


Mazatec, San
Jerónimo Tecóatl



New Testament in Mazatec, San Jerónimo Tecóatl Mazateco de S
Jeronimo Tecoatl; maa (MX:maa:Mazatec, San Jerónimo Tecóatl)

Mazatec, San Jerónimo Tecóatl
New Testament in Mazatec, San Jerónimo Tecóatl Mazateco de S Jeronimo Tecoatl;
maa (MX:maa:Mazatec, San Jerónimo Tecóatl)

copyright © 2012 Wycliffe Bible Translators, Inc.

Language: Mazatec, San Jerónimo Tecóatl

Translation by: Wycliffe Bible Translators, Inc.

Contributor: Bible League International

Mazateco, San Jerónimo Tecóatl [maa], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, San Jerónimo Tecóatl

© 2012 Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-05-10

PDF generated using Haiola and XeLaTeX on 10 May 2025 from source files dated 10 May 2025
9f778253-d34e-5037-af35-7bca16479aa0

Contents

San Mateo	1
San Marcos	62
San Lucas	100
San Juan	163
Hechos	210
Romanos	267
1 Corintios	292
2 Corintios	316
Gálatas	332
Efesios	341
Filipenses	350
Colosenses	356
1 Tesalonicenses	362
2 Tesalonicenses	367
1 Timoteo	370
2 Timoteo	377
Tito	382
Filemón	385
Hebreos	387
Santiago	405
1 Pedro	411
2 Pedro	418
1 Juan	422
2 Juan	429
3 Juan	430
Judas	432
Apocalipsis	434

'Én ndaà-la Nainá xi kjoa ts'e Cristo koni s'ín kiskù San Mateo

*Xita jchínga-la Jesucristo
(Lucas 3:23-38)*

¹ Jè xojòn xi oxkít'aà 'ín-la na'èn-jchá kjìin-la Jesucristo, xi ya inchrobàt'aà-ne tje-la David kò ts'e Abraham.

² Jè Abraham, jè komà na'èn-la xi Isaac ki'mì; kò jè Isaac, jè komà na'èn-la xi Jacob ki'mì; kò jè Jacob, jè komà na'èn-la xi Judá ki'mì, kò jñà xita 'ndse.

³ Judá, jè komà na'èn-la xi Fares kò Zara ki'mì. Kò jè nea-la, Tamar ki'mì. Jè Fares, jè komà na'èn-la xi Esrom ki'mì; kò jè Esrom, jè komà na'èn-la xi Aram ki'mì;

⁴ kò jè Aram, jè komà na'èn-la xi Aminadab ki'mì; kò jè Aminadab, jè komà na'èn-la xi Naasón ki'mì; kò jè Naasón, jè komà na'èn-la xi Salmón ki'mì;

⁵ kò jè Salmón, jè komà na'èn-la xi Booz ki'mì; kò jè nea-la Booz, Rahab ki'mì. Kò jè Booz, jè komà na'èn-la xi Obed ki'mì; kò jè nea-la Obed, Rut ki'mì. Kò jè Obed, jè komà na'èn-la xi Isaí ki'mì;

⁶ kò jè Isaí, jè komà na'èn-la xi David ki'mì xi xitaxá ítjòn tsibìjna; koa jè David, jè komà na'èn-la xi Salomón ki'mì; kò jè nea-la Salomón, jè xi komà chjoón-la Urías nga sa ítjòn.

⁷ Jè Salomón, jè komà na'èn-la xi Roboam ki'mì; kò jè Roboam, jè komà na'èn-la xi Abías ki'mì; kò jè Abías, jè komà na'èn-la xi Asa ki'mì;

⁸ kò jè Asa, jè komà na'èn-la xi Josafat ki'mì; kò jè Josafat, jè komà na'èn-la xi Joram ki'mì; kò jè Joram, jè komà na'èn-la xi Uzías ki'mì;

⁹ kò jè Uzías, jè komà na'èn-la xi Jotam ki'mì; kò jè Jotam, jè komà na'èn-la xi Acáz ki'mì; kò jè Acáz, jè komà na'èn-la xi Ezequías ki'mì;

¹⁰ kò jè Ezequías, jè komà na'èn-la xi Manasés ki'mì; kò jè Manasés, jè komà na'èn-la xi Amón ki'mì; kò jè Amón, jè komà na'èn-la xi Josías ki'mì;

¹¹ kò jè Josías, jè komà na'èn-la xi Jeconías ki'mì, kò jñà xita 'ndse, k'e nga kiiko kjo'in xita Israel ján i'nde ñánda 'mì Babilonia.

¹² Xi komà iskan k'e nga jye kiiko kjo'in xita ján Babilonia, jè Jeconías, jè komà na'èn-la xi Salatiel ki'mì; kò jè Salatiel, jè komà na'èn-la xi Zorobabel ki'mì;

¹³ jè Zorobabel, jè komà na'èn-la xi Abiud ki'mì; kò jè Abiud, jè komà na'èn-la xi Eliaquim ki'mì; kò jè Eliaquim, jè komà na'èn-la xi Azor ki'mì;

¹⁴ kò jè Azor, jè komà na'èn-la xi Sadoc ki'mì; kò jè Sadoc, jè komà na'èn-la xi Aquim ki'mì; kò jè Aquim, jè komà na'èn-la xi Eliud ki'mì;

¹⁵ kò jè Eliud, jè komà na'èn-la xi Eleazar ki'mì; kò jè Eleazar, jè komà na'èn-la xi Matán ki'mì; kò jè Matán, jè komà na'èn-la xi Jacob ki'mì;

¹⁶ kò jè Jacob, jè komà na'èn-la José. Kò José, jè xi x'in-la komà María; kò jè María, nea-lá komà Jesús xi Cristo, [xita xi xó kisikasén-ne Nainá].

¹⁷ Ngats'ìi xita jchínga-la Jesús, teñijòn skò ma-ne xi inchrobàt'aà-ne ts'e Abraham skanda David. Kò jñà xita jchínga-la Jesús xi inchrobàt'aà-ne ts'e David skanda k'e nga kiiko kjo'in jñà xita Israel ján i'nde ñánda 'mì Babilonia, tikoáá teñijòn skò ma-ne. Kò nguì teñijòn skò ma-ne skanda k'e kits'iin xi Cristo, [xita xi xó kisikasén-ne Nainá].

*Kii komà k'e nga kits'iin Jesucristo
(Lucas 2:1-7)*

¹⁸ K'e nga kits'iin Jesucristo kiís'ín komà: María xi nea-la Jesús kò José jñà títsajna'nño-la xíkjin nga kixan. K'e nga tikj'eè bitsajnakò xíkjin, María ki'ya-la nga ki'ndí 'ya xi it'aà ts'e nga'nño-la Inima Tsjeè-la Nainá.

¹⁹ José, xi x'in-la komà, nga xita kixi-né, majin-la nga kjosobà tsjá-la jè María, kisikitsjeèn nga tà sikkijna-ne chjoón jè, kò mì yá xita kji'nchré.

²⁰ K'e nga k'oas'ín tísikitsjeèn jñà kjoa koi, jngoò àkjale-la Nainá tsohókò inga nijñá. Kitsò-la:

—José, xi ya nchrobàt'aà-ne tje-la David, kì tsakjoòn-jèn nga bijnakoi María xi chjoón-lè koma, jè ki'ndí xi 'ya, nga'nño ts'e Inima Tsjeè-la Nainá-né.

²¹ S'ée jngoò-la ki'ndí x'in, kò 'ín-la Jesús k'oín. Koií k'oas'ín k'oín-ne nga jè kochrjetji naxandá-la xi kjoa ts'e jé-la.

²² Ngats'ì kjoa koi, k'oaá s'ín tsitasòn koni s'ín kitsò Nainá xi it'aà ts'e xita xi kiichja ngajo-la Nainá kjõtseé nga kitsò:

²³ Jngoò chjoón xongó, ki'ndí k'oa kò k'oeè jngoò ki'ndí x'in xi Emanuel k'oín 'ín-la.

Jè 'ín xi Emanuel tsò, Nainá tíjnako-ná tsòyaá-ne.

²⁴ K'e nga jaá-la José, k'oaá s'ín kis'iin koni s'ín kitsò-la àkjale-la Nainá, kiskoétjò María kò chixàn-kò.

²⁵ Tanga mìkì tsoyijòkò xíkjin skanda k'e-né nga kits'iin ki'ndítjòn-la María. Kò k'oaá s'ín tsibít'aà 'ín-la nga Jesús ki'mì.

2

Kiís'ín komà nga ijchò katsejèn-la Jesús jñà xita xi 'nño tjín-la kjoachjine

¹ Jesús kits'iin ya naxandá xi 'mì Belén, nangui xi chja-ne Judea, k'e nga xitaxá ítjòn tjína xi 'mì Herodes ya i'nde jè. Ijchò ján Jerusalén, xi naxandá sko-la Judea, xita xi 'nño tjín-la kjoachjine, xi inchrobà-ne ñánda bitjokàtji-ne ts'oi

² nga kjònangui. Kitsò:

—¿Ñánda tjína xitaxá ítjòn-la ts'e xita judío xi jye kits'iin? Ki'yaá jngoò-jen ni'ño ján ñánda bitjokàtji-ne ts'oi xi tsakó nga jye kits'iin. Kò ngajen koií xá kjoí-najen nga jchaxkón-jen.

³ K'e nga kii'nchré Herodes xi xitaxá ítjòn tjína, tà kitsakjòn-né kò ngats'ì xita naxandá Jerusalén.

⁴ Jè xitaxá ítjòn xi 'mì Herodes, kiichja-la ngats'ì xita sko-la nò'mì kò xita xi okóya kjotíxoma-la Nainá xi kiskii Moisés; kiskònangui-la ñánda jts'ín xi Cristo, [jè xita xi xó sikkasén-ne Nainá].

⁵ Jñà xita koi kitsò-la:

—Yaá Belén, naxandá xi chja-ne Judea. K'oaá s'ín tíchja xojon xi kiskii jñà xita xi kiichja ngajo-la Nainá nga kitsò:

⁶ Jñò xi xita Belén 'mì-nò, xi nangui Judá nokjoà-nò, ngàsòn chjí-la naxandá-nò koni jñà naxandá ítjòn-la nangui Judá, nga yaá kitjojiin jngoò xitaxá ítjòn xi sikkinda naxandá-na Israel.

⁷ Jè xitaxá ítjòn xi 'mì Herodes, kiichja'ma-la jñà xita xi 'nño tjín-la kjochjine nga kiskònangui-la mé nachrjein-ne nga kijtseè ni'ño.

⁸ K'ée kiskasén ján Belén; kitsò-la:

—Tanguió ján, koa ndaà chjinanguio xi it'aà ts'e ki'ndí jè. K'e nga sakò-nò, tikí'nchré-ná mé-ne tikoá kjián katsejèn-la nga skoexkoán koa jeya sikkijna.

⁹ K'e nga jye kii'nchré xita xi 'nño tjín-la kjoachjine koni s'ín kitsò Herodes, k'ée kii xita koi kò jè ni'ño xi kijtseè ñánda bitjokàtji-ne ts'oi k'oaá s'ín kii ítjòn-la skanda ijchò ñánda tjína ki'ndí jè, kò yaá tsasijna jè ni'ño.

¹⁰ Jñà xita xi 'nño tjín-la kjoachjine k'e nga kijtseè ni'ño jè, taxki tsjaá komà-la.

¹¹ K'e nga jahas'en ni'ya jñà xità koi, kijtseè ki'ndí kò nea-là María. K'eé chincha-xkó'nchit'aà-là jè ki'ndí kò kijtseèxkón; jeya kisikíjna. Ikjoàn kiskíx'a kaxa-là kò kitsjaà-là tòn oro, kò chrjongó-là Nainá kò xkii xi 'ñó ndaà jne xi 'mì mirra.

¹² Nga komà iskan kits'i-là nijñá xità xi 'ñó tjín-là kjoachjine nga mì tì k'oaá s'ín ndiyá kjoí-ne ñánda tíjna Herodes. Xin ndiyá kii-ne nangui-là.

K'e nga jñà xità jchínga-là Jesús kiiko ján nangui Egipto

¹³ K'e nga jye kii-ne jñà xità xi 'ñó tjín-là kjoachjine, jngoò àkjale-là Nainá kisijnijñá-là José, kitsò-là:

—Tisítjiin; chjoí jè ki'ndí kò nea-là; t'in ján nangui Egipto; yaá tijni skanda k'e 'an koxán-lè. Nga jè Herodes xi xitaxá ítjòn tíjna, kohótsji ki'ndí jè nga mejèn-là nga siik'en.

¹⁴ K'eé tsasítjen José, k'e nga nitjen kiskoé jè ki'ndí kò nea-là nga kii ján nangui Egipto.

¹⁵ Yaá tsibítsajna skanda k'e nga k'en Herodes. K'oaá s'ín tsitasòn koni s'ín kitsò Nainá xi it'aà ts'e xità xi kiichja ngajo-là Nainá nga kitsò: “Ya nangui Egipto kichjà-là ki'ndí-na.”

K'e nga kinik'en ndí ixti x'in

¹⁶ K'e nga kijtseè jè Herodes nga jñà xità xi 'ñó tjín-là kjoachjine kiskoònachan-là, tsí jti komà-là. Ikjoàn kitsjaà okixi nga siik'en yije ndí ixti x'in xi jò nó tjín-là kò ngats'i xi isa ki'ndí isa kóhokji ján naxandá Belén, kò ya naxandá indi-là koni s'ín jye kisijiin-là mé nachrjein-ne nga kijtseè ni'ño jñà xità xi 'ñó tjín-là kjoachjine.

¹⁷ K'oaá s'ín tsitasòn 'én xi kitsò Jeremías, xità xi kiichja ngajo-là Nainá, nga kitsò:

¹⁸ Ya i'nde Ramá kina'ya jngoò-là xità xi tísikájno kò 'ñó tíkjindáya kò títsiné; jè chjoón Raquel xi tíkjindáyakeè ndí ixti-là, nga mìkii majehikon inima-là nga jye k'en ixti-là.

¹⁹ K'e nga jye k'en Herodes, xi xitaxá ítjòn tíjna, jngoò àkjale-là Nainá kisijnijñá-là José ján Egipto. Kitsò-là:

²⁰ —Tisítjiin, chjoí ki'ndí jè kò nea-là. T'in jngoò k'a-ne nangui Israel. Jyeé k'en jñà xità xi tjín-ne nga mejèn-là siik'en ki'ndí jè.

²¹ K'eé tsasítjen José, kiiko-ne ki'ndí jè kò nea-là ya nangui Israel.

²² Tanga k'e nga kii'nchré José nga jè tíhotíxoma jè xi 'mì Arquelao ya nangui Judea, nga jè tíjna ngajo-là na'èn-là Herodes, José kitsakjòn-né; mì k'oaá s'ín kii. Ján kii i'nde ñánda 'mì Galilea nga k'oaá s'ín kis'enojmíya-là inga nijñá.

²³ K'e nga ijchò i'nde jè, yaá tsibítsajna ya naxandá xi 'mì Nazaret. K'oaá s'ín komà mé-ne nga tsitasòn koni s'ín kitsò jñà xità xi kiichja ngajo-là Nainá, nga jè Jesús xità Nazaret k'oín.

3

*'Én xi kiichja Juan xi kis'iin bautizar xità
(Marcos 1:1-8; Lucas 3:1-9, 15-17; Juan 1:19-28)*

¹ Jñà nachrjein koi j'ii Juan xi kis'iin bautizar xità ya i'nde it'aà xin ñánda nangui kixi choòn, nangui xi chja-ne Judea, nga kisika'bí 'én-là Nainá,

² kitsò:

—Tikájno jé-nò, kì tì jé binchaàtsji-nò nga jyeé kjòchrañàt'aà-nò nachrjein nga jchaa kó s'ín otíxoma jè xi ngajmii nchrobá-ne.

³ Jè Isaías, xità xi kiichja ngajo-là Nainá, k'oaá s'ín kiskii xojon-là xi it'aà ts'e Juan nga kitsò:

Na'yà-la jta-la jngoò xita xi 'ño chja
ya i'nde it'aà xìn ñánda nangui kixi choòn, nga tsò:

“Tjandaà ndiyá-la Nainá ya jjiin inima-nò;
kixi tikijna koni jngoò ndiyá ñánda kojmeèya Na'èn-ná.”

⁴ Nikje xi tsohòkjá Juan, tsja-la cho camello-né; ko jngoò sincho chrjoa tsibíkjá ndáyá-la. Koá jña tsojmi xi kiskine, cho langosta-né ko tsjén-la cho cera xi tjín jjiin ijña.

⁵ Ijchò 'nchré-la xita xi inchrobà-ne Jerusalén, ko nga kijndà nangui Judea ko ngats'iì naxandá xi ya chrañat'aà-la xajngá nandá Jordán.

⁶ K'e nga jye tsafatakòn jé-la jña xita, Juan, ikjoàn kis'iin bautizar ya xajngá nandá Jordán.

⁷ K'e nga kijtseè Juan nga kjin xita fariseo ko xita saduceo j'iì nga koma bautizar, kitsò-la:

—jñò, k'oaá s'ín ngaya-nò koni tsà tje-la ye! ¿Yá xi okitsò-nò nga kinchat'aàxìn-là jè kjo'in xi nchrobá machrañat'aà-nò?

⁸ Ndaà tjín kjoa xi t'een nga ndaà kàta'ya-nò nga jyeé kinikájno jé-nò nga mì tì jé binchaàtsji-nò.

⁹ Kì k'oaá s'ín nikítsjeèn jjiin inima-nò nga bixón: “Ngajen, [mikiì s'e-najen kjo'in nga] yaá inchrobàt'aà-najen tje-la Abraham.” K'oaá xan-nò, Nainá, skanda jña ndajo koma-la sijkatjija-la nga ixti-la Abraham koma.

¹⁰ Jè kichayá jyeé kjiinandaà nga kotesòn yá; ngats'iì yá xi 'mì ndaà toò ojà-la, skanda ko ima-la, jtísòn-né, ikjoàn sìnchájiin ni'ín nga kitì.

¹¹ Xi okixi, 'an koó nandá s'iin-nò bautizar, mé-ne nga sikájnoò jé-nò ko mì tì jé kinchátsji-nò. Tanga jè xi nchrobátjinguina s'iin-nò bautizar ko Inima Tsjeè-la Nainá koá ko ni'ín. Isaá tjín-la nga'ño mì k'oaá-ne 'an. Skanda mikiì tji'nde-na nga 'an kji'koaa xojté-la.

¹² Jyeé kjinaya tsja jè pala nga siitsjeè tjé-la trigo. Kincháxkó trigo ya iya ni'nga; ko jè tjé paja kinchájiin ni'ín ñánda nga mikiì bits'o nita mé nachrjein-ne.

K'oaá s'ín komà nga komà bautizar Jesús

(Marcos 1:9-11; Lucas 3:21-22)

¹³ Jesús j'iì-ne Galilea ya xajngá nandá Jordán nga mejèn-la nga jè Juan s'iin bautizar Jesús.

¹⁴ Tanga jè Juan k'e nga sa ítjòn mikiì kòkjeiín-la, kitsò-la Jesús:

—'Aán xi mochjeén-na nga jii s'een-ná bautizar, tanga ngaji, ta saá 'an f'iichòn-ná.

¹⁵ K'ee kitsò Jesús:

—Tji-lè kjondaà, t'een-ná bautizar mé-ne nga k'oas'ín sikitasoán kjotixoma-la Nainá.

K'ee kòkjeiín-la Juan.

¹⁶ K'e nga jye komà bautizar Jesús, k'e nga jye itjojiin-ne nandá, ikjoàn kitáx'a-la ngajmii, ko jè Jesús kijtseè Inima Tsjeè-la Nainá xi inchrobàjen-ne ngajmii, koni kji nise paloma kji; yaá kiskaàsòn-la Jesús.

¹⁷ K'ee kina'yà jngoò-la 'én xi ngajmii inchrobà-ne xi kitsò:

—Jè jèe xi ki'ndí-na xan-la xi 'ño matsjake; tsja tjín-la takoàn it'aà ts'e.

4

K'e nga jè xita neii kiskoòt'aà Jesús

(Marcos 1:12-13; Lucas 4:1-13)

¹ Jè Inima Tsjeè-la Nainá kiko Jesús jngoò i'nde it'aà xìn nga jè xita neii skót'aà nga mejèn-la nga kàtátsji jé.

² Ichán nāchrjein kō ichán nītjen tsibìjnachjan Jesús kō k'ē nga kōma iskan jye kjòhojò-là.

³ Jè xītā neí xi ma-là konāchan ijchò kasit'aà chrañà-là ñánda tíjna Jesús, kitsò-là:

—Tsà kixí kjoa nga ngaji xi Ki'ndí-là Nainá 'mì-lè, tji-là okixi jñà ndajo koi nga inchrajín kātama.

⁴ Tanga Jesús kitsò-là:

—Tjít'aà Xojoñ-là Nainá, nga tsò: “Mìtsà tà koi tsojmì xi ma chine kítsakon-ne xītā, tikoáá kítsakon-ne nga yije 'én xi chja Nainá.”

⁵ Jè xītā neí kiìkō Jesús ya Naxandá-là Nainá xi xó kitjaàjìin-ne [ñánda 'mì Jerusalén]; kisikíjnason ingo ítjòn ñánda ìsa 'nga kji.

⁶ Kitsò-là:

—Tsà kixí kjoa nga jì xi Ki'ndí-là Nainá 'mì-lè, tìkatjengui yijo-lè, nga k'oaá s'ín tjít'aà Xojoñ-là Nainá nga tsò:

Nainá koií xá-là àkjale-là it'aà tsiji, nga kō tsja tsoba'ño-lè,

mé-ne nga nijngoò ndajo satíngui-ne ndsokoiì.

⁷ Jesús kitsò-là:

—Tikoáá tjít'aà Xojoñ-là Nainá, nga tsò: “Kì k'oaá s'ín chít'iì Nà'èn-ná xi Nainá.”

⁸ Ìjngoò k'a jè xītā neí kiìkō Jesús isòn nindoò xi 'ño 'nga kji, koa tsakó yije-là ngats'iì naxandá xi tjín isò'nde kō kjoajeya-là jñà naxandá.

⁹ Kitsò-là:

—Nga jìi tsjaà yije-lè naxandá koi, tsà kosixkó'nchit'aà-ná kō jeya sikíjna-ná.

¹⁰ K'ée kitsò Jesús:

—Tixín xītā neí, tsit'aàxìn-ná. Nga k'oaá s'ín tjít'aà Xojoñ-là Nainá nga tsò: “Jeya tikíjni Nà'èn-ná xi Nainá 'mì-là; tà jè tajngoò tikitason-là.”

¹¹ K'ée kiì jè xītā neí, tsasit'aàxìn-là Jesús. Ìkjoàn ijchò àkjale-là Nainá xi kisìs'in-là Jesús.

Kii komà nga kiì síxájiin-là xītā Galilea Jesús

(Marcos 1:14-15; Lucas 4:14-15)

¹² K'ē nga kiì'nchré Jesús nga jè Juan xi kis'iìn bautizar xītā ndayá tíjna'ya, kiì ìjngoò k'a-ne ya ì'nde-là ñánda 'mì Galilea.

¹³ Tanga mì ya tsibìjna ñánda 'mì Nazaret; ján kiì kíjna ñánda 'mì Capernaum, jngoò naxandá xi kijnandiì ndáchikon ya ì'nde xi chja-ne Zabulón kō Neftalí.

¹⁴ K'oaá s'ín komà mé-ne nga tsitasòn-ne 'én xi kiskii Isaiás xītā xi kiichja ngajo-là Nainá nga kitsò:

¹⁵ Jè nangui xi ts'ē Zabulón kō jè nangui xi ts'ē Neftalí, ya ndiyá xi fi ìndiì ndáchikon,

ján xijngoà xajngá nandá Jordán ya nangui Galilea, ñánda tjín xi mìtsà xītā judío.

¹⁶ Jñà xītā naxandá koi xi tjíjñò kjohítsjeèn-là,

kijtseè jngoò ni'ín xi 'ño tse kji,

koa jñà xītā xi ya tjímaya ndiyá-là kjoabiyaà,

kjòhiseèn kjohítsjeèn-là.

¹⁷ K'ée tsibíts'ia Jesús nga kiichjaya 'én ndaà-là Nainá. Kitsò:

—Tikájno jé-nò, kì tì jè binchaàtsji-nò nga jyeé kjòchrañàt'aà-nò nāchrjein nga jchaa kós'ín otíxoma jè xi ngajmii nchrobá-ne.

Kii kis'iìn Jesús nga ñijòn xītā kiichja-là xi ma-là sík'en tìn

(Marcos 1:16-20; Lucas 5:1-11)

¹⁸ K'e nga tífa Jesús ya indii ndáchikon ts'e Galilea, kijtseè jò xita xi 'ndse ma, jngoò xi 'mì Simón kò tije-ne xi 'mì Pedro, kò xi jngoò, jè xi 'mì Andrés. Jña xita koi xi sík'en tin. K'e nga nchisíkatjen-jijn-nda na'ya-la,

¹⁹ Jesús kitsò-la:

—Nchrohótjngui-ná, 'aán tsjaà-nò xá nga kíxkóya xita xi 'an kjit'aà-na koni s'in maxkóya tin.

²⁰ Jña xita koi nitoón kisikájna na'ya-la nga kiitjngui-la Jesús.

²¹ Isa xijngoaà isa Jesús kijtseè ngui jò xita xi tikoá 'ndse ma-ne; jngoò xi 'mì Jacobo, kò xi jngoò, Juan 'mì; ixti-la Zebedeo. Yaá títsaya chitso kò na'èn-la. Nchibíndaàya jña na'ya-la. Jesús kiichja-la nga jña kojmeiko.

²² Xita koi nitoón kisikájna chitso-la kò na'èn-la nga kiitjngui-la Jesús.

Kii kis'in Jesús nga kjin xita tsakóya-la

(Lucas 6:17-19)

²³ Jesús tsajmeè kóhokji nangui Galilea, tsakóya 'én-la Nainá ya ni'ya ingo sinagoga nga íngó íngó naxandá. Kiichjaya 'én ndaà-la Nainá koni s'in otixoma Nainá; tikoá kisindaà-ne ngats'ii ch'in xi tjin-la xita nga xki xi ján ijòjno ijòt'aà yijo-la.

²⁴ Kina'ya-la Jesús kóhokji ya i'nde ñanda 'mì Siria, koá j'iko-la xita xk'én xi kjin skaya ch'in tjin-la, jña xi ijòjno ijòt'aà yijo-la kò xita xi ch'in nejí tjin inima-la, kò tjin xi ch'in biyaàxín tjin-la, kò xita xi mì kì ndaà ma síhiníyá yijo-la. Jesús kisindaà-ne ngats'ii xita koi.

²⁵ Kjin xita xi ya i'nde-la Galilea kiitjngui-la, kò jña xita naxandá xi te ma-ne (xi 'mì Decápolis), kò jña xita naxandá Jerusalén kò naxandá xi i'nga xi ya chja-ne nangui Judea, kò xi chja-ne xijngoaà xajngá nandá Jordán.

5

Kii kitsò Jesús nga kiichjaya ya isò'nga nindoò

¹ Jesús, k'e nga kijtseè ngats'ii xita xi kjin ma-ne, kùmjijn-jno ya isò'nga nindoò koá yaá tsibijna. Jña xita xi kota'yàt'aà-la ijchò kinchat'aà-la.

² Jesús k'eé tsakóya-la kitsò-la:

Kjondaà xi sakó-la jña xita k'e nga mé kjoá títsajin

(Lucas 6:20-23)

³ —Mé tà ndaà-la jña xita xi machiya-la nga mochjeén-la kjondaà-la Nainá; xita koi, jyeé ts'e ngats'ii kjondaà xi tjin ya ñanda tíhotixoma jè xi ngajmii nchrobá-ne.

⁴ 'Mé tà ndaà-la jña xita xi kjindáya; Nainá sijnjetakòn-né.

⁵ 'Mé tà ndaà-la jña xita xi indaàjijn tjin inima-la; jña tjoé-la nangui xi Nainá jye k'oas'in kitsò nga jña tsjá kjotjò-la.

⁶ 'Mé tà ndaà-la jña xita xi 'nó mejèn-la nga kitasòn xi kjoá kixi xi Nainá síjé; Nainá kosiko nga kitasòn kjoá koi.

⁷ 'Mé tà ndaà-la jña xita xi mahimakeè xita xi kj'eji; Nainá kohimakeè ngajo-ne jña xita koi.

⁸ 'Mé tà ndaà-la jña xita xi tsjeè tjin inima-la; jña xita koi, jña-né xi skoexkon Nainá.

⁹ 'Mé tà ndaà-la jña xita xi síkijna'nchán kjoá; Nainá ki'ndí-laá kitso-la.

¹⁰ 'Mé tà ndaà-la jña xita xi kjo'in tjin-la nga fitjngui kondra-la xita, koi kjoá-la nga ndaà síkitasòn xi kjoákixi. Xita koi, jyeé ts'e ngats'ii kjondaà xi tjin ya ñanda tíhotixoma jè xi ngajmii nchrobá-ne.

¹¹ 'Mé tà ndaà-nò k'e nga jña xita ch'o kitso-nò nga kotít'aà-nò kò k'e nga ch'o siko-nò, kò k'e nga 'én ndiso tsját'in-nò xi kjoá ts'an.

12 Tsja t'è-là inìma-nò, koa tsja t'è-là takòn. Jñò, tsee kjondaà tjoé-nò ján ngajmì. Mìtsà tà jñò xi otínìko-nò. K'oaá tìs'ín kinìko jñà xìta xi kiichja ngajo-la Nainá xi chinchima ítjòn-nò.

Kiis'ín kochjeén naxa ko ni'ín xi tjín isò'nde

(Marcos 9:50; Lucas 14:34-35)

13 Jñò, k'oaá s'ín ngaya-nò koni tsà naxa xi mochjeén-la xìta isò'nde. Tanga tsà jè naxa mì tì kiì sijnchra-ne tsojmì, ¿kó tìs'ín kochjeén-ne? Mì tì mé chjí-la; xixteèn-ne ko yaá kìnchanè xìta.

14 Jñò, k'oaá s'ín ngaya-nò koni tsà ni'ín xi mochjeén-la xìta isò'nde. Tsà jngoò naxandá xi isò'nga nindoò kijna, mìkiì koma kíjna'ma.

15 K'e nga jngoò ni'ín sit'a'í, mìtsà ya sijnangui kaxa. Yaá sijna ñánda 'nga choòn, mé-ne nga kohiseèn yije-la xìta xi títsajnaya ni'ya.

16 Koni ni'ín xi síhiseèn-la xìta, k'oaá s'ín ndaà tijchá yijo-nò nguixkon xìta xi kj'eíí, mé-ne jñà xìta koi, jeya sijkíjna Na'èn-nò xi Nainá xi tjina ngajmì k'e nga skoe-nò nga ndaà tìtsa'nè.

Kiis'ín tsakóya Jesús it'aà ts'e kjotíxoma-la Nainá xi kiskii Moisés

17 Jñò, k'oaá s'ín nìkítseèn: mìtsà koi xá j'i-na 'an nga kochrjekànguia jè kjotíxoma-la Nainá xi kiskii Moisés ko jè xi tsakóya xìta xi kiichja ngajo-la Nainá. Tà saá j'i sijnogoò-ná 'én xi tjít'aà kjotíxoma.

18 Okixíí xi xan-nò, koni tjín nachrjein kíjna-isa isò'nde ko ngajmì, nímé xi tjáxìn-la jè kjotíxoma, nijngoò punto ko nijngoò letra tjáxìn-la, skanda kóni nga kojngoò yije kjoa xi tjít'aà kjotíxoma.

19 Jè xìta xi mìkiì síkitasòn koni s'ín tíchja kjotíxoma, nas'ín 'ñó chiba tíchja, ko k'oaá s'ín okóya-la xìta, k'oaá tìs'ín 'ñó chiba jcha-la ya jjiìn naxandá xi jè otíxoma-la xi ngajmì nchrobá-ne. Ko jè xìta xi síkitasòn kjotíxoma-la Nainá ko k'oas'ín okóya-la xìta xi kj'eíí, jè xìta jè, jè xi 'ñó 'nga kíjna ya jjiìn naxandá xi jè otíxoma-la xi ngajmì nchrobá-ne.

20 Okixíí xi xan-nò, tsà mìkiì isa ndaà síkitasòn kjoakixi koni jñà xìta fariseo ko xìta xi okóya kjotíxoma-la Nainá xi kiskii Moisés, mìkiì kitjás'en-jñò ñánda tíhotíxoma jè xi ngajmì nchrobá-ne.

Kiis'ín tjín it'aà ts'e kjoajti

(Lucas 12:57-59)

21 Jñò jye kina'yà koni s'ín ki'mì-la jñà xìta jchínga-nò: “Kì xìta nìk'eèn; nìta yá-ne xi xìta sikk'en, kjo'in s'e-la.”

22 Tanga 'an k'oaá xan-nò, tsà jngoò xìta xi kojtikeyè 'ndse, s'eé-la kjo'in. Jè xi ch'o kítso-la 'ndse, xitaxá tsjá-la kjo'in. Ko jè xi 'ndse kítso-la: “Ngaji nímé chjí-lè”, ok'ín-la nga ján kjoí jjiìn ni'ín ts'e i'nde kjo'in.

23 Tsà k'e nga kíkoí tsojmì kjotjò-lè nga Nainá k'oi-la ya i'nde tsjeè-la, koa ya koìtsjeèn-lè nga jè 'ndsì tjín-la kondra tsiji,

24 tikítsajnei tsojmì kjotjò-lè ya i'nde tsjeè, ikjoàn tikítsi'ba-la 'ndsì koa k'eé koma síkítsajnei tsojmì-lè.

25 Tsà tjín xìta xi kohòngui-lè nga kjiko-lè ni'ya osen, k'e nga tjaàya ndiyá, nitoón jchibàndaà-nò, mé-ne nga mì ya kjiko-lè nguixkon xitaxá, ko jè xitaxá mì ya tsjá-la kindá jñà policia nga mì ndayá kjiko-lè.

26 Okixíí xi xan-lè, mì tì kiì koma kitjoo-ne ndayá skanda k'e nga kichjítjì yijo-lè nga yije xi sijné-lè xitaxá.

Kiis'ín tjín ts'e kjoa chijngui

27 Jñò, jye kina'yà koni s'ín ki'mì-nò kjòtseé: “Kì kjoa chijngui 'nè.”

28 Tanga 'an k'oaá xan-nò, nìta yá-ne xi kotsejèn-jno jngoò chjoón nga fahajjìn-la, jye kjoa chijngui tís'ín koni títsò inìma-la.

29 'Tsà jǎà xkoòn kixi ótsji jé-nò, tìnachrjeè; kjiìn tìkatsjoò. Ìsáá ndaà-ne tsà chija jngoò xkoòn mì k'oaá-ne tsà ya kixojììn yije yijo-nò ya ijììn ni'ín ya i'nde kjo'in.

30 Tsà jǎà ndseji kixi ótsji jé-nò, tìchátjòn; kjiìn tìkatsjoò. Ìsáá ndaà-ne tsà chija jngoò ndseji mì k'oaá-ne tsà ján kjoì yijo-nò ijììn ni'ín ya i'nde kjo'in.

Kiis'ín tǐn kjotíxoma it'aà ts'e xita xi tsjeiìn xíkjin
(Mateo 19:9; Marcos 10:11-12; Lucas 16:18)

31 'K'oaá tís'ín kis'enojmi kjòtseé, nita ya xita-ne xi mejèn-la tsjin chjoón-la, ítjòn tǎmì'nga xojon xi tsjeiìn-ne xíkjin xita.

32 Tanga 'an k'oaá xan-nò: tsà jngoò xita x'in xi tsjin chjoón-la, tsà mìtsà kjoa chijngui tís'ín jè chjoón, jè x'in-la tìbít'in-la nga kjoa chijngui kàtas'ín chjoón. Jè chjoón, k'e nga kixan ijngoò k'a-ne, jè x'in xi kixan-ko, tìkoaá jye kjoa chijngui tís'ín.

Kiis'ín tǐn it'aà ts'e 'én xi nokjoá nga Nainá tibeè

33 'Tìkoaá jye kina'ya koni s'ín ki'mì-la jǎà xita jchínga-ná: “K'e nga bixón: tibeè Nainá, kì chonachan-jèn, tìkitasòn 'én-nò.”

34 Tanga 'an k'oaá xan-nò: K'e nga 'bioò 'én-nò, jngoò k'aá kì yá xi nìkíjna ítjòn. Kì k'oas'ín bixón: “Tibeè ngajmì.” Nga jè ngajmì, jè íxile kjotíxoma-la Nainá.

35 'Tìkoaá kì bixón-jèn: “Tibeè isò'nde”, nga jè nangui, yaá nchasòn ndsoko Nainá. Tìkoaá kì bixón-jèn: “Tibeè naxandá Jerusalén”, nga jè naxandá jè, ts'eé Xitaxá ítjòn xi Nainá.

36 'Tìkoaá kì skoò nìkíjna ítjòn k'e nga mé 'én xi 'bioò. Nga mìkì koma-nò nga sijmà o sìchroba jngoò tsja skoò.

37 Tà k'oaá s'ín tìnókjoaa “jon”, o xi “majìn”. Jǎà 'én xi kjisòn, yaá nchrobá-ne it'aà ts'e xita neji.

Kiis'ín tìkoo jǎà xita xi ch'o síko-nò
(Lucas 6:29-30)

38 'Jye kina'ya koni s'ín ki'mì-nò kjòtseé: “Tsà yá xi kochrje jngoò xkoììn, tìnachrjeè ngajo-ne ts'e. Kò tsà yá xi skoetoòn-lè nga skónájen jngoò ni'ñoi, chjínájen ngajo-ne ts'e.”

39 Tanga 'an, k'oaá xan-nò: Tìkjeiìn-la xita ts'en. Tsà jngoò xita xi sùjts'iìn-t'aà kjioòn kixi, tìkoaá tjii-là xi ngobà nga kàt'eé-la.

40 Tsà jngoò xita kohòngui-nò nga mejèn-la skoé nachro-nò, tìkoa tjii-là nachrokisòn-nò nga kàtakjoé.

41 Tsà jngoò xita xi kjò'ño s'ín-nò nga sùkajen jngoò hora-nò ch'á-la nga onguíkò-la, jò hora isà kjiiìn tanguíkò-la.

42 Tsà yá xita xi síjé-nò tsojmì, tjii-là; kò tsà jngoò xita xi mejèn-la skiñat'aà-nò tsojmì, kì 'mì-là: mìkì koma.

Kó s'ín síkoo jǎà xita xi majtikeè-nò
(Lucas 6:27-28, 32-36)

43 'Tìkoaá jye kina'ya koni ki'mì-nò kjòtseé: “Tìtsjacha xita xinguiò ko tìjticha kondra-nò.”

44 Tanga 'an k'oaá xan-nò: Tìtsjacha jǎà xi kondra-nò, tìchikon-t'ioòn jǎà xi chja'on-ko-nò, ndaà tìkoo jǎà xi jtikeè-nò, tìtsi'batjiò jǎà xi ch'o tsò-nò kò jǎà xi ch'o síko-nò.

45 Tsà k'oas'ín s'eén, ki'ndí-la Nainá xi tǐjna ngajmì koma; Nainá síhiseèn-la ndobá-la ts'oi xita xi ndaà kò xi mì kì ndaà; tìkoaá Nainá sík'a-la jtsí jǎà xita kixi kò xi mìtsà xita kixi.

⁴⁶ Jñò, tsà tà jñà matsjacha x̄ita xi matsjakeè-nò, n̄i mé kjondaà xi s'è-nò; nga k'oaá t̄is'ín jñà x̄ita xi síkíh̄j̄t̄j̄ tsojm̄i ts'è Roma.

⁴⁷ Tsà tà jñà x̄ita x̄inguīo xi 'ndsè chiba s̄ixat'aà, ¿a k'oaá ma-nò nga 'ñó ndaà titsa'nè?; nga t̄ikoáá jñà x̄ita xi mìk̄i beèxkon Nainá, k'oaá t̄is'ín.

⁴⁸ Jñò, nguì kjoakix̄ií t'een, koni jè Na'èn-ná xi t̄jna ngajm̄i nga nguì kjoakix̄ií s'ín.

6

Kiís'ín t'een k'e nga k'oi-là kjondaà x̄ita

¹ 'K'e nga ndaà t̄jn̄ kjoa xi 'nè, t̄ikindāko-nò yijo-nò; k̄i tà k'èé k'oa 'nè k'e nga nguixkon x̄ita, tsà tà jè xi mejèn-nò nga skoe-nò x̄ita xi kj'eíí. Tsà k'oas'ín s'een, Na'èn-ná xi t̄jna ngajm̄i mìk̄i s̄ichikon-t'in-nò.

² K'e nga jngoò kjondaà k'oij-là x̄ita ima, k̄i k̄i bènojmi-là ngats'ii x̄ita xi kj'eíí, koni s'ín x̄ita xi jò isén t̄jn̄-la ya ni'ya ingo sinagoga ko ya ndiyá nga tsjá kjotjò-la tsojm̄i x̄ita; tà jé xi mejèn-la nga skoe yije x̄ita. Tanga okix̄ií xi xan-nò, jñà x̄ita xi k'oas'ín s'ín, jyeé t̄jn̄-la chj̄i-la [nga nguixkon x̄ita. Mì t̄i mé s̄ichikon-t'in-ne Nainá.]

³ K'e nga tsà tsojm̄i k'oi kjotjò-la x̄ita ima, mochjeén-né nga mì yá x̄ita xi skoe; n̄i jè skoe xi 'ñó amigo chibá.

⁴ Tj̄a'ma-là jè kjondaà-nò; k'e nga jè Na'èn-ná skoe jè xi kjoa'ma, jè tsjá-nò chj̄i-nò.

Kiís'ín t'een k'e nga bìtsi'ba-lá Nainá (Lucas 11:2-4)

⁵ 'K'e nga bìtsi'ba, k̄i k'oaá 'nè koni s'ín x̄ita xi jò isén t̄jn̄-la. Jñà x̄ita koi, k'e nga bìtsi'ba-lá Nainá, tsjakeè-né nga bincha kix̄i ya ni'ya ingo sinagoga ko ya chr̄jangui-la nditsin ñánda kjin x̄ita kotsejèn-la nga Nainá bìtsi'ba-lá. Xi okix̄i k'oaá xan-nò, jñà x̄ita koi, jyeé t̄jn̄-la chj̄i-la [nga nguixkon x̄ita. Mì t̄i mé s̄ichikon-t'in-ne Nainá.]

⁶ Tanga k'e nga mejèn-lè nga k̄itsi'ba-lá Na'èn-ná, t̄jtjás'ii ni'ya-lè, tichjoi xotjoa-la ni'ya-lè, ikjoàn t̄jé-la kjondaà-la Na'èn-ná xi ya tajngoò t̄jna'mako-lè. Jè Na'èn-ná tsjá-lè chj̄i-lè nga jè t̄ibeè xi kjoa'ma.

⁷ 'K'e nga bìtsi'ba, k̄i tax̄ki kjin 'én nokjoà, koni s'ín x̄ita xi mìk̄i beèxkon Nainá. K'oaá s'ín sík̄itsjeèn nga kjin 'én k̄ichja-la Nainá, isaá ndaà kjin'chré-la.

⁸ K̄i k'oaá 'nè koni s'ín jñà x̄ita koi; jè Na'èn-ná jye t̄jiin-la mé xi mochjeén-nò k'e nga t̄ikj'eè n̄jét'aà-là.

⁹ K'e nga bìtsi'ba, kiís'ín t̄inókjoa:
Na'èn-najen xi t̄jni ngajm̄i,
k̄atayaxkón-la kjoajeya-lè nga tsjeè t̄jni.

¹⁰ K̄atjanchrobá kjotixoma-lè,
k'oas'ín k̄atama i it'aà nangui koni s'ín mejèn-lè nga koma,
koni s'ín ma ján ngajm̄i.

¹¹ T̄jiin-najen i ndei jè ñño xi mochjeén-najen nga nachrjein inchiòn.

¹² T̄jichàat'aà-najen jé-najen koni s'ín n̄jchàat'aà-lajen jñà x̄ita xi ch'o síko-najen.

¹³ K̄i k̄i bìl'ndi yá xi mejèn-la nga kot'aà-najen nga k̄inchátsji jé-jen.

T̄ikinda-najen xi it'aà ts'è x̄ita neíí.

Nga tsjiií kjotixoma, tsjiií nga ñó ko tsjiií kjoajeya n̄ita kjé-ne. K'oas'ín k̄atama.

¹⁴ Tsà jñò s̄jchàat'aà-là jé-la x̄ita xi kj'eíí, t̄ikoáá jè Na'èn-ná xi t̄jna ngajm̄i s̄jchàat'aà-nò jé-nò.

¹⁵ Tanga tsà jñò mìk̄i s̄jchàat'aà-là jé-la x̄ita, t̄ikoáá Na'èn-ná mìk̄i s̄jchàat'aà-nò jé-nò.

Kiis'in t'een k'e nga bitsajnachjan

16 'K'e nga bitsajnachjan, kì k'oaá 'nè koni s'in jñà xita xi jò isén tjín-la nga síkjatjya isén-la, mé-ne nga skoe-ne xita nga ba tjín-la nga títsajnachjan. Xi okixi, k'oaá xan-nò, jñà xita koi, jyeé kitjoé-la chjí-la [nga nguixkon xita. Mì tì mé sìichikon-t'in-ne Nainá.]

17 Tanga jñò, k'e nga bitsajnachjan, kì k'oaá 'nè. Ta saá tanìjnoò isén-nò ko tasi'a tsjaskoò,

18 mé-ne nga mìkì skoe-nò xita tsà títsajnachjan, ko jè Na'èn-ná xi tíjna'mako-nò, ta jè xi tíbeè. Jè sìichikon-t'in-nò.

Kjoa nchiná xi tjín ján ngajmì

(Lucas 12:33-34)

19 'Jñò, kì tsojmì kìn binchatjò i isò'nde; bits'on-né ko makixo-né ko jñà xita síchijé.

20 Ta saá ján ngajmì tinchatjò tsojmì. Ján ngajmì mìkì bits'on ko mìkì makixo tsojmì; tíkoaá tsjìn xita chijé.

21 Ya ñánda kìnchatjò tsojmì-nò, tíkoaá yaá sìikítsjeèn inima-nò.

Kós'in mochjeén xkoaán

(Lucas 11:34-36)

22 'Jñà xkoaán, jè ma ni'in xi síhiseèn-la yijo-ná. Koií kjoa-la k'e nga ndaà tsejèn-ná, iseèn choòn yije-la yijo-ná;

23 tanga tsà mìkì ndaà tsejèn-la xkoìn, tíkoaá kóhokji yijo-lè, tà jñò choòn-la. Nga tjíjñò-la kjoátsjeèn-lè tíkoaá nguì tà jñò choòn-la yijo-lè.

Yá xi koma nei-la xita xi 'ñó matsjakeè ton

(Lucas 16:13)

24 'Nijngoò xita xi jò koma nei-la nga sìixá-la. Tsà jò koma nei-la, jngoò kojtikeye koa jngoò kotsjakeè; jngoò ndaà kjit'aà-la koa ch'o sìiko xi ijngoò. Jñò, tsà kjoa nchiná sìis'in-là, mìkì kos'in-la kjoa ts'e Nainá.

Kós'in síkinda Nainá jñà xi ixti-la ma

(Lucas 12:22-31)

25 'K'oaá xan-nò, kì makájno-nò mé tsojmì xi chjinee, xi s'ioo, nga sijchá yijo-nò, ko mé nikje xi chikjá. ¿A mì 'ya-jèn k'e nga títsajnakoaán i isò'nde tjín-isa kjoa xi isa 'ñó chjí-la mì k'oa-ne koni tsojmì xi ma chine? Tíkoaá yijo-ná, tjín-isa kjoa xi isa 'ñó chjí-la mì k'oa-ne koni jè nikje xi chikjá.

26 Chítsejèn-là nise xi tjíma ijìin isén; mì jnoó 'beé; mì nijin majchá-la koa mì ni'nga tjín-la ñánda bincháxkó nijin-la; tanga jè Na'èn-ná xi tíjna ngajmì tsjá-la tsojmì xi kine; koa jñò, isaá chjí-nò mì k'oa-ne jñà nise.

27 Jñò, nas'in takó 'ñó síkájnoò, ni itsé koma síkatonè-là nachrjein-nò koni s'in tjíndaà-la Nainá.

28 '¿Mé-ne níkájno-nò xi it'aà ts'e nikje xi chikjá? Chítsejèn-là naxó lirio xi majchá ijìin ijñá; mìkì síxá ko mìkì ma-la faña nikje.

29 Tanga 'an, k'oaá xan-nò, ndaà tsà jè Salomón xi xitaxá ítjòn tsibìjna nga 'ñó xita jeya, mì k'oaá kjoàn nikje xi tsohòkjá koni kjoàn jñà naxó nga ndaà kjoàn.

30 Nainá, k'oaá s'in ndaà kjoàn s'in xka ijñá, xi jngoò nachrjein títsajnakon ko xi ma nchijòn kotsjòojìin ni'in. Jñò xi xita 'mì-nò xi mìkì ndaà mokjeiín-nò, ¿a mìtsà isa nìton tsjá-nò Nainá nikje xi mochjeén-nò nga chikjá?

31 Kì makájno-nò, kì bixón-jèn: “¿Mé xi chjineé?, ko ¿mé xi s'ioaá? ko ¿mé nikje xi chikjá?”

³² Nga yije tsojmì koi, k'oaá tjin xi ótsji jñà xitá xi mìkì mokjeiín-la ìt'aà ts'e Nainá. Tanga jñò tíjnaá-nò Na'èn xi tíjna ngajmì xi jyeé tíjìn-la nga mochjeén-nò ngats'ì tsojmì koi.

³³ Ítjòn tìnchátsjioò kjoa ts'e Nainá koni s'ín otíxoma ko kjoakixi-la; ngats'ì tsojmì xi mochjeén-nò tà tjoésòn-nò.

³⁴ Kì makájno-nò mé kjoa xi s'e nchijòn-lè; nga nchijòn-lè, s'ée-nò kjoa xi kokájno-nò; tà koi kjoa tikájno xi tjin nachrjein ì'ndeì.

7

Mì kù koma jñá sikhindaá jé-la xitá xinguiá

(Lucas 6:37-38, 41-42)

¹ 'Kì kjo'in 'biì-la xitá xinguióo kjoa ts'e jé-la mé-ne nga mì kjo'in tjoé-nò kjoa ts'e jé-nò.

² Koni s'ín k'oi-la kjo'in xitá xi k'eií, k'oaá tis'ín tjoé ngajo-nò kjo'in. Jè chiba xi sichibaya-la xinguióo, tíjè kochiba ngajo-nò.

³ [¿Mé-ne jé-la xinguii nikhinda-ne koa tsiji mìkì nikhindi?] ¿Mé-ne chitsejèn-la jè tjé xi kjinangui xkon xinguii, ko jè yá chiso xi kjinangui xkoiin mìkì chitsejèn-la?

⁴ Tsà yá chiso kjinangui xkoiin, ¿a koma k'oin-la xitá xinguii: “Tjì'nde-ná nga kochrjekànguia tjé xi kjinangui xkoiin”?

⁵ Ngaji xi jò ma isén-lè, ítjòn tìnachrjekàngui chiso xi kjinangui xkoiin mé-ne nga ndaà kotsejèn-lè, ikjoàn tìnachrjekàngui tjé xi kjinangui xkon xinguii.

⁶ 'Tsojmì tsjeè xi ts'e Nainá, kì nañá 'biì-la mé-ne nga mì ya sikháfat'aà-lè ko ya skine-lè. Koa jè ndátòn chjí xi nikhíin, kì chinga nikatjen-la mé-ne nga mì ndsoko kìnchanè-ne.

Kó s'ín sijé-lá Nainá k'è nga mé xi mejèn-ná

(Lucas 11:9-13; 6:31)

⁷ 'Tijé mé xi mejèn-nò, jè Nainá tsjá-nò; tìnchátsjioò Nainá, sakó-nò; tìnókjoat'aà-la Nainá mé xi mejèn-nò mé-ne skix'a'nde-nò koni jngoò xotjoa.

⁸ Ngats'ì xitá xi síjé, tjoé-la, jè xi ótsji, sakó-la ko jè xi chjat'aà-la Nainá, táx'a'nde-la koni jngoò xotjoa.

⁹ 'Jñò xi xitá jhínga 'mì-nò, tsà inchrájin sikhé-nò ìxti-nò, ¿a ndajoó k'oi-la? Majìn.

¹⁰ Koa tsà tìn sikhé-nò, ¿a yeé k'oi-la? Majìn.

¹¹ 'Jñò nas'ín xitá xi ch'o 'nè, ma-nò 'biì-la ìxti-nò tsojmì xi ndaà kjoàn. Jè Na'èn-nò xi tíjna ngajmì, isaá nìtòn siks'in-nò nga tsjá-nò tsojmì xi ndaà kjoàn tsà jñò sikhé'aà-la.

¹² 'Nita mé kjondaà xi mejèn-nò nga sikhó-nò xitá, k'oaá tis'ín tiko ngajo-nò. K'oaá s'ín tíchja kjotíxoma-la Nainá xi kikhí Moisés ko xojon-la xitá xi kichja ngajo-la Nainá.

Kó kji xotjoa xi kitjás'én

(Lucas 13:24)

¹³ 'Titjás'ioòn jè xotjoa xi 'nchrèya kji. Jè xotjoa ko jè ndiyá xi 'ño tiyà, ndiyá-la kjo'in-né. Kjin xitá xi ya fahas'en.

¹⁴ Ko jè xotjoa ko ndiyá xi 'nchrèya choòn, ndiyá-la kjoabinachon-né, ko chiba xitá matsji-la.

Kó s'ín jchaxkoaán xitá ìt'aà ts'e xá xi s'ín.

(Lucas 6:43-44)

¹⁵ 'Ndaà t̄ikindaa yijo-nò it'aà ts'e x̄ita ndiso xi tsò nga 'én-la Nainá síka'bí. K'e nga f'ìikon-nò j̄nà x̄ita koi, ima kjoaá s'ín koni orrè tanga inima-la, tsején ts'eén 'ya.

¹⁶ J̄nò jchaxkoòn x̄ita koi it'aà ts'e xá xi s'ín. K'oaá ngaya-la koni jngoò yá xi ndaà toò ojà-la. Jè toò uva, mìtsà jè majchá-la yá na'yá. T̄ikoaá jè toò iko, mìtsà jè majchá-la yá na'yá.

¹⁷ Ngats'ìi yá xi ndaà kjoàn, ndaà toò ojà-la. Tanga jè yá xi mìkiì ndaà kjoàn, mìkiì ndaà toò xi ojà-la.

¹⁸ Jngoò yá xi ndaà kji, mìtsà ch'o kjoàn toò xi ojà-la. Koá jè yá xi ch'o kji, mìkiì ojà-la toò xi ndaà kjoàn.

¹⁹ Nga yije yá xi mìkiì ojà-la toò xi ndaà, satèsòn-la ikjoàn s̄inchájiìn ni'ín nga kiti.

²⁰ K'oaá s'ín jchaxkoòn x̄ita koi it'aà ts'e xá xi s'ín.

*Yá x̄ita xi kjoahas'en-jìin ñánda nga Nainá tíhotíxoma
(Lucas 13:25-27)*

²¹ 'Mìtsà tà ngats'ìi x̄ita xi tsò-na: “Na'èn, Na'èn”, kjoas'en-jìin jè kjotíxoma-la ngajmiì. Tà j̄nà x̄ita xi kjoas'en-jìin xi síkitasòn koni s'ín mejèn-la Na'èn-na xi tíjna ngajmiì.

²² K'e nga kijchò nachrjein, kjìn x̄ita k̄itso-na: “Na'èn, Na'èn, ngajen kinokjoàya-nájen 'én-lè xi it'aà tsiji. Nga koó 'ín-lè kinachrjekàjiìn-nájen inima ch'o-la neíi xi mìkiì ndaà; t̄ikoaá kjìn kjoaxkón ki'nè-jen xi ndaà tjín.”

²³ K'eé k'oaá xán-la: “Mìkiì bexkon-nò. T̄inchat'aàxìn-ná j̄nò xi ch'o ki'nè.”

*Mé xi ngaya-la j̄nà x̄ita xi síkitasòn 'én-la Jesús ko xi mìkiì síkitasòn.
(Lucas 6:47-49; Marcos 1:22)*

²⁴ Jè xi 'nchré koá síkitasòn 'én-na koni xan-la, k'oaá s'ín ngaya-la koni jngoò x̄ita xi tjín-la kjohitsjeèn; yaá bíndaàsòn ni'ya-la ñánda naxi choòn.

²⁵ 'Ba jtsí; 'ba tjoaxkón; f'ìi xajngá nandá xi fahanè ni'ya; nì mé xi ma-la nga ndaà tjíndaà jè ni'ya, yaá kijnasòn ñánda naxi choòn.

²⁶ Tanga n̄ita yá-ne xi 'nchré 'én-na ko mìkiì síkitasòn, k'oaá ngaya-la koni jngoò x̄ita xi tsjìn-la kjohitsjeèn; yaá bíndaàsòn ni'ya ñánda jncha tsomì.

²⁷ 'Ba jtsí; 'ba tjoaxkón; f'ìi xajngá nandá yaá bixòña ni'ya jè; mì tà k'oaá kji kjoa xi ma k'e nga bixòña.

²⁸ K'e nga jye kiichja Jesús, ngats'ìi x̄ita xi títsajna, tà k'oaá komà-la koni tsò 'én xi tsakóya.

²⁹ K'oaá s'ín tsakóya koni jngoò x̄ita xi 'ñó tjín-la kjotíxoma, mìtsà k'oaas'ín tsakóya koni x̄ita xi okóya kjotíxoma-la Nainá xi kiskìi Moisés.

8

*Kii komà nga kjòndaà jngoò-ne x̄ita xi t̄ibindojno chrjoa yijo-la
(Marcos 1:40-45; Lucas 5:12-16)*

¹ K'e nga itjojen-ne Jesús ya isò'nga nindoò, kjìn x̄ita j'ìitj̄ngui-la.

² Jngoò x̄ita xi t̄ibindojno chrjoa yijo-la ijchòkon koá tsasìxkó'nchit'aà-la, kitsò-la:

—Na'èn, tsà mejèn-lè, t̄itsjeè-ná ch'in xi tjín-na.

³ Jesús, k'eé tsijmeé tsja nga tsohót'aà-la yijo-la x̄ita jè, kitsò-la:

—Mejèn-na, kàtandaà-ne yijo-lè.

K'e nga okitsò Jesús, n̄itoón kjòndaà-ne.

⁴ K'eé kitsò-la Jesús:

—Tíná'yi, kì yá x̄it̄a xi bènoj̄mí-l̄a. T'in ñánda t̄jna n̄o'miì, takó-l̄a yijo-lè nga jyeé kj̄ondaà-ne; koa jch'iì kj̄otj̄ò-lè, tsojmì xi síjé kj̄otixoma-l̄a Nainá xi kiskiī Moisés, mé-ne nga k̄ateè-ne j̄ñà x̄it̄a nga jyeé kj̄ondaà-ne ch'in-lè.

*Kií komà nga kj̄ondaà-ne ch̄i'nda-l̄a xi x̄it̄a sko-l̄a soldado
(Lucas 7:1-10)*

⁵ K'e nga jahas'en Jesús ya naxandá Capernaum, jngoò x̄it̄a sko-l̄a soldado ts'e Roma ijchòkon, kisijé-l̄a kj̄ondaà.

⁶ Kitsò-l̄a:

—Na'èn, x̄it̄a ch̄i'nda-na kijna-né ján ni'ya-na. Tsí 'ñó xk'én koa tifa kjo'in nga mìkiī ma síhiníyá yijo-l̄a.

⁷ Jesús kitsò-l̄a:

—Koma kj̄isindaà-na.

⁸ Jè x̄it̄a sko-l̄a soldado kitsò:

—Na'èn, mìkiī ok'in-na nga ngaji k'oín sobi ni'ya-na, ta saá tjiì okixi nga k̄atandaà-ne, koa k̄ondaà-ne ch̄i'nda-na.

⁹ 'An, t̄jiin-na nga t̄jín-lè kj̄otixoma. T̄ikoáá 'an, t̄jín-na x̄it̄a ítjòn xi otixoma-na, t̄ikoáá t̄jín-na soldado xi 'an otixoma-l̄a, k'e nga xan jngoò-l̄a: “T'in”, fi-né; xan-l̄a xi ijngoò: “Nchroboí”, nchrobá-né; koa k'e nga xan-l̄a jè xi ch̄i'nda-na: “K'oa t'j̄in”, síkitasòn-na.

¹⁰ K'e nga kii'nchré Jesús j̄ñà 'én koi, tà kj̄òxkón-l̄a. Kitsò-l̄a j̄ñà x̄it̄a xi t̄jingui-l̄a:

—Okixī xi xan-nò, ya Israel ni saá jngoò x̄it̄a sakó-na xi k'oas'in ndaà mokjeiín-l̄a koni jè x̄it̄a jè.

¹¹ K'oaá xan-nò, kj̄in x̄it̄a kjoí-ne nga ñijòn chr̄jangui-l̄a isò'nde xi k̄okjen-ko Abraham ko Isaac ko Jacob ya ngajmiī ñánda tíhotixoma Nainá.

¹² Tanga j̄ñá x̄it̄a xi t̄jín-ne nga ya k̄itsajna ñánda k̄otixoma Nainá, k̄itjokàj̄iin-né; ján kjoì nditsin ñánda j̄ñò choòn, ko yaá sk̄indàya koa s̄ījts'iin ni'ño.

¹³ K'ée kitsò-l̄a Jesús jè x̄it̄a sko-l̄a soldado:

—T'in-ne ni'ya-lè; koni s'in nga ndaà mokjeiín-lè, k'oaá s'in koma.

Jè ch̄i'nda-l̄a t̄ik'ée kj̄ondaà-ne.

*Kií kis'iin Jesús nga kisindaà-ne nachíya-l̄a Pedro
(Marcos 1:29-31; Lucas 4:38-39)*

¹⁴ Jesús kii ni'ya-l̄a Pedro koa k̄ijtseè nachíya-l̄a nga kijna xk'én; ch'in t̄jnga t̄jín-l̄a.

¹⁵ Jesús tsohót'aà-l̄a tsja jè chj̄oón, n̄itoón kj̄ondaà-ne ch'in t̄jnga-l̄a, tsas̄tjen-ne jè chj̄oón, ik̄joàn kisis'in-l̄a Jesús.

*Kií kis'iin Jesús k'e nga kj̄in x̄it̄a xk'én j'ùko-l̄a
(Marcos 1:32-34; Lucas 4:40-41)*

¹⁶ K'e nga jye k̄oj̄nò, kj̄in x̄it̄a xk'én j'ùko-l̄a Jesús xi in̄ima ch'o-l̄a neií t̄jín-l̄a. Jesús tà jngoò okixī kitsjaà nga tsatixoma-l̄a mé-ne nga itjokàj̄iin-ne in̄ima-l̄a j̄ñà x̄it̄a ngats'ī in̄ima ch'o-l̄a neií, koa kj̄ondaà yije-ne x̄it̄a xk'én.

¹⁷ Kjoa koi koni s'in komà, koií tsitasòn koni kitsò Isaías x̄it̄a xi kiichja ngajo-l̄a Nainá k'e nga kitsò: “Jè jaàxìn ch'in-ná ko jè kisikjeiín kjo'in nga kj̄ondaà-ne ñánda kitsi'on yijo-ná.”

*Mé xi síjé Jesús it'aà ts'e x̄it̄a xi mejèn-l̄a fit̄jingui-l̄a
(Lucas 9:57-62)*

¹⁸ K'e nga k̄ijtseè Jesús nga kj̄in ma-ne x̄it̄a xi kitseèndī-l̄a, kitsjaà-l̄a okixī x̄it̄a xi kota'yàt'aà-l̄a nga kii ján xijngoàà ndáchikon.

¹⁹ K'eé j'ii jngoò xitá xi okóya kjotíxoma-la Nainá xi kiskiù Moisés, ijchòkon Jesús, kitsò-la:

—Maestro, kjítjìngui-lè nitá ñánda nga k'óin.

²⁰ Jesús kitsò-la:

—Jñà ninda tjin-la nguijo ñánda oyijò, koa jñà nise tjin-la tje, tanga 'an xi Ki'ndí-la Xitá xan-la yijo-na, tsjin-na i'nde ñánda síkjáya.

²¹ Jjngoò xitá xi kota'yát'aà-la kitsò-la:

—Na'èn, tji'nde-ná nga ítjòn kjián kihijñaà na'èn-na.

²² Jesús kitsò-la:

—Ji, nchrobátjìngui-ná, jñà mik'en kàtìhijìn mik'en-la.

*Kii kis'ii Jesús nga kisikínajyò tjojkón ya jjiin ndáchikon
(Marcos 4:35-41; Lucas 8:22-25)*

²³ Jahas'en Jesús jè chitso; kjihijtakò jñà xitá xi kota'yát'aà-la.

²⁴ Tà nitòón tsatsejèn jngoò tjojkón kò jtsí ya jjiin ndáchikon, kò jè ndáchikon taxki komà-né, mejèn bíjtsa'ma jè chitso. Tanga jè Jesús kjinafé-né.

²⁵ Jñà xitá xi kota'yát'aà-la k'eé kiikon nga kisikjaá-la Jesús, kitsò-la:

—Na'èn, tikinda-nájen. Jye titsabixònguindá.

²⁶ Kiichja Jesús kitsò:

—¿Mé-ne tsakjoòn-nò? Ñó chiba mokjeiín-nò xi it'aà ts'an.

K'eé tsasítjen Jesús, tsohótikò tjojkón kò ndáchikon koa nitòón kisijyò-ne tjo koa kjòndaàya-ne.

²⁷ Koa jñà xitá xi kota'yát'aà-la tà kjòxkón-la, kitsò:

—Yá xitá-ne jè skanda jè tjo kò ndáchikon síkitasòn-la.

*Kii kis'ii Jesús nga tsachrjekàjiiin inima ch'o-la neii xi tjin-la xitá Gadara
(Marcos 5:1-20; Lucas 8:26-39)*

²⁸ K'e nga ijchò Jesús ján xijngoà ndáchikon ya nangui Gadara, jò xitá ijchò kinchat'aà-la xi ya itjo-ne ya ñánda sihijìn mik'en. Inima ch'o-la neii tjin-la. Ñó jchán ts'en, kjaán-kò-ne tsà yá xi ya kjoahaya ndiyá.

²⁹ Ñó kiichja nga kitsò:

—¿Mé xi mejèn-lè kò ngajen, ji xi Ki'ndí-la Nainá 'mì-lè? ¿A koií xá kòf'i-ne nga jchatoòn-nájen k'e nga tikj'eè bijchó nachrjein-la kjo'in?

³⁰ Ya chrañat'aà-la kjin jchán chinga nchikjèn-jno,

³¹ koa jñà inima ch'o-la neii tsibítsi'ba-la Jesús, kitsò-la:

—Tsà kinachrjekàjiiin-nájen, tji'nde-nájen nga kitjás'en-jiiin-jen yijo-la chinga koi.

³² Jesús kitsò-la:

—Ndaà tjin, tanguió.

Ikjoàn itjojiin yijo-la jñà xitá koi, k'eé jahas'en-jiiin yijo-la jñà chinga, koa ngats'ii chinga tsatíkájjen-jno ya naxi skanda jjiin ndáchikon kò yaá k'en.

³³ Jñà xitá xi ko'ndà chinga tsanga; k'e nga ijchò jjiin naxandá, tsibénojmi yije kjoa xi komà kò kjoa xi komát'in jñà xitá xi inima ch'o-la neii tjiin inima-la.

³⁴ K'eé ijchò ngats'ii xitá naxandá ñánda tíjna Jesús; k'e nga kijtseèxkon tsibítsi'ba-la nga xìn nangui kàtjì.

9

*Kii kis'ii Jesús nga kisindaà jngoò-ne xitá xi mì kì ma síhiníyá yijo-la
(Marcos 2:1-12; Lucas 5:17-26)*

¹ K'e nga jahas'en Jesús jè chitso, jahatot'aà xijngoà ndáchikon koa ijchò-ne naxandá-la.

² Ya ijchòkò jngoò-la xita xi mìkii ma síhiníyá yijo-la; kjinason-la nachan-yá. K'e nga kijtsee Jesús nga jña xita koi mokjeiin-la it'aà ts'e, kitsò-la jè xita xk'én: —Ji ndí na'èn, tji-la nga'ño yijo-lè; jé-lè jye kichàat'aà-lè.

³ Jña xita xi okóya kjotixoma-la Nainá xi kiskii Moisés, tjin i'nga xi kitsò kjohítsjeèn-la: “Xita jè, Nainá chjajno-la.”

⁴ Jesús nitoón kijtseeya-la koni s'in nchisíkítsjeèn, kitsò-la:

—¿Mé-ne kotsò-ne kjohítsjeèn-la inima-nò nga ch'o tsò-ne?

⁵ ¿Mé xi isa chiba 'in tjin, tsà xán-la jè xita xi xk'én: “Jé-lè jye kichàat'aà-lè”, kò tsà xán-la: “Tisítjin koa titjeí?”

⁶ Kokoò-nò nga 'an xi Ki'ndí-la Xita xan-la yijo-na, tji'nde-na nga sijchàat'aà-la jé-la xita i isò'nde.

K'eé kitsò-la jè xita xk'én:

—Tisítjin, chjoí nachan-lè, t'in-ne ni'ya-lè.

⁷ K'eé tsasítjen jè xita xk'én, kii-ne ni'ya-la.

⁸ K'e nga kijtsee jña xita nga tsasítjen-ne jè xita xk'én, tà k'oaá koma-la; k'eé jeya kisikijna Nainá nga k'oas'in tse nga'ño tsjá-la xita isò'nde.

Mé kjoa xi komà k'e nga jè Jesús kiichja-la Mateo

(Marcos 2:13-17; Lucas 5:27-32)

⁹ Jesús kii-ne j'nde jè. K'e nga tífi, kijtsee jngoò xita xi 'mì Mateo xi tíjnat'aà ímixa ya ñánda síkíchjítjì tsojmì, tòn xi fi Roma; kitsò-la:

—Nchrobátjingui-ná.

K'eé tsasítjen Mateo, kiitjingui-la Jesús.

¹⁰ K'e nga tíjnat'aà ímixa Jesús nga tíkjèn ya ni'ya-la Mateo, kjìn xita j'ii xi tíkoa tsojmì síkíchjítjì kò xita xi jé tjin-la. Tíkoa tsibítsajnat'aà ímixa, tsakjèn-kò Jesús kò jña xita xi kota'yàt'aà-la.

¹¹ Tanga jña xita fariseo, k'e nga kijtsee xita koi, kiskònangui-la xita xi kota'yàt'aà-la Jesús, kitsò-la:

—¿Mé-ne k'oas'in-ne maestro-nò nga xita xi síkíchjítjì tsojmì kò xita jé kjèn-kò-ne?

¹² Kii'nchré Jesús, k'eé kitsò-la:

—Jña xita xi mì ch'in tjin-la, mì chjinexkii mochjeén-la, jña-né xita xi xk'én xi mochjeén-la chjinexkii.

¹³ Tanguió chíta'ya isa kó tsòya-ne Xojon-la Nainá xi tsò: “An mejèn-na nga kátas'e-nò kjohimatakòn; kì ta tsjaà cho'nik'eèn kjotjò xi 'an 'biì-ná.” Mìtsà koi xá j'i-na 'an nga j'ikjaajñaà xita kixi, jña-né xita xi tjin-la jé nga kátasíkájno jé-la nga mì tì jé kòhótsji-ne.

Kó kitsò Jesús k'e nga kitjònangui-la mé-ne mì bitsajnachjan-ne xita-la

(Marcos 2:18-22; Lucas 5:33-39)

¹⁴ Jè Juan xi kis'iin bautizar xita, jña xita xi kota'yàt'aà-la j'iikon Jesús ñánda tíjna koa kiskònangui-la, kitsò:

—Ngajen kò xita fariseo kjit'aà nachrjein bitsajnachjan-jen. ¿Mé-ne jña xita tsiji mìkii bitsajnachjan-ne?

¹⁵ Jesús kitsò-la:

—¿A baá bitsajna xita k'e nga s'eí tjin k'e nga títsajna osen xi kòbixan? Tanga kijchò nachrjein k'e nga tjáxin-la x'in xi kòbixan, k'e-né nga kítsajnachjan xita.

¹⁶ Jngoò nikje ibaa mìkii ma sijto-ne kò nikje xitse; nga jè nikje xitse, kjeèn-yó-né koa kotejnda-né jè nikje ibaa. Isa tse koma ñánda kixajnda kji.

¹⁷ Tíkoaá mìkii ma sìnchá xán ixii jè chrjoa jchínga, jè xán ixii kotijnda-né jè chrjoa jchínga koa xíxteèn jè xán. Tíkoaá chíja jè chrjoa. Jè xán ixii, chrjoa xitseé sìnchá. K'oaá s'in ndaà sìnchá ingajò.

*Tsòti-la Jairo kò chjoón xi kitsobà nikje-la Jesús
(Marcos 5:21-43; Lucas 8:40-56)*

¹⁸ Tik'eé-ne nga tíchja Jesús, ijchò jngoò xita sko-la jña xita judío, tsasìxkó'nchit'aà-la, kitsò-la:

—Ndí tsòti-na, sa kò jye k'en; tanga tsà jì k'óin kò tsà kjòt'aà-la ndseji, kíjnakon ìjngoò k'a-ne.

¹⁹ Tsasítjen Jesús, kiìkò jè xita sko-la kò jña xita xi kota'yàt'aà-la.

²⁰ K'e nga nchifi, jngoò chjoón ijchòtjingui-la; chjoón jè, jyeé kò tejò nó xk'én nga tíxíteen-la jní. Kù kasit'aà chraña-la Jesús ya ijton íts'in nga kitsobà'ño ìtjòn nikje-la.

²¹ K'oaá s'ín tíhóko inima-la: “Tsà tà jè sikoaa nikje-la, kondaá-na.”

²² Jè Jesús kisikáfaya, kijtsee chjoón jè, kitsò-la:

—Ndí nea, tjiì-la nga'ño yijo-lè. Kòmandaà-ne koií-né nga mokjeiín-lè ìt'aà ts'an.

Tijè-ne hora kjòndaà-ne chjoón jè.

²³ K'e nga ijchò Jesús ya ni'ya-la jè xita sko-la xita judío, kijtsee música xi nchisíkjane nga jye kihijiin mik'en koa kijtsee nga fijen fikjá xita nga 'ño nchikjindáya.

²⁴ Kitsò-la:

—Títjoo ni'ya; jè tsòti mìtsà kòbiyaà, tà kjinafé-né.

Jña xita, tà tsijnòkeè-né k'e nga okitsò Jesús.

²⁵ Tanga Jesús tsachrje ni'ya ngats'ìi xita xi títsajna; k'eé jahas'en ni'ya, kiskoé tsja jè tsòti, koa jè tsòti tsasítjen.

²⁶ Nga kijndà ì'nde jè, tsabísòn 'én ìt'aà ts'e kjoa xi koma.

Kó s'ín komàt'in xita xi jò ma-ne xi mìkiì tsejèn-la

²⁷ K'e nga itjo-ne Jesús ì'nde jè, jò xita xi mìkiì tsejèn-la kiìtjingui-la; 'ño kiìchja, kitsò-la:

—jchahimatakòn-nájen, ngaji xi ya nchrobàt'aà-ne tje-la xitaxá ítjòn David [nga jì tijna ngajo-la]!

²⁸ K'e nga jahas'en ni'ya Jesús, jña xita xi mìkiì tsejèn-la ijchòkon. Jesús, kiskònangui-la, kitsò-la:

—¿A mokjeiín-nò nga koma-na sindaà-nò?

K'eé kitsò jña xita xi mìkiì tsejèn-la:

—Jon, Na'én. Komaá-lè.

²⁹ Jesús k'eé kisìkò jña xkon, kitsò-la:

—Jñò, koni s'ín mokjeiín-nò, k'oas'ín kàtandaà-nò.

³⁰ Jña xita xi mìkiì tsejèn-la, kitáx'a-ne xkon koa kjòndaà-ne. Jesús 'ño tsibínè-la nga kitsò-la:

—Ndaà t'een kindà nga mì yá xita xi skoe kjoa koi.

³¹ Tanga jña xita koi, k'e nga itjo-ne ni'ya, tik'eé tsibíts'ia nga tsibénjímí nga kijndà ì'nde jè, kós'ín kis'iin Jesús.

Kó s'ín komà nga kjòndaà-ne jngoò xita xi mìkiì ma chja

³² K'e nga jye nchifi-ne jña xita xi mìkiì tsejèn-la, j'ìikò jngoò-la Jesús xita xi mìkiì ma chja nga inima ch'o-la neíí tíjiin inima-la.

³³ Jesús k'e nga jye tsachrjekàjiin inima ch'o-la neíí xi tíjiin inima-la jè xita xi mìkiì ma chja, tik'eé komà kiìchja-ne. Ngats'ìi xita xi ya títsajna tà kjòxkón-la. Kitsò:

—Kj'eé kiì 'yaá kjoa xi k'oas'ín ma ì ì'nde Israel.

³⁴ Tanga jña xita fariseo kitsò:

—Jè sobà xita sko-la xita neíí tsjá-la nga'ño nga ma-la ochrjekàjiin inima ch'o-la neíí xi tjín-la xita.

Kó kitsò Jesús k'e nga kjòhimakeè xita xi kjìn ma-ne

³⁵ Jesús tsajmeèjìn ñánda naxandá ìi kò naxandá jtobá nga tsakóya 'én-la Nainá ya ni'ya ingo sinagoga ts'e naxandá koi. Kùichjaya 'én ndaà-la Nainá koni s'ín otíxoma Nainá; tìkoá kisindaà-ne ngats'ìi ch'in xi tjin-la xita nga xkì xi ján ijòjno ijòt'aà yijo-la.

³⁶ K'e nga kijtsee Jesús nga kjìn ma xita, kjòhimakeè nga 'ñó makájno-la kò mì yá xi osikò nga jye títsjohoya k'oaá ngayala-la koni orrè xi tsjìn-la paxtò xi ko'ndà.

³⁷ K'ée kitsò-la xita xi kota'yàt'aà-la:

—Xi okixi, 'ñó tse xá tjin xi it'aà ts'e 'Én-la Nainá koni s'ín ma k'e nga kjìn tsojmì majchá tanga jña xita ch'i'nda xi síxá, chiba ma-ne;

³⁸ tìtsi'ba-là jè Nei-la xá, kàtasikasén-ìsa xita ch'i'nda xi kojìxkó tsojmì koi.

10

Kó 'mì 'ín-la xita-la Jesús xi tejò ma-ne

(Marcos 3:13-19; Lucas 6:12-16)

¹ Nga koma iskan Jesús kùichja-la xita-la xi tejò ma-ne xi kota'yàt'aà-la, kitsjaà-la kjotíxoma nga koma kochrjekàjìn inima ch'o-la neíi xi tjin-la xita koá koma-la sìindaà-nè nita mé ch'in-ne nga ijòjno ijòt'aà yijo-la xita.

² Jña 'ín-la xita xi tejò jaàjìn Jesús nga tsibíxáya-la: jè tíjna ítjòn, Simón xi tìkoá Pedro ki'mì, kò Andrés xi 'ndse ma Pedro; Jacobo kò 'ndse Juan xi ixti-la Zebedeo;

³ Felipe, Bartolomé, Tomás, kò Mateo jè xi kisikíchjítjì tsojmì ts'e Roma; Jacobo, ti-la Alfeo; Lebeo xi tìkoá Tadeo ki'mì;

⁴ Simón, xita xi ya fit'aà-la xita cananista; kò Judas Iscariote jè xi kisìngatsja kondra-la Jesús.

Kós'ín tsatíxoma-la Jesús xita-la xi tejò ma-ne xi kisikasén nga kisika'bí 'én-la Nainá

(Marcos 6:7-13; Lucas 9:1-6)

⁵ Jesús kisikasén nga tejò xita xi kota'yàt'aà-la nga kisika'bí 'én-la Nainá koá kitsjaà-la kjotíxoma, kitsò-la:

—Mikìi onguió ya i'nde-la jña xi mìtsà xita judío; tìkoá mikìi bitjaàs'en-jñoò ya naxandá-la xita Samaria.

⁶ Yaá tanguíchòn jña xita naxandá Israel koni orrè xi kichijà.

⁷ K'e nga onguió tìnókjoaya koá tixón: “Jye kjòchrañàt'aà-nò nachrjein nga jchaa kó s'ín otíxoma jè xi ngajmii nchrobá-ne.”

⁸ Tindaà-nò xita xi xk'én; tìtsjèè xi tìbindojno chrjoa yijo-la; tìkjaáya-là xi jye k'en; nachrjekajñoò inima ch'o-la neíi xi tíjìn inima-la xita. Tà kjotjò kitjoé-nò nga'ño koi, tìkoáá tà kjotjò tjiì ngajo-là jña xita.

⁹ Nímé tòn ch'aà.

¹⁰ Kì na'ya ch'aà xi it'aà ts'e ndiyá. Mikìi tsà jò nachro ch'aà. Tìkoáá mikìi xoxté tsjayaà. Tìkoáá kì yá garrote ch'aà. Nga jè xita xi síxá, mochjeén-né nga k'oj-la tsojmì xi skine.

¹¹ K'e nga kijchoò naxandá ìi, o xi naxandá jtobá tìnchátstjioò jngoò ni'ya xi ndaà xita nei-la, yaá titsajnakoo skanda k'e nga onguí-nò.

¹² K'e nga kitjás'een ni'ya, tìixat'aà jña xita nei-la ni'ya.

¹³ Tsà jña xita nei-la ni'ya skoétjò-nò, tìchikon-t'ioòn nga s'e-la kjoa'nchán, tanga tsà mikìi skoétjò-nò, tà saá jño s'e-nò kjoa'nchán nga sìchikon-t'in-nò Nainá.

¹⁴ Tsà mikìi skoétjò-nò, kò tsà majìn-la kji'nchré 'én-nò, tìtjoo ni'ya jè, o naxandá jè, koá titsajneè chijo-la ndsokoò.

¹⁵ Okixíí xi xan-nò, naxandá jè, isaá tse kjo'in s'e-la jè nachrjein k'e nga sindaàjìin-la xita, mì k'oaá-ne koni jñà xita ts'e naxandá Sodoma ko Gomorra.

Kjo'in xi tjín k'e nga 'én-la Nainá bènojmiá

¹⁶ 'Tiná'ya, 'an, k'oaá s'ín sikasén-nò koni tsà orrè ya jjiin-la cho tsején. Jñò, titsajnaandaà nita mé kjoa-ne koni tsà ye xi 'ñó maña tikoá indaàkjoa kàtama koni tsà nise paloma.

¹⁷ Ndaà tikindaa yijo-nò. Jñà xita koi, ján skìnìt'aà-nò nguixkon xitaxá koa skaàn-koo-nò ya ni'ya ingo sinagoga.

¹⁸ Skanda ján kjiko-nò nguixkon xitaxá gobernador ko xitaxá ítjòn, tà koií kjoa-la it'aà ts'an. K'oaá s'ín koma kinókjoa-là 'én xi ts'an jñà xitaxá ko jñà xi mìtsà xita judío.

¹⁹ K'e nga skìnìt'aà-nò ñánda títsajna xitaxá, kì makájno-nò kós'ín kinókjoaa, o kós'ín kixón. Nga tik'eé-ne, Nainá tsjá-nò 'én xi kinókjoaa.

²⁰ Nga mìtsà jñò xi kinókjoaa; jè Inima Tsjeè-la Nainá tsjá-nò kjohítsjeèn nga ma kinókjoajìin-là jñà xita.

²¹ 'Tijè-ne 'ndse sìngatsja 'ndse xita nga sikk'en. Jè na'èn-la sìngatsja ki'ndí-la nga sikk'en xita. Jñà ixti-la sìngatsja na'èn-la nga kiyá.

²² Ngats'ìi xita isò'nde kojikeè-nò xi kjoa ts'an; tanga jè xita xi kixi kájna skanda kjoehet'aà-ne, jè-né xi kitjokàjìin kjo'in.

²³ K'e nga kjitjingui kondra-nò xita xi jngoò naxandá, tiyó, xìn naxandá tanguió. Okixíí xi xan-nò, 'an xi Ki'ndí-la Xita xan-la yijo-na, isaá ítjòn kjoiaa nga tikj'eè onguió yije kóhokji naxandá Israel.

²⁴ Jngoò xita xi kota'yà mìtsà isaájna ítjòn koni maestro-la; tikoá jngoò xita xi ch'inda tjina mìtsà isaájna ítjòn-la nei-la.

²⁵ Jè xita xi kota'yà kojngoó ikon tsà k'oas'ín kijchò koni jè maestro-la ko jè xi ch'inda tjina tsà tà k'oas'ín kájna koni jè nei-la. Jè xi na'èn tjina, xita neíi tsò-la; jñà xi ixti-la, isaá tsato ch'o kitso-la.

Yá xita xi kiskón-lá

(Lucas 12:2-9)

²⁶ Kì xita tsakjoòn-là. Nga nì mé tjín xi títsa'ma xi mìkì kotsejèn; ngats'ìi xi tjí'ma, jchaá-la.

²⁷ Jè kjoa xi k'oa xan-nò k'e nga jñò choòn, k'oaá tixón k'e nga nachrjein; koa jè xi kjoa'ma xan-nò, jñò tinókjoaya kóhokji isò'nga ni'ya.

²⁸ Kì tsakjoòn-là jè xi ma-la sík'en yijo-ná, tanga inima-ná mìkì koma-la sikk'en. Jè xi tikón-là xi ma-la sík'en yijo-ná ko inima-ná nga kinjìin-ná ni'ín ts'e kjo'in.

²⁹ 'Maá satijna jò ndí nise nas'ín tà jngoò ma ton-ná. Tanga nijngoò nise kiyá tsà mìkì tsjá'nde Nainá.

³⁰ Jñò, skanda tsjaskoò tíxkeya yije-la Nainá.

³¹ Koií kjoa-la, kì tsakjoòn-jèn. Isaá tse chjí-nò mì k'oaá-ne nas'ín kjin ma ndí nise.

Jñà xita xi tsò nga 'an fit'aà-na

(Lucas 12:8-9)

³² 'Nita yá-ne xi tsjá 'én nga nguixkon xita nga 'an fit'aà-na, 'an k'oaá tì xán nga nguixkon Na'èn-na xi tjina ngajmìi nga xita ts'an-ná.

³³ Tanga jè xi kójna'mat'in-na nga nguixkon xita, 'an k'oaá tìs'ín kójna'mat'ian it'aà ts'e nga nguixkon Na'èn-na xi tjina ngajmìi.

Kii koma nga kojòya xita xi kjoa ts'e Cristo

(Lucas 12:51-53; 14:26-27)

³⁴ 'Kì k'oaá s'ín níkítsjeèn nga kjoa'nchán j'ìlkoaa isò'nde. Mì kjoa'nchán j'ìlkoaa, ta saá kjoajchán j'ìlkoaa.

³⁵ Koií xá j'i-na nga jñà xita, tije-ne na'èn-la koma-ne kondra-la; jè tsòti-la, tije koma-ne kondra-la nea-la; kò jè kja'nda-la, tije nachiya-la koma-ne kondra-la.

³⁶ Nga jngoò ijngoò xita, tijñà-ne xita ni'ya-la koma kondra-la.

³⁷ 'Jè xi isa tjòkèè na'èn-la kò nea-la kò 'an mìkì matsjakeè-na, mìkì ok'in-la nga xita-na xán-la; kò jè xi isa tjòkèè ti-la, o jè tsòti-la, kò 'an mìkì matsjakeè-na, mìkì ok'in-la nga xita-na xán-la.

³⁸ Jè xi kjo'in tsakjón-la nga majìn-la ojen krò-la nga 'an kjinchrobà tjingui-na mìkì ok'in-la nga xita ts'an xán-la.

³⁹ Jè xita xi ndaà ótsji kós'ín ma sìikinda yijo-la nga mì mé kjo'in sakò-la, tà saá sìichija-né kò kjo'in kijnajìn; tanga jè xi tíjndaà nga tsjá yijo-la nga kiyá xi kjoa ts'an, sakò-la kjoabinachon nga it'aà ts'an ndaà kijná.

Kjondaà xi tjín-la xita xi skoétjò xíkjin
(Marcos 9:41)

⁴⁰ 'Jè xita xi skoétjò-nò, 'an kjoétjò-na; kò jè xi skoétjò-na, jè kjoétjò xi kisikasén-na.

⁴¹ Jè xita xi kjoétjò jngoò xita xi chja ngajo-la Nainá, koií kjoa-la nga 'én-la Nainá chja, k'oaá tís'ín kochikon-t'in koni jè xita xi chja ngajo-la Nainá. Kò jè xita xi skoétjò jngoò xita kixi, koií kjoa-la nga ndaà s'ín, tikoaa tà ngásòn kochikon-t'in koni jè xita kixi.

⁴² Nita yá-ne xi tsjá jngoò chitsín-la nandá 'nchán jngoò ndí xita ima-na koií kjoa-la nga 'an kota'yát'aà-na, okixi-né kochikon-t'in-né.

11

¹ K'e nga jye kitsjaà-la okixi kós'ín sìixá xita-la xi tejò ma-ne xi kota'yát'aà-la Jesús, kiikakóya kò kisika'bí 'én-la Nainá ngats'iì naxandá xi tjín ya i'nde jè.

Jesús, kii kitsò-la xita xi ijchò kjònangui-la it'aà ts'e Juan
(Lucas 7:18-35)

² Juan, nga ndayá tjína'ya, kii'nchré kjoa xi tís'ín Cristo [xita xi xó kisikasén-ne Nainá]. Kisikasén i'nga xita xi kota'yát'aà-la

³ nga kii kjònangui-la. Kitsò-la:

—¿A ji-né xi Cristo xi tjínè-lè nga kjoii a xi kjeij chíña-lajen?

⁴ Jesús kitsò-la:

—Tanguió, tènøjmí-là Juan jñà kjoa xi titsa'yaà kò xi titsana'ya.

⁵ Jñà xita xi mìkì tsejèn-la, jyeé tsejèn-la; jñà xi tsá'yá kjoàn, jyeé ma fi-ne; jñà xi tíbindojno chrjoa yijo-la, tímatsjeèjno-ne yijo-la; jñà xita xi jtayaà, jyeé 'nchré-ne; kò xita xi jye k'en, nchifaáyaá-la; koa jñà xita ima, jyeé tís'enojmi-la 'én ndaà-la Nainá.

⁶ Mé tà ndaà-la jè xita xi ngui jngoò k'a ndaà mokjeiín-la it'aà ts'an nga ni mé xi osjna-ikòn-la.

⁷ K'e nga jye kii-ne xita xi kota'yát'aà-la Juan, tsibíts'ia Jesús nga tsohókò xita xi it'aà ts'e Juan, kitsò-la:

—¿Mé xi tsanguì chitsejèn-là ya i'nde it'aà xìn ñánda nangui kixi choòn? ¿A jè tsanguì chitsejèn-là jngoò xita xi yá ínaxò kji nga tsjin-la nga'ño nga ma síjtíya-la tjo?

⁸ Tsà majìn, ¿mé-nè xi tsanguì chitsejèn-là? ¿A jngoò xita xi 'ño ndaà kji nikje-la? Jñà xita xi 'ño ndaà kjoàn nikje-la, yaá títsajna ya ni'ya-la xitaxá ítjòn.

⁹ ¿Mé xá xi tsanguì-nò? ¿A jè tsanguì chitsejèn-là jngoò xita xi chja ngajo-la Nainá? Okixi-né, k'oaá xan-nò, Juan, isaá tíjna ítjòn mì k'oaá-ne koni jngoò xita xi chja ngajo-la Nainá.

¹⁰ It'aà ts'e Juan, yaá tíchja Xojon-la Nainá nga tsò:

'Aán sikasén ítjòn-lè xita-na xi kjiko 'én,
jè xi koiindaàya ítjòn-lè ndiyá-lè.

¹¹ Okixi-né, ngats'ìi xita xi tjin i isò'nde, ni saá jngoò xita bitjokajìn xi mangásòn koni jè Juan xi kis'iin bautizar xita; tanga ya jjiin naxandá ñánda otíxoma jè xi ngajmii nchrobá-ne, jè xita xi fehet'aà-ne, isaá jeya tíjna mì k'oaá-ne koni Juan.

¹² Tjen-ne nga j'i Juan xi kis'iin bautizar xita, jè kjotíxoma-la ngajmii, tse kjoasií tísakó-la skanda nachrjein i'nde; jña xita ts'en mejèn-la nga kàtachija kjotíxoma.

¹³ Ngats'ìi xita xi kiichja ngajo-la Nainá ko xojon ts'e kjotíxoma-la Nainá xi kiskii Moisés, tà 'én j'ìiko skanda k'e nga j'ii Juan xi kis'iin bautizar xita.

¹⁴ Tsà mokjeiin-nò koni tsò jè kjotíxoma ko xita xi kiichjaya tikoáá kokjeiin-nò nga jè Juan, jè-né xita xi 'mì Elías xi tjinè-la nga kjoii.

¹⁵ Ndaà tina'yaà koni xan-nò.

¹⁶ '¿Yá xi siingásòn-koa jña xita xi tjin nachrjein i'nde? Jña kongásòn-kjoò jña ixti xi bitsajna nditsin nga síská, chja-la xikjín, tsò-la:

¹⁷ “Kànikjaneé-nòjen xobí tanga jño, mìkii kàchà; kàjndaá-nòjen sò xi ba tsò tanga jño, mìkii kàchihindáyaà.”

¹⁸ K'e nga j'ii Juan, mìtsà 'ño tsakjèn, ni mì xán kits'ii, koa jño bixón-nò: “Inima ch'o-la neii tjin-la.”

¹⁹ Ikjoàn j'iaa xi Ki'ndí-la Xita xan-la yijo-na; ma-na kjeen, tikoá ma-na 'biaa; jña xita tsò-né: xita chrjá'a-né, xita ch'i-né, amigo-la-né jña xita-la xitaxá Roma xi síkíchjítjì tsojmì ko jña xi xita jé. Tanga jè kjoachjine-la Nainá, 'yaá-la nga kixi tjin k'e nga jye bitasòn.

Jesús, kii kitsò-la jña xita naxandá xi mìkii 'nchréñijon
(Lucas 10:13-15)

²⁰ Jesús k'eé tsibíts'ia nga tsohótiko ngats'ii xita naxandá ñánda nga kjin kjojkón-ndaà kis'iin, koií kjoa-la nga jña xita xi ya i'nde-la mìkii kisikájno jé-la nga tákó jè nchihótsji. Kitsò-la:

²¹ —jima xó-nò jño, xita naxandá Corazín! jima xó-nò jño, xita naxandá Betsaida! Tsà ya-làne naxandá Tiro ko Sidón nga k'oas'ín kis'iaàn kjojkón xi ndaà tjin xi komà ya jjiin naxandá tsajòn, tsà jña xita Tiro ko Sidón kijtsee, jyeé-la nikje naxá íkjá ko chijo ni'ín kisikaàjno sko koni seña nga jye kisikájno kjoa ts'e jé-la, mì tì jé ótsji-ne.

²² Tanga k'oaá xán-nò, k'e nga jè nachrjein nga sindaàjìn, isaá tse kjo'in s'e-nò mì k'oaá-ne koni jña xita naxandá Tiro ko Sidón.

²³ Koa jño xi xita naxandá Capernaum tsajòn, ¿a k'oaá s'ín mokjeiin-nò nga jchaxkón-nò ján ngajmii? Majìn, yaá kitsajnajñoò i'nde ñánda tjin kjo'in. Tsà yaá-làne naxandá Sodoma k'oas'ín komà kjojkón xi komà tsajòn, jè naxandá Sodoma tákó kijnaá-la skanda nachrjein i'nde.

²⁴ K'oaá xán-nò, k'e nga kijchò nachrjein nga sindaàjìn, isaá tse kjo'in s'e-nò mì k'oaá-ne koni jña xita naxandá Sodoma.

Ñánda sakó-ná kjoa nikjáya ts'e inima-ná
(Lucas 10:21-22)

²⁵ Jña nachrjein koi Jesús kitsò:

—Na'èn xi tsiji ngajmiì kò tsiji isò'nde, jeya síkijna-lè nga jñà kjoa koi tsibi'ma-la jñà xita xi tjin-la kjoachjine kò xi 'ño tjin-la kjohítsjeèn nga jñà tsakò-la xi taxki ndí xita ima kjoa.

²⁶ Jon, Na'èn, nga k'oaá s'ín kjòmejèn-lè.

²⁷ 'Ngats'iì kjoa ts'e kjotíxoma, 'aán kisìngatsja-na Na'èn-na. Mìtsà yá xi beèxkon yá-né xi Ki'ndí-la ma, tajngoò jè xi Na'èn ma; tikoáá mìtsà yá xi beèxkon yá-né xi Na'èn ma, tajngoò jè xi Ki'ndí-la beèxkon; kò jè Ki'ndí-la kokò-la jñà xita xi jè mejèn-la nga skoexkon, yá-né xi Na'èn ma.

²⁸ Nchrobáchón-ná ngats'ioò xi jye ijta-nò nga nixá kò nga kich'àjen ch'á-nò, 'aán síkjáya-nò.

²⁹ Jch'ajen-kò-ná jè yá ibò xi 'an 'yajen mé-ne nga koma-nò kos'ín s'een koni s'ín s'iaàn 'an. K'oas'ín t'een koni 'an nga tjin-na kjoatsejta kò indaá kjoa tjin inima-na. K'oas'ín sakó-nò kjoa nìkjáya ts'e inima-nò.

³⁰ Jè yá ibò kò ch'á xi 'an sik'àjen-nò, jna-né, mìtsà 'ño i'í.

12

Yá xita xi otíxoma-la jñà nàchrjein nìkjáya

(Marcos 2:23-28; Lucas 6:1-5)

¹ Jè nàchrjein nìkjáya, Jesús kò xita xi kota'yàt'aà-la ya ja ya ñánda tíjtje trigo. Koá jñà xita xi kota'yàt'aà-la Jesús kjòhojò-la. K'eé tsate natín-la trigo, ìkjoàn kiskine.

² Jñà xita fariseo k'e nga kijtseè, kitsò-la Jesús:

—Chítsején-la jñà xita xi kota'yàt'aà-lè, jè kjoa xi nchis'ín; mìkiì tíj'nde nga k'oas'ín koma jè nàchrjein nìkjáya.

³ Jesús kitsò-la:

—¿Jñò, a mìtsà jye tíjiin-nò koni s'ín tíchja Xojon-la Nainá koni kis'iin xitaxá ítjòn xi ki'mì David kò jñà xita-la xi kjihijtakò k'e nga kjòhojò-la?

⁴ Jahas'en ni'ya-la Nainá koá tsakjèn inchrajín tsjeè-la Nainá xi mìkiì tíj'nde-la nga jè David kokjèn kò xita xi kjihijtakò; ta jñà no'miì tíj'nde-la nga kokjèn.

⁵ ¿A tikoáá mìtsà jye tíjiin-nò koni tsò kjotíxoma xi kiskii Moisés? Nga jñà no'miì, ya iya ingo ítjòn, síxá-né nas'ín jè nàchrjein nìkjáya, kò nas'ín síxá mìtsà jè nchihótsji.

⁶ 'An, k'oaá xan-nò, jngoò tíjna ijndé xi isa jeya tíjna mì k'oaá-ne koni jè ingo ítjòn.

⁷ Ngats'ioò jñò mìkiì machiya-nò kó tsòya-ne Xojon-la Nainá nga tsò: “'An, mejèn-na nga kátas'e-nò kjohimatakòn, kì ta tsjaà cho nìk'eèn kjotjò xi 'an 'biì-ná.” Tsà kochiya-nò, mì-la kii kjo'in k'oi-la xita xi mìtsà jè tjin-la.

⁸ K'oaá s'ín tjin, 'an xi Ki'ndí-la Xita xan-la yijo-na, 'aán otíxoma-la nàchrjein nìkjáya.

Mé kjoa xi kisakò-la Jesús k'e nga kisindaà jngoò-ne xita nàchrjein nìkjáya

(Marcos 3:1-6; Lucas 6:6-11)

⁹ Ìkjoàn kii-ne Jesús ya i'nde jè; jahas'en jngoò ni'ya ingo sinagoga.

¹⁰ Ya tíjna jngoò xita xi kixit'aà jngoò tsja. Jñà xita xi ya títsajna kiskònangui-la Jesús nga mejèn-la kohòngui, kitsò-la:

—¿A tíj'nde-né nga kjondaà-ne xita k'e nga jè nàchrjein nìkjáya?

¹¹ Jesús kitsò-la:

—Jñò, tsà tíjna jngoò-nò orrè kò tsà ya skaya ngajo, ¿a mìtsà konguínachrjeè nas'ín nàchrjein nìkjáya?

¹² Jyee 'ya, isaá 'ño chjí-la jngoò xita mì k'oaá-ne koni jngoò orrè. Koií kjoa-la nga tíj'nde-né nga kosikoaá xita nas'ín jè nàchrjein nìkjáya.

13 Jesús kitsò-là jè xità xi kixit'aà jngò tsja:

—Tjeendojoi ndseji.

Xità jè, tsijmeé tsja, nitoón kjòndaà-ne; k'oaá tì kji komà-ne koni kji xi jngò.

14 Jñà xità fariseo, k'e nga itjo-ne ingo, ikjoàn tsajoóya-ne nga mejèn-là sikk'en Jesús.

K'oaá s'in tsitasòn 'én xi kiichja Isaías xi it'aà ts'e Jesús

15 Jesús, k'e nga kijtseè nga jñà xità fariseo mejèn-là sikk'en, itjo ni'ya, kiì. Jjìn xità kiitjngui-là. Jesús kisindaà-ne ngats'ì xità xi xk'én.

16 Kitsjaà-là okixi jñà xità nga mìkì keenojmít'in yá-né jè.

17 K'oaá s'in komà mé-ne nga tsitasòn-ne 'én xi kiichja Isaías, xità xi kiichja ngajo-là Nainá, nga kitsò:

18 I tíjna jè chí'nda-na jè xi 'an jaajñaà,

xi 'ño matsjake,

tjín-là kjotsja inima-na xi it'aà ts'e.

'Aán tsjaà-là Inima Tsjeè-na

nga jè kichjajìn-là ngats'ì xità isò'nde xi kjoakixi

mé-ne nga koma sindajìn-là.

19 Mìtsà xità skaàn-ko, ko nì mé 'én xi 'ño kichja,

ko mì kìná'ya-là ya iya ndiyá 'én xi kichja.

20 Mìkì skít'o jngò yá inaxo xi jye mejèn tít'ò,

tjkoá mìkì sikkits'o jngò ni'in xi ta nj'ndí títbitjo sa-là.

K'oa'sín s'in skanda k'e nga koindaajìn xi kjoakixi.

21 Jñà xità naxandá xi tjín isò'nde xi mìtsà xità judío,

kojjeín-là nga skóña-là kjòndaà xi tsjá-là.

Mé xi komat'in jñà xità xi chjajno-là Inima Tsjeè-là Nainá

(Marcos 3:19-30; Lucas 11:14-23; 12:10)

22 J'ikò jngò-là xità Jesús xi mìkì tsejèn-là, ko xi mìkì ma chja nga inima ch'o-là neí tíjìn inima-là. Kisindaà-ne Jesús nga komà kiichja-ne koa kjòtsejèn-là.

23 Ngats'ì xità, tà kjòxkón-là. K'eé kitsò:

—¿A jè jèe xi ya nchrobát'aà-ne tje-là xitaxá ítjòn David [nga jè kína ngajo-là]?

24 K'e nga kiì'nchré jñà xità fariseo kitsò:

—Xità jè, ma-là ochrjekajìn inima ch'o-là neí xi tíjìn inima-là xità, k'oí-né nga jè síkjeén nga 'ño-là Beelzebú xi sko-là xità neí.

25 Jesús kijtseèya-là koni s'in nchihóko inima-là, kitsò-là:

—Ngats'ì naxandá xi jòya tjín nga kondra títsajna-là xíkín, ti yijo-lá tísikixòña-ne; koa tsà jngò naxandá ko tsà jngò ni'ya xità sijòya xíkín, mìkì koma ndaà kítsajna.

26 Tsà jè xità neí tíjè tíhocrjejin-ne yijo-là neí, jòya tí'sín xi tíjè-ne yijo-là. ¿Kós'in koma s'e-là nga 'ño nga kotixoma?

27 Jñò bixón-nò nga 'an síkjeén nga 'ño-là xi sko-là xità neí k'e nga ochrjekajñaà inima ch'o-là neí. Tsà k'oaá s'in tjín kjoa, jñà xità tsajòn, ¿yá xi tsjá-là nga 'ño k'e nga ochrjekajìn neí? Koi kjoa-là, tíjña-ne xità-nò keenojmí nga mìtsà kixi kjoa nga jè sko-là neí síkjeén.

28 Tanga 'an, k'e nga ochrjekajñaà inima ch'o-là neí xi tíjìn inima-là xità, jè Inima Tsjeè-là Nainá tsjá-na nga 'ño. Jè kjoa koi tsòyaá-ne nga Nainá, jyeé i tíhotixoma i it'aà nangui.

29 '¿Kó s'ín koma kjoahas'en ni'ya-la nga siichijé-la jngoò xita nei-la ni'ya xi tjín-la nga'ño tsà mìtsà ítjòn koìit'aà'ño? K'eé koma siichijé-la k'e nga jye kàsìt'aà'ño.

30 'Nìton yá-ne xi mì 'an fit'aà-na, jè-né kondra-na; koa nìton yá-ne xi mìkìi síchját'aà-na nga bíxkóyako-na xita xi ts'an koma, jè tísítsjohoba xita.

31 'K'oaá xan-nò, Nainá siichàat'aà-la jña xita nita mé jé xi kohótsji, nita mé 'én xi ch'o tsò kichja. Tanga jè xi Inima Tsjeè-la Nainá kichjajno-la mìkìi jchat'aà-la jé-la.

32 Nìton yá-ne xi kichjajno-na 'an xi Ki'ndí-la Xita xan-la yijo-na, jchat'aà-la jé-la; tanga jè xi kichjajno-la Inima Tsjeè-la Nainá, mìkìi jchat'aà-la jé-la nì jè nàchrjein i'ndeì, kò nì jè nàchrjein xi iskan kjoìi.

*Kós'ín 'ya-la kós'ín tjín inima-la jña xita
(Lucas 6:43-45)*

33 'Tsà jngoò yá xi ndaà kji, ndaà toò xi ojà-la. Kò tsà jngoò yá xi mìkìi ndaà kji, mìkìi ndaà toò xi ojà-la. Jngoò yá, jè toò-la yaxkon-la.

34 'Jñò, xita tje-la ye-nò! ¿Kós'ín ma kìnókjoaa 'én xi ndaà tsò nga ch'o tsò inima-nò? Nga k'oaá tsò 'én xi chja jña xita koni tsò kjohítsjeèn xi tíjìn inima-la.

35 'Jngoò xita xi 'én ndaà chja, koií-né nga kjondaà tíjìn inima-la; koa jngoò xita xi 'én ts'en chja, koií-né nga kjoats'en tíjìn inima-la.

36 'K'oaá xán-nò k'e nga kijchò nàchrjein nga sindaàjìn, k'oaá s'ín tsjá kinda ngats'ìi xita nita mé 'én xi taxki chja.

37 'Xi it'aà ts'e 'én-nò, k'oaá s'ín sindaàjìn-nò nga jcha-la tsà xita ndaà-nò, o tsà jé tjín-nò.

*Yá xi tsját'in 'én jña xita ts'en xi tjín nàchrjein i'ndeì
(Marcos 8:12; Lucas 11:29-32)*

38 'Jña xita fariseo kò xita xi okóya kjotíxoma-la Nainá xi kiskìi Moisés kitsò-la Jesús:

—Maestro, mejèn-najen nga jcha jngoò-jen seña xi jì 'nì.

39 'Jesús kitsò-la:

—Jña xita ts'en kò xita xi mìkìi 'nchréñijon-la Nainá, síjé jngoò seña xi jeya tjín; tanga nímé seña skoe; ta jè skoe ts'e Jonás, xita xi kiichja ngajo-la Nainá.

40 'Koni jè Jonás nga jàn nàchrjein kò jàn nìtjen tsibìjnaya indso'ba jngoò tìn je, k'oaá tìs'ín 'an xi Ki'ndí-la Xita xan-la yijo-na, jàn nàchrjein kò jàn nìtjen kójna ijñaà nanguì.

41 'Jña xita naxandá Nínive kosítjen-né jè nàchrjein k'e nga koìindaàjìn Nainá; jña tsját'in 'én jña xita xi tjín nàchrjein i'ndeì, koií kjoa-la nga kisikájno jé-la nga mì tì jé tsohótsji-ne k'e nga kiichjaya 'én-la Nainá Jonás; tanga nàchrjein i'ndeì, 'an xi tìchjàkò-nò, isaá 'ño jeya tijnàa mì k'oaá-ne koni Jonás [tanga jñò, mìkìi mokjeiín-nò].

42 'Tìkooá jè chjoón ítjòn xi ya otíxoma nanguì sur, kosítjen-né jè nàchrjein k'e nga koìindaàjìn Nainá; jè tsját'in 'én jña xita xi tjín nàchrjein i'ndeì, koií kjoa-la nga kjìn nanguì j'ìi-ne nga j'ìi 'nchré-la kjoachjine-la Salomón; tanga nàchrjein i'ndeì, 'an xi tìchjàkò-nò, isaá 'ño jeya tijnàa mì k'oaá-ne koni Salomón [tanga jñò, mìkìi na'yà-ná].

*Inima ch'o-la neì xi f'ù ijngoò k'a-ne
(Lucas 11:24-26)*

43 'K'e nga jngoò inima ch'o-la neì bitjokàjìn inima-la jngoò xita, yaá ojmeè i'nde ñánda kixì choòn, ótsji'nde nga siikjáya; k'e nga mìkìi sakó'nde-la,

⁴⁴ Ijngoò k'a síkítsjeèn, tsò: “Kjín-la ijngoò k'a-na ni'ya-na ñánda inchrobà-na.” K'e nga bijchó ijngoò k'a-ne, beè ni'ya-la nga kjijñá, ndaà kisatiicha kò tsjeè choòn.

⁴⁵ Ikjoàn fikjaá nguì itoò xíkjín xi ìsà ch'o s'ín. K'ée fahas'en-jiin inima-la xita jè; yaá bitsajna. Xita jè ìsáá 'ñó ch'o bijna koni s'ín tsibijna k'e nga sa ítjòn. Jñò, xi xita ts'en 'mì-nò, k'oaá tìs'ín komat'ioòn nachrjein i'ndeì.

Nea-la kò 'ndse Jesús

(Marcos 3:31-35; Lucas 8:19-21)

⁴⁶ Táko tìk'ée tíhókò xita Jesús nga ijchò nea-la kò 'ndse. Yaá tsibìtsajna ján ndìtsiaán nga mejèn-la kichja-la.

⁴⁷ Jngoò xita kitsò-la Jesús:

—Nea-lè kò jñà 'ndsì ján ndìtsiaán títsajna. Ji xó kòkò-lè.

⁴⁸ Jesús kitsò-la jè xita xi ijchòkò-la 'én:

—¿A mejèn-lè nga jchii yá-né xi nea-na kò xi 'ndsè?

⁴⁹ K'ée tsakó-la jñà xita xi kota'yàt'aà-la. Kitsò:

—Chítsején-lá jñà xita koi, jè-né xi nea-na kò jñà-né xi 'ndsè.

⁵⁰ Ngats'ì xi síkitasòn koni s'ín mejèn-la Na'èn-na xi tíjna ngajmiì, jñà-né xi 'ndsè xi tichja kò xi nea-na.

13

Kjoa xi mangásòn ts'e xita xi kíjndi xojmá

(Marcos 4:1-9; Lucas 8:4-8)

¹ Tjè-ne nachrjein, Jesús itjo-ne ni'ya, yaá tsibìjnandiì ndáchikon.

² Kjín jchán xita chixoñat'aà-la; Jesús jahas'en jngoò chitso; yaá tsibìjnaya. Ngats'ì xita xi i'nga, yaá tsibìtsajna indìi nandá.

³ Tsibíts'ia Jesús nga kjìn skoya kjoa xi mangásòn tsibénojmí kitsò:

—Jngoò xita kiì kíjndi xojmá.

⁴ K'e nga tsibíts'ia nga kiskíjndi xojmá, chixò chiba ya iya ndiyá. Ikjoàn j'ì nise; tsakjèn.

⁵ Nguì koa tjin chixò ñánda naxi choòn nga chiba ni'nde tjin-la. Jñà xojmá koi, nitoón isò, koi-né nga mì nanga tjin nangui.

⁶ Tanga k'e nga itjokàtji ts'oi nga kjòtsjè ndobá, kixiñó, ikjoàn jngoò k'aá kixi, koi-né nga tsjin-la ima.

⁷ Nguì koa tjin chixò ya jjiin na'yá. K'e nga kjò'nga na'yá, kisik'en-ngui xka-la xojmá.

⁸ Jñà xi chixò ñánda nangui ndaà, ndaà tsajà-la toò. Tjin xi kitsjaà jngoò sìndo nga jngoò ijngoò xojmá, tjin xi kitsjaà jàn kaàn, koa tjin xi kitsjaà katé.

⁹ Ndaà tiná'yaà koni xan-nò.

Mé-ne kjoa xi mangásòn tsakóya-ne Jesús

(Marcos 4:10-12; Lucas 8:9-10)

¹⁰ Jñà xita xi kota'yàt'aà-la Jesús ijchòkon ñánda tíjna koa kiskònangui-la kitsò-la:

—¿Mé-ne k'oas'ín nokjoà-la xita kjoa xi mangásòn k'e nga okoòyi?

¹¹ Jesús kitsò-la:

—Jñò, Nainá jye kitsjaà-nò nga jchaa kjoa'ma-la xi bénojmíya kó s'ín otixoma jè xi ngajmiì nchrobá-ne. Tanga jñà xita xi kj'eí, mìkiì tíjin-la.

¹² Jè xi tjin-la kjohítsjeèn, k'oií ìsà-la skanda tsatoó s'e-la, tanga jè xi tsjin-la, skanda tjá'aán-la mé xi chiba tjin-la.

¹³ Koií kjoa-là k'e nga okoòya, koií 'én chjà-là kjoa xi mangásòn. Jñà xita koi, sík'aá xkon tanga mìkiì tsejèn-là. Binchá líká-là tanga mìkiì 'nchré, tikoáá mìkiì machiya-là.

¹⁴ Kjoa ts'e xita koi, k'oaá s'ín bitasòn koni kitsò Isaías xita xi kiichja ngajo-la Nainá, nga kitsò:

Jñò, nas'ín í'ño-ìsa kiná'ya-nò tanga mìkiì kochiya-nò,
nas'ín í'ño-ìsa chítsejèn-nò tanga mìkiì jchaa.

¹⁵ Inima-là xita koi, tájaàjiìn tjín;
tsibíchoajto líká-là, tíchjoajto xkon.

Koií kjoa-là mìkiì ndaà 'nchré kò mìkiì tsejèn-là kò mìkiì fahas'en-jiìn-là.
K'oaá ma-ne nga majìn-là nga 'an fit'aà-na mé-ne nga 'an sindaà-na.

¹⁶ 'Jñò, mé tà ndaà-nò nga tjín xkoòn nga ma tsejèn-nò kò tjín líká-nò nga ma na'yà kjoa xi tíma nachrjein i'ndeì.

¹⁷ Okixií xi xan-nò, kjìn xita xi kiichja ngajo-la Nainá kò xi xita kixi kjòmejèn-là nga skoe jè xi jñò titsa'yaà tanga mìkiì kijtsee; tikoáá kjìn xita kjòmejèn-là nga kji'nchré jè xi jñò titsana'yà tanga mìkiì kiì'nchré.

*Kó tsòya-ne kjoa xi mangásòn ts'e xojmá
(Marcos 4:13-20; Lucas 8:11-15)*

¹⁸ 'Tiná'yaà kó tsòya-ne jè kjoa xi mangásòn ts'e xita xi kíjndi xojmá.

¹⁹ Jñà xojmá xi chixò iya ndiyá, jè गया-la koni jñà xita xi 'nchré 'én-la Nainá koni s'ín otíxoma tanga mìkiì machiya-là; f'ii xita neji, ikjoàn faáxin jè 'én ijiìn inima-là xita.

²⁰ Jñà xojmá xi chixò ya ñánda naxi choòn, jè गया-la xita xi 'nchré 'én-la Nainá. Tsjaá ma-la nga sa 'nchré.

²¹ Tanga jè-nè nga tsjin-la ima, ta chiba nachrjein chikjoa-la. K'e nga mé kjoa xi sakó-la kò tsà xita fitjingui kondra-la nga jè ngatji-la 'én-la Nainá, nitóón síkijna ndiyá-la Nainá.

²² Jñà xojmá xi chixò ijiìn ñánda tjín na'yá, jè गया-la xita xi 'nchré 'én-la Nainá tanga 'ño síkájno kjoa ts'e tsojmì xi tjín isò'nde kò jè kjoa nchiná konachan-la. Jñà kjoa koi síkits'ón-jiìn 'én-la Nainá, k'oaá ma-ne nga mìkiì makjìn-ya.

²³ Tanga jñà xojmá xi chixò ñánda nga nangui ndaà, jè गया-la xita xi 'nchré 'én-la Nainá koa machiya-là; ikjoàn makjìn-ya 'én, k'oaá गया-la koni yá xi ojà-la toò. Tjín xi tsjá katé; tjín xi tsjá jàn-kaàn; tjín xi tsjá jngoò sindo nga jngoò ijngoò yá.

Kjoa xi mangásòn it'aà ts'e ijñá xi mìkiì ndaà

²⁴ Jesús nguì jngoò kjoa xi mangásòn tsakóya-la xita, kitsò-la:

—Koni s'ín otíxoma jè xi ngajmiì nchrobá-ne, k'oaá गया-la koni jngoò xita xi 'ño ndaà xojmá-la trigo tsibítjesòn nangui-la.

²⁵ Tanga k'e nga kjifè yije kóhotjín xita, j'ii kondra-la nga tsibítjejiìn xka ijñá xi mìkiì ndaà ya ijiìn trigo. Ikjoàn kiì.

²⁶ K'e nga jye kjò'nga jñà trigo koa kixò-la natín, yaá tsatsejèn-jiìn ijñá xi mìkiì ndaà.

²⁷ K'eé kiì jñà chi'nda nga tsibénojmí-la nei-la. Kitsò-la: “Na'én, jñà xojmá xi tsibítjiì ya nangui-lè, ndaà-né. Tanga, ¿ñánda j'ii-ne ijñá xi mìkiì ndaà xi tsatsejèn-jiìn trigo?”

²⁸ Jè nei-la nangui, kitsò: “Jngoò-la xita kondra-na xi okis'iìn.” K'eé kitsò jñà xita chi'nda: “¿A mejèn-lè nga konguí-jen, chjínèjìn-jen jñà ijñá xi mìkiì ndaà?”

²⁹ Tanga jè nei-la nangui kitsò: “Majìn, tsà chjínè jñò ijñá xi mìkiì ndaà, tsà koi nachrjein-la yaá chjínèkjoò jñà trigo.”

³⁰ Tikoáá-ne kàtamajchá kjoò ingajò skanda k'e nga jye kojchá. K'e nga jè nachrjein nga sincháxkó, 'aán koxán-la chí'nda xi kojìxkó: "Ítjòn xìn kìncha ijñá xi mìkiì ndaà, k'o'ñójté-né mé-ne nga kiti-ne. Nga koma iskan kìncháxkó jñà trigo; yaá kìncha iya ni'nga-na."

Kjoa xi mangásòn it'aà ts'e xojmá mostaza
(Marcos 4:30-32; Lucas 13:18-19)

³¹ Jesús ìjngòò k'a tsakóya-la xita kjoa xi mangásòn, kitsò-la:
—Koni s'ín otíxoma jè xi ngajmii nchrobá-ne, jè mangásòn-kò koni kji xojmá mostaza k'e nga jngòò xita bitjejiin nangui-la.

³² Okixi-né xojmá jè, jè xi isa itsé kji ngats'ii xojmá xi tjín, tanga k'e nga jye majchá, isaá 'nga ma koni xka xi ma chine xi sitje indi ni'ya. K'oaá kji 'nga ma koni jngòò yá 'nga; f'ii nise xi tjímajii isén, jñà chrja-la ya bíndaà'a tjé-la nise.

Kjoa xi mangásòn it'aà ts'e na'yo san
(Lucas 13:20-21)

³³ Jesús nguì jngòò k'a tsakóya-la xita kjoa xi mangásòn, kitsò-la:
—Koni s'ín otíxoma jè xi ngajmii nchrobá-ne, k'oaá ngaya-la koni jè na'yo san, k'e nga jngòò chjoón síkajii jàn chiba skoan inchrajín, masan yije-né kóhokji na'yo.

Jesús, kós'ín kisikjeén kjoa xi mangásòn
(Marcos 4:33-34)

³⁴ Ngats'ii 'én koi, Jesús, nguì kjoa xi mangásòn tsakóya-la xita; nímé 'én kiichja xi mìtsà kjoa xi mangásòn tsibénojmi.

³⁵ K'oaá s'ín tsitasòn koni s'ín kitsò jè xita xi kiichja ngajo-la Nainá nga kitsò: Kjoa xi mangásòn kichjà.
Koií kjoa kènojmiá kjoa xi tjí'ma skanda tjen-ne nga kisindaà isò'nde.

Kó tsòya-ne kjoa xi mangásòn it'aà ts'e ijñá xi mìkiì ndaà

³⁶ Jesús k'e nga kisihiat'aà xita xi kjin ma; ikjoàn jahas'en ni'ya. Yaá ijchòkon xita xi kota'yàt'aà-la. Kitsò-la:

—Tènojmi-nájen kó tsòya-ne jè kjoa xi mangásòn kò jè ijñá xi mìkiì ndaà xi tjín ya ijii trigo.

³⁷ Jesús kitsò:

—Jè xi kíjndi xojmá xi ndaà, 'an-ná xi Ki'ndí-la Xita xan-la yijo-na;

³⁸ kò jè nangui, jè isò'nde; jñà xojmá xi ndaà, jñà-né xita xi titsajnajii kjotíxoma-la ngajmii; jñà ijñá xi mìkiì ndaà, jñà-né xi xita-la xita neí;

³⁹ kò jè xita kondra xi tsibítje ijñá xi mìkiì ndaà, tijè-ne xita neí; k'e nga jye sincháxkó tsojmi xi kojchá jè ngaya-la k'e nga kjoehet'aà isò'nde; koa jñà xi bíxkó tsojmi, jñà ngaya-la àkjale.

⁴⁰ K'oaá s'ín sincháxkó ijñá xi mìkiì ndaà mé-ne nga kotsjòjii-ne ni'ín nga kiti, k'oaá s'ín koma k'e nga kjoehet'aà isò'nde.

⁴¹ 'An xi Ki'ndí-la Xita xan-la yijo-na siikasén àkjale-na it'aà ts'e kjotíxoma-na mé-ne nga kojìxkó ngats'ii xita xi bí'tin-la xita xi kj'eí nga kátátsji jé, kò ngats'ii xita xi ch'o s'ín.

⁴² Yaá kotsjoya ngajo ñánda títi ni'ín; yaá skindàya kò sùjts'iin ni'ño.

⁴³ Koa jñà xi xita kixi, k'oaá s'ín ote kotsejèn koni ndobá-la ts'oí ya ñánda nga tíhotíxoma Nà'èn-la. ¡Ndaà tina'yaá koni xan-nò!

Jngòò tsojmi chí xi kisijna'ma

⁴⁴ Koni s'ín otíxoma jè xi ngajmii nchrobá-ne, k'oaá ngaya-la koni jngòò ton xi 'ño chí xi tjina'ma ijii nangui. Jè xita xi sakó-la, tsjaá ma-la. Tiyáá ìjngòò

k'a bíjna'ma-ne. K'ée fi katijna yije tsojmì xi tjin-la; ikjoàn otse nangui jè, nga ts'e koma ton xi 'ño chjí-la.

Jngoò ndátòn chjí

⁴⁵ 'Koni s'ín otíxoma jè xi ngajmii nchrobá-ne, k'oaá tís'ín ngaya-la koni jngoò xita xi koi xá s'ín nga tsojmì otíjnaya. Ótsji ndátòn chjí xi 'ño ndaà.

⁴⁶ K'e nga jye sakó-la xi 'ño chjí, ikjoàn fi katijna yije tsojmì-la xi tjin-la; k'ée otse ndátòn jè.

Na'ya xi bixkóya tin

⁴⁷ 'Koni s'ín otíxoma jè xi ngajmii nchrobá-ne, tikoáá k'oaá s'ín ngaya-la koni jngoò na'ya xi níkatjen-jiin ndáchikon mé-ne nga koma kjin skoya tin koiixkóya-ne.

⁴⁸ K'e nga jye tse na'ya-la jña xita xi sík'en tin, fiko ya indii ndáchikon; yaá faájiin ngats'ii tin xi ndaà kjoàn; nisíyá binchá; koa jña tin xi mikii ndaà kjoàn, síkatsjò-ne.

⁴⁹ K'oaá s'ín koma k'e nga kjoehet'aà isò'nde, kitjojen àkjale xi kjoaájiin jña xita xi ch'o s'ín ya ñánda títsajna xita kixi.

⁵⁰ Ko jña xita xi ch'o s'ín kotsjoya ngajo ñánda títi ni'ín; yaá skindàya ko sijn's'ii ni'ño.

Tsojmì chjí xi xitse ko xi jye kòjchínga

⁵¹ Jesús kiskònangui-la jña xita, kitsò-la:

—¿A machiyaá-nò ngats'ii kjoa koi?

Jña xita kitsò:

—Jon, Na'èn.

⁵² K'ée kitsò-la Jesús:

—Jngoò xita xi okóya kjoíxoma-la Nainá xi kiskii Moisés k'e nga kota'ya kó s'ín otíxoma jè xi ngajmii nchrobá-ne, k'oaá s'ín ngaya-la koni jngoò nei-la ni'ya xi 'nchaxkó-la tsojmì, koa k'e nga mochjeén-la, ochrje tsojmì chjí xi xitse, o xi jye kòjchínga.

Kó kitsò xita k'e nga kii Jesús ján naxandá-la Nazaret

(Marcos 6:1-6; Lucas 4:16-30)

⁵³ Jesús, k'e nga jye tsibénojmiya kjoa xi mangásòn, kii-ne.

⁵⁴ K'e nga ijchò-ne nangui-la ján Nazaret, ya ni'ya ingo sinagoga, tsibíts'ia nga tsakóya-la xita 'én-la Nainá. Koa jña xita ta kjòxkón-la, k'ée kitsò:

—¿Xita jè, ñánda komà-la ngats'ii kjoachjine xi okóya? ¿Kó ma-ne nga ma-la s'ín kjoxkón xi ndaà tjin?

⁵⁵ ¿A mìtsà jè ti-la chjineyá? ¿A mìtsà jè nea-la xi 'mì María? ¿A mìtsà 'ndse ma Jacobo, José, Simón, ko Judas?

⁵⁶ Tikoáá, ¿a mìtsà i títsajnajiiin-ná jña íchjín ndichja? ¿Ñánda ma yije-la kjoa koi?

⁵⁷ K'oaá ma-ne nga mikii kòkjeiin-la it'aà ts'e Jesús. Tanga jè Jesús kitsò-la:

—Jngoò xita xi chja ngajo-la Nainá, nita ñá naxandá-ne yaxkón-né, tanga ya naxandá-la ko ni'ya-la mikii yaxkón.

⁵⁸ Mikii kjin kjoxkón xi ndaà tjin kis'iiin nga jña xita xi ya i'nde-la mikii kòkjeiin-la it'aà ts'e Jesús.

14

Kii komà k'e nga k'en Juan xi kis'iiin bautizar xita
(Marcos 6:14-29; Lucas 9:7-9)

1 Jñà nàchrjein koi, jè Herodes xi xitaxá ítjòn tíjna ya nangui Galilea, kii'nchré koni s'ín bénojmi xita mé kjoa xi tís'ín Jesús.

2 Kitsò-la jñà xita xi síxá-la:

—Xita jè, jè-né xi 'mì Juan xi kis'iin bautizar xita xi jye jaáya ijngò k'a-la. K'oa ma-ne nga tjín-la nga ñó nga ma-la s'ín kjoxkón xi ndaà tjín.

3 Nga isa kjòtseé, jè Herodes kitsjaà okixi nga kitsobà'ño Juan, ikjoàn kiskinis'en ndayá, koi kjoa-la nga jè chjoón Herodías xi chjoón-la Felipe xi 'ndse komà Herodes k'oa s'ín kisjé.

4 Koi kjoa-la nga jè Juan xi kis'iin bautizar xita, kjin k'a okitsò-la Herodes: “Mikiì tji'nde-lè nga ji tijnakoi chjoón-la 'ndsi.”

5 K'oa ma-ne nga jè Herodes mejèn-la kisik'en Juan, tanga jñà kitsakjòn-la xita naxandá, nga jyeé tíjìn-la naxandá nga jè Juan, jè xita xi chjaya ngajo-la Nainá.

6 K'e nga ijchò nó-la jè Herodes, tsachrje s'eí-la koa jè tsòti-la Herodías kite nga nguixkòn xita xi títsajna s'eí. Jè Herodes, 'ño ndaà kisaseèn-la.

7 Koa kitsjaà kixi 'én-la nga tsjá yije-la mé xi sijié-la jè tsòti.

8 Koa jè nea-la chinchá'a ítjòn jè tsòti nga katasíjé-la sko Juan. Jè tsòti, k'eé kitsò-la Herodes:

—Tji-ná sko Juan xi kis'iin bautizar xita, tinaya-ná chrobate.

9 Jè Herodes xi xitaxá ítjòn tíjna, kjòba-la k'e nga kii'nchré-la jè tsòti. Tanga koi kjoa-la nga jye kitsjaà kixi-la 'én nga nguixkòn xita xi ya títsajna s'eí, k'eé kitsjaà okixi nga k'oi-la sko Juan jè tsòti.

10 Jè Herodes kitsjaà-la okixi xita-la nga tsatesin Juan ya iya ndayá.

11 Ikjoàn kiiko sko Juan, tjíya-la chrobate nga kitsjaà-la jè tsòti, ko jè tsòti kisìngatsja nea-la.

12 K'eé ijchò xita xi kota'yàt'aà-la Juan; kiskoé yijo-la nga jye k'en, ikjoàn kii kijiin; nga komà iskan, kisikí'nchré Jesús.

Kó kis'iin Jesús nga 'òn jmù xita kisikjèn

(Marcos 6:30-44; Lucas 9:10-17; Juan 6:1-14)

13 Jesús, k'e nga jye kii'nchré jè kjoa xi komàt'in Juan, tà tajngò kii-ne; tsibijna'ya jngò chitso; ijchò jngò i'nde it'aà xìn. Tanga jñà xita, nga jye kii'nchré nga kii-ne Jesús, tikoáà kiitjinguì-la; saà ndsokoó kii-ne ngats'ii xita xi ya chrañàt'aà-la naxandá-la.

14 Jesús, k'e nga itjojen chitso, kijtseè nga 'ño kjin ma xita xi títsajna; kjòhimakeè-né. K'eé kisindaà-ne ngats'ii xita xi xk'én.

15 Nga jye kjòhoxòn jñà xita xi kota'yàt'aà-la Jesús ijchò kinchat'aà-la, kitsò-la:

—Jye kjòhoxòn, ko i'nde jè, it'aà xìn-né; nimé tjín. Kot'in-la jñà xita kàtjì-ne nga kàtatse tsojmì xi skine jñà naxandá ñánda nga chrañàt'aà.

16 Jesús kitsò:

—Mikiì kjoì-ne. Tji-là jñò xi kokjen xita koi.

17 Xita xi kota'yàt'aà-la Jesús kitsò:

—Nimé tjín-najen. Tà 'òn ma inchrájin ko jò ma tin xi títsajna-najen.

18 Jesús kitsò-la:

—Nchrohóko-ná ijndé.

19 K'eé kitsò-la jñà xita xi kjin ma-ne nga kàtitsajnajiin ijñá; ikjoàn kiskoé jñà inchrájin xi 'òn ma-ne ko jñà tin xi jò ma-ne; ikjoàn kiskoòtsejèn ngajmii, kitsjaà-la kjondaà Nainá, ikjoàn kisixkoaya inchrájin; k'eé kitsjaà-la jñà xita xi kota'yàt'aà-la, koa jñà xita xi kota'yàt'aà-la kisika'bì-la jñà xita xi kjin ma-ne.

20 Tsakjèn yije kóhotjín xita kó nga kjòski. K'eé tsibíxkó-ne jñà xi tsiningui-ne. Nguì tejò nisiyá komà.

21 Jñà x̄it̄a xi tsakjèn, 'òn jmiì ma-ne xi x̄it̄a x'ìn. Mìkiì kòxkeya jñà íchjín ko ixti.

*Kjoxkón xi kis'ìn Jesús nga kù-ne ndsokò ya isòn ndáchikon
(Marcos 6:45-52; Juan 6:16-21)*

22 Nga komà iskan, Jesús kisikas'en x̄it̄a xi kota'yàt'aà-là ya ȳa chitso mé-ne nga is̄a ítjòn kijchò-ne ján xijngoaà ndáchikon; koa jè Jesús k'èé tíshixat'aà x̄it̄a xi k̄jìn ma-ne nga jye nchifi-ne.

23 K'è nga jye kisihixat'aà yije jñà x̄it̄a, Jesús kìmijìn-jno jngòò nindoò nga kù kiichjat'aà-là Nainá nga t̄a jè tajngoo. K'è nga jye kòjñò, Jesús tà tajngoo tíjna ya i'nde jè.

24 Jè chitso jye 'ñó k̄jìn ijchò. Jè nga'ñó-là nandá jye ngaxìn ngajen tífiko chitso nga jè t̄jò bíchjoà ikon-là.

25 K'è nga tajñòya is̄a, Jesús kiit̄j̄ingui-là x̄it̄a xi kota'yàt'aà-là nga kù-ne ndsokò ya isòn nandá.

26 Jñà x̄it̄a xi kota'yàt'aà-là k'è nga kijtseè nga tífisòn nandá tà kitsakjòn-là; k'èé kiskindàya xkón, kitsò:

—In̄im̄a ch'o-né.

27 Tanga Jesús n̄it̄oón kiichja-là, kitsò-là:

—Ñó t'è-là takòn, kì tsakjoòn-jèn, 'an-ná.

28 Jè Pedro, k'èé kiichja-là kitsò-là:

—Na'èn, tsà j̄i-né, t̄j̄i'nde-ná nga k̄j̄isoàn nandá skanda ñánda t̄is̄ijni.

29 Jesús kitsò-là:

—Nchroboí.

Jè Pedro itjojen-jno chitso koa tsibíts'ia nga kù-ne ndsokò ya isòn nandá ñánda síjna Jesús.

30 Tanga k'è nga kijtseè nga jè t̄jò 'ñó tí'ba, kitsakjòn-né, ikjoàn tsibíts'ia nga mejèn kiskaàj̄indá; k'èé kiskindàya kitsò:

—j̄Na'èn, n̄achr̄ej̄j̄ìn-ndá-ná!

31 Jesús n̄it̄oón kitsobà'ñó tsja, kitsò-là:

—j̄Chibaá mokjeiín-lè it'aà ts'an! ¿Mé-ne jò kòbeè-là takòin?

32 K'è nga jahas'en-ne chitso ingajò, n̄it̄oón kisijyò-ne t̄jò.

33 Jñà x̄it̄a xi títsaj̄naya chitso chincha-xkó'nchit'aà-là Jesús, kitsò-là:

—j̄Xi okixi, j̄i-né xi Kì'ndí-là Nainá!

*Kií s'ín kjòndaà-ne x̄it̄a xi xk'én ján Genesaret
(Marcos 6:53-56)*

34 K'è nga jye tsatoj̄j̄ìn ndáchikon, ijchò ján nangui Genesaret.

35 Jñà x̄it̄a xi ya i'nde-là, k'è nga kijtseèxkon Jesús nga jè xi ya ijchò, kisikí'nchré xíkjín kóhok̄ji ya i'nde ñánda chrañàt'aà; ikjoàn j'ũiko-là ngats'ii x̄it̄a xi xk'én ya ñánda tíjna Jesús.

36 Tsibítsi'ba-là nas'ín t̄a jè ítjòn nikje-là tsobà'ñó nga kàtandaà-ne; ngats'ii xi kitsobà'ñó nikje-là kjòndaà yijeé-ne.

15

*Jè kjoa xi síkits'ón x̄it̄a
(Marcos 7:1-23)*

1 Ijchò i'nga x̄it̄a fariseo ko x̄it̄a xi okóya kjotíxoma-là Nainá xi kiskìi Moisés xi inchrobà-ne Jerusalén nga kiskònangui-là Jesús, kitsò-là:

2 —¿Mé-ne jñà x̄it̄a xi kota'yàt'aà-lè, k'è nga kjèn, mì k'oaá s'ín oníjno-ne tsja koni s'ín síjé kjotíxoma-là x̄it̄a jchínga-ná?

3 Jesús k'èé kiskònangui-là jñà x̄it̄a koi, kitsò-là:

—¿Jñò, mé-ne mìkìi nìkitasòn-nò kjotíxoma-la Nainá nga koi onguítjngui-là kjotíxoma-la xíta?

⁴ Jè Nainá k'oaá kitsò: “Jchaxkoín na'èn-lè kò nea-lè”, kò: “Jè xi chjajno-la na'èn-là kò nea-là tjínè-la nga kiyá.”

⁵ Tanga jñò bixón-nó: “Jngoò xíta ma kitsò-la na'èn-là, o nea-la: Mìkìi koma siichját'aà-lè; ngats'ìi tsojmì xi tjín-na, jè Nainá jye kitsjaà-la.”

⁶ Bixón-nó nga mì tì kii tjí'nde-la nga skoexkón na'èn-là kò nea-la; mì tì kii koma kosìkò-nò. K'oaá s'ín 'nè jñò nga nìkìjna kjotíxoma-la Nainá nga koi onguítjngui-là kjotíxoma tsajòn.

⁷ Jñò, xíta xi jò ma isén-nò, ndaà kiiichja it'aà tsajòn Isaías, xíta xi kiiichja ngajo-la Nainá k'e nga kitsò:

⁸ Jñà xíta koi beèxkón-na xi tà 'én chja tanga jè inima-la kjiin tíjnat'aàxìn.

⁹ Nímé chjí-la nga beèxkón-na,

nga kjotíxoma-la xítaá okóya koni tsà kjotíxoma-la Nainá.

¹⁰ Jesús, k'eé kiiichja-la ngats'ìi xíta, kitsò-la:

—Tíná'yaà kò ndaà kàtachiya-nò.

¹¹ Jñà tsojmì xi tso'ba kine-ne xíta, mìtsà jñà xi síkìts'ón xíta nga nguixkòn Nainá; jñà xi tso'ba bitjo-ne xi síkìts'ón.

¹² Jñà xíta xi kota'yàt'aà-la Jesús ijchòkon, kiskònangui-la, kitsò-la:

—¿A tíjìn-lè jñà xíta fariseo kòjti-la k'e nga kii'nchré 'én koni s'ín kinokjoi?

¹³ Jesús kitsò-la:

—Nìton mé tsojmì tje xi mìtsà jè Na'èn-na xi tíjna ngajmii tsibítje, tjánè-né skanda kò ima-la.

¹⁴ Kì kii 'nè kindà; jñà xíta fariseo mejèn-la okó-la ndiyá jñà xíta xi mìkii tsejèn-la, tanga jñà, tìkooá mìkii tsejèn-la. Tsà jngoò xíta xi mìkii tsejèn-la, mìkii koma kòkò-la ndiyá ijngoò xi tìkoo mìkii tsejèn-la. Ingajò, yaá kixoya ngajo ñánda ch'o choòn.

¹⁵ Pedro kitsò-la Jesús:

—Tènojmiya-nájen jè kjoa koi koni s'ín kasi.

¹⁶ Jesús kitsò:

—¿Jñò, a tìkooá mìkii machiya-nò kó tsòya-ne?

¹⁷ ¿A mì fìya-nò ngats'ìi tsojmì xi ndsobaá chine-ná, indso'ba fìs'en, ikjoàn bitjojiin-ne yijo-ná?

¹⁸ Tanga ngats'ìi 'én xi ndsobaá nokjoàa-ná, inima-ná bitjojiin; jñà 'én koi, jñà-né xi síkìts'ón xíta nga nguixkòn Nainá.

¹⁹ Nga yaá bitjokàjiin inima-la xíta kjohítsjeèn xi ch'o tsò, koni jñà xi xíta sík'en, kò xi kjoa chijngui s'ín ts'e xíta xi kj'eè kii bixan kò xi jye chixàn, kò kjoa chijé, kò kjoa ndiso kò kjoa nga chjajno-ná.

²⁰ Ngats'ìi kjoa koi xi inima-la bitjokàjiin-ne xíta, jñà-né xi síkìts'ón xíta; tanga k'e nga bichiaá, nas'ín mìkii onijnòaa ndsaá, mìkii síkìts'ón-ná.

Kó kitsò jngoò chjoón xi xìn nangui-la nga kòkjeín-la it'aà ts'e Jesús

(Marcos 7:24-30)

²¹ Jesús itjokàjiin ya i'nde jè; kii i'nde ñánda 'mì Tiro kò Sidón.

²² Jngoò chjoón xi xíta Cananea xi ya i'nde-la, inchrobà-ne ijchòkon Jesús, ñó kiiichja, kitsò-la:

—iNa'èn, nga ya nchrobàt'aà-ne tje-la xitaxá ítjòn David [nga jì tíjna ngajo-la] jchahima-ná! Ndí tsòti-na ch'in neí tíjìn inima-la, tsee kjo'in tísíkjeín.

²³ Tanga Jesús nì mé 'én kiiichja-la jè chjoón. Kò jñà xíta xi kota'yàt'aà-la Jesús, kitsò:

—Kot'in-la chjoón jè, kàtjì-ne; tsí ch'o kjindáya tjingui-ná.

24 K'ée kitsò Jesús:

—Nainá kisìkasén-na, tà jñà j'ì katsjià x̄it̄a naxandá Israel nga kichijà koni orrè.

25 Tanga jè chjoón tsasìxkó'nchit'aà-la Jesús, kitsò-la:

—Na'èn, t̄ichjât'aà-ná.

26 Jesús kitsò-la:

—Mìkìi ndaà t̄jín nga chjaà'an-lá ñiño jñà ixti, ikjoàn k'oj-lá nañá.

27 Tanga jè chjoón kitsò:

—Jon, Na'èn, tanga jñà nañá kineé xi-la tsojmì xi bixòngui ímixa-la nei-la.

28 Jesús k'ée kitsò-la:

—Jì chjoón, 'ñó ndaà mokjeíin-lè it'aà ts'an. K'oas'ín kàtama koni s'ín mejèn-lè.

Ko jè tsòti-la chjoón, tik'ée kjòndaà-ne nga tijè-ne hora.

Kó kis'ìn Jesús nga kjìn skoya ch'in kisìndaà-ne

29 Jesús kii-ne ya i'nde ñánda 'mì Tiro ko Sidón ko tsatot'aà indii nandá Galilea. K'ée kiimijín-jno jngoò nindoò ko yaá tsibijna.

30 Kjìn jchán x̄it̄a ijchòtjingui-la ñánda t̄jina; ijchòko-la x̄it̄a xi tsá'yá kjoàn, x̄it̄a xi mìkìi tsejèn-la, x̄it̄a xi kótó tsja kjoàn, x̄it̄a xi mìkìi ma chja ko x̄it̄a xi kj'eíi ch'in t̄jín-la; yaá kisìkítsajngui ndsòko Jesús. Ngats'ii x̄it̄a koi kisìndaà-ne.

31 Tà kjòxkón-la jñà x̄it̄a k'e nga kijtseè nga komà kiichja-ne jñà xi mìkìi ma chja; koa jñà xi mìkìi ndaà síxá tsja, kjòndaà-ne; xi mì ma fi, komà kii-ne; koa jñà xi mìkìi tsejèn-la, kjòtsejèn-la. K'ée jeya kisikíjna Nainá koni kisiko jñà x̄it̄a-la naxandá Israel.

Kó kis'ìn Jesús nga ñijòn jmii x̄it̄a kisikjèn (Marcos 8:1-10)

32 Jesús kiichja-la x̄it̄a xi kota'yàt'aà-la, kitsò-la:

—Mahimakeè-ná jñà x̄it̄a koi. Jye kò jàn naxrjein t̄jín-la nga títsajna-ko-na, koa ñimé t̄jín tsojmì xi kine. Majín-na nga tà k'oas'ín síkasén chjan-na ni'ya-la tsà ya kohindaàya ndiyá.

33 Jñà x̄it̄a xi kota'yàt'aà-la Jesús kitsò:

—Jngoò i'nde it'aà xìn ñánda ñimé tsojmì t̄jín, ¿kós'ín koma sakó-ná tsojmì xi kòkjen jñà x̄it̄a koi nga 'ñó kjìn ma-ne?

34 Jesús kiskònangui-la, kitsò-la:

—¿Kó t̄jín ma inchrájín xi tíyijò-nò?

Jñà x̄it̄a xi kota'yàt'aà-la kitsò:

—Itoò ma-ne inchrájín, ko t̄jín chiba-najen t̄jín jtobá.

35 K'ée kitsò Jesús:

—Koatín-la kàtítsajnat'aà nangui jñà x̄it̄a.

36 Jesús kiskoé inchrájín xi itoò ma-ne ko jñà t̄jín jtobá, kitsjaà-la kjondaà Nainá, ikjoàn kisìxkoaya, kjòngatsja jñà x̄it̄a xi kota'yàt'aà-la mé-ne nga kitsjaà-la jñà x̄it̄a xi kjìn ma-ne.

37 Tsakjèn yije x̄it̄a kóhótjín skanda kó nga kjòski. K'e nga tsibíxkó-ne xi tsiningui-ne, nguì itoò ñisijá komà.

38 Jñà x̄it̄a xi tsakjèn, ñijòn jmii ma-ne xi x̄it̄a x'in, mìkìi kòxkeya jñà íchjín ko ixti.

39 Jesús kisihixat'aà x̄it̄a, ikjoàn jahas'en chitso koa kii ya i'nde ñánda 'mì Magdala.

16

Kó kitsò Jesús k'e nga jñà xità fariseo kò xità saduceo kisijé jngoò seña
(*Marcos 8:11-13; Lucas 12:54-56*)

¹ Jñà xità fariseo kò xità saduceo kiikon Jesús ñánda tíjna nga mejèn-là skót'aà tsà kixi kjoa nga Nainá kisikasén. Kisijé jngoò-là seña xi jeya tjin xi it'aà ts'e Nainá nchrobá-ne.

² Tanga Jesús kitsò-là:

—K'e nga jye mahixòn, jñò, bixón-nò: “Ndaà choòn nchijòn-lè, inì choòn ján ngajmì.”

³ K'e nga tajñòya bixón-nò: “Mikiì ndaà choòn nchrjein i'nde; ngajmì inì choòn kò ifi kjiya.” Jñò xi jò ma isén-nò, 'ya-nò kó choòn ngajmì tanga mikiì fiya-nò kó tsòya-ne kjojkón xi tíma nchrjein i'nde.

⁴ Jñà xità ts'en kò xità xi mikiì 'nchréñijon-là Nainá, jngoò seña síjé xi jeya tjin; tanga nimé seña skoe, tà jè skoe ts'e Jonás, xità xi kiichja ngajo-là Nainá. Jesús yaá kisikítsajna xità koi; jè, kii-né.

Jesús, mé kjoa xi tisingásòn-kò kjohítsjeèn xi okóya xità fariseo
(*Marcos 8:14-21*)

⁵ Jñà xità xi kota'yàt'aà-là Jesús, k'e nga tsatot'aà xijngoaa nandá, ki-chàajiin-là mikiì ts'a inchrájin.

⁶ Jesús kitsò-là:

—Chítsejèn-là koa tikindaa yijo-nò it'aà ts'e na'yo san-là xità fariseo kò xità saduceo.

⁷ Xità xi kota'yàt'aà-là Jesús tsohóko xíjín, kitsò-là:

—Koiì kotsò-ná nga mikiì kich'á inchrájin.

⁸ Jesús nitoón kijtseèya-là, kitsò-là:

—¿Mé-ne kòkixón-nò nga tsjin-nò inchrájin? 'Ñó chiba mokjeiín-nò it'aà ts'an.

⁹ ¿A mì machiya-nò, a mì bítsjeèn-nò k'e nga kisika'biá inchrájin xi 'òn ma-ne koa 'òn jmì xità x'in tsakjèn? ¿Kó tjin nisiyá tsibíxkó-ìsa?

¹⁰ ¿A mì tíjin-nò tikoaa k'e nga kisika'biá inchrájin xi itoò ma-ne kò ñijòn jmì xità tsakjèn? ¿Kó tjin nisiyá tsibíxkó-ìsa?

¹¹ ¿Mé-ne nga mikiì machiya-nò nga 'an mìtsà koi xi otixan-nò it'aà ts'e inchrájin? Jè-né nga tikindaa yijo-nò na'yo san-là xità fariseo kò xità saduceo.

¹² K'ée kjòchiya-là nga jè Jesús k'e nga okitsò-là: “Tikindaa yijo-nò”, mìtsà na'yo san-là inchrájin xi tsibénojmi-là, jñà kjohítsjeèn xi okóya jñà xità fariseo kò xità saduceo.

Kó kitsò Pedro yá xità-ne Jesús
(*Marcos 8:27-30; Lucas 9:18-21*)

¹³ K'e nga ijchò Jesús ya i'nde ñánda 'mì Cesarea ts'e Filipino kiskònangui-là jñà xità xi kota'yàt'aà-là. Kitsò-là:

—¿Kó tsò jñà xità? ¿Yá-ná 'an xi Ki'ndí-là Xità xan-là yijo-na?

¹⁴ Kitsò jñà xità xi kota'yàt'aà-là:

—Tjin xi tsò: “Jè Juan xi kis'iin bautizar xità.” Kò tjin xi tsò: “Jè Elías.” Tikoaa tjin xità xi tsò: “Jè Jeremías.” Kò xi k'ejí xità tsò-né: “Jngoò xità xi kiichja ngajo-là Nainá.”

¹⁵ K'ée kitsò Jesús:

—¿Koa jñò, kó bixón? ¿Yá-ná 'an?

¹⁶ K'ée kiichja Simón Pedro kitsò:

—Ji-né xi Cristo [xi xó kisikasén-ne Nainá], Ki'ndí-là Nainá xi tíjnakon.

¹⁷ Ikjoàn kiichja Jesús; kitsò-là:

—Mé tà ndaà-lè nga jì Simón, ki'ndí-là Jonás. Jè Nainá xi tǐjna ngajmì tsakó-lè ngats'iì kjoa koi; mìtsà xita isò'nde tsibénojímí-lè.

¹⁸ 'An, k'oaá xán-lè nga Pedro 'mì-lè [nga ndajo tsò-ne]; yaá isòn ndajo jè kındaasoàn naxandá-na; nas'ín jè nga ñò-là kjoabiyaà mìkì sǐkijne-là jǎn xita naxandá-na.

¹⁹ 'Aán tsjaà-lè ibi-là xotjoa-là naxandá xi jè otíxoma-là jè xi ngajmì nchrobá-ne; ngats'iì kjoa xi koi'ndi i isò'nde, tikoáá ján ngajmì Nainá tsjá'nde-né; ko jǎn kjoa xi mìkì koi'ndi i isò'nde, tikoáá ján ngajmì, Nainá mìkì tsjá'nde.

²⁰ Jesús kitsò-là jǎn xita xi kota'yàt'aà-là:

—Kì yá xi bènojímí-là nga 'an-ná xi Cristo [nga 'aán kisikasén-na Nainá].

*K'oaá s'ín tsibénojímí Jesús kjoabiyaà-là
(Marcos 8:31-9:1; Lucas 9:22-27)*

²¹ Tikoí-ne nàchrjein Jesús tsibíts'ia nga tsibénojímíya-là xita xi kota'yàt'aà-là nga jè, ján kjoí Jerusalén, koa jǎn xita jchínga ko xita sko-là no'miì ko xita xi okóya kjoíxoma-là Nainá xi kiskì Moisés, tseé kjo'in tsjá-là. Sǐk'en-né. Tanga k'e nga kijchò jàn nàchrjein, kjoaáya-là.

²² Jè Pedro k'eé kíkko Jesús ñánda it'aà xìn nga kùchjako nga mìkì ndaà tǐjn koni tsò. Kitsò-là:

—Na'èn, kì k'oaá s'ín nìkítsjìin. Mì k'oaá tsò Nainá nga k'oas'ín komat'in.

²³ Tanga Jesús kisikáfaya, kitsò-là jè Pedro:

—Tisít'aaxín-ná jì xita neí. Tà mejèn-lè nga jé binchaàtsji-ná. Mìtsà k'oas'ín nìkítsjìin koni s'ín tǐjn kjoíhítsjeèn-là Nainá. Ngaji tà k'oaá s'ín nìkítsjìin koni s'ín tǐjn kjoíhítsjeèn-là xita.

²⁴ Jesús k'eé kitsò-là xita xi kota'yàt'aà-là:

—Tsà yá xi mejèn-là nga xita ts'an koma, kàtatsjeiìn-takòn mé xi mejèn-là yijo-là; koni jngoò xita xi 'yajen krò-là, kàtǐjnandaà nga sǐkjeiìn kjo'in xi kjoa ts'an; ndaà kàtjít'aà-na.

²⁵ Nga nita yá xita xi mejèn-là kochrjetjì yijo-là nga nímé kjo'in sakò-là, tà saá sǐichja-né ko kjo'in kíjnajìin; tanga jè xi tǐjnandaà nga tsjá yijo-là xi kjoa ts'an, sakò-là kjoabinachon nga it'aà ts'an ndaà kíjna.

²⁶ ¿Mé xi sǐkijne jngoò xita nas'ín tjoé yije-là isò'nde tsà sǐichja inima-là? Nímé. ¿A komaá koi'chjí kjoabiyaà jngoò xita xi majìn-là nga kiyá? Majìn.

²⁷ 'An xi Kì'ndí-là Xita xan-là yijo-na kítjojeén òjngoò k'a-na nga kjoikooa kjoajeya-là Na'èn-na ko àkjale-là nga sichikon-t'ian nga jngoò òjngoò xita koni s'ín kisikitasòn.

²⁸ Okixí xi xan-nò, títsajnajìin i'nga ijndé xita xi mì kì kiyá skanda k'e nga skoe-na xi Kì'ndí-là Xita xan-là yijo-na nga kítjojen òjngoò k'a nga kotixoma.

17

*Kii komà nga jahatjìya í'ño isén-là Jesús ya isò'nga nindoò
(Marcos 9:2-13; Lucas 9:28-36)*

¹ Nga komà joòn nàchrjein Jesús kilmijìn-jno jngoò nindoò xi 'nga kji; kíkko jè Pedro, Jacobo, ko Juan xi 'ndse ma Jacobo.

² K'e nga ijchò i'nde jè, Jesús, jahatjìya í'ño isén-là nga nguixkon jǎn xita koi. K'oaá kji komà isén-là koni kji ts'oi ko jè nikje-là kjòchroba-né koni isén ndobá.

³ Jǎn xita koi tà nitoón kijtseé Moisés ko Elías nga nchijoókjoò Jesús.

⁴ Pedro kitsò-là Jesús:

—Na'èn, ndaà tǐjn nga i títsajnaá; tsà mejèn-lè jàn ni'ya xkójndà kındaà-jen, jngoò tsiji, jngoò ts'e Moisés ko xi òjngoò ts'e Elías.

⁵ K'e nga tíchja Pedro, j'ìi jngoò 'nguién-la ifi xi ote kji xi tsibí'ma xita koi, ko ya ijìin ifi kina'ya jngoò-la 'én xi kitsò:

—Jè jèe xi ki'ndí-na xi 'ño matsjake ko xi xó jaàjìin-na; jè tìná'ya-là.

⁶ Jñà xita xi kota'yàt'aà-la Jesús k'e nga kii'nchré, tà kitsakjòn-né. K'ée tsoyijò tsakjàn skanda it'aà nangui.

⁷ Jesús kiikasit'aà chraña-la; kisikjaníya-la, kitsò-la:

—Tisítjeen, kì tsakjón-jèn.

⁸ K'e nga kiskoòtsejèn xita koi mì tì yá tjín-ne. Tà jè tajngoò síjna Jesús.

⁹ K'e nga inchrohòjen-t'aà-ne nindoò, Jesús kitsò-la:

—Kì yá xita xi bènojmí-là jè kjoa xi kà'yaà skanda k'e nga kjoaáya-na it'aà ts'e kjoabiyaà 'an xi Ki'ndí-la Xita xan-la yijo-na.

¹⁰ Jñà xita xi kota'yàt'aà-la Jesús kiskònangui-la, kitsò-la:

—¿Mé-ne kòtsò-ne xita xi okóya kjoatixoma-la Nainá xi kiskii Moisés nga jè Elías kjoí itjòn?

¹¹ Jesús kitsò:

—Okixi-né, jè kjoí itjòn Elías, ko jè koiindaàjìin yije kjoa.

¹² Tanga 'an, k'oaá xán-nò, jè Elías, jyeé j'ìi. Jñà xita, mìkii kijtseèxkon. Ta k'oaá s'ín kisikò koni s'ín mejèn-la. K'oaá tis'ín komat'ian 'an xi Ki'ndí-la Xita xan-la yijo-na; tseé kjo'in tsjá-na jñà xita.

¹³ Jñà xita xi kota'yàt'aà-la Jesús k'ée kjòchiya-la nga jè Jesús, k'e nga tíchja it'aà ts'e Elías, jè Juan xi kis'iin bautizar xita xi otsò-la.

Kós'ín koma kitjokàjìin inima ch'o-la neíi xi tjín-la xita

(Marcos 9:14-29; Lucas 9:37-43)

¹⁴ K'e nga ijchò Jesús ñanda títsajna xita xi kjìn ma-ne, jngoò xita ijchò kasit'aà-la nga tsasixkó'nchit'aà-la, kitsò-la:

¹⁵ —Na'èn, चाहिमा ki'ndí-na. Ch'in biyaàxín tjín-la. 'Ñó tse kjo'in síkjeiín. Jyeé kòkjìn k'a kaàjìin ni'ín ko nandá.

¹⁶ Íi kòf'ìkò-la jñà xita xi kota'yàt'aà-lè, tanga mìkii mandaà-la.

¹⁷ Jesús kitsò:

—Jñò xita xi mìkii mokjeiín-nò it'aà ts'an xi ch'o 'nè. ¿Skanda mé nachrjein kótijnako-nò? ¿Skanda mé nachrjein ska-na kjoa-nò? Nchrohóko-ná jè ti ijndé.

¹⁸ Jesús tsohótiko jè inima ch'o-la neíi koa itjokàjìin-ne yijo-la jè ti. Tijè-ne hora, nitoón kjòndaà-ne.

¹⁹ Jñà xita xi kota'yàt'aà-la Jesús kiskònanguit'aàxìn-la. Kitsò-la:

—¿Mé-ne ngajen mìkii kòbitjoiin-najen jè inima ch'o-la neíi?

²⁰ Jesús kitsò-la:

—Mìkii komà-nò koi-né nga tà chiba mokjeiín-nò it'aà ts'an. Okixíi xi xan-nò tsà ta okji kòkjeiín-nò koni kji xojmá mostaza nga itsé kji, koma k'oín-là nindoò: “Tixín ijndé. T'in ján xijngoàà ñanda it'aà xìn.” Koa jè nindoò kosit'aàxìn-né. Jñò, nímé kjoa xi 'ín koma-nò tsà ndaà kòkjeiín-nò.

²¹ Jñà inima ch'o-la neíi xi okjoàn, k'ée bitjokàjìin nga nokjoat'aà-la Nainá ko nga bijnachjaán.

K'oaá s'ín tsibénojmí Jesús kjoabiyaà-la xi ma-ne jò k'a

(Marcos 9:30-32; Lucas 9:43-45)

²² K'e nga taña kitjen nga tjíma ya i'nde Galilea, Jesús kitsò-la jñà xita xi kota'yàt'aà-la:

—An, xi Ki'ndí-la Xita xan-la yijo-na, yaá tsoba'ño-na jñà xita,

²³ ikjoàn sùk'en-na. Tanga k'e nga kijchò jàn nachrjein nga kiyá, kjoaáya-na. Jñà xita xi kota'yàt'aà-la k'e nga kiì'nchré 'én koi tà ba koma-la.

Tsojmì xi machítjì ts'e ingo itjòn

²⁴ K'e nga ijchò Jesús kò xità xi kota'yàt'aà-la ján naxandá Capernaum, jña xità xi bíxkó ton ts'e ingo ítjòn kiskònangui-la Pedro kitsò-la:

—Jè Maestro-lè, ¿a mìkiì bíchjí ton ts'e ingo?

²⁵ Jè Pedro kitsò:

—Jon, bíchjí-né.

K'e nga jahas'en ni'ya Pedro, Jesús, jè kiìchja ítjòn-la, kitsò-la:

—¿Kó si Simón, jè xitàxá ítjòn xi i isò'nde ts'e, yá-né xi síkíchjítjì tsojmì kò ton-sá? ¿A jña-né xi i naxandá-la, o xi jña-né xi xin i'nde-la?

²⁶ Pedro kitsò:

—Jña xi xin i'nde-la xi bíchjí.

K'ée kitsò-la Jesús:

—Jña xi i naxandá-la nimé koiìchjí.

²⁷ Tanga mé-ne nga mì ch'o kitsò-ná jña xità, t'in ján indii ndáchikon. Tikatjen-jìin kichá libá-lè xi tsojà'nño tìn, koa jè tìn xi chjoé ítjoìn, chíx'eìi tso'ba; ya tjí'a jngoò ton. Komaá-ne nga kichjí xi ts'an kò tsjìi. Tikoii, tíchjí-la.

18

Yá xità-ne xi tíjna ítjòn ít'aà ts'e Nainá

(Marcos 9:33-37; Lucas 9:46-48)

¹ Jña naxrjein koi jña xità xi kota'yàt'aà-la Jesús ijchòkon nga kiskònangui-la; kitsò-la:

—Jña xità xi jè otíxoma-la xi ngajmii nchrobá-ne, ¿yá-ne xi tíjna ítjòn nga isa 'ño chí-la?

² Jesús kiìchja jngoò-la ndí ti. Kisikasíjna jngoò osen-la jña xità.

³ Kitsò:

—Okixíi xi xan-nò, jño, tsà mì kì síkjatjìya-là kjohítsjeèn-nò kò tsà mì kì k'oas'ín s'een koni jña ndí ixti mìkiì kítjás'en-jñoò ñánda tíhotíxoma jè xi ngajmii nchrobá-ne.

⁴ Jè xi síkjajen-la inima-la koni ndí ti jè, jè-né xi tíjna ítjòn-la ngats'ii xità xi jè tíhotíxoma-la xi ngajmii nchrobá-ne.

⁵ Nità yá-ne xi ít'aà ts'an skoétjò jngoò ndí ti koni jè, 'aán xi skoétjò-na.

Mé xi ok'in-la jña xità xi jé ótsji-la xità xi kj'eíi

(Marcos 9:42-48; Lucas 17:1-2)

⁶ Nità yá-ne xi jé skìnjìin jngoò ndí xità ima xi mokjeiín-la ít'aà ts'an, isaá-la ndaà koma tsà síngui'ño jngoò ndajo natsí ís'iin, ikjoàn síkatjen-jìin ndáchikon ñánda nga 'ño nanga 'ncha nandá.

⁷ Ima xó-ne jña xità isò'nde nga tjín jchán xità xi ótsji'nde-la nga mejèn-la nga sakó jé. Tanga xó k'oaa koma-ne isò'nde, tanga ima xó-nè jè xità xi ótsji-la jé xi kj'eíi xità.

⁸ Tsà jè ndsaa kò ndsokoò ótsji jé-nò, tíchátjòn koa kjiin tikatsjoò. Isaá ndaà-nè tsà xkoán titsjoò nga kítjás'een ñánda s'e-nò kjoabinachon, mì k'oaa-ne tsà jò ma ndsaa kò ndsokoò koa ján onguió jjiin ni'ín ts'e i'nde kjo'in nità mé naxrjein-ne.

⁹ Tsà jè xkoòn ótsji jé-nò, tìnaxrjeè, kjiin tikatsjoò. Isaá ndaà-nè tsà jngoò ma xkoòn nga kítjás'een ñánda s'e-nò kjoabinachon, mì k'oaa-ne tsà jò ma xkoòn koa ján onguió jjiin ni'ín ts'e i'nde kjo'in.

Kjoa xi mangásòn ts'e orrè xi kichjì

(Lucas 15:3-7)

¹⁰ 'Nijngoò ndí xità koi xi naxrjenguioò; k'oaa xán-nò, ján ngajmii, jña àkjale-la xità koi, yaá títsajna kjit'aà nga nguixkon Na'èn-na xi tíjna ngajmii.

11 'An xi Ki'ndí-la Xita xan-la yijo-na koií xá j'i-na nga j'i kàchrjekàjñàà kjo'in jñà xita xi kichijà.

12 '¿Kó bixón? Tsà jngoò xita xi jngoò sìndõ ma orrè-la koa tsà sijchaya jngoò ján jjiin ijñá, ¿a mìtsà siikítsajna jñà xi ñijòn-kaàn ko chrj'oòn ñijòn ma nga kjoí kátsji jè orrè xi kichijà jngoò?

13 Tsà kotsji-la, okixíí xi xan-nò, isaá tsja koma-la nei-la jè orrè xi jngoò ma, mì k'oaá-ne jñà xi kjìn ma xi mì kì kichijà.

14 K'oaá s'ín mejèn-la Nainá xi tjna ngajmii nga nijngoò xita sìchja inima-la.

Mé xi mochjeén k'e nga sindaàjiiin jngoò-la xita

(Lucas 17:3-4)

15 'Tsà jè 'ndsì ch'o tísiko-lè, tinókjoa-la k'e nga tà jè tajngoò tjna; tindaàjiiin-koii jè kjoa-la; tsà kjì'nchré-lè, jyeé ndaà kichibà-nò 'ndsì.

16 Tanga tsà mìkii kjì'nchré-lè, k'eé tinókjoa-la tsà jngoò ko tsà jò xita mé-ne nga kjì'nchré yije-ne 'én xi chibà koni s'ín tíchja Xojon-la Nainá nga tsò: Mochjeén-né tsà jò ko tsà jàn xita xi tsjá 'én nga koma sindaàjiiin nita mé kjoa-ne mé-ne nga chí-la.

17 Tsà mìkii 'nchréñijon-la jñà xita koi, koatìn-la xita naxandá-la Nainá; koa tsà mìkii 'nchréñijon-la jñà xita naxandá-la Nainá, tà k'oas'ín jchatakòin koni tsà jngoò xita xi mìkii beèxkon Nainá, koni tsà jngoò xita xi tsojmi síkíchítjì.

18 'Okixíí xi xan-nò, jñò, ngats'ii kjoa xi koi'nde i isò'nde, tikoáá ján ngajmii Nainá tsjá'nde-né; koa jñà kjoa xi mìkii koi'nde i isò'nde, tikoáá ján ngajmii Nainá mìkii tsjá'nde.

19 'Jngoò k'a koa xan-nò: tsà jò ma-nò i isò'nde xi tijnngoò takòn nga sijét'aà-là Na'èn-na xi tjna ngajmii nita mé kjoa-ne, tsjá-nò.

20 Ya ñánda títsajna jò jàn xita-na xi it'aà ts'an bixoña, yaá tijnajiin osen-la.

21 K'eé kii kasit'aà chraña-la jè Pedro, kiskònangui-la Jesús, kitsò-la:

—Na'èn, ¿kó tjin k'a siijchàat'aà-la xinguiáa k'e nga tsà ch'o tísiko-na? ¿A skanda itoò k'a?

22 Jesús kitsò-la:

—Mìtsà xan-lè itoò k'a; xaán-lè itoò k'a xi jàn-kaàn ko te.

Jngoò ch'i'nda xi mì kì kisijchàat'aà-la xíkjin

23 'Koni s'ín otíxoma jè xi ngajmii nchrobá-ne, k'oaá s'ín tjin koni kis'iin jngoò xitaxá itjòn xi kisijé-la kindá xita ch'i'nda-la.

24 K'e nga tís'ín kindá j'ii jngoò ch'i'nda-la xi 'ño kjìn millón ton kitjen-la.

25 Ch'i'nda jè tsjin-la ton xi koiichjí-la. Jè nei-la kitsjaà okixi nga katasatjna osen jè chá, ko chjoón-la ko ixti-la, ngats'ii tsojmi xi tjin-la mé-ne nga kochjí-la ton xi kitjen-la.

26 Ch'i'nda jè tsasìxkó'nchit'aà-la jè nei-la; tsibítisi'ba-la, kitsò-la: “Na'èn, tjin-lè kjondaà, chíñakjoa-ná; kichjí yijeé-lè ngats'ii xi kitjen-na.”

27 Jè nei-la kjòhimakeè ch'i'nda-la, kisijchàat'aà-la nga yije kindá xi kitjen-la koa kisikijnandejí-ne.

28 Tik'e-ne nga itjo ni'ya ch'i'nda jè, kisatiikjoò jngoò ch'i'nda xíkjin xi tikoá ton kitjen chiba-la xi ts'e. Kitsobà'ño ís'iin nga mejèn-la kinchàjta-la, kitsò-la: “Tíchjí-ná xi kitjen-lè.”

29 Koa jè ch'i'nda xíkjin tsasìxkó'nchit'aà-la, tsibítisi'ba-la. Kitsò-la: “Chíñakjoa-ná, kichjí yijeé-lè xi kitjen-na.”

30 Tanga jè mìkii kòkjeiín-la. Ta saà ndayá kiskinìs'en skanda k'e nga koiichjí yije-la kóhotjín xi kitjen-la.

31 K'e nga kijtseè jñà ch'i'nda xíkjin xi i'nga, baá koma-la. K'eé kii tsibénojmi-la nei-la ngats'ii kjoa xi komà.

³² Jè x̄itaxá ítjòn xi nei-la, k'eé kiskinìkjaá chí'nda jè, kitsò-la: “Jì chí'nda xi ch'o 'nì. 'An kisìjchàat'aà-lè ngayije xi kitjèn-lè k'e nga tsibítsi'ba-ná.

³³ Tìkoáá ngaji tjí'nde-lè nga jchahimachii chí'nda xinguii koni s'ín kisìko-lè nga kjòhimakeè-lè.”

³⁴ Jè nei-la kjòjtí-la, k'eé kitsjaà okixi nga kàt'ì-la kjo'in skanda k'e nga koiichjí yije xi kitjèn-la.

³⁵ Jesús kitsò:

—Jñò k'oaá tìs'ín s̄ìko-nò nga jngoò ìjngoò Na'èn-na xi tíjna ngajmii tsà nga mì koo inìma-nò sijchàat'aà-là jé-la xinguiio.

19

Kiis'ín tsakóya Jesús it'aà ts'e x̄ita xi tsjiin xíkjin

(Marcos 10:1-12; Lucas 16:18)

¹ K'e nga jye kiichja Jesús, kiì-ne ya Galilea ján nangui Judea xi tíjna xijngoáà xajngá nandá Jordán.

² 'Nó kjìn x̄ita kiitjngui-la koa yaá kisindaà-ne ì'nde jè jñà x̄ita xi xk'é.

³ Ijchò i'nga x̄ita fariseo ya ñánda tíjna Jesús nga mejèn-la skónachan-la. Ikjoàn kiskònangui-la, kitsò-la:

—¿A tjí'nde-la xi x'ín nga tsjiin chjoón-la xi n̄ita mé kjoa-ne?

⁴ Jesús kitsò-la:

—¿A kj'eè bixkejñò Xojon-la Nainá nga tsò: “Nainá, k'e nga sa tsibíndaà x̄ita, tsibíndaà x'ín kò chjoón?”

⁵ K'oaá kitsò: “K'oaá ma-ne nga jè x'ín s̄ìkijna na'èn-la kò nea-la nga kijnako chjoón-la. Ta jngoò x̄ita koma-ne ingajò.”

⁶ Mìtsà tì jò ma-ne, tà jngoò koma-ne. K'oií kjoa-la nga mì yá x̄ita tjí'nde-la nga s̄ìtsjiin-ne xíkjin xi Nainá kisìjngoò.

⁷ Jñà x̄ita fariseo kiskònangui-la Jesús:

—¿Mé-ne jè Moisés kitsjaà'nde-ne nga tsò: xojon kàtasindaà nga koma tsjín xíkjin x̄ita?

⁸ Jesús kitsò-la:

—Koií-né nga tájaajjìn tjin inìma-nò, Moisés kitsjaà'nde-nò nga kijnioò íchjín-nò, tanga k'e nga sa tàts'en-la kjoa, mì k'oaá s'ín tjin.

⁹ 'An k'oaá xán-nò, jè x'ín xi tsjín-ne chjoón-la, tsà mìtsà kjoa chijngui tísìko, kò tsà kj'eí chjoón kixan-kò, jyeé kjoa chijngui tís'ín jè x'ín. Tìkoáá tsà jè x'ín xi kixan-kò jngoò chjoón xi kitsjiin x'ín-la, tìkoáá kjoa chijngui tís'ín.

¹⁰ Jñà x̄ita xi kota'yàt'aà-la Jesús kitsò:

—Tsà k'oaá s'ín 'iín tjin kjoa ts'e x̄ita xi bixan, ìsaá-la ndaà s'e tsà mì kì kixan x̄ita.

¹¹ Jesús kitsò-la:

—Tjín x̄ita xi mìkiì mokjeiín-la kjohítsjeèn jè; tà jñá x̄ita xi Nainá xó k'oaas'ín kitsjaà-la.

¹² Tjín x̄ita xi mìkiì bixan nga xó k'oaas'ín kits'iin-ne nga mì íchjín s̄ìs'in-la; tìkoáá tjin x̄ita xi x̄ita xíkjin okisìko nga mì íchjín s̄ìs'in-la; tìkoáá tjin x̄ita xi mìkiì bixan nga k'oaas'ín tsibínè-la yijo-la nga mì íchjín s̄ìs'in-la nga mejèn-la s̄ìxá it'aà ts'e kjotíxoma-la ngajmii. Jñà x̄ita xi chíkjoa-la nga mokjeiín-la kjoa koi, k'oaas'ín kàtasíkitasòn.

Kii kitsò Jesús nga kisichikon-t'in ndí ixti

(Marcos 10:13-16; Lucas 18:15-17)

¹³ Jñà x̄ita j'ìko-la ndí ixti ñánda tíjna Jesús nga mejèn-la kòt'aà-la tsja kò kiìtsi'batjì, tanga jñà x̄ita xi kota'yàt'aà-la Jesús tsohótiko jñà x̄ita xi j'ìko ndí ixti.

14 K'eé kitsò Jesús:

—Tjì'nde-là jǎà ndí ixti nga kàtjanchrobákon-na. Kì binchahikon-là. Jǎà xi k'oa s'ín tjín iníma-là koni ts'e ndí ixti, jyeé ts'e ngats'ì kjòndaà xi tjín ya ñánda tíhotíxoma jè xi ngajmì nchrobá-ne.

15 Jesús tsohósòn-là tsja jǎà ndí ixti; ikjoàn kii-ne ya i'nde jè.

Xita xi 'ñó kjìn tsojmì tjín-la

(Marcos 10:17-31; Lucas 18:18-30)

16 Jngoò xita ijchòkon Jesús, kiskònangui-là, kitsò-là:

—Maestro, ¿mé kjòndaà xi s'iaàn nga s'e-là kjoabinachon iníma-na nita kjé-ne?

17 Jesús kitsò-là:

—¿Mé-ne chjínangui-ná it'aà ts'e kjoa xi ndaà tjín? Mìtsà yá tjín xi ndaà xita, tà jngoò Nainá. Tsà mejèn-lè nga s'e-lè kjoabinachon nita kjé-ne, tikitasoìn kjotíxoma-là Nainá.

18 Xita jè kiskònangui:

—¿Ñá-láá kjotíxoma-ne?

Jesús kitsò-là:

—“Kì xita nìk'in; kì kjoa chijngui 'nì; kì chijé 'nì; kì 'én ndiso nokjoì it'aà ts'e xita xi kj'eíí;

19 jchaxkoín na'èn-lè ko nea-lè; tìtsjachi xita xingui koni tsà tì yijo tsiji-ne.”

20 —Ngats'ì kjotíxoma koi jyeé kisikitasoàn —kitsò jè ti—. ¿Mé xi chija isa-na?

21 Jesús kitsò-là:

—Tsà mejèn-lè nga nguì kixi kijni, t'in, tatijni yije tsojmì xi tjín-lè. Jè ton-lè tika'bí-là xita ima mé-ne nga s'e-lè kjoa machíkon-t'in ján ngajmì. Ikjoàn nchrobátjngui-ná.

22 Xita jè, k'e nga kii'nchré 'én koi, tà baá komà-là, koií kjoa-là nga 'ñó kjìn tsojmì tjín-là.

23 K'eé kitsò-là xita xi kota'yàt'aà-là Jesús:

—Okixíí xi xan-nò. 'Ñó 'in koma-là jǎà xita nchiná nga kjoahas'en-jìin ñánda tíhotíxoma jè xi ngajmì nchrobá-ne.

24 Nguì jngoò k'a koxan-nò, isaá mì 'in koma-là jngoò cho camello nga kjoahas'en xkon nindoò xi tjahaña-ne nikje, mì k'oaá-ne koni jngoò xita nchiná xi 'ñó tjín-là tsojmì nga koma kjoahas'en-jìin ñánda tíhotíxoma jè xi ngajmì nchrobá-ne.

25 K'e nga kii'nchré 'én koi jǎà xita xi kota'yàt'aà-là Jesús tà kjòxkón-là. K'eé kitsò:

—¿Yá-né xi kitjokàjìin kjo'in kjoa ts'e jé-là?

26 Jesús kiskoò'an, kitsò-là:

—Jǎà xita mìkì koma-là kochrjekàjìin kjo'in iníma-là. Tanga xi Nainá komaá-là ngats'ì kjoa.

27 K'eé kitsò Pedro:

—Na'èn, ngajen, jyeé kiníkítsajna yije-jen ngats'ì tsojmì xi tjín-najen, koa jì tjaàtjngui-lèjen. ¿Mé xi tjoé-najen?

28 Jesús kitsò-là:

—Xi okixíí xi xan-nò, k'e nga kijchò nachrjein nga koxitseyá jngoò k'a isò'nde, ko 'an xi Ki'ndí-là Xita xan-là yijo-na, k'e nga kótijnasoàn íxile xi 'ñó jeya tíjna, jǎò, xi jye 'an tjaàtjngui-ná, tikoáá yáá kitsajnasòn íxile ts'e kjotíxoma xi tejò ma-ne, nga jǎò kíndaàjìin-là jǎà xita xi tejò tje-là ts'e naxandá Israel.

29 Ngats'iì xi kjoa ts'an kisikíjna ni'ya-la, 'ndse, ndichja, na'èn-la, nea-la, chjoón-la, ixti-la, nangui-la, jngoò sìndo k'a k'oa tjin tjoé isa-la. Tikoáá tjoé-la kjoabinachon nita kjé-nè.

30 I'ndeji, kjin xita xi títsajna ítjòn, k'e nga koma iskan jña kítsajna tjingui. Ko xi títsajna tjingui i'ndeji k'e nga koma iskan jña kítsajna ítjòn.

20

Chì'nda xi kisixáko tsojmì tjè

1 'Koni s'in otíxoma jè xi ngajmì nchrobá-ne, k'oaá s'in ngaya-la koni tsà jngoò xita xi tjin-la nangui. Kii nga tajñòya nga kii kátsji chì'nda xi sìxáko ñánda tjin-la toò uva.

2 K'e nga jye tsibíndaàjìin-ko nga koiichjí-la koni tjin síkijne xita chì'nda nga jngoò nachrjein, ikjoàn kisikasén ñánda kisixá.

3 Ijngoò k'a kii jè nei-la xá koni xi ñijaàn-la nga tajñòya. Kijtseè isa chì'nda xi tíyijòjìin ndítsin xi tsjin-la xá.

4 Kitsò-la: "Tanguió tixáko-ná. 'An kichjí-nò koni tjin machjí-nò." Kii chì'nda koi nga kisixá.

5 Jè nei-la xá, kii ijngoò k'a k'e nga ijchò nchisen. Tikoáá kii ijngoò k'a k'e nga ijchò xi jàn nga kjòhoxòn.

6 Jye-la ijchò tsà xi 'òn nga kjòhoxòn, itjo ijngoò k'a jè nei-la xá; koa kisakò isa-la chì'nda xi tà jyò títsajna. Kitsò-la: "¿Mé-ne tà jyò títsajna-nò kó nga kò'ba-nò nachrjein nga mì nixá-nò?"

7 Jña chì'nda koi kitsò: "Koií-né nga mì yá tsjá xá-najen." K'ée kitsò-la: "Tanguió ndaà tsà jñò; tanguí tixá ján jìin tsojmì tjè-na."

8 K'e nga jye kòjñò, jè nei-la xá kitsò-la jè xita xi síkinda chì'nda-la: "Tínókjoa-là ngats'iì chì'nda. Tichjí-la. Títs'iaako-ne jña xi iskan kòfahas'en xá-la; koa jña xi ítjòn kòfahas'en, tikjehet'aà-ne."

9 K'ée kiichja-la jña chì'nda xi jahas'en xi 'òn nga kjòhoxòn; k'oaá tjin tsibíchjí-la koni tjin chí-la nga jngoò nachrjein nga jngoò ijngoò.

10 K'e nga kjòchjí-la jña chì'nda xi jahas'en tajñòya, k'oaá komà-la tsà isaá tse kochjí-la. Tanga tà ngàsòn tjin kjòchjí-la koni tjin machjí-la nga jngoò nachrjein nga jngoò ijngoò.

11 K'e nga jye kjòchjí-la chì'nda koi ikjoàn tsibíts'ia nga tsatít'aà jè nei-la xá.

12 Kitsò-la: "Jña chì'nda xi iskan kòbijchó, tà jngoò hora kàsíxá, koa ngajen kànixá-najen nga kò'ba nachrjein koa kànìkjeiín-lajen ndobá nga kò'ba nachrjein. Tà ngàsòn tjin tìbíchjí-najen."

13 Tanga jè nei-la xá kitsò jngoò-la jña chì'nda: "Ji amigo mìtsà mé xi ch'o tìsìko-lè; k'oaá tjin tìbíchjí-lè koni tjin chí-la nga jngoò nachrjein nga k'oaá s'in kàchibá.

14 Chjoí chíjì-lè koa t'in-ne. K'oaá s'in mejèn-na nga k'oa tì tjin tsjaà-la jè xi iskan kàsíxá koni tjin tìtsjaà-lè.

15 Nga ko ton-na, ¿a mì tjí'nde-na nga k'oas'in s'iaàn koni s'in mejèn-na? ¿A maxítakòn-né nga 'an ndaà xita?"

16 Jesús kitsò isa:

—K'oaá s'in koma jña xita xi títsajna tjingui nachrjein i'ndeji, nga koma iskan, jña kítsajna ítjòn; koa jña xi títsajna ítjòn i'ndeji nga koma iskan jña kjoehet'aà-ne. [Kjin ma-ne xi xó chja-la Nainá tanga chiba ma-ne xi tjájiin.]

K'oaá s'in tsibénjímí Jesús kjoabiyaà-la xi ma-ne jàn k'a

(Marcos 10:32-34; Lucas 18:31-34)

17 Jesús k'e nga nchifi ján naxandá Jerusalén, kiichjat'aaxìn-la jña xita xi kota'yàt'aà-la xi tejò ma-ne, kitsò-la:

18 —I'ndeḡ nga titsahonguiá naxandá Jerusalén, 'an xi Ki'ndí-la Xita xan-la yijo-na yaá tsoḡà'nó-na xita sko-la no'miì ko xita xi okóya kjoḡíxoma-la Nainá xi kiskii Moisés nga koi'nè-na kjoabiyaa,

19 ikjoàn siingatsja-na jña xi mitsà xita judío nga siisobà-na, kojà-na, koḡt'aà-na krò. Tanga xi koma jàn naxrjein kjoaáya-na.

*Kjondaà xi kisijé nea-la Jacobo ko Juan
(Marcos 10:35-45)*

20 Nea-la Jacobo ko Juan ixti-la Zebedeo ijchòkon ñanda tíjna Jesús. Tjiko ixti-la. Tsasixkó'nchit'aà-la Jesús nga kisijé jngoò-la kjondaà.

21 Jesús kiskònangui-la, kitsò-la:

—¿Mé xi mejèn-lè?

Jè chjoón kitsò:

—Ya ñanda koḡixomai, tjii okixi nga ya kàtiyijòt'aà-lè ixti-na. Jngoò kàtijnakixi-lè koa jngoò kàtijnat'aà-lè xi ngaskón-lè.

22 Jesús kitsò-la:

—Mikiì 'yaà mé xi nìjé. ¿A kichikjoaá-nò nga kotojñoò jè kjo'in xi 'an kotojñaà?

Xita koi kitsò:

—Kichikjoaá-najen.

23 K'ée kitsò-la Jesús:

—Okixi-né, k'oaá tis'in kotojñoò kjo'in koni 'an, tanga xi 'an tsjaà-nò nga ya kitsajnat'aà-ná ya kixi-na ko ngaskón-na mitsà 'an oko-na nga tsjaà-nò. Jña i'nde koi, jña tjoé-la xita xi Nainá titsajnaandaà-la nga tsjá-la.

24 K'e nga kiì'nchré jña xita-la Jesús xi i'nga xi te ma-ne, kjoḡti-la it'aà ts'e xita xi jò ma-ne.

25 Jesús kiìchja-la, kitsò:

—Jyeé tíjin-nò nga jña xita sko-la naxandá, nangui síkítsajna xita-la xi jña otíxoma-la. Tjikoáá jña xita xi 'nga xá tjín-la, jña xi beè nga otíxoma-la xita.

26 Tanga jño mikiì k'oas'in s'een. Tsà jngoò xita xinguiqo mejèn-la 'nga kójna, jè xi kàtasíxá-la xita xi i'nga.

27 Ko jè xi mejèn-la kójna ítjòn, chi'nda-nò kàtama.

28 'An xi Ki'ndí-la Xita xan-la yijo-na, mitsà koi xá j'i-na nga 'an koḡ'in-na, tà saá 'an siixá-la xita xi i'nga ko tsjaá yijo-na nga kiyá mé-ne nga kjin xita kitjokajijn-ne kjo'in xi kjoa ts'e jé-la.

*Kó kisiko Jesús nga kisindaà-ne xita xi jò ma-ne xi mikiì tsejèn-la
(Marcos 10:46-52; Lucas 18:35-43)*

29 K'e nga jye nchifi-ne ya naxandá Jericó, kjin xita kiitjinguila Jesús.

30 Ya indii ndiyá koni s'in tífi Jesús, jò xita xi mikiì tsejèn-la titsajna. K'e nga kiì'nchré nga jè Jesús tífaya ndiyá, 'ño kiìchja-la kitsò-la:

—jNa'èn, nga ya nchrobàt'aà-ne tje-la xitaxá ítjòn David [nga ji tijna ngajo-la] jchahimatakòn-nájen!

31 Jña xita xi tjiko Jesús tsohótiko-ne nga jyò kàtítsajna, tanga jña xita xi mikiì tsejèn-la, isaá 'ño kiìchja, kitsò:

—jNa'èn, xi tje-la David, jchahimatakòn-nájen!

32 K'ée tsasijna Jesús koa kiìchja-la, kiskònangui-la, kitsò-la:

—¿Mé xi mejèn-nò nga siiko-nò?

33 Jña xita koi, kitsò:

—Na'èn, mejèn-najen nga kàtatsejèn-najen.

34 Jesús kjòhimakeè jña xita koi. Tsohót'aà-la tsja xkon koa nitoón kjòtsejèn-la. Ikjoàn kiitjinguila Jesús.

21

*Kó kitsò x̄ita naxandá k'e nga jahas'en-jìin Jesús ján Jerusalén
(Marcos 11:1-11; Lucas 19:28-40; Juan 12:12-19)*

¹ K'e nga jye kjomeè bijchó chraña-la naxandá Jerusalén ijchò jngoò naxandá xi 'mì Betfagé ya chrañat'aà-la nindoò Yá Olivo. Jesús kisikasén jò x̄ita xi kota'yàt'aà-la.

² Kitsò-la:

—Tanguió ján ndí naxandá itsé xi kijnat'aà ján koa ya sakó jngoò-nò orra xi tjít'aà'ño kò ndí búrró ki'ndí-la. Chíjnda'ño koa nchrohóko-ná.

³ Tsà yá xi kó kitsò-nò, kot'in-là: “Jè xó Na'èn-ná kochjeén-la koa n̄itoón xó s̄ikasén-ne.”

⁴ K'oaá s'ín komà mé-ne nga tsitasòn-ne koni s'ín kiskii x̄ita xi kiichja ngajo-la Nainá, nga tsò:

⁵ Kot'in-la naxandá Sión:

“Chítsejèn-là X̄ita Ítjòn-lè;
nga jí nchrobá katsejèn-lè;
imaá kji;

tinasòn jngoò-la búrró,

jngoò ndí búrró itsé xi ki'ndí-la cho ch'á.”

⁶ Kii jña x̄ita xi kota'yàt'aà-la Jesús, k'oas'ín kisikitasòn koni s'ín kisatiixá-la.

⁷ K'e nga ijchòko ñánda tíjna Jesús jè orra kò ki'ndí-la, jña kisikjeén nikje-la nga tsohótsa-la; ikjoàn tsibijnasòn-la Jesús.

⁸ Koa jña x̄ita xi kjìn ma-ne tsohójngoò nikje-la ya iya ndiyá. Tjín i'nga xi chrja-la yá tsate, ikjoàn tsohójngoò iya ndiyá.

⁹ Jña x̄ita xi tjíma ítjòn-la kò xi tjingui-la tsibíts'ia nga 'ño kiichja, kitsò:

—Jeya kàtjina jè xi ya nchrobát'aà-ne tje-la x̄itaxá ítjòn David [nga jè kíjna ngajo-la]! Mé ta ndaà-la jè xi nchrobá ngajo-la Na'èn-ná! Jeya choòn ján ngajmi!

¹⁰ K'e nga jahas'en Jesús ya naxandá Jerusalén ngats'ii x̄ita naxandá tà kjòxkón-la, koa kiskònangui-la xíkjin. Kitsò:

—¿Yá x̄ita-ne jè?

¹¹ Jña x̄ita xi kjìn ma-ne kitsò:

—Jè x̄ita xi chja ngajo-la Nainá xi Jesús 'mì xi Nazaret ts'e, ya nangui Galilea.

*K'e nga tsachrje ingo ítjòn jña x̄ita xi otíjna tsojmi
(Marcos 11:15-19; Lucas 19:45-48; Juan 2:13-22)*

¹² Jesús jahas'en ya nditsin ingo ítjòn-la Nainá, tsachrje yije ngats'ii x̄ita xi ya nchihotíjna kò nchihotse tsojmi ya nditsin ingo. Kisihitíkjá ímixa-la jña x̄ita xi síkjatjya tòn kò tikoáá kisikatsjoò íxile-la jña xi otíjna nise paloma.

¹³ Kitsò-la:

—Jè Xojòn-la Nainá tsò-né: “Ni'ya-na, ni'ya-la ochikoón k'oín.” Tanga jñò, nguijo-la x̄ita chijé titsa'nè.

¹⁴ Nga ya ingo ítjòn tíjna Jesús, ijchò kinchat'aà-la x̄ita xi mikii tsejèn-la kò xi tsá'yá kjoàn; jè Jesús kisindaà-ne x̄ita koi.

¹⁵ Jña x̄ita sko-la nò'mii kò x̄ita xi okóya kjotíxoma-la Nainá xi kiskii Moisés kòkjan-la k'e nga kijtsee kjòxkón xi kis'ìin Jesús kò nga ki'nchré 'én-la jña ndí ixti xi chjaya iya ingo ítjòn, nga tsò: “Jeya kàtjina jè xi ya nchrobát'aà-ne tje-la x̄itaxá ítjòn David [nga jè kíjna ngajo-la]!”

¹⁶ K'ée kiichja x̄ita koi, kitsò-la Jesús:

—¿A na'yà-né? ¿A ndaà tsò 'én xi chja jña ixti koi?

Jesús kitsò:

—Jon, 'nchré-ná. ¿A kj'e è bixkejñoò Xojon-la Nainá nga tsò?:
 Jñà ndí ixti xi jtobá kjoàn kō ki'ndí xi sa oki,
 jñà-né xi títsajnandaà nga jeya sikkíjna Nainá.

¹⁷ Jesús yaá kisikítsajna jñà xitá koi, itjojin-ne ya naxandá ítjòn Jerusalén.
 Kìi ján naxandá Betania. Yaá kisikjáyá nga nitjen.

*K'e nga jè Jesús kisixi yá-la toò iko
 (Marcos 11:12-14, 20-26)*

¹⁸ K'e nga tajñoòya nga tífi-ne Jerusalén, Jesús, kjòhojò-la.

¹⁹ Kijtseè jngòò yá-la toò iko xi ya chraña indii ndiyá síjna. Kìi katsejèn-la
 tanga nimé toò yijà-la. Tà xkaá tjín-la. K'ée kitsò-la Jesús:

—Nì tì jngòò naxrjein koja-lè toò.

Koà jè yá toò iko nitóón kixi.

²⁰ K'e nga kijtseè jñà xitá xi kota'yàt'aà-la Jesús, tà kjòxkón-la. K'ée
 kiskònangui-la mé-ne nga tà niton kixi-ne jè yá-la toò iko.

²¹ Jesús kitsò-la:

—Xi okixi, tsà ndaà mokjeiin-nò it'aà ts'an, tsà mì jò tjín-la inima-nò,
 komaá-nò nga k'oas'ín s'een koni s'ín kàsikooa jè yá iko; tikoaa komaá-nò
 k'oín-la jè nindoò: “Tisixìn; ján tikatjen-jìin yijo-lè ndáchikon.” Kō k'oaá s'ín
 koma.

²² Jñò, tsà ndaà mokjeiin-nò nitá mé xi sijé k'e nga kítsi'ba, k'oaá s'ín tjoé-nò.

*Kjotixoma xi tjín-la jè Jesús
 (Marcos 11:27-33; Lucas 20:1-8)*

²³ K'e nga jye komà kjoa koi, Jesús jahas'en ya nditsin jngo ítjòn kō k'e nga
 tíhokóya-la xitá ijchòkon jñà xitá skò-la nò'miù kō xitá jchínga-la jñà xitá judío.
 Kiskònangui-la:

—¿Mé kjotixoma xi tsjá'nde-lè koni s'ín 'nì? ¿Yá xi kitsjaà-lè kjotixoma koi?

²⁴ Jesús kitsò-la:

—Tikoaa 'an skònangui jngòò-nò kjoa. Jñò, tsà kòk'oín-ná, tikoaa 'an k'oaá
 xán-nò yá xi kitsjaà-na kjotixoma koni s'ín s'iaàn.

²⁵ Jè Juan, k'e nga kis'iìn bautizar xitá, ¿yá xi kitsjaà-la kjotixoma? ¿A
 Nainá-né xi tjína ngajmì, o xi tà xitá-né?

Jñà xitá koi k'ée tsajoóya-ne. Kitsò-la xikjín:

—Tsà kixoán: “Nainá kitsjaà-la kjotixoma”, kitsò-ná: “¿Mé-ne mìkì
 kòkjeiin-nò it'aà ts'e?”

²⁶ Koà tsà kixoán: “It'aà ts'e xitá-né”, tsakjoòn-ná tsà koi naxrjein-la jñà
 xitá naxandá skaàn-kò-ná, nga ngats'iì, nguì k'oaá tsò nga jè Juan, jngòò xitá
 xi kùichja ngajo-la Nainá.

²⁷ K'ée kùichja, kitsò-la Jesús:

—Mì kì 'ya-jen.

Koà jè Jesús kitsò-la:

—Tikoaa 'an mìkì k'oa xán-nò yá xi kitsjaà-na kjotixoma koni s'ín s'iaàn.

Kjoa xi mangásòn ts'e ixti xi jò ma-ne

²⁸ Jesús kiskònangui-la, kitsò-la:

—¿Jñò, kó bixón? Jngòò xitá xi jò ma ixti x'in-la kitsò jngòò k'a-la jngòò ti-la:
 “Na'èn, t'in, tixá-la jè toò uva-na.”

²⁹ Tì jè kitsò: “Majìn-na.” Tanga koma iskan, kisikítsjeèn; k'ée kù síxá.

³⁰ Na'èn-la k'ée kù nga kùikon ti xi jngòò. K'oaá tì kitsò-la. Tanga ti jè, kitsò:
 “Ndaà tjín na'èn, komaá kjián.” Tanga mìkì kù.

³¹ ¿Ná-laá nga ingajò ixti xi kisikitasòn-la na'èn-la?

Jñà xitá kitso:

—Jè xi ítjòn.

K'ée kitsò-la Jesús:

—Okixíí xi xan-nò, jñà xità xi síkíchítjì tsojmì ts'e Roma ko jñà íchjín ská, isaá nìton kjoahas'en ñánda nga Nainá tíhotíxoma mì k'oaá-ne koni jñò.

³² Nga jè Juan xi kis'iin bautizar xità k'oií xá j'ii-ne nga tsakóya-la xità kós'ín sùjchá yijo-la, tanga jñò mìkiì kòkjeiín-nò. Koa jñà xi síkíchítjì tsojmì ko jñà íchjín ská kòkjeiín-la. Tanga jñò ndaà nas'ín ki'yaà yije kjoa koi, mìkiì kinikájno jé-nò ko mìkiì kòkjeiín-nò.

Jñà chì'nda ts'en

(Marcos 12:1-12; Lucas 20:9-19)

³³ Tíiná'yaà ìjngòè-la kjoa xi mangásòn. Jngòè xità xi tjín-la nangui, tsibítje toò uva ko tsibíndiì-la íchíábá, ìkjoàn tsibíndaà jngòè ì'nde ñánda tsi'ñóngui nandá-la toò uva. Tíkòa tsibíndaà jngòè torre ñánda bitsajna xità nga síkinda yije kóhótjín. Ìkjoàn kisikiña-la nangui-la xità xi kj'eíí nga kisixásòn. Ìkjoàn kiì nei-la nangui ñánda ì'nde kjiìn.

³⁴ K'e nga ijchò nachrjein-la nga jye kòjchá toò uva, jè nei-la nangui kisikasén xità chì'nda-la nga kisìjé-la xi jè okò-la ts'e toò uva xi kòjchá.

³⁵ Tanga jñà xità xi kisixásòn nangui kitsobà'ño xità-la jè nei-la nangui. Jngòè xi tsi'beé-la ko jngòè xi kisik'en koa jè xi ìjngòè ndajo tsibínè.

³⁶ K'e komà iskan jè nei-la nangui isaá kjin xità-la kisikasén tanga jñà xità xi síxásòn nangui ta ngásòn kisikò ngats'ii chì'nda xi j'ii.

³⁷ K'e nga jyehet'aà-ne kisikasén ki'ndí-la. Kisikítsjeèn kitsò: “Skoexkón-la ki'ndí-na.”

³⁸ Jñà xità xi síxásòn nangui k'e nga kijtseè jè ki'ndí-la nei-la nangui tsajoóya-ne, kitsò-la xíkjin: “Jè jèè xi tjoé kjotjò-la ì'nde, s'ik'eén ko tsaján koma ì'nde.”

³⁹ Kitsobà'ño, tsachrjeiìn ya nangui ñánda títje toò uva. Ìkjoàn kisik'en.

⁴⁰ Jñò, ¿kó bixón? K'e nga kjoíí nei-la nangui, ¿mé xi sùkò jñà xità xi kisixásòn nangui-la?

⁴¹ Jñà xità xi nchi'nchré kitsò:

—Jngòè k'aá sùk'en jñà xità ts'en; mìkiì kohimakeè. Ko jè nangui-la, kj'eíí xità sùkiña-la xi kojichjí kó kji okò-la k'e nga kojchá toò uva.

⁴² Jesús kitsò-la:

—¿A kj'eè bìxkejñoò Xojon-la Nainá nga tsò?:

Jè ndajo xi tsachrjekàngui chjinechrjó nga sa ítjòn,

jè-né xi komà ndajo tàts'en chrjó-la ni'ya.

K'oaá s'ín kis'iin Nainá.

Jñá, tà maxkón-ná k'e nga 'yaá kjoa koi.

⁴³ K'oií koxan-nò jñò, tjáxìn-nò kjoa machikon-t'in nga jè Nainá tíhotíxoma-nò. Jñá tjoé-la xità xi k'oaas'ín síxá koni s'ín ok'in-la xá-la Nainá.

⁴⁴ Xi ít'aà ts'e ndajo, nita yá-ne xi kixosòn ndajo jè, koxkoaya-né; ko tsà jè ndajo skané xità, kochijo-né.

⁴⁵ Jñà xità skò-la no'miì ko xità fariseo, k'e nga kiì'nchré koni s'ín kiìchja Jesús nga tsibénojmi 'én xi mangásòn, k'ée kjòchija-la nga ít'aà ts'e-né koni s'ín kiìchja Jesús.

⁴⁶ Tik'ée-ne mejèn kitsobà'ño Jesús tanga jñá kitsakjòn-la xità naxandá, koi-né nga k'oaá s'ín mokjeiín-la jñà xità nga jè Jesús, jngòè xità xi chja ngajo-la Nainá.

22

S'eí xi bitjo k'e nga bixan xita
(Lucas 14:15-24)

- ¹ Jesús tsibíts'ia ìjngoò k'a nga tsakóya-la xita kjoa xi mangásòn. Kitsò:
² —Koni s'ín otíxoma jè xi ngajmì nchrobá-ne, k'oaá s'ín mangásòn koni jngoò xitaxá ítjòn xi tsibíjna jngoò s'eí k'e nga chixàn ti-la.
³ Kisikasén ch'nda-la mé-ne nga kiì kichja-la ngats'ii xita xi xó kinokjoá-la nga ti-la túbixan. Tanga jña xita koi, mikiì kòkjeiin-la nga kiì s'eí.
⁴ Ìjngoò k'a kisikasén ch'nda-la xi kj'eí. Kitsò-la: “Kot'ìn-là jña xita xi jye kiì'nchré: Tsojmì xi skine, jyeé tjindaà; jyeé kisik'en nchraja-na, cho xi 'ño xiné. Jyeé tjindaà yije kóhótjín. Kàtjanchróbá s'eí.”
⁵ Tanga jña xita koi mikiì kisis'in. Tjín xi rancho-la kiì-katsejèn-la; tjín xi kjohima-la kiì.
⁶ Koa jña xita xi i'nga, kitsobà'ño ch'nda-la jè xitaxá ítjòn. Kiskaàn-ko koa kisik'en.
⁷ Jè xitaxá ítjòn, 'ño kòjti-la. K'eé kisikasén xita soldado nga kisik'en yije kóhótjín jña xita koi nga ma-la sík'en-ná, koa tsaká naxandá-la.
⁸ Jè xitaxá ítjòn, ìjngoò k'a kitsò-la ch'nda-la: “Kixíi kjoa, jyeé tjindaà yije xi kjoa ts'e s'eí, tanga jña xita xi jye kiì'nchré, mikiì mochjeén-la nga i kjoí.
⁹ Tanguió ìjngoò k'a ya ndiyá jngoò osen-la naxandá, tinókjoa-là xita nita yá-ne xi skajñoò nga s'eí tjín kjoa ts'e xita xi bixan.”
¹⁰ Jña ch'nda-la xitaxá ítjòn kiì kixkóya xita incho calle nita yá xi kjòtsja-la nga kiì s'eí, xita xi ndaà ko xi mikiì ndaà; k'oaá s'ín kitseè ni'ya.
¹¹ Jè xitaxá ítjòn, k'e nga jahas'en ni'ya, kiskoòtsejèn-la jña xita xi ijchò. K'eé kijtseè jngoò xita xi ya tijnajin nga mikiì íkjá nikje-la xi ts'e kjoa bixan.
¹² Kitsò-la: “Ji, amigo, ¿kó s'ín komà nga kòbitjaàs'ii ìjndé nga mikiì kichíkjei nikje xi ts'e s'eí?” Tanga xita jè, tà jyò tsibíjna.
¹³ Jè xitaxá ítjòn kitsò-la jña xita xi nchisís'in-la ímixa: “Tit'aà'ño ndsoko ko tsja. Ikjoàn tikatjeen ján ijín jño ya ñanda nga skindaya ko sijnst'ii ni'ño.”
¹⁴ Kitsò-isa Jesús:
 —K'oaá s'ín koma nga kjin ma-ne xita xi nokjoà-la tanga tà chibaá ma-ne xi tjájin.

Kjoa nga machítjì tsojmì
(Marcos 12:13-17; Lucas 20:20-26)

- ¹⁵ Jña xita fariseo k'eé kiì tsajoóya-ne nga mejèn-la kohòngui Jesús mé 'én xi kichja.
¹⁶ Koií kjoa-la nga kisikasén-la Jesús xita-la ko xita-la Herodes; kiskònangui-la, kitsò-la:
 —Maestro, 'ya-nájen nga 'én kixíi xi nokjoì koa k'oaá s'ín okoòyi ndiyá-la Nainá koni s'ín tjín xi kjoa kixi. Mikiì 'ni kindá koni tsò-lè xita; ko mìtsà jè chitsejèn-jnoi kó joàn xita.
¹⁷ Koatìn-nájen. ¿A ndaà tjín nga kichítjì-jen tsojmì it'aà ts'e xitaxá ítjòn ts'e Roma, a xi majìn-né?
¹⁸ Jesús kjòchiya-la nga ch'o nchisíkítsejèn. K'eé kitsò-la:
 —Jño, xita xi jò isén tjín-nò, mé-ne chonachán-ná.
¹⁹ Takó-ná jè ton xi machítjì-ne tsojmì.
 K'eé j'ii ko jngoò-la ton denario.
²⁰ K'e nga kijtseè Jesús, kiskònangui-la, kitsò-la:
 —¿Yá ts'e isén jè ko jè 'ín xi tjít'aà?
²¹ Kitsò xita koi:
 —Ts'eé Cēsar, xitaxá ítjòn ts'e Roma.

K'eé kitsò-la Jesús:

—Tji-lá César xi ts'e César koa tji-lá Nainá xi ts'e Nainá.

²² K'e nga kii'nchré 'én koi jñà xita fariseo ko xita-la Herodes, tà kjòxkón-la. Kitsjiin Jesús, ikjoàn kii-ne.

Kó s'in koma k'e nga kjoaáya ijngoò k'a-la xita xi jye k'en

(Marcos 12:18-27; Lucas 20:27-40)

²³ Tikoi-ne nachrjein ijchòkon Jesús jñà xita saduceo nga mìkii mokjeiin-la nga faáya-la jñà xita xi jye k'en. Xita koi kiskònangui-la Jesús,

²⁴ kitsò-la:

—Maestro, Moisés kitsò-né: “Tsà jngoò xita x'in kiyá xi mìkii kis'e-la ixti ko chjoón-la, jè 'ndse mik'en kixan-ko ijngoò k'a chjoón-la 'ndse nga s'e-la ixti xi tje ts'e 'ndse.”

²⁵ Kis'e xó jngoò k'a xita ijndé xi itoò komà 'ndse. Jè xi síjna ítjòn chixàn, tanga k'e nga k'en, mìkii kis'e-la ixti koa jè 'ndse xi ma jò-ne tsibijnako jè chjoón ka'àn.

²⁶ K'oaá ti komàt'in jè 'ndse xi ma jò-ne ko xi ma jàn-ne skanda komà itoò. Nijngoò xi kis'e-la ixti.

²⁷ Xi jyehet'aà-ne, k'en jè chjoón.

²⁸ K'e nga tsà kjoaáya ijngoò k'a-la mik'en, ¿ñá-laá nga itoò 'ndse xi koma chjoón-la? Nga jñà chixàn-ko nga itoò.

²⁹ K'eé kitsò-la Jesús:

—Jñò, maskáya-nò koi-né nga mìkii 'yaà kó s'in tíchja Xojon-la Nainá ko nga'ño xi tjin-la Nainá.

³⁰ K'e nga kjoaáya ijngoò k'a-la mik'en, íchjín, íchjá, mì ti kii kixan-ne. K'oaá s'in s'e koni jñà àkjale xi títsajna ngajmii xi ts'e Nainá.

³¹ Jè kjoa nga faáya ijngoò k'a-la mik'en, ¿a kj'eè bìxkejñoò Xojon-la Nainá nga jè sobà Nainá xi kitsò:

³² “An-ná xi Nainá tsò-na Abraham, Isaac ko Jacob”? Jñà xi jye k'en, mìtsà Nainá tsò-la xi Nainá; tà jñà xi títsajnakon xi Nainá tsò-la! [Nga it'aà ts'e Nainá, títsajnakon xita koi.]

³³ Jñà xita naxandá, k'e nga kii'nchré 'én koi, tà kjòxkón-la koni s'in tsakóya Jesús.

Jè kjotíxoma-la Nainá xi tíjna ítjòn

(Marcos 12:28-34)

³⁴ Jñà xita fariseo k'e nga kii'nchré nga Jesús kisikítsajnajyò jñà xita saduceo, tsibíxkóya xíkjín.

³⁵ Jngoò xi xita ts'e, xi chjine xojon-la kjotíxoma-la Nainá xi kiskii Moisés, mejèn-la skót'aà Jesús nga skónachan-la. Kiskònangui-la, kitsò-la:

³⁶ —Maestro, ¿ñá-laá kjotíxoma xi isa tíjna ítjòn nga yije kjotíxoma ts'e Moisés?

³⁷ Jesús kitsò-la:

—“Titsjachi Na'èn-ná xi Nainá 'mì-la, nga ko inima-lè ko kjohítsjeèn-lè ko nga tijnakoin.”

³⁸ Jè kjotíxoma xi isa 'ño tjin ko xi tíjna ítjòn.

³⁹ Jè xi ma-ne jò, k'oaá ti tsò-ne: “Titsjachi xita xinguii xi i'nga koni tsà ti yijo tsiji-nè.”

⁴⁰ Jñà títsajna ítjòn jñà kjotíxoma koi. Yaá bitjokàt'aà kóhotjín kjotíxoma xi i'nga xi ts'e Moisés ko xi ts'e xita xi kii'chja ngajo-la Nainá.

Ñanda kitjen-la Cristo [xita xi xó kisikasén-ne Nainá]

(Marcos 12:35-37; Lucas 20:41-44)

41 Tà kó yaá títsajna jñà xità fariseo. Jesús kiskònangui-la, kitsò-la:

42 —¿Jñò, kó bixón it'aà ts'e Cristo [jè xità xi xó sùikasén-ne Nainá]? ¿Ñánda kitjen-la?

Jñà xità fariseo kitsò:

—Yaá kjinchrobát'aà-ne tje-la xitàxá ítjòn David [nga jè kájna ngajo-la].

43 K'ée kitsò Jesús:

—Tanga jè David k'e nga kiichja nga ko nga'ño-la Injima Tsjeè-la Nainá, kitsò it'aà ts'e Cristo: “Jè otíxoma-na.” K'oaá s'ín kiichja David:

44 Jè Nainá kitsò-la jè xi otíxoma-na:

“Tijnat'aà-ná i kixi-na

skanda k'e nga síkítsajnanguia ndsokoi

jñà xi kondra-lè nga 'an jye kisikijne-la.”

45 Jè David, tsà kos'ín kitsò-la Cristo [jè xità xi xó síkasén-ne Nainá], ¿kó s'ín tjín-ne nga ya nchrobát'aà-ne tje-la xitàxá ítjòn David?

46 Nijngò xi koma-la nga kisikátji-ne 'én koi. Tjen-ne nachrjein koi, mì tì yá xi kjò'ño-ne ikon nga kiskònangui isa-la 'én xi kj'eí.

23

Kiis'ín kiichja Jesús it'aà ts'e xità fariseo ko xità xi okóya kjotíxoma-la Nainá (Marcos 12:38-40; Lucas 11:37-54; 20:45-47)

1 Xi komà iskan kitsò-la Jesús jñà xità xi kjín ma-ne ko xità xi kota'yàt'aà-la:

2 —Jñà xità xi okóya kjotíxoma-la Nainá xi kiskii Moisés ko jñà xità fariseo tjín-la xá nga okóya kjotíxoma-la Nainá xi kiskii Moisés.

3 Tiná'yaá yije-là koni s'ín okóya-nò. Tanga mìkii k'oa 'nè koni s'ín jñà xità koi. Kj'eí tsò ko kj'eí s'ín.

4 Jñà xità koi bínè-la xità xi kj'eí kjotíxoma-la xi 'ño 'in tjín koni tsà ch'á í'í sík'a xi mìkii k'a-la; koa jñà xità xi okóya kjotíxoma, ni itsé síchjât'aà-la jñà xità nga síkítasòn kjotíxoma-la.

5 Koni s'ín s'ín yije kjoa koi, tà jè-né nga mejèn-la nga isa ndaà skoe xità. Jè Xojon-la Nainá xi ót'aà tjen-la ko chrja-la, isaá ì s'ín; koa jè nikje xi ókjá, isaá ndojò kjoàn s'ín lixto xi tíjòn-la nikje-la, tà jè xi mejèn-la nga okó yijo-la nga tsò nga xità tsjeè-la Nainá-né.

6 Mejèn-la nga jñà kítsat'aà ítjòn ímíxa k'e nga kjèn xità ñánda tjín s'eí ko ya ni'ya ingo sinagoga mejèn-la nga jñà kítsanè íxile xi jncha ítjòn.

7 Tikoaá mejèn-la nga skoexkón xità xi kj'eí, ndaà síxat'aà ya ndítsin; kítso-la: “Maestro, Maestro.”

8 Tanga jñò, mìkii bìl'nde nga “Maestro” kítso-nò xità; ngats'ioè jñò, 'ndsè chibàkoo xinguioo; tà jngò ma xi Maestro-nò, jè Cristo [xità xi xó kisikasén-ne Nainá].

9 Nijngò xi “Na'èn” 'mì-là i it'aà nangui; tà jngò ma xi Na'èn-nò xi tíjna ngajmii.

10 Koa ni yá xi xità sko-la kítso-nò; tajngò Cristo xi sko-la tíjna-nò.

11 Jè xi 'ño 'nga síkíjna yijo-la it'aà tsajòn, jè-né xi síxá-la xità xi i'nga.

12 Jè xi 'nga síkíjna yijo-la, isaá nangui kájna nga koma iskan; ko jè xi nangui síkíjna yijo-la, isaá 'nga kájna nga koma iskan.

13 'jima xó-nò jñò, xità xi okoóya kjotíxoma-la Nainá xi kiskii Moisés, ko jñò xi xità fariseo, xità xi jò isén tjín-nò! Bichjoà-là ndiyá-la ngajmii jñà xità xi mejèn-la fahas'en ya ñánda nga tíhotíxoma Nainá. Jñò, mìkii bitjaàs'en-jñò ko mìkii bìl'nde-là xi kj'eí xità nga fahas'en-jiin.

14 'jima xó-nò jñò, xità xi okoóya kjotíxoma-la Nainá, ko jñò xi xità fariseo, xità xi jò isén tjín-nò! Chjaà'an-là ni'ya-la íchjín ka'àn xi jye k'en x'in-la; ikjoàn

'ńó ndojò onguíkoo ochikon-nò nga mejèn-nò nga bitsajna'ma nga mì jcha-nò mé kjoa xi 'nè. Koií kjoa-la ìsaá tse kjo'in s'e-nò.

15 'iIma xó-nò jñò, xita xi okoòya kjotíxoma-la Nainá, kò jñò xi xita fariseo, xita xi jò isén tjín-nò! Bitjaàsòn yije isò'nde kò ndáchikon nga nokjoà-là nas'ín tà jngoò xita nga ya fit'aà-nò. Kò k'e nga jye bitasòn-nò xita jè, jò k'a okji ok'in-la koni jñò nga s'e-la kjo'in ya ñánda títi ni'ín ts'e i'nde kjo'in.

16 'iIma-xó-nò jñò, xita xi mìkìi tsejèn-nò nga mejèn-nò okoò-là ndiyá xita xi k'ejí! Bixón-nó: “Tsà jngoò xita xi tsjá 'én-la xi it'aà ts'e ingo, mìtsà mé-ne. Tanga tsà jngoò xita tsjá 'én-la xi it'aà ts'e tsojmì chjí xi oro ts'e ingo, koií xi kjo'ńó kítasòn 'én-la.”

17 jñò xi xita tòndo kò xita xkan 'mì-nò! ¿Ñá-laá xi ìsa ndaà tjín? ¿A jña tsojmì chjí xi oro a xi jè ingo xi síchikon-t'in tsojmì chjí?

18 Jñò k'oaá tì bixón: “Tsà jngoò xita tsjá 'én-la nga kító: Tíbeè i'nde tsjeè ñánda binchasòn kjotjò xi tsjá-la Nainá, jña xita mìkìi kjo'ńó kítasòn 'én-la. Tanga tsà tsjá 'én-la xi it'aà ts'e tsojmì xi ya títsajnasòn jè i'nde tsjeè, jè xi okixi nga kjo'ńó kítasòn.”

19 jñò xi xita tòndo kò xita xkan 'mì-nò! ¿Ñá-laá xi ìsa ndaà tjín? ¿A jña tsojmì xi tjín-sòn ya i'nde tsjeè a xi jè i'nde tsjeè xi síchikon-t'in tsojmì?

20 Jè xi tsjá 'én-la xi it'aà ts'e i'nde tsjeè, tìkooá tsjá 'én-la xi it'aà ts'e ngayije tsojmì xi ya tjín-sòn ya i'nde tsjeè.

21 Jè xi tsjá 'én-la it'aà ts'e ingo mìtsà tà jè it'aà ts'e ingo tsjá, tìkooá tsjá 'én-la xi it'aà ts'e Nainá xi ya tjína.

22 Jè xi tsjá 'én-la it'aà ts'e ngajmì, tsjá 'én-la xi it'aà ts'e íxile kjotíxoma-la Nainá; tìkooá tsjá 'én-la xi it'aà ts'e Nainá xi ya tíjnasòn íxile.

23 'iIma xó-nò jñò, xita xi okoòya kjotíxoma-la Nainá, kò jñò xi xita fariseo, xita xi jò isén tjín-nò! Nga ma-nò 'biù-là Nainá xi teya oko-la ts'e xka menta kò xka anís kò xka comino; tanga mìkìi níkitasòn jè kjotíxoma xi ìsa 'ńó mochjeén koni jè kjoa kixi, kjoahimatakòn kò jè kjoa nga kixi kàtakjeiín-nò it'aà ts'e Nainá. Koií kjoa xi 'ńó mochjeén nga kítasòn; tìkooá mochjeén-né nga kítasòn jña kjoa xi i'nga.

24 jñò, xita xi mìkìi tsejèn-nò nga mejèn-nò okoò-là ndiyá xita xi k'ejí, jñò, níkaànguioò natse nga majìn-nò nga chíjeèn cho xi tjé, tanga mìkìi 'yaà k'e nga chíjeèn cho ch'á xi 'mì camello!

25 'iIma xó-nò jñò, xita xi okoòya kjotíxoma-la Nainá, kò jñò xi xita fariseo, xita xi jò isén tjín-nò! Onijnòò chítsín-nò kò chroba-nò ya isò'nga-la tanga ya iya-la kitseè tsojmì xi nìchijé kò nga tse mejèn-nò.

26 Jñò xi xita fariseo 'mì-nò, xi mìkìi tsejèn-nò. Ítjòn taníya chítsín-nò kò chroba-nò ya iya-la, mé-ne nga kòtsjeè-ne isò'nga-la.

27 'iIma xó-nò jñò, xita xi okoòya kjotíxoma-la Nainá, kò jñò xi xita fariseo, xita xi jò isén tjín-nò! K'oaá titsjoè koni kjoàn chrjó-la mik'en xi kitsiinga isò'nga-la. Ndaà kjoàn, tanga ya iya-la kitseè nindaà-la mik'en kò ngats'ìi tsojmì xi ch'o kjoàn.

28 Jñò, k'oaá s'ín 'nè nga nguixkon xita, xita ndaà-nò; tanga jjiìn inima-nò kitseè kjoa xi jò isén tjín-la kò kjoa nga ch'o 'nè.

29 'iIma xó-nò jñò, xita xi okoòya kjotíxoma-la Nainá, kò jñò xi xita fariseo, xita xi jò isén tjín-nò! Bindaà chrjó-la mik'en ts'e xita xi kiichja ngajo-la Nainá kò níkiinga chrjó-la xi xita kixi komà.

30 Ikjoàn bixón: “Tsà jña-la-ná xi titsajnakoaán jè nàchrjein-la xita jchínga-ná mì-la kii kinìchját'aà-lá xita jchínga-ná nga kisi'k'en jña xita xi kiichja ngajo-la Nainá.”

³¹ K'oaá s'ín 'ya-la nga tijnò 'ya-nò yijo-nò nga ixti-la maá xita xi kisik'en xita xi kiichja ngajo-la Nainá.

³² Jñò, koni s'ín tsibíts'ia xita jchinga-nò, jngoò k'a tikitason yije kjoa.

³³ Jñò, k'oaá ngaya-la koni ye, nga ya tjen-nò it'aà ts'e ye. Mikii kojno-nò i'nde ts'e kjo'in.

³⁴ K'oij kjoa-la, 'an sikasén-nò xita xi kichja ngajo-la Nainá, xita xi tjin-la kjoachjine ko xi kokòya kjotixoma. Tanga jñò, tjin xi sik'eèn, tjin xi kjòt'aà krò koa tjin xi kixkàn-koo ya iya ni'ya ingo sinagoga; koa konguítjingu kondra-la xita koi nga xki xi ján naxandá.

³⁵ Jñò skané yije-nò kjo'in jè jní xi kixixteèn ts'e xita ndaà xi k'en, mats'iaako-ne Abel, xita kixi xi k'en itjòn, skanda jè Zacarías, ki'ndí-la Berequías, jè xi kisik'en xita tsajòn ya i'nde jngoò osen-la ñánda tjna Ni'ya Tsjeè-la Nainá ko ñánda binchásòn kjotjò xi tsjá-la Nainá jña xita.

³⁶ Okixí xi xan-nò, ngats'i kjoa koi, jña skané-la kjo'in jña xita xi tjin i'nde.

*Mé kjoa-ne nga kos'ín kiichjako-ne Jesús xita naxandá Jerusalén
(Lucas 13:34-35)*

³⁷ Jñò xi xita naxandá Jerusalén tsajòn xi nik'eèn xita xi chja ngajo-la Nainá ko binè ndajo jña xita xi Nainá sikasén-nò! Kjin k'a kjòmejèn-na nga tsibíxkóya xita naxandá-nò, koni s'ín xa'nda nga bingui jngaá-la jña ixti-la; tanga jñò, mikii kòkjeín-nò!

³⁸ Chítsejèn-là ni'ya-nò nga jye tsjün-takòn Nainá.

³⁹ K'oaá xán-nò mats'ia-ne naxrjein i'ndeji mì tì kii jchaxkoòn-ná skanda k'e nga jè naxrjein nga kixón: “iMé ta ndaà-la jè xi nchrobá ngajo-la Nainá!”

24

*K'e nga kiichja Jesús it'aà ts'e ingo kó s'ín tjinè-la nga kixoña
(Marcos 13:1-2; Lucas 21:5-6)*

¹ Jesús k'e nga jye itjo-ne ingo itjòn, jyeé tífi nga ijchò kinchat'aà chraña-la xita xi kota'yàt'aà-la. Ikjoàn tsakó-la jè ingo itjòn ko ni'ya xi tjin-la.

² Jesús kitsò-la:

—¿A titsachitsejèn-là ngats'i ni'ya koi? Okixí xi xan-nò, nì tì jngoò ndajo sijijòsòn-la xíkjín. Kixoña yije-né kóhotjín.

*Seña xi s'e k'e nga nchrobá ma chraña nga kjoehet'aà isò'nde
(Marcos 13:3-23; Lucas 21:7-24; 17:22-24)*

³ Jesús, k'e nga tjna ya nindoò Yá Olivo, ijchò kinchat'aà-la jña xita xi kota'yàt'aà-la nga kiskònanguit'aàxìn-la kitsò-la:

—Koaìn-nájen, ¿mé naxrjein-ne nga okoma kjoa koi? ¿Mé seña xi s'e k'e nga kjoji jngoò k'a ko k'e nga kjoehet'aà isò'nde?

⁴ K'ée kitsò-la Jesús:

—Tikindaa yijo-nò nga mì yá xita xi skónachan-nò.

⁵ Kjin xita kjoji xi 'ín ts'an sikkjeén; kitsò: “An-ná xi Cristo, [nga 'aán kisikasén-na Nainá]”; koa kjin xita skónachan-la.

⁶ S'e kjoichán ñánda chrañat'aà ko tikoa kiná'ya-la kjoa ts'e kjoichán ñánda kjün i'nde, tanga jñò, kì tsakjoòn-jèn. Xó k'oaá koma-ne. Tanga k'jeè tsá isò'nde tifehet'aà.

⁷ Naxandá skaàn-kjoò xi k'jeí naxandá. Koa xitaxá kojits'ia nga skaàn-kjoòko xitaxá xi k'jeí naxandá. S'e kjinchrá, s'e ch'in, ko k'oa ch'ón nga xki xi ján i'nde.

⁸ Ngats'i kjoa koi, tà jè xi sa tímats'iaako kjo'in.

9 Jǎa xita skinit'aà-nò ts'e xitaxá nga tsjá-nò kjo'in; siik'en-nò. Ngats'ii xita isò'nde kojtikeyè-nò koií kjoa-la nga 'an onguít'aà-ná.

10 Jè nachrjein koi, kjìn koma xi mì kii tì kokjeiín-la it'aà ts'an. Tijǎa koótjinè-ne xíkjin xita ko tsjénguikeè xíkjin.

11 Kjìn xita s'e xi xita ndiso xi kitso nga Nainá chja ngajo-la. Tikoáá kjìn xita skónachan-la.

12 Ndaà jchán s'e kjoats'en; skanda mì tì kii kotsjakeè-ne xíkjin xita.

13 Tanga jè xi kixi kíjnakò kjoa xi mokjeiín-la skanda k'e nga kjoehet'aà-ne kjoa, jè xi kitjokàjin kjo'in.

14 Koá jè 'én ndaà-la Nainá koni s'ín otíxoma Nainá, kobísòn yije-né nga tíjtsa isò'nde mé-ne nga kji'nchré-ne ngats'ii xita naxandá; ikjoàn k'eé kjoehet'aà isò'nde.

15 'K'e nga jchaa nga 'ñó ch'o tíma ya I'nde Tsjeè-la Nainá, koií kjoa tíbitasòn koni s'ín kiskii Daniel, xita xi kiichja ngajo-la Nainá. (Kátasijiín-la jǎa xita xi bíkke xojon jé.)

16 Jǎo, k'e nga jchaa kjoa koi, jǎa xita xi títsajna Judea, kátanga, kàtji ñánda nindoò choòn.

17 Jè xi tíjnasò'nga ni'ya-la, kì tì kii fahas'en-ne ni'ya nga skoé tsojmì-la.

18 Jè xi tíxíajjin nangui-la, kì tì kii nchrobá-ne nga nchrohókjá nikje-la.

19 iIma xó-ne jǎa íchjin xi ki'ndí 'ya kò xi ixti xó nchisíkaki jǎa nachrjein koi!

20 Tijét'aà-là Nainá mé-ne nga mì k'eé kiyó-nò k'e nga nachrjein-la cho 'nchán kò k'e nga nachrjein nikjáya.

21 Jǎa nachrjein koi, tseé kjo'in s'e; kj'eè kii k'oa ma skanda tjen-ne nga kisindaà isò'nde. Koá mì tì kii okoma-ne nga koma iskan.

22 Tsà mì k'oaá kitso Nainá nga isa chiba nachrjein s'e kjo'in nijngoò xita kitjokàjin kjo'in. Tanga koií kjoa-la jǎa xita xi xó jaàjin-ne Nainá, isa chiba nachrjein s'e kjo'in.

23 'K'e nga tsà yá xita xi kitso-nò: “iChítsejèn-là íí tíjna Cristo [xita xi xó kisikasén-ne Nainá]!”, o tsà kitso-nò: “iJán tíjna ján!”, kii kii mokjeiín-nò.

24 Kjoíí xita ndiso xi Cristo kitso-la yijo-la, tikoáá kjoíí xita xi koa ti kitso nga jǎa xi chja ngajo-la Nainá. K'oaá tis'ín kokò seña kò kjoxxón xi ndaà tjín nga skónachan. Skanda jǎa xita xi jye jaàjin Nainá mejèn skónachan-la tsà kokjeiín-la.

25 Kangui nachrjeiín tibenojmíya yije-nò kjoa xi koma iskan.

26 Tsà yá xita xi kitso-nò: “iChítsejèn-là yaá tíjna Cristo ya i'nde it'aà xìn ñánda nangui kixi choòn!”, kii kii onguió; kò tsà kitso-nò: “iYaá tíjnaya inga ni'ya!”, tikoáá kii kii mokjeiín-nò.

27 Koni ma ni'ín ch'on k'e nga ote ñánda bitjokàtji-ne ts'oí skanda ñánda okaàtji-ne, k'oaá s'ín koma k'e nga kjoiaa ijngoò k'a xi Ki'ndí-la Xita xan-la yijo-na.

28 Ya ñánda kijna mik'en, yaá kítsajnajtín jǎa líké.

Mé xi koma k'e nga kjoíí ijngoò k'a Ki'ndí-la Xita

(Marcos 13:24-37; Lucas 21:25-33; 17:26-30, 34-36)

29 'Tijè-ne nachrjein, k'e nga kjoehet'aà kjo'in koi, jè ts'oí, mì tì kii siihiseèn-ne, kojñò-né, mì tì kii kotsjè-ne ndobá-la. Tikoáá jè sá, mì tì kii siihiseèn-ne. Ni'ño xi tjín ngajmii, kixongui-né. Jǎa nga'ño xi tjín ngajmii kitíya yijeé-la.

30 Ikjoàn skoe xita ján ngajmii seña-na xi Ki'ndí-la Xita 'mì-na. Ngats'ii naxandá xi tjín i isò'nde, jǎa xita skindàya-né nga 'ño tsakjón. Koá skoe-na xita xi Ki'ndí-la Xita xan-la yijo-na nga kjinchrobàjǎaà ijjin ifi xi tjín ngajmii; tse nga'ño kò kjoajeya kjoikoáa.

31 Siikasén àkjale-na nga 'ñó siikjindáya chrjo nga koiìxkóya xita-na xi 'an xó jaàjìin-na nga ñijòn chrjangui-la isò'nde, nga jngoò ìjngoò ngobà-la isò'nde.

32 'Chíta'yakoò jè yá-la toò ikò mé xi okóya-ná; k'e nga ma kíndíya chrja-la, ikjoàn bíjts'én xka-la, tíjìin-nò nga jye nchrobá machraña chon ndobá.

33 K'oaá tìs'ín tìjín, k'e nga jchaá nga k'oas'ín tíma kjoa koi, kátasijìin-nò nga 'an xi Kì'ndí-la Xita xan-la yijo-na jyeé nìton kjoiaa, k'oaá ngaya-la koni tsà jye tìjna chraña xotjoa-la ni'ya.

34 Okixíi xi xan-nò, k'oaá s'ín kítasòn yije kjoa koi, k'e nga tìkj'eè biyaà xita xi tìjín nachrjein i'ndeì.

35 Jè ngajmii kò isò'nde kjoehet'aà-né, tanga jña 'én-na mìkiì kjoehet'aà; kítasòn-né.

36 'Tanga k'e nga okoma, mì yá xi tíjìin-la mé nachrjein-ne kò mé hora-ne; nì jña àkjale xi tìjín ngajmii, kò nì jè Kì'ndí-la Nainá tíjìin-la; tajngoò Nainá xi Na'èn-ná tíjìin-la.

37 'Koni s'ín komà nachrjein-la Noé, k'oaá tìs'ín koma k'e nga kjoiaa ìjngoò k'a 'an xi Kì'ndí-la Xita xan-la yijo-na.

38 Jña nachrjein koi, k'e nga tìkj'eè 'ba jtsí xkón, jña xita xi tìjín k'e-ne, nchikjèn, nchi'biì, nchibixan íchjá kò íchjín skanda k'e nga jè nachrjein nga jahas'en ni'ya chitso jè Noé.

39 Xita xi tìjín koi nachrjein, mìkiì tíjìin-la mé xi koma skanda k'e nga j'ìi jtsí xkón xi kiìchrjoako nandá ngats'ii xita. K'oaá tìs'ín koma k'e nga kjoiaa ìjngoò k'a 'an xi Kì'ndí-la Xita xan-la yijo-na.

40 Jè nachrjein k'e nga 'an xi kjoiaa, jò xita xi nchisíxá ján ijìin ijña, jngoò tjámìtjen, xi ìjngoò sijna-né.

41 Jò íchjín nchat'aà natsí xi nchi'o na'yo, jngoò tjámìtjen, xi ìjngoò sijna-né.

42 'Titsajnakoon nga mìkiì 'yaà mé nachrjein-ne kò mé hora-ne nga kjoiaa 'an xi Nainá 'mì-na.

43 Kátasijìin-nò, tsà jngoò nei-la ni'ya sijìin-la mé hora-ne k'e nga jño kjoíi xita chijé nga siichijé-la, siikindaá ni'ya-la; mìkiì tsjá'nde nga kochijé-la.

44 Jño, tìkoaá titsajnandaà; nga 'an xi Kì'ndí-la Xita xan-la yijo-na, k'eé kjoiaa ìjngoò k'a k'e nga jño mìkiì titsachiña.

*Chì'nda xi ndaà s'ín kò xi ch'o s'ín
(Lucas 12:41-48)*

45 '¿Yá-ne xi chì'nda kixi xi tìjín-la kjoachjine? Jè nei-la siikíjna'nda jña chì'nda-la xi i'nga xi ya síxá ni'ya-la mé-ne nga k'e kijchò chiba-la, siikjèn chì'nda xíkjín.

46 Mé tà ndaà-la jè chì'nda xi k'oas'ín ndaà tísíkitasòn k'e nga kjoíi-ne nei-la.

47 Xi okixíi xi xan-nò, nei-la chì'nda jè, jè siikíjna'nda yije tsojmì xi tìjín-la.

48 Tanga tsà jè chì'nda ts'en kító nga kòòkò inima-la: "Nei-na, kjìn nachrjein kochrjein-la nga kjoíi-ne."

49 Ikjoàn koiìts'ia nga skaàn-kò chì'nda xíkjín, koa kòkjen-kò kò skoíko xita ch'i.

50 Chì'nda jè, kjoíi-ne nei-la jè nachrjein kò jè hora k'e nga mìkiì tíkoña-la.

51 'Ñó tse kjo'in tsjá-la. Tà ngàsòn okji kjo'in tsjá-la koni jña xita xi jò isén tìjín-la. Ikjoàn skindáya kò sijts'ìin nì'ño.

25

Kjoa xi mangàsòn ts'e ixti íchjín xi te ma-ne

1 'Jè nachrjein k'e nga kotixoma jè xi ngajmii nchrobá-ne, k'oaá s'ín koma koni komàt'in jña ixti íchjín xi te ma-ne. Kiskoé ni'ín lámpara-la xi ts'e asìti. Kiìkoña-la jè xita xi bixan.

2 'Òn ma-ne ixti íchjín xi tjín-la kjohítsjeèn koa 'òn ma-ne xi tsjìn-la kjohítsjeèn.

3 Jñà ixti íchjín xi tsjìn-la kjohítsjeèn kiskoé lámpara-la tanga mìkì ts'a-la asìti.

4 Koa jñà ixti íchjín xi jye tíjìn-la ts'a nomità asìti-la ko lámpara-la.

5 Jè xità xi túbixan, mìkì xátì j'ìi, koa kjònijñá-la ngats'ìi ixti íchjín; tsohofè í'ñó.

6 K'e nga ijchò osen nítjen, 'ñó kùichja jñà xità, kitsò: “Jye nchrobá jè xità xi bixan. Títjoo ni'ya, tanguíchjaà indiaà.”

7 Ngats'ìi ixti íchjín tsasítjen, koa tsibítsajnandaà lámpara-la.

8 Jñà xi 'òn ma-ne xi tsjìn-la kjohítsjeèn kitsò-la jñà xi tjín-la: “Tjii ìtsé-nájen asìti-nò. Jè ni'ín-nájen jye tíbìts'o.”

9 Tanga jñà ixti íchjín xi tjín-la kjohítsjeèn, kitsò-la: “Mìkì koma, mìkì kichóya-la tsajen. Tanguí kindá ñánda satíjna.”

10 Tanga jñà ixti íchjín xi tsjìn-la kjohítsjeèn k'e nga kù katse asìti-la, k'eé j'ìi xità xi bixan. Koa jñà ixti íchjín xi 'òn ma-ne xi títsandaà nga títi lámpara-la, jahas'en ko jè xità xi bixan ya ni'ya ñánda tjín s'eí. Ikjoàn kisichjoà xotjoa-la ni'ya.

11 Koma iskan j'ìi-ne jñà ixti íchjín xi nguì 'òn ma. Kitsò: “Na'èn, Na'èn, chíx'a-nájen ni'ya.”

12 Tanga jè xità xi bixan, tà kitsò-la: “Okixíi xi xan-nò, mìkì bexkon-nò yá-nò jñò.”

13 Jesús kitsò-ìsa:

—Jñò, títsajnandaà, nga mìkì 'yaà mé nàchrjein-ne koa mé hora-ne nga kjoiaa 'an xi Kí'ndí-la Xità xan-la yijo-na.

Kjoa xi mangàsòn ts'e ton xi kitjoé-la jñà chí'nda

14 Jè nàchrjein k'e nga kotìxoma jè xi ngajmii nchrobá-ne, k'oaá ti ngayala-koni tsà jngoò xità xi tjín-la chí'nda. Kjiiìn ì'nde tífi. Kùichja-la chí'nda-la; kisìngatsja ton-la nga jngoò ìjngoò nga kàtasíkinda.

15 Jngoò chí'nda xi kitsjaà-la 'òn jmiì ton oro; xi ìjngoò jò jmiì kitsjaà-la; xi ma-ne jàn jngoò jmiì kitsjaà-la. K'oaá s'ín kitsjaà-la koni s'ín koma-la nga sùxáko nga jngoò ìjngoò. Ikjoàn kù jè nei-la xá ñánda ì'nde kjiiìn.

16 Jè chí'nda xi kitjoé-la 'òn jmiì, kisìxáko ton xi kitjoé-la koa nguì okji kisìkijnesòn.

17 Ko jè chí'nda xi jò jmiì kitjoé-la, k'oaá tí kis'ìin, tíkoa nguì jò jmiì kisìkijnesòn.

18 Tanga jè chí'nda xi kitjoé-la jngoò jmiì, tà tsibíjna'ma-né ton xi kitsjaà-la nei-la. Yaá tsibíjnajiìn ìt'aà nangui.

19 K'e nga jye kjòtseé kù nei-la chí'nda koi, j'ìi ìjngoò k'a-ne; kis'ìin-la kindá jè ton xi kitsjaà-la.

20 Ijchò jè xi kjòngatsja xi 'òn jmiì, koa nguì 'òn jmiì ijchòkosòn. Kitsò-la nei-la: “Na'èn, 'òn jmiì ton xi jì kinìngatsja-ná, koa nguì 'òn jmiì kisìkijnesoàn.”

21 Jè nei-la kitsò-la: “Ndaà tjín; ngaji, xità ndaà-né. Ndaà kinìtasòn-ná nas'ín tà chiba ton kitsjaà-lè. 'An, isaá tse tsja isa-lè. Títjás'en-jiiìn nga títsjako-ná.”

22 Ikjoàn ijchò jè chí'nda xi jò jmiì kjòngatsja, kitsò: “Na'èn, jò jmiì ton kinìngatsja-ná koa nguì jò jmiì kisìkijnesoàn.”

23 Jè nei-la kitsò-la: “Ndaà tjín; ngaji, xità ndaà-né. Ndaà kinìtasòn-ná nas'ín tà chiba ton kitsjaà-lè. 'An isaá tse tsja isa-lè. Títjás'en-jiiìn nga títsjako-ná.”

24 Koa k'e nga ijchò jè chí'nda xi jngoò jmiì kjòngatsja kitsò-la nei-la: “Na'èn, bexkoón-lè nga xità jti takòn-né nga bìxkoí tsojmì xi mì jì bìtjii, ko bìxkoí jñà xi mì jì chíjndii.

25 Koií kjoa-là nga kitsakjòn-na nga tsibìjna'ma ton-lè ya jjiìn nangui. I tíjna-ne ton-lè xi jngoò jmiì kinìngatsja-ná.”

26 Jè nei-là kitsò-là: “iNgaji, chí'nda ch'o-né koa xita ts'eè-né! Tsà jye tíjiìn-lè nga 'an bixkoá ñánda mì 'an bitjee ko bixkoá ñánda mì 'an kíjndiaa.

27 Tsà ya tsibìjni ton-na ya banco mé-ne k'e nga kjoì-na, tjoé-na ton-na ko ki'ndí-là ton xi ts'an.”

28 Ikjoàn kitsò-là jña xita xi ya títsajna: “Chjaà'an-là jè ton xi jngoò jmiì; jè tjiì-là chí'nda xi te jmiì ma ts'e.

29 Nga jè xi tjín-là, k'oií isa-là skanda tsatoó s'e-là, tanga jè xi tsjìn-là, skanda tjá'aán-là mé xi chiba tjín-là.

30 Jè chí'nda xi nì mé chí-là, tikatjeen ján nditsiaán ya ñánda jñò choòn, yaá skindàya ko yaá siìjts'ìn nì'ño.”

K'e nga jè Nainá koìndaajìin-là ngats'ìi xita isò'nde

31 K'e nga kjoiaa jngoò k'a 'an xi Ki'ndí-là Xita xan-là yiyo-na koni jngoò xitaxá ítjòn nga kjoikoaa kjoajeya-na, ko àkjale tsjeè-na xi títsajnandii-na, k'eé kótijnasoàn íxile ts'e kjoíxoma-na xi ñó jeya tíjna.

32 Ngats'ìi xita xi tjín isò'nde, yaá koxkóya nguixkoaàn; ikjoàn siìjòya koni s'ín paxtò xi ko'ndá tíndsó nga ochrjekàjìin orrè ko tíndsó ska.

33 Jña orrè, yaá kítsajnat'aà kixi-na, koa jña tíndsó ska, yaá kítsajnat'aà ngaskón-na.

34 'An xi xitaxá ítjòn 'mì-na xán-là jña xi títsajnat'aà kixi-na: “Nchrobá jñò xi Nainá kisichikon-t'in-nò; chjoé kjondaà xi tíjnandaà-là Nainá skanda k'e nga kisindaà isò'nde, nga ya kítsajnaà ya ñánda nga jè tíhotíxoma.

35 K'e nga kjòhojò-na, kits'ìi-ná jñò xi tsoókjeen; k'e nga kjòxíndá-na, kits'ìi-ná nandá nga kits'iaa; k'e nga tsjìn-na i'nde ñánda sìkjáya, kits'ìi'nde-ná ni'ya-nò.

36 K'e nga tsjìn-na nikje xi ónakjá, jñò kits'ìi-ná; k'e nga kjòxk'én, tsanguì nìkinda-ná; k'e nga ndayá tsohótijna'ya, tsanguì chítsejèn-ná.”

37 Koa jña xi xita kixi skonanguí-na, kitso-na: “Na'èn, ¿kjé-né nga ki'ya-lèjen nga kjòhojò-lè, ko kits'ìi-lèjen xi chichi?, o ¿kjé-né nga ki'ya-lèjen nga kjòxíndá-lè, ko kits'ìi-lèjen nandá nga ki'yoì?

38 ¿Kjé-né nga ki'ya-lèjen nga tsjìn-lè i'nde ñánda nìkjáyi, ko kits'ìi'nde-lèjen ni'ya-najen, nas'ín mìkiì yaxkon-lèjen? ¿Kjé-né nga ki'ya-lèjen nga tsjìn-lè nikje xi chíkjeí, ko kits'ìi-lèjen?

39 ¿Kjé-né nga ki'ya-lèjen nga kjòxk'ín, ko tsanguì nìkinda-lèjen?, o ¿kjé-né nga ki'ya-lèjen nga tina'yi ndayá, ko tsanguì chítsejèn-lèjen?”

40 'An xi xitaxá ítjòn 'mì-na xán-là: “Okixí xi xan-nò, k'e nga k'oas'ín kinìko jngoò xita xinguiáa nas'ín takó 'ño xita imá kji, 'aán xi k'oas'ín kinìko-ná.”

41 'An xi xitaxá ítjòn 'mì-na xán-là jña xita xi títsajna ngaskón-na: “Tinchat'aaxìn-ná jñò xi kjo'in tjínè-nò. Tanguió ya i'nde ñánda títi ni'ín xi mìkiì bits'o nita kjé-ne, jè i'nde xi tjíndaà it'aà ts'e xita neí ko àkjale-là.

42 K'e nga kjòhojò-na, jñò, mìkiì kits'ìi-ná xi tsoókjeen; k'e nga kjòxíndá-na, mìkiì kits'ìi-ná nandá nga kits'iaa;

43 k'e nga tsjìn-na i'nde ñánda sìkjáya, mìkiì kits'ìi'nde-ná ni'ya-nò. K'e nga tsjìn-na nikje xi ónakjá, jñò mìkiì kits'ìi-ná; k'e nga kjòxk'én mìkiì tsá kinìkinda-ná; k'e nga ndayá tsohótijna'ya, mìkiì tsanguì chítsejèn-ná.”

44 Tikoáá jña xita xi títsajna ngaskón-na skonanguí-na, kitso-na: “Na'èn, ¿kjé-né nga ki'ya-lèjen nga kjòhojò-lè, nga kjòxíndá-lè nga tsjìn-lè i'nde ñánda nìkjáyi, nga tsjìn-lè nikje xi chíkjeí, nga kjòxk'ín, o k'e nga tina'yi ndayá ko mìkiì kinìchját'aà-lèjen?”

⁴⁵ 'An xi xitaxá ítjòn 'mì-na, xán-la: “Okixíí xi xan-nò, k'e nga mìkii k'oas'ín kinìkòò jngoò xita nas'ín takó 'ñó ima kji, 'aán xi mìkii k'oas'ín kinìkò-ná.”

⁴⁶ Jñà xita ts'en koi s'eé-la kjo'in nita kjé-ne, koa jñà xi xita kixi s'eé-la kjoabinachon nita kjé-ne.

26

Kiis'ín tsajoóya-ne xita kondra-la Jesús nga tsoba'ño
(Marcos 14:1-2; Lucas 22:1-2; Juan 11:45-53)

¹ Jesús k'e nga jye kiichja yije 'én koi kitsò-la xita xi kota'yàt'aà-la:

² —Jñò, jye tíjiin-nò nga tà jò nachrjein chija ts'e s'eí Paxko; 'an xi Ki'ndí-la Xita xan-la yijo-na, yaá kongatsja it'aà ts'e xita naxandá nga koòt'aà-na krò.

³ Nachrjein koi jñà xita sko-la no'miì, xita xi okóya kjoíxoma-la Nainá xi kiskii Moisés ko xita jchínga-la jñà xita judío, yaá chixoña ya nditsin ni'ya-la Caifás xi no'miì ítjòn.

⁴ Yaá tsajoóya-ne kós'ín tsobà'ño Jesús xi kjoa chijé, ikjoàn sikk'en.

⁵ Kitsò-la xíkjín:

—Mì nachrjein-la s'eí sikk'eén nga mì kots'en jñà xita naxandá.

Jngoò chjoón xi kisikaájno xkii jne sko Jesús
(Marcos 14:3-9; Juan 12:1-8)

⁶ Jesús, k'e nga tíjna ján naxandá Betania, ya ni'ya-la jngoò xita xi tsindojno chrjoa yijo-la nga sa ítjòn xi 'mì Simón,

⁷ ijchò jngoò chjoón xi 'ya jngoò lamita ndajo xi 'mì alabastro xi tjíya-la xkii jne, xi 'ñó chjí-la. K'e nga tíjnat'aà ímixa Jesús, chjoón jè, tsibíxteèn-sòn sko jè xkii jne.

⁸ Jñà xita xi kota'yàt'aà-la Jesús k'e nga kijtseè, kòjti-la, kitsò:

—¿Mé-ne nga kasíkits'ón-ne jè xkii jne?

⁹ Tsà kàsatíjna, 'ñó-là tse chjí-la koa jè ton-la komaá kochját'aà-la xita ima.

¹⁰ Kii'nchré Jesús. K'eé kitsò-la:

—¿Mé-ne njeti-là chjoón jè? Koni s'ín kasiko-na ndaà kàs'ín.

¹¹ Jñà xita ima kítsajnakò kjit'aà-nò; tanga 'an mì i tíjnako kjit'aà-nò.

¹² Koni s'ín kasiko-na chjoón jè, nga kàbixteèn-jno xkii jne yijo-na, koií okàs'ín-ne nga síkijnandaà-na nga sijnña.

¹³ Okixíí xi xan-nò, nita ñánda-ne nga tíjtsa isò'nde nga kobísòn 'én ndaà-la Nainá, tikoáá kobísòn-nè koni s'ín kasiko-na mé-ne nga sikkítsjeèn-ne xita it'aà ts'e chjoón jè.

Kó kis'iin Judas nga tsatíjna Jesús
(Marcos 14:10-11; Lucas 22:3-6)

¹⁴ Jè xi 'mì Judas Iscariote xi ya itjoiin ts'e xita xi tejò ma-ne xita-la Jesús, kiikon jñà xita sko-la no'miì,

¹⁵ kitsò-la:

—¿Kó tíjn ton k'oi-ná nga sìngatsja-nò Jesús?

Jñà xita sko-la no'miì, katé ixò ton chroba tsibíndaàjiiin-ne.

¹⁶ Judas, k'eé tsibíts'ia nga tsohótsji'nde-la kós'ín sìngatsja Jesús.

Kiis'ín tsibíjna okixi Jesús k'e nga tsakjèn-ko xita-la xi tejò ma-ne
(Marcos 14:12-25; Lucas 22:7-23; Juan 13:21-30; 1 Corintios 11:23-26)

¹⁷ Jè nachrjein xi mats'ia ítjòn ts'e s'eí k'e nga kjèn inchrajín xi tsjín-la na'yo san jñà xita judío, jñà xita xi kota'yàt'aà-la Jesús ijchòkon, kiskònangui-la, kitsò-la:

—¿Ñánda mejèn-lè nga onguí kíndaà-jen tsojmì xi chjineé ts'e s'eí Paxko?

¹⁸ Jesús kitsò-la:

—Tanguíchòn ni'ya-la jngoò x̄it̄a ya j̄iìn naxandá. Kot'ìn-là: “Jè maestro k'oaá tsò: Jyee tíma chrañà n̄achrjein-na nga k̄iyá. Yaá ni'ya-lè k̄jián kachrje s'eí Paxko k̄o x̄it̄a xi kota'yàt'aà-na.”

¹⁹ Jñà x̄it̄a xi kota'yàt'aà-la, k'oaá s'ín kis'iìn koni s'ín kitsò-la Jesús. Yaá tsibindaà tsojmì xi k̄okjen kjoa ts'e s'eí Paxko.

²⁰ K'e nga jye k̄òjñò, Jesús, tsibíjnat'aà ím̄ix̄a k̄o x̄it̄a-la xi tejò ma-ne.

²¹ K'e nga nchikjèn, Jesús kitsò-la:

—Okixíí xi xan-nò, jñò, ì t̄ijnajìin jngoò-nò xi s̄ìngatsja-na ìt'aà ts'e x̄it̄a kondra-na.

²² Jñà x̄it̄a xi kota'yàt'aà-la Jesús 'ñó kjòba-la k'e nga okitsò. K'ée jngó jngó kiskònangui-la, kitsò-la:

—Na'èn, ¿a 'an-ná?

²³ Jesús kitsò-la:

—Jè xi kóngájiìn-kò-na chroba, jé xi s̄ìngatsja-na.

²⁴ 'An xi Kí'ndí-la X̄it̄a xan-la yijo-na, k'oaá s'ín komat'ian koni s'ín t̄ichja Xojon-la Nainá. ¡Tanga ím̄a xó-ne jè x̄it̄a xi s̄ìngatsja-na! Ísaá-là ndaà komà tsà mìkìi kits'iìn x̄it̄a jè.

²⁵ K'ée k̄iichja Judas, jè xi s̄ìngatsja Jesús, kitsò:

—Maestro, ¿a 'an-ná?

Jesús kitsò-la:

—Jon, ngaji-né.

²⁶ K'e nga nchikjèn, Jesús kiskoé inchrájin, k̄iichjat'aà-la Nainá nga kisichikon-t'in, kisìxkoaya ìkjoàn kitsjaà-la x̄it̄a xi kota'yàt'aà-la, kitsò-la:

—Chjóé, t̄ichioò, yijo-na né.

²⁷ Ìkjoàn kiskoé jngoò ch̄itsín, kitsjaà-la kjondaà Nainá, k'ée kitsjaà-la x̄it̄a xi kota'yàt'aà-la. Kitsò-la:

—Ngats'ioò, t'ioo jè xi t̄íya ch̄itsín.

²⁸ Jè-né xi jnì-na xi s̄íkixiya kjoa x̄it̄se xi b̄indaajìin-kò-nò. Jè jnì-na x̄ixteèn xi kjondaà ts'e k̄jìn x̄it̄a mé-ne nga jchat'aà-la jé-la.

²⁹ K'oaá xán-nò, mì t̄i k̄iì sk̄i-na vino skanda jè n̄achrjein k'e nga sk̄ik̄o ìjngoò k'a-nò vino x̄it̄se jè n̄achrjein k'e nga kot̄ixoma Na'èn-na.

'Én xi k̄iichja Jesús nga jè Pedro kjó'mat'in

(Marcos 14:26-31; Lucas 22:31-34; Juan 13:36-38)

³⁰ K'e nga jye kiseè jngoò-la sò Nainá ts'e Salmo, ìkjoàn k̄iì ján ì'a nindoò Yá Olivo.

³¹ Jesús kitsò-la x̄it̄a xi kota'yàt'aà-la:

—Ngats'ioò jñò, n̄it̄jen jè, k̄jineí takòn-ná, nga k'oaá s'ín t̄ichja Xojon-la Nainá nga tsò: “K̄iyá jè paxtò koa jñà orrè tsjohoya-né.”

³² Tanga koma ìskan, k'e nga kjoaáya-na, k̄jín ítjòn-nò ján nangui Galilea.

³³ Kitsò Pedro:

—Nas'ín ngats'ìi x̄it̄a-lè xi i'nga tsjín takòn-lè, 'an, n̄imé n̄achrjein-ne nga tsjìin takòn-lè.

³⁴ K'ée kitsò-la Jesús:

—Okixíí xi xan-lè, n̄it̄jen jè, k'e nga t̄ikj'eè k̄jindáya kóxtí, ngaji, jàn k'a tsjá'mat'in-ná.

³⁵ Pedro kitsò:

—Nas'ín skanda ya k̄iyáko-lè mìkìi kójn̄a'mat'in-lè.

Ngàsòn kitsò ngats'ìi x̄it̄a xi kota'yàt'aà-la Jesús.

K̄iì kitsò Jesús nga tsib̄itsi'ba ya ì'nde ñánda 'mì Getsemaní

(Marcos 14:32-42; Lucas 22:39-46)

³⁶ K'ée k̄iì Jesús ya ñánda 'mì Getsemaní k̄o x̄it̄a xi kota'yàt'aà-la. Kitsò-la:

—Títsajna ijndé. 'An, ya kò-là kjián nga kichjàt'aà-là Nainá.

³⁷ Jesús kiikò Pedro kò ingajò ixti-là Zebedeo. Ikjoàn tsibíts'ia nga kjòba-la koà kisikájno inima-la.

³⁸ K'ée kitsò Jesús:

—Tsí baá ma-la inima-na koni tsí mejèn kiyá. Títsajna ijndé koa titsajnakon-kò-ná.

³⁹ Jesús kiikjá chiba-isa. Ikjoàn tsohojna tsakjàn skanda it'aà nangui koa kisijét'aà-là Nainá, kitsò:

—Ji xi Na'èn-na xan-lè, tsà koma, kàtatjaàxìn-ná kjo'in koi, tanga mìtsà jè 'én ts'an kítasòn, jè kàtítasòn 'én tsiji.

⁴⁰ Ikjoàn j'ìi ijngoò k'a-ne ya ñánda títsajna xita-la xi kota'yàt'aà-là, tanga jña xita-la, kjijijòfè-né. Jesús kitsò-la Pedro:

—¿A mì kachíkjoa-nò tsà tà jngoò hora kòbitsajnakon kò-ná?

⁴¹ Títsajna kòon koa títisi'ba-là Nainá mé-ne nga mì sijkijne-nò kjoa ts'e jé. Xi okixi, jé inima-nò tijnandaà-né tanga jè yijo-nò xi tsjin-la nga'ño.

⁴² Xi ma-ne jò k'a kii ijngoò k'a Jesús nga kii kítisi'ba. Kitsò:

—Ji xi Na'èn-na xan-lè, tsà mìkii koma tjáxìn-na kjo'in koi, kòs'ín kàtítasòn koni s'ín mejèn-lè.

⁴³ K'e nga j'ìi ijngoò k'a-ne, jña xita xi kota'yàt'aà-là, tákó kjijijòfè-né nga 'ño nijña-la.

⁴⁴ Komà jàn k'a nga kii kítisi'ba. Yaá kisikítsajna xita xi kota'yàt'aà-là. Táko k'oaá tì kitsò nga tsibítsi'ba.

⁴⁵ J'ìi ijngoò k'a-ne ya ñánda títsajna xita xi kota'yàt'aà-là. Kitsò-la:

—¿A táko titsanikjáya-nò kò titsafè-nò? Jyee ijchò hora-la, 'an xi Ki'ndí-la Xita xan-la yijo-na, yaá kongatsja jña xita jé.

⁴⁶ Tísítjeen, chítsejèn-là, tíkjaán, jyee nchrobá chraña jè xi sijnngatsja-na.

Kii komà k'e nga kindobà'ño Jesús

(Marcos 14:43-50; Lucas 22:47-53; Juan 18:2-11)

⁴⁷ Táko tik'eé tíchja-isa Jesús nga ijchò Judas xi ya itjojin ts'e xita-la Jesús xi tejò ma-ne. Kjin xita tjiko xi 'ya kicha ndojò kò yá. Jña kisikasén xita sko-la no'mii kò xita jchínga xi ts'e xita judío.

⁴⁸ Judas, jè xi tsatjna Jesús, ítjòn tsibénojmi-la kòs'ín kòkò-la Jesús. Kitsò-la:

—Jè xi skíne'a, jè-né xi tindoḃa'ño.

⁴⁹ Nitoón kii kasit'aà chraña-la Jesús. Kitsò-la:

—Ndaà-lè Maestro.

Ikjoàn kiskine'a.

⁵⁰ Jesús kitsò-la:

—Amigo, ¿mé xá kjoj-ne?

Jña xita xi tjiko Judas, nitoón kitsobà'ño Jesús.

⁵¹ Jngoò xita xi tikoḃa ya sóhoko Jesús, tsachrje kicha ndojò-la. Tsajá-la jè xita chí'nda-la no'mii ítjòn; tsatet'aà líká-la.

⁵² Jesús kitsò:

—Tikájnatojò kicha ndojò-lè ya i'nde-la; jña xi kicha skaàn-ne nga sijk'en xikjín, ngásòn kicha kiyá ngajo-ne.

⁵³ ¿A mì 'ya-jèn tsà 'an sijé-la Na'èn-na, tsatoó tejò jmii àkjalé nitoón sijkasén-na?

⁵⁴ Tanga tsà k'oas'ín sijé, mìkii kítasòn koni s'ín tíchja Xojon-la Nainá nga mochjeén-né nga k'oas'ín koma.

⁵⁵ Jesús kitsò-la jña xita xi kjin ma-ne:

—¿Mé-ne kos'ín kòf'iì ndobà'ńó-ná nga kò kichà kò yá kich'à koni tsà jngoò xita chijé? Nachrjein nchijòn tijnako-nò ján ingo ítjòn nga okoòya-nò kò mìkii kindobà'ńó-ná.

⁵⁶ K'oií kjoa-la okoma-ne nga kitasòn 'én xi tít'aà xojon-la jña xita xi kiichja ngajo-la Nainá.

Tík'eé-né ngats'iì xita xi kota'yàt'aà-la Jesús tsanga kò kitsjeiin takòn.

Kii komà k'e nga tsibijna Jesús nguixkon nò'miì ítjòn

(Marcos 14:53-65; Lucas 22:54-55, 63-71; Juan 18:12-14, 19-24)

⁵⁷ Jña xita xi kitsobà'ńó Jesús kiikò ñánda tijná Caifás xi nò'miì ítjòn. Yaá títsajna xita xi okóya kjoítixoma-la Nainá xi kiskii Moisés kò xita jchínga-la xita judío.

⁵⁸ Jè Pedro, tà kjiin tà kjiin tsajmeètjngui-la skanda ijchò nditsin ni'ya-la nò'miì ítjòn. Jahas'en ni'ya. Yaá tsibijnat'aà-la ñánda títsajna xita xi síkinda ni'ya ingo nga mejèn-la skoe kós'ín koma nga kjoehet'aà kjoa.

⁵⁹ Jña xita sko-la nò'miì kò xita jchínga, ngats'iì xita xi tjin-la xá ts'e xita judío, tsohótsji'nde-la nga tsját'in 'én xi kondra ts'e Jesús mé-ne nga koma sijnatsja-ne xita Roma nga sijk'en Jesús.

⁶⁰ Tanga nímé 'én kisakò-la nas'ín ijchò xita ndiso xi kondra ts'e. Xi komà iskan ijchò jò xita ndiso

⁶¹ xi kitsò:

—Xita jè kitsò-né: “An, koma-na nga sìhixòña ingo ítjòn-la Nainá koa jàn nachrjein kìndàya à jngoò k'a-na.”

⁶² K'eé tsasijna kixi jè nò'miì ítjòn. Kitsò-la Jesús:

—¿A nímé 'én nokjoì, koni tsò 'én xi tsjá xita koi xi kondra tsiji?

⁶³ Jesús mìkii kiichja. Jè nò'miì ítjòn kitsò-la:

—Tènojmi kixi nga nguixkon Nainá xi tijnakon. Kot'in-nájen. ¿A ngaji-né xi Cristo [xita xi xó kisikasén-lè Nainá] nga Ki'ndí-la mai?

⁶⁴ Jesús kitsò-la:

—Ngajii xi k'oa si nga 'an-ná. Tikoá, k'oaá xán-nò, jñò jcha-ná xi Ki'ndí-la Xita xan-la yijo-na nga kótijnat'aà kixi-la ñánda tijná Nainá xi 'ńó tse nga'ńó tjin-la. Tikoáá jcha-ná k'e nga kjinchrobajñaà ijii ifi xi ts'e ngajmiì.

⁶⁵ Jè nò'miì ítjòn tsatijndajno yijo-la nikje-la xi íkjá nga 'ńó kòjti-la, kitsò:

—Xita jè, jyeé kà'yaà nga chjajno-la Nainá koni tsò 'én xi chja. ¿Mé s'eén-isa-ná xita xi kj'eí xi tsjá 'én? Jña, jyeé kàna'ya-lá koni s'ín chjajno-la Nainá.

⁶⁶ ¿Jñò, kó bixón, mé xi sikoáá?

Ngats'iì xita kitsò:

—Tjin-la jé, ok'ín-la nga sijk'en.

⁶⁷ Ikjoàn tsibíchrá'a kò tsi'beé-la. Koa tjin xi isén-la tsi'beé'a,

⁶⁸ kitsò-la:

—Ji Cristo [xi xó kisikasén-lè Nainá], kot'in-nájen, ¿yá xi tí'beé-lè?

K'e nga jè Pedro jàn k'a tsoho'mat'in Jesús

(Marcos 14:66-72; Lucas 22:56-62; Juan 18:15-18, 25-27)

⁶⁹ Jè Pedro k'e nga tijná nditsin ni'ya, ijchòkon jngoò chjoón ch'inda xi kitsò-la:

—Tikoáá ngaji, yaá tjaàkoii Jesús xi Galilea i'nde-la.

⁷⁰ Tanga jè Pedro tsoho'mat'in-né nga nguixkon ngats'iì xita. Kitsò:

—Mìkii be mé 'én xi tinokjoì.

⁷¹ Jè Pedro jyeé tíbitjo xotjoa ni'ya k'e kijtseè jngoò chjoón xi k'oa ti kitsò-la jña xita xi ya títsajna. Kitsò:

—Xita jè, tikoáá ya tsóhokò Jesús xi Nazaret ts'e.

⁷² Pedro ijngoò k'a tsoho'mat'in. Kitsò:

—i Tíbeè Nainá, mìkìì bexkoan xìtá jè!

⁷³ Nga komà iskan jñà xìtá xi yá títajna ijchòkon ñánda tíjna Pedro. Kitsò-la:
—Okixi-né, tìkoaá ngaji xìtá xi kota'yàt'aà-la Jesús-né. 'Yaà-lè; k'oaá tìs'ín nokjòì.

⁷⁴ K'eé isa 'ñó kiichja Pedro kitsò:

—i Beè Nainá, nas'ín tìk'eèn-ná, mìkìì bexkoan xìtá jè!

Tìk'e-ne kiskindàya jngoò kóxtí.

⁷⁵ K'eé tsibítseèn-la Pedro koni kitsò-la Jesús: “K'e tìkj'eè kjindáya kóxtí, ngaji, jàn k'a tsjá'mat'in-ná.” K'eé itjo ni'ya Pedro, jàn ndítsiaán; ndaà jchán kiskindàya.

27

Kjoa xi komàt'in Jesús k'e nga kjòngatsja Pilato (Marcos 15:1-2; Lucas 23:1-2; Juan 18:28-32)

¹ K'e nga kis'e isén, ngats'ìì xìtá sko-la nò'miì, jñà xìtá jchínga ts'e xìtá judío tsajoóya-ne nga kondrà kjoì-la Jesús mé-ne nga koma sìngatsja-ne jñà xìtá Roma nga sìk'en.

² Tsibít'aà'ñó, kìkò nga kisingatsja Pilato xi xìtaxá gobernador tíjna ts'e Roma.

Kii komàt'in Judas k'e nga k'en

³ Judas, jè xi tsatíjna Jesús, k'e nga jye kijtseè nga jye kitjoèt'in kjoa nga kiyá, 'ñó kokájno-la kjoa xi kis'ììn koa kiskátji-ne tòn chroba xi katé ma-ne jñà xìtá sko-la nò'miì kò xìtá jchínga.

⁴ Kitsò-la:

—Tsee jé tsohótsji-la yijo-na nga kisingatsja-nò jngoò xìtá xi nímé jé tjín-la.

Tanga jñà xìtá koi kitsò:

—Ngajen, mìkìì 'ya-jen. Kjoa tsiji-né.

⁵ Judas tsibítseèn tòn yá ingò ítjòn. K'eé kii tsibítjohóngui yijo-la.

⁶ Jñà xìtá sko-la nò'miì, kiskoé tòn, kitsò:

—Mìkìì koma yá sìjngoaa tòn xi tjíya kaxa-la tòn kjotjò-la Nainá. Tòn jè, chjí-la mik'en-né.

⁷ K'eé tsajoóya-ne nga jè tòn jè, nanguí kòtse jngoò 'nde-ne, xi 'mì: I'nde Ñánda Mandaà Tijí, mé-ne nga s'e-ne i'nde ñánda koma sìjììn xìtá xi xìn naxandá-la.

⁸ K'ojí kjoa-la, skanda nàchrjein i'nde, tákó k'oaá 'mì i'nde jè nga I'nde-la Jní 'mì.

⁹ K'oaá s'ín tsitasòn koni s'ín kitsò Jeremías xìtá xi kiichja ngajo-la Nainá nga kitsò: “Kiskoé tòn chroba xi katé ma-ne, koni tjín tsibíjna-la chjí-la jñà xìtá Israel,

¹⁰ kò k'oaá s'ín kiskijeén tòn jè nga tsatse i'nde-la xìtá xi tjí bíndaà koni s'ín kitsjaà-na okixi Nainá.”

'Én xi kiichja Pilato k'e nga kiskònangui-la Jesús (Marcos 15:2-5; Lucas 23:3-5; Juan 18:33-38)

¹¹ Jesús, k'e nga síjna nguixkòn jè xìtaxá gobernador kiskònangui-la, kitsò-la:
—¿A jì-né xi xìtaxá ítjòn-la jñà xìtá judío?

Jesús kitsò:

—Ngají xi k'oa si nga 'an-ná.

¹² K'e nga nchihóngui Jesús jñà xìtá sko-la nò'miì kò xìtá jchínga-la xìtá judío, Jesús nímé 'én kiichja.

13 K'eé kitsò Pilato, jè xi xitaxá gobernador:

—¿A mi na'ya-là koni tsò-lè? Kjin 'én tsjá xi kondra tsiji.

14 Tanga Jesús nijngoò 'én kiichja. K'oií kjoa-là nga jè xitaxá gobernador tà k'oaá komà-là.

*Kii komà k'e nga kitjoònè kjoa Jesús nga kiyá
(Marcos 15:6-20; Lucas 23:13-25; Juan 18:38-19:16)*

15 Nga xkì nó k'e nga bitjo s'eí Paxko, jè xitaxá gobernador síkijnandeí jngoò xita xi títsa'ya ndayá, jè xi mejèn-là xita naxandá nga kijnandeí.

16 Tik'eé-ne tíjna'ya ndayá jngoò xita xi 'ya-là nga 'ño ts'en xi 'mì Barrabás.

17 K'e nga chixoña xita naxandá, jè Pilato kiskònangui-là, kitsò-là:

—¿Yá-né xi mejèn-nò nga kijnandeí? ¿A Barrabás-né, o xi Jesús-né xi Cristo 'mì-là?

18 Koií okitsò-ne Pilato nga jyeé tíjin-là nga tà kjoaxitakòn-né nga ya ijchò síngatsja Jesús.

19 Jè Pilato k'e nga tíjna ni'ya osen, jè chjoón-là kisikasén xá-là, kitsò-là: “Kii ji chingájin kjoa-là xita kixi jè. Nati nitjen, tsí 'ño ch'o tsò nijña xi kò'biì-na it'aà ts'e.”

20 Tanga jña xita sko-là no'mi kò xita jchínga, chinchá'a xita naxandá nga kátasíjé nga kátijnandeí Barrabás kò kátasík'en Jesús.

21 Jè xitaxá gobernador ijngoò k'a kiskònangui-là jña xita naxandá; kitsò-là:
—¿Ñá-laá nga ingajò xita koi xi mejèn-nò nga síkijnandiaá?

Jña xita naxandá kitsò:

—Jè Barrabás.

22 Pilato kiskònangui-là jña xita naxandá. Kitsò-là:

—¿Mé xi sikoáá Jesús xi Cristo 'mì-là?

Ngats'ì xita naxandá kitsò:

—¡Kátasit'aà krò!

23 K'eé kitsò Pilato:

—¿Mé jé xi tsohótsji, mé-ne kiyá-ne?

Jña xita, isaá 'ño kiichja, kitsò:

—¡Kátasit'aà krò!

24 K'e nga kijtsee Pilato nga ni mé kjoa sindajjin, tà isaá tímatse kjoasiì, kiskinikjaá nandá nga tsaníjno tsja nga nguixkon xita naxandá [mé-ne nga skoe-ne jña xita nga nimé jé tjín-là]. Kitsò:

—Nimé jé tjín-na xi it'aà ts'e xita kixi jè nga mejèn-nò nìk'eèn. Kjoa tsajòn-nò.

25 Ngats'ì xita kjin kitsò:

—Kjoabiyaà-là xita jè, kindá tsajen-nájen kò ixti-najen.

26 Pilato, k'eé kisikijnandeí Barrabás; k'e nga jye kitsjaà okixi nga tsajá-là Jesús, ikjoàn kisìngatsja nga sit'aà krò.

27 Jña soldado-là xitaxá gobernador kiiko Jesús ján ni'ya osen. Ikjoàn kiichja yije-là soldado xikjín nga tsibìtsajnandii-là.

28 Tsachrje nikje-là koa kisikjá jngoò nikje xi inì kji.

29 Ikjoàn tsibí'a sko jngoò corona na'yá xi jña xó tsibíndaà-ne, koa jngoò yá tsohóya tsja kixi; k'eé chinchaxkó'nchit'aà-là nga kisìsobà-là. Kitsò-là:

—¡Viva xitaxá itjòn-là xita judío!

30 Tikoaá tsibíchrájno koa kiskoé yá xkajnchra xi kjiya tsja, tsatjì sko.

31 K'e nga jye kisìsobà-là, jaàxìn-là nikje inì xi íkjá. Ikjoàn kisikákjá-ne xi nikje ts'e. K'eé kiiko nga kosit'aà krò.

*Kii kiniko Jesús k'e nga kisasit'aà krò
(Marcos 15:21-32; Lucas 23:26-43; Juan 19:17-27)*

³² K'e nga jye nchifiko Jesús, kiskaàkjoò jngoò xita xi Cirene i'nde-la xi 'mì Simón. Jñà soldado kjo'ño kis'iin-la nga kisik'ajen krò-la Jesús.

³³ K'e nga ijchòko ya i'nde ñánda 'mì Gólgota 'én xi tsòya-ne i'nde sko mik'en,
³⁴ yaá kitsjaà-la vino xi tsjájin-la ndá chikitsja. K'e nga kiskoòt'aà Jesús mìkii kits'iì.

³⁵ K'e nga jyeé tsasit'aà krò, jñà soldado kisiskáko nikje-la Jesús nga kisika'bí-la xíkjin yá ts'e koma. K'oaá s'in tsitasòn 'én-la jè xita xi kiichja ngajo-la Nainá nga kitsò: “Kisika'bí nikje-na koá kisiskáko yá ts'e koma.”

³⁶ Ikjoàn yaá tsibìtsajna nga kisikinda Jesús.

³⁷ Ya isòn sko krò tsibít'aà 'én xi k'oa kitsò mé jé xi komà-la nga kinik'en. Jñà 'én koi, tsò: “Jè jèe xi Jesús xi Xitaxá Ítjòn-la xita judío.”

³⁸ Tikoáá kisit'aà krò jò xita chijé. Jngoò kisit'aà nga kixi-la koá jngoò kisit'aà nga ngaskón-la.

³⁹ Jñà xita xi ya ja, sikatji sko nga kiichjajno-la,

⁴⁰ kitsò-la:

—Ji, k'oaá kisi nga siixòñi ingo ítjòn-la Nainá ko jàn nachrjein kíndaà ngajo-ne; tikijnandeii yijo-lè. Tsà kixi kjoa nga ji xi Ki'ndí-la Nainá, chinájen-t'i yijo-lè krò.

⁴¹ K'oaá tís'in kisisobà-la jñà xita sko-la no'miì, ko xita xi okóya kjotíxoma-la Nainá xi kiskii Moisés, ko xita jchínga ts'e xita judío. Kitsò:

⁴² —Xita jè, tsachrekàjin kjo'in xi kje'ei xita, tanga jè xi yijo-la, mìkii ma ochrekàjin kjo'in. Tsà kixi kjoa nga jè Xitaxá Ítjòn-la Israel, kàtìtjojen-t'aà krò mé-ne nga kòkjeiín-ná it'aà ts'e.

⁴³ Xita jè, it'aà ts'e Nainá kjo'ño t'aà ikon. Tsà kixi kjoa tsjakeè Nainá, i'nde, jè kàtasiko. Nga k'oaá ti kitsò nga Ki'ndí-la Nainá ma.

⁴⁴ Skanda jñà xita chijé xi tikoá ya kjit'aà krò tikoáá tsatít'aà.

Mé xi komà k'e nga k'en Jesús

(Marcos 15:33-41; Lucas 23:44-49; Juan 19:28-30)

⁴⁵ K'e nga ijchò nchisen skanda xi jàn nga kjòhoxòn, kòhokji nga tíjtsa isò'nde kòjñò.

⁴⁶ Tijè-ne hora Jesús 'ño kiichja nga kitsò: “Elí, Elí, ¿lama sabactani?” 'Én jè tsòya-ne: Nainá, Nainá, ¿mé-ne kàjneitakòn-ná?

⁴⁷ Tjin i'nga xita xi ya títsajna xi kii'nchré-la, kitsò:

—Xita jè, jé chja-la Elías.

⁴⁸ K'eé tsangachikon jngoò xi kiikjaá tsanga; kisika'nchi-la ko vinagre; ikjoàn tsibísko-la inaxo; kitsjaà-la Jesús nga kàt'iì.

⁴⁹ Tanga kitsò xita xi i'nga:

—Kii k'oa niko, chítsejèn-lá, ¿a kjoii Elías nga skónájen-t'aà krò?

⁵⁰ Jesús ijngoò k'a 'ño kiskindàya. Ikjoàn k'en.

⁵¹ Jè nikje velo xi tjohóya jngoò osen ingo ítjòn kixajndà. Jòya komà skanda it'aà nangui; ts'a ch'ón koá tsàkjàn naxi

⁵² nga kitáx'a jñà itsjó-la mik'en. Kjìn xita tsjeè-la Nainá jaáya-la xi kjòtseé k'en.

⁵³ Jñà xita mik'en xi itjo-ne itsjó-la, k'e nga koma iskan nga jaáya-la Jesús, xita koi, jahas'en ya naxandá tsjeè Jerusalén; kjìn xita kijtseèkon.

⁵⁴ Jñà xita xi nchisikinda Jesús ko jé xita sko-la soldado, k'e nga kijtseè nga ts'a ch'ón, ngats'iì kjoa xi komà, tsí ndaà kitsakjòn. K'eé kitsò:

—Kixií-lá kjoa, xita jèe, Ki'ndí-la Nainá-né.

⁵⁵ Tikoáá kjìn íchjín títsajna xi kjìn nchikotsejèn-ne xi inchrobà-tjingui-la Jesús skanda ján Galilea nga kisichját'aà-la.

⁵⁶ Yaá títsajna xi 'mì María Magdalena, María xi nea-là ma Jacobo ko José, ko nea-là ixti-là Zebedeo.

K'e nga kisihjiin Jesús

(Marcos 15:42-47; Lucas 23:50-56; Juan 19:38-42)

⁵⁷ K'e nga jye kòjñò, j'ii jngoò xitá nchiná xi 'mì José. Yaá i'nde-la jè naxandá xi 'mì Arimatea. Xitá jè tikoáá yaá kiskoòta'yàt'aà-la Jesús.

⁵⁸ K'ée kiichja-la Pilato nga kisijé-la yijo-la Jesús. Jè Pilato kitsjaà okixi nga kàtatjóé-la.

⁵⁹ José kiskoé yijo-la Jesús; kisikájté jngoò nikje sábana tsjeè.

⁶⁰ Kii kiihjiin ya nangui-la xi ts'e José. Kiskinìs'engui jngoò ngajo itsjó xitse xi xó tsibíndaà-ne ya ingui nguijo. Ikjoàn tsohójsa xotjoa-la ngajo jngoò ndajo teè; ikjoàn kii-ne.

⁶¹ Jè María Magdalena ko María xi i'jngoò, yaá tsibítsajnat'aà chraña-la ñánda kisihjiin Jesús.

Mé-ne soldado kisikinda-ne ñánda kisihjiin Jesús

⁶² K'e nga komà inchijòn, jè nachrjein nìkjáya, jña xitá sko-la no'miì ko xitá fariseo kiikon Pilato.

⁶³ Kitsò-la:

—Na'èn, bítsjeèn-najèn, jè xitá ndiso jèe, k'e nga sà tsibìjnakon kitsò-né: “K'e nga kijchò jàn nachrjein kjoáaya-na.”

⁶⁴ K'oií kjoa-la kàtamakinda itsjó-la skanda k'e koma jàn nachrjein nga mì yaá kijchò xitá-la xi kota'yàt'aà-la k'e nga nitjen nga kijko chijé yijo-la. Ikjoàn kitso jña xitá-la nga keènojmi-la jña xitá naxandá: “Jyeé jaáya-la xi it'aà ts'e kjoábiyaà.” Koá isaá ch'o komà 'én ndiso koi koni jña xi ítjòn.

⁶⁵ Kitsò Pilato:

—Ya títsajna soldado. Tanguió tikinda. 'Ñó tichjoà jè itsjó nga 'ñó kàtas'e.

⁶⁶ K'ée kii nga tsibíchjoà'ñó jè itsjó koá tsasén jngoò-la sello ya isò'nga-la ndajo xi kijtsa. Ikjoàn kisikítsajna soldado xi kisikinda.

28

Mé xi komà k'e nga jaáya-la Jesús it'aà ts'e kjoábiyaà

(Marcos 16:1-8; Lucas 24:1-12; Juan 20:1-10)

¹ K'e nga jye tsato nachrjein nìkjáya, nga jye tís'e isén jè nachrjein tahàngo nga tàts'en xomàna, kii María Magdalena ko María xi i'jngoò nga kii katsejèn-la itsjó-la ñánda kisihjiin Jesús.

² K'e nga itjokàjen jngoò àkjale-la Nainá xi inchrobà-ne ngajmiì, tà nitóon ts'a jngoò ch'ón xi 'ñó ts'a nga jaàxin jè ndajo xi kijtsa ngajo itsjó; yaá tsibìjnasòn.

³ Jè àkjale ote kji koni jngoò ni'ín ch'on; ko jè nikje-la xi íkjá, chroba kji koni kjoàn 'nchán.

⁴ Jña soldado k'e nga kijtseè, tsí ndaà kitsakjòn-la. Tsí chiba-la tsatsé-né koá yaá k'en-ña.

⁵ Jè àkjale kitsò-la jña íchjín:

—Kì tsakjoòn-jèn. Be-ná, jè binchaàtsjioè Jesús xi kisit'aà krò.

⁶ Mì tì íí tíjna-ne. Jyeé kòfaáya-la koni s'ín kitsò nga kjoáaya-la. Nchrobá chitsejèn-la i'nde-la ñánda kisijna.

⁷ Nitóon tanguió, koatìn-la xitá xi kota'yàt'aà-la: “Jyeé kòfaáya-la. Jè, yaá tífi ítjòn-nò ján Galilea. Yaá jchaxkoòn i'jngoò k'a.” Tà k'oaá tjin 'én xi tsja-nò.

⁸ Jña íchjín nitóon itjogui-ne nguijo; kii tsangachikon; okji tsakjón koá okji 'ñó tsja s'e-la nga kii kénojmi-la xitá xi kota'yàt'aà-la Jesús.

⁹ K'e nga nchifi íchjín, tà n̄itoón kisatìkjoò Jesús koà kisìhixat'aà. Jñà íchjín, kii kinchat'aà chrañà-la, ìkjoàn chincha-xkó'nchit'aà-la nga kijtseèxkón, k'ée kitsohòkjá ndsokò.

¹⁰ Jesús kitsò-la:

—Kì tsakjoòn-jèn. Tanguió t̄ikí'nchré jñà 'ndsè mé-ne nga kàtjì-ne ján Galilea. Yáá skoè ìjngoò k'a-na.

Én xi kitsjaà jñà soldado

¹¹ K'e nga nchifi-ne jñà íchjín, t̄ikoaá kii i'nga-ne jñà soldado xi kisìkinda jé ìtsjó; kii ján jngoò osen naxandá nga kii kénajmí-la jñà x̄ita sko-la no'miì ngats'ìi kjoà xi komà.

¹² Jñà x̄ita sko-la no'miì kiikákò jñà x̄ita jchínga. K'e nga jye tsajoóya-ne, tseé ton kitsjaà-la jñà soldado,

¹³ ìkjoàn kitsò-la:

—Jñò, k'oaá tixón: “K'e nga ijchò osen n̄itjen nga titsayijòfè-jen, jñà x̄ita xi kota'yàt'aà-la Jesús ijchòkjaá chijé yijo-la.”

¹⁴ Tsà kji'nchré jè x̄itaxá gobernador nga titsayijòfè, ngajeén onguíchoòn-jen mé-ne nga mì kjo'in tsjá-nò.

¹⁵ Jñà soldado kiskoé ton xi kitsjaà-la kò k'oaá s'ín kitsò koni s'ín ki'mì-la. Skanda naxrjein ì'ndeì tákó k'oaá tsò jñà x̄ita judío.

*Kii kitsò Jesús nga kitsjaà-la xá x̄ita xi kota'yàt'aà-la
(Marcos 16:14-18; Lucas 24:36-49; Juan 20:19-23)*

¹⁶ Jñà x̄ita xi kota'yàt'aà-la Jesús xi nguì tejngoò ma-ne, kii ján Galilea ya nindoò ñánda nga okitsò-la Jesús.

¹⁷ K'e nga kijtseè Jesús, chincha-xkó'nchit'aà-la nga kijtseèxkón. Tanga tjín i'nga xi mìkii kòkjeín-la tsà jè-né.

¹⁸ Jesús, k'ée kii kasit'aà chrañà-la, kitsò-la:

—Jyee kitjóé yije-na nga'ñó nga 'an kotìixoma ngajmiì kò ì isò'nde.

¹⁹ Tanguíchòn yije x̄ita xi tjín nga tíjtsa naxandá xi tjín isò'nde; takóya-là nga it'aà ts'an kàtakota'yà; t'een bautizar it'aà ts'e 'ín-la Na'èn-ná kò ts'e Kì'ndí-la koà kò ts'e Inimà Tsjeè-la Nainá;

²⁰ takóya-là nga kàtasíkitasòn yije kjoà xi 'an tsakoóya-nò. Kì nìjchàajiìn-jèn nga 'aán t̄ijnakò-nò naxrjein inchiòn skanda k'e nga kjoehet'aà isò'nde. K'oaá s'ín kàtama.

'Én ndaà-la Nainá xi kjoa ts'e Cristo koni s'ín kiskii San Marcos

*Kó kitsò 'én xi kiichja Juan xi kis'iin bautizar xita
(Mateo 3:1-12; Lucas 3:1-9, 15-17; Juan 1:19-28)*

¹ I mats'ia-ne 'én ndaà-la Jesucristo xi Ki'ndí-la Nainá.

² K'oaá s'ín komà koni s'ín tjit'aà xojon-la Isaías xita xi kiichja ngajo-la Nainá nga kitsò:

'An, sikasén ítjòn-lè xita-na xi kjiko 'én,
jè xi koindaaya ítjòn-lè ndiyá-lè.

³ Na'yà-la jta-la jngoò xita xi 'ño chja
ya i'nde it'aà xìn ñánda nangui kixi choòn, nga tsò:

“Tjandaà ndiyá-la Nainá ya jjiin inima-nò;
kixi tikájna koni jngoò ndiyá ñánda kojmeèya Na'èn-ná.”

⁴ K'oaá s'ín komà; j'ii jè Juan nga kis'iin bautizar xita ya i'nde it'aà xìn ñánda nangui kixi choòn. Kiichjaya nga katasíkajno jé-la jña xita nga mì ti jé kohótsji-ne, ikjoàn katas'ín bautizar yijo-la mé-ne nga sijchàat'aà-la Nainá jé-la.

⁵ Kjìn xita ijchò 'nchré-la Juan xi inchrobà-ne nangui Judea ko naxandá Jerusalén. K'e nga jye jahatakòn jé-la jña xita, jè Juan kis'iin bautizar ya nandá xajngá nandá Jordán.

⁶ Nikje xi tsohòkjá Juan, tsja-la cho camello-né; ko jngoò sincho chrjoa tsibikjá ndáyá-la; tsojmi xi kiskine Juan, jña cho langosta, ko tsjén-la cho cera xi tjín jjiin ijña.

⁷ K'oaá s'ín kiichja nga tsò:

—Jngoò nchrobátjngui-na xi isa tse nga'ño tjín-la mì k'oaà-ne koni 'an, skanda mì kì tjínde-na nga kósiñiat'aà-la nga skíjnda jè xox'ín-la xojté-la.

⁸ Kixii kjoa 'an, ta nandá s'iin-na bautizar xita, tanga jè xi sa nchrobátjngui-na, koó Inima Tsjeè-la Nainá s'iin-nò bautizar.

*Kós'ín komà k'e nga komà bautizar Jesús
(Mateo 3:13-17; Lucas 3:21-22)*

⁹ Jngoò nchrjein j'ii-ne Jesús ya Nazaret, nangui xi chja-ne Galilea; ikjoàn jè Juan kis'iin bautizar ya nandá xajngá nandá Jordán.

¹⁰ K'e nga itjokajjìn-ne nandá Jesús, nitoón kijtseè nga kitáxa ngajmiì koa jè Inima Tsjeè-la Nainá inchrobàjen 'nè-la koni jngoò nise paloma.

¹¹ Koa kina'yà jngoò-la 'én xi ngajmiì inchrobà-ne xi kitsò:

—Ji-né xi ki'ndí-na, xan-lè, xi 'ño matsjake-lè, tsja tjín-la takoàn it'aà tsiji.

*K'e nga jè xita neii kiskoòt'aà Jesús
(Mateo 4:1-11; Lucas 4:1-13)*

¹² Nga komà iskan jè Inima Tsjeè-la Nainá kisikasén Jesús ya i'nde it'aà xìn ñánda nangui kixi choòn.

¹³ Ichán nchrjein tsibijna; tsibijnajjìn-la cho ts'en ko jè xita neii kiskoòt'aà nga mejèn-la nga kátátsji jé. Tanga jña àkjalé kisis'in-la.

*K'e nga tsibíts'ia Jesús nga kisixá ya i'nde Galilea
(Mateo 4:12-17; Lucas 4:14-15)*

¹⁴ K'e nga jye kii ndayá Juan xi kis'iin bautizar xita, Jesús kii ján Galilea nga kiichjaya 'én ndaà-la Nainá koni s'ín otíxoma Nainá.

¹⁵ Kitsò:

—Jye kjòchrañàt'aà-nò nàchrjein nga jchaa kós'ín otíxoma Nainá. Tíkájno jé-nò, kì tì jé binchaàtsji-nò; kàtakjeiín-nò 'én ndaà-la Nainá.

Kii kis'ùin Jesús nga ñijòn xita kiichja-la xi ma-la sík'en tìn
(Mateo 4:18-22; Lucas 5:1-11)

¹⁶ Jesús, k'e nga ja indii ndáchikon Galilea, kijtseè xi 'mì Simón ko 'ndse Andrés nga nchisíkatjen-nguindá na'ya-la. Xita koi, tìn sík'en.

¹⁷ Jesús kitsò-la:

—Nchrobátjngui-ná, 'an tsjaà-nò xá nga kíxkóya xita xi 'an kjít'aà-na koni s'ín maxkóya tìn k'e nga nìk'eèn.

¹⁸ Jñà xita koi nitoón kisikájna na'ya-la nga kiitjngui-la Jesús.

¹⁹ Ìsa xijngoaà ìsa, Jesús kijtseè xi 'mì Jacobo ko 'ndse Juan, ixti-la Zebedeo nga títsaya chitso; nchibíndaàya na'ya-la.

²⁰ Tíkooá nitoón kiichja-la xita koi; yaá kiitjngui-la Jesús; kisikájna Zebedeo xi na'én-la ma, ko xita chí'nda xi síxáko ya iya chitso.

Jngoò xita xi inima ch'o-la neí tjiin inima-la
(Lucas 4:31-37)

²¹ Ijchò naxandá Capernaum; k'e nga jye ijchò nàchrjein níkjáya, jahas'en ni'ya ingo sinagoga ts'e xita judío; ikjoàn tsakóya 'én-la Nainá.

²² Jñà xita, tà k'oaá komà-la koni tsò 'én xi tsakóya. K'oaá s'ín tsakóya koni jngoò xita xi 'ño tjin-la kjotíxoma; mìtsà k'oaas'ín tsakóya koni xita xi okóya kjotíxoma-la Nainá xi kiskii Moisés.

²³ Ya ni'ya ingo sinagoga tjna jngoò xita xi inima ch'o-la neí tjiin inima-la. Ñó kiichja nga kitsò:

²⁴ —Ji Jesús, xi Nazaret tsiji, ¿mé xi mejèn-lè? ¿Mé xi binchaàtsji? ¿A kòf'i níkjehesòn-nájen? Bexkon-lè; ji-né xi Xita Tsjeè-la Nainá.

²⁵ Tanga Jesús tsohótiko jè inima cho-la neí, kitsò-la:

—Jyò tjni, titjojiin inima-la xita jè.

²⁶ Jè inima cho-la neí kisikatsé koa kiskindàya xá, ikjoàn itjojiin inima-la xita jè.

²⁷ Ngats'ii xita xi títsajna, tà k'oaá koma-la; xki xi ján tsohóko xíkjin; kitsò:
—¿Mé kjoa-ne koi? Jngoò kjoa xitse okóya xi tjin-la kjotíxoma. Skanda jñà inima cho-la neí tsjá-la okixi, ko 'nchréñijon-la.

²⁸ Jesús, nitoón kina'ya-la kóhokji nga jngoò itjandi nangui xi chja-ne Galilea.

K'e nga kisindaà-ne Jesús jè nàchíya-la Pedro
(Mateo 8:14-15; Lucas 4:38-39)

²⁹ Jesús, k'e nga itjo-ne ni'ya ingo sinagoga, kjihjtako Jacobo ko Juan, nitoón kii ya ni'ya-la ñánda tjna Simón ko Andrés.

³⁰ Jè nàchíya-la Simón, kijna xk'én-né. Ch'in tjnnga tjin-la. Nitoón kis'enojmi-la Jesús.

³¹ Ikjoàn kiikasít'aà chrañà-la; kitsobà'ño tsja; kisikasítjen. Ko nitoón kitjaaxin-la ch'in tjnnga. Ikjoàn chjoón jè, kisis'in-la Jesús ko xita xi kjihjtako.

K'e nga Jesús, kjin xita xk'én kisindaà-ne
(Mateo 8:16-17; Lucas 4:40-41)

³² K'e nga jye kiskaàtji ts'oó nga jye kòjñò, j'iiiko-la Jesús ngats'ii xita xk'én ko xi inima cho-la neí tjiin inima-la.

³³ Ngats'ii xita naxandá, yaá kitseèjto xotjoa ni'ya.

³⁴ Jesús, k̄jìn jchán x̄it̄a kisindaà-ne xi k̄jìn skaya ch'in t̄jìn-la t̄ikoáá tsachrjekàjìin in̄ima ch'o-la neí̄ xi t̄jìin in̄ima-la x̄it̄a; Jesús mìkìi kitsjaà'nde nga j̄nà neí̄ k̄iichj̄a nga j̄nà in̄ima ch'o-la neí̄ jyeé beèxkon yá-né Jesús.

*K'e nga ijchò Jesús ján Galilea nga kisika'bí 'én ndaà-la Nainá
(Lucas 4:42-44)*

³⁵ 'Nó tajñòya tsasítjen Jesús; tákó j̄nò-isa nga itjojiin najnchra; k̄i jngoò ì'nde ìt'aà xìn ñánda tsjìn x̄it̄a nga k̄iichj̄at'aà-la Nainá.

³⁶ Simón ko x̄it̄a x̄ikj̄ín xi i'nga, k̄i kátsji Jesús.

³⁷ K'e nga jye kisakò-la ñánda t̄jna Jesús, kitsò-la:

—Ngats'ìi x̄it̄a, j̄i ótsji-lè.

³⁸ K̄iichj̄a Jesús, kitsò:

—T̄ikoá t̄ikjiaán j̄nà naxandá chrañat'aà nga kichj̄aya 'én-la Nainá nga koií xá j̄i-na.

³⁹ K'oaá s'ín tsajmeè Jesús kóhokji ì'nde Galilea nga k̄iichj̄aya 'én-la Nainá ya ni'ya ingo sinagoga nga x̄k̄i xi ján naxandá. T̄ikoáá tsachrjekàjìin-ne in̄ima chò-la neí̄ xi t̄jìin in̄ima-la x̄it̄a.

*Kii komà nga kjòndaà jngoò-ne x̄it̄a xi t̄bindojno chrjoa yijo-la
(Mateo 8:1-4; Lucas 5:12-16)*

⁴⁰ J'ìikon jngoò x̄it̄a xi t̄bindojno chrjoa yijo-la. Tsasèn-xkó'nchit'aà-la Jesús, tsibítsi'ba-la, kitsò-la:

—Tsà mejèn-lè, t̄itsjeè-ná ch'in xi t̄jìn-na.

⁴¹ Jesús kjòhimakeè-né, tsijmeé tsja nga tsohót'aà-la yijo-la x̄it̄a jè, kitsò-la:

—Mejèn-na, kàtandaà-ne.

⁴² T̄ik'eé-ne nga t̄ichj̄a Jesús, n̄it̄oón kjòndaà-ne; kitjaàxìn-la ch'in; kjòtsjeè-ne yijo-la.

⁴³ Jesús kisihixat'aà x̄it̄a jè nga k̄i-ne. Tanga ítjòn 'ñó tsibít'in-la, kitsò-la:

⁴⁴ —T̄iná'yi, k̄i yá x̄it̄a bènojmi-la. T'in ñánda t̄jna n̄o'miì, takó-la yijo-lè nga jye kjòndaà-ne; jch'ii kjotjò-lè, tsojmì xi s̄jé kjotíxoma-la Nainá xi kiskii Moisés, mé-ne nga tsjeè kijna-ne nguixkon Nainá t̄ikoá skoe j̄nà x̄it̄a nga jye kjòndaà-ne ch'in-lè.

⁴⁵ Tanga x̄it̄a jè, k'e nga k̄i-ne, tsibíts'ia nga tsibénojmi yije kós'ín komát'in. K'oaá komà-ne nga jè Jesús, mì t̄i k̄i ma taxk̄i jahas'en-jìin-ne j̄nà naxandá; yaá tsibìjna ñánda tsjìn x̄it̄a. Tanga j̄nà x̄it̄a xi x̄k̄i xi ján ì'nde inchrobà-ne, yaá ijchòkon ñánda t̄jna Jesús.

2

*K'e nga jè Jesús kisindaà jngoò-ne x̄it̄a xi mìkìi ma osìjna kixi
(Mateo 9:1-8; Lucas 5:17-26)*

¹ Xi komà jò jàn naxrjein, ijchò ìjngoò k'a Jesús ján naxandá Capernaum. K̄i'nchré x̄it̄a nga ya t̄jna Jesús ya ni'ya jè.

² T̄ik'e-ne k̄jìn jchán x̄it̄a ijchò maxkót'aà-la skanda mì ti k̄i tsì'ndè-ne xotjoa ni'ya. Jesús k̄iichj̄ajajìin-la 'én ndaà-la Nainá.

³ Jngoò x̄it̄a j'ìiko xi mìkìi ma síhiníyá yijo-la. Ñijòn x̄it̄a yangui.

⁴ Nga mìkìi komà kitjò'nde-la nga jahas'en ya xotjoa ni'ya, nga 'ñó k̄jìn x̄it̄a t̄itsajna, yaá kiskix'a ìtsjá ni'ya ya kixi-la ñánda t̄jna Jesús. Yaá kiskinìjen-ne jè x̄it̄a xi xk'én xi kjiya-la yá.

⁵ Jesús, k'e nga kijtseè nga j̄nà x̄it̄a koi mokjeiín-la ìt'aà tse, kitsò-la jè x̄it̄a xi xk'én:

—J̄i ndí na'èn, jé-lè jye kichàat'aà-lè.

6 Ya títsajna i'nga xita xi okóya kjoítixoma-la Nainá xi kiskii Moisés nga nchisíkítsjeèn jjiin inima-la. Kitsò:

7 “¿Mé-ne kòs'ín chja-ne jè xita jè nga Nainá chjajno-la? Nga tajngoò Nainá síjchàat'aà-ná jé-ná.”

8 Tik'e kijtseèya-la Jesús koni s'ín nchisíkítsjeèn jjiin inima-la. Kitsò-la:

—¿Mé-ne kòtsò-ne kjohítsjeèn-la inima-nó?

9 ¿Mé xi isa chiba 'in tjin? Tsà xan-la jè xita xi xk'én: “Jé-lè jye kàchàat'aà-lè”, o tsà xán-la: “Chjoí nachan-lè, tisítjin, tijeí.”

10 Kokoò-nò nga 'an xi Ki'ndí-la Xita xan-la yijo-na, tji'ndeé-na nga síjchàat'aà-la jé-la xita i isò'nde.

K'eé kitsò-la jè xita xi xk'én:

11 —Ji, k'oaá xan-lè: Tisítjin, chjoí nachan-yá-lè, t'in-ne ni'ya-lè.

12 K'eé tsasítjen jè xita xk'én. Kiskoé nachan-la. Itjojin-la ngats'ii xita xi títsajna. K'e nga kijtseè kjoa koi, tà kjòxkón-la ngats'ii xita. K'eé jeya kisikíjna Nainá. Kitsò:

—Ni saá jngoò k'a 'yaá jngoò kjoa xi kòs'ín ma.

*K'e nga jè Jesús kiichja-la Leví
(Mateo 9:9-13; Lucas 5:27-32)*

13 Jesús, jngoò k'a itjo. Kii ján indii ndáchikon. Ngats'ii xita yaá ijchòkon, ikjoàn tsakóya-la 'én ndaà-la Nainá.

14 K'e nga nchifi, Jesús kijtseè jè Leví, ki'ndí-la Alfeo. Tijnat'aà ímixa ya ñánda síkíchjítjì tsojmì ts'e Roma. Kitsò-la:

—Nchrohótjinguí-ná.

K'eé tsasítjen Leví, kiitjinguí-la Jesús.

15 K'e nga tijnat'aà ímixa Jesús nga tíkjèn ya ni'ya-la Leví, kjin ma xita xi síkíchjítjì tsojmì kò xita xi jé tjin-la títsat'aakò ímixa Jesús kò xita xi kota'yát'aà-la. Kjin jchán ma xita xi tjinguí-la.

16 Jña xita xi okóya kjoítixoma-la Nainá xi kiskii Moisés kò xita fariseo k'e nga kijtseè Jesús nga tíkjèn-kò xita xi tse jé tjin-la kò xita xi síkíchjítjì tsojmì, kitsò-la jña xita xi kota'yát'aà-la Jesús:

—¿Mé-ne k'oas'ín-ne Maestro-nò nga xita xi síkíchjítjì tsojmì kò xita jé kjèn-kò-ne?

17 K'e nga kii'nchré Jesús; kitsò-la:

—Jña xita xi mì ch'in tjin-la, mì chjineexkii mochjeén-la; jña-né xita xi xk'én xi mochjeén-la chjineexkii. 'An, mìtsà koi xá j'i-na nga jña kichjà-la jña xita xi tsò-la yijo-la nga xita kixi, koi xá j'i-na nga jña kichjà-la xita xi beè-la ikon nga jé tjin-la.

*Xita xi bitsajnachjan
(Mateo 9:14-17; Lucas 5:33-39)*

18 Jngoò k'a, k'e nga jña xita xi kota'yát'aà-la Juan kò jña xi kota'yát'aà-la xita Fariseo nchibitsajnachjan, kii i'nga xita koi nga kiskònanguí-la Jesús. Kitsò-la:

—Jña xita xi kota'yát'aà-la Juan kò xi kota'yát'aà-la xita Fariseo bitsajnachjan-né. ¿Mé-ne jña xita tsiji xi kota'yát'aà-lè mì bitsajnachjan-né?

19 Kitsò Jesús:

—¿A bitsajnachjaán xita k'e nga xita kòbixan k'e nga ya tíjnako-isa jè xita x'in xi kòbixan? Majin, mìkii bitsajnachjan xita.

20 Tanga kijchò nachrjein k'e nga tjáxin-la x'in xi kòbixan; k'e-né nga kítsajnachjan xita.

21 Jngoò nikje ibaà mìkii ma sijto-ne kò nikje xitse; nga jè nikje xitse, kjeèn-yó-né koa kotejnda-né jè nikje ibaà. Isáá tse koma ñánda kixajndà kji.

²² Tìkoáà mìtsà yá xi koma binchá xán ixìi kò chrjoa jchínga; tsà kòs'ín s'een, k'e nga jye kojchá xán, sùxajndà chrjoa jchínga, ìkjoàn chija xán kò chrjoa. Jè xán ixìi, chrjoa xitsee sinchá.

Kiis'ín tjin it'aà ts'e nachrjein nikjáya
(Mateo 12:1-8; Lucas 6:1-5)

²³ Jngoò nachrjein nikjáya ja Jesús ya ñánda títje trigo. Jñà xita xi kota'yàt'aà-là tsate chiba natín-là trigo.

²⁴ Jñà xita Fariseo kitsò-là:

—¿Mé-ne kòs'ín-ne xita-lè jè nachrjein nikjáya? Mìkiì tji'nde nga kòs'ín koma.

²⁵⁻²⁶ Kiichja Jesús kitsò-là:

—¿Ñò, a mìtsà jye tjiin-nò koni s'ín tíchja Xojon-là Nainá koni kis'iin xitaxá ítjòn xi ki'mi David kò jñà xita-là xi kjihitako k'e nga no'miì ítjòn tsibijna jè Abiatar? K'e nga kjòhòjò-là nga nì mé tjin xi kine, jahas'en ni'ya-là Nainá. Tsakjèn inchrájin tsjeè-là Nainá. Tìkoá kitsjaà-là xita-là xi tjiko. Mìkiì tji'nde nga jñà kòkjen. Tà jñà no'miì tji'nde-là nga kòkjen.

²⁷ Jngoò k'a kitsò Jesús:

—Jè nachrjein nikjáya, koií xá kisindaà-ne nga kjondaà ts'e xita. Mìtsà koi xá kisindaà-ne xita nga kjondaà ts'e nachrjein.

²⁸ K'oaá s'ín tjin, 'an xi Ki'ndí-là Xita xan-là yijo-na, skanda jè nachrjein nikjáya, 'aán otiixoma-là.

3

Xita xi kixit'aà jngoò tsja
(Mateo 12:9-14; Lucas 6:6-11)

¹ Jngoò k'a jahas'en Jesús ñánda tina jngoò ni'ya ingo sinagoga. Kò ya tina jngoò xita xi kixit'aà jngoò tsja.

² Jñà kondra-là Jesús nchisíkinda nga mejèn-là nga skoe a siindaá-ne jè xita xi kixit'aà tsja jè nachrjein nikjáya, mé-ne nga koma kohongui-ne.

³ Jesús kitsò-là jè xita xi kixit'aà jngoò tsja:

—Tisítjii, tisijni i jngoò osen-là xita.

⁴ Jesús k'ée kitsò-là jñà xita xi i'nga:

—¿A tsjá'nde kjotixoma nga ndaà s'éeen, o xi ch'o s'éeen, jè nachrjein nikjáya? ¿A siindaá-ná xita, o xi sik'en-ná?

Jñà xita xi otì'mi-là ta jyò tsibìtsajna.

⁵ Jesús kiskoòtsejèn-jiiin-là xita nga jti komà-là. Tìkoá ba kis'e-là nga tájaajiiin tjin inima-là jñà xita. K'ée kitsò-là jè xita xi kixit'aà tsja:

—Tjeendojoi ndseii.

Tsijmeé tsja, nitóon kjondaà-ne.

⁶ Jñà xita fariseo, k'e nga itjo-ne, tsajoóya-ne kò xita Herodes nga mejèn-là sikk'en Jesús.

K'e nga kjin xita kùtjingui-là Jesús ya indii ndáchikon Galilea

⁷ Jesús kò xita xi kota'yàt'aà-là chinchat'aà xìn. Ján kiì indii ndáchikon. Kjin xita kùtjingui-là xi nangui Galilea ts'e kò xita nangui Judea,

⁸ kò xita naxandá Jerusalén, kò xita nangui Idumea, kò xita xijngoáà xajngá nandá Jordán kòhokji jngoò itjandii-là naxandá Tiro kò Sidón nga kiì'nchré-là kjojkón xi kis'iin Jesús. K'oaá komà-ne kjin jchán xita ijchò tjingui-là.

⁹ Jesús kitsò-là xita xi kota'yàt'aà-là:

—Kjit'aà nachrjein tjajnandaà jngoò chitso mé-ne nga mi xita kojtinè-ná.

10 Koií kjoa-là nga jyeé kìn jchán xita xk'én kjòndaà-ne. Jñà xita xk'én xi i'nga, yaá fikjanè'ño ñánda tíjna Jesús nga mejèn-là koòt'aà-là tsja.

11 Jñà xita xi inima ch'o-là neíí tíjìn inima-là, k'e nga beè Jesús bincha-xkó'nchit'aà-là, ikjoàn 'ño chja, tsò:

—Ji-né xi Ki'ndí-là Nainá.

12 Tanga jè Jesús 'ño tsohótiko nga mì jñà keènojmi yá-né jè.

Kó 'mì 'ín-là xita-là Jesús xi tejò ma-ne

(Mateo 10:1-4; Lucas 6:12-16)

13 Xi jye komà iskan, Jesús kùimijìn-jno jngoò nindoò. Kùichja-là xita xi jè ndaà kisaseèn takòn. Xita koi, ijchò kinchat'aà-là.

14 Ikjoàn jaàjìn tejò xita xi koahitako, tijñà-ne xi sikkasén nga kichjaya 'én ndaà-là Nainá

15 xi tikoa kitjoé-là okixi nga sùindaà-ne xita xi ch'in tíjn-là tikoa kochrekàjìn inima ch'o-là neíí xi tíjìn inima-là xita.

16 Jñà xita xi kitjaàjìn: jè Simón. Ikjoàn tsibít'aàsòn 'ín-là; Pedro kitsò-là.

17 Kò jñà ixti-là Zebedeo xi 'mì Jacobo kò jè 'ndse xi 'mì Juan, xi tikoa tsibít'aàsòn 'ín-là; Boanerges kitsò-là. (Jè 'én jè tsò-ne: Ixti-là ch'on.)

18 Kò Andrés; Felipe; Bartolomé; Mateo; Tomás; Jacobo xi ti-là ma Alfeo; Tadeo; Simón, xita xi ya fít'aà-là xita cananista;

19 Judas Iscariote, jè xita xi kisingatsja kondra-là Jesús.

Xita xi chjajno-là Inima Tsjeè-là Nainá

(Mateo 12:22-32; Lucas 11:14-23; 12:10)

K'e nga j'ì-ne Jesús ni'ya ñánda síkjáya,

20 ijngoò k'a kòkjìn xita skanda mì ti kùì kitjò'nde-là nga tsakjèn.

21 K'e nga kùì'nchré xita xíkjin Jesús, kjoa xi tís'ín, kùì kátsji nga tsoba'ño; kitsò: Skáyaá-là.

22 Jñà xita xi okóya kjotíxoma-là Nainá xi kiskùì Moisés xi j'ì-ne Jerusalén k'oaá kitsò nga jè xita neíí xi 'mì Beelzebú tíjìn inima-là Jesús, nga jè xita sko-là xita neíí tsjá-là nga'ño nga ochrekàjìn inima ch'o-là neíí xi tíjìn inima-là xita.

23 Jesús kùichja-là xita koi. Tsibénojmi jngoò-là kjoa xi mangásòn. Kitsò-là:

—¿A komáá jè xita neíí kochrekàjìn-ne xi tijè-ne yijo-là ya inima-là xita? Majìn.

24 Tsà jngoò naxandá je, tsà jòya tíjn nga kondra títsajna-là xíkjin, mìkùì koma 'ño kítsajna;

25 kò tsà jngoò ni'ya, tsà jòya tíjn nga kondra títsajna-là xíkjin, tikoaá mìkùì koma 'ño kítsajna.

26 Tsà jè xita neíí, tsà jòya tís'ín xi tijè-ne yijo-là, mìkùì koma 'ño kíjna. Jye tífehet'aà nachrjein-là.

27 'Jngoò xita xi tíjn-là nga'ño, mì yá xi koma kjoahas'en ni'ya-là nga sìichijé-là tsà mì ítjòn kòjít'aà'ño. K'eé koma sìichijé-là k'e nga jye kàsít'aà'ño.

28 'Okixíí xi xan-nó, xita xi tíjn-là jé kò xi chjajno-là Nainá, jchat'aà-là jé-là.

29 Tanga jñà xita xi chjajno-là Inima Tsjeè-là Nainá, mìkùì jchat'aà-là nita mé nó-ne, nita mé nachrjein-ne. Kjo'in s'e-là nita kjé-ne.

30 Koií k'oas'ín kitsò-ne Jesús nga jñà xita xi okóya kjotíxoma-là Nainá xi kiskùì Moisés kitsò-né: “Xita jè, inima ch'o-là neíí tíjìn inima-là.”

Nea-là Jesús kò 'ndse

(Mateo 12:46-50; Lucas 8:19-21)

31 Xi komà iskan, ijchò 'ndse kò nea-là Jesús. Ján ndítsiaán tsibítsajna. K'eé kinokjoà-là Jesús.

- ³² Jñà x̄it̄a xi t̄ítsaj̄nand̄i-l̄a, kitsò-l̄a:
—Nea-lè k̄o jñà 'ndsì, ján nd̄ítsiaán t̄ítsaj̄na. J̄i xó óts̄ji-lè.
- ³³ K'eé kiich̄ja Jesús, kitsò:
—¿Yá-né xi nea-na k̄o xi 'ndsè?
- ³⁴ Ikjoàn kiskoòtsejèn-j̄iìn-l̄a jñà x̄it̄a xi t̄ítsaj̄nand̄i-l̄a. Kitsò:
—Jñà x̄it̄a koi xi nea-na, k̄o xi 'ndsè.
- ³⁵ Nga n̄it̄a yá x̄it̄a-ne xi síkitasòn koni s'ín mejèn-l̄a Nainá, jñà-né xi 'ndsè, xi tich̄ja, k̄o xi nea-na.

4

Kjoa xi mangásòn ts'e x̄it̄a xi b̄ít̄je xojmá (Mateo 13:1-9; Lucas 8:4-8)

- ¹ Jesús ìjngò k'a tsib̄íts'ia nga tsakóya ya ìnd̄i ndáchikon. K̄jìn jchán ma x̄it̄a xi chixoñat'aà-l̄a. Jesús jahas'en jngò chitso xi k̄jijnaj̄iìn ndáchikon; ìkjoàn tsib̄ijnaya. Ngats'ìi x̄it̄a, yaá t̄ítsaj̄nat'aà nanguií ya ìnd̄i ndáchikon.
- ² K̄jìn skaya kjoa xi mangásòn tsakóya-l̄a x̄it̄a. K'e nga tsibénoj̄mí-l̄a kitsò-l̄a:
- ³ —Ndaà t̄iná'yaà. Jngò x̄it̄a k̄i k̄j̄nd̄i xojmá.
- ⁴ K'e nga tsib̄íts'ia nga kisk̄j̄nd̄i xojmá, chixò chiba ya ìya ndiyá. Ikjoàn j'ìi nise; tsakjèn.
- ⁵ Ngui k'oa t̄jìn chixò ñánda nax̄i choòn nga chiba ni'nde t̄jìn-l̄a. Jñà xojmá koi, n̄itoón isò koi-né nga mì nanga t̄jìn nangui.
- ⁶ Tanga k'e nga itjok̄at̄ji ts'oi nga kjòtsjè ndobá, kixiñó, ìkjoàn jngò k'aá kixi, koi-né nga tsjìn-l̄a ìma.
- ⁷ Ngui k'oa t̄jìn chixò ya ìj̄iìn na'yá. K'e nga kjò'nga na'yá, kisik'en-ngui xka-l̄a xojmá; k'oa ma-ne nga mìk̄i tsajà-l̄a toò.
- ⁸ Tanga jñà xojmá xi chixò ñánda nangui ndaà, tsijin, kjò'nga, tsajà-l̄a toò, ndaà itjo. Kitsjaà katé, jàn-kaàn skanda jngò s̄ind̄o toò nga jngò ìjngò.
- ⁹ Ikjoàn kitsò Jesús:
—Ndaà t̄iná'yaà koni xan-nò.

Mé-ne kjoa xi mangásòn kisikjeén-ne Jesús (Mateo 13:10-17; Lucas 8:9-10)

- ¹⁰ K'e nga jye tsib̄ijna tajngò Jesús, jñà x̄it̄a xi chrañà t̄ítsaj̄nat'aà-l̄a k̄o x̄it̄a-l̄a xi tejò ma-ne, kiskònangui-l̄a kó tsòya-ne 'én xi tsibénoj̄mí.
- ¹¹ Kitsò Jesús:
—Jñò, Nainá jye kitsjaà-nò nga jchaa kjoa'ma-l̄a kó s'ín otíxoma Nainá. Tanga jñà x̄it̄a xi kj'eíí, tà 'én ts'e kjoa mangásòn s'enoj̄mí yije-l̄a,
- ¹² mé-ne nga mìk̄i skoe-ne nas'ín skótsejèn, t̄ikoáá mìk̄i kochiya-l̄a nas'ín kj̄i'nchré. Nga jñà x̄it̄a, majìn-l̄a síkat̄j̄iya kjoh̄ítsjeèn-l̄a koa mìk̄i jchat'aà-l̄a jé-l̄a.

Jesús tsibénoj̄mí kó tsòya-ne kjoa xi mangásòn ts'e x̄it̄a xi b̄ít̄je xojmá (Mateo 13:18-23; Lucas 8:11-15)

- ¹³ Kitsò Jesús:
—¿A mì f̄iya-nò jè 'én ts'e kjoa xi mangásòn? ¿Kós'ín skaya-nò ngats'ìi kjoa xi ì'nga?
- ¹⁴ Jè xi b̄ít̄je xojmá, jè ngaya-l̄a x̄it̄a xi síka'bí 'én-l̄a Nainá.
- ¹⁵ Jñà xojmá xi chixò ya ìya ndiyá, jñà ngaya-l̄a x̄it̄a xi 'nchré 'én-l̄a Nainá. K'e nga ma ìskan nga jyeé 'nchré, f'ìi x̄it̄a neíí faáxìn jè 'én ya ìj̄iìn in̄ima-l̄a x̄it̄a.
- ¹⁶ Jñà xojmá xi chixò ya ñánda nax̄i choòn, jñà ngaya-l̄a x̄it̄a xi 'nchré 'én-l̄a Nainá. Tsjaá s'e-l̄a k'e nga sa 'nchré.

¹⁷ Tanga jè 'én mìkii ndaà kisijiin inima-la koni xka xi tsjin-la ima, mi 'ño binchako 'én, ta chiba nachrjein chikjoa-la. K'e nga mé kjoa xi sakó-la ko tsà xita fitjingui kondra-la nga jè ngatji-la 'én-la Nainá, nitoón síkijna ndiyá-la Nainá.

¹⁸ Jè xojmá xi chixò ya ñánda tjin na'ya, jña ngaya-la xita xi 'nchré 'én-la Nainá,

¹⁹ tanga 'ño síkájno kjoa ts'e tsojmi xi tjin isò'nde; ko jè kjoa nchiná konachan-la; ko mejèn yije-la tsojmi xi tjin isò'nde. Jña kjoa koi síkits'on-jijn 'én-la Nainá, k'oaá ma-ne nga mìkii makjin-ya.

²⁰ Tanga jña xojmá xi chixò ñánda nga nangui ndaà, jña ngaya-la xita xi 'nchré 'én-la Nainá koa mokjeiin-la; ikjoàn makjin-ya 'én, k'oaá ngaya-la koni ya xi oja-la toò. Tsjá katé, jàn-kaàn skanda jngoò sindo nga jngoò ijngoò ya.

*Kjoa xi mangásòn ts'e ni'in xi síhiseèn
(Lucas 8:16-18)*

²¹ Jesús kitsò-isa:

—¿A k'oaá s'in mochjeén ni'in xi síhiseèn nga ya sijnangui kaxa, o ya sijnangui nachan? Majìn, jngoò ni'in xi síhiseèn, 'ngaá sijná mé-ne nga síhiseèn-la xita.

²² Nímé kjoa tjin xi tji'ma i'nde xi mìkii jcha-la; tikoáá tsjin kjoa xi tji'ma i'nde xi mìkii kotsejèn.

²³ ¡Ndaà tiná'yaà koni xan-nò!

²⁴ Jesús kitsò-isa-la:

—Jñò xi na'ya, ndaà tiná'yaà. Koni kji machiya-nò, k'oaá ti kji siikichiya-nò Nainá, skanda tsjásòn-isa-nò.

²⁵ Jè xi tjin-la [kjohítsjeèn], tjoé-isa-la; tanga jè xi tsjin-la, skanda tjá'aán-la [kjohítsjeèn] xi chiba tjin-la.

Kjoa xi mangásòn ts'e nga majchá nijin

²⁶ Kitsò Jesús:

—Koni s'in otixoma Nainá k'oaá tis'in tjin koni k'e tsà jngoò xita bitje nojmé.

²⁷ Jè nojmé, síxá nga bisò, ma'nga, nas'in jè xita xi bitje mìkii tíbeè kós'in tísíxá nga jè xita ojnafè-né k'e nga nitjen; nga s'e isén osítjen;

²⁸ nga jè nangui tísíchá; ítjòn bitjo xka-la, iskan ma'nga, ikjoàn tjo-la natín koa ikjoàn majchá nijin.

²⁹ K'e jye majchá nijin, jye ma maxkó nga jye ijchò chiba-la nga sincháxkó nijin.

*Kjoa xi mangásòn ts'e xojmá mostaza
(Mateo 13:31-32; Lucas 13:18-19)*

³⁰ Jesús ijngoò k'a kitsò:

—¿Mé xi kongásòn-ko koni s'in otixoma Nainá?, o ¿mé 'én xi sijnásòn-kjoaá?

³¹ Jè mangásòn-ko koni kji xojmá mostaza; k'e nga sitje ijijn nangui, jè xi isa itsé kji i it'aà nangui.

³² K'e nga jye sitje, bisò, ma'nga skanda isaá 'nga ma koni ngats'ii xka xi ma chine xi sitje indii ni'ya. 'Ñó 'nga ma chrja-la skanda ma bíndaà'a tjé-la nise ya ngui 'nguién-la.

*Jesús, kós'in kisikjeén kjoa xi mangásòn
(Mateo 13:34-35)*

³³ Jesús kjin skaya kjoa xi mangásòn kisikjeén nga tsakóya 'én ndaà-la Nainá, koni kji nga ndaà fiya-la xita.

³⁴ Nguì koò kjoa xi mangásòn tsakóya-la xita; nimé 'én kiichja xi mitsà kjoa xi mangásòn tsibénjmi; tanga k'e nga jye tíjnat'aàxìn-ko xita-la xi kota'yàt'aà-la, k'ée ijngoò k'a tsakóya ndaà yije-la.

K'e nga jè Jesús kisikijnajyò tjojkón

(Mateo 8:23-27; Lucas 8:22-25)

³⁵ K'e nga jye kòjñò nga tíjè-ne nachrjein, Jesús kitsò-la xita-la xi kota'yàt'aà-la:

—Tíkjaán, ján xijngoaà ndáchikon.

³⁶ Jñà xita xi kjin ma-ne ta yaá kisikítsajna; kù Jesús ko xita xi kota'yàt'aà-la nga títsajnya chitso. Tíkooá tsafáhijtakò chitso xi i'nga.

³⁷ K'e nga jye tímajin nandá, j'ì jngoò tjojkón xi taxki komà-né; kiskimi'nga nandá koa jè chitso jye kitseè nandá.

³⁸ Jesús yaá kjinafè tàts'en chitso. Kijnanguisko jngoò nikje nguisko. K'ée kisikjaá-la, kitsò-la:

—Maestro, ¿a mitsà ti'yi nga titsabixònguindá-ná.

³⁹ Jesús k'ée tsasítjen, tsohótiko jè tjo; kitsò-la ndáchikon:

—Jyò tíjni.

Nítóón kisijyò-ne tjo; kjòndaàya-ne.

⁴⁰ Jesús kitsò-la xita xi kota'yàt'aà-la:

—¿Mé-ne tsakjoòn-nò? ¿A mitsà mokjeín-nò it'aà ts'an?

⁴¹ Jñà xita xi kota'yàt'aà-la ndaà jchán kitsakjòn. Xki xi ján kjònangui-la xikjin, tsò-la:

—¿Yá xita-ne jè skanda jè tjo ko ndáchikon síkitasòn-la?

5

Xita Gerasa xi kjin inima ch'o-la neí tíjin inima-la

(Mateo 8:28-34; Lucas 8:26-39)

¹ Jesús ko xita xi kota'yàt'aà-la ijchò ján xijngoaà ndáchikon ya nangui-la xita Gadareno.

² K'e nga itjojen chitso Jesús ijchò kasit'aà jngoò-la xita xi inima ch'o-la neí tíjin inima-la. Jè xita jè yaá itjo-ne itsjó ngajo mik'en.

³ Xita jè yaá binaya ya itsjó ngajo mik'en. Mi yá xi ma bít'aà'ño nas'ín na'ño kicha cadena.

⁴ Kjin k'a okis'iin-ko nga tsibít'aà'ño ndsoko ko tsja na'ño kicha cadena. Niyá xi chikjoa-la nga kisì'nchré; otejtso xó cadena.

⁵ Ko nachrjein ko nitjen yaá ojmeèsòn nindoò ñánda tjin itsjó ngajo-la mik'en. Kjindáya tsò kjindáya ská nga kjaán ko yijo-la; 'beé-la ndajo yijo-la.

⁶ K'e nga kijtseè nga kjin tinchrobá Jesús, tsangachikon. Kù kasit'aà chraña-la, tsasèn-xkó'nchit'aà-la.

⁷ 'Ñó kiichja, kitsò:

—¿Mé xi tjin-lè ko 'an, Jesús, Ki'ndí-la Nainá xi 'ño 'nga tíjna? Bìtsi'bà-lè nga nguixkon Nainá, kì yatoòn-ná.

⁸ Koií k'oas'ín kiichja-ne nga jè Jesús kitsò-la:

—Ngaji inima ch'o-la neí, titjoiín inima-la xita jè.

⁹ Jesús kiskònangui-la. Kitsò-la:

—¿Kó 'mì-lè?

Jè kitsò:

—Legión 'mì-na, koií-né nga kjin jchán ma-najen.

¹⁰ Jñà inima ch'o-la neí, 'ño tsibítsi'ba-la Jesús nga mì it'aà xìn skini ya i'nde jè.

¹¹ Ko ya chraña it'aà nindoò, kjin chinga nchikjèn-jno.

12 Jñà inìma ch'o-la neí tsibítsi'ba-la Jesús. Kitsò-la:

—Yaá tìkasén-nájen ñánda t́jín ch́inga; yaá kítjás'en-jìin-jen yijo-la.

13 Jesús kitsjaà'nde-la; jñà inìma ch'o-la neí itjoiìn inìma-la xita jè; ìkjoàn jahas'en-jìin yijo-la ch́inga. Ma-la tsà jò jmiì jñà ch́inga xi tsanga; tsatíkájén-jno ya naxi skanda jìiìn ndáchikon, yaá k'en yije jìiìn ndáchikon.

14 Jñà xita xi ko'ndà ch́inga, tsanga. Kì kénajmí-la xita naxandá kò xita rancho jè kjoa xi komà. Jñà xita naxandá ijchò katsejèn-la kjoa xi komà.

15 Kjìn xita ijchò ñánda t́jna Jesús, kijtseè jè xita xi inìma ch'o-la neí t́jìin inìma-la nga sa ítjòn. Jyò t́jna. Íkjá-ne nikje-la. Ndaà t́jín-ne kjohítsjeèn-la. Xita xi ijchò, ta kitsakjòn-la.

16 Jñá xita xi kijtseè koni s'ín komàt'in jè xita xi inìma ch'o-la neí t́jìin inìma-la nga kjòndaà-ne kò ch́inga xi tsatíkájá, tsibénajmí-la jñá xita xi ijchò xi mìkì kijtseè.

17 Jñà xita xi ijchò tsibítsi'ba-la Jesús nga xìn i'nde kàtjì.

18 K'e nga jahas'en chitso Jesús, jè xita xi inìma ch'o-la neí kisijìin inìma-la, tsibítsi'ba-la Jesús nga mejèn-la kjìkò.

19 Tanga jè Jesús mìkì kitsjaà'nde-la. Kitsò-la:

—T'in-ne ni'ya-lè, ténajmí yije-la xita xingui jè kjòndaà xi kisikò-lè Nainá; kós'ín kijtseè ima-lè.

20 Xita jè, kii; ìkjoàn tsibítsi'ia nga tsibénajmí-la jñà xita naxandá Decápolis jè kjòndaà xi kisikò Jesús. Ngats'ii xita xi kis'énajmí-la tà k'oaá komà-la.

Tsòti-la Jairo kò chjoón xi kitsobà'ño ítjòn nikje-la Jesús

(Mateo 9:18-26; Lucas 8:40-56)

21 Jesús tsibijna'ya chitso, inchrobà ìjngoò k'a-ne ján xijngoàà ndáchikon, kjìn jchán xita chixoñat'aà ìjngoò k'a-la, koa yaá tsibìjnandiì ndáchikon.

22 Ijchòkon jngoò xita xi 'mì Jairo xi xita ítjòn ts'e ni'ya ìngo sinagoga. K'e nga kijtseè Jesús tsasèn-xkó'nchit'aà-la.

23 'Ñó tsibítsi'ba-la, kitsò-la:

—Ndí tsòti-na jye kjomeè biyaà; nchroboí, tíkjaán, tjat'aà-la ndseji nga kàtandaà-ne, mé-ne nga kíjnakon-ne.

24 Jesús kii, kjìn jchán xita kii t́jngui-la; chiba-la ó'nchò'ño-né.

25 Yaá tsóhojìin jngoò chjoón xi kjò tejò nó xk'én, ch'in jní t́jín-la.

26 Kjòtseè tísíkjeiìn kjo'in it'aà ts'e chjìnexkii; jye xó kisikje yije ton-la; mìkì mandaà-ne, ta saà tíma'ño ch'in-la.

27 Chjoón jè, k'e nga kii'nchré it'aà ts'e Jesús, kii jìin-la ngats'ii xita kjìn; ijton its'in kitsobà-ne nikje-la Jesús.

28 K'oas'ín tísíkítsjeèn, kitsò: “Tsà tà jè nikje-la sikoaa, kondaá-na.”

29 K'e nga kitsobà'ño nikje-la, nitoón kisijyò-la jní, koa kijtseèyaá-la yijo-la nga jye kjòndaà-ne ch'in-la.

30 Jesús nitoón kijtseèya-la nga nga'ño-la itjoiìn; kisikátji, kiskoòtsejèn-jìin-la xita kjìn, kitsò:

—¿Yá xi kàtsobà'ño nikje-na?

31 Jñà xita xi kota'yàt'aà-la Jesús kitsò-la:

—¿A mìtsà 'yi nga jñà xita ó'nchò'ño-lè? Ngaji si-né: “¿Yá xi kàtsobà'ño nikje-na?”

32 Tanga jè Jesús kotsejèn-jìin-la jñà xita nga mejèn-la skoe yá xi kitsobà'ño nikje-la.

33 Chjoón jè, tsí tíhotsé-né nga kitsakjòn, nga jyeé t́jìin-la kós'ín komà ch'in-la; kii, tsasèn-xkó'nchit'aà-la Jesús; tsibénajmí kixi yije-la kós'ín komàt'in.

34 Jesús kitsò-la:

—Ndí neaa, koi-né nga mokjeiín-lè it'aà ts'an nga kòmandaa-ne. T'in-là ndaa-ne. Jyeé kòmaxkiì-là ch'in-lè.

³⁵ Tákó tik'eé tíchja-ìsa Jesús nga j'ìi i'nga xità xi inchrobà-ne ni'ya-là xità ítjòn ts'e ni'ya ingo sinagoga, kitsò-là:

—Kì tì kii nìsì-là Maestro, ndí tsòti-lè jyeé k'en.

³⁶ Tanga jè Jesús, nga kii'nchré koni kitsò okixi xi j'ìiko, kitsò-là jè na'èn-là ndí tsòti:

—Kì tsakjoòn-jèn; tà jè-né nga kàtakjeiín-lè.

³⁷ Jesús mìkii kitsjaà'nde nga kjìn xità kiiko. Tà jè Pedro, Jacobo ko Juan 'ndse Jacobo.

³⁸ K'e nga ijchò ni'ya-là jè xità ítjòn ts'e ni'ya ingo sinagoga, Jesús kijtseè nga fijen fikjá xità, 'ñó nchikjindáya ko 'ñó nchisíkájno.

³⁹ Jahas'en ni'ya Jesús, kitsò-là:

—¿Mé-ne ko'nè-nò nga ko tà ndaa chihindáya-nò? Jè ndí tsòti mìtsà kòbiyaà; ta kjinafé-né.

⁴⁰ Jñà xità xi títsajna tà tsijnòkeè Jesús. K'eé tsachrje yije ni'ya kóhotjín xità; tà jñà tsibítsajna na'èn-là, nea-là, ko xità ts'e xi tjiko. Ikjoàn jahas'en ñánda kijna ndí tsòti.

⁴¹ Kiskoé tsja, kitsò-là:

—Talita cumi —'én xi tsòya-ne: Jì tsòti, k'oaá xan-lè, tísítjìn.

⁴² Jè ndí tsòti nìton tsasítjen, tsajmeè-ne. Jye kjò tejò nó tjín-là. Jñà xità xi títsajna, 'ñó jchán kitsakjòn.

⁴³ Tanga Jesús 'ñó kitsjaà okixi nga mì yá xità xi keènojmi-là. Ikjoàn kitsò-là:

—Tjì-là nga kàtakjèn ndí tsòti.

6

Kó kitsò xità k'e nga kii Jesús ján Nazaret

(Mateo 13:53-58; Lucas 4:16-30)

¹ Jesús itjoiín-ne ya ì'nde jè, kii-ne nangui-là Nazaret, tjiko xità xi kota'yàt'aà-là.

² K'e nga jye ijchò nachrjein nìkjáya, tsibíts'ia nga tsakóya 'én ndaa-là Nainá ya ni'ya ingo sinagoga. Kjìn jchán ma xità xi kii'nchré-là koni s'ín tsakóya. Jñà xità, tà k'oaá komà-là, kjònangui-là xíkjín, kitsò:

—Xità jè, ¿ñánda komà-là ngats'ìi 'én xi okóya? ¿Ñánda ochrje kjoachjine koi ko kjoókón xi s'ín?

³ ¿A mìtsà jè xi chjineyá xi ti-là María, xi 'ndse ma Jacobo, José, Judas ko Simón? ¿A mìtsà tikoá ì títsajnajìin-ná íchjín ndichja?

Xità koi mìkii kòkjeiín-là it'aà ts'e Jesús.

⁴ Tanga jè Jesús kitsò-là:

—Jngòò xità xi chja ngajo-là Nainá, nita ñá naxandá-ne yaxkón-né, tanga ya naxandá-là ko ni'ya-là ko it'aà ts'e xità xíkjín mìkii yaxkón.

⁵ Jesús nímé kjoókón xi ndaa tjín kis'ìin nangui-là, tà chiba xità xk'én xi tsohót'aà-là tsja nga kisindaà-ne.

⁶ Tà kjòkón-là Jesús, nga jñà xità koi, mìkii mokjeiín-là it'aà ts'e.

Kós'ín tsatíxoma-là Jesús xità-là xi tejò ma-ne xi kisikasén nga kisika'bí 'én-là Nainá

(Mateo 10:5-15; Lucas 9:1-6)

Jesús yaá tsajmeè naxandá jtobá xi chrañat'aà kjiyijò nga tsakóya.

⁷ Nga komà iskan, Jesús kiìchja-là xità-là xi tejò ma-ne xi jè tsibíxáya-là; jò jò kisikasén, kitsjaà-là okixi nga kochrjekàjìin inima ch'o-là neí xi tíjìn inima-là xità.

8 K'oaá t̄is'ín kitsjaà-la òkixi nga n̄imé tsojmì k'oa k'e nga kjoì ndiyá. Kitsò-la:

—Tà k'oaá s'ín tanguió. Tà jngoò yá garrote ch'aà. Kì na'yaá ch'aà, kì inchrájin ch'aà, kì t̄on ch'aà.

9 Komaá tsjayaà xojté-nò. Tà jngoò nachro ch'aà. Kì jò ch'aà.

10 Jesús kitsò-isa-la:

—K'e nga kijchò jngoò naxandá, jngoò ni'ya t̄itsajna skanda k'e nga konguí-nò.

11 Tsà t̄jín naxandá ñánda mìkìl skoétjò-nò, tsà majìn-la nga 'nchré-nò, titjójñò, t̄itsajneé chijo-la ndsokoò mé-ne nga skoe-ne nga j̄ñà t̄jín-la jé nga mìkìl 'nchréñjon. Xi nguì òkixi k'oaá xan-nò k'e nga kijchò nachrjein-la j̄ñà naxandá koi, isaá tse kjo'in s'e-la koni s'ín komàt'in naxandá Sodoma kò Gomorra.

12 Xitá koi, kii nga tsibénojmiya-la xitá nga kàtasíkájno jé-la nga mì t̄i jé kohótsji-ne.

13 Kjìn inima ch'o-la neí tsachrjekàjìn inima-la xitá, t̄ikoá kjìn xitá kisindaà-ne xi xk'én nga kisikaàjno-la asit̄i.

*K'e nga k'en Juan xi kis'in bautizar xitá
(Mateo 14:1-12; Lucas 9:7-9)*

14 Jè Herodes xi xitá xá ítjòn t̄jna, kii'nchré it'aà ts'e Jesús nga jye xki xi ján naxandá kina'ya-la. T̄jín xitá xi kitsò:

—Jè Juan xi kis'in bautizar xitá, jyeé jaáya-la. K'oaá ma-ne nga t̄jín-la nga'ñó nga ma-la s'ín kjojkón xi ndaà t̄jín.

15 T̄jín xitá xi kitsò:

—Jè Elías.

T̄ikoá t̄jín xi kitsò:

—Jngoò xitá xi kiichja ngajo-la Nainá kjòtseé.

16 Jè Herodes, k'e nga kii'nchré kitsò-né:

—Jè Juan xi jaáya-la xi 'an tsatesian sko.

17 Nga isa kjòtseé, Herodes kisikasén xitá nga kitsobà'ñó Juan nga kiskinìs'en ndayá, koi kjoa-la ts'e chjoón Herodías xi chjoón-la Felipe nga jè Herodes chixàn-kò xi chjoón-la 'ndse.

18 Nga jè Juan xi kis'in bautizar xitá, kjìn k'a okitsò-la Herodes:

—Mìkìl j̄i'nde-lè nga j̄i t̄ijnakoj̄i chjoón-la 'ndsì.

19 Jè chjoón Herodías, kòjtikeè Juan, mejèn-la nga s̄iik'en t̄anga mìkìl ma xi síko.

20 Nga jè Herodes, beèxkón Juan kò síkinda-ne nga jye t̄jijn-la nga xitá kixi-né kò xitá tsjeè-né. Herodes k'e nga chjako Juan, matsjaá-la nga 'nchré-la, t̄anga mìkìl beè mé xi s'iin, a s̄iikitasòn-né, a xi majìn.

21 Ijchò jngoò nachrjein xi ndaà ts'e chjoón Herodías k'e nga tsachrje s'eí-la jè Herodes jè nachrjein nga kits'in. Ijchò xitá-la xitaxá ítjòn, kò xitá sko-la soldado, kò xitá nchiná xi t̄jín kóhokji Galilea nga tsakjèn-kò Herodes.

22 T̄ikoá ijchò tsòti-la Herodías, jahas'en ni'ya; kitè. Jè Herodes kò xitá xi t̄itsajna, ndaà jchán kisaseèn-la koni s'ín kitè jè tsòti. Herodes, xi xitá xá ítjòn t̄jna, kitsò-la:

—T̄jé-ná mé xi mejèn-lè, tsjaà-lè.

23 K'oaá s'ín kitsjaà-la tso'ba nga tsjá yije-la n̄itá mé xi mejèn-la nas'ín osen nangui xi jè otixoma-la.

24 Jè tsòti, itjo ni'ya, kiskònangui-la nea-la. Kitsò-la:

—¿Mé xi s̄ijé-la?

Jè nea-la. Kitsò:

—Tijé-la sko Juan xi s'in bautizar xita.

²⁵ Jè tsòti, nitoón jahas'en ijngoò k'a ni'ya ñánda tjna xitaxá ítjòn. Kitsò-la:

—I'ndeij mejèn-na nga niton tjiì-ná sko Juan xi s'in bautizar xita; tinaya-ná chrobate.

²⁶ Jè Herodes, xi xitaxá ítjòn tjna, 'ño kjòba-la k'e nga kiì'nchré-la jè tsòti. Tanga koií kjoa-la nga jye kitsjaà-la 'én-la nga nguixkon xita xi títsajna s'eí, kjo'ño kisikitasòn-la.

²⁷ Jè Herodes, tik'eé-ne kisikasén jngoò soldado, kitsjaà okixi nga kàtjanchrohóko sko Juan.

²⁸ Jè soldado kiì ján ndayá nga tsatesin Juan; ikjoàn j'ùko sko Juan; tjíya-la chroba nga kitsjaà-la jè tsòti; ko jè tsòti kisingatsja nea-la.

²⁹ K'e nga kiì'nchré xita xi kota'yàt'aà-la Juan nga jye k'en, kiìkjaá yijo-la nga kiskinìs'en-ngui jngoò ngajo itsjó-la mik'en.

Jè kjoxkón xi kis'iìn Jesús nga 'òn jmù xita kisikjèn

(Mateo 14:13-21; Lucas 9:10-17; Juan 6:1-14)

³⁰ K'e nga j'ii ijngoò k'a-ne jña xita xi tsibíxáya-la Jesús, tsibénojmí ngats'ii kjoa xi kis'iìn ko xi tsakóya ñánda kiì.

³¹ Jesús kitsò-la:

—Nchrobá. Tíkjaán nga sikjáya í'ñoá jngoò i'nde it'aà xìn.

Koií k'oa kitsò-la nga kjìn jchán ma xita, koa tjin bijchó, koa tjin nchrobá-ne. Jesús ko xita xi tsibíxáya-la skanda mi ti kiì ma'a-la nga kjèn.

³² Tsibítsajnaya chitso nga ta jña kiì jngoò i'nde it'aà xìn ñánda tsjin xita.

³³ Tanga kjìn xita kijtseè k'e nga kiì. Kijtseèxkon nga jè Jesús. Ikjoàn kiìtjingui-la ngats'ii xita naxandá xi ya chrañàt'aà-la nga kiì-ne ndsoko; skanda isa ítjòn ijchò jña xita koi.

³⁴ Jesús, k'e nga itjojen chitso, kijtseè nga 'ño kjìn ma xita xi títsajna; kjòhimaakeè-né. K'oaá ngaya-la koni jña orrè xi tsjin-la paxtò xi ko'ndà. Ikjoàn tsibíts'iaako nga kjìn 'én tsibénojmí-la.

³⁵ K'e nga jye 'ño kjòhoxòn, jña xita xi kota'yàt'aà-la Jesús ijchò kinchat'aà-la, kitsò-la:

—Jyeé kjòhoxòn, jè i'nde jè, it'aà xìn-né, nimé tjin.

³⁶ Kot'in-la jña xita kàtjì-ne nga kàtatse tsojmì xi skine ya naxandá ko tsà jña ni'ya ñánda nga chrañàt'aà.

³⁷ Kiìchja Jesús, kitsò-la:

—Tjiì-là jño xi kokjen xita koi.

Kitsò jña xita:

—¿A mejèn-lè nga konguí kindaà-jen inchrajín koni tjin síkijne xita nga jò sìndo nàchrjein síxá?

³⁸ Kitsò Jesús:

—Chítsejèn-là kó tjin ma inchrajín-nò.

K'e nga kijtseè kó tjin ma-ne, kitsò-la:

—'Òn ma inchrajín ko jò ma tin.

³⁹ K'eé kitsjaà okixi Jesús nga kàtítsajnajtín jña xita ya ijìn ijña ñánda sase choòn.

⁴⁰ Íjngó íjngó sìndo tsibítsajnajtín-ne jña xita; ko tjin ñánda icháte icháte tsibítsajnajtín-ne.

⁴¹ Jesús kiskoé jña inchrajín xi 'òn ma-ne ko jña tin xi jò ma-ne; ikjoàn kiskoòtsejèn ngajmii; kitsjaà-la kjondaà Nainá; ikjoàn kisixkoaya inchrajín; k'eé kitsjaà-la jña xita xi kota'yàt'aà-la nga kiska'bí-la ngats'ii xita kjìn xi títsajna. Tjikoá kisijòya tin xi jò ma-ne. Kitsjaà-la ngats'ii xita.

⁴² Tsakjèn yije kóhótjín xita kó nga kjòskiì.

⁴³ K'eé tsibíxkó-ne inçhrajín kò tìn xi kjòxkoaya jñà xi tsiningui-ne; nguì tejò nìsiyá komà.

⁴⁴ Jñà xità xi tsakjèn, 'òn jmiù ma-ne xi xità x'in.

*K'e nga jè Jesús tsajmeèsòn ndáchikon
(Mateo 14:22-27; Juan 6:16-21)*

⁴⁵ Nga komà iskan, Jesús kisikas'en xità xi kota'yàt'aà-la ya iya chitso mé-ne nga isa ítjòn kijchò-ne ján naxandá Betsaida ya xijngoaa ndáchikon; koa jè Jesús k'eé tísíhixat'aà xità xi kjìn ma-ne nga jye nchifi-ne.

⁴⁶ K'e nga jye kisihihixat'aà xità, Jesús kiimijìn-jno jngoò nindoò nga kii kiichjat'aà-la Nainá.

⁴⁷ K'e nga jye kòjñò, jè chitso, jyeé ya síjna jngoò osen ndáchikon. Jesús, nga tajngoò tsibíjnat'aà nangui,

⁴⁸ kijtseè chitso nga mìkii ma fi. Nga jè tjò bíchjoà ikon-la. K'e nga tajñòya isa, Jesús kiitjingui-la xità xi kota'yàt'aà-la nga kii-ne ndsoko ya isòn nandá. Tanga k'oaá kis'iin koni tsà mejèn-la nga kjoì ítjòn-la chitso.

⁴⁹ Jñà xità xi kota'yàt'aà-la, k'e nga kijtseè nga tífisòn nandá, k'oaá s'in kisikítsjeèn, kitsò, tsà inima ch'o-né; kiskindàya xkón

⁵⁰ nga kitsakjòn-la k'e nga kijtseè kóhotjín. Tanga Jesús nitoón kiichja-la, kitsò-la:

—'Nó t'è-là takòn, kì tsakjoòn-jèn, 'an-ná.

⁵¹ K'e nga jahas'en chitso Jesús, nitoón kisijyò-ne tjò. Tà k'oaá komà-la jñà xità xi kota'yàt'aà-la,

⁵² nga kj'eè kì ndaà fahas'en-jìin-la jè kjòxkón xi kis'iin Jesús ts'e inçhrajín, koi-né nga tájaajìin tjín inima-la.

*K'e nga jè Jesús kisindaà-ne xità xk'én ján Genesaret
(Mateo 14:34-36)*

⁵³ K'e nga jye tsatojìin ndáchikon, ijchò ján nangui Genesaret; yaá tsibít'aà'ñó chitso-la ya indii ndáchikon.

⁵⁴ K'e nga tsitajen yije chitso, jñà xità xi ya títsajna, nitoón kijtseèxkon nga jè Jesús.

⁵⁵ Tikoáá nitoón kii kóhokji nga jngoò itjandii i'nde jè. Ikjoàn tsibíts'ia xità nga j'ìiko-la ngats'ìi xità xi xk'én; kjisòn-la nàchan-yá ya i'nde ñánda nga 'nchré xità nga bijchó Jesús.

⁵⁶ Nità ñánda naxandá nga jahas'en Jesús, tsà naxandá jtobá-né, naxandá iì-né, inçhiya-né, kò tsà rancho-né, jñà xità yaá sikáyjò jñà xità xi xk'én ya jngohosen ndiyá; ikjoàn bítsi'ba-la nas'ín tà jè ítjòn nikje-la tsojà'ñó nga kátandaà-ne. Ngats'ìi xità xi kitsobà'ñó nikje-la kjòndaà yijeé-ne.

7

*Kjoa xi síkíts'ón xità
(Mateo 15:1-20)*

¹ Ijchò xità fariseo kò xità xi okóya kjotíxoma-la Nainá xi kiskii Moisés xi j'ìi-ne naxandá Jerusalén. Yaá ijchòtjingui-la ñánda tíjna Jesús.

² Jñà xità koi, kijtseè i'nga xità xi kota'yàt'aà-la Jesús nga kjèn tjéko tsja nga mìkii oníjno; kitsò-la xíkjín [nga mìkii nchisíkitasòn koni s'ín tjín kjotíxoma ts'e xità judío xi xkón tjín].

³ Nga jñà xità fariseo kò ngats'ìi xità judío, k'oaá s'ín síkitasòn koni s'ín tjín kjotíxoma-la xità jchínga; tsà mì nguì ndaà koníjno tsja, mìkii kòkjen.

⁴ Tikoáá k'e nga f'ìi-ne nditsin, ítjòn oníjno tsja, k'eé kjèn; tjín-ìsa-la kjotíxoma xi kj'eíj koni oníya chítsín-la, tjií-la, kò chítsín kicha-la kò nàchan-la.

⁵ Koií kjoa-là jñà xita fariseo kò xita xi okóya kjotíxoma-là Nainá xi kiskii Moisés kiskònangui-là Jesús, kitsò-là:

—¿Mé-ne mìkii síkitasòn-ne xita xi kota'yàt'aà-lè, koni s'ín tjín kjotíxoma-là xita jchínga nga ta k'oaá s'ín kjèn tjéko tsja?

⁶ Jesús kitsò-là:

—Koni s'ín kiskii Isaías, xita xi kiichja ngajo-là Nainá, ndaà kiichja it'aà tsajòn, jñò, xita xi jò ma isén-nò, k'e nga kitsò:

Jñà xita koi,

beèxkón-na xi tà 'én chja,

tanga jñà inima-là kjìin títsajna;

⁷ Nímé chjí-là nga beèxkón-na,

nga kjotíxoma-là xitaá okóya koni tsà kjotíxoma-là Nainá.

⁸ Jñò, nìkíjna-nò xi nguì kjotíxoma-là Nainá, kò jè onguítjìngui-là kjotíxoma-là xita jchínga-nò nga oníya tìjí-nò, chítín-nò; kjìin skaya kjotíxoma tjín-nò koni s'ín 'nè.

⁹ Kitsò-ìsa Jesús:

—Jñò, nachrjekàngui-nò xi nguì kjotíxoma-là Nainá, jè nìkitasòn kjotíxoma-là xita jchínga-nò.

¹⁰ Moisés k'oaá kitsò: “Jchaxkoín na'èn-lè kò nea-lè.” K'oaá tì kitsò: “Jè xi chjajno-là na'èn-là kò nea-là, tjínè-là nga sik'en.”

¹¹ Tanga jñò bixón-nò: “Jngoò xita, ma kitsò-là na'èn-là, o nea-là: Mìkii koma siichját'aà-lè; ngats'ii tsojmì xi tjín-na, Corbán-né.” (Én xi tsò Corbán, 'én Hebreo-né; tsòyaá-ne: jè Nainá jyeé kitsjaà yije-là.)

¹² Bixón-nò nga mì tì kii tìj'nde-là nga kosìko na'èn-là, o nea-là.

¹³ Jñò, nachrjekàngui-nò 'én-là Nainá nga nìkatoya-là xinguiòo kjotíxoma-là xita jchínga-nò. Kjìin skaya kjotíxoma tjín-ìsa-nò xi k'oaas'ín 'nè.

¹⁴ Jesús, k'eé kiichja-là ngats'ii xita, kitsò-là:

—Ngats'ioò, tiná'yaà kò ndaà kàtachiya-nò.

¹⁵ Nímé tjín xi fahas'en-jìin yijo-là xita xi síkits'ón. Jè-né xi inima-là xita bitjoiìin-ne, xi síkits'ón.

¹⁶ Ndaà tiná'yaà koni xan-nò!

¹⁷ Jesús itjokàjìin-là xita; kii, jahas'en jngoò ni'ya; ikjoàn jñà xita xi kota'yàt'aà-là kiskònangui-là kó tsòya-ne jè kjoa mangàsòn xi tsibénojmi.

¹⁸ Kitsò Jesús:

—¿Jñò, a tìkooá mìkii machiya-nò kó tsòya-ne? ¿A mì fiya-nò ngats'ii tsojmì xi fahas'en-jìin yijo-là xita mìkii síkits'ón

¹⁹ nga mìtsà inima-là fahas'en-jìin? Yaá fahas'en indso'ba, ikjoàn bitjo-ne k'e nga fi kítsajna ján baño.

Jesús kitsòyaá-ne: Ngats'ii tsojmì xi ma chine, tsjeè-né; mìkii síkits'ón inima-là xita.

²⁰ Kitsò-ìsa Jesús:

—Jè kjohítsjeèn xi bitjoiìin inima-là xita, jè xi síkits'ón.

²¹ Koi-né nga inima-là xita nchrobájiin, jñà kjohítsjeèn xi ch'o tsò, koni jè kjoa chijngui ts'e xita xi jye chixàn kò xi k'j'eé bixan jèn, kò xi xita sík'en,

²² kò kjoa chijé, kò kjoa tse mejèn, kò kjoa ts'en, kò kjoa konachan, kò kjoa ts'e xi otonè-là kjoa ts'e yijo-ná, kò kjoaxitakòn, kò kjoa 'on takòn, kò kjoa 'nga ikon, kò kjoa 'én ndiso, kò kjoa tònò xi mìtsà ítjòn nìkítsjeèn.

²³ Ngats'ii kjoa koi xi inima-là xita bitjokàjìin-ne, koií xi síkits'ón xita.

*Mé xi komàt'in chjoón xi xìn nangui-là nga kòkjeín-là it'aà ts'e Jesús
(Mateo 15:21-28)*

²⁴ Kìi Jesús ján naxandá Tiro kọ Sidón. K'ẹ nga ijchò ya, jahas'en jngoò ni'ya; mejèn-la nga mì yá xita xi skoe, tanga mìkìi komà tsibìjna'ma.

²⁵ Nìtoón kii'nchré jngoò chjoón xi inima ch'o-la neí tíjìn inima-la tsòti-la. Kii ñánda tíjna Jesús nga tsasìxkó'nchit'aà-la;

²⁶ tsibítsi'ba-la nga kochrjekàjìn jè inima ch'o xi tíjìn inima-la tsòti. Jè chjoón, yaá i'nde-la ñánda 'mì Sirofenicia; 'én griego chja.

²⁷ Jesús kitsò-la:

—Tjìi'nde-la jñà kàtakjèn ítjòn xi ìxti ma. Mìkìi ndaà tjín tsà chjaà'an-la ñiño jñà ìxti, ìkjoàn k'oi-lá ndí nañá.

²⁸ Jè chjoón kitsò:

—Ndaà tjín Na'èn; tanga jñà ndí nañá kineé xi-la tsojmì xi bixòngui ímìxa xi síkatsjoò ìxti.

²⁹ K'ée kitsò Jesús:

—Ndaà kinokjò. T'in-ne ni'ya-lè. Jè inima ch'o-la neí, jye itjokàjìn-ne inima-la tsòti-lè.

³⁰ K'ẹ nga ijchò-ne ni'ya-la, jè chjoón, jè tsòti-la, yaá kijnasòn nàchan; tanga jye itjokàjìn-ne inima-la jè inima ch'o-la neí.

K'ẹ nga jè Jesús kisìndaà jngoò-ne xita jtayaà kọ xi skí'in

³¹ Jesús kii-ne ya i'nde ts'ẹ Tiro; jahatojìn i'nde Sidón, tìkoá jahatojìn nangui xi 'mì Decápolis, ijchò-ne ya ndáchikon ts'ẹ Galilea.

³² Yaá ijchòkọ jngoò xita xi jtayaà kọ skí'in, tsibítsi'ba-la Jesús nga koòt'aà-la tsja jè xita jè.

³³ Jesús, it'aà xìn kii kọ ñánda tsjìn xita, k'ée jahas'en jnótsja ya líká-la, kọ ndánachrá-la kisìkaàjno nìjen-la.

³⁴ Jesús kiskoòtsejèn ngajmì; ìkjoàn jaátse-la, kitsò:

—¡Efata! —tsò-ne 'én jè: ¡Kàtatáx'a!

³⁵ Nìtoón kitáx'a-ne líká-la xita jè, tìkoáá ndaà komà kii chja-ne.

³⁶ Jesús kitsò-la jñà xita:

—Kì yá xita xi bènojímí-là.

Tanga k'ẹ nga 'ño tsibít'in-la Jesús nga mì yá xita keènojímí-la, tanga jñà xita ìsáá ndaà kiskinìsòn 'én.

³⁷ Jñà xita xi kii'nchré, ta kjoókón-la, kitsò:

—Ndaà s'ín yije. Síndaà-ne xita xi jtayaà kọ xi mìkìi ma chja.

8

Jè kjoókón xi kis'ìn Jesús nga ñijòn jmì xita kisìkjen

(Mateo 15:32-39)

¹ Jngoò nàchrjein nga kjin jchán xita kjoókóya koá tsjìn tsojmì xi kine, Jesús kii chja-la xita-la xi kota'yàt'aà-la, kitsò-la:

² —Jñà xita koi, mahimakeè-ná. Jyee kò jàn nàchrjein tjín-la nga títsajnakọ-na koá nìmé tjín tsojmì xi kine.

³ Tsà tà kọs'ín siikasén chjan-na ni'ya-la yaá kohindaàya ndiyá nga tjín xi kjiìn inchrobà-ne.

⁴ Kitsò xita xi kota'yàt'aà-la Jesús:

—¿Kós'ín síkjèn xita koi jngoò i'nde it'aà xìn ñánda nìmé tjín?

⁵ Jesús kiskònangui-la, kitsò-la:

—¿Kó tjín ma inchrajín xi tíyijò-nò?

Kitsò jñà xita xi kota'yàt'aà-la:

—Itoò ma-ne.

⁶ K'ée kitsò Jesús:

—Koatìn-la kàtìtsajnat'aà nangui jñà xita.

Jesús kiskoé *inchrajín* xi itoò ma-ne; kitsjaà-la *kjondaà* Nainá *ikjoàn* *kisìxkoaya*; k'eé *kjòngatsja* *jñà xità* xi kota'yàt'aà-la mé-ne nga *kisìka'bí-la* *jñà xità* xi *kjìn* ma-ne.

⁷ *Tìkoáá* *tíyijò* *chiba-la* *tìn* *jtobá*. Jesús *kisìchikon-t'in*; *ikjoàn* *kitsò-la* *xità* xi kota'yàt'aà-la:

—*Tìka'bió*.

⁸ *Tsakjèn* *yije* *xità* *kóhotjín* *skanda* *kó* nga *kjòskiì*; k'e nga *tsibíxkó-ne* *jñà* xi *kjòxkoaya* nga *tsiningui-ne*, *nguì* itoò *nìsiyá* *komà*.

⁹ *Jñà xità* xi *tsakjèn*, *kjomeè* *ñijòn* *jmiì* ma-ne. Jesús, *ikjoàn* *kisìhixat'aà-ne* *jñà xità*;

¹⁰ *ikjoàn* *jahas'en* *chitso* *ko* *xità* xi kota'yàt'aà-la. *Yáá* *kiì* *i'nde* *ñánda* 'mì *Dalmanuta*.

K'e nga jñà xità fariseo jngoò seña kisijé xi jeya tjín
(*Mateo 16:1-4; Lucas 12:54-56*)

¹¹ *Ijchò* *xità* *fariseo*, *tsibíts'ia* nga *tsajoókjoò-ko* Jesús. *Kisijé* *jngoò-la* *seña* xi *jeya* *tjín* xi *it'aà* *ts'e* *Nainá* *nchrobá-ne* nga *mejèn-la* *skoe* *tsà* *kixi* *kjoa* nga *Nainá* *kisìkasén*.

¹² Jesús 'ñó *jaátse-la*, *kitsò*:

—*Jñà xità* *koi*, *¿mé-ne* *seña* xi *jeya* *tjín* *síjé-ne*? *Xi* *nguì* *okixi*, *k'oaá* *xan-nò*, *nijngoò* *seña* *jchaa*.

¹³ *Yáá* *kisìkítsajna* *xità* *koi*; *jahas'en* *ijngoò* *k'a-ne* *chitso*; *kiì* *ján* *xijngoà* *ndáchikon*.

Na'yo san-la xità fariseo
(*Mateo 16:5-12*)

¹⁴ *Jñà xità* xi kota'yàt'aà-la Jesús, k'e nga *kiì*, *kijchàajiìn-la* *mikiì* *ts'a* *inchrajín*. *Tà* *jngoò* *ma* *inchrajín* xi *kjinaya-la* *chitso*.

¹⁵ Jesús *kitsò-la*:

—*Chítsejèn-la* *koa* *tìkindaa* *yijo-nò* *it'aà* *ts'e* *na'yo* *san-la* *xità* *fariseo* *ko* *ts'e* *Herodes*.

¹⁶ *Jñà xità* xi kota'yàt'aà-la Jesús *tsohóko* *xíkjín*, *kitsò-la*:

—*Koiì* *k'oa* *tsò-ná* nga *mikiì* *kich'á* *inchrajín*.

¹⁷ Jesús *kisijììn-la* *koni* *s'ín* *nchijoó*, *k'eé* *kitsò-la*:

—*¿Mé-ne* *kòbixón-nò* nga *tsjìn-nò* *inchrajín*? *¿A* *kj'eè* *fíya-nò*? *¿A* *mì* *machiya-nò*? *¿A* *tsí* 'ñó *tájaajììn* *tjín* *inìma-nò*?

¹⁸ *Tjín* *xkoòn*, *¿mé-ne* *mikiì* *tsejèn-nò*? *Tjín* *líká-nò*, *¿mé-ne* *mikiì* *na'yà-nò*? *¿A* *mì* *bítsjeèn-nò*

¹⁹ *k'e* *kisìka'biá* *inchrajín* xi 'òn *ma-ne* *koa* 'òn *jmiì* *xità* *tsakjèn*? *¿Kó* *tjín* *nìsiyá* *tsiningui-ne* xi *tsibíxkó-isa*?

Kitsò *jñà xità*:

—*Tejò* *nìsiyá* *komà*.

²⁰ —*K'e* nga *kisìka'biá* *jñà* *inchrajín* xi itoò *ma-ne*, *koa* *ñijòn* *jmiì* *xità* *tsakjèn*, *¿kó* *tjín* *nìsiyá* *tsiningui-ne* xi *tsibíxkó-isa*?

Kitsò *jñà xità*:

—*Itoò* *nìsiyá* *komà*.

²¹ *K'eé* *kitsò-la*:

—*¿A* *tà* *kó* *kj'eè* *machiya-nò*?

K'e nga jè Jesús kisindaà jngoò-ne xità xi mikiì tsejèn-la

²² Jesús *ijchò* *ján* *naxandá* *Betsaida*; *ya* *ijchòko* *jngoò-la* *xità* xi *mikiì* *tsejèn-la*. *Tsibítsi'ba-la* nga *kátát'aà-la* *tsja* *jñà* *xkon*.

²³ Jesús kitsobà'ńó tsja jè x̄ita xi mìkiì tsejèn-là. Ikjoàn tsachrjekàjìin naxandá, tsibíchrángui xk̄on, ikjoàn tsohósòn-là tsja. K'ée kiskònangui-là a tsejèn chiba-là.

²⁴ Jè x̄ita xi mìkiì tsejèn-là kiskoòtsejèn, kitsò:

—Jye be x̄ita tanga k'oaá ma-na ta koni kjoàn yá kjoàn nga tjíma.

²⁵ Jesús, ìjngòò k'a tsohót'aà-là tsja jńà xk̄on. Kitsò-là nga ndaà kàtakotsejèn, n̄itoón kjòndaà-ne. Ndaà kijtseè yije-ne.

²⁶ Jesús kisìkasén-ne ni'ya-là x̄ita jè, kitsò-là:

—Kì yá bitjaàs'en-jìin naxandá, kì yá x̄ita xi bènojmí-là.

K'è nga jè Pedro tsibénojmíya nga Jesús, jé xi Cristo

(Mateo 16:13-20; Lucas 9:18-21)

²⁷ Itjo Jesús kò x̄ita xi kota'yàt'aà-là, kù yá naxandá jtobá xi chja-ne Cesarea ts'e Filipino. K'è nga tjímaya ndiyá, Jesús kiskònangui-là x̄ita xi kota'yàt'aà-là, kitsò-là:

—¿Kó tsò jńà x̄ita? ¿Yá-ná 'an?

²⁸ Kitsò jńà x̄ita xi kota'yàt'aà-là:

—Tjín xi tsò: “Jé Juan xi kis'ìin bautizar x̄ita.” Tjín xi tsò: “Jé Elías.” Tìkoaá tjín xi tsò: “Jngòò x̄ita xi kùichja ngajo-là Nainá.”

²⁹ Jesús kiskònangui-là jńà x̄ita xi kota'yàt'aà-là; kitsò-là:

—¿Jńò kó bixón? ¿Yá-ná 'an?

Kùichja Pedro, kitsò:

—Jì-né xi Cristo [xi xó kisìkasén-lè Nainá].

³⁰ Tanga jè Jesús kitsò-là:

—Kì yá x̄ita xi bènojmí-là xi ìt'aà ts'an.

K'è nga jè Jesús tsibénojmíya kjoa biyaà-là

(Mateo 16:21-28; Lucas 9:22-27)

³¹ Tsibíts'ia Jesús nga tsakóya-là x̄ita xi kota'yàt'aà-là, kitsò-là:

—'An xi Kì'ndí-là X̄ita xan-là yijo-na, tse kjo'in siìkjiaán; kochrjengui-na jńà x̄ita jchínga, kò jńà x̄ita skò-là nò'miì, kò x̄ita xi okóya kjotíxoma-là Nainá xi kiskù Moisés. Siìk'eén-na tanga k'è nga kijchò jàn nachrjein kjoaáya-na.

³² Jesús nguì ndaà tsibénojmí kjoa xi komàt'in. Jé Pedro kùichjat'aàxìn-là Jesús nga mìkiì ndaà tjín koni tsò.

³³ Tanga Jesús, kisìkáfaya, kiskoòtsejèn-là x̄ita xi kota'yàt'aà-là, tsohótiko Pedro. Kitsò-là:

—Tisìt'aàxìn-ná jì x̄ita neíí. Nga jì, mìtsà k'oas'ín nìkìtsjìin koni s'ín tjín kjohìtsjeèn-là Nainá. Ngaji tà k'oas'ín nìkìtsjìin koni s'ín tjín kjohìtsjeèn-là x̄ita.

³⁴ Jesús kùichja-là x̄ita xi kota'yàt'aà-là kò x̄ita xi tjingui-là. Kitsò-là:

—Tsà yá xi mejèn-là nga x̄ita ts'an koma, kàtatsjeiìn-takòn mé xi mejèn-là yijo-là; koni jngòò x̄ita xi 'yajen krò-là, kàtìjnandaà nga siìkjeiìn kjo'in xi kjoa ts'an; ndaà kàtjìt'aà-na.

³⁵ Nga n̄ita yá x̄ita xi mejèn-là kochrjetjì yijo-là nga n̄imé kjo'in sakò-là, tà saá siìchija-né kò kjo'in kíjnajìin; tanga jè xi tìjnandaà nga tsjá yijo-là xi kjoa ts'an kò kjoa ts'e 'én ndaà-là Nainá, jè-né xi k̄itjokàjìin kjo'in nga ìt'aà ts'an ndaà kíjna.

³⁶ ¿Mé xi siìkijne x̄ita nas'ín tjoé yije-là isò'nde tsà siìchja inìma-là? N̄imé.

³⁷ ¿A koma kòichjí kjoabiyaà jngòò x̄ita xi majìn-là nga kiyá? Majìn.

³⁸ Tsà tjín i'nga x̄ita xi kòsobà-là ìt'aà ts'an kò ìt'aà ts'e 'én-na yá nguixkon x̄ita jé xi tjín, tìkoaá 'an xi Kì'ndí-là X̄ita xan-là yijo-na, kòsobà-na ìt'aà ts'e k'è nga kjoìkooa ijngòò k'a kjoajeya-là Na'èn-na kò àkjale tsjeè-là Nainá.

9

¹ Jesús kitsò-ìsà:

—Òkixíjì xi xan-nò, títsajnajìin i'nga xítà ijndé xi mìkì kiyá skanda k'e nga skoe kó s'ín otíxoma Nainá nga kjoíko nga'ńó-là.

*K'e nga jè Jesús jahatjìya í'ńó isén-là kóhokji yijo-là
(Mateo 17:1-13; Lucas 9:28-36)*

² Nga komà joòn nachrjein, Jesús kùimijìn-jno jngoò nindoò xi 'nga kji; tà jñà kùiko Pedro, Jacobo ko Juan. K'e nga ijchò i'nde jè, Jesús, jahatjìya í'ńó isén-là nga nguixkon jñà xítà koi.

³ Jè nikje-là 'ńó kjòchroba, tsí ote ni'ín né. Tsjìn xítà nga tíjtsa isò'nde xi ma-là ts'ìin nikje koni s'ín kjòchroba.

⁴ Tìkoáá kijtseè jè Elías ko Moisés nga nchijoókjoè ko Jesús.

⁵ Jè Pedro kitsò-là Jesús:

—Maestro, ndaà tíjìn nga i títajnaá. Jàn ni'ya xkójndà kíndaà-jèn. Jngoò tsiji, jngoò ts'e Moisés, jè xi ijngoò ts'e Elías.

⁶ Jè Pedro tà k'oaá kitsò. Mì tì kì beè-ne kó s'ín kùichjà nga 'ńó kitsakjòn xítà koi.

⁷ K'eé j'ìi jngoò 'nguién-là ifi xi tsibí'ma xítà koi; yaá ijìn ifi kina'yà jngoò-là 'én xi kitsò:

—Jè jèe xi k'í'ndí-nà xi 'ńó matsjake. Jè tìná'ya-là.

⁸ Tìk'e-ne kiskoòtsejèn xítà koi. Mì tì yá tíjìn-ne. Tà jè tajngoò Jesús síjna.

⁹ K'e nga inchrobàjen-t'aà-ne nindoò, Jesús kitsò-là xítà xi kota'yàt'aà-là:

—Kì yá xítà xi bènojímí-là jè kjoà xi kà'yaà; skanda k'eé tènójímí-là k'e nga kjoááya-na it'aà ts'e kjoabiyaà 'an xi Kí'ndí-là Xítà xan-là yijo-na.

¹⁰ Jñà xítà xi kota'yàt'aà-là tsibí'ma jè kjoà jè, sakoáá tsajoóya-ne kó tsò-ne xi tsò-là kjoááya-là.

¹¹ Kiskònangui-là Jesús. Kitsò-là:

—¿Mé-ne kòtsò-ne jñà xítà xi okóya kjotíxoma-là Nainá xi kiskì Moisés nga jè Elías kjoí itjòn?

¹² Jesús kitsò-là:

—Òkixì né. Jè kjoí itjòn Elías, jè koìndaàjìn yije kjoà. ¿Kjoà mé-ne kòtsò-ne Xojòn-là Nainá nga 'an xi Kí'ndí-là Xítà xan-là yijo-na, tseé kjo'in sìkjaán, toòn skoe-na xítà?

¹³ Tànga 'an, k'oaá xán-nò, jè Elías jyeé j'ìi. Jñà xítà k'oaá s'ín kiskò koni s'ín mejèn-là. Tànga k'oaá s'ín tíchjà Xojòn-là Nainá nga k'oaá s'ín komat'in.

*K'e nga jè Jesús kisindaà jngoò-ne ti xi inìma ch'o-là neí tíjìn inìma-là
(Mateo 17:14-21; Lucas 9:37-43)*

¹⁴ Jesús k'e nga ijchò-ne ñánda títsajna xítà xi kota'yàt'aà-là xi i'nga, kijtseè nga kjin jchán ma xítà xi títsajna. Yaá títsajnajìin i'nga xítà xi okóya kjotíxoma-là Nainá xi kiskì Moisés, 'ńó nchijoóya-ne.

¹⁵ Jñà xítà k'e nga kijtseè nga ijchò Jesús, tà k'oaá koma-là. Kù yije kóhótjìn nga kishixat'aà.

¹⁶ Jesús kiskònangui-là, kitsò-là:

—¿Mé xi kò ta ndaà chibàya-nò?

¹⁷ K'eé kùichjà jngoò xítà xi ya tíjnajìn. Kitsò:

—Maestro, jè k'í'ndí-nà kòf'ìko-lè. Inìma ch'o-là neí tíjìn inìma-là; mìkì ma chjà.

¹⁸ Nìton ñánda tíjna k'e nga tsobà'ńó, majndoòt'aà nangui ko ochrje ndáxó tso'ba, síjts'ìin nì'ńó, ìkjoàn síjna tsjò. Koi tìsìjé-là xítà xi kota'yàt'aà-lè nga kàtachrjekàjìn inìma-là jè inìma ch'o-là neí tanga mìkì bitjokàjìn-là.

¹⁹ Kùichjà Jesús, kitsò:

—Jñò, xità xi mìkìi mokjeiín-nò it'aà ts'an. ¿Skanda mé nachrjein kótijnako-nò? ¿Mé nachrjein ska-na kjoa-nò? Nchrohóko-ná jè ti ijndé.

²⁰ K'èé kiìkò jè ti ya nguixkon Jesús; jè inima ch'o-la neíí, k'e nga kijtseè Jesús, ijngoò k'a k'en xín ti. K'e nga kiskaat'aà nangui tsangáyà'nde koa itjo ndáxo tso'ba.

²¹ Jesús kiskònangui-la na'èn-la, kitsò-la:

—¿A kjòtseé oma-la ti-lè?

Jè na'èn-la kitsò:

—Tik'e-ne nga sa ndí ti jtobá kji.

²² Jè inima ch'o-la neíí kò kjìn jchán k'a síkatjen-jiìn ni'ín ko síkatjen-jiìn nandá nga mejèn-la sík'en. Tsà koma-lè mé xi sikoji, jchahimatakòn-nájen ko tichját'aà-nájen.

²³ Jesús kitsò-la:

—¿Kó si tsà koma-lè? Ma yije-né nita mé kjoa-ne jè xi mokjeiín-la.

²⁴ Nitoón 'ño kiìchja jè na'èn-la ti. Kitsò:

—Mokjeiín-na, tichját'aà-isa-ná nga ngui isa ndaà kokjeiín-na.

²⁵ Jesús k'e nga kijtseè nga tíma kjìn xità, tsohótiko jè inima ch'o-la neíí; kitsò-la:

—Ngaji, inima ch'o-la neíí xi mìkìi ma-lè nokjoì ko mìkìi na'yì, 'an, k'oaá xan-lè, titjojiìn inima-la ti jè; kì ti yaá bitjaàs'en-jiìn-ne inima-la.

²⁶ Jè inima ch'o-la neíí kiskindà yaxá; ikjoàn ijngoò k'a k'en xín ti. Ikjoàn itjojiìn-ne inima-la. Kisikájna jè ti koni tsà jye k'en, jñà xità xi nchikotsejèn, kitsò:

—Jyeé k'en.

²⁷ Tanga jè Jesús kitsobà'ño tsja; kiskími'nga; ikjoàn tsasíjna kixi jè ti.

²⁸ K'e nga jahas'en ni'ya Jesús, jñà xità xi kota'yàt'aà-la kiskònangui-la nga tajngoò, kitsò-la:

—¿Mé-ne ngajen mìkìi kòbitjojiìn-nájen jè inima ch'o-la neíí?

²⁹ Kiìchja Jesús, kitsò:

—Jñà inima ch'o-la neíí xi okjoàn, k'èé bitjokàjiìn nga nokjoàt'aà-la Nainá ko nga bijnachjaán.

K'oaá s'ín tsibénojmí Jesús kjoabiyaà-la xi ma-ne jò k'a

(Mateo 17:22-23; Lucas 9:43-45)

³⁰ K'e nga kii-ne ya i'nde jè, jahatojiìn nangui Galilea. Tanga Jesús majìn-la nga xità skoe;

³¹ Jesús k'oaá s'ín tsakóya-la xità xi kota'yàt'aà-la. Kitsò-la:

—'An xi Ki'ndí-la Xità xan-la yijo-na yaá tsoba'ño-na jñà xità; ikjoàn sùik'en-na. Tanga k'e nga kijchò jàn nachrjein nga kiyá, kjoaáya-na.

³² Tanga jñà xità xi kota'yàt'aà-la mìkìi kjòchiya-la 'én xi kitsò-la. Tà kitsakjòn-né, mìkìi kiskònangui-la.

Yá xità xíkjin xi kína ítjòn

(Mateo 18:1-5; Lucas 9:46-48)

³³ K'e nga ijchò ya naxandá Capernaum, k'e nga jye títsajna iya ni'ya, Jesús kiskònangui-la xità xi kota'yàt'aà-la, kitsò-la:

—¿Mé xi koa ta ndaà chibàya-nò k'e nga títsanchrobáya ndiyá?

³⁴ Xità xi kota'yàt'aà-la tà jyò tsibítsajna, koi-né, k'e nga nchinchrobá ya ndiyá, tsajoóya-ne yá xità xíkjin xi kína ítjòn.

³⁵ Jesús tsibìjna; ikjoàn kiìchja-la nga tejò xità xi kota'yàt'aà-la, kitsò-la:

—Tsà yá xità xi mejèn-la nga kína ítjòn, ta saà jè kjoehet'aà-ne, chi'nda-la kàtama ngats'ìi xità xi i'nga.

³⁶ Jesús kiskoé jngoò ndí ti. Tsasíjna 'nchòhosen. Tsa'nga. Ikjoàn kitsò-la:

³⁷ —Nìtá yá-ne xi ìt'aà ts'an skoétjò jngoò ndí ti koni jè, 'aán xi skoétjò-na; kò jè xi skoétjò-na mìtsà tà 'an skoétjò-na, tìkoáá jè skoétjò xi kisìkasén-na.

Yá xi kondra-la Cristo kò yá xi xìtá ts'e
(Lucas 9:49-50; Mateo 10:42)

³⁸ Kìichja Juan, kitsò:

—Maestro, jngoò xìtá ki'ya-jen xi ìt'aà tsjji ochrjekàjìin inìma ch'o-la neí inìma-la xìtá. Tanga mìtsà xìtá tsaján; mìkì kits'i'nde-lajen.

³⁹ Jesús kitsò:

—Kì k'oaà nìkòo. Niyá-jèn xi ìt'aà ts'an s'ìin jngoò kjoókón xi ndaà tjin xi tije kichjajno-ná.

⁴⁰ Jè xi mìtsà kondra tsaján, ìt'aà tsaján tíjna.

⁴¹ Ngats'ìi xìtá xi ìt'aà ts'an tsjá jngoò chitsín-nò nandá, koií kjoa-la nga xìtá-la Cristo 'mì-nò, okixí xi xan-nò, jña xìtá koi, tjoé-la chjì-la.

Xìtá xi bít'in-ná nga binchaàtsjiaá jé
(Mateo 18:6-9; Lucas 17:1-2)

⁴² 'Nìtá yá-ne xi jé skìnjìin jngoò ndí xìtá ìma xi mokjeíin-la ìt'aà ts'an, ìsaá-la ndaà koma tsà s'ingui'ño jngoò ndajò natsí ís'ìin, ìkjoàn s'ikatjengui ndáchikon.

⁴³ Tsà jè ndsaa ótsji jé-nò, tìchátjòn. Ìsaá ndaà-ne tsà xkoán titsjoò nga kítjás'en-jñoò kjoabinachon mì k'oa-ne tsà jò ma ndsaa koa ján konguió ìjìin ni'ín ñánda mìkì bits'o,

⁴⁴ yá ñánda mìkì biyaà ch'ndo xi kine-ná kò yá ñánda mìkì bits'o ni'ín nga tìtiá.

⁴⁵ Tsà jña ndsokoò ótsji jé-nò, tìchátjòn. Ìsaá ndaà-ne tsà xkoán titsjoò nga kítjás'en-jñoò kjoabinachon mì k'oa-ne tsà jò ma ndsokoò koa ján konguió ìjìin ni'ín,

⁴⁶ yá ñánda mìkì biyaà ch'ndo xi kine-ná kò yá ñánda mìkì bits'o ni'ín nga tìtiá.

⁴⁷ Tsà jña xkoòn ótsji jé-nò, tìnachrjeè. Ìsaá ndaà-ne tsà jngoò ma xkoòn nga kítjás'en-jñoò ñánda tíhotíxoma Nainá mì k'oaá-ne tsà jò ma xkoòn koa ján konguió ìjìin ni'ín

⁴⁸ yá ñánda mìkì biyaà ch'ndo xi kine-ná kò yá ñánda mìkì bits'o ni'ín nga tìtiá.

⁴⁹ 'Ngats'ìi xìtá sá ni'ín kòtsjeè-ne, koa jña kjetjò xi tsjá xìtá, naxaá kojnchra-ne.

⁵⁰ Jè naxa, ndaà-né; tanga tsà mì tì kì jnchra-ne, ¿kós'ín siko-là nga kojnchra ìjngoò k'a? Kàtasijìin naxa inìma-nò koa 'nchán titsajnakò xinguiòo.

10

K'e nga jè Jesús tsakóya kjoa ts'e xìtá xi tsjìin xíkjin
(Mateo 19:1-12; Lucas 16:18)

¹ Jesús itjòjìin yá naxandá Capernaum, kii ján i'nde Judea, ijchò ján nangui ijton xajngá nandá Jordán. Yáá kòkjìn ìjngoò k'a xìtá; koa jè tsibíts'ia ìjngoò k'a nga tsakóya-la xìtá koni s'ín kjit'aà.

² Ijchò kinchat'aà chraña i'nga-la xìtá fariseo. Nga mejèn-la skónachan-la, kiskónangui-la, kitsò-la:

—¿A tji'nde-la xi x'ín nga tsjín chjoón-la?

³ Tanga Jesús kitsò-la:

—¿Kós'ín tsakóya-nò Moisés?

⁴ Kitsò xìtá koi:

—Moisés kitsjaà'nde-né nga ma s'indaà xojon nga koma tsjín xíkjin xìtá.

⁵ Jesús kitsò-là:

—Moisés, koi k'oa kitsò-nò, jñò, 'ñó tájaàjiin tjin inima-nò.

⁶ Tanga k'e nga sa kisindaà isò'nde, Nainá tsibíndaà x'in ko chjoón.

⁷ K'oaá ma-ne nga jè x'in siikijna na'èn-là ko nea-là nga kijnako chjoón-là.

⁸ Ta jngoò xita koma-ne ingajò. Mìtsà tì jò ma-ne, ta jngoò koma-ne.

⁹ K'oií kjoa-là nga mì yá xita tji'nde-là nga siitsjiin xikjin xi Nainá kisijngò.

¹⁰ K'e nga ijchò-ne ni'ya-là, jñà xita xi kota'yàt'aà-là Jesús kiskònangui ijngò k'a-là tikoi-ne kjoa koi.

¹¹ Jesús kitsò-là:

—Jè xita xi tsjin chjoón-là, ikjoàn bixan-ko ijngò xi kj'eí chjoón, kjoa chijngui tís'in it'aà ts'e chjoón-là.

¹² Tsà jè chjoón tsjin x'in-là ikjoàn bixan-ko ijngò xi kj'eí x'in, tikoaá kjoa chijngui tís'in it'aà ts'e x'in-là.

K'e nga jè Jesús kisichikon-t'in ndí ixti

(Mateo 19:13-15; Lucas 18:15-17)

¹³ Jngoò k'a jñà xita j'iko-là ndí ixti jè Jesús nga mejèn-là siichikon-t'in; koòt'aà-là tsja. Tanga jñà xita xi kota'yàt'aà-là Jesús mìkì kitsjaà'nde-là. Tsohótiko-né.

¹⁴ K'e nga kijtseè Jesús, kòjti-là, kitsò-là:

—Tji'nde-là ndí ixti kàtjanchrobákon-na. Kì binchahikon-là. Jñà xi k'oaá s'in tjin inima-là koni ts'e ndí ixti, jñà xi tjin-là kjondaà nga Nainá tíhotixoma-là.

¹⁵ K'oaá xan-nò xi nguì okixi, jñà xi mìkì kòkjeiin-là koni jngoò ndí ixti nga skoé kjondaà-là Nainá nga jè kotixoma-là, mìkì kjoahas'en-jiin ñánda tíhotixoma Nainá.

¹⁶ Jesús tsa'nga jñà ndí ixti; tsohósòn-là tsja; ikjoàn kisijét'aà-là Nainá nga kàtasichikon-t'in jñà ixti.

Xita xi 'ñó kjin tsojmì tjin-là

(Mateo 19:16-30; Lucas 18:18-30)

¹⁷ K'e nga tífi ijngò k'a-ne Jesús, tsangachikon jngoò xita xi ijchò tjingui-là. Tsasìxkó'nchit'aà-là; ikjoàn kiskònangui-là; kitsò-là:

—Jì Maestro ndaà, ¿mé xi s'iaàn nga s'e-na kjoabinachon nita kjé-ne?

¹⁸ Jesús kitsò-là:

—¿Mé-ne nga xita ndaà 'mì-ná? Nijngò xita xi ndaà, ta jngoò jè Nainá xi ndaà.

¹⁹ Jyeé tíjiin-lè kó tsò kjotixoma: “Kì xita nìk'in; kì kjoa chijngui 'nì; kì chijé 'nì; kì 'én ndiso nokjoi it'aà ts'e xita xi kj'eí; kì chonachan-jèn; chaxkoín na'èn-lè kò nea-lè.”

²⁰ Jè xita nchiná kitsò:

—Maestro, ngats'ìi kjotixoma koi, jyeé kisikitasoàn kó nga sa chítia.

²¹ Jesús tsja komà-là, kiskoò'an, ikjoàn kitsò-là:

—Ijngò kjoa chija-lè. T'in, tatìjni yije tsojmì xi tjin-lè. Ikjoàn tika'bí-là xita ima mé-ne nga s'e-lè kjoa machikon-t'in ján ngajmì. Ikjoàn nchrobátjingui-ná.

²² Jè xita nchiná, tà kjòbaá-là nga kù'nchré 'én koi. Tà ba kis'e-là nga kù, koi xó nga 'ñó kjin tsojmì tjin-là.

²³ Jesús kiskoòtsejèn tjingui-là, kitsò-là xita xi kota'yàt'aà-là:

—'Ín jchán koma-là jñà xita nchiná nga kjoahas'en-jiin ñánda tíhotixoma Nainá.

²⁴ Jñà xita xi kota'yàt'aà-là Jesús, k'e nga kù'nchré 'én koi, tà k'oaá komà-là. Tanga jè Jesús ijngò k'a kitsò-là:

—Jñò xi ki'ndí-na xan-nò, 'ñó 'iín koma-la jñà xita xi ton-la 'ñót'aà takòn nga kjoahas'en-jìin kjoatìxoma-la Nainá.

²⁵ Ìsaá mì 'in koma-la jngoò cho camello nga kjoahas'en xkon nindoò xi tjahaña-ne nikje, mì k'oaá-ne koni jngoò xita nchiná xi 'ñó tjin-la tsojmì nga koma kjoahas'en-jìin ñánda tíhotìxoma Nainá.

²⁶ Jñà xita xi kota'yàt'aà-la Jesús, isaá ndaà kjòxkón-la. Ikjoàn kiskònangui-la xíkjin, kitsò:

—¿Yá-né xi kitjokàjìin kjo'in?

²⁷ Jesús kiskoò'an, kitsò:

—Jñà xita mìkì koma-la; tanga Nainá komaá-la; it'aà ts'e Nainá nita mé kjoa-ne, koma yijeé-la.

²⁸ Kìichja Pedro, kitsò:

—Na'èn, ngajen, jyeé kinìkìtsajna yije-jen ngats'iì tsojmì xi tjin-najen nga tjaàtjingui-lèjen.

²⁹ Jesús kitsò:

—Okixi xi xan-nò, nita yá xita-ne xi kisìkìjna ni'ya-la, 'ndse, ndichja, nea-la, na'èn-la, chjoón-la, ixti-la ko nangui-la xi kjoa it'aà ts'an ko it'aà ts'e 'èn ndaà-la Nainá

³⁰ i isò'nde, isaá tsato tjoé ngajo-la xi ni'ya 'mì, xi 'ndse, ndichja, nea-la, ixti-la ko nangui-la, nas'ín kjitjinguikeè xita kondra. Tanga jè isò'nde xi sa nchrobá, s'eé-la kjoabinachon nita kjé-ne.

³¹ Kjin xita xi títsajna ítjòn i'nde, k'e nga koma iskan jñà kìtsajna tjingui. Ko xi títsajna tjingui i'nde k'e nga koma iskan jñà kìtsajna ítjòn.

K'oaá s'in tsibéojmí Jesús kjoabiyaà-la xi ma-ne jàn k'a

(Mateo 20:17-19; Lucas 18:31-34)

³² Jesús, tsó'ba ítjòn-la xita xi kota'yàt'aà-la nga nchifi ján naxandá Jerusalén. Jñà xita xi tjingui tà nchimaxkón-la nga nchifi. K'eé kìichjat'aà-xìn ijngoò k'a-la xita-la xi tejò ma-ne, ikjoàn tsibéojmí ijngoò k'a-la jè kjoa xi komàt'in. Kitsò-la:

³³ —I'nde ján titsahonguiá naxandá Jerusalén; 'an xi Ki'ndí-la Xita xan-la yijo-na, yaá tsobà'ñó-na xita sko-la no'mì ko xita xi okóya kjoatìxoma-la Nainá xi kiskì Moisés nga koi'nè-na kjoabiyaà, ikjoàn sìngatsja-na jñà xi mìtsà xita judío

³⁴ nga sìsobà-na, kìichrájno-na, kojà-na, ikjoàn sìk'en-na. Tanga k'e kijchò jàn naxrjein kjoáyaá-na.

Kjondaà xi 'in tjin xi kisijé Jacobo ko Juan

(Mateo 20:20-28)

³⁵ Jacobo ko Juan ixti-la Zebedeo ijchò kinchat'aà-la Jesús, kitsò-la:

—Maestro, mejèn-najen nga k'oi-najen jè kjondaà xi sijé-lèjen.

³⁶ Jesús kiskònangui-la, kitsò-la:

—¿Mé-ne xi mejèn-nò nga tsjaà-nò?

³⁷ Jacobo ko Juan kitsò:

—K'e nga jeya kijni nga tíhotìxomai, k'i'nde-najen nga ya kitsat'aà-lèjen, jngoò kijnat'aà-lè kixi-lè koa jngoò kijnat'aà-lè ngaskón-lè.

³⁸ K'eé kitsò Jesús:

—Mìkì 'yaà mé xi nìjé. ¿A kichìkjoaá-nò nga s'ioya jè chitsín ts'e kjo'in xi 'an skiaa, a chíkjoa-nò nga koma bautizar ts'e kjo'in xi 'an tímat'ian?

³⁹ Kitsò jñà xita koi:

—Kichìkjoaá-najen.

Kitsò-la Jesús:

—Jñò, komaá s'ioo koa koma-nò bautizar it'aà ts'e kjo'in xi 'an kotojñaà,
⁴⁰ tanga xi 'an tsjaà-nò nga ya kitsajnat'aà-ná ya kixi-na ko ngaskón-na mitsà 'an oko-na nga tsjaà-nò. Jñà i'nde koi, jñà tjoé-la xita xi Nainá títsajnaanda-la nga tsjá-la.

⁴¹ K'e nga kiì'nchré jñà xita-la Jesús xi i'nga xi te ma-ne, kòjti-la koni kitsò Jacobo ko Juan.

⁴² Tanga jè Jesús kiichja-la, kitsò-la:

—Jye tíjìn-nò nga jñà xita sko-la naxandá xi 'ya-la nga kjoíxoma tíjya tsja, nangui síkítsajna xita-la xi jñà otíxoma-la. Tíkooá jñà xita xi 'ñó jeya títsajna, beetoón-né jñà xi xita ima.

⁴³ Tanga jñò mìkiì k'oas'ín s'een; tsà jngoò xita xinguiò mejèn-la 'nga kíjna, jè xi kàtasíxá-la xita xi i'nga.

⁴⁴ Koa jè xi mejèn-la kíjna ítjòn, chí'nda-la kàtama ngats'ì xita xi i'nga.

⁴⁵ Ndaà tsà 'an xi Ki'ndí-la Xita xan-la yijo-na, mitsà koi xá j'i-na nga 'an kos'in-na; tà saá 'an síixá-la xita xi i'nga, ko tsjaà yijo-na ko inima-na nga kjin xita kitsajnandeí kjoa ts'e jé-la.

*K'e nga kisindaà-ne Jesús jè xita xi mìkiì tsejèn-la xi 'mì Bartimeo
 (Mateo 20:29-34; Lucas 18:35-43)*

⁴⁶ K'e nga ijchò naxandá Jericó nga jye nchibitjòjìn najnchra, Jesús tjiko xita xi kota'yát'aà-la ko kjin xita tjingui-isa-la. Ya indii ndiyá tíjna jngoò xita ima xi mìkiì tsejèn-la xi 'mì Bartimeo, ti-la ma xita xi 'mì Timeo, nga tísíjé kjojò tsojmì.

⁴⁷ Jè xita xi mìkiì tsejèn-la k'e nga kiì'nchré nga jè Jesús xi Nazaret ts'e tífi, nitoón kiichja-la, kitsò-la:

—Jesús, nga ya nchrobát'aà-ne tje-la xitaxá ítjòn David [nga jì tíjna ngajo-la], jchahimatakòn-ná!

⁴⁸ Kjin ma xita xi tsohótiko Bartimeo nga jyò kàtìjna. Tanga jè Bartimeo isaá 'ñó kiichja. Kitsò:

—Jì xi ya nchrobát'aà-ne tje-la xitaxá ítjòn David, jchahimatakòn-ná!

⁴⁹ K'ée tsasíjna Jesús, kitsò:

—Tínókjoa-là.

Ikjoàn kinokjoà-la jè xita xi mìkiì tsejèn-la. Kitsò-la:

—'Ñó te-la takòin, tísitjìn, chja-lè Jesús.

⁵⁰ Jè xita xi mìkiì tsejèn-la kisikatjen inchrokisòn-la, nitoón tsasítjen, kiì kasit'aà-la ñánda síjna Jesús.

⁵¹ Jesús kiskònangui-la, kitsò-la:

—¿Mé xi mejèn-lè nga síkò-lè?

Jè xita xi mìkiì tsejèn-la kitsò:

—Maestro, mejèn-na nga kàtatsejèn-na.

⁵² Jesús kitsò-la:

—T'in-ne; koi-né nga mokjeiín-lè it'aà ts'an nga kòmandaà-ne.

Jè xita xi mìkiì tsejèn-la nitoón kjòtsejèn-la. Kùtjingui-la koni s'ín ndiyá tífi Jesús.

11

*K'e nga jè Jesús jahas'en-jìn naxandá Jerusalén
 (Mateo 21:1-11; Lucas 19:28-40; Juan 12:12-19)*

¹ K'e nga jye kjomeè bijchó chraña-la naxandá Jerusalén, jñà naxandá xi 'mì Betfagé ko Betania, ya it'aà nindoò Yá Olivo, Jesús kisikasén jò xita xi kota'yát'aà-la;

² kitsò-la:

—Tanguió ján ndí naxandá itsé xi kijnat'aà ján. K'e nga kijchoò yaá síjnat'aà'ño jngoò búrró ki'ndí xi ní saá yá bijnasòn-la. Chíjnda'ño, nchrohókoo.

³ Tsà yá xi kjòngui-nò, tsà kitsò-nò: “¿Mé-ne konìko-nò búrró?”, tìn-là: “Jé xó Na'èn-ná Jesús kochjeén-la, koa nitòón xó sikkasén-ne.”

⁴ Kìi jña xita xi kota'yàt'aà-la. K'e nga ijchò jngoò ni'ya, yaá tjit'aà'ño jngoò búrró jè xotjoa-la ni'ya ya iya ndiyá. K'e nga kiskijnda'ño.

⁵ Jña xita xi ya títajna kitsò-la:

—¿Mé s'een-nò, mé-ne chíjnda'ño-nò ndí búrró?

⁶ K'oaá s'ín kitsò-la koni s'ín tsibénajmí-la Jesús; kitsjaà'nde-la nga kiiko.

⁷ K'e nga ijchòko ñánda tíjna Jesús jè ndí búrró, jña nikje ts'e xita kisikjeén nga tsohòjtsa-la jè ndí búrró; ikjoàn tsibijnasòn-la Jesús.

⁸ Kjin xita tsohòjngoò nikje-la ya iya ndiyá. Jña xita xi i'nga, xka chrja-la yá tsohòjngoò xi tsate ya jjiin ijña.

⁹ Jña xita xi tíjòn ko xi tjingui 'ño chja, nga kitsò:

—¿Mé tà ndaà-la jè xi nchrobá ngajo-la Nainá, jè xi otixoma-ná!

¹⁰ ¿Mé tà ndaà-ne nga jè kotixoma ngajo-la xita jchínga-ná David! ¿Kátas'e kjoajeya ján ngajmii!

¹¹ Jesús jahas'en-jiin ya naxandá Jerusalén. Ikjoàn jahas'en nditsin ingo ítjòn. Xki xi ján kiskoòtsejèn. Ikjoàn itjo-ne; kiiko xita-la xi tejò ma-ne ján naxandá Betania, koi-né nga jye kjòhoxòn.

K'e nga jè Jesús kitsò-la jngoò yá-la toò iko nga ch'o kátama-la

(Mateo 21:18-19)

¹² K'e koma nchijòn nga itjo ìjngoò k'a-ne ján naxandá Betania, Jesús kjòhojò-la.

¹³ K'ée kijtsee jngoò yá-la toò iko xi kjiin síjna. Kìi katsejèn-la tsà yijà-la toò, tanga nímé tjín-la; tà xkaá tjín-la. Mìtsà naxhrjein-la toò.

¹⁴ K'ée kitsò-la jè yá toò iko:

—Nì tì yá xi skine-ne toò-lè.

Xita xi kota'yàt'aà-la Jesús kii'nchré 'én koi.

K'e nga tsachrje ingo ítjòn jña xita xi otíjna tsojmi

(Mateo 21:12-17; Lucas 19:45-48; Juan 2:13-22)

¹⁵ K'e nga ijchò naxandá Jerusalén, Jesús jahas'en ya nditsin ingo ítjòn; ikjoàn tsibíts'ia nga tsachrje jña xita xi tsojmi otíjna ko xi otse tsojmi. Kisihitíkjá ímixa-la jña xita xi síkjatjya ton tikoáá kisihitíkjá íxile-la xita xi otíjna nise paloma.

¹⁶ Mì tì kii kitsjaà'nde-la xita xi tsojmi otíjna nga ch'á fahatoyako ingo ítjòn.

¹⁷ Ikjoàn tsakóya-la xita. Kitsò-la:

—Jè Xojon-la Nainá tsò-né: “Ni'ya-na, ni'ya ts'e ochikoón k'oín nga i kichjat'aà-na ngats'ii xita naxandá xi tjín kóhokji isò'nde.” Tanga jño, nguijo-la xita chijé tita'nè.

¹⁸ K'e nga kii'nchré jña xita sko-la no'mii ko xita xi okóya kjotixoma-la Nainá xi kiskii Moisés, tsohótsji'nde-la kós'ín siiko nga siik'en Jesús nga tsakjón-la. Koií kjoa-la nga jña kjotixoma xi okóya Jesús ndaá tsò, ko jña xita xi 'nchré-la tà k'oaá ma-la 'én xi okóya.

¹⁹ K'e nga jye kòjño, Jesús ko xita xi kota'yàt'aà-la itjojiin naxandá Jerusalén, xìn kii.

Mé xi komà-la jè yá toò iko xi tsjin-la toò

(Mateo 21:20-22)

20 K'e nga tajñòya nga koma nchijòn, ja ìjngoò k'a ñánda síjna yá toò iko, kijtsee nga jye kixì yá kóhokji skanda ì'ma-la.

21 Jè Pedro tsibítsjeèn-la koni kitsò Jesús. K'ée kitsò-la:

—Maestro, chítsejèn-la jè yá toò iko xi 'on kinokjoàkoji ngojña. Jye kixì.

22 Jesús kiìchja; kitsò:

—Kàtakjeiín-nò ìt'aà ts'e Nainá.

23 Okixí xi xan-nò, tsà yá xi kitso-la jè nindoò jè: “Tisixìn; ján tikatjen-jiìn yijo-lè ján jììn ndáchikon.” Tsà mìtsà tà jò tjín-la k'e nga okitsò nga tíjngoò ìnima-la nga mokjeiín-la, k'oaá s'ín koma.

24 Koi kos'ín xan-nò kóhótjiòn, k'e nga kítsi'ba-la Nainá, k'oaá s'ín kàtakjeiín-nò koni tsà jye kitjoé-nò mé-ne nga tjoé-nò.

25 K'e nga kinókoat'aà-la Nainá tijchàat'aà-la jé-la xinguiò mé-ne jè Na'èn-nò xi tíjna ìt'aà ngajmì sijnchàat'aà-nò jé-nò xi tsajòn.

26 Tanga tsà mìkiì sijchàat'aà-la jé-la xita xinguiò tikoa mìkiì sijnchàat'aà-nò Na'èn-ná xi tíjna ngajmì.

Kjotíxoma-la Jesús

(Mateo 21:23-27; Lucas 20:1-8)

27 Jesús ijchò ìjngoò k'a Jerusalén. K'e nga tsó'ba ya nditsin ingo ítjòn, j'ì kinchat'aà-la jña xita sko-la no'miì, ko xita xi okóya kjotíxoma-la Nainá xi kiskì Moisés, ko xita jchínga;

28 kiskònangui-la, kitsò-la:

—¿Mé kjotíxoma xi tsjá'nde-lè koni s'ín 'nì? ¿Yá xi kitsjaà-lè kjotíxoma kjoa xi 'nì?

29 Jesús kitsò-la:

—Tikoaá 'an jngoò kjoa skònangui-nò. Kot'in-ná, koa 'an, k'oaá xán-nò yá xi kitsjaà-na kjotíxoma koni s'ín s'iaàn.

30 ¿Yá xi kitsjaà-la kjotíxoma Juan nga kis'iìn bautizar xita? ¿A Nainá-né xi tíjna ngajmì, o xi tà xita-né? Kot'in-ná.

31 Jña xita koi, k'ée tsajoóya-ne, kitsò-la xíkjín:

—Tsà kixoán: “Nainá kitsjaà-la kjotíxoma”, kitso-né: “¿Mé-ne mìkiì kòkjeiín-nò ìt'aà ts'e?”

32 Mì-la kii koma kixoán: “It'aà ts'e xita-né.”

Nga jña xita naxandá tsakjón-la, koi-né nga jña xita k'oaá tsò nga jè Juan, ngui kjoa kixì-né nga jè xi kiìchja ngajo-la Nainá.

33 K'ée kiìchja, kitsò-la Jesús:

—Mìkiì 'ya-jen.

Jè Jesús kitsò-la:

—Tikoaá 'an mìkiì k'oa xán-nò yá xi kitsjaà-na kjotíxoma koni s'ín s'iaàn.

12

Kjoa mangásòn ts'e xita xi tsibítje toò uva

(Mateo 21:33-46; Lucas 20:9-19)

1 Tsibíts'ia Jesús nga tsibénojmiya kjoa xi mangásòn. Kitsò:

—Jngoò xita tsibítje toò uva, tsibíndi-la ínchíba, ikjoàn tsibíndaà jngoò ì'nde ñánda tsi'ñóngui nandá-la toò uva. Tikoa tsibíndaà jngoò torre xi síkinda yije kóhótjín. Ikjoàn kiskíña-la nangui xita xi kj'eíí nga kixásòn. Ikjoàn kii jè nei-la nangui ñánda ì'nde kjiìn.

2 K'e nga ijchò nachrjein-la nga kòjchá toò uva, jè nei-la nangui kiskasén jngoò xita chí'nda-la nga kisiyé-la xi jè tjoé chiba-la ts'e tsojmì xi kòjchá.

3 Tanga jña xita xi síxásòn nangui kitsobà'ño koa kiskaàn-ko, tà kiskasén tiyaá-ne.

⁴ Jé nei-la nangui kisikasén ìjngoò xita chi'nda-la. Tikoáà tà ndajo tsibínè, tsate sko, kisiki'on ko ch'o kisiko.

⁵ Jè nei-la nangui ìjngoò kisikasén xita chi'nda-la. Tikoáà kisik'en-né. Kjin xita-la kisikasén-isa, tanga tjín xi kiskaàn-ko, koa tjín xi kisik'en.

⁶ 'Ko jè nei-la nangui tà jngoò xita-la tíjna-isa; tà jè ki'ndí-la xi 'ño matsjakeè kisikasén, kitsò: “Skoexkón-la ki'ndí-na.”

⁷ Tanga jña xita xi síxájiin nangui, tsajoóya-ne, kitsò-la xíkjin: “Jè jèe xi tjoé kjotjò-la i'nde, sik'eén, tsaján koma i'nde.”

⁸ Kitsobà ñó, kisik'en, ikjoàn kisikatjen ján ijton nangui ñánda tíje toò uva.

⁹ 'Jñò, ¿kó bixón? K'e nga kjoíí nei-la nangui, ¿mé xi síiko jña xita koi? Síik'en-né; kj'eíí xitaá síngatsja jè nangui ñánda tjín toò uva.

¹⁰ '¿A kj'eè bíxkejñoò Xojon-la Nainá? Tsò-né:

Jè ndajo xi tsachrekàngui chjinechrjó nga sa ítjòn, jè-né xi komà ndajo tàts'en chrjó-la ni'ya;

¹¹ K'oaá s'ín kis'iin Nainá. Jña, tà maxkón-ná.

¹² Jña xita sko-la no'mii, ko xita xi okóya kjotíxoma-la Nainá ko xita jchínga mejèn kitsobà'ño Jesús nga kiskaàya-la jè kjoa xi mangásòn xi tsibénojmí nga kondra ts'e-né, tanga jña kitsakjòn-la xita naxandá; kisikíjna, ikjoàn kiì-ne.

Kjoa ts'e xi machítjì tsojmi

(Mateo 22:15-22; Lucas 20:20-26)

¹³ Kisikasén i'nga-la Jesús xita Fariseo ko xita ts'e Herodes nga mejèn-la ótsji'nde-la kós'ín síiko nga kohôngui.

¹⁴ Xita koi, kií kitsò-la:

—Maestro, 'ya-nájen nga 'én kixíí xi nokjoi; mìkiì 'nì kindá koni tsò-lè xita; ko mìtsà jè chítsejèn-jnoi kó kjoàn xita; k'oaá s'ín okoòyi ndiyá-la Nainá koni s'ín tjín xi kjoa kixi. ¿A ndaà tjín nga kíchjítjì-jen tsojmi it'aà ts'e xitaxá ítjòn ts'e Roma, o xi majìn-né? ¿A kíchjì-nájen a xi mìkiì kíchjì-jen?

¹⁵ Jesús jye beè nga jò tjín iníma-la; kitsò-la:

—¿Mé-ne nga chonachan-ná? Nchrohóko jngoò-ná ton nga skoeè kó kji.

¹⁶ K'eé kiìko jngoò-la ton. Jesús kitsò-la:

—¿Yá ts'e isén jè ko jè 'ín xi tjít'aà?

Kitsò-la:

—Ts'eé César, xitaxá ítjòn ts'e Roma.

¹⁷ K'eé kitsò Jesús:

—Tjiì-là César xi ts'e César koa tjii-là Nainá xi ts'e Nainá.

Tà k'oaá koma-la nga kiì'nchré koni kitsò Jesús.

Kjoa ts'e nga faáya-la mik'en

(Mateo 22:23-33; Lucas 20:27-40)

¹⁸ Jña xita Saduceo ijchòkon Jesús. Jña xita koi mìkiì mokjeiín-la nga faáya-la xi jye k'en. Kiskònangui-la, kitsò-la:

¹⁹ —Maestro, jè Moisés, k'oaá s'ín kiskii: Tsà jngoò xita xi kiyá 'ndse, tsà tsjin-la ixti k'e nga kiyá, jè chjoón-la, tijè-ne 'ndse kixan-ko jngoò k'a-ne mé-ne nga s'e-la ixti xi tje ts'e 'ndse.

²⁰ Kis'e xó jngoò k'a xita xi itoò komà 'ndse. Jè xi síjna ítjòn, kis'e xó-la chjoón; tanga k'e nga k'en, mìkiì kis'e-la ixti.

²¹ Jè xi ma jò-ne chixàn-ko chjoón ka'àn-la 'ndse. Tikoáà jè k'en. Mìkiì kis'e-la ixti. K'oaá tì komà jè xi ma jàn-ne.

²² Ngásòn komà nga itoò. Njngoò xi kis'e-la ixti. Nga jye it'aà-ne k'en jè chjoón.

²³ K'e nga tsà kjoaáya-la mik'en, nga itoò 'ndse, ¿yá-né xi chjoón-la koma? Nga jña tsibìtsajnakò nga itoò 'ndse.

24 Kisikátji-ne 'én Jesús, kitsò-là:

—Jñò, koií maskáya-nò nga mìkì 'yaà kó s'ín tíchjǎ Xojon-là Nainá kò nga'ño xi tǐn-là Nainá.

25 K'e nga kjoááya-là mik'en, íchjín, íchjǎ mì tǐ kù kixan-ne. K'oaá s'ín s'e koni jñà àkjǎle xi títsajna ngajmii.

26 Jè kjoá ts'e mik'en nga kjoááya-là, ¿a kje'e bixkejñoò xojon-là Moisés ya ñánda tíchjǎ ts'e yá na'yá xi títi? Nainá kitsò-là Moisés: “An-ná xi Nainá tsò-na Abraham, Isaac, kò Jacob.”

27 Jñà xi jye k'en, mìtsà Nainá tsò-là xi Nainá; tà jñà xi títsajnakon xi Nainá tsò-là! Jñò, 'ño maskáya-nò.

Kjotíxoma-là Nainá xi tǐjna ítjòn

(Mateo 22:34-40)

28 Jngòò xítǎ xi okóya kjotíxoma-là Nainá xi kiskii Moisés kii'nchré-là Jesús nga ndaà kiichjǎ; k'e nga nchijoókjoò ijchò kasit'aà chraña-là, ikjoàn kiskònangui-là, kitsò-là:

—¿Ñá-láá kjotíxoma-là Nainá xi tǐjna ítjòn?

29 Kiichjǎ Jesús, kitsò-là:

—Jè kjotíxoma xi tǐjna ítjòn tsò-né: “Tǐná'yaà xítǎ Israel, jè Nainá xi Na'èn-ná, ta jè ta jngòò-né xi otíxoma-ná.

30 Tǐtsjachi Na'èn-ná xi Nainá 'mì-là, nga kò iníma-lè kò yijo-lè kò kjohítsjeèn-lè kò nga'ño-lè.”

31 Jè xi ma-ne jò: “Tǐtsjachi xítǎ xinguii koni tsà tǐ yijo tsiji-ne.” Mì tǐ tsjìn-ne kjotíxoma xi ìsa xkón tǐn.

32 Jè xítǎ xi okóya kjotíxoma-là Nainá kitsò:

—Ndaà tǐn, Maestro. Okixi-né koni s'ín nokjoi. Jngòò ma-ne Nainá kò mì tǐ yá tǐn-ne xi kje'ejí.

33 Ìsa chjǐ-là nga kò iníma-ná jchaxkoán Nainá, kò kjohítsjeèn-ná kò nga'ño-ná kò nga jchaxkoán xinguiáá koni tsà yijo-ná. Ìsaá chjǐ-là koni ngats'ii cho xi tìsòn ímixǎ tsjeè-là Nainá, kjotjò xi tsjǎ jñà xítǎ.

34 Jesús k'e nga kijtsee nga ndaà kiichjǎ jè xítǎ xi okóya kjotíxoma-là Nainá, kitsò-là:

—Mìtsà kjìnn tǐjni it'aà ts'e kjondaà xi tǐn-là jñà xítǎ xi Nainá otíxoma-là.

Mì tǐ yá xi kjò'ño-ne ikon nga kiskònangui-ìsa-là.

Ñánda kitjen-là Cristo [xítǎ xi xó kisikasén-ne Nainá]

(Mateo 22:41-46; Lucas 20:41-44)

35 Jesús k'e nga tíhokóya ya ndítsin ingo ítjòn, kiskònangui-là, kitsò-là:

—¿Mé-ne kòtsò-ne jñà xítǎ xi okóya kjotíxoma-là Nainá xi kiskii Moisés nga jè xi Cristo, [xítǎ xi xó sǐikasén-ne Nainá], nga yaá kjinchrobàt'aà-ne tje-là xítaxá ítjòn David?

36 Tǐjè-ne David k'e nga kiichjǎ nga kò nga'ño-là Iníma Tsjeè-là Nainá, kitsò-né:

Jè Nainá kitsò-là jè xi Nei-na:

“Tǐjnat'aà-ná i kixi-na

skanda k'e nga sǐkítsajnanguia ndsokoi

jñà xi kondra-lè nga 'an jye kisikijne-là.”

37 Jè David, tsà Nainá kitsò-là Cristo, [xítǎ xi xó sǐikasén-ne Nainá], ¿kó s'ín tǐn-ne nga tje-là ma-ne David?

Ngats'ii xítǎ xi kjìnn ma-ne, tsja ma-là nga 'nchré-là Jesús koni s'ín okóya.

K'e nga jè Jesús tsohojét'in jñà xítǎ xi okóya kjotíxoma-là Nainá xi kiskii Moisés
(Mateo 23:1-36; Lucas 11:37-54; 20:45-47)

³⁸ Jesús k'oaá s'ín tsakóya-la xita. Kitsò-la:

—Tikindaa yijo-nò it'aà ts'e xita xi okóya kjoṭixoma-la Nainá xi kiskiì Moisés. Sasén-la nga nikje ndojò ókjá. Tikoaá sasén-la nga skoexkón xita xi k'ejí, ndaà s̄ixat'aà ya nditsin.

³⁹ Tikoaá jñà ótsji íxile xi jncha ítjòn ya ni'ya ingo sinagoga, ko mejèn-la nga jñà kítat'aà ítjòn ímixa k'e nga kjèn xita ñánda tjin s'eí.

⁴⁰ Koa faá'an ni'ya-la xi tjin-la íchjín ka'àn xi jye k'en x'in-la. K'e nga chjat'aà-la Nainá 'ñó ndajo fiko ochikon nga mejèn-la nga bitsajna'ma nga mì jcha-la mé kjoa xi s'ín. Jñà xita koi isaá tse kjo'in s'e-la.

*Ton xi kitsjaà kjoṭjò chjoón ka'àn xi 'ñó ima
(Lucas 21:1-4)*

⁴¹ Jesús tsibìjna ya kixi-la ñánda tjna kaxa xi sinchá ton kjoṭjò-la Nainá. Tikotsejèn-la xita naxandá nga bitsajna ton kjoṭjò-la Nainá. Kjin xita nchiná xi tse ton bitsajna.

⁴² Ijchò jngoò chjoón ka'àn xi 'ñó ima. Jò ndí ton jtobá tsibìjna xi chiba chjí-la.

⁴³ Jesús kiichja-la xita xi kota'yat'aà-la, kitsò-la:

—K'oaá xan-nò xi nguì okixi, jè chjoón ka'àn xi 'ñó ima, jè xi isa tse ton kòbìjna mì k'oaá-ne koni jñà xita xi i'nga.

⁴⁴ Tà jè tsjá xi ningui-la tanga jè ndí chjoón ima, nas'ín nímé tjin-la, jngoò k'a kàtsjá yije ngats'ì ndí ton xi tjna-la xi tísjchá-ne yijo-la.

13

*K'e nga jè Jesús tsibénojmí nga kixoña ingo ítjòn
(Mateo 24:1-2; Lucas 21:5-6)*

¹ K'e nga itjo-ne nditsin ingo ítjòn, Jesús, jngoò xita xi kota'yat'aà-la kitsò-la: —Maestro, chítsejèn-la mé tà ndaà kjoàn ni'ya ko ndajo-la.

² Kitsò Jesús:

—Chítsejèn-la ngats'ì ni'ya koi xi ì kjoàn. Nì tì jngoò ndajo siyijòsòn-la xíkjin. Kixoña yije-né kóhotjin.

*Mé seña xi s'e k'e nga nchrohómachraña nga kjoehet'aà isò'nde
(Mateo 24:3-28; Lucas 21:7-24; 17:22-24)*

³ Jesús, k'e nga tjna ya nindoò Yá Olivo ya kixi-la Ingo Ítjòn ts'e Jerusalén, jè Pedro, Jacobo, Juan ko Andrés, ijchò kinchat'aà-la Jesús, kiskònanguit'aàxìn-la kitsò-la:

⁴ —Koatìn-nájen, ¿mé nachrjein-ne nga okoma kjoa koi? ¿Mé seña xi s'e k'e nga jye mejèn kítasòn yije kjoa koi?

⁵ Kiichja Jesús, kitsò-la:

—Tikindaa yijo-nò nga mì yá xita xi skónachan-nò.

⁶ Kjin xita kjoí xi 'ín ts'an s̄ikjeén; k̄itso: “'An-ná xi Cristo, [nga 'aán kisikasén-na Nainá].” Ko kjin xita skónachan-la.

⁷ 'Jñò, k'e nga kiná'ya kjoa ts'e kjojchán nga xki xi ján i'nde tjin, kì tsakjoòn-jèn. Xó k'oaá koma-ne, tanga kj'eè tsà isò'nde tífehet'aà.

⁸ Naxandá skaàn-kjoò xi k'ejí naxandá. Koa xitaxá kojìts'ia nga skaàn-kjoò ko xitaxá xi k'ejí naxandá. Xki xi ján k'oa ch'ón. S'e kjinchrá. S'e kjoasì. Jñà kjoa koi, tà jè xi sa tímats'ia ko kjo'in.

⁹ Ndaà tikindaa yijo-nò nga yaá skinìt'aà-nò nguixkon xitaxá. Siki'oón-nó nga skaàn-ko-nò xita ya ni'ya ingo sinagoga. Kjikò-nò nguixkon xitaxá gobernador ko xitaxá ítjòn, tà koií kjoa-la it'aà ts'an. K'oaá s'ín koma kinókjoa-là 'én xi ts'an.

10 Mochjeén-nè nga ítjòn kòbìsòn 'én ndaà-là Nainá xi kjoa ts'e Cristo nga tíjtsa isò'nde.

11 K'e kijchò nguixkòn xitaxá, kì makájno-nò kós'ín kinókjoaa. Kì níkítsejèn-jèn. Nga tìk'eé-ne, Nainá tsjá-nò 'én xi kinókjoaa. Nga mìtsà jñò xi kinókjoaa; jè Inima Tsjeè-là Nainá xi kichja ngajo-nò.

12 Tjè-ne 'ndse sìngatsja 'ndse xita nga sìk'en. Jè na'èn-là sìngatsja ki'ndí-là nga sìk'en xita. Jñà ìxti-là sìngatsja na'èn-là nga kiyá.

13 Ngats'ìi xita isò'nde kojtikeyè-nò xi kjoa ts'an; tanga jè xi kichikjoa-là skanda k'e nga kjoehet'aà-ne kjoa, jè xi kitjokajjìn kjo'in.

14 'K'e nga jchaa nga 'ñó ch'o tíma ya I'nde Tsjeè-là Nainá ñánda mìkìi ok'in-là, [koni s'ín kiskìi Daniel xita xi kichja ngajo-là Nainá]. (Kátasijjìn-là jñà xita xi bixke xojon jé.) K'e nga okoma kjoa koi, jñà xita xi títsajna Judea, kátanga, kàtji ñánda nindoò choòn.

15 Jè xi tíjnasò'nga ni'ya-là, kì tì kii nchrobájen-ne, kì tì kii fahas'en-ne ni'ya-là tsà mé xi mejèn-là nga skoé.

16 Jè xi tísíxájjìn nangui-là kì tì kii nchrobá-ne nga nchrohókjá níkje-là.

17 jima xó-ne jñà íchjín xi ki'ndí 'ya kò xi ìxti xó nchisíkaki jñà nàchrjein koi!

18 Tjjet'aà-là Nainá nga mì k'eé okoma k'e nga nàchrjein-là chon 'nchán.

19 K'e nga jè nàchrjein nga okoma, 'ñó tse kjo'in s'e, kj'eè ñá oma skanda tjen-ne tsibíndaà isò'nde Nainá koa mì tì kii okoma-ne nga koma iskan.

20 Tsà mì k'oaá kitsò Nainá nga isa kochiba nàchrjein, nijngoò xita kitjokajjìn kjo'in. Tanga koi kjoa-là jñà xita xi xó jaàjjìn-ne Nainá, kochibaya nàchrjein.

21 'K'e nga tsà yá xi kitsò-nò: “Chítsejèn-là, jí tíjna Cristo [xita xi xó kisikasén-ne Nainá]”, o tsà kitsò-nò: “Chítsejèn-là, ján tíjna ján”, kì kii mokjeiín-nò.

22 Kjoíi xita ndiso xi Cristo kitsò-là yijo-là, tikoáá kjoíi xita xi koa ti kitsò nga jñà xi chja ngajo-là Nainá. K'oaá tís'ín kokò seña kò kjoxkón xi ndaà tíjìn nga skónachan. Skanda jñà xita xi jye jaàjjìn Nainá mejèn skónachan-là tsà kokjeiín-là.

23 Tìkindaa yijo-nò. Nga jyeé tibenojmiya yije-nò ngats'ìi kjoa xi koma iskan.

*K'e nga kjoíi ijngoò k'a Ki'ndí-là Xita
(Mateo 24:29-35, 42-44; Lucas 21:25-36)*

24 'K'e nga koma iskan nga jye koto nàchrjein ts'e kjo'in, jè ts'oi kojñò-né, mì tì kii kotsjè-ne ndobá-là; tikoáá jè sá mì tì kii kohiseèn-ne.

25 Ni'ño xi tíjìn ngajmiì, kixongui-né. Jñà nga'ño xi tíjìn ngajmiì kitija yijeé-là.

26 Ikjoàn skoe-na xita xi Ki'ndí-là Xita xan-là yijo-na nga kjinchrobàjñàà ijjìn ifi; tseé nga'ño kò kjoajeya kjoikoaa.

27 Sìikasén àkjale-na nga koiixkóya xita-na xi 'an xó jaàjjìn-na nga ñijòn chrjangui-là nga tíjtsa isò'nde kò nga tíjtsa ngajmiì.

28 'Chíta'yàkòò jè yá-là toò iko mé xi okóya-ná; k'e nga ma kíndiya chrja-là, ikjoàn bíjts'én xka-là, tíjìn-nò nga jye nchrobá machraña chon ndobá.

29 K'oaá tís'ín tíjìn, k'e nga jchaa nga k'oas'ín tíma kjoa koi, kátasijjìn-nò nga 'an xi Ki'ndí-là Xita xan-là yijo-na, jyeé nìton kjoiaa, k'oaá ngaya-là koni tsà jye tíjnaa chraña xotjoa-là ni'ya.

30 Okixíi xi xan-nò, ngats'ìi kjoa koi, k'oas'ín koma k'e nga tìkj'eè biyaà xita xi tíjìn nàchrjein j'ndeì.

31 Jè ngajmiì kò isò'nde kjoehet'aà-né, tanga jñà 'én-na mìkìi kjoehet'aà; kítasòn-né.

³² Tanga k'e nga okoma, mi yá xi tjiin-la mé nachrjein-ne ko mé hora-ne; ni jña àkjale xi títajna ngajmii ko ni jè Ki'ndí-la Nainá tjiin-la; tajngoò Nainá xi Na'èn-ná tjiin-la.

³³ T'een kinda yijo-nò, títajnakon, títisi'ba nga mikii tjiin-nò kjé-né nga okoma.

³⁴ K'oaá s'in t'een koni s'in chi'nda-la xita xi kjiin i'nde tifi, jè xita xi tifi síngatsja ni'ya-la xita chi'nda-la. Tsja-la xá nga òjngoò òjngoò, tsò-la jè xi síkinda xotjoa ni'ya: "Tijni, tijnakoin."

³⁵ K'oaá s'in títajnaokòn ngats'ioò nga mikii 'yaá mé nachrjein kjoí-ne nei-la ni'ya. ¿A k'ée-né nga kjòhoxòn, o xi k'ée-né nga kijchò osen nitjen, o xi k'ée-né nga skindàya kóxtí, o xi k'ée-né nga jye s'e isén?

³⁶ Kì tsjayijòfè-jèn tsà koi nachrjein-la tà niton j'ii-ne nei-la ni'ya.

³⁷ Koni s'in xan-nò jñò, k'oaá xan yije-la kòhotjin xita: "Títajnaokòn."

14

Kiis'in tsajooya-ne xita kondra-la Jesús nga tsoqa'ño (Mateo 26:1-5; Lucas 22:1-2; Juan 11:45-53)

¹ Tà jò nachrjein chija-la nga kitjo s'eí Paxko ts'e xita judío k'e nga kjèn inchrajín xi tsjin-la na'yo san. Jña xita sko-la no'mii ko xita xi okóya kjotixoma-la Nainá xi kiskii Moisés tsohótsji'nde-la kós'in sílko nga skónachan-la nga tsoqa'ño Jesús, ikjoàn sík'en.

² Tjin i'nga xita xi kitsò:

—Mì nachrjein-la s'eí sík'eén nga mì kots'en jña xita naxandá.

Jngoò chjoón xi kisikaajno xkii jne sko Jesús (Mateo 26:6-13; Juan 12:1-8)

³ Jesús, k'e nga tjina ján naxandá Betania, ya ni'ya-la Simón, jngoò xita xi tsindojno chrjoa yijo-la nga sa ítjòn, k'e nga tijnat'aà ímíxa, ijchò jngoò chjoón xi 'ya jngoò ndajo chitsín xi tjíya-la xkii jne ts'e nardo, xi 'ño chjí-la. Kiskíx'a ndajo chitsín, ikjoàn tsibíxteèn-jno sko Jesús jè xkii jne.

⁴ Tjin i'nga xita xi ya títajna, kòjti-la, kitsò-la xíkjín:

—¿Mé-ne kasíkits'ón-ne jè xkii jne?

⁵ Tsà kàsatjna, tsatoó-la jàn sìndò ton denario chjí-la koa jè ton-la koma kochját'aà-la xita ima.

Kiichajno-la jè chjoón xi okis'iin.

⁶ Tanga kitsò Jesús:

—Kì k'oaá 'mì-là. ¿Mé-ne nìjti-là? Koni s'in kàs'in-ko-na, ndaà kàs'in.

⁷ Jña xita ima kítajnaoko kjit'aà-nò, ko maá síchját'aà-là k'e nga mejèn-nò. Tanga 'an, mi i tijnako kjit'aà-nò.

⁸ Jè chjoón jè, k'oaá s'in kàs'in koni kji ma xi kàs'in. Kàsikaajno ítjòn xkii jne yijo-na xi ts'e nga síjñaà.

⁹ Okixii xi xan-nò, nita ñánda-ne nga tíjtsa isò'nde nga kobísòn 'én ndaà-la Nainá, tikoá kobísòn-né koni s'in kasíko-na mé-ne nga síkítsjeèn-ne xita it'aà ts'e chjoón jè.

K'e nga jè Judas tsatjna Jesús (Mateo 26:14-16; Lucas 22:3-6)

¹⁰ Jè Judas Iscariote xi ya itjojin-ne ts'e xita xi tejò ma-ne xi tsajmeiiko Jesús, kiikon jña xita sko-la no'mii nga síngatsja Jesús.

¹¹ Jña xita sko-la no'mii, k'e nga kiinchré, kjòtsja-la, kitsjaà-la tso'ba nga ton tsja-la. Jè Judas tsohótsji'nde-la kós'in síngatsja Jesús.

*K'e nga jè Jesús tsakjèn kò xità xi kota'yàt'aà-là jè s'eí Paxko
(Mateo 26:17-29; Lucas 22:7-23; Juan 13:21-30; 1 Corintios 11:23-26)*

¹² Jè nàchrjein ts'e s'eí xi mats'ia íjtòn-ne k'e nga kjèn inchrájin xi tsjin-là ná'yo san jñà xità judío, k'e nga sík'en orrè xi ts'e s'eí Paxko, jñà xità xi kota'yàt'aà-là Jesús kiskònangui-là; kitsò-là:

—¿Ñánda mejèn-lè onguíkindaà-jen xi kichiaá ts'e s'eí Paxko?

¹³ Jesús kisikasén jò xità xi kota'yàt'aà-là ján Jerusalén, kitsò-là:

—Tanguió ján ijìin naxandá, yaá skajñoò jngoò xità xi 'yajen jngoò nisa nandá; tanguítjngui-là.

¹⁴ Ya ñánda kjoahas'en, koatìn-là nei-là ni'ya: “K'oaá tsò Maestro: ¿Ñánda tíjna jè cuarto ñánda kókjen-koaa xità xi kota'yàt'aà-na jè s'eí Paxko?”

¹⁵ Yaá kòkò jngoò-nò cuarto xi je kji xi tíjna isò'nga ni'ya. Jyee tíjndaà tsojmì xi kochjeén. Ya tindaà xi kichiaá.

¹⁶ Kii jñà xità xi kota'yàt'aà-là ján ijìin naxandá. K'oaá s'ín kisakò-là koni s'ín kitsò-là Jesús, yaá tsibíndaà tsojmì xi kókjen kjoa ts'e s'eí Paxko.

¹⁷ K'e nga jye kòjñò, Jesús, ijchòkò xità-là xi tejò ma-ne.

¹⁸ K'e nga títsajnat'aà ímixa nga nchikjèn, Jesús kitsò-là:

—Okixíí xi xan-nò, jñò, íí tíjnajìin jngoò-nò xi sìngatsja-na it'aà ts'e xità kondra-na, jngoò xi 'an tíkjèn-ko-na.

¹⁹ Jñà xità xi kota'yàt'aà-là Jesús ta kjòba-là k'e nga okitsò. K'ée jngó jngó kiskònangui-là, kitsò-là:

—¿A 'an-ná?

²⁰ Jesús kitsò:

—Jngoò xi kitjokàjìin ts'e xità-na xi tejò ma-ne jè xi tíjè-ne chroba ts'an tísíka'nchi-ne inchrájin-là.

²¹ 'An xi Kí'ndí-là Xità xan-là yijo-na, k'oaá s'ín komat'ian koni s'ín tíchja Xojon-là Nainá. Tanga imà xó-ne jè xità xi sìngatsja-na! Ísaá-là ndaà komà tsà mìkii kits'ìin xità jè.

²² K'e nga nchikjèn, Jesús kiskoé inchrájin, kùchjat'aà-là Nainá nga kisichikon-t'in, kisìkkoaya ikjoàn kitsjaà-là xità xi kota'yàt'aà-là, kitsò-là:

—Chjoé. Yijo-na né.

²³ Ikjoàn kiskoé jngoò chitsín, kitsjaà-là kjondaà Nainá; k'ée kitsjaà-là xità xi kota'yàt'aà-là, ngats'ii xità kits'ii vino xi tíjya chitsín.

²⁴ Kitsò-là:

—Jè-né xi jní-na xi sìkixiya jè kjoa xitse xi bìndaajìin-ko-nò. Jè jní-na xìixteèn xi kjondaà ts'e nga kjin xità.

²⁵ Okixíí xi xan-nò, mì tí kii skì-na vino skanda jè nàchrjein k'e nga skiaa vino xitse, ján ñánda tíhotíxoma Nainá.

*'Én xi kùchja Jesús nga jè Pedro kjó'mat'in
(Mateo 26:30-35; Lucas 22:31-34; Juan 13:36-38)*

²⁶ Jesús kò xità-là, k'e nga jye kiseè jngoò-là sò Nainá ts'e Salmo, ikjoàn kii ján nindoò Yá Olivo.

²⁷ Jesús kitsò-là xità xi kota'yàt'aà-là:

—Ngats'ioò jñò, kijneí takòn-ná jè nítjen jè, nga k'oaá s'ín tíchja Xojon-là Nainá, nga tsò: “Kiyá jè paxtò koa jñà orrè tsjohoya-né.”

²⁸ Tanga koma iskan, k'e nga kjoaáya-na, kjín íjtòn-nò ján nangui Galilea.

²⁹ Kitsò Pedro:

—Nas'ín ngats'ii xità-lè xi i'nga tsjeiìn takòn-lè, 'an, mìkii tsjeiìn-takòn-lè.

³⁰ Jesús kitsò-là:

—Okixí xi xan-lè; n̄tjen jé, k'e nga t̄ikj'e'e kjindáya jò k'a kóxtí, ngaji, jàn k'a tsjá'mat'in-ná.

³¹ Jè Pedro ìsa 'ñó kiichja; kitsò:

—Nas'ín ya kiyáko-lè, mìkiì kójna'mat'in-lè.

Ngásòn kitsò yije x̄ita xi kota'yàt'aà-la xi i'nga.

*Kii kitsò Jesús nga tsibítsi'ba ya i'nde ñánda 'mì Getsemani
(Mateo 26:36-46; Lucas 22:39-46)*

³² Kii ján i'nde ñánda 'mì Getsemani; Jesús kitsò-la x̄ita xi kota'yàt'aà-la:

—T̄itsajna ijndé; 'an, Nainá kò-la kichj̄at'aà-la.

³³ Jesús kiikò Pedro, Jacobo, kò Juan. Ikjoàn tsibítsi'ia Jesús nga ba koma-la. 'Ñó kisikájno.

³⁴ K'e kitsò Jesús:

—Tsí baá ma-la in̄ima-na koni tsà mejèn kiyá. T̄itsajna ijndé, t̄itsajnaakoòn.

³⁵ Jesús kiikjá chiba-isa. Ikjoàn tsohojna skanda it'aà nangui koa kisijét'aà-la Nainá tsà koma, kjoáxìn-la kjo'in jè.

³⁶ K'e nga t̄ichj̄at'aà-la Nainá, kitsò-la:

—Na'èn xi Na'èn-na xan-lè, ma yijeé-lè n̄ita mé kjoa-ne it'aà tsiji. Chj̄aàxìn-ná kjoa ts'e kjo'in jè, t̄anga mìtsà jè 'én ts'an k̄itasòn, jè k̄atitasòn 'én tsiji.

³⁷ Ikjoàn j'ì ìjngò k'a-ne ya ñánda t̄itsajna x̄ita-la, t̄anga j̄nà x̄ita-la, kjiy-ijòfè-né. Jesús kitsò-la Pedro:

—Simón, ¿a t̄itsajnafè-né? ¿A mì kachíkjoa-lè tsà tà jngò hora kòb̄ijnakoin?

³⁸ T̄itsajnaakoòn, t̄ijét'aà-la Nainá mé-ne nga mì s̄ikijne-nò kjoa ts'e jé. Xi okixi, jè in̄ima-nò t̄ijnandaà-né t̄anga jè yijo-nò, indaá t̄jín, tsjìn-la nga'ñó.

³⁹ Jesús kiì k̄itsi'ba ìjngò k'a. Táko k'oaá t̄i kitsò-ne koni kitsò nga s̄a ítjòn.

⁴⁰ K'e nga j'ì ìjngò k'a-ne, j̄nà x̄ita xi kota'yàt'aà-la, táko kjiyijòfè-né nga 'ñó nijñá-la. Mikiì beè kó k̄itso-la Jesús.

⁴¹ Koma jàn k'a nga j'ì Jesús. Kitsò-la:

—¿A táko t̄itsan̄ikjáya-nò kò t̄itsafè-nò? K̄atje kjoa. Jyeé ijchò hora-la, 'an xi Ki'ndí-la X̄ita xan-la yijo-na, yaá kongatsja j̄nà x̄ita jé.

⁴² T̄isítj̄een, ch̄itsej̄en-là, t̄ikjiaán, jye nchrobá chrañà jè xi s̄ìngatsja-na.

*Kii komà k'e nga kindobà'ñó Jesús
(Mateo 26:47-56; Lucas 22:47-53; Juan 18:2-11)*

⁴³ Táko t̄ik'e'e t̄ichja-isa Jesús nga ijchò Judas, xi ya itjojiìn-ne ts'e x̄ita-la Jesús xi tejò ma-ne. K̄jìn x̄ita t̄jiko xi 'ya k̄ich̄a ndojò kò yá. X̄ita koi, j̄nà kisikasén x̄ita skò-la no'miì kò x̄ita xi okóya k̄jot̄ixoma-la Nainá xi kiskii Moisés kò x̄ita jchínga-la x̄ita judío.

⁴⁴ Judas, jè xi tsat̄jna Jesús, ítjòn tsibíhichiya-la kós'ín kòkò-la Jesús. Kitsò-la:

—Jè xi skíne'a, jè-né xi t̄indoba'ñó; ndaà t̄ikinda k'e nga onguíkoo.

⁴⁵ K'e nga ijchò Judas, kiì ndiyá-né ñánda t̄jna Jesús, kitsò-la:

—Maestro.

Ikjoàn kiskine'a.

⁴⁶ J̄nà x̄ita xi t̄jiko, n̄itoón kitsobà'ñó Jesús.

⁴⁷ Yaá t̄jna jngò x̄ita xi tsachrje k̄ich̄a ndojò-la. Tsajá-la jè x̄ita ch̄i'nda-la no'miì ítjòn, tsatet'aà jngò líká-la.

⁴⁸ Jesús kiichja, kitsò-la j̄nà x̄ita:

—¿Mé-ne kòs'ín kof'i ndobà'ñó-ná nga kò k̄ich̄a kò yá kich'à koni tsà jngò x̄ita chijé?

⁴⁹ Nachrjein nchijòn t̄jnakò-nò ján ingo ítjòn nga okoòya-nò koa mìkiì kindobà'ñó-ná. Koií k'oaá s'ín tíma-ne nga k̄itasòn 'én xi t̄jít'aà Xojon-la Nainá.

⁵⁰ Ngats'ìi x̄it̄a xi kota'yàt'aà-l̄a Jesús tsanga-né, yaá kitsjeiìn-takòn.

⁵¹ Jngoò chíti t̄j̄ngui-l̄a xi t̄j̄najté jngoò nikje sávana. J̄ñà x̄it̄a kitsobà'ñó,

⁵² t̄anga jè chíti kitsjeiìn nikje sávana-l̄a; ìkjoàn k'oas'ín tsanga laká.

K'e nga kiiko Jesús ñánda t̄jna no'miì ít̄jòn

(Mateo 26:57-68; Lucas 22:54-55, 63-71; Juan 18:12-14, 19-24)

⁵³ Jesús kiiko ñánda t̄jna no'miì ít̄jòn. Yaá chixoña kóhot̄j̄n x̄it̄a sko-l̄a no'miì, j̄ñà x̄it̄a jchínga, k̄o xi okóya kjotixoma-l̄a Nainá xi kiskii Moisés.

⁵⁴ Jè Pedro, tà k̄jiìn tà k̄jiìn tsajmeèt̄j̄ngui-l̄a skanda k'e nga ijchò ya nditsin ni'ya-l̄a no'miì ít̄jòn. Yaá tsibíjnat'aà-l̄a ñánda títsajna x̄it̄a chí'nda xi síkinda ingo nga títsajna'ngui.

⁵⁵ J̄ñà x̄it̄a sko-l̄a no'miì k̄o ngats'ìi x̄it̄axá xi ts'e x̄it̄a judío tsohótsji'nde-l̄a nga tsját'in 'én xi kondra ts'e Jesús mé-ne nga koma s̄iik'en-ne t̄anga nímé 'én kisakò-l̄a.

⁵⁶ K̄jìn ma x̄it̄a xi tsját'in 'én ndiso xi kondra ts'e Jesús t̄anga k'ej̄eí tsò nga jngoò ìjngoò; mìkii mangásòn 'én xi tsját'in.

⁵⁷ Chíncha kixi i'nga x̄it̄a xi tsibénojmi'én ndiso. Kitsò:

⁵⁸ —Ngajen, kina'yà-lajen nga tsò: “An siikixoña ingo ít̄jòn xi tsja x̄it̄a kisindaà-ne, k̄o jàn nachrjein k̄indaà ìjngoò-na xi mìtsà tsja x̄it̄a sindaà-ne.”

⁵⁹ Ni mìkii kjòngásòn 'én-l̄a nas'ín okitsò.

⁶⁰ K'eé tsasítjen jè no'miì ít̄jòn; tsasíjnajiìn osen-l̄a; kiskònangui-l̄a Jesús, kitsò-l̄a:

—¿A nì mé 'én nokjoi, koni tsò 'én xi tsjá x̄it̄a koi xi kondra tsjji?

⁶¹ T̄anga jè Jesús jyò tsibijna, nímé 'én kiichja. Jè no'miì ít̄jòn ìjngoò k'a kiskònangui-l̄a, kitsò-l̄a:

—¿A j̄i-né xi Cristo, xi Ki'ndí-l̄a Nainá xi 'ñó jeya t̄jna?

⁶² Jesús kitsò:

—An-ná, j̄ñò jcha-ná xi Ki'ndí-l̄a X̄it̄a xan-l̄a yijo-na nga kótijnat'aà chrja kixi-l̄a Nainá xi 'ñó tse nga'ñó t̄j̄n-l̄a, koa kjinchrobaj̄ñaà ifi ján ngajmiì.

⁶³ Jè no'miì ít̄jòn tsatijndajno yijo-l̄a nikje-l̄a xi íkjá nga 'ñó kòjti-l̄a. Kitsò:

—¿Mé s'eén-isa-ná x̄it̄a xi k'ej̄eí xi tsjá 'én?

⁶⁴ J̄ñá, jye titsana'yà koni s'ín chjajno-l̄a Nainá. ¿J̄ñò, kó bixón? ¿Mé xi s̄ikoaá?

Ngats'ìi x̄it̄a kisijngoò ikon nga t̄j̄n-l̄a jé koa ok'ín-l̄a nga kijá.

—Ok'ín-l̄a nga s̄ik'en.

⁶⁵ J̄ñà x̄it̄a tsibíts'ia nga tsibíchrájno koa tsibíchjoà xkon, tsi'beé-l̄a, kitsò-l̄a:

—K'oaá si, ¿yá xi tí'beé-lè?

J̄ñà x̄it̄a xi síkinda ingo, kisijts'iìn-'a isén-l̄a.

K'e nga jè Pedro tsibijna'mat'in Jesús

(Mateo 26:69-75; Lucas 22:56-62; Juan 18:15-18, 25-29)

⁶⁶ Jè Pedro yaá t̄jna kangui nditsin ni'ya. Ijchò jngoò chjoón xi chí'nda-l̄a no'miì ít̄jòn.

⁶⁷ K'e nga kijtseè Pedro, nga t̄jna'ngui, kiskoòtsejèn-jno, kitsò-l̄a:

—T̄ikoaá ngaji, yaá tjaàkoi Jesús xi Nazaret i'nde-l̄a.

⁶⁸ T̄anga jè Pedro tsoho'mat'in-né. Kitsò:

—Mìkii bexkoan. Mìkii be mé 'én xi tinokjoi.

Pedro itjo ni'ya ján xotjoa-l̄a. K'eé kiskindàya jngoò kóxtí.

⁶⁹ Jè chjoón chí'nda-l̄a no'miì ít̄jòn kijtseè ìjngoò k'a jè Pedro. Kitsò-l̄a j̄ñà x̄it̄a xi ya títsajna:

—Jè x̄it̄a jè, x̄it̄a ts'eé Jesús.

⁷⁰ Tanga jè Pedro tsoho'mat'in ìjngoò k'a. Nga koma iskan, jñà xita xi ya títsajna, ìjngoò k'a kitsò-la Pedro:

—Xi okixi, ngaji, xita-la Jesús-né nga Galilea ì'nde-lè, k'oaá tsò 'én-lè xi nokjoi.

⁷¹ Tanga isaá 'ñó kiichja Pedro kitsò:

—iBeè Nainá, nas'ín tik'eèn-ná, mìkii bexkoan jè xita xi o'mi-là!

⁷² Tik'e-ne nga okitsò Pedro, jè xi ma-ne jò k'a kiskindàya kóxtí. K'ée tsibítseèn-la Pedro koni kitsò-la Jesús: “K'e tikj'eè kjindàya jò k'a kóxtí, ngaji, jàn k'a tsjá'mat'in-ná.” Ikjoàn ndaà jchán kiskindàya.

15

Kjoa xi komàt'in Jesús k'e nga kjòngatsja Pilato

(Mateo 27:1-2, 11-14; Lucas 23:1-5; Juan 18:28-38)

¹ K'e nga kis'e isén jñà xita sko-la no'mii ko xita jchinga ko xita xi okóya kjotíxoma-la Nainá xi kiskii Moisés ko ngats'ii xitaxá ts'e xita judío tsajoóya-ne. Tsibít'aà'ñó Jesús, kiiko, kisingatsja jè Pilato.

² Jè Pilato kiskònangui-la, kitsò-la:

—¿A ji-né xi xitaxá ítjòn-la jñà xita judío?

Jesús kitsò:

—Ngajii xi k'oa si nga 'an-ná.

³ Tanga jñà xita sko-la no'mii, kjin skaya 'én tjín-ne xi tsját'in nga óngui.

⁴ Pilato ìjngoò k'a kiskònangui-la, kitsò-la:

—¿A nimé 'én nokjoi? Tiná'yaà-la, 'ñó kjin skaya kjoa tsját'in-lè nga óngui-lè.

⁵ Jesús mìkii kiichja nas'ín koa tí'mi-la. Pilato, tà k'oaá komà-la.

K'e nga jè Jesús kitjoònè kjoa nga kiyá

(Mateo 27:15-31; Lucas 23:13-25; Juan 18:38-19:16)

⁶ Nga xki nó k'e nga bitjo s'eí Paxko jè Pilato síkijnandeí ìjngoò xita xi títsa'ya ndayá, jè xi síjé xita naxandá nga kijnandeí.

⁷ Jñà xita xi títsa'ya ndayá nga kjoasi tsohótsji ts'e gobierno, ya tjina xi 'mi Barrabás xi xita kisik'en.

⁸ Jñà xita naxandá kiikáko Pilato nga mejèn-la koa s'ín síkitasòn koni ma nga xki nó.

⁹ Kiichja Pilato, kitsò:

—¿A mejèn-nò nga siikijnandeí-nò xi xitaxá ítjòn-la xita judío?

¹⁰ Pilato jye tjijin-la nga tà kjoaxitakòn-né nga jñà xita sko-la no'mii ya ijchò síngatsja Jesús.

¹¹ Jñà xita sko-la no'mii chinchá'a xita naxandá nga kos'ín kàtasíjé nga kàtijnandeí-ne Barrabás.

¹² Pilato ìjngoò k'a kiskònangui-la xita naxandá, kitsò-la:

—¿Mé xi sikoáá jè xi 'mi-là xitaxá ítjòn-la xita judío?

¹³ Jñà xita, 'ñó kiichja, kitsò:

—Tasit'ii krò.

¹⁴ K'ée kitsò Pilato:

—¿Mé jé xi tsohótsji, mé-ne kiyá-ne?

Jñà xita, isaá 'ñó kiichja, kitsò:

—Tasit'ii krò.

¹⁵ Pilato mejèn-la nga ndaà kijnako xita naxandá. Kisikijnandeí Barrabás. K'e nga jye kitsjaà okixi nga tsaja-la Jesús, ikjoàn kisingatsja nga sít'aà krò.

¹⁶ Jñà soldado kiiko Jesús ján ni'ya osen. Ikjoàn kiichja yije-la soldado xíjín.

¹⁷ Kisikákjá ìjngoò nikje xi inì jmà kji; tsibí'a sko ìjngoò corona na'ya xi jñà xó tsibíndaà-ne.

18 *Ikjoàn tsibíts'ia* nga kiskindàyat'in. Kitsò-la:

—Viva *xitaxá ítjòn-la xita* judío.

19 Tsatji yá *xkajnchra sko*; *ikjoàn tsibíchrájno* koa *chinha-xkó'nchit'aà-la* koni tsà *nchibeèxkón*.

20 K'e nga jye *kisísobà-la*, *jaàxìn-la* nikje sko xi *íkjá*, *ikjoàn kisikákjá-ne* xi nikje ts'e. K'eé itjoko nga *kosit'aà krò*.

K'e nga kisit'aà krò Jesús

(Mateo 27:32-44; Lucas 23:26-43; Juan 19:17-27)

21 Jngoò *xita* *kisatiikjoò* xi 'mì *Simón* xi *Cirene* *i'nde-la* xi *tínchrobá-ne* *ranchò-la*. Na'èn-laá ma jè *Alejandro* ko *Rufo*. Jñà *soldado* *kjo'ño* *kis'iin-la* nga *kisik'ajen* *krò-la* *Jesús*.

22 Kiiko *Jesús* *ján* *i'nde ñánda* 'mì *Gólgota*, jè 'én xi *tsòya-ne* *i'nde* *sko* *mik'en*.

23 *Kitsjaà-la* *vino* xi *tsjájin* *xich'a* *tsja* xi 'mì *mirra* *tanga* jè *Jesús* *miki* *kits'iì*.

24 K'eé *tsasit'aà krò*, *ikjoàn* *jñà* *soldado* *kisiskáko* *nikje-la* *Jesús* nga *kisika'bí-la* *xíjín* yá *ts'e* *koma*.

25 *Ijchò-la* tsà xi *ñijaàn* nga *tajño* nga *kisasit'aà krò* *Jesús*.

26 Jñà 'én xi *tsohót'aà isòn* *sko* *krò*, *yáá* *tíchja* *mé* *jé* xi *komà-la* *Jesús* nga *kinik'en*. Tsò-né: “*Xitaxá ítjòn-la xita* judío.”

27 *Tikoáá* *chinchat'aà krò* jò *xita* *chijé*. Jngoò *tsasíjnat'aà* nga *kixi-la* *Jesús* ko *jngoò* *tsasíjnat'aà* nga *ngaskón-la*.

28 K'oaá s'ín *kjòngàsòn* koni s'ín *tíchja* *Xojòn-la* *Nainá* nga tsò: “K'oaá *ngaya-la* koni *jngoò xita* xi *tse* *jé* *tjín-la*.”

29 Jñà *xita* xi *yá* *ja*, *sikatji* *sko* nga *kiichjajno-la*, *kitsò-la*:

—*Ji*, *k'oaá* *kisi* nga *sixòñi* *ingo* *ítjòn-la* *Nainá* ko *jàn* *nachrjein* *kíndaà* *ngajo-ne*,

30 *tikíjnandejí* *yijo-lè* ko *chínájen-t'i* *yijo-lè* *krò*.

31 K'oaá *tis'ín* *kisísobà-la* *jñà* *xita* *sko-la* *no'mi* ko *xita* xi *okóya* *kjotíxoma-la* *Nainá* xi *kisiki* *Moisés*. *Kitsò-la* *xíjín*:

—*Xita* jè, *tsachrekàjin* *kjo'in* xi *kje'ei* *xita*, *tanga* jè xi *yijo-la*, *miki* ma *ochrekàjin* *kjo'in*.

32 *Kàitjopen-t'aà* *krò* jè xi *Cristo*, xi *Xitaxá ítjòn-la* *naxandá* *Israel*, *mé-ne* nga *jcha-ná* koa *kokjeiín-ná*.

Skanda *jñà* *xita* xi *tikoá* *yá* *kjit'aà* *krò*, *tikoáá* *tsatít'aà*.

K'e nga k'en Jesús

(Mateo 27:45-56; Lucas 23:44-49; Juan 19:28-30)

33 K'e nga *ijchò* *nchisen*, *kóhokji* nga *tíjtsa* *isò'nde* *kòjño* *skanda* xi *jàn* nga *nguixòn*.

34 *Tijè-ne* *hora* *Jesús* 'ño *kiichja* nga *kitsò*:

—*Eloi*, *Eloi*, ¿*lama* *sabactani*? —'Én jè *tsòya-ne*: *Nainá*, *Nainá*, ¿*mé-ne* *kàjneitakòn-ná*?

35 *Tjín* *i'nga* *xita* xi *yá* *títsajna* xi *kii'nchré-la*, *kitsò*:

—*Tiná*'*yaà-là*, jè *chja-la* *Elías*.

36 K'eé *tsangachikon* *jngoò* xi *kisika'nchi* *tsanga* ko *vinagre*, *ikjoàn* *tsibísko-la* *inaxo*, *kitsjaà-la* *Jesús* nga *kàt'i*, *kitsò*:

—*Chítsejèn-là*, ¿*a* *kjoji* *Elías* nga *skónájen-t'aà* *krò*?

37 *Tanga* *Jesús* *isaá* 'ño *kiskindàya*; *k'en*.

38 Jè *nikje* *velo* xi *tjohóya* *jngoò* *osen* *ingo* *ítjòn* *kixajndà*, *jòya* *koma* *skanda* *it'aà* *nangui*.

39 Jè *xita* *sko-la* *soldado* xi *síjna* *ñánda* *kisit'aà* *krò* *Jesús* *k'e* nga *kijtseè* nga *jye* *k'en* *Jesús*, *kitsò*:

—Kixí kjoa, xita jèe, Ki'ndí-la Nainá-né.

⁴⁰ Tíkoá títsajna i'nga íchjín xi kjiìn nchikotsejèn-ne; jè María Magdalena, ko chjoón Salomé, ko María xi nea-la ma José ko Jacobo, jè xi isa ma ki'ndí.

⁴¹ Jñà íchjín koi, k'e nga tsibijna Galilea Jesús, yaá chinchima-tjingui-la ko yaá kischját'aà-la. Kjin ma íchjín xi ya títsajna xi ijchòko ján Jerusalén.

K'e nga kishijìn Jesús

(Mateo 27:57-61; Lucas 23:50-56; Juan 19:38-42)

⁴² K'e nga jye kjònguixòn nga jye bitsajnandaà-la nachrjein nìkjáya.

⁴³ José xi Arimatea i'nde-la, jngoò xita xi tíkoá 'nga xá tjín-la ts'e xitaxá-la xita judío xi tíkoá tíkoña-la nga mejèn-la skoe kó s'ín otíxoma Nainá, kitsjaà-la nga'ño yijo-la, jahas'en ya ni'ya ñánda tjina Pilato nga kisiyé yijo-la Jesús.

⁴⁴ Pilato, tà k'oaá koma-la nga jye k'en Jesús; kiichja-la jè xita sko-la soldado; kiskònangui-la tsà kixi kjoa nga jye k'en.

⁴⁵ K'e nga jye tsibénojmí jè xita sko-la soldado nga jye k'en Jesús, Pilato kisingatsja José yijo-la Jesús.

⁴⁶ José tsatse jngoò nikje sábana; kiskójen-t'aà krò yijo-la Jesús; ikjoàn kiskájté jè nikje. K'éé kii kíhijìn ñánda jye tjíndaà jngoò ngajo itsjó ingui nguijo; kiskinìs'en-ngui, ikjoàn tsohójtsa xotjoa-la ngajo jngoò ndajo.

⁴⁷ María Magdalena ko María nea-la José, nchikotsejèn-la nga kishijìn Jesús.

16

K'e nga jaáya-la Jesús

(Mateo 28:1-10; Lucas 24:1-12; Juan 20:1-10)

¹ K'e nga jye tsato nachrjein nìkjáya, María Magdalena, Salomé, ko María nea-la Jacobo, tsatse xkii jne nga mejèn-la sùikaajno yijo-la Jesús.

² Jè nachrjein nga tàts'en xomàna, 'ño tajñoaya kii katsejèn-la ñánda kishijìn Jesús. Tík'eé tíbitjokàtji ts'oi.

³ Tsò-la xíkjín:

—¿Yá xi kjoaáxìn-ná ndajo xi tíchjoàjto ya xotjoa-la ngajo itsjó?

⁴ K'e nga ijchò, kiskoòtsejèn, kijtseè nga jè ndajo je xi 'ño i'í xi tíchjoàjto-la ngajo itsjó ñánda kisijna Jesús, jye kitjaàxìn.

⁵ K'e nga jahas'en-ngui nguijo kijtseè jngoò xita ixti xi tíjnajté jngoò nikje chroba ndojò. Tíjnat'aà kixi-la ngajo. Jñà íchjín tà kitsakjòn-né.

⁶ Tanga jè xita ixti kitsò-la:

—Kì tsakjoòn-jèn. Jñò, jè binchaàtsjioò Jesús xi Nazaret i'nde-la, jè xi kisit'aà krò. Jye kòfaáya-la. Mì tì i'í tjina-ne. Chítsejèn-là i'nde-la ñánda kisijna.

⁷ Tanguió koatin-là xita xi kota'yàt'aà-la ko Pedro: “Jè tífi ítjòn-nò ján Galilea. Yaá jchaxkoòn ìjngoò k'a koni s'ín kitsò-nò.”

⁸ Jñà íchjín, itjo nitoón-ne ya iya nguijo. Kii, tsangachikon. Chiba-la nchihotsé-né nga kitsakjòn. Niyá xi tsibénojmí-la nga 'ño tsibíxkón-la yijo-la.

K'e nga jè María Magdalena kijtseè Jesús

(Juan 20:11-18)

⁹ Jè nachrjein nga tàts'en xomàna, Jesús jaáya-la nga tajñoaya. Jè kijtseè ítjòn María Magdalena, jè xi tsachrjekàjìn itoò inima ch'o-la neí inima-la.

¹⁰ María Magdalena kii, kiskí'nchré ngats'ii xita-la Jesús nga ba tjín-la koa nchikjindáya.

¹¹ Jñà xita xi kota'yàt'aà-la, k'e nga kii'nchré nga tíjnakon Jesús nga jè chjoón kijtseè, mìkii kòkjeín-la.

*K'e nga jò x̄ita-là kijtseè Jesús
(Lucas 24:13-35)*

¹² K'e komà iskan, Jesús, kj'eíí kji isén-là k'e nga tsakó-là yijo-là jò x̄ita-là xi nchifi campo.

¹³ Tsohótji-ne jñà x̄ita xi jò ma, kisikí'nchré jñà x̄ita xi i'nga. T̄ikoaá mìkì kòkjeiín-là.

*Kii kitsò Jesús nga kitsjaà-là xá x̄ita xi kota'yàt'aà-là
(Mateo 28:16-20; Lucas 24:36-49; Juan 20:19-23)*

¹⁴ Xi jyehet'aà-ne, Jesús tsakó-là yijo-là jñà x̄ita xi tejngoò ma-ne k'e nga títsajnat'aà ímíxa nga nchikjèn. Tsohótiko nga tájaà t̄jín iníma-là nga mì kòkjeiín-là k'e nga tsibénojímí-là jñà x̄ita xi tsakó ítjòn-là yijo-là nga jè jye jaáya-là.

¹⁵ Koá kitsò-là:

—Tanguió nga tíjtsa isò'nde. Tènojímí yije-là ngats'iì x̄ita jè 'én ndaà-là Nainá xi kjoá ts'an.

¹⁶ Jñà x̄ita xi kòkjeiín-là it'aà ts'an koá koma bautizar, kitjokàjìin kjo'in. Tanga jñà xi mìkì kòkjeiín-là, kjo'íin s'e-là.

¹⁷ Jñà xi kòkjeiín-là it'aà ts'an, k'oaá s'ín jcha-là; nga koma-là kochrjekàjìin iníma ch'o-là neíí xi tíjìin iníma-là x̄ita; t̄ikoaá koma-là kichja 'én xi kj'eíí tsò;

¹⁸ tsà yè tsobà'ñó, tsà xkiì kjan skine, nímé xi koma-là; kohòsòn-là tsja x̄ita xi xk'én, kondaà-ne.

*K'e nga jè Jesús kùmjìin ngajmì
(Lucas 24:50-53)*

¹⁹ K'e nga jye okitsò-là x̄ita xi kota'yàt'aà-là, Na'èn-ná Jesús, kitjámìi'nga; nga kii ngajmì, tsibìjna it'aà kixi-là Nainá.

²⁰ Jñà x̄ita-là kii; kisika'bí 'én ndaà-là nga kijndà i'nde, kò jè Na'èn-ná Jesús kisichjât'aà-là kò kisikixiyandaà 'én-là kò kjondaà xi kis'iin x̄ita-là. K'oaá s'ín kàtama.

'Én ndaà-la Nainá xi kjoa ts'e Cristo koni s'ín kiskii San Lucas

'Én xi kiskii-la Teófilo jè Lucas

¹ Kjoa kixi xi komà jjiin naxandá it'aà ts'e Cristo, jye kjin ma-ne xita xi kiskii chiba

² koni s'ín tsakóya-najen jña xita xi xkon kijtseè-ne skanda tàts'en-la kjoa, tijña-ne xi kis'e-la xá nga kisika'bí 'én ndaà-la Nainá xi kjoa ts'e Cristo.

³ Ngaji Na'èn Teófilo xi 'ño ndeè, tikoáá 'an, ndaà sasén-na nga tikji-lè xojon jè, koni s'ín tjín nga jngoò ijngoò skoya kjoa; ndaà tsohotsji-jñaà yiye skanda tisa tàts'en-la kjoa

⁴ mé-ne nga isa ndaà jcha-ne kjoa kixi xi nguì kos'ín tjín, jña 'én xi k'oas'ín tsakóya-lè xita.

'Én xi kiichja jngoò àkjale-la Nainá nga iskan jts'ín Juan xi kis'iin bautizar xita

⁵ Koi nachrjein k'e nga jè tjina xitaxá ítjòn Herodes ján nangui Judea, tjina jngoò no'miù xi Zacarías 'mì xi tje-la ts'e Abías. Jè Zacarías tjín-la chjoón xi Elisabet 'mì xi tikoá tje-la ts'e Aarón.

⁶ Jña ingajò, xita kixi-né nga nguixkon Nainá. Síkitasòn yiye-né ngats'iì kjotixoma-la Nainá.

⁷ Tsjin-la ixti; jè Elisabet, chjoón 'ndi-né; ingajò, jyeé 'ño xita jchínga.

⁸ Jngoò nachrjein, jña xita no'miù xi síxákjoò Zacarías, jña tsako-la nga kisixá nguixkon Nainá.

⁹ Koni s'ín tjín kjotixoma xi ts'e no'miù Israel, tsako-la suerte Zacarías nga jahas'en ni'ya tsjeè-la Nainá, ya iya ingo ítjòn, nga jè kokà chrjongó-la Nainá.

¹⁰ Jè hora k'e nga tí chrjongó-la Nainá ngats'iì xita naxandá, yaá títsajna nditsin nga nchichjat'aà-la Nainá.

¹¹ Jè Zacarías tsatsejèn jngoò-la àkjale-la Nainá xi síjna kixi ya ngobà kixi-la ñánda tìsòn chrjongó-la Nainá.

¹² Jè Zacarías k'e nga kijtseè, tà kjòxkón-la, tà kitsakjòn-né.

¹³ Tanga jè àkjale-la Nainá kitsò-la:

—Ngaji, Zacarías, kì tsakjoòn-jèn; jè kjoa bìtsi'ba-lè jye kina'yà-la; jè chjoón-lè Elisabet, jts'ín jngoò-la ki'ndí x'in; k'oáá s'ín kít'aà 'ín-la nga Juan k'oín.

¹⁴ 'Nó s'e-lè kjotsja. Koi kjoa-la nga jè ki'ndí xi jts'ín, kjin xita kjotsja-la.

¹⁵ Xita ítjòn kijná nga nguixkon Nainá; mikii xán sk'oí nga xó k'oáá s'ín kitjaàjiiin-ne; Inima Tsjeè-la Nainá sijiin inima-la skanda tik'e-ne nga tisa tjina'ya'ma indso'ba nea-la.

¹⁶ Xi it'aà ts'e, kjin xita naxandá Israel koófat'aà-la Nainá.

¹⁷ Jè kjoí ítjòn-la Na'èn-ná. Sijiin inima-la nga'ño xi kisikjeén jè Elías xita xi kiichja ngajo-la Nainá. Inima-la xita jchínga, 'nchán sijkítsajnakó ixti-la. Jña xita xi tájaàjiiin tjín inima-la nga mikii síkitasòn, sijkjatjya-la kjohitsjeèn-la mé-ne nga s'e-la kjoa chjine xi tjín-la xita kixi. K'oáá s'ín sijkíyijòndaà xita naxandá mé-ne nga kítsajnandaà-ne k'e nga kjoí Na'èn-ná.

¹⁸ Zacarías kitsò-la jè àkjale:

—¿Kó s'ín skoeè-na tsà kixi kjoa? 'An, jye 'ño xita jchínga; tikoáá chjoón-na jye tífehét'aà nachrjein-la.

¹⁹ Jè àkjale kitsò:

—'An-ná Gabriel xi tijn_{na} nguixk_{on} Nainá; kisikasén-na nga kichjàk_o-lè, tsjaà-lè 'én ndaà-la Nainá.

²⁰ I'nde_i, kijna chisín-né, mìkì k_oma k_{in}ókjo_i skanda k'e nga kijchò nàchrjein nga k_{it}asòn 'én koi, koi kjoa-la nga mìkì kòmokjeiín-lè 'én-na xi kàxan-lè.

²¹ Jñà x_{it}a naxandá, nchikoña-la Zacarías. Kjònangui-la xíkjin nga tífichrjein-la nga mìkì xátí bitjo-ne ni'ya tsjeè-la Nainá.

²² K'e nga jye itjo-ne jyeé kjòchisín; mì t_i k_i ma chja-ne; jñà x_{it}a xi nchikoña-la kis'ejiín-la nga tjín kjoa xi kijtseè ya iya ni'ya tsjeè-la Nainá; Zacarías tà jmeé chisín-isa tsja. K'oaá s'ín tsibijna nga mìkì komà k_ichja.

²³ Zacarías, k'e nga jye kisisòn jñà nàchrjein nga kisikitasòn xá-la, k_i-ne ni'ya-la.

²⁴ K'e nga komà iskan, jè chjoón Elisabet, ki'ndí ts'a; 'òn sá mì t_i k_i itjo-ne ni'ya-la. Kitsò:

²⁵ “K'oaá s'ín kisik_o-na jè Nainá xi it'aà ts'an: kijtseè imaá-na nga kitsjaà-na kjondaà-la mé-ne nga mì k_i k_ochrjekàngui-na x_{it}a.”

K_ii komà k'e nga jngò òkjale tsibéojmí nga iskan jts'ín jè Jesús

²⁶ K'e nga ijchò joòn sá, jè àkjale Gabriel, Nainá kisikasén jngò naxandá xi chja-ne Galilea ñánda 'mì Nazaret.

²⁷ K_iikon jngò chjoón xongó xi tjín-ne nga jè k_{ix}an-k_o jngò x_{it}a xi 'mì José xi tje-la ts'e x_{it}axá ítjòn xi k_i'mì David. Jè 'ín-la chjoón xongó, María 'mì.

²⁸ Jè àkjale, k'e nga jahas'en ni'ya nga kijtseèxkon María, kitsò-la:

—iNdaà-lè, ngaji xi j_i kitjoé-lè kjondaà jè! Nainá tínak_o-lè. Ngaji xi ndaà kjòchikon-t'in mì k'oaá-ne koni íchjín xi k_j'eí.

²⁹ Jè María k'e nga kijtseèxkon, tà kjòxkón-la koni s'ín kitsò-la jè àkjale; kisikítsjeèn kó tsòya-ne nga k_os'ín j'ì síhixat'aà-ne.

³⁰ Jè àkjale kitsò-la:

—María, k_i tsakjoòn-jèn, jye kitjoé-lè kjondaà nga nguixk_{on} Nainá.

³¹ I'nde_i koxk'én-né, ki'ndí jcha jngoi. K'oaá s'ín kít'ì 'ín-la nga Jesús k'oín.

³² X_{it}a ítjòn k_oma; Ki'ndí-la Nainá k'oín xi isa 'ñó 'nga tíjna; Nainá, jè s_ingatsja kjotixoma-la. X_{it}axá ítjòn k_ijna koni s'ín tsibijna David xi x_{it}a jchínga-la komà.

³³ Jè kotixoma-la naxandá Israel. K_jotixoma-la mì k_i kjoèhet'aà n_{it}a kjé-ne.

³⁴ Jè María k'eé kitsò-la àkjale:

—¿Kó s'ín k_oma jè kjoa koi? Nga mìtsà x'in tjín-na.

³⁵ Jè àkjale kitsò:

—Jè In_ima Tsjeè-la Nainá k_{it}jojen-nè-lè. Jè nga'ñó-la Nainá xi 'ñó 'nga tíjna koi_itsat'in-lè koni jngò 'nguién-la ifi mé-ne jè ki'ndí tsjeè xi jts'ín, Ki'ndí-la Nainá k'oín.

³⁶ Jè xingui Elisabet xi chjoón 'nd_i, kò joòn sá tjín-la nga ki'ndí 'ya nas'ín jye 'ñó x_{it}a jchínga.

³⁷ Xi it'aà ts'e Nainá, nijngò kjoa xi mìkì k_oma-la —kitsò àkjale.

³⁸ K'eé kitsò María:

—'An-ná xi chjoón ch_i'nda-la Nainá; k'oaá s'ín kátama koni s'ín kò'mì-ná.

Jè àkjale t_inguixk_oón-ne k_i-ne.

K_ii komà k'e nga jè María k_i katsejèn-la Elisabet

³⁹ Nàchrjein koi, jè María n_{it}oón k_i jngò naxandá xi kijna'nchò nindoò ján nangui Judea.

⁴⁰ Jahas'en ni'ya-la Zacarías; kisihixat'aà Elisabet.

41 K'e kii'nchré Elisabet nga kisihixat'aà María, ki'ndí xi 'ya, kiskì'nga iya indso'ba. Jè inima-la Elisabet ndaà kis'ejiin Inima Tsjeè-la Nainá.

42 K'eé 'ño kiichja, kitsò:

—¡Nainá, isaá 'ño ndaà tísichikon-t'in-lè mì k'oaá-ne koni jña íchjín xi kj'eji; tikoáá ki'ndí-lè xi tijnaya indso'boi 'ño ndaà tímachikon-t'in!

43 ¿Yá-ná 'an? ¡Mé tà ndaà kòf'ijichon-ná jì xi nea-la Na'èn-ná!

44 Tik'e-né nga kà'nchrè nga kànihixat'aà-ná, ki'ndí-na kàkjì'ngaya indso'bà nga tsja kòma-la.

45 ¡Mé tà ndaà-lè nga mokjeiin-lè 'én xi kis'enojmí-lè! Jè 'én xi kiichja Nainá kítasòn-né —kitsò Elisabet.

46 Jè María kitsò:

Inima-na 'ño 'nga tísikíjna Nainá.

47 Matsja-na it'aà ts'e Nainá xi ochrjekátjì-na.

48 Kijtseè imaá-na, 'an xi chjoón chí'nda-la ma;

j'ndeji skanda nita kjé-ne k'oaá s'ín kitsò-na xita: “Mé tà ndaá-la.”

49 'Ñó ndaà tse kjoa kisikò-na Nainá, jè, nga isa tse nga'ño tjín-la.

Nainá, xita tsjeè-né.

50 Tjín kjit'aà-la kjohimatakòn it'aà ts'e jña xita xi beèxkón skanda tàts'en-la kjoa nita kjé-ne.

51 K'oaá s'ín okó nga tse nga'ño tjín-la;

jña xita xi 'ño 'nga ikon jjiin inima-la, ochrjekàngui kjohítsjeèn-la.

52 Jña xitaxá ítjòn xi 'nga títsajna, faáxìn kjotíxoma-la,

koa jña xi nangui títsajna, isaá 'nga síkítsajna.

53 Jña xita xi tsjín-la tsojmì xi kine, 'ño kjín tsjá-la,

koa jña xita nchiná, nimé tsjá-la, tà síkasén tiyaá-ne.

54 Nainá síchjít'aà-la naxandá Israel, jña xita chí'nda-la;

mikiì síchàajiin nga tjòkeè Abraham,

55 ngats'ìi tje-la nita mé nachrjein-ne.

Nga Nainá, k'oaá s'ín kitsjaà-la tso'ba jña xita jchínga-ná.

Kitsò María.

56 Jè María, jàn sá tsibijnako Elisabet; k'e komà iskan kii-ne ni'ya-la.

K'e nga kits'iin Juan xi kis'iin bautizar xita

57 K'e nga jye ijchò nachrjein-la, Elisabet, kits'iin jngoò-la ki'ndí x'in.

58 Nainá, 'ño ndaà kisikò. K'e nga kii'nchré xita xikjín kò xita indiì ni'ya-la tikoáá kjòtsja-la.

59 Nga komà jiin nachrjein, kiikò jè ki'ndí nga nguixkòn no'miì, mé-ne nga kisit'aà chiba-la yijo-la kjoa ts'e circuncisión. Jña xita xi kj'eji, k'oaá s'ín mejèn tsibít'aà 'ín koni 'mì na'èn-la nga Zacarías 'mì.

60 Tanga jè nea-la kitsò:

—Majìn, Juan k'oín.

61 Kitsò jña xita xi títsajna:

—¿Mé-ne kòs'ín k'oín-ne? Nijngoò xita xingui xi kòs'ín 'mì 'ín-la.

62 K'eé kitjònangui chisín-la na'èn-la kó k'oín.

63 Zacarías kisijé jngoò iteè nga kiskijno, tsibít'aà: “Juan 'mì 'ín-la.” Ngats'ìi xita xi ya títsajna, tà k'oaá komà-la.

64 Zacarías tik'eé-ne kitáx'a-ne tso'ba kò tsaniyá-ne nijèn, ikjoàn komà kiichja-ne. K'eé kitsjaà-la kjondaà Nainá.

65 Ngats'ìi xita xi títsajna chraña indiì ni'ya-la, tà kjòxkón-la k'e nga kii'nchré nga jye ma kiichja-ne Zacarías. Xki xi ján tsabísòn kjoa koi kóhokji incho nindoò nangui Judea.

66 Ngats'ìi xita xi kii'nchré kjoa koi, tsohóko jjiin inima-la; kitsò:

—Jè ki'ndí, k'e nga kojchínga, ¿yá xitá xi koma?
Nga jè nga'ño-lá Nainá tijnako.

Kii komà k'e nga jè Zacarías kiichja it'aà ts'e Nainá

⁶⁷ Zacarías, na'èn-lá Juan, kisijiin inima-lá Inima Tsjeè-lá Nainá. Kiichja ngajo-lá Nainá, kitsò:

⁶⁸ ¡Mé tà ndaà kji-lá Na'èn-ná jè xi Nainá tsò-lá naxandá Israel nga j'ì kichjítì naxandá-lá tikoá j'ì síkíjnandeií!

⁶⁹ Kitsjaà jngoò-ná xitá xi tse nga'ño tjin-lá nga j'ì kachrjetjì-ná kjo'in xi kjoa ts'e jé-ná,

jè xi tje-lá David xi chi'nda-lá Nainá tsibijna.

⁷⁰ Nainá kisikjeén tso'ba jña xitá tsjeè-lá xi kiichja ngajo-lá.

K'oaá s'ín kitsò nga tisa tàts'en-lá kjoa nga

⁷¹ kochrjekátjì-ná it'aà ts'e xitá kondra-ná,

ko xitá xi jtikeè-ná.

⁷² K'oaá tì kitsò Nainá nga skoe ima jña xitá jchínga-ná.

Mikì sijnchàajijn jè 'én xi kitsjaà-lá xitá jchínga-ná Abraham nga tsibindaajijn-ko jngoò kjoa tsjeè.

⁷³ Nainá, k'oaá s'ín kitsjaà-lá tso'ba Abraham xi xitá jchínga kjiin-ná nga

⁷⁴ sijkítsajnandeií-ná ts'e xitá kondra-ná mé-ne nga mikì kiskoán nga sixá-lá.

⁷⁵ Kjit'aà nachrjein tsjeè kitsajnaá tikoá kixi kitsajnaá nga nguixkon Nainá.

Kitsò Zacarías.

⁷⁶ K'eé kitsò-lá ki'ndí-lá:

Ngaji, sijkjeén-lè Nainá xi 'ño 'nga tina nga kinókjoa ngajo-lá.

Ngajii k'oín ítjòn-lá Na'èn-ná nga kíndii ndiyá-lá.

⁷⁷ Kénajmí-lá naxandá-lá kós'ín s'ín Nainá nga kochrjekátjì-ná jé-ná.

Nainá, 'ño tse kjohimatakòn tjin-lá nga síjchàat'aà-lá jé-lá jña xitá.

⁷⁸ Nainá sijkasén jngoò-ná xi nchrobá-ne ngajmii.

K'e nga kjoii, k'oaá s'ín sijkiseèn-lá xitá koni s'ín mahiseèn k'e nga tajñoya.

⁷⁹ Jña kohiseèn-lá kjohítsjeèn-lá xitá xi i'nde jñò titsajnajijn,

ko xi jye ndiyá kjoa biyaà tjimaya.

Yaá kjiko-ná ndiyá ñánda tjin kjoa'nchán.

Kitsò Zacarías.

⁸⁰ Ki'ndí jè tímajchínga tikoá tís'e-lá nga'ño xi ts'e inima-lá. Yaá tsibijna i'nde it'aà xìn ñánda nangui kixi choòn skanda k'e nga tsibíts'ia nga tsibijna osen-lá naxandá Israel.

2

Kii komà k'e nga kits'iin Jesús

(Mateo 1:18-25)

¹ Koi nachrjein k'e nga tjin-lá xá ítjòn César Augusto tsjachrje jngoò okixi nga ngats'ii xitá naxandá xi otixoma-lá Roma, xojoón sit'aà 'ín-lá.

² Jè xojon censo xi kisindaà ítjòn k'e nga tina gobernador xitá xi 'mì Cirenio ján i'nde ñánda 'mì Siria.

³ Kii yije xitá nga kii kít'aà xojon yijo-lá nga jngoò ijngoò naxandá-lá xi chja-ne.

⁴ José itjo-ne Nazaret, naxandá ts'e Galilea, kii nangui ñánda 'mì Judea ya naxandá Belén ñánda kits'iin xitá ítjòn xi David ki'mì nga jè José, tje-lá ts'e David-né.

⁵ Kii kít'aà xojon yijo-lá; tikoá kii jè María, chjoón-lá xi tina'ño-lá nga jè kixan-ko, tanga jyeé ki'ndí 'ya.

⁶ K'e nga jye titsajna Belén, María ijchò nachrjein-lá nga kits'iin ki'ndí-lá.

⁷ Kits'iin ki'ndítjòn-là xi ndí ki'ndí x'in; kisikájté nikje-là; ya kisikánaya kaxa ñánda kjèn-ya чо, nga mì tì kiì tjín-ne i'nde ya ni'ya ñánda ma nikjáya.

Kií komà k'e nga jñà àkjale-là Nainá j'ìikon jñà paxtò

⁸ Ya chrañàt'aà-là Belén títsajna paxtò xi nchisíkinda чо orrè-là nga nítjen.

⁹ Tà nitoón ijchòkon jngoò àkjale-là Nainá. Jè kjoajeya-là Nainá xi 'ñó ote kji, kisihiseèn yije kóhokji jngoò itjandi ñánda títsajna jñà paxtò. K'e nga kijtsee, tsí ndaà kitsakjòn.

¹⁰ Jè àkjale kitsò-là:

—Kiì tsakjoòn-jèn; 'an, koií xá j'i-na nga síkí'nchré jngoò-nò 'én xitse xi ndaà tsò xi 'ñó kjotsja-là ngats'ì naxandá:

¹¹ I'ndeì kats'iin jngoò ki'ndí ya naxandá-là David jè xi koçhrjekàjìin-ná kjo'in, jè xi Cristo, [xità xi xó kisikasén-ne Nainá], nga jè kotixoma-ná.

¹² Tjín jngoò seña nga kixi kjoa: sakò jngoò-nò ki'ndí xi tsjáltéjìin nikje-là; kjinaya kaxa ñánda kjèn-ya чо.

¹³ Tik'e-ne kjìn jchán àkjale tsatsejèn-kjoò-isa xi inchrobà-ne ngajmì xi 'nga kisikíjna Nainá. Kitsò:

¹⁴ Nainá kàtas'e-là kjoajeya ján ngajmì;

ko j it'aà nanguì,

'nchán kàtas'e kjoa, it'aà ts'e xità xi tjín-là kjondaà-là Nainá.

¹⁵ K'e nga kiì-ne jñà àkjale ján ngajmì, jñà paxtò kitsò-là xíkjin:

—Tíkjaán skanda Belén nga jchaá kjoa xi kòma koni s'ín kàsikí'nchré-ná Na'èn-ná.

¹⁶ Nitoón kiì jñà paxtò ján Belén; k'e nga ijchò, kisakò-là ñánda tíjna María ko José, koa jè ki'ndí, kjinaya kaxa ñánda kjèn-ya чо.

¹⁷ K'e nga kijtseeèkxon ki'ndí jè, tsibénojmi yije koni s'ín kitsò jè àkjale it'aà ts'e ki'ndí.

¹⁸ Ngats'ì xità xi kiì'nchré koni s'ín kitsò jñà paxtò tà k'oaá komà-là.

¹⁹ Tanga jè María yaá tsibíjìin yije ijìin inima-là jñà 'én xi kis'enojmi-là. 'Ñó kisikítsjeèn-jìin kjoa koi.

²⁰ Kiì ijngoò k'a-ne jñà paxtò; jeya tsachrje tikoá ndaà kisikíjna Nainá ngats'ì kjoa xi kiì'nchré ko xi kijtsee, nga nguì k'oaá s'ín komà koni s'ín kis'enojmi-là.

K'e nga jñà xità jchínga-là Jesús kiìko ingo ítjòn ya Jerusalén nga kisìngatsja Nainá

²¹ K'e nga ijchò jìin nachrjein nga kits'iin ki'ndí jè, kisit'aà chiba-là yijo-là kjoa ts'e circuncisión; Jesús kisit'aà 'ín-là koni s'ín kitsò àkjale-là Nainá k'e nga tisa kisinaya'ma indso'ba nea-là.

²² Ijchò nachrjein nga k'oas'ín s'ín xità koi, koni s'ín tíchja kjotíxoma-là Nainá xi kiskì Moisés, mé-ne jè María tsjeè kíjna-ne nguixkon Nainá. Nachrjein koi, kiìko Jesús ingo ítjòn ya Jerusalén nga kisìngatsja Nainá.

²³ K'oaá s'ín tjít'aà kjotíxoma-là Nainá xi kiskì Moisés: “Ngats'ì ki'ndí x'in xi jts'ín ítjòn, ts'eé Nainá, jè kongatsja.”

²⁴ Xità jchínga-là Jesús kiìko kjotjò-là nguixkon Nainá; jò tjoni'ña ko tsà jò pichón koni s'ín tjín kjotíxoma-là Nainá.

²⁵ Koi nachrjein ján Jerusalén tíjna jngoò xità kixi xi ndaà beèkón Nainá, Simeón 'mì. Tikoáá tíkoña-là jè xi sùikíjnandéì naxandá Israel; jè Simeón, yaá tíjnako Inima Tsjeè-là Nainá.

²⁶ Jè Inima Tsjeè-là Nainá k'oaá s'ín tsibénojmiya-là Simeón nga mìkiì kiyá skanda k'e nga skoèkxon Cristo xi Nainá sùikasén.

²⁷ Jè Inìma-là Nainá kisikasén Simeón ján ingo ítjòn Jerusalén. K'e nga ijchòkò Jesús jñà xìtá jchínga-là mé-ne nga kisikitasòn-ne koni s'ín síjé kjotíxoma-là,

²⁸ Simeón kiskoé ki'ndí jè, tsohóya tsja; 'nga kisikíjna Nainá. Kitsò:

²⁹ Na'èn, jyeé kòbitasòn 'én-lè koni s'ín ki'mì-ná, i'ndeì, 'nchán kàtiyaà 'an xi chì'nda-lè ma.

³⁰ Jyeé kòbe-na xkoaàn jè xi kochrjekátjì-ná kjo'in,

³¹ jè xi kànikíjna-osin nguixkon ngats'ìi naxandá,

³² jè xi sìihiseèn-là kjohítsjeèn-là jñà xìtá xi mìtsà xìtá naxandá Israel.

It'aà ts'e ki'ndí jè, naxandá-lè Israel jeyaá kíjna.

³³ Jñà xìtá jchínga-là Jesús tà k'oaá komà-là koni s'ín kitsò Simeón it'aà ts'e ki'ndí-là.

³⁴ Simeón kisijét'aà-là Nainá nga kàtasíchikon-t'in; ikjoàn kitsò-là María, nea-là Jesús:

—It'aà ts'e ki'ndí jè, k'oaá s'ín tjinè-là nga kjìn xìtá naxandá Israel kitjojiìn kjo'in koa kjìn kixojìin. Seña-là Nainá kíjna

³⁵ mé-ne nga jcha-là kó s'ín tjin kjohítsjeèn-là nga jngoò ijngoò xìtá, tanga kjìn xìtá xi mìkìi kòkjeiìn-là; tìkoaá ngaji, k'oaá s'ín s'e-lè kjo'on-takòn koni tsà jngoò kichà ndojò kotokjá inìma-lè.

³⁶ Tìkoaá yaá tíjna chjoón Ana xi chjaya 'én-là Nainá, tsòti-là Fanuel xi tje-là Aser. Jyeé 'ñó xìtá jchínga. Itoò nó tsibìjnako x'in-là.

³⁷ Nachrjein koi, jè chjoón Ana kò ñijòn kaàn kò ñijòn nó tjin-là nga tíjna ka'àn. Yaá bìjnaya nachrjein inchijòn ya nditsin ingo ítjòn; kò nachrjein kò nitjen beèxkón Nainá; bìtsi'ba-là koa bìjnachjan.

³⁸ Tijè-ne hora, chjoón jè ijchò kasijnat'aà chraña-là xìtá jchínga-là Jesús; kitsjaà-là kjondaà Nainá; kiìchja-là ngats'ìi xìtá it'aà ts'e ki'ndí jè, jñà xi tìkoa nchikoña-là nga kitjotji yije naxandá xi chja-ne Jerusalén.

K'e nga kii ijngoò k'a-ne Nazaret

³⁹ José kò María, k'e nga jye kisihitasòn yije koni s'ín tíchja kjotíxoma-là Nainá, kii ijngoò k'a-ne ján Galilea ya naxandá-là Nazaret.

⁴⁰ Ki'ndí jè tímajchínga; tís'e-là nga'ño ijìin inìma-là; tìkoaá isa ndaà tímachiya-là; yaá tíjnako kjondaà-là Nainá.

Kii komà k'e nga jè Jesús tsibìjnaya ingo ítjòn ján Jerusalén

⁴¹ Jñà xìtá jchínga-là Jesús, xkì nó fì ya Jerusalén k'e nga bitjo s'eí Paxko.

⁴² Jesús, k'e nga jye tjin-là tejò nó tìkoa kii ján Jerusalén koni s'ín choòn kjotíxoma ts'e s'eí Paxko.

⁴³ K'e nga inchrobà-ne xìtá nga jyehet'aà s'eí, jè Jesús yaá tsibìjna Jerusalén; koa jñà xìtá jchínga-là mìkìi kisijìin-là tsà ya tsibìjna.

⁴⁴ Jngoò nachrjein chinchimaya ndiyá. Maá-là tsà yaá tsóhojìin-là jñà xìtá xi nchifi-ne. K'e nga tsohótsjijìin-là xíkjin kò xìtá xi beèxkon,

⁴⁵ mìkìi kisakò-là. K'ée kii ijngoò k'a ján Jerusalén nga kii kátsji.

⁴⁶ K'e nga komà jàn nachrjein nga nchihótsji, kisakò-là ya nditsin ingo ítjòn; tíjnajìin-là xìtá xi okóya kjotíxoma-là Nainá; tí'nchré-là tìkoa tìkjòngui-là.

⁴⁷ Ngats'ìi xìtá xi nchi'nchré-là tà k'oaá komà-là jè kjohítsjeèn xi tjin-là koni s'ín tíchja.

⁴⁸ Jñà xìtá jchínga-là, k'e nga kijtseè nga ya tíjna, tìkoaá tà k'oaá komà-là; jè nea-là kitsò-là:

—Ji na'èn, ¿mé-ne nga kòs'ín nìkò-nájen? Na'èn-lè kò 'an tímakájno-najen nga kichiji, titsabinchaàtsji-lèjen.

⁴⁹ Jesús kitsò:

—¿Mé-ne nga binchaàtsji-ná? ¿A mì tíjìn-nò nga t́jínè-na nga ya kótijna ni'ya-la Na'èn-na?

⁵⁰ Tanga jñà xítà jchínga-la mìkìl jahas'en-jìin-la jè 'én xi kitsò Jesús.

⁵¹ Jesús, kii ìjngòò k'a-ne ján Nazaret kò nea-la kò na'èn-la; Jesús ndaà kisikitasòn-la xítà jchínga-la. Jè nea-la tà yaá tsibíjìn-ikon inìma-la ngats'ìi kjoa koi.

⁵² Jesús, tímajchínga koa nachrjein inchijòn, ìsa ndaà tímachiya-la; tìkoa tís'e-la kjoandaà-la Nainá kò ts'e xítà.

3

'Én xi kiichja Juan xi kis'ìn bautizar xítà
(Mateo 3:1-12; Marcos 1:1-8; Juan 1:19-28)

¹ K'e nga jye t́jín-la chrj'oòn nó nga tíhotíxoma-la ìsò'nde xi chja-ne Roma jè xi 'mì Tiberio César, kò ján nangui Judea, jè t́jna gobernador Poncio Pilato; kò jè Herodes, xítaxá ítjòn t́jna ya nangui Galilea; kò jè Felipe xi 'ndse ma Herodes, xítaxá ítjòn t́jna ya nangui ñánda 'mì Iturea kò ya nangui Traconite; kò jè Lisaniás, xítaxá ítjòn t́jna ya nangui Abilinia.

² Kò ján Jerusalén, no'mì ítjòn títsajna jè Anás kò Caifás. Tìkoi-ne nachrjein, Juan, ki'ndí-la Zacarías, kits'ìi-la 'én-la Nainá ya ì'nde ít'aà xìn ñánda nangui kixì choòn.

³ Juan, kii kóhokji indìl xajngá nandá Jordán nga kiichjaya nga kàtasíkájno jé-la jñà xítà nga mì tì jé kohótsji-ne, ìkjoàn kàtas'ín bautizar yijo-la mé-ne nga sùjchàat'aà-la Nainá jé-la.

⁴ K'e nga k'oas'ín kiichjaya Juan, jñà tíbitasòn 'én xi kiskii Isaías, xítà xi kiichja ngajo-la Nainá nga tsò:

Na'yà-la 'én xi 'ñó chja ya ì'nde ít'aà xìn ñánda nangui kixì choòn:

“Tjandaà ndiyá-la Nainá ya ìjìn inìma-nò; kixì tìkíjna koni jngòò ndiyá ñánda kojmeèya Na'èn-ná.

⁵ Ngats'ìi xajngá kongásòn-né;

ngats'ìi nindoò kò chrjangui, kòkixì-né;

jñà ndiyá xi tsó'ño t́jín, tìkoaá kòkixì-né;

koa jñà ndiyá xi tjen-jen-jno tjen-jen-t'aà choòn, kojchoòn-la.

⁶ Ngats'ìi xítà nga títsa ìsò'nde, skoe-né kó s'ín s'ìin Nainá nga kochrjekátjì jé-la xítà.”

Kitsò Isaías.

⁷ Juan kitsò-la jñà xítà xi ijchò nga mejèn-la koma bautizar:

—jñò xi xítà tje-la ye 'mì-nò! ¿Yá xi okitsò-nò nga kìnchat'aàxìn-là jè kjo'in xi sa nchrobá machrañat'aà-nò?

⁸ Ndaà t́jín kjoa xi t'een nga ndaà kàta'ya-nò nga jyeé kinikájno jé-nò nga mì tì jé binchaàtsji-nò. Kì bixón-jèn ya ìjìn inìma-nò: “Ngajen, [mìkìl s'e-najen kjo'in] nga yaá inchrobàt'aà-najen tje-la Abraham.” K'oaá xan-nò, Nainá, skanda jñà ndajo komaá-la sùkjatjìya-la nga ìxti-la Abraham koma.

⁹ Jè kichayá jyeé kjiijnandaà nga kotesòn yá; ngats'ìi yá xi 'mì ndaà toò ojà-la, skanda kò ìma-la, jtisòn-né, ìkjoàn sìnchájìn ni'ín nga kítjì.

¹⁰ Jñà xítà kiskònangui-la kitsò-la:

—¿Mé xi s'èn-jen?

¹¹ Juan kiichja kitsò-la:

—Jè xi jò ma nachro-la kàtatsjá jngòò-la jè xi tsjìn-la; jè xi t́jín-la tsojmì xi kine, kàtatsjá-la jè xi tsjìn-la.

¹² Tìkoaá j'ìi i'nga xítà-la xítaxá Roma xi síkíchjítjì tsojmì nga mejèn-la koma bautizar. Kitsò-la Juan:

—Maestro, ngajen, ¿mé xi s'en-jen?

¹³ Juan kitsò:

—Ki tsato níkichjió koni s'ín tíchja kjotíxoma.

¹⁴ Tíkoá kiskònangui i'nga jñà soldado, kitsò:

—Ngajen, ¿mé xi s'en-jen?

Juan kitsò-la:

—Ki xita binchaxkón-la, k'én ndiso nìyasòn-la k'e nga nì mé kjoa tjín-la nga ton mejèn-nò nachrjekàjno-la; kàtajngoò-takòn koni tjín machjí-nò.

¹⁵ Nchikoña jñà xita naxandá; nchisíkítsjeèn ijìin inima-la xi it'aà ts'e Juan: tsà jè xi Cristo, [xita xi xó kisìkasén-ne Nainá].

¹⁶ Juan kitsò-la ngats'ìi xita naxandá:

—Okixi-né, 'an, tà nandá s'ìin-nò bautizar; tanga nchrobá ìjngoò xi ìsa tse nga'ño tjín-la mì k'oaá-ne koni 'an; skanda mìkìi tíj'nde-na nga skíjnda'ñoá xox'ín-la xojté-la; jè xi sa nchrobá, s'ìin-nò bautizar ko Inima Tsjeè-la Nainá koa ko ni'ín.

¹⁷ Jyeé kjinaya tsja jè pala nga sùtsjeè tjé-la trigo. Kìinchàxkó trigo ya iya ni'nga; tanga jè tjé-la trigo, kòkà-né ya ijìin ni'ín ñánda mìkìi bits'o nita mé nachrjein-ne.

¹⁸ Juan, k'oaá s'ín kùichjayajìin-la xita 'én ndaà-la Nainá; k'jìn skoya kjotíxoma tsibít'in-la xi ndaà tsò.

¹⁹ Juan, tsohótiko jè Herodes xi xita ítjòn tíjna, koií kjoa-la nga jè tíjnakò Herodías chjoón-la Felipe xi 'ndse Herodes. Tíkoá tsohótiko Herodes ngats'ìi kjoa xi ch'o tís'ín.

²⁰ Tanga jè Herodes, ìsaá 'ño ch'o kis'ìin-ìsa: ndayá kiskinìs'en Juan.

Kii komà k'e nga komà bautizar Jesús

(Mateo 3:13-17; Marcos 1:9-11)

²¹ K'e nga tikj'eè ndayá fahas'en Juan nga tís'ín bautizar ngats'ìi xita naxandá, tíkoá k'eé komà bautizar Jesús; k'e nga tíchjat'aà-la Nainá Jesús, kitáx'a ngajmii.

²² Ikjoàn itjojen-nè-la Jesús jè Inima Tsjeè-la Nainá xi okji koni kji nise paloma; koa kina'ya jngoò-la 'én xi ngajmii inchrobà-ne xi kitsò:

—Ji-né xi ki'ndí-na xan-lè xi 'ño matsjake-lè; tsja tjín-la takoàn it'aà tsjii.

Tje-la Jesucristo

(Mateo 1:1-17)

²³ Jesús k'e nga tsibíts'ia nga kisìxá, tjín-la tsà katé nó. K'oaá s'ín tíjìin-la xita, nga ki'ndí-la xó José; José, ki'ndí-la Elí;

²⁴ Elí, ki'ndí-la Matat; Matat, ki'ndí-la Leví; Leví, ki'ndí-la Melqui; Melqui, ki'ndí-la Jana; Jana, ki'ndí-la José;

²⁵ José, ki'ndí-la Matatías; Matatías, ki'ndí-la Amós; Amós, ki'ndí-la Nahúm; Nahúm, ki'ndí-la Esli; Esli, ki'ndí-la Nagai;

²⁶ Nagai, ki'ndí-la Maat; Maat, ki'ndí-la Matatías; Matatías, ki'ndí-la Semei; Semei, ki'ndí-la Josec; Josec, ki'ndí-la Judá;

²⁷ Judá, ki'ndí-la Joanán; Joanán, ki'ndí-la Resa; Resa, ki'ndí-la Zorobabel; Zorobabel, ki'ndí-la Salatiel; Salatiel, ki'ndí-la Neri;

²⁸ Neri, ki'ndí-la Melqui; Melqui, ki'ndí-la Adi; Adi, ki'ndí-la Cosam; Cosam, ki'ndí-la Elmodam; Elmodam, ki'ndí-la Er;

²⁹ Er, ki'ndí-la Josué; Josué, ki'ndí-la Eliezer; Eliezer, ki'ndí-la Jorim; Jorim, ki'ndí-la Matat;

³⁰ Matat, ki'ndí-la Leví; Leví, ki'ndí-la Simeón; Simeón, ki'ndí-la Judá; Judá, ki'ndí-la José; José, ki'ndí-la Jonam; Jonam, ki'ndí-la Eliaquim;

- 31 Eliaquim, ki'ndí-là Melea; Melea, ki'ndí-là Mainán; Mainán, ki'ndí-là Matata; Matata, ki'ndí-là Natán;
- 32 Natán, ki'ndí-là David; David, ki'ndí-là Isai; Isai, ki'ndí-là Obed; Obed, ki'ndí-là Booz; Booz, ki'ndí-là Salmón; Salmón, ki'ndí-là Naasón;
- 33 Naasón, ki'ndí-là Aminadab; Aminadab, ki'ndí-là Aram; Aram, ki'ndí-là Esrom; Esrom, ki'ndí-là Fares; Fares, ki'ndí-là Judá;
- 34 Judá, ki'ndí-là Jacob; Jacob, ki'ndí-là Isaac; Isaac, ki'ndí-là Abraham; Abraham, ki'ndí-là Taré; Taré, ki'ndí-là Nacor;
- 35 Nacor, ki'ndí-là Serug; Serug, ki'ndí-là Ragau; Ragau, ki'ndí-là Peleg; Peleg, ki'ndí-là Heber; Heber, ki'ndí-là Sala;
- 36 Sala, ki'ndí-là Cainán; Cainán, ki'ndí-là Arfaxad; Arfaxad, ki'ndí-là Sem; Sem, ki'ndí-là Noé; Noé, ki'ndí-là Lamec;
- 37 Lamec, ki'ndí-là Matusalén; Matusalén, ki'ndí-là Enoc; Enoc, ki'ndí-là Jared; Jared, ki'ndí-là Mahalaleel; Mahalaleel, ki'ndí-là Cainán;
- 38 Cainán, ki'ndí-là Enós; Enós, ki'ndí-là Set; Set, ki'ndí-là Adán; Adán, xi jè sobà Nainá tsibíndaà.

4

K'e nga jè xita neí kiskoòt'aà Jesús (Mateo 4:1-11; Marcos 1:12-13)

¹ Jesús, nga ndaà tíjìn iníma-là jè Iníma Tsjeè-là Nainá, inchrobà ìjngò k'a-ne ya xajngá nandá Jordán, koà jè Iníma Tsjeè-là Nainá kiìko jngò ì'nde ìt'aà xìn ñánda nangui kixì choòn.

² Ichán nachrjein tsibìjna. Jè xita neí kiskoòt'aà nga mejèn-là kàtátsji jé Jesús. Ngats'ìi nachrjein koi, Jesús mìkì tsakjèn, tsibìjnachjan-né. K'e nga jyehe't'aà nachrjein, jyeé 'ñó kjòhòjò-là.

³ Jè xita neí kitsò-là:

—Tsà kixì kjoà nga ngaji xi Ki'ndí-là Nainá 'mì-lè, tji-là okixì ndajo jè nga inchrájìn kàtama.

⁴ Jesús kiìchja kitsò:

—Tjít'aà Xojon-là Nainá nga tsò: “Mìtsà tà koi tsojmì xi ma chine kitsakon-ne xita, tìkoáá kitsakoón-ne ngats'ìi 'én-là Nainá.”

⁵ Jè xita neí kiìko Jesús jngò nindoò 'nga, tà jngòhijta tsakó yije-là ngats'ìi naxandá xi tjin isò'nde.

⁶ Jè xita neí kitsò-là Jesús:

—Ngajíi tsjaà yije-lè ngats'ìi naxandá koi, nga jì kotixoma-là nga jeya kijni. Nga 'aán kjòngatsja yije. Tsà mejèn-na maá singatsja nita yá-ne.

⁷ Ngaji, tsà kosìxkó'nchit'aà-ná ko jeya sikhjna-ná, tsjii koma kóhòtjin.

⁸ Kiìchja Jesús, kitsò-là:

—Tisít'aà xìn-ná jì, xita neí. K'oaá s'ín tjit'aà Xojon-là Nainá nga tsò: “Jeya tikhjni Na'èn-ná xi Nainá; tà jè tajngò chaxkoín.”

⁹ Jè xita neí, ikjoàn kiìko Jesús ján Jerusalén; kisikhjnasòn ingo ítjòn ñánda isa 'nga kji; kitsò-là:

—Tsà kixíi kjoà nga jì xi Ki'ndí-là Nainá 'mì-lè, tìkatjengui yijo-lè ijndé;

¹⁰ k'oaá s'ín tjit'aà Xojon-là Nainá nga tsò:

Nainá koií xá-là àkjale-là mé-ne nga sikhinda-lè,

¹¹ nga ko tsja tsoba'ñó-lè mé-ne nga nijngò ndajo satíngui-ne ndsokoi.

¹² Kiìchja Jesús, kitsò-là:

—K'oaá s'ín tíchja Xojon-là Nainá nga tsò: “Kì taxki chít'aà-jèn Na'èn-ná xi Nainá.”

¹³ Jè xita neí, k'e nga mì tì kii kisakò-là kós'ín skónachan-là Jesús nga mejèn-là kohótsji jé, tsasít'aà xìn chiba nachrjein-là skanda komà iskan.

*Kii komà nga tsibíts'ia Jesús nga kisixá nangui Galilea
(Mateo 4:12-17; Marcos 1:14-15)*

¹⁴ Jesús j'ii ìjngòò k'a-ne Galilea, kò nga'ño-là Inima Tsjeè-là Nainá ndaà tíjìn inima-là; kina'yà-là it'aà ts'e, kóhokji nga jngòò itjandi nangui ts'e Galilea.

¹⁵ Tsakóya ya ni'ya ingo sinagoga xi ts'e naxandá ñánda tsajmeè; ngats'ii xita xi kii'nchré 'én-là ndaà kisikijna Jesús.

*Kó kitsò Jesús nga mi kii kòkjeín-là jña xita ya naxandá-là Nazaret
(Mateo 13:53-58; Marcos 6:1-6)*

¹⁶ Jesús ijchò Nazaret ya nangui-là ñánda kòjchá. Jè nachrjein nìkjáya, koni s'ín s'ín kjit'aà, jahas'en ni'ya ingo sinagoga. Tsasijna kixi nga tsibíxke Xojon-là Nainá.

¹⁷ Kits'ii-là xojon-là Isaías, xita xi kiichja ngajo-là Nainá; k'e nga kiskíjndaya jè xojon, kjòtsji-là ñánda tíjt'aà 'én xi tsò:

¹⁸ Jè Inima Tsjeè-là Nainá tíjnako-na nga 'aán tsibít'aà-na xá nga sika'bí-là xita ima 'én ndaà-là Nainá;

'aán kisikasén-na nga sindaà-na xita xi kjo'on tíjìn inima-là;

tikoáá koi xá kisikasén-na nga 'an kichjàjìn-là xita xi ndayá títsajna nga kítsajnandejí-ne;

sindaà-na jña xita xi mìkii tsejèn-là;

kítsajnandejí xita xi tíyatoòn;

¹⁹ kichjàya jè nó-là Nainá k'e nga tsjá-là kjotjò xita-là.

²⁰ Tsibíxkóya-ne xojon, kitsjaà-là jè xita xi síchjít'aà xá ts'e ni'ya ingo sinagoga, ikjoàn tsibijna. Tà nchikotsejèn-là ngats'ii xita xi ya títsajna.

²¹ K'ée tsibíts'ia Jesús nga kiichja kitsò:

—I'ndej, jyeé kána'yà-là nga nguixkoòn kòbitasòn koni s'ín tíchja Xojon-là Nainá xi 'an kòbìxkee.

²² Ngats'ii xita ndaà kiichja it'aà ts'e Jesús. Tà k'oaá komà-là nga 'ño ndaà tsò 'én xi chja. Jña xita kitsò-là xikjín:

—¿A mìtsà jè jèe xi ki'ndí-là José?

²³ K'ée kitsò Jesús:

—Xi okixi, jño, k'oaá k'oín-ná 'én xi tsò: “Chjine xkii, tiji tixkii-là yijo-lè.” K'oaá tís'ín k'oín-ná: “Koni s'ín kina'yà-jen kjoa xi ki'nì ján Capernaum nga kinìxkii-là xita, k'oa tís'ín tixkii-là i nangui-lè.”

²⁴ Jesús kitsò-isa:

—Okixií xi xan-nò, nijngòò xita xi chja ngajo-là Nainá xi yaxkón ya nangui-là.

²⁵ Tikoáá okixií xi xan-nò, kjìn íchjín ka'àn tíjín ya Israel jè nachrjein ts'e Elías k'e nga jàn nó osen mì tì kii ts'a-ne jtsí; j'ii kjínchrá 'ño kóhokji i'nde Israel.

²⁶ Tanga jè Elías mìtsà ya kii ñánda títsajna íchjín ka'àn ts'e naxandá Israel; yaá kinikasén ñánda tíjna chjoón ka'àn ts'e naxandá Sarepta xi chja-ne Sidón.

²⁷ Tikoáá kjìn ma xita xi tìbindojno chrjoa yijo-là ya Israel koi nachrjein ts'e Eliseo, xita xi kiichja ngajo-là Nainá. Tanga nijngòò xi xita Israel kjòndaà-ne, tà jè tajngòò Naamán xi Siria ts'e.

²⁸ Ngats'ii xita xi ya títsajna ya ni'ya ingo sinagoga, 'ño kòjti-là k'e nga kii'nchré 'én xi kiichja Jesús nga k'oaá s'ín kiskaàya-là nga kondra ts'e-né.

²⁹ Ngats'ii xita koi tsasítjen, tsachrjeiìn Jesús ya naxandá jè, kii'ko isò'nga nindoò ñánda kijna naxandá-là nga mejèn-là sikkatjen-ngui naxi ñánda nga 'ño tjen-jen-jno choòn.

³⁰ Tanga jè Jesús jahajìn osen-là koa kii.

*Jngòò xita xi inima ch'o-là neii síxájin yijo-là
(Marcos 1:21-28)*

³¹ Jesús kii ñánda 'mì Capernaum, na_xandá xi chja-ne Galilea; tsakóya-la xita k'e nga nachrjein ñikjáya.

³² Jñà xita, tà k'oaá komà-la koni tsò 'én xi tsakóya, nga jè 'én xi kiichja, tjin-la kjotixoma.

³³ Ya ni'ya ingo sinagoga tjna jngoò xita xi inima ch'o-la neí síxajin yijo-la; xita jè, 'ño kiichja:

³⁴ —Jesús xi Nazaret tsiji, kì k'oaá ñiko-nájen. ¿Mé kjoa xi tjin-lè ko ngajen? ¿Mé-ne ngajen ñiti-nájen? ¿A kòf'i ñikjehesòn-nájen? Beèxkon-lè; ji-né xi Xita Tsjeè-la Nainá —kitsò.

³⁵ Jesús tsohótiko jè xita neí:

—iJyò tjni, titjoiin yijo-la xita jè! —kitsò-la.

Jè inima ch'o-la neí, tsajndoòt'aà nangui nga nguixkon ngats'ì xita, ikjoàn itjoiin yijo-la xita jè, tanga ni mé xi kisiki'on.

³⁶ Ngats'ì xita xi títajna, tà kitsakjòn-né; k'eé tsohóko xíkjin:

—¿Mé 'én-ne koi? K'e nga chja xita jè, tjin-la nga'ño tikoá tjin-la kjotixoma nga síkitasòn-la inima ch'o-la neí —kitsò.

³⁷ Jesús, kina'ya-la kóhokji nga jngoò itjandi nangui xi chja-ne Galilea.

Kii kis'ìn Jesús nga kisindaà-ne nachiya-la Pedro

(Mateo 8:14-15; Marcos 1:29-31)

³⁸ Jesús tsasítjen; itjo-ne ni'ya ingo sinagoga; kii; jahas'en ni'ya-la Simón. Jè nachiya-la Simón 'ño xk'én. Ch'in tjnnga tjin-la. Jñà xita kiichjatji nga skótsejèn-la.

³⁹ Jesús tsasiñiat'aà-la, tsohótiko ch'in tjnnga; jè chjoón ñitoón kjòndaà-ne. Ikjoàn tsasítjen, kisìs'in-la xita.

Kii kis'ìn Jesús nga kjin xita xk'én kisindaà-ne

(Mateo 8:16-17; Marcos 1:32-34)

⁴⁰ K'e nga tíkaàtji ts'oi, ngats'ì xita xi tjin-la xita xk'én xi kjin skoya ch'in tjin-la, j'ìiko ñánda tjna Jesús. Jè Jesús tsohót'aà-la tsja nga jngoò ijngoò xita xk'én; ngats'ì xita koi, kjòndaà yijeé-ne.

⁴¹ Tikoáá kjin ma xita xi inima ch'o-la neí itjokàjii yijo-la nga kjòndaà-ne. 'Ñó kiichja inima ch'o-la neí:

—ji-né xi Ki'ndí-la Nainá 'mì-lè! —kitsò.

Tanga jè Jesús tsohótiko. Mikì kitsjaà'nde-la nga kiichja, koi kjoa-la nga jyeé beèxkon nga jè xi Cristo, [xita xi xó kisikasén-ne Nainá].

Kii komà k'e nga jè Jesús kisika'bí 'én-la Nainá

(Marcos 1:35-39)

⁴² K'e nga jye kis'e isén, itjo Jesús; kii jngoò i'nde it'aà xìn ñánda tsjin xita. Jñà xita tsohótsji ñánda kii. K'e nga ijchò ñánda tjna, mejèn-la nga ya kíjnakò nga mì xìn kjoì.

⁴³ Tanga jè Jesús kitsò-la jñà xita:

—Tikoáá mochjeén-né nga xìn na_xandá kjíkoáa 'én ndaà-la Nainá koni s'ín otixoma Nainá. Koií xá kisikasén-na Nainá.

⁴⁴ K'oaá s'ín chjaya 'én-la Nainá kóhokji ni'ya ingo sinagoga xi tjin ya nangui-la xita judío.

5

Kjoxkón xi komà k'e nga kjin tjin tsibíxkóya Pedro

(Mateo 4:18-22; Marcos 1:16-20)

¹ Jesús k'e nga síjna ya indii ndáchikon ts'e Genesaret kjòjtínè jñà xita xi ijchò nga mejèn-la kji'nchré 'én-la Nainá.

² Jesús, kijtsee jò chitso xi ya kjoòndiì ya indiì nandá. Jñà xita nei-la xi bíxkóya tìn, jyeé itjojen chitso nga nchihoníjno na'ya-la.

³ Jesús jahas'en jngoò chitso xi ts'e Simón, tsibítsi'ba-la nga skinìkjá-isa chitso-la ya jjiin ndáchikon. Ikjoàn tsibijnaya nga tsakóya-la xita.

⁴ K'e nga jye tsakóya-la xita, kitsò-la Simón:

—Tikoji chitso-lè ñánda nga isa 'ño nanga nandá; ikjoàn tìkatjen-ngui-ndá na'ya-nò mé-ne nga kíxkóya-nò tìn.

⁵ Simón kiichja kitsò:

—Maestro, kànik'a-nájen nitjen nga kànixá-jen, nímé xi kàsakó-najen; tanga tsà ji xi osi nga siikatjen-ngui-ndá na'ya-na, koma-né.

⁶ K'e nga jngoò k'a kisikatjen-ngui-ndá na'ya-la, kjin jchán tìn tsibíxkóya, tsí mejèn xajndá na'ya-la.

⁷ K'eé kisikatjiì-la tsja xíkjin nga kiichja-la jñà xita xi títsaya chitso xi jngoò mé ne nga kisichját'aà-la. Ingajò chitso jngoò k'a kitsee tìn. Mejèn tsà bixòngui-ndá nga 'ño i'í komà.

⁸ Jè Simón xi tìkoá Pedro 'mì, k'e nga kijtsee kjoá koi, tsasèn-xkó'nchit'aà-la Jesús, kitsò-la:

—iTsít'aàxìn-ná Na'èn, 'an xita jé-ná!

⁹ Jè Simón ko xita xíkjin xi taña síxákjoò, tà kjòxkón-la nga 'ño kjin tìn kjòxkóya-la.

¹⁰ Tìkoáá tà kjòxkón-la jè Jacobo ko Juan, ixti-la Zebedeo, jñà xita xi taña síxákjoò Simón. Jesús kitsò-la Simón:

—Kì tsakjoòn-jèn, i'ndeì mì tì kii tìn kíxkóya-ne, xitaá kíxkóyi xi it'aà ts'an.

¹¹ K'e nga jye kiikò-ne chitso-la ya indiì ndáchikon, yaá kitsjeiìn-takòn yije tsojmì-la, ikjoàn kiitjingui-la Jesús.

*K'e nga jè Jesús kisitsjeè jngoò xita xi tìbindojno chrjoa yijo-la
(Mateo 8:1-4; Marcos 1:40-45)*

¹² Jesús k'e nga tsibijna jngoò naxandá, ijchò jngoò xita x'in xi tìbindojno chrjoa yijo-la; nga kijtsee Jesús, tsohojna-ñiat'aà nangui nga kijtseeèxkón Jesús, tsibítsi'ba-la, kitsò-la:

—Na'èn, tsà mejèn-lè, tìtsjeè-ná ch'in xi tjin-na.

¹³ Jesús tsijmeé tsja nga tsohót'aà-la yijo-la xita jè, kitsò-la:

—Mejèn-na; jkàtandaà-ne!

Xita jè, nitoón kjòndaà-ne.

¹⁴ Jè Jesús kitsò-la:

—Kì yá xita xi bènojní-la; t'in ñánda tíjna no'miì; takó-la yijo-lè nga jye kjòndaà-ne; tjiì-la kjotjò xi síjé kjotíxoma-la Moisés mé-ne nga tsjeè kijna-ne nguixkòn Nainá tìkoá skoe jñà xita nga jye kjòndaà-ne ch'in-lè.

¹⁵ Tanga Jesús, isaá 'ño kina'ya-isa-la; ko isaá kjin xita kjòxkóya xi mejèn-la nga kjì'nchré-la; tìkoá mejèn-la nga kòndaà-ne ch'in xi tjin-la.

¹⁶ Tanga Jesús xìn i'nde fì ñánda tsjìn xita nga chjat'aà-la Nainá.

*Kii kis'iìn Jesús nga kisindaà jngoò-ne xita xi mì kì ma síhiníyá yijo-la
(Mateo 9:1-8; Marcos 2:1-12)*

¹⁷ Jngoò nachrjein k'e nga tíhokóya-la xita Jesús, ya títsajnajiiin xita fariseo ko xita xi okóya kjotíxoma-la Nainá xi kiskii Moisés. Xita koi, ján inchrobà-ne naxandá xi chja-ne Galilea, Judea ko Jerusalén. Jesús ya tíjnajiin inima-la nga 'ño-la Nainá nga siindaà-ne ngats'iì xita xi xk'én.

¹⁸ J'iikò jngoò xita xk'én xi mìkii ma síhiníyá yijo-la; kjiya-la nachan-yá. Tsohótsji'nde-la kó s'ín siikas'en xotjoa ni'ya ya ñánda tíjna Jesús.

19 Tanga mìkii komà jahas'en ni'ya nga 'ñó kjin xita títsajna; k'ée tsijin isò'nga ni'ya; jaàxìn nitja; kiskinjèn-jìin-la xita koni s'ín kjiya nàchan-yá-la jè xita xk'én. Yaá tsohójna nguixkòn ñánda tíjna Jesús.

20 Jesús k'e nga kijtseè nga mokjeiín-la it'aà ts'e, kitsò-la jè xita xk'én:
—Ngaji, jyeé kàchàat'aà-lè jé-lè.

21 Jñà xita fariseo ko xita xi okóya kjotíxoma-la Nainá xi kiskii Moisés tsohóko inima-la, kitsò: “Xita jè, chjajno-la Nainá koni s'ín tsò. ¿Yá-né jè nga ma-la síjchàat'aà-ná jé-ná? Tajngoò Nainá xi síjchàat'aà-ná jé-ná.”

22 Jesús kijtseèya-la koni s'ín nchisíkítsjeèn; kiichja, kitsò-la:
—¿Mé-ne kotsò-ne inima-nò?

23 ¿Mé xi isa chiba 'in tjin, tsà xán-la jè xita xi xk'én: “Jé-lè jyeé kichàat'aà-lè”, ko tsà xán-la: “Tísítjiin koa títjeí”?

24 Kokoò-nò nga 'an xi Ki'ndí-la Xita xan-la yijo-na, tji'nde-na nga síjchàat'aà-la jé-la xita i isò'nde.

Jè Jesús k'ée kitsò-la jè xita xi mìkii ma síkjaníyá:

—Ji, k'oaá xan-lè, tísítjiin, chjoí nàchan-lè, t'in-ne ni'ya-lè.

25 Jè xita xk'én nitoón tsasítjen nga nguixkòn ngats'ii xita xi ya títsajna; kiskoé nàchan-la xi kijnasòn; k'e nga tífi-ne ni'ya-la, jeya chjat'aà-la Nainá.

26 Ngats'ii xita xi ya títsajna tà kjòxkón-la, tikoáá jeya kiichjat'aà-la Nainá. Tsakjón-ko-ne, kitsò:

—I'ndeí kàyaxkon jngoáá kjòxkón.

Mé kjoa xi komà k'e nga jè Jesús kiichja-la Leví

(Mateo 9:9-13; Marcos 2:13-17)

27 K'e nga jye os'ín komà kjoa koi, itjo Jesús, kii; k'ée kijtseè jngoò xita xi 'mì Leví, xita-la xitaxá Roma xi síkíchjítji tsojmì. Tijnat'aà ímixa ya ñánda síkíchjítji tsojmì ts'e Roma. Jesús kitsò-la:

—Nchrobátjngui-ná.

28 Leví, tsasítjen; kisíkítsajna yije tsojmì xi tjin-la; kiitjngui-la Jesús.

29 Leví, ya ni'ya-la, tsí ndaà kis'iin-la s'eí Jesús. Tikoáá kjin xita xikjín títsajna xi tikoá tsojmì síkíchjítji, ko xita xi kj'eí; títsat'aà ímixa.

30 Jñà xita fariseo ko xita xi okóya kjotíxoma-la Nainá xi kiskii Moisés tsatit'aà xita xi kota'yàt'aà-la Jesús, kitsò-la:

—¿Mé-ne jñà xita xi síkíchjítji tsojmì, ko xi tjin-la jé, 'yò-koo koa bichi-koo?

31 K'ée kiichja Jesús kitsò:

—Jñà xita xi mìtsà ch'in tjin-la mìtsà chjine xkii mochjeén-la, tà jñà xita xi xk'én xi mochjeén-la chjine xkii.

32 Mìtsà koi xá j'i-na 'an nga j'ikjaajñaà xita kixi, jñà-né xita xi tjin-la jé nga kàtasíkájno jé-la nga mì tì jé kohótsji-ne.

Kó kitsò Jesús k'e nga kitjònangui-la mé-ne mì bìtsajnachjan-ne xita-la

(Mateo 9:14-17; Marcos 2:18-22)

33 Jñà xita kitsò-la Jesús:

—¿Mé-ne jñà xita xi kota'yàt'aà-la Juan tsí ndaà bìtsajnachjan tikoá tsí ndaà bìtsi'ba; k'oaá tís'ín jñà xita fariseo; tanga jñà xita tsiji, kjèn-né koa 'bii-né?

34 Jesús kitsò-la:

—K'e nga bixan jngoò xita, ¿a komaá síkítsajnachjaán xita xi báhihtako-ná k'e nga tákó tíjna xita x'in xi kòbixan?

35 Tanga kijchò nàchrjein nga tjáxìn-la x'in xi kòbixan, k'e-né nga kítsajnachjan xita.

36 Tikoáá tsibénojmi jngoò-la 'én xi mangásòn [nga tsakóya-la nga jñà kjotíxoma jchínga, mìkii sasén-la xi kjotíxoma xitse]. Kitsò-la:

—Mìtsà yá xi ote chiba nikje xitse nga bíto-ne kò nikje ibaà. Tsà kòs'ín s'een kits'ón nikje xitse; tìkoáá mìkiì ndaà kongásòn nikje xitse kò nikje ibaà.

³⁷ Tìkoáá mìtsà yá xi binchá xán ixii chrjoa jchínga; tsà kòs'ín s'een, k'e nga jye kojchá xán, sìxajndà chrjoa jchínga, ìkjoàn xixteèn xán; tìkoáá chija jè chrjoa.

³⁸ Jè xán ixii, chrjoa xitseé sinchá mé-ne nga ndaà sìnchátjò-ne.

³⁹ Tsà yá xi skoí xán jchínga xi kjòtseé jncha, mìkiì nìton sìjé ìjngoò k'a xi xán ixii. Kìtso-né: “Jè xán jchínga, ìsáá ndaà.”

6

K'e nga jñà xita xi kota'yàt'aà-la Jesús tsate natín jè nachrjein nìkjáya
(Mateo 12:1-8; Marcos 2:23-28)

¹ Jngoò k'a jè nachrjein nìkjáya, ja Jesús ñánda títje trigo. Xita xi kota'yàt'aà-la tsate natín-la trigo, tsafèya-ne tsja, ìkjoàn kiskine.

² Tjín i'nga xita fariseo xi kitsò:

—¿Mé-ne kò'nè-enò jè kjoa xi mìkiì tjí'nde nga kòs'ín koma jñà nachrjein nìkjáya?

³ Kìichja Jesús, kitsò-la:

—¿Jñò, a mìtsà jye tíjìin-nò koni s'ín tíchja Xojon-la Nainá koni kis'iin xitaxá ítjòn xi ki'mì David kò jñà xita-la xi kjihijtakò k'e nga kjòhojò-la?

⁴ Jahas'en ni'ya-la Nainá; kiskoé inchrajín tsjeè-la Nainá; tsakjèn. Tìkoá kitsjaà-la xita-la xi tjiko. Mìkiì tjí'nde nga jñà kòkjen. Tà jñà no'miì tjí'nde-la nga kòkjen.

⁵ Jesús kitsò-ìsa-la:

—'An xi Ki'ndí-la Xita xan-la yijo-na, 'aán otìxoma-la nachrjein nìkjáya.

Xita xi kixit'aà jngoò tsja
(Mateo 12:9-14; Marcos 3:1-6)

⁶ Ìjngoò k'a k'e nga jè nachrjein nìkjáya, Jesús jahas'en ni'ya ingo sinagoga; tsibíts'ia nga tsakóya-la xita. Koá yaá tíjna jngoò xita xi kixit'aà tsja kixi.

⁷ Jñà xita xi okóya kjotíxoma-la Nainá xi kiskii Moisés kò xita fariseo nchisíkinda Jesús kó s'iin, a sìndaá-ne jè xita xi xk'én jè nachrjein nìkjáya; mejèn-la nga skoe mé-ne nga koma kòhòngui-ne.

⁸ Tanga Jesús jyeé tíjìin-la kó s'ín nchisíkitsjeèn jñà xita koi. Kitsò-la jè xita xi kixit'aà tsja:

—Tisítjìin, tìsijna kixi ya jngoò osen.

Xita jè tsasítjen, tsasìjna kixi.

⁹ Jesús, k'eé kitsò-la ngats'ii xita xi ya títsajna:

—Jngoò kjoa skònangui-nò: ¿A tjí'nde-né k'e nga jè nachrjein nìkjáya nga ndaà s'eén, o xi ch'o s'eén? ¿A s'ik'en-ná o xi sìndaá-ná jngoò xita?

¹⁰ Jesús kiskoòtsejèn yije-la kóhotjín xita xi ya títsajnandiì-la. K'eé kitsò-la jè xita xi kixit'aà tsja:

—Tjeèndojoi ndseji.

Xita jè, tsijmeé tsja, nìtoón kjòndaà-ne.

¹¹ Jñà xita fariseo, 'ñó jti komà-la; k'eé tsibíts'ia nga tsajoóya-ne mé xi sìiko Jesús.

Kó 'mì 'ín-la xita-la Jesús xi kota'yàt'aà-la xi tejò ma-ne
(Mateo 10:1-4; Marcos 3:13-19)

¹² Tìjñà-ne nachrjein koi, Jesús kiiimijìin-jno jngoò nindoò nga kiiichjat'aà-la Nainá; kiskik'a nìtjen nga tíchjat'aà-la.

¹³ K'e nga kis'e isén kiichja-la xita xi kota'yat'aà-la; ikjoàn jaàjiin tejò xita xi tsibíxáya-la.

¹⁴ Jè Simón xi tikoá Pedro tsibít'aà 'ín; Andrés xi 'ndse ma Simón; Jacobo; Juan; Felipe; Bartolomé;

¹⁵ Mateo; Tomás; Jacobo, ti-la Alfeo; Simón xi ya fit'aà-la kjoatíxoma ts'e xita Celote;

¹⁶ Judas, ti-la Jacobo; ko Judas Iscariote, jè xi iskan komà kondra-la Jesús.

K'e nga jè Jesús, kjin xita kisindaà-ne

(Mateo 4:23-25)

¹⁷ Jesús itjojen-jno-ne nindoò, tjiko xita xi kota'yat'aà-la; j'ii jngoò i'nde ñánda isòn choòn; yaá tsibítsajna. Kjin ma xita-la xi ya nchikoña-la; tikoáá kjin ma xita xi kjeí xi inchrobà-ne kóhokji i'nde Judea ko naxandá Jerusalén ko xi inchrobà-ne Tiro ko Sidón, naxandá xi kjiyijòndii ndáchikon. Koi xá j'ii-ne nga kji'nchré-la Jesús, tikoá mejèn-la kondaà-ne ch'in xi tjin-la.

¹⁸ Jña xita xi inima ch'o-la neí síjti-la, tikoáá kjondaà-ne.

¹⁹ Ngats'ii xita, mejèn-la nga koòt'aà-la tsja yijo-la Jesús nga tsee nga'ño tíbitjojiin yijo-la nga mandaà yije-ne xita.

Kó kitsò Jesús it'aà ts'e xita ima ko xita nchiná

(Mateo 5:1-12)

²⁰ Jesús kiskoòtsejèn-'a xita xi kota'yat'aà-la kitsò-la:

—Mé tà ndaà-anò jño xi xita ima 'mì-nò, nga tsajòn-nó jña kjondaà xi tsjá Nainá nga jè tíhotíxoma.

²¹ 'Mé tà ndaà-anò jño xi ijò-nò i'ndeí, nga koma iskan, koskii-nò.

'Mé tà ndaà-anò jño xi chihindáya i'ndeí, nga koma iskan kijno-nò.

²² 'Mé tà ndaà-anò k'e nga tjin xita xi síjtikeè-nò tà 'an ngatji-na xi Ki'ndí-la Xita xan-la yijo-na; k'e nga síkítsajnat'aaxìn-nò, k'e nga chja'on-ko-nò, k'e nga ochrjekàngui-nò koni tsà jngoò xita xi 'ño ts'en.

²³ Tsja t'è-là takòn jè nachrjein koi; titsja-là inima-nò; tsee kjondaà tjoé-nò ján ngajmii; tikoáá jña xita jchínga-la xita xi beètoòn-nò, k'oaá tis'ín kijtseètoòn jña xita xi kiichja ngajo-la Nainá.

²⁴ Tanga ima-xó-nò jño xi xita nchiná 'mì-nò nga tjin yije-nò xi mochjeén-la yijo-nò [tanga mikii níkítsjeèn kjondaà-la Nainá xi mochjeén-la inima-nò].

²⁵ 'Ima-xó-nò xi skii titsajnaà i'ndeí; k'e nga koma iskan, kohojò-nò.

'Ima-xó-nò jño xi bijno i'ndeí; k'e nga koma iskan kobaá-nò koa jchihindáya-nò.

²⁶ 'Ima-xó-nò jño k'e nga ndaà síkítsajna yije-nò xita. Jña xita jchínga k'oaá tis'ín ndaà kisikítsajna jña xita xi 'én ndiso kiichjaya.

Kó s'ín sikoáá xita kondra-ná

(Mateo 5:38-48; 7:12)

²⁷ Tanga jño xi titsana'yà, k'oaá xán-nò: Títsjacha kondra-nò, ndaà tjiko jè xi jtikeè-nò.

²⁸ Tijét'aà-là Nainá nga kátasíchikon-t'in jña xi chja'on-ko-nò, titsi'batjiò jè xi ch'o síko-nò.

²⁹ Jè xi síjts'iin-t'aà kjoòn, tikoá tjii-là xi ngobà; jè xi faá'an nachrokisòn-nò, tikoá tjii-là nachro-nò xi ijngoò.

³⁰ Nita yá xita xi síjé-nò tsojmì, tjii-là; tsà yá xi skoé xi tsojmì tsajòn, kì tjii kii nijé-là.

³¹ Koni s'ín mejèn-nò nga síiko-nò xita, k'oaá tis'ín tjiko ngajo-nò.

³² Tsà matsjacha jè xi matsjakeè-nò, nímé kjondaà xi s'e-nò, nga k'oaá tis'ín jña xita ts'en, matsjakeè xikjin.

³³ Tsà tà jñà ndaà sikoò xita xi tikoà ndaà síko-nò, nímé kjondaà xi s'e-nò. Jñà xita ts'en, k'oaá ti síko xíkjin.

³⁴ Tsà sikiña-là jè xi yaxkoòn nga koiichjí, tikoáá nímé kjondaà s'e-nò. Tikoáá jñà xita ts'en sikiña-là xíkjin nga jyeé tíjin-là nga koiichjí yije kóhotjin.

³⁵ Títsjacha kondra-nò; ndaà tikoo; tikiña-là mé xi síjé-nò, nímé xi chiña-là it'aà ts'e. Tsà kos'in s'een, isaá tse kjondaà s'e-nò. Ixti-là Nainá xi 'ñó 'nga tíjna komaà k'e nga k'oas'in s'een koni s'in Nainá, nga tjin-là kjohimatakòn it'aà ts'e xita xi 'nga ikon kò xi ch'o s'in.

³⁶ Chahimaa xinguiòo koni s'in beèhima-nò Nainá xi Na'èn-ná 'mì-là.

Mì kù koma jñà sikiñaá jé-là xita xinguiáá

(Mateo 7:1-5)

³⁷ 'Kì jé-là xinguiòo 'nè kindaa mé-ne nga Nainá tikoà mìkì sikiña jé-nò; kì jé binchanè-là xinguiòo mé-ne nga Nainá mì jé kinchanè-nò; tíjchàat'aà-là jé-là xinguiòo mé-ne nga Nainá tikoà sikiñchàat'aà-nò jé-nò.

³⁸ Tji-là xinguiòo; jè Nainá tsjá ngajo-nò; Nainá sikiñbà-nò chibà xi ndaà kitseè, xi 'ñó jncha, xi ndaà kisitsajneè kò xi tíxteèn-tji nga kincha chijtsa-nò; jè chibà xi sikiñbaya-là xinguiòo, tíjè sikiñbaya ngajo-nò Nainá.

³⁹ Jesús tsibénojmí jngoò-là kjoa xi mangásòn, kitsò-là:

—Jngoò xita xi mìkì tsejèn-là, mìkì koma kòkò-là ndiyá lingoò xi tikoà mìkì tsejèn-là. Ingajò, yaá kixoya ngajo ñánda ch'o choòn.

⁴⁰ Jngoò xita xi kota'yà mìtsà isa 'nga tíjna koni maestro-là; tanga k'e nga kjoehet'in-là nga ndaà skóta'yà, tikoáá kongásòn-né koni jè maestro-là.

⁴¹ '[¿Mé-ne jé-là xinguii nikinda-ne koa tsiji mìkì nikindi?]' ¿Mé-ne chitsejèn-là tjé xi kjinangui xkon xinguii, koa jè yá chiso xi kjinangui xkoiin mìkì chitsejèn-là?

⁴² ¿A mì 'ya-jèn yá chiso xi kjinangui xkoiin? ¿Mé-ne kò'mì-là xinguii: “Ndsé, tji'nde-ná nga kochrjekànguia tjé xi kjinangui xkoiin”? Ngaji xi jò ma isén-lè; ítjòn tinachrjekàngui chiso xi kjinangui xkoiin, mé-ne nga ndaà kotsejèn-lè, ikjoàn tinachrjekàngui tjé xi kjinangui xkon xinguii.

Kós'in 'ya-là kós'in tjin inima-là jñà xita

(Mateo 7:17-20; 12:33-35)

⁴³ 'Tsjin yá xi ndaà kjoàn kò ch'o kjoàn toò xi ojà-là; tikoáá tsjin yá xi ch'o kjoàn kò ndaà kjoàn toò xi ojà-là.

⁴⁴ Nga jngoò lingoò skoya yá, k'oaá s'in yaxkon-là koni kjoàn toò xi ojà-là. Jè toò iko, mìtsà yá na'yá ojà-là. Tikoáá jñà toò uva mìtsà na'yá xanchroò ojà-là.

⁴⁵ Koni kjoàn yá, k'oaá ti kjoàn xita; jngoò xita xi 'én ndaà chja, koií-né nga kjondaà tíjin inima-là; koa jngoò xita xi 'én ts'en chja, koií-né nga kjoats'eén tíjin inima-là; nga k'oaá tsò 'én xi nokjoá koni tsò kjohítsjeèn xi tíjin inima-ná.

Chró ni'ya xi jò ma-ne

(Mateo 7:24-27)

⁴⁶ '¿Mé-ne kos'in 'mì-ná nga bixón: “Na'èn, Na'èn”, koa mìkì nikitason koni xan-nò?

⁴⁷ K'oaá xan-nò yá xi mangásòn jè xita xi 'an fit'aà-na, xi 'nchré 'én-na, tikoà síkitason.

⁴⁸ Jè mangásòn jngoò xita xi bíndaà ni'ya-là; 'ñó nanga ò'nguii; bíjna tàts'en chró ni'ya ya isòn naxi. K'e nga 'ba jtsí xkón, f'ii xajngá nandá, kaat'aà'ñó-là ni'ya; nímé xi síko nga ya tíndaàson naxi.

⁴⁹ Tanga jè xi 'nchré 'én-na koa mìkì síkitason, k'oaá ngaya-là koni jngoò xita xi bíndaàson ni'ya-là ñánda tà nangui; mìkì ndaà bíndaà tàts'en chró; f'ii xajngá nandá, kaat'aà'ñó-là ni'ya; yaá bixòña ni'ya jè; jngoò k'a bixòjen.

7

*Kii komà nga kjòndaà-ne chi'nda-la xi xita sko-la soldado
(Mateo 8:5-13)*

¹ Jesús, k'e nga jye tsakóya-la xita naxandá xi nchi'nchré 'én-la, kii, ja-has'en-jiin naxandá Capernaum.

² Ya tíjna jngoò soldado ítjòn. Jè chi'nda-la, 'ño xk'én. Kjomeè biyaà. Tanga 'ño tjòkeè.

³ K'e nga kii'nchré xita jè it'aà ts'e Jesús, kisikasén xita jchínga xi ts'e xita judío nga kii kítsi'ba-la Jesús mé-ne nga kàtjanchrobá, kàtasíxki-là jè chi'nda-la xi xk'én.

⁴ Jñà xita jchínga, k'e nga ijchòkon Jesús 'ño tsibítsi'ba-la, kitsò-la:

—Ok'ín-la nga sìchját'aà-la xita ítjòn jè.

⁵ Tsjakeè naxandá xi chja-ne Judea, koa jè tsibíndaà jngoò-ná ni'ya ingo sinagoga i naxandá-ná.

⁶ Jesús kii'ko jñà xita jchínga koi, tanga k'e nga jye kjomeè bijchó chrañà'taà-la ni'ya, jè xita ítjòn-la soldado kisikasén i'nga amigo-la nga kitsò-la Jesús:

—Na'én, kii yijo-lè njeti-la. 'An, mikii ok'in-na nga ngaji k'oín sobi ni'ya-na.

⁷ Tikoáá mikii ok'in-na nga 'an kòfikon sobà-lè. Tanga tji okixi nga kàtandaà-ne chi'nda-na.

⁸ 'An, tíjiin-na nga tjín-lè kjotíxoma. Tikoáá 'an, tjín-na xita ítjòn xi otíxoma-na, tikoáá tjín-na soldado xi 'an otíxoma-la, k'e nga xan jngoò-la: “T'in”, fi-né; xan-la xi ijngoò: “Nchroboí”, nchrobá-né; koa k'e nga xan-la jè xi chi'nda-na: “K'oa t'jiin”, síkitasòn-na.

⁹ K'e nga kii'nchré Jesús jñà 'én koi, tà kjòxkón-la. K'eé kiskoòtsejèn-'a jñà xita xi tjingui-la; kitsò-la:

—K'oaá xan-nò, ya Israel, ni saà jngoò xita sakó-na xi kos'ín ndaà mokjeiin-la koni jè xita jè.

¹⁰ Jñà xita xi kii'jaá Jesús, k'e nga j'ii-ne, jè chi'nda xi xk'én, jyeé kjòndaà-ne.

Kós'ín komà k'e nga jè Jesús kisikjaáya-la ki'ndí-la chjoón ka'àn

¹¹ Nga komà iskan Jesús kii jngoò naxandá xi 'mì Naín. Tjiko xita xi kota'yà'taà-la, tikoáá kjin xita xi tà xita naxandá tjingui-la.

¹² K'e nga jye ijchò chrañà ijto xotjoa naxandá, kjin ma xita naxandá xi kjihijtao chjoón ka'àn nga nchifi kíhijiin jngoò mik'en xi ti ta jngoò-la jè chjoón ka'àn.

¹³ Na'én-ná Jesucristo, k'e nga kijtseèxkon, kjòhimakeè; kitsò-la chjoón ka'àn:

—Kii chihindáya-jèn.

¹⁴ Kii kasit'aà chrañà-la jè kaxa mik'en, tsohósòn-la tsja; jñà xita xi yangui mik'en chinchako. Kitsò Jesús:

—Ngaji ti, k'oaá xán-lè: ¡Tisítjiin!

¹⁵ Jè mik'en nitoón tsibijna kixi; ikjoàn kiichja. Jesús, k'eé kisìngatsja nea-la.

¹⁶ Ngats'ii xita xi tjiko, tà kitsakjòn-né; k'eé jeya kisikíjna Nainá kitsò:

—Jngoò xita tíjnako-ná xi 'ño ndaà chja ngajo-la Nainá.

Tikoáá tjín xi kitsò:

—Nainá j'ii kasiko naxandá-la.

¹⁷ Jñà 'én koi, kina'yà-la kòhokji nangui Judea, ngats'ii i'nde nga jngoò itjandii nangui Judea.

*Xita xi kota'yà'taà-la Juan xi kis'iin bautizar xita
(Mateo 11:2-19)*

18 Juan xi kis'iin bautizar x̄it̄a kiì'nchré yije kjoa xi tís'in Jesús; jñà x̄it̄a xi kota'yàt'aà-là tsibénojmi-là. K'eé kiichja jò-là xi x̄it̄a ts'e.

19 Kisikasén ñánda t̄jna Jesús nga skonangui-là, ¿a jè-né xi Cristo xi t̄jínè-là nga kjoii a xi kj'eii chíña-lá?

20 Jñà x̄it̄a-là Juan, k'e nga ijchòkon Jesús, kitsò-là:

—Jè Juan kàsikasén-najen xi it'aà tsiji nga chjinangui-lèjen, ¿a ji-né xi Cristo xi t̄jínè-lè nga kjoii a xi kj'eii chíña-lajen?

21 Tjè-ne hora, Jesús, kjìn x̄it̄a kisindaà-ne xi xk'én, xi kjo'in nchisíkjeín, xi inima ch'o-là neii t̄jiin inima-là; t̄ikoaa kjìn x̄it̄a xi mìkiì tsejèn-là kjòndaà-ne.

22 Jesús kitsò-là jñà x̄it̄a xi ijchòkon:

—Tanguió tènójmi-là Juan jñà kjoa xi kà'yaà ko xi kàna'ya. Jñà x̄it̄a xi mìkiì tsejèn-là, jyeé tsejèn-là; jñà xi tsá'yá kjoàn, jyeé ma fi-ne; jñà xi t̄bindojno chrjoa yijo-là, t̄matsjeèjnoó-ne yijo-là; jñà x̄it̄a xi jtayaà, jyeé 'nchré-ne; ko x̄it̄a xi jye k'en, nchifaáyaá-là; koa jñà x̄it̄a ima, jye t̄s'enojmi-là 'én ndaà-là Nainá.

23 ¡Mé tà ndaà-là jè x̄it̄a xi nguì jngoò k'a ndaà mokjeiín-là it'aà ts'an nga nimé xi osìjna-ikòn-là!

24 K'e nga jye kii-ne x̄it̄a xi kisikasén Juan, tsibíts'ia Jesús nga tsohóko x̄it̄a xi it'aà ts'e Juan, kitsò-là:

—¿Mé xi tsanguì ch̄itsejèn-là ya i'nde it'aà xìn ñánda nangui kixì choòn? ¿A jè tsanguì ch̄itsejèn-là jngoò yá ínaxo xi s̄jt̄iya-là tjò?

25 ¿Mé-né xi tsanguì ch̄itsejèn-là? ¿A jngoò x̄it̄a xi 'ñó ndaà kji nikje-là? Jñò, jyeé 'yaà, jñà xi ndaà kjoàn nikje xi ókjá, xi t̄ikoaa 'ñó ndaà kjoàn tsojmi xi t̄jín-là, yaá t̄ítsaya ni'ya-là x̄itaxá ítjòn.

26 Tanga, ¿mé xi tsanguì ch̄itsejèn-là? ¿A jngoò x̄it̄a xi chja ngajo-là Nainá? Okixi-né, k'oaá xan-nò, Juan, isaá 'ñó ndaà koni jngoò x̄it̄a xi chja ngajo-là Nainá.

27 It'aà ts'e Juan, yaá t̄ichja Xojon-là Nainá nga tsò:

'An, s̄ikasén ítjòn-lè x̄it̄a-na xi kjiko 'én; jè xi kojindaàya ítjòn-lè ndiyá-lè.

28 K'oaá xán-nò, ngats'ii x̄it̄a xi t̄jín i isò'nde, nijngoò x̄it̄a xi mangásòn koni jè Juan xi kis'iin bautizar x̄it̄a, tanga ya ijìin naxandá ñánda otíxoma Nainá, jè x̄it̄a xi fehet'aà-ne, isaá jeya t̄jna mì k'oaá-ne koni Juan.

29 K'e nga kiì'nchré jñà x̄it̄a naxandá ko jñà x̄it̄a-là x̄itaxá Roma xi s̄íkíhjt̄jì tsojmi, kjòjngoò-ikon nga ndaà t̄jín jè ndiyá kixi-là Nainá, nga jye komà bautizar it'aà ts'e Juan.

30 Tanga jñà x̄it̄a fariseo ko x̄it̄a chjine xojon ts'e kjotíxoma-là Nainá, mìkiì komà bautizar it'aà ts'e Juan. Tsachrjengui-né kjòndaà xi t̄jindaà-là Nainá nga tsjá-là x̄it̄a koi.

31 Jesús kitsò:

—¿Yá xi siingásòn-koaa jñà x̄it̄a xi t̄jín n̄chrjein i'ndeij? ¿Kó kjoàn xi kongásòn-ko?

32 Jñà kongásòn-kjoò jñà ixti xi bitsajna nditsin nga síská, chja-là x̄íkjín, tsò-là: “Kànìkjaneé-nòjen xobí tanga jñò mìkiì kàchà; kàjndaá-nòjen sò xi ba tsò tanga mìkiì kàchihindáyaà.”

33 J'ii Juan xi kis'iin bautizar x̄it̄a xi mìtsà inchrájin tsakjèn, t̄ikoaa mìtsà xán kits'ii koa jñò bixón-nò: “Inima ch'o-là neii t̄jín-là.”

34 Ikjoàn j'iaa xi Ki'ndí-là X̄it̄a xan-là yijo-na; ma-na kjeen, t̄ikoaa ma-na 'biaa; jñò, k'oaá s'in bixón i'ndeij: “X̄it̄a chrjá'a-né, x̄it̄a ch'i-né, amigo-là-né jñà x̄it̄a-là x̄itaxá Roma xi s̄íkíhjt̄jì tsojmi ko jñà xi x̄it̄a jé.”

35 Tanga jè kjoachjine-là Nainá, 'yaá-là nga kixi t̄jín k'e nga jye bitasòn.

Kó tsò 'én xi kiichja Jesús k'e nga jngoò chjoón xi tse jé tjín-la tsaníjno ndsoko

³⁶ Jngoò xita fariseo kiichja-la Jesús nga mejèn-la kòkjèn-kò. K'e nga jahas'en ni'ya-la jè xita fariseo, tsibìjnat'aà ímíxa.

³⁷ Ya naxandá jè, tíjna jngoò chjoón xi tse jé tjín-la. K'e nga kiì'nchré nga ya tíjnat'aà ímíxa Jesús, ya ni'ya-la jè xita fariseo, ijchòkò jngoò chitsín xi tjíya-la xkiì xi ndaà jne.

³⁸ Yaá tsasìjnat'aà ijton ndsoko Jesús nga tíkjindáya. Ikjoàn tsaníjno ndsoko Jesús kò ndáxkon. K'eé kisìxìjno-ne kò tsja sko. Kjìn k'a kiskine'a ndsoko. Ikjoàn kisikaàjno xkiì xi ndaà jne.

³⁹ Jè xita fariseo xi kiichja-la Jesús, k'e nga kijtseè kjoa koi, kitsò jjiìn iníma-la: “¿Mé-ne nga mìkiì beèxkon-ne yá chjoón-ne xi otísíko? Tsà kixi kjoa nga jè xita xi chja ngajo-la Nainá, skoexkon-né nga chjoón xi jé tjín-la.”

⁴⁰ K'eé kiichja Jesús, kitsò-la:

—Simón, jngoò kjoa koxán-lè.

Simón kitsò:

—Maestro, kòt'ín-ná.

⁴¹ Jesús kitsò:

—Jò xita títsajna xi ton tjen-la ts'e xita xi síkìña ton; jngoò xi 'òn sìndo tjen-la; jè xi ìjngoò icháte tjen-la.

⁴² Ingajò xita koi, tsjìn-la ton xi koiichjí ngajo-ne. Jè nei-la ton kisìjchàat'aà-la ingajò. Kòt'ín-ná, ¿ñá-laá ingajò xita koi xi ìsa 'ñó matsjakeè jè nei-la ton?

⁴³ Kiichja Simón kitsò:

—'An, k'oaá s'ín síkìtsjeèn, jè-la xi ìsa tse ton kitjen-la.

Jesús kitsò:

—Ndaà kichoòsòn-la.

⁴⁴ Jesús kiskoòtsejèn-jno jè chjoón, kitsò-la Simón:

—Chítsejèn-la chjoón jè. 'An, k'e nga kòfahas'eèn ni'ya-lè [mìkiì kànìkitasoìn koni s'ín tjín kjoótixoma tsaján]; mìkiì kò'biì-ná nandá xi mochjeén-la ndsokoaà nga saníjno; tanga chjoón jè, ndáxkoón kòhoníjno-ne ndsokoaà kò tsja skoò kàsìxìjno-ne.

⁴⁵ K'e nga kànìhixat'aà-ná mìkiì kichine'a-ná tanga chjoón jè, kóni kòfahas'eèn ni'ya-lè tíkine'a ndsokoaà.

⁴⁶ 'Ngaji, mìkiì kànáhijnoi asitì skoaà, tanga chjoón jè, kòfàhijno ndsokoaà xkiì xi ndaà jne.

⁴⁷ Koií k'oaá s'ín xan-lè: Chjoón jè, jyeé kàchàat'aà yije-la ngats'ii jé-la koi kjoa-la nga 'ñó matsjakeè-na, tanga jè xita xi chiba kàchàat'aà-la jé-la, ìsaá chiba matsjakeè-na.

⁴⁸ K'eé kitsò-la Jesús jè chjoón:

—Jé-lè jyeé kàchàat'aà-lè.

⁴⁹ Jñá xita xi taña títsajnat'aà ímíxa kitsò-la xíkjín:

—¿Yá xita-né jè nga tìkoá ma-la síjchàat'aà-ná jé-ná?

⁵⁰ Jesús kitsò ìjngoò k'a-la jè chjoón:

—Koi-né nga mokjeiín-lè ìt'aà ts'an nga bitjotjì-ne jé-lè; t'in-là ndaà-ne.

8

Íchjín xi kisìchját'aà-la Jesús

¹ K'e nga komá ìskan, Jesús, kjìn naxandá tsajmeè, kò rancho, nga kiichjaya kò kisika'bí 'én ndaà-la Nainá koni s'ín otixoma Nainá. Tjiko xita-la xi tejo ma-ne.

² Tìkoáá tjiko i'nga íchjín xi jye kjòndaà-ne ch'in neí-la kò xi k'ejí ch'in. Yaá tjiko María jè xi Magdalena 'mì, xi itoò iníma ch'o-la neí itjojiìn yijo-la;

³ t̄jiko Juana, ch̄joón-la Chuza xi síkinda tsojmì-la x̄itaxá ít̄jòn xi 'mì Herodes; t̄jikoá t̄jiko xi 'mì Susana koa k̄jìn-isa íchjín t̄jiko xi síchját'aà-la mé tsojmì xi t̄jín-la.

Kjoa xi mangásòn ts'e x̄ita xi bítje xojmá
(Mateo 13:1-9; Marcos 4:1-9)

⁴ K'e nga jye kòk̄jìn x̄ita xi x̄k̄i xi ján naxandá j'ìi-ne, Jesús, tsibénojímí-la kjoa xi mangásòn. Kitsò-la:

⁵ —Jngoò x̄ita xi kiì k̄j̄ndi xojmá. K'e nga tsibíts'ia nga kiskíj̄ndi xojmá, chixò chiba ya iya ndiyá. Koa chinchane x̄ita koa j̄nà n̄ise tsakjèn.

⁶ Nguì k'oa t̄jín chixòson ya ñánda naxi choòn, tanga k'e nga isò xojmá, n̄itoón kixi nga mikì 'nchì'nde nangui.

⁷ Nguì k'oa t̄jín chixò ya ij̄ìn na'yá; yaá taña isòkjoò; k'e nga kjò'nga na'yá, kisik'en-ngui xka-la xojmá.

⁸ Nguì k'oa t̄jín chixò ñánda nangui ndaà; isò, kjò'nga, koa tsaja-la toò; kitsjaà jngoò sìndo nga jngoò ijngoò.

Jesús k'e nga jye tsibénojímí kjoa koi, 'ñó kiichja, kitsò:

—j̄ndaà t̄iná'yaà koni xan-nò!

Mé-ne kjoa xi mangásòn kisikjeén-ne Jesús
(Mateo 13:10-17; Marcos 4:10-12)

⁹ J̄nà x̄ita xi kota'yàt'aà-la Jesús kiskònangui-la kó tsòya-ne jè kjoa xi mangásòn xi tsibénojímí-la x̄ita.

¹⁰ Jesús kitsò:

—J̄nò, Nainá jye kitsjaà-nò nga jchaa kjoa'ma-la xi bénojímíya kó s'ín otíxoma Nainá; tanga j̄nà x̄ita xi kj'ejí, tà kjoa xi mangásòn s'enojmí-la, mé-ne nga mikì skoe-ne xi kjoa kixi nas'ín skótsejèn, mikì kochiya-la nas'ín nchì'nchré.

Kó tsòya-ne kjoa xi mangásòn ts'e x̄ita xi bítje xojmá
(Mateo 13:18-23; Marcos 4:13-20)

¹¹ Jè kjoa xi mangásòn ts'e xojmá, kiì tsòyaá-ne: J̄nà xojmá, jè 'én-la Nainá.

¹² J̄nà xojmá xi chixò iya ndiyá, j̄nà ngaya-la x̄ita xi 'nchré 'én-la Nainá, ikjoàn f'ìi x̄ita nejí, faáxìn jè 'én ij̄ìn inima-la mé-ne nga mikì kokjeiín-la koa mikì kitjoiín kjo'in inima-la.

¹³ J̄nà xojmá xi chixòson naxi, j̄nà ngaya-la x̄ita xi 'nchré 'én-la Nainá, k'e nga tàts'en-la kjoa tsjaá ma-la nga mokjeiín-la, tanga tsjìn-la i'ma; tà chibaá nachrjein mokjeiín-la; k'e nga mé kjoa xi sakó-la, n̄itoón sík̄jna-ne.

¹⁴ J̄nà xojmá xi chixò ij̄ìn na'yá, j̄nà ngaya-la x̄ita xi 'nchré 'én-la Nainá; k'e nga jye t̄jímaya ndiyá-la Nainá, bít's'ia nga síkájno-la yijo-la, ótsji xi kjoa nchiná ko xi kjoa kjotsja. J̄nà kjoa koi xi t̄jín isò'nde bíchjoà-ikòn-la nga mikì makixi nga ojà-la toò.

¹⁵ J̄nà xojmá xi chixò ñánda nangui ndaà, j̄nà ngaya-la x̄ita xi ndaà t̄jín ko xi kixi t̄jín inima-la; 'nchré 'én-la Nainá t̄jikoá bíj̄ìn-ikon 'én xi 'nchré; ndaà bincha kixi skanda k'e nga ndaà makjìn-ya j̄nà 'én.

Kjoa xi mangásòn ts'e ni'ín xi síhiseèn
(Marcos 4:21-25)

¹⁶ 'Tsjìn x̄ita xi oká ni'ín, ikjoàn bíjtsa'ma, o xi ya sík̄jnangui nachan; jngoò ni'ín xi tì, sijna 'nga-né; yaá sijnaya candelero mé-ne nga kohiseèn-la j̄nà x̄ita xi kjoahas'en ni'ya.

¹⁷ Nímé kjoa t̄jín xi t̄jí'ma i'ndeí xi mikì kotsejèn nga koma iskan; t̄jikoá tsjìn kjoa xi t̄jí'ma i'ndeí xi mikì jcha-la. Ngats'ii kjoa skoeḅkon yije x̄ita.

18 'T'een kinda kjohítsjeèn-nò k'e nga kiná'ya 'én-la Nainá. Ndaà tiná'yaà. Nga jè xi tjín-la kjohítsjeèn k'oií isa-la; tanga jè xi tsjìn-la, skanda tjá'aán-la mé xi k'oas'ín síkítsjeèn nga tjín-la.

Nea-la Jesús ko 'ndse

(Mateo 12:46-50; Marcos 3:31-35)

19 Nea-la ko 'ndse kiikon ñánda tíjna Jesús. Tanga mìkii komà ijchò skanda ñánda tíjna nga 'ño kjìn ma-ne xita xi títsajna.

20 Jesús kis'enojmí-la, kitsò-la:

—Nea-lè ko jña 'ndsi, ján ndítsiaán títsajna, mejèn xó-la nga skótsejèn-lè.

21 Kiichja Jesús, kitsò:

—Xi nea-na ko xi 'ndsè xan-la, jña-né xi 'nchré 'én-la Nainá, tikoá síkitasòn.

K'e nga jè Jesús kisikínajyò tjoxkón

(Mateo 8:23-27; Marcos 4:35-41)

22 Jngò nàchrjein, Jesús ko xita xi kota'yàt'aà-la jahas'en jngò chitso, kitsò Jesús:

—Tíkjaán, kítjájtoaá ján xijngoaà ndáchikon.

Ikjoàn kiì.

23 Tanga k'e nga kiisondá chitso, Jesús tsohojnafè-né. Ikjoàn kjòts'ia nga j'ì tjoxkón ya ijìn ndáchikon. Jyeé tífahas'en nandá chitso; xkón tjín tsà ya skajiìn-ndá.

24 Jña xita-la k'eé kiikon nga kisikjaá-la Jesús; kitsò-la:

—¡Maestro! ¡Maestro! ¡Chitso, jye tíkaànguindá! Jyeé-la kiyá.

Jaá-la Jesús; ikjoàn tsohótiko tjoxkón ko ndáchikon, nitoón kisijyò-ne, kjòndaàya-ne.

25 Jesús kitsò:

—¿Mé-ne mìkii mokjeiín-nò it'aà ts'e Nainá?

Jña xita-la tà kitsakjòn-né. Tà kjòxkón-la. Kitsò-la xíkjín:

—¿Yá xita-ne jè nga chja-la tjo ko nandá koá síkitasòn-la?

Xita Gadara xi kjìn inima ch'o-la neí tjìin inima-la

(Mateo 8:28-34; Marcos 5:1-20)

26 Ikjoàn ijchò ya nangui-la xita Gadareno xi kijna xijngoaà ndáchikon ts'e Galilea.

27 K'e nga itjojen chitso, Jesús, ijchò kasit'aà jngò-la xita x'in xi ya i'nde-la naxandá Gadara. 'Ñó kjòtseé tjìin yijo-la inima ch'o-la neí; mìtsà nikje ókjá, koá mì ni'ya tjín-la; yaá xó bijnaya ngajo-la mik'en.

28 Xita jè, k'e nga kijtsee Jesús, 'ño kiskindàyat'aà-la koá tsasèn-xkó'nchit'aà-la; ikjoàn 'ño kiichja, kitsò:

—Jesús, ngaji xi Ki'ndí-la Nainá 'mì-lè xi 'ño 'nga tíjna, ¿mé xi mejèn-lè ko 'an? ¡Bìtsi'bà-lè, kì yatoòn-ná!

29 Koií okitsò-ne, nga jè Jesús, jyeé kos'ín tsatíxoma-la jè inima ch'o-la neí nga kàtitjojin yijo-la xita jè. Jyeé kjòtseé kos'ín tjìin yijo-la nga biyaàxín; nas'ín na'ño kicha cadena sit'aà'ño ndsoko ko tsja, chíkjoaá-la nga otejtso, ikjoàn fiko jè inima ch'o-la neí ya nangui kixi ñánda tsjìn xita.

30 Jesús kiskònangui-la, kitsò-la:

—¿Kó 'mì-lè?

Xita jè kitsò:

—Legión 'mì-na.

Koií ko'mì-ne nga 'ño kjìn inima ch'o-la neí tjìin yijo-la.

31 Jña inima ch'o-la neí tsibítsi'ba-la Jesús nga mì yaá sìikatsjoya nitjan-la neí ñánda tjín kjo'in.

³² Ya it'aà nindoò, 'ñó kjìn ma chinga xi nchikjèn-jno jjiìn ijñá. Jñà inima ch'o-la neí, tsibítsi'ba-la Jesús nga tsjá'nde-la nga ya kjoahas'en-jiiìn yijo-la chinga. Jesús, kitsjaà'nde-la.

³³ Jñà inima ch'o-la neí, nga jye itjojiìn yijo-la xita jè, ikjoàn jahas'en-jiiìn yijo-la jñà chinga. Ikjoàn jñà chinga tsatíkájajen-jno ya naxi skanda jjiìn nandá; yaá k'en-jiiìn nandá ngats'ii jñà chinga.

³⁴ Jñà xita xi nchikondà chinga, k'e nga kijtseè kjoa xi komà, tsangachikon nga kisikí'nchré naxandá kóhokji ñánda rancho.

³⁵ Jñà xita naxandá, k'e nga kii'nchré, itjo katsejèn jñà kjoa xi komà. Kii ñánda tíjna Jesús. Tikoá ya tíjnat'aà ndsoko Jesús jè xita xi jye itjojiìn-ne yijo-la jñà inima ch'o-la neí. Jyee íkjá-ne nikje-la, tikoáá jyee ndaà tíjn-ne kjohítsjeèn-la. Jñà xita k'e nga kijtseèxon, tà kitsakjòn-la.

³⁶ Jñà xita xi kijtseè kjoa koi, tsibénojmí-la xíkjin kó s'ín komà nga kjòndaà-ne jè xita xi inima ch'o-la neí kisijiìn yijo-la.

³⁷ Ngats'ii xita xi títsajna ya nangui-la xita Gadareno, kóhokji jngoò itjandi, tsibítsi'ba-la Jesús nga kàtji-ne, koi kjoa-la nga 'ñó kitsakjòn xita koi. Jesús jahas'en-ne chitso, ikjoàn kii-ne.

³⁸ Jè xita xi jye itjokàjiìn-ne yijo-la inima ch'o-la neí tsibítsi'ba-la Jesús nga mejèn-la nga ya kojmeiiko; tanga jè Jesús kitsjaà-la okixi nga kàtjna; kitsò-la:

³⁹ —T'in-ne ni'ya-lè, tènójmí yije-la xita nga 'ñó tse kjoa kàsiko-lè Nainá.

Xita jè, kii-ne; ikjoàn tsibíts'ia nga tsibénojmí, kisihingasòn 'én kóhokji naxandá jè nga 'ñó tse kjoa kisiko Jesús xi it'aà ts'e.

*Tsòti-la Jairo ko chjoón xi kitsobà itjòn nikje-la Jesús
(Mateo 9:18-26; Marcos 5:21-43)*

⁴⁰ K'e nga jye j'ii ñngoò k'a-ne Jesús ján xijngoàà ndáchikon, kjòtsjaá-la jñà xita xi kjìn ma-ne, koi kjoa-la nga ngats'ii, nchikoña-la.

⁴¹ J'iikon jngoò xita sko-la xi ts'e ni'ya ingo sinagoga xi 'mì Jairo; tsasèn-xkó'nchit'aà ndsoko Jesús, tsibítsi'ba-la nga mejèn-la kjiko ni'ya-la.

⁴² Koi xá j'iikjaá-ne nga jye tíbiyaà ndí tsòti-la xi tajngoò ma-ne xi tejò nó tíjn-la.

Jesús, k'e nga tífi, jñà xita nga kjìn ma-ne, chiba-la tsohó'nchò'ñó-né.

⁴³ Ya tsóhojiìn jngoò chjoón xi jye kjò tejò nó tíjn-la ch'in jní. Jye kjò tse ton ko tsojmí xi tíjn-la kisikjeheya xi kjoa ts'e chjinekki; mikiì mandaà-ne nita ya xi síxkiì-la.

⁴⁴ Chjoón jè, kii kasit'aà chraña-la Jesús ya ijton íts'in nga kitsobà'ñó itjòn nikje-la, koa jè jní xi tíxíteèn-la, nitoón kisijyò-ne.

⁴⁵ K'ée kiskònangui Jesús, kitsò:

—¿Yá-né xi kàtsobà-na?

Ngats'ii xita kitsò:

—Mìtsà yá-jèn.

K'ée kitsò Pedro ko xita xi i'nga:

—Maestro, jñà xita nga kjìn ma-ne fàhitjen-lè koa ó'nchò'ñó-lè, ngaji si-né: “¿Yá-né xi kàtsobà-na?”

⁴⁶ Jesús kitsò ñngoò k'a:

—Tjín xi kàtsobà-na; kàbeýaá-na nga kòbitjojiìn nga'ñó yijo-na.

⁴⁷ Jè chjoón, k'e nga kijtseè nga mikiì koma kójna'ma nga ki'yat'in-la, chiba-la tíhotsé yijo-la nga tsasèn-xkó'nchit'aà-la Jesús. Tsibénojmí-la nga nguixkon ngats'ii xita naxandá mé kjoa-ne nga nikje-la Jesús kitsobà-ne, koa kó s'ín nga nìton kjòndaà-ne ch'in-la.

⁴⁸ Jesús kitsò-la:

—Ndí neaa, koi-né nga mokjeiín-lè it'aà ts'an nga kòmandaa-ne. T'in-là ndaa-ne.

⁴⁹Tákó tìk'eé tíchja-ìsa Jesús nga j'ìi jngoò xìtá xi ts'e xìtá ítjòn xi inchrobà-ne ni'ya-là nga kitsò:

—Ndí tsòti-lè jyeé k'en; kì tì kii nìjti-là Maestro.

⁵⁰K'e nga kii'nchré Jesús kitsò-là:

—Kì tsakjoòn-jèn; tà jè-né nga kàtakjeiín-lè, jè ndí tsòti-lè kòndaá-ne.

⁵¹K'e nga jahas'en ni'ya, Jesús, mìkii kitsjaà'nde-là xìtá xi kj'ejí nga jahas'en-kò, tà jè Pedro, Jacobo, Juan, kò na'èn-là kò nea-là ndí tsòti.

⁵²Ngats'ìi xìtá xi títsajna, nchikjindáya-né koa nchisíkájno-né xi it'aà ts'e ndí tsòti. Tanga jè Jesús kitsò-là:

—Kì chihindáya-jèn; mìtsà kòbiyaà ndí tsòti, tà kjinafè-né.

⁵³Jñà xìtá xi títsajna tà tsijnòkèè Jesús nga tíjìin-là nga jyeé k'en.

⁵⁴Tanga Jesús kiskoé tsja ndí tsòti; 'ñó kiiichja-là kitsò-là:

—Tsòti, itisítjìin!

⁵⁵J'ìi ìjngoò k'a-ne inìma-là; ìkjoàn nìtoón tsasítjen; Jesús kitsjaà okixi nga tsjá-là xi skine.

⁵⁶Jñà xìtá jchínga-là, tà kjòxkón-là; tanga jè Jesús kitsò-là:

—Kì yá xìtá xi bènojímí-là jè kjoa xi kòma.

9

K'e nga jè Jesús kitsjaà-là xá xìtá-là xi tejò ma-ne

(Mateo 10:5-15; Marcos 6:7-13)

¹Jesús kiiichja-là xìtá-là xi tejò ma-ne xi jè tsibíxáya-là; kitsjaà-là nga'ñó kò kjotíxoma nga kòchrjeiìn yije inìma ch'o-là neíi xi tíjìin yijo-là xìtá; tìkoá kòma-là sùindaà-ne xìtá xi ch'in xk'én tjín-là.

²Kisikasén nga kichjaya kó s'ín otíxoma Nainá, tìkoá sùindaà-ne xìtá xi ch'in tjín-là.

³Kitsò-là:

—Nimé xi ch'aà xi ts'e ndiyá; kì yá garrote ch'aà; kì na'yaá ch'aà; kì inchrajín ch'aà; kì toón ch'aà; tìkoá kì jò nachro ch'aà.

⁴Nita ñánda ni'ya nga kijchoò, yaá títsajna, skanda k'e kitjoo-nò.

⁵Tsà jngoò naxandá ñánda kijchoò, tsà mìkii skoétjò-nò, titjójñoò, titsajneè chijo-là ndsokoò nga kàteè kjoa koi koni jngoò seña, nga jñò, mì tì kii s'is'in-là; kjo'íin s'e-là nga mìkii mokjeiín-là.

⁶Itjo xìtá koi, xkì xi ján naxandá kii; kisi'ká'bí 'én ndaa-là Nainá xi kjoa ts'e Cristo; tìkoáá kisiindaà-ne xìtá xi ch'in tjín-là nga kjiindà naxandá.

K'e nga k'en Juan xi kis'ìin bautizar xìtá

(Mateo 14:1-12; Marcos 6:14-29)

⁷Jè xìtaxá ítjòn xi 'mì Herodes, k'e nga kii'nchré ngats'ìi kjoa xi tís'ín Jesús, mìkii beè kó s'ín sùikítsjeèn, nga tjín i'nga xìtá xi tsò: “Juan, jyeé jaáya-là.”

⁸Xìtá xi i'nga tsò: “Jè Elías xi tsatsejèn ìjngoò k'a-ne.” Tìkoáá xìtá xi kj'ejí tsò: “Jaáya jngoò-là xìtá jchínga xi kiiichja ngajo-là Nainá.”

⁹Kitsò Herodes:

—'An sobà tsibíxá-là xìtá xi kisi'k'en Juan nga tsatesin. ¿Yá xìtá-ne jè xi kòs'ín tís'ín kjoa xi 'nchrè?

K'oaá ma-ne nga mejèn-là skoexkon Jesús.

K'e nga 'òn jmii xìtá kisi'k'èn Jesús

(Mateo 14:13-21; Marcos 6:30-44; Juan 6:1-14)

¹⁰ K'e nga j'ii ìjngòò k'a-ne jñà xità xi tsibíxáya-là Jesús, tsibénojmi ngats'ii kjoa xi kis'iin. Jesús, k'ée kiikò jngòò i'nde ts'e naxandá Betsaida ñánda tsjin xita.

¹¹ Jñà xita, k'e nga kii'nchré nga jye kii Jesús, kùtjìngui-là; k'e nga ijchòtjìngui-là, Jesús, kisis'in-là, tsohóko, tsibénojmi-là kó s'ín otíxoma Nainá, tìkoa kisindaà-ne xita xi mochjeén-là nga kondaà-ne.

¹² K'e nga jye tímahixòn, jñà xita-là xi tejò ma-ne, ijchò kinchat'aà-là Jesús, kitsò-là:

—Kot'in-là ngats'ii xita kàtji-ne mé-ne nga kàtasíkjáya ya naxandá chrañat'aà kò rancho ñánda sakò-là xi skine. I i'nde ñánda titsajnaá, it'aà xìn-né, nímé tjín.

¹³ Jesús kitsò-là:

—Tjii-là jñò xi kòkjen xita koi.

Jñà xita-là kitsò:

—Nímé tjín-najen, tà 'òn ma inchrájin-najen koa jò ma tin, tà jè-la tsà konguí kindaa-lajen xi kòkjen ngats'ii xita koi.

¹⁴ Maá-là tsà 'òn jmiì xi ngui xita x'in.

Jesús kitsò-là xita xi kota'yat'aà-là:

—Tíkítsajnajtión, icháte icháte tíkítsajna-nò.

¹⁵ K'oaá s'ín kisíkítsajna kóhotjín.

¹⁶ Jesús, kiskoé jñà inchrájin xi 'òn ma-ne kò jñà tin xi jò ma-ne; ikjoàn kiskoòtsejèn ngajmiì; kitsjaà-là kjondaà Nainá; ikjoàn kisixkoaya inchrájin, k'ée kitsjaà-là jñà xita xi kota'yat'aà-là nga kisika'bí-là jñà xita xi kjin ma-ne.

¹⁷ Tsakjèn yije kóhotjín xita, kó nga kjòskiì; k'ée tsibíxkó-ne jñà xi tsiningui-ne; ngui tejò nisiyá komà.

*Kós'ín kiichja Pedro nga jè Jesús xi Cristo
(Mateo 16:13-19; Marcos 8:27-29)*

¹⁸ Jngòò k'a k'e nga tíjnat'aàxìn Jesús nga tíchjat'aà-là Nainá, ya títsajnakò xita xi kota'yat'aà-là. Jesús kiskònangui, kitsò-là:

—¿Kó tsò xita, yá-ná 'an?

¹⁹ Jñà xita-là kitsò:

—Tjín xi tsò: jè Juan xi kis'iin bautizar xita, tìkoaá tjín xi tsò: jè Elías, koa tjín i'nga xi tsò: jaáyaá-là jngòò-là xita xi chinchima kjòtseé xi kiichja ngajo-la Nainá.

²⁰ Jesús kiskònangui-là kitsò-là:

—Jñò, kó bixón. ¿Yá-ná 'an?

K'ée kiichja Pedro, kitsò:

—Ji-né xi Cristo xi xó kisikasén-lè Nainá.

*K'oaá s'ín tsibénojmi Jesús kjoabiyaà-là
(Mateo 16:20-28; Marcos 8:30-9:1)*

²¹ Tanga Jesús 'ñó tsibít'in-là nga mì yá xita xi keènojmi-là kjoa koi.

²² Kitsò-là:

—'An xi Ki'ndí-là Xita xan-là yijo-na, tseé kjo'in siikjiaán; kochrje-nguií-na jñà xita jhínga, kò xita skò-là nò'miì kò xita xi okóya kjotíxoma-là Nainá xi kiskii Moisés. Siik'eén-na tanga k'e nga kijchò jàn nachrjein kjoaáya-na.

²³ Xi komà iskan kitsò-là kóhotjín:

—Tsà yá xi mejèn-là nga xita ts'an koma, kàtatsjeiìn-takòn mé xi mejèn-là yijo-là; koni jngòò xita xi 'yajen krò-là, nachrjein inchiòn kàtijnandaà nga siikjeiìn kjo'in xi kjoa ts'an; ndaà kàtjìt'aà-na.

24 Nga n̄ita yá x̄ita xi mejèn-la kochrjetjì yijo-la nga n̄imé kjo'in sakò-la, tà saá s̄ichija-né kò kjo'in kíjnajìin; tanga jè xi t̄ijnandaà nga tsjá yijo-la xi kjoa ts'an, jè-né xi kitjokàjìin kjo'in nga it'aà ts'an ndaà kíjna.

25 ¿Mé xi s̄ikijne jngòò x̄ita nas'in tjoé yije-la isò'nde tsà chija in̄ima-la koa s̄ikits'ón yijo-la? N̄imé.

26 Tsà t̄jín i'nga x̄ita xi kosobà-la it'aà ts'an kò it'aà ts'e 'én-na, t̄ikoaá 'an xi Ki'ndí-la X̄ita xan-la yijo-na, kosobà-na k'e nga kitjojen ìjngòò k'a nga skoe x̄ita kjoajeya-na, skoe kjoajeya-la Na'èn-na t̄ikoa skoe kjoajeya-la ts'e àkjale tsjeè-la Nainá.

27 Xi okixi, k'oaá xán-nò, ìjndé t̄itsajnajìin i'nga x̄ita xi mìkiì kiyá skanda k'e nga skoe kó s'ín otíxoma Nainá.

*Kíi komà k'e nga jè Jesús jahatjìya í'ño isén-la kóhokji yijo-la
(Mateo 17:1-8; Marcos 9:2-8)*

28 T̄jín-la tsà kó jìin nachrjein nga tsibénojímí 'én koi, Jesús, kiimijìn-jno jngòò nindoò nga kiichjat'aà-la Nainá. Kìikò Pedro, Juan kò Jacobo.

29 K'e nga tíchjat'aà-la Nainá, Jesús, jahatjìya í'ño isén-la; jè nikje-la 'ño kjòchroba; tsí ote tsatsejèn.

30 Jò x̄ita x'in tsatsejèn xi nchijoókjoò Jesús, jè Moisés kò Elías.

31 X̄ita koi, tsí ote choòn kjoajeya-la nga jngòò itjandì ñánda jncha. Nchi-joóya-ne nga jè Jesús, jye tífi síkitasòn kjoa ján Jerusalén nga ya kiyá.

32 Jè Pedro kò x̄ita xíkjin, tsí 'ño nijñá-la, tanga k'e nga jye kitjaàxìn-la nijñá kijtseexon kjoajeya-la Jesús kò jñà x̄ita xi jò ma-ne xi t̄itsajnakò.

33 K'e nga jye chinchat'aà xìn-la Jesús x̄ita koi, jè Pedro kitsò:

—Maestro, ndaà t̄jín nga ì t̄itsajnaá. Kíndaá jàn ni'ya xkójndà, jngòò tsiji, jngòò ts'e Moisés, jè xi ìjngòò ts'e Elías.

Jè Pedro tà k'oaá kitsò, mì t̄i kii beè-ne kó s'ín kichja.

34 T̄ik'e-né nga tíchja Pedro, j'ì jngòò 'nguién-la ifi xi tsibí'ma x̄ita koi. K'e nga jahas'en-jìin ifi, tà kitsakjòn-né.

35 Ya jjiin ifi kina'yà jngòò-la 'én xi kitsò:

—Jè jèe xi ki'ndí-na xi 'ño matsjake, jè t̄iná'ya-là.

36 K'e nga jye kina'yà-la 'én koi tà jè tajngòò síjna-isa Jesús. Nachrjein koi jñà x̄ita-la jyò tsibìtsajna, n̄imé 'én xi kiichja, mìtsà yá x̄ita tsibénojímí-la kjoa xi kijtsee.

*K'e nga jè Jesús kisindaà jngòò-ne ti xi in̄ima ch'o-la neíí t̄jìin in̄ima-la
(Mateo 17:14-21; Marcos 9:14-29)*

37 Xi komà inchijòn, k'e nga itjojen-jno-ne nindoò, 'ño kjìn x̄ita kisatìikjoò.

38 K'ée jngòò x̄ita xi ya t̄ijnajìin-la x̄ita kjìn, 'ño kiichja, kitsò-la Jesús:

—Maestro, t̄ibitsi'bà-lè nga chítsejèn-la ki'ndí-na xi tà jè tajngòò-ne.

39 Jngòò in̄ima ch'o-la neíí tsobà'ño; tà n̄itoón kjindáya, ìkjoàn 'ño síkatsé yijo-la; ochrje ndáxó tso'ba; tse kjo'in tsjá-la, mìkiì xátí tsjeiìn.

40 Kàbìtsi'bà-la jñà x̄ita xi kota'yàt'aà-lè nga kàtachrjekàjìin in̄ima ch'o xi t̄jìin yijo-la, tanga mìkiì kòma-la.

41 K'ée kiichja Jesús kitsò:

—Jñò, x̄ita xi mìkiì mokjeiìn-nò it'aà ts'an, xi ch'o 'nè. ¿Skanda mé nachrjein kótijnakò-nò koa ska-na kjoa-nò? Nchrohókoi ki'ndí-lè ìjndé.

42 K'e nga tíchrobá chrañà jè t̄i, jè in̄ima ch'o-la neíí, tsajndoòt'aà nangui, ìkjoàn kisikatsé yijo-la; tanga jè Jesús, tsohótiko jè in̄ima ch'o-la neíí, ìkjoàn kisindaà-ne jè t̄i; kisingsatsja-ne na'èn-la.

43 Ngats'ìi x̄ita tà kjòxkón-la jè kjoajeya-la Nainá.

K'oaá s'ín tsibénojmi Jesús kjoabiyaà-la xi ma-ne jò k'a
(Mateo 17:22-23; Marcos 9:30-32)

Ngats'ii kjoa xi kis'iin Jesús, tikoáà tà kjòxkón-la ngats'ii xita. Jesús kitsò-la jña xita xi kota'yàt'aà-la:

⁴⁴ —Ndaà tiná'yaà jña 'én koi; kì nìjchàajiin-jèn: 'An xi Ki'ndí-la Xita xan-la yijo-na yaá sùngatsja-na xita nguixkon xitaxá.

⁴⁵ Jña xita-la mìkiì kjòchiya-la jè 'én xi kos'ín kitsò-la. Nainá tsibí'ma-né nga mìkiì kjoahas'en-jiin-la; tà kitsakjòn-né, mìkiì kiskònangui-la Jesús kó tsòya-ne 'én xi tsibénojmi-la.

Yá xita xíkjin xi kjna ítjòn
(Mateo 18:1-5; Marcos 9:33-37)

⁴⁶ Xita xi kota'yàt'aà-la Jesús, tsibíts'ia nga tsajoóya-ne yá xita xíkjin xi kjna ítjòn.

⁴⁷ Jesús, k'e nga kijtseè koni s'ín nchisíkítsjeèn, kiskoé jngoò ndí ti, kisikíjnat'aà-la yijo-la,

⁴⁸ kitsò-la:

—Nita yá-ne xi it'aà ts'an skoétjò jngoò ndí ti koni jè, 'aán xi skoétjò-na; jè xi skoétjò-na, tikoáà skoétjò-né jè xi kisikasén-na. Koi kjoa-la, jè xi isa nangui tíjna xi ya tíjnajiin-nò, jè-né xi isa tíjna ítjòn.

Yá xi kondra-la Cristo ko yá xi xita ts'e
(Marcos 9:38-40)

⁴⁹ Juan kitsò:

—Maestro, ki'ya jngoò-jen xita xi ko 'ín-lè ochrjekàjiin inima ch'o-la neí xi tíjin yijo-la xita; mìkiì kits'ii'nde-lajen nga mìtsà xita tsaján xi jña fit'aà-ná.

⁵⁰ Jesús kitsò-la:

—Kì bichakjáya-là. Jè xi mìtsà kondra tsaján, xita tsaján-ná.

K'e nga jè Jesús tsohótiko Jacobo ko Juan

⁵¹ K'e nga jye kjòchraña nàchrjein nga kjoì jngoò k'a-ne Jesús ján ngajmii, 'nó tsi'beé-la ikon nga kii ján Jerusalén.

⁵² Kisikasén ítjòn i'nga xita-la jngoò naxandá jtobá ján nangui Samaria. Kii kátsji'nde ñánda síkjáya.

⁵³ Jña xita Samaria mìkiì kitsjaà'nde-la nga jyeé tíjin-la nga ján nchifi Jerusalén.

⁵⁴ Xita xi kota'yàt'aà-la Jesús, Jacobo ko Juan, k'e nga kijtseè nga mìkiì kitsjaà'nde-la kitsò:

—Na'èn, ¿a mejèn-lè nga k'oa kixón-jen nga kàtjanchrobá-jen ni'ín xi ts'e ngajmii nga kàtjehesòn xita koi koni s'ín kis'iin Elías?

⁵⁵ Tanga jè Jesús kisikátji'a, tsohótiko. Kitsò-la:

—Jñò, mìkiì tíjin-nò yá ts'e inima xi kàtsjá-nò kjohítsjeèn jè.

⁵⁶ 'An xi Ki'ndí-la Xita xan-la yijo-na, mìtsà koi xá j'i-na nga kàtachija inima-la xita; jè-né nga kàtitjokàjiin kjo'in.

Ikjoàn xìn naxandá kii.

Jè xi mejèn-la nga kjitjingui-la Jesús
(Mateo 8:19-22)

⁵⁷ K'e nga nchifiya ndiyá, jngoò xita kitsò-la:

—Na'èn, kjitjingui-lè nita ñánda-ne nga k'oín.

⁵⁸ Jesús kitsò-la:

—Jña njnda, tjín-la nguijo ñánda oyijò; tikoáà jña njise tjín-la tjé; tanga 'an xi Ki'ndí-la Xita xan-la yijo-na, tsjin-na i'nde ñánda síkjáya.

⁵⁹ Jesús kitsò jngoò-la xita:

—Nchrobátjngui-ná.

Jè x̄ita xi oki'mì-la kitsò:

—Na'èn, tji'nde-ná nga ítjòn kjián k̄ihijñaà na'èn-na.

⁶⁰ Jesús kitsò-la:

—Jñà mik'en kàt̄ihijìn mik'en-la; ngaji t'in, t̄ika'bí 'én kó s'ín otíxoma Nainá.

⁶¹ J̄ngò x̄ita xi k'oá t̄i kitsò:

—Kjít̄jnguí-lè ngaji Na'èn, t̄anga tji'nde-ná nga kjián síhixat'aà ítjòn jñà x̄ita xi t̄ítsajna ni'ya-na.

⁶² Jesús kitsò-la:

—Nj̄ngò x̄ita xi ijton ít̄s'in t̄ikotsejèn-ne koma síkitasòn xá-la Nainá nga jè tíhotíxoma. K'oáá ngaya-la tsà j̄ngò x̄ita xi t̄ísíkon nchraja, tsà ijton ít̄s'in t̄ikotsejèn-ne, mìkì koma síxá.

10

Xá xi kits'ù-la x̄ita xi jàn-kaàn k̄o te ma-ne

¹ K'e nga jye komà kjoá koi, Na'èn-ná Jesús kitsjaà-la xá ngui jàn-kaàn k̄o te x̄ita xi k̄'ejí. Jò jò kisikasén ítjòn nga kj̄jndà naxandá k̄o i'nde ñánda nga ìsa ìskan k̄oj̄ jè.

² Kitsò-la:

—Xi okixi, 'ñó tse xá t̄jín xi it'aà ts'e 'Én-la Nainá koni s'ín ma k'e nga kj̄j̄n tsojmì majchá, t̄anga jñà x̄ita ch̄i'nda xi síxá, chiba ma-ne. T̄itsi'ba-là jè Nei-la xá, k̄atasikasén-ìsa x̄ita ch̄i'nda xi k̄oj̄xkó tsojmì koi.

³ Tanguió; 'aán síikasén-nò koni orrè ki'ndí ya j̄j̄in-la ch̄o tsején.

⁴ Kì chijtsa t̄on ch'aà, k̄i naxá na'yaá ch'aà, n̄i xoxté tsjayaà; t̄ikoáá mìkì yá x̄ita xi ñhixat'aà ya j̄ya ndiyá.

⁵ N̄ita ñánda ni'ya nga k̄itjás'een, ítjòn k'oá tixón: “Nchán k̄atas'e ni'ya jè.”

⁶ Ni'ya jè, tsà t̄jín x̄ita xi ok'in-la nga s'e-la kjoá'nchán, k̄itasòn-né; tsà maj̄n, mìkì k̄itasòn.

⁷ T̄ítsajna ya ni'ya ñánda k̄itjás'een; k̄i x̄k̄i xi ján ni'ya onguió; ch̄inee, t'ioo mé tsojmì xi tsjá-nò. Jè x̄ita xi síxá mochjeén-né nga k'oí-la ch̄j̄i-la.

⁸ K'e nga kijchoò j̄ngò naxandá ñánda tsjá'nde-nò, ch̄inee mé tsojmì xi tsjá-nò.

⁹ Tsà t̄jín x̄ita xi xk'én, t̄indaà-nò; koat̄in-là: “Jye kjòchrañat'aà-nò nga jchaa kó s'ín otíxoma Nainá.”

¹⁰ Tsà j̄ngò naxandá ñánda kijchoò, tsà mìkì tsjá'nde-nò, t̄itjayaà ndiyá, koat̄in-là:

¹¹ “Skanda jè chijo-la naxandá-nò xi k̄atsobà'ñó ndsokò-jen, k̄itsajneè-nòjen koni j̄ngò seña nga mì t̄i k̄i s̄is'in-nòjen. T̄anga k̄atasij̄in-nò nga jye kjòchrañat'aà-nò nga jchaa kó s'ín otíxoma Nainá.”

¹² K'oáá xán-nò, naxandá jè, ìsáá tse k̄j̄o'in s'e-la jè nachrjein k'e nga s̄indaàj̄in-la x̄ita, mì k'oáá-ne koni jñà x̄ita ts'e naxandá Sodoma.

Mé k̄j̄o'in xi t̄joé-la naxandá xi mìkì sík̄jahatj̄ya k̄j̄oh̄tsjeèn-la k̄j̄oá ts'e jé-la (Mateo 11:20-24)

¹³ 'j̄l̄ma xó-nò jñò, x̄ita naxandá Corazín! j̄l̄ma xó-nò jñò, x̄ita naxandá Betsaida! Tsà ya-làne naxandá Tiro k̄o Sidón nga k'oás'ín kis'iaàn k̄j̄oxkón xi ndaà t̄jín xi komà ya j̄j̄in naxandá tsajòn, tsà jñà x̄ita Tiro k̄o Sidón k̄it̄seè, j̄yee-la nikje naxá íkjá k̄o chijo ni'in t̄ítsaj̄in koni seña nga jye kisikájno jé-la nga mì t̄i jé ótsji-ne.

¹⁴ T̄anga jè nachrjein nga s̄indaàj̄in, ìsáá tse k̄j̄o'in s'e-nò mì k'oáá-ne koni jñà x̄ita naxandá Tiro k̄o Sidón.

15 Jñò xi x̄ita naxandá Capernaum tsajòn, ¿a k'oaá s'ín mokjeiín-nò nga jchaxkón-nò ján ngajmii? Majìn, yaá kitsajnajñò ì'nde ñánda t̄jín k̄jo'in.

16 'Jè xi 'nchré-nò, 'aán xi 'nchré-na; jè xi kochrjengui-nò, 'aán xi ochrjengui-na; jè xi kochrjengui-na, jè ochrjengui xi kisìkasén-na.

Mé-ne kjòtsja-la jñà x̄ita xi jàn-kaàn k̄o te ma-ne

17 J'ii-ne jñà x̄ita xi jàn-kaàn k̄o te ma-ne. 'Nó tsja t̄jín-la, kitsò:

—Na'èn, xi it'aà tsiji, skanda jñà inima ch'o-la neí síkitasòn-najen.

18 Jesús kitsò-la:

—Kixí kjoa, k̄ijtseè-ná jè x̄ita neí koni k̄ji ni'ín ch'oón k̄ji nga kiskaàngui it'aà ngajmii.

19 'An, jyeé kitsjaà-nò kjotíxoma k̄o nga'ño nga koma k̄inchanè ye k̄o cho na'yá, nga sikijneè-là ngats'ii nga'ño-la x̄ita neí xi kondra tsajòn; n̄imé xi ch'o s̄ikò-nò.

20 Tanga k̄i matsja-nò nga jè inima ch'o-la x̄ita neí síkitasòn-nò; jè xi k̄atatsja-nò nga jye t̄jín-nò ì'nde ján ngajmii nga jyeé ya t̄jít'aà 'ín-nò.

Mé kjoa-ne nga jè Jesús kitsjaà-la kjondaà Na'èn-la it'aà ts'e x̄ita-la (Mateo 11:25-27; 13:16-17)

21 Tjè-ne hora, Jesús, tsjaá komà-la xi it'aà ts'e Inima Tsjeè-la Nainá; kitsò: —Na'èn, xi tsiji ngajmii k̄o tsiji isò'nde, tsjaà-lè kjondaà nga jñà kjoa koi tsibi'ma-la jñà x̄ita xi t̄jín-la kjoachjine k̄o xi 'ño t̄jín-la kjohitsjeèn nga jñà tsakoò-la xi taxk̄i ndí x̄ita ima kjoa. Jon, Na'èn, nga k'oaá s'ín kjòmejèn-lè.

22 'Ngats'ii kjoa ts'e kjotíxoma, 'aán kisingsja-na Na'èn-na. Mìtsà yá xi beèxkon yá-né xi Ki'ndí-la ma, tajngoò jè xi Na'èn ma; t̄ikoáà mìtsà yá xi beèxkon yá-né xi Na'èn ma, tajngoò jè xi Ki'ndí-la beèxkon, k̄o jè Ki'ndí-la kokò-la jñà x̄ita xi jè mejèn-la nga skoexkon, yá-né xi Na'èn ma.

23 Jesús kisikáfaya'a x̄ita xi kota'yàt'aà-la, tà jñà kiichjat'aà xin-la, kitsò-la:

—Mé tà ndaà-la jñà x̄ita xi xkon nchibeè-ne koni s'ín t̄itsa'yaà jñò.

24 K'oaá xán-nò, k̄jìn x̄ita xi kiichja ngajo-la Nainá, t̄ikoá k̄jìn x̄itaxá ítjòn xi kjòmejèn-la nga skoe jè kjoa xi jñò t̄itsa'yaà, tanga mìkì k̄ijtseè; t̄ikoáà kjòmejèn-la nga k̄jì'nchré jè xi t̄itsana'yà, tanga mìkì k̄i'nchré.

X̄ita samaritano xi ndaà x̄ita

25 Jngoò x̄ita chjine xojon ts'e kjotíxoma-la Nainá xi kiskii Moisés kiikon Jesús nga mejèn-la skónachan-la, kitsò:

—Maestro, ¿mé kjondaà xi s'iaàn nga k̄ijnakon inima-na n̄ita mé nachrjein-ne?

26 Jesús kitsò-la:

—¿Mé xi t̄jít'aà jè xojon ts'e kjotíxoma-la Nainá xi kiskii Moisés? ¿Kó tsò xi b̄ixkejiin?

27 Jè x̄ita chjine xojon kitsò:

—“T̄itsjachi Na'èn-ná xi Nainá 'mì-la nga k̄o inima-lè, k̄o nga'ño-lè, k̄o kjohitsjeèn-lè; koa t̄is'ín t̄itsjachi x̄ita xingui koni tsà t̄i yijo tsiji-ne.”

28 Jesús kitsò-la:

—Ndaà k̄anokjoi. Tsà k'oas'ín s'jin, k̄ijnakon-né.

29 Jè x̄ita chjine xojon mejèn-la nga ndaà s̄ik̄ijna yijo-la 'én xi kiskònangui; ijngoò k'a kiskònangui-la Jesús, kitsò:

—¿Yá-né xi x̄ita xinguiáa?

30 Jesús kitsò:

—Jngoò x̄ita tífjen ján ndiyá Jerusalén skanda Jericó. Ya iya ndiyá tsibíchoà-la x̄ita chijé. Tsafaá'an tsojmì-la k̄o nikje-la. 'Nó kisiki'on. Ikjoàn yaá kisikájna k'en ya iya ndiyá.

³¹ Tijè-ne ndiyá, k'e chiba-la jahajen jngoò no'miì, tanga k'e nga kijtseèxkon nga ya kjinaya ndiyá xita xi kitsi'on, tà jahat'aà xìn-la.

³² Tik'eé-ne ja jngoò xita levita [xi iya ingo síxá] k'oaá ti kis'iìn k'e nga kijtseèxkon xita jè nga kjinaya ndiyá; tikoáá tà jahat'aà xìn-la.

³³ Tanga k'e nga ijchò jngoò xita Samaria [xi xita kondra-la xita judío] nga koa tis'in tífi ndiyá jè, k'e nga kijtseèxkon, kjòhimakeè-né.

³⁴ Kii kasit'aà chraña-la. Kisìxkiì-la; kisikaájno asiti ko xán ñánda kitì-la. Ikjoàn tsibíjtéjìn; kisikíjnasòn-la kohòyo-la; kiìko jngoò ni'ya ñánda nga ma níkjáyaá. Jè kisikinda.

³⁵ Xi komà inchijòn k'e nga jye tífi-ne jè xita Samaria, tsibíchjí-la nei-la ni'ya, kitsjaà-la ton koni tjín chjí-la chí'nda xi jò nachrjein; kitsò-la: “Tikinda-ná xita jè. K'e nga kjoì ijngoò k'a-na kíchjía tsà isa tse síkje.”

³⁶ Ngaji, ¿kó si? Ingajàn xita koi, ¿yá-né xi xíkjin jè xita xi kisiki'on chijé?

³⁷ Jè xita chjine xojon kitsò:

—Jè xi xíkjin, jè xita xi kjòhimakeè.

Jesús kitsò-la:

—Ngaji, k'oaá tis'in t'iin.

K'e nga jè Jesús tsibijna ni'ya-la María ko Marta

³⁸ Jesús k'e nga tjímaya-isa iya ndiyá, ijchò jngoò ndí naxandá jtobá ñánda tíjna ni'ya-la chjoón xi 'mì Marta. Yaá kitsjaà'nde-la nga tsibijna.

³⁹ Jè Marta tíjna ijngoò-isa chjoón ndichja xi 'mì María. Jè María tsibijnat'aà ndsoko Jesús nga kii'nchré-la 'én xi tibenójmí.

⁴⁰ Tanga jè Marta, 'ño tísikájno xá xi tjín-la. Kii kasit'aà-la Jesús, kitsò-la:

—Na'èn, ¿a mì makájno-lè nga jè xinguiáa tajngoò síkjna-na nga s'iaàn xá? Kot'in-la katasíchjít'aà-na.

⁴¹ Jesús kiichja kitsò-la:

—Marta, Marta, tsí ndaà níkájnoi, tsí ndaà bìnè-la xá yijo-lè.

⁴² Tà jngoò kjoa xi 'ño mochjeén. Jè María ndaà tjín xi kòfaájìn; niyá xi kjoaáxìn-la kjoa jè.

11

K'e nga jè Jesús tsakóya kjoa ts'e nga bìtsi'baá (Mateo 6:9-15; 7:7-11)

¹ Jngoò k'a, Jesús tíjna jngoò i'nde ñánda tíchjat'aà-la Nainá; k'e nga jye kiichjat'aà-la, jngoò xita xi kota'yát'aà-la kitsò-la:

—Na'èn, takóya-nájen kó s'in kinókjoat'aà-lajen Nainá koni s'in kis'iìn Juan nga tsakóya-la xita xi kota'yát'aà-la.

² Jesús kitsò-la:

—K'e nga kinókjoat'aà-la, k'oaá s'in tixón:

Na'èn xi tijni ngajmiì, kàtayaxkón-la kjoajeya-lè nga tsjeè tijni.

Kàtjanchrobá kjotíxoma-lè.

K'oaas'in kàtama i it'aà nangui koni s'in mejèn-lè nga koma, koni s'in ma ján ngajmiì.

³ Tjii kjit'aà-nájen niño xi mochjeén-najen nga nachrjein inchijòn.

⁴ Tijchàat'aà-nájen jé-najen koni s'in nìchàat'aà-lajen ngats'ù xita xi ch'o síko-najen.

Ki kii bìi'ndi yá xi mejèn-la nga kot'aà-najen nga kinchátsji jé-jen.

⁵ Jesús kitsò-isa-la:

—Jñò, tsà tjín jngoò-nò amigo, tsà osen nitjen onguíchoòn, tsà k'oin-là: “Amigo, tikìña jàn-ná inchrajín-lè,

⁶ jngoò amigo-na kòf'iikon-na koa tsjìn-na mé xi tsjaà-la.”

⁷ Tsà jè amigo xi tǐjna inga ni'ya, tsà kǐtso: “Kì 'an nǐti-ná. Jè xotjoa ni'ya jyeé tíchjoàjto. Jǎà ndí ixti-na kǒ 'an jyeé kinikǐjáyajen. Mìkìi koma kósitjēen nga tsjaà-lè tsojmì xi mochjeén-lè.”

⁸ K'oaá xán-nò, nas'ín majìn-la nga osítjen nga amigo tsajòn, tsà 'ñó sǐsì-là, chaán kosítjen. Tsjá yije mé xi mejèn-nò.

⁹ K'oaá xan-nò: Tijé mé xi mejèn-nò, jè Nainá tsjá-nò; tǐnchátsjioò Nainá, sakó-nò; tǐnókjoat'aà-là Nainá mé xi mejèn-nò mé-ne skíx'a'nde-nò koni jngoò xotjoa.

¹⁰ Ngats'ìi xǐta xi sǐjé, tjoé-la, jè xi ótsji, sakò-la kǒ jè xi chjat'aà-la Nainá, tjáx'a'nde-la koni jngoò xotjoa.

¹¹ Jǎò xi na'èn 'mì-nò, tsà inchrájin sǐjé-nò ixti-nò, ¿a ndajoo k'oi-là? Majìn. Koa tsà tǐn sǐjé-nò, ¿a yéé k'oi-là? Majìn.

¹² Tsà chjoó sǐjé-nò, ¿a cho na'ya k'oi-là? Majìn.

¹³ Jǎò, nas'ín xǐta xi ch'o 'nè, ma-nò 'biì-là ixti-nò tsojmì xi ndaà kjoàn; jè Na'èn-nò xi tǐjna ngajmìi, isaá nǐton sǐs'in-nò nga tsjá-nò Inima Tsjeè-la tsà jǎò sǐjé't'aà-là.

Jngoò ni'ya xi jòya tǐjn

(Mateo 12:22-30; Marcos 3:20-27)

¹⁴ Jesús, tíhochrjejin inima ch'o-la neíi xi tǐjin inima-la jngoò xǐta xi mìkìi ma chja. Xǐta jè, k'e nga jye itjokàjin jè inima ch'o-la neíi, komà kǐichja-ne. Jǎà xǐta xi nchikotsejèn, tà kjòxkón-la jè kjoa jè.

¹⁵ Tanga tǐjn i'nga xǐta xi kitsò:

—Jè xǐta sko-la xǐta neíi xi 'mì Beelzebú, jè tsjá-la nga'ñó nga k'oas'ín ochrjekàjin inima ch'o-la neíi xi tǐjin inima-la xǐta.

¹⁶ Tǐjn i'nga xǐta xi mejèn-la skót'aà tsà kixǐ kjoa nga Nainá kisikasén Jesús; kisǐjé jngoò-la seña xi jeya tǐjn xi it'aà ts'e Nainá nchrobá-ne.

¹⁷ Jesús, tǐk'eé kǐjtseèya-la koni s'ín nchisíkǐtsejèn xǐta koi, kitsò-la:

—Ngats'ìi naxandá xi jòya tǐjn nga kondra tǐtsajna-la xǐkǐjn, ti yijo-laá tǐsíkixòña-ne; tǐk'oaá tsà jngoò ni'ya xǐta xi jòya tǐjn nga kondra tǐtsajna-la xǐkǐjn tǐk'oaá jngoò k'a tsjohoba xǐta.

¹⁸ Tsà tǐk'oa jè xǐta neíi, tsà jòya tǐs'ín xi tǐjè-ne yijo-la. ¿Kós'ín koma s'e-la nga'ñó nga kotixoma? Jǎò, bixón-nò nga 'an, koo nga'ñó-la Beelzebú ochrjekàjñaà inima ch'o-la neíi.

¹⁹ Tsà k'oas'ín tǐjn kjoa, jǎà xǐta tsajòn, ¿yá xi tsjá-la nga'ñó k'e nga ochrjekàjin neíi? Koií kjoa-la, tǐjǎà-ne xǐta-nò keènojmi nga mìtsà kixǐ kjoa nga jè sko-la neíi sǐkjeén.

²⁰ Tanga 'an, k'e nga ochrjekàjñaà inima ch'o-la neíi xi tǐjin inima-la xǐta, jè Nainá tsjá-na nga'ñó. Jè kjoa koi tsòyaá-ne nga Nainá, jyeé i tíhotixoma i it'aà nanguí.

²¹ K'e nga jngoò xǐta xi tǐjn-la nga'ñó kǒ tǐjn-la kǐcha, kǒ ndaà síkinda ni'ya-la, ndaà jncha tsojmì xi tǐjn-la.

²² Tanga tsà kjoíi jngoò xi k'jeíi xǐta xi isa tse nga'ñó tǐjn-la, sǐikijne-la, kjoaá'an yije kǐcha xi ma'ñót'aà takòn, ikjoàn sǐjòya yije tsojmì xi tǐjn-la; kjiko-né.

²³ Nǐton yá xǐta-ne xi mì 'an fit'aà-na, jè-né xi kondra-na; koma nǐta yá xǐta-ne xi mìkìi síchjat'aà-na nga bíxkóyako-na xǐta xi ts'an koma, jè tǐsǐtsjohoba xǐta.

Mé xi mat'in xǐta k'e nga f'ù jngoò k'a-ne inima ch'o-la neíi

(Mateo 12:43-45)

²⁴ K'e nga jngoò inima ch'o-la neí bitjokàjiin inima-la jngoò xita, yaá ojmeè i'nde ñánda kixi choòn, ótsji'nde nga síikjáya. K'e nga mìkì sakó'nde-la, ijngoò k'a síkítsejèn, tsò: “Kjín-la ijngoò k'a-na ni'ya-na ñánda inchrobà-na.”

²⁵ K'e nga bijchó ijngoò k'a-ne ni'ya-la, beè nga ndaà kisatiìcha kò tsjeè choòn.

²⁶ Ikjoàn fikjaá ngui itoò xíkjin xi isa ch'o s'in. K'ée fahas'en-jiin inima-la xita jè; yaá bitsajna. Xita jè, isaá 'ñó ch'o bijna koni s'in tsibijna nga sa ítjòn.

Yá xita-ne xi isa 'ñó ndaà-la

²⁷ Tik'e-né nga túbénojmi Jesús jña kjoa koi, kiichja jngoò chjoón xi ya tíjnajiin-la xita kjin, 'ñó kiichja, kitsò:

—jMé tà ndaà-la jè chjoón xi kisikatsejèn-lè isò'nde tikoá kisikaki-lè!

²⁸ Jesús kitsò:

—jIsaá ndaà-la jña xita xi 'nchré 'én-la Nainá, tikoá síkitasòn!

Xita xi kisijé jngoò kjoókón

(Mateo 12:38-42; Marcos 8:12)

²⁹ K'e nga jye kòkjìn xita ñánda tjina Jesús, tsibíts'ia nga kitsò:

—Xita xi tjín nachrjein i'nde, ch'oo s'in; síjé jngoò seña xi it'aà ts'e Nainá, tanga nijngoò seña skoe. Tà jè skoe seña ts'e Jonás.

³⁰ Koni s'in komát'in Jonás, jña xita naxandá Nínive kijtseè jngoò kjoókón xi ndaà tjín, 'an xi Ki'ndí-la Xita xan-la yijo-na, k'oaá tis'in tjín jè kjoa xi sa komat'ian; jña xita xi tjín i'nde skoeé kjoókón xi ndaà tjín.

³¹ Jè chjoón ítjòn xi ya otixoma nangui sur, kosítjen-né jè nachrjein k'e nga koìndaàjiin Nainá; jè tsját'in 'én jña xita xi tjín nachrjein i'nde, koi kjoa-la nga kjiin nangui j'ii-ne nga j'ii 'nchré-la kjoachjine-la Salomón; tanga nachrjein i'nde, 'an xi tichjàkò-nò, isaá 'ñó jeya tjina mi k'oaá-ne koni Salomón.

³² Jña xita naxandá Nínive kosítjen-né jè nachrjein k'e nga koìndaàjiin Nainá; jña tsját'in 'én jña xita xi tjín nachrjein i'nde, koi kjoa-la nga kisikájno jé-la nga mi tì jé tsohótsji-ne k'e nga kiichjaya 'én-la Nainá Jonás; tanga nachrjein i'nde, 'an xi tichjàkò-nò, isaá 'ñó jeya tjina mi k'oaá-ne koni Jonás.

Ni'in xi síhiseèn-la xita

(Mateo 5:15; 6:22-23)

³³ 'Nijngoò xita xi síkijna'ma k'e nga jngoò ni'in bí't'a'í. Mìtsà kaxa síkijnanguì; síkijna'nga-né, candelero síkijnaya mé-ne nga kohiseèn yije-la xita xi fahas'en ni'ya.

³⁴ Jña xkoaán, jè ma ni'in xi síhiseèn-la yijo-ná; k'e nga ndaà tsejèn-ná, iseèn choòn yije-la yijo-ná; tanga tsà mìkì ndaà tsejèn-la xkoìn, jño choòn-la yijo-lè.

³⁵ Ndaà chítsejìn, ¿a ndaà tjina inima-lè? ¿A iseèn choòn-la? ¿A xi jño choòn-la?

³⁶ Tsà iseèn choòn kóhokji yijo-lè, tsà mi ñánda tít'aà xi jño choòn, ndaà kotsejìn k'oaá गया-la koni tsà jngoò ni'in xi 'ñó títì tísihiseèn-lè.

K'e nga jè Jesús kisikaká-la xita fariseo kò xita chjine xojon ts'e kjotíxoma-la Nainá

(Mateo 23:1-36; Marcos 12:38-40; Lucas 20:45-47)

³⁷ K'e nga jye kiichja Jesús, jngoò xita fariseo kiichja-la nga mejèn-la kokjen-kò ya ni'ya-la. K'e nga jahas'en ni'ya Jesús, tsibijnat'aà ímíxa.

³⁸ Jè xita fariseo, tà k'oaá komà-la nga kijtseè nga jè Jesús, mìkì kisihitasòn kjotíxoma xi xkón tjín, mìkì tsanijno tsja nga tsakjèn.

³⁹ Kiichja Na'èn-ná Jesucristo, kitsò-la:

—Jñò, xi xita fariseo 'mì-nò, onìjnoò chitsín-nò kò chroba-nò ya isò'nga-la, tanga ijìn inima-nò, 'ñó fahajìn-nò nga chjaà'an-là tsojmì-la xita xi kj'eí tikoáá binchaàtsjioò kjoa xi ch'o tjin.

⁴⁰ Jñò xi xita tondo 'mì-nò. ¿A mì tjiin-nò: Nainá, k'e nga tsibíndaà isò'nga yijo-la xita, tikoáá tijè-ne xi tsibíndaà inima-la?

⁴¹ Tji-là xita ima kjondaà xi tjiin inima-nò mé-ne nga tsjeè kitsajnaà nguixkon Nainá.

⁴² 'Ima xó-nò xi xita fariseo 'mì-nò! Nga ma-nò bíchjí-là Nainá xi teya oko-la ts'e xka menta kò xka ruda ngats'ìi xka xi ma chine, tanga mìkìi kjoa kixi nikoo xita; mìkìi tjòcha 'yaà Nainá. Koi kjoa xi 'ñó mochjeén nga kitasòn; tikoáá mochjeén-né nga kitasòn jña kjoa xi i'nga.

⁴³ 'Ima xó-nò xi xita fariseo 'mì-nò! Nga mejèn-nò nga jñò kitsanè íxile xi jncha ítjòn ya ni'ya ingo sinagoga, tikoáá mejèn-nò nga skoexkón-nò xita xi kj'eí, ndaà sjaxat'aà-nò ya nditsin.

⁴⁴ 'Ima xó-nò jñò xita xi okoòya kjotixoma-la Nainá xi kiskii Moisés kò xi xita fariseo 'mì-nò xi jò ma isén-nò! K'oas'ín titsjoò koni kjoàn ngajo-la mik'en nga mìkìi tsejèn; k'e nga binchimasòn xita, mìkìi beè mé xi jnchaya.

⁴⁵ K'e kitsò jngoò jña xita chjine xojon:

—Maestro, k'e nga k'oas'ín nokjoi, tikoáá 'on nokjoàko-nájen.

⁴⁶ Jesús kitsò:

—Tikoáá, ima xó-nò jñò xi xita chjine xojon 'mì-nò! Nga binè-là kjotixoma-nò xita xi kj'eí xi 'ñó 'in tjin nga mìkìi chíkjoa-la nga síkitasòn, tanga jñò, ni itsé nìchjít'aà-là.

⁴⁷ 'Ima xó-nò xi bindaà chrjó-la mik'en ts'e jña xita xi kiichja ngajo-la Nainá! Jña xita jchínga-nò kisik'en.

⁴⁸ K'oáá s'ín bitjo kixi kjoa nga tíjngoò-takòn nga xita jchínga tsajòn kisik'en xita koi, koa jñò, bindaà chrjó-la mik'en.

⁴⁹ 'Xi kjohitsjeèn ts'e Nainá kitsò-né xi it'aà ts'e xita jchínga-nò kò tsajòn: “Siikasén xita xi kichja ngajo-na kò xita xi 'an kotixáya-la; tanga tjin xi sik'en koa tjin xi kondra kjoí tjingui-la.”

⁵⁰ Nainá kindáá sijé-la jña xita xi tjin i'ndeí, jní xi kixixteèn ngats'ìi xita xi k'en xi kiichja ngajo-la Nainá skanda k'e nga tisa kisindaà isò'nde;

⁵¹ mats'iaako-ne Abel xita xi k'en ítjòn skanda jè Zacarías xi jyehet'aà-ne nga k'en; jè xita xi k'en ya i'nde jngoò osen-la ñánda tjina Ni'ya Tsjeè-la Nainá kò ñánda binchásòn kjotjó xi tsjá-la Nainá jña xita. K'oáá xán-nò, jè Nainá sijé-la kindá jña xita xi tjin i'ndeí.

⁵² 'Ima xó-nò jñò xita xi okoòya kjotixoma-la Nainá xi kiskii Moisés! Binchachjoà-là xita xi kj'eí nga mìkìi kjoahas'en-jiin-la kjoa chjine-la Nainá; jñò, mìkìi bitjaas'en-jñoò kò mìkìi bì'nde-là xi kj'eí xita nga fahas'en-jiin kjoa chjine-la Nainá.

⁵³ K'e nga jye okitsò Jesús jña 'én koi, jña xita xi okóya kjotixoma-la Nainá kò xita fariseo 'ñó tsibít'aà-la nga kjìn skoya kjoa kiskònangui-la,

⁵⁴ tikoáá kisikinda nga skoe mé 'én xi kichja-isa mé-ne nga koma kohòngui-ne it'aà ts'e xitaxá.

12

Kjoa ts'e xita xi jò isén tjin-la

¹ K'e nga jye 'ñó kjìn jmiù kòkjìn xita, chiba-la otíjno, otít'aà xíkjín, tsibíts'ia Jesús nga kiichja ítjòn-la xita xi kota'yát'aà-la; kitsò-la:

—Tikinda yijo-nò it'aà ts'e xita fariseo xi jò isén tjin-la; kì k'oáá s'ín komat'ioòn koni ma na'yo san nga sísan xíkjín k'e nga otijin-la.

2 Nì mé tjín xi tíjtsa'ma xi mìkìi kòtsejèn; ngats'ìi xi tjí'ma, jchaá-la.

3 Ngats'ìi kjoa xi kìnókjoa'maà k'e nga nítjen, kji'nchré yije xita k'e nga nachrjein; jè kjoa xi ya kìnókjoa'maà iya ni'ya-nò, ján isò'nga ni'ya, 'nó kìná'ya-la.

*Yá-né xi kiskón-lá
(Mateo 10:26-31)*

4 'Jñò xi amigo ts'an xan-nò, kì tsakjoòn-là jñà xi ma-la sík'en yijo-ná; k'e nga jye ma, nì tì mé xi síko-isa-ná.

5 'An, k'oa xán-nò yá xi kiskón-là; jè xi tiskón-là, jè xi ma-la sík'en-ná, ikjoàn tjí'nde-la nga síkatjen-jìin-ná ñánda títi ni'ín xi ts'e kjo'in. K'oaá xan-nò, jè xi tiskón-là.

6 'K'e nga 'òn ndí nise, saá jò tòn satíjna-ne. Tanga Nainá, tjín-la kindá. Nijngòò nise síjchàajìin.

7 Xi it'aà tsajòn, isaá 'nó tse chjí-nò mì k'oaá-ne koni nas'ín 'nó kjin ma nise. Skanda tsajskoò tíxkeya yije-la Nainá. Kì tsakjoòn-jèn, nga Nainá 'nó ndaà s'ín-nò kindá.

*Jñà xi beèkón Jesús nga nguixkon xita
(Mateo 10:32-33; 12:32; 10:19-20)*

8 'Ngats'ìi xita xi tsjá 'én nga nguixkon xita nga 'an fit'aà-na, tikoáá 'an xi Kì'ndí-la Xita xan-la yijo-na, tsjaà-la 'én jñà àkjale-la Nainá nga xita ts'an xan-la.

9 Tanga jè xi kjojna'mat'in-na nga nguixkon xita, tikoáá si'mat'in-né nga nguixkon àkjale-la Nainá.

10 'Ngats'ìi xita xi ch'o tsò 'én xi kichajno-na 'an xi Kì'ndí-la Xita xan-la yijo-na, jchat'aà-la jé-la; tanga jñà xi kichajno-la Inima Tsjeè-la Nainá mìkìi jchat'aà-la jé-la.

11 'Jñò, k'e nga kjiiko-nò xita ya ni'ya ingo sinagoga, ya nguixkon xita ítjòn ko ts'e xitaxá, kì makájno-nò kó s'ín kixón nga kosiko yijo-nò mé 'én xi kìnókjoaa.

12 'K'e nga kijchò hora nga kìnókjoaa, jè Inima Tsjeè-la Nainá, keènojmiya-nò kó s'ín kixón.

Xi ts'e kjoa nchiná

13 Jngòò xita xi ya tíjnajìin-la xita kjin, kitsò-la Jesús:

—Maestro, kòt'in-la jè 'ndsè kàtasíjòya tsojmì-la xita jchínga-najen; xi 'an oko-na, kàtatsjá-na.

14 Tanga jè Jesús kitsò-la:

—Jì amigo, mìtsà xitaxá tjín-na nga 'an sìjòya-nò tsojmì xi tsajòn.

15 Jesús tikoáá kitsò-isa-la:

—Chítsejèn, tikoá t'een kindá yijo-nò; kì 'nó kjin tsojmì binchaàtsjioè ì isò'nde; nga jngòò xita, nas'ín 'nó kjin tsojmì tjín-la, mìkìi sìikíjnakon tsojmì-la.

16 Tikoáá tsibénojmi jngòò-la kjoa xi mangásòn; kitsò-la:

—Jngòò k'a jngòò xita xi 'nó nchiná, 'nó kjin tsojmì kòjchásòn nangui-la.

17 Xita jè, kisiíktsjeèn; kitsò: “¿Mé xi s'iaàn? Tsjìn-na ñánda kìnchaàxkoá tsojmì-na.”

18 'K'ée kitsò: “Jyeé be mé xi s'iaàn. Sìikixòña ni'nga-na, ikjoàn kìnndaà-isa xi isa ìi kjoàn; yaá kìnchaàxkoá yije kòhotjín tsojmì xi kòjchá-na ko xi tjín-na.

19 Ikjoàn xán-la yijo-na: Kjin tsojmì 'nchaxkó-na. Kjin nó koma-la; sìikjáya, kókjeen, skiaa, sìitsjakoaa isò'nde.”

20 Tanga jè Nainá kitsò-la: “Jì xi xita tònò 'mì-lè, nítjen jè, kiyá-né. Tsojmì xi 'nchaxkó-lè, ¿yá ts'e koma?”

21 K'oaá s'ín mat'in jñà xita xi tà tsojmì ts'e yijo-la bincháxkó koa mìtsà xita nchiná nga nguixkon Nainá.

*Kós'ín síkinda Nainá jñà xi ixti-la ma
(Mateo 6:25-34)*

22 Nga komà iskan Jesús kitsò-la xita xi kota'yàt'aà-la:

—Koií k'oa xan-nò: kì makájno-nò mé tsojmì xi chjinee nga sijchá yijo-nò ko mé nikje xi chikjá.

23 Ìsaá 'ñó tse chjì-la nga titsajnakoaán i isò'nde koni jñà tsojmì xi ma chine. Tikoá yijo-ná, ìsaá 'ñó tse chjì-la koni jñà nikje xi chikjá.

24 Chítsejèn-là jñà nchraá; mì jnoó 'beé, mì nijin bincháxkó, tsjin-la kaxa nojmé, tikoá tsjin-la ni'nga; tanga jè Nainá tsjá-la tsojmì xi kine. Jjñò, ìsaá 'ñó chjì-nò mì k'oaá-ne koni jñà cho xi tjimajiin isén!

25 Jñò, nas'ín takó 'ñó síkájnoò, ni itsé koma síkatonè-là nachrjein-nò koni s'ín tjindaà-la Nainá.

26 Tsà mìkiì ma-nò nìkitasòn kjoa xi chiba tjín, mé-ne nga jè nìkájno-nò kjoa xi isa chjá tjín.

27 'Chítsejèn-là naxó lirio, kó s'ín majchá; mìkiì síxá, mìkiì ma-la faña nikje; tanga 'an, k'oaá xan-nò, ndaà tsà jè Salomón xi xitaxá ítjòn tsibìjna nga 'ñó xita jeya, mì k'oaá kjoàn nikje tsohòkjá koni kjoàn jñà naxó.

28 Nainá, k'oaá s'ín ndaà kjoàn s'ín xka ijñá, xi jngoò nachrjein titsajnakon ko xi ma nchijòn kotsjòojiin ni'ín. Jñò xi xita 'mì-nò xi mìkiì ndaà mokjeiin-nò, ¿a mìtsà isa niton tsjá-nò Nainá nikje xi mochjeén-nò nga chikjá?

29 Jñò, kì nìkájno-jèn; kì bixón-jèn: “¿Mé xi chjineé; mé xi s'ioáá?”

30 Ngats'ii xita isò'nde, k'oaá tjín tsojmì xi ótsji, tanga jñò, tíjnaá-nò Na'èn xi Nainá; jyeé tíjiin-la nga kotjín tsojmì xi mochjeén-nò.

31 Jñò, tinchátsjioò kjoa ts'e Nainá koni s'ín otíxoma; ngats'ii tsojmì xi mochjeén-nò tikoáá tjoésòn-nò.

*Tsojmì xi 'ñó tse chjì-la ngajmii
(Mateo 6:19-21)*

32 Jñò, xi ndí orrè-na xan-nò, kì tsakjoòn-jèn; k'oaá s'ín kiskoòsòn-la Nainá nga jñò kotixomakjoò ya ñánda tíhotíxoma Nainá.

33 Tatijnaà tsojmì xi tjín-nò; tjii kjotjò-là jñà xita xi mochjeén-la; k'e nga tsà k'oas'ín s'een, k'oaá ngaya-la koni tsà nchisakó ngajo-nò chijtsa ton ján ngajmii xi mìkiì majchínga; sakò-nò tsojmì xi 'ñó tse chjì-la ján ngajmii ya ñánda mìkiì kjoehet'aà, mìkiì bijchó chijé, tikoá mìkiì síkje cho kixo.

34 Ya ñánda kinchajtiòn tsojmì-nò, tikoáá yaá síkítsjeèn inima-nò.

Chì'nda xi ndaà titsajnandaà

35 'Ndaà titsajnandaà nga síkitasòn-là Na'èn-ná koni jngoò xita xi ndaà tíkjá xincho-la ko ndaà títi ni'ín-la.

36 K'oaá s'ín ndaà titsajnakoòn koni jñà xita chì'nda xi nchikoña-la nei-la xi s'eí kòfi ñánda kòbixan xita, mé-ne k'e nga kjoí-ne, nei-la ni'ya kichja, síikjane xotjoa ni'ya, ikjoàn skíx'a-la.

37 Mé tà ndaà-la jñà xita chì'nda xi titsajnakon k'e nga kjoí-ne nei-la. Xi okixi, k'oaá xán-nò, jè sobà nei-la skoé nikje ot'aà-la nga koòt'aà koa síkítsajnat'aà ímixa-la, ikjoàn síikjèn.

38 Mé tà ndaà-la jñà chì'nda xi kos'ín titsajnakon nas'ín jye ijchò osen nitjen, nas'ín jye nchrohós'e isén nga kjoí-ne nei-la.

39 Tíjiin-nò tsà jngoò nei-la ni'ya síjiin-la mé hora kjoí xita chijé nga síichijé-la, kíjnakon-né nga mìkiì tsjá'nde nga kochijé-la.

⁴⁰ Jñò, k'oaá t̄is'ín t̄itsajna_{ndaà}; 'an xi Ki'ndí-la X̄ita xan-la yijo-na, kjōī ijngoò k'a k'e nga mìkì t̄itsachiñà kjoaa.

Chì'nda xi mì ndaà s'ín
(Mateo 24:45-51)

⁴¹ Pedro kiskònangui, kitsò:

—Na'èn, jè kjoa mangásòn xi tinokjoì, ¿a tà j̄iín xi ot̄i' m̄i-nájen, a xi kóhòtj̄ín x̄ita?

⁴² Kitsò Na'èn-ná Jesús:

—K'oaá xán-nò yá-né xi ch̄i'nda kixi xi t̄j̄ín-la kjoachj̄ine nga jè nei-la s̄ik̄ijna'nda j̄nà ch̄i'nda-la xi i'nga xi ya síxá ni'ya-la mé-ne nga k'e kijchò ch̄iba-la, s̄ikjèn ch̄i'nda x̄ikj̄ín.

⁴³ Mé tà ndaà-la jè ch̄i'nda xi k'oa's'ín ndaà t̄is̄ik̄itasòn k'e nga kjōī-ne nei-la.

⁴⁴ Okixī xi xan-nò, nei-la ch̄i'nda jè, jè s̄ik̄ijna'nda yije tsojm̄i xi t̄j̄ín-la.

⁴⁵ Tanga tsà jè ch̄i'nda jè k̄itso nga kòòko in̄ima-la: “Nei-na, k̄j̄in n̄achr̄jein kochr̄jein-la nga kjōī-ne.” Ikjoàn koīts'ia nga skaàn-kò ch̄i'nda x'ín x̄ikj̄ín, t̄ikoa k'oèè-la j̄nà ch̄i'nda íchj̄ín; kòkjen, koa skoí, koa koch'í.

⁴⁶ Ch̄i'nda jè, kjōī-ne nei-la jè n̄achr̄jein kò jè hora k'e nga mìkì t̄ikoña-la. 'Ñó tse kjo'in tsjá-la; yaá s̄ik̄ijnaj̄iín-la ñánda t̄itsajna x̄ita xi mìkì mokjeīn-la.

⁴⁷ Jè ch̄i'nda xi jye ndaà t̄j̄iín-la mé xi mejèn-la nei-la, tanga mìkì b̄ijnandaà, t̄ikoa mìkì síkitasòn koni s'ín sijé nei-la, koií jé xi koma-la nga 'ñó kojà-la nei-la.

⁴⁸ Tanga tsà jè ch̄i'nda, tsà mìkì t̄j̄iín-la nga kjo'in t̄j̄ín-la kjoa xi ch'o t̄j̄ín, isaá chiba kjo'in s'e-la. Jè xi tse kitjoé-la, isaá tse sijé-la; t̄ikoa jè xi tse k̄j̄ongatsja, t̄ikoaá isaá tse sijé-la.

Mé xi koma ya ni'ya-la x̄ita xi jè ngat̄j̄i-la kjoa ts'e Jesús
(Mateo 10:34-36)

⁴⁹ 'Koni jngoò ni'ín xi oká tjé kò síkijne-ngui xi tsjeè, koií xá j'i-na i' it'aà nangui nga kjoax̄in-la jé-la x̄ita mé-ne nga kòtsjeè-ne. Tsí mejèn-na tsà jye t̄ibitasòn.

⁵⁰ K'oaá s'ín t̄j̄inè-na nga tse kjo'in kòtojñàà; jtsí ndaà makájno-na skanda k'e nga k̄itasòn!

⁵¹ ¿A k'oaá s'ín n̄ik̄itsjeèn nga jè kjoa xi j'iikoaa nga 'nchán k̄itsajna x̄ita? Maj̄in, xán-nò, kjoas̄i k̄itsajnaj̄iín jè ngat̄j̄i-la kjoa ts'an.

⁵² Mats'ia-ne skanda i'ndēj kóni nga fi-isa n̄achr̄jein, k'oaá ngaya-la tsà 'òn ma x̄ita xi t̄itsajna nga jngoò ni'ya, jòya koma; xi jàn ma-ne skaàn-kjoòko xi jò ma-ne, j̄nà xi jò ma-ne skaàn-kò xi jàn ma-ne.

⁵³ Jò skoya s'e. Na'èn-la, kondra-laá koma jè ki'ndí-la; koa jè ki'ndí-la, kondra-laá koma na'èn-la; nea-la, kondra-laá koma tsòti-la; jè tsòti-la kondra-laá koma nea-la; n̄achíya-la, kondra-laá koma jè kja'nda-la; jè kja'nda-la kondra-laá koma n̄achíya-la.

Seña ts'e n̄achr̄jein
(Mateo 16:1-4; Marcos 8:11-13)

⁵⁴ Jesús t̄ikoa kitsò-la j̄nà x̄ita xi k̄j̄in ma-ne:

—K'e nga 'yaà nga nchrobá ifi, bixón-nò: “Jtsí k'oa.” K'oaá s'ín bitasòn.

⁵⁵ K'e nga 'ba tjo tsjè, bixón-nò: “Ndobá kòtsjè.” K'oaá s'ín bitasòn, matsjè-né.

⁵⁶ Jñò, x̄ita xi jò ma isén-nò! Maá-nò ch̄itsejèn-là kó choòn it'aà ngajm̄i kò it'aà nangui, koa, ¿mé-ne nga mìkì ma-nò 'nè kindà mé kjoa xi tíma j̄nà n̄achr̄jein xi t̄itsajnaà?

Mé xi komat'iaán tsà mìkì n̄iton k̄indaàj̄iín-koaa kondra-ná
(Mateo 5:25-26)

57 '¿Mé-ne nga mì tà jñò bìndaàjìin-là xinguiòo nga kàtakixiya kjoa xi tjín-nò?

58 K'e nga onguió ján nguixkon xitaxá ko kondra-lè, tinchátsji'nde-la ya iya ndiyá mé-ne nga koma jchibàndaà-nò nga mì ya kjiko-lè it'aà ts'e xitaxá koa jè xitaxá mì ya sìngatsja-lè it'aà ts'e policia koa jè policia nga mì ndayá skinìs'en-lè.

59 K'oaá xan-lè, mìkìi koma kítjoo-ne ndayá skanda k'e nga kichjítji yijo-lè nga yije xi sìjé-lè xitaxá.

13

Mé xi koma tsà mìkìi sìkájno jé-la jñà xita

1 Tijnà-ne nachrjein koi, ijchò xita xi tsibénojmí-la Jesús nga jè Pilato tsatixá-la xita nga taña kisik'en-kjoò cho ko xita Galilea k'e nga nchitsjá-la kjotjò Nainá. Kisikátjijiin jní-la cho ko ts'e xita.

2 Kiichja Jesús, kitsò:

—Jñò, ¿a k'oaá s'ín nìkìtsjeèn nga isaá tse jé tjín-la jñà xita Galilea nga k'oa's'ín komàt'in?

3 Majìn, xán-nò; tsà mìkìi sìkájnoò jé-nò nga mì tì jé kinchátsji-nò, jñò, kiyá yije-nò.

4 K'e nga k'en jñà xita xi chrj'oòn jàn ma-ne xi kiskaànè chrjó ts'e torre Siloé, ¿a k'oaá s'ín nìkìtsjeèn nga isaá tse jé tjín-la xita koi nga kos'ín komàt'in, mì k'oa-ne koni ngats'ii xita xi tjín ján Jerusalén?

5 Majìn, xán-nò; tsà mìkìi sìkájnoò jé-nò nga mì tì jé kinchátsji-nò, jñò, tikoá kiyá yije-nò.

Kjoa xi mangásòn-kjoò yá iko xi mìkìi ojà-la toò

6 Jesús tikoá tsibénojmí jngoò-la kjoa xi mangásòn. Kitsò-la:

—Jngoò xita xi kijna jngoò-la i'nde ñánda tjín-la toò uva, yaá títejiin jngoò-la yá toò iko. Xita jè, j'ii katsejèn-la tsà yijà-la toò, tanga nímé kisakò-la.

7 K'ee kitsò-la jè xita xi tjina'nda: “Kó jàn nó nga f'ii katsejèn-la yá jè, tsà yijà-la toò. Tanga nímé tjín-la. Tichásoìn. Nanguií tísíkits'ón.”

8 Jè xita xi tjina'nda kitsò: “Nà'èn, tikíjna-là nguì jngoò nó-isa. Sikòn-la, sìxan-ngui-la ni'nde nga jngoò itjandi; ikjoàn kinguì-la tjé'nde.

9 Tsà koií nachrjein-la, koja-la toò nó xi nchrobá; tsà majìn, komaá iskan kichásoìn.”

K'e nga jè Jesús jngoò chjoón kisindaà-ne nachrjein nìkjáya

10 Jesús, k'e nga tíhokóya jngoò ni'ya ingo sinagoga ts'e xita judío, jè nachrjein nìkjáya,

11 ya tjina jngoò chjoón xi jye kò chrj'oòn jàn nó tjina nga xk'én. Jngoò inima ch'o-la neíí tísítis'in koa mì xó kii ma osijna kixi.

12 Jesús, k'e nga kijtseè, kiichja-la, kitsò-la:

—Chjoón, jyeé ndaà-ne ch'in xi tjín-lè.

13 Ikjoàn tsohósòn-la tsja; jè chjoón, nitoón kjòkixi jngoò k'a-ne, ikjoàn kitsjaà-la kjondaà Nainá.

14 Tanga jè xita sko-la ts'e ni'ya ingo sinagoga kòjtíi-la nga jè Jesús kisindaà-ne chjoón jè, koií kjoa-la nga nachrjein nìkjáya; kitsò-la jñà xita xi títsajna:

—Joòn nachrjein tjín nga ma maxá; jñà nachrjein koi komaá kjinchrobà nga kondaà-nò, tanga mìkìi tjí'nde jè nachrjein nìkjáya.

15 K'ee kiichja Nà'èn-ná Jesús, kitsò:

—Jñò, xi jò ma isén-nò. Jè nachrjein nìkjáya, ¿a mì chíjnda'ñó-jèn nchraja-nò ko búrró-nò nga nachrjenguiòò ni'nga nga onguí nìk'ioò nandá?

¹⁶ Kò jè chjoón jè, xi tsòti-la Abraham, jyeé kò chrj'oòn jàn nó tjin-la nga tjit'aà'ño-la xita neí. ¿A mì koma tjàjnda'ño nas'in jè nachrjein nikjáya?

¹⁷ K'e nga jye okitsò Jesús, tà kjòsobà-la ngats'ì xita kondra-la tanga jña xita naxandá kjòtsja-la koni s'in tjin kjòxkón xi 'ño jeya tís'in Jesús.

Kjoa xi mangásòn-kjoò xojmá mostaza

(Mateo 13:31-32; Marcos 4:30-32)

¹⁸ Jesús kitsò:

—¿Mé xi k'oas'in mangásòn-kjoò koni s'in otíxoma Nainá? ¿Mé xi siìngásòn-kjoàà?

¹⁹ Jè mangásòn-kò koni kji xojmá mostaza; k'e jngoò xita bitjejin nangui-la, ijkjoàn bisò, ma'nga; jña nise xi tjíma i'ngaá, bíndaà'a tje-la jña chrja-la yá.

Kjoa xi mangásòn-kjoò na'yo san

(Mateo 13:33)

²⁰ Jngoò k'a kiichja Jesús, kitsò:

—¿Mé xi siìngásòn-kjoàà koni s'in otíxoma Nainá?

²¹ K'oaá ngaya-la koni jè na'yo san, k'e nga jngoò chjoón síkájìn jàn chiba skoan inchrájin, masan yije-né kóhokji na'yo.

Xotjoo xi 'nchrèya kji

(Mateo 7:13-14, 21-23)

²² Jesús, nga tífi ján ndiyá Jerusalén, kjìn naxandá jahato nga tsakóya, naxandá xi jtobá kjoàn kò xi ì kjoàn.

²³ Jngoò xita xi kiskònangui-la, kitsò-la:

—Na'èn, ¿a chibaá ma xita xi kochrjekàjìn kjo'in Nainá?

Jè, k'eé kitsò:

²⁴ —T'een-la kjo'ño yijo-nò nga kitjás'een jè xotjoo xi 'nchrèya kji. K'oaá xán-nò: kjìn xita komejèn-la kjoahas'en tanga mìkiì koma kjoahas'en.

²⁵ K'e nga jè nei-la ni'ya kosítjen nga kiichjoàjto xotjoo ni'ya, jño, tsà nditsiaán titsajnaà, k'eé kíts'iaa nga kinókjoaa, kixón: “Na'èn, chíx'a-nájen xotjoo ni'ya.” Jè nei-la ni'ya kítsò-nò: “Mikiì bexkon-nò ñánda-ne tsajòn.”

²⁶ K'eé kíts'iaa nga kixón: “Tañaá chichikò-lèjen, tikoaa tañaá ki'yòkò-lèjen, tikoaa yaá nditsin-nájen tsakoòyi.”

²⁷ Tanga jè, tà kítsò-nò: “K'oaá xan-nò, mìkiì bexkon-nò ñánda-ne tsajòn. ¡Tinchat'aàxin-ná ngats'ioò xi ch'o 'nè!”

²⁸ Yaá jchìhindáyaà, tikoà sijts'ioòn ni'ñoò k'e nga jchaxkoòn jè Abraham, Isaac, Jacob, ngats'ì xita xi kiichja ngajo-la Nainá nga ya titsajna ñánda tíhotíxoma Nainá, koa jño, xìn i'nde siìkasén-nò Nainá.

²⁹ Kjoí-ne xita xi kjinchrobà-ne nga ñijòn chrjangui-la isò'nde xi kítsajnat'aà imixa nga kokjen ñánda tíhotíxoma Nainá.

³⁰ I'ndeí, tjin xita xi titsajna-tjingui, nga koma iskan jña kítsajna ítjòn; tikoaa tjin xita xi titsajna ítjòn i'ndeí, k'e nga koma iskan, jña kjoehet'aà-ne.

K'e nga jè Jesús kiskindàyakeè naxandá Jerusalén

(Mateo 23:37-39)

³¹ Tjè-ne nachrjein ijchò i'nga xita fariseo ñánda tjina Jesús, kitsò-la:

—Tisít'aà xìn, jè Herodes mejèn-la siìk'en-lè.

³² Kitsò Jesús:

—Tanguió, kot'in-la xita maña jè: “I'ndeí kò nchijòn-lè k'oaá s'iaàn: kochrjekàjñaà inima ch'o-la neí xi tjìin inima-la xita, tikoà siìndaà-na xita xi xk'én; skanda k'e kjichò nachrjein nga kjoehet'aà xá-na.”

³³ K'oaá s'ín koma i'nde, nchijòn-le kò jngui-le, kàtjì-isa ndiyá-na. Mìkìi ndaà tjin nga jngoò xita xi chja ngajo-la Nainá, xìn-t'aà kiyá-la naxandá Jerusalén.

³⁴ 'jñò xi xita naxandá Jerusalén tsajòn xi nìk'eèn xita xi chja ngajo-la Nainá, kò bìnè ndajo jñà xita xi Nainá síkasén-nò! ;Kjìn k'a kjòmejèn-na nga tsibìxkóya ixti-nò koni s'ín xa'nda nga bíngui jngaá-la jñà ixti-la; tanga jñò, mìkìi kòkjeín-nò!

³⁵ Chítsejèn-là ni'ya-nò nga jye tsjeiin-takòn Nainá; k'oaá xán-nò nga mì tì kù jchaxkoòn-ná skanda k'e nga kijchò naxrjein nga kixón: “;Mé tà ndaà-la jè xi nchrobá ngajo-la Nainá!”

14

Kós'ín komà k'e nga kisindaà jngoò-ne xita Jesús xi ch'in chjón-nda tjin-la

¹ Jngoò k'a jngoò naxrjein nìkjáya, Jesús kù kjèn ni'ya-la jngoò xita sko-la jñà xita fariseo; jñà xita koi, nchisíkinda mé kjoa xi s'iin Jesús.

² Tikoá yaá tjna nguixkòn Jesús jngoò xita xi ch'in chjón-nda tjin-la (jñà xita xi nandá sinchá indso'ba).

³ Jesús kiskònangui-la jñà xita chjine xojòn ts'e kjotíxoma-la Nainá kò xita fariseo, kitsò-la:

—;A tji'nde-né nga sixkù-lá xita jè naxrjein nìkjáya, a xi majìn-né?

⁴ Tanga jñà xita koi, mìkìi kùichja, tà jyò tsibìtsajna. Tanga jè Jesús kiskoé xita jè, kisindaà-ne, ikjoàn kisikasén-ne ni'ya-la.

⁵ K'eé kitsò-la jñà xita koi:

—Jñò, tsà búrró-nò, kò tsà nchraja-nò kixoya jngoò ngajo, ;a mìtsà nìtòn kìnaxrje-nò nas'ín naxrjein nìkjáya?

⁶ Jñà xita fariseo, nì tì mé 'én kùichja-ne.

Xita xi faájìn íxile xi jncha ítjòn

⁷ Jesús, k'e nga kijtseè jñà xita xi xó kinokjoà-la nga nchifaájìn íxile ts'e xita ítjòn ya it'aà ímixa, tsibénojmi jngoò-la kjoa xi mangásòn, kitsò-la:

⁸ —Tsà xó kìnókjoa-lè ya ni'ya ñánda tjin s'eí nga xita bixan, mìkìi ya bijnasoìn íxile ts'e xita ítjòn, tsà koi naxrjein-la tjin jngoò-isa xita xi 'ño tíjòn koni ngaji, xi tikoá xó kánokjoa-la;

⁹ jè xita xi xó kàchja-nò kitsò-lè: “Tji'nde-la xita jè nga kàtjna.” Ngaji, kosobà-lè nga k'ejí íxile kijnasoìn ñánda fehet'aà-ne.

¹⁰ K'e nga xó kìnókjoa-lè, yaá tijnasoìn íxile xi fehet'aà-ne mé-ne k'e nga kjoí jè xita xi xó kàchja-lè, kitsò-lè: “Amigo, tijnat'eii ímixa ñánda síjna íxile ítjòn.” Ngaji, skoexkón-lè xita xi taña titsajnat'aà ímixa.

¹¹ Jè xita xi 'nga síkjna yijo-la, isaá nangui kijn; jè xi nangui síkjna yijo-la, isaá 'nga kijn.

¹² Jesús, tikoá kitsò-la jè xita xi xó kùichja-la:

—K'e nga xó kìnókjoa-la xita nga kichikojì nga nchisen, o nas'ín nguixòn, kù jñà nokjoà ítjòn-la amigo-lè, 'ndsì, xita xingui, nì jñà xita indii ni'ya-lè xi xita nchiná, mé-ne nga jñà xita koi, tsà koi naxrjein-la k'oaá tìs'ín kichja ngajo-lè nga kojndà-ne.

¹³ Tà saá k'e nga s'eí s'iin, jñà tìnókjoa ítjòn-la xita ima, xi tsjìn tsja, xi mìkìi ma fi, kò xi mìkìi tsejèn-la.

¹⁴ Ngaji, k'e nga k'oas'ín s'iin, ndaà s'e-la inima-lè nga jñà xita koi mìkìi koma sijnà ngajo-lè; tanga ngaji, k'eé kochjí ngajo-lè k'e nga kjoaáya-la jñà xi xita kixi.

Kjoa xi mangásòn ts'e xita xi kjèn s'eí
(Mateo 22:1-10)

15 K'e nga kiì'nchré jngoò xita xi ya taña títsajnat'aà ímíxa, kitsò-la Jesús:
—;Mé tà ndaà-la jè xita xi kòkjen ya ñánda tíhotíxoma Nainá!

16 K'eé kitsò Jesús:

—Jngoò xita, xi s'eí tsibíjna, kjìn xita kiìchja-la.

17 K'e nga ijchò hora-la nga jye kòkjen xita, kisikasén chì'nda-la nga kiì kichja-la jña xita xi xó kinokjoà-la, kitsò-la: “Nchrobá, jyeé tjíndaà yije.”

18 Ngats'ìi xita kisijé kjoa nìchàat'aà. Kitsò jè xi tíjtòn: “Mì-la kiì koma kjián; jngoò nangui jye kòhotse; mochjeén-né nga kjián katsejèn-la; kitsi'bà-lè, tije-la takòin, mìkiì kjián.”

19 Jè xi ìjngoò kitsò: “An, 'òn nga nchraja xi bínchi jyeé kòhotse; mejèn-na kjián kat'aà tsà ndaà síxá; kitsi'bà-lè, tije-la takòin, mìkiì kjián.”

20 Xi ìjngoò, k'oaá tì kitsò: “An, saá jye kòbixan, koií kjoa-la nga mìkiì koma kjián.”

21 K'e nga j'ìi-ne chì'nda jè, tsibénojmi yije-la nei-la ngats'ìi kjoa koi. Jè nei-la ni'ya, kòjti-la; k'eé kitsò-la chì'nda-la: “T'in nìtojin ján nditsin, kóhokji iya ndiyá-la naxandá; nchrohókoi yije xita ima, xi tsjin tsja, xi mìkiì ma fi, kò xi mìkiì tsejèn-la.”

22 Chì'nda jè, nga komà iskan kitsò: “Na'èn, jyeé kòbitasòn yije koni s'ín kò'mì-ná, tanga tjín-isa ì'nde.”

23 K'eé kitsò jè nei-la chì'nda: “T'in kóhokji ndiyá teè, kò ndiyá itsjí; nchrohókoi xita; kò'ño t'en-la nga kàtjahas'en mé-ne nga kàtatseè ni'ya-na.

24 K'oaá xán-nò; nìjngoò xita xi kichjà íjtòn-la kòkjen-kò-na s'eí-na.”

Mé kjo'in xi singui nga onguítjngui-lá Cristo
(Mateo 10:37-38)

25 'Ñó kjìn xita tjìngui-la Jesús; kisikáfayat'aà-la, kiìchja, kitsò-la:

26 —Tsà yá xi mejèn-la nga 'an kjinchrobà-tjìngui-na, tsà jè yijo-la, tsà na'èn-la, tsà nea-la, tsà chjoón-la, ìxti-la, 'ndse, ndichja, tsà isa tjòkeè mì k'oaá-ne koni 'an, mìkiì koma nga xita ts'an xán-la nga 'an kota'yàt'aà-na.

27 Jè xi mìkiì síkitasòn koni jngoò xita xi 'yajen krò-la, tsà mìkiì tjìndaà nga sùkjeiín kjo'in nga 'an kjinchrobà-tjìngui-na, mìkiì koma nga xita ts'an xán-la nga 'an kota'yàt'aà-na.

28 Jñò, tsà mejèn-nò nga chrjó torre kíndaà jngoò, ¿a mìtsà íjtòn jchósòn-là kó tjín singui chjí-la, a tjín-nò ton xi sindaà yije-ne?

29 Tsà koi nàchrjein-la tà jè tàts'en chrjó sijna. Tsà mìkiì kóngásòn yije chrjó, ngats'ìi xita xi skoë kijnokeè-né.

30 Kitso: “Jña xita koi tsibíts'ia nga kiskímìtjen chrjó ni'ya tanga mìkiì kisikjehet'aà.”

31 Tsà jngoò xitaxá íjtòn xi mejèn-la koiìts'ia kjojchán nga skaàn-kjoòko xíkjin xi ngásòn xitaxá íjtòn, ¿a mìtsà íjtòn skósòn-la tsà te jmiì ma xita-la, a kichikjoaá-la nga skaàn-kò tsà kaàn jmiì ma xita kondra-la?

32 Tsà beè-la ikon nga mìkiì kichikjoa-la, tik'eé-ne nga kjiìn tjina xitaxá íjtòn xi ìjngoò, sùikasén xita xi kjoì sùjé kjoa'nchán.

33 K'oaá tìs'ín tjín, ngats'ioò, nita yá-nò xi mejèn-nò nga xita ts'an koma, íjtòn tikítsjeèn, a sijngoò-takòn nga sichjaà yije tsojmì xi tjín-nò. Tsà majìn, mìkiì koma nga xita ts'an xán-nò.

Jña xita xi kota'yàt'aà-la Cristo, k'oaá s'ín ngaya-la koni naxa
(Mateo 5:13; Marcos 9:50)

34 'Jè naxa, ndaà-né; tanga tsà mì tì kiì sijnchra-ne tsojmì, ¿kó tìs'ín kochjeén-ne?

35 Mì tì mé chjí-la; mì tì kiì kochjeén-la nangui; mì tì kiì kochjeén-ne koni tjé'nde, tà xixteén-né. ¡Ndaà tiná'yaà koni xan-nò!

15

Kjoa xi mangásòn ts'e paxtò xi kisakò-ne orrè-la (Mateo 18:10-14)

1 Jñà xita-la xitaxá Roma xi síkíchjítjì tsojmì kò jñà xita xi ch'o tjin kjoa xi s'ín, ijchò kinchat'aà chraña-la Jesús ñánda tjna, nga mejèn-la kji'nchré-la.

2 Jñà xita fariseo kò xita xi okóya kjotíxoma-la Nainá xi kiskii Moisés kiichajano-la Jesús, kitsò:

—Xita jè, ndaà ókò jñà xita xi ch'o s'ín, tikoá tañaá kjèn-kò.

3 Jesús, k'eé tsibénojmí jngoò-la kjoa xi mangásòn, kitsò-la:

4 —Tsà jngoò xita tsajòn xi tjin-la jngoò sìndò orrè, tsà chija jngoò orrè-la, ¿a mìtsà sikkítsajna jjiin ijñá jñà xi ñijòn kaàn kò chrj'oòn ñijòn ma-ne? Ikjoàn kjoì kátsji jè xi kichijà skanda kó nga sakò-la.

5 K'e nga jye sakò-la, tsjaá koma-la; koa'nga kohòsòn chrja-la.

6 K'e nga kijchò-ne ni'ya-la, kichja-la amigo-la kò xita indii ni'ya-la, kitsò-la: “Titsjako-ná, jye kásakó-ne orrè-na xi kichijà.”

7 K'oaá xán-nò, k'oaá tìs'ín isa ndaà s'e kjotsja ján ngajmii it'aà ts'e jngoò xita jé xi síkájno jé-la nga mì tì jé ótsji-ne, mì k'oaá-ne koni tsà ñijòn kaàn kò chrj'oòn ñijòn ma-ne xi tjin-la okixi xi mìkiì mochjeén-la nga sikkájno jé-la.

Kjoa xi mangásòn ts'e chjoón xi kisakò-ne ton-la

8 'Tsà jngoò chjoón xi te ma-ne ton-la, tsà chija jngoò ton-la, ¿a mìtsà kokà ni'ín, tikoá koticha inga ni'ya-la; ndaà ndaà kohótsji ton-la skanda kó nga sakò-la?

9 K'e nga jye sakò-la, kichja-la amiga-la kò íchjín indii ni'ya-la, kitsò-la: “Titsjako-ná, jye kásakó-ne ton-na xi kichijà.”

10 K'oaá xán-nò, k'oaá tìs'ín tjin kjotsja nga nguixkon àkjale-la Nainá k'e nga jngoò xita jé síkájno jé-la nga mì tì jé ótsji-ne.

Kjoa xi mangásòn ts'e ti xi kichijà

11 Jesús tsibénojmí jngoò kjoa xi mangásòn; kitsò:

—Jngoò xita xi jò ma ixti-la.

12 Jè ti xi ma ki'ndí kitsò-la na'èn-la: “Na'èn, tjii-ná tsojmì xi 'an koko-na.” Jè na'èn-la kisijòya yije-la tsojmì xi tjin-la, ikjoàn kitsjaà-la.

13 Xi jye tsato jò jàn nachrjein, ti jè, nitoón tsatjna yije tsojmì-la xi kitjoé-la, kisijngoò ton-la. Ikjoàn kiì jngoò naxandá xi 'ño kjiiin kijna. Yaá kisikjeheya yije ton-la nga taxki kisikò yijo-la.

14 K'e nga jye kisikjeheya yije ton-la, ya i'nde ñánda tsibijna, j'ii jngoò kjinchrá 'ño; mì tì mé tjin-la xi kine.

15 K'eé kiì síjé-la xá jngoò xita xi ya i'nde-la naxandá jè. Xita jè, kisikasén ñánda tjin-la rancho nga kisikinda chinga.

16 Ti jè, mejèn xó kine chrjoa najmá xi kjèn chinga tanga mì yá xi tsjá-la.

17 K'e nga jye kjondaàya-ne kjohítsjeèn-la kitsò: “¡Kjin xita ch'i'nda tjin-la na'èn-na ya ni'ya-la xi ningui-la inchrájin xi kjèn, koa 'an, ijndé, tibiyaá-ná kjinchrá!

18 Kjin jngoò k'a-na ni'ya-la na'èn-na; k'oaá xán-la: Na'èn, tseé jé tsohotsjia xi it'aà ts'e Nainá xi tjna ngajmii kò it'aà tsiji;

19 mì tì kiì ok'in-na nga ki'ndí-lè k'oín-ná; k'oaá s'ín jcha-takòn-ná koni tsà jngoò chì'nda-lè.”

20 K'eé tsasítjen, kiìkon na'èn-la.

”Tik'eé-ne nga kjiin tífi, jè na'èn-la kijtseèxkon, kjòhimakeè, tsangachikon, ikjoàn kitsobàkjá ki'ndí-la, kiskine'a.

21 Jè ki'ndí-la kitsò: “Na'èn, tsohotsjià jé xi it'aà ts'e Nainá xi tíjna ngajmii ko it'aà tsiji; mì tì kiì ok'in-na nga ki'ndí-lè k'oín-ná.”

22 Tanga jè na'èn-la kitsò-la chì'nda-la: “Niton nchrobákoò nikje xi isa 'ño ndaà kjoàn, tikákjá, tikoá tíkjá jngoò tangò jnótsja, tjayaà xoxté ndsoko.

23 Tanguíchjaà jngoò nchraja ki'ndí xi 'ño xiné, tik'eèn. ¡Chjineé, s'eí s'eén!

24 Jè ki'ndí-na, maá-na tsà jyeé k'en, tanga tíjnakon-né; kichijà-né tanga i'ndeji kàsakó-ne. Ikjoàn tsibíts'ia s'eí.”

25 Jè ti-la xi ma jchínga, ján tisíxá rancho-la. K'e nga j'ii chraña-ne ni'ya-la, kiì'nchré-la música nga s'eí tjín; xita nchitè.

26 K'eé kiichja jngoò-la chì'nda, kiskònangui-la mé xi tíma.

27 Jè chì'nda kitsò: “Jè 'ndsì kòf'iì-ne; jè na'èn-lè kàsík'en jngoò nchraja ki'ndí xi 'ño xiné, koiì kjoa-la nga ndaà kòf'iì-ne jè 'ndsì.”

28 Jè ti xi ma jchínga, 'ño kòjti-la; majin-la fahas'en ni'ya; k'eé itjo ni'ya na'èn-la, tsibítsi'ba-la nga kàtjahas'en ni'ya.

29 Kitsò-la na'èn-la: “An, kjò kjìn nó sixá-lè; nikjé-ne nga mìkiì sikitason-lè; ni saà jngoò ndí tíndsó ki'ndí 'biì-ná nga sìtsjakoaa amigo-na.

30 Tanga k'e nga kòf'iì-ne ki'ndí-lè xi kisikjeheya ton-lè, tsojmì-lè, kisikjeheyako íchjín ská; ikjoàn kànìk'en jngoò-la nchraja ki'ndí xi 'ño xiné.”

31 Jè na'èn-la kitsò-la: “Ngaji xi ki'ndí-na xan-lè, íi tíjnakò kjit'aà-ná; ngats'iì tsojmì xi tjín-na, tsiji-né.

32 Mochjeén-né nga s'eí s'eén mé-ne nga sìtsjakoaa yijo-ná, koi kjoa-la nga jè 'ndsì, jye kòf'iì-ne. Maá-na tsà jyeé k'en tanga tíjnakon-né; kichijà-né tanga i'ndeji kàsakó-ne.”

16

Kjoa xi mangásòn ts'e chì'nda xi konachan

1 Jesús tsibénojmi ijngoò-la kjoa xi mangásòn, jña xita xi kota'yàt'aà-la, kitsò-la:

—Jngoò k'a, jngoò xita nchiná, tíjna jngoò-la xita xi síkinda chì'nda. Xita xi kj'eíi kiì nga nguixkon nei-la nga kitsjaat'in 'én nga tsojmì-la tísíkje.

2 Jè nei-la, k'eé kiichja-la, kitsò-la: “¿Mé 'én xi tsját'in-lè xita? Tjiì-ná kindá kjoa ts'e xá-lè; mì-la tì kiì chì'nda sko-la kijna-ne.”

3 Chì'nda jè, k'eé tsohóko yijo-la, kitsò: “¿Mé xi s'iaàn? Jè nei-na mì tì kiì tsjá-na xá. 'An, mìkiì chíkjoa-na nga siixákoaa nangui. Masobà-na tsà ton siijé kjotjoà.

4 Jyeé be mé xi s'iaàn mé-ne nga s'e-na amigo xi tsjá'nde-na ni'ya-la k'e nga tjáxin-na xá jè.”

5 K'eé kiichja ijngoò ijngoò-la jña xita xi tjen-la ton ts'e nei-la. Kitsò-la jè xi ítjòn: “¿Kó tjín kitjen-lè ts'e nei-na?”

6 Xita jè kitsò: “Jngoò sindo barril asitì kitjen-na.” Jè chì'nda kitsò-la xíkjín: “Chjóí xojon-lè, tjíni, niton tindaà ijngoì xi kj'eíi xojon xi tà icháte chjí-la.”

7 Ikjoàn kiskònangui-la xi ijngoò, kitsò-la: “Ngaji, ¿kó tjín kitjen-lè?” Xita jè kitsò: “Jngoò sindo naxá trigo kitjen-na.” K'eé kitsò-la: “Chjóí xojon-lè; tindaà ijngoì xi tà ñijòn kaàn chjí-la.”

8 Chì'nda jè, kijtseèxkón nei-la nga tjín-la kjohítsjeèn nga amigo tsohótsji, nas'ín ch'o kis'iin nga kiskoònachan-la nei-la. Jña xi mìtsà xita-la Nainá, isaá

tjín-la kjohítsjeèn kó s'ín ótsji amigo-la xi skoétjò mè k'oaá-ne koni jñà xità xi iseèn tjín kjohítsjeèn-la.

⁹ K'oaá xán-nò, tikjeén ton ko tsojmì xi tjín i isò'nde nga kàtas'e-nò amigo mé-ne k'e nga mì tì kii kochjeén-ne i isò'nde, ján ngajmii s'e-nò amigo xi skoétjò-nò ya ñánda kitsajnaà nita mé nachrjein-ne.

¹⁰ Jè xi ndaà síkitasòn jè kjoa xi chiba tjín, tikoáá ndaà síkitasòn jè kjoa xi tse tjín; tanga jè xi konachan kjoa xi chiba tjín tikoáá konachan-né kjoa xi tse tjín.

¹¹ Jñò, tsà mì ndaà titsanìchjeén tsojmì ko ton xi tjín isò'nde jè, mìkii tjoé-nò kjoa xi ngui ndaà tjín ts'e ngajmii.

¹² Tsà mì ndaà titsanìchjeén tsojmì ko ton xi mì tsajòn-jèn xi Nainá kisingatsja-nò i isò'nde, tikoáá mìkii tjoé-nò xi ngui tsajòn ján ngajmii.

¹³ Nijngòò chì'nda xi jò koma nei-la nga sìxá-la; tsà jò koma nei-la, jngòò kojtikeyè koa jngòò kotsjakeè; jngòò ndaà kjit'aà-la koa ch'o sìiko xi ijngòò. Jñò, tsà kjoa nchiná sìis'in-là, mìkii kos'in-la kjoa ts'e Nainá.

¹⁴ Jñà xità fariseo nga tsjakeè ton, k'e nga kii'nchré ngats'ii kjoa koi, tà tsijnòkèè Jesús.

¹⁵ K'ée kitsò-la jè Jesús:

—Jñò, ndaà nìkìtsajnaà yijo-nò nga nguixkon xità, tanga Nainá, beè inima-nò nga mìtsà kixi kjoa nga ndaà 'nè. Jè kjoa xi jeya síkijna xità, Nainá ochrjekàngui-né.

Kjotíxoma-la Nainá xi kiskii Moisés

¹⁶ Jesús kitsò-isa:

—Jñà Xojon-la Nainá xi kiskii Moisés ko xità xi kiichja ngajo-la Nainá, jñà tímakjeén xojon koi skanda k'e nga j'ii Juan xi kis'ii bautizar xità. Tjen-ne nachrjein koi, skanda j'nde, tìnokjoáya 'én ndaà-la Nainá kó s'ín otíxoma Nainá. Ngats'ii xità xi mejèn-la kjoahas'en-jii ñánda tíhotíxoma Nainá, bínè-la yijo-la.

¹⁷ "Ñó 'in tjín tsà jè isò'nde ko ngajmii chija, tanga isaá tà 'ño 'in tjín nga chija jngòò letra ts'e kjotíxoma-la Nainá xi kiskii Moisés. Mìkii chija nita kjé-ne —kitsò Jesús.

Kiis'in tsakóya Jesús it'aà ts'e xità xi tsjii xíjín

(Mateo 19:1-12; Marcos 10:1-12)

¹⁸ —Nita yá-ne xi tsjii chjoón-la ikjoàn bixan-ko jngòò chjoón xi kj'eí, kjoa chijngui tís'in; tikoáá jè x'in xi bixan-ko chjoón xi kitsjii x'in-la, tikoáá kjoa chijngui tís'in —kitsò-isa Jesús.

Xità nchiná ko xità ima xi 'mì Lázaro

¹⁹ Jesús kitsò:

—Tsibijna jngòò xità nchiná xi 'ño ndaà kjoàn nikje chí xi tsohòkjá; nachrjein inchiòn kis'ii s'eí xi taxki 'ño ndaà ma.

²⁰ Tikoá tsibijna jngòò xità ima xi Lázaro ki'mì, xi jtsé tjín yijo-la. Yaá bijna xotjoa ni'ya-la jè xità nchiná.

²¹ Xità ima jè, fahajii xó-la jñà xi-la tsojmì xi kine jè xità nchiná nga bixòngui ímixa; tikoáá jñà nañá bijchó xó nga tomajno jtsé-la.

²² K'e nga k'en jè ndí xità ima, jñà àkjale-la Nainá kiiiko; yaá kisikíjnat'aà-la Abraham. Tikoáá chaán k'en jè xità nchiná; ikjoàn kisihijii.

²³ Ya j'nde ts'e mik'en ñánda nga tísikjeiin kjo'in jè xità nchiná, kiskoòtsejèn, kijtseèxkon Abraham nga kjiin tjina; yaá tjínat'aà-la jè Lázaro.

²⁴ Xità nchiná, k'ée 'ño kiichja kitsò: “iNa'èn Abraham, chahima-takòn-ná! Tíkasin Lázaro nga kàtasíka'nchi jnótsja ya ijii nandá nga kàtasíkijne 'nchán nijen-na; 'ño tse kjo'in tìsikjaán i jii ni'in.”

25 Jè Abraham kitsò-la: “Na'èn, tìkítsjiin k'e nga tsijni isò'nde, 'ño ndaà tsijni. Jè Lázaro, kjo'íin kisìkjeiín, tanga i'nde, ndaà tíjna ijndé. Ngaji, kjo'íin tìnkjeiín.

26 K'oaá s'ín tjin, tìkoaá jngoò xajngá jño xi 'ño nanga kijna-ikòn mé-ne nga mìkìi koma ján kotot'aà jña xita xi i títsajna; tìkoa xi títsajna ján, mìkìi koma kjinchrobà ijndé.”

27 'Kitsò jè xita nchiná: “Na'èn Abraham, 'an bìtsi'bà-lè tìkasín Lázaro ya ni'ya-la Na'èn-na;

28 'òn ma-ne 'ndsè xi títsajna; kàtènojmi-la xi okixi mé-ne nga tìkoa mì i kjinchrobà-ne i'nde ts'e kjo'in.”

29 Abraham kitsò-la: “Xita xinguii, jyeé tjin-la xojon-la Moisés ko ts'e xita xi kiichja ngajo-la Nainá; jña kàta'nchré-la!”

30 K'ée kitsò jè xita nchiná: “Majin, na'èn Abraham, tsà jngoò mik'en xi jye kijtsee kjo'in kjo'i keènojmi-la, sikkájno jé-la nga mì tì jé kohótsji-ne.”

31 Jè Abraham kitsò-la: “Tsà mìkìi 'nchré-la Moisés ko xita xi kiichja ngajo-la Nainá, tìkoaá mìkìi kòkjeiín-la nas'ín kjoaáya jngoò-la mik'en.”

17

*Xita xi bit'in-ná nga binchaàtsjiaá jé
(Mateo 18:6-7, 21-22; Marcos 9:42)*

1 Jesús kitsò-la xita xi kota'yat'aà-la:

—Kjit'aà nachrjein s'e xita xi koiit'in-ná nga kinchátsjiaá jé, tanga ima-xó-ne jè xita xi koiit'in.

2 Isaá-la ndaà koma tsà singui'ño jngoò ndajo natsí is'iin, ikjoàn sikatjen-jiin ndáchikon, mé-ne nga mì jé skinjjiin-ne ndí xita xi mochjeén-la nga kòkinda.

3 iT'een kinda yijo-nò!

'Tsà jè xinguii ótsji jé xi kondra tsiji, tinókjoa-la nga kàtakixi; tsà sikkájno jé-la nga mì tì jé kohótsji-ne, tijchàat'aà-la.

4 Tsà itoò k'a nga jngoò nachrjein ótsji jé xinguii xi kondra tsiji, koa tsà sikkájno jé-la koa tsà itoò k'a nga jngoò nachrjein kjoikkon-lè, kitsò-lè: “Mì tì kii k'oa s'iin-na”, tsà k'oa kitsò-lè, tijchàat'aà-la.

K'e nga mokjeiín-ná it'aà ts'e Jesús

5 Jña xita xi tsibíxáya-la Na'èn-ná Jesucristo kitsò-la:

—Tisikò-nájen mé-ne nga isa 'ño ndaà kòkjeiín-nájen it'aà tsiji.

6 Jè Na'èn-ná k'ée kitsò:

—Jño, tsà tà okji kòkjeiín-nò koni kji xojmá mostaza nga itsé kji, komaá k'oín-là yá xanchroò jè: “Chjínèyi yijo-lè, ikjoàn ya kàtatjen-jiin ndáchikon”; jè yá, k'oaá s'ín sikkitasòn-nò.

Xá-la chi'nda

7 Jño, tsà tíjna jngoò-nò chi'nda xi kàfi síkínchi nchraja, o xi kàfi ka'nda tíndsó, k'e nga kjoii-ne nga kàfi síxá, ɔa k'oín-là: “Tijni, tijnat'eii ímixa”?

8 Majin, a mìtsà ta sa k'oín-là: “Tindaà-ná tsojmì xi kókjeen; tíxkóngui nikje-lè; tìya-ná tsojmì xi kókjeen ko xi skiaa. K'e nga jye kjoé koma, ikjoàn tichi koa tioji ji.”

9 Jè nei-la, tìkoaá mìkìi tsjá-la kjondaà chi'nda-la nga ndaà kàsikitasòn jè xá xi kàsit'in-la; mìtsà tsò-la: “Ndaà chjì-lè.”

10 Tìkoaá jño, k'e nga jye nikitasòn yije xá xi tsjá-nò Nainá, k'oaá tixón: “Ngajen, taxkì chi'nda-nájen, tà jè kànikitasòn-jen koni s'ín ki'mì-nájen.”

Kós'ín komà k'e nga jè Jesús, te xita kisindaà-ne xi tìbindojno chrjoa yijo-la

11 Jesús, k'e nga tífi ján naxandá Jerusalén, jahato ya nangui Samaria ko Galilea.

¹² K'e nga jahas'en-jiin jngoò ndí naxandá xi jtobá kji, te xitá kiskaàjiin ya iya ndiyá xi tìbindojno chrjoa yijo-la; kjiin chincha-ne

¹³ nga 'ñó kiichja kitsò:

— ¡Jesús, Maestro, chahima-takòn-nájen!

¹⁴ Jesús, k'e nga kijtsee, kitsò-la:

— Tanguió, takó-la yijo-nò jè nò'miì.

K'oaá s'ín komà, k'e nga nchifì-ne, kjòtsjeè-ne yijo-la ch'in xi tjín-la.

¹⁵ K'e nga kijtsee yijo-la nga jye kjòndaà-ne ch'in xi tjín-la, jngoò-ne xi inchrobà ijngoò k'a-ne; 'ñó kiichja nga kitsjaà-la kjondaà Nainá.

¹⁶ Tsasèn-xkó'nchit'aà-la Jesús skanda it'aà nangui, nga kitsjaà-la kjondaà. Xitá jè, Samaria i'nde-la.

¹⁷ Jesús kitsò-la:

— ¿A mìtsà te ma-ne xi kòmatsjeè-ne ch'in-la? Jñà xi ñijaàn, ¿ñánda títsajna?

¹⁸ ¿A tà jè tà jngoò xitá xi xìn nangui-la kànchrobá ijngoò k'a-ne nga tsjá-la kjondaà Nainá?

¹⁹ Jesús kitsò-la xitá jè:

— Tísítjiin, t'in-ne; koi-né nga mokjeiín-lè nga kòmandaà-ne.

K'e nga jcha-la kó s'ín kotixoma Nainá

(Mateo 24:23-28, 36-41)

²⁰ Jñà xitá fariseo kiskònangui-la Jesús, kitsò-la:

— ¿Kjé-né nga jcha-la kó s'ín kotixoma Nainá?

Jesús kitsò-la:

— Koni s'ín otixoma Nainá mìtsà tsejèn jcha-la.

²¹ Mìtsà yá xi kitso: “Íí tíjna ijndé”, ko “Ján tíjna ján”; nga jyeé tíjnajiin-nò kó s'ín otixoma Nainá.

²² Jesús, kiichja-isa; kitsò-la xitá xi kota'yàt'aà-la:

— Kijchò nachrjein k'e nga komejèn-nò jchaxkoòn-ná nga jye kótijnajiin-nò 'an xi Ki'ndí-la Xitá xan-la yijo-na, tanga nachrjein jè, mìkiì jchaxkoòn-ná.

²³ K'oaá kitso-nò xitá: “Chítsejèn-là ijndé, chítsejèn-là ján.” Tanga kì kii mokjeiín-nò, tìkoaá kì kii onguítjngui-là nas'ín k'oa kitso-nò.

²⁴ Koni ma ni'ín ch'on k'e nga ote, ma iseèn kó okji nga jngoò itjandì, k'oaá s'ín koma k'e nga kijchò nachrjein nga kjoiaa ijngoò k'a xi Ki'ndí-la Xitá xan-la yijo-na.

²⁵ Tanga 'an xi Ki'ndí-la Xitá xan-la yijo-na, ítjòn, tse kjo'in siikjiaán; jñà xitá xi tjín nachrjein i'nde, kochrjekàngui-na.

²⁶ Koni s'ín komà jñà nachrjein ts'e Noé, k'oaá tìs'ín koma jñà nachrjein k'e nga kjoiaa ijngoò k'a 'an xi Ki'ndí-la Xitá xan-la yijo-na.

²⁷ Xitá, tsakjèn, kits'ìl, chixàn íchjá ko íchjín skanda jè nachrjein nga jahas'en ni'ya chitso jè Noé, ikjoàn j'ìl jtsí xkón, yaá jyehesòn yije xitá kóhotjín.

²⁸ K'oaá tìs'ín komà nachrjein ts'e Lot [xitá xi tsiniì kitsò-la Abraham]. Jñà xitá tsakjèn, kits'ìl, tsatse tsojmì, tsatíjna tsojmì, tsibítje tsojmì, tsibíndaà ni'ya;

²⁹ tanga jè nachrjein nga itjojiin jè Lot ya naxandá Sodoma, ts'a jtsí ni'ín xi ngajmiì inchrobà-ne xi nguì chijo azufre, yaá jyehesòn yije xitá kóhotjín.

³⁰ K'oaá s'ín koma jè nachrjein k'e nga 'an kítjojen ijngoò k'a xi Ki'ndí-la Xitá xan-la yijo-na.

³¹ Jè xi tíjnasò'nga ni'ya-la, kì tì kii nchrobájen-ne nga skoé tsojmì xi 'ncha ni'ya-la; tìkoaá jè xi tísíxájiin nangui-la kì tì kii nchrobà-ne ni'ya-la.

³² Tíkítsejèn koni s'ín komàt'in chjoón-la Lot.

³³ Nita yá xitá xi mejèn-la kochrjetjì yijo-la nga mì mé kjo'in sakò-la, tà saá siichija-né ko kjo'in kíjnajiin; tanga jè xi tíjnandaà nga tsjá yijo-la, jè-né xi kítjokàjiin kjo'in nga it'aà ts'an ndaà kijná.

³⁴ 'K'oaá xan-nò, jè nitjen k'e nga okoma, tjin ni'ya ñánda jò xita kjoòsòn nachan, jngoò tjámìtjen nga kjiko Cristo, xi ijngoò sijna-né nga kjo'in s'e-la.

³⁵ Tikoáá tjin ni'ya ñánda jò íchjín nchi'o na'yo, jngoò tjámìtjen nga kjiko Cristo, xi ijngoò sijna-né nga kjo'in s'e-la.

³⁶ 'Jò xita xi nchisíxángui rancho-la, jngoò tjámìtjen nga kjiko Cristo, jè xi ijngoò sasíjna-né nga kjo'in s'e-la.

³⁷ Jñà xita kiskònangui-la Jesús:

—¿Ñánda-ne nga k'oas'in koma Na'èn?

Jesús kitsò-la:

—Ya ñánda kijna cho k'en, yaá kítsajnajtín jñà líké.

18

Kjoa xi mangásòn ts'e chjoón ka'àn ko xitaxá ts'en

¹ Jesús tikoá tsibénojmi jngoò-la kjoa xi mangásòn nga mochjeén-né nga mìkìl sìndaàjñáá inima-ná; nachrjein inchijòn kìnókjoat'aà-lá Nainá.

² Kitsò-la:

—Jngoò naxandá ñánda tjna jngoò xitaxá xi mìkìl beèxkón Nainá tikoá mìkìl beèxkón xita xi kj'eíí.

³ Tija-ne naxandá jè, tjna jngoò chjoón ka'àn xi f'ìikon kjit'aà xitaxá jè nga tsò-la: “Tindaàjijná kjoa ts'e kondra-na.”

⁴ Jè xita xi tjin-la xá, mìkìl xátí tsibíndaàjijn-la, tanga xi komà iskan kisikítsjeèn nga tsibíndaàjijn-la jè chjoón mé-ne nga mì ta tsja sìjti-la. Kitsò ijijn inima-la: “Nas'in mìkìl bexkoán Nainá, tikoá mìkìl bexkoán xita,

⁵ tanga chjoón jè, 'nó tísísi-na, koí kjoa-la nga kindaàjijn-la mé-ne nga mì ta tsja i kjoíikon-na, mì ta tsja 'an sìjti-na.”

⁶ Kitsò Na'èn-ná:

—Tiná'ya-là koni tsò xitaxá xi tsjìn-la okixi.

⁷ Nainá, ¿a mìtsà isa ndaà sìs'in-la xita-la xi xó k'oas'in jaàjijn-ne nga ko nachrjein ko nitjen 'nó sijét'aà-la? ¿A mìtsà isa niton sìs'in-la?

⁸ K'oaá xán-nò nga isa xátíya kojindaàjijn-la. Tanga k'e nga kjoiaa ijngoò k'a 'an xi Kí'ndí-la Xita xan-la yijo-na, ¿a sakó-na xita i isò'nde xi mokjeíin-la it'aà ts'an?

Kjoa xi mangásòn ts'e xita fariseo ko xita-la xitaxá Roma xi síkíchjítjì tsojmi

⁹ Jesús tsibénojmi jngoò-la kjoa xi mangásòn ts'e xita xi xita kixi tsò-la yijo-la koa ochrjekàngui xi i'nga. Kitsò:

¹⁰ —Jò xita kii ñánda tjna ingo ítjòn nga kùchjat'aà-la Nainá: jngoò xi xita fariseo, xi jngoò, xita-la xitaxá Roma xi síkíchjítjì tsojmi.

¹¹ Jè xita fariseo, nga síjna kixi, tíchjatjì yijo-la, kitsò: “Nainá, tsjaà-lè kjondaà, ndaà chjì-lè nga 'an mì k'oaá s'iaàn koni s'in xita xi kj'eíí xi tsjìn-la kjoa kixi, xita chjé, xita ts'en, xita chijngui; ni mì k'oaá s'iaàn koni s'in jè xita xi síkíchjítjì tsojmi.

¹² Jò k'a ótijnachjan nga jngoò xomàna; tsjaà-ná xi teya ngats'ìi xi síkijne.”

¹³ Tanga jè xita xi síkíchjítjì tsojmi, kjijn síjna; skanda majìn-la nga kotsejèn ngajmi; tà jè inima-la 'beé-la; tsò: “iNainá, kàtas'e-lè kjohimatakòn xi it'aà ts'an nga xita jé 'mì-na!”

¹⁴ K'oaá xán-nò, xita jè, k'e nga kii-ne ni'ya-la, jyeé xita kixi kitsò-la Nainá; tanga jè xita fariseo majìn. Koí kjoa-la, nitá yá-ne xi 'nga síkijna yijo-la, isaá nangui kijna, koa jè xi nangui síkijna yijo-la, isaá 'nga kijna.

*K'e nga jè Jesús kisichikon-t'in ndíixti
(Mateo 19:13-15; Marcos 10:13-16)*

¹⁵ Tíkooá j'ìikò-là ndí ixti mé-ne nga koòt'aà-là tsja; jñà xità xi kota'yàt'aà-là Jesús, k'e nga kijtseèxkon jñà xità xi ijchòkò ndí ixti, tsohótikò.

¹⁶ Tanga jè Jesús kiichja-là jñà ixti; kitsò-là xità-là:

—Tjii'nde-là jñà ndí ixti nga kàtjanchrobákon-na, kì binchahikon-là. Jñà xi k'oa s'ín tjín inima-là koni ts'e ndí ixti, jñà xi tjín-là kjondaà nga Nainá tíhotíxoma-là.

¹⁷ K'oaá xan-nò xi nguì okixi, jñà xi mìkì kòkjeiín-là koni jngoò ndí ixti nga skoé kjondaà-là Nainá nga jè kotíxoma-là, mìkì kjoahas'en-jìin ñánda tíhotíxoma Nainá.

Jngoò xità xi 'ñó nchiná

(Mateo 19:16-30; Marcos 10:17-31)

¹⁸ Jngoò xi xità sko-là kiskònangui-là Jesús kitsò:

—Maestro ndaà, ¿mé xi s'iaàn nga s'e-na kjoabinachon nità kjé-ne?

¹⁹ Jesús kitsò-là:

—¿Mé-ne nga xità ndaà 'mì-ná? Nijngoò xità xi ndaà; ta jngoò jè Nainá xi ndaà.

²⁰ Jyeé tíjìin-lè kó tsò kjotíxoma: “Kì kjoa chijnguií 'nì, kì xitàá nìk'in, kì chijé 'nì, kì 'én ndiso nokjoi it'aà ts'e xità xi kj'eíi, chàxkoín na'èn-lè kò nea-lè.”

²¹ Xità jè kitsò:

—Ngats'ìi kjotíxoma koi, jyeé kisìkitasoàn kó nga sa chítia.

²² K'e nga kii'nchré Jesús, kitsò-là:

—Nguì jngoò kjoa chija-lè: tatìjni yiji kóhotjín tsojmì xi tjín-lè; ikjoàn tika'bí-là xità ima mé-ne nga s'e-lè kjoa machikon-t'in ján ngajmì. Ikjoàn nchrobátjìngui-ná.

²³ Xità jè, k'e nga kii'nchré, tà kjòbaá-là, koií kjoa-là nga 'ñó nchiná.

²⁴ Jesús, k'e nga kijtseè nga 'ñó ba kis'e-là kitsò:

—Jñà xità nchiná, 'íin koma-là nga kjoahas'en-jìin ñánda tíhotíxoma Nainá!

²⁵ Ìsaá mì 'in koma-là jngoò cho camello nga kjoahas'en xkon nindoò xi tjahaña-ne nikje, mì k'oaá-ne koni jngoò xità nchiná xi 'ñó tjín-là tsojmì nga koma kjoahas'en-jìin ñánda tíhotíxoma Nainá.

²⁶ Jñà xità xi kii'nchré kitsò:

—¿Yá-né xi kítjokàjìin kjo'in?

²⁷ Jesús kitsò-là:

—Jè kjoa xi mìkì koma-là xità, Nainá komaá-là.

²⁸ K'eé kitsò Pedro:

—Na'èn, ngajen, jyeé kinìkítsajna yije-jen tsojmì xi tjín-najen nga tjaàtjìngui-lèjen.

²⁹ Jesús kitsò-là:

—Okixíi xi xan-nò, ngats'ìi xità xi kitsjìin-takòn ni'ya-là, na'èn-là, 'ndse, chjoón-là, ixti-là, nga mejèn-là k'oas'ín sùjchá yijo-là koni s'ín otíxoma Nainá,

³⁰ ngats'ìi xità koi, tsojmì xi kisìkítsajna, Ìsaá tse tjoé ngajo-là jñà nachrjein xi titsajnaá i'ndeì i isò'nde; koa jñà nachrjein xi sa nchrobá, s'eé-là kjoabinachon nità kjé-ne.

Jesús, jngoò k'a tsibénojmí kjoabiyaà-là

(Mateo 20:17-19; Marcos 10:32-34)

³¹ Jesús kiichjat'aà xìn-là xità-là xi tejò ma-ne, kitsò-là:

—I'ndeì, ján onguiá Jerusalén; yaá kítasòn yije ngats'ìi kjoa xi tjít'aà xojon it'aà ts'an xi Kì'ndí-là Xità xan-là yijo-na, koni s'ín kiskì xità xi kiichja ngajo-là Nainá.

³² Yaá sùngatsja-na it'aà ts'e xità xi mìtsà xità judío; kijnokeè-na; ch'o sùkò-na; kùchrájno-na;

³³ kojà-na, ikjoàn s̄iik'en-na; tanga xi koma jàn nāchrjein kjoaáya-na.

³⁴ Tanga jñà x̄ita-la mìkiì kjòchiya-la 'én xi tsibénojmi-la; tjí'maá-la; mìkiì jahas'en-jìin-la koni s'ín kitsò Jesús.

Kós'ín kisindaà-ne Jesús jngoò x̄ita xi mìkiì tsejèn-la ya naxandá Jericó (Mateo 20:29-34; Marcos 10:46-52)

³⁵ K'e nga jye tímachrañàt'aà nga kijchò Jesús ya naxandá Jericó, jngoò x̄ita ima xi mìkiì tsejèn-la tíjna indii ndiyá; tísíjé kjotjò ton.

³⁶ X̄ita jè, k'e nga kiì'nchré nga kjìn x̄ita nchifa, kiskònangui mé kjoa xi tíma.

³⁷ K'eé kitsò-la x̄ita nga jè Jesús xi Nazaret ts'e tífahato.

³⁸ K'eé 'ñó kiìchja, kitsò:

—Jesús, nga ya nchrobàt'aà-ne tje-la x̄itaxá ítjòn David [nga jì tíjna ngajo-la], jchahimatakòn-ná!

³⁹ Jñà x̄ita xi tíjma ítjòn, tsohótiko nga jyò kàtìjna; tanga jè, isaá 'ñó kiìchja nga kitsò:

—Jì xi ya nchrobàt'aà-ne tje-la x̄itaxá ítjòn David, jchahimatakòn-ná!

⁴⁰ K'eé tsasijna Jesús; kitsò: “Nchrobákoò.” K'e nga ijchò kasit'aà chrañà-la kiskònangui-la, kitsò-la:

⁴¹ —¿Mé xi mejèn-lè nga siìko-lè?

Jè x̄ita xi mìkiì tsejèn-la, kitsò:

—Na'èn, mejèn-na nga kàtatsejèn-na.

⁴² Jesús kitsò-la:

—¿Kàtatsejèn-lè! Koi-né nga mokjeiín-lè nga kòmandaà-ne.

⁴³ X̄ita jè, nitoón kjòtsejèn-la, ikjoàn kiitjingui-la Jesús; jeya kisikíjna Nainá. Ngats'ii x̄ita naxandá xi kijtsee kjoa koi, tìkoá jeya kisikíjna Nainá.

19

Jesús ko Zaqueo

¹ Jesús k'e nga ijchò naxandá Jericó, tsibíts'ia nga jahas'en-jìin naxandá.

² Ya tíjna jngoò x̄ita xi 'mì Zaqueo xi x̄ita sko-la jñà x̄ita-la x̄itaxá Roma xi síkíchjítjì tsojmì; tìkoá 'ñó x̄ita nchiná.

³ Mejèn-la nga skoexkon yá-né xi 'mì Jesús; tanga mìkiì ma kotsejèn-la nga kjìn ma-ne x̄ita, nga jtobá kji Zaqueo.

⁴ K'eé tsangachikon ítjòn, ikjoàn tsijin-jno jngoò yá sicómoro nga mejèn-la skoexkon Jesús koni s'ín kjoahato.

⁵ K'e nga jahaya ndiyá Jesús, kiskoòtsejèn mijìn k'oá kijtseeexkon Zaqueo nga ya tíjna'a yá; kitsò-la:

—Zaqueo, nitoón titajin, i'ndeì mochjeén-né nga ya siìkjáya ni'ya-lè.

⁶ Zaqueo, nitoón tsitajen. Tsjaá komà-la nga kitsjaà'nde-la ni'ya-la.

⁷ Jñà x̄ita k'e nga kijtsee nga ya kisikjáya ni'ya-la Zaqueo, tsibíts'ia nga kiìchjajno-la Jesús; kitsò nga ya kisikjáya ni'ya-la x̄ita xi jé tjín-la.

⁸ K'eé tsasijna kixi Zaqueo, kitsò:

—Na'èn, osen tsojmì xi tjín-na tsjaà-la x̄ita ima; koa tsà tjín x̄ita xi 'an kiskoònachaàn-la, ñijòn k'a kòkji tsjaà ngajo-la.

⁹ Jesús kitsò-la:

—Ngats'ii x̄ita nei-la ni'ya jè, nāchrjein i'ndeì, jyeé kòbitjokàjìin kjoa ts'e jé-la, koií kjoa-la nga k'oas'ín mokjeiín-la Zaqueo koni jè x̄ita jchínga-la Abraham.

¹⁰ 'An xi Ki'ndí-la X̄ita xan-la yijo-na, koií xá j'i-na nga j'i katsjià x̄ita xi kichijà, tìkoá j'i kàchrjekajñàà jé-la x̄ita.

Kjoa xi mangásòn xi okóya kjoa ts'e ton
(Mateo 25:14-30)

11 Jñà xita, k'e nga nchi'nchré-la Jesús, koni s'ín túbénojmi kjoa koi, k'oaá s'ín kisikítsjeèn nga yaá koìts'ia nìton nga kotìxoma Nainá; nga jè Jesús, jyeé kjomeè bijchó chraña Jerusalén. Koi kjoa-la, Jesús, tsibénojmi jngoò-la kjoa xi mangásòn nga mìtsà k'oa's'ín koma.

12 Kitsò-la:

—Jngoò k'a, jngoò xita xi tje-la xita ítjòn kii jngoò nangui ñánda 'ñó kjiìn nga tjoé-la xá ítjòn, ikjoàn kjinchrobà-ne k'e nga jye tjoé-la xá.

13 Tanga k'e nga tikj'eè bitjo xita jè, te xita chi'nda-la kii chja-la nga tse ton kisìngatsja nga jngoò ijngoò; kitsò-la: “Chjóé ton koi, tixáko skanda k'e nga kjoì-na.”

14 Tanga jña xita xi tiya-ne naxandá-la nga jtikeè komà, kisikasén-tjingui i'nga-la xita xi kitsò-la xitaxá ítjòn: “Majìn-najèn nga jè xitaxá jè kotìxoma-najèn.”

15 Tanga jè xita jè, k'e nga jye kitjóé-la xá, j'ii ijngoò k'a-ne nangui-la. Ikjoàn kii chja-la ngats'ii xita chi'nda-la xi kisìngatsja ton mé-ne nga skoé kó tjín kisikijne ki'ndí-la jè ton xi kisìngatsja nga jngoò ijngoò.

16 Jè xita xi j'ii ítjòn kitsò: “Na'èn, ton-lè xi kinìngatsja-ná, te k'a okji kisikijnesòn ki'ndí-la.”

17 Jè xitaxá ítjòn kitsò-la: “Ndaà tjín; ngaji, chi'nda ndaà-né; ndaà kinìkjiìn ton xi chiba kjongatsjei; i'ndeì, te naxandá sngatsja-lè xi jì kotìxoma-la.”

18 Ijchò ijngoò xi ma-ne jò chi'nda, kitsò: “Na'èn, ton-lè xi kinìngatsja-ná, 'òn k'a okji kisikijnesòn ki'ndí-la.”

19 Jè xitaxá ítjòn kitsò: “Tikoáá ngaji, 'òn naxandá sngatsja-lè xi jì kotìxoma-la.”

20 J'ii ijngoò xi kitsò: “Na'èn, i tìjna ton-lè xi kinìngatsja-ná. Ndaà tsibìtjòà; pahìto tsibìjté'ñoá.

21 Kitsakjóón-lè; ngaji, xita jti-takòn-né; chjoí xi mì ngají tsibìjni tikoá bìxkoí xi mì ngají tsibìtjiì.”

22 Jè xitaxá ítjòn kitsò: “Ngaji xi chi'nda ch'o 'mì-lè; tijè-ne 'én xi nokjoi sìnè-lè jé, nga si: xita jti-takòn-né; chjoí xi mì ngají tsibìjni tikoá bìxkoí xi mì ngají tsibìtjiì.

23 Tsà jye tíjìn-lè, ¿mé-ne mì yaá kinìkijna-ne ton-na ya banco nga kisikijnesòn ki'ndí-la mé-ne k'e nga kjoì ijngoò k'a-na sngatsja-ná ton-na?”

24 K'éé kitsò-la jña xita xi ya tìtsajna: “Chjaà'an-là ton; jè tjiì-là xita xi te k'a kisikijnesòn.”

25 Jña xita xi oki'mì-la kitsò: “Na'èn, i xita jè, jyeé kò te k'a kotjín tjín-la!”

26 Jè xitaxá ítjòn kitsò: “K'oaá xán-nò, ngats'ii xi tjín-la, k'oí-isa-la; tanga jè xi tsjìn-la, skanda tjá'aán-la mé xi chiba tjín-la.

27 Tikoá jña xita kondra-na xi majìn-la nga 'an kotìxoma-la, nchrohóko-ná ijndé, tik'eèn nga nguixkoaàn.”

K'e nga jahas'en Jesús ya naxandá Jerusalén
(Mateo 21:1-11; Marcos 11:1-11; Juan 12:12-19)

28 K'e nga jye okìtsò Jesús, kii ítjòn-la xita-la nga kii kò ján Jerusalén.

29 K'e nga jye ijchò chraña jña naxandá xi 'mì Betfagé kò Betania ya chrañat'aà-la jè nindoò xi 'mì Yá Olivo, kisikasén jò xita xi kota'yàt'aà-la.

30 Kitsò-la:

—Tanguió ján ndí naxandá itsé xi kijnat'aà ján; k'e nga kijchoò, yaá síjnat'aà'ño jngoò ndí búrró ki'ndí xi nì sa yá xita bìjnasòn-la. Chíjnda'ño, nchrohóko.

³¹ Tsà yá xi kjòngui-nò, tsà kitsò-nò: “¿Mé-ne chíjnda'ño-nò?”, tìn-là: “Jè xó Na'èn-ná Jesús kochjeén-la.”

³² Kii jña xita-la; k'oaá s'ín kisakò-la koni s'ín tsibénojmi-la Jesús.

³³ K'e nga nchikíjnda'ño ndí búrró ki'ndí, kitsò nei-la:

—¿Mé-ne chíjnda'ño-nò ndí búrró?

³⁴ Jña xita-la Jesús kitsò:

—Jè xó kochjeén-la Na'èn-ná Jesús.

³⁵ K'e nga ijchòko ñánda tíjna Jesús, jña kisikjeén nikje-la nga tsohójtsa-la ndí búrró; ikjoàn kisikíjnasòn-la.

³⁶ Koni s'ín tífi Jesús, jña xita tsohójngoò nikje-la ya iya ndiyá.

³⁷ K'e nga jye kjòchrañàt'aà nga nchifijen ya nindoò Yá Olivo, ngats'ii xita xi kota'yàt'aà-la xi tjiko tsibíts'ia nga 'ño kiichja xi nguì tà kjotsja-la nga kitsjaà-la kjondaà Nainá nga koií kjoa-la jña kjojkón xi jye kijtseè.

³⁸ Kitsò:

—Mé tà ndaà-la jè xitaxá ítjòn xi jè nchrobá ngajo-la Nainá. Tjín kjoa'nchán ít'aà ngajmii. Tjikoá tjín kjoajeya.

³⁹ Jña xita fariseo xi ya taña tjiko xita kjìn kitsò-la:

—¡Maestro, jchitikoji xita xi kota'yàt'aà-lè!

⁴⁰ Tanga jè Jesús kitsò-la:

—K'oaá xán-nò tsà jña xita koi kítsajnajyò, jña ndajo kichja.

⁴¹ Jesús, nga jye ijchò chraña naxandá Jerusalén, k'e nga kijtseèxkon, kiskindayakeè xi ít'aà ts'e naxandá.

⁴² Kitsò:

—Jño xi xita naxandá Jerusalén 'mì-nò, tsà jè-là-ne nachrjein i'ndeì kòkjeiin-nò ít'aà ts'e jè kjoa xi tsjá-nò kjoa'nchán; tanga i'ndeì, tjí'maá-nò.

⁴³ Kjojí nachrjein k'e nga jña kondra-nò koi'ndi-nò chrjó ndajo, sikkinda-nò kò kí't'aà-nò nga jngoò ítjandii.

⁴⁴ Jngoò k'a sikkjehesòn-nò, sikk'en yijeé-nò; níí tí jngoò ndajo sijijòsòn-la xíkjín. Koií jé xi koma-nò nga mikii kiyaxkoòn Nainá k'e nga j'ii katsejèn-nò.

Kii komà k'e nga jè Jesús tsachrje xita xi otjna tsojmi ya ingo ítjòn ts'e Jerusalén

(Mateo 21:12-17; Marcos 11:15-19; Juan 2:13-22)

⁴⁵ Jesús jahas'en ya ñánda kijna ingo ítjòn, ikjoàn tsibíts'ia nga tsachrje jña xita xi nchihotíjna kò xi nchihotse tsojmi;

⁴⁶ kitsò-la:

—K'oaá s'ín tíchja Xojon xi tjít'aà 'Én Tsjeè-la Nainá: “Ni'ya-na, ni'ya ts'e ochikon-né, tanga jño, nguijo-la xita chíjé titsa'nè.”

⁴⁷ Jesús, nachrjein inchijòn tsakóya-la xita ya nditsin ingo ítjòn; jña xita sko-la no'mii, xita xi okóya kjotixoma-la Nainá xi kiskii Moisés, kò jña xita sko-la naxandá, nchihótsji'nde-la nga mejèn-la sikk'en Jesús.

⁴⁸ Tanga mikii kisakò-la kó s'ín sikkò nga jña xita naxandá, 'ño ndaà nchi'nchré-la koni s'ín tsò 'én xi tibeínojmi.

20

Kjotixoma-la Jesús

(Mateo 21:23-27; Marcos 11:27-33)

¹ Jngoò nachrjein, k'e nga jè Jesús tíhokóya-la xita 'én ndaà-la Nainá ya nditsin ingo ítjòn, ijchò xita sko-la no'mii kò xita xi okóya kjotixoma-la Nainá xi kiskii Moisés; kjihijtakò xita jchínga.

² Kitsò-la:

—Koatìn-nájen, ¿mé kjotíxoma xi tsjá'nde-lè koni s'ín 'nì? ¿Yá xi kitsjaà-lè kjotíxoma koi?

³ Kiichja Jesús, kitsò:

—Tikoáá 'an, jngoò kjoa skònangui-nò. Koatìn-ná:

⁴ ¿Yá xi kitsjaà-là kjotíxoma Juan nga kis'iin bautizar xita? ¿A Nainá-né xi tíjna ngajmì, o xi tà xita-né?

⁵ Jñà xita koi k'ée tsajoóya-ne; kitsò-là xíkjin:

—Tsà kixoán: “Nainá kitsjaà-là kjotíxoma”, kitsò-né: “¿Mé-ne nga mìkì kòkjeiín-nò it'aà ts'e?”

⁶ Tikoá tsà kixoán: “It'aà ts'e xita-né”, jñà xita naxandá ndajoó koi'nè-ná nga k'oaá s'ín mokjeiín-là nga jè Juan xi kiichja ngajo-là Nainá.

⁷ K'ée kitsò:

—Mìkì 'ya-jen yá xi kitsjaà-là kjotíxoma.

⁸ Jè Jesús, kitsò-là:

—Tikoáá 'an, mìkì k'oa xán-nò yá-né xi kitsjaà-na kjotíxoma koni s'ín s'iaàn.

Kjoa xi mangásòn ts'e jñà ch'inda ts'en

(Mateo 21:33-44; Marcos 12:1-11)

⁹ Ikjoàn tsibíts'ia Jesús nga kiichja-là xita naxandá; tsibénojmí jngoò-là kjoa xi mangásòn, kitsò:

—Jngoò k'a jngoò xita tsibítje toò uva, ikjoàn kisikìña-là xita xi kj'eíí nga kisixásòn; jè nei-là nangui, kjiin nó kii.

¹⁰ K'e nga ijchò nachrjein nga jye kòjchá toò uva, jè nei-là, kisikasén jngoò ch'inda-là nga tjoé chiba-là chji-là toò uva xi jè oko-là; tanga jñà xita xi kisixásòn nangui, tà kiskaàn-ko-né, tà kisikasén tiyaá-ne.

¹¹ Xi komà iskan, jè nei-là nangui ijngoò xita ch'inda-là kisikasén; k'oaá tis'ín kisiko; kiskaàn-ko, ch'o kisiko, ikjoàn kisikasén tiya-ne.

¹² Ijngoò kisikasén xi ma-ne jàn xita ch'inda; tà ngásòn kisiko; kisiki'on, koa tsachrjekàjìin nangui-là.

¹³ K'ée kitsò jè nei-là nangui: “¿Mé xi s'iaàn? Jè-la sikasén ki'ndí-na xi 'ñó tsjakeè; jè-la xi skoexkón.”

¹⁴ Tanga jñà xita ch'inda koi, k'e nga kijtseèxkon, kitsò-là xíkjin: “Jè jèè xi tjoé kjotjò-là i'nde; s'ik'eén mé-ne nga tsaján koma i'nde.”

¹⁵ Tsachrjekàjìin ya ñánda tíjtje toò uva; ikjoàn kisik'en.

Jñò, ¿kó bixón? Nei-là nangui, ¿mé xi s'ikò xita koi?

¹⁶ Kjojí sík'en xita koi; kj'eíí xita s'ingatsja jè nangui ñánda tjín toò uva.

Jñà xita xi nchi'nchré-là Jesús kitsò:

—iNikjé-ne k'oa s'ín koma!

¹⁷ Tanga Jesús, kiskoò'an, kitsò-là:

—Tsà majìn, ¿kó bixón? ¿Kó tsòya-ne koni s'ín tíchja Xojon xi tjít'aà 'Én-là Nainá nga tsò?:

“Jè ndajo xi tsachrjekàngui chjinechrjó nga sa ítjòn,

jè-né xi komà ndajo tàts'en chrjó-là ni'ya.”

¹⁸ Ngats'iì xi ya kixosòn ndajo jè, koxkoaya-né; ko tsà jè ndajo skané xita, kochijo-né.

¹⁹ Jñà xita sko-là no'miì ko xita xi okóya kjotíxoma-là Nainá xi kiskii Moisés, mejèn-là nga tíjtje-ne hora tsobà'ñó Jesús, nga jè kjoa xi mangásòn, kiskaàya-là nga kondra ts'e koni s'ín tsibénojmí; tanga jñà xita naxandá kitsakjòn-là.

Kjoa ts'e xi machjtjì tsojmi

(Mateo 21:45-46; 22:15-22; Marcos 12:12-17)

20 Jñà x̄it̄a sko-l̄a n̄o'mīi kisikinda; kisikasén-'ma-l̄a x̄it̄a xi ijchò 'nchré-l̄a xi k'oas'ín kis'īin koni tsà x̄it̄a ndaà nga mejèn-l̄a sakòtsji jngoò-l̄a 'én xi ch'o tsò mé-ne nga koma s̄īngatsja-ne jè gobernador xi t̄j̄īya kjot̄ixoma tsja nga jè kōindaaj̄īn.

21 Jñà x̄it̄a koi kiskònangui-l̄a, kitsò-l̄a:

—Maestro, 'ya-nájen jñà 'én xi nokjoi, ndaà okoòyi; mikīi chjaaj̄īn x̄it̄a; k'oaa s'ín okoòyi ndiyá-l̄a Nainá koni s'ín t̄j̄īn xi kjoa kixi.

22 ¿A ndaà t̄j̄īn nga kíchj̄it̄i-j̄en tsojm̄i it'aà ts'e x̄it̄axá ít̄j̄on ts'e Roma? ¿A xi maj̄īn-né?

23 Jesús, t̄ik'eé kijtseèya-l̄a nga nchikonach̄an-l̄a, kitsò-l̄a:

—¿Mé-ne nga mejèn-nò nga 'an chít'aà-ná?

24 Takó jngoò-ná ton. ¿Yá ts'e isén ko 'ín xi t̄j̄it'aà?

Kitsò x̄it̄a koi:

—Ts'eé César xi x̄it̄axá ít̄j̄on ts'e Roma.

25 Jesús kitsò:

—T̄jīi-lá César xi ts'e César, koa t̄jīi-lá Nainá xi ts'e Nainá.

26 Ngats'īi 'én xi kiichja Jesús nga nguixkon x̄it̄a naxandá, mikīi kisakò-l̄a xi koma kohòngui-ne. Tà kjòxkón-l̄a; tà saá tà jyò tsibitsajna.

*Kós'ín kiskònangui kjoa ts'e nga faáya-l̄a mik'en
(Mateo 22:23-33; Marcos 12:18-27)*

27 Jñà x̄it̄a saduceo xi mikīi mokjeīin-l̄a nga faáya-l̄a x̄it̄a xi jye k'en ijchò kjònangui-l̄a Jesús, kitsò-l̄a:

28 —Maestro, Moisés, k'oaa s'ín kiskii: Tsà jngoò x̄it̄a xi kiyá 'ndse, tsà ts̄j̄īn-l̄a ixti k'e nga kiyá, jè chjoón-l̄a mik'en, t̄ij̄e-ne 'ndse kixan-ko jngoò k'a-ne mé-ne nga s'e-l̄a ixti xi t̄j̄e ts'e 'ndse.

29 Kis'e xó jngoò k'a x̄it̄a xi itoò komà 'ndse. Jè xi s̄j̄ina ít̄j̄on, kis'e xó-l̄a chjoón; tanga mikīi kis'e-l̄a ixti skanda kóni nga k'en.

30 Jè 'ndse xi ma-ne jò, chixàn-koó; t̄ikoaa k'e nga k'en, mikīi kis'e-l̄a ixti.

31 Chjoón jè, chixàn-koó xi ma-ne jàn; k'oaa xó s'ín chixàn-ko ngats'īi nga itoò 'ndse, tanga nijngoò xi kis'e-l̄a ixti skanda k'e nga k'en.

32 Xi komà iskan, t̄ikoaa k'en jè chjoón.

33 K'e nga tsà kjoaáya-l̄a, nga itoò 'ndse, ¿yá-né xi chjoón-l̄a koma? Nga jñà tsibitsajna-ko nga itoò 'ndse.

34 Jesús, k'eé kitsò-l̄a:

—Jñà x̄it̄a xi t̄j̄īn n̄achr̄ein i'nde, ko chjoón ko x'in, bixan-né.

35 Tanga jñà x̄it̄a xi Nainá ok̄it̄so nga ok'in-l̄a nga kjoaáya-l̄a nga kítsajna isò'nde xi sa kjoí, m̄i t̄i kii kixan-ne.

36 T̄ikoaa m̄i t̄i kii kiyá-ne. K'oaa s'ín ngàsòn kítsajnakon koni àkjale; yaá kítsajna-ko Nainá nga ixti-l̄a ma nga jye kòfaáya-l̄a.

37 T̄ij̄e-ne Moisés k'oaa s'ín okóya nga jñà xi jye k'en, kjoaáya-l̄a. K'oaa s'ín t̄j̄it'aà xojon it'aà ts'e yá na'yá xi t̄it̄i k'e nga tsò Moisés: “Jè xi Nainá 'mì-lá, t̄ikoaa Nainá tsò-l̄a Abraham, Isaac, ko Jacob.”

38 Jñà xi jye k'en, mitsà Nainá tsò-l̄a xi Nainá; tà jñà xi t̄itsajnakon xi Nainá tsò-l̄a! It'aà ts'e Nainá, ngats'īi-né nga t̄itsajnakon.

39 K'eé kiichja x̄it̄a xi okóya kjot̄ixoma-l̄a Nainá xi kiskii Moisés, kitsò:

—Maestro, kixi kjoa 'én xi nokjoi.

40 N̄i t̄i jngoò x̄it̄a xi kjò'ñó-ne ikon nga kiskònangui-isa-l̄a.

*Ñanda kitjen-l̄a Cristo [x̄it̄a xi xó kisikasén-ne Nainá]
(Mateo 22:41-46; Marcos 12:35-37)*

41 Jesús kitsò:

—¿Mé-ne kotsò-ne jǎà xitá nga jè xi Cristo, [xitá xi xó s̄ikasén-ne Nainá], nga ya k̄jinchrobát'aà-ne t̄jè-la xitaxá ítjòn David?

⁴² T̄jè-ne David, tsò xojon-la ya ts'e Salmo:

Jè Nainá kitsò-la Cristo, jè xi otíxoma-na:

“T̄jnat'aà-ná ì kixi-na,

⁴³ skanda k'e nga s̄ikítsajnanguia kondra-lè

ñánda nchasòn ndsokoi nga 'an, jye kisikijne-la.”

⁴⁴ Jè David, tsà kos'ín kitsò-la Cristo, ¿kó s'ín t̄jín-ne nga ya nchrobát'aà-ne t̄jè-la David?

Kii kitsò Jesús it'aà ts'e xitá xi okóya k̄jotíxoma-la Nainá

(Mateo 23:1-36; Marcos 12:38-40; Lucas 11:37-54)

⁴⁵ K'e nga nchi'nchré ngats'ii xitá naxandá, Jesús kitsò-la xitá xi kota'yát'aà-la:

⁴⁶ —T̄ikindaa yijo-nò it'aà ts'e xitá xi okóya k̄jotíxoma-la Nainá xi kiskii Moisés. Sasén-la nga nikje ndojò ókjá. T̄ikoaá tsjaá ma-la nga ndaà beèxkón xitá xi k'ejí, ndaà síhixat'aà ya nditsin. T̄ikoaá jǎà ótsji íxile xi jncha ítjòn ya ni'ya ingo sinagoga, k̄j mejèn-la nga jǎà kítsat'aà ítjòn ímíxa k'e nga k̄jèn xitá ñánda t̄jín s'eí.

⁴⁷ Faá'an ni'ya-la íchjín ka'àn xi jye k'en x'in-la. Ikjoàn 'ñó ndojò fiko ochikon-la nga mejèn-la nga bitsajna'ma nga mì jcha-la mé kjoa xi s'ín. Jǎà xitá koi isaá tse k̄j'ín s'e-la.

21

Ton xi kitsjaà k̄jotjò chjoón ka'àn xi 'ñó imá

(Marcos 12:41-44)

¹ Jesús k'e nga kiskoòtsejèn, k̄jtseè xitá nchiná xi 'ñó t̄jín-la ton nga nchibítsajnaya ton-la ya kaxa ñánda sinchá ton k̄jotjò-la Nainá.

² T̄ikoaá k̄jtseè jngoò chjoón ka'àn xi 'ñó imá nga tsibítsajnaya jò ndí ton xi chibachjí chjí-la.

³ K'eé kitsò:

—Xí kjoa kixi, k'oaá xán-nò, chjoón ka'àn imá jè, isaá tse ton kòbójna mì k'oaá-ne ngats'ii xitá xi i'nga.

⁴ Ngats'ii xitá koi xi t̄jín-la ton, koií tsjá-la Nainá jè xi ningui-la, tanga jè chjoón imá, kàtsjá yijeé ton xi t̄jín-la xi tímajchá-ne.

K'e nga k̄iichja Jesús it'aà ts'e ingo kó s'ín t̄jínè-la nga kixoña

(Mateo 24:1-2; Marcos 13:1-2)

⁵ T̄ikoa nchijoóya i'nga-ne xitá xi nchikotsejèn-la ingo ítjòn nga ndaà kjoàn ndajò-la; t̄ikoa ndaà kjoàn tsojmì xi kitsjaà k̄jotjò-la Nainá jǎà xitá. Jesús kitsò-la:

⁶ —Kjoíi nchrjein k'e nga jǎà ndajò k̄j tsojmì xi ndaà kjoàn xi chitsejèn-la, níi t̄j jngoò síyijòsòn-la xíkjín, kixoña yije-né.

Seña xi s'e k'e nga nchrobá machraña nchrjein nga kjoehet'aà isò'nde

(Mateo 24:3-28; Marcos 13:3-23)

⁷ K'eé kiskònangui-la kitsò-la:

—Maestro, ¿mé nchrjein-ne nga okoma kjoa koi? ¿Mé seña xi s'e k'e nga jye kochraña nga k'oas'ín koma kjoa koi?

⁸ Jesús kitsò:

—T̄ikindaa yijo-nò nga mì yá xitá xi skónachan-nò. K̄jìn xitá kjoíi xi 'ín ts'an s̄ikjeén; k̄itso: “An-ná xi Cristo, [nga 'aán kisikasén-na Nainá]”, t̄ikoa k̄itso-nò: “Jyeé t̄jina chraña nchrjein nga 'an kotíxoma.” Kì kii onguítjngui-là.

⁹ K'e nga kiná'ya kjoa ts'e kjojchán, kjoasiì, kì tsakjoòn-jèn; mochjeén-né nga k'oas'ín koma ítjòn tanga k'j'eè tsà jè nachrjein nga kjoehet'aà.

¹⁰ Kitsò-isa-la:

—Naxandá skaàn-kjoò xi k'jeí naxandá. Koa xitaxá kojìts'ia nga skaàn-kjoòko xitaxá xi k'jeí naxandá.

¹¹ Ndaà jchán k'oa ch'ón xkón; xki xi ján naxandá s'e kjinchrá ko ch'in xi 'ño kjan. Ján ngajmii jcha-la kjojkón xi ch'o tjín ko xi ch'o kjoàn.

¹² Tanga jñò, ítjòn tsoba'ño-nò xita; kjitjinguikèè-nò kjiko-nò ya ni'ya ingo sinagoga nga ya sindaàjìin. Skinìs'en-nò ndayá; kjiko-nò it'aà ts'e xitaxá ítjòn ko ts'e gobernador, tà koií kjoa-la nga mokjeiín-nò it'aà ts'an.

¹³ K'e nga k'oas'ín komat'ioòn, jè hora nga kénojmí-la xita xi it'aà ts'an.

¹⁴ K'oaá s'ín t'è-là takòn, kì tà chjà ítjòn nikìtsjeèn kó kixón nga kinókjoaa nga kinchakoo yijo-nò,

¹⁵ koií kjoa-la nga 'an, tsjaà-nò 'én tikoá tsjaà-nò kjoa kjin-takòn kó s'ín kinókjoaa mé-ne nga jña xita kondra-nò mikii sùikijne-nò k'e nga chibàkjoò.

¹⁶ Skanda jña sùingatsja-nò xi na'èn-nò, 'ndsè, xinguiqo ko amigo-nò, tikoá sùik'en i'nga-nò.

¹⁷ Ngats'ìi xita isò'nde kojtikeyè-nò xi kjoa ts'an.

¹⁸ Tanga nijngòò tsjaskòò chija.

¹⁹ Jè xi kichikjoa-la kjo'in, kijnakon inima-la!

²⁰ K'e nga jchaa naxandá Jerusalén nga kitseè jngòò itjandù-la soldado, k'oaá s'ín tíjìin-nò nga jye kjòchraña nga jngòò k'a kjoehesòn yije mé xi tjín.

²¹ Jña xita xi títsajna Judea, kátanga, kàtji ñánda nindoò choòn; jña xi títsajna Jerusalén, kàtitjokàjìin naxandá, jña xi ján títsajna campo, kì tì kii nchrobá-ne ijìin naxandá-la.

²² Koií kjoa-la nga nachrjein ts'e kjo'in-né mé-ne nga kítasòn yije-ne koni s'ín tíchja Xojon xi tjít'aà 'Èn Tsjeè-la Nainá.

²³ jima xó-ne jña íchjín xi k'ndí 'ya ko xi ixti xó nchisíkaki jña nachrjein koi, nga 'ño tse kjo'in s'e it'aà nangui! Xi kjoajti-la Nainá, tse kjo'in koi'nè-la xita naxandá Israel.

²⁴ Tjín xita xi kichá machitìn kiyá-ne; tikoáá tjín xi k'jeí nangui kjiko preso jña xita kjojchán. Jña xi mìtsà xita judío, 'ño ch'o sùiko nga skoetoòn jña xita naxandá Jerusalén; jña kotixoma skanda k'e nga kítasòn nachrjein-la xita koi.

K'e nga kjoíi jngòò k'a-ne Ki'ndí-la Xita

(Mateo 24:29-35, 42-44; Marcos 13:24-37)

²⁵ Ikjoàn jcha-la jè ts'oi, sá ko ni'ño nga kotsejèn-la seña xi ch'o kjoàn. I it'aà nangui, ngats'ìi xita 'ño tsakjón nga kji'nchré-la nga 'ño kjone nga fi nchrobá ndáchikon.

²⁶ Jña xita chiba-la kiyáya-né nga tsakjón k'e nga skoe kjoa xi komat'in isò'nde. Skanda jña ni'ño xi tjín ngajmii kijtiyaá-la.

²⁷ Ikjoàn skoe-na xita xi Ki'ndí-la Xita xan-la yijo-na nga kjinchrobàjñaà ijìin ifi. Tseé nga'ño ko kjoajeya kjoikoaa.

²⁸ K'e nga kots'ia kjoa koi nga k'oas'ín koma, kixi tinchaà, chjímii'ngaà skoò, tsja t'è-là inima-nò, chíñakjoaa nga jyeé kjòchraña nachrjein nga jño kítsajnandeíi-nò.

²⁹ K'ée tsibénojmí jngòò-la kjoa xi mangásòn; kitsò-la:

—Chitsejèn-la yá toò iko, ngats'ìi yá xi tjín.

³⁰ K'e nga jye bíts'ia nga bíjts'én xka-la yá, jyeé 'yaà nga nchrobá machraña chon ndobá.

³¹ K'oaá tis'ín tjín, k'e nga jchaa nga k'oas'ín tíma kjoa koi, kátasijìin-nò nga jye tíjnat'aà chraña-nò nachrjein nga jchaa kó s'ín otixoma Nainá.

³² 'Xi okixi, k'oaá xán-nò: Mikiì kiyá xitá xi tjin nàchrjein koi skanda kóni nga jye kitasòn yije jñà kjoa koi.

³³ Jè ngajmì kò isò'nde kjoehet'aà-né, tanga jñà 'én-na mikiì kjoehet'aà; kitasòn-né.

³⁴ T'een kindá yijo-nò; mikiì biì'nde nga sítájàjìin inìma-nò jñà kjoa xi ch'o tjin koni kjoa ch'i, kjoa chrjá'a, kò kjoa xi nikájnoò j isò'nde. Tsà k'oas'ín s'een, mikiì titsajnaandaà jè nàchrjein k'e nga 'an kjoiaa jngò k'a; tà nìton kjoì nàchrjein, skanè-nò koni jngò ch'an.

³⁵ K'oaá s'ín komat'in ngats'ii xitá xi tjin nga tíjtsa isò'nde.

³⁶ Jñò, ndaà titsajna, titsi'ba kijndá nga kjit'aà nàchrjein mé-ne nga s'e-nò nga'ño nga koma kitjojnò ngats'ii kjo'in xi k'oas'ín koma, tikoá mé-ne nga mikiì kosobà-nò nga kìncha nguixkon Ki'ndí-la Xitá.

³⁷ K'e nga nàchrjein, Jesús, yaá tsakóya ya nditsin jngò ítjòn. K'e nga majñò yaá fisikjáya ya nindoò xi 'mì Yá Olivo.

³⁸ Kjin xitá naxandá, f'ìikon ya nditsin jngò ítjòn nga xki tajñòya; f'ìi 'nchré-la mé 'én xi okóya.

22

*Kiis'ín tsohótsji'nde-la xitá kondra-la Jesús nga tsoba'ño
(Mateo 26:1-5, 14-16; Marcos 14:1-2, 10-11; Juan 11:45-53)*

¹ Jyeé tímachraña nàchrjein nga bitjo s'eí Paxkò k'e nga kjèn inchrájin xi tsjin-la na'yo san jñà xitá judío.

² Jñà xitá sko-la no'miì kò xitá xi okóya kjotíxoma-la Nainá xi kiskii Moisés, nga tsakjón-la xitá naxandá, tsohótsji'nde-la kó s'ín sikkò Jesús nga sikk'en.

³ Jè xitá neii jahas'en-jìin inìma-la jè Judas xi tikoá Iscariote 'mì, xi ya itjojìin ts'e xitá xi tejò ma-ne xi tsajmeiiko Jesús.

⁴ Judas, kiikáko jñà xitá sko-la no'miì kò xitá sko-la xi síkindá jngò ítjòn nga tsajoóya-ne kó s'ín sùngatsja Jesús.

⁵ Jñà xitá koi, tsjaá komà-la; tsibíndaajìin nga ton tsjá-la.

⁶ Judas, kòkjein-la, ikjoàn tsohótsji'nde-la kó s'ín sùngatsja Jesús nga mikiì skoe jñà xitá naxandá.

*K'e nga jè Jesús tsakjèn-kò xitá xi kota'yàt'aà-la
(Mateo 26:17-29; Marcos 14:12-25; Juan 13:21-30; 1 Corintios 11:23-26)*

⁷ Ijchò nàchrjein-la s'eí ts'e inchrájin xi tsjin-la na'yo san, k'e nga k'oas'ín tjinè-la nga biyaà orrè xi bíxteèn jní-la xi it'aà ts'e s'eí Paxkò.

⁸ Jesús kisikasén Pedro kò Juan, kitsò-la:

—Tanguió kindáà tsojmì xi kjoa ts'e s'eí Paxkò mé-ne nga kichiaá.

⁹ Jñà xitá-la kiskònangui-la, kitsò-la:

—¿Ñánda mejèn-lè nga konguí kindáà-jen?

¹⁰ Jesús kitsò:

—K'e nga kitjás'en-jñoò naxandá, ya skakjoò jngò xitá x'in xi 'yajen jngò nisa nandá. Tanguítjngui-la skanda ya ñánda kjoahas'en ni'ya.

¹¹ Kot'in-là nei-la ni'ya: “Jè Maestro kjònangui: ¿Ñánda tíjna cuarto-la ni'ya ñánda kòkjen-koaa xitá xi kota'yàt'aà-na ts'e s'eí Paxkò?”

¹² Xitá jè, kòkò jngò-nò cuarto xi tiyà kji xi jye ndaà choòn xi ya tíjnasò'nga ni'ya. Ya tindaà nga kichiaá.

¹³ Jñà xitá koi, kii; k'oaá s'ín kisakò-la koni s'ín kitsò-la Jesús. Yaá tsibíndaà tsojmì xi kòkjen kjoa ts'e s'eí Paxkò.

¹⁴ K'e nga ijchò hora nga kòkjen, Jesús tsibìjnat'aà ímíxa kò xitá-la xi tsibíxáya-la.

15 Kitsò-là:

—ì'Ñó tìsikìtsjeèn nga mejèn-na kókjèn-ko-nò ts'e s'eí Paxko nga tìkj'eè fì-na kjoa biyaà!

16 K'oaá xán-nò nga mì tì kù kókjeen-na s'eí Paxko skanda k'e nga kítasòn yije kjoa ts'e s'eí Paxko jñà nachrjein k'e nga Nainá kotìxoma.

17 K'ée kiskoé jngoò chìtsín, kitsjaà-là kjondaà Nainá, kitsò:

—Chjoé, tìka'bí-là xinguiò;

18 k'oaá xán-nò nga mì tì kù skì-na vino skanda k'e nga kotìxoma Nainá.

19 Ikjoàn kiskoé inchrájìn, kitsjaà-là kjondaà Nainá, kisìxkoaya, kitsjaà-là xita-là, kitsò:

—Inchrájìn jè, yijo-na-né nga 'aán kiyá ngajo-nò. K'oa tìs'ín t'een nga tìxkoaya inchrájìn, mé-ne nga koiìtsjeèn-nò xi it'aà ts'an.

20 K'e nga jye tsakjèn, k'oaá tìs'ín kis'iìn; kiskoé chìtsín, kitsò:

—Chìtsín jè, jè-né xi kjoa xitse xi bìndaajìin-ko-nò xi it'aà ts'e jnì-na xi xixteèn xi kjondaà tsajòn nga makixiya kjoa.

21 Íí tìjnat'aàko-ná ímìxa, jè xita xi sìngatsja-na it'aà ts'e xita kondra-na.

22 Xi okixi, 'an xi Kì'ndí-là Xita xan-là yijo-na, tìjné-na nga kiyá. Tanga, jìma xó-ne jè xita xi sìngatsja-na!

23 Jñà xita-là tsibìts'ia nga kiskònangui-là xíkjìn, kitsò:

—¿Yá-né xi k'oas'ín sìngatsja?

Yá-né xi tìjna ítjòn

24 Jñà xita-là tsajoókjoò xi kjoa ts'e yá-né xi tìjna ítjòn.

25 Jesús kitsò-là:

—Jñà xitaxá ítjòn-là xi mìtsà xita judío, 'ñó beètoòn xita naxandá-là, tanga jñà xitaxá koi, tsò-né nga ndaà xita.

26 Tanga jñò, mìkù k'oas'ín s'een. Jè xi tìjna ítjòn, isaá nangui kàtìjna; jè xi otíxá, tà saá jè kàtama chì'nda.

27 ¿Yá-né xi tìjna ítjòn? ¿A jè xi bìjnat'aà ímìxa, o xi jè xi bíya tsojmì? ¿A mìtsà jè xi bìjnat'aà ímìxa? Tanga j'ndeì, mìkù k'oas'ín koma. 'An, tìjnajìin-nò koni jngoò xita chì'nda xi síxá-nò.

28 'Skanda kó-ne nga tàts'en-là kjoa, jñò-nò xi tìtsajnakò kjit'aà-ná nita mé kjoa xi tímat'ian.

29 Koiì kjoa-là nga 'an sìngatsja-nò kjotìxoma nga jñò kotìxomaà koni s'ín kisìngatsja-na Nainá xi Nà'èn-na,

30 mé-ne jñò, ya kichioò tìkoá s'ioo ya it'aà ímìxa-na ñánda tìhotìxoma, tìkoá ya kìtsajnasòn íxile ts'e kjotìxoma nga jñò, kíndaajìin-là xita xi tejò tje-là ts'e naxandá Israel.

'Én xi kùichja Jesús nga jè Pedro kjó'mat'in

(Mateo 26:31-35; Marcos 14:27-31; Juan 13:36-38)

31 Kùichja-isa Nà'èn-ná, kitsò:

—Simón, Simón, jè xita neíì kisijé'nde nga mejèn-là 'ñó skót'aà-nò. K'e nga skót'aà-nò, yaá jcha-là yá-né xi ndaà ko xi mìkù ndaà, koni s'ín nìko trigo nga matsjeè.

32 'Tanga 'an, tsibìtsi'batjì-lè mé-ne nga mì jchiját'aà-lè nga mokjeiín-lè xi it'aà ts'an. K'e nga jye s'ikátjifaya-ne xi it'aà ts'an, tìs'ikoji xingui nga kixi kìtsajna.

33 Simón kitsò:

—Nà'èn, tìjnandaà-ná nga k'jìko-lè nas'ín ndayá k'oín, nas'ín skanda kiyáko-lè.

34 Jesús kitsò-là:

—Ngaji Pedro, k'oaá xan-lè, i'ndeí, jàn k'a k'oa sí nga mìkìì yaxkon-ná k'e nga tìk'j'èè kjindáya kóxtí.

K'e nga jye kjòchraña nachrjein nga k'oi-la kjo'in Jesús

³⁵ Jesús kiskònangui-la, kitsò-la:

—K'e nga kisikasén-nò nga tsanguió nika'bió 'én-na nga mìkìì kich'à ton, mìkìì kich'à chijtsa, mìkìì xoxté kitsjaya, ¿mé xi kisìchjaàt'aà-nò?

Jña xita kitsò:

—Nimé-jèn.

³⁶ K'ée kitsò-la:

—I'ndeí, jè xi tjin-la chijtsa ton, kàtakjoé; tikoá jè xi tjin-la na'ya kàtakjoé; ko jè xi tsjin-la kichà ndojò, kàtatjna nachrokisòn-la koá kàtatse kichà-la.

³⁷ K'oaá xán-nò nga tjinè-la nga kítasòn koni s'ín tíchja Xojon xi tjit'aà 'Én Tsjeè-la Nainá xi it'aà ts'an nga tsò: “K'oaá s'ín skoe-ikon koni jngoò xita xi mìkìì ndaà s'ín.” Koni s'ín tíchja 'Én Tsjeè-la Nainá xi it'aà ts'an, kítasòn yije-né.

³⁸ Jña xita-la kitsò:

—Na'èn, kjioè jò-najen kichà ndojò ijndé.

Jè Jesús kitsò:

—Kàtje kjoa.

K'e nga jè Jesús tsibít'si'ba ya nindoò Yá Olivo

(Mateo 26:36-46; Marcos 14:32-42)

³⁹ Jesús kii nga kiichjat'aà-la Nainá ya ñánda 'mì nindoò Yá Olivo koni s'ín s'ín kjit'aà; ikjoàn kiitjingui xita xi kota'yat'aà-la.

⁴⁰ K'e nga ijchò i'nde jè, kitsò-la xita-la:

—Titsi'ba-la Nainá mé-ne nga mì jé skajñoò.

⁴¹ K'ée tsasit'aà xin chiba-la koni kji saté jngoò ndajo k'e jngoò xita osén. Tsasèn-xkó'nchi, ikjoàn kiichjat'aà-la Nainá.

⁴² Kitsò:

—Na'èn, tsà mejèn-lè, chjaàxin-ná kjo'in jè; tanga mìtsà jè kítasòn 'én-na, jè kàtabitasòn tsiji.

⁴³ K'e nga tíchjat'aà-la Nainá tsatsejèn jngoò àkjale-la Nainá xi inchrobà-ne ngajmù nga kitsjaà-isa-la nga'ño.

⁴⁴ Nga tse kjo'in tísíkjeiín inima-la, isaá 'ño kiichjat'aà-la Nainá; chiba-la kitjoondá-né, jè ndátsjéya-la xi chixòt'aà nangui, jní kjoàn.

⁴⁵ K'e nga jye kiichjat'aà-la Nainá, kii jngoò k'a-ne ñánda títsajna xita xi kota'yat'aà-la. Tanga k'e nga ijchò, jyeé kjiyijòfè, koií kjoa-la nga 'ño 'on ma-la inima-la.

⁴⁶ Kitsò-la:

—¿Mé-ne titsayijòfè-nò? Tísítjeen, titsi'ba-la Nainá mé-ne nga mì jé skajñoò.

Kii komà k'e nga kindobà'ño Jesús

(Mateo 26:47-56; Marcos 14:43-50; Juan 18:2-11)

⁴⁷ Táko tìk'èé tíchja-isa Jesús, kjìn xita ijchò; jè tsó'ba ítjòn Judas, xi ya itjojiìn ts'e xita-la Jesús xi tejò ma-ne. K'e nga ijchò, kii kasit'aà chraña-la Jesús nga kiskine'a.

⁴⁸ Jè Jesús kitsò-la:

—Ngaji Judas, ¿a k'oaá s'ín tà jngoò kjoa xi chine'aá nìngatsja-ná 'an xi Ki'ndí-la Xita xan-la yijo-na?

⁴⁹ Jña xita-la xi i'nga, k'e nga kijtseè kjoa xi komat'in Jesús, kitsò:

—Na'èn, ¿a mejèn-lè nga kich'on-jen kichà ndojò?

⁵⁰ Jngoò xita-la Jesús tsajá-la kichà ndojò jè ch'inda-la no'mií ítjòn, tsatet'aà líká kixi-la.

51 K'eé kitsò Jesús:

— ¡Kì k'oaá nìkoo, kàtje kjoa!

Ikjoàn tsohót'aà-là tsja líká-là; nìtoón kjòndaà-ne.

52 K'eé kitsò-là jñà xità xi j'ìkjaá xi xità sko-là no'miì kò xità xi síkinda ingo ítjòn kò xità jchínga:

— ¿Mé-ne k'oas'ín kà'nè-nò nga kicha machitìn kò yá kich'à koni tsà jngoò xità chijé kòf'ìichjaà?

53 Nachrjein inchiòn tsohótijnako-nò ya nditsin ingo ítjòn; ¿mé-ne nga mìkiì ya kindobà'ño-ná? Koií kjoa-là nga jè hora jè nga jñò choòn, tsajòn-nò k'e nga jè xità nejí tíhotíxoma.

K'e nga jè Pedro mìkiì tsibénojmí nga beèxkon Jesús

(Mateo 26:57-58, 69-75; Marcos 14:53-54, 66-72; Juan 18:12-18, 25-27)

54 Jesús, kitsobà'ño xità, kiìkò ni'ya-là no'miì ítjòn. Jè Pedro, tà kjììn tà kjììn tsajmeètjngui-là.

55 Ya jngoò osen nditsin, jñà xità tsibítse jngoò ni'ín, ikjoàn tsibìtsajna'ngui jngoò ítjandiì. Tìkoo jè Pedro tsibìjnajiìn-là xità.

56 K'eé jngoò chjoón ch'nda kijtseèxkon Pedro nga tíjna'ngui; kiskoò'an, kitsò:

— Xità jè, tìkooá yaá tsóhoko Jesús.

57 Tanga jè Pedro tsoho'mat'in-né, kitsò:

— Ngaji chjoón, xità jè, mìkiì bexkoan.

58 Xi komà ijngoò tjò, nguì jngoò xità kijtseèxkon Pedro, kitsò-là:

— Tìkooá ngaji, yaá tjaàkoiì Jesús.

K'eé kitsò Pedro:

— Ngaji x'ìin, mìtsà ya tsòhokoaa.

59 Nga komà iskan, tjín-là tsà jngoò hora, tìkooá 'ño okitsò nguì jngoò xità:

— Kixií kjoa, xità jè, yaá tsóhoko, tìkooá yaá i'nde-là Galilea.

60 Pedro kitsò:

— Ngaji x'ìin, mìkiì be mé 'én xi kò'mi-là.

Tìk'eé-ne tíchja Pedro kiskindàya kóxtí.

61 Kisikátjifaya Na'èn-ná Jesús, kiskoòtsejèn-là Pedro. K'eé tsibìtsjeèn-là Pedro 'én xi kitsò-là Na'èn-ná Jesús nga kitsò-là: “Jàn k'a k'oa sí nga mìkiì yaxkon-ná k'e nga tìkj'eè kjindàya kóxtí.”

62 Jè Pedro, k'eé itjo ni'ya, ikjoàn 'ño jchán kiskindàya nga 'on komà-là inìma-là.

Kós'ín kùichja xità xi kisìsobà-là Jesús

(Mateo 26:67-68; Marcos 14:65)

63 Jñà xità xi nchisíkinda Jesús, kisìsobà-là tìkoo tsajá-là.

64 Tsibíchjoà xkon, ikjoàn kiskònangui-là, kitsò-là:

— ¡Koaìn-nájen yá xi tí'beé-lè!

65 Kjìn kjoa tjín-ìsa xi kj'ejí xi 'ño 'on kitsò-là.

K'e nga kiìkò Jesús ñánda tíjna xitaxá ítjòn ts'e xità judío

(Mateo 26:59-66; Marcos 14:55-64; Juan 18:19-24)

66 K'e nga kis'e isén, kjòxkóya jñà xità jchínga ts'e xità judío, xità sko-là no'miì kò xità xi okóya kjotíxoma-là Nainá xi kiskì Moisés; kiìkò Jesús ya ñánda maxkóya jñà xitaxá ítjòn; ikjoàn kiskònangui-là, kitsò-là:

67 — Koaìn-nájen, ¿a ngaji-né xi Cristo, [xi xó kisìkasén-lè Nainá], o xi majìn-né?

Jesús kitsò:

— Tsà k'oa xán-nò: “An-ná”, mìkiì kokjeiín-nò.

68 Tsà 'an skònangui-nò, jñò, mìkiì kìnókjoaa tìkooá mìkiì sikíjnandejí-ná.

⁶⁹ Jyeé ijchò hora-la nga 'an xi Ki'ndí-la Xita xan-la yijo-na yaá kótijnat'aà kixi-la Nainá xi 'ño tse nga'ño tjín-la.

⁷⁰ Ngats'ìi xita kitsò:

—¿A ngaji-né xi Ki'ndí-la Nainá 'mì-lè?

Jesús kitsò-la:

—Jñò sobà xi obixón nga 'an-ná.

⁷¹ K'eé kitsò jñà xita:

—¿Yá xita xi mochjeén-isa-ná xi tsja 'én? Jñá sobá titsana'yà-lá koni s'ín tíchja-ne tso'ba.

23

K'e nga kiiko Jesús ñánda tjna Pilato

(Mateo 27:1-2, 11-14; Marcos 15:1-5; Juan 18:28-38)

¹ Tsasítjen ngats'ìi xita, kiiko Jesús ñánda tjna Pilato.

² K'e nga ijchòko nguixkon Pilato, jñà xita tsibíts'ia nga tsohóngui, kitsò:

—Xita jè, kjòtsji-najen nga kj'eíi ndiyá fiko naxandá-ná. Tsò-né nga mì xò kiì kichjítjia tsojmì xi it'aà ts'e César, xitaxá ítjòn ts'e Roma; tikoáá tsò-né nga jè xò xi Cristo [xi xò kisikasén-ne Nainá] nga xitaxá ítjòn kína.

³ Jè Pilato kiskònangui, kitsò-la:

—¿A ji-né xi xitaxá ítjòn-la jñà xita judío?

Kitsò Jesús:

—Ngají xi k'oa si nga 'an-ná.

⁴ Pilato kitsò-la jñà xita sko-la no'miù ko xita naxandá:

—Nimé jé xi matsji-na it'aà ts'e xita jè.

⁵ Tanga jñà xita, isaá 'ño kiichja nga tsohóngui, kitsò:

—Kj'eíi s'ín okóya-la xita naxandá nga ótsji-la kjoasiì. Tsibíts'ia-ne nangui Galilea, kóhokji nangui Judea, skanda i Jerusalén.

K'e nga kiiko Jesús ñánda tjna Herodes

⁶ K'e nga kiì'nchré Pilato jè 'én xi tsò, Galilea, kiskònangui-la xita: ¿A yaá i'nde-la?

⁷ K'e nga kis'enojmí-la nga ya i'nde-la, kisikasén-la jè xita xi tjna xitaxá ítjòn Galilea xi 'mì Herodes; jñà naxrjein koi, tikoáá ján tjna naxandá Jerusalén.

⁸ Herodes, k'e nga kijtseèxkon Jesús, 'ño tsja komà-la nga kjòtseé mejèn-la nga skoexkon, nga jyeé kjìn kjoa kiì'nchré xi it'aà ts'e. Mejèn-la skoè jngoò kjoxkón xi s'ín.

⁹ Kjìn skoya kjoa kiskònangui-la, tanga jè Jesús, nijngoò 'én kiichja.

¹⁰ Tikoáá yaá títsajna jñà xita sko-la no'miù ko xita xi okóya kjotíxoma-la Nainá xi kiskìi Moisés nga 'ño nchihóngui.

¹¹ Jè Herodes ko soldado-la tsachrjekàngui-né; kisikákjá nikje xi 'ño ndaà kjoàn koni ts'e xitaxá ítjòn nga kisìsobà-la; ikjoàn kisikasén i'ngoò k'a-la jè Pilato.

¹² Naxrjein jè, tsajoóndaà-ne jè Pilato ko Herodes; k'e nga sa ítjòn, kondraá títsajna-la xíkjin.

K'e nga kitjoònè kjoa Jesús nga kiyá

(Mateo 27:15-26; Marcos 15:6-15; Juan 18:39-19:16)

¹³ Pilato tsibíxkóya jñà xita sko-la no'miù ko jñà xitaxá, ngats'ìi xita naxandá,

¹⁴ kitsò-la:

—Jñò, kinikasén-ná xita jè nga onguioò; bixón-nó nga kjoasiì ótsji-la xita naxandá; tanga 'an, kiskònanguií-la nga nguixkoòn; ngats'ìi 'én xi 'bioò, nimé jé sakó-na it'aà ts'e.

15 'Tikoaá jè Herodes, kisikasén ìjngoò k'a-na xita jè nga nímé jé kisakòt'aà-la. Tsjin-la jé nga kiyá.

16 Tsjaà-la kjo'in, ìkjoàn siikíjnandeí-na.

17 K'oaá s'in tjinè-la, k'e nga bitjo s'eí Paxko, bijnandeí jngoò xita xi ndayá títsajna'ya.

18 Tanga jña xita naxandá, tà jngoò jtaá kii ngats'ii, kitsò:

—;Kàtiyaà Jesús; tikíjnandeí-nájen Barrabás!

19 Barrabás, ndayá tjna koií kjoa-la nga xita naxandá Jerusalén kisikjaán-kjoò tikoa xita kisik'en jngoò.

20 Pilato, mejèn-la nga siikíjnandeí Jesús; ìjngoò k'a kiichja-la xita naxandá.

21 Tanga jña xita naxandá, isaá 'ño kiichja, kitsò:

—;Tjat'aà krò! ;Tjat'aà krò!

22 Xi ma-ne jàn k'a kitsò-la xita naxandá:

—;Mé jé xi tsohótsji, mé-ne kiyá-ne? 'An, nímé jé sakó-na xi it'aà ts'e nga kiyá. Tikoaá-ne tsjaà-la kjo'in, ìkjoàn siikíjnandeí-na.

23 Siì kis'iin xita, 'ño kiichja nga mejèn-la krò sít'aà Jesús. Koií kjoa-la nga 'ño chja xita naxandá ko xita sko-la no'miì, kisikijne nga kisikitasòn Pilato.

24 Jè Pilato kitsjaà okixi nga kàtitasòn koni s'in síjé xita naxandá.

25 Kisikíjnandeí Barrabás, xita xi xó k'oas'in kisijé-ne naxandá xi tjna'ya ndayá nga kjoasiì tsohótsji koa xita kisik'en. Ìkjoàn kisingatsja Jesús nga k'oas'in kàtasíko koni s'in mejèn-la.

K'e nga kisit'aà krò Jesús

(Mateo 27:32-44; Marcos 15:21-32; Juan 19:17-27)

26 K'e nga kiikò Jesús nga kii sík'en it'aà krò, kitsobà'ño jngoò xita xi tinchrobá-ne rancho-la xi 'mì Simón xi ya i'nde-la ñánda 'mì Cirene; jé kisik'ajen krò nga kiitjinguiko-la Jesús.

27 Kjìn xita naxandá tjingui-la, tikoaá kjìn íchjín tjingui-la xi kjindáyakeè nga mahimakeè kjoa xi tímat'in Jesús.

28 Jesús, kisikátji, kiskoòtsejèn-la, kitsò:

—Íchjín xi Jerusalén tsajòn, kì 'an chihindáyachaà-ná, chihindáyachaà yijo-nò ko ts'e ixti-nò.

29 Kijchò nachrjein k'e nga tse kjo'in s'e nga kitsò xita: “Mé tà ndaà-la jña íchjín xi 'ndi, xi tsjin-la ixti, xi mìkii ki'ndí tsi'beé, xi mì ixti kisikaki nga isaá chiba siikájno.”

30 Ìkjoàn kojìts'ia nga kitsò-la nindoò: “;Kàtakaànè-najen!” K'oa ti kitsò-la chrjangui-la nindoò: “;Tijtsa'nde-najen!”

31 'An, koni jngoò yá xkoén, tanga 'ño ch'o síko-na xita; jño xi xita Jerusalén tsajòn, isaá tà 'ño ch'o siiko-nò xita koni jña yá kixi.

32 Tikoa kiikò jò xita xi tse jé tjin-la nga tikoa krò kiyát'aà.

33 K'e nga ijchòko ya i'nde ñánda 'mì I'nde Sko Mik'en, tsasíjnat'aà krò Jesús ko xita xi jò ma-ne, jña xi tse jé tjin-la; jngoò, tsasíjnat'aà nga kixi-la koa jngoò, tsasíjnat'aà nga ngaskón-la.

34 K'éé kitsò Jesús:

—Na'èn, tjichàat'aà-la; mìkii beè mé kjoa xi s'in.

Ìkjoàn jña soldado kisiskáko nikje-la Jesús nga kisika'bí-la xikjín yá ts'e koma.

35 Jña xita naxandá nchikotsejèn-la; tikoa jña xitaxá ítjòn nchisísobà-la, nchitsò:

—Xita xi kj'eíj tsachrjetjì kjo'in; tsà kixi kjoa nga jé xi Cristo xi xó k'oas'in jaàjìn-ne Nainá, kàtachrjetjì kjo'in yijo-la.

36 Tikoáá jñà soldado kisisobà-là Jesús. Ijchò kinchat'aà chraña-là; kits-jaà-là nandá vinagre nga s̄ik̄i.

37 Kitsò-là:

—T̄sà j̄i-né xi x̄itaxá ítjòn-là x̄it̄a judío, t̄ik̄ijnandeí yijo-lè!

38 Tikoá t̄jít'aàsòn-là skò krò xi 'én griego, 'én latín, kò 'én hebreo xi tsò: “Jè jèe xi X̄itaxá ítjòn-là x̄it̄a judío.”

39 Jñà x̄it̄a xi tse jé t̄jín-là xi t̄ikoá yà t̄johónguit'aà krò, jngoò xi 'ñó 'nga kiichjako Jesús, kitsò-là:

—T̄sà j̄i-né xi Cristo [xi xó kisikasén-lè Nainá], t̄ik̄ijnandeí yijo-lè t̄ikoá t̄ik̄itsajndeí-nájen!

40 Jè x̄it̄a xi òjngoò tsohótiko x̄ik̄jín, kitsò-là:

—¿A mì tsakjoòn-là Nainá nga ngàsòn k̄jò'in t̄itsan̄ik̄jiaán?

41 Xi òkixi, jñá òk̄ín-ná nga s̄ik̄jiaán k̄jò'in nga k̄ichjiá jé-ná, koi k̄joá-là nga 'ñó ch'o k̄i'né; tanga jè x̄it̄a jè, n̄imé xi ch'o kis'ìn.

42 K'eé kitsò-là Jesús:

—T̄ik̄itsjeèn-ná k'e nga jye k̄its'i nga kot̄ixomai.

43 K'eé kitsò Jesús:

—Òkixi xi xan-lè; ònde, ján k̄ijnako-ná ngajmì yà ònde ñánda 'ñó ndaà choòn.

K'e nga k'en Jesús

(Mateo 27:45-56; Marcos 15:33-41; Juan 19:28-30)

44 K'e nga ijchò nchisen, kòjñò nga t̄jtsa isò'nde skanda xi jàn nga nguixòn.

45 Jè ts'oi, kòjñò, koá jè nikje xi t̄johóya jngohosen òngò ítjòn, jòya komà nga kixojndà.

46 Jesús 'ñó kiichja, kitsò:

—N̄a'èn, ndseji b̄ijnaya in̄ima-na!

K'e nga jye òkitsò, k'en.

47 Jè x̄it̄a skò-là soldado, k'e nga kijtseè k̄joá koi koni s'ín komà, kijtseèkón Nainá, kitsò:

—Kixi k̄joá, x̄it̄a jè, x̄it̄a kixi-né.

48 Ngats'ì x̄it̄a xi chixoña nga nchikotsejèn, k'e nga jye kijtseè k̄joá xi komà, kiì-ne ni'ya-là; kis̄ijts'ìn-sòn in̄ima-là nga 'ñó tse k̄joaba kis'ejiìn in̄ima-là.

49 Ngats'ì x̄it̄a xi beèkxon Jesús kò íchjín xi inchrobà-t̄jngui-là skanda ján Galilea, k̄jiìn jncha-ne nga nchikotsejèn-là.

K'e nga kisihjiìn Jesús

(Mateo 27:57-61; Marcos 15:42-47; Juan 19:38-42)

50 T̄jina jngoò x̄it̄a xi 'mì José xi 'ñó ndaà x̄it̄a, t̄ikoáá x̄it̄a kixi-né. Yáá ònde-là ñánda 'mì Arimatea, jngoò naxandá xi ch̄ja-ne Judea. T̄ikoáá xá ítjòn t̄jín-là ts'e x̄it̄a judío.

51 Jè José, t̄ikoáá tíkoñaá-là nga mejèn-là skoe kó s'ín ot̄ixoma Nainá; mìk̄i t̄jngò-ìkon koni s'ín tsajoóya-ne x̄itaxá x̄ik̄jín koni s'ín kisiko Jesús.

52 Kiìkon Pilato; kiì s̄ijé'nde-là nga k̄jinchrobàkò yijo-là Jesús.

53 Kiskónájen-t'aà krò; kisikájté jngoò nikje lino chroba. Ikjoàn kiì k̄ihjiìn. Kiskin's'en-ngui jngoò ngajo mik'en ñánda nga xó k'oas'ín kitax'a-ne naxi. Ì'nde jè, n̄i saá jngoò mik'en sihiìn.

54 Nachrjein jè, víspera-là s'eí Paxkò-né; jye kjomeè bijchó hora nga kots'ia jè nachrjein n̄ik̄jáya.

55 Jñà íchjín xi t̄jiko kóni nga inchrobà-ne Galilea, kiìt̄jngui-là; kijtseèkxon ngajo mik'en kó s'ín kisijna yijo-là Jesús.

⁵⁶ K'e nga j'i-ne ni'ya-la tsibítsajnándaà xkii xi 'ño ndaà jne ko xkii na'yo. Ikjoàn kisikjáya íchjín jè nachrjein nìkjáya, koni s'ín tíchja kjotíxoma.

24

Mé xi komà k'e nga jaáya-la Jesús

(Mateo 28:1-10; Marcos 16:1-8; Juan 20:1-10)

¹ Jè nachrjein nga tàts'en xomàna, 'ño tajñòya kii jña íchjín ya ngajo mik'en ñánda kisihijín Jesús nga kii ko xkii jne xi tsibítsajnándaà nga kii xten-jno yijo-la Jesús; tikoá kjihijtakò íchjín xi kj'eíí.

² K'e nga ijchò, kijtseè jè ndajo xi tíchjoàjto-la ngajo mik'en, xìn kijna.

³ K'e nga jahas'en-ngui ngajo mì tì kii kjòtsji-la yijo-la Na'èn-ná Jesús.

⁴ K'e nga nchisíkájno íchjín koi, tà nitoón chinchat'aà jò-la xita x'in xi íkjá nikje xi ote ni'ín kjoàn.

⁵ Íchjín koi, tà kitsakjòn-la; chincha-ñiat'aà nangui. K'eé kitsò jña xita x'in xi jò ma-ne:

—¿Mé-ne i binchaàtsjijín-là mik'en jè xita xi tíjnakon?

⁶ Mì tì yá tjín-ne ijndé, jyeé kòfaáya-la. Tíkítsjeèn koni s'ín kitsò-nò k'e nga tisa tsibijna Galilea,

⁷ nga kitsò: “Mochjeén-né nga jè Ki'ndí-la Xita, jña kongatsja xita jé nga koòt'aà krò tanga k'e nga kijchò jàn nachrjein kjoáya-la.”

⁸ Jña íchjín koi, k'eé tsibítsjeèn-la koni s'ín kitsò Jesús.

⁹ K'e nga j'i-ne nga kii katsejèn-la ngajo mik'en, tsibénojímí-la jña xita xi tsibíxáya-la xi tejngoò ma-ne ko xita xi i'nga.

¹⁰ Jña íchjín koi, jè xi 'mì María Magdalena, Juana, María xi nea-la ma-ne Jacobo ko xi kj'eíí íchjín-lsa; jña xi ijchòko 'én nga tsibénojímí-la jña xita xi tsibíxáya-la.

¹¹ Tanga jña xita-la Jesús, xi kjoa nìton, tà kjoaská komà-la; mìkii kòkjeín-la 'én xi tsibénojímí-la jña íchjín.

¹² Tanga jè Pedro, tsangachikon, kii katsejèn-la ngajo mik'en; k'e nga kiskoòtsejèn-s'en ngajo, kijtseè nga tà jña kjioò nikje xi kisìjtéjín Jesús. Ikjoàn kii-ne ni'ya-la; tà kjòxkón-la kjoa xi komà.

Ndiyá Emaús

(Marcos 16:12-13)

¹³ Tijè-ne nachrjein, jò xita xi kota'yàt'aà-la Jesús nchifi jngoò naxandá xi 'mì Emaús, xi tjín-la tsà tejngoò kilómetro skanda ján Jerusalén.

¹⁴ Nga nchifi ya ndiyá, koií nchijoóya-ne ngats'ì kjoa xi komà.

¹⁵ Nga nchijoónojímí tikoá nchikjònangui-la xíkjín ijchòtjìngui chraña-la xi tijè-ne Jesús xi taña tsobáhijtakò.

¹⁶ Tanga jña, k'oaá komà-la koni tsà tíchjoà xkon, mìkii kijtseèxkon.

¹⁷ Jesús kiskònangui-la, kitsò-la:

—¿Mé 'én xi ondaà chibàya-nò nga tjaàya ndiyá? ¿Mé-ne ba tjín-nò?

¹⁸ K'eé kii chja Cleofas, kitsò:

—Ngats'ì xita naxandá Jerusalén, tà jì ta jngoò-lè xi mìkii tíjín-lè jè kjoa xi komà ján Jerusalén, jña nachrjein xi tsato.

¹⁹ Jesús kitsò:

—¿Mé kjoa-ne?

Jña xita koi kitsò-la:

—Kjoa ts'e Jesús xi Nazaret i'nde-la, jè xi kii chja ngajo-la Nainá; kis'eé-la nga'ño, ma yijeé-la nita mé kjoa-ne, nita mé 'én-ne nga nguixkon Nainá, nguixkon ngats'ì xita naxandá.

²⁰ Xità skò-là nò'miì, kò xitaxá tsajen, kisingatsja xità Romano nga kisik'en, tsohót'aà krò.

²¹ Ngajen, titsachiñá-lajen, bixón-nájen tsà jè Mesías xi siikítsajnandeijí-ne xità naxandá Israel. Tanga i'ndeì, jyeé tjín-là jàn nachrjein nga k'oas'ín komà kjoa koi.

²² Tikoáá tjín i'nga íchjín xi títsajnajin-najen, xi tajñòya kòfi katsejèn-là jè ngajo mik'en. K'e nga kòf'i-ne kàbincháxkón-najen nga kábénojmi-najen

²³ nga mì xó kii kàsakó-là yijo-là Jesús; tikoá kàbeèxkon xó àkjale xi kàtsò-xó-là: Jesús tjínakon-né.

²⁴ K'eé kòfi i'nga xità xingui-jen xi kòfi katsejèn-là ngajo mik'en, k'oáá tis'ín kàbeèxkon koni s'ín kàtsò jñà íchjín tanga jè Jesús, mì xó kii kòbeè.

²⁵ K'eé kitsò Jesús:

—Mé tà tòndò-nò tikoá mé tà tájaàjìn tjín inima-nò nga mikii ndaà mokjeiín-nò kjoa xi kitsò jñà xità xi kiichja ngajo-là Nainá!

²⁶ ¿A mìtsà tíjìn-nò? K'oáá s'ín tjínè-là Cristo, [xità xi xó kisikasén-ne Nainá], nga íjòn siikjeiín kjo'in, ikjoàn kjoahas'en ngajmii ñánda jeya kijna.

²⁷ Tsibénojmiya-là kó tsòya-ne koni s'ín tíchja ngats'ii Xojon-là Nainá it'aà ts'e Cristo. Tsibíts'iaqo-ne xojon xi kiskii Moisés; ikjoàn tsibénojmiya-là ngats'ii xojon xi kiskii jñà xità xi kiichja ngajo-là Nainá.

²⁸ K'e nga ijchò ya naxandá ñánda nchifi xità koi, Jesús, k'oáá kis'iin koni tsà isa kjiin tífi.

²⁹ Tanga jñà xità koi, kjo'ño kis'iin-là nga kisikijna; kitsò-là:

—Tijnako-nájen; jyeé kjòhoxòn, jye kiskaàtji ts'oi.

Jè Jesús, kòkjeiín-là; jahas'en ni'ya; tsibijnako.

³⁰ K'e nga jye títsajnat'aà ímixa, kiskoé inchrajín, kitsjaà-là kjondaà Nainá, kisixkoaya, ikjoàn kitsjaà-là jñà xità.

³¹ K'eé kitáx'a xkon; kijtseèxkon nga jè Jesús; tanga jè Jesús, tà kichijà-né nga nguixkon xità koi.

³² K'eé kitsò-là xíkjín:

—Koií-la kjoa-là nga ndaà kòmatsja-là inima-ná k'e nga tíhókonojmi-ná ya iya ndiyá nga tíbénojmi-ná kjoa ts'e Xojon-là Nainá.

³³ Mì tí kii kiskoòñà-ne, kisikátji nitoón-ne nga kii-ne Jerusalén; ijchò ijngoò k'a-ne jngoò ni'ya ñánda títsajnajtín xíkjín xi tejngoò ma-ne kò xità xi k'ejí-isa.

³⁴ Jñà xità xi tejngoò ma-ne kitsò-là xíkjín:

—Kixíí kjoa, jyeé kòfaáya-là Na'èn-ná Jesús; jyeé kòbeèxkon Simón.

³⁵ K'eé tsibénojmi jñà xità xi jò ma-ne kó s'ín komàt'in ya iya ndiyá koa kó s'ín komà nga kijtseèxkon Jesús k'e nga kisixkoaya inchrajín.

K'e nga jè Jesús tsatsejèn-jiin osen ñánda títsajna xità xi kota'yàt'aà-là (Mateo 28:16-20; Marcos 16:14-18; Juan 20:19-23)

³⁶ Táko tik'eé nchichja-isa nga nchibénojmi-là xíkjín kjoa koi, nga tsasijnajin osen-là Jesús; kisihixat'aà, kitsò-là:

—Nainá, 'nchán kàtasíkítsajna-nò.

³⁷ Jñà xità koi, tsí ndaà kitsakjòn, koa tsí ndaà kisinchaàxkón; k'e nga kijtseè, komà-là tsà tà inima-là mik'en-né.

³⁸ Tanga Jesús kitsò-là:

—¿Mé tà ndaà tsakjoòn-nò? ¿Mé-ne k'oá tsò-ne kjohítsjeèn xi bitjojiin inima-nò?

³⁹ Chítsejèn-là ndsaa kò ndsokoaà. 'An-ná. Tjat'aà-ná ndsaa koa chítsejèn-ná. Jngoò xità xi tà inima, tsjìn-là yijo, tikoáá tsjìn-là nindaà, tanga 'an, tjín-na koni s'ín titsa'yaà-ná.

⁴⁰ K'e nga jye okitsò-là, tsakó-là tsja kò ndsoko.

41 Tanga jñà x̄ita-là mìkìi xátí kòkjeíin-là nga tsja komà-là t̄ikoà kisin-chaàxkón nga kijtseèxkon Jesús; k'eé kiskònangui Jesús, kitsò-là:

—¿A t̄jín chiba-nò tsojmì xi ma chine?

42 Kitsjaà ìtsé-là t̄in xi jye kichjàn, kò tsjén-là cho cera.

43 Jesús kiskoé, ìkjoàn kiskine nga nguixkon jñà x̄ita-là.

44 K'eé kitsò-là jñà x̄ita-là:

—Jñà kjoà xi komàt'ian, jñà-né xi tsibenojmí-nò k'e nga t̄isa tsohótijnako-nò. K'oaá s'ín kixan-nò nga k̄itasòn yije-né koni s'ín t̄ichja xojon ìt'aà ts'an, jè k̄jotíxoma-là Nainá xi kiskìi Moisés kò ts'e x̄ita xi k̄ichja ngajo-là Nainá kò xi t̄jít'aà libro ts'e Salmo.

45 K'eé kisìkichiya-là k̄johítsjeèn-là mé-ne nga kàtjahas'en-jìin-là koni s'ín t̄ichja Xojon xi t̄jít'aà 'Én Tsjeè-là Nainá.

46 Kitsò-là:

—K'oaá s'ín t̄ichja Xojon-là Nainá nga tsò nga 'an xi Cristo, [xi xó kisìkasén-na Nainá], k'oaá s'ín t̄jìnè-na nga k̄iyá; tanga k'e nga k̄ijchò jàn nàchrjein, kjoaáya-na ìt'aà ts'e kjoà biyaà.

47 Xi ìt'aà ts'an, Nainá s̄ijchàat'aà-là jé-là x̄ita k'e nga s̄ikájno jé-la nga mì t̄i jé kohótsji-ne. Jè 'én koi, mochjeén-né nga k̄inókjoayajìn yije-là x̄ita mats'iāko-ne Jerusalén kó nga t̄jtsa isò'nde.

48 Jñò kénajmió kjoà kixi koni s'ín komà.

49 'An s̄ikasén-nò jè k̄jotjò xi tsjá Na'èn-na koni s'ín kitsjaà tso'ba. Tanga jñò, ìí t̄itsajna naxandá Jerusalén skanda k'e nga tjoé-nò nga'ñó-là Nainá xi nchrobá-ne ngajmì.

K'e nga k̄imijìn ngajmì Jesús

(Marcos 16:19-20)

50 K'eé k̄iikò x̄ita-là skanda ján naxandá Betania. Kiskimì'nga tsja nga kisìjét'aà-là Nainá nga k̄atasíchikon-t'in jñà x̄ita koi.

51 K'e nga t̄isjét'aà-là, kitjámì'nga nga k̄iì-ne ngajmì.

52 Jñà x̄ita-là, k'e nga jye chincha-xkó'nchit'aà-là nga jeya kisìkijna Jesús, k̄iì-ne Jerusalén; 'ñó tsja kis'e-là.

53 Nàchrjein inchiòn tsibìtsajnaya ìngo ìtjòn nga kitsjaà-là k̄jondaà Nainá t̄ikoà jeya kisìkijna.

'Én ndaà-la Nainá xi kjoa ts'e Cristo koni s'ín kiskù San Juan

Jesucristo xi 'Én-la Nainá, xitàá komà

¹ K'e nga tisa tàts'en-la kjoa, jè 'Én, jyeé k'oa tíjna-né. Yaá tíjnakò Nainá. Jè 'Én, Nainá-né.

² Kò yaá tíjnakò Nainá skanda tisa tàts'en-la kjoa.

³ Jè Nainá, k'e nga tsibíndaà ngats'ì tsojmì xi tjin, it'aà ts'eé 'Én tsibíndaà; nì mé tsojmì tjin xi mì it'aà ts'e kisindaà.

⁴ Jè 'Én, it'aà ts'e-né nga títsajnakon xità; jè kjoa nga títsajnakon xità, jè-né ni'ín xi síhiseèn-la ngats'ì xità.

⁵ Jè ni'ín xi síhiseèn ñánda jñò choòn, ote-né, kò jè kjoa jñò mìkù ma síkijne-la ni'ín nga síkits'o.

'Én xi kùchja Juan it'aà ts'e Cristo

⁶ Tsibìjna jngò xità xi 'mì Juan xi Nainá kiskasén.

⁷ Jè j'ì tsjá 'én it'aà ts'e ni'ín xi síhiseèn, mé-ne ngats'ì xità kòkjeiín-la koni s'ín kùchjaya.

⁸ Mìtsà jè Juan ni'ín xi síhiseèn-la xità, tà 'én j'ì tsjá it'aà ts'e ni'ín xi síhiseèn-la xità.

⁹ Jè ni'ín xi nguì kixi kjoa xi síhiseèn-la ngats'ì xità, yaá tíchrobá jì isò'nde.

¹⁰ Í tsibìjna isò'nde, kò it'aà ts'eé kisindaà isò'nde, tanga jñà xità isò'nde mìkù kijtseèxkon.

¹¹ J'ì nangui ñánda ts'e, tanga jñà xità-la mìkù kiskoétjò.

¹² Ngats'ì xità xi kiskoétjò tikoà kòkjeiín-la jñà 'én xi kùchja, k'oaá s'ín kitjò'nde-la nga Ki'ndí-la Nainá ma,

¹³ tanga mìtsà koi kjoa-la nga jni kits'ìin-jìin, nì mìtsà koi kjoa-la nga it'aà ts'e xità kits'ìin; koi-né nga it'aà ts'e Nainá kits'ìin.

¹⁴ Jè 'én, xitàá komà, í tsibìjnajìin-najen. Ki'ya-nájen kjoa jeya-la nga Ki'ndí tà jngò-la Nainá. 'Ñó tjin-la kjondaà kò kjoakixi.

¹⁵ Juan kitsjaà 'én it'aà ts'e, kitsò:

—Jè jèe xi k'oas'ín kixan-nò k'e nga kixan-nò: “Jè xi sa nchrobá tjingui-na, jè isa tíjna ítjòn-na, nga isa kjòtseé tíjna koni 'an.”

¹⁶ 'Ñó tse kjondaà kitjoé-ná ngats'iaá, sa 'ño, sa 'ño kochikon-t'ian.

¹⁷ Jè kjotíxoma, it'aà ts'e Moisés j'ì-ne, tanga xi kjondaà kò kjoakixi, it'aà ts'e Jesucristo j'ì-ne.

¹⁸ Nì saá jngò xità beèxkon kó kji Nainá. Tà jè xi ki'ndí tajngò-la xi ya tíjnat'aà-la, bénojmi kixi-ná it'aà ts'e.

'Én xi tsibénojmi Juan it'aà ts'e Jesús

(Mateo 3:11-12; Marcos 1:7-8; Lucas 3:15-17)

¹⁹ Jñà 'én koi xi kitsjaà Juan, k'e nga jñà xità judío xi títsajna Jerusalén kiskasén-la nò'mì kò xità levita ñánda tíjna Juan nga kiskònangui-la, kitsò-la:

—¿Yá xità-ne jì?

²⁰ Juan tsibénojmi kixi-né; mìkù tsakajna'ma, kitsò:

—Mìtsà 'an xi Cristo, xità xi xó kiskasén-ne Nainá.

²¹ Xità koi l'ngò k'a kiskònangui-la kitsò-la:

—¿Yá-né ngaji? ¿A jì-né Elías?

Juan kitsò:

—Majìn, mìtsà 'an.

—¿A jì-né xìtá xi chjã ngajo-là Nainá xi tjinè-là nga kjoíí?

Juan kitsò:

—Majìn, mìtsà 'an.

²² Ìjngòò k'a kiskònangui-là, kitsò-là:

—Kòt'ìn-nájen, yá-ne jì, mé-ne nga koma kònguiko-lajen 'én jñà xìtá xi kàsikasén-najen. ¿Mé 'én xi k'oi-nájen it'aà tsiji?

²³ K'eé kitsò Juan:

—'An-ná xìtá xi 'ñó chjaya i'nde it'aà xìn ñánda nangui kixì choòn: “Tjandaà kixiõo ndiyá-là Nainá”, koni s'ín kitsò Isaiás, xìtá xi kiichjã ngajo-là Nainá.

²⁴ Jñà xìtá xi ijchò kjònangui-là Juan, xìtá fariseo-né.

²⁵ Ìjngòò k'a kiskònangui-là, kitsò-là:

—Tsà mìtsà jì xi Cristo, nì Elías, nì jè xìtá xi chjã ngajo-là Nainá, mé-ne xìtá 'nè-ne bautizar.

²⁶ Kiichjã Juan kitsò:

—'An tà nandá s'iin-nà bautizar xìtá, tanga tijnajìn jngòò-nò xi jñò mìkì yaxkon,

²⁷ jè xi iskan kjoíí, jè xi isã tìjna ítjòn koni 'an; skanda mìkì tji'nde-nà nga 'an skijnda'ñoá xox'ín-là xojté-là.

²⁸ Ngats'iì kjoa koi, ján naxandá Betania nga k'oas'ín komà, naxandá xi kijna xijngoaà ndá je Jordán, ñánda kis'iin bautizar xìtá jè Juan.

²⁹ Nga komà nchijòn, Juan kijtseè Jesús nga tinchrobákon, kitsò:

—¿Chítsejèn-là, jè jèe xi síkasén Nainá k'oaa ngaya-là koni Orrè Ki'ndí xi faáxìn jé-là xìtá isò'nde!

³⁰ Jè jèe xi k'oã kixan-nò k'e nga kixan: “Nchrobá tjingui jngòò-na xìtá x'ín xi isã tìjna ítjòn-nà nga isã kjòtseé tìjna koni 'an.”

³¹ Tikoaa 'an, mìkì bexkoan yá-né jè. Koií kjoa-là nga ta nandá s'in-na bautizar xìtá mé-ne jñà xìtá naxandá Israel skoexkon-ne.

³² Juan, k'oas'ín kitsjaà 'én nga kitsò:

—Kijtseè-ná jè Inimã Tsjeè-là Nainá nga itjojen-ne ngajmiì koni kji nise paloma kji, tsibìjnasòn-là Jesús.

³³ 'An, kj'eè kì bexkoan, tanga jè Nainá xi kisikasén-nà nga kò nandá s'iin-na bautizar xìtá, kitsò-na: “Jè xi jchii nga kitjojenè-là Inimã Tsjeè-nà nga ya kijnasòn-là, jè-né xi kò Inimã Tsjeè-nà s'iin-ne bautizar xìtá.”

³⁴ 'An, k'oaa s'ín kijtseè, k'oaa ma-ne k'oas'ín tsjaà 'én nga Jesús, jè xi Ki'ndí-là Nainá.

Xìtá xi kiskoòta'yàt'aà ítjòn-là Jesús

³⁵ Nga komà nchijòn, Juan yaá tìjna ìjngòò k'a; tjiiko jò xìtá xi kota'yàt'aà-là.

³⁶ Juan kijtseèxkon Jesús nga tikoã ya tsóba, kitsò:

—¿Chítsejèn-là, jè jèe xi orrè-là Nainá [xi kiyátjì jé-là xìtá]!

³⁷ Ingajò xìtá koi, k'e nga kii'nchré koni s'ín kitsò Juan, kiitjingui-là Jesús.

³⁸ Jesús k'e nga kisikátjiya, kijtseè nga xìtá tjingui-là kitsò-là:

—¿Mé xi binchaàtsjioò?

Ingajò xìtá koi, kiichjã, kitsò:

—Maestro, ¿ñánda tijnì?

³⁹ Jesús kitsò-là:

—Nchrobá, chítsejèn.

Ikjoàn kiitjingui-là, kijtseè ñánda bìjna Jesús. Yaá tsibìtsajnakò nga jye kjòhoxòn, ijchò-la tsà xi ñijòn.

⁴⁰ Ingajò x̄it̄a koi, j̄ñà xi kiit̄j̄ngui-l̄a Jesús k'e nga kiì'nchré-l̄a koni s'ín kitsò Juan, jngoò xi 'mì Andrés xi 'ndse ma Simón Pedro.

⁴¹ Andrés kiì kátsji ítjòn 'ndse xi 'mì Simón, kitsò-l̄a:

—Jyeé kà yaxkon-j̄en j̄e Mesías [xi xó kisikasén-ne Nainá]. J̄e 'én Mesías, Cristo tsòya-ne.

⁴² Andrés kiìkò Simón xi 'ndse ma ya ñánda tíjna Jesús. Jesús, k'e nga kijtseè, kitsò-l̄a:

—Ngaji-né xi 'mì-lè Simón xi ki'ndí-l̄a ma Jonás. I'ndeì, Cefas k'oín-lè ('én xi Pedro tsòya-ne).

K'e nga Jesús kiìchja-l̄a j̄e Felipe kò Natanael

⁴³ Nga komà nchijòn, Jesús k'oaá s'ín kisikítsjeèn nga ján kjoì nangui Galilea. Kiskaàjìin Felipe, kitsò-l̄a:

—Nchrobá t̄j̄ngui-ná.

⁴⁴ Felipe, yaá i'nde-l̄a naxandá Betsaida, ya ñánda i'nde-l̄a Andrés kò Pedro.

⁴⁵ Felipe kiì kátsji Natanael, kitsò-l̄a:

—J̄e x̄it̄a xi oxk̄it'aà kjotíxoma xi kiskì Moisés kò x̄it̄a xi kiìchja ngajo-l̄a Nainá, jyeé kà yaxkon-j̄en nga j̄e Jesús xi ki'ndí-l̄a José xi Nazaret i'nde-l̄a.

⁴⁶ Natanael, kitsò-l̄a Felipe:

—Ján naxandá Nazaret, ¿a tíjn jngoò xi ndaà x̄it̄a xi ya k̄it̄jokàjìin-ne?

Felipe kitsò:

—Nchroboí, chítsejèn-l̄a.

⁴⁷ Jesús, k'e nga kijtseè Natanael nga tínchrobákon, kitsò:

—J̄e x̄it̄a j̄e xi nguì kixi kjoa nga x̄it̄a Israel nga ndaà tísjchá yijo-l̄a kò mìkì konachan.

⁴⁸ Natanael kitsò:

—¿Kó s'ín ma-ne nga yaxkon-ná?

Jesús kitsò:

—K'ée kòbe-lè k'e nga t̄ikj'eè chja-lè Felipe nga tíjna'ngui yá toò ikò.

⁴⁹ Natanael kitsò:

—Maestro, ngaji-né xi Ki'ndí-l̄a Nainá; j̄i-né xi x̄itaxá ítjòn-l̄a naxandá Israel.

⁵⁰ Kiìchja Jesús kitsò:

—¿A koií-né nga xan-lè: Kòbe-lè k'e nga tíjna'ngui yá toò ikò nga mokjeiín-lè? K'oaá xan-lè nga isa 'ño tse kjoxkón jchaá-isi.

⁵¹ Ijngoò k'a kiìchja Jesús kitsò:

—Nguì okixi xi xan-nò, nachrjein xi sa f'ii isa jchaxkoòn ngajmii nga tix'á koa j̄ñà àkjale-l̄a Nainá fimijìn koa nchrobájen nga tíjmat'aà-na xi Ki'ndí-l̄a X̄it̄a xan-l̄a yijo-na.

2

J̄e kjoxkón xi kis'ùin ítjòn Jesús

¹ Xi komà ján nachrjein, kis'e jngoò s'eí nga chixàn x̄it̄a ján naxandá Caná, ya nangui Galilea. T̄ikoaá yaá tíjna j̄e nea-l̄a Jesús.

² T̄ikoa kinokjoà-l̄a Jesús kò x̄it̄a xi kota'yàt'aà-l̄a ya ñánda chixàn x̄it̄a.

³ K'e nga jyehet'aà vino, j̄e nea-l̄a Jesús kitsò:

—Mì t̄i mé vino tíjn-ne.

⁴ Jesús kitsò:

—¿Mé xi ma-lè? ¿Mé-ne 'an kò'mì-ná? Kj'eè kiì bijchó nachrjein-na nga skoe-na x̄it̄a yá-ná 'an.

⁵ J̄e nea-l̄a Jesús kitsò-l̄a j̄ñà x̄it̄a xi bíya vino:

—K'oaá s'ín t̄ikitasòn yije-là koni s'ín tsò-nò.

⁶ Ya títsajna joòn tíjí ndajo xi sinchá nandá, xi síkjeén jñà xità judío nga ma sítsjeè-ne tsojmì xi tíjín-la koni s'ín tíjín kjotíxoma-la xi xkón tíjín. Jñà tíjí kjiyaá-la tsà jò kò tsà jàn nisa nandá.

⁷ Jesús kitsò-la jñà xità chí'nda xi nchibíya vino:

—Tínchaà nandá tíjí koi.

Jñà xità chinchá nandá; jngoò k'aá kisítseè.

⁸ Ikjoàn kitsò Jesús:

—Tínachrjeè chiba vino; tanguíko-la jè xi tísis'in-la xità.

K'eé kiìko-la.

⁹ Jè xità xi oko-la nga tísis'in-la jñà xità, kiskoòt'aà nandá xi vino komà; xità jè, mìkì tíjìin-la ñánda j'ù-ne. (Tà jñà tíjìin-la xità chí'nda xi tsachrje nandá.) Jè xità xi oko-la, k'eé kiìchja-la xità x'in xi chixàn,

¹⁰ kitsò-la:

—Ngats'ìi xità, jè tsjá ítjòn vino xi 'ñó ndaà; k'e nga jye 'ñó 'biì jñà xità, k'eé tsjá xi chiba ndaà. Tanga ngaji, kòbinchatjó-né xi 'ñó ndaà, skanda saá tì'biì.

¹¹ Jè kjoxkón xi kis'iin ítjòn Jesús ján naxandá Caná nangui xi chja-ne Galilea; k'oaá s'ín tsakó kjoa jeya-la kò jñà xità xi kota'yàt'aà-la kòkjeiín-la ít'aà ts'e.

¹² Xi jye komà iskan, Jesús kii ján naxandá Capernaum; kiìko nea-la, 'ndse, kò xità xi kota'yàt'aà-la. Tà chibaá nachrjein tsibìtsajna ya naxandá jè.

K'e nga kii s'eí Jesús ján Jerusalén

(Mateo 21:12-13; Marcos 11:15-18; Lucas 19:45-46)

¹³ Nga jye nchrobá machraña s'eí-la xità judío xi bitjo k'e nga itjokàjìin kjò'in ján nangui Egipto, Jesús kii ján Jerusalén.

¹⁴ K'e nga jahas'en ingo ítjòn, kijtseè nga tíjín xità ya nditsin ingo xi nchihotíjna nchraja kò orrè kò paloma; tíkkoa títsajna xi síkjatíya tòn.

¹⁵ Jesús tsibíndaà jngoò na'ñó xi tsjá-la jñà xità nga tsachrje yije ya nditsin ingo, kò nchraja kò orrè. Tsibíxteèn tòn-la jñà xi síkjatíya tòn. Jngoò k'aá chinchá ngajten ímixa-la.

¹⁶ Jñà xità xi nchihotíjna nise paloma, kitsò-la:

—Tínachrjeè yije cho koi; kii ni'ya nditsin 'nè ni'ya-la Na'èn-na.

¹⁷ Jñà xità xi kota'yàt'aà-la k'eé tsibítsjeèn-la nga k'oas'ín tíjt'aà Xojon-la Nainá nga tsò: “Ñó matsjake ni'ya-lè; koií kjoa-la nga machinikeè.”

¹⁸ Jñà xità judío kiskònangui-la Jesús, kitsò-la:

—¿Mé kjoxkón xi okoò-nájen nga tíjín-lè kjotíxoma ít'aà ts'e kjoa xi 'nì?

¹⁹ Kiìchja Jesús kitsò-la:

—Tíkixàña ingo jè, 'an, jàn nachrjein kìndàyà ijngoò k'a-na.

²⁰ Kitsò jñà xità judío:

—Ingo jè ichán joòn nó kisindaà-ne, koa ji, ¿a tà jàn nachrjein kíndaà xítse ijngoò k'a-ne?

²¹ Tanga jè ingo xi kisikaxki Jesús, jè yijo-la xi okitsò-la.

²² K'e nga jye jaáya-la Jesús nga k'en, k'eé tsibítsjeèn-la jñà xità xi kota'yàt'aà-la 'én xi okitsò. K'eé kòkjeiín-la koni s'ín tíchja Xojon-la Nainá kò 'én xi kiìchja Jesús.

Jesús, kós'ín ma ndaá beè inima-la ngats'ìi xità

²³ Jesús k'e nga tsibìjna s'eí Paxko ján Jerusalén, kjìin xità kòkjeiín-la ít'aà ts'e k'e nga kijtseè kjoxkón xi kis'iin.

²⁴ Tanga Jesús mìtsà nguì ndaà tíjngoò ikon ít'aà ts'e xità koi, nga jyeé beèxkon yije xità.

²⁵ Jesús mìkiì mochjeén-là nga kj'eí xítà okítsò-là kó s'ín jñà xítà; jè, jyeé beè inìma-là xítà kós'ín síkítsjeèn.

3

K'e nga jè Jesús tsohókò Nicodemo

¹ Tsibìjna jngò xítà fariseo xi tìkoà xítà ítjòn tsibìjna ít'aà ts'e xítà judío; Nicodemo kí'mì.

² Jngò k'a j'ìkon Jesús k'e nga jñò, kitsò-là:

—Maestro, 'ya-nájen nga jè Nainá kíkásén-lè mé-ne kókóya-nájen. Nga jngò xítà xi mìtsà Nainá tíjnako, mìkiì koma-là s'iin kjoàkón xi jì 'nì.

³ Jesús kitsò-là:

—Xi nguì okixi, k'oaá xan-lè, jè xítà xi mìkiì jts'ín xítse òjngò k'a-ne, mìkiì skoe kó s'ín otíxoma Nainá.

⁴ Nicodemo kiskònangui, kitsò:

—¿Kós'ín koma jts'ín xítse òjngò k'a xítà xi jye kòjchínga? Nì ítse koma kjoahas'en òjngò k'a indso'ba nea-là nga jts'ín òjngò k'a.

⁵ Kìichja Jesús kitsò:

—Xi nguì okixi, k'oaá xan-lè, jè xi mì ít'aà ts'e nandá kò Inìma Tsjeè-là Nainá jts'ín-ne, mìkiì koma kjoahas'en-jìin ñánda tíhotíxoma Nainá.

⁶ Jè xi ts'iin ít'aà ts'e xítà, xítà-né. Koà jè xi ts'iin ít'aà ts'e Inìma Tsjeè-là Nainá, inìma-né.

⁷ Kì maxkón-lè koni s'ín tìxan-lè: “Mochjeén-né nga jts'ín xítse òjngò k'a-ne jñà xítà.”

⁸ Jè tjo 'ba-né nítà ñánda-ne; na'yà-là nga one. Tanga mìkiì 'ya-là ñánda nchrobá-ne, tìkoà mìkiì 'ya-là ñánda fì. K'oaá tìs'ín ma yije ngats'ì xi ít'aà ts'e Inìma Tsjeè-là Nainá ts'iin-ne.

⁹ K'eé kitsò Nicodemo:

—¿Kós'ín ma-ne nga k'oaá s'ín koma-ne kjoà koi?

¹⁰ Jesús kitsò-là:

—Ngaji, maestro tijni ts'e xítà naxandá Israel. ¿Mé-ne mìkiì tíjìn-lè kjoà koi?

¹¹ Xi nguì okixi, k'oaá xan-lè: Jè kjoà xi ma-nájen, k'oaá s'ín nokjoà-jen; xi jye kina'yà-jen, k'oaá s'ín bènojímí-jen. Jñò, mìkiì mokjeiín-nò 'én-nájen.

¹² K'e nga benojímí-nò kjoà xi tíjn isò'nde, mìkiì mokjeiín-nò. ¿A kòkjeiín-nò tsà keènojímí-nò kjoà xi tíjn ján ngajmii?

¹³ Nì saà jngò xítà xi jye kìmijìn ján ngajmii; tà jè Kì'ndí-là Xítà xi ngajmii tíjna nga ya ítjojen-ne.

¹⁴ Koni s'ín kíkásén Moisés nga kiskímii'nga yá xi tjoót'aà ye kichá bronce ya ònde ít'aà xìn ñánda kixi choòn, k'oaá tìs'ín tíjìn-là jè Kì'ndí-là Xítà nga tjámìtjen-t'aà jè yá,

¹⁵ mé-ne ngats'ì xítà xi kòkjeiín-là ít'aà ts'e, mìkiì chija, s'eé-là kjoabinachon nítà kjé-ne.

¹⁶ 'Nainá 'ñó tsatoó kjòtsjakeè xítà isò'nde nga kitsjaà Kì'ndí-là xi tajngò ma-ne, mé-ne ngats'ì xítà xi mokjeiín-là ít'aà ts'e, mìkiì chija; s'eé-là kjoabinachon nítà kjé-ne.

¹⁷ Nainá mìtsà koi xá kíkásén-ne Kì'ndí-là nga kjo'in kòinè-là xítà isò'nde; koií xá kíkásén-ne nga kòchrjekàjìn kjo'in xítà kjoà ts'e jé-là.

¹⁸ Jè xi mokjeiín-là ít'aà ts'e Kì'ndí-là Nainá, mìtsà kjo'in sìnè-là xi kjoà ts'e jé-là, tanga jè xi mìkiì mokjeiín-là jyeé kjo'in tíjìnè-là, koií kjoà-là nga mìkiì mokjeiín-là ít'aà ts'e Kì'ndí-là Nainá xi tajngò ma-ne.

19 Jñà xità xi mìkiì mokjeiín-la, jyeé kjo'in tjínè-la, koií kjoa-la k'e nga j'ìi ì isò'nde jè xità xi j'ìiko kjoahiseèn, mìkiì kisaseèn-la kjoahiseèn; isaá ndaà kisaseèn-la kjoajñò, nga ch'o tjín kjoa xi nchis'ín.

20 Ngats'ìi xità xi ch'o s'ín, majtikeè kjoahiseèn; mìkiì ya síchrañat'aà ñánda iseèn choòn, mé-ne nga mìkiì jcha-la kjoa xi ch'o nchis'ín.

21 Tanga jñà xità xi kjoa kixi nchis'ín, nchrobá kinchat'aà chraña-la ñánda iseèn choòn, mé-ne nga jcha-la nga ndaà tjín kjoa xi nchis'ín koni s'ín mejèn-la Nainá.

Jè Juan, j'ìi ítjòn-la Cristo

22 Nga jye komà kjoa koi, Jesús kiìko xità xi kota'yàt'aà-la ján nangui Judea; yaá tsibitsajna chiba nachrjein nga kis'iìn bautizar xità.

23 Juan tìkoà kis'iìn bautizar xità ya naxandá Enón, jngoò i'nde xi chrañat'aà-la ya naxandá Salim, koií kjoa-la i'nde jè tjín jchán nandá. Jñà xità, yaá ijchòkon Juan nga komà bautizar.

24 Nachrjein koi, tìkj'eè ndayá fis'en Juan.

25 Jñà xità xi kota'yàt'aà-la Juan kò jngoò xità judío tsohótiya-ne kjojíxoma-la xità judío xi xkón tjín kós'ín matsjeèya-ne xità.

26 Kiì jñà xità ñánda tíjna Juan, kitsò-la:

—Maestro, jè xità xi ijchòkoií ján xijngoàà xajngá nandá Jordán, jè xità xi jì kits'ìi 'én ít'aà ts'e, i'nde jè tìkoà tís'ín bautizar; saá jè fitjingui-la ngats'ìi xità.

27 Kiìchja Juan, kitsò:

—Nimé xi s'e-la xità tsà mì jè sobà Nainá tsjá-la.

28 Jñò, ndaà tíjìin-nò koni s'ín kixan-nò nga mìtsà 'an xi Cristo; 'an-ná xi kinikasén ítjòn-na ít'aà ts'e xità jè.

29 Jè xità x'ín xi sa kòbixan, tíjna chjoón-la; jè amigo-la xi kòbixan síjnat'aà chraña-la nga tí'nchré-la koni s'ín tíchja. Tsja jchán ma-la k'e nga 'nchré-la xità xi sa kòbixan. 'An, k'oaá tís'ín matsja-na k'e nga 'nchré koni s'ín tís'ín xità jè.

30 Xità jè, mochjeén-né nga kàtasijna ítjòn. 'An, kósijna tjingui-ná.

Mé 'én xi tsjá jè xi ngajmìi nchrobá-ne

31 Jè xi nchrobá-ne ngajmìi, jè tíjna ítjòn-la ngats'ìi xità. Jè xi ì isò'nde ts'e, xità isò'nde-né, kò jñà 'én xi chja kjoa ts'e isò'nde-né. Tanga jè xi ngajmìi nchrobá-ne, jè tíjna ítjòn-la nità yá-ne.

32 Jè tsjá 'én mé xi kijtseè kò mé xi kiì'nchré. Tanga 'én xi tsjá, niyá xi mokjeiín-la koni s'ín tsò.

33 Tanga jè xità xi mokjeiín-la 'én xi chja, jè tsjá 'én nga Nainá, nguì 'én kixíi xi chja.

34 Xità xi Nainá kisikasén, 'én-la Nainá chja, nga mìkiì fehet'aà koni s'ín síxájìin inìma-la jè nga'ñó xi tjín-la Inìma Tsjeè-la Nainá.

35 Na'èn-ná tsjakeé Ki'ndí-la; jè kisìngatsja yije nità mé kjoa-ne.

36 Jè xi mokjeiín-la koni tsò 'én xi chja Ki'ndí-la Nainá, tjín-la kjoabinachon nità kjé-ne. Kò jè xi mìkiì mokjeiín-la mìkiì kíjnakon inìma-la; kjo'in sìnè-la xi kjojtì-la Nainá.

4

Kó komà k'e nga jè Jesús tsohóko jngoò chjoón samaritana

1 Jesús, kis'enojmí-la nga jñà xità fariseo kitsò: Jesús isaá kjín xità tís'ín bautizar mé-ne nga ya skóta'yàt'aà-la mì k'oa-ne Juan.

2 (Tanga Jesús mìtsà xità kis'iìn bautizar; tà jñà xità xi kota'yàt'aà-la xi kis'iìn bautizar.)

3 K'oaá komà-ne itjòjìin-ne nangui Judea; kiì ijngoò k'a-ne nangui Galilea.

4 K'e nga kii-ne, kjo'ño tjín-ne nga ya kjoahato Samaria.

5 Ijchò jngoò naxandá xi 'mì Sicar, nangui xi chja-ne Samaria, ya chrañat'aà-la nangui xi kitsjaà kjotjò-la kjòtseé Jacob jè ki'ndí-la xi José ki'mì.

6 Yaá tjina jngoò ngajo nandá xi nei-la komà Jacob. Jesús jye 'ño ijta-la nga tsó'baya ndiyá. Tsibijnat'aà jè ngajo nandá nga jyeé kjomeé bijchó nchisen.

7-8 Jñà xita xi kota'yat'aà-la Jesús, tsojmií kiì katse ján jjiin naxandá, jñà tsojmi xi skine. K'ée ijchò jngoò chjoón xi ya i'nde-la Samaria xi ijchòkjaá nandá. Jesús kitsò-la:

—Tjiì itsé-ná nandá xi skiaa.

9 Jñà xita judío mìkiì ndaà fiko xita Samaria. Koií kjoa-la, jè chjoón kitsò:

—Ngaji xita judío-né, kò 'an chjoón Samaria-ná. ¿Mé-ne nandá nijé-ná?

10 Kiichja Jesús kitsò-la:

—Tsà 'ya-lè kjotjò xi tsjá Nainá kò tsà yaxkoin yá-né xi tísjé-lè nandá, tsà jì sijé-la nandá, jè tsjá-lè nandá xi síkijnakon-ná.

11 Jè chjoón kitsò:

—Na'èn, nímé kich'i xi koma kinachrje-ne nandá. Jè ngajo nandá 'ño nanga. Ñánda tjín-lè nandá xi síkijnakon-ná.

12 Ngaji, ¿a isaá tjina ítjòn-la xita jchínga-najen Jacob? Jè kitsjaà-najen jè ngajo nandá jè. Jñà xita jchínga-najen, íí kits'iì nandá, ixti-la kò cho tjè-la.

13 Kiichja Jesús kitsò-la:

—Nita yá-ne xi skoí nandá xi i tìbitjo, koxínda jngoò k'a-la.

14 Tanga jè xita xi skoí nandá xi 'an tsjaà-la, mì tì kiì koxínda-la nita kjé-ne. K'oaá s'in s'e jjiin inima-la koni jngoò ngajo nandá xi tìbitjo nga jè nandá síkijnakon-ne nita kjé-ne.

15 Jè chjoón kitsò:

—Na'èn, tjiì-ná jè nandá xi kò'mì-la mé-ne nga mì tì kiì koxínda-na tikoá mì tì jí kjoijkjaá-na nandá.

16 Jesús kitsò-la:

—Tínókjoa-la x'in-lè, nchrobákoji ijndé.

17 Kiichja jè chjoón kitsò:

—Tsjìn-na x'in.

Jesús kitsò-la:

—Okixí xi sí nga tsjìn-lè x'in.

18 Jyeé kò 'òn ma x'in-lè xi bijnakoji. Jè xita xi tijnakoji i'ndeí, mìtsà x'in-lè ma. Okixí xi kasi nga tsjìn-lè x'in.

19 Jè chjoón k'e nga kiì'nchré 'én koi kitsò:

—Na'èn, k'oaá s'in machiya-na nga jíí-la xita xi chja ngajo-la Nainá.

20 Xita jchínga-najen xi Samaria tsajen, íí nindoò jè kijtseèxkón Nainá. Tanga jñò xi xita judío 'mì-nò bixón-nó nga tà ján Jerusalén jchaxkoán Nainá.

21 Jesús kitsò-la:

—Ngaji chjoón, kàtakjeín-lè, jyeé nchrobá machraña nachrjein nga jchaxkón Nainá nas'in mì i kjinchrobà nindoò jè kò nì ján onguió Jerusalén.

22 Jñò, xi Samaria tsajòn, mìkiì 'ya yá-né xi yaxkón; tanga ngajen xi xita judío 'mì-najen, 'ya-najen yá xi yaxkón-jen; nga tje-la xita judío kitjokajjìn jngoò xi kochrjekajjìn kjo'in xita.

23 Jyeé nchrobá nachrjein, kò tijè-ne hora jè, k'e nga jñà xita xi nguì kixi kjoa nga beèxkón Nainá, kàteèxkón nga kò inima-la kò kjoa kixi. Tikoá jè Na'èn-ná ótsji-né xita xi k'oaá s'in mejèn-la nga skoèxkón.

24 Nainá Inima Tsjeè-né. Jè xita xi beèxkón, mochjeén-né nga nguì kò kjoa kixi kò nguì kò inima-la kàteèxkón.

25 Jè chjoón, k'ée kitsò:

—'An, be-ná nga sa kjoí jè Mesías [xi xó sùikasén-ne Nainá] jè xi Cristo tsòya-ne; k'e nga jè xi kjoí keènojmi yije-najen kjoa koi.

²⁶ Jesús kitsò-la:

—'An-ná, jè xi tìhókò-lè.

²⁷ Tjè-ne hora j'ì-ne xità xi kota'yàt'aà-la xi kii katse tsojmi. Ta k'oaá komà-la nga kijtsee nga chjoón tìhókò. Tanga nijngò xità xi kitsò ikon nga kiskònangui-la mé xi tìkjònangui-la, o mé 'én xi nchjoó.

²⁸ Jè chjoón, k'eé kisikíjna nisa nandá-la; kii ján ijìin naxandá nga tsibénojmi yije-la xità; kitsò-la:

²⁹ —Nchrobá, chítsejèn-là jngò xità xi k'oa kàtsò yije-na kjoa xi kis'iaàn. Tsà jè-né xi Cristo [xi xó kisikasén-ne Nainá].

³⁰ K'eé kii jña xità naxandá nga kii katsejèn-la ñánda tíjna Jesús.

³¹ Tìk'e-ne jña xità xi kota'yàt'aà-la Jesús, tsibít'si'ba-la, kitsò-la:

—Maestro, tìchi.

³² Tanga Jesús kitsò:

—'An, tíjn-na tsojmi xi kókjeen, xi jñò mikiì yaxkon.

³³ Jña xità xi kota'yàt'aà-la kitsò-la xíkjin:

—¿Yá xi kòf'ùkò-la tsojmi xi skine?

³⁴ Tanga Jesús kitsò:

—Jña tsojmi xi kínee, jè-né nga sikitasoàn koni s'ín mejèn-la jè xi kisikasén-na kò nga sikjehet'aà xá-la.

³⁵ Jñò, bixón-nó nga ngui ñjòn sá chija-la nga sincháxkó tsojmi xi jye tímajchá. 'An, k'oaá xan-nò: Chítsejèn-là xità koi; k'oaá ngaya-la koni tsojmi tjè xi jye kòjchá; jyeé koma sincháxkó.

³⁶ Jè xità xi bíxkó, machjí-la, kò jña tsojmi xi bincháxkó, k'oaá ngaya-la koni xità xi s'e-la kjoabinachon, mé-ne nga jè xi bitje kò xi bincháxkó ngàsòn s'e-la kjotsja.

³⁷ 'Én kixi-né xi tsò: “Kj'eí xità xi bitje koa kj'eí xi bíxkó.”

³⁸ 'An, kisikasén-nò nga kìncháxkó tsojmi xi mìtsà jñò kisengui-nò kjo'in. Kj'eí xi kisixá. Tanga jñò tìhókò-nò nga bíxkó tsojmi tjè-la.

³⁹ Kjìn jchán xità Samaria xi ya títsajna naxandá jè kòkjeín-la it'aà ts'e Jesús koni kitsò 'én xi kitsjaà jè chjoón nga kitsò: “K'oaá kàtsò yije-na kjoa xi kis'iaàn.”

⁴⁰ K'e nga jña xità Samaria ijchòkon Jesús ñánda tíjna, tsibít'si'ba-la nga ya kàtijnako. Jesús, jò nàchrjein tsibijnako.

⁴¹ Kjìn xità kòkjeín isa-la it'aà ts'e Jesús, k'e nga kii'nchré-la 'én xi jè sobà tsibénojmi.

⁴² Jña xità kitsò-la jè chjoón:

—I'ndeì mokjeiín-najen; mìtsà tà koi kjoa-la koni s'ín ki'mì-nájen. Ngajen sobà kina'yà-lajen; k'oaá s'ín ma-ne nga mokjeiín-najen. Kixí kjoa, jè xi kochrjekàjìin kjo'in kjoa ts'e jé-la xità isò'nde, jè-né xi Cristo [xi xó kisikasén-ne Nainá].

K'e nga jè Jesús kisindaà jngò-ne ti xi chi'nda-la xitàxá ítjòn.

⁴³ Xi jye komà jò nàchrjein nga tsibìjna Samaria, Jesús, itjojìin ijngò k'a-ne j'nde jè. Kii ijngò k'a-ne nangui Galilea.

⁴⁴ Jè sobà Jesús kitsò: Nijngò xità xi chja ngajo-la Nainá yaxkón nangui-la.

⁴⁵ K'e nga ijchò ya Galilea, jña xità xi ya j'nde-la, ndaà kiskoétjò, nga jyeé kijtsee jña kjoa xi kis'ìin ján Jerusalén k'e nga itjo s'eí Paxkò. Jña xità koi tìk'oaá kii-ne k'e nga itjo s'eí.

⁴⁶ Jesús ijchò ijngòò k'a ján Caná, nangui xi chja-ne Galilea, ñánda kisikjatjya-la nandá nga vino kis'iin. Ya naxandá Capernaum tjna jngòò chi'nda-la xitaxá ítjòn xi tikoá xá 'nga tjín-la. 'Ñó xk'én ki'ndí-la.

⁴⁷ Xita jè k'e nga kiì'nchré nga Jesús ya ijchò Galilea nga inchrobà-ne Judea, kiikon, tsibítsi'ba-la nga kàtjì ni'ya-la, kàtasindaà-ne ki'ndí-la xi jyeé kjomeé biyaà.

⁴⁸ Jesús kitsò-la:

—Jñò, mìkiì mokjeiín-nò k'e nga tsà mìkiì jchaa kjojkón kjo xi okó kjoa jeya-la Nainá.

⁴⁹ Jè xita chi'nda ítjòn kitsò-la Jesús:

—Na'èn, t'iin kjondaà, nìton nchroboí nga tikj'eè biyaà ki'ndí-na.

⁵⁰ Jesús kitsò-la:

—T'in-ne ni'ya-lè. Ki'ndí-lè jyeé ndaà tjna-ne.

Xita jè kòkjeiín-la 'én xi kitsò-la Jesús. Ikjoàn kiì-ne ni'ya-la.

⁵¹ K'e nga jye kjomeé bijchó-ne ni'ya-la, xita chi'nda-la kiikjaá indiaà, kitsò-la:

—Ki'ndí-lè jyeé ndaà tjna-ne.

⁵² Xita jè, kiskònangui-la chi'nda-la:

—¿Mé hora kjòxan-la ch'in 'ndi xi tjín-la?

Kitsò xita chi'nda-la:

—Ngojña xi jngòò-là kjondaà-ne.

⁵³ Jè na'èn-la ti xi xk'én, kisijiin-la nga tijè-ne hora k'e nga kitsò-la Jesús: "Ki'ndí-lè jyeé ndaà tjna-ne." Xita jè kò ngats'ii xita xi títsajna ni'ya-la, jyeé ndaà tjíjngòò ikon nga mokjeiín-la ít'aà ts'e Jesús.

⁵⁴ Jè xi ma-ne jò kjojkón xi kis'iin Jesús k'e nga inchrobà-ne Judea nga j'ii-ne ya Galilea.

5

Kó kitsò xita k'e nga Jesús kisindaà jngòò-ne xita xi mìkiì ma fi jè nachrjein nìkjáya

¹ K'e nga jye k'oas'ín komà kjoa koi, nga komà iskan, jña xita judío tsibíjna jngòò s'eí ján Jerusalén. Jesús kiì ijngòò k'a ján Jerusalén.

² Ya Jerusalén tjna jngòò chrjó nandá xi 'mì Betesda nga 'én hebreo. 'Òn ma nguitjoa xi tjín-la. Yaá tjna chrañat'aà-la xotjoa ts'e orrè.

³ Ya nguitjoa-la kjìn xita xk'én kjiyijòngui: xi mìkiì tsejèn-la, xi tsá'yá kjoàn, xi mìkiì ma síkjaníyá. Ngats'ii xita koi nchikona-la k'e nga síjtija-la nandá xi 'ncha jè chrjó.

⁴ Jngòò àkjalé-la Nainá xi tà kjé tà kjé bitjojen-ne nga síjtija-la nandá. Jè xita xk'én xi fahas'en-jìin ítjòn nandá, k'e nga jye jtija-la, nitoón mandaà-ne nita mé ch'in xi tjín-la.

⁵ Ya kijnajìin jngòò xita xi jye tjín-la kaàn chrj'oòn jàn nó nga xk'én.

⁶ Jesús, k'e nga kijtseèxkon nga ya kijna, kisijiin-la nga jyeé 'ñó kjòtseé xk'én. Kitsò-la:

—¿A mejèn-lè kondaà-ne?

⁷ Jè xita xk'én, kitsò:

—Na'èn, mì yá xi síchját'aà-na nga kinís'en-jìin-na k'e jtija-la nandá. 'An, k'e nga mejèn-na fahas'en-jña, kj'eí xita síkijne-na nga fahas'en-jìin ítjòn.

⁸ Jesús kitsò-la:

—Tisítjiin, chjoí nijñaà-lè, títjámì.

⁹ Xita jè nitoón kjondaà-ne, kiskoé-ne nijñaà-la, komà tsajmeè-ne. Nachrjein jè, nachrjein nìkjáya-né.

10 Jñà x̄it̄a judío kitsò-l̄a jè x̄it̄a xi kjòndaà-ne:

—N̄achr̄jein i'ndēi, n̄achr̄jein n̄ikj̄aya-né. Mik̄i t̄j̄'nde-lè nga kíkōi nijñà-lè.

11 X̄it̄a jè kitsò:

—Jè x̄it̄a xi kàsindaà-n̄a, jè sobà xi kòkàtsò-na: “Chjoí nijñà-lè, t̄it̄j̄am̄i.”

12 Jñà x̄it̄a koi kiskònangui-l̄a, kitsò-l̄a:

—¿Yá-né xi okàtsò-lè: “Chjoí nijñà-lè, t̄it̄j̄am̄i”?

13 Jè x̄it̄a xi jyeé kjòndaà-ne mik̄i beèxkon yá x̄it̄a-ne xi kisindaà-ne nga jè Jesús jyeé x̄in k̄i nga itjokàj̄in-l̄a x̄it̄a xi kj̄in ma-ne xi ȳa t̄ítsajna.

14 Xi komà iskan, Jesús kisat̄ikjòò l̄jngoò k'a x̄it̄a jè ȳa iya ingo, kitsò-l̄a:

—Jyeé kòmandaà-ne; t̄anga k̄i t̄i jè binchaàts̄ji-ne, mé-ne nga mì is̄a ch'o t̄j̄in kjōa xi komat'in.

15 X̄it̄a jè kiikon jñà x̄it̄a judío, tsibénoj̄m̄i-l̄a nga jè Jesús xi kisindaà-ne.

16 Jñà x̄it̄a judío kiit̄j̄ingui kondra-l̄a Jesús, mejèn-l̄a s̄iik'en koi kjōa-l̄a nga k'oas'in s'in k'e nga n̄achr̄jein n̄ikj̄aya.

17 T̄anga Jesús kitsò-l̄a:

—N̄a'èn-n̄a skanda n̄achr̄jein i'ndēi k'oaā t̄j̄in xá xi t̄is'in, t̄ikoaā 'an k'oaā t̄is'in t̄is'iaàn.

18 K'oaā ma-ne jñà x̄it̄a judío is̄aā 'ñó ndaà kiit̄j̄ingui kondra-l̄a Jesús nga mejèn-l̄a s̄iik'en. M̄itsà t̄a koi kjōa-l̄a nga mik̄i beèxkón n̄achr̄jein n̄ikj̄aya, t̄ikoaā koi-né nga jè Jesús N̄a'èn-n̄a tsò-l̄a Nainá. K'oaā s'in t̄is̄ingàsòn-kjòò yijo-l̄a koni Nainá nga k'oaā tsò.

19 Jesús kitsò-l̄a:

—Xi nguì okixi xi xan-nò, 'an xi Ki'ndí-l̄a Nainá n̄i mé kjōa xi s'iaàn xi tà kjoh̄itsjeen ts'an. Tà koi kjōa s'iaàn xi be koni s'in N̄a'èn-n̄a. Ngats'ì kjōa xi s'in N̄a'èn-n̄a, 'an xi Ki'ndí ma, k'oaā t̄is'in s'iaàn.

20 Jè xi N̄a'èn-n̄a ma, 'ñó tsjakeè-na nga Ki'ndí-l̄a tsò-na; okó yije-n̄a mé xi s'iaàn. Kòkò-isa-na kjōa xi is̄a 'ñó xkón t̄j̄in, mé-ne jñò, k'e nga jchaa, is̄a 'ñó ndaà kòxkón-nò.

21 Koni s'in s'in Nainá nga síkjaáya-l̄a mik'en kò síkítsajnakon in̄ima-l̄a n̄ita kjé-ne, 'an xi Ki'ndí-l̄a ma, k'oaā t̄is'in tsjaà-l̄a kjōabinachon yá-né xi mejèn-na nga tsjaà-l̄a.

22 Jè xi N̄a'èn-na ma, m̄itsà jè b̄indaàj̄in-l̄a x̄it̄a, 'an-ná xi Ki'ndí-l̄a ma kis̄ingatsja yije-na kjot̄ixoma nga koma k̄indaàj̄in-l̄a x̄it̄a,

23 mé-nè ngats'ì x̄it̄a skoexkón-na nga Ki'ndí-l̄a ma koni s'in beèxkón N̄a'èn-n̄a. Jè xi mik̄i beèxkón-na nga Ki'ndí-l̄a ma, t̄ikoaā mik̄i beèxkón N̄a'èn-n̄a nga jè kisikasén-na.

24 'Xi nguì okixi, k'oaā xan-nò: Jè xi 'nchré 'én-n̄a koni s'in chj̄a, t̄ikoaā mokjeín-l̄a it'aà ts'e xi kisikasén-na, t̄j̄in-l̄a kjōabinachon n̄ita kjé-ne. M̄itsà kjo'in s̄inè-l̄a, jyeé itjokàj̄in kjo'in ts'e kjōa biyaa, jyeé t̄j̄inakon in̄ima-l̄a it'aà ts'e Nainá.

25 Xi nguì okixi xi xan-nò: Nchrobá n̄achr̄jein, t̄j̄jè-ne hora jè, k'e nga jñà mik'en k̄j̄i'nchré j̄ta-n̄a xi Ki'ndí-l̄a Nainá ma; jñà xi k̄j̄i'nchré j̄ta-n̄a, k̄ítsajnakon-né.

26 Jè N̄a'èn-na, t̄j̄jè-ne xi kjōabinachon; kò 'an xi Ki'ndí-l̄a ma, k'oaā t̄is'in kitsjaà-na nga t̄j̄'an-na xi kjōabinachon.

27 T̄ikoaā kitsjaà-na kjot̄ixoma nga 'an k̄indaàj̄in-l̄a x̄it̄a, nga 'an-ná xi Ki'ndí-l̄a X̄it̄a xan-l̄a yijo-n̄a.

28 K̄i maxkón-nò 'én koi, k̄j̄ichò n̄achr̄jein k'e nga ngats'ì x̄it̄a xi t̄ítsajnak'en j̄án ínchíba mik'en k̄j̄i'nchré-l̄a j̄ta-n̄a.

²⁹ Kosítjen ijngoò k'a-ne ya ngajo mik'en. Jñà xitá xi ndaà kis'iin, kjoaáya-la nga s'e-la kjoabinachon, tanga jñà xitá xi ch'o kis'iin, kjoaáya-la nga s'e-la kjo'in.

Yá xi tsjá 'én it'aà ts'e Jesús

³⁰ Jesús kitsò:

—'An, nì mé xi s'iaàn xi ta kjohítsjeèn ts'an. K'oaá s'ín bindaàjñàà koni s'ín tsò-na Na'èn-na. Kixíí bindaàjñàà; mìtsà k'oas'ín s'iaàn koni s'ín mejèn-na. K'oaá s'ín s'iaàn koni s'ín mejèn-la Na'èn-na xi kisikasén-na.

³¹ Tsà tì'an tsjaà-na 'én xi it'aà ts'an, 'én xi tsjaà, jñò kixón-nò: “Nì mé chjí-la.”

³² Tanga tjín jngoò xi kj'eíí xi tsjá 'én xi it'aà ts'an, be-ná nga jè 'én xi tsjá it'aà ts'an, nguì 'én kixí-né.

³³ Jñò kinikasén-la xitá Juan nga kiskònangui-la. Jè Juan, kitsjaà kixí 'én xi it'aà ts'an.

³⁴ Mìtsà kjo'ño tjínè-la nga kj'eíí xitá tsjá 'én xi it'aà ts'an, koií k'oa xan-nò mé-ne nga kítjokàjñòò kjo'in kjoa ts'e jé.

³⁵ Juan k'oas'ín ngaya-la koni jngoò ni'ín xi títi nga síhiseèn, tanga jñò tà chiba nachrjein kinítsjakoo kjoa iseèn-la.

³⁶ Jè xá xi tìs'iaàn, isa 'ño ts'e chjí-la mì k'oa-ne koni 'én xi kitsjaà Juan, nga jè Na'èn-na kitsjaà-na nga sikitasoàn; tije-ne xá xi tìs'iaàn okó it'aà ts'an nga kixí kjoa nga jè Na'èn-na kisikasén-na.

³⁷ Jè Na'èn-na xi kisikasén-na, tsjá 'én xi it'aà ts'an. Jñò, kj'eè kiì na'yà-là jta-la, nì mìkiì yaxkon kó kji isén-la;

³⁸ tikoáá jè 'én-la mìkiì fahas'en-jìin inima-nò. Jè xi Nainá kisikasén, mìkiì mokjeiín-nò it'aà ts'e.

³⁹ Ndaà binchaàtsjijñòò Xojon-la Nainá nga k'oas'ín nikítsjeèn nga ya sakó-nò kjoabinachon nitá kjé-né. Jè Xojon-la Nainá, tsjá 'én xi it'aà ts'an,

⁴⁰ tanga jñò, mìkiì sasén-nò nga nchrobátjingui-ná, mé-ne nga s'e-nò kjoabinachon koi.

⁴¹ Mìtsà koi kjoa otsjià nga jeya sùkíjna-na xitá.

⁴² Tanga 'an, beèxkoòn-nò, nga jñò, mìkiì matsjacha Nainá nga ko inima-nò.

⁴³ 'An, it'aà ts'e Na'èn-na j'i-na; jñò majìn-nò nga choétjò-ná. Tanga tsà kj'eíí xitá kjoíí xi ta kjotsja ts'e kjoíí-ne, isaá-là niton choétjò.

⁴⁴ Jñò, ¿kós'ín koma kòkjeiín-nò? Nga tà jè binchaàtsjioò nga ndaà kítsajnaà nga nguixkon xitá, kò mìtsà jè binchaàtsjioò nga ndaà kítsajnaà nga nguixkon Nainá xi tà jngoò ma.

⁴⁵ Kì k'oa s'ín nikítsjeèn nga 'an tsjat'in-nò 'én nga nguixkon Na'èn-na. Jè xi tsjat'in-nò 'én, tije-ne Moisés xi jè ma'ñót'aà takòn.

⁴⁶ Jñò, tsà mokjeiín-nò koni s'ín kiskii Moisés, tikoáá kòkjeiín-nò it'aà ts'an nga jè Moisés it'aà ts'aán kiichja nga kiskii.

⁴⁷ Tsà mìkiì mokjeiín-nò koni s'ín kiskii Moisés, ¿kós'ín kòkjeiín-nò 'én-na xi benojmí-nò?

6

Kó kis'iin Jesús nga 'òn jmiì xitá kisikjèn

(Mateo 14:13-21; Marcos 6:30-44; Lucas 9:10-17)

¹ Nga jye komà kjoa koi, Jesús kiì ján xijngoàà ndáchikon Galilea, xi tikoá Tiberias 'mì.

² 'Nó kjìn xitá kiitjingui-la nga jye kijtseè kjoxkón ndaà xi s'ín nga síndaà-ne xitá xk'én.

³ Jesús k'eé kiimijìn-jno jngoò nindoò, yaá tsibìjna kò xitá xi kota'yàt'aà-la.

⁴ Jyeé tímachraña s'eí Paxkò ts'e xitá judío.

⁵ Jesús, k'e nga kiskoòtsejèn, kijtseè nga 'ñó kjìn ma x̄it̄a t̄j̄ima t̄j̄ingui-l̄a, kitsò-l̄a Felipe:

—¿Ñánda kindá-lá tsojmì xi kokjèn x̄it̄a koi?

⁶ Tà k'oaá kitsò-l̄a, tà jè xi mejèn-l̄a nga skoē kó kitsò Felipe. Jesús, jyeé t̄j̄iìn-l̄a mé kjoa xi s'̄iìn.

⁷ Felipe kitsò:

—Nas'ín jò-la s̄indo n̄achrjein t̄j̄in-ne chj̄í-l̄a x̄it̄a, mì-la kiì k̄ich̄iya-l̄a nga ītsé ītsé sk̄ine ngats'ìi x̄it̄a koi.

⁸ Kiichj̄a Andrés xi t̄ikoa x̄it̄a xi ya kota'yàt'aà-l̄a Jesús xi 'ndsè ma Simón Pedro, kitsò:

⁹ —I t̄j̄ina jngoò ti xi 'ya 'òn inchr̄ajín ts'e cebada kò jò ma t̄in xi 'ya, t̄anga mì-la kiì k̄ich̄iya-l̄a nga 'ñó kjìn ma-ne x̄it̄a.

¹⁰ Jesús kitsò-l̄a:

—Kot'ìn-l̄a j̄n̄a x̄it̄a, kàt̄itsajna yije.

I'nde jè 'ñó t̄j̄in x̄k̄a ij̄n̄á. J̄n̄a x̄it̄a xi tsib̄itsajna, ma-l̄a tsà 'òn j̄miì xi nguì x̄it̄a x'ìn.

¹¹ Jesús, kiskoé inchr̄ajín, kitsjaà-l̄a kj̄ondaà Nainá, ikjoàn kitsjaà-l̄a j̄n̄a x̄it̄a-l̄a. K'eé kisika'bí-l̄a j̄n̄a x̄it̄a xi t̄itsajna. K'oa t̄is'ín kisikò j̄n̄a t̄in, kiskine n̄ita kó kji mejèn-l̄a nga jngoò ijngoò.

¹² K'e nga jye kjòsk̄i yije x̄it̄a, Jesús kitsò-l̄a j̄n̄a x̄it̄a xi kota'yàt'aà-l̄a:

—T̄ixkó yije-nò xi kaningui-ne, mé-ne nga mì kits'ón-ne.

¹³ J̄n̄a x̄it̄a-l̄a tsib̄ixkó-ne inchr̄ajín xi tsiningui-ne. Nguì tejò n̄is̄iyá komà, k'e nga jye tsakjèn yije x̄it̄a.

¹⁴ J̄n̄a x̄it̄a, k'e nga jye kijtseè kjoxkón ndaà xi kis'iìn Jesús, kitsò-l̄a x̄íkj̄in:

—Kix̄í-l̄a kjoa, jè-la x̄it̄a jè xi chj̄a ngajo-l̄a Nainá, xi t̄j̄inè-l̄a nga kjoí ī isò'nde.

¹⁵ T̄anga Jesús, t̄ik'eé kijtseèya-l̄a nga j̄n̄a x̄it̄a mejèn-l̄a kjo'ñó kiìkò nga x̄it̄axá it̄jòn s̄iik̄ijna; ijngoò k'a kiimij̄in-jno nindoò nga tà tajngoò tsib̄ijna.

K'e nga tsajmeèsòn ndáchikon Jesús

(Mateo 14:22-27; Marcos 6:45-52)

¹⁶ K'e nga jye kòj̄nò, x̄it̄a xi kota'yàt'aà-l̄a Jesús inchr̄ohòjen ijngoò k'a-ne ñánda kijna ndáchikon.

¹⁷ Jahas'en jngoò chitso, kiìsòn-ndá nga kiì ján naxandá Capernaum. Jyeé 'ñó kòj̄nò, Jesús mìkiì xátí j'ìi t̄j̄ingui-l̄a j̄n̄a x̄it̄a-l̄a.

¹⁸ Ya ij̄iìn ndáchikon j'ìi jngoò t̄joxkón xi 'ñó jchán ts'a. Jè ndáchikon tsib̄its'ia nga kiskì'nga.

¹⁹ K'e nga jye t̄j̄in-l̄a tsà 'òn kò tsà joòn j̄miì metro nga t̄j̄imaj̄iìn nandá, kijtseè nga jè Jesús tsóbasòn ndáchikon. Tífi t̄j̄ingui chrañà-l̄a jè chitso. J̄n̄a x̄it̄a tà kitsakjòn-l̄a.

²⁰ K'eé kiichj̄a Jesús, kitsò-l̄a:

—Ki tsakjoòn-jèn, 'an-ná.

²¹ J̄n̄a x̄it̄a tsjaá komà-l̄a, k'eé kisikas'en chitso. Kò jè chitso n̄itoón ijchò ya naxandá ñánda nchifi.

Mé xi kis'iìn j̄n̄a x̄it̄a nga tsohótsji Jesús

²² Nga komà nchijòn, j̄n̄a x̄it̄a xi tsib̄itsajna ján xijngoà ndáchikon, kijtseè nga tà jngoò chitso kijna xi kiìkò x̄it̄a, t̄anga Jesús mìkiì tsejèn jahas'en ya chitso. Tà j̄n̄a x̄it̄a xi kota'yàt'aà-l̄a jahas'en nga kiì.

²³ T̄anga ijchò chitso xi kj'eí xi ya inchr̄obà-ne naxandá Tiberias; yaá chincha chrañà i'nde ñánda tsakjèn inchr̄ajín x̄it̄a xi 'òn j̄miì ma-ne, k'e nga jè Jesús kitsjaà-l̄a kj̄ondaà Nainá.

²⁴ Jñà xità, k'e nga kijtseè nga mì yá tjín Jesús kò xità xi kota'yàt'aà-la, k'eé jahas'en jñà chitso koi, kiì kátsji Jesús ján naxandá Capernaum.

Inchrajín xi tsjá Nainá, jè xi tsjá-la kjoabinachon xità

²⁵ Xità koi, k'e nga jye ijchò ján xijngoàà ndáchikon, yaá kiskaàjiin Jesús kitsò-la:

—Maestro, ¿mé nàchrjein j'ii ijndé?

²⁶ Kiichja Jesús, kitsò-la:

—Xi nguì okixi, k'oaá xan-nò, mìtsà koi xá binchaàtsji-ná nga ki'yaá kjoxkón-ndaà xi kis'iaàn, koií-né nga kisikjèn-nò skanda kó nga kjòskioò.

²⁷ Kì koi nixátjiò tsojmì xi fehet'aà. Jè tixátjiò tsojmì xi síkijnakon inima-ná nità kjé-né, jè xi 'an tsjá xi Ki'ndí-la Xità xan-la yijo-na. Na'èn-ná xi Nainá jè kitsjaà-na kjoíxoma kjoa xi s'iaàn.

²⁸ Xità koi, kiskònanguì, kitsò-la Jesús:

—¿Mé xi s'en-jen nga koma síxá-lajen Nainá koni s'ín mejèn-la jè?

²⁹ Jesús kitsò-la:

—Xá-la Nainá, jè-né nga kòkjeiín-nò it'aà ts'e xi Nainá kisikasén.

³⁰ Xità koi, kitsò-la Jesús:

—¿Mé kjoxkón ndaà xi kòkó-nájen mé-ne k'e nga jcha-jen kòkjeiín-najen? ¿Mé xi ma-lè 'nì?

³¹ Jñà xità jchínga kjìn-najen tsakjèn inchrajín xi 'mì maná, ján i'nde it'aà xìn ñánda nangui kixi choòn. Koni s'ín tjt'aà Xojon-la Nainá nga tsò: “Inchrajín xi nchrobá-ne ngajmii kitsjaà-la nga kisikjèn.”

³² Kiichja Jesús kitsò-la:

—Xi nguì okixi xi xan-nò, mìtsà jè Moisés kitsjaà-nò inchrajín xi ngajmii inchrobà-ne; jè Na'èn-na xi tsjá-nò xi nguì inchrajín xi ngajmii nchrobá-ne.

³³ Inchrajín xi tsjá Nainá, jè xi jye itjojen-ne ngajmii, jè xi tsjá-la kjoabinachon jñà xità isò'nde.

³⁴ Xità koi kitsò:

—Na'èn, kjit'aà nàchrjein tjii-nájen inchrajín koi.

³⁵ Jesús, kitsò-la:

—'An-ná inchrajín xi síkijnakon inima-la xità. Jè xi 'an kjinchrobát'aà-na, mì tì kiì kohijò-la. Jè xi kòkjeiín-la it'aà ts'an, mì tì kiì koxíndá-la nità kjé-ne.

³⁶ Jyeé okixan-nò, jñò nas'ín titsa'yaà-ná mìkiì mokjeiín-nò.

³⁷ Ngats'ii xità xi 'an tsjá-na Na'èn-na, 'aán nchrobát'aà-na; kò jñà xi 'an nchrobát'aà-na mìkiì ochrjengua.

³⁸ 'An, mìtsà koi xá itjojen-na ngajmii nga k'oas'ín s'iaàn koni s'ín mejèn-na. K'oaá s'ín sikitasoàn koni s'ín mejèn-la Na'èn-na xi kisikasén-na.

³⁹ Jè xi mejèn-la Na'èn-na xi kisikasén-na, nga nijngoò xità chija xi 'an tsjá-na. 'An síkjaáya-la it'aà ts'e kjoa biyaà k'e nga kjoehet'aà nàchrjein.

⁴⁰ Koi xi mejèn-la jè xi kisikasén-na: ngats'ii xità xi skoexkon-na nga Ki'ndí-la Nainá 'mì-na kò kòkjeiín-la it'aà ts'an, s'eé-la kjoabinachon. 'An síkjaáya-la k'e nga kjoehet'aà nàchrjein.

⁴¹ Jñà xità judío k'eé tsibíts'ia nga kiichjajno-la Jesús, koií kjoa-la nga kitsò: “'An-ná inchrajín xi ngajmii nchrobá-ne.”

⁴² Kitsò-la xíkjín:

—¿A mìtsà jè Jesús, xi ti-la ma José? Yaxkon-ná na'èn-la kò nea-la. ¿Mé-ne tsò-ne nga ngajmii itjojen-ne?

⁴³ K'eé kitsò Jesús:

—Kù k'oas'ín nokjoàjno-ná.

44 Nijngoò x̄ita xi koma kjinchrobát'aà-na tsà mìtsà jè Na'èn-na xi kisikasén-na kjinchrobàko, mé-ne nga 'an siikjaáya-la k'e nga kjoehet'aà nachrjein.

45 X̄ita xi kiichja ngajo-la Nainá, k'oaá tsò xojon xi kiskii nga tsò: “Jè sobà Nainá kokòya yije-la x̄ita.” K'oaá s'ín ma-ne nga ngats'iì x̄ita xi 'nchré-la Na'èn-na ko xi machiya-la it'aà ts'e, 'aán nchrobát'aà-na.

46 'Ni saá jngoò x̄ita xi beèxkon Na'èn-ná. Tajngoò jè beèxkon xi Nainá kisikasén.

47 Xi nguì okixi xi xan-nò: Jè xi kokjeiín-la it'aà ts'an s'eé-la kjoabinachon nita kjé-ne.

48 'An-ná inchrájín xi síkijnakon inima-la x̄ita.

49 Jñà x̄ita jchínga kjin-nò tsakjèn inchrájín xi 'mì maná ya i'nde it'aà xìn ñánda nangui kixi choòn, tanga táko k'en-né.

50 Jè inchrájín xi k'oa xan-nò xi nchrobájen-ne ngajmii. Ko jè xi kokjen inchrájín jè mikii kiyá.

51 'An-ná inchrájín xi tíjnakon xi itjojen-ne ngajmii. Tsà yá xi kokjen inchrájín jè, s'eé-la kjoabinachon nita kjé-ne. Jè inchrájín xi 'an tsja, jè yijo-na. Koií k'oa'sín tsjaà-na nga 'an kiyátjì-la x̄ita isò'nde mé-ne nga kitsajnakon-ne.

52 Jñà x̄ita judío xki xi ján tsajoóko xíkjín, kitsò:

—¿Kós'ín s'iin nga siikine-ná yijo-la?

53 Jesús kitsò-la:

—Nguì okixi xi xan-nò. Jñò, tsà mikii chjinee yijo-na 'an xi Ki'ndí-la X̄ita xan-la yijo-na, tikoá mikii s'ioo jní-na, mikii s'e-nò kjoabinachon.

54 Jè xi skine yijo-na tikoá skoí jní-na tjín-la kjoabinachon nita kjé-ne. 'An siikjaáya-la k'e nga kjoehet'aà nachrjein.

55 Yijo-na, jè xi kixi kjoá xi nguì yijo xi ma chine; koá jè jní-na jè nandá xi nguì kixi kjoá nga ma 'yò.

56 Jè xi skine yijo-na koá skoí jní-na, kjit'aà nachrjein ya kíjnakò-na, tikoá 'an kjit'aà nachrjein ya tíjnakjoòkoaa.

57 Na'èn-na xi kisikasén-na, tíjnakon-né; ko it'aà ts'e-né nga tíjnakon; k'oaá tis'ín tjín jè xi skine yijo-na, it'aà ts'an kíjnakon-né.

58 Jè inchrájín xi itjojen-ne ngajmii, mìtsà jè xíkjín inchrájín maná xi tsakjèn x̄ita jchínga kjin-nò; nga komà iskan, x̄ita xi tsakjèn, k'en-né. Tanga jè xi kokjen inchrájín xi itjojen-ne ngajmii, s'eé-la kjoabinachon nita kjé-ne.

59 Jesús k'oaá s'ín kiichja nga tsakóya ya ni'ya ingo sinagoga ya naxandá Capernaum.

'Én xi tsjá-la kjoabinachon inima-la x̄ita

60 Jñà x̄ita k'e nga kiì'nchré koni s'ín tsakóya Jesús, kjín ma x̄ita xi kota'yàt'aà-la xi kitsò:

—Jñà 'én koi, 'ñó 'in tjín. ¿Yá xi kokjeiín-la?

61 Jesús, k'e nga kijtseèya-la nga jñà x̄ita xi kota'yàt'aà-la ch'o nchijoóya-ne 'én xi tsakóya, kitsò-la:

—¿'Én koi, a mì sasén-nò?

62 ¿Kós'ín koma-ne tsà jcha-ná 'an xi Ki'ndí-la X̄ita xan-la yijo-na nga kjímijìn ijngoò k'a-na ñánda tjnāa nga sa ítjòn?

63 Jè Inima Tsjeè-la Nainá xi síkijnakon-ná. Jè yijo-ná nímé chjí-la. 'Én xi 'an okóya-nò, ts'eé Inima Tsjeè-la Nainá, ko tsjá-la kjoabinachon inima-nò.

64 Tanga jñò tjín i'nga x̄ita xinguiqo xi mikii mokjeiín-la.

Nga jè Jesús jye tíjìn-là kóni skanda tàts'en-là kjoa yá-né xi mìkìi kòkjeiín-là kò yá-né xi sìngatsja it'aà ts'e xita kondra-la.

⁶⁵ Jesús kitsò isa:

—Koií k'oas'ín kixan-nò nga nijngoò xita xi koma kjinchrobàt'aà-na tsà mìtsà jè Na'èn-na kjinchrobàko.

⁶⁶ Ikjoàn kjin jchán xita xi kota'yàt'aà-la Jesús xi tjingui-la tsibíts'ia nga kù-ne its'in. Mì tì kù ya chinchimako-ne.

⁶⁷ Jesús kitsò-la jña xita-la xi tejò ma-ne:

—Jñò, ¿a tikoáá mejèn-nò nga onguió?

⁶⁸ Kiichja Simón Pedro, kitsò:

—Na'èn, ¿yá xi onguítjingui-lajen? Ji-né xi tjín-lè 'én xi tsjá kjoabinachon.

⁶⁹ Ngajen 'ya-nájen, tikoáá mokjeiín-najen nga ji-né xi Cristo, xi Ki'ndí-la Nainá xi tjínakon.

⁷⁰ Jesús kitsò-la:

—An, xó k'oáá s'ín jaàjìn-nò nga tejò ma-nò, mé-ne nga kitjako-ná. Tanga jñò, yáá tíjnajìn jngoò-nò xi xita neí tísxájin inima-la.

⁷¹ Jesús, jè kiichja it'aà ts'e Judas, ki'ndí-la Simón Iscariote. Nga jè sìngatsja Jesús it'aà ts'e xita kondra-la. Jè Judas, xi ya itjojin xita-la Jesús xi tejò ma-ne.

7

Kó kitsò jña 'ndse Jesús nga mìkìi kòkjeiín-la it'aà ts'e

¹ K'e nga jye k'oas'ín komà kjoa koi, Jesús yáá tsajmeè nangui Galilea. Majìn-la nga ya kojmeè naxandá Judea, koií kjoa-la nga jña xita judío nchihótsji nga mejèn-la sìik'en.

² Jyeé nchrobá machraña s'eí-la xita judío ts'e Ni'ya Xka Ijña.

³ Jña 'ndse Jesús kitsò-la:

—Kì tã tsja jí bijni. T'in ján Judea mé-ne jña xita xi kota'yàt'aà-lè xi títsajna ján kàteè-lè mé kjoa xi 'nì.

⁴ Tsà k'e mejèn-ná nga skoe-ná xita mé kjoa xi tí'né, mochjeén-né nga kòkò-lá yijo-ná. Ngaji, koni s'ín 'nì, takó-là yijo-lè ngats'ii xita isò'nde.

⁵ Koií okitsò-la jña 'ndse nga mìkìi kòkjeiín-la it'aà ts'e.

⁶ Jesús kitsò-la:

—Kj'eè kii bijchó nàchrjein-na, tanga xi it'aà tsajòn ndaà tjín nita mé nàchrjein-ne.

⁷ Jñò, mìkìi majtikeè-nò jña xita isò'nde, tanga 'an majtikeé-na, koií kjoa-la nga 'an benojmí kixi-la nga ch'o tjín kjoa xi s'ín.

⁸ Tanguió jñò jè s'eí, 'an mìkìi kjián. Kj'eè kii bijchó nàchrjein-na.

⁹ K'e nga jye okitsò-la jña xita, Jesús yáá tsibijna ya nangui Galilea.

K'e nga jè Jesús kii s'eí ts'e ni'ya xka

¹⁰ K'e nga jye kii s'eí jña 'ndse Jesús, jè, tikoáá kii 'ma-né. Majìn-la nga xita skoexkon.

¹¹ Ya ñánda tíbitjo s'eí, jña xita judío nchihótsji Jesús, kitsò-la xíkjin:

—Xita jè, ñánda tjina.

¹² Ngats'ii xita xi ijchò s'eí, xki xi ján tsajoóya-ne it'aà ts'e Jesús. Tjín xi kitsò: “Xita ndaà-né.” Tikoáá tjín xi kitsò: “Majìn, naxandá konachan-la.”

¹³ Tanga nijá xi kiichja tsejèn nga nguixkon xita xi kj'eí, nga jña xita sko-la xita judío, tsakjón-la.

¹⁴ K'e nga jye ijchò osen nga tíbitjo s'eí, ijchò Jesús, jahas'en ingo ítjòn, ikjoàn tsakóya-la xita.

¹⁵ Jña xita judío, k'e nga kijtseè koni s'ín okóya, tà kjòxkón-la kitsò-la xíkjin:

—Xita jè, ¿kós'ín ma-ne nga ko tà ndaà okóya-ne nga mìtsà xojoñ kiskoòta'yà?

¹⁶ Jesús kitsò-la:

—Jñà 'én xi 'an okoòya, mìtsà 'én ts'an, ts'e-né jè xi kisikasén-na.

¹⁷ Tsà yá xi mejèn-la sùkitasòn koni s'ín mejèn-la Nainá, skoè-né jñà 'én xi 'an okoòya tsà it'aà ts'e Nainá nchrobá-ne, o xi tà kjohítsjeèn ts'an-ná.

¹⁸ Jngoò xita xi tà kjohítsjeèn ts'e tísíkeén nga tíchja, tà jè xi mejèn-la nga jè jchaxkón; tanga jè xita xi koií kjoa tíhótsji nga jè kátayaxkón jè xi kisikasén, jè-né xi nguì 'én kixi tsjá, mìtsà 'én ndiso chja.

¹⁹ Jñò, ¿a mìtsà kixi kjoa nga kitjoé-nò kjotíxoma-la Nainá xi jè Moisés kiskii? Tanga jñò, nijngoò xi ma-la síkitasòn. ¿Mé-ne mejèn-nò nga sük'en-ná?

²⁰ Jñà xita kitsò:

—¡Neí-là tíjiñ inima-lè! ¿Yá-né xi mejèn-la sük'en-lè?

²¹ Jesús kiichja kitsò-la:

—Jñò, maxkón-nò jngoò kjoa xi kis'iaàn jè nachrjein níkjáya.

²² Kixií kjoa, jè Moisés kitsjaà-nò kjotíxoma xi kjoa ts'e circuncisión. (Tanga kjotíxoma jè, mìtsà ts'e Moisés; it'aà ts'eé xita jchínga kjìñ-nò inchrobà-ne.) Tanga jñò, nas'ín nachrjein níkjáya bit'aà chibaá-la xita x'in kjoa ts'e circuncisión.

²³ Jñò, nga bit'aà chiba-la jñà xita kjoa ts'e circuncisión jè nachrjein níkjáya nga majìñ-nò nijchaànguio kjotíxoma xi kitsjaà-nò Moisés, ¿mé-ne majti-nò nga 'an jngoò k'a ndaà sindaà-na xita jè nachrjein níkjáya?

²⁴ Kì k'oaá s'ín jchósòn-là koni s'ín tsejèn-nò. K'oaá s'ín jchósòn-là koni s'ín tjín xi nguì kjoa kixi.

Kós'ín bénojmí Jesús ñánda j'ii-ne

²⁵ Tjín i'nga xita xi Jerusalén ts'e xi kitsò:

—¿A mìtsà jè xita jè xi ótsji jñà xita judío nga mejèn-la sük'en?

²⁶ Chítsejèn-là, tíchjajìñ osen-la jñà xita naxandá, niyá xi kó tsò-la. ¿A jyeé kòkjeiñ-la jñà xitaxá nga kixi kjoa nga jè xi Cristo [xi xó Nainá kisikasén-ne]?

²⁷ Tanga jñà, 'ya-ná ñánda j'ii-ne xita jè, k'e nga kjoíí Cristo niyá xi skoè ñánda kjoíí-ne.

²⁸ Jesús nga tíhokóya ya nditsin ingo ítjòn, kiì'nchré koni s'ín kitsò jñà xita. K'ée 'ño kiichja kitsò:

—Jñò, yaxkoón-ná; tíjiñ-nò ñánda j'i-na. Tanga mìtsà tà kjotsja ts'an nga j'iaa. Jè xi kisikasén-na, jè-né xi nguì kixi kjoa nga Nainá. Jñò, mìkiì yaxkon.

²⁹ Tanga 'an, bexkon-ná. It'aà ts'eé inchrobà-na nga jè sobà kisikasén-na.

³⁰ Tijè-ne hora jñà xita mejèn-la nga tsobà'ño Jesús tanga nijngoò xi kitsò ikon nga kitsobà'ño, koi-né nga kj'eè kì bijchó nachrjein-la nga kiyá.

³¹ 'Ñó kjìñ xita kòkjeiñ-la koni kitsò Jesús. Kitsò-la xíkjín:

—K'e nga kjoíí Cristo, ¿a isá kjìñ kjoxkón ndaà xi s'ìñ, koni jè xita jè? Kixií-là kjoa, jè-la xi Cristo.

Kó kitsò Jesús k'e nga jñà xita fariseo mejèn-la kitsobà'ño

³² Jñà xita fariseo kiì'nchré koni s'ín nchijoó jñà xita it'aà ts'e Jesús. Xita sko-la no'miì ko xita fariseo kisikasén xita xi síkinda ingo nga mejèn-la tsobà'ño Jesús.

³³ Jesús kitsò-la:

—'An, tà chibaá nachrjein kótijnako-nò, ikjoàn kjín ijngoò k'a-na ñánda tjina xi kisikasén-na.

³⁴ Jñò, kìnchátsji-ná tanga mìkiì sakò-nò nga mìkiì koma konguió ya ñánda kótijna.

³⁵ Jǎ̀nà x̄it̄a judío, tsibíts'ia nga kiskònangui-la x̄íkjín kitsò:
—X̄it̄a jè, ¿ñánda kjoí? ¿Mé-ne nga mìkìi koma sakò-ná? ¿A yaá kjiko x̄it̄a judío xinguiáá xi x̄ìn i'nde títsajna nga jǎ̀nà xi taxkì x̄it̄a kokòya-la?

³⁶ ¿Kó tsòya-ne 'én xi bénojmi nga tsò: “Jǎ̀nò, kinchátsji-ná tanga mìkìi sakò-nò nga mìkìi koma konguió ya ñánda kótijna”?

Jngoò xajngá nandá xi t̄ijnakon

³⁷ Jè nachrjein xi fehet'aà-ne s'eí, Jesús tsasíjna kixi, 'ñó kiichja, kitsò:

—Tsà ya xi x̄indá-la kàtjanchrobákon-na, kàt'iì nandá.

³⁸ Koni s'ín tíchja Xojon-la Nainá nga tsò: Jè xi mokjeiín-la it'aà ts'an sijnajijn inima-la koni jngoò xajngá nandá xi mìkìi x̄iya xi síkijnakon x̄it̄a.

³⁹ K'e nga okitsò Jesús, it'aà ts'eé Inima Tsjeè-la Nainá kiichja nga iskan tjoé-la jǎ̀nà x̄it̄a xi kokjeiín-la it'aà ts'e. Nachrjein jè, Inima Tsjeè-la Nainá kj'eè kii bitjojen nga kj'eè kii fi-ne ngajmiì Jesús nga jcha-la kjoajeya-la.

Mé-ne kjòjòya-ne jǎ̀nà x̄it̄a it'aà ts'e Jesús

⁴⁰ Jǎ̀nà x̄it̄a, k'e nga kii'nchré 'én koi, t̄jín i'nga xi kitsò:

—Kixií kjoa x̄it̄a jè, jè-né xi t̄jínè-la nga kjoíi nga kichja ngajo-la Nainá.

⁴¹ Jǎ̀nà x̄it̄a xi i'nga kitsò:

—Jè-né xi Cristo [xi xó kisikasén-ne Nainá].

T̄ikoáá t̄jín i'nga xi kitsò:

—Majin-la nga jè Cristo, mìtsà nangui Galilea kjoíi-ne.

⁴² Xojon-la Nainá k'oaá s'ín tíchja nga jè Cristo, yaá kjinchrobát'aà-ne tje-la David, ya naxandá Belén, i'nde-la David.

⁴³ K'oaá s'ín komà-ne nga kjòjòya jǎ̀nà x̄it̄a xi kjoa ts'e Jesús.

⁴⁴ T̄jín i'nga x̄it̄a xi mejèn-la kitsobà'ñó nga kjiko ndayá, tanga nijngoò xi kitsò ikon nga kitsobà'ñó.

Kjoa xi tsohótiya-ne x̄it̄a it̄jòn-la nò'miì

⁴⁵ Jǎ̀nà x̄it̄a xi síkinda ingo, inchrobà-ne ñánda títsajna x̄it̄a fariseo ko x̄it̄a sko-la nò'miì, kitjànangui-la, ki'mi-la:

—¿Mé-ne mìkìi kànchrobáko-nò?

⁴⁶ Jǎ̀nà x̄it̄a xi síkinda ingo kitsò:

—Nì saá jngoò x̄it̄a xi k'oas'ín chja koni s'ín chja x̄it̄a jè.

⁴⁷ Jǎ̀nà x̄it̄a fariseo, kitsò:

—Jǎ̀nò, ¿a t̄ikoáá kachonachaán-nò?

⁴⁸ ¿A k'oaá t̄is'ín mokjeiín-la x̄itaxá it̄jòn tsaján ko x̄it̄a xinguiáá fariseo?

⁴⁹ Tanga jǎ̀nà x̄it̄a xi tíchonachan-la nga mìkìi t̄jijn-la kjotixoma-la Moisés, t̄jínè-la nga kjo'in s'e-la.

⁵⁰ Nicodemo, jè xi x̄it̄a fariseo, xi jǎ̀nò j'iikon jngoò k'a Jesús, kitsò-la:

⁵¹ —Kjotixoma tsaján, mìkìi tsjá'nde nga kjo'in k'oi-la x̄it̄a, k'e nga t̄ikj'eè kii ndaà 'ya-la mé kjoa xi t̄jín-la.

⁵² Jǎ̀nà x̄it̄a fariseo, kitsò-la Nicodemo:

—¿A t̄ikoáá yaá nangui-lè Galilea? Chíta'yi Xojon-la Nainá mé-ne nga jcha-ne nì sà jngoò x̄it̄a xi chja ngajo-la Nainá f'iì-ne Galilea.

Chjoón xi kjoa chijngui kis'iìn

⁵³ Tà k'oas'ín kitsjòya-ne x̄it̄a, xkì xi ján kii-ne ni'ya-la nga jngoò ijngoò.

8

¹ Tanga Jesús, ján kii ya nindoò Yá Olivo.

² Nga komà nchijòn tajñòyaá j'iì-ne ya ingo it̄jòn. Ngats'iì x̄it̄a j'iì t̄jinguila Jesús ñánda t̄ijna. K'eé tsibìjna nga tsakóya-la jǎ̀nà x̄it̄a.

³ Jñà xità xi okóya kjotíxoma-la Nainá xi kiskii Moisés kọ xità fariseo ijchòko jngoò chjoón xi ki'yat'in-la nga kjoa chijngui tís'in. Tsasíjna osen ñánda títsajna ngats'i xità;

⁴ Jñà xità koi kitsò-la Jesús:

—Maestro, chjoón jè, ndaà kà'yat'in-la nga kjoa chijngui tís'in.

⁵ Jè kjotíxoma-la Moisés, k'oáá s'in tíchja nga jñà íchjín xi k'oá tjin kjoa xi ótsji ndajoó kiyá-ne. Ngaji, ¿kó si?

⁶ Jñà xità koi, koi k'oas'in kitsò-la Jesús nga mejèn-la skót'aà, mé-ne koma kohongui-ne it'aà ts'e xitaxá. Tanga Jesús, tsasiñiat'aà nangui nga kiskiijno-ne kọ jnótsja it'aà nangui.

⁷ Xità koi nga sii nchis'in nga kjònangui, Jesús tsasíjna kixi kitsò-la:

—Jñò, tsà tjin i'nga xità xinguijọ xi tsjin-la jé, jè kátinè ítjòn ndajo chjoón jè.

⁸ Jesús ijngoò k'a tsasiñia nga kiskiijno isa it'aà nangui.

⁹ Jñà xità koi, k'e nga kii'nchré koni s'in kitsò Jesús, tà íjngó íjngó kii-ne, nga kijtseè nga mikii ndaà tjin kjohítsjeèn xi kiichja, tsibíts'ia-ne xi xità jchinga, ikjoàn kii-ne ixti. Tà jè tajngoò Jesús kọ chjoón tsibítsajna.

¹⁰ Jesús tsasíjna kixi-ne, kijtseè nga mì tì yá xità tjin-ne. Tà jè tajngoò chjoón síjna. K'eé kitsò-la:

—¿Ñánda títsajna xità xi óngui-lè? ¿A nijngoò xi kòhónè-lè kjo'in?

¹¹ Jè chjoón kitsò:

—Na'èn, niyá-jèn.

Jesús kitsò-la:

—Tikoáá 'an, mikii kinè-lè kjo'in. T'in-ne ni'ya-lè; kii tì jé binchaàtsji-ne.

Ni'in xi tsjá kjoabinachon xi síhiseèn-la xità isò'nde

¹² Jesús, íjngoò k'a kiichjajiiin-la jñà xità, kitsò-la:

—'An-ná ni'in xi síhiseèn-la isò'nde. Jè xi 'an fit'aà-na s'eé-la ni'in xi tsjá kjoabinachon. Mì tì kii yá kojmejiin-ne kjoajñò.

¹³ Jñà xità fariseo kitsò:

—Ti jii tì'biì-ne 'én it'aà tsiji. 'Én xi nokjoi, nímé chjí-la.

¹⁴ Jesús kiichja kitsò-la:

—'Én xi chjà, chjí-la-né, nas'in tì'an tsjaà-na 'én xi it'aà ts'an. Nga be-ná ñánda j'i-na kọ ñánda tífia. Tanga jñò mikii 'yaà ñánda j'i-na kọ ñánda tífia.

¹⁵ Jñò, tà kjohítsjeèn ts'e xitàá nìkjeén k'e nga jé bìnè-ná. Tanga 'an nijngoò xità bìnè-la jé.

¹⁶ Tanga 'an, tsà yá xità xi konè-la jé, kjoakixii xi s'iaàn. Nga mìtsà tajngoò bindaàjiaàn, kọó Na'èn-na xi kisikasén-na bindaàjiin-kọ-na.

¹⁷ Kjotíxoma tsajòn k'oas'in tíchja nga tsò: K'e nga tsà jò ma-ne xità xi tsjá 'én, tsà ngásòn tsò ingajò, kixii kjoa, chjí-la né.

¹⁸ Tì'aán-na xi tsjaà 'én it'aà ts'an. Kọ tikoáá jè Na'èn-na xi kisikasén-na tsjá 'én it'aà ts'an.

¹⁹ Jñà xità fariseo, kiskònangui-la kitsò-la:

—¿Ñánda tíjna Na'èn-lè?

Kiichja Jesús, kitsò-la:

—Jñò, 'an, mikii yaxkon-ná, ni jè Na'èn-na mikii yaxkon. 'An, tsà yaxkon-ná tikoáá jchaxkon-nò Na'èn-na.

²⁰ K'e nga tsakóya jñà 'én koi Jesús, yaá tíjna ya ingo ítjòn ya chrañat'aà-la i'nde ñánda maxkón ton kjotjò. Nijngoò xità xi kitsò ikon nga kitsobà'ño Jesús nga kj'eè kii bijchó nachrjein-la nga kiyá.

Mé-ne jñà xità mikii koma kjoì-ne ya ñánda tífi Jesús

²¹ Jesús íjngoò k'a kitsò-la:

—'An, tìfi-ná. Jñò, kìnchátsji-ná. Tanga jñò yaá kiyájñòò jé-nò. Ya ñánda 'an tìfia, jñò mìkì koma konguió.

²² Jñà xita judío kitsò-la xíkjin:

—¿A tije sük'en-ne yijo-la? ¿Mé-ne k'oa tsò-ne, nga tsò: Ya ñánda 'an tìfia, jñò mìkì koma konguió?

²³ Jesús kitsò-la:

—Jñò, jí it'aà nangui tsajòn, tanga 'an ján ngajmì ts'an. Jñò, jí i'nde-nò isò'nde, 'an, mìtsà isò'nde i'nde-na.

²⁴ Koií k'oa'sín kixan-nò nga ya kiyájñòò jé-nò nga mìkì mokjeiín-nò nga 'an-ná (xi Cristo). Koií kjoa-la nga kiyájñòò jé-nò.

²⁵ Xita judío, kiskònangui-la, kitsò-la:

—¿Yá-ne ngaji?

Jesús kiichja, kitsò-la:

—Jyeé okixan-nò nga sa ítjòn yá-ná 'an.

²⁶ It'aà tsajòn, kjin kjoa tjin isa xi 'an kènojímí-nò, ko xi 'an kindaàjiin-ko-nò. Jè xi kisikasén-na nguì 'én kixí xi chja. Koni s'ín ki'nchrè-la, k'oaá tjin 'én xi 'an chjàjiin-la jña xita isò'nde.

²⁷ Tanga jña xita judío mìkì kjòchija-la tsà it'aà ts'e Na'èn-ná xi Nainá tíchja Jesús.

²⁸ Jesús kitsò-la:

—Jñò, k'e nga chjímì'nga-ná 'an xi Ki'ndí-la Xita xan-la yijo-na, k'eé kochiya-nò nga 'an-ná [xi Cristo]. Nímé kjoa xi s'iaàn xi ta kjòhítsjeèn ts'an. K'oa'sín chjà koni s'ín tsakóya-na xi Na'èn ma.

²⁹ Jè xi kisikasén-na jí tijnako-na. Mìkì síkijna tajngoò-na Na'èn-na. Koií kjoa-la nga kjit'aà nàchrjein sikitason koni s'ín sasén-la jè.

³⁰ Jesús, k'e nga kiichja 'én koi, kjin jchán xita kòkjeiín-la it'aà ts'e.

Jè kjoa kixi síkítsajnandeíí-ná xi kjoa ts'e jé-ná

³¹ Jesús kitsò-la jña xita judío xi kòkjeiín-la it'aà ts'e:

—Tsà kixi sikitason 'én-na xi okoòya-nò, jñò-nò xi nguì kixi kjoa nga 'an kota'yàt'aà-na.

³² Jchaxkoòn xi kjoa kixi, koa jè kjoa kixi síkítsajnandeíí-nò.

³³ Kiichja xita judío, kitsò:

—Ngajen, xita tje-la Abraham-nájen. Ni saá jngoò xita xi kj'eíí síkítsajna'ñó-najen. Ngaji, ¿mé-ne k'oa si-ne nga kítsajnandeíí-najen?

³⁴ Jesús kitsò-la:

—Nguì kjoa kixi xi xan-nò, ngats'ì xita xi jé ótsji, yaá títsajna'ñó it'aà ts'e jé-la, k'oaá ngaya-la koni jngoò xita ch'nda xi tijná'ñó-la nei-la.

³⁵ Jngoò xita xi ch'nda tijná, mìkì tji'nde-la nga ya kijná kjit'aà ya ni'ya ñánda síxá. Tanga jngoò xi ki'ndí ma, tji'ndeé-la nga kjit'aà nàchrjein ya kijná ya ni'ya-la na'èn-la.

³⁶ K'oaá ma-ne, tsà jè Ki'ndí-la Nainá síkijnandeíí-nò, nguì kixi kjoa nga jñò, kítsajnandeíí-nó.

³⁷ 'An, be-ná nga tje-la Abraham-nò; tanga jñò mejèn-nò nga sük'en-ná, koi-né nga mìkì mokjeiín-nò 'én-na xi chjà.

³⁸ 'An, k'oaá s'ín chjà koni s'ín tjin xi kijtseè k'e nga tisa tijnakoaa Na'èn-na. Jñò, k'oaá tis'ín 'nè koni s'ín kina'yà-là na'èn-nò.

Yá-né xi na'èn-la ma xita xi chjako Jesús

³⁹ Jña xita judío kitsò:

—Jè tje-najen, yaá inchrobàt'aà-ne ts'e Abraham. Jè na'èn-jchá kjiin-najen. Jesús kiichja kitsò-la:

—Tsà kixi kjoa nga ixti-la Abraham 'mì-nò, k'oaá s'ín s'een koni s'ín kis'iin Abraham.

⁴⁰ 'An, nas'ín jye k'oas'ín tsibenojmí kixi-nò, nga Nainá kitsjaà-na 'én xi chjà, jñò mejèn-nò nga sik'en-ná. Abraham mì k'oaá kis'iin.

⁴¹ Jñò, k'oas'ín 'nè koni s'ín na'èn-nò.

Jña xita judío kitsò:

—Ngajen, mìtsà kjoa chijngui kits'iin-jìin-jen. Tajngoò jè Na'èn-najen, jè Nainá.

⁴² Jesús kiichja, kitsò-la:

—Tsà kixi kjoa nga jè na'èn-nò Nainá, 'an tjòchaá-la s'en-ná nga it'aà ts'e Nainá inchrobà-na; mìtsà tà kjotsja ts'an nga j'iaa; Nainá kisikasén-na.

⁴³ ¿Mé-ne mìkiì machiya-nò 'én-na xi chjàkò-nò? Koií-né nga mìkiì ma-nò na'yañijon.

⁴⁴ Na'èn-nò, jè xita neí, jè nokjoà-nò. K'oaá s'ín 'nè koni s'ín mejèn-la na'èn-nò. Jè xi ma-la sik'en xita kóni nga tisa tàts'en-la kjoa. Mìtsà kjoa kixi s'ín nga tsjìn-la kjoa kixi. K'e nga chja 'én ndiso, k'oaá tsò koni s'ín tjín inima-la nga ngui xita ndiso-né. Jè na'èn-la ts'e 'én ndiso.

⁴⁵ Tanga 'an, 'én kixi benojmí-nò; koií kjoa-la jñò, mìkiì mokjeiín-nò.

⁴⁶ ¿Yá xita xinguiqo xi koma-la kokò mé jé xi tjín-na? K'e nga chjàkò-nò, ngui 'én kixi chjà, kò ¿mé-ne mìkiì mokjeiín-nò?

⁴⁷ Jè xi xita-la Nainá, 'én-la Nainá 'nchré. Tanga jñò, nga mìkiì na'yà, koií-né nga mìtsà xita-la Nainá 'mì-nò.

Jña kjoa xi tsohótiya-ne Jesús kò xita judío

⁴⁸ Jña xita judío kiichja, kitsò-la Jesús:

—Ngajen, koií kjoa-la k'oas'ín 'mì-lèjen: ji, xita Samaria-né, inima ch'o-la neí tjìin inima-lè.

⁴⁹ Kiichja Jesús kitsò-la:

—'An, mìtsà inima ch'o-la neí tjìin inima-na. Jè kjoa xi tìs'iaàn, jè-né nga bexkoán Na'èn-na. Tanga jñò mìkiì yaxkón-ná. Tà saá nachrjengui-ná.

⁵⁰ Mìtsà jè kjoa tìhotsjia nga jeya siikíjna yijo-na. Tíjna jngoò xi tìkosòn-la, jè-né xi jeya síkíjna-na.

⁵¹ Ngui 'én kixi xi chjàkò-nò, jè xi síkitasòn 'én-na koni s'ín xan-nò, mìkiì kiyá nita kjé-ne.

⁵² Xita judío kiichja, kitsò:

—I'ndeí jyeé 'ya-jen nga inima ch'o-la neí tjìin inima-lè. Abraham kò ngats'ii xita xi kiichja ngajo-la Nainá kjòtseé, k'en-né. Tanga ji si-né: “Jè xi síkitasòn 'én-na koni s'ín xan-nò, mìkiì kiyá.”

⁵³ Ngaji, ¿a isa tíjna ítjoín a mì k'oa-ne koni jè Na'èn-najen Abraham? K'en-né. Kò ngats'ii xita xi kiichjaya ngajo-la Nainá tìkoaá k'en-né. ¿Yá-ne ji nga tiji tìnachrjeè jeya-ne yijo-lè?

⁵⁴ Kiichja Jesús kitsò-la:

—Tsà tì'an jeya síkíjna-na yijo-na, nìmé chjí-la. Jè xi jeya síkíjna-na, jè Na'èn-na xi Nainá 'mì-là.

⁵⁵ Jñò mìkiì yaxkon Nainá, tanga 'an beèxkon-ná. Tsà xán-nò mìkiì bexkoan, xita ndiso koma koni jñò nga xita ndiso-nò. 'An, bexkon-ná koa síkitasòn-ná 'én-la.

⁵⁶ Xita jchínga-nò Abraham, tsjaá komà-la nga mejèn-la skoexkon nachrjein-na nga j'iaa. K'e nga kijtseè nachrjein-na isa 'ñó ndaà kjòtsja-la.

⁵⁷ Jña xita judío kitsò-la:

—Skanda kj'eè tjín-lè icháte nó. ¿Kós'ín komà-ne nga kiyaxkoin Abraham?

⁵⁸ Jesús kiichja kitsò-la:

—Nguì kixi kjoa xi xan-nò, 'An-ná xi isa kjòtseé tijnáa koni jè Abraham.

⁵⁹ Jñà xita judío, kiskoé ndajo nga mejèn-la kosèn-la Jesús. Tanga Jesús tsibijna'ma, itjo-ne nditsin ingo, jahajìin osen-la xita, ikjoàn kiì.

9

K'e nga jè Jesús kisindaà jngoò-ne xita xi mìkiì tsejèn-la

¹ Jesús k'e nga tífi ya ndiyá, kijtseé jngoò xita xi mìkiì tsejèn-la xi xó k'oas'ín kits'iin-ne.

² Xita xi kota'yàt'aà-la Jesús kiskònangui-la kitsò-la:

—Maestro, xita jè, ¿mé-ne k'oas'ín kits'iin-ne? ¿Yá xi tsohótsji jé? ¿A jñà xita jchínga-la, o xi jè xita xi mìkiì tsejèn-la?

³ Kiichja Jesús kitsò-la:

—Mìtsà jè xita xi mìkiì tsejèn-la tjin-la jé, ni mìtsà jñà xita jchínga-la tsohótsji jé. Koií-né nga it'aà ts'e xita koi jcha-la kjoxkón-ndaà-la Nainá.

⁴ Mochjeén-né nga siikitasoàn kjoxkón-ndaà-la jè xi kisikasén-na nga nachrjein isa. Kijchò nachrjein k'e nga kojñò; ni tì jngoò-ne xi koma siixá.

⁵ K'e tákò i tijnáa isa isò'nde, 'an-ná ni'ín xi sìhiseèn-la xita isò'nde.

⁶ K'e nga jye okitsò, tsibíchrá it'aà nangui. Jè ndánachrá-la tsibíndaà-ne ndási, ikjoàn kisikaajno xkon jè xita xi mìkiì tsejèn-la.

⁷ Ikjoàn kitsò-la:

—T'in, kaníkjoìin ya chrjó nandá Siloé (jè 'én xi tsòya-ne, jè xi kinikasén).

Jè xita xi mìkiì tsejèn-la kiì kaníkjoàn, k'e nga inchrobà-ne jye tsejèn-la.

⁸ Jñà xita indii ni'ya-la jè xita xi mìkiì tsejèn-la, kò jñà xita xi jye kjòtseé beèxkon nga ton síjé kjotjò, kitsò-la xíkjín:

—¿A mìtsà jè xita jè xi bijna nga síjé kjotjò ton?

⁹ Tjín i'nga xita xi tsò:

—Jè-né.

Koa jñà xita xi i'nga kitsò:

—Kjomeé k'oaa kji, tanga mìtsà jè.

K'eé kiichja xita xi mìkiì tsejèn-la nga sa ítjòn, kitsò:

—'An-ná.

¹⁰ Jñà xita kiskònangui-la kitsò-la:

—¿Kós'ín komà nga kitáx'a-ne xkoiin?

¹¹ Xita jè kitsò:

—Jè xita xi 'mì Jesús, kisindaà ndási, kisikaajno xkoaàn, ikjoàn kitsò-na: “T'in, kaníkjoìin ya chrjó nandá Siloé.” 'An, kìaà, k'e nga jye tsaníkjoaàn, komà kotsejèn-na.

¹² Jñà xita koi kiskònangui-la kitsò-la:

—Xita jè, ¿ñánda tijná?

Jè xita xi jye kjòndaà-ne, kitsò:

—Mìkiì be ñánda tijná.

K'e nga jñà xita fariseo kisijtsò jè xita xi mìkiì tsejèn-la xi jye kjòndaà-ne

¹³ Jè xita xi mìkiì tsejèn-la nga jye kjòndaà-ne kiìkò ñánda títsajna xita fariseo,

¹⁴ koií kjoa-la nga nachrjein nìkjáya-né k'e nga tsibíndaà ndási Jesús nga kisikaajno xkon jè xita xi mìkiì tsejèn-la mé-ne koma kitáx'a-ne xkon.

¹⁵ Jñà xita fariseo ijngoò k'a kiskònangui-la jè xita xi mìkiì tsejèn-la xi jye kjòndaà-ne, kitsò-la:

—¿Kós'ín komà nga kitáx'a-ne xkoiin?

Xita jè kitsò:

—Ndásií kisikaajno xkoaàn; ikjoàn tsaníkjoàn; i'ndeì jyeé tsejèn-na.

¹⁶ Tjín i'nga xita fariseo xi kitsò:

—Xita jè, mì-la tsà Nainá kisikasén nga mìkiì beèxkón nàchrjein nìkjáya.

Tìkoa tjin i'nga xi kitsò:

—¿Kós'ín ma-ne nga ma-la s'ín kjo_xkón xi ndaà tjin tsà xita jé-né?

Ikjoàn kjòjòya xi tijnà-ne xita fariseo; mìkiì kjòngàsòn kjòhítsjeèn-la.

¹⁷ Ìjngò k'a kitjànangui-la jè xita xi mìkiì tsejèn-la xi jye kjòndaà-ne, kitsò-la:

—Ngaji, ¿kó si, yá xita-ne xi kiskíx'a-ne xkòin?

Xita jè kitsò:

—Jngò xita xi chja ngajo-la Nainá.

¹⁸ Tanga jña xita judío, mìkiì kòkjeín-la tsà kixi kjoa nga jè xita xi mìkiì tsejèn-la nga k'oas'ín kits'ìn koa i'nde_i jyeé tsejèn-la. K'eé kiichja-la jña xita jchínga-la,

¹⁹ kiskònangui-la kitsò-la:

—Jè xita jè, ¿a ki'ndí-nò ma? ¿A kixi kjoa nga mìkiì tsejèn-la k'e nga sa kits'ìn? ¿Kó ma-ne nga tsejèn-la i'nde_i?

²⁰ Jña xita jchínga-la kitsò:

—'Ya-nájen nga ki'ndí-najen ma. Kixi kjoa nga mìkiì tsejèn-la k'e nga sa kits'ìn.

²¹ Tanga mìkiì 'ya-jen mé-ne nga ma tsejèn-la i'nde_i, tìkoaá mìkiì 'ya-jen yá-né xi kiskíx'a-ne xkòn. Jè sobà chjinangui-là, jè kàtènojímí-nò, nga jyeé xita jchínga.

²² Jña xita jchínga-la koií k'oas'ín kitsò-ne nga jña tsakjón-la xita judío. Jña xita judío jyeé k'oas'ín tsajoóya-ne nga jngò k'aá kitjokàjìn ya ni'ya ingo sinagoga, tsà yá xita xi kitsò nga jè Jesús jè xi Cristo [xi xó kisikasén-ne Nainá].

²³ Koií k'oa tís'ín kitsò-ne jña xita jchínga-la, nga kitsò: “Jè sobà chjinangui-là, nga jyeé xita jchínga-né.”

²⁴ Jña xita judío ìjngò k'a kiichja-la jè xita xi mìkiì tsejèn-la, kitsò-la:

—Tènojímí kixi-nájen nga nguixkòn Nainá. Ngajen 'ya-nájen nga jè xita jè, xita jé-né.

²⁵ Jè xita xi mìkiì tsejèn-la xi jye kjòndaà-ne kiichja, kitsò:

—'An, mìkiì be tsà xita jé-né. Tà jè xi be, k'e nga sa kits'ian mìkiì tsejèn-na, tanga i'nde_i jyeé tsejèn-na.

²⁶ Ìjngò k'a kitsò-la:

—¿Mé xi kisikò-lè? ¿Kó s'ín kisikò-lè nga kitáx'a-ne xkòin?

²⁷ Jè xita xi mìkiì tsejèn-la kitsò:

—Jyeé koa kàxan-nò, tanga jñò mìkiì na'yà. ¿Mé-ne mejèn-nò nga ìjngò k'a k'oa xán-nò? ¿A tìkoaá mejèn-nò nga xita-la koma nga ya chíta'yát'aà-là?

²⁸ Jña xita judío k'e nga k'oa ki'mì-la, kòjti-la, kiichjajno-la jè xita xi mìkiì tsejèn-la, kitsò-la:

—Ji-né xita xi ya chíta'yát'aà-la. Tanga ngajen yaá chíta'yát'aà-lajen Moisés.

²⁹ 'Ya-nájen nga jè sobà Nainá kiichjako Moisés. Tanga jè xita jè mìkiì 'ya-jen ñánda j'ì-ne.

³⁰ Jè xita xi mìkiì tsejèn-la kitsò:

—Kjoa jè, tà maxkón-ná nga jñò, mìkiì 'ya ñánda j'ì-ne xita jè, tanga 'an be-ná nga jè kiskíx'a-ne xkoaàn.

³¹ 'Yaà-ná jña xita xi tjin-la jé, mìkiì 'nchré-la Nainá. Tanga jña xita xi tsakjón-keè Nainá tìkoa sítasòn koni s'ín mejèn-la, jña-né xi 'nchré-la.

³² Kóni nga tisa kjòtseé, ni saá jngò xita na'yà-la xi ma-la kix'a-ne xkòn jngò xita xi mìkiì tsejèn-la k'e nga k'oas'ín kits'ìn.

³³ Xita jè, tsà mìtsà Nainá kisikasén, nimé xi koma-la nga k'oas'ín s'ìn.

³⁴ Jña xita judío kitsò-la jè xita xi mìkiì tsejèn-la:

—Ngaji xi taxki 'ño tse jé tjin-lè, ¿a jii mejèn-lè kókóya-najen?

Ikjoàn tsachrje ni'ya ingo sinagoga.

Xita xi miki tsejèn-la kjoa ts'e inima-la

³⁵ Jesús kii'nchré nga jè xita jè kinachrjekajin ya ni'ya ingo sinagoga. K'e nga kisatiikjoò ijngoò k'a, kiskònangui-la kitsò-la:

—Ji, ¿a mokjeiin-lè it'aà ts'e xi Ki'ndí-la Xita tsò-la yijo-la?

³⁶ Xita jè kitsò:

—Na'èn, koatìn-ná yá-né, mé-ne nga kokjeiin-na it'aà ts'e.

³⁷ Jesús kitsò-la:

—Jyeé ki'yi, 'an-ná xi tichjàko-lè.

³⁸ Xita jè tsasijna xkó'nchit'aà-la Jesús nga kijtseèxkón, kitsò-la:

—Na'èn mokjeiin-na it'aà tsiji.

³⁹ Ikjoàn kitsò Jesús:

—'An, koií xá j'i-na i isò'nde; nga 'an skosòn-la mé-ne jña xita xi miki tsejèn-la kotsejèn ijngoò k'a-la, koa jña xi tsejèn-la miki kotsejèn-la.

⁴⁰ Tjín i'nga xita fariseo xi ya títsajnakò Jesús, k'e nga kii'nchré 'én koi, kiskònangui-la kitsò-la:

—Ngajen, ¿a tikoáá miki tsejèn-najen?

⁴¹ Jesús kiichja kitsò-la:

—Jñò, tsà miki tsejèn-nò, tsjìn-nò jé. Tanga bixón-nò: “Tsejèn-najen”, k'oaá ma-ne nga ya tjínè-nò jé-nò.

10

Paxtò ko ndí orrè-la

¹ 'Nguì kjoa kixijí xi xan-nò, jè xita xi mìtsà ya fahas'en-ne xotjoa-la ínchíba-la orrè, xi xìn fahas'en-kjá-ne, xita chijé-né, jè xita xi fikò chijé cho.

² Tanga jè xi ya fahas'en-ne xotjoa-la ínchíba, jè-né xi paxtò, xi síkinda orrè.

³ Jè xi síkinda xotjoa-la ínchíba, jé kíx'a-la. Jè xi paxtò, chja 'ín-la nga jngoò ijngoò orrè, ko jña orrè 'nchréjta-la nei-la. Ikjoàn ochrje ínchíba-la.

⁴ K'e nga jye bitjo yije ínchíba-la jña orrè, jè paxtò fikò nga 'nchréjtaá-la nga jè nei-la.

⁵ Tanga jngoò xita xi kj'eíí, miki kjitjingui-la nga miki beèxkon. Ta saá ta kongaa-la nga miki 'nchré jta-la xita xi kj'eíí.

⁶ Jesús k'oaá tsò kjoa xi mangásòn xi tsibénojmi-la. Tanga jña xita koi miki kjòchiya-la kó tsòya-ne.

Mé xi s'ín jè paxtò xi ndaà síkinda orrè

⁷ Jesús, ijngoò k'a kitsò-la:

—Xi nguì okixi k'oaá xán-nò. 'An-ná xotjoa-la ínchíba ñánda fahas'en-ne jña orrè.

⁸ Ngats'ì jña xi j'ì ítjòn-na, sa xita chijé-né, jña xi fikò chijé cho. Jña orrè miki kii'nchréñijon-la.

⁹ 'An-ná xi xotjoa; jè xi it'aà ts'an kjoahas'en, kitjokajin kjo'in kjoa ts'e jé-la. K'oas'ín ngaya-la koni s'ín orrè nga fahas'en ínchíba-la ko bitjo ko sakó-la ijña xi kjèn.

¹⁰ Jè xita chijé tà f'ì síchijé-né, f'ì sík'en-né, f'ì síkjesòn-ne. Tanga 'an, koií xá j'i-na nga kátas'e-nò kjoabinachon nità kjé-ne, nga nimé chijat'aà-nò nga nguì ndaà kátas'e-nò.

¹¹ 'An-ná xi paxtò xi ndaà ko'ndà orrè. Jè paxtò xi ndaà ko'ndà orrè, jè xi tjijngoò ikon nga kijátjì jña orrè.

¹² Jè xita xi tà chi'nda tjina nga ko'ndà orrè, k'e nga beè nga nchrobá chraña tsejèn, síkítsajna jña orrè, ikjoàn onga. Koií k'oas'ín-ne nga mìtsà jè paxtò xi

ko'nda, tikoá mitsà jè nei-la orrè. Ikjoàn matsja-la jè tsején nga tsobà'nño jña orrè, xki xi ján sítsjòya jña orrè xi i'nga.

¹³ Jè xita xi chi'nda tíjna tà onga-né; koií k'oas'ín-ne nga nímé kinda-la. Tà jè síkinda chjí-la mitsà jña orrè síkinda.

¹⁴⁻¹⁵ 'An-ná paxtò xi ndaà ko'nda orrè; koni s'ín beèxkon-na Na'èn-na, tikoá 'an bexkoan Na'èn-na, k'oaá tis'ín beèxkon-ná orrè-na kó kjoàn, kò jña orrè beèxkoòn-na nga ts'an. 'An tíjngò takoàn nga kiyátjia jña orrè-na.

¹⁶ Tikoá tjín-isa-na xi kj'ejií orrè, jña xi mitsà i títsajnaya ínchíba jè. Tikoáá mochjeén-né nga kjinchrobàkon-na mé-ne nga kji'nchréñijon-na tikoá síkitasòn-na. Jngò ìnchíba koma-ne kò jngò koma paxtò xi skó'nda.

¹⁷ 'Koií kjoa-la nga matsjakeè-na Na'èn-na nga 'an tíjngò takoàn nga kiyá mé-ne k'e nga koma iskan kjoáaya-na.

¹⁸ Niyá xi tjí'nde-la nga sijk'en-na, 'an kjotsja ts'an-ná nga tsja yijo-na. Tjí'nde-na nga tsja, tikoá tjí'nde-na nga kjoáaya-na it'aà ts'e kjoabiyaà. Jè Na'èn-na k'oa tjín kjotíxoma xi kitsjaà-na.

¹⁹ Jña xita judío k'e nga kiì'nchré 'én koi, ijngò k'a kjòjòya jña xita.

²⁰ Kjin ma xita xi kitsò:

—Inima cho-la neií tíjìn inima-la. Xita ská-né. ¿Mé-ne okji-ne xita xi na'yà-là?

²¹ Jña xita xi i'nga kitsò:

—'Én koi mitsà ts'e xita neií. ¿A komaá-la jè xita neií nga skíx'a xkon xita xi mikì tsején-la?

Mé xi komà k'e nga jña xita judío kisijtikeè Jesús

²² K'e nga nàchrjein chon 'nchán, ján Jerusalén tíbitjo s'eí nga ijchò ijngò nò nga kjòchikon-t'in ingo.

²³ Jesús ya tíjna ingo ítjòn nga tsóbangui nguitjoa xi 'mì Salomón.

²⁴ Jña xita judío chinchà jngò itjandi-la Jesús, kitsò-la:

—¿Skanda mé nàchrjein chíña-lèjen? Jngò k'a koatìn-nájen, ¿a ji-né xi Cristo [xi xó kisikasén-ne Nainá]?

²⁵ Jesús kiìchja kitsò-la:

—Jyeé k'oa kixan-nò, tanga jñò mikì mokjeiín-nò. Jña kjoxkón xi it'aà ts'e Na'èn-na s'iaàn, jña síkixiya ndaà kjoa xi it'aà ts'an.

²⁶ Tanga jñò, mikì mokjeiín-nò, koií kjoa-la nga mitsà ndí orrè ts'an xan-nò.

²⁷ Jña ndí orrè-na 'nchréjtaá-na; 'an beèxkon-ná, koa fitjngui-na.

²⁸ 'Aán tsja-la kjoabinachon nita kjé-ne; mikì chija nita kjé-ne; tikoá niyá xi kjoáá'an-na.

²⁹ Jè Na'èn-na xi kisingatsja-na jña ndí orrè, isa tíjna ítjòn nita yá-ne. Nijngò xi koma-la kjoáá'an-na iya tsja Na'èn-na.

³⁰ 'An kò Na'èn-na tà jngò ma-nájen.

³¹ Jña xita judío tsibíxkó ndajo nga mejèn-la kosèn-la Jesús.

³² Kiìchja Jesús kitsò-la:

—'Nño kjìn kjoxkón xi ndaà tjín jye tsakoò-nò xi inchrobà-ne it'aà ts'e Na'èn-na. ¿Jñò, ñá-laá ngatji-la kjoa koi, nga ndajo mejèn bínè-ná?

³³ Jña xita judío kitsò:

—Mitsà koií kjoa-la kjoxkón ndaà xi tì'nì nga ndajo kínè-lèjen. Koií kjoa-la nga Nainá nokjoajno-la nga Nainá 'mì-la yijo-lè. Ji, tà xita-né.

³⁴ Jesús kiìchja kitsò-la:

—Jè Xojon-la Nainá xi jñò chita'yà k'oaá s'ín tíchja ñánda nga tsò Nainá: “Jñò, k'oaá kixan-nò, nainá 'mì-nò.”

³⁵ Xojon-la Nainá, mì yá xi koma kochrjekàngui. K'oaá s'ín tíchja nga jè Na'èn-ná, nainá kitsò-la jñà xita xi kitjoé-la 'én-la.

³⁶ Tsà k'oas'ín ki'mì xita koi, ¿mé-ne bixón-nò nga Nainá chjàjno-la k'e nga xan-nò: 'An-ná xi Ki'ndí-la Nainá? Nga jè Nainá kitsjaà-na xá nga kisikasén-na i'isò'nde.

³⁷ Kì kii mokjeiin-nò it'aà ts'an, tsà mì k'oaá s'ín tìs'iaàn koni s'ín tís'ín Na'èn-na.

³⁸ Tanga tsà k'oa tjin kjoa xi tìs'iaàn nas'ín mìkii mokjeiin-nò it'aà ts'an, kàtakjeiin-nò it'aà ts'e kjoa xi tìs'iaàn, mé-ne nga k'oas'ín jcha-nò kò kàtakjeiin-nò nga ta jngoó ma-najen Na'èn-na kò 'an.

³⁹ Jñà xita judío mejèn-la nga kitsobà'nó òjngoò k'a Jesús. Tanga Jesús itjokàya tsja xita koi, ikjoàn kii.

⁴⁰ K'ée kii òjngoò k'a ján xijngoàà xajngá nandá Jordán ya ñánda kis'iin ítjòn bautizar xita jè Juan; Jesús yaá tsibìjna.

⁴¹ 'Nó kjin xita ijchò tjingui-la Jesús. Xita koi, kitsò:
—Juan, ñimé kjojkón ndaà kis'iin. Tanga ngats'iì 'én xi kitsò jè Juan it'aà ts'e xita jè, ngui kjoa kixi-né.

⁴² Ya i'nde jè, 'nó kjin xita kòkjeiin-la it'aà ts'e Jesús.

11

Kó kitsò Jesús k'e nga kii'nchré nga k'en Lázaro

¹ Tíjna xk'én jngoò xita xi 'mì Lázaro xi ya i'nde-la Betania, ya naxandá ts'e María kò ndichja xi 'mì Marta.

² (Jè María xi ndichja ma Lázaro, jè-né xi kisikaájno xkii jne ndsoko Jesús. Ikjoàn kò tsja skò kisixijno-ne ndsoko.)

³ Jñà íchjín ndichja Lázaro, kisikasén-la xá Jesús, kitsò-la:

—Na'èn, jè amigo-lè xi ndaà matsjachi kijna xk'én-né.

⁴ K'e nga kii'nchré Jesús, kitsò:

—Ch'in jè, mìkii kiyá-ne; k'oaá s'ín kochjeén nga jcha-la kjoajeya-la Nainá, mé-ne jè Ki'ndí-la tikoá jeya kijna-ne.

⁵ Jesús 'nó matsjakeè Marta kò ndichja kò Lázaro xi 'ndse ma.

⁶ K'e nga kii'nchré nga kijna xk'én Lázaro, ngui jò nachrjein tsibìjna Jesús, ya i'nde ñánda tíjna.

⁷ Xi jye komà, ikjoàn kitsò-la xita xi kota'yàt'aà-la:

—Òjngoò k'a tíkjiaán ján nangui Judea.

⁸ Jñà xita xi kota'yàt'aà-la Jesús kitsò:

—Maestro, kj'eè tsà kjin nachrjein tjin-la k'e nga jñà xita judío mejèn-la tsibínè-lè ndajò nga sikk'en-lè. ¿A tijaá mejèn k'oin òjngoò k'a ngá-ne?

⁹ Kiiichja Jesús kitsò-la:

—Nga jngoò nachrjein, ¿a mìtsà tejò hora tjin-la? Jè xi nachrjein tsóba mìkii satíngui nga jè ni'ín xi tjin isò'nde síhiseèn-la.

¹⁰ Tanga jè xi tsóba nga nitjen, satíngui-né nga tsjin-la ni'ín xi síhiseèn-la.

¹¹ Ikjoàn kitsò-la xita-la:

—Jè amigo-ná Lázaro kjinafé-né, tanga 'an koií xá fi-na nga 'an sikkjaá-la.

¹² Xita xi kota'yàt'aà-la Jesús kitsò:

—Na'èn, tsà kjinafé-né, kondaá-ne.

¹³ Jesús k'e nga okitsò, jè tíchja it'aà ts'e kjoabiyaà-la Lázaro. Tanga jñà xita xi kota'yàt'aà-la k'oaá s'ín kisikitsjeèn tsà tà tísikjaya-ne Lázaro nga kjinafé.

¹⁴ K'ée jngoò k'a tsibénojmí kixi-la kitsò-la:

—Lázaro jyeé k'en.

¹⁵ Matsja-na xi it'aà tsajòn nga jè nàchrjein nga mì ya titsajnaà, mé-ne jñò kòkjeiín-nò. Nchrobá, tíkjiaán chítsejèn-lá.

¹⁶ K'eé kiìchja Tomás xi tìkoà Dídimo tsò-là ['én xi tsòya-ne Ti'ñò]; kitsò-là xíkjin:

—Jñá tìkoà tíkjiaán, mé-ne ya kiyákoá Jesús.

Jesús, jè xi síkjaáya-là xita tìkoà tsjá-là kjoabinachon

¹⁷ K'e nga ijchò Jesús, kiì'nchré nga jyeé tjín-là ñijòn nàchrjein nga kisìhijìn Lázaro.

¹⁸ Naxandá Betania chrañàt'aà kijna-là naxandá Jerusalén, tjín-là tsà jàn kilómetro.

¹⁹ Kjin xita judío ijchòkon jè Marta kò María nga ijchò síjehikon nga 'ndse k'en.

²⁰ Jè Marta, k'e nga kiì'nchré nga Jesús tínchrobá chrañà, kiìkjaá indiaà. Jè María yaá tsibìjnaya ni'ya.

²¹ Jè Marta kitsò-là Jesús:

—Na'èn, tsà ì-là tijni, jè 'ndsè mì-la kiì k'en.

²² Tanga ì'ndeì be-ná nita mé xi sijé-la Nainá, tsjá-lè.

²³ Jesús, kitsò-là:

—Jè 'ndsì kjoáya-là.

²⁴ Marta kitsò:

—Be-ná k'e nga kjoehet'aà nàchrjein kíjnakon ìjngoò k'a-ne, k'e nga kjoáya-là ngats'ì xita xi jye k'en.

²⁵ Jesús, k'eé kitsò-là:

—'An-ná xi síkjaáya-là xita kò tsjaà-là kjoabinachon. Jè xi mokjeiín-là it'aà ts'an nas'ín kiyá, kíjnakon ìjngoò k'a-ne.

²⁶ Ngats'ì xita xi títsajnakon, jñà xi mokjeiín-là it'aà ts'an, mìtsà jngoò k'a kiyá. Ngaji, ¿kó sí?, ¿a mokjeiín-lè?

²⁷ Marta kiìchja kitsò:

—Jon Na'èn, 'an, mokjeiín-na nga jì-né xi Cristo; jì-né xi Ki'ndí-là Nainá, jè xi k'oas'ín tjínè-là nga kjoí ì isò'nde.

Jesús, mé-ne kiskindàyakeè-ne Lázaro

²⁸ Marta, k'e nga jye òkitsò, kiìchja'ma-là María xi ndichja ma, kitsò-là:

—Í tijna Maestro, chja xó-lè.

²⁹ Jè María k'e nga kiì'nchré, nitoón tsasítjen, kiìkon Jesús.

³⁰ Jesús, kj'eè kiì fahas'en-jìin naxandá, tákó yaá síjna ñánda ijchòkjaá indiaà Marta.

³¹ Jñà xita judío xi títsajnakò ni'ya-là María nga nchisíjehikon, k'e nga kijtseè nga tà nìton itjo ni'ya María, kiitjingui-là. K'oaá s'ín kisikítsjeèn tsà ya tífi kjindáya ñánda kisìhijìn Lázaro.

³² María k'e nga ijchò ñánda síjna Jesús, k'e nga kijtseè, tsasìjna xkó'nchit'aà-là, kitsò-là:

—Na'èn tsà ì-là tijni, jè 'ndsè mì-la kiì k'en.

³³ Jesús k'e nga kijtseè nga tíkjindáya María tìkoà nchikjindáya xita judío xi tìjiko, 'oon komà-là inima-là Jesús, 'ñó kjòba-là.

³⁴ Jesús kiskònangui, kitsò:

—¿Ñánda kisìhijìn?

Kitsò jñà xita:

—Na'èn nchroboí, chítsejèn-là.

³⁵ Jesús kiskindáya-né.

³⁶ Jñà xita judío kitsò-là xíkjin:

—Chítsejèn-là, 'ñó matsjakeè Lázaro.

37 Tjín i'nga x̄ita xi kitsò:

—X̄ita jè komà-la kiskíx'a xkon x̄ita xi mìkiì tsejèn-la, ¿a mìtsà komà-la tsà mìkiì k'en Lázaro?

Kós'ín ma jaáya-la Lázaro

38 Jesús ijngoò k'a 'ñó 'on komà-la in̄ima-la. Kìi kasìt'aà chrañà-la jè itsjó-la mik'en. Jngoò nguijo ñánda jngoò ndajo teè tíchjoàjto-la.

39 Jesús kitsò:

—Chjaàxiòn jè ndajo.

Jè Marta, ndichja mik'en, kitsò-la Jesús:

—Na'èn, jyeé-la ch'o jne nga jyeé tjín-la ñijòn nàchrjein nga kisìhijìn.

40 Kìichja Jesús kitsò-la:

—¿A mì jyeé k'oa kixan-lè, tsà mokjeiín-lè jcha-ne kjoajeya-la Nainá?

41 K'eé jaàxìn ndajo xi tíchjoàjto-la itsjó-la mik'en, Jesús kiskoòtsejèn ngajmìi, kitsò:

—Na'èn, tsjaà-lè kjondaà, ndaàha chjì-lè nga na'yà-ná.

42 'An be-ná nga kjit'aá nàchrjein na'yà-ná, tanga koií k'oa kàxan-lè nga kjìn ma x̄ita xi títsajna mé-ne nga kòkjeiín-la nga jì kinìkasén-ná.

43 K'e nga jye okitsò, 'ñó kìichja, kitsò:

—Lázaro, nchroboí, tìtjoì ngajo.

44 Jè xi kijna k'en, itjo-ne ngajo. Jñà ndsoko ko tsja, nikje na'ñó tjí'ñó-ne. Jè isén-la, jngoò nikje chroba tíjtéjìn. Jesús k'eé kitsò-la jñà x̄ita:

—Chíjnda'ñó-nò, kàtjì-ne.

K'e nga jñà x̄ita judío tsajoóya-ne nga s̄ìk'en Jesús

(Mateo 26:1-5; Marcos 14:1-2; Lucas 22:1-2)

45 Jñà x̄ita judío xi j'ìi nga tsoháhtako María, k'e nga kijtseè koni s'ín kis'ìn Jesús, kjìn ma xi kòkjeiín-la it'aà ts'e.

46 Tanga tjín i'nga x̄ita judío xi kìikon jñà x̄ita fariseo, tsibénojmi-la koni s'ín tjín kjoa xi kis'ìn Jesús.

47 Jñà x̄ita sko-la no'miì ko x̄ita fariseo tsibíxkóya xíkjín, tsibíjna jngoò junta ts'e x̄ita ítjòn-la x̄ita judío, kitsò-la xíkjín:

—¿Mé xi s'eén? X̄ita jè ndaà jchán tís'ín kjoxkón xi ndaà tjín.

48 Tsà ta k̄i'nde-lá, ngats'ìi x̄ita kòkjeiín-la it'aà ts'e. Ikjoàn kjoíi x̄ita Roma, s̄ìkits'ón-ya i'nde tsjeè-ná ko naxandá-ná.

49 Xi tíjñà-ne x̄ita koi, jngoò xi 'mì Caifás xi no'miì ítjòn tíjna jè nó jè, kìichja kitsò:

—Jñò, n̄imé kjoa xi tíjìn-nò,

50 ko mìkiì n̄ikítsjeèn nga mochjeén-né nga tà jngoò x̄ita kàtiyaàtjì-la naxandá-ná mì k'oaá-ne tsà kiyá yije x̄ita naxandá-ná.

51 Caifás k'e nga k'oa'sín kìichja mìtsà tà kjohítsjeèn ts'e. Tanga koi-né nga no'miì ítjòn tíjna nó jè, Nainá kisìkichiya-la nga Jesús, k'oaá s'ín tjínè-la nga jè naxandá kiyátjì ngajo-la.

52 Mìtsà ta jè naxandá kiyátjì ngajo-la; t̄ikoaá koiìxkóya-né ngats'ìi ixti-la Nainá xi x̄k̄i xi ján naxandá nchisíjchá yijo-la, kóhokji nga tíjtsa isò'nde.

53 Tjìjè-ne nàchrjein jè tsajoóya-ne nga s̄ìk'en Jesús.

54 Koií kjoa-la Jesús mì t̄i k̄i taxk̄i tsajmeèjìn osen-la x̄ita judío. Yaá k̄i k̄ijna i'nde it'aà xìn ñánda nangui kixì choòn ya chrañàt'aà-la jngoò naxandá xi 'mì Efraín; yaá tsibíjna ko x̄ita xi kota'yàt'aà-la.

55 Jyeé nchrobá machrañà s'eí Paxko ts'e x̄ita judío. K'e nga t̄ikj'eè mats'ia s'eí, kjìn x̄ita k̄i ján Jerusalén nga k̄i s̄itsjeèya yijo-la koni s'ín tjín kjotíxoma-la xi xkón tjín.

56 Xk̄i xi ján tsohótsji Jesús. K'e nga títsajna ya nd̄itsin ingo, kitsò-la xíkjín:

—¿Kó bixón? ¿A kjoí s'eí Paxko, o xi majín-né?

⁵⁷ Jñà xita sko-la nò'mi kò xita fariseo, k'oaá s'ín kitsjaà okixi tsà yá xi skoexkon ñánda tíjna Jesús, kàtènojmi mé-ne nga tsoḅa'ño-ne.

12

*Mé xi kis'iin María it'aà ts'e Jesús
(Mateo 26:6-13; Marcos 14:3-9)*

¹ Ngui joòn nàchrjein chija isa-la nga kitjo s'eí Paxko. Jesús kii ján naxandá Betania ñánda tíjna Lázaro xi jè Jesús kisikjaáya-la k'e nga k'en.

² Yaá kisindaà-la tsojmi Jesús xi tsakjèn nga kòñò. Jè Marta tsibíya tsojmi xi kiskine. Ngats'i xita xi ya títsajnat'aà ímíxa, tikoḅa ya tíjna Lázaro kò Jesús.

³ María j'ikò osen litro xkii jne xi 'ño chjí xi ngui ts'e nardo. Kisikaàjno ndsoko Jesús, ikjoàn kisixijno-ne tsjasko. Kóhokji i'nga ni'ya, ndaà jchán kiijne.

⁴ Jngoò xita xi kota'yàt'aà-la Jesús, jè ti-la Simón xi 'mì Judas Iscariote, jè xi siingatsja Jesús jñà xita kondra-la, kitsò:

⁵ —¿Mé-ne mìtsà kàsatíjna-ne xkii jne jè? Tsà kàsatíjna-ne koni tjin síkijne chjí-la jngoò xita xi jàn sindo nàchrjein síxá, mé-ne jè ton-la ko'bi-la jñà xita ima.

⁶ Judas mìtsà koi kjoḅa-la okitsò-ne nga makájno-la xita ima, koií-né nga xita chijé-né. Jè ngatsja chijtsa xi sinchá ton; ma síchijé ton xi sinchá chijtsa.

⁷ Jesús kitsò-la:

—Kì k'oa 'mì-la jè chjoón. Xkii jne jè tíjnatjò-la k'e nga 'an xi siijñaà.

⁸ Jñò, kjit'aà nàchrjein kitsajnakò-nò jñà xita ima, tanga 'an mìtsà tà kjit'aà nàchrjein i kótijnakò-nò.

K'e nga jñà xita judío tsajoóya-ne nga tikoḅa siik'en jè Lázaro

⁹ 'Nó kjin xita judío kisijiin-la nga ya tíjna Jesús ya naxandá Betania; k'eé kiitjingui-la. Tanga mìtsà tà koií kjoḅa-la Jesús kii-ne; jè kii katsejèn-la Lázaro xi jè Jesús kisikjaáya-la k'e nga k'en.

¹⁰ Jñà xita sko-la nò'mi tsajoóya-ne nga tikoḅa mejèn-la siik'en jè Lázaro,

¹¹ koií kjoḅa-la nga jè ngatji-la Lázaro, kjin jchán xita judío chinchat'aàxin nga jye mokjeiin-la it'aà ts'e Jesús.

*Kós'ín komà k'e nga jè Jesús jahas'en-jìn naxandá Jerusalén
(Mateo 21:1-11; Marcos 11:1-11; Lucas 19:28-40)*

¹² Nga komà nchijòn, kjin jchán xita ijchò s'eí Paxko ján Jerusalén; kisijiin-la nga tikoḅa ya kijchò Jesús;

¹³ tsate xkajén, itjo kiskoðña-la iya ndiyá; 'ño kiichja, kitsò:

—jeya kàtjna Nainá! jMé tà ndaà-la jè xita xi nchrobá ngajo-la Nainá, xi xitaxá ítjòn-la xita naxandá Israel!

¹⁴ Jesús kisakò jngoò-la ndí búrró ki'ndí xi tsibijnasòn-la koni s'ín tíchja Xojon-la Nainá, nga tsò:

¹⁵ Kì tsakjoòn-jèn, ji naxandá Sión, chitsejèn-la xitaxá ítjòn-lè xi nchrobá, tíjnasòn jngoò-la ndí búrró ki'ndí.

¹⁶ K'e nga sa ítjòn, jñà xita xi kota'yàt'aà-la Jesús mikii kjòchiya-la kó tsòya-ne 'én koi. Tanga k'e nga k'en Jesús, ikjoàn jaáya-la nga kiimijin ján ngajmii, skanda k'eé kjòchiya-la nga k'oaá s'ín komàt'in koni s'ín tíchja xojon xi it'aà ts'e.

¹⁷ Jñà xita xi kijtseè k'e nga jè Jesús kisikjaáya-la jè Lázaro nga jye kijnak'en, isaá ndaà kisika'bísòn 'én, tsibènojmi yije-la xita xi kj'eí.

¹⁸ Koií kjoa-la 'ñó kjin xita kiikjaá indiaà Jesús nga jye kiì'nchré jña kjo_xkón xi kis'iìn.

¹⁹ Jña xita fariseo kitsò-la xíkjin:

—Chítsején-là; jña, nímé xi s'eén nga ngats'ìi xita isò'nde sa jè fitjingui-la.

Kó kitsò Jesús k'e nga jña xita griego mejèn-la skoexkon

²⁰ Jña xita xi ijchò s'eí ján Jerusalén nga ya beèxkón Nainá, yaá títsajnajin i'nga xita griego.

²¹ Xita koi ijchòkon Felipe xi Betsaida i'nde-la, nangui xi chja-ne Galilea; tsibítisi'ba-la kitsò-la:

—Na'èn, mejèn-najen jchaxkon-jen Jesús.

²² Felipe kiì kénojímí-la Andrés; k'eé kiì Andrés ko Felipe tsibénojímí-la Jesús.

²³ Jesús kiìchja kitsò-la:

—Jyeé ijchò nachrjein-la nga jè Ki'ndí-la Xita kjimijìn ijngoò k'a-ne ngajmì mé-ne nga jeya kína-ne.

²⁴ Nguì okixí xi xan-nò, jè nojmé tsà mìkiì tjókiyá k'e nga sitje, tà jngoò kjit'aá koma. Tanga tsà tjókiyá k'e nga síhijìn, kòkjìn-ya-né.

²⁵ Jè xita xi tjòkeè yijo-la nga mì mé kjo'in sakò-la, tà saá sìichija-né ko kjo'in kijnajìn; tanga jè xita xi mìkiì tjòkeè yijo-la i isò'nde, ndaà tíjnatjò-la kjoabinachon-la skanda ta mé nachrjein-ne.

²⁶ Tsà yá xi mejèn-la nga 'an sìixáko-na kàtjanchrobá tjingui-na; ya ñánda nga 'an kótijna, tikoà jè, yaá kijnat'aà-na. Tsà yá xi 'an sìixáko-na jè Na'èn-na ndaà skoexkón.

K'oaá s'ín tsibénojímí Jesús it'aà ts'e kjoabiyaà-la

²⁷ 'I'ndeí 'ñó jchán ba ma-la inima-na. ¿Mé 'én xi kichjà? ¿A k'oaá xan-lè: “Na'èn, tinachrjekàjin-ná kjo'in xi komat'ian jè hora jè”? Majìn, nga koií xá j'i-na nga kitasòn.

²⁸ Na'èn, jeya tijni.

Tik'e-ne kina'ya jngoò-la 'én xi ngajmì nchrobá-ne, kitsò:

—Jyeé kòkjìn k'a jeya síkijna yijo-na ko ijngoò k'a jeya sìikijna yijo-na.

²⁹ Jña xita xi ya títsajna, k'e nga kiì'nchré, tíjin xi kitsò: ch'oon xi jane. Jña xita xi i'nga, kitsò:

—Àkjale-la Nainá xi kiìchja-la.

³⁰ Kiìchja Jesús kitsò:

—'Én xi kàna'ya-là mìtsà kjondaà ts'an, kjondaà tsajòn-nò.

³¹ Jè hora jè, nga sindaàjin-la isò'nde; i'ndeí, jyeé ijchò hora nga jè xita neí xi tíhotíxoma-la isò'nde, jyeé kitjojin.

³² K'e nga 'an, tjámìtjen it'aà nangui, ngats'ìi xita, 'aán kichjà-la nga kjinchrobàt'aà-na.

³³ Koií okitsò-ne, jè tsibénojímíya kós'ín komat'in k'e nga kiyá.

³⁴ Jña xita kiìchja kitsò-la:

—'Ya-najen nga jè kjotíxoma-la Nainá xi kiskì Moisés, k'oaá s'ín tíchja, tsò-né: Jè Cristo, kijnakon-ne nita kjé-ne. Ngaji, ¿mé-ne kosi-ne nga mochjeén-né nga jè Ki'ndí-la Xita tjámìtjen-t'aà nangui? ¿Yá-ne xi Ki'ndí-la Xita 'mì-la?

³⁵ Jesús kitsò-la:

—Táko kijnajìn chiba nachrjein-nò ni'ín xi síhiseèn-nò. Títjájmeè nga tíjnajìn-nò xi síhiseèn-nò, mé-ne nga mì kojñò-nò. Jè xi ijìn jñò tsó'ba mìkiì beè kós'ín fi.

³⁶ Kàtakjeiín-nò it'aà ts'e ni'ín xi síhiseèn k'e nga táko tíjnajìn-nò, mé-ne nga ya kitjá ñánda iseèn choòn.

K'e nga jye okitsò Jesús, kiì tsibìjna'ma-la jñà xita.

Mé-ne jñà xita judío mìki kòkjeiín-la it'aà ts'e Jesús

³⁷ Jesús, nas'ín tákó 'ñó kjin kjojkón ndaà kis'iin nga nguixkon xita, jñà xita mìki kòkjeiín-la.

³⁸ Koií tsitasòn 'én xi kiskiì Isaías, xita xi kiichjaya ngajo-la Nainá, nga kitsò: Na'èn, ¿yá-né xi tímokjeiín-la 'én-ná xi kinokjoàyaá?

¿Yá xi tihokoò-la nga'ño xi tjín-lè?

³⁹ Koií kjoa-la nga mìki kòkjeiín-la, nga k'oaá s'ín tíchja òjngoò k'a xojon-la Isaías ñánda tsò:

⁴⁰ Nainá tsibíchjoà xkon,

kisítájaàjìin inima-la,

mé-ne nga mìki kotsejèn-la,

mìki kochiya-la jìin inima-la

nga tikoà mì 'an kjinchrobàt'aà-na nga 'an sindaà-na.

⁴¹ Isaías, koií k'oaá s'ín kiichja-ne nga jyeé kijtseè jè kjoa jeya-la Jesús nga it'aà ts'eé kiichja.

⁴² Nas'ín koatsò 'én koi, kjin xita judío kòkjeiín-la it'aà ts'e Jesús, skanda kòkjeiín i'nga-la xi xita sko-la. Tanga mìtsà jngoò k'a tsakó yijo-la nga jye kòkjeiín-la it'aà ts'e Cristo; nga jñà tsakjón-la jñà xita fariseo, tsà ya kochrjekàjìin ni'ya òngo sinagoga.

⁴³ Jè xi mejèn-la nga isa ndaà kítsajna nga nguixkon xita mì k'oa-ne koni nga nguixkon Nainá.

'Én xi kiichja Jesús, nga jè koìndaàjìin-la xita

⁴⁴ Jesús 'ño kiichja kitsò:

—Jè xi mokjeiín-la it'aà ts'an, mìtsà tà it'aà ts'an mokjeiín-la, tikoáà mokjeiín-la it'aà ts'e Na'èn-na xi jè kisikasén-na.

⁴⁵ Jè xi beèxkon-na, tikoáà beèxkon-né jè xi kisikasén-na.

⁴⁶ An xi síhiseèn-la xita, koií xá j'i-na i isò'nde, nga ngats'iì xita xi kòkjeiín-la it'aà ts'an, mì ya kítsajnajìin jìin jñò.

⁴⁷ Jè xi 'nchré 'én-na kò mìki síkitasòn, mìtsà 'an tsjaà-la kjo'in nga mìtsà koi xá j'i-na nga kjo'in tsjaà-la xita isò'nde, koií xá j'i-na nga kochrjekàjñà kjo'in xita isò'nde.

⁴⁸ Jè xi ochrjekàngui-na nga mìki kjoétjò 'én-na, tjín xi tsjá-la kjo'in. Jè 'én xi jye 'an kichjà, jè tsjá-la kjo'in k'e nga kjoehet'aà nachrjein.

⁴⁹ K'e nga chjà, mìtsà tà kjohítsjeèn ts'an síkjeén, jè Na'èn-na xi kisikasén-na kitsjaà-na okixi kós'ín chjà koà mé 'én xi kokoòya.

⁵⁰ Be-ná jè kjotíxoma-la Na'èn-na, jè xi tjín-la kjoabinachon nita kjé-ne. Jñà 'én xi 'an chjà, k'oaá s'ín chjà koni s'ín tsatíxoma-na Na'èn-na.

13

K'e nga jè Jesús tsanjno ndsoko xita xi kota'yàt'aà-la

¹ Chibaá nachrjein chija-isa nga kitjo s'eí Paxko ts'e xita judío. Jesús jyeé tíjìin-la nga jye ijchò nachrjein nga síkìjna isò'nde nga jye tífiko-ne Na'èn-la. Tanga Jesús tjòkèè kijtseè yije xita-la i isò'nde kóni skanda jyehet'aà nachrjein-la.

² K'e nga jye kòjñò, Jesús tíkjèn-kò xita-la, kò jè xita neí jyeé k'oaá s'ín tsibìjìin inima-la jè Judas Iscariote, ti-la Simón, nga jè sìngatsja Jesús it'aà ts'e xita kondra-la.

³ Jesús jyeé tíjìin-la nga jè Na'èn-la kisìngatsja yije kjoa nga jè kotíxoma-la nga it'aà ts'e Nainá inchrobà-ne kò tije tífiko òjngoò k'a-ne.

⁴ Jesús tsasítjen-t'aà ímíxa, jaàxìn nàchro xi kisòn-'nga-la, kiskoé jngoò nikje toalla, tsibíkjá ndáyá-la.

⁵ Ikjoàn kiskoé jngoò tina, tsibíya nandá, tsibíts'ia nga tsaníjno ndsoko xita xi kota'yàt'aà-la, ikjoàn kisixijno-ne jè nikje toalla xi tíkjá ndáyá-la.

⁶ K'e nga ijchò kasit'aà-la Simón Pedro nga mejèn-la koníjno ndsoko, Simón kitsò:

—Na'èn, ¿a ok'ín-na nga jì konìjnoi ndsokoaà?

⁷ Kiichja Jesús, kitsò:

—I'ndeì mikiì machiya-lè mé kjoa xi tìs'iaàn, tanga koma iskan, k'ée kochiya-lè.

⁸ Jè Pedro kitsò:

—Mikiì tsjaà'nde nga ndsokoaà konìjnoi.

Jesús kitsò-la:

—Tsà mikiì kónijnoa ndsokoiì mìtsà xita ts'an xán-lè.

⁹ K'ée kitsò Simón Pedro:

—Na'èn, mìtsà tà ndsokoaà tanìjnoi, tìkooá tanìjnoi ndsaa ko skoaà.

¹⁰ Kiichja Jesús kitsò-la:

—Jè xi jye tsangàya, tà jè ndsoko mochjeén nga saníjno, nga jyeé tsjeè yije yijo-la. Jñò, tsjeè kjoàn nas'ín mìtsà kóhotjiòn.

¹¹ Jesús koií k'oas'ín kitsò-la: “Mìtsà tà ngats'ioò nga tsjeè kjoàn”, nga jyeé tíjìn-la yá-né xi sìngatsja it'aà ts'e xita kondra-la.

¹² K'e nga jye tsaníjno ndsoko jñà xita-la, tsohòkjá-ne nàchrokisòn-'nga-la. Tsibìjnat'aà-ne ímíxa, kitsò-la:

—¿A machiyaá-nò kjoa xi kàsìlko-nò?

¹³ Jñò, k'ooá bixón nga Maestro ko Na'èn 'mì-ná. Ndaà bixón, kixí kjoa xi 'mì-ná.

¹⁴ 'An, xi Maestro ko Na'èn 'mì-na, kònijnoa ndsokoò, jñò tìkooá mochjeén-né nga k'oa tìs'ín tanìjnoò ndsoko xinguiòo.

¹⁵ 'An, k'ooá s'ín kijna jngoò-nò xkòsòn mé-ne jñò k'oa tìs'ín tìkoo xinguiòo koni s'ín kàsìlko-nò.

¹⁶ Ngui kjoa kixí xi xan-nò, jè xi ch'nda tíjna, mìtsà jè tíjna ítjòn-la nei-la. Tìkoo jè xi satíxá-la mìtsà jè tíjna ítjòn-la jè xi otíxá-la.

¹⁷ I'ndeì nga jye machiya-nò kjoa koi, mé ta ndaà-nò tsà k'oas'ín sikitason nga kos'ín s'een.

¹⁸ 'Mìtsà ngats'ioò k'oatixan-nò; bexkon-ná jñà xita xi 'an jaàjñaà. Mochjeén-né nga kàtitason koni s'ín tíchja Xojon-la Nainá nga tsò: “Jè xi kjèn-ko-na, tíjè-ne xi kondra kùtjìngui-na.”

¹⁹ Tibenojmí-nò kjoa koi k'e nga tìkj'eè k'oa ma, mé-ne k'e nga jye k'oas'ín koma, kòkjeiín-nò nga 'an-ná [xi Nainá].

²⁰ Ngui kjoa kixí xi xan-nò, jè xi skoétjò xita xi 'an sìlkasén, 'aán skoétjò-na; ko jè xi skoétjò-na, jè skoétjò jè xi kisìkasén-na.

Kó kitsò Jesús k'e nga tsibenojmí nga jè Judas sìngatsja xita kondra-la (Mateo 26:20-25; Marcos 14:17-21; Lucas 22:21-23)

²¹ Jesús k'e nga jye okitsò, 'ñó jchán kokájno-la; jngoò k'a kiichja, kitsò:

—Ngui okixí xi xan-nò, ì tíjnajìn jngoò-nò xi sìngatsja-na it'aà ts'e xita kondra-na.

²² Jñà xita xi kota'yàt'aà-la, xki xi ján kiskoò'an xíkjín nga mikiì tíjìn-la yá-ne xi otítsò-la Jesús.

²³ Jngoò xita xi kota'yàt'aà-la Jesús ya tíjnakjoòko k'e nga nchikjèn, jè xita-la xi jè Jesús 'ñó matsjakeè.

24 Jè Simón Pedro, kitsjaà-là seña jè xità xíkjin xi ya tíjnakjoòko Jesús nga skonangui-là yá-né xi otítsò-là.

25 Jè xità jè, isa 'nó tsibìjnat'aà chraña-là; kiskònangui-là, kitsò-là:

—Na'èn, ¿yá-né xi otì'mì-là?

26 Kiìchja Jesús kitsò:

—Jè xi tsjaà jngoò-là inchrájin 'nchi, jè-né xi otìxan-là.

K'eé kitsjaà-là jè Judas Iscariote, ti-là Simón.

27 Jè xità neí nitoón jahas'en-jìin inima-là Judas k'e nga kiskoé inchrájin. Jesús kitsò-là:

—Jè kjoa xi s'iin xátíya kot'iin.

28 Jñà xità xi títsajnat'aà ímíxa xi nchikjèn, nijngoò xi kjòchiya-là mé-ne kos'ín kitsò-ne Jesús.

29 Tjín i'nga xità xi k'oas'ín kisikítsjeèn; maá-là tsà títsò-là Jesús: “Tsojmì tìndí xi ts'e s'eí.” O tsà títsò-là: “Ton tjiì chiba-là xità ima.” Nga jè Judas ngatsja chijtsa ton.

30 Judas, k'e nga jye tsakjèn inchrájin, nitoón itjo ni'ya; kiì; nga jye jñò choòn.

Kjotíxoma xitse xi kitsjaà Jesús

31 K'e nga jye itjo ni'ya Judas nga kiì, Jesús kitsò:

—I'ndeí, jè Ki'ndí-là Xità, jyeé jeya tíjna. Tìkoá Nainá jyeé jeya tíjna it'aà ts'e Ki'ndí-là.

32 Nainá tsà jeya tíjna it'aà ts'e Ki'ndí-là, tije-ne Nainá jeya sikkíjna Ki'ndí-là. Nitoón jcha-là kjoa jeya-là.

33 Jñò, xi ndí ixti-na xan-nò, mìtsà tì tse kótijnako isa-nò. Jñò, kinchátsji-ná tanga k'oáá xan-nò koni kixan-là jñà xità judío: Ya ñánda tífia, jñò, mìkiì koma konguió.

34 Jngoò kjotíxoma xitse tsjaà-nò: Tìtsjacha xinguió nga jngoò ijngoò. K'oas'ín tìtsjacha xinguió koni s'ín 'an kisìtsjakeè-nò.

35 Tsà k'oas'ín sìtsjacha xinguió nga jngoò ijngoò, k'oáá s'ín skoe-ne ngats'iì xità nga kixi kjoa nga ya chità'yàt'aà-ná.

'Én xi kiìchja Jesús nga jè Pedro kjó'mat'in

(Mateo 26:31-35; Marcos 14:27-31; Lucas 22:31-34)

36 Simón Pedro kiskònangui-là Jesús, kitsò-là:

—Na'èn, ¿ñánda tì'mì?

Jesús, kitsò-là:

—Ya ñánda tífia, mìkiì koma kjítjìngui-ná xi kjoa niton, tanga k'e nga koma iskan, komaá kjítjìngui-ná.

37 Simón Pedro kitsò-là:

—Na'èn, i'ndeí, ¿mé-ne mìkiì koma kjítjìngui-lè? Tíjngoò takoàn nga 'an kiyá ngajo-lè.

38 Jesús kiìchja, kitsò-là:

—¿A kixi kjoa nga tíjngoò takoàn nga jì kiyá ngajo-ná? Ngui okixi xi xan-lè, k'e nga tìkj'eè kjindáya kóxtí, jàn k'a tsjá'mat'in-ná nga mìkiì yaxkon-ná.

14

Kó s'ín koma nga ma kijchoáa ya ñánda tíjna Na'èn-ná

1 'Kì makájno-nò. Kàtakjeiín-nò it'aà ts'e Nainá, tìkoá kàtakjeiín-nò it'aà ts'an.

2 Ján ni'ya-là Na'èn-na tjín jchán i'nde ñánda ma nìkjáya. Tsà mì kixi kjoa nga k'oas'ín tjín, mì-la tsà tà chja k'oá xán-nò nga tífikindaà-nò jngoò i'nde xi tsajòn.

³ Koni s'ín kjián nga kındaà-nò ì'nde, k'oaá tís'ín kjoiaa ìjngoò k'a nga kjīko-nò, mé-ne ya ñánda kótijna, t̄ikoa ya k̄itsajna_{ko}-ná.

⁴ J̄ñò jyeé 'yaà kós'ín fi ndiyá ñánda t̄ifia.

⁵ Tomás kitsò:

—Na'èn mìkiì 'ya-jen ñánda t̄i'mì. ¿Kós'ín jcha-najen ndiyá?

⁶ Jesús kitsò-la:

—'An-ná xi ndiyá, 'an-ná xi kjoakixi, 'an-ná xi kjoabinachon. Tajngoò ìt'aà ts'an koma kijchò j̄ñò ñánda tíjna Na'èn-ná.

⁷ J̄ñò, tsà yaxkon-ná, t̄ikoa jchaxkon-nò Na'èn-na. Tanga ì'nde, jyeé yaxkon k̄o t̄itsach̄itsejèn-la.

⁸ Felipe kitsò:

—Takó-nájen yá-ne xi Na'èn 'mì. Ta k'oaá t̄jín xi kojngoò-ne takòn-jen.

⁹ Jesús kiichja kitsò-la:

—Ji Felipe, kjòtseé t̄jnakò-nò, ¿a tà kj'eè yaxkon-ná? Jè xi jye kijtseèxkon-na, jyeé kijtseèxkon Na'èn-na. ¿Mé-ne kosi-ne: “Takó-nájen xi Na'èn 'mì”?

¹⁰ ¿A mì mokjeiín-lè nga 'an, yaá t̄jnakooa Na'èn-na, koa jè Na'èn-na ya t̄jnakò-na? J̄ñà 'én xi 'an chjàkò-nò, mìtsà kjoh̄itsjeèn ts'an; jè Na'èn-na xi t̄jnakò-na, jè-né xi t̄isíxá ìt'aà ts'an.

¹¹ Kàtakjeiín-nò nga 'an ya t̄jnakooa Na'èn-na, k̄o jè Na'èn-na ya t̄jnakò-na. Tsà mìkiì mokjeiín-nò ìt'aà ts'an, nas'ín tà jè kàtakjeiín-nò ìt'aà ts'e xá-na xi 'an t̄is'iaàn.

¹² Nguì okixií xi xan-nò, jè xi mokjeiín-la ìt'aà ts'an, t̄ikoaá komaá-la s'jìn xá xi 'an s'iaàn; skanda isaá tsato s'jìn, nga 'an, ján t̄ifia ñánda tíjna Na'èn-na.

¹³ Nita mé xi sijé-la Na'èn-na xi ìt'aà ts'an, 'an s̄ikitasoàn, mé-ne jè Na'èn-na jeya kíjna-ne ìt'aà ts'e Ki'ndí-la.

¹⁴ Tsà mé xi sijé ìt'aà ts'an, 'an, s̄ikitasòn-ná.

K'e nga jè Jesús kitsjaà 'én-la nga s̄ikasén jè Inima Tsjeè-la Nainá

¹⁵ J̄ñò, tsà matsjacha-ná t̄ikitasòn kjot̄ixoma-na.

¹⁶ 'An, kitsi'bà-la Na'èn-na nga k̄atasikasén jngoò-nò jè xi kos̄iko-nò, mé-ne kjit'aà nachrjein kíjnakò-nò.

¹⁷ Jè xi s̄ikasén-nò Na'èn-na, jè Inima Tsjeè-la xi nguì kjoa kixi. J̄ñà xita isò'nde, mìkiì koma skoétjò nga mìkiì beèxkon, tanga j̄ñò yaxkon-nò nga ya t̄jnakò-nò, ko yaá kíjnajiìn inima-nò.

¹⁸ Mìkiì s̄ikitsajna jchan-nò, kjoikon ìjngoò k'a-nò nga kótijnakò-nò.

¹⁹ Tà chibaá nachrjein chija-la nga j̄ñà xita isò'nde mì t̄i kiì skoexkon-na; tanga j̄ñò jchaxkon-ná; t̄ikoaá k̄itsajnakon-nò nga 'an t̄jnakon-ná.

²⁰ K'e nga kijchò nachrjein jè, jcha-nò nga yaá t̄jnakooa Na'èn-na, koa j̄ñò yaá t̄itsajnakò-ná, k̄o 'an yaá t̄jnakò-nò.

²¹ Jè xi t̄jjiìn-la kjot̄ixoma-na t̄ikoaá s̄ikitasòn-né, jè-né xi matsjakeè-na. K̄o jè xi matsjakeè-na t̄ikoaá k̄otsjakeè Na'èn-na. 'An, t̄ikoaá matsjakeè-ná koa kokoò tsejèn-la yijo-na.

²² Kiskònangui Judas (mìtsà jè Iscariote). Kitsò-la:

—Na'èn kós'ín koma nga tà ngajen k̄okótsejèn-nájen yijo-lè nga mìtsà j̄ñà xita isò'nde k̄okótsejèn-la yijo-lè.

²³ Kiichja Jesús, kitsò-la:

—Jè xi matsjakeè-na s̄ikitasòn 'én-na; k̄o jè Na'èn-na k̄otsjakeè-né. Na'èn-na k̄o 'an kjinchrob̄achón-nájen; yaá k̄itsajna_{ko}-jen.

²⁴ Jè xi mìkiì matsjakeè-na mìkiì s̄ikitasòn 'én-na. J̄ñà 'én xi j̄ñò t̄itsana'ya, mìtsà ts'an, ts'eé Na'èn-na xi kisikasén-na.

²⁵ 'K'oaá s'ín tibenojmi yije-nò 'én koi k'e nga tákó t̄jnakò isa-nò.

26 Jè xi kosiko-nò, jè Inima Tsjeè-la Nainá xi it'aà ts'an sikkasén-nò Na'èn-na, jè kokòya yije-nò koa sikkitsjeèn-nò ngats'ii 'én xi tixan-nò.

27 "An, tsjaà-nò kjoa'nchán; yaá sikijnajñaà inima-nò. K'oaá s'ín tsjaà-nò koni s'ín 'nchán tijnáa, mitsà k'oas'ín tsjaà-nò koni s'ín tsjá isò'nde. Kì makájno-nò ko kì tsakjoon-jèn.

28 Jñò, jyeé kina'yà koni s'ín tixan-nò nga 'an tífia tanga kjoii ijngoò k'a. Tsà kixi kjoa nga matsjacha-ná, jñò, tikoáá kotsjaá-nò nga xan-nò: Jye tífia ñánda tijná Na'èn-na; nga jè Na'èn-na isaá tijná ítjòn mì k'oa-ne koni 'an.

29 K'oaá s'ín tibenojmí ítjòn-nò kjoa koi, mé-ne k'e nga jye kítasòn, kokjeiín-nò.

30 'Mì tì kii kjìn 'én kichjàko isa-nò. Jyeé nchrobá xita neí xi tíhotíxoma-la jè isò'nde; tanga nímé nga ñó tjin-la nga jè sikkijne-na.

31 K'oaá s'ín kítasòn, mé-ne skoé-ne jña xita isò'nde nga matsjake Na'èn-na nga tìsíkitasoàn kjotíxoma xi kitsjaá-na.

'Tisítjeen, tíkjaán.

15

Jè xi ngui yá-la toò uva ko jña xi chrja-la

1 'Aán ngaya-la yá je-la toò uva; jè Na'èn-na xi síxáko.

2 Ngats'ii chrja-la yá uva xi it'aà ts'an nchrobát'aà-ne xi mìkii ojà-la toò, Na'èn-na otet'aà-né; koa jña xi ojà-la toò, ta sítsjeè-né, mé-ne nga isa ndaà koja-la toò.

3 Jñò, jyeé k'oas'ín kjòtsjeè-nò xi it'aà ts'e 'én xi okixan-nò.

4 Jñò, mochjeén-né nga ya kítsajnakò kjit'aà-ná koa 'an, yaá kótijnako kjit'aà-nò. Jngoò chrja-la yá toò uva, mìkii koja-la toò tsà mìkii 'ñó tjit'aà jè yá je-la. It'aà tsajòn, k'oa tís'ín tjin, nímé xi s'een tsà mì 'an kítsajnakò kjit'aà-ná.

5 "An-ná xi yá je-la toò uva, jñò-nó xi chrja-la. Jè xi 'an kíjnakò kjit'aà-na ko 'an kótijnako kjit'aà, ndaà jchán koja-la toò. Tanga nímé xi s'een tsà títsajnat'aàxìn-ná.

6 Jè xi mitsà 'an kíjnakò kjit'aà-na, k'oaá s'ín tjáxìn koni chrja-la yá xi nímé toò ojà-la; k'e nga jye xì, maxkó-né ikjoàn sinchájiìn ni'ín nga tì.

7 Jñò, tsà ya kítsajnakò kjit'aà-ná, koa tsà kixi kítsajnakoo 'én-na xi 'an tsakoòya-nò, tije nita mé xi mejèn-nò, k'oaá s'ín kítasòn-nò koni s'ín kixón.

8 K'oaá s'ín ma-ne jcha-la kjoajeya-la Na'èn-na k'e nga 'ñó kjìn toò koja-nò ko k'oaá s'ín ma-ne nga 'ya-la nga kixi kjoa nga ya chita'yat'aà-ná.

9 Koni s'ín matsjakeè-na Na'èn-na, jñò, 'an, k'oa tís'ín matsjake-nò. Mochjeén-né nga k'oas'ín títsajnakò kjit'aà kjoa tsjacha-na.

10 Tsà sikitason kjotíxoma-na, yaá kítsajnajñoò kjit'aà kjoa tsjacha-na. 'An, k'oaá tís'ín sikitason kjotíxoma-la Na'èn-na ko yaá tijnajñaà kjit'aà kjoatsjacha-la.

11 Jñò, k'oaá s'ín chjàko-nò mé-ne sijnajìin-ne inima-nò kjotsja xi 'an tjin-na ko ngui ndaà s'e-nò kjotsja.

12 Kjotíxoma-na xi 'an tsjaà-nò, jè-né nga títsjacha xinguiò nga jngoò ijngoò, koni 'an matsjake-nò.

13 Jè xita xi biyaàtji ngajo-la amigo-la, jè-né xi isa 'ñó matsjakeè xíjín.

14 Jñò-nó xi amigo-na xan-nò, tsà sikitason koni s'ín binè-nò.

15 Mì tì chi'nda-na xan-nò nga jè chi'nda mìkii beè mé xi s'ín nei-la. Amigo ts'aán xan-nò nga jyeé tsibenojmíya yije-nò kjoa xi tsakóya-na Na'èn-na.

16 Mitsà jñò kichjaàjiìn-ná, ta saà 'an jaàjiìn-nò. Kitsjaà-nò xá nga konguió mé-ne nga ndaà síxá-nò. Jè xá-nò sijna-né nita kjé-ne, mé-ne k'e nga mé xi sijé-la Na'èn-na xi it'aà ts'an, tsjá-nò.

17 Jè kjotíxoma xi 'ñó tìbìnè-nò: Nga tjòcha jchaa xinguiqo nga jngoò l̄jngoò.

Mé-ne jñà x̄ita isò'nde s̄j̄tikeè-ne x̄ita-la Jesús

18 'Jñò, tsà s̄j̄tikeè-nò jñà x̄ita isò'nde, k̄atasij̄in-nò nga 'an, k'oaa s'ín kis̄j̄tikeè ítjòn-na.

19 Jñò, tsà tákó ya titsaj̄najīin-là x̄ita isò'nde, jñà x̄ita isò'nde kotsjakeé-nò koni s'ín matsjakeè x̄ita x̄ikj̄in. Tanga jñò, mìtsà t̄i i-ne isò'nde tsajòn. 'An jaaj̄in-nò nga tsachrjekàj̄in-nò kjoa xi t̄j̄in isò'nde, koí kjoa-la nga maj̄tikeè-nò jñà x̄ita isò'nde.

20 Ndaà t̄ik̄itsjeèn koni s'ín kixan-nò: “Jè xi ch̄i'nda t̄jna, mìtsà is̄a t̄jna ítjòn-la nei-la.” Koni s'ín k̄it̄j̄ingui kondra-na jñà x̄ita, jñò, k'oaa t̄is'ín k̄it̄j̄ingui kondra-nò. Tsà kis̄ik̄itasòn 'én-na, t̄ikoaá s̄ik̄itasòn tsajòn.

21 Ngats'ì kjoa koi, k'oaa s̄ik̄o-nò jè ngat̄j̄i-la it'aà ts'an nga mìk̄i beèxkon jè xi kis̄ikasén-na.

22 'An, tsà mì-la k̄i j'iaa k̄o tsà mì-la k̄i tsohókoa, n̄i mé-la jé t̄j̄in-la. Tanga i'nde, mì t̄i k̄i koma k̄os̄ik̄o-ne yijo-la kjoa ts'e jé-la.

23 Jñà x̄ita xi 'an maj̄tikeè-na, t̄ikoaá maj̄tikeè Na'èn-na.

24 N̄imé-là jé t̄j̄in-la jñà x̄ita tsà mì-la k̄i k̄it̄seè jñà k̄joxkón xi 'an kis'iaàn xi n̄i saá jngoò x̄ita k'oas'ín s'ín. Tanga jyeé k̄it̄seè k̄joxkón xi 'an kis'iaàn, tanga tákó maj̄tikeè-na t̄ikoa maj̄tikeè Na'èn-na.

25 K'oas'ín tíma nga t̄ibitason 'én xi t̄j̄it'aà Xojon-la Nainá xi kota'ya x̄ita koi, nga tsò: “T̄is̄j̄tikeè-na nas'ín n̄i mé kjoa t̄is̄ikoa.”

26 'Tanga k'e k̄it̄jojen jè xi k̄os̄ik̄o-nò, xi 'an s̄ikasén it'aà ts'e Na'èn-na, jè In̄ima Tsjeè-la Nainá xi nguì okixi, xi it'aà ts'e Na'èn-na nchrobá-ne, jè tsjá 'én it'aà ts'an.

27 Jñò, t̄ikoaá k'oioo 'én it'aà ts'an nga yaá titsaj̄nako-ná kóni nga tàts'en-la kjoa.

16

1 'K'oas'ín t̄ibenojmí-nò kjoa koi mé-ne nga mìk̄i k̄inchat'aàxìn-nò nga mokjeīin-nò it'aà ts'an.

2 Kochrjekàj̄in-nò ya ni'ya ingo sinagoga. T̄ikoa k̄ijchò nachrjein k'e nga n̄ita yá-ne xi s̄ik̄'en-nò k'oaa s'ín s̄ik̄itsjeèn nga Nainá nchisíxá-la.

3 Koí kjoa-la nga k'oas'ín s'jin-ne nga mìk̄i beèxkon Na'èn-na, t̄ikoaá 'an mìk̄i beèxkon-na.

4 Koí k'oas'ín t̄ixan-nò mé-ne k'e nga k̄ijchò nachrjein k̄ītsjeèn-nò nga jyeé tsibenojmíya yije-nò. K'e nga sa ítjòn, mìk̄i okixan-nò nga yaá t̄j̄nako-nò.

Xá xi s'ín In̄ima Tsjeè-la Nainá

5 'Tanga i'nde, jyeé t̄ifiko-na jè xi kis̄ikasén-na. Jñò, n̄jngoò chjinangui-ná, ñánda t̄ifia.

6 Tà saá kjoaba t̄j̄in in̄ima-nò, jè ngat̄j̄i-la koni t̄ixan-nò kjoa koi.

7 'Én kixi xi t̄ixan-nò; k̄jondaà tsajòn-nò nga k̄jián. Tsà mìk̄i k̄jián, mìk̄i koma k̄it̄jojen jè xi k̄os̄ik̄o-nò nga i k̄j̄nako-nò. Mochjeén-né nga k̄jián mé-ne nga koma s̄ikasén-nò.

8 K'e nga k̄it̄jojen jè xi k̄os̄ik̄o-nò, jè s̄ik̄ichiya ndaà-la x̄ita isò'nde kjoa ts'e jé, k̄o kjoa xi kixi t̄j̄in k̄o nga s̄indaaj̄in yá xi k̄oko-la kjo'in.

9 Jè s̄ik̄ichiya ndaà-la x̄ita isò'nde xi kjoa ts'e jé nga mìk̄i mokjeīin-la it'aà ts'an.

10 K̄o s̄ik̄ichiya ndaà-la x̄ita it'aà ts'e kjoa xi kixi t̄j̄in, nga 'an jyeé t̄ifia ñánda t̄jna Na'èn-na. Jñò, mì t̄i k̄i jchaxkon-ná.

11 K̄o s̄ik̄ichiya ndaà-la x̄ita nga s̄indaaj̄in-la yá xi k̄oko-la kjo'in, koi kjoa-la nga jè x̄ita neí xi t̄ihotíxoma-la isò'nde jye k'oas'ín t̄j̄inè-la nga kjo'in s'e-la.

¹² 'Kjìn jchán kjoa tjin ìsa xi k'ejí xi koxán-nò tanga i'ndeí mìkì tìtsajnándaà nga kjoahas'en-jìin-nò.

¹³ K'e nga kítjojen jè Inìma Tsjeè-la Nainá xi nguì kjoa kixì, jè sìikixiya ndaà-nò xi nguì kjoa kixì nga mìtsà kjohítsjeèn ts'e sìikjeén k'e nga kichja. K'oaá s'ín kichja koni s'ín tjin kjoa xi 'nchré. Keènojmi-nò kjoa xi s'e k'e nga koma iskan.

¹⁴ Jè jeya sìikijna-na k'e nga tjoé-la 'én-na ikjoàn kòkòya-nò.

¹⁵ Ngats'ì xi tjin-la Na'èn-na, tikoáá ts'an-ná. Koií k'oa xan-nò nga jè Inìma Tsjeè-la Nainá tjoé-la 'én xi ts'an, ikjoàn kòkòya-nò.

Mé-ne jè kjoba, kjotsjaá koma-ne

¹⁶ 'Jñò, tà chibaá nachrjein chija nga mì tì kù jchaxkon-ná; xi koma jò jàn nachrjein ìjngò k'a jchaxkon ìjngò k'a-ná nga jè tìfikoaa Na'èn-na.

¹⁷ Xità xi kota'yàt'aà-la k'ée kitsò-la xíkjin:

—Kó tsòya-ne 'én xi tsò-la: tà chibaá nachrjein chija-la nga mì tì kù jchaxkon-ná, xi koma jò jàn nachrjein, ìjngò k'a jchaxkon-ná nga jè tìfikoaa Na'èn-na.

¹⁸ Kitsò-la xíkjin:

—¿Kó tsòya-ne 'én xi tsò-la: “Ta chibaá nachrjein chija”? Mìkì fiya-ná koni s'ín chja.

¹⁹ Jesús, tik'eé kjòchiya-la nga jñà xità-la mejèn-la skonangui-la kó tsòya-ne 'én xi kùichja. K'ée kitsò-la:

—¿A tìtsachjinanguí-la xinguiòo kó tsòya-ne koni s'ín kàxan-nò: Tà chibaá nachrjein chija-la nga mì tì kù jchaxkon-ná, xi koma jò jàn nachrjein ìjngò k'a jchaxkon-ná?

²⁰ Nguì okixí xi xan-nò, jñò, ba s'e-la inìma-nò, jchìhindáya-nò, tanga jñà xità isò'nde tsjaá s'e-la inìma-la. Jñò, nas'ín ba s'e-nò, jè kjoa ba-nò, nga koma iskan, kjoa tsjaá koma-ne.

²¹ Jngò chjoón, k'e nga chóya nachrjein-la nga 'beé ki'ndí, tse kjo'in síkjeín. Tanga k'e nga jye ts'ìn jè ki'ndí, mì tì kù síkìtsjeèn-ne kjo'in xi kasíkjeín jè chjoón. Tà saá tà kjotsjaá s'e-la nga jngò xità kats'ìn ì isò'nde.

²² Okixì-né it'aà tsajòn, i'ndeí, ba tjin-nò, tanga koma iskan, k'e nga skoexkon ìjngò k'a-nò, k'e-né nga 'ñó tsja koma-la inìma-nò. Jè kjotsja-nò niyá xi kjoááxìn-nò.

²³ 'K'e nga kijchò nachrjein nga jchaxkon ìjngò k'a-ná, nímé xi chjinangui-ná. Okixí xi xan-nò, nità mé xi sijé-là Na'èn-na xi it'aà ts'an, tsjá-nò.

²⁴ Skanda i'ndeí, ni sà mé xi nìjé xi it'aà ts'an; tije, tjoé-nò, mé-ne nga nímé xi chijat'aà-la kjotsja xi tjin inìma-nò.

Mé kjoa-ne nga Jesús jye kisikijne-la kjoa xi tjin isò'nde

²⁵ "Én xi tìchjàkò-nò, tà kjoa mangásòn-né tìsikjeén. Tanga kijchò nachrjein k'e nga mì tì kù kjoa mangásòn kichjàkò-nò. Kènojmi kixí-nò it'aà ts'e Na'èn-na.

²⁶ Nachrjein jè, jñò, it'aà ts'aán sijét'aà-là Na'èn-na. 'An, mì tì kù kítsi'ba-tjì-nò xi it'aà tsajòn,

²⁷ nga jè sobà Na'èn-na matsjakeè-nò. Koií matsjakeè-nò nga jñò, tikoáá matsjacha-ná kò mokjeín-nò nga it'aà ts'e Nainá inchrobà-na.

²⁸ Yaá itjokàt'aà-la Nainá nga inchrobà ì isò'nde. I'ndeí sìikijna-ná isò'nde, tìfikoó ìjngò k'a-na Na'èn-na.

²⁹ Jñà xità xi kota'yàt'aà-la kitsò-la:

—I'ndeí, tinokjoà kixì-né, nímé kjoa mangásòn tìnkjín.

³⁰ I'nde_i, jyeé 'ya-jen nga ji machiya yijeé-lè nita mé kjoa-ne. Mikii mochjeén tsà yá xi skonangui-lè. K'oaá ma-ne nga mokjeiin-najen nga it'aà ts'e Nainá inchrobà-ne.

³¹ Kiichja Jesús, kitsò-la:

—I'nde_i, ¿a mokjeiin-nò?

³² Jyeé kjomeè bijchó hora, tijè-ne hora jè, jñò, tsjohoba-nò nga jngoò lingoò; ongui-nò ni'ya-nò; tajngoò sikijna-ná. Tanga mitsà tajngoò tijná, jè tijnako-na Na'èn-na.

³³ K'oaá s'ín tichjàko-nò mé-ne it'aà ts'an s'e-nò kjoa'nchán. Koá i isò'nde kjo'íin s'e-nò, tanga 'ñó t'è-là takòn. 'An, jyeé kisikijne-la jñà kjoa xi tjin isò'nde.

17

K'e nga jè Jesús tsibítsi'batji jñà xita xi kota'yàt'aà-la

¹ Jesús, k'e nga jye k'oas'ín kiichja, kiskoótsejen ngajmii, kitsò:

—Na'èn, jyeé ijchò hora-la, jeya tikijni Ki'ndí-lè, mé-ne jè Ki'ndí-lè tikoá ngaji, jeya sikijna-lè,

² koni s'ín kits'ii-la kjoatixoma Ki'ndí-lè it'aà ts'e ngats'ii xita nga tji'nde-la nga tsjaà-la kjoabinachon nita kjé-ne ngats'ii xita xi ji kits'ii-la.

³ Jè kjoabinachon xi tjin nita kjé-ne, jè-né nga skoexkon-lè, nga ta ji tajngoò-né xi kixi kjoa nga Nainá 'mì-lè, tikoá skoexkon Jesucristo xi Ki'ndí-lè xi xó ji kinikasén-ne.

⁴ 'An, jeya kisikijna-lè i isò'nde, nga jyeé kisjngoaa xá xi ji kiningsatsja-ná.

⁵ Na'èn, i'nde_i, k'oas'ín jeya tikijna-ná nga nguixkoiin koni tjin kjoa jeya xi kis'e-na nga tsohótijnat'aà-lè k'e nga tikj'eè sindaà isò'nde.

⁶ Jñà xita isò'nde xi xó ji kichjaajijn-ne nga 'an kiningsatsja-ná, jyeé tsi-benojmí-la it'aà tsiji. Xita tsiji-né, nga ji kits'ii-ná, ko nchisikitasòn-né koni tsò 'én-lè.

⁷ Jñà xita koi, i'nde_i, jyeé beè nga ngats'ii kjoa xi 'an kits'ii-ná, it'aà tsiji nchrobá-ne.

⁸ 'An, tsibenojmí-la jñà 'én xi ji kits'ii-ná; jñà xita koi, jahas'en-jijn-la; jyeé kijtseè nga kixi kjoa nga it'aà tsiji inchrobà-na. Mokjeiin-la nga ji kinikasén-ná.

⁹ Jñà xita koi, bitsi'batjià. Mitsà jñà xita isò'nde bitsi'batjià; tà jñà-né xi ji kits'ii-ná, nga xita tsiji-né.

¹⁰ Ngats'ii xita xi ts'an, tikoá tsiji-né, koá jñà xita xi tsiji, tikoáá ts'an-ná. It'aà ts'eé xita koi, nga jeya otijna.

¹¹ 'An, mì ti kii tse kótijna-na i isò'nde; tanga jñà xita koi, jí kítsajna isò'nde. 'An, yaá tifikon-lè nga ya kótijnako-lè. Na'èn tsjeè, ndaà tikindii xita koi nga ko nga'ño-lè, tijè-ne nga'ño xi ji kits'ii-ná mé-ne nga ndaà kítsajnajtín-ne koni jñà ndaà titsajnakjoaa ngaji ko 'an.

¹² K'e nga tsohótijnakoaa i isò'nde, ndaà kisikindaa nga ko nga'ño-lè, tijè-ne nga'ño xi ji kits'ii-ná. Nijngoò xi kichjà, tà jé kichjà jè xi k'oas'ín tjinè-la nga k'oas'ín komat'in, mé-ne kítasòn-ne koni s'ín tichja Xojon-lè.

¹³ Tanga i'nde_i yaá tifikon-lè nánanda tijni. Jñà 'én xi tichjà k'e nga tákó i tijná isò'nde, koi-né nga 'ñó ndaà katasijijn inima-la jñà xita-na, jè kjotsja xi tjiijn ts'an.

¹⁴ 'An, jyeé tsibenojmí-la 'én-lè jñà xita-na; tanga jñà xita isò'nde sítikeè-né, koi-né nga mitsà ti xita ts'e isò'nde-ne, tikoáá 'an, mitsà ti i isò'nde chjà-na.

¹⁵ Mitsà xan-lè nga chjàxìn i isò'nde, tà jè-né xi xan-lè nga tikindii it'aà ts'e xita neí.

¹⁶ Koni 'an mitsà i isò'nde chjà-na, tikoáá jñà xita-na mitsà ti i-ne isò'nde chjà-ne.

17 It'aà ts'e kjoa kixi-lè, tsjeè tikítsajni nga nguì xita tsiji kàtama; nga jña 'én-lè, nguì kjoa kixi-né.

18 Ji, koni s'ín kinikasén-ná i isò'nde, 'an, k'oaá tis'ín sikasén jña xita-na it'aà ts'e xita isò'nde.

19 Xi kjondaà ts'e xita-na, 'an, jyeé tsjeè tisingatsja-lè yijo-na mé-ne jña xita-na tikoá tsjeè sisingatsja-lè yijo-la xi it'aà ts'e kjoa kixi-lè.

20 Mitsà tà jña bìtsi'batjià jña xita ts'an; tikoá bìtsi'batji-ná jña xita xi iskan kokjeiin-la it'aà ts'an k'e nga kji'nchré 'én-na xi keènojmi-la jña xita-na,

21 mé-ne ngats'i jña xita koi, tà jngoò koma-ne, koni jña nga jngoò ma-ná koni s'ín tijnako-ná ngaji Na'èn, tikoá 'an tijnako-lè. Jña xita koi, tikoá kàtsajnakò-ná mé-ne jña xita isò'nde kokjeiin-la nga ji kinikasén-ná.

22 Jè kjoajeya xi ji kits'i-ná, 'an, k'oaá tis'ín kitsjaà-la jña xita-na mé-ne nga tà jngoò koma-ne koni jña nga tà jngoò ma-ná.

23 'An tijnakoá jña xita-na ko ji tijnako-ná, mé-ne nga nguì jngoò koma-ne. K'oaá s'ín skoe-ne jña xita isò'nde nga ji kinikasén-ná ko tikoá skoe nga matsjachi jña xita-na koni s'ín matsjacha-ná 'an.

24 Na'èn, koi xi mejèn-na nga jña xita xi ji kits'i-ná ya kítsajnakò-na ñánda kótijna, mé-ne nga skoe-ne kjoa jeya-na xi ji kits'i-ná nga tikoá matsjacha-ná skanda k'e nga tikj'eè sindaà isò'nde.

25 Na'èn xi xita kixi 'mì-lè, jña xita xi tjin isò'nde, mìkì beèxkon-lè, tanga 'an, beèxkoòn-lè. Tikoá jña xita xi ji kits'i-ná jye kisijin-la nga ji kinikasén-ná.

26 Jña xita-na jyeé tsibenojmi yije-la it'aà tsiji; táko saá kènojmi isa-la mé-ne jè kjoatjòcha xi tjin-lè it'aà ts'an, tikoá s'e-la jña xita koi, koá 'an sobà kótijnajña inima-la.

18

*Kós'ín komà k'e nga kitsobà'ño Jesús xita kondra-la
(Mateo 26:47-56; Marcos 14:43-50; Lucas 22:47-53)*

1 Jesús k'e nga jye okitsò, ikjoàn itjo, kiìko xita xi kota'yàt'aà-la ján xijngoaà xajngá nandá xi 'mì Cedrón. Ya kijna jngoò i'nde ñánda kjìn skaya tsojmì títje; yaá jahas'en-jìn Jesús ko xita-la.

2 Judas, xita xi sisingatsja Jesús it'aà ts'e xita kondra-la, jyeé beèxkon i'nde jè, nga Jesús, kjìn k'a ya chixoñako xita xi kota'yàt'aà-la ya i'nde jè.

3 Judas, kjìn soldado ijchòko, tjìko xita xi síkinda ingo xi jña kisisikásén xita sko-la no'mi ko xita fariseo; 'ya ni'ín linterna, 'ya kichá ndojò, 'ya ni'ín nicha.

4 Jesús, nga jyeé tjin yije-la kjoa xi komat'in, nitoón itjo, kitsò-la:

—¿Yá xi binchaàtsjioò?

5 Xita koi, kitsò:

—Jè Jesús xi Nazaret i'nde-la.

Jesús kitsò-la:

—'An-ná.

Judas, xita xi tisingatsja Jesús, tikoá ya tsóbajin-la.

6 K'e nga kitsò Jesús: “'An-ná”, xita koi, kiì-ne íts'in, chixòt'aà nangui.

7 Jesús, jngoò k'a kiskònangui-la kitsò-la:

—¿Yá xi binchaàtsjioò?

Xita koi kitsò:

—Jè Jesús xi Nazaret i'nde-la.

8 Kiichja Jesús, kitsò-la:

—Jyeé, k'oa tixan-nò, 'an-ná. Tsà 'an binchaàtsji-ná, tji'nde-là jña xita-na xi i'nga nga kàtji-ne.

⁹ K'e nga okitsò Jesús, koií tsitasòn 'én xi jè kiichja k'e nga kitsò: “Na'èn, xita xi ji kits'ì-ná, nijngòò kichjà.”

¹⁰ Jè Simón Pedro, 'ya jngòò kichja ndojò; tsachrje; tsajà-là xita xi 'mì Malco, xita chi'nda-là nò'miì ítjòn; tsatet'aà líká kixi-là.

¹¹ Jesús kitsò-là jè Simón Pedro:

—Tikájnàtjò-ne kichja ndojò-lè. Tjaya-ne chrjoa-là. Jè kjoa ts'e kjo'in xi tsjá-na Na'èn-na koni s'ín mejèn-là, ¿a mìtsà tjínè-là nga siikitasoàn?

K'e nga jè Jesús tsibijna nguixkon Anás

(Mateo 26:57-58; Marcos 14:53-54; Lucas 22:54)

¹² Jñà xita soldado kò soldado ítjòn kò xita judío xi síkinda ingo ítjòn, kitsobà'ño Jesús, ikjoàn chinchá na'ño.

¹³ Ítjòn kiiko ján ñánda tíjna ni'ya-là Anás, nga níxáya-là ma jè Caifás xi nò'miì ítjòn tíjna nó jè.

¹⁴ Jè Caifás xi okitsò-là jñà xita judío nga kitsò-là: Mochjeén-né nga tà jngòò xita kàtiyaàtjì-là naxandá.

K'e nga jè Simón Pedro k'oaá kitsò nga mìkiì beèxkon Jesús

(Mateo 26:69-70; Marcos 14:66-68; Lucas 22:55-57)

¹⁵ Simón Pedro tjingui-là Jesús kò jngòò sa xita xi kota'yàt'aà-là Jesús, jè xi beèxkon jè nò'miì ítjòn, jahas'en-kò Jesús ya nditsin ni'ya-là nò'miì ítjòn.

¹⁶ Tanga jè Pedro, ján kiskoòña nditsiaán; yaá tsibijna xotjoa-là ni'ya. Jè xita-là Jesús xi jngòò, k'eé itjo jngòò k'a, kiichja-là jè chjoón xi síkinda xotjoa-là ni'ya, ikjoàn kisikas'en Pedro.

¹⁷ Jè chjoón xi síkinda xotjoa-là ni'ya, kitsò-là Pedro:

—Ngaji, ¿a mìtsà tikoá ya chità'yàt'aà-là xita jè?

Jè Pedro, kitsò:

—Majìn.

¹⁸ Jñà xita chi'nda kò xita xi síkinda ingo nchat'aà-là ni'ín xi jñà tsibítse nga nchisíhiso-là yijo-là nga 'ño 'nchán tíma. Jè Pedro tikoá ya síjna nga tísíhiso-là yijo-là.

Mé 'én xi kiichja Jesús ya nguixkon nò'miì ítjòn

(Mateo 26:59-66; Marcos 14:55-64; Lucas 22:66-71)

¹⁹ Jè nò'miì ítjòn tsibíts'ia nga kiskònangui-là Jesús it'aà ts'e xita xi kota'yàt'aà-là kò it'aà ts'e 'én xi okóya.

²⁰ Kiichja Jesús kitsò-là:

—'An, kichjàjìn osen-là xita nga tíjtsa isò'nde. Kjit'aà nàchrjein tsakoóya ya ni'ya ingo sinagoga kò ya nditsin ingo ítjòn ñánda bixoña yije xita judío. Nímé 'én xi tìchjà 'ma.

²¹ ¿Mé-ne 'an chjinangui-ná? Jñà chjinangui-là xita xi kiì'nchré-na, mé 'én xi tsakoóya-là. Jñà xita koi, ndaà tíjìn-là kó kixan-là.

²² K'e nga jye okitsò Jesús, jngòò xita xi síkinda ingo ítjòn síjnat'aà chraña-là, kisìjts'ìin-t'aà kjin Jesús, kitsò-là:

—¿Mé-ne kòtsò-ne 'én xi nokjoàkoji nò'miì ítjòn?

²³ Jesús kiichja kitsò-là:

—Tsà ch'o tsò 'én xi tìchjà, koatìn-ná, kó xán. Tanga tsà ndaà tsò 'én xi tìchjà, ¿mé-ne ti'bé-ná?

²⁴ Nga k'oa'sín tjít'aà'ño Jesús, jè Anás kisikasén ñánda tíjna jè Caifás jè xi nò'miì ítjòn tíjna koi nàchrjein.

K'e nga jè Pedro jngòò k'a kitsò nga mìkiì beèxkon jè Jesús

(Mateo 26:71-75; Marcos 14:69-72; Lucas 22:58-62)

25 Jè Pedro ya síjnat'aà-la ni'ín nga tísíhiso-la yijo-la; jñà xità koi kiskònangui-la, kitsò-la:

—Ngaji, ¿a mìtsà tìkoà ya chità'yàt'aà-la xità jè?

Jè Simón Pedro tsibìjna'ma, kitsò:

—Majìn, mì yaá kota'yàt'aà-la.

26 Ikjoàn kiskònangui ìjngò-la xità chì'nda-la nò'miì ítjòn; xíkjín ma xità xi jè Pedro tsatet'aà líká-la, kitsò-la:

—Ngaji, yaá kijtseèxkon-lè kò Jesús ya ì'nde ñánda tjín tsojmì tjè.

27 Jè Pedro, ìjngò k'a tsibìjna'mat'in Jesús, ìkjoàn nìtòón kiskindàya kóxtí.

K'e nga tsibìjna Jesús ya nguixkon Pilato

(Mateo 27:1-2, 11-14; Marcos 15:1-5; Lucas 23:1-5)

28 Kìikò-ne Jesús ya ni'ya-la Caifás skanda ján ni'ya osen ts'e xitàxá ítjòn ts'e Roma. Nga jye tís'e isén, jñà xità judío mìkìì jahas'en ni'ya osen koni s'ín tjín kjotíxoma-la nga majìn-la nga sìkìts'ón yijo-la mé-ne koma kokjèn-ne s'eí paxkò.

29 K'oaá komà-ne nga itjo ni'ya osen jè Pilato, kiskònangui-la jñà xità koi, kitsò-la:

—¿Mé kjoà xi ongui-nò xità jè?

30 Jñà xità judío kitsò:

—Tsà nímé jé tjín-la, mì-la jì tìtsanìngatsja-lèjèn.

31 K'eé kitsò Pilato:

—Tanguíkò, jñò tìndaàjìlìn-là koni s'ín tjín kjotíxoma-nò.

Jñà xità judío kitsò:

—Ngajèn mìkìì tjì'nde-najèn nga taxkì s'ik'en jngò-jèn xità.

32 K'oaas'ín komà-ne nga tsitasòn 'én xi kitsò Jesús k'e nga tsibénojímí kós'ín komat'in k'e nga kiyá.

33 Pilato, ìjngò k'a jahas'en ni'ya osen, kùichjā-la Jesús, kitsò-la:

—¿A jì-né xi 'mì-lè xitàxá ítjòn-la xità judío?

34 Kùichjā Jesús, kitsò-la:

—¿A tà kjohítsjeèn tsijì-né nga k'oa tisi, a xi kj'eí xitàá okitsò-lè ít'aà ts'an?

35 Pilato kitsò:

—'An, mìtsà xità judío-ná. Jñà xità naxandá-lè kò xità sko-la nò'miì, jñà xi kòfì síngatsja-na ít'aà tsijì. ¿Mé kjoà xi chinchààtsjì?

36 Kùichjā Jesús kitsò:

—Mìtsà ì isò'nde tjìnè-na nga kotìxoma. Tsà k'oaá-la s'ín tjín jñà xità-na kòsìko-na nga mì ya kongatsja ts'e xità judío. Tanga mìtsà ì kotìxoma.

37 Pilato, ìjngò k'a kiskònangui-la kitsò-la:

—Ngaji, ¿a xitàxá ítjòn 'mì-lè?

Kùichjā Jesús kitsò:

—Ngajíí xi osi nga xitàxá ítjòn 'mì-na. Koií xá kits'ìin-na kò koií xá j'ì-na ì isò'nde, mé-ne nga kènojmiá ít'aà ts'e kjoà kixì. Ngats'ìì xi fìt'aà-la kjoà kixì, 'nchré 'én-na.

38 Pilato kiskònangui, kitsò-la:

—¿Mé-né xi 'mì-la kjoakixì?

K'e nga kitjoònè kjoà Jesús nga kiyá

(Mateo 27:15-31; Marcos 15:6-20; Lucas 23:13-25)

K'e nga jye kiskònangui Pilato, ìjngò k'a itjo ni'ya osen. Kìikon xità judío, kitsò-la:

—Xità jè, nímé jé xi sakót'aà-na ít'aà ts'e.

39 Jñò, k'oaá s'ín tjín kjotíxoma-nò k'e nga bitjo s'eí Paxkò: bijnandeíí jngò xità xi ndayá títajna. ¿A mejèn-nò nga kàtìjnandeíí jè Xitàxá Ítjòn-la xità judío?

⁴⁰ Ìjngoò k'a 'ñó jchán kiìchja kóhótjín x̄ita judío, kitsò:
—Majìn, jè Jesús, mìkì kijnandeí, jè Barrabás kijnandeí.
Tanga jè Barrabás x̄ita chijé-né.

19

K'e nga jñà x̄ita kisijé nga krò kàtasit'aà jè Jesús

¹ Pilato kitsjaà-là òkixi jñà x̄ita soldado nga tsajá-là Jesús.

² Jñà soldado tsibíndaà jngoò corona na'yá, tsibí'a skò Jesús, ìkjoàn kisikákjá jngoò nikje sko.

³ Kitsò-là:

—A ta k'oaá ndaà-ne jì xi x̄itaxá ítjòn-là x̄ita judío 'mì-lè.

Ìkjoàn kisijts'iìn-t'aà kjin.

⁴ Pilato itjokò ìjngoò k'a ya nditsin, kitsò-là jñà x̄ita naxandá:

—Chítsejèn-là, ì j'ìikò ìjngoò k'a-nò mé-ne nga jchà-nò nga nímé jé sakót'aà-na ìt'aà ts'e x̄ita jè.

⁵ Itjo Jesús, tjí'a corona na'yá skò; íkjá nikje xi sko kjoàn; Pilato kitsò-là jñà x̄ita naxandá:

—Ì síjna x̄ita jè.

⁶ K'e nga kijtseèxkon jñà x̄ita skò-là nò'miì kò jñà x̄ita xi síkinda ìngo, tsibíts'ia nga 'ñó jchán kiìchja, kitsò:

—ìTjat'aà krò! ìTjat'aà krò!

K'ée kitsò jè Pilato:

—Jñò, sobà tanguíkòo nga tjat'aà krò. 'An, nímé jé xi sakót'aà-na ìt'aà ts'e x̄ita jè.

⁷ Kiìchja jñà x̄itaxá-là x̄ita judío, kitsò-là Pilato:

—Ngajen, tjín jngoò-najen kjotíxoma; k'oaá s'ín tíchja kjotíxoma tsajen: X̄ita jè, mochjeén-né nga kiyá, koií kjoa-là nga Ki'ndí-là Nainá tsò-là yijo-là.

⁸ Pilato, k'e nga kiì'nchré 'én koi, ìsaá 'ñó ndaà kitsakjòn.

⁹ Pilato, jahas'en ìjngoò k'a ni'ya osen, kitsò-là Jesús:

—¿Ñánda-ne ì'nde-lè?

Tanga Jesús, mìkì kiìchja-là.

¹⁰ Pilato kitsò-là:

—¿Mé-ne mì nokjoà-ná? ¿A mì 'ya-jèn? 'An, tjí'ndeé-na nga kot'aà-lè krò, tìkòo tjí'ndeé-na nga sìikijnandeí-lè.

¹¹ Kiìchja Jesús kitsò-là:

—Nímé-la xi tjí'nde-lè ìt'aà ts'an tsà mìtsà Nainá kitsjaà-lè. Jè x̄ita xi síngatsja-na ìt'aà tsiji, ìsaá tse jé tjín-là mì k'oa-ne koni jì.

¹² Tjè-ne hora, jè Pilato mejèn-là sìikijnandeí Jesús tanga jñà x̄ita judío ìsaá 'ñó kiìchja kitsò:

—X̄ita jè, tsà sìkijnandeí-ne, mìtsà amigo tsiji ma César xi x̄itaxá ítjòn tíjna ts'e Roma. Nita yá-ne xi x̄itaxá ítjòn tsò-là yijo-là, kondra ts'eé César.

¹³ Pilato, k'e nga kiì'nchré 'én koi, kiìkò Jesús ján nditsiaán; tsibijnasòn íxile-là ya ì'nde ñánda 'mì Ìsòn Chrjó Ndajo; Gabatá 'mì nga 'én hebreo.

¹⁴ Ta jngoò nachrjein chija-là ts'e s'eí Paxkò; jyeé kjomeè bijchó nchisen. Pilato, kitsò-là jñà x̄ita judío:

—ì síjna x̄itaxá ítjòn-nò!

¹⁵ Jñà x̄ita judío 'ñó jchán kiìchja kitsò:

—ìKàtabiyaà! ìKàtabiyaà! ìTjat'aà krò!

Pilato kitsò-là:

—X̄itaxá ítjòn-nò, ¿a krò kót'aà?

Jñà x̄ita skò-là nò'miì, kiìchja kitsò:

—Ngajen, tsjìn-najen xitaxá ítjòn xi kj'eií, tà jè tã jngoò César.

¹⁶ Pilato kisìngatsja nga kàtát'aà krò. Jñà xitã koi kiìkò Jesús.

K'e nga kisit'aà krò Jesús

(Mateo 27:32-44; Marcos 15:21-32; Lucas 23:26-43)

¹⁷ Jesús itjo, 'yajen krò-la; yaá kiìkò ya ì'nde ñánda 'mì Ì'nde Skò Mik'en, xi 'én hebreo Gólgota 'mì.

¹⁸ K'e nga ijchòkò ì'nde jè, tsohót'aà krò, kò nguì jò xitã xi kj'eií, íjngó íjngó kisinchaàt'aà-la nga ngobà ngobà. Jè Jesús kisasìjna jngoò osen-la.

¹⁹ Pilato kiskìi 'én xi tsohót'aà skò krò xi tsò: “Jesús xi Nazaret ì'nde-la, Xitaxá ítjòn-la xitã judío.”

²⁰ Jñà 'én koi, kjìn xitã judío tsibíxkejìn; nga ya ì'nde ñánda kisit'aà krò Jesús, yaá chrañàt'aà-la naxandá. 'Én hebreo tjít'aà kò 'én griego, kò 'én latín.

²¹ Jñà xitã skò-la nò'miì ts'e xitã judío, kitsò-la jè Pilato:

—Kì k'oaá s'ín chjiì xi tsò: “Xitaxá ítjòn-la xitã judío.” K'oaá s'ín chjí xi tsò: “Xitã jè, k'oaá tsò nga jè-né xi xitaxá ítjòn-la xitã judío.”

²² Kiìchja Pilato kitsò:

—Koni s'ín jye kàkjiaà, k'oaá s'ín kàtìjna.

K'e nga jñà soldado, kisijòya nikje-la Jesús

²³ Jñà soldado k'e nga jye tsohót'aà krò Jesús, tsibíxkò nikje-la; ñijòn ya kis'iìn. Íjngó íjngó ya kitsjaà-la xíkjín. Tìkoã kiskoé jè nikje ndojò-la xi x'íó kji, mìkiì kitjahaña, tà kijna ndojò-né.

²⁴ Kitsò-la xíkjín:

—Mìkiì sìxajndá; tà siskáko-ná yá ts'e koma.

Jè kjoã koi k'oaá s'ín tsitasòn koni s'ín tíchja Xojòn-la Nainá nga tsò:

Nikje-nã kisika'bí-la xíkjín;

jè nikje ndojò-nã tà kisiskáko-né.

Jñà soldado, k'oaá kis'iìn.

²⁵ Yaá nchat'aà chraña-la krò neã-la Jesús kò ndichja kò María chjoón-la Cleofas kò María Magdalena.

²⁶ Jesús, k'e nga kijtseèxkon neã-la kò jè xitã xi kota'yàt'aà-la xi 'ñó matsjakeè, kitsò-la neã-la:

—Chjoón, ya síjna ki'ndí-lè.

²⁷ Ikjoàn kitsò-la jè xitã xi kota'yàt'aà-la xi 'ñó matsjakeè:

—Yã síjna neã-lè.

Skanda tik'e-ne jè xitã jè kiskoétjò jè neã-la ya ni'ya-la.

K'e nga k'en Jesús

(Mateo 27:45-56; Marcos 15:33-41; Lucas 23:44-49)

²⁸ Xi jye komà, Jesús kijtseè nga jye tsitasòn yije, kitsò:

—Xínda-na.

K'oaá s'ín tsitasòn koni s'ín tjít'aà Xojòn-la Nainá.

²⁹ Yaá tíjna jngoò tíjí xi tjíya nandá vinagre. Kiskoé tsanga, kisika'nchi-ne vinagre, ikjoàn tsibí'a jngoò yá, tsijmeé'a chraña-la tso'ba Jesús.

³⁰ Jesús, k'e nga jye kits'iì nandá vinagre, ikjoàn kitsò:

—Jyeé tsitasòn yije.

Tsibíjnajteén skò, k'en.

Mé-ne kiskíx'akjá-ne nisìn-la Jesús

³¹ Tã jngoò nãchrjein chija-la ts'e s'eí Paxkò; jñà xitã judío majìn-la nga ya sítjobát'aà krò yijo-la xitã xi jye k'en jè nãchrjein nìkjáya (koií kjoã-la nga 'ñó xkón jè s'eí Paxkò). Tsibítsi'ba-la Pilato nga kàtatsjá okixi mé-ne nga

kàtakjàn-ne nindaà chrjomí-la jñà xità xi tjoót'aà krò, ikjoàn kàtakjínájen-t'aà krò.

³² Kii jñà soldado nga tsakján nindaà chrjomí-la jè xi síjna ítjòn; k'oaá ti kisìko jè xi ìjngoò xi ngàsòn taña kisit'aà krò.

³³ Tanga k'e nga ijchò kinchat'aà-la Jesús, kijtseè nga jye k'en. Miki tsakján nindaà chrjomí-la.

³⁴ Tanga jngoò soldado tsibísekjá nisìn-la jngoò kichà xi 'mì lanza. Ikjoàn itjo jní kò nandá.

³⁵ Jè xi kijtseè kjoa koi, jè-né xi tsjá 'én nga kixi kjoa, kò jè 'én xi tsjá, ngui 'én kixi-né, ndaà tíjiin-la nga 'én kixi xi bénojmi, mé-ne jñò tìkooa kòkjeiín-nò.

³⁶ Kjoa koi, k'oaá s'ín komà mé-ne nga tsitasòn-ne koni s'ín tjit'aà Xojon-la Nainá nga tsò: “Nijngoò nindaà-la kòkjàn.”

³⁷ Tìkooa tjit'aà-né ñánda tsò: “Jè skótsejen-la jè xi kiskix'akjá nisìn-la.”

K'e nga kisihijiin Jesús

(Mateo 27:57-61; Marcos 15:42-47; Lucas 23:50-56)

³⁸ K'e nga jye komà kjoa koi, José xi ya naxandá Arimatea i'nde-la, tìkooa jè xità xi kota'yàt'aà-la Jesús tanga tà tsajmeè'ma-né nga jñà tsakjón-la xità judío. Tsibítsi'ba-la Pilato nga kàtatsjá'nde-la nga kjiiko yijo-la Jesús. Pilato kitsjaà'nde-né. José kiskónájen-t'aà krò yijo-la Jesús, ikjoàn kiiko.

³⁹ Tìkooa ijchò Nicodemo, jè xità xi ijchòkon jngoò k'a Jesús k'e nga jñò. 'Ya chijo jne xi tsjájiin-la chijo xi 'mì mirra kò áloe. Ma-la tsà katé kilo chijo xi 'ya.

⁴⁰ José kò Nicodemo, kiiko yijo-la Jesús. Kisikájtéjno nikje xi tjin-la chijo xi ndaà jne koni s'ín tjin kjoatixoma-la jñà xità judío k'e nga sihiijiin mik'en.

⁴¹ Ya i'nde ñánda kisit'aà krò Jesús, tjin jngoò i'nde ñánda títe tsojmì tje; yaá tix'á jngoò ngajo itsjó-la mik'en xi ngui xitse, ñánda ni saà jngoò mik'en sijnaya.

⁴² Yaá kisikájna yijo-la Jesús nga isa chrañat'aà nga jyeé tímats'ia nachrjein nikjáya ts'e xità judío, jè víspera-la s'eí Paxko.

20

K'e nga jaáya-la Jesús it'aà ts'e kjoa biyaà

(Mateo 28:1-10; Marcos 16:1-8; Lucas 24:1-12)

¹ Jè nachrjein nga tàts'en xomàna, jè María Magdalena 'ño tajñòya kii, nga kii katsejen-la itsjó ñánda kisihijiin Jesús; tákó jñò choòn k'e nga kii. K'e nga ijchò, kijtseè nga jye kitjaaxìn ndajo xi tíchjoàjto-ne jè ngajo itsjó.

² K'eé tsangachikon, kiikon ñánda tjna Simón Pedro kò xità xi ìjngoò xi tìkooa ya kota'yàt'aà-la Jesús, jè xi 'ño matsjakeè, kitsò-la:

—Jñà xità, jyeé kiiko jè Na'èn-ná. Miki 'yaá ñánda kisikájna.

³ Pedro kò xità xi ìjngoò xi ngàsòn ya kiskoòta'yàt'aà-la Jesús, kii katsejen-la jè ngajo itsjó.

⁴ Ingajò xità koi, 'ño jchán tsangachikon, tanga jè xi ìjngoò, isaá 'ño tsangachikon mì k'oaá-ne koni jè Pedro. Isaá ítjòn ijchò ya ngajo itsjó-la Jesús.

⁵ K'e nga tsasiña kiskoòtsejen-s'en ngajo, kijtseè nga tà jñà nikje-la kjioò, tanga mikì jahas'en-ngui ya ngajo.

⁶ Ikjoàn ijchò tjingui Simón Pedro, jè-né xi jahas'en-ngui ngajo itsjó, tìkooa kijtseè nga tà jñà nikje-la kjioò.

⁷ Tìkooa kijtseè jè nikje xi kisijtèjiin sko Jesús. Mìtsà ya tsátijiin-la nikje xi i'nga. Xin kijna nga tíxkóya-la.

⁸ K'eé jahas'en-ngui xità xi ìjngoò, jè xi ijchò ítjòn; kijtseè kjoa xi komà, kòkjeiín-la.

⁹ K'èè kii ndaà machiya-la nga k'oas'ín tíchja Xojon-la Nainá nga jè Jesús, k'oaá s'ín tjinè-la nga kjoáaya-la it'aà ts'e kjoabiyaà.

¹⁰ Jñà xita xi kota'yàt'aà-la Jesús, kii-ne ni'ya-la.

*K'è nga jè Jesús tsakó-la yijo-la jè María Magdalena
(Marcos 16:9-11)*

¹¹ Tanga jè María Magdalena, yaá tsibijna nditsiaán nga tíkjindáyat'aà-la ngajo itsjó; k'è nga tíkjindáya tsasiñia nga kiskoòtsejèn-s'en jè ngajo itsjó-la Jesús.

¹² Kijtsee jò àkjale xi nikje chroba íkjá. Jngoò tíjna ya skò ñánda kisijna yijo-la Jesús; jè xi ijngoò ya tíjnangui ndsoko.

¹³ Jñà àkjale, kitsò-la María:

—Ji ndí chjoón, ¿mé-ne tìhìhindáya-ne?

Jè María kitsò:

—Koií tíkjindáya-na, jyeé kiìkò xita yijo-la Na'èn-na; mìkiì be ñánda kisikájna.

¹⁴ María k'è nga okitsò, kisikátji skò, kijtsee Jesús nga ya síjna, tanga mìkiì beè tsà jè-né.

¹⁵ Jesús kitsò-la:

—Ji ndí chjoón, ¿mé-ne chìhindáya-ne? ¿Yá xi binchaàtsji?

Jè María, k'oaá s'ín kisikítsjeèn, maá-la tsà jè xita xi síkinda i'nde jè, kitsò-la:

—Ji na'èn, tsà ji kiìkòji, kot'ìn-ná ñánda kinikájnei mé-ne nga kíkjaá-na.

¹⁶ Jesús kiìchja-la kitsò-la:

—¡María!

Kò jè María, kisikátji, kitsò-la:

—¡Raboni! —'én hebreo xi tsòya-ne: Maestro.

¹⁷ Jesús, kitsò-la:

—Kì 'an nìkò-ná nga k'èè kii fì mijìn-koaa jè Na'èn-na. Tanga t'in tìkí'nchré jñà 'ndsè, kot'ìn-la nga jye tífikoaa jè Na'èn-na jè xi tìkoaa Na'èn-nò ma, jè xi Nainá xan-la, xi tìkoaa Nainá 'mì-là.

¹⁸ María Magdalena kii kisikí'nchré jñà xita xi kota'yàt'aà-la Jesús nga jye kijtsee kon Jesús, tìkoaa tsibénojmi-la 'én xi kiìchja Jesús.

*K'è nga jè Jesús tsakó-la yijo-la jñà xita-la
(Mateo 28:16-20; Marcos 16:14-18; Lucas 24:36-49)*

¹⁹ K'è nga jye kòjñò, tíjè-ne nàchrjein nga tàts'en xomàna, jñà xita xi kota'yàt'aà-la Jesús tíchjoàjto-la xotjoa-la ni'ya ñánda chixoña nga jñà tsakjón-la xita judío. Jesús jahas'en ni'ya, tsasijnajin osen-la xita-la, kisìhixat'aà, kitsò-la:

—¿A ta k'oaá ndaà-ne? Kàtas'e-nó kjoa'nchán.

²⁰ K'è nga jye okitsò-la, tsakó-la tsja kò nindaà nisìn-la. Jñà xita xi kota'yàt'aà-la 'ño tsja kis'e-la k'è nga kijtsee Jesús.

²¹ Jesús, ijngoò k'a kitsò-la:

—Jñò, kàtas'e-nò kjoa'nchán. Koni s'ín kisikasén-na Na'èn-na, jñò, k'oaá tìs'ín siikasén-nò.

²² K'è nga jye okitsò, ikjoàn kiskinomájno, kitsò-la:

—Chjoé jè Inima Tsjeè-la Nainá.

²³ Jñà xita xi jñò sijchàat'aà-là jé-la, jchat'aà-la, jñà xi jñò mìkiì sijchàat'aà-là jé-la, k'oaá s'ín kítsajna nga mìkiì jchat'aà-la.

K'è nga kijtsee Tomás nga jye jaáya-la Jesús

²⁴ Xita xi kota'yàt'aà-la Jesús xi tejò ma-ne, jngoò xi 'mì Tomás, xi tìkoaa Dídimò tsò-la ['én xi tsòya-ne: Tì'ño], mìkiì ya tíjna k'è nga ijchò Jesús.

²⁵ Jñà xita xi i'nga xi tìkoaa ya kota'yàt'aà-la Jesús, kitsò-la Tomás:

—Kà'ya-nájen Na'èn-ná Jesús.

Tomás kitsò:

—Tsà mìkìi skoeè tsja ñánda kisinchaàs'en xó, kò tsà mìkìi skinìs'en najmá ndsaa ñánda kitáx'a, kò tsà mìkìi skinìs'en ndsaa ya nisìn-la, mìkìi kòkjeiín-na.

²⁶ Xi jye komà jìin nàchrjein, jñà xitá xi kota'yàt'aà-la Jesús ìjngòò k'a ya títsajna; jyeé ya tíjna-ne Tomás; tanga jè xotjoa ni'ya tíchjoàjto-né. Ijchò Jesús, tsasìjnajiìn osen-la, kitsò-la:

—Jñò, kàtas'e-nò kjoa'nchán.

²⁷ Jesús, ìkjoàn kitsò-la Tomás:

—Chìnis'in najnóndseji ijndé, chítsejèn-la ndsaa. Nchrobákoji ndseji, chìnìs'in nisìn-na. Kì k'oaá s'ín mìkìi mokjeiín-lè. Kàtakjeiín-lè.

²⁸ K'eé kùichja Tomás, kitsò:

—jì xi Na'èn xan-lè kò xi Nainá xan-lè!

²⁹ Jesús kitsò-la:

—Ngaji Tomás, koi kjoa-la mokjeiín-lè nga kà'ya-ná. ¡Mé tà ndaà-la jñà xitá xi mokjeiín-la nas'ín mìkìi beèxkon-na!

Mé-ne k'oa'sín kitjei-ne xojon jè

³⁰ Taxkì kjin jchán kjoxkón kis'ìin isa Jesús nga nguixkon xitá xi kota'yàt'aà-la xi mìkìi tíjt'aà xojon jè.

³¹ Tà jñà 'én koi k'oa'sín kitjei mé-ne nga kòkjeiín-nò nga Jesús, jè xi Cristo, [jè xi xó kinikasén-ne] xi Kì'ndí-la Nainá. Kò mé-ne k'e nga kòkjeiín-nò s'eé-nò kjoabinachon xi it'aà ts'e.

21

K'e nga jè Jesús itoò xitá-la tsakó-la yijo-la

¹ Jesús, ìjngòò k'a tsakó-la yijo-la jñà xitá xi kota'yàt'aà-la ya ìndiì ndáchikon xi 'mì Tiberias. Jñà kjoa koi, kiís'ín komà.

² Títsajna kjoò Simón Pedro kò Tomás, xi tikoá Dídimò tsò-la ['én xi tsòya-ne: Tì'ño], kò Natanael xi Caná i'nde-la, nangui xi chja-ne Galilea. Tìkoá títsajna jñà ìxti-la Zebedeo kò ngui jò isa xitá xi tikoá ya kota'yàt'aà-la Jesús.

³ Simón Pedro kitsò-la xitá xíkjin:

—Tìn kó-lá tífi tsobà'ñoá nga sik'èn.

Jñà xitá xi i'nga, kitsò-la:

—Tìkoá onguíko-lèjen.

Ìkjoàn kii, jahas'en jngòò chitso. Tanga nìtjen jè, nìmé tìn kisakò-la.

⁴ K'e nga jye kis'e isén, Jesús tsatsejèn, tsasìjna ya ìndiì nandá, tanga jñà xitá xi kota'yàt'aà-la mìkìi kijtseèxkon tsà jè Jesús.

⁵ Jesús kitsò-la:

—Ìxti, ¿a kj'eè sakó chiba-nò tìn?

Jñà xitá-la kitsò:

—Majìn, nìmé tjin.

⁶ Jè Jesús, k'eé kitsò-la:

—Tìkatjen-ngui-ndá na'ya-nò ya kixi xijngoaà chitso. Sakò-nò tìn.

Jñà xitá koi, k'oaá s'ín kisìkatjen-ngui-ndá na'ya-la. K'e nga tsachrekàjìin-ne, jye mì tì kii ma bitjokàjìin-ne na'ya-la nga 'ñó jchán kjin tìn 'ncha.

⁷ Jè xitá-la Jesús xi 'nó matsjakeè xi ngàsòn ya kota'yàt'aà-la Jesús, kitsò-la jè Simón Pedro:

—Jè Na'èn-ná Jesús xi okji.

Simón Pedro, k'e nga kii'nchré nga jè Nà'èn-ná Jesús, n̄itoón tsohòkjá nachro-là (nga sa ítjòn tà nikje kjinguí íkjá), ikjoàn kiskìngui nandá nga kùtjingui-là Jesús.

⁸ Jñà x̄ita xi i'nga xi ngàsòn ya kota'yàt'aà-là, kiìkò jè chitso; tífejìn nandá jè nà'ya t̄in nga kjìn jchán t̄in 'ncha; nga mìtsà kjìn kijna jè chitso; t̄jìn-là tsà jngoò sìndò metro ñánda kijnajìn nandá.

⁹ X̄ita koi, k'e nga tsitajen chitso, kijtsee ìt'aà nangui t̄jítse jngoò ni'ín. Jngoò t̄in tímatsjò, t̄ikoa kijtsee ìnchrajín.

¹⁰ Jesús kitsò-là:

—Nchrohókoo i'nga t̄in xi sa jye kitjoé-nò.

¹¹ Simón Pedro, jahas'en chitso. Kiskoé nà'ya t̄in, tsibífet'aà nangui. Jngoò sìndò kò icháte jàn ma-ne jñà t̄in ì xi 'ncha nà'ya. Nàs'ín 'ñó kjìn ma-ne t̄in, jè nà'ya mìkì kixajndà.

¹² Jesús kitsò-là:

—Nchrobá, t̄ichioò.

Tanga n̄jngoò x̄ita xi kota'yàt'aà-là kitsò ikon nga kiskònangui-là yá-né jè. Nga jyeé t̄jìn-là nga jè Nà'èn-ná Jesús.

¹³ Jesús, kii kasit'aà chraña-là, kiskoé ìnchrajín, kitsjaà-là jñà x̄ita koi, k'oaá ti kisìkò jñà t̄in.

¹⁴ Ya ma-ne jàn k'a nga tsakó-là yijo-là Jesús jñà x̄ita xi kota'yàt'aà-là, k'e nga jye jaáya-là ìt'aà ts'e kjoabiyaà.

Jesús, mé-ne jàn k'a kùichja-là Simón Pedro

¹⁵ K'e nga jye tsakjèn, Jesús kiskònangui-là Simón Pedro, kitsò-là:

—Ji, Simón, ti-là Jonás, ¿a ìsaá ndaà matsjacha-ná mì k'oa-ne koni jñà koi?

Pedro kitsò:

—Jon Nà'èn, jyeé 'yi nga matsjake-lè.

Jesús kitsò-là:

—T̄ikindii jñà ndí ìxti orrè-na.

¹⁶ Xi ma-ne jò k'a, Jesús ìjngoò k'a kiskònangui-là, kitsò-là:

—Simón, ti-là Jonás, ¿a matsjacha-ná?

Kùichja Pedro, kitsò:

—Jon Nà'èn, jyeé 'yi nga matsjake-lè.

Jesús kitsò-là:

—T̄ikindii jñà orrè-na.

¹⁷ Xi ma-ne jàn k'a, ìjngoò k'a kiskònangui-là kitsò-là:

—Simón, ti-là Jonás, ¿a matsjacha-ná?

Pedro, ba kis'e-là nga ma-ne jàn k'a nga kjònangui-là tsà nga matsjakeè-né.

Kitsò-là:

—Nà'èn, 'ya yije-né, jyeé t̄jìn-lè nga matsjake-lè.

Jesús kitsò-là:

—T̄ikindii jñà orrè-na.

¹⁸ Ngui òkixí xi xan-lè, k'e nga t̄isa ti titsjoi, jì tajngoó kichíkjeí nikje-lè k'e nga k'ìn ñánda mejèn-lè nga k'óin. Tanga k'e nga jye kojchíngui, tà kjoén-né ndseji. K'ejí x̄itaá sìkákjá-lè nikje-lè, kjoìkò-lè ñánda nga majìn-lè nga k'óin.

¹⁹ Jesús, koi òkitsò-ne, jè kjoa tsibénojmiya kós'ín komat'in Pedro k'e nga kijá mé-ne nga jeya sìkíjna-ne Nainá. K'e nga jye òkitsò Jesús, ikjoàn kitsò-là Pedro:

—Nchrobátjingui-ná.

Jè x̄ita-là Jesús xi 'ñó tsjakeè

²⁰ Pedro, k'e nga kiskoòtsejèn-ne ít'in, kijtsee jè x̄ita-là Jesús xi 'ñó mat-sjakeè xi ngàsòn ya kota'yàt'aà-là nga tíftjingui-là. T̄jè-ne x̄ita xi taña

tsibìtsajnakjoò Jesús k'e nga tsakjèn. Jè xi kiskònangui-là nga kitsò-là: “¿Yá-né xi sìnngatsja-lè it'aà ts'e xita kondra-lè?”

²¹ Pedro, k'e nga kijtseè, kiskònangui-là Jesús, kitsò-là:

—Na'èn, xita jè, ¿mé xi komat'in?

²² Kiichja Jesús, kitsò-là:

—Tsà 'an xi mejèn-na nga kíjnakon skanda k'e nga kjoiaa ìjngoò k'a, mìtsà jì oko-lè. Ngaji, nchrobátjìngui-ná.

²³ K'oaá s'ín komà-ne nga tsabísòn 'én koi. Ngats'ìi xita 'ndse kitsò nga jè xita jè, mìkìi kiyá; tanga Jesús mìtsà kitsò nga mìkìi kiyá. Kitsò-né: “Tsà 'an xi mejèn-na nga kíjnakon skanda k'e nga kjoiaa ìjngoò k'a, mìtsà jì oko-lè.”

²⁴ Tijè-ne xita xi kota'yàt'aà-là Jesús xi tìbénojímí kixi ngats'ìi kjoa koi. Kò tijè-ne xi kiskìi yije xojon jè. Kò 'ya-ná nga 'én kixií xi chja.

²⁵ Jesús kjìn jchán kjoa kis'ìin-ìsa xi kj'eíí. Tsà tjeí yije nga jngoò jngoò skaya kjoa xi kis'ìin, mì-la kii kichìya-là nga tíjtsa isò'nde jñà xojon. K'oa's'ín kàtama.

Kó kis'iìn jñà x̄ita xi tsibíxáya-la Jesús

'Én xi kitsjaà Jesús nga iskan kjoí Inima Tsjeè-la Nainá

¹ Ngaji Na'èn Teófilo, jè xojon xi 'an kiskii ítjòn-lè, k'oaá kixan-lè ngats'iì kjoa xi kis'iìn kò xi tsakóya Jesús kóni nga tsibíts'ia nga kisixá

² skanda jè nachrjein k'e nga Nainá kiiko ìjngoò k'a-ne ján ngajmiì. K'e nga t̄ikj'eè fì-ne ján ngajmiì, jè nga'ñó-la Inima Tsjeè-la kisikjeén nga jaàjiìn x̄ita xi tsibíxáya-la nga kitsjaà-la kjotíxoma mé xá xi s'iìn.

³ K'e nga k'en kò nga jaáya-la it'aà ts'e kjobiyyà nguì ichán nachrjein tsibìjna isá; kjìn k'a tsakó-la yijo-la jñà x̄ita-la kò kjìn skoya kjoa kis'iìn nga kixi kjoa nga tíjnakon. T̄ikoaá tsakóya-la x̄ita-la kós'ín otíxoma Nainá.

⁴ K'e nga tíjnakò x̄ita-la k'oaá s'ín kitsjaà-la okixi, kitsò-la:
—Kì tà chjà bitjojñòò naxandá Jerusalén. Chíña kjoaa skanda k'e nga kitjojen kjondaà xi tsjá Na'èn-na koni s'ín kitsjaà tso'ba. Jyeé k'oa's'ín kixan-nò nga sa ítjòn.

⁵ Kixii kjoa, jè Juan, nandá kis'iìn-ne bautizar x̄ita. Tanga jñò, machraña nachrjein nga kò Inima Tsjeè-la Nainá koma-nò bautizar.

Kii komà k'e nga kii mijìn ìjngoò k'a-ne Jesús ján ngajmiì

⁶ Jñà x̄ita xi títsajnakò Jesús, kiskònangui-la, kitsò-la:
—Na'èn, xi jì otíxoma-nájen, jñà nachrjein koi, ¿a síkijnandeí ìjngoò k'a-ne naxandá Israel nga ta jè tajngoò kotíxoma-la yijo-la?

⁷ Jesús kitsò:
—Mítsà jñò oko-nò nga jchaa nachrjein; ta jngoò Na'èn-ná beè kó s'ín kosòn-la xi kjotíxoma ts'e.

⁸ Tanga k'e nga kitjojen-nè-nò jè Inima Tsjeè-la Nainá, tjoé-nò nga'ñó-la. Jñò kénajmí-la x̄ita xi it'aà ts'an i Jerusalén, kóhokji nga kijndà nangui Judea kò Samaria, skanda ñánda fehet'aà-ne isò'nde.

⁹ K'e nga jye okitsò Jesús, ikjoàn kitjámijìn i'nga nga kiiko ìjngoò k'a Nainá ján ngajmiì kò jñà x̄ita-la nchikotsejèn-la. Chaán mì t̄i kii kijtseè-ne nga jè ifi tsibíjtsa'ma.

¹⁰ Jñà x̄ita-la, k'e nga nchikotsejèn-la nga tífi-mijìn ngajmiì Jesús, tà nitoón j'iì kinchat'aà jò-la x̄ita xi íkjá nikje chroba.

¹¹ Kitsò jñà x̄ita koi:
—Jñò xi x̄ita Galilea tsajòn, ¿mé-ne kos'ín chitsejèn-nò ngajmiì? Jè Jesús, koni s'ín kà'yaà nga kòfimijìn ìjngoò k'a-ne ngajmiì, kijchò nachrjein nga k'oa t̄is'ín kjoí ìjngoò k'a-ne.

Kii komà nga kitjaàjiìn Matías

¹² Jñà x̄ita xi tsibíxáya-la Jesús inchrobà-ne nindoò Yá Olivo nga kii ìjngoò k'a-ne Jerusalén. K'oaá kji chrañat'aà fì ndiyá Jerusalén koni kji tsjá'nde kjotíxoma nga ma fì x̄ita k'e nga nachrjein níkjáya.

¹³ K'e nga ijchò-ne naxandá Jerusalén, kiimijìn isò'nga ni'ya, jahas'en cuarto ñánda síkjáya. Jñà x̄ita xi ijchò, jè Pedro, Jacobo, Juan, Andrés, Felipe, Tomás, Bartolomé, Mateo, Jacobo ki'ndí-la Alfeo, Simón Celote, Judas, ti-la Jacobo.

¹⁴ Ngats'iì x̄ita koi yaá bixofña nga kjit'aà nachrjein nga jngoò tíjnjohítsjeèn-la nga chjat'aà-la t̄ikoa bítsi'ba-la Nainá; t̄ikoaá títsajna i'nga íchjín kò María xi nea-la Jesús kò jñà 'ndse Jesús.

¹⁵ Jñà nachrjein koi, Pedro, kiichjajiìn-la x̄ita xíkjín xi mokjeiìn-la it'aà ts'e Cristo. Maá-la tsà jngoò sìndò kò kaàn jñà x̄ita. Pedro kitsò:

16 —'Ndsè, t́ín-ne nga kítasòn koni s'ín t́ichja Xojon-la Nainá jñà 'én xi kjòtseé kiùchja Inima Tsjeè-la Nainá nga jè xítaxá ítjòn David kisikjeén nga kiùchja mé xi komat'in Judas, jè xi kiìkakó-la xítà xi kitsobà'ñó Jesús.

17 Judas, nga xítà xingui-nájen. T́ikoaá kitjoé-la xá nga ngajen kisixáko-najen.

18 Jè ton xi kisikijne Judas it'aà ts'e jé xi tsohótsji, nanguií tsatse jngoò 'nde-ne; ikjoàn skò kiskaànguit'aà-ne nangui, jngoò k'a kixojndá indso'ba, itjo ndó'ye-la.

19 K'e nga jye kii'nchré yije xítà naxandá Jerusalén nga jye k'en Judas, i'nde jè, k'oaá s'ín tsibít'aà 'ín nga Acéldama kitsò-la. 'Én ts'e xi chja, tsòyaá-ne: “I'nde ts'e Jní-né.”

20 Jè xojon ts'e Salmo, k'oaá s'ín t́ichja nga tsò:

Ni'ya-la kátasijna tiya-né,

nijngoò xítà kítasajna.

T́ikoaá t́ichja Salmo ñánda tsò:

Kj'eí xítà kát'i-la xá-la.

21 'Mochjeén-né nga kj'eí xítà sakó ijngoò-isa xi jè ngajo-la Judas; jñà chjaàjìn-jgoaá xítà xi kjòtseé t́imakó-ná skanda k'e nga tisa tsajmeiìko-ná Jesús,

22 mats'iaño-ne nga kis'iin bautizar Juan skanda k'e nga tsijin ijngoò k'a-ne Jesús ján ngajmii, mé-ne nga kíjnako-ná t́ikoa tsjá 'én nga Jesús jyeé jaáya-la.

23 K'eé tsafaájìn jò xítà: jngoò xi 'mì José, t́ikoa t́ít'aàsòn 'ín-la nga Barsabás 'mì. Barsabás, kò t́ijè-ne xi 'mì Justo. Xi ijngoò, Matías 'mì.

24 Ikjoàn kiùchjat'aà-la Nainá kitsò:

—Ngaji Nà'èn, xi yaxkoin inima-la ngats'ii xítà, kot'in-nájen ñá-laá ingajò xítà koi jye kàchjaàjìn,

25 mé-ne nga skoé xá-lè xi ji bíxáya-la, jè xá xi kisikijna Judas k'e nga tsohótsji jé, nga jye t́jna i'nde ñánda oko-la.

26 Kisiskákjoò suerte-la. Jè Matías kisikijne. Jè komà-ne tejò xítà xi tsibíxáya-la Jesús xi tejngoò ma nga sa ítjòn.

2

K'e nga itjojen Inima Tsjeè-la Nainá

1 K'e nga ijchò nachrjein-la s'eí Pentecostés, ngats'ii xítà xi mokjeiín-la it'aà ts'e Cristo ta jngoò jtín t́tsajna.

2 Tà nitoón kina'yà jngoò-la xi 'ñó one, koni jngoò tjo xi 'ñó tí'ba xi ngajmii inchrobà-ne. Kina'yà-la kóhokji i'nga ni'ya ñánda t́tsajna jñà xítà.

3 Tsatsejèn-la nijen xi koni kjoàn ni'ín kjoàn; kjòxkoaya íjngó íjngó kisijnasòn-la jñà xítà.

4 Ngats'ii xítà, jngoò k'a ndaà kis'ejiin inima-la Inima Tsjeè-la Nainá; ikjoàn tsibíts'ia nga kiùchja 'én-la xítà xi kj'eí naxandá koni s'ín kitsjaà-la Inima Tsjeè-la Nainá nga kichja.

5 Nachrjein koi, kjìn xítà judío t́tsajna [xi ijchò s'eí] ya naxandá Jerusalén xi beèxkón Nainá xi inchrobà-ne ñánda nga xìn naxandá nga t́jtsa isò'nde.

6 Jñà xítà xi ya t́tsajna xi ijchò s'eí ya naxandá Jerusalén, ngats'ii kjòxkóya k'e nga kii'nchré-la xi jane. T́ikoaá tà kjòxkón-la k'e nga kii'nchré-la xítà-la Cristo nga ma-la chja nga jngoò ijngoò skoya 'én-la xítà xi xìn naxandá-la xi ya t́tsajna.

7 Tà k'oaá komà-la, t́ikoaá tà kjòxkón-la, kitsò-la xíkjin:

—¿A mìtsà xítà Galilea ngats'ii xítà xi nchichja?

⁸ ¿Kós'ín ma-ne nga na'yá-lá 'én-ná xi nokjoá nga xìn naxandá-ná nga ìjngoò jngoá?

⁹ Ngats'iaá xi ì titsajnaá, tjín xita Partia, xita Media, xita Elam, xita Mesopotamia, xita Judea, xita Capadocia, xita Ponto, xita Asia,

¹⁰ xita Frigia, xita Panfilia, xita Egipto, xita Libia xi ya chrañat'aà-la Cirene. Tikoá tjín xita Roma xi ì titsajna Jerusalén. Tjín xi nguì xita judío. Tikoáá tjín xi tà jahatjìya-la nga xita judío komà.

¹¹ Tikoáá tjín xi inchrobà-ne Creta ko Arabia. ìNgats'iaá na'yà-lá nga jngoò ìjngoò skoya 'én-ná koni s'ín bénojímí-ná kjojkón xi s'ín Nainá!

¹² Ngats'ìi xita tà kisinchaàxkón-né, mì tì kù machiya-la, kitsò-la xikjín:

—¿Kó tsòya-ne kjoá koi?

¹³ Tjín i'nga xita xi tà tsijnòkèè-né, kitsò:

—ìCh'íi xita koi!

'Én xi kùichjayajìn-la xita jè Pedro

¹⁴ K'eé tsasjina kixi Pedro ko xita xi tejngoò ma-ne; 'ñó kùichjayajìn-la xita, kitsò:

—Jñò, xita xinguiáá xi judío 'mì-ná ko ngats'ioò xi xìn naxandá-nò xi ì titsajnaà Jerusalén, ndaà kàtasijìn-nò, ndaà tìná'ya 'én xi kichjàkò-nò.

¹⁵ Jñò bixón-nò: “Ch'íi xita koi.” ¿Kós'ín koma-ne nga koch'ì nga saá ijchò xi ñijaàn nga tajñòya?

¹⁶ Koií tìbitasòn 'én xi kùichja Joel, xita xi kùichja ngajo-la Nainá.

¹⁷ K'oaá tsò Nainá:

K'e nga jye tífehet'aà nachrjein,

síka'bí-la Inima Tsjeè-na ngats'ìi xita xi tjín nga tíjtsa isò'nde;

jñà ìxti x'in ko ìxti íchjín-nò, 'aán kichja ngajo-na;

jñà ìxti xongó-nò, skoe kjojkón xi okó Nainá;

jñà xita jchinga-nò k'oií-la nijñá xi it'aà ts'e Nainá.

¹⁸ Okixi-né nachrjein koi,

jñà ch'ìnda-na xi x'in ko íchjín siika'bí-la Inima Tsjeè-na

mé-ne nga kichja ngajo-na.

¹⁹ Ján ngajmù kjin kjojkón jcha-la,

tikoáá ì it'aà nangui jchaá-la kjojkón

nga xixteèn jní-la xita,

nga ko ni'ín ko ni'ndi tsjè xi kjoá ts'e kjojchán.

²⁰ Jè ts'oi, kojñò-né,

jè sá, jní kji koma

k'e nga tikj'eè f'ìi Na'èn-ná

nga kjoíi kíndaajìn-la xita

jè nachrjein xi jeya ko 'ñó xkón.

²¹ Tanga ngats'ìi xita xi kichjat'aà-la Nainá,

kítjokajìn kjo'in.

[K'oaá tsò 'én-la Nainá xi kiskù Joel (2:28-32).]

²² Tìná'ya xi xita Israel 'mì-nò 'én xi k'oa xán-nò: Jñò, ndaà tíjìn-nò, Nainá tsakó nga Jesús xi Nazaret ts'e, tjín-la kjotixoma. Xkoòn ki'ya-nò nga kis'ìn ngats'ìi kjojkón ko kjoá ts'e seña xi tseé nga 'ñó tjín-la.

²³ Koni s'ín tjindaà-la Nainá nga tisa tàts'en-la kjoá, jñò, kindobà'ñó xita jè nga kinik'eèn nga kiningsja xita xi mìkù beèxkón kjotixoma nga tsakat'aà krò.

²⁴ Tanga Nainá kisikjaáya-la; kisikjñandeíi kjoá ts'e kjo'in xi tjín-la kjoabiyaà nga mìkù koma nga ya sijna'ñó it'aà ts'e kjoabiyaà.

²⁵ Jè xitaxá ítjòn xi David ki'mì, kitsò it'aà ts'e Jesús:

Kjtseè kjit'aà-ná Nainá k'e nga tíjna nguixkoaàn;

ì tǐjnat'aà ndsaa kixi mé-ne nga nì mé xi komat'ian.

²⁶ Koií kjoa-la nga matsja-la inima-na,
tikoá matsja-la njjen-na nga seè.

Yijo-na, tikoáá ndaà siikjáya nga skóña kjoa,

²⁷ koií kjoa-la nga mì ya sikíjni inima-na ya i'nde-la mik'en,
tikoá mikii koi'ndi nga ki'ndo yijo-na xi chi'nda tsjeè-lè 'mì-ná.

²⁸ Tsakoò-ná ndiyá nga ma kótijnakoan,
tseé kjotsja s'e-la inima-na nga jì tijnako-ná.

[K'oaá tsò 'én-la Nainá xi kiskii David (Salmo 16:8-11).]

²⁹ "Ndsè, k'oaá xan-nò xi nguì kjoa kixi: xita jchínga-ná David, jye kjòtseé k'en, tikoá kisihijiin-né. Jè itsjó-la, tǐjna skanda nachrjein i'ndeí.

³⁰ Tanga jè David, jngoò xita xi kiichja ngajo-la Nainá. Jyeé k'oas'ín tǐjiin-la koni s'ín kitsjaà-la tso'ba Nainá nga tje ts'e kitjokàjiin Cristo nga jè kǐjna ngajo-la koni xitaxá ítjòn.

³¹ Jè David, k'oaá s'ín kiichja it'aà ts'e Cristo koni tsà jye kijtseè nga jye jaáya-la. Kitsò: "Mikii ya kisijna inima-la ya i'nde-la mik'en, tikoáá mikii i'ndo yijo-la."

³² Nainá, jyeé kisikjaáya-la Jesús. Ngats'ii kjoa xi komà, k'oaá s'ín bènojmi-nòjen nga xkoòn ki'ya-najen.

³³ Nainá jeya kisikǐjnat'aà chrja kixi-la; kitjoé-la Inima Tsjeè-la koni s'ín kitsjaà tso'ba Nainá. Jè Jesús kiska'bisòn òjngoò k'a Inima Tsjeè-la. Koií kjoa-la nga k'oas'ín titsa'yaà kò titsana'ya.

³⁴ Jè David, mìtsà ngajmii kii mijin; tanga k'oaá kitsò:

Jè Nainá kitsò-la jè xi Nei-na:

"Tǐjnat'aà-ná ì kixi-na,

³⁵ skanda k'e nga sikítsajnanguia kondra-lè ñánda nchasòn ndsokoiì."

³⁶ 'Jñò xi xita naxandá Israel tsajòn, ndaà jchaa yije nga 'ñó kixi tǐjn kjoa nga jè Jesús xi jñò tsakat'aà krò, Nainá, k'oaá s'ín kisikǐjna nga jè-né xi Na'èn-ná, kò tǐjè-ne xi Cristo [xita xi xó kisikasén-ne Nainá].

³⁷ K'e nga kii'nchré 'én xi okitsò jña xita xi ya títsajna, kisikájno jjiin inima-la; k'ée kiskònangui-la Pedro kò xita xikjín xi i'nga xi tikoá xó tsibíxáya-la Jesús. Kitsò-la:

—'Ndsè, ¿mé xi s'en-jen?

³⁸ Pedro kitsò-la:

—Tikájno jé-nò, kì tǐ jé binchaàtsji-nò; t'een bautizar yijo-nò it'aà ts'e Jesucristo nga jngoò òjngoò-nò, mé-ne nga siichàat'aà-nò Nainá, tikoá tsjá-nò Inima Tsjeè-la.

³⁹ Koni s'ín kitsjaà tso'ba Nainá, 'én xi tsibíjna tsajòn-nò; tikoáá ts'eé ixti-nò, kò ngats'ii xita xi kjiiin títsajna, nga yije xi jè sobà Nainá xó kichja-la.

⁴⁰ Pedro, kjin 'én kiichjajiin-sa-la. 'Ñó kiichjako. Kitsò-la:

—Tinchat'aàxìn-là kjo'in xi tjoé-la jña xita koi xi ch'o s'ín!

⁴¹ Jña xita xi kòkjeiin-la 'én xi kiichja Pedro komà bautizar; ma-la tsà jàn jmiì xita xi jahas'en-t'aà nachrjein jè.

⁴² Kóhotjín, kixii chinchako 'én xi kii'nchré koni s'ín tsakóya-la jña xita xi tsibíxáya-la Jesús, tikoá kjit'aà nachrjein maxkóya nga kjèn-kò xikjín tikoá chjat'aà-la Nainá.

⁴³ Ngats'ii xita xi ya títsajna tà kitsakjòn-né k'e nga kijtseè ngats'ii kjondaà kò kjojkón xi kis'iin jña xita xi tsibíxáya-la Jesús.

⁴⁴ Jña xita xi jye kòkjeiin-la it'aà ts'e Cristo bìtsajnajtín-né kóhotjín; síxkoaya yije mé tsojmì xi tǐjn-la.

⁴⁵ Otíjna nangui-là kò tsojmì xi t́ín-là, ikjoàn síjòya tón-là koni s'ín mochjeén-là nga jngoò ìjngoò.

⁴⁶ Nachrjein inchijòn bixoña ya ndítsin ingo ítjòn, kò ya ni'ya-là xíkjin nga kjèn-kjoò nga t́ín-là kjotsja kò indaàjìn t́ín inima-là.

⁴⁷ Jeya kisikíjna Nainá; jñà xitá naxandá tsjakeè komà xitá-là Cristo; jè Nainá, nachrjein inchijòn kisikas'en-t'aà-isa naxandá-là Cristo jñà xitá xi jè mejèn-là nga kitjokàjìn kjo'in.

3

Kós'in komà k'e nga kjòndaà jngoò-ne xitá xi mìkì ma fi

¹ Jngoò k'a kii Pedro kò Juan ya ingo ítjòn ts'e xitá judío. Ijchò-la xi jàn nga nguixòn k'e nga chjat'aà-là Nainá jñà xitá.

² Nachrjein nchijòn bijchó síkíjna jngoò xitá ima xi mìkì ma fi. Xitá jè k'oaá s'ín kits'iin. Yaá bijnajto xotjoa-là ingo ítjòn xi k'oas'in t́ít'aà 'ín: xotjoa xi ndaà kji. Xitá jè, tón síjé kjotjò-là jñà xitá xi fahas'en ndítsin ingo.

³ Jè xitá xi mìkì ma fi, k'e nga kijtseè Pedro kò Juan nga nchifahas'en ndítsin ingo, kisijé kjotjò-là tón.

⁴ Jè Pedro kò Juan, kiskoò'an; jè Pedro kitsò-là:

—¡Chítsejèn-'a-nájen!

⁵ Jè xitá xi mìkì ma fi kiskoò'an; k'oaá s'ín komà-là koni tsà t́ín xi tsjá-là.

⁶ Tanga jè Pedro kitsò-là:

—Nimé tón t́ín-na xi oro kò xi plata, tanga jè xi t́ín-na tsjaà-lè; it'aà ts'e Jesucristo xi Nazaret ts'e, t́isitjìn, t́itjájmì.

⁷ Jè Pedro, k'e nga okitsò-là, kiskoé tsja kixi, kiskímìtjen; nitoón kis'e-là ngañó tsji ndsoko, kóhokji ndsoko.

⁸ Jè xitá jè, kiskì'nga nga tsasítjen; ikjoàn tsibíts'ia nga tsajmeè-ne; jahas'en-kò ndítsin ingo jè Pedro kò Juan nga ndsoko kii-ne; fijen fikjá, kji'nga kitsian nga jeya kisikíjna Nainá.

⁹ Ngats'ii xitá naxandá kijtseè jè xitá jè nga jye ma fi-ne kò nga jeya kisikíjna Nainá.

¹⁰ Tà kjòxkón-là xitá, tikoáà tà kitsakjòn-né koni s'ín komà'in jè xitá jè nga jyeé beèxkon nga jè-né xi síjé kjotjò tón ya xotjoa ingo xi k'oas'in t́ít'aà 'ín-là: xotjoa xi ndaà kji.

'Én xi kiichjaya Pedro ya nguitjoa-là ingo ts'e Salomón

¹¹ Jè xitá xi jye kjòndaà-ne, mìkì tsjeiin nga kitsobà'ñó Pedro kò Juan. Ngats'ii xitá naxandá tà k'oaá komà-là; k'ée tsangachikon kiitjingui-là ya ingo ítjòn, ya nguitjoa-là xi 'mì Salomón.

¹² Jè Pedro, k'e nga kijtseè jñà xitá naxandá, kitsò-là:

—Jñò, xitá xinguiáá xi xitá Israel 'mì-ná, ¿mé-ne maxkón-onò? ¿Mé-ne ngajen ch'àn-nájen? ¿A k'oaá s'ín nikítsjeèn koni tsà ngañó tsajen kò kjòndaà tsajen kòmandaà-ne xitá jè nga ma fi-ne?

¹³ Jè xi Nainá tsò-là Abraham, Isaac, Jacob kò ngats'ii xitá jchínga-ná xi i'nga, jè-né xi jeya kàsikíjna Jesús xi ch'inda-là ma; t́ijè-ne Jesús xi jñò kinìngatsja xitaxá. Jñò, mìkì kits'ii'nde k'e nga jè Pilato mejèn-là s'ikíjnandejì-ne.

¹⁴ Jñò, kinachrjekànguio jè xi Xitá Tsjeè kò xi Xitá Kixi; ikjoàn kinìjé nga tsibijnandejì jè xitá xi mik'en kitjen-là.

¹⁵ Jñò kinìk'eèn jè xi síkíjnakon-ná tanga jè Nainá kisikjaáya-là. Ngats'ii kjoa koi, ki'ya-nájen, k'oaá ma-ne nga bènojímí-jen.

¹⁶ Jesús kàtsjá-la nga'ño xita jè xi jño títsa'yaà tikoá yaxkoòn, koi-né nga mokjeiín-najen it'aà ts'e Jesús. Tà koií kjoa-la nga ndaà mokjeiín-najen nga ndaà kòmandaà-ne xita jè nga nguixkoòn jño xi i títsajnaà.

¹⁷ "Ndsè, jyeé tíjìn-na, k'e nga k'oas'ín ki'nè kò xitaxá-nò nga kinik'eèn Jesús, koi-né nga mikì machiya-nò.

¹⁸ Jè Nainá, k'oaá s'ín kisikitasòn koni s'ín kiichja ngats'ii xita-la xi kiichja ngajo-la nga jè Cristo [jè xi xó kisikasén-ne Nainá] k'oaá s'ín tjínè-la nga kiyá.

¹⁹ Koií k'oa 'mì-nòjen nga tikájno jé-nò, kì tì jé binchaàtsji-nò; Nainá tanguít'aà-là mé-ne nga jchat'aà-nò jé-nò ikjoàn tsjá-nò Nainá kjoa'nchán ts'e inima-nò.

²⁰ Kàtasikasén-nò Jesús, jè xi xó k'oas'ín kjòtseé jaàjìn-ne Nainá nga jè xi Cristo nga it'aà tsajòn kjoí-ne.

²¹ Mochjeén-né nga ján kína ngajmì jè Jesucristo skanda k'e nga jè Nainá sùxitseya yije ìjngò k'a tsojmì xi tjín. K'oaá s'ín kitsjaà okixi Nainá k'e nga kiichja ngajo-la xita tsjeè-la xi jè kisikjeén nga sa kjòtseé.

²² Moisés, k'oaá s'ín kitsò-la jña xita jchínga-ná: "Jè Na'èn-ná xi Nainá, yaá kochrjekàjìn jngò xita xinguaá xi kichja ngajo-la Nainá koni 'an. Jè tiná'ya-là koni s'ín kichjako-nò ngats'ii kjoa xi keènojmi-nò.

²³ Ngats'ii xita xi mikì kji'nchréñijon-la, jngò k'a tjáxin it'aà ts'e naxandá-la Nainá."

²⁴ 'Ngats'ii xita xi kiichja ngajo-la Nainá, mats'ia-ne Samuel, skanda i'ndeí, saá koií 'én tsibénojmi mé kjoa xi tíma nachrjein i'ndeí.

²⁵ Kjongdaà tsajòn-nò koni s'ín kitsjaà tso'ba Nainá it'aà ts'e xita-la xi kiichja ngajo-la. Tikoáá kjondaà tsajòn-nò koni s'ín tsibíndaàjìn jngò kjoa Nainá kò xita jchínga-ná k'e nga kitsò-la Abraham: "Ngats'ii xita xi tjín nga títsa isò'nde kochikon-t'in-né xi it'aà ts'e tje-lè."

²⁶ Nainá, k'e nga kisikjaáya-la Ki'ndí-la, jño kisikasén ítjòn-nò nga siichikon-t'in-nò mé-ne nga sikjatjia-là kjohítsjeèn-nò nga jngò ìjngò, nga mì tì ch'o s'en-nò.

4

K'e nga jè Juan kò Pedro kiiko xita naxandá ya nguixkon xitaxá

¹ Pedro kò Juan tákó tik'eé nchihóko xita naxandá nga ijchò jña nò'miì, tjiko jè xita sko-la policía xi síkinda jngò ítjòn kò jña xita saduceo.

² Jña xita koi 'ño jti komà-la nga jè Pedro kò Juan k'oaá s'ín tsakóya-la xita naxandá nga jyeé ki'ya-la nga kjoaáya-la xita xi jye k'en koni s'ín jaáya-la Jesús.

³ Kitsobà'ño, kiiko, ikjoàn kiskinìs'en ndayá nga jyeé kjònguixòn. Yaá kisikítsajna ndayá skanda komà nchijòn.

⁴ 'Ñó kjìn ma-ne xita xi kòkjeiín-la k'e nga kiì'nchré 'én xi kiichja Pedro kò Juan. Jyeé ma 'òn jmì xita x'in xi mokjeiín-la; kò jña íchjín xi kòkjeiín-la mikì kòxkeya.

⁵ Xi komà inchijòn, kjòxkóya ján Jerusalén xita sko-la jña xita judío kò xita jchínga kò xita chjine xojon xi okóya kjotíxoma-la Nainá xi kiskì Moisés.

⁶ Tikoá ya tíjna Anás, xi nò'miì ítjòn, Caifás, Juan, kò Alejandro, ngats'ii xita xikjín jña xi nò'miì ítjòn.

⁷ Kiskinikjaá Pedro kò Juan, ikjoàn chinchá osen nga kiskònangui-la, kitsò-la:

—¿Yá ts'e nga'ño? ¿Yá xi kitsjaà'nde-nò nga xita xk'én nìndaà-nò?

⁸ Jè Pedro nga ndaà tíjìn inima-la jè Inima Tsjeè-la Nainá kitsò:

—Jño xi xitaxá ítjòn 'mì-nò kò xita jchínga-la naxandá Israel:

⁹ Jñò, ¿mé-ne mejèn-nò nga jchaa kjondaà xi kòmat'in xita jè nga kòmandaa-ne nga jye ma fi-ne?

¹⁰ Jñò nga nguixkoòn, kénòjmí-nòjen, tikoà kàtji'nchré yije ngats'ii xita naxandá Israel. Xita jè, it'aà ts'ee Jesucristo xi Nazaret ts'e kjondaà-ne. Tijè-ne xi kinik'eèn nga tsakat'aà krò, tanga Nainá kisikjaáya-la.

¹¹ Jñò, k'oaá ngaya-la koni chjinechrjó xi bíndaà ni'ya. Kinachrjekàngui-nò Jesús koni jngoò ndajo xi nimé chjí-la. Tanga i'ndeí jè tíjna ítjòn koni ndajo chrjangui-la chrjó ni'ya.

¹² Tà jngoò ma xita xi ma-la ochrjekàjìin-ná kjo'in, tà jè Jesucristo. Mi tí yá xita tjín-ne i it'aà nangui xi Nainá kisikasén nga koma kochrjekàjìin-ná kjo'in.

¹³ Jñà xitaxá, k'e nga kijtseè nga 'ño chja Pedro ko Juan nga mìkiì tsakjón, tikoà kijtseè nga taxki ndí xita-né nga mìtsà 'ño ma-la xojon, tà kjòxkón-la; k'ee kjòchiya-la nga jñà xita xi tsajmeiiko Jesús.

¹⁴ Tikoà kijtseè nga ya síjna jè xita xi jye kjondaà-ne, k'oaá s'ín komà-ne nga mì tí kó kitsò-la.

¹⁵ K'ee tsachrje jngoò tjò ni'ya osen, ikjoàn tsajoóya-ne.

¹⁶ Kitsò-la xikjín:

—¿Mé xi sikoáá xita koi? Ngats'ii xita naxandá Jerusalén, jyeé tíjìin-la kjòxkón xi kis'iin, mìkiì koma kí'maá.

¹⁷ Kinchaxkón-laá nga ni tí jngoò xita kohóko-ne xi it'aà ts'e Jesús, mé-ne nga mì tí kii kobísòn-ne kjoa koi.

¹⁸ K'ee kiichja jngoò k'a-la Pedro ko Juan; kitsjaà-la okixi nga jngoò k'a mì tí kii tíj'nde-la nga kichja-isa-la, tikoà kokòya-isa-la xita it'aà ts'e Jesús.

¹⁹ Jè Pedro ko Juan kiichja, kitsò-la:

—Jñò, ndaà jchósòn-là, ñá-laá xi kixi tjín nga nguixkon Nainá. ¿Yá-né xi sikitason-lajen? ¿A jñò-nò xi xita 'mì-nò? ¿A xi jè sobá Nainá?

²⁰ Mìkiì koma jyò kítsajna-jen it'aà ts'e kjoa xi ki'ya-jen ko xi kina'yà-jen.

²¹ Jñà xitaxá mìkiì kjòtsji-la kós'ín siko nga tsjá-la kjo'in, tà chincháxkón-la, ikjoàn kisikítsajnandeí-ne, koi kjoa-la nga jñà ngats'ii xita naxandá, 'ño jeya kisikjina Nainá it'aà ts'e kjòxkón xi komà.

²² Koií-né nga jè xita xi jye kjondaà-ne, tsatoó ichán nó tjín-la k'e nga k'oas'ín komat'in kjòxkón jè.

Kó s'ín kisijét'aà-la Nainá jñà xita xi mokjeiín-la it'aà ts'e Cristo

²³ K'e nga jye tsibítsajnandeí-ne Pedro ko Juan, kii-ne ñánda títsajna xita xikjín; tsibénòjmí yije-la kó kitsò-la jñà no'miì ítjòn ko jñà xita jchínga.

²⁴ Jñà xita xikjín, k'e nga jye kii'nchré koni s'ín kis'enojmí-la, ngats'ii, tsibíts'ia nga tà jngoò jta kiichjat'aà-la Nainá, kitsò:

—Ji Na'èn xi ji tjín-lè kinda ngats'ii xi tjín, nga ji tsibìndiì ngajmì, nangui ko ndáchikon, ngats'ii tsojmì xi tjín isò'nde.

²⁵ Nga ko Inima Tsjeè-lè kinikjìin tso'ba chj'nda-lè David xi xita jchínga kjiin-najen nga k'oa kisi:

¿Mé-ne nga mats'en-ne xita isò'nde?

Ko jñà xita naxandá, ¿mé-ne kjoa ts'en joóya-ne xi kondra ts'e Nainá?

²⁶ Kjòxkóya xitaxá ítjòn xi tjín isò'nde;

kisìjngoò yijo-la jñà xita xi tjín-la kjotíxoma

nga kondra kii-la Nainá ko Cristo, [xita xi xó kisikasén-ne Nainá].

²⁷ Kixi kjoa, jè Herodes ko Poncio Pilato, ko xi taxki xita xi mìtsà xita judío, ko ngats'ii xita naxandá Israel, kisìjngoò yijo-la i naxandá jè, nga kondra kii-la Ki'ndí-lè Jesús xi xita tsjeè xi ngaji xó ji kichjaàjìin-ne nga kinikasín nga jè xi Cristo.

²⁸ Jǎ̀nà x̄it̄a koi, k'oaá s'ín kis'iin yije koni s'ín t̄j̄indaà-lè nga t̄isa t̄ats'en-la kjoa nga k'oa's'ín koma.

²⁹ Na'èn, i'nde, chítsején-la x̄it̄a koi nga mejèn-la beètòon-najen; t̄ichj̄at'aà-najen nga mìk̄i k̄iskón-jen nga ma k̄inókjoaya-jen 'én-lè xi ch̄i'nda-lè 'mì-najen.

³⁰ Takoí nga'ñó xi t̄j̄iya ndseii nga k̄atandaà-ne x̄it̄a xi xk'én; it'aà ts'e Ch̄i'nda Tsjeè-lè Jesús, t'iin k̄joxkón xi okó kjoajeya-la Nainá.

³¹ K'e nga jye k̄iichj̄at'aà-la Nainá, ts'a ch'ón ya i'nde ñánda t̄ítsajna. Ngats'ì x̄it̄a xi ya t̄ítsajna kis'ejiin in̄ima-la In̄ima Tsjeè-la Nainá; mì t̄i k̄i kitsakjòn-ne nga k̄iichj̄aya 'én-la Nainá.

Kó kis'iin j̄nà x̄it̄a-la Cristo nga nijngoò xi kisichij̄at'aà-la tsojm̄i xi mochjeén-la

³² Ngats'ì x̄it̄a xi jye kòkjeiín-la, ngàsòn ngáya t̄j̄in in̄ima-la kò k̄johítsjeèn-la; ngats'ì tsojm̄i xi t̄j̄in-la nga jngoò ìjngoò, ts'e yije-né kòhotj̄in. Nijngoò xi kitsò: “Tsojm̄i xi t̄j̄in-na, tà ts'an, tajngoò-ná.”

³³ J̄nà x̄it̄a xi tsibíxáya-la Jesús 'ñó tse nga'ñó kis'e-la nga is̄a ndaà tsibénojm̄i nga jye jaáya-la Na'èn-ná Jesucristo it'aà ts'e kjoabiyaà. Ngats'ì j̄nà x̄it̄a koi, Nainá 'ñó ndaà kisichikon-t'in.

³⁴ K'oaá s'ín komà-ne nga nijngoò x̄it̄a kisichij̄at'aà-la tsojm̄i xi mochjeén-la. J̄nà x̄it̄a x̄ikj̄in xi t̄j̄in-la nangui kò j̄nà xi t̄j̄in-la ni'ya, ot̄ijna. Ikjoàn f'ìkò yije t̄on-la tsojm̄i xi ot̄ijna.

³⁵ Síngatsja j̄nà x̄it̄a xi tsibíxáya-la Jesús; ikjoàn síka'bí-la x̄ikj̄in nga jngoò ìjngoò mé xi chij̄at'aà-la.

³⁶ Ya t̄ijnaj̄in jngoò x̄it̄a levita xi José 'mì. Yaá i'nde-la naxandá Chipre. J̄nà x̄it̄a xi tsibíxáya-la Jesús, tsibít'aàsòn 'ín-la: Bernabé kitsò-la. (Ín jè, tsòyaà-ne: x̄it̄a xi síjehikon-ná.)

³⁷ X̄it̄a jè, kijna jngoò 'nde-la nangui; tsat̄ijna; j'ìkò t̄on-la; kisíngatsja j̄nà x̄it̄a xi tsibíxáya-la Jesús.

5

Jé xi tsohótsji Ananías kò Safira

¹ Tanga ìjngoò x̄it̄a x'in xi 'mì Ananías kò chjoón-la Safira, t̄ikoa tsat̄ijna jngoò 'nde nangui-la.

² X̄it̄a jè tsajoóya-ne kò chjoón-la, tsibí'ma chiba t̄on chj̄i-la nangui. Tà chiba j'ìkò nga kisíngatsja j̄nà x̄it̄a xi tsibíxáya-la Jesús.

³ Jè Pedro kitsò:

—Ji Ananías, ¿mé-ne kòbì'nde-ne nga x̄it̄a neí kòfahas'en-j̄in in̄ima-lè nga mejèn-lè kachonach̄an-la In̄ima Tsjeè-la Nainá nga kòbì'ma chiba t̄on chj̄i-la nangui?

⁴ ¿A mìtsà tsiji nangui? K'e nga jye kòhotijni, ¿a mìtsà tsiji t̄on? ¿Mé-ne k'oa's'ín k̄anik̄itsjeèn-ne j̄j̄in in̄ima-lè? Mìtsà taxk̄i x̄it̄a mejèn-lè kachonach̄an-la, jè sobà Nainá.

⁵ Jè Ananías, k'e nga k̄i'nchré 'én koi, kiskaàjndoòt'aà nangui, k'en. Ngats'ì x̄it̄a xi kis'ejiin-la kjoa xi komà, ndaà jchán kitsakjòn.

⁶ K'ée j'ì i'nga ixti x'in xi kisikájté nikje yijo-la Ananías; tsachrje ni'ya, nga k̄i k̄ihij̄in.

⁷ T̄j̄in-la tsà jàn hora nga j'ì Safira chjoón-la Ananías; mìk̄i t̄ij̄in-la mé kjoa xi komà.

⁸ Pedro kiskònangui-la kitsò-la:

—¿A k'oaá t̄j̄in kòhotijna-nò nangui-nò koni t̄j̄in bixón?

Jè chjoón kitsò:

—Jon, k'oaá tjin kòhotijna-najen.

⁹ Jè Pedro kitsò-la:

—¿Mé-ne k'oas'ín kàchibàya-nò? ¿A k'oaá s'ín kànikítsjeèn nga ma chónachan-là jè Inima Tsjeè-la Nainá? Chítsején-la jñà ixti xi nchajto xotjoa ni'ya. Jñà kòfi kíhijìn x'in-lè; tikoá ngaji, jñà kjiko-lè.

¹⁰ Chjoón jè, nitoón kiskaàjndoòt'aà nanguì ya ñánda síjna Pedro; k'en. K'e nga jahas'en ni'ya jñà ixti x'in, kijtsee nga jye k'en; tsachrje ni'ya; kiì kíhijìn-t'aà-la x'in-la.

¹¹ Ngats'ìi xita naxandá-la Cristo ko ngats'ìi xita xi kiì'nchré kjoa koi, ndaà jchán kitsakjòn.

Kjoxkón ndaà xi kis'ìn jñà xita xi tsibíxáya-la Jesús

¹² Jñà xita xi tsibíxáya-la Jesús, kjìn kjoxkón xi okó kjoajeya-la Nainá kis'ìn nga nguixkon xita naxandá. Ngats'ìi xita-la Cristo, yaá bixoña kjit'aà ya ingo ítjòn ya nguitjoa-la xi 'mì Salomón.

¹³ Jñà xita xi mìkiì mokjeiín-la it'aà ts'e Cristo, nijngoò kjò'ñóhikon nga ya kiìt'aà-la jñà xita-la Cristo. Tanga jñà xita naxandá, 'nó ndaà kijtseeékón jñà xita-la Cristo.

¹⁴ Tanga jñà xita xi kòkjeiín-la it'aà ts'e Cristo, íchjín íchjá, isaá 'nó kòkjìn-ya-isa.

¹⁵ Jñà xita tsachrje xita xi xk'én ya iya ndiyá; kisikáyijòsòn nachan ko nijñaà mé-ne k'e nga kjoa Pedro, nas'ín tà jè 'nguién-la skat'aà i'nga-la jñà xita xk'én.

¹⁶ Tikoá kjìn xita j'ìi ya Jerusalén xi inchrobà-ne naxandá xi kjiyijòt'aà chraña-la; j'ìiko xita xi xk'én ko jñà xi inima ch'o-la neí nchibeètoòn; ngats'ìi xita koi kjòndaà yijeé-ne.

Kjo'in xi tsatojìn Pedro ko Juan

¹⁷ Jè nò'miì ítjòn ko ngats'ìi xita xi ya báhiytako, jñà xi ya chja-ne it'aà ts'e xita saduceo, kjòchinikeé jñà xita xi tsibíxáya-la Jesús.

¹⁸ Kitsobà'ñó; kiìko; kiskinìs'en ndayá xi ts'e naxandá.

¹⁹ Tanga k'e nga jye kòjñò, jngoò àkjale-la Nainá ijchò kíx'a-la xotjoa ndayá. Tsachrje xita koi; kitsò-la:

²⁰ —Tanguió, tinchajtoò xotjoa ingo ítjòn. Tènojmi yije-là xita naxandá kós'ín kítsajnakon xita it'aà ts'e Cristo.

²¹ K'e nga kiì'nchré 'én koi, nga komà nchijòn, tajñòyaá kiì ya ingo ítjòn, ikjoàn tsibíts'ia nga tsakóya-la xita.

Tik'e-ne chixoña jè nò'miì ítjòn, ngats'ìi xita-la xi ya títsajnako. Kiìchja-la ngats'ìi xitaxá ko xita jchínga ts'e naxandá Israel; ikjoàn kiskinikjaá jñà xita-la Cristo xi títsajna'ya ndayá.

²² Tanga k'e nga ijchò jñà policía, mìkiì kisakò-la jñà xita xi títsajna'ya ndayá; tà k'oaá s'ín inchrobà-ne; kitsjaà okixi nga mì tì yá tjin-ne.

²³ Kitsò:

—K'e nga kòbijchò-jen, ndaà tíchjoajto xotjoa-la ndayá. Jñà xita soldado xi síkinda, yaá nchajto xotjoa, tanga k'e nga kòbitjaàs'en-jen mì tì yá xita tjin-ne iya ndayá.

²⁴ K'e nga kiì'nchré 'én koi, jè nò'miì ítjòn ko nò'miì xi i'nga ko jè xita sko-la policía xi síkinda ingo ítjòn, tà k'oaá komà-la nga mìkiì machiya-la kós'ín komà nga kjoehet'aà kjoa koi.

²⁵ Tik'eé-ne j'ìi jngoò xita xi j'ìi kènojmi, kitsò:

—Jñà xita xi kichinìs'en ndayá ngojña, yaá títsajna ingo ítjòn nga nchi-hokóya-la xita naxandá.

26 K'eé kii jè xita sko-la policia xi síkinda ingo, kjihjtao jña policia xi i'nga nga kiikjaá Pedro ko Juan. Tà kjondaá inchrobako. Jña tsakjón-la xita naxandá tsà ndajo koii'nè nga siik'en.

27 K'e nga j'iiko, chinchá osen ñanda nchijoóya-ne. Jè no'mii ítjòn kitsò-la:

28 —¿A mìtsà k'oas'in ki'mi-nòjen nga jngoò k'a mì tì k'oaá tsò-ne 'én xi kokóya it'aà ts'e Jesús? I'ndeji, kóhokji Jerusalén, jyeé titsachinìsòn yije kjotíxoma-nò; tikoáá mejèn-nò ngajen chinì'nè-nájen nga k'en xita xi 'mì Jesús.

29 Jè Pedro ko xita xi i'nga xi taña tsibíxáya-la Cristo kitsò:

—Isaá 'ño mochjeén nga jè Nainá sikitasòn-lajen mì k'oaá-ne koni xi taxki xita.

30 Jè xi Nainá tsò-la xita jchínga-ná kisikjaáya-la Jesús it'aà ts'e kjoabiyaá, tijè-ne Jesús xi jño kinik'eèn nga tsakat'aà krò.

31 Nainá, 'ño jeya kisikíjnat'aà chrja kixi-la. Xitaxá ítjòn kisikíjna. Tikoáá jè kisikíjna nga jè kochrjekàjiin-ná kjo'in. K'oaá s'in kis'iin Nainá, mé-ne nga jña xi naxandá Israel 'mì-ná sikájnoaá jé-ná; mì tì jé kinchátsji-ná nga siijchàat'aà-ná Nainá jé xi tjín-ná.

32 K'oaá s'in bènójmí-nòjen kjoa koi xi xkoòn ki'ya-najen. Tikoá bènójmí kixi-né jè Inima Tsjeè-la Nainá xi jye kitjoé-la jña xita xi síkitasòn-la Nainá.

33 K'e nga kii'nchré 'én koi, 'ño jchán kòjti-la; skanda mejèn-la siik'en.

34 Ya tijnajiin jngoò xita fariseo xi tikoá xá tjín-la xi 'mì Gamaliel, jè xi okóya kjotíxoma. Ngats'ii jña xita naxandá 'ño ndaà beèxkón xita jè. K'eé tsasíjna-kixi-jiin-la ngats'ii jña xita xi tjín-la xá; kitsjaà okixi nga kàtitjo jngoò tjò ni'ya jña xita xi tsibíxáya-la Jesús.

35 Jè Gamaliel kitsò-la xitaxá xíkjin:

—Jño ngats'ioò xi xita xinguiáá Israel 'mì-ná, ndaà tikítsjeèn mé kjoa xi sikoo jña xita koi.

36 Tikítsjeèn jña nachrjein xi jye tsato, tsibíjnaá jngoò xita xi ki'mi Teudas. K'oaá kitsò nga xita ítjòn-né. Komà-la tsà ñijòn sìndo xita xi kiit'aà-la. Tanga k'e nga kisik'en xita, ngats'ii xita xi kiit'aà-la, kitsjohoba-né. Tà yaá jyehet'aà kjoa.

37 K'e nga komà iskan, jè nachrjein nga kòxkeya xita, tsatsejèn ijngoò xita xi 'mì Judas xi xita Galilea. Tikoáá kjin xita naxandá kiit'aà-la. Tanga k'e nga kinik'en xita jè, tikoáá ngats'ii xita xi ya kiit'aà-la, kitsjohoba yije-né.

38 I'ndeji k'oaá ma-ne koxan-nò, tà tikjehet'aà kjoa. Tjiin'nde-là xita koi nga kàtji-ne. Tsà tà xá ts'e xitaá xi nchis'in kjoehet'aà-né.

39 Tanga tsà xá ts'e Nainá-né xi nchis'in, mìkii kichikjoa-nò nga jño kixkàn-ko; tikindaá yijo-nò tsà koi nachrjein-la, tsà xá-la Nainá titsabixkàn-ko.

40 Ngats'ii xita xi títsajna junta, kòkjeiín-la koni s'in kitsò Gamaliel. K'eé kiichja ijngoò k'a-la jña xita xi tsibíxáya-la Jesús. Ikjoàn tsaja-la. 'Ñó tsibínè-la nga mì tì k'oa s'in kichjaya-ne it'aà ts'e Jesús. Ikjoàn kisikítsajnadeji-ne.

41 Jña xita xi tsibíxáya-la Jesús, 'ño tsja tjín-la k'e nga itjo-ne ni'ya nga jè Nainá kitsjaà'nde nga kitjoé-la kjondaá nga kisikjeiín kjo'in xi kjoa ts'e Jesús.

42 Jña xita koi, mìkii jyò tsibítsajna. Nachrjein inchijòn tsakóya tikoá kiichjaya 'én ndaà-la Nainá ya ingo ítjòn ko xi kj'eji ni'ya nga jè Jesús xi Cristo [jè xi xó kisikasén-ne Nainá].

6

K'e nga itoò xita kitjaàjiin xi kisichját'aà

1 Jña nachrjein koi, k'e nga jye 'ño tímakjin-ya xita xi kota'yàt'aà-la Cristo, jña xita xi chja 'én griego tsibíts'ia nga tsohojét'in jña xita xi chja 'én hebreo,

nga jñà íchjín ka'àn xi ts'e xita griego mì ngàsòn tí'biì-là tsojmì xi kine koni jñà íchjín ka'àn xi ts'e xita hebreo.

² Jñà xita xi tejò ma-ne xi tsibíxáya-là Jesús, tsibíxkóya ngats'ìi xita xi kota'yàt'aà-là Cristo, kitsò:

—Mì-la kii ndaà tjin nga sikijna-jen xá-là Nainá nga mì tì kii kinókjoaya-najen 'én-là Nainá, nga nguì ta koi xá s'en-jen nga xita ima sikjèn-jen.

³ 'Ndsè, chjaájñoò itoò xita x'in xi 'yaà nga ndaà nchisíchá yijo-là, tikoà ndaà tíjìn inima-là Inima Tsjeè-là Nainá, xita xi ndaà kjohítsjeèn tjin-là mé-ne jñà kongatsja xá koi.

⁴ Ngajen, kjit'aà naxrjein kinókjoat'aà-lajen Nainá; tikoà kokóya-jen 'én-là Nainá.

⁵ Jñà 'én koi, ndaà kisaseèn yije-là ngats'ìi xita. K'eé jaàjìn Esteban, jngoò xita x'in xi ndaà mokjeiín-là it'aà ts'e Nainá, tikoà ndaà tíjìn inima-là jè Inima Tsjeè-là Nainá. Tikoà kitjaàjìn Felipe, Prócoro, Nicanor, Timón, Parmenas, Nicolás, jngoò xita Antioquia xi jahatjìya-là nga xita judío komà.

⁶ Jñà xita xi itoò ma-ne chinchá osen nga nguixkon xita xi tsibíxáya-là Jesús. Kò jñà xita xi tsibíxáya-là Jesús kiichjatjì it'aà ts'e Nainá, ikjoàn tsohósòn-là tsja nga kjòngatsja xá.

⁷ Isaá 'ño tsabísòn-isa 'én-là Nainá. Ya naxandá Jerusalén saá 'ño saá 'ño makjìn-ya xita xi kota'yàt'aà-là Cristo. Skanda jñà no'miì, tikoá jyeé kjìn ma-ne xi mokjeiín-là it'aà ts'e Cristo.

K'e nga kindobà'ño Esteban

⁸ Jè Esteban, 'ño ndaà kis'e-là nga'ño kò kjondaà xi it'aà ts'e Nainá. K'oaá komà-ne nga kjìn kjojkón xi okó kjoajeya-là Nainá kis'iìn ya jjiìn naxandá.

⁹ Tjin i'nga xita xi ya chja-ne ni'ya ingo sinagoga ñánda maxkóya xita judío xi jye títsajnadeií-ne, kò xita Cirene, xita Alejandría, xita Cilicia kò xi ján i'nde-là Asia; tsibíts'ia nga tsakátikjoó kò Esteban.

¹⁰ Tanga xita koi, mìkii kisikijne, nga jè Esteban, koó kjohítsjeèn-là Inima Tsjeè-là Nainá kiichja.

¹¹ K'eé tsohótsji xita xi tsibíchjí-là nga kitsjaàt'in 'én ndiso; kitsò:

—Kina'yà-lajen Esteban nga chjajno-là Moisés kò Nainá.

¹² K'oaá s'in komà-ne nga kòjti-là jñà xita naxandá kò xita jchínga kò xita xi okóya kjotíxoma-là Nainá xi kiskii Moisés. Kitsobà'ño Esteban, kiikò ñánda títsajna xitaxá ítjòn xi joóya-ne kjotíxoma.

¹³ Ijchòkò xita ndiso xi kitsjaàt'in 'én, kitsò:

—Xita jè, mìkii jyò bìjna, kjit'aà naxrjein chjajno-là jè Ingo Tsjeè-là Nainá kò kjotíxoma xi kiskii Moisés.

¹⁴ Jyeé kina'yà-lajen nga tsò nga jè Jesús xi Nazaret ts'e, sikkixòña Ingo-là Nainá tikoà sikkjatjìya-là kjotíxoma xi 'né koni s'in tsakóya-ná Moisés.

¹⁵ Ngats'ìi xitaxá xi ya títsajna, k'e nga kiskoò'an Esteban, k'oaá s'in kijtseè isén-là koni kji isén-là àkjale.

7

'Én xi kiichja Esteban nga tsasikò yijo-là

¹ Jè xita sko-là no'miì kiskònanguì-là Esteban kitsò-là:

—¿A kixí kjoa nga k'oa tjin jé xi ónè-lè xita?

² Jè Esteban kitsò:

—'Ndsè, kò xi xita jchínga 'mì-nò, tiná'ya-ná: Jè Nainá, xi 'ño jeya tíjna, yaá ijchòkon ñánda tíjna xita jchínga-ná Abraham k'e nga tákó ya tíjna

Mesopotamia, k'e nga tikj'eè bijchó kijna ján naxandá Harán. Ko jè Abraham kijtsee tsejèn-né kó kji Nainá.

³ K'eé kiichja Nainá, kitsò-la: “Titjoiin nangui-lè; tikítsajnei xita xinguui; t'in kijni ya nangui ñánda 'an kokoò-lè.”

⁴ Jè Abraham, itjokàjiin nangui-la xita Caldea; ján ki kína nangui Harán. K'e nga k'en na'èn-la, Nainá j'iiko i i'nde jè ñánda titsajnaá i'nde.

⁵ Nainá, nimé i'nde kitsjaà kjotjò-la; ni tsà tà itsé ñánda kosijnasòn jngoò ndsoko. Tanga k'oaá s'ín kitsjaà-la tso'ba nga kitsò-la nga ts'eé koma ko ts'eé xita tje-la nita mé nachrjein-ne. Nachrjein koi, kj'eé ixtií tjin-la jè Abraham.

⁶ Nainá k'oaá s'ín kitsò-isa-la: “Jña tje-lè, xita chi'ndaá koma; ñijòn sìndo nó xìn naxandá siijchá yijo-la nga siikjeiin kjo'in.”

⁷ Nainá kitsò: “Aán tsjaà-la kjo'in jè naxandá ñánda chi'nda kítsajna; k'e nga koma iskan, kitjokàjiin-né nangui jè. Kjinchrobà ijngoò k'a-ne ijndé, ko íí i'nde jè, skoexkón-na.”

⁸ Nainá jngoò kjoa tsibindaàjiin-ko Abraham nga sit'aà chiba-la yijo-la xita kjoa ts'e circuncisión. Abraham, kis'e jngoò-la ki'ndí xi Isaac ki'mì; k'e nga ijchò jiin nachrjein nga kits'iin, tsibít'aà chiba-la. Isaac kis'e-la ki'ndí xi 'mì Jacob; k'oaá tis'ín kisiko. Jacob, kis'e-la ixti xi tejò ma-ne tje-la xita jchínga-la naxandá Israel. K'oaá tis'ín tsibít'aà chiba-la.

⁹ Jña ixti-la Jacob, xi xita jchínga-ná, kjòxítakòn-keè jè 'ndse xi 'mì José; ikjoàn tsatijna nga kiiko xita xi tsatse ján nangui Egipto. Tanga Nainá kisikinda José.

¹⁰ Nainá kisichját'aà-la nita mé kjoa xi kis'e-la José. Kitsjaà-la kjohítsjeèn, kitsjaà-la kjondaà nguixkon faraón xi xitaxá ítjòn tina ján naxandá Egipto. Jè Faraón kisikijna José nga jè tsatixoma-la naxandá Egipto, tikoá jè tsatixoma ni'ya-la faraón.

¹¹ Jña nachrjein koi j'ì kjinchrá kóhokji nangui Egipto ko i'nde Canaán; tsee kjo'in kis'e-la xita; jña xita jchínga-ná tsjin tsojmì xi kine.

¹² K'e nga kiì'nchré Jacob nga tjin tsojmì xi ma chine ján Egipto kisikasén nga kiikjaá ítjòn tsojmì ixti-la jña xi xita jchínga-ná.

¹³ Xi komà jò k'a nga kiikjaá tsojmì, José tsakó-la yijo-la xikjín nga 'ndse ma-ne. Faraón k'oaá s'ín komà-ne kijtseèxkon, ñánda nchrobát'aà-ne tje-la José.

¹⁴ José kiskinikjaá Jacob xi na'èn-la ma nga kjitjingui-la ján Egipto. Ngats'ìi xita xikjín, jàn kaàn ko chrj'oòn ma-ne.

¹⁵ K'oaá s'ín komà-ne nga kiì Jacob ján Egipto; yaá k'en; tikoá yaá k'en ngats'ìi ixti-la jña xi xita jchínga-ná.

¹⁶ Xi komà iskan, kiiko nindaà-la Jacob ko ts'e ti-la nga kiì kíhjiin jngoò ngajo itsjó ján Siquem; i'nde ñánda tsatse Abraham xi tsatijna ixti-la Hamor.

¹⁷ K'e nga jye kjòchraña nachrjein nga kitasòn 'én koni s'ín kitsjaà tso'ba Nainá koni s'ín tsajoókjoò Abraham, jè naxandá Israel, 'ño kòkjìn-ya jña xita-la ján Egipto.

¹⁸ Ijchò nachrjein nga ijngoò xita kisakò xi xita sko-la tsibijna ján Egipto; tanga xita jè, mikiì beèxkon José.

¹⁹ Xitaxá ítjòn jè, tsibíts'ia nga kiskoònachan-la xita jchínga-ná nga kijtseètoòn; kis'iin-la kjo'ño nga kitsjeiin takòn ngats'ìi ndí ixti-la mé-ne nga kàtiyaá yije-ne nga kàtachija tje-ne.

²⁰ Tijña-ne nachrjein koi, kits'iin Moisés. Ki'ndí jè, 'ño ndaà kji isén-la. Jàn sá kisikijna'ma ni'ya-la xita jchínga-la.

²¹ K'e nga ijchò síkijna ijjiin nandá, jè tsòti-la faraón kiskoétjò, kisijchá koni tsà ki'ndí ts'e.

22 Jè Moisés kiskoòta'yà ngats'iì kjoachjine xi tjin Egipto. 'Ñó ndaà kjohítsjeèn xi kis'e-la, ndaà kiichja tikoá ndaà kis'iìn.

23 'Moisés, k'e nga jye tjin-la ichán nó k'oaá s'ín tsi'beé-la ikon nga mejèn kiikon xita naxandá Israel xikjín.

24 Moisés, k'e nga kijtsee nga ch'o tìniko jngoò xita Israel xikjín, tsasiko nga kisik'en xita Egipto mé-ne nga kòjndà-ne.

25 Moisés, k'oaá s'ín tísikítsjeèn, maá-la tsà tímachiyaá-la jña xita Israel xikjín nga jè Moisés siikjeén Nainá nga siikítsajndeí; tanga jña xita Israel mikì kjòchiya-la.

26 K'e nga komà inchijòn, Moisés kijtsee jò xita Israel xi nchikjaán-kjoò, mejèn-la kotekjáya-la, kitsò-la: “Jñò xi 'ndsè chiba, ¿mé-ne bixkàn-ko-nò xinguiò?”

27 Jè xita xi tíkjaán-ko xikjín, k'eé kù jahitjen Moisés, kitsò-la: “¿Yá xi xitaxá kásikjina-lè ko xi ixkàlè kàtsò-lè xi it'aà tsajen?”

28 ¿A tikoá mejèn-lè nga sik'en-ná koni s'ín kinik'in ngojña jè xita Egipto?”

29 Moisés, k'e nga kiì'nchré 'én koi, tsanga-né; ján kiì kjna i'nde ñánda 'mì Madián. K'oaá s'ín tsibijna koni jngoò xita xi kjìin i'nde-la; jò ixti kis'e-la.

30 'K'e nga jye ijchò ichán nó nga tjina Madián, Moisés, tsatsejèn jngoò-la àkjale-la Nainá xi ya síjnajiìn ni'ín ñánda títi jngoò yá na'yá ya chrañat'aà-la nindoò Sinaí, ya i'nde it'aà xìn ñánda nangui kixì choòn.

31 Moisés, k'e nga tìkotsejèn-la jè yá na'yá xi títi, tà kjòxkón-la koni s'ín tíma; k'e nga isa chrañat'aà kiì kasijna nga isa ndaà skoe, kiì'nchré jta-la Nainá nga kiichja-la, kitsò:

32 “An-ná xi Nainá tsò-na xita jchínga-lè, Nainá tsò-na Abraham, ko Isaac, ko Jacob.” Tanga jè Moisés tà tsatsé-né nga 'ñó kitsakjòn, mikì kitsò-ikon nga kiskoòtsejèn-la.

33 Jè Nainá kitsò-la Moisés: “Chjaàxìn xojté xi titsjayi; jè i'nde ñánda tisijnasoìn, i'nde tsjeè-né.

34 Ndaà tibe kjo'in xi nchisíkjeíin xita-na xi títsajna Egipto. Jyeé ki'nchrè-la nga nchihojét'aà-na; koií xá kòbitjojen-na nga siikítsajndiaá. Koií xá tìchjà-lè, nchroboí, ján siikasén-lè Egipto.”

35 'Jña xita Israel nas'ín tsachrjekàngui Moisés k'e nga kitsò-la: “¿Yá xi xitaxá kásikjina-lè ko xi ixkàlè kàtsò-lè?”, tanga jè sobá Nainá kisikasén ján naxandá Egipto koni jngoò xitaxá ítjòn xi kisikítsajndeí xita Israel. Nainá kisikjeén jè àkjale xi tsatsejèn-jìin yá na'yá xi títi.

36 Jè Moisés xi tsachrjekàjìin xita Israel ján naxandá Egipto. Nainá kisikjeén Moisés nga 'ñó kjìin kjòxkón kis'iìn kóhokji Egipto, ko ya Ndáchikon Inì, kóhokji ñánda nangui kixì choòn nga ichán nó chinchimaya ndiyá.

37 Tijè-ne Moisés xi kitsò-la jña xita Israel: “Nainá kochrjekàjìin jngoò xi tì xita xinguiò-nò, jè xi kichja ngajo-la Nainá koni 'an.”

38 Tikoá tijè-ne Moisés xi tsibijnako xita naxandá Israel ya ñánda nangui kixì choòn, jè xi tsohóko àkjale ya nindoò Sinaí, jè xi tsajmeìko xita jchínga-ná nga kisikatoya-la 'én xi kitsjaà-la àkjale; tikoá tijè-ne xi kitjoé-la 'én-la Nainá xi síkijnakon-ná mé-ne komà kisikatoya-ná jña 'én.

39 'Tanga jña xita jchínga-ná, tsachrjenguií 'én xi kitsjaà Moisés, mikì kisikitasòn. K'oaá s'ín kisikítsjeèn jìin inima-la, mejèn kiì jngoò k'a-ne ján Egipto.

40 Kitsò-la jè Aarón: “Tindaà i'nga-ná nainá xi kjiko-ná. Jè Moisés xi tsachrjekàjìin-ná ján nangui Egipto, mikì 'yaá mé xi komà-la.”

⁴¹ K'eé tsibíndaà jngoò xkósòn xi nainá kitsò-la xi isén-la nchraja ki'ndí kji; kisik'en cho kjotjò xi kitsjaà-la jè nchraja nga kijtseèxkón, ikjoàn tsibíjna jngoò-la s'eí xi it'aà ts'e xkósòn xi tijnà tsibíndaà-ne.

⁴² Koií kjoa-la tsasit'aaxìn Nainá it'aà ts'e xita Israel. Kitsjaà'nde-la nga kijtseèxkón yije ni'ño xi tjin ngajmii. K'oaá s'ín tíchja jè xojon xi kiskii jña xita xi kiichja ngajo-la Nainá nga tsò: Jño xi xita naxandá Israel tsajòn, k'e nga ichán nó tsitjaàyaà ndiyá ya ñánda nangui kixi choòn, kò kinik'eèn cho nga mejèn-nò kits'iì kjotjò-ná, mìtsà 'an kiyaxkón-ná.

⁴³ Majìn, ta saá kichijeèn ni'ya nikje-la Moloc, kò ni'ño ts'e Renfán xi nainá 'mì-là; jña isén xi tijnò tsibíndaà-nò nga kiyaxkón. Koií kjoa-la nga kochrjekàjiìn-nò i'nde tsajòn. Ján siikasén-nò ñánda nga isa kjiìn-la Babilonia.

⁴⁴ 'Ya ñánda nangui kixi choòn, jña xita jchínga-ná kis'e-la Ni'ya Tsjeè xi nikje ñánda kjiyijòya kjotixoma-la Nainá. K'oaá s'ín kisindaà koni s'ín tsatixoma-la Nainá jè Moisés k'e nga kitsò-la nga kátindaà jngoò ni'ya koni kji isén-la ni'ya xi jye jè tsakó-la.

⁴⁵ Ni'ya tsjeè jè xi nikje, jña xita jchínga-ná kjòngatsja; jña xita Israel xi tjiko Josué, j'iikò ni'ya jè, k'e nga jahas'en nangui ijndé ñánda Nainá kitsjaà-la kò tsachrjekàjiìn nangui-la jña xita naxandá xi kjeí. Ni'ya jè, yaá kisijna skanda naxrjein ts'e xitaxá ítjòn xi David ki'mì.

⁴⁶ Nainá, 'ño ndaà kisaseèn takòn David. Kò jè David mejèn-la koìndaà jngoò-la ni'ya ñánda jeya kíjna Nainá xi beèxkón jña xita tje-la Jacob.

⁴⁷ Tanga jè xitaxá ítjòn xi ki'mì Salomón, jè xi tsibíndaà jngoò-la ni'ya Nainá.

⁴⁸ Nainá xi 'ño nga tíjna, mìtsà ya tíjnaya ni'ya xi xita bíndaà. Jè xita xi kiichja ngajo-la Nainá kitsò:

⁴⁹ Jè ngajmii, jè íxile-na ñánda otixoma; jè isò'nde, k'oaá ngaya-la koni jngoò ískon ñánda nchasòn ndsokoaà. ¿A komaá-nò nga kíndaà jngoò-ná ni'ya ñánda siikjaya? tsò Na'èn-ná.

⁵⁰ ¿A mìtsà 'an sobà xi tsibíndaà yije tsojmì koi?

⁵¹ Jè Esteban kitsò-isa-la:

—Jño, kjit'aà naxrjein, 'ño tájaajiìn tjin inima-nò, kò mìkii ndaà na'ya koni s'ín jña xi mìtsà xita-la Nainá. Kjit'aà naxrjein kondra onguí-là Inima Tsjeè-la Nainá koni kis'iìn jña xita jchínga-nò.

⁵² Nijngoò xita xi kiichja ngajo-la Nainá xi mì kondra kii-la; kisik'en jña xita xi j'iì kénojmi it'aà ts'e jè xita kixi xi tjinè-la nga kjoí. I'ndeí, nga jye j'iì jè xita kixi, yaá kinìngatsja jña xitaxá nga kisik'en.

⁵³ Jño, nas'ín it'aà ts'e àkjale-la Nainá kitjoé-nò kjotixoma, tanga mìkii nìkitasòn.

K'e nga k'en Esteban

⁵⁴ K'e nga kii'nchré 'én xi kiichja Esteban, 'ño jti komà-la jjiìn inima-la, chiba-la kinené ni'ño xi kondra ts'e Esteban.

⁵⁵ Jè Esteban, 'ño ndaà tíjin inima-la Inima Tsjeè-la Nainá. Kiskoòtsejèn ngajmii; kijtsee kjoajeya-la Nainá nga Jesús ya síjnat'aà chrja kixi-la Nainá.

⁵⁶ Kitsò Esteban:

—Tíbe-ná ngajmii nga tix'á; jè xi Ki'ndí-la Xita tsò-la yijo-la yaá síjnat'aà chrja kixi-la Nainá.

⁵⁷ Ngats'iì xita koi, tsibíchjoajto líká-la; ikjoàn 'ño kiskindàya; jngoò k'a kii kóhotjín nga jahatjen Esteban;

⁵⁸ tsachrjekàjiin naxandá; ko jñà xita ndiso xi kitsját'in 'én xi kondra kii-la Esteban, yaá tsibítsajnangui ndsoko jñà nikje-la ñánda síjna jngoò xita ixti xi 'mì Saulo mé-ne nga komà tsibínè-ne ndajo nga kisik'en.

⁵⁹ K'e nga tísiné ndajo, Esteban tíchjat'aà-la Nainá, kitsò:

—Na'èn Jesús, chjoétjoi inima-na.

⁶⁰ Esteban tsasìjna-xkó'nchi, ikjoàn 'ño kiichja kitsò:

—¡Na'èn, kì kindaá 'nì jé-la xita koi!

K'e nga jye okitsò, k'en.

8

¹ Jè Saulo, nga ya síjna tikoáá kisìjngoò ikon nga kinik'en Esteban.

Mé kjoa-ne nga jè Saulo kitsobà'ño xita-la Cristo

Kjòts'ia-ne nachrjein jè nga 'ño kiitjingui kondra-la xita ngats'ii xita naxandá-la Cristo ján Jerusalén. Kóhotjín xita-la Cristo kitsjohoba kóhokji nangui Judea ko Samaria. Tà jñà tsiningui-ne xita xi tsibíxáya-la Jesús.

² Tjín i'nga xita xi beèxkón Nainá, jñà tsibíhijin Esteban. 'Nó kiskindàyakeè.

³ Tanga jè Saulo, 'ño kiitjingui kondra-la xita naxandá-la Cristo. Xki xi ján ni'ya jahas'en nga kjo'ño ochrje íchjín ko íchjá, ikjoàn kinís'en ndayá.

Mé xi komà ya nangui Samaria k'e nga kiichjaya 'én-la Nainá jè Felipe

⁴ Jñà xita xi kitsjohoba, xki xi ján kii nga kisika'bí 'én ndaà-la Nainá xi kjoa ts'e Cristo.

⁵ Jè Felipe, k'e nga ijchò naxandá Samaria, yaá tsibénojmi it'aà ts'e Cristo [xita xi xó kisikasén-ne Nainá].

⁶ Jñà xita Samaria nga kjin ma, k'e nga kii'nchré tikoá kijtseè jñà kjoxkón ndaà xi kis'iin Felipe, kóhotjín, isaá ndaà kii'nchré-isa koni s'in tsibénojmiya-la.

⁷ Kjín xita xi inima ch'o-la neíí tíjin inima-la kjòndaà-ne. Jñà inima ch'o-la neíí, 'ño kjindáya k'e nga bitjoiin inima-la xita. Tikoáá kjín xita ima kjòndaà-ne xi mikii ma síhiníyá yijo-la ko xi tsá'yá kjoàn.

⁸ K'oaá ma-ne nga jñà xita naxandá jè, 'ño tsja kis'e-la.

⁹ Ya Samaria tsibìjna jngoò xita xi Simón ki'mì. K'e nga sa ítjòn, maá-la bíndaà. Kjín nó kiskoònachan-la xita xi ya i'nde-la nga chincháxkón-la nga kitsò: “An 'ño ndaà machiya-na.”

¹⁰ Ngats'ii xita ixti ko xita jchinga, ndaà kii'nchréñijon-la; kitsò:

—Jè xita jè xi tse nga'ño tjín-la it'aà ts'e Nainá.

¹¹ Koií kjoa-la nga ndaà kii'nchréñijon-la nga jye kò kjín nó konachan-la nga bincháxkón-la nga 'ño ndaà ma-la bíndaà.

¹² Jñà xita, k'e nga kòkjeín-la 'én ndaà-la Nainá kó s'in otíxoma Nainá ko it'aà ts'e Jesucristo xi jè Felipe tibeñojmí, tsibíts'ia nga komà bautizar íchjín íchjá.

¹³ Skanda tjìjè-ne Simón tikoáá kòkjeín-la; ikjoàn komà bautizar. Nándá tsajmeè Felipe, yaá tsajmeiiko Simón. Tà k'oaá ma-la nga tibeè kjoxkón ndaà xi tís'in Felipe ko kjoa xi okó kjoa jeya-la Nainá.

¹⁴ Jñà xita xi tsibíxáya-la Jesús xi títsajna Jerusalén, k'e nga kii'nchré nga jñà xita Samaria jyeè kòkjeín-la 'én-la Nainá, kisikasén jè Pedro ko Juan.

¹⁵ Jñà xita koi, k'e nga jye ijchò Samaria, tsibítsi'batjì jñà xita xi jye kòkjeín-la mé-ne nga tjoé-la jè Inima Tsjeè-la Nainá.

¹⁶ Nga jè nachrjein jè, ni saá jngoò tjoé-la Inima Tsjeè-la Nainá. Sà tà jè it'aà ts'e Na'èn-ná Jesús komà bautizar xita koi.

¹⁷ Jè Pedro ko Juan, k'eé tsohósòn-la tsja, ikjoàn kitjoé-la Inima Tsjeè-la Nainá.

¹⁸ Jè Simón, k'e nga kijtsee nga jñà xita xi tsibíxáya-la Jesús, óson-la tsja jñà xita, nitoón tjoé-la Inima Tsjeè-la Nainá, jè Simón tsibít'aà-la ton jñà xita-la Cristo,

¹⁹ kitsò-la:

—'An, tikoá tjiì-ná nga'ño jè, mé-ne nita yá xita-ne xi kosòn-la ndsaa tikoá tjoé-la Inima Tsjeè-la Nainá.

²⁰ Jè Pedro kitsò-la:

—¡Kàtiyaàkoji ton-lè! Ngaji, k'oaá s'ín nìkítsjiìn tsà maá bindaà-ná kjojtò xi tsjá Nainá.

²¹ Ngaji mikìì tji'nde-lè it'aà ts'e xá jè nga jè inima-lè mì kixi tíjna nguixkon Nainá.

²² Tikájnoi jé-lè, nga ch'o tsò ya jjiìn inima-lè, kì tì jé binchaàtsji-ne. Tijét'aà-la Nainá tsà koi nachrjein-la sijnchàat'aà-lè jé-lè.

²³ Be-ná nga jè kjoaxitakòn xi tíjiìn inima-lè kò jè kjoach'o-lè mìkìì tsjá'nde-lè nga ndaà 'nì.

²⁴ Jè Simón k'eé kitsò:

—Sjé't'aà-nò, titsi'ba-la Nainá xi it'aà ts'an mé-ne nga mì k'oa s'ín komat'ian ngats'ii kjoá xi k'oas'ín titsa'mi-ná.

²⁵ Jñà xita xi tsibíxáya-la Jesús, k'e nga jye kitsjaà 'én it'aà ts'e Cristo tikoá tsakóya 'én ndaà-la Nainá, kii ìjngoò k'a-ne ján Jerusalén. K'e nga chinchimaya ndiyá, kjiìn xita naxandá jtobá xi chja-ne Samaria tsibénojmi-la 'én ndaà-la Nainá xi kjoá ts'e Cristo.

Jè Felipe kò jngoò xita Etiopía

²⁶ Xi jye komà, jngoò àkjale-la Nainá kiichja-la Felipe, kitsò-la:

—Tisítjiìn, t'in kixii ndiyá xi bitjokàt'aà-ne Jerusalén, fijen bijchó skanda Gaza.

(Ndiyá jè, yaá fahato ya i'nde it'aà xìn ñánda nangui kixi choòn.)

²⁷ Felipe, tsasítjen, kii; ya iya ndiyá kisatiikjoò jngoò xita x'in ts'e Etiopía xi 'ño 'nga xá tjín-la xi jye kjòxkii-la nga mì tì íchjín sji's'in-ne; tesorero tjín-la ts'e chjoón sko-la Etiopía xi 'mì Candace. Jerusalén j'ii-ne xita jè nga kii ingo ñánda beèxkón Nainá.

²⁸ Xita jè, k'e nga tíchrobá-ne nangui-la, tíjnaya carreta-la; túbíxkejiìn xojon xi kiskii Isaías, xita xi kiichja ngajo-la Nainá.

²⁹ Jè Inima Tsjeè-la Nainá kitsò-la Felipe:

—T'in tjingui-la carreta jè, tsjahijtakoji.

³⁰ Felipe nitoón kiitjingui-la, kii'nchré-la jè xita nga túbíxkejiìn xojon xi kiskii Isaías, xita xi kiichja ngajo-la Nainá; ikjoàn kiskònangui-la kitsò-la:

—¿A fiyaá-lè kó s'ín tíchja xojon xi túbíxkejiìn?

³¹ Jè xita etiope kitsò:

—¿Kó s'ín koma kjiya-na nga mì yá bénojmiya-na? K'eé tsibítsi'ba-la Felipe nga tsijin-jno carreta; yaá tsibijnayako.

³² Jè Xojon-la Nainá xi túbíxkejiìn ts'e Isaías tsò-né:

Kiiko koni jngoò orrè nga kii sík'en;

k'oaá ngaya-la koni jngoò orrè ki'ndí xi mìkii kjindáya k'e nga tísijn-la,

k'oaá s'ín mìkii kiichja k'e nga tsatojiìn kjo'in.

³³ K'e nga tsachrjekàngui xita, mì kixi kisindaàjiìn-la.

Nga mì yá xita tje s'e-la, niyá xi sikkítsjeèn,

nga jè, kinik'en-né i'isò'nde.

³⁴ Jè xita etiope kitsò-la Felipe:

—T'iiìn kjondaà. Tènojmiya-ná yá-né xi k'oas'ín títò-la jè Isaías; ¿a kj'eíí xita-né, a xi tijè-ne yijo-la?

³⁵ Felipe tsibíts'ia_{ko}-ne jè xo_{jon} xi túbíxke_{jìin} xítà etiope; tsibéno_{jmí} yije-la ìt'aà ts'e 'én ndaà-la Nainá xi kjoà ts'e Jesús.

³⁶ Koni s'ín nchifiya ndiyá, ijchò jngoò ì'nde ñánda t_{jín} nandá, kitsò xítà etiope:

—Ì'nde jè, t_{jín} nandá; ¿a mìtsà ndaà s'e tsà s'iaàn bautizar yijo-na?

³⁷ Felipe kitsò-la:

—Tsà koó in_{ima}-lè nga ndaà mokjeí_{in}-lè koma-né.

Xítà jè kitsò:

—Mokjeí_{in}-na nga Jesús, jè xi Cristo xi Ki'ndí-la Nainá.

³⁸ Kò kitsjaà okixi nga tsasí_{jna} carreta, ikjoàn tsitajen ingajò, jahas'en-jìin nandá, jè Felipe kis'i_{in} bautizar.

³⁹ K'e nga jye itjokà_{jìin}-ne nandá, Felipe, tà nitoón kichijà; jè In_{ima} Tsjeè-la Nainá kiìkò; mì tì kiì kijtseè_{xkon}-ne xík_{jín}; tanga jè xítà etiope, k'e nga tífi ya ndiyá, tsjaá jchán t_{jín}-la.

⁴⁰ Jè Felipe k'e nga kjòch_{iya}-la jye ya tíjna naxandá Azoto; xkì xi ján naxandá tsibéno_{jmí} 'én ndaà-la Nainá xi kjoà ts'e Cristo skanda k'e nga ijchò naxandá xi 'mì Cesarea.

9

Kós'ín komà k'e nga jè Saulo kòkjeí_{in}-la ìt'aà ts'e Cristo (Hechos 22:6-16; 26:12-18)

¹ Saulo, xkì xi ján ì'nde binchá_{xkón}-la xítà xi kota'yàt'aà-la Cristo nga mejèn-la siìk'en. K'oaá ma-ne nga kiìkon jè no'miì í_{tjòn},

² nga kisìjè-la xo_{jon} xi t_{jín}-la nga'ño xi k'oa ts'e jñà ni'ya ingo sinagoga ján Damasco, mé-ne nga koma tso_{bà}'ño-ne xítà ích_{jín} kò ích_{já} xi fit'aà-la jè ndiyá xit_{se}-la Cristo; ikjoàn kjinchrobà_{kò} Jerusalén nga siìkítsajna ndayá.

³ K'e nga nchifiya ndiyá nga jye kjòchrañàt'aà-la naxandá Damasco, tà nitoón kjòhiseèn jngoò itjandiì-la jngoò ni'ín xi inchrobà-ne ngajmiì.

⁴ Jè Saulo kiskaà_{jndoòt}'aà nangui, ikjoàn kiì'nchré-la 'én xi kiìch_{jajìin} isén xi kitsò:

—Saulo, Saulo, ¿mé-ne 'an tì'mìt_{jingui} kondra-ná?

⁵ Saulo kitsò:

—¿Yá-né ngaji, Na'èn?

Jè xi tích_{ja} kitsò:

—An-ná Jesús xi tì'mìt_{jingui} kondra-ná. Tijí t_{yatoòn}-ne yijo-lè, k'oaá ngaya-la koni tsà nchra_{ja} tsjón-la jè yá xi bínès'en-la nei-la.

⁶ Saulo, tsí tsatsé-né; tsí ndaà kitsak_{jòn}; k'ée kitsò:

—Na'èn, ¿mé xi mejèn-lè nga 'an s'iaàn?

Jè Na'èn-ná kitsò-la:

—Tisít_{jìin}, tít_{jás}'en-jìin naxandá; yaá s'eno_{jmí}-lè mé xi s'iin.

⁷ Jñà xítà xi tjikò Saulo, tà kisinchaà-né nga 'ño kitsak_{jòn}; kiì'nchré-la jè xi tích_{ja} tanga mìkiì kijtseè_{xkon} yá xi tích_{ja}.

⁸ Jè Saulo, tsasít_{jen}-t'aà-ne nangui, tanga k'e nga kiskí_{x'a} xkon mì tì kiì kjòtse_{jèn}-la. Tà jñà xítà xi tjikò kitsobàt'aà, kiìkò ján Damasco.

⁹ Ján nachr_{jein} tsibì_{jna} nga mì tì kiì kotse_{jèn}-la; nímé xi kiskine tìkoà nímé xi kits'iì.

¹⁰ Ya naxandá Damasco tíjna jngoò xítà xi kota'yàt'aà-la Cristo xi 'mì Ananías; Nainá kiìch_{ja}-la nga tsatse_{jèn} jngoò-la kjoà koni tsà nijñá tí'biì-la, kitsò-la:

—¡Ananías!

Kiìch_{ja} Ananías kitsò:

—¿Mé-ne Na'èn? ¿Mé xi mejèn-lè?

11 Jè Nà'èn-ná kitsò-là:

—Tísítjiin, t'in jè calle xi 'mì Calle Kixi, ya ni'ya-là Judas; ya tinchátsji jngoì xita xi 'mì Saulo xi ya i'nde-là Tarso. I'ndeì, tíbítsi'ba-né.

12 Saulo jyeé kòbeè jngoò kjoa koni tsà nijña tí'biì-là xi tsò: jngoò xita xi 'mì Ananías kòbijchókon nga kòhòsòn-là tsja nga kòmandaà jngoò k'a-ne xkon.

13 Ananías, k'e nga kii'nchré kitsò:

—Nà'èn, tíjiiin-na, kjin xita jye tsibénojmí-na nga 'ño ch'o kjoàn xita jè; jè-né xi 'ño tibeètoòn xita tsiji ján Jerusalén.

14 I'ndeì koií xá j'ii-ne skanda ijndé, tjín-là okixi it'aà ts'e no'miì ítjòn nga tsoba'ño ngats'ii xita xi mokjeiín-là it'aà tsiji.

15 Nainá kitsò-là Ananías:

—Tich'oín xita jè; xó jaàjiiin-na; k'oaá s'ín kochjeén-na nga jè kichjaya it'aà ts'an nga tíjtsa isò'nde nguixkon ngats'ii xita xi mìtsà xita judío kò xitaxá ítjòn-là, tikoá jña xi xita Israel.

16 'Aán kokoò yije-là kjo'in xi 'ño tse sikkjeiín xi kjoa ts'an.

17 Ananías kii'ñánda tíjna Saulo; jahas'en ni'ya. Tsohòsòn-là tsja, kitsò-là:

—'Ndsè Saulo, jè Nà'èn-ná Jesús xi kiichja-lè ya iya ndiyá k'e nga tjinchroboí, jè kàsikasén-na nga kotsejèn jngoò k'a-lè tikoá sijiin inima-lè Inima Tsjeè-là Nainá.

18 Saulo, nitoón kitjaàxìn-là xkon xi koni kjoàn chrjoa ton-là tin. Ikjoàn kjotsejèn jngoò k'a-la. K'eé tsasítjen, ikjoàn komà bautizar.

19 Saulo, tsakjèn; ikjoàn kis'e jngoò k'a-la nga'ño. Tsibijnako chiba nachrjein jña xita xi kota'yát'aà-là Cristo xi títsajna Damasco.

Kós'ín komà nga jè Saulo kiichjaya 'én-là Cristo

20 Saulo, nitoón tsibíts'ia nga kiichjaya it'aà ts'e Jesús ya ngats'ii ni'ya ingo sinagoga nga jè Jesús, jè xi Ki'ndí-là Nainá.

21 Ngats'ii xita xi kii'nchré-là tà kjòxkón-là; kitsò-là xikjín:

—¿A mìtsà jè xita jè xi tsangatjingui-là xita ján Jerusalén, jña xi mokjeiín-là it'aà ts'e Jesús? ¿A mìtsà tikoá koií xá j'ii-ne ijndé nga ndayá kjiko yije xita koi, ikjoàn siingatsja no'miì ítjòn?

22 Tanga Saulo, isaá 'ño tse nga'ño tísiijin inima-là nga chjaya. Jña xita judío xi títsajna Damasco, skanda mì tì kii beè-ne kós'ín sikkítsjeèn koni s'ín tsakóya Saulo nga ngui 'én kixi-né nga Jesús, jè xi Cristo [jè xi xó kisikasén-ne Nainá].

K'e nga jè Saulo tsanga-là xita judío

23 Nga jye komà kjin nachrjein, jña xita judío, tsajoóya-ne nga sikk'en Saulo.

24 Tanga jè Saulo kii'nchré koni s'ín tsajoóya-ne nga jña xita judío, kò nachrjein kò nitjen kisikinda, tsibítsajnajto xotjoa-là naxandá nga mejèn-là sikk'en.

25 Tanga jña xita-là Saulo, k'e nga jñò, kiiko, kisikijnaya jngoò nisiyá xi je kji; ikjoàn kiskinìs'en-kjá ñánda tix'á chiba jè chrjó xi tjíndii-là naxandá kò yaá kiskinìjen-jno jè chrjó, mé-ne komà tsanga-ne.

K'e nga tsibijná Jerusalén jè Saulo

26 Saulo, k'e nga ijchò-ne ján Jerusalén, mejèn-là nga ya koahijtako jña xita xi kota'yát'aà-là Cristo, tanga ngats'ii xita koi, tà kitsakjòn-là, nga mikii kòkjeiín-là tsà kixi kjoa nga tikoá ya kota'yát'aà-là Cristo.

27 Tanga jè Bernabé k'eé kiiko ñánda títsajna xita xi tsibíxáya-là Jesús. Tsibénojmí-là nga jyeé jahatjìya-là k'e nga kijtseè Nà'èn-ná Jesús nga kiichja sobà-là ya iya ndiyá k'e nga tífi Damasco; tikoáá tsibénojmí-là nga ján Damasco 'ño ndaà kiichja it'aà ts'e Jesús, mikii kitsakjòn.

²⁸ Saulo, yaá tsibìjnako jñà xità xi tsibíxáya-la Jesús; yaá tsajmeiiko Jerusalén. Mikì kitsakjòn nga kiichjaya it'aà ts'e Jesús.

²⁹ N'ó kiichjako jñà xità judío xi 'én griego chja nga tsajoókjoòko xíkjin; tanga jñà xità koi tsohótsji'nde-la kó s'ín siiko nga mejèn-la siik'en Saulo.

³⁰ Jñà xità xi 'ndse joó it'aà ts'e Cristo, k'e nga kiì'nchré 'én koi, kiiko Saulo ján Cesarea, ikjoàn kisikasén skanda ján Tarso.

³¹ Ngats'ii xità naxandá-la Cristo, 'nchán tsibìtsajna kóhótjin naxandá xi chja-ne nangui Judea, Galilea ko Samaria; ni tì mé kjoasii kis'e-ne. Kis'e-isa-la nga'ño ts'e inima-la nga isa ndaà kijtseèxkón Nainá; jè Inima Tsjeè-la Nainá isaà ndaà tsasiko nga isa kjìn komà xità-la Cristo.

Kós'ín komà k'e nga kjòndaà-ne Eneas

³² Jè Pedro, k'e nga tsajmeèsòn i'nde koi, tìkoaá kiikon xità-la Cristo xi títsajna ya naxandá Lida.

³³ Ya tíjna jngoò xità xi 'mì Eneas; jyeé tjin-la jìin nó nga kijna xk'én, mikì ma síkjaníyá yijo-la.

³⁴ Pedro kitsò-la:

—Eneas, jè Jesucristo tísindaà-lè. Tísítjin, tixkóyi nijñaà-lè.

Eneas, nitoón tsasítjen.

³⁵ Ngats'ii xità xi títsajna ya naxandá Lida ko Sarón, kijtseè Eneas nga tsajmeè-ne, ikjoàn kòkjeiín-la it'aà ts'e Na'èn-ná Jesús.

K'e nga jaáya-la Dorcas it'aà ts'e kjoabiyà

³⁶ Ya naxandá Jope tíjna jngoò chjoón xi kota'yàt'aà-la Cristo: Tabita 'mì. Jè 'én griego, Dorcas 'mì. [Jè 'én tsaján, Naxín tsò-ne.] Chjoón jè, 'ño ndaà xità, tìkoaá ndaà síchját'aà-la xità ima.

³⁷ Jñà nachrjein koi, chjoón jè, kjòxk'én koa k'en. K'e nga jye kisihingáya, kiiko, kisikájnyaya ni'ya xi ma-ne jò piso.

³⁸ Jè naxandá Lida yaá kijnat'aà chraña-la Jope. Jñà xità xi kota'yàt'aà-la Cristo kiì'nchré nga ya tíjna Lida jè Pedro. Kisikasén jò xità x'in xi kiì kitsi'ba-la, kitsò-la:

—Kì nikachrjein-jèn, nìton nchrobáchón-nájen.

³⁹ Pedro, k'e nga kiskaàt'aà-la okixi, nitoón tsasítjen; tsobáhijtao xità koi. K'e nga ijchò Jope, kiiko ñánda kijna mik'en; jahas'en ni'ya. Ngats'ii íchjín ka'àn xi títsajna ijchò kinchat'aà-la Pedro nga kjindáya; tsakó-la x'ió ko nachro xi tsibíndaà Dorcas k'e nga tisa tíjnakon.

⁴⁰ Pedro tsachrje yije ni'ya jñà xità koi; ikjoàn tsasìxkó'nchi, kiichjat'aà-la Nainá; k'ée kiskoò'an jè mik'en, kitsò-la:

—¡Tabita, tísítjin!

Jè mik'en, kiskíx'angui-ne xkon. K'e nga kijtseè Pedro, tsibìjna kixi.

⁴¹ Pedro kitsjaà-la tsja, kisikasítjen; ikjoàn kiichja-la xità-la Cristo ko jñà íchjín ka'àn; tsakó-la Dorcas nga tíjnakon-né.

⁴² Kjoa jè, ki'ya yijeé-la kóhokji Jope; kjìn xità kòkjeiín-la it'aà ts'e Na'èn-ná Jesucristo.

⁴³ Jè Pedro, kjìn nachrjein tsibìjna ya Jope, ya ni'ya-la xità xi 'mì Simón chjinechrjoa.

10

K'e nga jè Cornelio kiichja-la Pedro

¹ Ya naxandá Cesarea tsibìjna jngoò xità xi 'mì Cornelio, jè xi xità sko-la ts'e soldado xi jngoò sìndo ma-ne xi ya chja-ne xi 'mì Italiano.

² Jè Cornelio, ngats'ìi xit̩a ni'ya-la, ndaà beèxkón Nainá, t̩ikoáá tsakjón-keè Nainá. Ndaà síchját'aà-la j̩nà xit̩a im̩a xi nì mé t̩jín-la. Kjit'aà nachrjein bítsi'ba-la Nainá.

³ Jngoò nachrjein, ijchò-la tsà xi jàn nga nguixòn, tsatsejèn jngoò-la kjoa koni tsà nijná tí'biì-la nga jahas'en jngoò àkjale-la Nainá ya ni'ya ñánda t̩jna; kitsò-la:

—¡Cornelio!

⁴ Jè Cornelio, k'e nga kiskoò'an àkjale, tà kitsakjòn-la, kitsò-la:

—¿Mé xi mejèn-lè na'èn?

Jè àkjale kitsò:

—Jyeé ijchò kaàt'aà-la Nainá jè kjoa bítsi'ba-lè kò kjoa nga nìchját'aà-la xit̩a im̩a xi nì mé t̩jín-la. Jè Nainá ndaà sasén-la.

⁵ T̩ikasín xit̩a-lè ján naxandá Jope; kàtikjaá Simón xi t̩ikoá Pedro 'mì.

⁶ Ya t̩jna ni'ya-la xit̩a xi t̩ikoá Simón 'mì xi chrjoa-la cho síhinda. Jè ni'ya-la yaá kijnandiì ndáchikon. Jè keènojmi-lè mé xi s'j̩in.

⁷ K'e nga jye kii-ne àkjale-la Nainá xi tíchjako Cornelio, kiìchja jò-la xit̩a chi'nda-la koa jngoò soldado xi ndaà beèxkón Nainá xi ya síxát'aà-la.

⁸ K'e nga jye tsibénojmi yije-la ngats'ìi kjoa xi kii'nchré, ikjoàn kisikasén ján naxandá Jope.

⁹ K'e nga komà nchijòn, ijchò-la tsà nchisen, j̩nà xit̩a koi, jyeé kjomeè bijchó chraña-la naxandá Jope. T̩jè-ne hora jè Pedro, tsijin isò'nga ni'ya nga kii kítsi'ba-la Nainá.

¹⁰ Pedro, jyeé ñó kjòhòjò-la; mejèn-la nga kòkjen, tanga tíkoñaá-la, k'eé t̩sindaà tsojmi xi skine; tsatsejèn jngoò-la kjoa koni nijná tí'biì-la.

¹¹ Kijtseè nga t̩ixá ngajmi; inchrobàjen jngoò nikje skanda it'aà nangui xi ñó teè kji, t̩jít'aà'ñó nga ñijòn chrjangui-la.

¹² Jè nikje, yaá t̩tsajmaya yije cho xi t̩jín i it'aà nangui xi ñijòn ma ndsoko ko j̩nà cho xi bífejno yijo-la nangui, ngats'ìi cho xi t̩jín-la jngaá xi t̩jima j̩j̩in isén.

¹³ Jè Pedro kii'nchré jngoò 'én xi kitsò-la:

—Pedro, t̩sítj̩in, t̩ik'in cho koi, chin̩i.

¹⁴ Kitsò Pedro:

—Na'èn, majin; ni saà jngoò k'a tsojmi t̩jé kineè xi xkón t̩jín it'aà ts'e kjotíxoma.

¹⁵ Pedro, j̩ngoò k'a kii'nchré 'én xi kitsò-la:

—Tsojmi xi Nainá jye kisitsjeè nga ma chjine, k̩i tsojmi t̩jé 'mì-la.

¹⁶ Jè kjoa ts'e nikje, jàn k'a okomà. Ikjoàn tsijin j̩ngoò k'a-ne ján ngajmi.

¹⁷ Pedro, t̩síkitsjeèn kó tsòya-ne jè kjoa xi kijtseè. T̩ik'eé-ne ijchò kinchajto xotjoa ni'ya j̩nà xit̩a xi kisikasén Cornelio nga jye kiskònangui ñánda-ne ni'ya-la Simón.

¹⁸ Kiskònangui, a yaá t̩jna jngoò xit̩a xi Simón 'mì, t̩ikoá t̩jít'aàsòn 'ín-la nga Pedro 'mì.

¹⁹ Jè Pedro, tákó k'eé t̩síkitsjeèn jè kjoa xi kijtseè, jè Inima Tsjeè-la Nainá kitsò-la:

—Jàn ma xit̩a xi j̩i ótsji-lè.

²⁰ T̩sítj̩in, titj̩j̩in, k̩i jò 'beé-la takoin nga 'mìkoi; j̩nà xit̩a koi, 'aán kàsikasén.

²¹ Jè Pedro inchrobàjen ñánda 'ncha xit̩a xi kisikasén Cornelio, kitsò-la:

—An-ná xi binchaàtsji-ná; ¿mé xá xi kòf'i-nò?

²² J̩nà xit̩a koi kitsò:

—Jè kisikasén-najen xit̩a sko-la soldado xi 'mì Cornelio, jngoò xit̩a kixi xi ndaà beèxkón Nainá, t̩ikoá jè, ndaà yaxkón it'aà ts'e naxandá Israel. Jngoò xó

àkjale-là Nainá k'oa kitsò-là nga ngaji skinìkjaá-lè nga k'oín ni'ya-là mé-ne nga kénojmiya-là 'én xi jì tìhokoòyi.

²³ Jè Pedro kisìkas'en ni'ya-là; yaá kisìkjáyako jngoò nìtjen. Xi komà nchijòn, kiìko xita koi; tìkoáá tsobáhìjtako i'nga xita xi mokjeiín-là it'aà ts'e Cristo xi títsajna ya Jope.

²⁴ Xi komà nchijòn ijchò Cesarea; jyeé tíkoña jè Cornelio; jyeé títsajna xita xikjín ko amigo-là xi ndaà óko xi xó kisìkí'nchré-ne.

²⁵ K'e nga jye ijchò Pedro, jè Cornelio itjo ni'ya nga kisìhixat'aà; tsasìxkó'nchit'aà-là nga kijtseèxkón.

²⁶ Tanga jè Pedro kisìkasítjen, kitsò-là:

—Tísítjìin; 'an, tìkoáá ta xita-ná koni ngaji.

²⁷ Jè Pedro, nga tíhóko Cornelio, jahas'en ni'ya; kijtseè nga 'ño kjìn ma-ne xita xi ya títsajna.

²⁸ Pedro kitsò-là:

—Jñò, tíjìin-nò nga jñà xita judío mìkìlì tjí'nde-là nga jñà xita xi xìn j'nde-là sìngàsòn-ko, mìkìlì ma kjoas'en ni'ya-là xi mìtsà xita judío. Tanga Nainá tsibénojmiya-na nga nijngoò xita xi koma xán-là: jñò, taxki xita-nò ko xita tjé-nó nga nguixkon Nainá.

²⁹ Koiì kjoa-là k'e nga ijchò nokjoà-ná, mìkìlì kisitàjaajñaà, nìtoón inchrobà. Jè xi kjònanguia, ¿mé xá xi nokjoà-ná?

³⁰ Cornelio kitsò:

—Tjín-là ñijòn nachrjein, tíjè-ne hora jè nga xi jàn nga nguixòn, k'e nga tìchjät'aà-là Nainá i ni'ya-na, tà nìtoón tsatsejèn jngoò xita xi tsasìjna nguixkoaàn; 'ño ote kji nikje-là.

³¹ Kitsò-na: “Cornelio, jè kjoa bìtsi'ba-lè jye kina'yà-là ko jye ki'ya-là nga nguixkon Nainá koni s'ín nìchjät'aà-là xita imà xi nì mé tjín-là.

³² Tìkasín xita-lè ján naxandá Jope, kàtikjaá Simón xi tìkoá Pedro 'mì. Ya tíjna ni'ya-là xita xi tìkoá Simón 'mì xi chrjoa-là cho síhinda. Jè ni'ya-là yaá kijnandiì ndáchikon.”

³³ K'oaá komà-ne nga nìton kiskinìkjaá-lè. Ndaà kà'nè-ne nga kànchroboì. Kóhótjín-jen jí títsajna-jen nga nguixkon Nainá mé-ne nga kìná'ya yije-jen mé okixi xi kitsjaà-lè Nainá nga kénojmi-nájen.

K'e nga kiichja Pedro ya ni'ya-là Cornelio

³⁴ Pedro tsibíts'ia nga kiichja, kitsò:

—Kixí kjoa, tíbe-ná nga Nainá mìkìlì faájìin nita yá xita-ne, tà ngàsòn fiko yije.

³⁵ Nainá kjoétjò-né nita yá xita-ne nita ñánda-ne j'nde-là xi beèxkón Nainá xi tìkoá s'ín kjoakixi.

³⁶ Nainá kisìkasén 'én-là ya naxandá Israel; tsibénojmiya-là 'én ndaà-là nga 'nchán kìtsajna kjoá Nainá it'aà ts'e Cristo, jè xi otíxoma-là ngats'ì xita xi tjín isò'nde.

³⁷ Jñò, ndaà tíjìin-nò koni s'ín komà kóhokji nangui-là xita judío, kjòts'ia-ne j'nde Galilea k'e nga jye kiichjaya Juan xi kjoa ts'e bautismo.

³⁸ Tíjìin-nò nga jè Jesús xi Nazaret ts'e, Nainá xó jaájìin-ne nga kitsjaà-là Inima Tsjeè-là ko nga'ño. Nita ñánda-ne nga tsajmeè Jesús, ndaà tjín kjondaà xi kis'iin; kisindaà-ne xita xi kjo'in nchisìkjeiín it'aà ts'e xita nejí. Koiì k'oa'sín kis'iin-ne nga jè Nainá tíjnako.

³⁹ K'oaá ma-ne bènojmi-jen nga xkoón ki'ya-najen ngats'ì kjondaà xi kis'iin Jesús ya nangui-là xita judío ko Jerusalén. K'e nga komà iskan, jñà xita kisik'en Jesús, tsibítjohónguit'aà krò.

⁴⁰ Tanga nga ijchò jàn nàchrjein Nainá kisikjaáya-là kò k'oaá s'ín kis'iin nga kiyaxkon ìjngoò k'a-là nga jye jaáya-là.

⁴¹ Mìtsà ngats'ìi xìtá naxandá kijtseèxkon, tà ngajen-nájen xi xó kjòtseé kitjaàjìin-najen mé-ne nga koma kénojmí-jen xi ìt'aà ts'e, ngajen-nájen xi chichiko-jen tìkoa k'i'yòko-jen k'e nga jye jaáya-là.

⁴² Jè Jesús tsibít'in-najen nga kìnókjoaya-jen kò kénojmí kixi-lajen xìtá naxandá nga jè Jesús, k'oaá s'ín kisikìjna Nainá koni xìtaxá ìtjòn nga jè bíndaàjìin-là xìtá xi tìtsajnakon kò xi jye k'en.

⁴³ Ngats'ìi xìtá xi kùichja ngajo-là Nainá, k'oaá s'ín tsjá 'én nga ngats'ìi xìtá xi mokjeiín-là ìt'aà ts'e Cristo, ìt'aà ts'e-né nga jchat'aà-là jé-là.

K'e nga kitjoé-là Inìma Tsjeè-là Nainá jñà xi mìtsà xìtá judío

⁴⁴ Tákó tik'eé tíchja ìsa Pedro, ngats'ìi xìtá xi nchi'nchré-là itjojen-nè Inìma Tsjeè-là Nainá.

⁴⁵ Jñà xìtá judío xi tìkò Pedro [xi tìkoa jye mokjeiín-là ìt'aà ts'e Cristo], tà k'oaá komà-là k'e nga kijtseè nga jñà xi mìtsà xìtá judío, tìkoa ndaà itjojen-nè jè Inìma Tsjeè-là Nainá.

⁴⁶ Nga kii'nchré-là nga chja xi kj'eìj 'én, tìkoa chjat'aà-là Nainá nga 'ñó jeya síkìjna.

⁴⁷ K'eé kitsò Pedro:

—Mì-la kii koma kichakjáya-là jñà xìtá koi nga koma bautizar nga jyeé kàtjoé-là Inìma Tsjeè-là Nainá koni s'ín kitjoé-ná jñà.

⁴⁸ Jè Pedro kitsjaà okixi nga koma bautizar xìtá koi ìt'aà ts'e Na'èn-ná Jesucristo. Ìkjoàn jñà xìtá tsibítisi'ba-là Pedro nga kàtìjnakò chiba nàchrjein ìsa.

11

Mé 'én xi kùichja Pedro nga tsibénojmí-là xìtá naxandá-là Cristo ján Jerusalén

¹ Jñà xìtá xi tsibíxáya-là Jesús kò xìtá xíkìjn xi 'ndse joó ìt'aà ts'e Cristo xi tìtsajna nangui Judea, kii'nchré nga jñà xi mìtsà xìtá judío tìkoaá jye kòkjeiín-là 'én-là Nainá.

² Jñà xìtá judío xi mokjeiín-là ìt'aà ts'e Cristo tsohótikò Pedro, k'e nga ijchò-ne ján Jerusalén.

³ Kitsò-là:

—¿Mé-ne ya kii-ne ni'ya-là xi taxkì xìtá xi mìtsà xìtá judío, skanda yaá chichikoii?

⁴ Jè Pedro k'eé tsibítisi'ia nga ndiyá ndiyá tsibénojmí yije-là koni s'ín komàt'in; kitsò-là:

⁵ —K'e nga tìjnaa ján naxandá Jope, nga tìchjàt'aà-là Nainá, tsatsejèn jngoò-na kjoa koni tsà nijñá tí'biì-na, jngoò nikje kijtseè xi 'ñó te kji, tjí'ñó nga ñijòn chrjangui-là xi ngajmii inchrobàjen-ne, j'ì skanda ñánda tìjnaa.

⁶ K'e nga kiskoòtsejèn-là, ndaà kijtseè nga tìtsajnaya cho xi tìjn ìt'aà nangui xi ñijòn ma ndsokò kò cho ts'en xi tìjn ìjìin ijñá, kò cho xi bífejno yijo-là nangui, ngats'ìi cho xi jngáá tìjn-là xi tìjmajìin ìsén.

⁷ K'i'nchré jngoàà 'én xi kitsò-na: “Pedro, tìsítjìin, tìk'iin cho koi, chinji.”

⁸ 'An kixan-là: “Majìn Na'èn, 'an, nì saà jngoò k'a tsojmì tjé kínee xi xkón tìjn ìt'aà ts'e kjotíxoma.”

⁹ Xi ma-ne jò k'a, jngoò k'a kùichja-na ján ngajmii kitsò-na: “Tsojmì xi Nainá jye kisìtsjeè nga ma chjìne, kì tsojmì tjé 'mì-là.”

¹⁰ Jè kjoa koi, jàn k'a okomà. Ìkjoàn tsijìn yije jngoò k'a-ne ján ngajmii.

¹¹ Tìjè-ne hora, jàn xìtá ijchò kátsji-na ya ni'ya ñánda tìjnaa xi ján inchrobà-ne Cesarea xi xó kisatìixá-là.

12 Jè Inìma Tsjeè-la Nainá kitsò-na: “Tikoji xita koi; kì jò beè-la takoin nga tsjáhihtakoi; tikoáá tsoháhihtako-na jña xita 'ndsè xi joòn ma-ne xi ì títsajna; ijchò-jen ya ni'ya-la jè xita xi kiskinìkjaá-na, ikjoàn tsitjaàs'en-jen ni'ya-la.”

13 Xita jè tsibénojmí-najen nga jngoò xó àkjalé kijtseè ya ni'ya-la xi kitsò xó-la: “Tikasín xita ján naxandá Jope nga kàtikjaá jè xita xi 'mì Simón xi tikoá Pedro 'mì.

14 Jè tsjá-lè 'én nga kítjokàjñoò kjo'in kjoa ts'e jé-nò, ngaji kò ngats'ìi xita ni'ya-lè.”

15 K'e nga tsibíts'ia nga tsibénojmí-la, jè Inìma Tsjeè-la Nainá, nitoón itjo-jen-nè jña xita koi koni s'ín komàt'iaán jña nga sa tàts'en-la kjoa.

16 K'ée tsibítsjeèn-na koni s'ín kitsò Na'èn-ná Jesús nga kitsò: “Jè Juan, nandá kis'ìin-ne bautizar, tanga jño, koó Inìma Tsjeè-la Nainá koma-nò bautizar.”

17 Tsà Nainá k'oas'ín sasén-la nga tikoá tsjá kjotjò-la jè Inìma Tsjeè-la koni s'ín kitsjaà-ná jña k'e nga kòkjeiín-ná it'aà ts'e Na'èn-ná Jesucristo, ¿'an, mé-ne kondra kótijna-la Nainá?

18 K'e nga kiì'nchré 'én koi, jyò tsibítsajna. Jeyaá kisikíjna Nainá, kitsò:

—;Kixí-la kjoa nga jña xi mìtsà xita judío, tikoá tsjá-la kjondaà Nainá mé-ne nga sùkájno-ne jé-la kò mì tì jé kohótsji-ne mé-ne nga s'e-la kjoabinachon ts'e inìma-la!

K'e nga kinikasén Bernabé ján naxandá Antioquía

19 K'e nga jye k'en Esteban, jña xita xi mokjeiín-la it'aà ts'e Jesús kitsjohoba, koi kjoa-la nga 'ño kiitjinguikeè xita. Tjín xi kiì ján nangui Fenicia kò Chipre kò naxandá Antioquía. Xita koi, k'e nga ijchò i'nde koi, tsibénojmí-la 'én-la Cristo jña xita judío xi ya títsajna tanga xi taxki xita, majín.

20 Jña xita xi kitsjohoba, tjín i'nga xi ján i'nde-la nangui Chipre kò naxandá Cirene. K'e nga ijchò ya naxandá Antioquía tikoáá tsibénojmí-la jña xita xi mìtsà xita judío 'én ndaà-la Nainá xi kjoa ts'e Jesús xi otíxoma-ná.

21 Nainá kitsjaà-la nga'ño; kjin xita koi kòkjeiín-la it'aà ts'e Cristo, jahatjìya-la kjohítsjeèn-la, kiit'aà-la Na'èn-ná.

22 Jña xita naxandá-la Cristo xi títsajna Jerusalén kiì'nchré koni s'ín tíma ján Antioquía. Kisikasén jè Bernabé.

23 Bernabé, k'e nga ijchò Antioquía, kijtseè nga jè Nainá ndaà tísíchikon-t'in xita koi. Tsja jchán komà-la. K'ée isa ndaà tsibít'in yije-la nga kò inìma-la isa ndaà kàtjìt'aà-la Na'èn-ná.

24 Jè Bernabé, 'ño ndaà xita; ndaà tíjìin inìma-la Inìma Tsjeè-la Nainá; tikoáá ndaà mokjeiín-la it'aà ts'e Nainá. K'oaá s'ín komà-ne nga isa kjiìn xita jahas'en-t'aà-la Na'èn-ná Jesús.

25 Nga komà iskan, Bernabé kiì ján Tarso nga kiì kátsji Saulo.

26 K'e nga jye kisakò-la, kiìkò ján Antioquía. Jngoò nó tsibítsajnakò jña xita naxandá-la Cristo; koií xá kis'ìin nga kjin xita tsakóya-la. Yaá kisit'aà 'ín itjòn nga xita-la Cristo 'mì ngats'ìi xita xi kota'yàt'aà-la Cristo.

27 Nachrjein koi ijchò i'nga xita xi kiìchja ngajo-la Nainá ján Antioquía xi inchrobà-ne Jerusalén.

28 Jngoò xita xi 'mì Agabo, tsasìjna kixi, kiìchja nga jè Inìma Tsjeè-la Nainá tsibít'in-la, kitsò nga títsa isò'nde kjinchrá 'ño kjoí. 'Én jè, k'oaá s'ín tsitasòn k'e nga tsibìjna xitaxá itjòn ján Roma jè xi 'mì Claudio.

29 Jña xita xi kota'yàt'aà-la Cristo xi títsajna Antioquía tsajoóya-ne nga sùkasén-la nga'ño xita xíkjin xi títsajna nangui Judea koni kji bijchó nga'ño-la nga jngoò l'jngoò.

³⁰ Koni s'ín tsajoóya-ne, k'oaá s'ín kisikitasòn. Jè Bernabé kò Saulo, kiìko kjotjò jè ján nanguí Judea nga kisìngatsja jñà xità jchínga xi tjín-la xá ts'e naxandá-la Cristo.

12

Kó s'ín komà nga itjo ndayá Pedro

¹ Tijnà-ne nàchrjein koi, jè Herodes xi xitaxá ítjòn tíjna, kitsjaà okixi nga kitsobà'ño i'nga xità naxandá-la Cristo mé-ne nga koma skoetoòn-ne.

² Tsatíxá nga kichá ndojò kisik'en-ne Jacobo, 'ndse Juan.

³ Jè Herodes, k'e nga kijtseè nga tsja komà-la jñà xità judío nga jye k'en Jacobo, ikjoàn kitsobà'ño Pedro jè nàchrjein k'e nga bitjo s'eí nga kjèn inchrájin xi tsjìn-la na'yo san.

⁴ Kiskinìs'en ndayá. Chrj'òòn jngoò soldado kisikinda ya iya ndayá; ñijòn kisikinda nga indiaà indiaà. Kjòhìtsjeèn-la Herodes, jè-né k'e nga jye kjoehet'aà s'eí Paxkò kochrje ndayá mé-ne jñà xità naxandá tsjá 'én nga kiyá Pedro.

⁵ Jè Pedro, ndaá tímakinda iya ndayá; kò jñà xità naxandá-la Cristo, mìkiì jyò tsibìtsajna nga 'ño ndaà nchisíjèt'aà-la Nainá ít'aà ts'e Pedro.

⁶ Jè nàchrjein k'e nga mejèn-la Herodes nga sùngatsja xità naxandá jè Pedro, tíjè-ne nítjen, kjijnafè'nchò osen-la jò soldado; jò na'ño kichá cadena tíjt'aà'ño-ne; jñà soldado xi i'nga yaá nchisíkinda xotjoa ndayá.

⁷ Tà nitoón tsatsejèn jngoò àkjale-la Nainá ya iya ndayá; kjòhiseèn yije kòhokji; jè àkjale kishiníyá-la Pedro nga kisikjaá-la; kitsò-la:

—¡Nìton tìsítjiin!

Jñà na'ño kichá cadena xi tíjt'aà'ño-ne tsja Pedro chixòt'aà nanguí.

⁸ Jè àkjale kitsò-la:

—Chìkjeí nikje-lè, tsjayi xojté-lè.

Jè Pedro, k'oaá s'ín kis'iìn. Ikjoàn kitsò àkjale:

—Chìkjeí nàchrokisòn-lè, nchrobátjingui-ná.

⁹ Pedro itjo tjingui-la jè àkjale; mìkiì machiya-la tsà kixí kjoa xi tísíko àkjale; jè Pedro k'oaá ma-la koni tsà nijñá tí'biì-la.

¹⁰ Jahat'aà-la jè soldado xi síjna ítjòn, tíkò jahat'aà-la xi ma-ne jò; k'e nga ijchò xotjoa-la ndayá xi nguì kichá nga jye bitjoaá calle, tà tajngoò kitáx'a; ikjoàn itjo; tsato'nchò jngoò calle; tà nitoón kichijà jè àkjale; jè Pedro, tajngoò kisasijna.

¹¹ Jè Pedro, k'eé ndaà kjòchiya-la nga kixi kjoa xi tímat'in, kitsò:

—Kixí kjoa, mokjeíin-na nga Nainá kàsikasén àkjale-la nga kàsíkíjnandeíi-na ít'aà ts'e Herodes kò ngats'ì kjoa xi ch'o tjín xi nchikoña-la xità judío nga sùko-na Herodes.

¹² Jè Pedro, k'e nga ndaà kjòchiya-la kjoa koi, kù ni'ya-la María, nea-la Juan xi tíkò Marcos 'mì. Ya ni'ya jè, kjìn xità chixoña xi nchibítsi'ba-la Nainá.

¹³ Kiìchja, kisikjane xotjoa-la ni'ya; k'eé itjo katsejèn jngoò tsòti xi 'mì Rode nga mejèn-la skoe yá-né xi tíchja.

¹⁴ K'e nga kiì'nchré jta-la nga jè Pedro xi tíchja, tsja jchán komà-la skanda mì tí kiì kiskix'a-la xotjoa ni'ya; ta saá tsangachikon iya ni'ya; kisikí'nchré ñánda títsajna xíkjin nga jè Pedro síjnajto xotjoa ni'ya.

¹⁵ Jñà xità xíkjin kitsò-la:

—¡Ská-lè!

Tanga jè tsòti táko k'oaá tsò nga kixí kjoa jè Pedro xi tíchja. Tanga jñà xità kitsò-la:

—Jè-la àkjale-la.

16 Jè Pedro, tákó tíchja-ne, síkjane xotjoa ni'ya. K'e nga kiskíx'a-là xotjoa ni'ya, kijtseèxkon nga jè Pedro; jñà xità xíkjin, tà kjòxkón-là.

17 Kiskímiltjen tsja Pedro nga kitsò-là jyò títsajnaà; ìkjoàn tsibénojmi-là kó s'ín komàt'in nga Nainá tsachrje-ne ndayá. Kitsò-là:

—K'oaá s'ín ténajmí-là jè Jacobo kò xità xinguiáá xi i'nga.

Ìkjoàn itjo ni'ya; xìn ì'nde kiì.

18 K'e nga kis'e isén ngats'ìi soldado xi nchisíkinda, mì tà k'oaá kji kjoasìi kis'e-là nga mìkiì tíjin-là kó s'ín komà nga itjo ndayá Pedro.

19 Jè Herodes kitsjaà okixi nga tsohótsji Pedro tanga mìkiì kisakò-là. K'e nga jye kiskònangui-là ngats'ìi soldado xi kisíkinda, jñà kiskaànè-là nga tsjin Pedro; ìkjoàn kitsjaà okixi nga kàtiyaà jñà soldado. Herodes itjokàjin ya Judea. Ján kiì kijna naxandá Cesarea.

20 Herodes kjoasíi tjín-là kò xità naxandá Tiro kò Sidón. Xità naxandá koi, tsajoóya-ne nga inchrobàkon Herodes. Tanga ítjòn ndaà tsajoókò Blasto xi tikoá xá tjín-là ya ni'ya-là Herodes xi xitaxá ítjòn tjina. Kò jè Blasto kiichjatji naxandá koi nga kàtas'e kjoa'nchán. Koi k'oaá s'ín kis'ìin-ne jñà naxandá koi, nga ya nangui-là Herodes otse tsojmi xi kine.

21 Jè nachrjein k'e nga chixoña xità nga kisijna junta, jè Herodes, tsohòkjá nikje-là xi ts'e xitaxá ítjòn; tsibijnasòn íxile-là, ìkjoàn kiichjajin-là xità naxandá.

22 Jñà xità naxandá, k'e nga kiì'nchré-là, tsibíts'ia nga 'ño kiichja kitsò:

—Jè xi tíchja, jngoò xità xi nainá, mìtsà taxki xità!

23 Tik'e-ne j'ìi àkjale-là Nainá xi kitsjaà ch'in-là; kjòxk'én, chi'ndoó kisìkje, ìkjoàn k'en, koi kjoa-là nga mìkiì jeya kisíkijna Nainá.

24 Tanga jè 'én-là Nainá isaá ndaà tíhobísòn k'oa isaá ndaà tímakjin xità xi mokjeín-là.

25 Jè Bernabé kò Saulo, k'e nga jye kjòngásòn xá-là, inchrobà-ne Jerusalén, kiì-ne ján Antioquía. Tjiko Juan xi tikoá Marcos 'mì.

13

K'e nga jè Bernabé kò Saulo tsibíts'ia nga kisixá

1 Jñà xità naxandá-là Cristo xi títsajna ya naxandá Antioquía, tjín i'nga xità xi chjaya ngajo-là Nainá kò okóya 'én-là Nainá: jè xi 'mì Bernabé, Simón (xi tikoá Niger 'mì), Lucio xi Cirene ts'e, Manaén (xi taña kòchákò Herodes, xi tsatíxoma Galilea), kò Saulo.

2 Jngoò nachrjein k'e nga tíma culto tikoá títsajnachjan xità-là Cristo, jè Inima Tsjeè-là Nainá kitsò:

—Tíkítsajnandaà-ná jè Bernabé kò Saulo xá xi xó 'an kichjà-là.

3 Jñà xità-là Cristo, k'e nga jye tsibítsajnachjan koa jye tsibítsi'ba, tsohósòn-là tsja Bernabé kò Saulo, ìkjoàn kisikasén [xi kjoa ts'e xá-là Nainá].

Kós'ín komà k'e nga jè Bernabé kò Saulo kiichjaya ján Chipre

4 Jè Inima Tsjeè-là Nainá kisikasén Bernabé kò Saulo nga kiì Seleucia; yaá jahas'en chitso nga kiì nangui xi kijnajin-nda xi 'mì Chipre.

5 K'e nga ijchò naxandá Salamina, tsibíts'ia nga kiichjaya 'én ndaà-là Nainá ya jñà ni'ya ingo sinagoga ts'e xità judío. Tjiko jè Juan Marco xi kisichját'aà-là Bernabé kò Saulo.

6 Tsatojin kóhokji nangui jin-nda Chipre, ijchò skanda naxandá Pafos. Yaá kiskaat'aà jngoò-là xità judío xi 'mì Barjesús xi xità tj'e, tikoá xità ndiso-né nga tsò, 'én-là Nainá chjaya.

⁷ Jè xitá tje, yaá ojmeèko Sergio Paulo xi xitaxá ítjòn tíjna kóhokji nangui Chipre. Jè Sergio Paulo ndaà fíya-lá. Kiichja-lá jè Bernabé ko Saulo nga mejèn-lá kji'nchré 'én ndaà-lá Nainá.

⁸ Tanga jè xitá tje, xi 'mì Barjesús xi tikoá Elimas 'mì xi 'én griego, kondraá kii-lá jè Bernabé ko Saulo nga majín-lá nga jè xitaxá ítjòn kòkjeiín-lá 'én ndaà-lá Nainá.

⁹ Tanga jè Saulo, tíjè-ne xi 'mì Pablo, ndaà tíjìn iníma-lá Iníma Tsjeè-lá Nainá; 'ño kiskod'an,

¹⁰ kitsò-lá:

—Xitá ndiso xi ch'o tíjn kjohítsjeèn-lè; ki'ndí-lá xitá neií; ngaji kondra 'mì yije-lá xi kjoá kixi! ¿Mé-ne nga kjit'aà nàchrjein mejèn-lè níkits'ón-jìn ndiyá kixi-lá Nainá?

¹¹ I'ndeí Nainá tsjá-lè kjo'in; mì kii tí kotsejèn-lè. Kjìn nàchrjein mì tí kii jcha-ne isén ndobá ts'e ts'oi.

Tík'e-ne mì tí kii kjòtsejèn-lá. Kj'eíí xitá tsohótsji xi kitsobàt'aà nga komà kii.

¹² Jè xitaxá ítjòn, k'e nga kijtseè kjoá koi, kòkjeiín-lá 'én-lá Nainá nga kixi kjoá. Tà kjòxkón-lá koni s'ín tsakóya-lá Pablo ko Bernabé ít'aà ts'e Na'èn-ná.

Kós'ín komà k'e nga jè Pablo kiichjaya ya Antioquía ts'e Pisidia

¹³ Pablo ko jña xitá xi kjihijtao jahas'en chitso ya Pafos, kii ján Perge i'nde xi chja-ne Panfilia. Tanga jè Juan Marco, tsohótji-ne, ján kii-ne Jerusalén. Mì tí ya tsobáhijtao-ne Pablo.

¹⁴ Jè Bernabé ko Pablo jahato Perge, kii Antioquía, naxandá xi chja-ne Pisidia. Jè nàchrjein níkjáya, jahas'en ni'ya ingo sinagoga, ikjoàn tsibítsajna.

¹⁵ K'e nga jye kjòxkejiín kjotíxoma-lá Moisés ko xojon xi kiskii xitá xi kiichjaya ngajo-lá Nainá, jña xitá sko-lá ni'ya ingo sinagoga kisikasén xá-lá jè Pablo ko Bernabé, kitsò-lá:

—'Ndsè, tsà tíjn-nò mé 'én xi kinókjoajiín-lá xitá, tinókjoaa mé-ne nga s'e-lá nga'ño iníma-lá jña xitá.

¹⁶ K'eé tsasítjen Pablo; koó tsja kisijé-lá nga jyò kàtítsajna; kitsò-lá:

—Jño xi xitá Israel 'mì-nò, ko xi mìtsà naxandá Israel tsajòn tanga yaxkón Nainá, tiná'ya-ná.

¹⁷ Jè Nainá xi ts'e naxandá Israel, jaàjìn xitá jchínga kjìn-ná; jngoò naxandá je kis'iín k'e nga tisa ján títsajna Egipto nga mìtsà ya i'nde-lá; nga'ño ts'e Nainá-né nga tsachrjekàjìn nangui Egipto.

¹⁸ Nainá, ichán nó kis'e-lá kjoatsejta nga kisikinda jña xitá Israel ya i'nde ít'aà xìn ñánda nangui kixi choòn.

¹⁹ Nainá, itoò naxandá xitá kisikjehesòn ya nangui Canaán. Ikjoàn kitsjaà-lá jña xitá Israel jè nangui jè nga ts'e koma.

²⁰ Ngats'ii kjoá koi, ñijòn sindo osen nó tsato.

'Xi komà iskan, Nainá kitsjaà-lá xi xitá sko-lá tsibítsajna nga tsibíndaàjìn-lá xitá naxandá Israel. Ko jña tsasiko skanda k'e nga j'ii Samuel, xitá xi kiichja ngajo-lá Nainá.

²¹ Xitá naxandá Israel, kisijé-lá Nainá jngoò xitaxá ítjòn xi mejèn-lá nga kotíxoma-lá. Nainá kitsjaà-lá Saúl, ki'ndí-lá Cis xi tje-lá Benjamín. Ichán nó tsatíxoma Saúl.

²² Nga komà iskan, Nainá jaàxìn Saúl; jè David kitsjaà-lá xá nga tsibijna xitaxá ítjòn. Nainá kitsò: “Jyeé kisakò-na nga jè David xi ki'ndí-lá Isaí, jngoò xitá xi sasén-lá iníma-na nga sikkitasòn yije xi 'an mejèn-na.”

²³ Nainá kisikasén-lá xitá naxandá Israel, jngoò xitá xi tje-lá David xi 'mì Jesús nga jè kochrjekàjìn kjo'in. Nainá, k'oaá s'ín kitsjaà tso'ba nga tisa tàts'en-lá kjoá.

24 K'e nga tikj'eè f'ii Jesús, Juan kiichjayajiiin-la xita naxandá Israel nga kátasíkájno jé-la, mi ti jé kohótsji-ne ko kátama bautizar.

25 K'e nga jye tifehet'aà nachrjein-la Juan xá xi j'ii-ne, kitsò: “Jñò, ¿kó s'ín nikítsjeèn it'aà ts'an? ¿A bixón-nò: jé Cristo? Majìn. Saá nchrobá tjingui jngoò-na xi isa tíjna ítjòn skanda mìkiì ok'in-na nga 'an skíjnda'ñoá xox'in-la xoxté-la”, kitsò Juan.

26 Tanga i'ndeì, k'oaá ma-ne koxan-nò ngats'ioò jñò ndí 'ndsè xi tje-la Abraham inchrobát'aà-nò ko jñò xi mìtsà ya inchrobát'aà-nò tanga yaxkón Nainá: jñá j'ii-ná jé 'én it'aà ts'e Cristo nga jé kochrjekàjiiin-ná kjo'in.

27 Jñà xita naxandá Jerusalén ko xitaxá-la, mìkiì kijtseèxkon Jesús nga jé xi Cristo, tikoáá mìkiì kjòchiya-la jñà 'én xi maxke nga jiiin jiiin nachrjein jé nachrjein nikjáya ya ni'ya ingo sinagoga koni s'ín tjít'aà xojon ts'e xita xi kiichja ngajo-la Nainá. Tanga jñà xita koi kitsjaà okixi nga katiyaá Jesús ko k'oaá s'ín tsitasòn koni tsò 'én koi.

28 Nas'ín tsjin-la jé Jesús nga ok'in-la nga kiyá, xita koi, kisijét'aà-la Pilato nga kátasík'en.

29 K'e nga jye tsitasòn yije koni s'ín tíchja Xojon-la Nainá it'aà ts'e Jesús, kiskónájèn t'aà krò, ikjoàn kii nga tsibíhijiiin.

30 Tanga Nainá kisikjaáya-la it'aà ts'e kjoabiyaá.

31 Jesús, k'e nga jye jaáya-la, kjin k'a tsakó-la yijo-la jñà xita xi chinchimako nga inchrobà-ne Galilea skanda Jerusalén; nachrjein i'ndeì, jñà xita koi xi bénojmi kixi-la xita naxandá it'aà ts'e Jesús.

32 Koi xá j'ii-najèn nga kénojmi-jèn 'én ndaà-la Nainá xi kjoa ts'e Cristo koni s'ín kitsjaà-la tso'ba Nainá jñà xita jchínga-najèn.

33 I'ndeì, k'e nga kisikjaáya-la Jesús, k'oaá s'ín kisikitasòn xi it'aà tsajèn xi ixti-la ma-jèn jñà xita jchínga-najèn. K'oaá s'ín tjít'aà xojon ts'e Salmo xi ma-ne jò, nga tsò: “I'ndeì, ji-né xi Ki'ndí-na xan-lè; 'an-ná xi na'èn-lè ma.”

34 Koni kis'iin Nainá nga kisikjaáya-la Jesús it'aà ts'e kjoabiyaá nga mi ti kii kiyá-ne, yaá makixiya 'én koi nga tsò Xojon-la Nainá: “Siikitasòn-ná koni tsò 'én tsjeè-na, ko 'én kixi-na xi 'an kitsjaà-la David.”

35 K'oaá tis'ín tjít'aà ljngoò xojon ts'e Salmo nga tsò: “Mìkiì koj'ndi nga k'i'ndo yijo-la Xita tsjeè-lè.”

36 Jñà nachrjein nga tsibijnakon David, k'e nga jye kisikitasòn koni s'ín mejèn-la Nainá, k'en. K'oaá tis'ín kisihijiiin koni komát'in xita jchínga-la. Tikoáá i'ndo yijo-la.

37 Tanga jé Xita Tsjeè xi Nainá kisikjaáya-la mìkiì i'ndo yijo-la.

38 Ngats'ioò jñò ndí 'ndsè, k'oaá s'ín kátasijiin-nò, jñà 'én xi nokjoàyajiiin-nòjèn, jé-né nga it'aà ts'e Jesús, Nainá síjchàat'aà-ná jé-ná.

39 Jñà xita, ngats'ii kjoa xi ch'o s'ín, mìtsà it'aà ts'e kjotíxoma-la Moisés makixiya; jé it'aà ts'e Jesús makixiya xita, jñà xi mokjeiín-la it'aà ts'e.

40 T'een kindá yijo-nò mé-ne nga mi k'oaá s'ín komat'ioòn koni s'ín tíchja xojon-la jñà xita xi kiichja ngajo-la Nainá nga tsò:

41 Chítsejèn, jñò xi nachrjekànguioò kjoakixi,

kátaxkón-nò, ko jngoò k'a kátachija jñò.

'An, jngoò xá s'iaàn nachrjein tsajòn, k'e nga tisa titsajnakoòn.

Mìkiì kokjeiín-nò nas'ín s'enojmi-nò xá xi 'an tìs'iaàn.

42 Jé Pablo ko Bernabé k'e nga itjo-ne ni'ya ingo sinagoga, jñà xita kisijét'aà-la nga kátènojmiya kjoa koi jé xòhoto xi sa nchrobá.

43 K'e nga kisihixat'aà xíkjín nga kii-ne, kjin xita kiit'aà-la Pablo ko Bernabé, jñà xi xita judío ko jñà xita xi beèxkón Nainá xi jye jahatjia-la nga xita judío

komà. Jè Pablo kò Bernabé, k'e nga tsohóko xita koi, 'ño tsibít'in-la nga ndaà kátjìin inima-la jña 'én xi jye kii'nchré xi kjondaà ts'e Nainá.

⁴⁴ Jè nachrjein nìkjáya xi ìjngòò, kjomeé ijchò ngats'ìi xita naxandá nga kii'nchré 'én-la Nainá.

⁴⁵ Tanga jña xita judío k'e nga kijtseè nga 'ño kjìn ma xita, isaá ndaà kjòchìnikèè Pablo. Ìkjoàn tsibíts'ia nga kondra kii-la Pablo 'én xi kii'chja, tìkoà tsakatít'aà.

⁴⁶ Pablo kò Bernabé, 'ño tsi'beé-la ikon; kitsò-la:

—Tjínè-najen nga kénojní ítjòn-nòjen 'én-la Nainá jño xi xita judío 'mì-nò; tanga jño nachrjengui-nò; k'oaá ma-ne nga jño, mìkii s'e-nò kjoabinachon nita mé nachrjein-ne; ngajen ta saá jña kénojní-lajen jña xi mìtsà xita judío.

⁴⁷ K'oaá s'ín tsatíxoma-najen Nainá nga kitsò:

Jii tsjaà-lè xá nga sikhiseèn-la jña xita xi mìtsà xita judío, kóhokji nga tíjtsa isò'nde mé-ne nga kítjokàjìin-ne kjoa ts'e kjo'in.

⁴⁸ K'e nga kii'nchré ngats'ìi xi mìtsà xita judío, kjòtsjaá-la; ìkjoàn tsibíts'ia nga kitsò: Ndaà tjín 'én-la Nainá; kòkjeiín-la ngats'ìi xi xó kitjaàjìin-ne nga s'e-la kjoabinachon nita mé nachrjein-ne.

⁴⁹ K'oaá s'ín komà nga tsabíson 'én ndaà-la Nainá kóhokji ya i'nde jè.

⁵⁰ Tanga jña xita judío tsibíts'ia nga chinchá'a jña íchjín ítjòn xi ndaà beèxkón Nainá kò xita ítjòn-la naxandá. K'oaá s'ín komà nga kondra kii-la jè Pablo kò Bernabé. Tsachrjekàjìin ya naxandá.

⁵¹ Jè Pablo kò Bernabé tsibítsajneè chijo-la ndsoko xi kondra ts'e xita koi, [jè kjoa xi okó nga kjo'in s'e-la it'aà ts'e Nainá]; ìkjoàn kii ján Iconio.

⁵² Tanga jña xita xi kota'yát'aà-la Cristo, ndaà kis'e-la kjòtsjacha kò ndaà kisixájìin inima-la Inima Tsjeè-la Nainá.

14

K'e nga jè Pablo kò Bernabé kii'chjaya ján Iconio

¹ K'oaá s'ín komà ya Iconio, jè Pablo kò Bernabé, k'e nga jahas'en ni'ya ingo sinagoga ts'e xita judío, 'ño ndaà tsakóya; k'oaá komà-ne nga 'ño kjìn xita judío kò xi mìtsà xita judío kòkjeiín-la it'aà ts'e Jesús.

² Tanga jña xita judío xi mìkii mokjeiín-la, chinchá'a jña xi mìtsà xita judío mé-ne nga ch'o tsò-ne kjohítsjeèn xi kisikítsjeèn it'aà ts'e xita-la Cristo.

³ Pablo kò Bernabé, tseé tsibítsajna ya Iconio. Mìkii kitsakjòn nga tsakóya 'én ndaà-la Nainá koi kjoa-la nga Nainá ndaà ma'ñót'aà takòn. Nainá kisikixiyandaà nga kixi kjoa 'én xi tsibénojní xi kjondaà-la Nainá. Kitsjaà-la nga'ño nga kis'iin kjoxkón xi ndaà tjín xi okó kjoajeya-la Nainá.

⁴ Jña xita naxandá Iconio, jòya komà; osen kiit'aà-la jña xita judío koa osen kiit'aà-la Pablo kò Bernabé, xita xi tsibíxáya-la Jesús.

⁵ Jña xita judío kò xi mìtsà xita judío tsajoóya-ne kò xitaxá ítjòn-la nga mejèn-la skaàn-ko, kii'nè ndajo.

⁶ Pablo kò Bernabé, k'e nga jye kii'nchré, tsanga; kii ján Listra kò Derbe, naxandá xi chja-ne Licaonia; tìkoà chinchima kóhokji i'nde xi chja-ne nga jngòò itjandi.

⁷ Ya i'nde jè, tìkoà kisika'bí 'én ndaà-la Nainá xi kjoa ts'e Cristo.

K'e nga kisinè ndajo Pablo ya Listra

⁸ Ya Listra tjina jngòò xita x'in xi mìkii ma fi. K'oaá s'ín kits'iin; ni saá jngòò nachrjein nga ndsoko tsajmeè-ne.

⁹ Xita jè, tjina; tí'nchré-la Pablo nga tíchjaya. Jè Pablo, k'e nga kiskoò'an, kijtseè nga mokjeiín-la nga kondaà-ne.

¹⁰ Pablo, 'ño kii'chja kitsò-la:

—iTisítjijn, tísijna kixi-ne ndsokoi!

Xita jè, nguì kiskì'nga-né; tsibíts'ia nga tsajmeè-ne.

¹¹ Jñà xita, k'e nga kijtsee kjoəxkón ndaà xi kis'iin Pablo, 'ño kiichja xi 'én Licaonia, kitsò:

—jñà nainá, xitaá kjoàn kòma nga kòf'iikon-ná!

¹² Bernabé, Zeus kitsò-la; Pablo, Hermes kitsò-la nga jè xi isa 'ño chja.

¹³ Jè jngo xkòsòn-la Zeus, yaá kijna indii naxandá. Jè no'mii-la j'iko nchraja ko corona. Jè no'mii, ko ngats'ii xita naxandá mejèn sík'en-la jñà nchraja nga tsjá-la kjoə mé-ne nga skoəxkón-ne.

¹⁴ Jè Pablo ko Bernabé xi kisixáya-la it'aà ts'e Cristo, ch'oó komà-la k'e nga kijtsee kjoə xi nchis'in; tsatejndajno yijo-la jè nikje-la; ikjoàn kiis'ejiin-la xita. 'Ñó kiichja, kitsò-la:

¹⁵ —Tiná'yaà, ¿mé-ne k'oas'in tita'nè-nò? Ngajen, tikoá taxki xita-nájen koni jñò. Koií xá kòf'i-najen nga kénojmi-nòjen 'én ndaà-la Nainá xi kjoə ts'e Cristo mé-ne nga síkijna-nò kjoə koi xi nì méé chí-la; jè tanguít'aà-la Nainá xi tíjakon xi tsibíndaà ngajmii, nangui, ko ndáchikon, ko ngats'ii tsojmi xi ya tjín.

¹⁶ Nachrjein xi jye tsato, Nainá kitsjaà'ndeé-la ngats'ii xita naxandá xi tjín kòhokji isò'nde nga chinchimaya ndiyá xi kisaseèn-la.

¹⁷ Tanga Nainá, kjit'aà nachrjein tíhokó yijo-la yá-né jè, nga tí'ya-la ngats'ii kjondaà xi tí'sín; jè-né xi tí'sikasén-nò jtsí xi ngajmii tínchrobá-ne; títsjá-nò tsojmi xi ndaà tímajchá-nò; jè tí'síchikon-t'in-nò nga ndaà títsjá-nò tsojmi xi ma chine, mé-ne nga ndaà s'e-nò kjotsja.

¹⁸ Pablo ko Bernabé, nas'in k'oas'in tsatekjáya yije-la kjoə xi nchis'in nga mejèn sík'en-t'aà-la cho, tseé xá kisengui nga kòkjeiin-la jñà xita naxandá.

¹⁹ Tik'e-ne j'ii xita judío xi inchrobà-ne Antioquía ko Iconio xi chinchá'a jñà xita naxandá nga tsibínè ndajo jè Pablo. K'e nga jye k'oas'in kisiko, kitsò-né tsà jyeé k'en; ikjoàn tsibífejno nangui, kií síkatjen ján indii naxandá.

²⁰ Tanga jñà xita xi kota'yát'aà-la Cristo, k'e nga chixoñat'aà-la Pablo ñánda kijna, jè Pablo tsasítjen ijngoò k'a-ne; jahas'en-jiin ijngoò k'a-ne naxandá; xi komà inchijòn, Pablo ko Bernabé kií ján Derbe.

²¹ K'e nga jye tsibénojmi 'én ndaà-la Nainá xi kjoə ts'e Cristo ya Derbe, nga jye kjin xita kòkjeiin-la, kií ijngoò k'a-ne Listra, Iconio ko Antioquía.

²² Pablo ko Bernabé kitsjaà-la nga'ño inima-la jñà xita xi kota'yát'aà-la Cristo xi títsajna naxandá koi; tsibénojmi-la nga kixi kàtìtsajnakò 'én xi mokjeiin-la; kitsò-la:

—Mochjeén-né nga tse kjo'in síkjiaán ítjoán k'e nga kitjás'en-jñaá ñánda tíhotixoma Nainá.

²³ Nga jngoò ijngoò i'nde ñánda tjín xita naxandá-la Cristo, Pablo ko Bernabé jaàjiin xita jchínga xi tsibít'aà xá nga síkinda xita-la Cristo; k'e nga jye kiichjat'aà-la Nainá, jye tsibìtsajnachjan, kisikìtsajnaya tsja Nainá nga jye mokjeiin-la it'aà ts'e Nainá.

Kós'in ijchò-ne Pablo ko Bernabé ján Antioquía ts'e Siria

²⁴ Jahato i'nde Pisidia, ijchò-ne nangui Panfilia.

²⁵ Tsibénojmi 'én ndaà-la Nainá xi kjoə ts'e Cristo ya Perge, ikjoàn kií-ne Atalia.

²⁶ Yaá jahas'en chitso nga tsohótji-ne nga kií ijngoò k'a-ne Antioquía, i'nde ñánda kisatiixá-la it'aà ts'e kjondaà-la Nainá, xá xi jye kisikitasòn.

²⁷ K'e nga jye ijchò-ne Antioquía, tsibíxkóya xita naxandá-la Cristo; tsibénojmi-la ngats'ii kjoə xi kisiko Nainá, kós'in komàt'in nga Nainá kitsjaà'nde nga tikoə kòkjeiin-la jñà xi mìtsà xita judío.

28 Pablo kò Bernabé, tsee tsibìtsajna kò xità xi kota'yàt'aà-la Cristo ya Antioquía.

15

Mé kjoa xi tsajoóya-ne jñà xità xi tsibíxáya-la Jesús kò xità jchínga ján Jerusalén

¹ Jñà nachrjein koi, j'ìi i'nga xità xi inchrobà-ne Judea nga tsibénojmi-la xità-la Cristo, kitsò-la: “Mikìi kítjokàjñò kjo'in tsà mikìi sít'aà chiba-la yijo-nò kjoa ts'e circuncisión koni s'ín tíchja kjo'tíxoma xi kiskìi Moisés.”

² Pablo kò Bernabé 'ñó tsajoókjoè kò jñà xità koi; tsohótiyaá-ne jñà kjoa koi; ikjoàn kisìkasén Pablo kò Bernabé ján Jerusalén; tsobáhijtako i'nga xità-la Cristo xi títsajna ya Antioquía nga kiikon jñà xità xi tsibíxáya-la Jesús kò xità jchínga xi otíxoma ya naxandá-la Cristo nga sindaàjiin kjoa koi.

³ Jñà xità naxandá-la Cristo xi títsajna Antioquía, kisìchját'aà-la nga kiì-ne xità koi. Jahato Fenicia kò Samaria; tsibénojmi nga jñà xi mìtsà xità judío tíkjoa jyeé tífatjìya-la nga Cristo nchifit'aà-la. Ngats'ìi xità xi mokjeiín-la it'aà ts'e Cristo, 'ñó kjòtsja-la.

⁴ Pablo kò Bernabé, k'e nga ijchò ján Jerusalén, jñà xità naxandá-la Cristo kò xità jchínga xi ya otíxoma kò xità xi tsibíxáya-la Jesús, ndaá kiskoétjò. Xità koi tsibénojmi yije mé kjoa xi kis'ìin Nainá nga kisìchját'aà-la.

⁵ Ya títsajnajìin i'nga xità fariseo xi jye kòkjeiín-la 'én ndaà-la Nainá xi kjoa ts'e Cristo; chinchà kixi, kitsò:

—Jñà xi mìtsà xità judío xi jye mokjeiín-la, mochjeén-né nga sít'aà chiba-la kjoa ts'e circuncisión; tíkjoa sinè-la nga kàtasíkitasòn kjo'tíxoma xi kiskìi Moisés.

⁶ Kjòxkóya xità xi tsibíxáya-la Jesús kò xità jchínga xi otíxoma ya jìjìin naxandá-la Cristo nga tsajoóya-ne kjoa koi.

⁷ Tse jchán tsajoóya-ne kjoa koi; chaán tsasìjna kixi Pedro, kiìchja, kitsò:

—'Ndsee, jñò, jyeé tíjìin-nò nga kjòtsee jaàjìin-na Nainá nga 'an kènojmi-la 'én ndaà-la Nainá xi kjoa ts'e Cristo jñà xi mìtsà xità judío mé-ne nga tíkjoa kòkjeiín-la.

⁸ Nainá xi beè inìma-ná, k'oaá s'ín tsakó kixi-ná nga tíkjoa kiskoétjò xità koi nga k'oaá tìs'ín kitsjaà-la Inìma Tsjeè-la koni s'ín kitsjaà-ná jñà.

⁹ Nainá, kisìtsjeè inìma-la xità koi k'e nga kòkjeiín-la it'aà ts'e Cristo, nga mikìi faàjìin xità, tà ngàsòn fikò-ná ngats'iaá, xi xità judío 'mì-ná kò xi taxki xità.

¹⁰ I'ndeì, ¿mé-ne kondra onguí-là kjohítsjeèn-la Nainá, tsà koi nachrjein-la kojti-la? Nga bìnè-lá xità xi kota'yàt'aà-la Cristo nga sùkítasòn kjoa ts'e kjòtíxoma. Nì jñà kò nì jñà xità jchínga-ná chíkjoa-ná nga nìkitasoán.

¹¹ Mikìi kòs'ín koma. Nga k'oaá s'ín mokjeiín-ná nga jñà, kò xi taxki xità, ta ngàsòn kjondaà-la Na'èn-ná Jesucristo kítjokàjñá kjo'in.

¹² Jyò tsibìtsajna ngats'ìi xità xi ya títsajna. Kìi'nchré-la Bernabé kò Pablo nga tsibénojmi-la xità nga 'ñó tse kjòxkón ndaà xi kis'ìin Nainá xi it'aà ts'e nga nguixkòn jñà xi mìtsà xità judío.

¹³ K'e nga jye kiichja Bernabé kò Pablo, k'eé kiichja Jacobo, kitsò:

—'Ndsee xi i títsajnaà, tìná'ya-ná.

¹⁴ Jè Simón Pedro, jyeé tsibénojmi-ná kó s'ín komà nga tisa ítjòn nga Nainá jaàjìin jñà xi mìtsà xità judío nga naxandá-la koma.

¹⁵ K'oaá s'ín mangàsòn 'én koni s'ín kiskìi jñà xità xi kiìchja ngajo-la Nainá nga kitsò:

¹⁶ K'e nga koma iskan, kítjojen ijngò k'a

nga kìndàyà xitè-na kjòtíxoma-la xitàxá ítjòn David xi jye its'oòn;

jè xi jye chixoña, ìjngoò k'a síkixiya-na;
siikíjna jngoò-na xita xi kotixoma ngajo-la David,

¹⁷ mé-ne jña xita xi i'nga kohótsji-ne Nainá,
ngats'iì xi mìtsà xita judío, jña xi 'ín ts'an tjit'aà.

¹⁸ K'oaá tsò Nainá, nga tsibénojmi kjohítsjeèn xi tjin-la
skanda tisa tats'en-la kjoa.

¹⁹ "An, k'oaá xán-nò nga mìkiì sinè-la kjoa xi 'in tjin jña xi mìtsà xita judío,
jña xi nchifatjia-la nga Nainá nchifit'aà-la.

²⁰ Ta jè xi mochjeèn nga sikasén-lá xojon mé-ne nga mìkiì skine ngats'iì
tsojmi xi ya sinchá nguixkon kjoaxkósòn; tikoá kì tì kjoa chingui s'ín-ne, mì
tì kiì skine-ne jní kò ngats'iì yijo-la cho xi mìkiì xíxteèn jní-la.

²¹ Skanda kjótseé, xkì xi ján naxandá tjin xita xi bíxkejìin xojon kjotixoma
xi kiskìi Moisés ya ni'ya ingo sinagoga nga jìin jìin nachrjein nga nachrjein
nikjáya.

²² Jña xita xi tsibíxáya-la Jesús kò ngats'iì xita naxandá-la Cristo kò xita
jchínga xi ya otixoma, tsajoóya-ne nga jaàjìin i'nga xita xíkjin xi kisikasén ján
Antioquía. Jña kitjaàjìin Judas xi tikoá Barsabás 'mì kò Silas, jña xita xi ndaà
yaxkón ya ijìin naxandá-la Cristo. Tsobáhijtakò Pablo kò Bernabé.

²³ Kisik'a jngoò xojon xi tsò:

"Ngajen, xita xi tsibíxáya-la Jesús kò xita jchínga, nihixat'aà-nòjen jñò xi
mìtsà xita judío 'mì-nò xi 'ndsé chibá it'aà ts'e Cristo xi titsajnaà ya naxandá
Antioquía, kò i'nde Siria kò Cilicia.

²⁴ Jyee kina'ya-jen nga i'itjokàjìin i'nga xita xi ijchòkon-nò nga siì síko-nò nga
chjako-nò 'én xi síkíts'ón-jìin-la inima-nò, tanga mìtsà ngajen tsatíxá-lajen.

²⁵ Ngats'iì-jen, k'oaá s'ín kichoòsòn-lajen nga kinikasén i'nga-nòjen xita
tsajen xi kiikon-nò. Tsobáhijtakò xinguiáá Pablo kò Bernabé, xita xi 'ñó
matsjacha-jen.

²⁶ Jña xita koi, jye k'oas'ín tsibínè-la yijo-la nita mé kjo'in xi komàt'in xi kjoa
ts'e Na'èn-ná Jesucristo.

²⁷ Titsanikasén-nòjen Judas kò Silas; ngats'iì 'én xi tjit'aà xojon, jña xita koi
keènojmiya ìjngoò k'a-nò xi tà 'én kòkò-nò.

²⁸ Ngajen kò Inima Tsjeè-la Nainá ndaà kisaseèn-najen nga mì kjo'ñó
koma-nò kjoa ts'e kjotixoma xi 'in tjin; tà koi-né xi ndaà mochjeèn:

²⁹ nga mìkiì ma chjinee yijo-la cho xi ya biyaà nguixkon xkósòn; mìkiì ma
chjinee jní kò mìkiì ma chjinee yijo-la cho xi mìkiì xíxteèn jní-la; tikoá kì tì
kjoa chingui nis'in-là; tsà chjaàxìn-là yijo-nò ngats'iì kjoa koi, ndaà s'e; k'e
chibá."

³⁰ Xita koi, k'e nga jye kisihixat'aà xíkjin, nitoón kiì skanda ján Antioquía; k'e
nga ijchò tsibíxkóya ngats'iì xita-la Cristo, kisingsja xojon xi 'ya.

³¹ Jña xita naxandá-la Cristo, k'e nga jye tsibíxkejìin xojon, tsjaá komà-la
nga ijchò-la 'én xi kisìjehikon.

³² Jè Judas kò Silas tikoáá Nainá chja ngajo-la; ndaà kisìjehikon jña xita-la
Cristo; kitsjaà-la nga'ñó.

³³ Xita koi, kjìn nachrjein tsibìtsajna Antioquía. Nga komà iskan kisihixat'aà
xíkjin, kiì-ne Jerusalén; kiikon-ne jña xita xi kisikasén.

³⁴ [Tanga jè Silas ndaà kisaseèn-la nga tsibìjna Antioquía.]

³⁵ Jè Pablo kò Bernabé, yaá tsibìtsajna Antioquía; tsakóya-isa 'én-la Nainá
tikoá kiichjaya 'én ndaà-la Nainá xi kjoa ts'e Cristo. Tikoáá kjìn xita xi kj'eij
kisixákjò.

K'e nga chinchat'aà xìn-la xíkjin jè Pablo kò Bernabé

³⁶ K'e nga komà iskan, Pablo kitsò-la Bernabé:

—Tíkjaán ìjngò k'aá kóhokji naxandá ñánda tsibènojmiá 'én-la Nainá mé-ne nga jchaá kó s'ín títsajna xita xinguiá.

³⁷ Jè Bernabé mejèn-la kjiko Juan, xi tikoá Marcos 'mì;

³⁸ tanga jè Pablo mìkìi kisaseèn-la nga jè kjiko, koií kjoa-la nga kitsjeiin takòn ján Panfilia nga mì tì kii tsobáhihtako-ne nga kisixá jè xá xi tjíma-ne.

³⁹ K'oaá s'ín komà-ne nga kisakò kjoa nga mìkìi kjòngàsòn 'én-la; chinchat'aà xìn-la xíkjin; jè Bernabé kii kjoa Marcos; kiisòn-ndá skanda Chipre.

⁴⁰ Jè Pablo, jaàjin Silas nga tsobáhihtako. Jñà xita-la Cristo kisikítsajnyaya tsja Nainá nga kii.

⁴¹ Kii kóhokji nangui Siria kò Cilicia nga ya chinchima nga isa ndaà kisi'ño ikon jñà xita naxandá-la Cristo.

16

K'e nga jè Timoteo tsobáhihtako Pablo kò Silas

¹ Pablo, k'e nga ijchò naxandá Derbe kò Listra, ya kisatiikjoò jngò xita xi kota'yàt'aà-la Cristo xi Timoteo 'mì; nea-la xita judío-né xi mokjeiin-la it'aà ts'e Cristo. Tanga jè na'èn-la xita griego-né.

² Jñà xita-la Cristo xi títsajna Listra kò Iconio 'ño ndaà kisikijna Timoteo.

³ Pablo mejèn-la nga jè koahihitako; k'oaá komà-ne nga kisit'aà chiba-la kjoa ts'e circuncisión mé-ne nga ndaà kijn-ne Timoteo it'aà ts'e xita judío; nga jñà xita xi ya i'nde-la jyeé beè nga na'èn-la Timoteo, xita griego-né.

⁴ Ngats'ii naxandá ñánda jahato, k'oaá kitsò-la nga kàtasíkitasòn kjoakixi xi tsajoóya-ne jñà xita xi tsibixáya-la Jesús kò xita jchínga xi títsajna Jerusalén xi otixoma ya ijìn naxandá-la Cristo.

⁵ Jñà xita naxandá-la Cristo, isaá 'ño ndaà mokjeiin isa-la; nachrjein nchijòn tímakjin-ya xita xi nchimokjeiin-la.

K'e nga jè Pablo kisiniñá jngò-la xita Macedonia

⁶ Jè Iníma Tsjeè-la Nainá mìkìi kitsjaà'nde-la Pablo kò xita xi kjihitako nga 'én-la Cristo kii síka'bí ján nangui Asia; k'oaá ma-ne nga ya jahatojin nangui ñánda 'mì Frigia kò Galacia.

⁷ K'e nga ijchò chrañat'aà-la nangui Misia mejèn-la nga ján kjoì nangui Bitinia, tanga jè Iníma-la Jesús mìkìi kitsjaà'nde-la.

⁸ Tà jahato Misia, ijchò skanda naxandá Troas.

⁹ Nga jye títsajna Troas, Pablo, k'e nga nitjen, tsatsejèn jngò-la xita koni tsà nijná tí'biì-la xi nangui Macedonia i'nde-la xi tsasíjna kixi nguixkon Pablo. Tsibítsi'ba-la, kitsò-la: “Nchroboí i nangui Macedonia. Tichját'aà-nájen.”

¹⁰ Pablo, k'e nga jye kijtseè kjoa koi, nitóon tsitsajnandaà-jen nga tsanguì-jen ján nangui Macedonia; k'oaá s'ín kjòchiya-najen nga kixi kjoa nga Nainá tichja-najen mé-ne nga síka'bí-jen 'én ndaà-la Nainá xi kjoa ts'e Cristo ya i'nde jè.

Kós'ín komà nga jè Pablo kò Silas kii ndayá ya naxandá Filipos

¹¹ K'e nga itjo-najen ya naxandá Troas, kichjoé jngò-jen chitso, tsanguí kixi-jen ya nangui xi kijnajin ndá xi 'mì Samotracia; xi komà inchijòn ìjngò k'a tsanguì-jen skanda naxandá Neápolis.

¹² Itjo-najen Neápolis, tsanguì-jen Filipos, jngò naxandá ítjòn ts'e i'nde Macedonia xi 'ño tjoé-la nga'ño it'aà ts'e Roma. Kjin nachrjein tsitsajna-jen ya i'nde jè.

¹³ Jngò nachrjein nìkjáya tsanguí jngò-jen i'nde indii naxandá ñánda tífa jngò xajngá nandá nga k'oas'ín kinikitsjeèn-jen nga tjín jngò i'nde ñánda

chjat'aà-la Nainá xitá judío. Tsitsajna-jen; kinokjoàko-jen it'aà ts'e 'én ndaà-la Nainá xi kjoa ts'e Cristo jñà íchjín xi maxkóya ya i'nde jè.

¹⁴ Ya tijnajin jngoò chjoón xi 'mì Lidia xi otíjna nikje chjí xi sko kjoàn isén-la; yaá i'nde-la ñánda 'mì Tiatira; ndaà beèxkón Nainá; jè Nainá kiskíx'ajin kjohítsjeèn-la nga ndaà tí'nchré koni s'ín tíchja Pablo.

¹⁵ Komà bautizar Lidia ko ngats'ii xitá ni'ya-la; xi komà iskan tsibítsi'ba-najen kitsò:

—Jñò tsà kixii kjoa nga mokjeiin-nò nga 'an, ndaà mokjeiin-na it'aà ts'e Nainá, tíkjiaán ni'ya-na, ya síkjayaá.

Ngajen kjo'ño tsitsajna-jen.

¹⁶ Jngoò nachrjein k'e nga titsahonguí-jen i'nde ñánda nokjoat'aà-lajen Nainá, kisatíikjoò jngoò-jen tsòti chí'nda xi iníma ch'o-la neíí tíjin iníma-la; maá-la bíndaà nga kot'aàsòn xitá. Jñà nei-la tsòti jè, ndaà jchán síkijne ton nga koi xá s'ín.

¹⁷ Tsòti jè, kiitjingui-najen; 'ño chja tjingui-najen, nga tsò:

—Xitá koi, chí'nda-la Nainá-né xi 'ño jeya tíjna; tíjñà-ne xi bénojmí-nò ndiyá xi kitjokàjin-nò kjo'in.

¹⁸ Jè tsòti, kjin nachrjein k'oas'ín kitsò-najen. Pablo chaán kòjti-la, kisikátjifaya'a; kiichja-la jè tjo neíí xi tíjin iníma-la. Kitsò-la:

—It'aà ts'e Jesucristo, k'oaá xan-lè, tíjokàjin iníma-la tsòti jè.

Tík'ée-ne kjòndaà-ne.

¹⁹ Jñà nei-la, k'e nga kijtseè nga kitjaàxin-la kjoa xi ma-la, nga mì tí kiì kisikijne-ne ton, kitsobà'ño Pablo ko Silas, kiìko nguixkon xitaxá.

²⁰ Chinchá osen ñánda títsajna xitaxá, kitsò:

—Jñà xitá koi xi xitá judío, fi kátsji kjosii i naxandá-ná.

²¹ Kjoíxoma xi okóya mìkiì ndaà tíjn, mìkiì tíj'nde-ná nga chjoé, mìkiì k'oas'ín s'éeen, koií kjoa-la nga xitá Roma-ná jñà.

²² Ngats'ii xitá naxandá saà kondra kiì-la jè Pablo ko Silas; jñà xitaxá kitsjaà okixi nga tsatejndajno nikje-la, ikjoàn tsajá-la.

²³ K'e nga jye 'ño tsajá-la, ingajò, kiskinìs'en ndayá; ikjoàn kitsjaà-la okixi jè xitá xi síkinda ndayá nga ndaà kàtasíkinda xitá koi.

²⁴ Jè xitá xi síkinda ndayá, k'e nga kits'ii-la okixi, yaá chinchá iya ñánda isa 'ño tíjn. Tsibít'aà'ño ndsoko it'aà yá ts'e ndayá.

²⁵ K'e nga jye ijchò osen nitjen, jè Pablo ko Silas, nchichjat'aà-la Nainá ko nchiseè-la; jñà xitá xi i'nga xi tíkoà kjo'in títsajna, tà nchi'nchré-la.

²⁶ Tík'e-ne tà nitoón j'ii jngoò ch'ón xi 'ño jchán ts'a. Jñà xotjoa-la ndayá kitáx'a, tíkoà jñà na'ño kichá cadena xi tíj'aà 'ño-ne xitá xi titsajna ndayá, jngoò k'a kitjajnda'ño.

²⁷ Jè xitá xi síkinda ndayá, k'e nga jaá-la, kijtseè nga tíx'a yije xotjoa-la ndayá. Kisikítsjeèn, maá-la tsà jyeé tsanga yije xitá xi títsajna kjo'in. Kiskoé jngoò kichá ndojò nga mejèn-la sík'en yijo-la.

²⁸ Jè Pablo, k'e nga kijtseè, nitoón 'ño kiichja-la kitsò-la:

—Kì k'oaá nikoíi yijo-lè; jí titsajna yije-jen.

²⁹ Jè xitá xi síkinda ndayá kisijé jngoò ni'ín nga kjòhiseèn-ya ndayá; chiba-la tíhotsé-né k'e nga jahas'en cuarto ñánda títsajna Pablo ko Silas; ikjoàn kisikatjen yijo-la ya ingui ndsoko.

³⁰ Ikjoàn tsachrje-ne ndayá Pablo ko Silas; kiskònangui-la, kitsò-la:

—Na'èn, ¿mé xi s'iaàn nga kitjokàjñàà kjo'in?

³¹ Pablo ko Silas kitsò-la:

—Kàtakjeiin-lè it'aà ts'e Na'èn-ná Jesucristo mé-ne nga kíjokàjñoò kjo'in ngaji ko ngats'ii xitá ni'ya-lè.

³² K'eé tsibénojmí-la 'én-la Nà'èn-ná ngats'iì xità xi ya títsajna ni'ya-la.

³³ Tìjè-ne nìtjen jè, jè xità xi síkinda ndayá, tsanínno ñánda kitì-la Pablo kò Silas; xità jè tìkoá komà bautizar kóhótjín xità xi ya títsajna ni'ya-la.

³⁴ Nga jye komà iskan, kiiko ni'ya-la nga tsakjèn kjoò kóhótjín xità ni'ya-la xi nguì tà kjotsja nga jye kòkjeín-la ìt'aà ts'e Nainá.

³⁵ Nga komà inchijòn, jña xitàxá kisìkasén policia-la nga kisìkasén-la okixi jè xi síkinda ndayá nga tà k'oas'ín kàtitjo-ne Pablo kò Silas.

³⁶ Jè xità xi síkinda ndayá kisikí'nchré Pablo kitsò-la:

—Jña xitàxá, jyeé kàtsjá-na okixi nga ma kítjondeí-nò. Ndaà tanguí-nò.

³⁷ Tanga jè Pablo kitsò:

—Ngajen xità Roma-nájen. [Mikiì tjí'nde nga taxki siko-najen.] Tanga kis'eé-najen yá nga nguixkòn naxandá k'e nga skanda tìkj'eé 'ya-la mé jé xi tjín-najen; tanga ì'ndeì mejèn-la nga tà kjoa chijé kochrje-najen ndayá; jña kàtjanchrobá sobà nga kàtchrje-najen.

³⁸ Jña policia, k'oáá s'ín kiì kénojmí-la jña xitàxá koni s'ín kitsò Pablo. K'e nga kiì'nchré jña xitàxá nga jè Pablo kò Silas nga xità Roma, tsí ndaà kitsakjòn.

³⁹ K'eé nìton kiì nga tsachrje-ne ndayá Pablo kò Silas; ikjoàn tsibít'si'ba-la kjoa xi komàt'in; kitsò-la nga ta kjondaà kàtitjojin naxandá.

⁴⁰ Pablo kò Silas, k'e nga jye itjo-ne ndayá, kiì ni'ya-la chjoón xi 'mì Lidia. Yáá tsohókò nojmí xikjín xi ngàsòn mokjeín-la ìt'aà ts'e Cristo nga 'ñó kàt'eé-la ikon; ikjoàn kiì-ne.

17

K'e nga kisakò kjoasì ján Tesalónica

¹ Jahato Anfípolis kò Apolonia, ijchò Tesalónica ya naxandá ñánda tjín jngoò ni'ya ingo sinagoga xi ts'e xità judío.

² Jè Pablo, koni s'ín kjit'aà, jahas'en jè ni'ya ingo sinagoga; jàn nàchrjein nìkjáya tsajoóya-ne nga kiskoòta'ya Xojon-la Nainá.

³ K'oáá s'ín tsibénojmí-la nga jè Cristo k'oáá s'ín tjínè-la nga kiyá tìkoáá jaáyaá-la ìt'aà ts'e kjoabiyaà. Kitsò-la:

—Jesús xi 'an tibenojmí-nò, jé-né xi Cristo [xi xó k'oas'ín tjínè-la nga kjoí].

⁴ Tjín i'nga xità judío xi kòkjeín-la; yaá tsoháhtakò Pablo kò Silas. Tìkoáá kjín íchjín ítjòn kòkjeín-la kò xità griego xi beèxkón Nainá.

⁵ Tanga jña xità judío xi mikiì mokjeín-la, kjòchinikeè Pablo kò Silas. Tsibíxkóya xità ts'eé xi tà jyò tjíma; tsibít'si'ia kjoasì ya naxandá; kiì kjaán-t'aà ni'ya-la xità xi 'mì Jasón nga tsohótsji Pablo kò Silas nga mejèn-la sùkíjna osen nga nguixkòn naxandá.

⁶ Tanga mikiì kisakò-la ñánda tjína Pablo kò Silas; kjo'ño komà-la nga tsachrje ni'ya jè Jasón kò i'nga xità-la Cristo xi ya títsajna nga kiiko nguixkòn xitàxá; 'ño kiìchja kitsò:

—Jña xità koi xi síkits'ón xità xi tjín nga títsa isò'nde; jyeé j'ì ì'nde tsaján.

⁷ Ngats'iì xità koi, jè Jasón kitsjaà'nde-la ni'ya-la. Saà kondraá fi-la kjotíxoma-la César xi xitàxá ítjòn ts'e Roma; k'oáá tsò nga tjín ìjngoò xitàxá ítjòn xi Jesús 'mì.

⁸ Jña xitàxá kò xità naxandá, k'e nga kiì'nchré 'én koi, kòjtí-la.

⁹ Jè Jasón kò xità xi i'nga tsibíhjtjì yijo-la ìt'aà ts'e xitàxá nga komà tsibít'sajnandeí-ne.

K'e nga tsibít'sajna naxandá Berea Pablo kò Silas

10 K'e nga jye kòjñò, jñà xità-là Cristo nitoón kisikasén jè Pablo kò Silas skanda ján naxandá Berea. K'e nga ijchò i'nde jè jahas'en ni'ya ingo sinagoga ts'e xità judío.

11 Jñà xità xi títsajna Berea, isaá ndaà tjín kjohítsjeèn-là mì k'oaà-ne koni xi títsajna ya Tesalónica; isaá nìton kòkjeiín-là 'én-là Nainá kò nachrjein inchiòn tsibíxkejiín Xojon-là Nainá nga mejèn-là skoë tsà kixí kjoa koni tsò 'én xi okóya Pablo.

12 Kjìn xità judío kòkjeiín-là tikoá kjìn íchjín ítjòn kò xità x'in kòkjeiín-là xi xità griego.

13 Jñà xità judío xi títsajna Tesalónica, k'e nga kiì'nchré nga jè Pablo kò Silas ya títsajna Berea, nga 'én-là Nainá nchibénojmí, kiì ya naxandá jè nga kiì kinchá'a xità mé-ne nga kisakò-ne kjoasii.

14 Jñà xità-là Cristo, nitoón kisikasén Pablo ján indii ndáchikon; tà jè Silas kò Timoteo tsibítsajna ya Berea.

15 Jñà xità xi tsobáhijtakò Pablo nga kiì kinì indiaà, kiìkò skanda Atenas. K'e nga jye j'ii-ne xità koi, 'ya-là okixi Silas kò Timoteo nga nitoón kjitjinguila Pablo.

Kó tsò 'én xi kùichja Pablo k'e nga tsibìjna ján Atenas

16 Pablo, k'e nga tíjna naxandá Atenas nga tíkoña-là Silas kò Timoteo, 'ño baá komà-là nga kijtseè nga ya naxandá jè, 'ño kjìn xkósòn beèxkón.

17 Ya ni'ya ingo sinagoga tsajoókjoòkò xità judío kò xi taxki xità xi beèxkón Nainá; nachrjein inchiòn tsohóko ngats'ii xità xi bixoña ya ndítsin.

18 Nachrjein koi tjín i'nga xità xi tsakóya kjohítsjeèn ts'e xità epicúreo kò xità estoicos nga tsajoókjoò Pablo. Tjín i'nga xi tsò:

—¿Kó tsóya-ne 'én xi chjaya, nga siì s'ín nga chja?

Tikoáá tjín i'nga xi tsò:

—K'oaá ma-ná, kj'ejií-la nainá tíhokóya.

Koií k'oas'ín kitsò-ne nga jè Pablo, jè tíbénojmí 'én ndaà-là Nainá xi kjoa ts'e Jesús nga jaáya-là it'aà ts'e kjoabiyaà.

19 K'ée kiìkò jngoò i'nde ñánda 'mì Areópago. Kiskònanguila kitsò-là:

—¿A komaá isa ndaà kénojmí-nájen jè kjotíxoma xitse xi ngaji okoòyi?

20 'Ñó kj'ejií tsò. Mejèn-nájen nga jcha-jen kó tsóya-ne.

21 Koií okitsò-ne nga jñà xità Atenas kò xità xi xìn nangui-là xi ya títsajna, tà jè xi mejèn-là nga skoë kò koma kjoóya-ne ngats'ii kjoa xitse.

22 Pablo, tsasíjna kixi nga jngoò osen-là i'nde Areópago, kitsò:

—Ngats'ioò xi i i'nde-nò Atenas, k'oaá s'ín tibexkon-nò; 'ño ndaà yaxkón jñà xi nainá 'mì-là.

23 K'e nga jáhatoaà jñà ingo ñánda bixoñaà, kijtseè jngoaa ingo ñánda tjít'aà 'én xi tsò: “Nainá xi mìkiì yaxkon-là.” Jè xi jñò yaxkón, nas'ín mì kì yaxkon, tijè-ne xi 'an benojmí-nò.

24 Jè Nainá xi tsibíndaà isò'nde, ngats'ii tsojmì xi tjín nga tíjtsa isò'nde, jè xi nei-là ngajmii kò nangui; mìtsà ya tíjnaya ingo xi tsja xità bíndaà-ne.

25 Tikoáá, nímé xi mochjeén-là it'aà tsaján. Ta saá jè tísíkiñakon-ná, tsjá-ná tjo xi chjoaán, tsjá-ná ngats'ii xi mochjeén-ná.

26 'Nainá, jngoò xità kisikjeén nga tsibíndaà ngats'ii xità xi tjín nga tíjtsa isò'nde; kiskoòsòn-là kótjín nachrjein kítsajna kò ñánda kítsajna,

27 mé-ne nga kátátsji-ne Nainá, nas'ín k'oas'ín kátas'ín koni jngoò xità xi mìkiì tsejèn-là nga ótsijino ótsjit'aà nangui. Tanga Nainá, mìtsà kjìlìn tíjna; chraña tíjnat'aà-ná.

²⁸ Koni s'ín kitsò jngoò x̄ita tsajòn xi 'ñó chjine: “Jñá, ki'ndí-la Nainá 'mì-ná.” Kixí kjoa, nga jè tsjá-ná nga titsajnakoaán nga ñikjaníyá nga titsajnasoán isò'nde.

²⁹ Tsà kixí kjoa nga ki'ndí-la Nainá 'mì-ná, mì k'oas'ín sikítsjeén nga Nainá jñà isén xi kicha oro xi kicha plata kò xi ndajo xi x̄ita bíndaà-ne tsja koni s'ín tjín kjohítsjeèn-la.

³⁰ Nga sà ítjòn Nainá kitsjaà'nde-né nga tjíjñò-la x̄ita. Tanga i'nde, k'oaa s'ín tsjá okixi nga tíjtsa isò'nde nga jñà x̄ita kàtasíkájno jé-la nga mì tì jé kohótsji-ne.

³¹ Nainá jye tsibíjna jngoò nàchrjein nga kixí koìindaàjìin ngats'ìi x̄ita isò'nde. Jaàjìin jngoò x̄ita xi kitsjaà-la okixi nga jè koma x̄itaxá xi koìindaàjìin-la ngats'ìi x̄ita. Kò k'oaa s'ín tsakó nga kixí kjoa k'e nga kisikjaáya-la it'aà ts'e kjoa biyaà.

³² K'e nga kii'nchré-la kjoa ts'e nga faáya-la mik'en it'aà ts'e kjoa biyaà, tjín i'nga x̄ita xi tà tsijnò'nga-né kò tjín i'nga xi kitsò:

—Jñà kjoa koi, kj'eíi nàchrjein kìná'ya-jen.

³³ Pablo, k'eé itjojìin-la.

³⁴ Tanga tjín i'nga x̄ita xi ya títsajna nga kòkjeiín-la: jngoò x̄ita xi 'mì Dionisio xi ya chja-ne ts'e x̄ita xi títsajnajtín xi 'mì Areópago; tìkoa jngoò chjoón xi 'mì Dámaris, kò x̄ita xi kj'eíi isa.

18

K'e nga kisixá Pablo ya Corinto

¹ K'e nga jye komà iskan, Pablo itjojìin Atenas, kii Corinto.

² Yaá kiskaàkjoò jñà x̄ita judío xi 'mì Aquila kò chjoón-la xi 'mì Priscila. Ján nangui-la ñánda 'mì Ponto. Sà ta k'eé j'ìi-ne nangui Italia koií kjoa-la nga jè Claudio xi x̄ita sko-la tsachrje kjotíxoma nga ngats'ìi x̄ita judío kitjokàjìin naxandá ítjòn xi 'mì Roma. Pablo kiikon jñà x̄ita koi.

³ Jñà x̄ita koi, tìkoaá koií xá s'ín jè xá xi s'ín Pablo nga ni'ya nikje bíndaà. Yaá tsibijnako nga kisixákjoò.

⁴ Nga jìin jìin nàchrjein, k'e nga nàchrjein ñikjáya, Pablo fi ya ni'ya ingo sinagoga nga fi káko jñà x̄ita judío kò xi mìtsà x̄ita judío nga kàtakjeiín-la.

⁵ K'e nga j'ìi-ne Macedonia, jè Silas kò Timoteo, jè Pablo nguì koií xá kis'iin nga tsibenojmí-la 'én-la Nainá jñà x̄ita judío. Kitsò-la nga jè Jesús, jè xi Cristo [xi xó kinikasén-ne].

⁶ Tanga jñà x̄ita judío, tà kondraá kii-la Pablo koa kiichjajno-la; k'oaa s'ín komà-ne jè Pablo tsibítsajne nikje-la xi kondra ts'e x̄ita koi, [jè kjoa xi okó nga kjo'in s'e-la it'aà ts'e Nainá], kitsò-la:

—Jé tsajòn-nó tsà mìkii mokjeiín-nò; 'an jye kisikitasoàn nga tsibenojmí-nò 'én. I'nde, jñà tífikenojmí-la jñà xi mìtsà x̄ita judío.

⁷ Pablo, itjo ni'ya ingo sinagoga; kii jngoò ni'ya-la x̄ita xi ya chrañat'aà tjina xi 'mì Ticio Justo xi ndaà beèxkón Nainá.

⁸ Crispo, jè xi x̄ita ítjòn-la ni'ya ingo sinagoga, kòkjeiín-la 'én-la Nainá, ngats'ìi xi x̄ita ni'ya-la; tìkoaá kjin x̄ita Corinto xi kii'nchré 'én xi tsakóya Pablo kòkjeiín-la, ikjoàn komà bautizar.

⁹ Jngoò nitjen jè Pablo, k'oaa komà-la koni tsà nijná kits'ii-la; Na'èn-ná kiichja-la, kitsò-la:

—Kì jyò bijni, kò kì tsakjoòn-jèn, tìnókjoa-né.

¹⁰ Mì yá x̄ita kó sikkò-lè, 'aán tijnako-lè; i'nde jè, kjin ma xi x̄ita ts'an ma.

¹¹ Pablo, jngoò nó osen tsibijna Corinto nga tsakóya 'én-la Nainá.

¹² K'e nga xitaxá gobernador tsibìjna jè xi 'mì Galión ya ì'nde Acaya, jñà xita judío tsajoóya-ne nga kitsobà'ño Pablo; kiikò ni'ya osen mé-ne nga kisindaàjìin-la.

¹³ Kitsò-la jè xitaxá xi gobernador tíjna:

—Xita jè naxandá tíbinchá'a nga kj'eí s'ín beèxkón Nainá; mì k'oagá s'ín koni s'ín tjín kjotíxoma ts'e Roma.

¹⁴ K'e nga mejèn kiichja Pablo, jè Galión kitsò-la xita judío:

—Tsà jngoò kjoa xi tse tjín kò 'in tjín, tjínè-la nga 'an kíndaajñaà;

¹⁵ tanga tà 'én-né, tà kjotíxoma tsajòn-nò; tà jñò tindaajñoò; 'an mìkì skongájñaà kjoa koi.

¹⁶ Ikjoàn tsachrje ni'ya osen.

¹⁷ Ngats'ìi xita griego kitsobà'ño jè xita ítjòn ts'e ni'ya ingo sinagoga, jè xi 'mì Sóstenes. Kiskaàn-kò ya ni'ya osen nga nguixkòn xitaxá. Tanga jè xitaxá Galión, mìkì kisìs'in-la.

Kìi s'ín kii ìjngoò k'a-ne Pablo ya Antioquía

¹⁸ Pablo, kjin nàchrjein tsibìjna isa ya Corinto. Iskan kisihixat'aà jñà xita 'ndse, kii-ne Siria. Tsobáhjtakò Priscila kò Aquila. Ya Cencrea tsibìjno-la skò koni jngoò chiba xi okó nga jye kisikitasòn koni s'ín kitsjaà-la tso'ba Nainá.

¹⁹ K'e nga ijchò Éfeso, yaá tsibìtsajna Priscila kò Aquila. Pablo, ján kii ni'ya ingo sinagoga nga tsajoókjoò jñà xita judío xi ya bixoña.

²⁰ Jñà xita koi tsibìtsi'ba-la Pablo nga isa kjin nàchrjein kàtijnako, tanga Pablo, mìkì kòkjeiín-la.

²¹ Kisihixat'aà xita xíkjin kitsò-la:

—Tsà Nainá mejèn-la, iskan kjoìkon ìjngoò k'a-nò.

Ikjoàn tsibìjnaya chitso nga kii.

²² K'e nga ijchò Cesarea, kii ján Jerusalén nga kisihixat'aà xita naxandá-la Cristo. Ikjoàn kii skanda Antioquía.

²³ Kjin nàchrjein tsibìjna Antioquía; iskan kii kóhokji ì'nde Galacia kò Frigia. Kisì'ño ikon ngats'ìi xita xi kota'yàt'aà-la Cristo.

K'e nga kiichjaya Apolos ya Éfeso

²⁴ Ya Éfeso ijchò jngoò xita judío xi 'mì Apolos xi ján ì'nde-la Alejandría, jngoò xita xi 'ño ndaà ma-la chjaya. Ndaà tíjìin-la it'aà ts'e Xojòn-la Nainá.

²⁵ Jè Apolos, xó kiskoòta'yà-ne ndiyá-la Nainá; 'ño tsja beè-la inima-la nga ngui kixí chjaya tikoagá tsakóya it'aà ts'e Jesús; jé kjoa ts'e bautismo nas'ín tà jè tíjìin-la ts'e Juan.

²⁶ Apolos, 'ño tjín ikon nga kiichja ya ni'ya ingo sinagoga. K'e nga kii'nchré jè Priscila kò Aquila, it'aà xin kiikò nga isa kixi tsakóya-la ndiyá-la Nainá.

²⁷ Apolos, k'e nga kjòmejèn-la kii ján ì'nde Acaya, ngats'ìi xita-la Cristo kisì'ño ikon nga komà kii. Ikjoàn kiskii jngoò-la xojòn jñà xita xi kota'yàt'aà-la Cristo xi títsajna ján ì'nde Acaya nga skoétjò jè Apolos k'e nga kijchò. K'e nga ijchò Acaya, 'ño ndaà tsasìkò jñà xita xi kitsjaà-la kjondaà Nainá nga kòkjeiín-la it'aà ts'e Cristo.

²⁸ Apolos, 'ño ndaà tsajoókjoò jñà xita judío ya nguixkòn naxandá nga kisikítsajnajyò nga it'aà ts'e Xojòn-la Nainá, ngui ndaà tsakó-la nga jè Jesús, jè xi Cristo [xi xó kinikasén-ne].

19

K'e nga ijchò naxandá Éfeso jè Pablo

1 K'e nga tákó ya tǐjna Apolos ya naxandá Corinto, jè Pablo, kǐn i'nde jahatojǐn xi nindoò choòn nga ijchò Éfeso. Yaá kiskaàjǐn i'nga xǐta xi kota'yàt'aà-la Cristo.

2 Kiskònangui-la, kitsò-la:

—¿A kitjoé-nò Inima Tsjeè-la Nainá k'e nga kòkjeiín-nò it'aà ts'e Cristo?

Jǐnà xǐta koi kitsò:

—Ngajen mìkǐi tǐjǐn-najen tsà tǐn Inima Tsjeè-la Nainá.

3 Pablo kitsò-la:

—¿Kó s'ín komà bautizar?

Jǐnà xǐta koi kitsò:

—It'aà ts'eé bautismo-la Juan komà-jen.

4 Pablo kitsò:

—Kixǐi kjoa. Juan, kis'iin bautizar xǐta xi kisikájno jé-la nga mì tǐ jé kohótsji-ne, tanga k'oaá s'ín kitsò-la xǐta naxandá nga kàtakjeiín-la it'aà ts'e Jesús, jè xǐta xi iskan kjoí.

5 K'e nga jye kǐi'nchré 'én koi, ikjoàn komà bautizar it'aà ts'e Na'èn-ná Jesucristo.

6 Pablo, k'e nga jye tsohósòn-la tsja, jǐnà xǐta koi jahas'en-jǐn inima-la Inima Tsjeè-la Nainá, ikjoàn kǐichja 'én xi kj'eíi tsò tǐkoá kǐichjaya ngajo-la Nainá.

7 Ngats'ìi xǐta koi, tejo ma xi xǐta x'ín.

8 Pablo, jàn sá tsibǐjna Éfeso nga xkǐ xòhoto fǐ ya ni'ya ingo sinagoga; mìkǐi tsakjón nga bénojmiya, 'ñó kǐichjako xǐta nga kàtakjeiín-la kós'ín otíxoma Nainá.

9 Tanga tǐn i'nga xǐta xi kisitájaàjǐn inima-la, mìkǐi kòkjeiín-la koni s'ín tíhokóya Pablo. Ch'oo kǐichja nga nguixkon xǐta it'aà ts'e ndiyá xitse-la Cristo. Pablo, k'eé tsasit'aà xǐn; kǐiko yije xǐta xi kota'yàt'aà-la Cristo. Yaá kǐiko jngoò ni'ya escuela ñánda okóya xǐta xi 'mì Tirano. Yaá tsajoóya-ne nga nachrjein nchijòn.

10 Pablo, jò nó tsibǐjna nga tsakóya-la xǐta. K'oaá s'ín komà nga kǐi'nchré 'én ndaà-la Na'èn-ná Jesucristo ngats'ìi xǐta judío ko xi mìtsà xǐta judío xi títsajna naxandá ts'e nangui Asia.

11 Nainá, tseé kjoxkón kis'iin nga jè kisikjeén Pablo.

12 Skanda jè pahìto-la ko nikje xi síkjeén Pablo f'ìikjaá xǐta nga fiko-la xǐta xi xk'én. K'e nga jye síko jǐnà nikje, mandaà-ne ch'in xi tǐn-la; tǐkoáá bitjokàjǐn-ne inima ch'o-la neíi xi tǐjǐn inima-la.

13 Tǐn i'nga xǐta judío xi xkǐ xi ján naxandá tǐjima nga ochrjekàjǐn inima-la xǐta xi inima ch'o-la neíi tǐjǐn inima-la. Mejèn-la k'oa tǐs'ín sìikaxkǐ 'ín-la Jesús nga koxkǐi-la xǐta. Tsò-la jè neíi:

—¡It'aà ts'e Jesús xi jè Pablo okóya otíxoma-lè nga tǐtjokàjǐn inima-la xǐta koi!

14 Jngoò xǐta judío xi 'mì Esceva xi xǐta sko-la no'mii, k'oaá s'ín mejèn kis'iin ixti-la xi itoò ma-ne.

15 Tanga jè xǐta neíi, jngoò k'a kǐichja-la kitsò-la:

—'An bexkon-ná Jesús, tǐkoáá bexkon-ná Pablo; tanga jǐnò, ¿yá xǐta-nò?

16 Jè xǐta xi inima ch'o-la neíi tǐjǐn inima-la kiskaàn-ko jǐnà ixti koi; kitsjoònè kitsjoòfe; kisikijne-la nga itoò ixti. Itjo ni'ya, ikjoàn tsanga nga laká kjoàn koi kjoa-la nga 'ñó kisiki'on.

17 Ngats'ìi xǐta judío ko xi mìtsà xǐta judío xi tǐn ján naxandá Éfeso, kǐi'nchré kjoa xi komà; tà kitsakjòn-né. Ísaa 'ñó ndaà kǐjtseèxkón Na'èn-ná Jesucristo.

18 Kǐn xǐta xi jye mokjeiín-la 'én ndaà-la Nainá xi kjoa ts'e Cristo, j'ìi kénojmí nga nguixkon xǐta nga ch'o tǐn xá xi kis'iin nga sa ítjòn.

¹⁹ Tíkooá kjin ma xita tj'e j'ikō yije libro xi kisikjeén nga tisa ítjòn nga tsaká. Chinchájin ni'ín nga kitì nga nguixkon yije xita. K'e nga komà kinda jè chjí-la libro xi kitì, icháte jmiù ton plata tjín-ne chjí-la.

²⁰ K'oaá s'ín komà-ne nga 'ñó tsangasòn 'én ndaà-la Nainá xi kjoa ts'e Cristo; tseé nga'ñó kis'e-la.

²¹ K'e nga jye jyehet'aà kjoa koi, Pablo kisikítsjeèn nga ján kjoí Jerusalén, kjoahato nangui Macedonia ko Acaya. K'oaá s'ín kisikítsjeèn nga tikoá mochjeén-né nga ján kjoí naxandá Roma.

²² K'ée kisikasén ingajò xita xi síchját'aà-la ján nangui Macedonia, jè Timoteo ko Erasto; ko jè Pablo, yaá tsibijna chiba naxhrjein isa ya nangui Asia.

Mé kjoa-ne nga kjoasii kis'e ya naxandá Éfeso

²³ Jñà naxhrjein koi, 'ñó tse kjoasii kis'e ya Éfeso, koií kjoa-la Ndiyá xitse-la Cristo.

²⁴ Jngoò xita xi 'mì Demetrio xi síxáko kicha plata, bíndaà xkósòn-la ts'e ingo-la Diana. Ngats'ii xita xi síxáko 'ñó ndaà síkijne ton.

²⁵ Tsibíxkóya ngats'ii xita-la xi síxáko ko xita xi kj'eíí xi tikoá koi xá s'ín, kitsò-la:

—Ngats'ioò jñò, 'ya-nò nga jè xá koi, bijne-ná ton.

²⁶ Tanga tikoáá títsa'ya-nò, ko títsana'ya-nò nga jè xita xi 'mì Pablo, k'oaá s'ín binchá'a yije xita nga mì xó tsà nainá xi tsja xita sindaà-ne. Kjin ma-ne xi jye jahatjia-la, mìtsà tà i Éfeso, kóhokji jngoò ítjandii nangui Asia.

²⁷ Jè kjoa koi, mìkiù ndaà tjín. Mìtsà tà koi kjoa-la nga chija xá xi 'nè. Tíkooá tjín-la kjoskon tsà chija ingo-la nainá xi 'mì Diana, jè xi 'ñó 'nga tíjna nga mì tí kiù skoexkón-ne xita; ko yaá chija kjoajeya-la; mìtsà tà i Asia nga yaxkón, tíjtsaá isò'nde.

²⁸ Jñà xita, k'e nga kiù'nchré 'én koi, 'ñó kòjti-la, ikjoàn 'ñó kiùchja nga kitsò:

—i'Nga kàtìjna Diana ts'e naxandá Éfeso!

²⁹ Kóhokji naxandá kis'e kjoasii; kitsobà'ñó jè xi 'mì Gayo ko Aristarco. Ingajò xita koi, yaá kjihijtakō Pablo; ján i'nde-la nangui Macedonia. Fàhatjen fàhania, kiùko ni'ya teatro ñánda bixoña xita naxandá.

³⁰ Pablo, mejèn jahas'en tjingui-la ni'ya nga kichjajin-la xita naxandá tanga jñà xita xi kota'yat'aà-la Cristo mìkiù kitsjaà'nde-la.

³¹ Tíkooá yaá títsajna i'nga xita xi xá tjín-la ts'e nangui Asia xi amigo ts'e Pablo. Kisikasén-la 'én nga mì ya kjoas'en-jin ya ni'ya teatro.

³² Ya ni'ya teatro ñánda chixoña xita, mìkiù 'ya-la mé kjoa xi tjín. Xki xi ján chja, kakj'eíí kakj'eíí tsò nga jngoò lingoò. Isáá kjin ma-ne xi mìkiù tíjin-la mé kjoa xi tjín i'nde jè.

³³ Jñà xita judío tsasíjna osen Alejandro nga kisikíchja. Jè Alejandro, k'ée kiskimìtjen tsja nga kisikítsajnajyò xita. Mejèn-la nga kosiko xita judío.

³⁴ Jñà xita, k'e nga kijtseèxkon Alejandro nga xita judío, ngats'ii, 'ñó kiùchja nga ta jngoó jtaá kiùchja, kitsò:

—i'Nga kàtìjna Diana ts'e naxandá Éfeso!

Koni jò-la hora kiùchja nga okitsò.

³⁵ Jè xita xi tjín-la secretario ts'e naxandá, k'e nga jye kisikítsajnajyò xita naxandá kitsò-la:

—Ngats'ioò xi xita Éfeso 'mì-nò, 'ya-nò nga ngats'ii xita xi tjín nga tíjtsa isò'nde beè-né nga i naxandá Éfeso tjín-la kinda ingo-la ko xkósòn-la xi nea-ná Diana xi 'ñó 'nga tíjna xi ngajmii j'ii-ne.

³⁶ Nijngoò xi koma kíjna'ma kjoa koi. Mochjeén-né nga mì taxki s'een; ítjòn tikítsjeèn.

³⁷ Jñà xitá xi jñò kòf'ikòò ijndé, nì mé kjoa xi kòhótsji it'aà ts'e ingo; tikoáà mìtsà jè nea-ná Diana kàchajno-la.

³⁸ Tsà jè Demetrio kò xitá xi síxáko, tsà mé kjoa xi tjín-la kò xitá xi kj'eí, tjín xitaxá xi ma-la bíndaàjìn, koa tjín ni'ya osen ñánda sindaàjìn mé-ne nga koma kinchako-ne yijo-la.

³⁹ Jñò, tsà mé xi mejèn-isa-nò, kàtasijna jngoò junta ts'e xitá naxandá xi kixi tjín nga kàtasindaàjìn koni s'ín tíchja kjotíxoma.

⁴⁰ Jè kjoa xi kòma i'ndeí, tjín-la kjoskon tsà jè xitaxá ítjòn ts'e Roma kichja'nchré-ná nga kjosì títسابinchaátsjiaá. ¿Mé kindá xi k'oiáá?

⁴¹ K'e nga jye okitsò xitá jè, kii yije-ne ni'ya-la xitá.

20

K'e nga kii Pablo ya nangui Macedonia ko Grecia

¹ K'e nga jye kisikjoàn-la kjoasì, Pablo tsibíxkóya yije xitá xi kota'yàt'aà-la Cristo nga kitsjaà-la 'én xi ndaà tsò nga kisì'ñojìn ikon. Ikjoàn, kisìhixat'aà xíkjin nga kii ján nangui Macedonia.

² Koni s'ín tsajmè nga kii, jahato ngats'iì naxandá nga ndaà kisì'ñojìn ikon jñà xitá-la Cristo; ijchò skanda Grecia.

³ Pablo, jàn sá tsibìjna Grecia. K'e nga jye tìbìjnandaà nga skoé jngoò chitso nga jye tífi ján Siria, kisijìn-la nga jñà xitá judío, k'oaá s'ín tjíndaà-la nga mejèn-la síik'en; kisikátji-ne, ndiyá Macedonia kii ijngoò k'a-ne.

⁴ Tsobáhjtako jè Sópater xi Berea i'nde-la, ti-la ma Pirro; jè Aristarco ko Segundo xi Tesalónica i'nde-la; Gayo xi Derbe i'nde-la; ko Timoteo; tikoáá ya tjiko Tíquico ko Trófimo xi Asia i'nde-la.

⁵ Jñà xitá xinguiáá koi, kii ítjòn-né skanda ján Troas. Yaá kiskoòña-najen.

⁶ K'e nga jye jyehet'aà jñà nachrjein-la s'eí nga bichiaá inchrajín xi tsjín-la na'yo san, tsitsajnyaya jngoò-jen chitso ya Filipos; ikjoàn tsanguijìn-nda-jen; xi komà 'òn nachrjein ijchòtjingui-lajen ján Troas; yaá tsitsajna jngoò xomàna-jen.

K'e nga tsibìjna Pablo ján Troas

⁷ Jè nachrjein tahàngo nga tàts'en xomàna chixoña yije-jen nga kinìxkoaya-jen inchrajín; jè Pablo 'ño ndojò kiiko nga tsibénojmiya 'én-la Cristo. Tíchja-né skanda kó nga ijchò osen nitjen, koií kjoa-la nga komà inchjòn jye tífi-ne.

⁸ Ya cuarto xi kijnasòn-'nga ts'e ni'ya ñánda titsajna-jen, kjin lámpara títi.

⁹ Jngoò chíti xi 'mì Eutico tíjnajto ventana-la ni'ya xi jàn piso tjín-la. Koa jè Pablo nga 'ño ndojò kiiko 'én xi tsibénojmi, jè chíti kisijnafè nga 'ño nijña-la. K'e nga jye 'ño kjinafè, kiskaàngui skanda it'aà nangui. K'e nga kitjámütjen, jyeé k'en.

¹⁰ K'ee inchrobàjen Pablo; kitsobàkjá, kitsò:

—Ki tsakjoòn-jèn, tíjnakon-né.

¹¹ Ikjoàn kii mijìn ijngoò k'a-ne ya cuarto ñánda títsajna; kisìxkoaya inchrajín, koa tsakjèn-kò xíkjin. Ijngoò k'a tsibíts'ia nga kiichjaya skanda kis'e-la isén. Ikjoàn kii-ne.

¹² Jñà xitá kiiko-ne ni'ya-la jè chíti; jye tíjnakon-ne; k'oaá tjín kjoa xi isa ndaà kjòtsja-la xitá.

K'e nga itjo-ne Pablo ya Troas nga kii ján Mileto

¹³ Ngajen, tsanguì ítjòn-najen, tsitsajnyaya-jen chitso skanda ján Asón; yaá tsitjaàchjaàto-jen Pablo; k'oaá kitsò nga ndiyá ndsokoó kii-ne.

14 K'e nga jye ijchò-jen ján Aso, yaá kiskaàkjoò-jen Pablo; tsibìjnayako-najen chitso; tsanguí-jen skanda ján Mitilene.

15 Itjo-jen Mitilene. Nga komà inchijòn, tsitjaàjto-jen Quío. Xi ma-ne jò nàchrjein ijchò-jen Samos. Yaá Trogilio kinìkjáya-jen. Xi komà jàn nàchrjein ijchò-jen Mileto.

16 Jè Pablo, k'oaá s'ín kisikítsjeèn nga tà kjoahato kixíí Éfeso; kisixátíya-la yijo-la nga mìkiì tsibìjna Asia; jè xi mejèn-la nga isa nìton kijchò Jerusalén tsà koi nàchrjein-la ya tíjna k'e nga kítjo s'eí ts'e Pentecostés.

'Én xi kiùchjako Pablo jñà xita jchínga ts'e naxandá-la Cristo xi títsajna Éfeso

17 Pablo, k'e nga tíjna Mileto, kiskinìkjaá jñà xita jchínga xi tíjn-la xá ya jìjìn naxandá-la Cristo xi títsajna Éfeso.

18 K'e nga ijchò jñà xita jchínga, kitsò-la:

—Jñò, ndaà tíjìn-nò kós'ín tìjnako-nò skanda tjen-ne k'e nga j'iaa i nangui Asia.

19 Nga kjit'aà nàchrjein, 'ñó indaàkjoa tìsìxá-la Nainá; mì k'oaá kji ndáxkoaàn bìxteèn nga otojñaà kjoa koií kjoa-la koni s'ín síko-na jñà xita judío nga bíchjoà ikon-na.

20 'An, mìkiì jyò ótijna nga benojmíya-nò ngats'ìi kjoa xi mochjeén-nò xi kjondaà tsajòn. Benojmíya-nò ñánda bixoña xita ko ni'ya-nò.

21 K'oaá s'ín benojmíya yije-la, ngats'ìi xita judío ko xi mìtsà xita judío nga kátasíkájno jé-la nga mì tì jé kohótsji-ne, Nainá kàtjít'aà-la ko kàtakjeíin-la it'aà ts'e Na'èn-ná Jesucristo.

22 I'ndeì, ján tífia Jerusalén; tsejèn ma-na nga jè kjo'ño tífiko-na Inìma Tsjeè-la Nainá. Mìkiì tíjìn-na mé kjoa xi komat'ian;

23 ta jè-né nga kjijndà naxandá ñánda bijchoa, jè Inìma Tsjeè-la Nainá, k'oaá s'ín benojmíya-na, k'e nga kìjchoa Jerusalén, ndayá kótijna, tse kjo'in sìkjaáan.

24 Kjoa ts'e kjo'in, mìkiì makájno-na nas'ín sìk'en-na xita. Jè xi mejèn-na nga ndaà sikitasoàn. Ndaà sikjehet'aà xá xi kitsjaà-na Na'èn-ná Jesucristo nga sika'biá 'én ndaà-la it'aà ts'e kjondaà xi tsjá Nainá.

25 I'ndeì, k'oaá xan kixi-nò ngats'ioò jñò xi kiyaxkon-ná nga tsibenojmí-nò kjotíxoma-la Nainá, mì tì kiì jchaxkon-ná.

26 I'ndeì, k'oaá xan-nò, tsà mìkiì mokjeíin-nò it'aà ts'e Jesús, mìtsà 'an tíjn-na jé tsà kjo'in s'e-nò.

27 Nga 'an, jyeé tsibenojmí yije-nò kó s'ín tíjn kjoa xi tíjndaà-la Nainá; nímé xi tsibì'ma-nò.

28 Jñò, tìkindaa yijo-nò, tìkoa tìkindaa naxandá-la Cristo xi jè kisikijne nga ko jní-la. K'oaá s'ín tìkindaa koni jngoò paxtò ts'e orrè nga jè xá kitsjaà-nò Inìma Tsjeè-la Nainá.

29 'An, be-ná, k'e nga koma iskan, nga jye kjián, kjoahas'en-jìin-nò xita xi kj'eíi koni tsején ts'en xi mejèn-la sìkje xita naxandá-la Cristo.

30 Tìkoa kítjokàjìin xi tì xita tsajòn-nò xi kj'eíi kjotíxoma kokòya xi mìtsà kixi kjoa; kjìko xita xi kota'yát'aà-la Cristo nga skónachan-la.

31 Tìtsajnakon; tìkítsjeèn, 'an, jàn nó tsohótijnako-nò ko nàchrjein ko nìtjen bìxteèn ndáxkoaàn nga tsibenojmíya-nò kós'ín sìjchá yijo-nò.

32 I'ndeì, ndí 'ndsè, ngats'ioò, tsja Nainá sìkítsajnyà-nò. Tìkoa sìkítsajnajìin-nò 'én-la Nainá it'aà ts'e kjotsjacha xi tíjn-la, jè 'én xi koma tsjá-la nga ñó inìma-nò. It'aà ts'e 'én koi tjoé-nò kjotjò ján ngajmì k'e nga tjoé yije-la xita tsjeè-la Nainá.

33 'An, nímé xi jaàjìin-na, nì ton, nì nikje xi ts'e xita.

34 Jñò, ndaà tíjìn-nò nga ndsaa kisixá-na nga kisikijne ngats'ìi tsojmì xi kinìchjeén-jen ko xita xi títsajnakò-na.

³⁵ K'oaá s'ín tsakoòya-nò, mochjeén-né nga sixá mé-ne nga sichját'aà-lá jñà xita xi 'in títajna; tikítsjeèn 'én-la Na'èn-ná Jesucristo xi tsò: “Ìsaá ndaà machikon-t'in jñà xita xi tsjá mì k'oaá-ne jñà xita xi tjoé-la.”

³⁶ K'e nga jye okitsò, ikjoàn tsasijna-xkó'nchi Pablo, kiichjat'aà-la Nainá kóhotjín xita.

³⁷ Ngats'ii kiskindàya, kitsobàkjá ko kiskine'a Pablo.

³⁸ Jñà xita, tsí 'on komà-la jè 'én xi kitsò Pablo nga mì tì kii skoexkon-ne xíkjín. Kii kinì indiaà skanda ñánda kijna chitso.

21

K'e nga kii Pablo ján Jerusalén

¹ K'e nga jye kinìhixat'aà-jen xita xingui-jen, tsitsajnaya-jen chitso; tsanguí kixi-jen naxandá jìin-ndá ñánda 'mì Cos; xi komà inchijòn ijchò-jen naxandá Rodas, ikjoàn tsanguí-jen skanda naxandá Pátara.

² Ya Pátara síjna ìjngò chitso xi tífi Fenicia; jè tsitsajnaya-jen nga tsanguí-jen.

³ K'e nga tsitjaàjìin-ndá-jen, ki'ya-jen nangui jìin-ndá ts'e Chipre xi kijna ya ngaskón-najen; tanga tsanguí kixi-nájen skanda Siria. Jè chitso, yaá kisasijna indii ndáchikon Tiro nga yaá chinchá ch'á-la xi 'ya.

⁴ Ya Tiro, kiskaàkjoò-jen xita xi kota'yàt'aà-la Cristo, itoò nachrjein tsitsajnakò-jen. Jñà xita koi kitsò-la Pablo nga mìkii kjoì ján Jerusalén; jè Inima Tsjeè-la Nainá k'oaá s'ín tsibénojmiya-la.

⁵ K'e nga jye ijchò jngò xomàna nga títajna-jen, ikjoàn itjo ìjngò k'a-jen. Tsobáhijtakò yije-najen jñà xita-la Cristo, ko íchjín-la ko ìxti-la skanda ján indii najnchra. Ko yaá indii ndáchikon chincha-xkó'nchi-jen nga kinokjoàt'aà-lajen Nainá.

⁶ Ikjoàn kinìhixat'aà-jen xita xingui-jen, tsitjaàs'en-jen chitso koa jñà xita koi, kii-ne ni'ya-la.

⁷ Yaá jyehet'aà nga tsitjaàjìin-ndá-jen nga itjo-najen Tiro skanda ijchò-jen Tolemaida. Yaá kinìhixat'aà-jen xita xinguiáa it'aà ts'e Cristo; jngò nachrjein tsitsajnakò-jen.

⁸ K'e nga komà nchijòn, tsanguí-jen ján Cesarea. Ijchò-jen ni'ya-la Felipe, xita xi chjaya 'én ndaà-la Nainá xi kjoa ts'e Cristo, jè xi taña kitjaàjìin-ko jñà xita xi itoò ma-ne nga kisixákò naxandá-la Cristo. Yaá kinìkjáya-jen ni'ya-la.

⁹ Ñijòn ma ìxti íchjín xongó-la xi síkjeén Nainá nga chja ngajo-la.

¹⁰ Kjìn nachrjein tsitsajnakò-jen Felipe. Yaá j'ii jngò xita xi 'mì Agabo xi inchrobà-ne Judea jè xi síkjeén Nainá nga chja ngajo-la.

¹¹ K'e nga ijchòkon-najen, kiskoé sincho xi bìjnakjá Pablo. Tsibí'ño tsja ko ndsoko, ikjoàn kitsò:

—K'oaá tsò jè Inima Tsjeè-la Nainá: kiís'ín kojìt'aà'ño jñà xita judío ján Jerusalén jè xita nei-la sincho jè; ikjoàn sìngatsja xi mìtsà xita judío.

¹² Ngajen ko xita Cesarea, k'e nga kina'ya-jen 'én koi, tsibìtsi'ba-lajen Pablo nga mìkii kjoì Jerusalén.

¹³ Tanga jè Pablo kitsò:

—¿Mé xi ma-nò? ¿Mé-ne chihindáya-nò? Kì nìba-là inima-na. 'An tíjngò takoàn nga kàtít'aà'ño-na nas'ín kàtasík'en-na xita ján Jerusalén xi kjoa ts'e Na'èn-ná Jesucristo.

¹⁴ Mìkii komà kichjaàxìn-lajen kjohítsjeèn-la; tà k'oaá ki'mì-lajen:

—K'oas'ín kàtitasòn koni s'ín mejèn-la Nainá.

¹⁵ Xi komà iskan, tsibìxkó-jen tsojmì-najen, ikjoàn tsanguí-jen Jerusalén.

¹⁶ Tsobáhijtakò i'nga-najen jñà xità-là Cristo xi Cesarea i'nde-là. Kùkò-najen ya ni'ya-là xità xi 'mì Mnasón xi Chipre i'nde-là. Xità jè kjòtseé kota'yàt'aà-là Cristo. Yaá kinìkáyako-jen.

Mé xi komà k'e nga jè Pablo ijchò Jerusalén

¹⁷ K'e nga ijchò-jen Jerusalén, jñà xità-là Cristo xi ya títsajna, tsjaá komà-là nga kiskoétjò-najen.

¹⁸ Xi komà inchijòn, tsanguì-jen kò Pablo ni'ya-là Jacobo; yaá títsajna ngats'iì xità jchínga xi otíxoma ijìin naxandá-là Nainá.

¹⁹ Pablo kisihixat'aà xità koi, ikjoàn tsibénojímí yije-là kjoa xi tís'ín Nainá it'aà ts'e xità xi mìtsà xità judío nga jè tísíkjeén Pablo xá xi tís'ín.

²⁰ K'e nga kiì'nchré 'én koi, jeyaá kisikíjna Nainá. Ikjoàn kitsò-là Pablo:
—Ji ndí 'ndsè, tí'ya-né nga jñà xità judío jyeé 'ñó kjìn jmii ma-ne xi mokjeiín-là it'aà ts'e Jesús. Ngats'iì xità koi, 'ñó mejèn-là nga kítasòn kjotíxoma xi Nainá kitsjaà-là Moisés.

²¹ Tanga jye xó kiì'nchré xi it'aà tsiji nga k'oaá xó s'ín okoòya-là ngats'iì xità judío xi títsajnajìin ya naxandá-là jñà xi mìtsà xità judío nga mì xó tì kiì sùkítasòn-ne kjotíxoma-là Moisés; kàtasíchija xó kjotíxoma xi tjín-ná xi xità judío 'mì-ná, tìkoa mì xó tì kiì sít'aà chiba-là jñà ndí jxti kjoa ts'e circuncisión.

²² ¿Mé xi s'eén? Kjo'ñó-né kji'nchré xità nga i tijni.

²³ K'oaá s'ín t'iin koni s'ín 'mì-lèjen; i títsajnajìin ñijòn-najen xità xi sùkítasòn koni s'ín kitsjaà-là tso'ba Nainá nga sùtsjeèya yijo-là.

²⁴ Tikoi jñà xità. Tìtsjeèyi yijo-lè kò xità koi. Tíchjí nga kàtasijno-là tsja skò mé-ne nga skoe-ne xità xi kj'eíí nga mìtsà kixi kjoa koni tsò-lè xità. Yaá skoe-ne nga tìkoaá ngaji nikitasoìn kjotíxoma-là Moisés.

²⁵ It'aà ts'e xità xi mìtsà xità judío xi jye mokjeiín-là 'én-là Cristo, jyeé kinìkasén-lajen xojon koni s'ín kichoòsòn-lajen nga mìkiì skine tsojmì xi xkòsòn sinchát'aà-là; mìkiì skine jní-là cho; tìkoaá mìkiì skine yijo-là cho xi mìkiì xíxteèn jní-là k'e nga biyaà; tìkoaá kì tì kjoa chijngui sís'in-là.

K'e nga kindobà'ñó Pablo ya ingo ítjòn

²⁶ Xi komà nchijòn, Pablo kùkò nga ñijòn xità koi. Tañaá kisikítasòn kjotíxoma-là xità judío nga kisìtsjeèya yijo-là kjoa ts'e jé-là. Ikjoàn kiì ya ñánda tíjna ingo ítjòn nga kisikí'nchré jñà xità mé naxrjein kjoehet'aà naxrjein-là nga nchisìtsjeèya yijo-là; ikjoàn koma kjiko cho xi kjotjò ts'e Nainá nga jngoò ijngoò.

²⁷ K'e nga jye kjomeè bijchó itoò naxrjein, jñà xità judío xi inchrobà-ne nangui Asia, kijtseèxkon Pablo nga ya tíjna nditsin ingo ítjòn; chinchá'a ngats'iì xità nga kitsobà'ñó.

²⁸ 'Nó kiichja, kitsò:

—iNgats'ioò xi xità Israel 'mì-nò, tìchját'aà-nájen! Jè xità jè xi tsò'ba nga kijndà naxandá nga okoòya kjotíxoma xi kondra ts'e naxandá, kondra ts'e kjotíxoma-là Moisés, kò kondra-là ingo ítjòn. Skanda j'ìkòó xità xi mìtsà xità judío xi kisikas'en ya nditsin ingo nga sítjé jè i'nde tsjeè-là Nainá.

²⁹ Xità koi, koií kjoa-là nga k'oas'ín kitsò, k'e nga sa ítjòn kijtseèxkon Pablo ya jìin naxandá nga taña tímakjoòkò jngoò xi mìtsà xità judío xi 'mì Trófimo xi xità Éfeso; k'oaá s'ín kisikítsjeèn tsà tìkoaá kùkò-né ya nditsin ingo.

³⁰ Kóhokji naxandá kiì'nchré nga kjoasiì kisakò. Nìtoón chixoña xità. Kitsobà'ñó Pablo; kjo'ñó tsachrje ya nditsin ingo; ikjoàn tsibíchjoàjto-là xotjoa ingo.

³¹ Jye mejèn nchisík'en tanga nìtoón kiì'nchré jè xità skò-là soldado ts'e Roma nga kjoasiì kisakò naxandá Jerusalén.

³² Jè xita sko-la soldado, nitoón kiichja i'nga-la soldado xi isa nangui xa tjin-la nga tsibixkoya soldado-la; ikjoàn tsangachikon, ki ñánda tjin kjoasi. Jña xita, k'e nga kijtsee soldado, k'ee kitsjein Pablo; mi ti ki kiskaan-ko-ne.

³³ K'e nga ijchò xita sko-la soldado, kitsobà'ño Pablo; kitsjaà okixi nga jò na'ño kicha cadena kisit'aà'ño Pablo. Ikjoàn kiskònangui yá xita-ne xi 'mi Pablo ko mé xi kis'iin.

³⁴ Jña xita xi kjin ma-ne, xki xi ján chja; kakj'eij kakj'eij tsò nga jngoò ijngoò. Jè xita sko-la soldado, miki kisakò-la mé kjoa xi komà nga 'ño si nchis'in. Kitsjaà-la okixi soldado-la nga kàtjikò Pablo ján cuartel.

³⁵ K'e nga nchifimijn-jno escalón, jña soldado tsa'nga Pablo, koi kjoa-la nga jña xita xi kjin ma-ne xi tjingui-la, 'ño nchimats'en,

³⁶ nga tsò:

—Tik'eèn!

Kó kitsò Pablo nga kiichjatji yijo-la

³⁷ Jè Pablo, k'e nga jye tífahas'en cuartel kiichja-la jè xita sko-la soldado, kitsò-la:

—¿A koma kichjàko jngoò tjò-lè?

Jè xita sko-la soldado kitsò:

—¿A maá-lè nokjoì 'én griego?

³⁸ ¿A mìtsà ngaji xi xita Egipto i'nde-lè xi tsibíts'i kjoasi kò jngoò kò jò nó nga kiikoij ñijòn jmii xita kjoasi ján i'nde it'aà xin ñánda nangui kixi choòn?

³⁹ Pablo kitsò:

—'An, xita judío-ná, yaá i'nde-na Tarso, jngoò naxandá xi ndaà yaxkon-la ts'e nangui Cilicia; tjin-lè kjondaà, tji'nde-ná nga kichjàkoaa xita naxandá.

⁴⁰ Jè xita sko-la soldado, kitsjaà'nde-la; ikjoàn tsasijna kixi Pablo ya escalón; kiskimijtjen tsja nga jyò kàtitsajna xita naxandá. K'e nga jye tsibítsajnajyò, kiichjàko 'én hebreo, kitsò:

22

¹ —Ngats'ioò xi xita judío xinguiá 'mì-nò ko xi xita jchínga, tiná'ya 'én kixi xi kichjàko-nò nga kichjätjià yijo-na.

² Jña xita, k'e nga ki'nchré nga 'én hebreo kiichja, isaá jyò tsibítsajna. K'ee kitsò Pablo:

³ —'An, xita judío-ná. Yaá kits'ian Tarso, naxandá xi chja-ne Cilicia. Tanga ij Jerusalén kòjchá. Jè kiskoòta'yàt'aà-la jè maestro Gamaliel. Ngui kixij tsakóya-na koni s'in tjin kjotixoma-la xita jchínga-ná. Ngui tjingoò takoàn nga sikitasòn-la Nainá koni s'in 'nè jño skanda nàchrjein i'ndeij.

⁴ Nga sa kjòtsee, kiitjinguì kondra-la jña xita xi fitjinguì-la ndiyá xitse jè, skanda mejèn-na kisik'én. Tsibit'aà'ñoá, tikoá kiskinìs'en ndayá íchjín, íchjá.

⁵ Jña xita sko-la no'mii, ngats'ii xita jchínga, ndaà kijtsee kjoa koi. Jña kitsjaà-na xojon nga kiiko-la xita xinguiá xi títsajna Damasco nga koma kjinchrobàkoaa ij Jerusalén ngats'ii xita xi mokjeín-la it'aà ts'e Cristo mé-ne nga s'e-la kjo'in.

Kó kitsò Pablo k'e nga tsibénojmí kó s'in komàt'in nga jahatjiya kjohítsjeèn-la (Hechos 9:1-19; 26:12-18)

⁶ K'e nga jye kjomeè bijchoa chrañat'aà-la Damasco, ijchò-la tsà nchisen, tà nitoón tsatsejèn jngoò-na ni'in xi ngajmii inchrobà-ne xi kjohiseèn kòhokji nga jngoò itjandiì-na koni s'in tífia.

⁷ 'An, kiskaàjndoòt'aà nangui. Ki'nchrè 'én xi ijijn isén kiichja, kitsò: “Saulo, Saulo, ¿mé-ne 'an ti'mitjinguì kondra-ná?”

8 K'eé kiskònangui-là, kixan-là: “¿Yá-ne ngaji Na'èn?” Kitsò-na: “An-ná xi m̀i-na Jesús xi Nazaret ts'an xi jì tì m̀itjìngui kondra-ná.”

9 J̀nà x̄it̄a xi t̄jikoà, kijtsee ni'ín nga kjòhiseèn, tà kitsakjòn-né, tanga mìkì ki'ya-là 'én xi 'an kiichja-na.

10 K'eé kiskònangui-là kixan-là: “¿Mé xi s'iaàn, Na'èn?” Kitsò-na: “T̄is̄it̄j̄in, t'in kixi Damasco. Yaá s'enojmí yije-lè kó s'ín t̄j̄indaà kjoa xi s'j̄in.”

11 Koi kjoa-là nga 'ñó kjòhiseèn ni'ín, 'an mì t̄j̄i k̄i kjòtsejèn-na. J̀nà x̄it̄a xi t̄jikoà kitsobà'ñó ndsaa nga kiikò-na skanda Damasco.

12 'Ya Damasco t̄jna jngoò x̄it̄a xi 'm̀i Ananías xi ndaà beèxkón Nainá koni s'ín t̄ichja kjotíxoma ts'e Moisés. Jè Ananías t̄jikoáá ndaà yaxkón it'aà ts'e x̄it̄a judío xi t̄tsajna ya j̄'nde jè.

13 K'e nga j'ìi katsejèn-na Ananías, kitsò-na: “Ndsè Saulo, kàtatáx'a-ne xkoiin.” T̄ik'eé-ne kitáx'a-ne xkooàn ikjoàn kiskoð'an Ananías.

14 Kitsò isa-na: “Nainá xi ts'e x̄it̄a jchínga-ná jaàj̄in-lè nga jchaxkoin mé xi mejèn-là; t̄jikoà jchaxkoin jè xi Nguì X̄it̄a Kixi; k̄iná'yi 'én-là xi jè sobà k̄ichja-lè.

15 J̄i k̄enojmí-là ngats'ìi x̄it̄a, ngats'ìi kjoa xi t̄i'yi k̄o xi t̄ina'yì.

16 I'nde, k̄i t̄j̄i chiñà-ne. T̄is̄it̄j̄in; k̄atamai bautizar; t̄inókjoat'aà-là Na'èn-ná Jesús nga k̄atatsjeèya jé-lè.”

Mé xi komà k'e nga jè Pablo tsibénojmí-là kós'ín komà nga kiikon j̀nà xi mìtsà x̄it̄a judío

17 K'e nga j'ìi-na Jerusalén, kiaà ya ñánda t̄jna ingo it̄jòn nga kichjàt'aà-là Nainá. Koni nijñá tí'biè-na,

18 tsatsejèn-na Na'èn-ná; kitsò-na: “T̄ixát̄iyi, n̄it̄on t̄it̄jokàj̄in naxandá Jerusalén; ijndé, mì yá xi k̄j̄i'nchré 'én-lè xi k̄inókjoayi it'aà ts'an.”

19 An kixan-là: “Na'èn, jyeé beèxkon-na nga 'an, x̄k̄i ni'ya ingo sinagoga kiaà nga kitsobà'ñóá x̄it̄a, kiskinìs'en ndayá, t̄jikoà kiskaàn-koáa j̀nà xi mokjeiín-là it'aà ts̄j̄i.

20 K'e nga kisik'en Esteban xi x̄it̄a chi'nda-lè xi jè kitsjaà 'én ts̄j̄i, t̄jikoáá 'an yaá t̄j̄naa; t̄jikoáá kis̄j̄ngoò takoàn nga kinik'en; skanda 'aán kitsobà nikje-là j̀nà x̄it̄a xi kisik'en Esteban.”

21 Tanga jè Na'èn-ná kitsò-na: “T'in, ján siikasén-lè naxandá-là xi mìtsà x̄it̄a judío xi k̄j̄in t̄tsajna.”

22 J̀nà x̄it̄a naxandá, ndaà nchi'nchré-là Pablo koni s'ín t̄ichja; k'eé kòjti-là k'e nga k̄i'nchré 'én xi jyehet'aà-ne; 'ñó kiichja kòhot̄j̄in nga kitsò:

—X̄it̄a jè, kàtiyaà! M̄ik̄i ok'in-là nga k̄ijnakon isa isò'nde!

23 J̀nà x̄it̄a koi, isaá 'ñó kiichja isa, bítsajneè nikje-là koá bíxteèn chijo ni'nde.

24 Jè x̄it̄a skò-là soldado, kitsjaà okixi nga tsas̄j̄ina'ya Pablo ya cuartel; t̄jikoà kitsjaà okixi nga k̄ataj̄á-là mé-ne nga keènojmí-ne mé kjoa xi tsohóts̄j̄i nga kondra fit̄j̄ingui-là x̄it̄a.

25 K'e nga jye t̄j̄it'aà'ñó, Pablo kiskònangui, kitsò-là jè soldado xi ya s̄j̄na, jè xi bít'in-là j̀nà soldado xi i'nga:

—¿A ts̄j̄á'ndeé-lè kjotíxoma nga k'oas'ín n̄ikoi jngoò x̄it̄a Roma xi kj'eè k̄i 'ya-là mé jé xi t̄j̄in-là?

26 Jè x̄it̄a xi bít'in-là j̀nà soldado xi i'nga, k'e nga k̄i'nchré nga x̄it̄a Romaá Pablo, kiikon jè x̄it̄a skò-là soldado, kitsò-là:

—¿Mé xi s̄ikoi x̄it̄a jè? Nga x̄it̄a Roma-né.

27 Jè x̄it̄a skò-là soldado kiikon Pablo, kiskònangui-là kitsò-là:

—Ngaji, ¿a kixi kjoa nga x̄it̄a Roma-né?

Pablo kitsò:

—Kixi kjoa.

28 Jè x̄it̄a skò-là soldado kitsò-là Pablo:

—Tse jchán ton kisengui-na yijo-na nga xitá Roma komà.

Jè Pablo kitsò:

—Tanga 'an, k'oaá s'ín kits'ian nga xitá Roma-ná.

²⁹ Jñà xitá soldado xi tjin-ne nga kojà-la, chinchat'aàxìn; tikoá jè xitá sko-la soldado k'e nga kisijiin-la nga jè Pablo xitá Roma-né, kitsakjòn-né koi kjoa-la nga jè kitsjaà okixi nga kisit'aà'ño Pablo.

Mé xi komà k'e nga jè Pablo tsibìjna nguixkon xitaxá ítjòn-la xitá judío

³⁰ K'e nga komà inchijòn, jè xitá sko-la soldado mejèn-la nga ndaà skoé mé jé xi tjin-la nga k'oas'ín óngui-ne jñà xitá judío. Kiskíjnda'ño; ikjoàn tsibíxkóya xitá sko-la no'miì kò xitaxá ítjòn-la xitá judío; kiìkò Pablo, tsasíjngangi nguixkon xitá koi.

23

¹ Pablo kiskoò'an jñà xitaxá ítjòn kitsò-la:

—Jñò xi xitá xinguiáá judío 'mì-nò, ngats'ioò, k'oaá xán-nò, kjohítsjeèn ts'an, k'oaá tsò nga ndaà tsìkitasoàn koni s'ín mejèn-la Nainá skanda nachrjein i'ndeì.

² Jè no'miì ítjòn xi 'mì Ananías kitsò-la jñà xitá xi nchat'aà chraña-la Pablo nga kàtasíjts'iin-'a tso'ba.

³ Tanga jè Pablo kitsò-la:

—iNgaji, xi jò isén tjin-lè, Nainá kàtasíjts'iin-'a ndsoboì! Ngaji, koií xá tijna-ne nga kíndaàjiin-ná koni s'ín tíchja kjotíxoma tanga ngaji, isaá nìkatonè-la kjotíxoma nga mejèn-lè sijn'in-'a-ná.

⁴ Jñà xitá xi nchat'aà chraña-la Pablo kitsò-la:

—¿Mé-ne k'oas'ín nokjoàjno-la xi no'miì ítjòn-la Nainá?

⁵ Pablo kitsò:

—'Ndsè, mìkiì bexkoan tsà jè xi no'miì ítjòn tíjna. Kixí kjoa, k'oaá s'ín tíchja xojon kjotíxoma-la Nainá nga tsò: “Jè xi xitaxá sko-la naxandá mìkiì koma kínoàkjoajno-la.”

⁶ Pablo, k'e nga kijtseèxkon jñà xitá xi títsajna nga jò skoya ma; tjin xitá fariseo kò tjin xitá saduceo; 'ño kiichja, kitsò-la:

—'Ndsé, 'an, xitá fariseo-ná; kí'ndí-la xitá fariseo-ná; koií kjoa-la nga k'oas'ín tíndaàjiin-na nachrjein i'ndeì nga k'oaá s'ín mokjeiín-na nga faáya-la jñà xitá xi biyaà.

⁷ K'e nga k'oa kitsò Pablo, kjòjòya jñà xitá xi títsajna junta; tsibíts'ia jñà xitá fariseo kò xitá saduceo nga tsohótikò xíkjin.

⁸ Koi kjoa-la nga jñà xitá saduceo mìkiì mokjeiín-la tsà kixi kjoa nga faáya-la mik'en, tikoá mìkiì mokjeiín-la tsà tjin xi 'mì àkjale kò xi 'mì inima; tanga jñà xitá fariseo mokjeiín yije-la kjoa koi.

⁹ Ngats'ì xitá 'ño jchán kiichja; k'eé chinchá kixi xitá xi okóya kjotíxoma-la Nainá xi ya chja-ne ts'e xitá fariseo, kitsò:

—Xitá jè, nímé kjoa xi ch'o tí'sín; tsà inima tsohókò kò tsà àkjale tsohókò; mìkiì koma jñà kíntcha ikón-lá Nainá.

¹⁰ Jè xitá sko-la soldado, k'e nga kijtseè nga isa 'ño makjan-la jñà xitá, kitsakjòn-né tsà ya sùk'en Pablo. K'eé kiichja isa-la soldado; kitsjaà-la okixi nga kàtjiko ìjngòò k'a ján cuartel.

¹¹ Xi komà nchijòn nga nitjen, ijchò kasit'aà-la Na'èn-ná jè Pablo, kitsò-la:

—Kì tsakjoòn-jèn, k'oaá s'ín mochjeén nga kínoàkjoì xi it'aà ts'an ján Roma, koni s'ín kinokjoi i Jerusalén.

K'e nga jñà xitá judío tsajoóya-ne nga sùk'en Pablo

¹² Nga kis'e isén, jñà xita judío tsajoóya-ne nga siik'en Pablo; k'oaá kitsò nga mì kì kokjen kò mìkì skoí nandá; Nainá kàtatsjá-la kjo'in tsà mìkì kítasòn nga siik'en Pablo.

¹³ Tsatoó ichán ma-ne jñà xita judío xi k'oa's'ín tsajoóya-ne.

¹⁴ Xita koi, kiikon jñà xita sko-la no'miì kò xita jchínga ts'e xita judío, kitsò-la: —K'oaá s'ín tsibìnè-lajen yijo-najen nga nímé xi chjine-jen, Nainá kàtatsjá-najen kjo'in tsà mìkì kítasòn nga sik'en-jen Pablo.

¹⁵ Ngats'ioò xi tjín-nò xá ítjòn ts'e Junta jè, kot'in-là jè xita sko-la soldado nga kàtjanchrobákò nchijòn-le i nguixkoòn. Tà k'oaá tìn-là nga isa ndaà mejèn-nò jchaxkoòn kjoa xi tjín-la. Ngajen kítsajndaà-jen ya iya ndiyá nga sik'en-jen k'e nga tikj'eè fi ijndé.

¹⁶ Jè ti-la ndichja Pablo, kiì'nchré kjoa xi tsajoóya-ne xita judío; k'eé kiì kisikí'nchré Pablo ya cuartel.

¹⁷ Pablo kiichja jngò-la soldado, kitsò-la:

—Tikoji ti jè ñánda tíjna xita sko-la soldado. Tjín 'én xi keènojmi-la.

¹⁸ Jè soldado kiìkò jè ti ñánda tíjna xita sko-la, kitsò-la:

—Jè Pablo xi tíjna ndayá kàchja-na kàtsò-na: “Tikoji ti jè.” Tjín xó 'én xi keènojmi-lè.

¹⁹ Jè xita sko-la soldado, kitsobà'ño tsja jè ti, kiìkò it'aà xìn, kiskònangui-la mé 'én xi keènojmi-la.

²⁰ Jè ti kitsò:

—Jñà xita judío, jye ndaà tsajoóya-ne [nga mejèn-la skónachan-lè]; siijé-lè nga kikoji nchijòn-lè jè Pablo ján nguixkòn xitaxá judío nga mejèn xó-la isa ndaà tjanangui-la mé kjoa xi tjín-la.

²¹ Ngaji, kì kiì mokjeiín-lè. Xita koi, ma-la tsà ichán nga títsajnachjoà-la Pablo ya iya ndiyá nga mejèn-la siik'en. Jye k'oa's'ín kitsjaà-la tso'ba Nainá nga mìkì kokjen tikoa mìkì skoí nandá skanda k'e nga siik'en Pablo. I'ndeì, tà jè nchikoña-la nga k'oi-la 'én-lè koni s'ín nchisijé.

²² Jè xita sko-la soldado, kitsò-la jè ti nga komaá kjoì-ne; kitsjaà-la okixi nga nijngòò xita keènojmi-la nga jè ijchò síkí'nchré.

K'e nga jè Pablo kichini'taà-la Félix xi xitaxá ítjòn

²³ Jè xita sko-la soldado kiichja jò-la soldado-la xi bit'in-la soldado xi i'nga, kitsjaà-la okixi nga kàtasíkítsajndaà jò sìndò soldado xi ndsokò kjoì-ne, ján kaàn kò te xi kohòyo kítsasòn-la, jò sìndò xi kichà lanza k'oa nga kjoì skanda ján Cesarea k'e nga kijchò xi ñijaàn nga kojño.

²⁴ Tikoa kitsjaà okixi nga kàtinchándaà kohòyo xi kijnakjá-la Pablo mé-ne nga ndaà kjiko-ne nga nímé xi komat'in skanda ñánda tíjna Félix xi xitaxá ítjòn.

²⁵ Jngòò xojòn carta tsibíndaà xi tsò:

²⁶ “Tjín-lè kjondaà ngaji Félix xi xitaxá ítjòn tjini; 'an, xi Claudio Lisias 'mì-na síhixat'aà-lè.

²⁷ Xita xi tsikasén-lè, jñà xita judío kitsobà'ño, kjomeé kisik'en, tanga 'an tsohósikoa nga kiikoa soldado-na nga jye kis'ejin-na nga xita Roma-né.

²⁸ 'An, mejèn-na nga skoeè mé kjoa xi tjín-la. K'oaá komà-ne nga kiikoa ñánda títsajna xitaxá judío.

²⁹ K'e nga ijchòkoa, kisijin-na nga tà koií kjoa-la xi kjotíxoma ts'e. Nì mé jé tjín-la nga kiyá; skanda mìkì ok'in-la nga ndayá kijná iya.

³⁰ 'An, kis'enojmi-na nga jñà xita judío, k'oaá s'ín tsajoóya-ne nga mejèn-la siik'en chijé. K'oaá ma-ne nga jì tsikasén-lè. K'oa tìs'ín kixan-la jñà xita xi óngui nga nguixkoiin kàtasindaàjin-la mé kjoa xi tjín-la kondra ts'e.”

³¹ Jñà soldado, k'e nga jye kitjoé-la okixi, kiìkò Pablo k'e nga jye kòjño skanda ján naxandá Antipatris.

³² Nga komà nchijòn jñà xità soldado xi ndsokò kiì-ne, kisikátji-ne; inchrobà-ne skanda cuartel. Tà jñà kiìkò Pablo soldado xi kohòyò títsajnasòn.

³³ Jñà xità soldado, k'e nga ijchò Cesarea, kisingatsja jè xitàxá ítjòn xojòn carta xi 'ya; tìkoá kisingatsja Pablo.

³⁴ Jè xitàxá ítjòn, k'e nga jye tsibíxkejiìn xojòn carta, kiskònangui ñánda i'nde-la Pablo. K'e nga jye kis'enojmí-la nga nangui Cilicia i'nde-la,

³⁵ kitsò-la:

—K'ée kji'nchrè-lè k'e nga kjoí xità xi óngui-lè.

Ikjoàn kitsjaà òkixi nga kàtamakinda, yaá kájna ni'ya osen-la Herodes.

24

Kó kitsò Pablo k'e nga kiichjajì yijo-la nguixkòn xitàxá ítjòn xi 'mì Félix

¹ K'e nga komà 'òn nàchrjein, ijchò Ananías ya Cesarea xi xità sko-la nõ'mii. Tjiko i'nga xità jchínga xi xá tjín-la ts'e xità judío tìkoá tjiko jngoò xità xi 'mì Tértulo xi chjine xojòn ts'e kjotíxoma. Jñà xità koi kiìkòn Félix jè xi xitàxá ítjòn tíjna nga kitsjaàt'in 'én xi kondra ts'e Pablo.

² K'e nga jye ijchòkò Pablo nguixkòn xitàxá, tsibíts'ia Tértulo nga kitsjaàt'in 'én xi kondra ts'e Pablo; kitsò-la Félix:

—Ngaji xi xitàxá ítjòn tijni, ndaà yaxkón-lèjen. Nga it'aà tsiji, 'ñó tísakó-najen kjoa'nchán. Ndaà xá xi tíbitasòn i naxandá-najen xi kjoa chjine tsiji.

³ Kjit'aà nàchrjein, kóhokji ñánda titsajna-jen tjoé-najen kjondaà tsiji. Ndaà chjí-lè nga k'oas'ín nìchjåt'aà-nájen.

⁴ Majìn-najen nga siì s'en-lèjen; tjín-lè kjondaà, tìná'ya itsé-nájen.

⁵ K'oaá s'ín ki'ya-jen xità jè nga títsa isò'nde 'ñó ch'o tjín kjoa xi ótsji nga síjòya xità judío; jè-né xi xità ítjòn-la xità Nazaret xi síkijatjìya ndiyá-la Nainá.

⁶ Tìkoáá mejèn-la ch'o kisítjé Ingo Tsjeè-la Nainá, k'oaá ma-ne nga kindobà'ñó-jen. [Mejèn k'oas'ín síkò-jen koni s'ín tíchja kjotíxoma tsajen,

⁷ tanga jè Lisias xi xità sko-la soldado tsasikò. Kóó kjoats'en tsafaá'an-najen k'e nga jye tíjnaya ndsaa-jen.

⁸ Kò k'oaá kitsò Lisias nga jñà xità xi óngui, ií kjoí nguixkoiìn nga sindaàjiìn.] Komaá ngaji sobà chjinangui-la mé-ne nga jcha-ne mé kjoa xi tjín-la nga ongui-jen.

⁹ Jñà xità judío xi ya títsajna, tìkoáá síngàsòn 'én nga kixi kjoa.

¹⁰ Jè xitàxá ítjòn kiskímìtjen tsja nga kitsjaà'nde-la Pablo nga kiichja. Pablo kitsò:

—Ji xi xitàxá ítjòn tijni, tjíin-na nga kò kjìn nó tìníkitasòin xá i i'nde jè; k'oaá ma-ne nga kò kjotsja-na, tì'an kichjåtjì-na yijo-na.

¹¹ Ngaji, komaá kinchátsjiyi. 'An, saá tjín-la tejò nàchrjein nga kiaa Jerusalén ya ingo ítjòn nga kijtseèxkoán Nainá.

¹² Nì saá jngoò k'a 'ya-na nga xità otikjoòkooa, tìkoáá mì xità naxandá binchaà'a ya ndítsin ingo ítjòn, kò ni'ya ingo sinagoga, kò ya jjiìn naxandá.

¹³ Jñà xità xi óngui-na mìkiì koma kòkixiya-la kjoa xi ónè-na.

¹⁴ K'oaá xán-lè xi ngui kixi kjoa, 'an, jè síkitasòn-la xi Nainá tsò-la xità jchínga-najen; k'oaá s'ín síkitasòan koni s'ín tjín jè ndiyá xitse-la Cristo, jè xi tsò-la jñà xità koi nga ndiyá xin-la Nainá-né. 'An, mokjeiìn yije-na koni s'ín tíchja xojòn ts'e kjotíxoma-la Nainá xi kiskiì Moisés kò ts'e xità xi kiichja ngajo-la Nainá.

¹⁵ 'An, k'oaá tìs'ín mokjeiìn-na it'aà ts'e Nainá koni s'ín mokjeiìn-la jñà xità xi óngui-na nga faáya-la xità xi biyaà, jñà xi xità kixi kò xi mìtsà xità kixi.

16 Koií k'oas'ín bìnè-là yijo-na nga tsjeè síkíjna kjohítsjeèn-na nguixkòn Nainá kò nguixkòn xítà.

17 'Nga jye kò kjìn nó mì tì kii f'i-na naxandá-na Jerusalén, j'íi ìjngò k'a-na nga j'ìkò-là ton jñà xítà imà kò kitsjaà-là kjotjò Nainá.

18 K'oaá tjin kjoa xi tìs'iaàn k'e nga jye kisítsjeèya yijo-na koni tjin kjotíxoma-là xítà judío. K'e nga kijtseè-na jñà xítà judío xi Asia i'nde-là nga ya tijnáa ya nditsin ìngo, mìtsà kjìn ma xítà xi títsajnakò-na. Tikoáà mìtsà kjoasii tìbìts'iaa.

19 Jñà xítà xi kijtseè-na ya nditsin ìngo, tsà mé kjoa xi tjin-là xi kondra ts'an, jñà sabá kàtjanchrobá nga kàtatsjá 'én.

20 Tsà majìn, jñà xítà xi i títsajna kàtènojímí tsà mé jé kisakòt'aà-là it'aà ts'an k'e nga tsohótijna nguixkòn xítaxá judío.

21 A xi koií jé xi tíma-na nga 'ñó kichjà k'e nga tijnajin-là xítaxá judío nga kixan-là: “Nàchrjein i'ndeí tíindaàjin-na nga mokjeiin-na nga faáya-là xítà xi biyáà.”

22 Jè Félix, ndaà tjin-là koni s'ín tjin ndiyá xítse ts'e Jesucristo. Tsibíchróbá kjoa koi. Kitsò:

—K'e nga kjoí Lisias xi xítà skò-là soldado, k'eé skònangui-ìsà-nò kjoa xi tjin-nò.

23 Félix kitsjaà-là okixi jñà soldado-là nga sùikíjna ìsà ndayá Pablo, tanga komaá kojmeèndeí ya iya ndayá, tikoáà komaá kijchòkon xítà xíkjin kò amigo-là.

24 K'e nga komà jàn ñijòn nàchrjein, ijchò ìjngò k'a Félix; tjikò Drusila xi chjoón-là ma xi tikoá xítà judío. Kiskinìkjaá Pablo nga mejèn-là kji'nchré-là kós'ín mokjeiin-là it'aà ts'e Na'èn-ná Jesucristo.

25 Pablo, tsibénojímí-là kós'ín tjin xi kjoa kixi, mé xi s'eén nga kíkjoán-lá kjoa xi ch'o tjin xi síjé yijo-ná; tikoá tsibénojímí-là nga sa nchrobá nàchrjein nga Nainá kùindaàjin. Félix tà kitsakjòn-né; k'eé kitsò-là:

—T'in-ne. Kjeí nàchrjein kichjà ìjngò k'a-lè k'e nga kò'a-na.

26 Jè Félix, k'oaá s'ín tísíkitsjeèn, mejèn-là ton kòchrjekájno-là Pablo nga sùikíjnandeí; k'oaá ma-ne nga kjìn k'a kiichja-là.

27 K'e nga tsato jò nó, jahatjìya xá-là Félix. Jè jahas'en xi 'mì Porcio Festo. Jè Félix, mejèn-là nga ndaà tsibijnakò jñà xítà judío; kisikíjna ìsà ndayá Pablo.

25

K'e nga jè Pablo tsibijna nguixkòn Festo

1 Festo ijchò Cesarea nga jahas'en xítaxá ítjòn; xi komà jàn nàchrjein itjo-ne Cesarea, kii Jerusalén.

2 K'e nga jye tìjna Jerusalén, jñà nò'mii ítjòn kò xítà skò-là xítà judío ijchòkon nga tsohóngui Pablo; kitsjaàt'in 'én xi kondra ts'e.

3 Xítà koi, kisijé-là kjondaà jè Festo nga kàtjanchrobákò Pablo ya Jerusalén. K'oaá s'ín jye tìndaà-là nga kítsachjoà ikon-là ya iya ndiyá mé-ne nga sùik'en-ne.

4 Tanga jè Festo, kitsò:

—Majìn, mìkii koma, nga jè Pablo ndayá tìjna ján Cesarea; 'an, jyeé ya tìfia.

5 Jñà xítaxá-nò koma koahijtako-na ján Cesarea mé-ne koma kohòngui-ne xítà jè, tsà mé jé xi tjin-là.

6 Jè Festo tsibijna-là tsà nguì jin nàchrjein kò tsà te nàchrjein ján Jerusalén; ikjoàn kii ìjngò k'a-ne ján Cesarea; nga komà inchiòn ijchò ní'ya osen, tsibijnanè íxile-là ñánda otíxoma; ikjoàn kiskinìkjaá Pablo.

⁷ K'e nga jahas'en ni'ya osen Pablo, jñà xitá judío xi j'ii-ne Jerusalén, kii kinchat'aà chraña-la nga kitsjaat'in 'én ndiso xi 'ño ch'o tsò tanga mìkii komà kjòkixiya 'én xi kitsjaat'in.

⁸ Pablo tsasìko yijo-la kitsò:

—Nimé jé xi tsohotsjià xi kondra ts'e kjotíxoma-la xitá judío, ni jè kondra ts'e ingo ítjòn-la Nainá, ni jè kondra ts'e César xi xitaxá ítjòn ts'e Roma.

⁹ Tanga jè Festo mejèn-la nga ndaà kíjnako xitá judío; kiskònangui-la Pablo, kitsò-la:

—¿A mejèn-lè nga k'oín ján Jerusalén mé-ne nga ya kíndaajñaà kjoa-lè?

¹⁰ Pablo kitsò:

—Jye i tijnaa ñánda tjin kjotíxoma-la César xi xitaxá ítjòn ts'e Roma. Mochjeén-né nga i kátasindaajin-na. Ngaji ndaà tíjin-lè nga ni mé kjoa tsohotsjià it'aà ts'e xitá judío.

¹¹ Tsà tjin-na jé, tsà ok'in-la nga kiyá, tíngoò takoàn nga kátasík'en-na; tanga tsà mì kixii kjoa 'én xi tsját'in-na, mìkii koma ya kongatsja it'aà ts'e xitá koi. Tikoaa-ne, jè kátindaajin-na César xi xitaxá ítjòn ts'e Roma.

¹² Jè Festo, k'ée tsajoóya-ne ko xitá-la xi títsajnao junta, ikjoàn kitsò:

—Tsà k'oaá s'in nijí nga jè César kíndaajin-lè, tà saá ján sikasén-lè.

K'e nga ijchò ján Cesarea jè xitaxá Agripa

¹³ K'e nga jye tsato chiba nachrjein, jè xitaxá Agripa ko Berenice kii ján Cesarea nga kisìhixat'aà Festo.

¹⁴ Kjin nachrjein tsibìtsajna ya Cesarea; jè Festo tsibénojmí-la Agripa kjoa-la Pablo, kitsò-la:

—Jè Félix, jngoò xitá kisìkijnaya ndayá ijndé.

¹⁵ K'e nga tsohótijna ján Jerusalén, jñà xitá sko-la no'mii ko xitá jchínga-la xitá judío kitsjaà-na 'én nga óngui. Kisijé nga kàtiyaà.

¹⁶ 'An, k'oaá kixan-la nga jñà xitaxá Roma, mì taxki sík'en xitá k'e nga tikj'eè 'ya-la jé xi tjin-la. Ítjòn joó'a kjoa-la ko jñà xitá xi óngui mé-ne nga koma kinchako-ne yijo-la.

¹⁷ Koií kjoa-la, k'e nga j'ii ijndé jñà xitá koi, mìkii kisichja nachrjein; nga koma inchijòn, nga jye tijnasoàn íxile-na nga tihotixoma, nitóon kiskinikjaá xitá jè.

¹⁸ K'e nga jye títsajna osen jñà xitá xi óngui, mìtsà koi kjoa tsohóngui koni s'in 'an tísíkijsjeén.

¹⁹ Tà k'oaá tjin 'én xi kitsjaat'in xi kondra ts'e Pablo koni s'in beèxkón Nainá ko it'aà ts'e jngoò xitá xi 'mì Jesús xi jye k'en; tanga jè Pablo tsò-né nga tíjnakon-né.

²⁰ 'An, mìkii be mé xi s'iaàn it'aà ts'e kjoa koi. K'ée kiskònangui-la Pablo, a mejèn-la nga ján kjoí Jerusalén mé-ne nga ya sindaajin-la kjoa xi finè.

²¹ K'oaá s'in kisijé Pablo nga jè César kíndaajin-la. Koií k'oaá s'in kitsjaà-na okixi nga ndayá tijnaya-isa skanda k'e nga koma sikasén-la César.

²² Agripa kitsò-la jè Festo:

—Tikoaa 'an mejèn-na nga kji'nchrè-la xitá jè.

Festo kitsò:

—Nchijòn-le kiná'ya-la.

²³ Nga komà inchijòn, ijchò Agripa ko Berenice. K'e nga jahas'en ni'ya osen 'ño ndaà kisis'in-la. Kjihitako jñà xitá sko-la soldado ko jñà xitá sko-la naxandá. Festo kitsjaà okixi nga kíichjaà Pablo.

²⁴ Festo kitsò:

—Ngaji Agripa xi xitaxá ítjòn tijni, ngats'ioò xi i titsajnaà: chítsejèn-là xita jè. Ngats'ii jñà xita judío, 'ñó síjèt'aà-na ján Jerusalén ko i Cesarea nga 'ñó chja nga mejèn-la sìik'en.

²⁵ Tanga 'an, nímé xi matsjit'aà-na it'aà ts'e nga mochjeén-la nga kiyá. Tanga tso'baá kisijé-ne nga jè kùindaàjiin-la César xi xitaxá sko-la tíjna-la ngats'ii xita. 'An, k'oaá s'in kiskoòsòn-la nga ya sìikasén.

²⁶ Tanga 'an, nímé kjoa xi matsji-na it'aà ts'e xita jè, kós'in síkasén-la xojon jè César xi xitaxá sko-la tíjna-la ngats'ii xita. K'oaá ma-ne nga síjèt'aà-nò jñò xi i titsajnaà ko ngaji Agripa xi xitaxá ítjòn tijni, mé-ne k'e nga jye chjinangui-laá, 'an sakó-na okixi nga síkasén xita jè.

²⁷ 'An, k'oaá ma-na, nga nímé chíj-la tsà taxki síkasén jngoàà xita xi ndayá tíjna tsà mì sik'à jngoò xojon xi 'ya-la mé jé xi tjín-la.

26

K'e nga kiichjatji yijo-la Pablo nga nguixkon Agripa

¹ Jè Agripa kitsò-la Pablo:

—Tjì'ndeé-lè nga kinókjoatji yijo-lè.

Pablo kiskímítjen tsja; tsibíts'ia nga kiichjatji yijo-la; kitsò:

² —Ngaji Agripa, matsjaá-na nga ma kichjàko-lè mé-ne nga kósikoaa yijo-na ngats'ii kjoa xi kondra ts'an tsját'in-na 'én xita judío.

³ Be-ná nga ji Agripa, tíjin yijeé-lè ngats'ii kjotíxoma xi tjín-la xita judío ko kjoa xi joóya-ne. K'oaá ma-ne síjèt'aà-lè, tjín-lè kjondaà, tse t'jin takoìn, ndaà tjiná'ya-ná.

⁴ Ngats'ii xita judío tíjin-la kós'in kisijchá yijo-na ján nangui-na ko Jerusalén tjen-ne nga sa ti kjia skanda nachrjein i'nde.

⁵ Jñà xita koi, tsà mejèn-la komaá keènojmi-lè. Ndaà tíjin-la nga 'an, ngui xita fariseo-ná; nga jñà xita fariseo xi isa 'ñó bínè-la yijo-la nga beèxkón kjotíxoma-la Nainá mì k'oaá-ne koni jñà xita judío xi i'nga.

⁶ 'An mokjeiin-na nga kitasòn kjoa xi tikoña-la koni s'in jye kitsjaà-la tso'ba Nainá jñà xita jchínga kjiin-ná. Koi kjoa-la nga i tijnáa.

⁷ Nga tejò tje-la naxandá Israel, ko nachrjein ko nitjen, jeya nchisíkjina Nainá nga nchikoñaá-la nga kitasòn kjoa koi. K'oaá xan-lè ngaji Agripa, nga tikoí-ne kjondaà xi 'an tikoña-la; k'oaá ma-ne nga óngui-na jñà xita judío.

⁸ ¿Jñò, mé-ne nga mikì mokjeiin-nò nga Nainá sìikjaáya-la xita xi jye k'en?

K'e nga tsibénojmi Pablo kó kis'iin nga kisijtikeè xita-la Cristo

⁹ 'An, nga sa kjòtseé, k'oaá s'in kisikítsjeèn nga mochjeén-né nga kondra kjítjngui-la Jesús xi Nazaret i'nde-la.

¹⁰ K'oaá kis'iaàn ján Jerusalén. Jñà xita sko-la no'mii kitsjaà-na okixi nga kjin xita tsjeè-la Nainá kiskinìs'en ndayá. K'e nga kinik'en xita koi, 'an tikoáà kjòjngoò takoàn.

¹¹ Nga xki xi ján ni'ya jngo sinagoga, kjin k'a kitsjaà-la kjo'in nga mejèn-na nga kátichajno-la Cristo. 'Nó kisijtikeè, skanda kiitjngui kondra-la ñánda xìn naxandá xi tjín isò'nde.

Kó komà nga jahatjya kjohítsjeèn-la Pablo (Hechos 9:1-19; 22:6-16)

¹² 'Koi xá kii-na ján naxandá Damasco nga 'an tsatíxá-na jñà xita sko-la no'mii, tikoá kitsjaà-na okixi.

¹³ Ngaji, xi xitaxá ítjòn tijni, k'e nga ijchò nchisen, kijtseè ya iya ndiyá, jngoò ni'in xi ngajmii inchrobà-ne xi isa 'ñó ote tsejèn mì k'oaá-ne koni ts'e ts'oi. Ngui kisihiseèn-né nga jngoò itjandii-na ko ts'e xita xi tjikoa.

14 Chixòt'aà-jen nangui, ikjoàn ki'nchrè jngoàà 'én hebreo xi kiichjajìin isén-na; kitsò: “Saulo, Saulo, ¿mé-ne 'an tì'mìtjingui kondra-ná? Tijí tìyatoòn-ne yijo-lè, k'oaá ngaya-la koni tsà nchraja tsjón-la jè yá xi bínès'en-la nei-la.”

15 'An kixan-la: “¿Yá-né ngaji Na'èn?” Jè kitsò-na: “'An-ná xi 'mì-na Jesús xi tì'mìtjingui kondra-ná.

16 Tìsítjìin; tìsijna kixii; koií xá kàyaxkon-ná nga 'an sixá-ná; jìi k'oii 'én, jè kjoa xi kà'yi kjoa xi iskan 'an kokoò sobà-lè.

17 'Aán sìkinda-lè it'aà ts'e xita naxandá-lè kò ts'e xi mìtsà xita judío. Yaá sikasén-lè

18 nga chíx'angui xkon nga mì tã tsjaà ya kinchimaya ndiyá jñò; ndiyá iseèn kinchimaya. Kàtinchat'aàxìn-la nga'nó-la xita neí; Nainá kàtjìt'aà-la. K'e nga kòkjeiín-la it'aà ts'an, jchat'aà-la jé-la, tikoá s'e-la kjoa xi tjoé-la xita naxandá-la Nainá xi xó kitjaajìin-ne.”

19 'Ngaji Agripa xi xitaxá ítjòn tijni, 'an mìkì kisitàjaajñà inìma-na jè kjoa xi kìtseè kò xi ki'nchrè xi ngajmì inchròbà-ne.

20 Ta saá, tsibenojmí ítjòn-la jñà xita Damasco, ikjoàn tsibenojmí-la xita Jerusalén, tikoá tsibenojmí-la kòhokji nangui Judea, kò jñà xi mìtsà xita judío. K'oaá s'ín tsibenojmí-la nga kàtasíkájno jé-la nga mì tì jé kòhòtsji-ne. Nainá kàtjìt'aà-la; ndaà kàtas'ín mé-ne nga jcha-la nga jye jahatjìya-la kjoa xi kòhòtsjeèn-la.

21 Koií kjoa-la, jñà xita judío, kitsobà'nó-na ya nditsin ingo; mejèn-la nga sikk'en-na.

22 Tanga Nainá tsasìko-na; tákó k'oaá tìs'iaàn skanda i'ndeji; k'oaá s'ín tibenojmí yije-la nita yá xita-ne. Mìtsà k'ejí 'én okoòya; koi 'én benojmiá xi tsakóya Moisés kò xita xi kiichja ngajo-la Nainá, kjoa xi koma nga tífi isa nachrjein.

23 K'oaá s'ín tsakóya xita koi, nga jè Cristo [xi xó kisikasén-ne Nainá] tjinè-la nga k'en, tanga jè jaáya ítjòn-la mé-ne nga keènojmiá-la xita naxandá-la kò xi mìtsà xita judío kòs'ín kòhiseèn-jìin inìma-la nga koma kìtjokajìin kjoajñò.

Kó kitsò Agripa nga mejèn jahas'en-jìin-la 'én-la Nainá

24 Jè Festo, k'e nga kii'nchré 'én-la Pablo nga tíhosìko yijo-la, 'nó kiichja kitsò: —Ngaji Pablo, tímaskáyaá-lè; jè xojon tísískáya-lè!

25 Tanga jè Pablo kitsò:

—Ngaji Festo xi xitaxá tijni, mìtsà tímaskáya-na; k'oaá s'ín tjin; 'én kixí xi tìchjà.

26 Jè Agripa xi xitaxá ítjòn tìjna, tìjìin yijeé-la kjoa koi; k'oaá ma-ne ma'nó takoàn nga nguixkon jè tìchjà 'én koi; 'an, k'oaá s'ín makixjìya-na nga jè, tikoá 'nó ndaà tìjìin-la kjoa koi; nga mìtsà tìjìma koni s'ín komà.

27 Ngaji Agripa xi xitaxá tijni, ¿a mokjeiín-lè koni s'ín kitsò jñà xita xi kiichja ngajo-la Nainá? 'An, be-ná nga mokjeiín-lè.

28 Jè Agripa kitsò-la Pablo:

—Tà chibaá chja-la tsà kinikijne-ná nga 'an, xita-la Cristo koma.

29 Pablo kitsò:

—Tsà tse kò tsà chiba chja-la, 'an, k'oaá s'ín mejèn-na nga nguixkon Nainá nga kàtakjeiín-lè xi xitaxá ítjòn tijni; tikoá kàtakjeiín-la ngats'ìi xita xi nchi'nchré-na. K'oaá s'ín kàtamát'ioòn koni 'an tanga mì k'oaá s'ín na'nó kìcha cadena sít'aà'nó.

30 K'èé tsasítjen Agripa kò Festo kò Berenice, ngats'ìi xita xi ya tìtsajna.

31 Xìn kii nga tsajoóya-ne kjoa koi. Kitsò-la xíkjin:

—Xita jè, nìmé kjoa tjin-la nga kiyá, tikoá mìkì ok'in-la nga ndayá kìjna'ya.

32 Agripa kitsò-la jè Festo:

—Xita jè, komaá-la kijnandeí-ne tsà mì k'oaá s'ín kisijé nga jè k̄indaàjiin-la César xi xitaxá ítjòn ts'e Roma.

27

K'e nga kinikasén Pablo ján Roma

¹ K'e nga jye k'oas'ín kiskoòsòn-la nga ján s̄ikasén-najen Italia, jè Pablo ko xita xi i'nga xi ndayá títsajna, jè kjòngatsja xita sko-la soldado xi 'mì Julio xi ya chja jngoò jtín-ne soldado xi ts'e César.

² Tsitjaàs'en-jen jngoò chitso xi ts'e Adramitio xi jye mejèn tíbitjo nga ya tífi jñà naxandá indiì ndáchikon ts'e nangui Asia. Tíkoaá yaá tíjnako-najen Aristarco xi ya i'nde-la Tesalónica, naxandá xi chja-ne nangui Macedonia.

³ Nga komà inchijòn, ijchò-jen Sidón. Jè Julio ndaà kijtseè ikon Pablo; kitsjaà'nde-la nga kiikon amigo-la mé-ne nga s̄is'in-la.

⁴ K'e nga itjo-najen Sidón, k'oaá s'ín tsanguì-jen xijngoàà nangui jiin-ndá Chipre, nga jè tjo, kondra tsajeén tí'ba.

⁵ Tsitjaàjto-jen jjiin ndáchikon i'nde ts'e Cilicia ko Panfilia; ijchò-jen Mira, naxandá xi chja-ne nangui Licia.

⁶ Jè xita sko-la soldado kisakò jngoò-la chitso xi naxandá Alejandría ts'e; yaá kisikas'en-najen nga ján tífi Italia.

⁷ Kjìn naxrjein tsitjaàjiin-jen ndáchikon nga tafi tafi tsanguì-jen; chja ijchò-najen ya kixi-la Gnido. Jè tjo mìkiì tsjá'nde-najen nga onguí kixi-jen; tsitjaáhindii-la-jen nangui Creta ya kixi-la naxandá Salmón.

⁸ Tseé kjo'in ki'nè-jen nga tsitjaàjiin-ndá-jen kóhokji indiì ndáchikon ts'e Creta. Chjá ijchò-najen i'nde ñánda 'mì Buenos Puertos ya chrañàt'aà-la naxandá Lasea.

⁹ Jyeé kjìn naxrjein tsato; jyeé 'ñó kjojkón tjín-la jjiin ndáchikon, nga jyeé nchrobá machraña naxrjein cho 'nchán [k'e nga 'ñó 'ba tjo]. K'oaá ma-ne jè Pablo kitsò-la jñà xita:

¹⁰ —'An, k'oaá s'ín machiyya-na, ndiyá jè, 'ñó tse kjojkón tjín-la; jchijaá-la jè chitso ko ch'á xi 'ya, skanda jñá, mejèn tsà sichijaá yijo-ná.

¹¹ Jè xita sko-la soldado, isaá ndaà kiì'nchréñijon-la jè nei-la chitso ko jè xita sko-la xi tíxáko chitso mì k'oaá-ne koni kitsò Pablo.

¹² Ya i'nde jè, mìkiì ndaà choòn nga ya sasíjna chitso naxrjein ch'o 'nchán. Xita xi ya títsajnaya chitso, kjìn ma xi ngásòn kitsò nga k̄itjokàjiin Buenos Puertos; ján kjoí Fenice, jngoò i'nde xi ndaà choòn xi chja-ne Creta ñánda bijchó sinchá chitso nga ya fahas'en jngoò chrja-la ndáchikon ya nga kixi-la ko ngaskón-la ñánda kahatji-ne ts'oi; yaá kitsajna naxrjein ts'e cho 'nchán.

K'e nga ts'a tjo xkón

¹³ Jñà xita xi síxáko chitso, k'e nga kijtseè nga indaà ts'a tjo xi inchrobà-ne ya i'nde sur, k'oaá s'ín kisikítsjeèn nga jyeé koma kisòn-ndá; itjo-jen, tsanguisòn ndá-jen ya indiì nangui Creta.

¹⁴ Xi komà iskan nga jye tjaàjiin-ndá-jen, j'ì tjojkón xi inchrobà-ne ya i'nde norte.

¹⁵ Kiìko jè chitso koni s'ín fi tjo. Ngajen, mì t̄i kiì ma n̄ikáfaya-najen jè chitso, nga jè tjo, mìkiì tsjá'nde-la; ta saá ta kits'ii'ndeé-lajen nga k'oas'ín kiìko-najen jè tjo.

¹⁶ Tsitjaàjto-jen ijton ít's'in i'nde Cauda; i'nde jè, mì t̄i k'oaá 'ñó tí'ba-ne tjo; chjá kitjoé-najen jè chitso jtobá xi tjíndófe-la ijton ít's'in jè chitso je.

¹⁷ K'e nga jye kitjoé-najen jè chitso jtobá, ikjoàn na'ñó tsibí'ñókjá-ne jè chitso je nga mì kixoña-jèn. Jñà xita xi síxáko chitso, tsakjón-la tsà ya

skajiin-'ñó ya i'nde ñánda 'ñó 'ncha tsomì ñánda 'mì Sirte. Koií kiskinájen-ne jè níkje ts'e chitso xi 'mì vela; tà k'oaá s'ín kiìko jè tjo.

¹⁸ Nga komà inchijòn, jè tjoxkón, tákó 'ñó jchán tí'ba. K'eé tsachrje jña ch'á xi 'ya chitso; tsibíxteèn-jìin ndáchikon [mé-ne nga ìsa jna komà-ne jè chitso].

¹⁹ Xi komà jàn nachrjein, tikoá tsachrje tsojmì xi mochjeén-la nga síxáko chitso. Tsibíxteèn-jìin ndáchikon.

²⁰ Kjìn nachrjein mì tì kiì ki'ya-najen ts'oi kò ni'ño nga 'ñó 'ncha ifi nga jtsí xkón tibanè-najen. K'oaá komà-ne nga chixón-jen nga mì-la tì kiì ndaà kítjokàjìin-najen ndáchikon.

²¹ Nga jyeé kò kjìn nachrjein mì tì kiì bichi-najen, Pablo tsasijna kixi, kitsò-la jña xita:

—Ndaà-la komà tsà kina'yañijon-ná koni kixan-nò; tsà mìkiì itjokàjñaá ya i'nde Creta, mì-la kiì k'oaá s'ín tímat'iaán nga kjo'in titsanìkjaán koá kinìchijaá tsojmì-ná.

²² Tanga i'ndeì, kì makájno-nò; nijngoò xita kiyá; tà jè chitso xi jchija.

²³ Nati nitjen kò'biì jngoò-na nijña; jngoò àkjale kò'f'ìikon-na xi Nainá kàsikasén, jè Nainá xi 'an fit'aà-la koá 'an síxá-la,

²⁴ kàtsò-na: “Pablo, kì tsakjoòn-jèn; kjo'ño tjín-ne nga kìjchoi nguixkon César, xitaxá ítjòn ts'e Roma. Nainá, k'oaá tjín kjondaà xi tsjá-lè nga nijngoò xita kiyá xi ya títsajnayako-lè chitso.”

²⁵ Jñò, 'ñó t'è-là takòn. 'An mìkiì sikájnoa. 'Beé-la takoàn, k'oaá s'ín kítasòn koni kàtsò-na jè àkjale.

²⁶ Tanga yaá kìjcho kat'aà'ño-laá jngoò nangui jtobá xi kijijnajìin-nda.

²⁷ K'e nga jye komà jò xomàna nga tjaajìin-jen ndáchikon Adriático, jè tjo fijen fikjako jè chitso. Jngoò nitjen, ijchò-la tsà osen nitjen, jña xita xi nchisíxáko chitso, kijtseè nga jyeé kjomeè bijcho chrañat'aà-lajen nangui.

²⁸ Kisìchiba kó kji nanga kijna nandá; kijtseè nga kaàn chrj'oòn jngoò metro nanga kijna. K'eé nguì kò kji kiì ìsa; ikjoàn kisìchiba ijngoò k'a; jye kaàn itoò metro tjín-la nga nanga.

²⁹ Kitsakjòn-la tsà jña ndajo nandá skakjoòko jè chitso. Ñijòn kichà ì xi gancho kjoàn kisikatsjoòjìin tàts'en chitso mé-ne nga kítsobà'ño-ne nangui nga mì tì kiì koma kjoì-ne jè chitso; ikjoàn tsibítsi'ba-la Nainá nga niton kàtas'e isén.

³⁰ Ngats'ì jña xita xi síxáko chitso mejèn tsanga chijé; k'oaá kis'ìin koni tsà jña kichà ì xi gancho kjoàn kìnchangui'ño skò chitso nga kítsobà'ño nangui; tsibíts'ia nga kiskinìjen-jìin nandá jè chitso jtobá.

³¹ Tanga jè Pablo kitsò-la jè xita skò-la soldado kò soldado xi i'nga:

—Tsà jña xita koi konga, jña, mìkiì koma kítjojñaá nandá.

³² Jña soldado tsate'ño jè chitso jtobá. Kiskaajìin ndáchikon.

³³ K'e nga jye kis'e isén, jè Pablo kitsò-la ngats'ì xita:

—Jyeé tjín-la jò xomàna nga titsajnachjaan nga chiñá-lá mé xi komat'iaán.

³⁴ Bitsi'bà-nò, mochjeén-né nga tìchiodé mé-ne nga s'e-nò nga'ño. Ngats'ioò, nímé xi komat'ioòn, skanda nijngoò xi sìichja jngoò tsja skoò.

³⁵ Pablo, k'e nga jye okitsò, kiskoé inchrájin, kitsjaà-la kjondaà Nainá nga nguixkon ngats'ì xita. Kisìxkoaya; ikjoàn tsakjèn.

³⁶ Ngats'ì xita, kjòtsja yije-la; tikoá tsakjèn kóhotjín.

³⁷ Jò sìndo kò jàn kaàn kò chrj'oòn jngoò ma-najen xi ya titsajnaya-jen chitso.

³⁸ K'e nga jye komà ndaà chichi yije-jen, jña ch'á trigo kisíxteèn-jìin ndáchikon mé-ne nga ìsa jna komà-ne jè chitso.

³⁹ K'e nga jye itjokàtji ts'oi, jña xita xi síxáko chitso, mìkiì beèxkon kó 'mì nangui ñánda ijchò-jen, tanga kijtseè-né nga tjín jngoò i'nde ñánda fahas'en

jngoò chrja-la ndáchikon ñánda 'ñó 'ncha tsoṁì; mejèn k'oas'ín kiskinì chitso tsà koma ya skajjìn-'ñó tsoṁì.

⁴⁰ Tsate na'ñó xi tjít'aà'ñó chitso; jña kicha ì xi gancho kjoàn, yaá kisijòjòjìn ndáchikon; kiskíjnda'ñó jña yá xi síxáko nga fiko kixi chitso. Ikjoàn kiskimittjen jè nikje xi sinchá tjo nga fàhitjen chitso. Ikjoàn tsibíts'ia nga kiì kixi ñánda kijna nangui xi 'ñó 'ncha tsoṁì.

⁴¹ Tanga yaá kiì kaajjìn-'ñó ñánda 'ncha tsoṁì ya ijìn ndáchikon. Jè sko yá chitso, kiskaajjìn-'ñó; mì ti kiì koma kishiniyá-ne. Ikjoàn kjòts'ia nga kjòxkoaya jè tàts'en chitso nga jè nga'ñó-la nandá kixiakoaya.

⁴² Jña soldado mejèn kiskik'en jña xita xi kjo'in nchifi nga majìn-la nga konga ya ijìn ndáchikon.

⁴³ Tanga jè xita sko-la soldado mìkiì kitsjaà'nde. Jè xi mejèn-la nga mì kiyá Pablo. Tà saá okixi kitsjaà kitsò:

—Yá xi ma-la nandá, kàtjì ítjòn mé-ne nga koma kijchò-ne ñánda nangui choòn,

⁴⁴ ko jña xita xi i'nga xi mì ma-la nandá, kàtjìsòn íteè ko tsà jña yá xkoa-la chitso.

K'oaá s'ín komà-ne nga ndaà ijchò yije-jen ñánda nangui choòn.

28

Mé xi komà'in Pablo k'e nga tsibijna Malta

¹ K'e nga jye itjojìn-jen ndáchikon, kis'enojmí-najen nga ya i'nde jè, Malta 'mì.

² Jña xita xi ya i'nde-la, ndaà kiskiko-najen; tsibítse-najen ni'ín, ikjoàn kitsjaà'nde-najen nga kinihiso-jen, nga jtsí tí'ba koa 'nchán choòn.

³ Jè Pablo tsibíxkó chiba chikín kixi. K'e nga chinchájin ni'ín jña chikín, jngoò ye itjokàjin xi tíhonga nga 'ñó tsjè ni'ín; kiskine tsja Pablo.

⁴ Jña xita xi ya i'nde-la nga kijtsee nga ye tjohóngui-la tsja Pablo, kitsò-la xíkjin:

—Xita jè, xitaá-la ma-la sík'en; nas'ín ndaà kòbitjokàjin ndáchikon, jè nea-ná xi tjín-la okixi, majìn-la síkijnakon.

⁵ Jè Pablo, tsibítsajneè tsja ya ijìn ni'ín; nímé xi komà-la.

⁶ Ngats'ii xita nchikoña-la mé hora kitjaya tsja koa mé hora kiyá Pablo. K'e nga kijtsee nga jye kjìn hora tsato nga nímé xi komà-la, kj'eí s'ín kiskítsjeèn, kitsò:

—Jè Pablo, Nainá-la.

⁷ Ya chrañat'aà-la i'nde ñánda ijchò-jen, tseé nangui tjín xi ts'e xita ítjòn-la i'nde Malta xi 'mì Publio. Jàn nachrjein tsitsajna-ko-jen; ndaà kiskoétjò-najen ko ndaà kisis'in-najen.

⁸ Nachrjein koi, jè na'èn-la Publio, xk'én-né; ch'in tíjnga tjín-la ko xojmá jní tífa-la. Pablo kiikon; kiichjat'aà-la Nainá; ikjoàn tsohójnasòn-la tsja; jngoò k'a kjòndaà-ne.

⁹ K'e nga kiì'nchré jña xita xk'én xi tjín ya i'nde jè, tikoà inchrobà ñánda tjina Pablo. Kjòndaà yijeé-ne.

¹⁰ Jña xita, ndaà kisis'in-najen. K'e nga jye titsachjoé jngoò-jen chitso nga jye titsahonguí-jen, jña xita kiskik'a yijeé-najen ngats'ii tsojmì xi kochjeén-najen ya ndiyá.

K'e nga ijchò Pablo ján naxandá Roma

¹¹ K'e nga jye tsato jàn sá nga titsajna-jen i'nde jè, ikjoàn tsanguì ijngoò k'a-jen. Tsitjaàs'en jngoò-jen chitso xi ján i'nde-la naxandá Alejandria xi tikoà

ya kisasijna ya indii ndáchikon ts'e Malta jña nàchrjein cho 'nchán; isén ts'e Cástor ko Pólux tjit'aà.

¹² K'e nga ijchò-jen naxandá Siracusa, jàn nàchrjein tsitsajna-jen.

¹³ Tsanguì ìjngoò k'a-jen; ijchò-jen skanda naxandá Regio. Xi komà inchijòn tsibíts'ia nga ts'a tjo xi inchrobà-ne ì'nde sur. Ijchò jò nàchrjein, ijchò-jen naxandá Puteoli.

¹⁴ Yaá kiskaàkjoò i'nga-jen xita xinguiáá xi it'aà ts'e Cristo xi kiichjako-najen nga tsitsajna-ko-jen jngoò xomàna. Xi komà iskan, ikjoàn tsanguì-jen skanda Roma.

¹⁵ Jña xita xinguiáá it'aà ts'e Cristo xi titsajna Roma, jyeé tíjìn-la nga ya titsahonguí-jen; tjín xi ijchò kaña-najen ya nditsin Apio; tikoá tjín xi ijchò kaña-najen ñánda 'mì Jàn Tabernas. Jè Pablo, k'e nga kijtseèxkon, tsjaá kis'e-la inima-la; kitsjaà-la kjondaà Nainá.

¹⁶ K'e nga jye titsajna-jen Roma, Pablo kits'ii'nde-la nga tsibijna tajngoò ni'ya-la; ko tà jngoò soldado kisikinda.

Mé 'én xi kiichja Pablo k'e nga tsibijna Roma

¹⁷ Nga komà jàn nàchrjein nga ijchò-jen Roma, Pablo, tsibíxkóya jña xita sko-la xita judío xi ya titsajna. K'e nga jye j'ii yije, kitsò-la:

—Jñò xi xita xinguiáá judío xi ì titsajnaà Roma, ján Jerusalén, kitsobà'ño-na xita, ikjoàn kisingsja-na it'aà ts'e xitaxá Roma nga tsibíndaàjìin-na. 'An, nímé jé xi tìhotsjià it'aà ts'e xita xinguiáá judío ko it'aà ts'e kjotixoma-la xita jchínga-ná.

¹⁸ Jña xitaxá Roma nga tsibíndaàjìin-na, nímé jé xi kisakòt'aà-la it'aà ts'an. Mejèn kisikíjnandeí-na nga mìkiì ok'ìn-la nga sikk'en-na.

¹⁹ Tanga jña xita judío, mìkiì kòkjeíin-la; k'oaá komà-ne nga 'an, kisìjé nga jè kàtíndaàjìin-na jè César xi xitaxá ítjòn ts'e Roma. 'An, nímé xi sùjé xi kondra ts'e naxandá-ná.

²⁰ K'oaá ma-ne nga kòbìxkóya-nò mé-ne nga kichjako-nò; koií kjoa-la nga mokjeíin-na it'aà ts'e kjoa xi titsachiñá-lá xi xita Israel 'mì-ná nga na'ño kichá tjit'aà'ño-na.

²¹ Jña xita judío kitsò:

—Ngajen, nímé xojon tíkaat'aà-najen xi kjoa tsiji xi ján Judea nchrobà-ne. Ngats'ii xita judío xinguiáá xi nchif'ii, nímé 'én xi ch'o tsò nchitsjá-najen xi kjoa tsiji.

²² Mejèn-najen nga kiná'ya-jen kjoa xi nìkítsjìin; ngajen, tíjìn-najen nga xki xi ján chjajno-la xita nga kondra fì-la jè ndiyá xitse xi ya tjaáyi.

²³ Tsibíjna jngoò nàchrjein-la xikjín, mé nàchrjein kixoña. K'e nga chixoña, kjìn xita ijchò ya ni'ya ñánda tíjna Pablo; ko jè Pablo tsakóya-la kós'ín otixoma Nainá, tsibíts'ia-ko-ne nga sa tajñòya skanda kjònguixòn. Pablo kisikjeén xojon ts'e Moisés ko ts'e xita xi kiichjaya ngajo-la Nainá nga tsakóya-la kó s'ín tíchja mé-ne nga jña xita kàtakjeíin-la it'aà ts'e Jesús nga jè xi Cristo.

²⁴ Tjín xita xi kòkjeíin-la, tikoá tjín xi mìkiì kòkjeíin-la.

²⁵ Nga mìkiì kjòngásòn 'én-la koni s'ín tsajoókjoò, tsibíts'ia nga itjo ni'ya. K'eé kitsò-la Pablo:

—Ndaà kiichja Inima Tsjeè-la Nainá nga kisikjeén Isaías xita xi kiichja ngajo-la kjòtseé nga kitsò-la jña xita jchínga judío:

²⁶ T'in, kot'ìn-la jña xita naxandá:

Jñò, kiná'ya-nò tanga mìkiì kjoas'en-jìin-nò; chítsejèn-nò tanga mìkiì jchaxkon.

²⁷ Koií kjoa-la nga jña xita naxandá jè, kisitájaàjìin kjohítsjeèn-la, tsibíchjoàjto líká-la,

tikoà tsibíchjoà xkon,
 mé-ne nga mìkì skoe-ne,
 mìkì kji'nchré,
 tikoà mìkì kjoas'en-jìin-la;
 majìn-la nga 'an fit'aà-na
 nga sindaà-na.

²⁸ Jñò kàtasijìin-nò, nàchrjein ì'ndeì, Nainá, ján tísikasén-la jñà xi mìtsà xita judío, kjondaà jè, mé-ne nga kítjokàjìin-ne kjo'in. Kò jñà xita koi, kokjeiín-la.

²⁹ K'e nga jye okitsò Pablo, jñà xita judío, k'e nga kii-ne, nguì tà tsohótiyaá-ne 'én xi tsibénojímí Pablo.

³⁰ Pablo, jò nó tsibìjna ni'ya xi kiskìña nga tsibíchjí. Yaá kisis'in-la ngats'ìi xita xi ijchòkon.

³¹ Kitjò'nde-la nga kiìchjaya kós'ín otíxoma Nainá tikoà tsakóya it'aà ts'e Na'èn-ná Jesucristo. Mì yá xita tsatekjáya-la.

Xojoṇ carta-la San Pabło xi kiskü-la xita naxandá-la Cristo xi títsajna Roma

Kó tsò Pablo nga síhixat'aà jñà xita naxandá-la Cristo xi títsajna Roma

¹ Jè xojoṇ carta jè, 'aán tikjii-nò xi Pabło 'mì-na xi chì'nda-la Jesucristo ma, xi xó kiichja-na Nainá nga 'an tsibíxáya-na kò xó kitjaàjiin-na nga 'an sika'bísoàn 'én ndaà-la Nainá.

² It'aà ts'e 'én koi, Nainá jye k'oas'ín kitsjaà tso'ba nga tisa kjòtseé, koni s'ín tichja Xojoṇ Tsjeè-la xi kiskü xita xi kiichja ngajo-la Nainá.

³ Nga ya tichja it'aà ts'e Ki'ndí-la, jè Na'èn-ná Jesucristo xi jè otíxoma-ná. Koni xita isò'nde, yaá inchrobát'aà-ne tje-la xitaxá itjòn David.

⁴ K'e nga jaáya-la it'aà ts'e kjoabiyaá, Jesucristo, k'oáá s'ín kiyaxkon-la nga Ki'ndí-la Nainá-né xi tse nga'ño tjín-la koni s'ín ndaà síkíchiya-ná jè Inima Tsjeè-la Nainá xi sítsjeè-ná.

⁵ It'aà ts'e Jesucristo, kitjoé-na kjondaà nga 'an tsibíxáya-na nga kènojmiya-la 'én ndaà-la jñà xita naxandá xi tjín nga títsa isò'nde nga kàtasíkitasòn kò kàtakjeiín-la it'aà ts'e Cristo, mé-ne nga jeya kijnane Cristo.

⁶ Tikoáá jñò, xó kinokjoà-nò nga xita-la Cristo k'oín-nò.

⁷ Tikjii-nò ngats'ioò xi títsajnaà Roma xi matsjakeè-nò Nainá nga tikoá xó kinokjoà-nò nga xita tsjeè-la koma.

Nainá xi Na'èn-ná, kò jè Jesucristo xi otíxoma-ná kàtatsjá-nò kjondaà kò kjoa'nchán ya jjiin inima-nò.

Mé-ne mejèn-la kjoí Roma jè Pablo

⁸ Xi mats'ia-ne, it'aà ts'e Jesucristo tsjaà-la kjondaà Nainá xi it'aà tsajòn, koi kjoa-la nga xki xi ján naxandá xi tjín nga títsa isò'nde, na'yá-nò nga ndaà mokjeiín-nò it'aà ts'e Cristo.

⁹ It'aà ts'e Nainá xi 'an sixá-la nga tíngoò takoàn nga sika'biá 'én ndaà-la xi kjoa ts'e Ki'ndí-la, jè tíbeè nga nachrjein nchijòn síkítsjeèn-nò k'e nga chjàt'aà-la.

¹⁰ K'e nga bìtsi'ba-la Nainá, k'oáá s'ín síjét'aà-la tsà ikon xi tsò nga chaán tsjá'nde-na nga kjíkon-nò.

¹¹ Tikoáá mejèn-na skoexkon-nò mé-ne nga tsja chiba-nò kjohítsjeèn ts'e inima-ná mé-ne nga isa kixi kitsajna-nò.

¹² Jè xi tixan-nò nga ngásòn k'oi-lá nga'ño xinguiáá it'aà ts'e kjoa xi mokjeiín-ná.

¹³ 'Ndsè, tichja, mejèn-na nga kàtasijiin-nò nga kjòtseé tjín-ne nga kjíkon-nò tanga skanda i'ndeí mì tà jngoò kjoa bíchjoà ikòn-na. Xi kjohítsjeèn ts'an, jè xi mejèn-na nga siixáko-nò jñò, koni s'ín kisixá ñánda nga xin naxandá mé-ne nga tikoá skoeè-na kjondaà-la xá-na xi 'an s'iaàn it'aà tsajòn.

¹⁴ Tjínè-na nga kokoòya-la ngats'ii xita xi 'én griego chja kò xi mìkiì chja, xita xi tjín-la kjoachjine kò xi tsjìn-la.

¹⁵ K'oáá ma-ne nga 'ño mejèn-na nga tikoá kichjàyajiin-nò jè 'én ndaà-la Nainá xi kjoa ts'e Cristo, jñò xi títsajnaà naxandá Roma.

Mé nga'ño xi tjín-la 'én ndaà-la Nainá xi kjoa ts'e Cristo

¹⁶ Mikiì masobà-na it'aà ts'e 'én ndaà-la Nainá xi kjoa ts'e Cristo, nga nga'ño-la Nainá-né. Jè 'én xi ma-la síkítsajnandeíi xita kjoa ts'e jé, ngats'ii xita xi mokjeiín-la it'aà ts'e, mats'iako-ne jñà xi xita judío kò tikoá xi mìtsà xita judío.

17 Jñà 'én ndaà-là Nainá xi kjoa ts'e Cristo okó-ná kós'ín s'ín Nainá nga síkixi xita. Tà jè-né nga mokjeiín-là it'aà ts'e Cristo mé-ne nga isa ndaà kòkjeiín-là. K'oaá s'ín tíchja Xojon-là Nainá nga tsò: “Jè xi xita kixi, it'aà ts'e kjoa xi mokjeiín-là kijnakon-ne.”

Jé xi tjín-là xita isò'nde

18 Nga jè Nainá skanda ján ngajmiù tíhokó kjoajti-là it'aà ts'e xita xi mìkiì beèxkón kò xi ch'o s'ín. Jè kjohítsjeèn ch'o xi tjín-là mì kì tsjá'nde-là nga kjoétjò xi kjoakixi.

19 Jè kjoa xi 'ya-là it'aà ts'e Nainá, ndaà tíjiín-là jñà xita koi, nga tijè-ne Nainá tíhokó-ne.

20 Nga jñà kjoa ts'e Nainá xi mìkiì tsejèn, ndaà tíyaxkon-là kóni nga tisa kisindaà isò'nde. Yaxkoón-là nga tjín-là nga'ño Nainá nita mé nachrjein-ne nga tà jè tajngoò xi Nainá 'mì. Kjoa koi tí'yaá-là it'aà ts'e tsojmi xi tsibíndaà Nainá. K'oaá ma-ne nga jñà xita mì kì koma kinchako yijo-là nga kitsò: “Mìkiì tíjiín-na tsà tíjna Nainá.”

21 Jñà xita nas'ín tíjiín-là nga tjín Nainá xi tsibíndaà isò'nde, tanga mìkiì jeya kisikíjna, nì mìkiì kitsjaà-là kjondaà. Tà saá tà koií 'ño ndaà kisis'in-là kjohítsjeèn xi nímé chjí-là. Kjöhitsjeèn tájaà-là kisijñò-là.

22 Xi kjohítsjeèn ts'e, xita chjineé kitsò-là yijo-là; tanga mìtsà kixi kjoa, xita nchikón-né.

23 Kisikíjnat'aàxìn Nainá xi jeya tíjna xi mìkiì fehet'aà nachrjein-là; tà saá koi kijtseèxkón isén ts'e xita xi fehet'aà nachrjein-là; skanda jñà isén-là cho xi tímajiín isén kijtseèxkón, kò isén-là cho xi ñijòn ma ndsoko kò isén-là ye.

24 Koií kjoa-là nga kitsjeiín takòn Nainá nga taxki kàtas'ín nga kàtas'ín nita mé kjoa chinga xi bitjokàjiín inima-là. K'oaá ma-ne nga tsohótsji-là kjoa sobà yijo-là koni s'ín kisikò xíkjin.

25 Kisikjatiyaá-là kjoa kixi-là Nainá; 'én ndiso kiskoé. Jñà kijtseèxkón koa jñà kisitsjako tsojmi xi jè Nainá tsibíndaà. Mìtsà jè kijtseèxkón koa kisitsjako Nainá xi tsibíndaà tsojmi. Nainá kàtayaxkón nita mé nachrjein-ne, k'oaas'ín kàtama.

26 Koií kjoa-là nga kitsjeiín takòn Nainá nga kò s'ín kàtas'ín-kò yijo-là kjoa sobà xi ch'o tjín. Jñà íchjín kisikjatiyaá-là koni s'ín mochjeén x'in; tjín íchjín xi tíjñà xíkjin kiskoé-ne.

27 K'oaá tis'ín kis'iín íchjá, kitsjeiín takòn-né koni s'ín mochjeén íchjín. Tjín íchjá xi 'ño kisaseèn-là nga tí x'in xíkjin tsoyijòko-ne. Tsohótsji-là kjoa sobà yijo-là. K'oaá ma-ne nga kjo'in kis'e-là xi tí yijo ts'e-ne koni s'ín ok'in-là kjoa ch'o xi kis'iín.

28 Xita koi, mìkiì kisikítsjeèn tsà mochjeén-né nga skoexkon Nainá; k'oaá ma-ne nga kitsjeiín takòn Nainá nga kàtasíkjeén kjohítsjeèn-là xi nì méé chjí-là mé-ne nga k'oaas'ín kàtas'ín-ne kjoa xi mìkiì ok'in-là.

29 Xita koi, yaá tíjiín yije inima-là ngats'iì kjoa xi ch'o tjín koni: kjoa chingui, kjoa ts'en, kjoa tse mejèn, kjoa toòn, kjoaxitakòn, kjoa nga ma-là sík'en xita, kjoa xi kjaán-kjoò, kjoa konachan, kjoa xi ch'o s'ín, kjoa 'én ndiso;

30 nga chjajno-là xíkjin; nga síjtikeè Nainá; ochrjengui xíkjin; 'nga ikon; ndaà síkijna yijo-là; síkítsjeèn nga mejèn-là isa ch'o tjín kjoa xi s'iín; mìkiì 'nchréñijon-là xita jchínga-là;

31 mìkiì machiya-là; mìkiì síkitasòn 'én xi chja; mìkiì beètjò xita xíkjin; tsjin-là kjoa njchàat'aà; koa tsjin-là kjoahimatakòn.

32 Jñà xita koi, ndaà tíjiín-là nga k'oaá s'ín tsjá okixi Nainá: ngats'iì xi k'oa tjín kjoa xi s'ín, ok'in-là nga kiyá. Tanga mìkiì majngoò ikon nga tà jñà xi k'oaas'ín, skanda tíkoáá matsja-là k'e nga k'oa tis'ín xita xi kj'ejí.

2

Nainá, mé xi tsjá-la xita xi ndaà s'in ko xi ch'o s'in

¹ K'oaá ma-ne, ngaji, nita yá xita-ne ji, nga jé onè-la xinguii, mìkii koma kosikoii yijo-lè nga nguixkon Nainá. K'e nga jé tìbìnè-la xita xinguii, tìkoaá ngaji, tiji tìbìnè-la jé yijo-lè nga k'oa tìs'in 'nì.

² Tanga 'ya-ná nga kixi s'in Nainá k'e nga tsjá-la kjo'in jña xita xi koa tjin jé xi ótsji.

³ Ngaji xi kjo'in bìnè-la xita xi kjeií, ¿mé-ne koa s'in nìkítsjeèn-ne nga jchat'aà-lè kjo'in xi tsjá Nainá? Nga ji k'oaá tìs'in 'nì.

⁴ ¿A mì tjiin-lè nga nachrjekàngui jé kjondaà-la Nainá nga tjin-la kjojetakòn koa tjin-la kjoatsejta? ¿A mì tjiin-lè nga jé kjondaà-la Nainá tìkoña-né nga s'ikájnoi jé-lè nga mì tì jé kinchátsji-ne?

⁵ Nga tájaàjìn tjin inima-lè nga mìkii nìkájnoi jé-lè, isaá tse kjo'in tìbìnè-la yijo-lè xi tsjá-lè Nainá jé nachrjein k'e nga kjoíko kjoajti-la nga jcha-la kós'in kixi koindaàjìn Nainá nga tsjá-la kjo'in jña xita.

⁶ Nainá tsjá-la chjì-la mé kjoa xi kis'iin nga jngoò òjngoò xita.

⁷ Tsjá-la kjoabinachon nita mé nachrjein-ne jña xita xi nchihótsji kjoajeya, ko nchihótsji nga jchaxkón, ko nchihótsji nga kítsajnakon nita mé nachrjein-ne ján ngajmii. Koií kjoa-la nga ndaà tjin kjoa xi nchis'in nga kjit'aà nachrjein.

⁸ Tanga Nainá nga ko kjoajti-la tsjá-la kjo'in jña xita xi kondra fi-la nga mìkii 'nchréñijon xi kjoa kixi. Tà kjoa nchikón fìtjingui-la.

⁹ Tseé kjoa s'e-la ko tseé kjo'in s'e-la ngats'ii xita xi ch'o s'in, mats'iaako ítjòn-ne jña xita judío, tìkoaá ko xi taxki xita xi mìtsà xita judío.

¹⁰ Tanga jña xita xi ndaà s'in, tjoé-la kjoajeya, ndaà jchaxkón, tìkoaá s'eé-la kjoa'nchán inima-la, mats'iaako ítjòn-ne jña xita judío, tìkoaá ko xi taxki xita xi mìtsà xita judío.

¹¹ Nainá mìkii faájin nita yá xita-ne, tà ngàsòn fiko yije.

¹² Ngats'ii jña xita xi mìkii tjiin-la kó tsò kjotíxoma xi kiskii Moisés, k'e nga jé ótsji, chija-né nas'in mìkii kijtsee kjotíxoma-la Moisés. Koa jña xita xi ndaà tjiin-la kjotíxoma-la Moisés, k'e nga jé ótsji, k'oaá s'in kojtsò koni s'in tíchja xi tije-ne kjotíxoma.

¹³ Jña xita xi tà 'nchré-la kjotíxoma xi kiskii Moisés, mìtsà jña xi xita kixi nga nguixkon Nainá. Jña-né xi xita kixi xi s'ikitasòn.

¹⁴ K'e nga jña xi taxki xita xi mìkii tjiin-la kós'in tíchja kjotíxoma-la Moisés, sà k'oaá tà yaá nchrobájin inima-la nga k'oa s'in s'in koni tsò kjotíxoma-la Moisés, yaá 'ya-la nga tìkoa tjiin inima-la kjotíxoma xi ts'e nas'in tsjin-la ts'e Moisés.

¹⁵ K'e nga ndaà s'in yaá 'ya-la nga tjiin inima-la kjoa xi síjé kjotíxoma-la Moisés; jé inima-la okó kjoa xi ndaà tjin ko xi mìkii ndaà tjin; tije-ne kjohítsjeèn-la sà k'oaá óngui ko sà k'oaá osìko.

¹⁶ K'oaá s'in koma jé nachrjein k'e nga Nainá koindaàjìn ngats'ii jé xi tji'ma-la xita jjin inima-la; it'aà ts'e Jesucristo sindaàjìn, koni tsò 'én ndaà-la Nainá xi kjoa ts'e Cristo xi 'an chjaya.

¹⁷ Ngaji xi xita judío 'mì-lè; jé ma'ñót'aà takoìn kjotíxoma xi kiskii Moisés; 'ngaá ma takoìn it'aà ts'e Nainá nga si tsiji-né;

¹⁸ 'ya-né mé xi mejèn-la Nainá nga s'ikitasòin; ma-lè chjaàjìn mé kjoa xi ngui ndaà tjin koni s'in okóya-lè Kjotíxoma;

¹⁹ k'oaá s'in nìkítsjin nga tìjngoò takoìn nga ji okoò-la ndiyá kixi xita xi mìkii machiya-la nga tíchjoà xkon ko k'oaá ma-lè nga ji nìhiseèn-la xi tjiñò kjohítsjeèn-la.

20 Ji, k'oaá s'ín níkítsjiin nga ma-lè okoòya-la xi taxki xita xi tsjin-la kjohítsjeèn; nga maestro 'mì-lè ts'e xita xi chiba ma-la it'aà ts'e Nainá; nga tjin-lè kjoa chjine ko kjoa kixi xi okó-lè it'aà ts'e Kjotíxoma.

21 Ji xi ma-lè okoòya-la xita xi k'ejí, ¿mé-ne mìkii okoòya-la xi ti yijo tsji-ne? Ji k'oaá s'ín nokjoayi nga mìkii ma s'ichijé; ji, ¿mé-ne n'ichijé-ne?

22 Ji, k'oaá si nga mìkii ndaà tjin nga kjoa chjngui s'iin xita; ji, ¿mé-ne nga k'oa tís'ín 'nè-ne? Ji, k'oaá si nga jtichii xkósòn; ¿mé-ne nga ingo bitjaàs'en-ne nga n'ichijí tsojmì-la xkósòn?

23 Ji, 'ngaá takoin nga ndaà tjiin-lè kjoa ts'e kjotíxoma tanga, ¿a mìtsà t'nachrjekàngui Nainá nga mìkii níkitasòn-la koni s'ín tíchja kjotíxoma?

24 K'oaá s'ín tíchja Xojon-la Nainá nga tsò: “Kjoa tsajòn-nò xi xita judío 'mì-nò nga chjajno-la Nainá jña xi taxki xita.”

25 Tsà ndaà síkitasòin kjotíxoma xi kiskii Moisés, jè kjoa ts'e circuncisión nga tjit'aà chiba-lè, chjí-la-né; tanga tsà mìkii síkitasòin, k'oaá ngaya-la koni tsà mìkii tjit'aà chiba-lè.

26 Jña xi mìtsà xita judío, nas'ín mìkii tjit'aà chiba-la koni xita judío, tanga tsà kixi síkitasòn kjotíxoma ts'e Moisés, Nainá skoétjò-né koni tsà tjit'aà chiba-la.

27 Jña xita xi síkitasòn kjotíxoma ts'e Moisés, nas'ín mìkii tjit'aà chiba-la yijo-la, jña koìindaàjiin-nò nga mìkii níkitasòn nas'ín tjit'aà chiba-nò, nas'ín tjin-nò xojon ts'e kjotíxoma-la Nainá.

28 Jngò xi xita judío, mìtsà tà jè nga ndaà 'ya-la kjoa xi s'ín; koa jngò xita xi tjit'aà chiba-la kjoa ts'e circuncisión, mìtsà tà jè xi mochjeén nga tjit'aà chiba-la isò'nga yijo-la.

29 Jè xi ngui xita judío, jè xi chjí-la koni s'ín tjin ijin inima-la. Ko jè xi ngui tjit'aà chiba-la, jè xi chjí-la koni s'ín tjit'aà chiba-la ya ijin inima-la. Kjoa koi, mìtsà ts'e kjotíxoma xi xojon tjit'aà; ts'eé Inima Tsjeè-la Nainá. Jña xi k'oa s'ín síkitasòn, Nainá ndaà chja xi it'aà ts'e, nas'ín mìkii ndaà chja xita xi k'ejí.

3

Mé kjoa xi 'ñó chjí-la it'aà ts'e xita judío

1 Tsà k'oaá s'ín tjin, ¿mé kjondaà xi isa tse tjin-la nga xita judío 'mì? Ko ¿mé chjí-la nga tjit'aà chiba-la?

2 Kjìn skoya chjí-la. Jè xi tjna ítjòn, jè-né nga jña xita judío kjòngatsja 'én-la Nainá.

3 Jña xita judío, nas'ín tjin i'nga xi mìkii síkitasòn 'én xi kjòngatsja, ¿a koma sikjatjìya-la kjoakixi-la Nainá nga mìkii kítasòn koni s'ín kitsjaà tso'ba?

4 Majìn, mìkii koma. Nainá, xita kixi-né, nas'ín xita ndiso ngats'ii xita xi tjin isò'nde; koni s'ín tíchja xojon nga tsò:

Mé-ne nga kàta'ya-la nga kixi kjoa 'én xi nokjoi sikijne-né k'e nga yá xi kohòngui-lè.

5 Tjin i'nga xita xi tsò: K'e nga ch'o 'nè, isaá ndaà 'ya-la kjoakixi-la Nainá. Tsà k'oa s'ín tjin, ¿kó kixoán? ¿A kixón-ná nga mì kjoa kixi tís'ín Nainá nga kjo'in tsjá-ná? (Tsà kos'ín kixoán, jngò kjohítsjeèn-la xi taxki xita títanikjeén.)

6 Tanga majìn, mì k'oaá s'ín tjin. Tsà mìtsà kixi s'ín Nainá nga kjo'in tsjá-ná, ¿kós'ín koma koìindaàjiin-la xita isò'nde?

7 Tikoáá tsà k'oa kítso xita koi: “Tanga tsà kjoandiso-na okó nga jè kjoa kixi-la Nainá isa jeya kína, ¿mé-ne k'oa s'ín tisinè-na nga xita jé tíyatakòn-na?”

8 Tikoáá-ne ch'o s'eén mé-ne nga kátasakó-isa-ná kjondaà-la Nainá. Tjin xita xi kòtsò nga k'oaá tjin 'én xi okoòya; jè xi mejèn-la nga ch'o síkíjna-na. Jña xita xi kòtsò, ok'ín-la nga tjoé-la kjo'in xi Nainá tsjá.

Mé jé xi tjin-la ngats'ii xita

⁹ ¿Kó s'ín nìkítsjeèn? Jñá xi x̄it̄a judío 'mì-ná, ¿a ìsaá ndaà x̄it̄aá koni jñà x̄it̄a xi k̄j'eíí? Majìn, jyeé k'oaá kixan-nò, tà ngàsòn jé tìtsajnajñáá ngats'iaá xi x̄it̄a judío 'mì-ná kò xi taxkì x̄it̄a.

¹⁰ Koni s'ín tìchj̄a Xojon-l̄a Nainá nga tsò:
Nijngòò x̄it̄a t̄jín xi x̄it̄a kixì, n̄i tsà tà jngòò.

¹¹ Nijngòò t̄jín xi machīya-l̄a,
nijngòò t̄jín xi ótsji Nainá.

¹² Ngats'ìi x̄it̄a, saá xìn ndiyá kù; ngats'ìi nìmée chj̄i-l̄a kjoa xi s'ín;
nijngòò xi ndaà s'ín, n̄i tsà tà jngòò.

¹³ Naxájta-l̄a, k'oaá kjoàn koni ngajo-l̄a mik'en k'e nga táx'ajto;
nijen-l̄a ngui 'én ndisoó chj̄a;

'én xi chj̄a, k'oaá ngaya-l̄a koni tsà xán-l̄a ye.

¹⁴ Chjajno-l̄a x̄it̄a kò ngui koi 'én chj̄a xi 'on ma-l̄a inima-ná.

¹⁵ Mikìi koña kjoa, n̄itoón sík'en x̄it̄a.

¹⁶ N̄it̄a ñánda nga fì, síhima kò síkjesko x̄it̄a xi k̄j'eíí.

¹⁷ Mikìi beèkxon ndiyá ñánda t̄jín kjoa'nchán.

¹⁸ Mikìi tsakjón-keè Nainá ìt'aà ts'e kjoa xi s'ín.

¹⁹ Jyeé 'yaá nga ngats'ìi 'én xi t̄jít'aà k̄jot̄ixoma ts'e Moisés, jñá chj̄a-l̄a ngats'ìi x̄it̄a xi ya fit'aà-l̄a, mé-ne nga ngats'ìi x̄it̄a, mikìi koma kichj̄a nga kinchako yijo-l̄a nga nguixkxon Nainá; ngats'ìi x̄it̄a xi t̄jín isò'nde koiindaàjìn-l̄a Nainá nga jcha-l̄a nga jé t̄jín-l̄a.

²⁰ Nijngòò x̄it̄a xi kixì k̄jna nga nguixkxon Nainá tà koi kjoa-l̄a nga ndaà tìsíkitasòn K̄jot̄ixoma ts'e Moisés. Nga jé K̄jot̄ixoma, tà k'oaá s'ín mochjeén nga bénojmiya-ná nga jé t̄jín-ná.

Kó síko-ná Nainá nga kixì k̄itsajnaá nguixkxon jé

²¹ Tanga ì'ndeì, Nainá okó-ná kós'ín s'ín Nainá nga x̄it̄a kixì beètakòn-ná. Kò mìtsà kjoa ts'e K̄jot̄ixoma nga bitasòn. Jñá xojon jchínga ts'e k̄jot̄ixoma-l̄a Nainá kò ts'e x̄it̄a xi kiichj̄a ngajo-l̄a Nainá k'oaá t̄is'ín bénojmiya-ná,

²² nga jñà x̄it̄a k'e nga mokjeiín-l̄a ìt'aà ts'e Cristo, kixìi bìtsajna nguixkxon Nainá. K'oaá s'ín síko yije kóhot̄jín xi mokjeiín-l̄a. Nga ngats'ìi x̄it̄a ngàsòn jé t̄jín-l̄a,

²³ nga ngàsòn ótsji jé-né; k̄jìn tìtsajnat'aaxìn-l̄a Nainá ñánda nga jeya t̄jna.

²⁴ Tanga Nainá, nga ndaà x̄it̄a, kitsjaà k̄jot̄jò-ná k̄jondaà-l̄a mé-ne nga kixì k̄itsajnaá nguixkxon jé. Jé Jesucristo tsibíchj̄it̄jì ngajo-ná jé-ná mé-ne nga k̄itsajnandeìí-ná xi kjoa ts'e jé.

²⁵ Nainá kitsjaà ki'ndí-l̄a koni jngòò k̄jot̄jò xi faáxìn jé-ná nga nguixkxon Nainá k'e nga mokjeiín-ná ìt'aà ts'e Jesucristo, nga jé tsibíxteèn jnì-l̄a k'e nga k'en. Nainá k'oaá s'ín okóya-ná kós'ín t̄jín kjoakixì-l̄a. Koií kjoa-l̄a nga ngasa k̄jot̄seé, Nainá, tíkoña kjoa-né, mikìi n̄iton kitsjaà-l̄a k̄jò'in x̄it̄a koni s'ín ok'in-l̄a jé xi tsohótsji.

²⁶ Tanga ì'ndeì tí'ya-l̄a nga ìt'aà ts'e Jesucristo tìsindaàjìn-l̄a x̄it̄a jñà kjoa-l̄a jé xi kisichroba mé-ne nga kàta'ya-l̄a Nainá nga x̄it̄a kixì-né kò t̄ikoáá t̄jè-ne Nainá xi kixì síkìtsajna x̄it̄a xi mokjeiín-l̄a ìt'aà ts'e Jesús.

²⁷ ¿A 'ngaá koma takoán nga kixì tìtsajnaá nguixkxon Nainá? Majìn, mikìi 'nga koma takoán. Nga mìtsà koi kjoa-l̄a nga k̄jot̄ixoma nìkitasoán. Jé-né nga mokjeiín-ná ìt'aà ts'e Jesús nga kixì síkìtsajna-ná Nainá.

²⁸ K'oaá tsòya-ne ngats'ìi kjoa koi nga Nainá síkixì x̄it̄a k'e nga mokjeiín-l̄a ìt'aà ts'e Jesús; mìtsà koi nga k̄jot̄ixoma ts'e Moisés síkitasòn.

²⁹ ¿A tà ts'eé xi x̄it̄a judío Nainá? ¿A mìtsà t̄ikoá ts'e xi taxkì x̄it̄a? Kjoa kixì-né, t̄ikoáá ts'e-né xi taxkì x̄it̄a xi mìtsà x̄it̄a judío.

³⁰ Nainá, tà jngoò ma xi kixi síkítsajna ngats'ìi xita k'e nga mokjeiín-la it'aà ts'e Jesús. Ngàsòn síko jñà xita judío xi tjit'aà chiba-la ko xi taxki xita xi mikii tjit'aà chiba-la.

³¹ Jè kjoa nga mokjeiín-ná it'aà ts'e Jesucristo, ¿a tíchahingui-né kjoa ts'e Kjotíxoma? Majìn, mìtsà tíchahingui; ta saá tímajngoò-ne koni jè xá xi tjin-la.

4

Abraham, mé-ne kixi tsibijna-ne nga nguixkon Nainá

¹ ¿Kó kixoán? ¿Mé kjoa kixi xi kisakò-la na'èn-jchá-kjìin-ná Abraham nga kixi tsibijna nguixkon Nainá?

² Na'èn-jchá-ná Abraham, tsà koií-la kjoa-la nga ndaà xá xi kis'iin nga kixi tsibijna nguixkon Nainá, ok'in-la nga jeya sùikíjna yijo-la, tanga majìn nga nguixkon Nainá.

³ Nga k'oaá s'in tíchja Xojon jchínga-la Nainá nga tsò: “Abraham, jè-né nga kòkjeiín-la it'aà ts'e Nainá; k'oaá ma-ne nga kiskoétjò Nainá nga xita kixi kitsò-la.”

⁴ Jngoò xita xi síxá, jè ton xi tjoé-la, mìtsà tà kjotjò tjoé-la; jè chjí-la nga síxá.

⁵ Tanga jè xita xi mìtsà xá-la ma'nó't'aà takòn, tanga mokjeiín-la it'aà ts'e Nainá xi kixi síkítsajna xita xi jé tjin-la, xita jè, Nainá k'oaá s'in skoétjò nga xita kixi tsò-la.

⁶ Jè xitaxá ítjòn xi ki'mì David k'oaá tis'in kiìchja nga tsja s'e-la xita xi Nainá kjoétjò nga xita kixi tsò-la; Nainá mì tì kindá s'in-ne nita mé xi s'in.

⁷ David kitsò:
Mé tà ndaà-la jñà xita xi jye kichàat'aà-la kjoa ch'o-la
ko xi jye tjt'sa'ma jé-la.

⁸ Mé ta ndaà-la jñà xita xi mì tì kindá s'in-ne Nainá kjoa ts'e jé-la.

⁹ Jè kjondaà jè, ¿a tà ts'eé xita judío xi tjit'aà chiba-la? ¿A xi tikoáá ts'e-né xi taxki xita xi mikii tjit'aà chiba-la? Jye okixan nga jè xita jchínga Abraham, k'e nga kòkjeiín-la it'aà ts'e Nainá, kiskoétjò-né nga xita kixi kitsò-la.

¹⁰ ¿Kós'in komà nga kiskoétjò Nainá Abraham nga xita kixi kitsò-la? ¿A k'e-né nga jye tjit'aà chiba-la? ¿A xi k'e-né nga tikj'eè tjit'aà chiba-la? Majìn, k'e-né nga tikj'eè tjit'aà chiba-la.

¹¹ Abraham, k'e nga jye kiskoétjò Nainá nga xita kixi kitsò-la, iskaán kisit'aà chiba-la koni jngoò chiba xi okó nga jye xita kixi nga kòkjeiín-la it'aà ts'e Nainá k'e nga tikj'eè tjit'aà chiba-la. K'oaá komà-ne nga xita jchínga kitsò-la Abraham ngats'ìi xita xi mokjeiín-la it'aà ts'e Nainá nas'in mikii tjit'aà chiba-la.

¹² Abraham, tikoáá xita jchínga-la-né jñà xita judío xi tjit'aà chiba-la, tanga mìtsà tà koií kjoa-la nga tjit'aà chiba-la, tikoáá koi-né nga ya tjímatjingui-la nga mokjeiín-la it'aà ts'e Nainá, koni s'in kòkjeiín-la Abraham k'e nga tikj'eè tjit'aà chiba-la.

¹³ Nainá, k'oaá s'in kitsjaà-la tso'ba Abraham ko ngats'ìi xita tje-la, nga jè kongatsja isò'nde; mìtsà koi kjoa-la nga Kjotíxoma kisikitasòn, jè-né nga kòkjeiín-la koni s'in kiìchja Nainá, k'oaá ma-ne nga xita kixi kitsò-la.

¹⁴ Tsà tà jñà tjoé-la kjondaà xita xi síkitasòn Kjotíxoma, tsà k'oaá s'in tjin kjoa, nimé-là chjí-la nga mokjeiín-ná it'aà ts'e Nainá; tikoáá mì-là kiì kítasòn koni s'in kitsjaà tso'ba Nainá.

¹⁵ K'e nga tjin Kjotíxoma, kjo'iín sinè-ná; tanga tsà tsjìn kjotíxoma, nimé tjin xi kotonè-la kjotíxoma.

¹⁶ Jñà xita, nga mokjeiín-la it'aà ts'e Nainá tjoé-la kjondaà koni s'in kitsjaà-la tso'ba Nainá jè Abram. Nainá tsjá kjotjò kjondaà koi mé-ne nga jcha-ná nga

kixi kjoa nga kitasòn it'aà ts'e ngats'iì tje-la Abraham. Mitsà tà jñà tjoé-la xita judío xi tje-la Abraham nga tjín-la kjotíxoma; tikoáá tjoé-la jñà xita xi mitsà xita judío xi tikoáá tje-la Abraham ma koií kjoa-la nga mokjeiín-la koni s'ín kòkjeiín-la Abraham. K'oaá ma-ne nga jè Abraham, xita jchínga-ná ma ngats'iaá

¹⁷ nga nguixkon Nainá. Koni s'ín tíchja Xojon-la Nainá nga tsò: “Kjìn naxandá xita xi jye kisìngatsja-lè xi xita jchínga tsò-lè.” Abraham, kòkjeiín-la it'aà ts'e Nainá xi ma-la síkjaáya-la xita xi jye k'en xi tikoá tsjá 'én-la koni tsà jye tsitasòn kjoa xi kj'eè bitasòn.

¹⁸ Xita jchínga Abraham kòkjeiín-la koni kitsò-la Nainá; kiskoñá kjoa-né nas'ín mìkiì tíjìn-la kós'ín koma nga kitasòn. K'oaá s'ín komà nga kjìn naxandá xi xita jchínga tsò-la, koni s'ín kitsjaà-la tso'ba Nainá nga kitsò-la: “K'oaá s'ín kjìn jchán koma tje-lè.”

¹⁹ Abraham, mìkiì kjòhindaà koni s'ín kòkjeiín-la it'aà ts'e Nainá, nas'ín kos'ín beè-la ikon nga mì tì mé chjí-la yijo-la nga jye 'ñó xita jchínga; jyeé kjomeè jngoò sìndò nó tjín-la; Sara xi chjoón-la, tikoáá chjoón 'ndi-né; mì tì kiì koma s'e-la ixti.

²⁰ Abraham, mitsà jò tsi'beé-la ikon koni s'ín mokjeiín-la 'én xi kitsjaà-la Nainá. Tà isaá 'ñó tsi'beé-la ikon nga ndaà kòkjeiín-la. 'Ñó jeya kisikíjna Nainá.

²¹ Abraham, nguì ndaà tíjngoò ikon nga Nainá tjín-la nga'ñó nga komaá-la síkitasòn yije kóhotjín kjoa koni s'ín kitsjaà-la tso'ba.

²² K'oaá ma-ne Nainá, k'e nga kijtsee nga ndaà mokjeiín-la Abraham, kiskoétjò nga xita kixi kitsò-la.

²³ Mitsà tà it'aà ts'e Abraham kitjei xojon jè nga Nainá kiskoétjò nga xita kixi tsò-la.

²⁴ Tikoáá it'aà tsaján kitjei nga Nainá skoétjò-ná nga ngásòn xita kixi kitso-ná koi kjoa-la nga mokjeiín-ná it'aà ts'e Nainá, jè xi kisikjaáya-la Na'èn-ná Jesucristo it'aà ts'e kjoabiyaá.

²⁵ Kjòngatsja xita nga kisik'en Jesús jè ngatjì-la jé-ná; tikoáá jaáya-la mé-ne nga kixi kitsajnaá nguixkon Nainá.

5

Mé kjondaà xi sakó-ná nga jye xita kixi tsò-ná Nainá

¹ K'e nga jye xita kixi 'mì-ná nga mokjeiín-ná it'aà ts'e Nainá, jyeé 'nchán titsajnaakoá Nainá it'aà ts'e Na'èn-ná Jesucristo.

² Jè Cristo tsjá-ná nga s'e-ná kjondaà jè, nga mokjeiín-ná it'aà ts'e. Jè kjondaà jè, 'ñó ndaà tíjìn iníma-ná; matsjaá-la iníma-ná nga chiña kjoá nga tikoá s'e-ná kjoajeya-la Nainá.

³ Mitsà tà koi kjoa nga matsja-ná, tikoáá matsja-ná k'e nga mé kjo'in xi otojñaá. K'e nga kjo'in otojñaá, yaá sakó-ná nga'ñó nga tseejta s'eén iníma-ná.

⁴ K'e nga tseejta s'eén iníma-ná, yaá sakó-ná nga ndaà kitjoáá; tsà nga ndaà kitjoáá, tikoáá yaá sakó-ná nga skóña kjoa iníma-ná kjondaà xi tsjá Nainá.

⁵ Jè kjoa xi chiña-lá nga tíjngoò takoán, mìkiì masobà-ná nga mìkiì kitasòn; jè Nainá jyeé ndaà kisikíjnajìn iníma-ná kjotjòcha-la it'aà ts'e Iníma Tsjeè-la Nainá xi kitsjaà-ná.

⁶ K'e nga kichóya nachrjein, Cristo, k'en ngajo-ná jñá xi xita jé 'mì-ná, koií kjoa-la nga tsjìn-ná nga'ñó nga ma bitjokàjñaá jé-ná.

⁷ Mì-lá yá xita tjín xi kiyátjì ngajo-la jngoò xita kixi, tanga tsà koi nachrjein-la tsà tjín jngoò xi kò'ñó ikon nga kiyátjì ngajo-la jngoò xi 'ñó ndaà xita.

⁸ Tanga jè Nainá okó-ná nga 'ñó tsjakeè-ná nga jè Cristo k'en ngajo-ná, k'e nga tákó x̄ita jé 'mì-ná.

⁹ I'ndeḡ nga jye x̄ita kixi tsò-ná Nainá nga jè Cristo tsibíxteèn jní-la k'e nga k'en ngajo-ná, ìsaá 'ñó tìkixi kjoa nga ìt'aà ts'e Cristo k̄itjokàjñaá kjo'in jè nachrjein k'e nga s̄ikasén kjoḡti-la Nainá.

¹⁰ K'e nga kondra tìtsajna-lá Nainá, jè Ki'ndí-la kisikijne 'nchán kjoa k'e nga k'en. I'ndeḡ, k'e nga jye ndaà chibà-ná, ìsaá 'ñó t̄jìkixi kjoa nga k̄itjokàjñaá kjo'in ìt'aà ts'e Cristo nga jè t̄jìnakon-né.

¹¹ Mitsà tà jña kjoa koi, t̄ikoáá 'ñó matsja-ná ìt'aà ts'e Nainá koni s'ín kisìko-ná ìt'aà ts'e Na'èn-ná Jesucristo nga ìt'aà ts'e Cristo 'nchán tìtsajna kjoá Nainá nga jye kichibàndaà-aná.

¹² K'e nga jahas'en jé isò'nde, jngòò x̄ita xi ki'mì Adán tsohótsji jé, ìkjoàn k'en; k'oaá s'ín komà nga k̄jòts'ia nga biyaà yije kóhòtjín x̄ita, koi kjoa-la nga jé ótsji yije kóhòtjín.

¹³ K'e nga t̄ikj'eè tjoé-la Kjotíxoma Moisés, x̄ita xi t̄jín isò'nde jyeé t̄jín yije-la jé. Tanga mìkiì ma kindà jé-la k'e nga tsjín kjotíxoma.

¹⁴ Tjen-ne nachrjein ts'e Adán skanda ts'e Moisés, t̄jínè-la nga kiyá yije x̄ita kóhòtjín nas'ín mì k'oaá t̄jín jé xi tsohótsji koni kis'ìin Adán nga kisìkatonè-la okixi xi kitsjaà-la Nainá. Adán, jè ngaya-la [Cristo] xi iskan j'ì.

¹⁵ Tanga jé xi tsohótsji Adán, mìkiì mangásòn koni jè kjondaà xi Nainá tsjá; nga tà jè ngat̄jì-la jé xi tsohótsji xi tà jngòò x̄ita, k'oaá ma-ne nga kjìn x̄ita biyaà; tanga ìsaá 'ñó tse kjondaà t̄jín-la Nainá nga kjìn x̄ita machikon-t'ín kjotjò xi tsjá Nainá ìt'aà ts'e xi tà jngòò x̄ita xi 'mì Jesucristo.

¹⁶ Jé xi tsohótsji xi tà jngòò x̄ita, mìkiì mangásòn koni jè kjondaà xi Nainá tsjá. K'e nga kisakò jé itjòn, Nainá kitsjaà okixi nga tsibínè-la kjo'in ngats'ì x̄ita. Tanga k'e nga jye kjìn jé tsohótsji x̄ita, j'ì kjondaà-la Nainá nga kixi k̄itsajna x̄ita nguixkòn Nainá.

¹⁷ Jè ngat̄jì-la jé-la xi tà jngòò x̄ita, t̄jínè-la nga kiyá x̄ita. Tanga i'ndeḡ, ìsaá 'ñó t̄jìkixi kjoa nga ìt'aà ts'e xi tà jngòò x̄ita xi 'mì Jesucristo, t̄jì'nde-la nga jeya k̄itsajnakon jña x̄ita xi 'ñó tse kjondaà-la Nainá kjoé, kò xi 'ñó tse kjotjò tjoé-la nga kixi k̄itsajna nguixkòn Nainá.

¹⁸ Jè kjoa-la jé xi tsohótsji xi tà jngòò x̄ita kisinè-la kjo'in ngats'ì x̄ita, tanga jè kjoa kixi xi kis'ìin Jesucristo t̄ikoáá kixi kisìk̄itsajna ngats'ì x̄ita nga k̄itsajnakon nguixkòn Nainá.

¹⁹ Jè kjoa-la nga mìkiì k̄iì'nchréñijon-la Nainá xi tà jngòò x̄ita xi 'mì Adán, k'oaá ma-ne nga kjìn x̄ita kisakò jé-la. Tanga jè kjoa-la nga k̄iì'nchréñijon-la Nainá xi tà jngòò x̄ita xi 'mì Jesucristo, kjìn x̄ita xi kixi k̄itsajna nga nguixkòn Nainá.

²⁰ J'ì Kjotíxoma-la Moisés mé-ne nga ndaà ki'ya-la nga ìsa 'ñó ìsa 'ñó t̄is'e jé; tanga k'e nga ìsa tse jé t̄isakò, ìsaá 'ñó tse kjondaà-la Nainá j'ì.

²¹ Nga sa itjòn, jè kjoa ts'e jé tsatíxoma-la x̄ita, mé-ne nga kisakò-la kjoabiyaà x̄ita; tanga i'ndeḡ, k'oaá t̄is'ín k̄atátíxoma kjondaà-la Nainá k'e nga kixi sík̄itsajna x̄ita nga nguixkòn Nainá mé-ne nga s'e-la kjoabinachon n̄ita mé nachrjein-ne xi ìt'aà ts'e Na'èn-ná Jesucristo.

6

Mé-ne nga jè kjoa ts'e jé, mì t̄jì mé nga 'ñó t̄jín-la nga jè kjotíxoma-ná

¹ ¿Kó kixoán? ¿A ndaà t̄jín nga k̄inchátsji-jé-ìsa mé-ne nga ìsa tse kjondaà tsjá-ne Nainá?

² Majìn, mì k̄iì t̄jì k'oa s'en-ná. Jyeé t̄itsajnat'aàxìn-lá kjoa ts'e jé koni tsà jye k'eén xi ìt'aà ts'e; mì t̄jì k̄iì koma ya k̄itsajnajìin-ìsaá kjoa ts'e jé.

³ ¿A mìtsà jye tíjìn-nò k'e nga komà bautizar it'aà ts'e Cristo ngats'iaá nga tikoá ya títakjoòkoá k'e nga k'en?

⁴ K'e nga ma bautizar xita, k'oaá s'ín ngaya-la koni tsà ya sihiin-t'aà-la Cristo k'e nga k'en. Koni s'ín jaáya-la Cristo it'aà ts'e nga'ño-la Nainá xi 'ño jeya tíjna, k'oaá tís'ín mochjeén nga kos'ín sijchá yijo-ná nga kijnakon xitse ijngò k'aá.

⁵ Koni s'ín títakjoòkoá Cristo k'e nga k'en, jña k'oaá tís'ín kjoáya-ná koni s'ín jaáya-la jè.

⁶ Tíjìn-ná nga jè kjoá jchinga-ná koni s'ín ki'né nga isa kjòtseé, yaá kisit'aà krò-la Cristo mé-ne nga kàtachija-ne nga'ño-la yijo jé-ná nga mì tì jè kjotixoma-isa-ná.

⁷ Jngò xita xi jye k'en, jyeé tíjñandei kjoá ts'e jé.

⁸ Nga ya k'en-koá Cristo, mokjeín-ná nga tikoá ya kitsajna koá.

⁹ Ya-ná k'e nga jaáya-la Cristo k'e nga k'en, nì tì jngò nachrjein kiyá ijngò k'a-ne. Mì tì mé nga'ño tíjìn-la kjoabiyaà nga jè kotixoma-la.

¹⁰ K'e nga k'en Cristo, jngò k'a k'en xi kjoá ts'e jé-ná; i'nde jè nga ijngò k'a tíjnakon-né koi kjoá tíjnakon-ne nga jeya síkijna Nainá.

¹¹ Jño, k'oaá tís'ín tikitsjeén koni tsà jye k'eèn xi kjoá ts'e jé; títajnakon-nò xi kjoá ts'e Nainá nga ya títajnakoo Na'èn-ná Jesucristo.

¹² Koi kjoá-la, mì tì kii biì'nde-la yijo jé-nò nga jè kjoá ts'e jé kotixoma-nò k'e nga kjo'ño s'ín-nò nga nìkitasòn-la kjoá xi ch'o tíjìn xi síjé yijo-nò.

¹³ Kì ya ñingatsja yijo-nò kjoá ts'e jé nga jè jé síkjeén nga ch'o 'nè, ta saá jè Nainá tìngatsja yijo-nò koni jngò xita xi jye jaáya-la it'aà ts'e kjoabiyaà. Nainá tìngatsja yijo-nò nga kàtasíkjeén kjoá xi kixi tíjìn.

¹⁴ Kjoá ts'e jé, mì tì mé nga'ño tíjìn-la nga jè kotixoma-nò nga mìtsà kjoá ts'e kjotixoma-la Moisés títajnajño; kjondaà-la Nainá títajnajño.

¹⁵ ¿Kó bixoán? ¿A ndaà tíjìn nga kinchátsji jé isaá nga kjondaà-la Nainá títajnajñaá nga mìtsà kjoá ts'e kjotixoma títajnajñaá? Majìn, mìkii ndaà tíjìn.

¹⁶ Ndaà tíjìn-nò tsà ya ñingatsja yijo-nò ts'e xita xi bitje chi'nda nga jè nìkitasòn-la, chi'nda-la komaà ts'e xita jè. Kjo'ño tíjìn-ne nga jè síkitasòn-la. K'oaá s'ín tíjìn, tsà chi'nda-la jé komaà nga jè síkitasòn-la, kiyá-nò; tanga tsà chi'nda-la Nainá komaà nga jè síkitasòn-la, kixi kitsajnaà nguixkon jè.

¹⁷ Jño, nga isa kjòtseé, k'oaá s'ín kinìkitasòn-la kjoá ts'e jé koni tsà jngò chi'nda, tanga i'nde jè, ndaà hjí-la Nainá nga kò inima-nò ndaà nìkitasòn koni s'ín nguì ndaà tíjìn 'én kixi xi kis'enojmí-nò.

¹⁸ I'nde jyeé títajñandei-la kjoá ts'e jé; chi'nda ts'e kjoakixi-nò; tíjìnè-nò nga síkitasòn koni s'ín síjé kjoakixi.

¹⁹ Koi 'én tìchjàkò-nò xi mìtsà 'in chja koi kjoá-la nga indaà tíjìn takòn; mìkii ndaà machiya-nò kjoá ts'e Nainá. Koni s'ín ki'nè nga isa kjòtseé nga ya ñingatsja yijo-nò it'aà ts'e ngats'ii kjoach'o xi tíjìn nga jè tsatixoma-nò koni xita chi'nda; i'nde jè k'oaá tís'ín tìngatsja yijo-nò it'aà ts'e kjoá kixi mé-ne jè kjoá kixi kàtatixoma-nò koni chi'nda xi tsjeé títajna nga nguixkon Nainá.

²⁰ K'e nga kjoá ts'e chi'nda-la jé títajnajño, mìkii títanìkitasòn-la kjoakixi-la Nainá.

²¹ Tanga, ¿mé xi kisakò-nò kjoá ts'e jé? I'nde jè tà masobà-nò kjoá koi; tà yaá fiko-ná ñánda tíjìn kjoabiyaà.

²² I'nde jè nga jye títajñandei-la xi kjoá ts'e jé, chi'nda-la Nainá ma; kjondaà xi sakò-nò jè-né nga tsjeé títajnaà nga nguixkon Nainá. Xi fehet'aà-ne, s'e-nò kjoabinachon nita mé nachrjein-ne.

23 Chjí xi t́jín-la kjoa ts'e jé, kjoabiyaà-né. Tanga kjotjò xi tsjá Nainá, kjoabinachon-né nítá mé nàchrjein-ne nga ya títajnakoaá Cristo Jesús xi Na'èn-ná ma.

7

Kó s'ín ma fehet'aà nga'ño-la jè kjotíxoma

1 Jñò, xi 'ndseé chibà, tìchjàko-nò xi jyeé tíjìn-nò kós'ín tíchjà kjotíxoma; 'ya-nò nga t́jín-la nga'ño jè kjotíxoma kós'ín otíxoma-la xítá k'e nga títajnakon-isa skanda k'e nga kiyá.

2 K'oaá ngaya-la jngoò chjoón xi t́jín-la x'in, k'oaá tsò kjotíxoma nga mìkì koma tsjín xíkín k'e nga tákó títajnakon ingajò. Tanga tsà jè x'in kiyá, jè chjoón, jye tíjnandeí it'aà ts'e kjotíxoma xi ts'e kjoabixan.

3 Jè chjoón, k'e nga tsà tákó tíjnakon x'in-la, tsà kj'eí x'in kixan-ko, kjoa chijnguí tís'in; tanga tsà jye k'en x'in-la, jè chjoón, jyeé tíjnandeí xi kjoa ts'e kjotíxoma jè; komaá kixan-ko jngoò k'a-ne xi kj'eí x'in. Mì tì kjoa chijnguí tís'in-ne.

4 Jñò ndí 'ndsè, k'e nga k'en-kjoòkòò Cristo, yaá k'en it'aà ts'e nga'ño-la kjotíxoma, mé-ne nga ya kìnókjoa-nò it'aà ts'e Cristo xi jye jaáya-la ts'e kjoabiyaà nga k'oas'ín kàta'ya-la it'aà tsaján jè kjondaà xi sasén-la Nainá.

5 K'e nga tisa ya tjaajñaá kjoa xi t́jín isò'nde, jè kjotíxoma tsibít'in-ná mé-ne nga jña kjoa ch'o xi síjé yijo-ná, isa 'ño ch'o kisixájin yijo-ná; k'oaá komà-ne nga kisakò-ná kjoabiyaà.

6 Tanga i'ndeí jyeé títajnandeí-lá kjoa ts'e kjotíxoma. Jyeé k'eén it'aà ts'e kjoa xi bít'aà'ño-ná, mé-ne nga koma sixá-lá Nainá xi kjoa xitse koni s'ín okóya-ná Inima Tsjeè-la Nainá. Mitsà k'oas'ín sixá-lá koni s'ín t́jín kjoa jchínga xi tít'aà xojon.

7 ¿Kó kixoán xi kjoa ts'e kjotíxoma? ¿A ch'o t́jín? ¿A kjoa ts'e jé-né? Majìn, ndaà t́jín. Tanga 'an, tsà mìkì kítseèxkoan kjoa ts'e kjotíxoma, tikoáá mì-là kù kítseè kjoa ts'e jé. Mì-là kù kisijìn-na nga mìkì ndaà t́jín nga 'an fahajìn-na tsojmì xi mìtsà ts'an, tsà jè kjotíxoma mì k'oaá s'ín bénojmí nga tsò: “Kì jì nìkjaàjin tsojmì xi mìtsà tsjì.”

8 Kjoa ts'e jé, yaá kisakò-la nga'ño it'aà ts'e kjotíxoma; k'oaá komà-ne nga isa 'ño jahajìn-na tsojmì xi mìtsà ts'an. Tanga tsà tsjìn kjotíxoma, tsjìn-la nga'ño kjoa ts'e jé.

9 K'e nga sa kjòtseé, kj'eè kù bexkoan kjotíxoma. Tanga k'e nga kítseèxkoan kjotíxoma, kjoa ts'e jé, isaá ndaà kis'e-la nga'ño; kjoabiyaà kisakò-na.

10 Kjoa ts'e kjotíxoma, t́jìnè-la nga kjoabinachon tsjá-na, tanga tà saá kjoa biyaà kitsjaà-na.

11 Kjoa ts'e jé, yaá kisakò-la nga'ño it'aà ts'e kjotíxoma nga kiskoònachan-na, k'oa kisik'en-na.

12 K'oaá s'ín t́jín nga jè Kjotíxoma, tsjeè-né; koni s'ín otíxoma jña 'én xi tít'aà, tsjeè-né, kixì-né, koa ndaà-né.

13 ¿Kó bixón? ¿A jè kjoa ts'e kjotíxoma xi ndaà t́jín xi kisik'en-na? Majìn, mìtsà koi kjoa-la. Kjoa ts'e jé-né. K'oaá s'ín ki'ya-la nga kixì kjoa nga jé-né. It'aà ts'e kjotíxoma xi ndaà t́jín, jè kjoa ts'e jé kisakò-la nga'ño nga kisik'en-na, mé-ne nga ki'ya-la it'aà ts'e kjotíxoma nga 'ño ch'o t́jín xi kjoa ts'e jé.

Kó tsò xítá xi otíxoma-la kjoa ts'e jé

14 Kjoa ts'e kjotíxoma, 'ya-ná nga kjohítsjeèn ts'e Inima Tsjeè-la Nainá; tanga 'an, yijo jé tsohoya; yijo-na yaá kjòngatsja kjoa ts'e jé nga jè otíxoma-na.

15 Mìkì fiya-na mé kjoa xi s'iaàn. Kjoa xi ndaà t́jín xi mejèn-na nga s'iaàn mìkì koa s'iaàn. Tà saá jña kjoa xi mìkì sasén-na sikitasoàn.

16 K'e nga k'oa s'iaàn jñà kjoa xi mìkiì mejèn-na, k'oaá xan nga tjíkixi kjoa nga ndaà tjin koni s'ín tichja kjotíxoma.

17 K'e nga k'oa s'iaàn nga otsjià jé, mìtsà 'an xi k'oa s'iaàn, jè kjoa ts'e jé xi tíjìn-na bí't'in-na.

18 'An xi xita isò'nde 'mì-na, be-ná nga mìkiì ndaà tjin kjoa xi tíjìn yijo-na. Mejèn-na nga ndaà s'iaàn, tanga mìkiì sakó-na kó s'ín s'iaàn kjoa xi ndaà tjin.

19 K'e nga mejèn-na ndaà s'iaàn, mìkiì sikitasoàn; tà saá koi sikitasoàn kjoa xi ch'o tjin xi majìn-na nga koa s'iaàn.

20 K'e nga k'oas'ín sikitasoàn kjoa xi ch'o tjin xi majìn-na nga koa s'iaàn, mìtsà 'an xi k'oa s'iaàn, jè kjoa ts'e jé xi tíjnajìn-na xi k'oas'ín.

21 Jngoò kjoa matsji-na nas'ín mejèn-na nga ndaà s'iaàn, tà saá tà koi sakó-na kjoa xi ch'o tjin.

22 Xi jjiìn inima-na matsja-na it'aà ts'e Kjoatíxoma-la Nainá.

23 Tanga tjin lingoò kjoa xi tíxájin yijo-na xi mìkiì tsjá'nde-na nga ndaà s'iaàn; jè kjoa ts'e jé kjaán-kjoò kjohítsjeèn-na xi mejèn-la nga ndaà s'iaàn. Kjoa ts'e jé xi tíxájin yijo-na síkijne-na nga ch'o s'iaàn.

24 Ima xó-na 'an; zyá xi síkijnandeí-na it'aà ts'e yijo jé-na xi kjoabiyaà tjin-la?

25 Ndaà chjí-la Nainá nga it'aà ts'e Na'èn-ná Jesucristo síkijnandeí-ná kjoa ts'e jé.

Nga jñà 'én xi kotixan-nò nga 'an, ya jjiìn kjohítsjeèn-na mejèn-na sikitasoàn kjotíxoma-la Nainá, tanga ya jjiìn yijo jé-na, tà saá kjoa ts'e jé sikitasoàn.

8

Mé kjondaà xi sakó-ná k'e nga k'oas'ín titsanjchá yijo-ná koni s'ín mejèn-la Inima Tsjeè-la Nainá

1 Tanga i'nde, jñà xita xi ya títsajnakjoòko Cristo, mì tì mé kjo'in sinè-la, jñà xita xi mì k'oaá s'ín nchisíjchá yijo-la koni tjin jé xi síjé yijo-la; tà saá k'oaá s'ín nchisíjchá yijo-la koni s'ín mejèn-la Inima Tsjeè-la Nainá.

2 Jè nga'ño-la Inima Tsjeè-la Nainá xi síkítsajnakon-ná nga ya títsajnakjoòkoaá Cristo; ko tíjè-ne nga'ño xi kíkítsajnadeí-ná it'aà ts'e nga'ño-la kjoa ts'e jé ko it'aà ts'e kjoabiyaà.

3 Kjoatíxoma ts'e Moisés mìkiì kichikjoa-la nga síkítsajnadeí-ná it'aà ts'e jé, nga tsjin-la nga'ño, koi kjoa-la nga jè yijo-ná síjé jé xi tjin isò'nde. Tanga Nainá kichikjoaá-la nga kíkikasén Ki'ndí-la koni jngoò xi xita isò'nde xi yijo kis'e-la koni jñà xi xita jé 'mì-ná. Ki'ndí-la kitsjaà kjotjò yijo-la nga k'en xi kjoa ts'e jé-ná. Nainá k'oaá s'ín kis'iìn nga jngoò k'a kíkijehet'aà kjoa ts'e jé xi tjin-la yijo-ná.

4 Nainá k'oaá s'ín kis'iìn mé-ne nga it'aà tsaján kàtitasòn-ne jè kjoa kixi xi ts'e kjotíxoma, jñà xi mì k'oaá s'ín titsanjchá yijo-ná koni tjin jé xi síjé yijo-ná, nga k'oas'ín titsanjchá yijo-ná koni s'ín mejèn-la Inima Tsjeè-la Nainá.

5 Jñà xita xi k'oa s'ín koni tjin xi síjé yijo-la, k'oaá tjin kjoa xi nchisíkítsjeèn; tanga jñà xi k'oa s'ín koni s'ín tjin xi síjé Inima Tsjeè-la Nainá, k'oaá tjin kjoa xi nchisíkítsjeèn.

6 Jñà xita xi k'oas'ín nchisíkítsjeèn koni tjin xi mejèn-la yijo-la, kjoabiyaà tjin-la. Tanga jñà xita xi k'oas'ín nchisíkítsjeèn koni s'ín mejèn-la Inima Tsjeè-la Nainá, tjin-la kjoabinachon ko kjoa'nchán.

7 Xita xi tà koi kjoa nchisíkítsjeèn koni tjin kjoa ch'o xi síjé yijo-la, kondra ts'e Nainá-né koi kjoa-la nga mìkiì síkitasòn ko mìkiì chíkjoa-la nga síkitasòn kjotíxoma-la Nainá.

⁸ Jñà xita xi k'oas'ín s'ín koni tjin xi síjé yijo-la, mikiì ma-la s'ín koni s'ín sasén-la Nainá.

⁹ Tanga jñò, mì tì k'oaá 'nè-nò koni tjin xi síjé yijo-nò; k'oaá s'ín titsa'nè koni tjin xi síjé Inima Tsjeè-la Nainá, nga jè tijnajin inima tsajòn Inima Tsjeè-la Nainá. Jñà xita xi tsjin-la Inima Tsjeè-la Nainá xi kitsjaà Cristo, mìtsà xita ts'e Cristo.

¹⁰ Tanga tsà yaá tijnajin inima tsajòn Cristo, inima tsajòn tijnakon-né nga xita kixi 'mì-nò nga nguixkon Nainá, nas'ín k'oas'ín tjinè-la nga kiyá yijo-nò xi kjoa ts'e jé.

¹¹ Jè Nainá xi kisikjaáya-la Jesucristo it'aà ts'e kjoabiyaà, tsà ya tijnajin inima-nò jè Inima Tsjeè-la, k'oaá tis'ín sikkitsajnakon ijngoò k'a yijo-nò xi kjoa ts'e kjoabiyaà it'aà ts'e nga'ño-la Inima Tsjeè-la Nainá xi tijnajin inima tsajòn.

¹² K'oaá ma-ne, jñá xi 'ndseé chibá, tjna jngoò xi tjinè-ná nga sikitasòn-lá, tanga mìtsà jè yijo-ná sikitasòn-lá; mì tì kiì k'oas'ín s'en-ná koni tjin kjoa ch'o xi síjé yijo-ná.

¹³ Tsá tákó k'oaá s'ín s'een nga ya onguít'aà-la kjoa xi ch'o mejèn-la yijo-nò, kiyá-nò. Tanga tsà koj'nde-la Inima Tsjeè-la Nainá nga jngoò k'a sikkijne-la kjoa xi ch'o mejèn-la yijo-nò, kitsajnakon-nò.

¹⁴ Jñà xita xi jè Inima Tsjeè-la Nainá okó-la ndiyá, jñà-né xi ixti-la Nainá 'mì.

¹⁵ Jè Inima Tsjeè xi kitsjaà-nò Nainá mìtsà taxki inima ima xi kjo'ño s'ín-nò koni jngoò chi'nda xi ts'e jé nga ma-la bíxkón-nò; ta saá jè Inima xi kitsjaà-ná Nainá skoétjò-ná nga ixti-la komaá, tije-ne Inima Tsjeè-la Nainá benojmíya-ná nga ma nokjoà-lá Nainá nga Ndí Apa 'mì-lá.

¹⁶ Jè Inima Tsjeè-la Nainá tsjá kixi-la 'én inima tsaján nga ixti-la Nainá 'mì-ná.

¹⁷ K'e nga jye ixti-la maá, tikoáá tsaján-ná kjotjò-la Nainá xi jye k'oas'ín kitsjaà tso'ba nga tsjá-ná; tañaá tjoékjoò-ná ko Cristo nga tikoá ko jè titsanikjaán kjo'in mé-ne nga jeya kitsajnakò-ná Cristo.

¹⁸ 'An, k'oaá xan nga kixi kjoa, koni tjin kjo'in xi titsanikjaán i'ndeij mikiì mangásòn koni tjin kjoajeya-la Nainá xi s'e-ná k'e nga koma iskan.

¹⁹ Jñà tsojmì xi Nainá tsibíndaà, 'ño nchikoña kjoa nga mejèn-la skoe nachrjein k'e nga Nainá jngoò k'a ndaà kòkò kó kjoàn xi ixti-la ma.

²⁰ Jñà tsojmì xi tsibíndaà Nainá, jngoò k'a its'oòn-jin koni s'ín tjinè-la nga kochjeén nga sa ítjòn; mìtsà kjotsja ts'e isò'nde nga k'oas'ín komat'in; koi-né nga jè Nainá k'oaá s'ín kiskoòsòn-la; tanga i'ndeij jñà xi tsibíndaà Nainá nchikoñaá-la

²¹ nga kjoíi nachrjein k'e nga tikoá kitsajnandeij xi tsibíndaà Nainá nga mì tì kiì kits'ón-jin-ne; Nainá jeya sikkitsajnandeij ijngoò k'a-ne koni s'ín sikkò ixti-la.

²² 'Ya-ná ngats'ii xi Nainá tsibíndaà, skanda i'ndeij, nchitsiné-né, kjo'in nchisíkjein koni jngoò chjoón xi ki'ndí tí'beé.

²³ Mìtsà tà koi xi tjin isò'nde xi tsiné; tikoáá jñá xi jye tjin-ná Inima Tsjeè-la Nainá koni jngoò kjondaà xi tjen kitjoé ítjòn-ná, tikoáá tsiné-ná nga kjo'in titsanikjaán nga titsachiñá-lá nga 'ño mejèn-ná nga skoétjò-ná Nainá nga jngoò k'a ya kitsajnakoaá koni ixti-la maá; yijo-ná kijnandeij-ne it'aà ts'e kjoa xi síkits'ón-ná.

²⁴ Nga jye titsajnandiaá, i'ndeij jè titsachiñá-lá nga jngoò k'a kàtitasòn. Tanga tsà tsejèn tjna xi chiñá-lá mikiì ma chiñá-lá. ¿Yá xi koña-la xi tsejèn tjna?

²⁵ Tanga tsà jè chiña-lá xi mikiì tsejèn tjna, tafi tafi chiñakjoa-lá.

26 K'oaá t̄is'ín s'ín jè Inima Tsjeè-la Nainá k'e nga indaàjìin t̄jín inima-ná síchját'aà-ná. K'e nga mìkìl ma-ná kó s'ín s̄ijét'aà-lá Nainá k'e nga bìtsi'ba-lá, t̄ijè-ne Inima Tsjeè-la Nainá bìtsi'batjì-ná, n̄imé 'én xi tsejèn chja, n̄i ìtsé f̄iya-ná kó tsòya-ne.

27 Jè Nainá xi ma-la bíxkejiin inima-ná, t̄ijìin-la mé xi t̄ibítsjeèn-la jè Inima Tsjeè-la. K'e nga bìtsi'batjì x̄it̄a tsjeè-la Nainá k'oaá s'ín s̄ijét'aà-la koni s'ín mejèn-la Nainá.

Nimé xi koma kochrjet'aàxin-ná kjoatjòcha-la Nainá xi jye t̄jín-ná it'aà ts'e Cristo Jesús

28 T̄ijìin-ná nga it'aà ts'e j̄nà x̄it̄a xi t̄jòkèè beè Nainá, ngats'ìi kjoa xi mat'in, Nainá k'oaá s'ín síkjeén xi k̄jondaà ts'e x̄it̄a. K'oaá s'ín síko j̄nà x̄it̄a xi xó jè k̄ichja-la koni s'ín mejèn-la,

29 j̄nà x̄it̄a xi jye t̄ijìin-la nga t̄isa tàts'en-la kjoa nga ixti-la koma; t̄ikoaá k'oaá s'ín kiskoòsòn-la nga ngàsòn kjoàn koma koni kji Ki'ndí-la mé-ne nga jè Cristo Ki'ndítjòn koma koa k̄jìn koma x̄it̄a x̄ikjín xi 'ndse.

30 Nainá nga k'oas'ín kiskoòsòn-la it'aà ts'e x̄it̄a koi, t̄ikoaá xó k̄ichja-la, j̄nà xi xó k̄ichja-la t̄ikoaá kixi k̄isikítsajna, j̄nà xi kixi k̄isikítsajna t̄ikoaá jeya k̄isikítsajna.

31 ¿Mé xi kixoán it'aà ts'e kjoa koi? Nga Nainá t̄jnakò-ná, n̄ijngoò x̄it̄a kondra-ná s̄ilkijne-ná.

32 Nainá mìkìl 'on komà-la, nga kitsjaà k̄jotjò Ki'ndí-la it'aà tsaján ngats'iaá skanda kjoabiyaà. ¿A mìtsà t̄ikoa tsj̄a k̄jotjò-ná ngayije nga kò Cristo?

33 ¿Yá xi koma k̄ohòngui-ná j̄nà xi Nainá xó jaàjìin-ná? Mì yá xi koma k̄ohòngui-ná nga jè Nainá jye kixi k̄isikítsajna-ná.

34 ¿Yá xi koi'nè-ná kjo'in? Nga jè Cristo Jesús k'en ngajo-ná, t̄ikoa jaáya-la kjoa ts'e kjoabiyaà. Yáá t̄jna it'aà kixi-la Nainá nga t̄ibítsi'batjì-ná.

35 ¿Yá xi kochrjet'aàxin-ná kjoatjòcha-la Cristo? ¿A kjo'in-né? ¿O xi kjoaba-ne? ¿O xi jè-né nga ongatj̄ngui-ná x̄it̄a? ¿O xi kjoa ts'e k̄jinchra-ne? ¿O xi koií-né nga tsj̄in-ná nikje xi ch̄ikj̄á? ¿O xi jè kjoa xi xkón t̄jín? ¿O xi jè kjoa biyaà nga x̄it̄a sík'en-ná? Majìn, n̄imé kjoa-ne.

36 K'oaá s'ín t̄ichja Xojòn-la Nainá nga tsò:
Xi kjoa tsj̄i k̄jit'aà n̄achrjein t̄jín k̄joxkón nga k̄iyá-jen,
k'oaá s'ín t̄iyatakòn-najen koni orrè xi t̄jnandaà nga k̄iyá.

37 Tanga it'aà ts'e ngats'ìi kjoa koi, jye tsato titsan̄ikijne-lá xi it'aà ts'e Cristo xi k̄jòtsjakeè-ná.

38 K'oaá s'ín t̄jngoò takoán nga n̄ijngoò kjoa xi koma kochrjet'aàxin-ná xi kjoatjòcha-la Nainá, n̄i jè kjoa biyaà, n̄i kjoabinachon, n̄i àkjale, n̄i j̄nà nga'ñó xi t̄jín isò'nde n̄i j̄nà xi t̄jín j̄jìin isén, n̄i j̄nà kjoa xi t̄jín n̄achrjein j̄'nde, n̄i j̄nà kjoa xi koma n̄achrjein xi sa nchrobá,

39 n̄i jè xi is̄a 'nga, n̄i jè xi is̄a n̄anga, n̄it̄a mé tsojmì xi Nainá tsibíndaà, n̄imé xi koma kochrjet'aàxin-ná kjoatjòcha-la Nainá xi jye t̄jín-ná it'aà ts'e Cristo Jesús xi Na'èn-ná.

9

Mé-ne mìkìl ijchòtj̄ngui-la kjoa kixi-la Nainá j̄nà x̄it̄a Israel xi xó jaàjìin-ne

1 Okixií xi xan it'aà ts'e Cristo; mì 'én ndiso chj̄a; jè Inima Tsjeè-la Nainá síkichiya-la k̄johítsjeèn-na nga tsj̄á 'én it'aà ts'an,

2 nga k̄jit'aà n̄achrjein ba t̄jín-na koa 'on ma-la inima-na,

3 it'aà ts'e j̄nà x̄it̄a 'ndsè xi xinguiāa ma koi-né nga 'ñó matsjake. 'Ñó mejèn-na nga k̄atasakó-la k̄jondaà. Skanda komaá-là kósit'aàxin-la Cristo tsà

k'oas'ín sakò-là kjondaà jñà xità xinguiáa xi ts'e naxandá Israel, tanga mìkì tji'nde-na nga kos'ín s'iaàn.

⁴ Nga jñà xità Israel, jè Nainá kiskoétjò nga ixti-là ma, kò yaá ki'ya-là kjoajeya-là Nainá, kò kitjoé-là jñà kjoa xi tsibíndaàjìin-kò, tìkoa kitjoé-là kjotíxoma-là Moisés, kò kitjoé-là okixi kós'ín skoexkón Nainá, kò kitjoé-là 'én koni s'ín kitsjaà-là tso'ba Nainá.

⁵ Jñà xità Israel yaá inchrobàt'aà-ne ts'e xi 'ñó xità jchínga kjìin xi Nainá xó jaàjìin-ne. Jè Cristo [xi xó kisikasén-ne Nainá] nga xità isò'nde komà, yaá inchrobàt'aà-ne it'aà ts'e xità jchínga koi. Jè Cristo xi Nainá; jè otíxoma yiye-là kjoa; jeya kàtijna nità kjé-ne. K'oas'ín kàtama.

⁶ [Nga mìtsà mokjeiín-là ngats'iì xità Israel], mìtsà koi kjoa-là nga jè 'én-là Nainá mìkì bitasòn. Koi-né nga it'aà ts'e Nainá, mìtsà ngats'iì xità xi ya nchrobát'aà-ne tje-là Israel nga ngui kixi kjoa nga ya chja-ne.

⁷ Nas'ín ya tjen-là it'aà ts'e Abraham, mìtsà ngats'iì nga kitjoé-là kjondaà nga ixti-là ma. Nga k'oáá tsò Xojon-là Nainá: “Jñà xità tje-lè, yaá kjinchrobà-ne it'aà ts'e Isaac.”

⁸ Kjoa koi, k'oáá tsòya-ne, nga jñà ixti-là Nainá, mìtsà jè xi chjí-là yá ts'e tje xi nchrobát'aà-ne. Ta jñà-né xi ixti-là Nainá ma jñà xi jye k'oas'ín kitsjaà tso'ba Nainá nga ixti-là koma. Tà jñà-né xi k'oas'ín oxkit'aà nga kixi kjoa nga ngui tje-là Abraham ma.

⁹ Nga jè 'én xi Nainá kitsjaà-là tso'ba Abraham, k'oáá tsò: “Jè nó xi sa nchrobá kjoíí ijngòò k'a-na; jè Sara, ki'ndí s'e jngòò-là.”

¹⁰ Mìtsà ta jñà kjoa koi xi komà. Tìkoaá jè Rebeca kis'e-là ixti'ño xi ts'e Isaac, jè xi xità jchínga-ná ma.

¹¹ Nainá k'oáá s'ín kitsjaà tso'ba k'e nga tikj'eè ts'iin jñà ixti'ño nga tikj'eè kii 'ya-là mé kjoa xi s'iin, a jè xi ndaà tjín, o jè xi mìkì ndaà tjín. K'oáá s'ín kjòkixi nga Nainá tji'nde-là nga kjoaájìin xità koni s'ín jye tjíndaà-là nga kichja-là jñà xità xi jè mejèn-là. Mìtsà kindá s'ín mé xi jye kis'iin xità.

¹² Nainá k'oáá kitsò-là Rebeca: “Jè ti-lè xi jts'ín ítjòn, chìnda-lá koma jè xi iskan jts'ín.”

¹³ K'oáá s'ín tíchja Xojon-là Nainá nga tsò: “Jè Jacob kjòtsjakeè-ná, kò jè Esaú kòjtikeè-ná.”

¹⁴ ¿Mé xi kixoán? Nainá, ¿a mìtsà kjoa kixi xi s'ín? Majìn, mì k'oáá s'ín tjín.

¹⁵ Nainá k'oáá kitsò-là Moisés: “Kohimakeè-ná xi 'an mejèn-na nga kohimakeè, skoehima-ná jè xi mejèn-na nga skoehima.”

¹⁶ K'oáá s'ín tjín kjoa koi, mìtsà koi nga jñà mejèn-ná nga s'e-ná, nì mìtsà koi nga 'ñó binchaàtsjiaá; jè Nainá tsjá-là kjondaà-là jñà xità xi jè mejèn-là mahimakeè.

¹⁷ K'oáá s'ín tíchja Xojon-là Nainá nga kitsò-là Faraón: “Koií k'oas'ín kisikíjna-lè nga xitaxá tjíni ya naxandá Egipto mé-ne nga it'aà tsiji kokoaà nga'ñó-na tìkoa skoexkon-na xità nga tíjtsa isò'nde.”

¹⁸ K'oáá s'ín s'ín Nainá, tjín-là kjohimatakòn it'aà ts'e xità xi jè mejèn-là; tìkoaá ma-là sítájaàjìin inìma-là xità xi jè mejèn-là nga kàtasítájaàjìin inìma-là.

¹⁹ Tanga tsà jì k'oa k'oín-ná: “Tsà k'oas'ín s'ín Nainá, ¿mé-ne jé bínè-là jñà xità?, nga nì yá xità xi koma kondra kjoí-là koni s'ín mejèn-là jè.”

²⁰ Tanga jì, xi taxkì xità-né, ¿yá-né jì, nga Nainá otìkjoòkoií? Jngòò tìjì xi xó kisindaà-ne, ¿a komaá kítso-là jè xi tsibíndaà: “Mé-ne k'oas'ín tsibíndaà-ná?”

²¹ ¿A mì tjí'nde-là jè xi ma-là bíndaà tìjì ni'nde nga tìjè-ne ndási koiíndaà jngòò-ne tìjì xi tà k'e mochjeén k'e nga tjín s'eí koa koiíndaà jngòò xi nachrjein nchijòn mochjeén?

²² Tsà Nainá mejèn-là tsakó kjoajti-là kò nga'ño-là, ¿a ch'o tjin nga kiskoòñà kjoa it'aà ts'e xita xi tjoé-là kjo'in kò xi tjinè-là nga kjoehesòn?

²³ Mìtsà ch'o tjin; nga koií k'oas'in kis'iin-ne mé-ne nga ma tsakó kjoajeya-là xi it'aà tsaján nga kjòhimakeè-ná. Nga jè tsibítsajnandaà-ná skanda tisa kjòtseé, mé-ne tikoá s'e-ná kjoajeya-là.

²⁴ Nainá k'oaá s'in xó kiichja-ná. Tjin xita xi ya itjokàjìn ts'e xita judío; tikoá tjin xita xi ya itjokàjìn ts'e xi taxki xita xi mìtsà xita judío.

²⁵ K'oaá s'in tíchja xojon-là Oseas xita xi kiichja ngajo-là Nainá nga tsò: Jè xi mìtsà naxandá-na ma nga sa ítjòn, naxandá ts'aán koma; jè xi mì tjokeè kijtseè nga sa ítjòn, tjokeè skoeè.

²⁶ Ti ya-ne i'nde ñánda oki'mi-nò:

“Mìtsà naxandá ts'an xan-nò”,

“ixti-là Nainá xi tijnakon” k'oín-nò.

²⁷ Isaías, xita xi kiichjaya ngajo-là Nainá, k'oaá ti tsò it'aà ts'e naxandá Israel: “Nas'in kjín jchán ma-ne ixti-là koni tsumi ts'e ndáchikon, tà chiba ma-ne xi kitjokàjìn kjo'in.

²⁸ Nga jè Na'èn-ná nitoón sùkitasòn jè kjoakixi-là xi jye jè kitsjaà koni s'in tjinè-là jña xita nga títsa isò'nde.”

²⁹ Koni s'in kitsò Isaías nga tisa ítjòn:

Jè Na'èn-ná, xi tse nga'ño tjin-là,
tsà mìkiì kisikiningui chiba-ne tje-ná,
jyeé-la kisikjehesòn yije-ná

koni kisikò naxandá Sodoma kò naxandá Gomorra.

³⁰ ¿Mé xi kixoán? Jña xi mìtsà xita judío, xi mìkiì fitjingui-là kjoa kixi, i'nde, jyeé xita kixi-né nga nguixkon Nainá tà koií kjoa-là nga mokjeiin-là it'aà ts'e Nainá.

³¹ Tanga jña xita Israel xi fitjingui-là Kjotixoma-là Moisés nga nchihótsji nga kixi kítsajna nguixkon Nainá mìkiì ijchòtjingui-là.

³² ¿Mé-ne nga k'oas'in komà-ne? Koií kjoa-là nga mìkiì mokjeiin-là it'aà ts'e Nainá. Tà k'oaá s'in 'ño tsohót'aahikon nga ndaà tjin kjoa xi kis'iin it'aà ts'e Kjotixoma. K'oaá ma-ne [k'e nga j'ii Cristo] yaá kisatíngui koni jngoò Ndajo xi kijnahikòn.

³³ Xojon-là Nainá k'oaá s'in tíchja [it'aà ts'e Cristo] nga tsò:

Ya nindoò Sión kijnaá jngoáá ndajo xi kijnahikòn,
jngoò Ndajo xi satíngui xita,
tanga jè xi kòkjeiin-là it'aà ts'e Ndajo jè mìkiì kosobà-là.

10

Mé xi s'eén nga kítsajnadeií-ná xi kjoa ts'e jé-ná nga kixi kítsajnaá nguixkon Nainá

¹ Jño ndí 'ndsè, xi nguì okixi, koií xi 'ño mejèn-là inima-na kò xi 'ño sjét'aà-là Nainá it'aà ts'e naxandá Israel, nga kàtitsajnadeií kjoa ts'e jé-là.

² An be kixi-ná nga 'ño mejèn-là nga ndaà skoexkòn Nainá jña xita Israel, tanga mìkiì mangáson kjohítsjeèn-là koni s'in tjin jè kjohítsjeèn xi nguì kixi tjin.

³ Nga mìkiì fahas'en-jin-là nga tà jngoò jè Nainá xi ma-là kixi síkítsajna xita. Tà jè xi mejèn-là nga tà jña kixi síkítsajna yijo-là. Majin-là kjoé xi okixi-là Nainá xi ma-là kixi síkíjna-ná.

⁴ Nga jè Cristo kisikjehet'aà kjoa ts'e kjotixoma mé-ne nga s'e-là kjoa kixi ngats'ii xita xi mokjeiin-là it'aà ts'e Nainá.

⁵ Jè Moisés, k'oaá s'ín kiskii it'aà ts'e xita xi mejèn-la kixi kítsajna it'aà ts'e kjotíxoma nga tsò: “Jè xita xi siikitasòn kjotíxoma, it'aà ts'eé kjotíxoma kijnakon-ne.”

⁶ Tanga it'aà ts'e xita xi kixi kítsajna k'e nga mokjeiin-la, k'oaá tsò: “Kì k'oaá tsò inima-lè: ¿Yá xi kjimijìn ngajmiì?” (Én koi tsòyaá-ne nga mejèn-la kjinchrobàjen-ko Cristo.)

⁷ Ko, k'oaá tsò inima-lè: “¿Yá xi ma koiis'en-jiìn i'nde ñánda nchisíkjeiin kjo'in jña mik'en?” (Én koi tsòyaá-ne nga mejèn-la skimiì'nga i'ngòò k'a-ne Cristo ya ijìin-la mik'en.)

⁸ Tanga, ¿kó tsò-isa 'én-la Moisés? Tsò-ne: “Chrañàt'aà tìjna-lè jè 'én, yaá tìjna'a ndsoboì, yaá tìjnajiìn inima-lè.” K'oaá tsò 'én xi 'an chjaya xi mochjeén nga kokjeiin-ná.

⁹ Tsà ndsoboì kénojmi-ne nga Jesucristo, jè xi Na'èn-ná, koa tsà ko inima-lè kokjeiin-lè nga Nainá kisikjaáya-la it'aà ts'e kjoabiyaá, kijnandeijí-né xi kjoa ts'e jé-lè.

¹⁰ Nga koó inima-ná mokjeiin-ná mé-ne nga kixi kítsajnaá nguixkon Nainá tìkoa koó ndsobaá bènøjmiá nga Jesucristo, jè xi Na'èn-ná, mé-ne nga koma kítsajnandeijí-ná xi kjoa ts'e jé-ná.

¹¹ K'oas'ín tíchja Xojon-la Nainá nga tsò: “Ngats'ii xi kokjeiin-la it'aà ts'e Cristo mìkii kosobà-la.”

¹² Jña xita judío ko xi mìtsà xita judío, tà ngàsòn-né xi it'aà ts'e Nainá; nga tìjè-ne Cristo xi Na'èn tsò-la ngats'ii xita. Jè kjondaà xi 'ñó tse tìjn-la Cristo, jè tsjá-la ngats'ii xita xi chjat'aà-la.

¹³ Nga k'oaá tì tsò Xojon-la Nainá: “Ngats'ii xita xi kichjat'aà-la Na'èn-ná, kítsajnandeijí-né xi kjoa ts'e jé-la.”

¹⁴ Tanga mìkii koma kichjat'aà-la Cristo jè xita xi kje'e k'oaá mokjeiin-la. Ko mìkii kokjeiin-la xita xi kje'e mé 'én 'nchré it'aà ts'e Cristo. Koa mìkii koma kji'nchré xita tsà mì yá xita tìjn xi keènojmi-la it'aà ts'e Cristo.

¹⁵ Koa jè xita xi keènojmi 'én, mìkii koma siixá tsà mì yá xi siikasén. K'oas'ín tìt'aà xojon: “Mé tà ndaà-ne nga k'oas'ín binchimasòn jña xita xi chjaya 'én ndaà-la Nainá xi kjoa ts'e Cristo xi ts'e kjoa'nchán.”

¹⁶ Tanga mìtsà tà ngats'ii xita Israel kisikitasòn jè 'én ndaà-la Nainá xi kii'nchré. Nga jè Isaías xita xi kiichja ngajo-la Nainá, k'oaá kitsò: “Na'èn, ¿yá xi kòkjeiin-la 'én xi jin kinokjoàya-jen?”

¹⁷ K'oaá ma-ne, k'e nga mokjeiin-ná, yaá nchrobát'aà-ne k'e nga na'yá-lá 'én. K'oa jña 'én xi na'yá, 'én ndaà-la Nainá xi kjoa ts'e Cristo-né.

¹⁸ Tanga, k'oaá xan: ¿A mìtsà kii'nchré xita Israel jè 'én ndaà-la Nainá? Jon, kii'nchré-né. Nga k'oaá tsò jè Xojon-la Nainá:

Kijndà isò'nde jyeé tsabísòn 'én-la.

Jyeé ijchò skanda ñánda fehet'aà-ne nangui.

¹⁹ Tìkooá xan-ná: jña xita Israel, ¿a mì kisijiìn-la kjoa koi? Kisijiìn-la. Jè xi tìjna ítjòn, k'oaá kitsò Moisés:

'An, k'oaá s'ín s'iaàn nga kàtachinicha jño jngòò naxandá xi mìtsà naxandá ts'an xan-la.

Kàtamajticha it'aà ts'e naxandá xi chiba kjohítsjeèn tìjn-la.

²⁰ Tìkooá Isaías 'ñó tsi'beé-la ikon nga kiichja 'én-la Nainá nga kitsò:

Kisakò-la jña xita xi mìkii 'an tsohótsji-na.

Tsakó-la kjondaà-na jña xita xi mìkii 'an kiskònanguiya-na.

²¹ Tanga jè Isaías k'oaá s'ín kiskii it'aà ts'e xita Israel koni s'ín kitsò Nainá: “Nachrjein nchijòn tsijmeé-la ndsaa nga kichjà'nchré-la jngòò naxandá xi kondrà kii-la 'én-na nga mì k'oaá kisikitasòn.”

11

Kjohimatakòn xi tjin-la Nainá it'aà ts'e naxandá Israel

¹ 'Aán kjònanguia, jè Nainá, ¿a kitsjeiìn takòn naxandá-la Israel? Majìn, mì k'oaá s'ín tjin. 'An, tikoáá xita Israel-ná, tje-laá ma Abraham, xita xinguiáa ma xi ya nchrobát'aà-ne ts'e Benjamín.

² Nainá mìtsà tsachrjekàngui naxandá-la nga jye tíjiìn-la nga tisa tàts'en-la kjoa nga ixti-la koma. ¿A mì tíjiìn-nò koni tsò Xojon-la Nainá it'aà ts'e Elías nga k'oas'ín chjat'aà-la Nainá xi kondra ts'e Israel? Tsò:

³ "Na'èn, jña xita-lè xi kiichja ngajo-lè, jyeé kisik'en xita, koa jña i'nde tsjeè-lè jyeé kisikits'óna; tà 'an tajngoò tijnaa isa, tikoáá mejèn-la siik'en-na."

⁴ Tanga k'oaá tsò 'én xi tsjá Nainá: "Majìn, mìtsà tà ji tajngoò tijni. Itoò jmiì ma-ne xita xi 'an títsajnatjò-na xi kj'eè tsà ya bincha-xkó'nchit'aà-la xkósòn-la Baal."

⁵ Nachrjein i'nde jì tákó k'oaá s'ín ma, tjin isa xita Israel xi títsajnatjò-la Nainá xi xó jaàjiìn-ne xi kjondaà ts'e.

⁶ Tsà tà kjondaà ts'eé Nainá nga k'oas'ín jaàjiìn xita, tsòyaá-ne mìtsà koi kjoa-la kjondaà xi kis'iìn. Tanga tsà koi kjoa-la kjondaà xi kis'iìn, mì-la tsà tì kjondaà-la Nainá kjòchjeén-ne nga kitjaàjiìn xita.

⁷ ¿Kó s'ín tjin kjoa? Tsòyaá-ne nga kjín xita Israel mìkiì ijchòtjingui-la jè kjoa xi tsohòtsji. Tanga kis'e i'nga xita xi xó jaàjiìn-ne Nainá xi jye ijchòtjingui-la. Jña xita xi i'nga, 'ño kjòtjaàjiìn inima-la.

⁸ K'oaá s'ín tjit'aà Xojon-la Nainá nga tsò: "Nainá, kitsjaà-la nga kisijñòjiìn inima-la; jña xkon mìkiì tsejèn-la, kò líká-la, mìkiì 'nchré skanda nachrjein i'ndej."

⁹ Jè xitaxá ítjòn David k'oaá ti kitsò:

Jè s'eí xi ochrje, tije kàtama-ne ch'an nga kàtakaàngui, kàtasiya'ño na'ya, kò tijña kàtasatingui-ne mé-ne nga kàtas'e-la kjo'in.

¹⁰ Kàtasichjoa xkon mé-ne nga mìkiì kotsejèn-la nga kjit'aà nachrjein kàtamatsit'in ít's'in.

¹¹ 'An kjònangui-ná, ¿a jngoò k'a chixòt'aà nangui jña xita Israel k'e nga kisatèngui? Majìn. Mì k'oaá s'ín tjin kjoa. Jè kjoa-la nga mìkiì kisikitasòn jña xita Israel, jña kitjoé-la xi mìtsà xita judío nga tsibìtsajnandejì xi kjoa ts'e jé-la. K'oaá s'ín komà mé-ne nga jña xita judío kàtachinì-ne it'aà ts'e kjondaà-la Nainá.

¹² Tsà jña xita isò'nde kisakò-la kjoanchinà-la Nainá k'e nga jña xita judío mìkiì kisikitasòn-la Nainá kò kisichijà kjondaà-la, isaá ta 'ño ndaà s'e-la kjoa machikon-t'in jè isò'nde k'e nga jña xita judío ijngoò k'a skoé i'nde-la ya nguixkon Nainá.

¹³ Jño chjàkò-nò xi mìtsà xita judío mì-nò. 'An kisixáya-na nga 'an kichjàjiìn-la jña xi mìtsà xita judío. 'An beèxkón-ná xá xi kits'iì-na.

¹⁴ Tsà koi nachrjein-la kochinì i'nga xita xinguiáa mé-ne nga tikoá koma kítsajnandejì-ne xi kjoa ts'e jé-la.

¹⁵ Tsà jña xita isò'nde kisakò-la kjoa'nchán it'aà ts'e Nainá k'e nga jña xita judío itjokàngui, isaá tse kjondaà sakò-la jña xita judío k'e nga skoétjò ijngoò k'a-ne Nainá. Skanda k'oaá s'ín komat'in koni jngoò xita xi jye k'en kò kjoáaya-la it'aà ts'e kjoabiyaà.

¹⁶ Tsà tsjeè niño xi sindaà ítjòn nga kongatsja Nainá, tikoáá tsjeè-né na'yo xi kochjeén nga sindaà niño k'e nga koma iskan. Tsà tsjeè it'aà ts'e Nainá i'ma-la yá, jña chrja-la tikoáá tsjeè-né.

¹⁷ Jña xita Israel, k'oaá s'ín ngaya-la koni jngoò yá olivo ndaà xi kitil't'aà chrja-la, koa ngaji k'oaá s'ín ngaya-la koni chrja-la yá olivo jjiìn ijña nga ya

kisikjoòkoji ya ngajo-la chrja-la yá olivo ndaà; k'oaá ma-ne nga ya tíchjoí jè nga'ño-la i'ma-la yá olivo ndaà.

¹⁸ Kì nga níkjíni yijo-lè nga ya titsakjoòkoji chrja-la yá olivo ndaà. Tikítsjiin nga tà kisikjoòko-nè; mìtsà jì 'biì-la nga'ño jñà i'ma-la yá olivo ndaà, tà saà jì tsjá-lè nga'ño jñà i'ma-la yá olivo ndaà.

¹⁹ Jì, kì k'oaá si: “Kitiit'aà chrja-la yá olivo ndaà, nga 'an kisikjoòkoaa.”

²⁰ Tikítsjiin koií kjoa-la nga mìkiì mokjeiín-la nga kitiit'aà-ne. Tanga jì koií kjoa-la nga mokjeiín-lè nga ya tijnat'eì. Kì ngaá beè-la takoin, tiskón-la Nainá.

²¹ Nainá, tsà mìkiì kitsjaà'nde-la jñà chrja-la jè yá olivo ndaà nga ya kijnakjoòko tikoáá ngaji tsà mì tì kiì mokjeiín-lè mì tì kiì tsjá'nde-lè nga ya kijnakjoòkoji.

²² Chitsejèn-la Nainá, 'ño ndaà xita tanga tikoáá jè xi mejèn-la nga ndaà kítasòn 'én xi chja. Mikiì beè ima jñà xita xi chinchat'aaxìn-la Nainá. Tanga it'aà tsjì títjsá-lè kjondaà. Tà jè xi mochjeén nga k'oas'ín kijni koni s'ín tjin kjondaà xi kitsjaà-lè. Tsà majìn tikoá kotet'aà-lè koni jngoò chrja-la yá.

²³ Jñà xita judío xi chrja-la yá xi kitiit'aà, tsà kòkjeiín ìjngoò k'a-la, komaá sincháya-ne i'nde-la, nga Nainá tjin-la nga'ño, komaá kíkjoò ìjngoò k'a-ne.

²⁴ Jì, nga ya kitiit'aà-ne jñà yá olivo jjiin ijñá koá kisikjoòkoji yá olivo ndaà nas'ín mìkiì ya ok'in-lè. ìlsaá tà ndaà ok'in-la nga jñà chrja-la yá olivo xi xó kitjaàjiin-ne nga sincháya ìjngoò k'a-ne i'nde-la xi tije-ne yijo-la yá!

²⁵ 'Ndsè, mejèn-na nga ndaà kátasijiin-nò kjoa'ma koi koni s'ín tjin-daà-la Nainá mé-ne nga mì 'ño chjine kinachrje yijo-nò. Jè kjoa nga tjin i'nga xita Israel xi kjòtájaàjiin inima-la nga mìkiì mokjeiín-la, tanga skanda k'ée kòkjeiín-la k'e nga jye kòkjeiín yije-la xi mìtsà xita judío.

²⁶ K'e nga jye k'oas'ín koma, ngats'iì xita Israel kítajandejì-né xi kjoa ts'e jé-la, koni s'ín tíchja xojon nga tsò:

Yaá nindoò Siòn kjinchrobà-ne xi ma-la sìikítajandejì xita Israel xi kjoa ts'e jé-la,

jè xi kjoaáxìn-la jé-la jñà xita tje-la Jacob.

²⁷ Jè kjoa xi bindaàjiin-koaa

k'e nga kjoaáxìn-la jñà jé xi tjin-la.

²⁸ Kjoa ts'e 'én ndaà-la Nainá xi kjoa ts'e Cristo, jñà xita judío, kondra-laá ma Nainá mé-ne jñò sakò-nò kjondaà. Tanga jè kjoa nga xó kitjaàjiin-ne xita koi, tákó matsjakeè Nainá nga jye kòs'ín kitsjaà-la tso'ba jñà xita jchínga kjìin-la.

²⁹ Nainá mìkiì faáxìn kjòtjò xi tsjá, tikoá mìkiì faáxìn 'én xi chja-ná.

³⁰ Jñò, k'oaá tìs'ín ki'nè nga sa kjòtseé; mìkiì kinikitasòn-la Nainá, tanga i'ndeji jyeé kisakò-nò kjohimatakòn, koií ngatjì-la nga mìkiì kisikitasòn jñà xita judío.

³¹ Nachrjein i'ndeji jñà xita judío mìkiì síkitasòn-la Nainá. Tanga tà koi-né nga jè Nainá tjin-la kjohimatakòn xi it'aà tsajòn mé-ne jñà xita koi tikoáá s'e-la kjohimatakòn ts'e Nainá.

³² Nainá, k'oaá tsò nga ngats'iì xita judío, kò xi mìtsà xita judío, mìkiì síkitasòn-la nga jè xi mejèn-la Nainá nga ngàsòn ngáya kohimakeè ngats'iì xita.

³³ ¡Mé tà 'ño tse ma kjoanchiná xi tjin-la Nainá, kò 'ño tse kjoachjine tjin-la kò kjohítsjeèn-la! Nijngoò xita xi machiya-la kòs'ín kosòn-la k'e nga bindaàjiin kò kòs'ín tjin ndiyá-la.

³⁴ ¿Yá xi beè kòs'ín tjin kjohítsjeèn-la Nainá? Mì yá xi koma-la sìikíchiya-la Na'èn-ná.

³⁵ ¿Yá xita xi jè kisikíña ítjòn-la xi mochjeén-la Nainá mé-ne nga jè sìikátji ngajo-la?

³⁶ It'aà ts'eé Nainá nchrobát'aà-ne ngats'iì tsojmì xi tjín, tìkoà it'aà ts'e-ne nga títsakon, kò k'oaá s'ín mochjeén nga jeya kíjna.

Nainá, kàtas'e-la kjoajeya nìta mé nachrjein-ne. K'oaá s'ín kàtama.

12

Mé xi s'eén nga tsjeè sijchá yijo-ná koni s'ín sasén-la Nainá

¹ K'oaá ma-ne 'ndsè, nga tse kjohimatakòn tjín-la Nainá xi it'aà tsaján, 'an bìtsi'bà-nò nga k'oaá s'ín tìngatsja yijo-nò it'aà ts'e Nainá koni jngoò kjotjò xi tjínakon, xi tsjeè tjín, xi ndaà sasén-la Nainá; nga nguì kò inìma-nò kò kjohítsjeèn-nò jeya s'íkíjna Nainá.

² Kì k'oaá s'ín onguíko yijo-nò koni s'ín tjín kjotíxoma-la isò'nde. Tìxítseyá kjohítsjeèn-nò nga kàtatjìya-nò koni s'ín tìtsanjchá yijo-nò mé-ne nga jchà-nò mé xi mejèn-la Nainá it'aà tsajòn, jñà kjoa xi ndaà tjín, xi nguì t'jìkixì, xi jè ndaà sasén-la.

³ It'aà ts'e xá xi 'an kitjoé kjotjò-na, k'oaá xan-nò nga jngoò ìjngoò, k'ì nga onguíko kjohítsjeèn-nò koni s'ín tjínè-la nga s'íkítsjeèn; tà saà ndaà t'íkítsjeèn koni s'ín ok'ín-la kjondaà xi kitsjaà-nò Nainá k'e nga kòkjeiín-nò it'aà ts'e Cristo.

⁴ Koni s'ín tjín yijo-ná nga kjìn skoya tjín-la tanga k'akj'eíí k'akj'eíí xá tjín-la nga ìjngoò ìjngoò skoya.

⁵ K'oaá s'ín ma it'aà tsaján nga kjìn ma-ná, tanga xi it'aà ts'e Cristo tà jngoò ma-ná nga ìjngoò ìjngoá; k'oaá s'ín k'indoba-ñoá xinguiáá koni s'ín kitsobà-ño x'íkín yijo-ná.

⁶ Koni s'ín kjòmejèn-la Nainá jye kitsjaà-ná xá xi s'eén nga jngoò ìjngoá. Jngoò x'ità, tsà jè xá kitjoé-la nga x'ità k'ichjayajìin-la, k'oaá s'ín kàtasíkjeén koni s'ín mokjeiín-la.

⁷ Tsà jè xá kitjoé-la nga x'ità k'osiko, k'oaá s'ín kàtasíkjeén nga ndaà kàtasìko x'ità. O xi jè xá kitjoé-la nga k'okòya, k'oaá s'ín kàtasíkjeén nga ndaà kàtakòya.

⁸ Jè xi kitjoé-la xá nga s'ijehikon x'ità, k'oaá s'ín kàtas'ín. Jè xi ma-la s'ika'b'í tsojmi, nguì k'oo inìma-la kàtasíka'b'í; jè xi xá ítjòn kjòngatsja, ndaà kàtasíkitasòn; jè xi síchját'aà-la jñà x'ità imà, k'oo kjotsja-la kàtasíchját'aà-la.

⁹ Nguì k'oo inìma-nó t'ìtsjacha xinguiòo. T'ijticha kjoa xi ch'o tjín. Koií tanguítjngui-la kjoa xi ndaà tjín.

¹⁰ K'oo kjotsja-nò t'ìtsjacha xinguiòo nga 'ndsè chiba. Ísa ndaà jchaxkón x'ità xinguiòo xi i'nga; jñà t'íkítsajna ítjòn nga jngoò ìjngoò.

¹¹ Kì ts'eè 'nè xi xá ts'e Nainá. Nguì k'oo inìma-nò t'ixá-la Na'èn-ná.

¹² Tsja te-lá takòn jè kjoa xi chiñà-là. Kò inìma-nò kàtachíkjoako-nò kjo'in xi t'ìtsanjkiòon. Nachrjein nchijòn t'ìtsi'ba-la Nainá.

¹³ T'jii-là mé xi mochjeén-la jñà x'ità tsjeè-la Cristo. Chjoétjò x'ità xi bijchó ya ni'ya-nò.

¹⁴ T'ijét'aà-la Nainá nga kàtasíchikon-t'in jñà x'ità xi ch'o síko-nò; k'ì k'oaá s'ín n'ijét'aà-la nga kjo'in tsjá-la.

¹⁵ T'ìtsjakoo jñà x'ità xi tsja tjín-la. Ch'ìhindáyakoo jñà xi nchikjindáya.

¹⁶ Tà jngoò t'een kjohítsjeèn-nò. Kì 'nga ikon 'nè yijo-nò, ya tsjahijtakoò jñà x'ità imà. Kì 'ño chjine nachrjenguiòo yijo-nò.

¹⁷ Jñà x'ità xi ch'o síko-nò, k'ì ch'o níkoò ngajo-nò. K'jit'aà nachrjein ndaà t'een nga nguixkon ngats'iì x'ità.

¹⁸ Skanda ñánda sakó'nde-nò, jñò tjínè-nò nga 'nchán t'ìtsajnakoo ngats'iì x'ità.

¹⁹ Ndí 'ndsè xi matsjake-nò, k'e nga mé xi mat'ioòn, k'ì jñò 'nè ngajo-nò. Tsja Nainá t'íkíjnaya kjoa-nò mé-ne nga jè tsjá-ne kjo'in. K'oaá s'ín t'ichja Xojon-la

Nainá nga tsò: “Tsò Na'èn-ná: 'Aán oko-na nga kındaàjìin-là xità, 'aán tsja-là chjí-là.”

²⁰ K'oaá ma-ne, tsà jè kondra-lè, tsà tsjìn tsojmì xi kine, jìí tji-là; tsà xíndá-là, tji-là nandá nga kàt'iì. K'e nga koa sikoji, kosobà tì'bi-là kondra-lè, chiba-là kohini isén-là koni xá'í.

²¹ Jè kjoa xi ch'o tjin, kì jè síkijne-nò; tikoá-ne jè kàtítasòn xi kjondaà, mé-ne nga síkijne-là kjoa xi ch'o tjin.

13

Mé kjoa-ne nga níkitasòn-lá xi xitaxá títsajna

¹ Ngats'iì xità kàtasíkitasòn-là xi xitaxá títsajna, nga Nainá kitsjaà-là kjotíxoma. Jñà xi xitaxá títsajna, Nainá kitsjaà-là xá.

² Jñà xità xi bitsajna tájaà-là kjotíxoma-là xitaxá, kondraá bitsajna-là jñà xità xi Nainá kitsjaà-là xá. Jñà xità koi, tì yijo-láá tìbínè-là kjo'in.

³ Jñà xitaxá mìtsà koi xá títsajna-ne nga jñà kinchaxkón-là xità xi ndaà s'ín, jñà-né xità xi ch'o tjin kjoa xi s'ín. Tsà mejèn-lè nga mìki kiskón-là xitaxá, ndaà t'ìin, ko jñà xitaxá ndaà sikkijna-lè.

⁴ Jñà xi xitaxá tjin-là, xá ts'e Nainá nchisíkitasòn, mé-ne nga ndaà kijna-ne. Tanga tsà ch'o tjin kjoa xi t'nì, tiskón-là xi xitaxá tjin-là, nga tji'nde-là nga tsjaà-lè kjo'in. Nga xá-là Nainá nchis'ín k'e nga bíndaàjìin kjoa ko nga tsjá-là kjo'in jñà xità xi ch'o s'ín.

⁵ K'oaá ma-ne nga mochjeén-né nga ndaà síkitasòn-lá jñà xi xitaxá títsajna, mìtsà tà koi-ne nga kjo'in tsjá-ná; koi-né nga xó k'oas'ín beè-là takoán nga tjinè-ná nga síkitasoán.

⁶ Koií kjoa-là nga tikoá machjí ton sá, nga jñà xitaxá k'oaá s'ín nchisíkitasòn-là Nainá ko kjit'aà nachrjein koatjin xá xi nchis'ín.

⁷ Tichjió yije mé xi kitjen-nò. Jè xi kitjen-là ton sá, kàtíchjí. Jè xi kitjen-là tsojmì xi machjítjì, kàtíchjítjì. Jè xità xi mochjeén-là nga jchaxkón, kàtayaxkón. Jè xità xi mochjeén-là nga ndaà kijná, ndaà tikijná.

⁸ Kì mé xi jmeèt'ioòn yijo-nò. Tanga kitjeén-nò ts'e kjoatjòcha it'aà ts'e xità xinguio. Nga jè xi matsjakeè xíkjín, jyeé kíkítasòn yije Kjoatíxoma.

⁹ Jñà kjotíxoma tsò-ne: “Kì kjoa chingui 'nì, kì xità nìk'in, kì chijé 'nì, kì 'én ndiso nokjoi, kì maxítakòn-chiì xinguui.” Ngats'iì kjotíxoma koi, ko xi k'ejí, yaá mangásòn yije jè kjotíxoma xi tsò: “Títsjachi xità xinguui koni tsà ti yijo tsiji-ne.”

¹⁰ Jè xi matsjakeè xíkjín, mìtsà ch'o síko xità xíkjín. Jè xi matsjakeè xíkjín, jyeé ndaà tísíkitasòn Kjoatíxoma.

¹¹ K'e nga k'oas'ín s'eén yijeé kjoa koi, jcha-ná nachrjein i'ndeí mé kjoa xi tíma nga jye ijchò chiba-là nga síkja-lá yijo-ná nga titsafè. Koni k'e nga sa kòkjeiín-ná, jye 'ñó kjòchrañà'taà nachrjein nga kítsajnandiaá kjoa ts'e jé-ná.

¹² Nitjen, jyeé tífahato, jyeé tímachraña nachrjein nga s'e isén nga kitjojen ijngò k'a Na'èn-ná. Kinachrjenguaiaá ngats'iì kjoa xi ma ñánda nga jñò choòn ko chjoé nga ñó-là Nainá koni s'ín mochjeén ñánda iseèn choòn koni tsà kicha ts'e soldado.

¹³ K'oaá s'ín iseèn kitjá koni nachrjein nga ndaà sjchá yijo-ná. Mì kì mochjeén nga taxkì chjineé tsojmì ko nga mach'iaá. Mìkì mochjeén nga íchjín kjòhijtakoáá, ko mì kì ma taxkì sikoáá yijo-ná. Mìkì mochjeén nga xità kixkàn-koáá ko mìkì mochjeén nga kjoaxítakòn kichjà-lá xinguiaá.

¹⁴ K'oaá s'ín tìjchá yijo-nò koni s'ín kík'ìin jè Na'èn-ná Jesucristo, kì kù níkitasòn-là yijo-nò kjoa ch'o xi síjé.

14

K'e nga mìkii mangàsòn kjohítsjeèn-ná it'aà ts'e kjoa xi mì xó kii tjí'nde-ná nga s'één

¹ Chjoétjò xita xinguiqo xi mìkii tíjngoò ikon mé kjoa xi tjí'nde-la nga s'iin; kì chibàya-nò jñà kjoa xi mìkii mangàsòn kjohítsjeèn-nò.

² Tjín xita xi k'oas'ín mokjeiín-la nga ma chine yije tsojmì xi tjín, tikoá tjín xita xi mìkii mokjeiín-la tsà ma chine yije tsojmì xi tjín. Tà jñà tsojmì xi nangui síjchá kine.

³ Jè xi kine yije tsojmì xi ma chine mìkii koma kochrjekàngui jè xi mìkii ma-la kine yije tsojmì; kò jè xi mìkii ma-la kine yije tsojmì, mìkii koma kichjajno-la jè xi ma-la kine yije tsojmì xi tjín, nga Nainá jyeé kiskoétjò nga ki'ndí-la ma.

⁴ ¿Yá-né jì nga nìkindi chì'nda xi mìtsà tsiji? Nga chì'nda ts'e Nainá-né. Jè chì'nda jè, kindá ts'eé nei-la tsà kixi tjina kò tsà mì kixi tjina. Tanga kixi kíjna, nga jè Na'èn-ná tjín-la nga'ño nga kixi síkíjna.

⁵ Tjín xita xi tsò: tjín nachrjein xi isa xkón. Tikoá tjín xi tsò: Nachrjein, tà ngàsòn ngaya-né nga nachrjein nchijòn. Nga jngoò ìjngoò xita, k'oaá s'ín ndaa katíjngoò-la ikon koni s'ín síkítsjeèn.

⁶ Jñà xita xi faájìin jngoò nachrjein nga beèxkón, k'oaá s'ín nga jeya síkíjna Na'èn-ná; koá jñà xita xi tsò nga ta ngàsòn ngáya nachrjein, tikoá k'oaá s'ín s'ín nga tikoá jeya síkíjna Na'èn-ná. Jñà xita xi kine yije tsojmì, it'aà ts'e Na'èn-ná kine, nga tsjá-la kjondaà Na'èn-ná k'e nga kine; k'oa jñà xita xi tsò nga tjín tsojmì xi mìkii ma chine, tikoá it'aà ts'eé Na'èn-ná nga mìkii kine tsojmì, kò tikoá tsjá-la kjondaà Na'èn-ná.

⁷ Jñà, k'e nga titsajnakoaán, mìtsà koi xá titsajnakon-ná xi ta kjondaà tsaján. Kò k'e nga kiyá, mìtsà ta kjondaà tsaján kinchátsjiaá nga kiyá.

⁸ Tanga k'e nga titsajnakoaán, koi xá titsajnakoaán xi kjondaà ts'e Na'èn-ná. Kò nga kiyá, tikoá koi xá kiyá-aná xi kjondaà ts'e Na'èn-ná. K'oaá ma-ne tsà titsajnakoaán kò tsà kiyá kjondaà ts'e Na'èn-ná nga ts'e tsò-ná.

⁹ Koi kjoa-la nga k'en Cristo koá jaáya-la nga tsibìjnakon-né, mé-ne nga jè koma-ne Nei-la jñà xita xi biyaá kò xi titsajnakon.

¹⁰ Tanga jì xi nokjoàjno-la 'ndsì, ¿mé-ne koá'nè-ne? Tikoá jì xi nachrjekàngui 'ndsì, ¿mé-ne nachrjekàngui-ne? Nga ngats'ìi-ná kijchò kinchanguiaá ndsokò Cristo ñánda nga jè tíhotíxoma.

¹¹ K'oaá s'ín tíchja Xojon-la Nainá nga tsò:

Tsò Na'èn-ná: 'An tijnakon-ná,
ngats'ìi xita kincha-xkó'nchit'aà-na
kò ngats'ìi xita skoexkón Nainá.

¹² Ngats'iaá k'oi-lá kindá Nainá mé kjoa xi ki'né nga tsitsajnaá isò'nde.

¹³ K'oaá ma-ne nga mì tì xinguiáá kinókjoajno-lá; jñò, ta saá ndaa tikítsjeèn nga nímé xi s'een xi síkíts'ón-jìin koni s'ín mokjeiín-la xinguiqo mé-ne nga mì jè skajìin ìjngoò k'a-ne.

¹⁴ 'An ndaa tíjngoò takoàn it'aà ts'e Na'èn-ná Jesús nga kixi kjoa nga tsjìn tsojmì xi xkón tjín nga mìkii ma chine; tanga jè xita xi k'oas'ín síkítsjeèn nga tjín tsojmì xi xkón tjín nga mìkii ma chine, xkón tjín-la it'aà ts'e tsà skine.

¹⁵ Tanga tsà ta koi kjoa-la ts'e tsojmì xi chinii, jè 'ndsì ch'o ma-la, jè kjoa xi tì'nì mìtsà tì kjoatjòcha-ne; kì kii bìi'ndi nga jè 'ndsì xi Cristo k'en ngajo-la kíts'ón-jìin-la xi tà kjoa ts'e tsojmì xi chinii.

¹⁶ Kì k'oaá s'ín 'nè mé-ne nga mì xita kichjajno-nò it'aà ts'e kjoa xi titsa'nè nga k'oas'ín mokjeiín-nò nga ndaa tjín.

¹⁷ K'e nga jè Nainá tíhotíxoma-ná mìtsà jè xi ìsà 'ñó chjí-là mé xi s'ioaá kò mé xi chineé. Jè xi 'ñó mochjeén nga kixi kítajnaá, 'nchán síjchá yijo-ná, kò tsja k'oe-lá inima-ná; koi kjoa xi tsjá Inima Tsjeè-là Nainá.

¹⁸ Jè xi k'oas'ín síkitasòn kjoa koi k'e nga síxá-là Cristo, ndaà sasén-là nguixkòn Nainá, tìkooá ndaà bìjna nga nguixkòn xita.

¹⁹ K'oaá s'ín kjitjngui-lá kjoa xi 'nchán síkíjna-ná kò kjoa xi 'bì-lá nga'ño xinguiáá nga jngoò jngoaa kóni s'ín mokjeiin-ná.

²⁰ Kì xá-là Nainá nìkìts'ón-jìin-là xi ta kjoa ts'e tsojmì xi ma chine. Kixí kjoa, ngats'ii tsojmì xi tjin, tsjeè-né. Tanga jè xi ch'o tjin k'e nga ta koi kjoa-là tsojmì xi chineé bits'ón-jìin-là kjoa xi mokjeiin-là it'aà ts'e Nainá jña xita xi k'ejí.

²¹ Ìsaá ndaà-ne nga mì yijo chjineé, nga mì xán s'ioaá, nga nímé kjoa xi s'eén jè xi síkìts'ón-jìin-là jè 'ndsì nga sakó-là jé.

²² Kóni s'ín mokjeiin-lè it'aà ts'e kjoa koi, tà jíí tíjìin takoìn kò Nainá. ¡Mé ta ndaà-là jè xi mì kjo'in bínè-là yijo-là k'e nga tíjngoò ikon nga ndaà tjin kjoa xi s'ín!

²³ Jè xi jò tjin-là k'e nga mé tsojmì xi kine, jé tíhónè-là yijo-là nga mìkì tíjngoò ikon tsojmì xi kine. Tsà mìkì tíjngoò takoán k'e nga mé kjoa xi s'eén, jé titsahonè-là yijo-ná.

15

¹ Jña xi jye kixi mokjeiin-ná it'aà ts'e kjoa xi tí'nde-ná mé xi s'eén, mochjeén-né nga tìkooa kichìkjoako-ná jña xita xi k'oas'ín mokjeiin-là nga mìkì tí'nde-là mé kjoa xi s'jin. Mìtsà tà jña kjoa xi ndaà sasén-ná kinchátsjiaá.

² Nga jngoò ìjngoaa, mochjeén-né nga k'oas'ín s'eén jè kjoa xi sasén-là jña xita xinguiáá xi kjondaà ts'e, mé-ne nga kijin-isa kjohítsjeèn-là jè kjoa xi mokjeiin-là.

³ Nga tìkooa jè Cristo mìtsà jè tsohótsji kjoa xi sasén-là yijo-là, tà saá it'aà ts'eé tsitasòn kóni s'ín tjit'aà xojon ts'e Salmo, nga tsò: “Én ch'o xi jí kichajno-lè, 'aán kiskaat'aà-na.”

⁴ Jña 'én xi kitjei nga sa kjòtseé, koií xá kitjei-ne nga kòkòya-ná mé-ne nga it'aà ts'e Xojon-là Nainá, tseé s'eén takoán tìkooa s'e-là kjoa'nchán inima-ná, mé-ne nga koma chíñakjoa-là it'aà ts'e Nainá.

⁵ Nainá xi ma-là tsjá-ná kjoatsetakòn kò xi ma-là sí'nchán-jìin inima-ná, k'oas'ín jngoò kjohítsjeèn kàtatsjá-nò nga jngoò ìjngoò kóni tsò Cristo Jesús,

⁶ mé-ne ngats'ioò ngàsòn jngoò jta jeya tìkíjna Nainá, Na'èn-là Jesucristo xi otíxoma-ná.

⁷ Koií kjoa-là k'oas'ín choétjò xinguiòo nga jngoò ìjngoò kóni s'ín kiskoétjò-nò Cristo mé-ne nga jeya kíjna-ne Nainá.

⁸ K'oaá xán-nò, jè Cristo Jesús, koií xá j'ii-ne nga j'ii síxájìin-là xita judío xi tjit'aà chiba-là kjoa ts'e circuncisión mé-ne nga tsakó-ne kjoakixi-là Nainá tìkooa síkitasòn kóni s'ín jye kitsjaà-là tso'ba Nainá jña xita jchínga kjìin-là.

⁹ Tìkooá koií xá j'ii-ne mé-ne nga jña xi mìtsà xita judío jeya síkíjna Nainá it'aà ts'e kjohimatakòn xi tjin-là Nainá kóni s'ín tíchja Xojon-là Nainá, nga tsò: Koií kjoa-là nga jeya síkíjna-lè jìin-là xita naxandá xi mìtsà xita judío. It'aà tsiji sé-lè sò xi ndaà tsò.

¹⁰ Ìjngoò k'a tjit'aà xojon ñánda nga tsò:

Jño xi mìtsà xita judío 'mì-nò,
tsjaá t'è-lá takòn kò xita naxandá-là Nainá.

¹¹ Ìjngoò k'a tjit'aà xojon ñánda tsò:

Jño ngats'ioò xi mìtsà xita judío 'mì-nò,
jeya tìkíjna Na'èn-ná,

ngats'ioò xi naxandá 'mì-nò jeya tìnachrjeè Nainá.

¹² Ìjngoò k'a tjit'aà xojon ts'e Isaiás ñánda tsò:

Jè tje-la Isai kitjot'aà jngoò-ne jts'én-la xi kotixoma-la jña xi mìtsà xita judío, kò jè jts'én jè koòt'aà ikon nga skóña-kjoa-la.

¹³ Nainá xi tsjá nga chiñakjoáá, kátatsjá yije-nò kjotsja kò kjoa'nchán nga mokjeín-nò it'aà ts'e, mé-ne nga isa ndaá chíñakjoa isa xi kò nga'ño-la Inima Tsjeè-la Nainá.

Pablo chi'nda-la Jesucristo

¹⁴ Tanga ndí 'ndsè, 'an tìjngoò takoàn xi it'aà tsajòn xi tijnò-nò tjín-nò kjondaà tikoá machiya-nò nga koma tijnò sikixiya-la xita xinguiòo nga ìjngoò jngoò.

¹⁵ Ndí 'ndsè, 'ño tíbeè-la takoàn nga tikjiì-nò xojon jè; tìchjà kixi-nò, mé-ne nga mìkiì jchàajìin-nò koni tsò xojon jè. Koií k'oas'ín tìsikitsjeèn-nò nga 'an kitjoé-na kjotjò-la Nainá k'e nga kitsjaà-na xá,

¹⁶ mé-ne nga 'an koma-na chi'nda-la Jesucristo it'aà ts'e xi mìtsà xita judío. Sìxákoáa 'én ndaà-la Nainá, mé-ne jña xi mìtsà xita judío ndaà sasén takòn-nè Nainá koni jngoò kjotjò xi 'ño sasén-la Nainá nga it'aà ts'e Inima Tsjeè-la Nainá jyeé kjòtsjeè.

¹⁷ 'An tjín-na mé kjoa-ne nga matsja-na it'aà ts'e Cristo ts'e xá xi tìs'iaàn.

¹⁸ Nì mé kjoa tjín xi ma'ño't'aà takoàn nga ma chjà, ta jè kjoa ts'e Cristo nga 'an síkjeén-na nga sìxákoáa jña xi mìtsà xita judío mé-ne nga koma sikitasòn-la Nainá. K'oaá s'ín kis'iaàn it'aà ts'e 'én xi kichjà kò it'aà ts'e xá xi kis'iaàn,

¹⁹ kò it'aà ts'e kjoaxkón xi okó kjoajeya-la Nainá kò it'aà ts'e nga'ño-la Inima Tsjeè-la Nainá. Jyeé ndaà kisingásoàn 'én ndaà-la Nainá xi kjoa ts'e Cristo, tsibìts'iaqo-na ján Jerusalén kóhokji nga jngoò itjandii-la skanda ján Ilírico.

²⁰ K'oaá s'ín tsibìnè-la yijo-na nga kichjàya 'én ndaà-la Nainá xi kjoa ts'e Cristo ya ì'nde ñánda kj'eé yá bénojmiya it'aà ts'e Cristo, mé-ne nga mì 'an kokoòya ndaà-la xita xi kj'eíi xi jye tsakóya ítjòn-la it'aà ts'e Cristo.

²¹ Koni s'ín tjit'aà Xojon-la Nainá nga tsò:

Skoe-né jña xita xi mì yá tsibénojmi-la it'aà ts'e;
kòchijaá-la jña xita xi kj'eé mé 'én 'nchré xi it'aà ts'e.

Kós'ín tìsikitsjeèn Pablo nga mejèn-la kjoì Roma

²² Kò kjìn k'a mejèn-na fikòn-nò tanga jña xá xi 'an tìs'iaàn ì ì'nde jé mìkiì tjò'nde-na nga ma fia.

²³ Tanga ì'ndeì nga jye jyehet'aà xá-na ijndé, kò tikoá kò kjìn nó tjín-la nga mejèn fikòn-nò,

²⁴ k'oaá s'ín tìsikitsjeèn, k'e nga kjián ján España, k'eé kichjàjto-nò mé-ne nga skoejkon-nò. K'e nga jye chibá jngoò tjoà koma kinchako-ná nga koma kjián ñánda nga tìfia.

²⁵ Tanga ì'ndeì ján Jerusalén tìfia, nga tífiko jngoò-la nga'ño jña xita-la Cristo xi ya títajna.

²⁶ Nga jña xita naxandá-la Nainá xi títajna Macedonia kò Acaya kjòtsja ts'e-né nga tsibíxkó chiba ton koni jngoò nga'ño xi kjotjò ts'e xita ima naxandá-la Cristo xi títajna ján Jerusalén.

²⁷ Ngui kjòtsja ts'e-né koni s'ín kis'ìin jña xita koi. Nga tjen-t'in-la kjondaà. Tsà jña xita xi mìtsà xita judío k'oaá s'ín kisakò-la kjondaà ya ijìin inima-la it'aà ts'e xi ngui xita judío, tikoáá tjínè-la jña xi mìtsà xita judío nga kinchako nga tsjá-la tsojmi xi mochjeén-la.

²⁸ K'e nga jye kjoehet'aà kjoa koi nga jye sìngatsja jè ton xi kjòxkó, ìkjoàn skotsejèn jngoò tjò-nò, k'eé kjián ján España.

²⁹ Be-ná nga 'ñó ndaà sùichikon-t'in-ná Cristo k'e nga kùjchokon-nò.

³⁰ Tanga jñò ndí 'ndsè, bìtsi'bà-nò it'aà ts'e Na'èn-ná Jesucristo ko it'aà ts'e kjoatjòcha xi tsjá-ná Inima Tsjeè-la Nainá, tìnókjoat'aà-là Nainá xi it'aà ts'an,

³¹ mé-ne nga kosìko-na Nainá it'aà ts'e xita xi mìkiì mokjeiín-la xi títsajna ján Judea, ko mé-ne nga jè tòn xi tífiko-la xita-la Cristo xi títsajna ján Jerusalén ndaà kátasasén-la,

³² mé-ne nga, tsà k'oas'ín mejèn-la Nainá, nga ko kjotsja-na kùjchokon-nò, tìkoa koma ndaà siikjáyaya chiba nachrjein-ko-nò.

³³ Jè Nainá xi tsjá-ná kjoa'nchán kàtijnako-nò ngats'ioò. K'oas'ín kàtama.

16

Kós'ín kisihixat'aà Pablo ngats'ii xita naxandá-la Nainá xi títsajna Roma

¹ It'aà tsajòn sngatsja-nò jè tichjaá Febe, jè xi síchját'aà naxandá-la Cristo xi ya tíjna Cencrea;

² ndaà chjoétyò xita jè nga xinguiáá ma nga tìkoaá mokjeiín-la it'aà ts'e Na'èn-ná nga k'oaá s'ín ok'in-la xi xita-la Cristo. Tichját'aà-là nita mé xi kochjeén-la nga 'ñó kjín xita tsasìko, tìkoa 'an kisichját'aà-na.

³ Tìixat'eì jè Priscila ko Aquila, jñà xita xi taña nìxákjoè-jen it'aà ts'e Cristo Jesús.

⁴ Jñà xita koi kjomeè kinik'en xi kjoa ts'an. Mìtsà tà 'an xi tsjaà-la kjondaà tìkoa tsjá-la kjondaà ngats'ii xita naxandá-la Cristo xi mìtsà xita judío.

⁵ Tìkoa tìixat'eì jñà xita naxandá-la Cristo xi maxkóya ya ni'ya-la Priscila ko Aquila. Tìixat'eì jè Epeneto xi 'ñó matsjake nga jè kòkjeiín ítjòn-la it'aà ts'e Cristo ya i'nde Acaya.

⁶ Tìixat'eì jè María, chjoón xi 'ñó ndaà kisixá it'aà tsajòn.

⁷ Tìixat'eì jè Andrónico ko Junias, xi xinguiáá ma nga taña tsitsajna'ya-jen ndayá. Jñà xita xi tsibixáya-la Cristo 'ñó matsjakeè xita koi. Ko isa ítjòn kijtseèxkon 'én-la Cristo koni 'an.

⁸ Tìixat'eì jè Amplias, jè xita xi 'an 'ñó matsjake it'aà ts'e Na'èn-ná.

⁹ Tìixat'eì jè Urbano xi taña síxako-na it'aà ts'e Cristo Jesús ko jè Estaquis xi 'an 'ñó matsjake.

¹⁰ Tìixat'eì jè Apeles xi ndaà kixi mokjeiín-la it'aà ts'e Cristo. Tìixat'eì jñà xita xíkjín xi ya títsajna ni'ya-la jè Aristóbulo.

¹¹ Tìixat'eì jè Herodión xi xinguiáá ma. Tìixat'eì jñà xita xíkjín xi ya títsajna ni'ya-la Narciso xi Na'èn-ná títsajna.

¹² Tìixat'eì jè Trifena ko Trifosa jñà íchjín xi 'ñó síxá-la Na'èn-ná, ko tichjaá Pérsida xi 'ñó matsjachaá nga tìkoa ndaà síxá-la Nainá.

¹³ Tìixat'eì jè Rufo xi xó jaàjiín-ne Nainá. Ko nea-la xi 'an k'oa tìs'ín beètakoàn koni tsà nea-na.

¹⁴ Tìixat'eì jè Asíncrito, jè Flegonte, jè Hermas, jè Patrobas, jè Hermes ko xita 'ndseé xi ya títsajna.

¹⁵ Tìixat'eì jè Filólogo, jè Julia, jè Nereo ko ndichja, ko Olimpas, ngats'ii xita xi mokjeiín-la it'aà ts'e Cristo xi ya títsajna.

¹⁶ Jñò nga jngoò ìjngoò, k'e nga síxat'aà xinguióo, nguì koó inima-nò tìixat'aà xinguióo nga ko okixi-nò. Ngats'ii xita naxandá-la Cristo xi i títsajna síhixat'aà-nò.

¹⁷ Ndí 'ndsè k'oaá s'ín bìtsi'bà-nò nga chítsejèn-là jñà xita xi síjòya ko xi síkìts'ón-jiín koni s'ín mokjeiín-nò, jñà xi kondra f'ii-la kjohítsjeèn koni s'ín kichità'ya jñò. Tìnchat'aaxín-la jñà xita koi.

¹⁸ Jñà xita koi, mìtsà Na'èn-ná Jesucristo síxá-la, tà yijo-laá síxátjì. 'Én sin 'én ndaà chja nga konachan-la xita xi mìkiì ndaà machiya-la.

¹⁹ 'An, matsjaá-na it'aà tsajòn nga jye ndaà na'ya-nò nga ndaà nìkitasòn. Tanga 'an mejèn-na nga xitá chjinee kàtama it'aà ts'e kjoa xi ndaà tjín. Kò jñà kjoa xi ch'o tjín, kj'eè kii na'ya-nò.

²⁰ Jè Nainá xi tsjá-ná kjoa'nchán, tà chibaá chija-là nga ya sikkijnangui ndsokòò jè xitá nejí mé-ne nga koma kinchanè. Kjonndaà-là Na'èn-ná Jesucristo kàtijnakò-nò.

²¹ Tísihixat'aà-nò jè Timoteo xi taña nìxákjoò-jen, kò Lucio, kò Jasón kò Sosípater jñà xi xitá xinguiia ma.

²² 'An xi Tercio mì-na, xi tikjiì-nò xojon jè, it'aà ts'e Na'èn-ná, sìhixat'aà-nò.

²³ Tìkoá tísihixat'aà-nò Gayo; 'an jí tijnáa i ni'ya-là nga tìkoá jí bixofña ngats'ii xitá naxandá-là Cristo. Tísihixat'aà-nò Erasto xitá xi bitjò ton ts'e ni'ya osen; tìkoáá sìhixat'aà-nò jè 'ndseé xi 'mì Cuarto.

²⁴ Ngats'ioò, jè kàtijnakò-nò kjonndaà-là Jesucristo xi otíxoma-ná.

'Én xi fehet'aà-ne

²⁵ Jeya kàtijná jè Nainá xi tijnakò-nò. Jè xi komà tsjá-nò nga'ñó tìkoá komà kixi sikkítsajna-nò koni tsò 'én ndaà-là Nainá xi 'an okoòya-nò kò jñà 'én xi nokjoàyajiln-nò it'aà ts'e Na'èn-ná Jesucristo. Nga jyeé tí'ya-là kjoa xi tjí'ma-là Nainá skanda sa kjòtseé;

²⁶ tanga i'ndeí jye ki'ya-là koni s'ín tíchja Xojon-là Nainá xi kiskii jñà xitá xi kiichja ngajo-là Nainá kjòtseé. K'oaá s'ín tíchja kjotíxoma-là Nainá xi tijná nita mé nachrjein-nè. Jè kjoa'ma-là Nainá, jye kis'enojmí yije-là ngats'ii xitá naxandá xi tjín nga títsa isò'nde mé-ne nga kàtasíkitasòn-ne koni s'ín mokjeiín-là.

²⁷ Jè Nainá xi tajngoò ma-ne, xi tjín-là kjoachjine, kàtas'e-là kjoa jeya it'aà ts'e Jesucristo nita mé nachrjein-ne. K'oas'ín kàtama.

Xojon carta-la San Pablo xi kiskii ítjòn-la xita naxandá-la Cristo xi títsajna Corinto

Kó tsò Pablo nga síhixat'aà jñà xita naxandá-la Cristo xi títsajna Corinto

¹ An xi 'mì-na Pablo, xi xó k'oas'ín kinokjoà-na nga 'an tsibíxáya-na Cristo Jesús, nga k'oas'ín kjòmejèn-la Nainá. Títsanìhixat'aà-nòjèn kò Sóstenes xi 'ndsee chibá it'aà ts'e Cristo.

² Tikjiì-nò xojon carta jè, jñò xi naxandá-la Cristo maà xi títsajnaà ján Corinto, xi jye kisìtsjeè-nò Nainá nga ya títsakjoòkoo Cristo Jesús nga xó k'oas'ín jaàjìin-nò Nainá mé-ne nga xita tsjeè-la komaà kò ngats'ìi xita xi xki xi ján chjat'aà-la nga jeya síkíjna jè Nà'èn-ná Jesucristo xi otíxoma-ná, tìkoà jè otíxoma-la xita koi. Xi Nà'èn-ná 'mì-lá, tìkoà Nà'èn-ná tsò-la jñà xita koi.

³ Nainá xi Nà'èn-ná, kò jè Jesucristo xi otíxoma-ná kàtatsjá-nò kjondaà kò kjoa'nchán ya ijìin inìma-nò.

'Én xi kùichja Pablo nga tsjá-la kjondaà Nainá

⁴ Kjit'aà nachrjein tsjaà-la kjondaà Nainá xi it'aà tsajòn koií kjoa-la jñà kjondaà xi kitsjaà-nò Nainá nga ndaà kisìchikon-t'in-nò it'aà ts'e Cristo Jesús.

⁵ Nga yaà it'aà ts'e Cristo, Nainá kisìchikon-t'in yije kjohìtsjeèn-la inìma-nò, kós'ín nokjoà, kò kós'ín machiya-nò 'én-la Nainá.

⁶ Nga k'oaa s'ín 'ya-la, nga jè 'én ndaà-la Nainá xi kjoa ts'e Cristo kjòkixiyaá ijìin inìma-nò.

⁷ Nímé kjotjò-la Nainá chjat'aà-nò k'e nga tákó títsachiñá-la nga kjoíì ìjngoò k'a Jesucristo xi otíxoma-ná.

⁸ Nainá tsjá-nò nga'ñó skanda k'e nga kjoehet'aà nachrjein, mé-ne nga nímé jè sakòt'aà-nò k'e nga kitjojen ìjngoò k'a Jesucristo xi otíxoma-ná.

⁹ Nainá xita kixi-né, síkitasòn-né koni s'ín tsjá 'én-la. Xó k'oaa s'ín kùichja-nò nga ya chraña kitsajnakjoòkoo Jesucristo xi ki'ndí-la tsò-la nga jè otíxoma-ná.

Mé-ne kjòjòya-ne naxandá-la Cristo ján Corinto

¹⁰ Ndí 'ndsè kò tichjaá, it'aà ts'e okixi xi kitsjaà-na Jesucristo xi otíxoma-ná, tìbits'ìbà-nò ngats'ioò, ngàsòn ngáya títsajnakoo xinguioo, mé-ne nga mì kojòya-ne kjohìtsjeèn-nò. Tajngoò kjohìtsjeèn tìkjeén, ngàsòn jchósòn-la nita mé kjoa-ne.

¹¹ Koií koxan-nò ndí 'ndsè, nga jñà xita ni'ya-la Cloé, tsibénojmi-na nga kjoasiì tjín-nò.

¹² Koií k'oas'ín tìxan-nò, tjín i'nga xita xinguiáa xi tsò: “An, jé Pablo fit'aà-la.” Tjín xi tsò: “An, jé Apolos fit'aà-la.” Tjín xi tsò: “An, jé Cefas [xi tìkoà Pedro 'mì] fit'aà-la.” Tjín xi tsò: “An, jé Cristo fit'aà-la.” ¿Mé-ne obixón-nò?

¹³ ¿A kjìn ya ma-ne Cristo? ¡Majìn! ¿A jè Pablo xi kisit'aà krò it'aà tsajòn? ¡Majìn! ¿A it'aà ts'eé Pablo komà bautizar? ¡Majìn!

¹⁴ Ndaà chjí-la Nainá, 'an, mìtsà yá xita kis'iaàn bautizar ya naxandá tsajòn, ta jè Crispo kò Gayo,

¹⁵ mé-ne nga mì yá xita kító-ne: “It'aà ts'eé Pablo komà bautizar.”

¹⁶ Saá tìbitsjeèn-na nga tìkoà kis'iaàn bautizar Estéfanos kò xita xíkjín, tanga mìkii bítsjeèn-na tsà kis'iaàn bautizar xi kjeíì xita.

¹⁷ Jè Cristo mìtsà koi xá kisikasén-na nga xita s'iaàn bautizar; koií xá kisikasén-na nga 'an kichjàya 'én ndaà-la Nainá. K'e nga chjàya, mìtsà 'én-la xita chjine síkjeén; majìn-na nga chija nga'ñó-la krò-la Cristo.

Jè Cristo, nga'ñó-la Nainá-né kọ kjoachjine-la Nainá-né

¹⁸ Jñà 'én xi t́nokjoáya it'aà ts'e Cristo nga k'en-t'aà krò, ta kjoa ská ma-la jñà xita xi ya t́jímaya ndiyá-la i'nde kjo'in. Tanga jñá xi jye titsabitjokàjñá kjo'in, k'oaá s'ín mokjeiín-ná nga jè 'én-la Cristo nga'ñó-la Nainá-né.

¹⁹ K'oaá s'ín t́chja Xojon-la Nainá nga tsò:

Jñà xita xi 'ñó t́jín-la kjoa chjine,
'aán kokoò-la nga nímé chjí-la kjoachjine-la.
'Aán kochrjeènguia kjohítsjeèn-la
jñà xita xi 'ñó machiya-la.

²⁰ Jñà xita xi 'ñó t́jín-la kjoachjine, kọ xi 'ñó chjine xojon kọ xi joóya-ne kjoa xi t́jín isò'nde, i'nde, ¿ñánda t́tsajnakọ kjoachjine-la? Jè Nainá, kisiskáya-la kjoachjine xi t́jín-la xita isò'nde.

²¹ Nainá 'ñó xita chjine, mìkì kitsjaà'nde-la xita nga it'aà ts'e kjoachjine-la isò'nde kijtseèxkon. Nainá k'oaá s'ín sasén-la nga ochrjekàjìin kjo'in jñà xi mokjeiín-la it'aà ts'e 'én ndaà-la Nainá xi kjoa ts'e Cristo, 'én xi tsò-la xita koi, kjoa ská-né.

²² Jñà xita judío [mìkì mokjeiín-la] nga jé xi mejèn-la nga skoè kjoxkón xi 'ñó jeya t́jín, kọ jñà xi mìtsà xita judío [t́kooá mìkì mokjeiín-la] nga koií ótsji xi 'ñó kjoa chjine.

²³ Tanga ngajen k'oaá s'ín nokjoàya-jen nga krò k'en-t'aà Cristo [xita xi xó kisikasén-ne Nainá]. Jñà xita judío mìkì mokjeiín-la kjoa xi komàt'in Cristo, kọ jñà xi mì xita judío, kjoa ská ma-la.

²⁴ Tanga jñà xita xi xó jaàjìin-ne Nainá, xi xita judío kọ xi mìtsà xita judío, k'oaá s'ín mokjeiín-la nga jè Cristo nga'ñó-la Nainá-né kọ kjoa chjine-la Nainá-né.

²⁵ Kjoa-la Nainá xi ta kjoa ská tsò-la xita isò'nde, kjoa chjine-la Nainá-né. Ìsáá tse kjoachjine t́jín-la mì k'oaá-ne koni kjoachjine xi t́jín-la xita isò'nde. Kọ jè kjoa-la Nainá xi ta kjoa indaà tsò-la xita isò'nde, nga'ñó-la Nainá-né. Ìsáá tse nga'ñó t́jín-la mì k'oa-ne koni nga'ñó xi t́jín-la xita isò'nde.

²⁶ Jñò ndí 'ndsè kọ ndí tichjaá, t́kítsjeèn k'e nga sa jaàjìin-nò Nainá, chibaá ma-nò xi xita chjine tsò-nò xita isò'nde, kọ chibaá ma-nò xi xita ítjòn titsajnaà, t́kooa chibaá ma-nò xi ya ni'ya-la xita sko-la kits'ìon.

²⁷ Tanga Nainá jaàjìin jñà xita xi tsò-la xita isò'nde nga chiba kjohítsjeèn t́jín-la mé-ne kosobà-la jñà xita chjine. T́kooa jaàjìin Nainá xi tsò-la xita isò'nde nga nímé chjí-la mé-ne kosobà-la jñà xita xi xita ítjòn t́tsajna.

²⁸ Nainá jaàjìin xita ima kọ xita xi bitjongui xi tsò-la xita isò'nde nga nímé chjí-la, mé-ne kítjongui-ne jñà xita xi tsò nga jñà t́tsajna ítjòn,

²⁹ mé-ne njngòò xita xi 'nga s̀ikíjna-ne yijo-la nga nguixkon Nainá.

³⁰ Tanga t́jè-ne Nainá kisíkítsajnakọ-ná Cristo Jesús. K'oaá t́s'ín kis'ìin nga it'aà ts'e Cristo sakó-ná jè kjoachjine, nga jè Cristo, xita kixi s'ín-ná, xita tsjéè s'ín-ná kọ síkítsajnandeíí-ná kjoa ts'e jé-ná.

³¹ Koni s'ín t́chja Xojon-la Nainá nga tsò: “Jè xi jeya síkíjna yijo-la, ta saá Nainá jeya kátasíkíjna.”

2

¹ Ndí 'ndsè kọ tichjaá, k'e nga kikon-nò nga tsibenojmí-nò 'én-la Nainá, mìtsà koi 'én kichjà-nò xi maxkón-la xita k'e nga 'nchré kọ xi tsò-la nga 'én-la xita chjine.

² K'e nga tsohótijnako-nò, k'oaá s'ín kiskoòsòn-la; mìtsà mé kjoa xi kj'eíí kisíkítsjeèn; nguì tà 'én-la Jesucristo tsibenojmí-nò, nga jè-né xi krò k'en-t'aà.

³ K'e nga ijchò kènojímí-nò 'én-la Nainá, indaàkjoaá ijchoa. Titsakjoòn-ná skanda tíhotsé-ná.

⁴ K'e nga kichjàyajiìn-nò mìtsà 'én-la xità chjine kisikjeén mé-ne nga kòkjeiìn-nò. Ta saá jè Inìma Tsjeè-la Nainá tsakó nga'ñó-la nga kòkjeiìn-nò.

⁵ Mé-ne jè kjoa xi mokjeiìn-nò it'aà ts'e Cristo, mìtsà ya nchrobá-ne kjoa chjine-la xità, yaá nchrobá-ne nga'ñó-la Nainá.

Xi ngui kjoa chjine, it'aà ts'eé Nainá nchrobá-ne

⁶ Kixíí kjoa 'én chjineé nokjoàya-lajen jñà xità xi jye tímajchínga nga mokjeiìn-la it'aà ts'e Cristo. Tanga mìtsà kjoa chjine ts'e isò'nde nokjoàya-jen, ni mìtsà ts'e xità ítjòn xi tjín isò'nde xi jye tíchja nga'ñó-la.

⁷ 'Én xi nokjoàya-jen, kjoa chjine ts'e Nainá-né, jè kjoachjine xi tíj'ma-la xi k'oas'ín kiskoòsòn-la skanda tisa kjòtseé nga jñá jeya kítsajnaá.

⁸ Nijngoò xità ítjòn xi tjín isò'nde kjòchya-la it'aà ts'e kjoa chjine koi. Tsà kjòchya-la, mì-là kii k'oas'ín krò kisik'en-t'aà Na'èn-ná Jesucristo xi tjín-la kjoa jeya.

⁹ Xojon-la Nainá, k'oaá s'ín tíchja nga tsò:

Jñà xità xi matsjakeè Nainá,
jè tjíndaà-la kjoa xi ni saá jngoò xità xi xkon beè-ne,
xi líká-la 'nchré-ne
xi kò inìma-la machiya-la.

¹⁰ Nainá, it'aà ts'e Inìma Tsjeè-la tsakó-najen kjoa koi. Nga jè Inìma Tsjeè-la Nainá ótsjiya yije-né skanda jñà kjoa xi mìkii ndaà fiya-ná it'aà ts'e Nainá.

¹¹ ¿Yá xità-ne xi machiya-la kó tsò kjohítsjeèn xi tíjiìn inìma-la xità xi kj'eíí? Tà jè tíjiìn inìma-la kó tsò kjohítsjeèn-la. K'oaá tís'ín tjín kjoa ts'e Nainá, nijngoò xità tíjiìn-la kó tsò kjohítsjeèn-la Nainá; ta jè Inìma Tsjeè-la tíjiìn-la.

¹² Ngajen, mìtsà jè inìma-la xità isò'nde kitjoé-najen. Jè Inìma Tsjeè-la Nainá kitjoé-najen, mé-ne nga jcha-najen kjoa xi Nainá kitsjaà kjotjò-ná.

¹³ 'Én koi, k'oaá s'ín nokjoà-jen koni s'ín okóya-najen Inìma Tsjeè-la Nainá. Mìtsà kjohítsjeèn ts'e xità isò'nde. 'Én Tsjeè-la Nainá bènojímí-jen xi kjoa ts'e Inìma Tsjeè-la.

¹⁴ Jè xi mìtsà xità-la Cristo, mìkii machiya-la 'én xi ts'e Inìma Tsjeè-la Nainá. Tà kjoa ská ma-la. Mìkii fahas'en-jììn-la, nga mochjeén-né nga it'aà ts'e Inìma Tsjeè-la Nainá kìnchátsjiyaá.

¹⁵ Tanga jè xità xi Inìma Tsjeè-la Nainá tíjnajiìn inìma-la, maá-la ótsjiya yije nita mé kjoa-ne. Tanga it'aà ts'e xità jè, mì yá xità xi koma-la kohótsjiya kjohítsjeèn-la.

¹⁶ K'oaá s'ín tíchja Xojon-la Nainá nga tsò: “¿Yá-né xi beè kjohítsjeèn-la Nainá? ¿Yá-né xi koma kòkòya-la?” Tanga jñá tjín-ná kjohítsjeèn xi ts'e Cristo.

3

Jñà xità xi síxá it'aà ts'e Nainá ján Corinto

¹ Jñò ndí 'ndsè kò tichjaá, mìkii komà kos'ín kichjàkò-nò koni xità xi ndaà tíjiìn inìma-la Inìma Tsjeè-la Nainá. Ta k'oaá s'ín kichjàkò-nò koni tsà taxkí xità isò'nde xi tà kjoa ts'e yijo-la ótsji, koni tsà tákó ndí ixti xó xi it'aà ts'e Cristo.

² Mìtsà 'in tjín 'én xi tsakoòya-nò; k'oas'ín ngaya-la koni ndí ixti xó xi sa nchi-hoki, tà tsjín 'biì, mìtsà tsojmì tájaà kine. Jñò, kj'eè kii ndaà fahas'en-jììn-nò 'én-la Nainá, k'oaá ngaya-la koni tsojmì tájaà xi kj'eè kii ma chine skanda nachrjein j'ndeì.

³ Táko k'oaá s'ín 'nè koni s'ín xità xi kjoa ts'e yijo-la ótsji. Machinicha-nò xinguiò, chitiya-nò nita mé kjoa-ne. Kjoa koi, kjoa ts'e xità isò'nde-né.

⁴ K'e nga bixón: “An, xita ts'e Pablo-ná”, kọ jè xi ìjngò tsò: “An, xita ts'e Apolos-ná”, jñò, k'oaá s'ín nokjoà koni chja xi taxki xita isò'nde.

⁵ An xi Pablo 'mì-na, kọ Apolos, tà xita chi'nda-nájen xi nìxá-lajen Nainá. It'aà tsajeén kòkjeín-nò 'én-la Nainá, nga ìjngò ìjngò-jen ki'nè-jen xá xi Na'èn-ná kisingatsja-najen.

⁶ Aán tsakoòya-nò 'én-la Nainá, k'oaá ngaya-la koni jngò xita xi bitje xojmá, jè Apolos kiskinínda-la, tanga jè Nainá tísjchá.

⁷ Mitsà jè xita xi bitje tsojmì, ni mitsà jè xi kinínda-la xi chjí-la, tà jngò jè Nainá xi síjchá tsojmì xi sitje xi 'ñó chjí-la.

⁸ Jè xi bitje kọ xi kinínda-la, ta jngò xá tjín-ne xi s'ín. Tanga jè Nainá tsjá-la chjí-la koni tjín xá xi kis'ín nga jngò ìjngò.

⁹ Ngajen, yaá taña nìxákjoè-jen xá-la Nainá. Koa jñò-nò i'nde ñánda sitje 'én-la Nainá. Tíkoaá jñò-nò ni'ya-la Nainá xi ngajen bíndaà-jen.

¹⁰ Koni s'ín tjín kjondaà-la Nainá xi kitjóé-na, 'an-ná xi chjine chrjó íjtòn, xi tsibijnà tàts'en chrjó-la ni'ya. Kjeíí xitaá bíndaàsòn ni'ya. Tanga jñà xi bíndaàsòn, ndaà kàtasíkinda nga jngò ìjngò kós'ín kíndaà.

¹¹ Mì tì yá xi koma-la kíjna ìjngò-isa tàts'en chrjó ni'ya koni jè xi jye tíjna, nga jè Jesucristo tíjna koni tàts'en chrjó ni'ya.

¹² Tàts'en chrjó ni'ya, komaá sindaàsòn-ne kichá oro, plata, ndajo chjí xi 'ñó ndaà kjoàn, nas'ín yá, nas'ín xka paja, o xka ndiji.

¹³ Tanga jñà xá xi s'ín nga jngò ìjngò xita, k'eé jcha-la jè nachrjein k'e nga sindaàjìin-la xita. Nachrjein jè, ni'ín kjoíko, koa jè ni'ín skót'aà nga jngò ìjngò skaya xá xi komà.

¹⁴ Tsà jngò xá kichikjoako-la ni'ín xi skót'aà, tjoé-la chjí-la jè xita xi kíndaàsòn.

¹⁵ Tanga tsà jè xá xi kisindaàsòn, tsà kitì, chijaá chjí-la. Tanga jè xita kitjokàjìin kjo'in koni jngò xita xi bitjokàjìin ni'ín.

¹⁶ Jñò, za mitsà tíjìin-nò nga ni'ya ingo tsjeè-la Nainá 'mì-nò? Nga jè Inima Tsjeè-la Nainá tíjnajìin-nò.

¹⁷ Tsà yá xita xi mejèn-la sükits'ón-jìin-la ni'ya tsjeè-la Nainá, Nainá tíkoaá sükits'ón-jìin-la jè xita xi k'oas'ín s'ín. Nga jè ni'ya-la Nainá, tsjeè-né. Koa jñò-nò xi ni'ya tsjeè-la Nainá 'mì-nò.

¹⁸ Kì yijo-nò chonachan-là, tsà yá xi k'oas'ín síkítseèn nga 'ñó tjín-la kjohítsjeèn xi ts'e kjoa chjine-la isò'nde, ta saá kós'ín kàtas'ín koni tsà tsjìn-la kjohítsjeèn, mé-ne nga nguì xita chjine koma-ne.

¹⁹ Jè kjoa chjine-la xita isò'nde, it'aà ts'e Nainá, kjoa ská tsò-la. Xojon-la Nainá, k'oaá s'ín tíchja nga tsò: “Nainá, k'oaá s'ín s'ín nga jñà xita chjine, tíjñà-ne kjoa maña-la kixojìin-ne.”

²⁰ Jè Xojon-la Nainá, ìjngò k'a tjít'aà ñánda tsò: “Nainá, beè-né nga nímé chjí-la kjohítsjeèn-la xita xi chjine tsò-la yijo-la.”

²¹ K'oaá ma-ne, jñò, kì ñjngò xita xi 'nga nìkíjna. Nga ngats'ìi xi tjín, kjondaà tsajòn yije-nò.

²² Tsà jè Pablo, tsà jè Apolos, tsà jè Cefas [xi tíkoa Pedro 'mì], tsà jè isò'nde, tsà jè kjoabinachon, tsà jè kjoa biyaà, tsà jè nachrjein i'nde, tsà jè nachrjein xi sa nchrobá, kjondaà tsajòn yije-nò.

²³ Jñò, ts'e Cristo-nò, koa jè Cristo ts'eé Nainá.

4

Xá-la xita xi tsibíxáya-la Jesús

¹ K'oaá s'ín jchatakòn-nájen koni xita chi'nda xi síxá-la Cristo, nga ngajen kjòngatsja-jen nga kókóya-jen kjoa tíj'ma-la Nainá.

² Jngoò x̄ita xi xá mangatsja, mochjeén-né nga kàta'ya-la nga kixi síkitasòn xá-la.

³ 'An, mìkiì s̄ikájnoa xi ìt'aà tsajòn kó tsò kjohítsjeèn-nò, a ndaá t̄is̄ikitasoàn, a xi ch'oo t̄is̄ikitasoàn xá xi 'an kjòngatsja, kò kó s'ín s̄ikítsjeèn j̄nã x̄itaxá xi b̄indaàj̄iìn-la x̄ita ìsò'nde. Skanda 'an, mì t̄i k̄iì xan-na tsà ndaà t̄j̄in kò tsà ch'oo t̄j̄in xá xi t̄is'iaàn.

⁴ 'An, nas'ín k'oas'ín s̄ikítsjeèn nga tsj̄in-na jé, t̄anga mìtsà tsò-ne kjoa nga nguì x̄ita kixi-ná. Nga jè Na'èn-ná xi b̄indaàj̄iìn-na.

⁵ K'oaá ma-ne k̄i t̄a ch̄j̄a jé b̄inè-là xinguiòo nga ti kj'eè bijchó nachrjein. Ch̄iña-kjoaa k'e nga kjoíi Na'èn-ná xi s̄ihiseèn nga j̄cha-la kjoa xi t̄j̄i'ma ñánda nga j̄nò choòn. Koa s̄iikatsj̄eèn kó tsò kjohítsjeèn xi t̄j̄j̄iìn in̄ima-la x̄ita. Ikjoàn Nainá jeya s̄iikájna koni s'ín nga ok'in-la nga jngoò ìjngoò x̄ita.

⁶ Ndí 'ndsè kò tichjaá, koi 'én t̄ichjàkò-nò kjoa xi mangásòn ìt'aà ts'an kò ìt'aà ts'e Apolos xi kjondaà tsajòn mé-ne nga mìkiì s̄ikatònè-là koni tsò 'én-la Nainá. Kì k'oaá s'ín n̄ikítsjeèn nga jngoò ch̄i'nda-la Nainá ìsa ndaà nachrjenguiòò koni ch̄i'nda xi i'nga.

⁷ J̄nò, ¿mé-ne koa bixón-nò nga ìsa 'ñó ch̄j̄i-nò koni x̄ita xi i'nga? ¿Mé kjondaà xi t̄j̄in-nò xi mìtsà Nainá kitsjaà-nò? Tsà jye kitjoé-nò ngats'ìi kjondaà, ¿mé-ne nga 'nga ma-ne takòn koni tsà ta nga 'ñó tsajòn kisakò-nò?

⁸ J̄nò, k'oaá s'ín machiya-nò koni tsà jyeé ma yije-nò, koni tsà 'ñó x̄ita nch̄iná ìt'aà ts'e Nainá. K'oaá s'ín n̄ikítsjeèn koni tsà x̄itaxá ìtjòn titsajnaà kò ngajen mìtsà x̄itaxá titsajna-jen. Ndaà-la t̄j̄in tsà kixi kjoa nga otìxoma, mé-ne ngajen koma kotìxomako-nòjen.

⁹ 'An, k'oaá s'ín s̄ikítsjeèn, ngajen xi ìt'aà ts'e Cristo kisixáya-najen, Nainá k'oaá s'ín kiskoòsòn-la nga ngajen-nájen xi fehet'aà-ne, xi t̄j̄inè-najen nga kiyá-jen nga nguixkòn ìsò'nde, nga nguixkòn x̄ita kò àkjale. J̄nã x̄ita, t̄a nchikotsej̄eèn-najen nga tsja ma-la mé kjo'in xi t̄imat'in-jen.

¹⁰ Ngajen, xi kjoa ts'e Cristo, x̄ita ská 'yatakòn-najen; t̄anga j̄nò, ìt'aà ts'e Cristo, k'oaá s'ín 'ya-nò nga 'ñó t̄j̄in-nò kjoachj̄ine. Ngajen, k'oaá s'ín 'yatakòn-najen nga x̄ita indaàkjoa-nájen; t̄anga j̄nò, x̄ita tájaà-nò. Ngajen, mì yá x̄ita beèxkòn-najen; j̄nò, beèxkòn-nò x̄ita.

¹¹ Skanda jè hora jè, kjinchrá-najen, x̄indá-najen, tsj̄in-najen nikje xi ch̄ikjá-jen, 'ñó beètoòn-najen x̄ita, t̄a t̄jaàsòn-najen, tsj̄in-najen n̄i'ya.

¹² Skanda bijtaá-najen nga 'ñó n̄ixá-jen. K'e nga ch̄ja'on-kò-nájen x̄ita, ngajen, n̄ijét'aà-lajen Nainá nga k̄atasíchikon-t'in. K'e nga kondra f̄i-najen x̄ita, ch̄ikjoakoó-najen.

¹³ 'On ch̄jako-najen x̄ita, ngajen ndaà nokjoá-lajen. K'oas'ín beè takòn-najen koni tsà t̄jé-la ìsò'nde. Skanda nachrjein ì'nde, j̄nã x̄ita k'oaá s'ín beètakòn-najen koni tsojm̄i xi ningui-ne nga b̄ixteèn.

¹⁴ Koni s'ín t̄ikj̄iì-nò, mìtsà t̄is'ìin sobà-nò. Kjohítsjeèn t̄itsja jngoò-nò koni tsà ìxti ts'an xi matsjake.

¹⁵ Nas'ín te jm̄iì ma-ne xi okóya-nò ìt'aà ts'e Cristo, ta jngoò ma-ne xi na'èn-nò. 'An-ná xi komà na'èn-nò nga mokjeiìn-nò ìt'aà ts'e Cristo Jesús nga 'aán tsibenojm̄i ìtjòn-nò 'én ndaà-la Nainá xi kjoa ts'e Cristo.

¹⁶ K'oaá ma-ne b̄itsi'bà-nò nga k'oas'ín t̄ijchá yijo-nò koni 'an.

¹⁷ Koiì kjoa-la t̄is̄ikasén-nò Timoteo, xi ki'ndí-na xan-la nga 'ñó matsjake kò kixi síxá-la Na'èn-ná. Jè s̄iikítsjeèn-nò kós'ín t̄ijnakoà Cristo Jesús nga mokjeiìn-na ìt'aà ts'e, koa kós'ín okoòya-la x̄ita naxandá-la Cristo nga kijndá naxandá ñánda bijchoa.

¹⁸ T̄j̄in i'nga x̄ita xinguiòo xi 'ñó 'nga ch̄ja, k'oaá-là s'ín s̄ikítsjeèn tsà mìkiì kj̄ikon-nò.

¹⁹ Tanga tsà Nainá mejèn-la, kjikon nitoón-nò. K'e nga kijchoa, skoeè jñà xita xi 'nga chja, a nga'ño-la Nainá xi tjin-la a xi tà jè 'én-la xi 'nga chja.

²⁰ K'e nga jè Nainá tíhotíxoma jngoò-la xita, mìtsà ta kjoa ts'e 'én mochjeén, koó nga'ño-la Nainá mochjeén.

²¹ Jñò, ¿kós'ín mejèn-nò nga kjián? ¿A mejèn-nò nga kjo'in tsjaà-nò k'e nga kijchokon-nò, a xi mejèn-nò nga ko kjondaà-na ko kjotsja-na kijchokon-nò?

5

Jé xi kisakò ya jjiin naxandá-la Cristo ján Corinto

¹ Jye na'yà-la nga kjoachijngui tíma jjiin tsajòn. Kjoa xi tíma, skanda jñà xita xi mìki beèxkón Nainá, mì k'oaá s'ín. Nga yaá tíjnajiin jngoò-nò xita xinguiòo xi neajòn-la tsóhoko.

² Jñò, ¿mé-ne 'nga nikítsajna-nò yijo-nò? Mochjeén-né nga kjoaba kitsajnajñoò, ko jè xita xi kotjin jé tíhotsji, tinachrjekàjioòn.

³ 'An, kixi kjoa, kjiin tjina-nò, tanga kjohítsjeèn-la inima-na yaá tíjnajiin osen-nò. 'An, k'oaá ngaya-la koni tsà ya tíjnajiin-nò, jyeé kiskoòsòn-la mé kjo'in xi sinè-la jè xita xi k'oaá tjin jé tíhotsji.

⁴ Jñò, k'e nga koxkóya nga jeya sikijna Jesucristo xi otíxoma-ná, jè kjohítsjeèn-la inima-na yaá kijnajiin-nò, tikoá yaá kijnajiin-nò jè nga'ño-la Na'èn-ná Jesucristo. Ko it'aà ts'e Na'èn-ná Jesucristo,

⁵ xita jè, xita neí kàtangatsja yijo-la nga kàtas'e-la kjo'in, ko kàtasíkájno jé-la nga mì tì jé kohótsji-ne mé-ne nga kitjokàjiiin-ne kjo'in inima-la, k'e nga kjoii ijngoò k'a Jesucristo xi otíxoma-ná.

⁶ Mìki ndaà tjin nga 'nga nikítsajna yijo-nò. ¿A mì tíjiin-nò nga nas'ín ta chiba na'yo san sísan yije xikjin na'yo?

⁷ Tinachrjekàjioòn jè xita xi ótsji jé k'oaá ngaya-la koni tsà na'yo san xi mì tì ndaà-ne nga síkíts'ón-nò, mé-ne jñò k'oaá s'ín kjoàn koma-nò koni na'yo xitse ts'e inchrajín xi tsjin-la na'yo san. Nga jñò, jyeé kitjaàxìn-nò kjoa ts'e jé koni na'yo san jchínga nga jè Cristo k'en ngajo-ná koni jñà orré xi kisik'en xita Israel k'e nga Paxko.

⁸ Koi kjoa-la jñá, k'oaá s'ín kináchrjeé s'eí nga jyeé kisikítsajnandeí-ná Nainá kjoa ts'e jé, koni s'ín xita Israel k'e nga Paxko nga sítsjeé ni'ya-la nga faáxìn yije na'yo san. Jñá, k'oaá tis'ín chjaàxián kjoa ts'e jé ko kjoa ch'o ko ngui kjoatsjeé ko kjoakixi sikjeén k'oaá ngaya-la koni inchrajín xi tsjin-la na'yo san.

⁹ Jè xojon xi kisikasén ítjòn-nò, k'oaá kixan-nò nga mì ya koahitakoo jñà xita xi kjoa chijngui s'ín.

¹⁰ K'e nga k'oa kixan-nò, mìtsà jñà kisikaxkia jñà xita isò'nde xi kjoa chijngui s'ín, ko jñà xi tse mejèn-la, ko jñà xita chijé, ko jñà xi xkósòn beèxkón. Xita koi, xki xi ján satíkjoò. Ta jè xi koma kinchat'aàxìn-là tsà xìn isò'nde onguió.

¹¹ Jñà 'én xi kixan-nò, jè-né nga mì ya tsjahitakoo jñà xi tsò nga xita-la Cristo xi 'ndsè chibá tsà tákó kjoa chijngui nchis'ín, xita xi tse mejèn-la, xi xkósòn beèxkón, xi ch'o chajno-ná, xi xán 'biì, xi chijé s'ín. Jñà xita xi k'oaá s'ín, skanda mìki mochjeén nga kichikoo.

¹²⁻¹³ Mìtsà jñá oko-ná nga bíndaàjiiin-lá jñà xita isò'nde. Jè Nainá kíindaàjiiin-la jñà xita koi. Tanga jñò oko-nò nga kíndaàjiiin-là xita naxandá-la Nainá xi tsajòn. K'oaá ma-ne nga xan-nò, chjaàxiòn jè xita xi ch'o tís'ín xi ya tíjnajiin-nò.

6

Kós'ín s'iiin jñà xita-la Cristo nga tijñà xikjin koiindaàjiiin-la

1 Jñò, k'e nga tsà kjoasii tjin-nò kò xita xinguiòò, ¿mé-ne jñà mejèn-nò koiindaàjiin-nò jñà xitaxá xi mìtsà xita-la Cristo? ¿A mìtsà tà jñà kàtindaàjiin-nò xi xita naxandá-la Cristo?

2 ¿A mìtsà tíjiin-nò nga jñá xi xita naxandá-la Cristo 'mì-ná, jñá kındaàjiin-lá xita isò'nde? Tsà jñò koiindaàjiin-lá xita isò'nde, ¿a mì chíkjoa-nò nga ta jñò kındaàjiin-lá xita xinguiòò kjoa xi chiba tjin?

3 ¿A mìtsà tíjiin-nò nga tikoá it'aà tsaján kındaàjiin-lá àkjale? Tsà jñá kındaàjiin-lá àkjale, ¿a mì koma-ná kındaàjiin-lá xita xinguiáá kjoa xi tjin i isò'nde?

4 K'oaá ma-ne tsà ta kjoa ts'e isò'nde-né xi tjin-nò, tinókjoa jngoò-la xita 'ndsé xi jñò nachrjenguiòò nga 'mì-lá nimé chíj-lá, jè kàtindaàjiin-nò.

5 Koií koa xan-nò mé-ne nga kàtasobà-nò. ¿A mìtsà tíjna jngoò xita xinguiòò xi tjin-la kjoahítsjeèn nga koma-la koiindaàjiin-la xita xi 'ndsé chibá?

6 Mìtsà ta koií kjoa-la nga bixkàn-kòò xinguiòò, skanda yaá onguíkòò xinguiòò nguixkòn xitaxá xi mìkii beèxkòn Nainá nga bindaàjiin-nò.

7 Kixíí kjoa, ch'oó tjin kjoa k'e nga tíjñò bixkàn-kò-nò xinguiòò. ¿Mé-ne mìtsà ta saá nìkjeiín-lá xinguiòò k'e nga ch'o síkò-nò? Ta saá tikjeiín-la nga kàtasíchijé-nò.

8 Tanga jñò, k'oaá tis'in ch'o nìkòò xinguiòò, tíjñò nìchijé-lá.

9 ¿A mìtsà tíjiin-nò nga jñá xi mìtsà xita kixi, mìkii kjoahas'en-jiin i'nde ñánda tíhotíxoma Nainá? Jñá xita xi kjoa chíjngui s'in, jñá xi xkósòn beèxkón, jñá xita xi jye chixàn xi kjoa chíjngui s'in, jñá xita xi'ndè xi tì x'in xíkjin oyijòkò-ne,

10 jñá xita chíjé, jñá xita tse mejèn, jñá xita xi xán 'biì, jñá xi xita chjajno-la, jñá xita xi konachan-la xíkjin nga síchijé-la, kì yijo-nò chonachan-la nga jñá xita xi koatjin kjoach'o xi s'in mìkii kjoahas'en-jiin ñánda tíhotíxoma Nainá.

11 Jñò, k'e nga sa kjòtseé k'oa tis'in k'i'nè i'nga; tanga i'nde, jye kisaníjno kjoa ts'e jé-nò, jye xita tsjeè-la Nainá komà, kò jye xita kixi komà it'aà ts'e nga'ño-la Jesucristo xi otíxoma-ná kò it'aà ts'e Inima Tsjeè-la Nainá.

Kó s'in sìchjeén yijo-ná mé-ne nga jeya kíjna Nainá

12 Tjin i'nga xita xinguiòò xi tsò: “An tíj'ndeé-na nita mé kjoa xi s'iaàn.” Kixíí kjoa tíj'nde-né, tanga mìkii ok'in-la tsà k'oas'en yijeé ngats'ii kjoa; k'oaá ma-ne, 'an, mìkii tsjaà'nde-la yijo-na nga sìkijne-na jngoò kjoa.

13 Tikoáá tjin i'nga xi tsò: “Jñá tsojmì xi ma chine, ts'eé indso'ba, koa jè indso'ba mochjeén-la tsojmì xi ma chine.” Kixíí kjoa, tanga ingajò kjoa koi, Nainá sìkjehet'aà. Tanga jè yijo-ná, mìtsà kos'in kochjeén nga kjoa chíjngui s'eén; it'aà ts'e Nainá kochjeén; yijo-ná, ts'eé Nainá.

14 Koni s'in kis'iin Nainá nga kisìkjaáya-la Na'en-ná Jesús, jñá k'oaá tis'in kjoaáya-ná it'aà ts'e kjoa biyaá nga tjin-la nga'ño Nainá.

15 ¿A mìtsà tíjiin-nò nga jè yijo-ná, yaá tíkjoòkò ts'e Cristo? ¿A komaá sìkjeén yijo-la Cristo nga sìjngoòt'aà-lá ts'e chjoón ská? Majin, mìkii koma.

16 ¿A mìtsà 'yaà, k'e nga jngoò xita x'in, tsà chjoón ská kíjnakò, jngoò yijoó koma? Nga k'oaá s'in tíchja Xojon-la Nainá nga tsò: Ingajò xita koi, jngoò yijoó koma.

17 Tanga jè xi Na'en-ná tíjnakò, yaá majngoòkò inima-la kò ts'e Na'en-ná.

18 Tinchat'aaxin-la kjoa chíjngui. Jngoò xita, nita mé jé xi ótsji xi kj'eí jé, mìtsà yijo-la tíbeètoòn. Tanga jè xita xi kjoa chíjngui s'in, yijo-laá beètoòn.

19 ¿A mìtsà tíjiin-nò nga jè yijo-nò ni'ya-la Inima Tsjeè-la Nainá-né xi jñò kitsjaà-nò Nainá nga tíjnajiin inima-nò? Yijo-nò, mìtsà tì tsajòn-nò.

20 Nainá jye tsakatse-nò, tseé tsibíhíjtì-nò. Koií kjoa-la jchaxkón Nainá, ndaà tikjeén yijo-nò nga ts'eé Nainá.

7

Kjoa ts'e xita xi bixan

¹ It'aà ts'e 'én xi kichjìngui-ná nga kinikasén-ná xojoŋ nga bixón: “Ndaà-la tjín, jngoò xita x'in ko jè chjoón tsà mìkiì kixan.”

² Tanga koií kjoa-la nga 'ñó tjín kjoa chijngui, nga jngoò ìjngoò xita x'in kàtas'e-la chjoón, ko nga jngoò ìjngoò chjoón kàtas'e-la x'in.

³ Koni s'in tjín kjoatixoma ts'e kjoa bixan, jè x'in, ndaà kàtasís'in-la chjoón-la k'e nga kójnako, tikoá jè chjoón, ndaà kàtasís'in-la x'in-la.

⁴ Jè chjoón, mìtsà tije otixoma-la yijo-la, jè x'in-la otixoma-la. Tikoá jè x'in mìtsà tije otixoma-la yijo-la, jè chjoón-la otixoma-la.

⁵ K'e nga tsjáyijòkoo xinguioo, kì yijo-nò nìxkon-là xinguioo. Tà k'e-né tsà ngàsòn chibàya-nò kótjín nàchrjein mìkiì tsjáyijòkoo xinguioo tsà Nainá kìnókjoat'aà-là. Xi koma iskan mochjeén-né nga sis'in-là xinguioo nga mì jè xita neí skónachan-nò k'e nga tsà mì tì kii chíkjoa-nò nga xìn tsjáyijò-là xinguioo.

⁶ 'Én xi tixan-nò tà 'an-ná xi tìtsjaà'nde-nò; mìtsà kjoatixoma tìbìnè-nò.

⁷ Xi it'aà ts'an, mejèn-na tsà ngats'ì xita k'oas'in kàtìtsajna tajngoò, koni 'an, tajngoó tìjnaa. Tanga ìjngoò ìjngoò xita kits'ì-la kjoatjò xi Nainá kitsjaà-la, kós'in kìtsajna. Kàkj'eí kàkj'eí s'in tìtsajna nga ìjngoò ìjngoò xita.

⁸ Jña xita xi tìtsajna tajngoò ko jña íchjín xi jye k'en x'in-la, ndaà-la tjín tsà tà k'oas'in kìtsajna tajngoò koni 'an.

⁹ Tanga tsà mìkiì chíkjoa-la nga bìtsajna ìjngó, isaá ndaà-ne tsà kàtixan, mì k'oa-ne tsà tsjè sikk'en.

¹⁰ 'An, k'oaá s'in bìnè-la jña xita xi jye chixàn, nga mìkiì koma tsjeín xíkjín. Jè chjoón, mìkiì koma sikkìjna x'in-la. Mìtsà kjoatixoma ts'an xi tsjaà-nò; ts'ee Nainá.

¹¹ Jè chjoón xi tsjeiin x'in-la, mìkiì tji'nde-la nga kj'eí x'in kixan-ko ìjngoò k'a. Tikoá-ne kàtajoondaà-ne. Tikoá jè x'in, mìkiì tji'nde-la nga tsjeín chjoón-la.

¹² Jña xita xi i'nga, k'oaá xan-la, xi tà kjohìtsjeèn ts'an, mìtsà jè Na'èn-ná tsibìjna kjoatixoma jè. Tsà jngoò xita x'in xi mokjeiin-la 'én-la Nainá, tsà jè chjoón-la xi tìjnako, tsà mìkiì mokjeiin-la, tsà tsò ikon jè chjoón nga bìjnako, kàtìjnako, kì tsjeiin takòn jè chjoón-la.

¹³ Tsà jngoò chjoón xi mokjeiin-la 'én-la Nainá, jè x'in xi tìjnako, tsà mìkiì mokjeiin-la, tsà tsò ikon jè x'in nga bìjnako, kàtìjnako, kì tsjeiin takòn jè x'in-la.

¹⁴ Jè x'in xi mìkiì mokjeiin-la 'én-la Nainá, it'aà ts'e chjoón-laá matsjeè-né; tikoáá jè chjoón xi mìkiì mokjeiin-la, it'aà ts'e x'in-laá matsjeè-né. Tsà majìn, jña ìxti-la mìtsà xita kixi nga nguixkon Nainá, tanga i'ndeì ìxti-la, yaá chja-ne naxandá-la Cristo.

¹⁵ Tanga tsà jè chjoón xi mìkiì mokjeiin-la 'én-la Nainá tsà mejèn-la tsjeín x'in-la xi mokjeiin-la, kàtatsjeiin. Ko tsà jè xita x'in xi mìkiì mokjeiin-la 'én-la Nainá, tsà mejèn-la nga tsjeín chjoón-la xi mokjeiin-la, kàtatsjeiin. Jña xita koi mìkiì tjinè-la nga kjo'ño kìtsajnako xíkjín. Nainá, jè xi mejèn-la nga 'nchán kìtsajna.

¹⁶ Ji chjoón xi mokjeiin-lè it'aà ts'e Cristo, mìkiì tjiin-lè tsà koi nàchrjein it'aà tsiji koma kìtjokàjìn kjo'in x'in-lè. Ko ji xi x'in 'mì-lè nga mokjeiin-lè it'aà ts'e Cristo, mìkiì tjiin-lè tsà koi nàchrjein it'aà tsiji koma kìtjokàjìn kjo'in chjoón-lè.

¹⁷ Jngoò kjoa mejèn-na nga ndaà síkìjna-la ngats'ì xita naxandá-la Cristo, nga ìjngoò ìjngoò xita x'in ko chjoón, mochjeén-né nga kós'in kàtasíjchá yijo-la koni s'in kitsjaà-la Nainá koni s'in tìtsajna k'e nga Nainá kiihja-la nga xita-la komà.

18 Tsà tǵín i'nga xǵta xi jye tǵít'aà chǵba yijo-la kjoa ts'e circuncisióon k'e nga xǵta-la Cristo komà, tà k'oaá s'ín kàtǵjna. Tsà tǵín i'nga xi kj'eè kii tǵít'aà chǵba yijo-la, kì bít'aà chǵba-la yijo-la.

19 Xi kjoa ts'e circuncisióon, tsà tǵít'aà chǵba-nò ko tsà majǵn, mìtsà mé-ne. Jè xi chǵí-la nga ndaà sǵkitasòon jè kjotǵxoma-la Nainá.

20 Nga jngoò òjngoò, k'oaá s'ín tǵtsajna koni s'ín tǵtsajnaà k'e nga kiichja-nò Nainá.

21 K'e nga kiichja-lè Nainá, tsà chǵ'nda tǵjni, kì makájno-lè. Tanga ò'nde ò tsà koma kǵjnandeí-ne, ndaà s'e, tǵjnandeí-ne.

22 Jè xi chǵ'nda tǵs'ín k'e nga kiichja-la Nainá nga kòkǵeíin-la 'én-la, ò'nde tǵjnandeí-né òt'aà ts'e Cristo. K'oaá tǵs'ín tǵjn, jè xi tǵjnandeí k'e nga kiichja-la Nainá, ò'nde chǵ'nda-la Cristo-né.

23 Jǵnò, Nainá jye tsatse-nò, kì kii biì'nde nga xǵta xi kj'eí chǵ'nda 'nè-là.

24 Jǵnò ndí 'ndsè ko tichjaá, koni s'ín tǵtsajnaà nga jngoò òjngoò k'e nga kiichja-nò Nainá, k'oaá s'ín tǵtsajna ya nguixkon Nainá.

25 Òt'aà ts'e xǵta xi tǵtsajna tajngoò, tsǵjn jngoò-na kjotǵxoma xi ts'e Na'én-ná. 'An, k'oaá s'ín kosòon-la koni tsò kjohǵtsjeèn-na nga Nainá kis'e-la kjohimatakòon mé-ne nga òt'aà ts'an kjoaàt'aà takòon-na jǵnà xǵta.

26 Koií kjoa-la nga 'nó 'in choòon nachrjein ò'nde, 'an, k'oaá s'ín sǵkǵtsjeèn, òsá-la ndaà tǵjn, tà k'oas'ín kàtǵtsajna xǵta koni s'ín tǵtsajna skanda nachrjein ò'nde.

27 Tsà tǵín-lè chjoón, kì nǵkǵjna-jèn chjoón-lè. Tsà tsǵjn-lè, kì chjoón binchaàtsji.

28 Tsà kixein, mìtsà jè tǵbinchaàtsji. Ko tsà jngoò chjoón xongó xi kǵxan, tǵkooá mìtsà jè tǵhótsji. Ta jè-né, k'e nga jye kǵxan, kjoaá s'e-nò. 'An, mejèn-na nga mì kjoa kàtas'e-nò.

29 Ndí 'ndsè, mejèn-na nga kàtasǵjǵn-nò, nga chiba jchán nachrjein chija nga ma sǵxá-lá Nainá. Koií kjoa-la jngoò xǵta x'in xi tǵjn-la chjoón, k'oaá s'ín kàtas'ín koni tsà tsǵjn-la chjoón.

30 Ko jǵnà xǵta xi kjoaba tǵtsajnajǵn, k'oaá s'ín kàtǵtsajna koni tsà mì ba tǵtsajna. Koa jǵnà xi s'eí tǵjn-la, k'oaá s'ín kàtǵtsajna koni tsà mì s'eí tǵjn-la. Koa jǵnà xi tsojmì otse, k'oaá s'ín kàtas'ín koni tsà nímé tǵjn-la.

31 Ko jǵnà xi fitǵjngui-la kjoa xi tǵjn òsò'nde, k'oaá s'ín kàtas'ín koni tsà mì ya fitǵjngui-la; nga jè òsò'nde xi tǵtsajnasóan òjndé, kjoehet'aà-né.

32 'An, k'oaá s'ín mejèn-na nga nímé kjoa ts'e òsò'nde sǵkǵtsjeèn. Jè xǵta x'in xi tǵjna tajngoò, koií sǵkǵtsjeèn kjoa ts'e Nainá, mé xi s'ǵjn nga kòtsja-la Nainá.

33 Tanga jè xi jye chjoón tǵjn-la, koií sǵkǵtsjeèn kjoa xi tǵjn òsò'nde mé xi s'ǵjn nga kòtsja-la chjoón-la,

34 k'oaá ma-ne nga jò kjoa sǵkǵtsjeèn. Tǵkooá jè chjoón ka'àn xi jye k'en x'in-la ko jè chjoón xi tǵjna tajngoò xi kj'eè x'in tǵjn-la, koií sǵkǵtsjeèn kjoa ts'e Nainá mé-ne nga tsjeè sǵkǵtsajna-ne yijo-la ko inǵma-la. Tanga jè chjoón xi x'in tǵjn-la, koií sǵkǵtsjeèn kjoa ts'e òsò'nde mé xi s'ǵjn nga kòtsja-la x'in-la.

35 Kjoa xi benojmí-nò kjondaà tsajòon-nò, mìtsà xan-nò nga 'an ósǵjna ikon-nò, jè-né nga nguì ndaà sǵjchá yijo-nò nga nímé kjoa kiichjoà ikon-nò nga sǵxá-lá Nainá.

36 Tsà jngoò x'in xi kos'ín tǵsǵkǵtsjeèn nga mì ndaà tǵsǵko chjoón nga mì xátǵ tǵbixan-ko nga jye tǵhóto nó-la chjoón, k'oaá s'ín kàtas'ín koni s'ín sǵkǵtsjeèn, kàtǵxan; jè kjoa bixan, mìtsà jè nchihótsji.

37 Tanga tsà jngoò xi k'oas'ín bínè-la yijo-la ko inǵma-la nga majǵn-la kǵxan, nga kjohǵtsjeèn ts'e-né, ko tsà chǵkjoa-la yijo-la nga mìkǵ kǵxan, ko tsà jye kos'ín kiskoòsòon-la, ndaà tǵjn.

³⁸ Jñà x̄ita xi bixan, ndaà s'ín, tanga jñà xi mìkii bixan, ìsàá ndaà s'ín.

³⁹ Jngoò chjoón xi x'ín t̄jín-la, mìtsà t̄jñandeíí. K'eé-né tsà jye k'en x'ín-la nga jye t̄jñandeíí. Koma k̄ixan-ko n̄ita yá x'ín-ne xi matsjakeè tsà tanga mokjeíín-la 'én-la Nainá.

⁴⁰ 'An, k'oaá s'ín síkítsjeèn, ndaà-la t̄jín tsà mì t̄i kii k̄ixan-ne jñà íchjín ka'àn. T̄ikoáá 'an, k'oaá s'ín machiya-na nga jè Inima Tsjeè-la Nainá t̄ísíchiya-na.

8

Tsojmì xi sinchásòn yá nguixkòn xkósòn

¹ Jè kjoa xi ts'e yijo-la cho xi sík'en-la xkósòn-la x̄ita isò'nde nga tsjá-la k̄jotjò, jñò bixón-nò nga ngats'iaá jyeé t̄jín-ná kjoachjine ít'aà ts'e kjoa koi. Kixíí kjoa, tanga k'e nga t̄jín-ná kjoachjine, ma'ngaá takoán. Tanga k'e nga t̄jín-ná jè k̄jotsjacha, ìsàá ndaà 'biì-lá nga'ñó xinguiáá.

² Tsà t̄jín i'nga x̄ita xi tsò nga ndaà machiya-la, chijaá ìsa-la; k'j'eè kii beè yije koni s'ín t̄jínè-la nga skoe.

³ Jngoò x̄ita xi matsjakeè Nainá, jè Nainá ndaà beèxkon.

⁴ K'oaá xan-nò kó s'ín t̄jín, tsà ma chine yijo-la cho xi yá biyaàt'aà-la jñà xkósòn. T̄jìin-ná nga jñà xkósòn xi t̄jín i isò'nde, n̄imé nga'ñó t̄jín-la. Nga ta jngoò ma-ne xi Nainá.

⁵ Jñà x̄ita, k'oaá s'ín síkítsjeèn nga k̄jìn ma nainá xi t̄jín ján ngajmii ko ít'aà nangui. (Kixíí kjoa ít'aà ts'e x̄ita koi, k̄jìn ma xi nainá ko na'èn-ná tsò-la.)

⁶ Tanga jñá, 'ya-ná nga ta jngoò ma-ne Nainá xi Na'èn-ná nga ít'aà ts'eé inchrobà-ne n̄ita mé xi t̄jín. Jñá, koií xá t̄jín-ná nga síkitasoán xá-la. T̄ikoáá ta jngoò ma-ne xi otíxoma-ná, jè Jesucristo; nga ít'aà ts'eé nga'ñó-la kisindaá yije n̄ita mé xi t̄jín ko t̄ikoáá jñá, ít'aà ts'eé t̄itsajnakoaán.

⁷ Tanga mìtsà ngats'ii x̄ita t̄jìin-la kjoa koi. T̄jín i'nga x̄ita 'ndseé xi jye k'oas'ín k̄jò'nga-la kjoa ts'e xkósòn k'e nga t̄ikj'eè mokjeíín-la. Tanga i'ndeí, k'e nga kine yijo-la cho xi yá biyaàt'aà-la jñà xkósòn, k'oaá s'ín síkítsjeèn nga jñà nchibeèxkón xkósòn xi nainá tsò-la x̄ita isò'nde. Nga jò t̄jín k̄johítsjeèn-la, k'oaá s'ín fiya-la nga jé ótsji nguixkòn Nainá.

⁸ Jñò bixón-nó nga jñà tsojmì xi ma chine, mìtsà koi kjoa-la nga ìsa ndaà skoétjò-ná Nainá. Tsà k̄ichiaá mìtsà ìsa ndaà k̄itsajnaá ko tsà mìkii k̄ichiaá mìtsà ìsa ch'o k̄itsajnaá nga nguixkòn Nainá.

⁹ Kixíí kjoa, t̄j'nde-ná n̄ita mé xi chjineé. Tanga jñá jchósòn-lá yijo-ná nga mì k'oaá t̄jín xi chjineé mé-ne jñà x̄ita 'ndseé xi indaàjìin t̄jín k̄johítsjeèn-la mì jé sakò-la.

¹⁰ Tsà t̄jín jngoò x̄ita xinguiòo xi tsò nga t̄jín-la k̄johítsjeèn nga ma chine n̄ita mé yijo-ne, ko yaá fì kakjèn ya i'nde ñánda yaxkón xkósòn; tsà koi nachrjein-la ya skoe jngoò 'ndsé xi indaàjìin t̄jín k̄johítsjeèn-la nga ya t̄ikjèn. Jè x̄ita 'ndsé, k'oaá t̄is'ín s'jìn.

¹¹ K̄johítsjeèn-la x̄ita jè nga tsò nga maá chine yije n̄ita mé-ne, koií kjoa-la nga k̄jò'in síikjeíín jè 'ndsé xi indaàjìin t̄jín k̄johítsjeèn-la xi Cristo k'en ngajo-la.

¹² K'e nga jé binchaàtsjioò xi kondra ts'e x̄ita 'ndseé nga n̄ikits'ón-jñò k̄johítsjeèn-la xi indaàjìin t̄jín, jé binchaàtsjioò xi kondra ts'e Cristo.

¹³ 'An, tsà ta koií kjoa-la ts'e tsojmì xi kínee nga jé sakò-la jè 'ndsé, t̄ikoáá-ne, jngoò k'a mì t̄i kii skíne-na yijo, mé-ne nga mì jé sakó-la 'ndsé.

9

Kjoa xi t̄j'nde-la x̄ita xi tsibíxáya-la Cristo

¹ 'Aán tsibíxáya-na Cristo. T̄jñandeíí-ná. Xkoaàn kijtseè-na jè Jesús xi otíxoma-ná. Nga xá-la Na'èn-ná t̄is'iaàn, i'ndeí jñò-nò xi x̄ita-la Cristo maà.

² K'oaá xó tsò i'nga xita xi k'jeí nga mì xó tsà 'an tsibíxáya-na Cristo, tanga jñò, ndaà tíjìn-nò nga 'aán kisíxáya-na, nga it'aà ts'an-ná nga mokjeíin-nò 'én-la Nainá. K'oaá s'ín bitjo kixi kjoa.

³ K'e nga jngò xita kjònangui-na xi kondra ts'an, 'an, kíí xan-la nga ósikoaa yijo-na:

⁴ ¿A mìtsà tí'nde-najen nga k'oi-najen tsojmì xi chine-jen ko xi s'io-jen nga xá-la Nainá títsa'nè-jen?

⁵ ¿A mìtsà tí'nde-najen nga kitjako jngò-jen xi chjoón-najen ma xi 'én-la Nainá mokjeíin-la, koni s'ín xita xi i'nga xi tsibíxáya-la Cristo koni jña 'ndse Na'èn-ná ko Cefas [xi tikoa Pedro 'mì]?

⁶ ¿A tà 'an-ná ko Bernabé xi tíjìnè-najen nga k'jeí xá s'en-jen mé-ne nga sakò-najen tsojmì xi chine-jen?

⁷ ¿A tíjìn xita xi soldado síkitasòn xi tíjé bíchí-la yijo-la? ¿A tíjìn xita xi bíte tsojmì tjé, koa mìkì kine toò xi oja-la? ¿A tíjìn xita xi cho síjchá, koa mìkì 'bì tsjìn xi ochrje?

⁸ Kì k'oaá s'ín nìkítseèn nga tà kjohítseèn ts'an koni s'ín tìxan. Tikoaá tíchjaá kjotíxoma ts'e Moisés.

⁹ Kjotíxoma-la Nainá xi kiskì Moisés, k'oaá s'ín tíchja nga tsò: “Jña nchraja xi bínchi, kì na'ya bì'a tso'ba.” 'Èn koi mìtsà tsò-ne kjoa nga Nainá 'nó síkinda nchraja,

¹⁰ jña-ná xi síkinda-ná Nainá; nga it'aà tsaján tíchja kjotíxoma. Jè xi síkínchi nchraja ko xi sítsje tsojmì xi majchá-la, nchikoñaá-la nga tjoé chiba-la tsojmì xi majchá-la.

¹¹ 'Èn ndaà-la Nainá xi kjoa ts'e Cristo xi jìn tsakoòya-nòjen jè ngaya-la koni tachó xi kisítje jíin inima-nò. ¿A mì ndaà s'e tsà tjoé chiba-najen tsojmì xi majchá-nò?

¹² Tsà jña xi k'jeí xita tjoé chiba-la tsojmì xi tsajòn, ngajen, ¿a mìtsà isa ndaà tí'nde-najen nga tikoa tjoé-najen?

Tanga mì k'oaá s'ín títsa'nè-jen koni s'ín tí'nde-najen mé-ne nga mìkì koma sichjoà ikon-la 'én ndaà-la Nainá xi kjoa ts'e Cristo.

¹³ Jñò, ndaà 'yaà, jña xita xi ya síxá ya Ingo Ítjòn-la Nainá, koi tsojmì kine xi tíjìn ya i'nde jè; ko jña xi ya síxá i'nde tsjeè-la Nainá ya ñánda bínchásòn kjotjò xi tsjá-la Nainá jña xita, okoó chiba-la yijo-la cho xi ya bínchásòn.

¹⁴ Nainá k'oaá s'ín kitsjaà okixi: jña xi chjaya 'én ndaà-la Nainá xi kjoa ts'e Cristo yaá sakò-la tsojmì xi skine.

¹⁵ 'An, mì k'oaá s'ín tìsikjeén jña kjoa xi tí'nde-na. Tikoaá mìtsà koi xá tikjì-nò nga kos'ín síko-ná. Isaá-la ndaà tíjìn tsà kàtiyaà mì k'oaá-ne tsà tíjìn xita xi kjoáxìn-na kjotsja xi tíjìn-na nga ta kjotjò 'an chjaya 'én ndaà-la Nainá xi kjoa ts'e Cristo.

¹⁶ Nga 'én ndaà-la Nainá xi kjoa ts'e Cristo chjaya, mìkì tsà jeya síkíjna yijo-na. 'An, xó k'oaá s'ín tíjìnè-na nga 'an kichjaya; ima xó-na tsà mìkì kichjaya jè 'én ndaà-la Nainá xi kjoa ts'e Cristo.

¹⁷ Tsà tà kjohítseèn ts'aán-la nga kos'ín tìs'iaàn, tíjìnè-la nga kochjí-na, tanga mìtsà tà kjohítseèn ts'an, jè tìsikitasoàn xá xi kisingatsja-na Nainá.

¹⁸ Jè chí xi tìsakó-na, jè-né nga tsja tíjìn-na nga chjaya 'én ndaà-la Nainá xi kjoa ts'e Cristo nga mìtsà chí-na sije, nas'ín tí'nde-na nga jè 'én ndaà-la Nainá xi kjoa ts'e Cristo kótijnakon-na.

¹⁹ 'An tíjñandejí-ná, tanga i'nde, k'oaá s'iaàn koni tsà chí'nda-la ma ngats'ìi xita, mé-ne nga isa kjìn xita koma kichjà-la 'én-la Cristo nga kokjeíin-la.

²⁰ K'e nga ya tíjñajìn-la jña xita xinguiáa judío, k'oaá s'ín s'iaàn koni s'ín xita judío mé-ne nga koma kichjà-la 'én-la Cristo nga kokjeíin-la. Kixí kjoa

nga 'an, mìkii kjo'ńó tjinè-na nga kos'ín sikitasoàn koni tsò kjotíxoma xi kiskii Moisés, tanga k'e nga ya tijnajiiin-la jńà xita judío xi kjotíxoma-la Moisés títsajnajiiin, 'an k'oaá ti s'iaàn, ta jè xi mejèn-na nga koma kichjà-la 'én ndaà-la Nainá xi kjoa ts'e Cristo nga kokjeiín-la.

²¹ K'e nga ya tijnajiiin-la jńà xita xi mìtsà ya títsajnajiiin kjotíxoma-la Moisés, 'an, k'oaá ti s'iaàn koni tsà mì ya tijnajńaa kjotíxoma mé-ne nga koma kichjà-la 'én-la Cristo nga kokjeiín-la xita xi mì ya títsajnajiiin kjotíxoma. Mìtsà tsò-ne kjoa nga tijnat'aà xìn-la kjotíxoma-la Nainá. Yaá tijnajńaa kjotíxoma-la Cristo.

²² K'e nga ya tijnajiiin-la jńà xita xi indaàjiiin tjin kjohítsjeèn-la, 'an, k'oaá s'iaàn koni tsà tikoáá indaàjiiin tjin kjohítsjeèn-na mé-ne nga koma kichjà-la 'én-la Cristo xita koi. Yaá singásòn yijekoaa mé kjoa xi títsajnajiiin ngats'ii xita mé-ne nga koma kochrjekàjiiin i'nga-na kjo'in kjoa ts'e jé-la.

²³ K'oaá s'iaàn xi kjondaà ts'e 'én ndaà-la Nainá xi kjoa ts'e Cristo mé-ne nga s'e-na kjoa machikon-t'in it'aà ts'e 'én.

²⁴ Jńò, jyeé tjiin-nò k'e nga síská xita xi ongachikon, ngats'ii-né nga ongachikon, tanga ta jngoò-né xi tjoé-la kjotjò, ta jè xi síkijne. Jńò, k'oaá s'ín tichá yijo-nò nga xita-la Cristo 'mì-nò koni jngoò xita xi ongachikon mé-ne nga tjoé-nò kjotjò xi Nainá tsjá-nò.

²⁵ Jńà xita xi sískákjoò nga mejèn-la síkijne, ítjòn bitsajnandaà nga mì tijná síkjeèn-ne tsojmì xi ch'o síko; koi k'oas'ín-ne nga mejèn-la tjoé jngoò-la kjotjò. K'e nga jye ma iskan, jè kjotjò xi tjoé-la, ta bits'on-né. Tanga jńà bitsajnandaà nga tjoé jngoò-ná kjotjò xi mìkii bits'on nita kjé-ne.

²⁶ 'An, mìtsà k'oas'ín ongachikoan [kjoa ts'e xá-la Nainá] koni jngoò xita xi mìkii beè ñánda kijchò. Tikoáá mìtsà k'oas'ín [sìxá it'aà ts'e Nainá] koni s'ín xita xi ta 'beéjiiin isén k'e nga kjaán-ko xíkjin.

²⁷ 'An, k'oaá s'ín bìnè-la yijo-na nga kátas'e-na kjo'in mé-ne k'e nga kjoehet'aà nachrjein nga okoóya-la xita 'én ndaà-la Nainá xi kjoa ts'e Cristo, Nainá mì kító-na: “Nì mé chjí-la xá-lè.”

10

Kjoa ts'e xkósòn xi mìtsà kixi kjoa nga Nainá

¹ Jńò ndí 'ndsè ko tichjaá, kì nìchàajiiin-jèn nga jńà xita jchínga kjiin-ná, [k'e nga itjoiin naxandá Egipto], yaá tsibítsajnangui yije jjiin ifi [nga tsakó-la ndiyá], tikoáá ngats'ii tsatojiiin ndáchikon.

² K'oaá गया-la koni tsà komà bautizar ya jjiin ifi ko jjiin ndáchikon mé-ne nga xita-la Moisés koma-ne.

³ K'oaá tís'ín jngoò skaya tsojmì kiskine xi kjoxkón ndaà ts'e Nainá.

⁴ Tikoáá ta jngoò skaya nandá kits'ii xi kjoxkón ndaà ts'e Nainá, jè nandá xi ya naxi itjo-ne nga jè Nainá kitsjaà-la. Jè naxi, jè गया-la Cristo nga jè tsajmeèyakò ndiyá ñánda chinchimaya.

⁵ Tanga jńà xita jchínga koi, kjin jchán k'en ya ñánda nangui kixi choòn nga Nainá mìkii kisaseèn-takòn koni s'ín kis'iin ngats'ii xita jchínga koi, ta chibaá tsiningui-ne.

⁶ Jńà kjoa xi k'oas'ín komà, jńà okóya-ná nga mì jńà síkjaàjńaa kjoa xi ch'o tjin koni kis'iin jńà xita jchínga-ná.

⁷ Kì k'oa s'ín sandò xkósòn yaxkón koni kis'iin i'nga xita jchínga koi, nga k'oaá s'ín tichja Xojon-la Nainá nga tsò: “Jńà xita naxandá tsibítsajna nga tsakjèn koa kits'ii, ikjoàn tsasítjen nga kitè [nga jè kisítsjakò xkósòn].”

⁸ Tikoáá mìkii kjoa chijngui s'eén koni s'ín kis'iin i'nga xita jchínga koi, nga tà jngoò nachrjein kaàn jàn jmiì xita k'en.

9 Mì kì taxkì chít'aá Nà'èn-ná koni s'ín kis'iìn i'nga x̄it̄a jchínga koi; k'oaá komà-ne nga k'en nga kiskine-la yē.

10 Tikoáá kì í'ño-isa tsajét'aà-là Nainá koni s'ín kis'iìn i'nga x̄it̄a jchínga koi. K'oaá komà-ne nga jè àkjale-la kjoabiyaà kisik'en x̄it̄a koi.

11 Ngats'ii kjoa koi, k'oaá s'ín komàt'in jñà x̄it̄a jchínga-ná kò k'oaá s'ín kisijna chib̄a mé-ne sijìin-ná. Kisit'aà Xojon-la Nainá nga jchaá jñá mé kjo'in xi s̄inè-ná tsà k'oa t̄is'ín s'eén jñá xi titsajnakoaán nachrjein xi jye tífehet'aà.

12 K'oaá ma-ne jè xi k̄os'ín sík̄itsjeèn nga kix̄i t̄jna, k̄atasíkinda yijo-la nga mì jé sakó-la.

13 Jñò, kj'eé mé kjoa xi mat'ioòn nga tíchit'aà-nò xi ìsa 'ño 'in t̄jín koni mat'in x̄it̄a xi kj'eíi. Nainá, x̄it̄a kix̄i-né, jè k̄ata'ñót'aà takòn nga mìk̄iì tsjá'nde nga ìsa tsato chít'aà-nò koni k̄jì chík̄joako-nò. Tjè-ne Nainá kòkò ndiyá kós'ín k̄ichik̄joa-nò koni s'ín tíchit'aà-nò skanda k'e nga kjoehet'aà kjoa.

14 Jñò ndí 'ndsè, n̄i'itsé kjoa ts'e xkósòn n̄ik̄itsjeèn nga mejèn-nò jchaxkón.

15 'An, k'oaá s'ín t̄ichjà-nò koni x̄it̄a xi t̄jín-la kjoh̄itsjeèn. Jchósòn-là 'én xi xán-nò, a kix̄i kjoa.

16 K'e nga 'yoaá vino xi t̄jía ch̄itsín nga n̄ijét'aà-lá Nainá nga k̄atasíchikon-t'in, ¿a mìtsà ya n̄ingàsòn-koaá kò jn̄i-la Cristo? Kò k'e nga n̄ixkoayaá inchrājín, ¿a mìtsà ya n̄ingàsòn-koaá kò yijo-la Cristo?

17 Jñá, nas'ín 'ño k̄jìn ma-ná, jè inchrājín xi bichiaá, ta jngoò ma-ne; k'oaá ma-ne nga ngats'iaá, ta jngoò yijo ma-ná.

18 Chítsejèn-là x̄it̄a naxandá Israel, jñà xi kine yijo-la cho xi biyaà ya i'nde tsjeè nga tsjá-la kjotjò Nainá. X̄it̄a koi, yaá síngàsòn-kò kjotjò xi tsjá-la Nainá ya i'nde tsjeè.

19 K'e nga k'oa xan-nò, mìtsà xan-nò nga t̄jín-la okix̄i jñà xkósòn kò tsojmì xi sinchát'aà-la.

20 Jñà 'én xi xan-nò, jñà kjotjò xi f̄ikò jñà x̄it̄a xi mìk̄iì beèxkon Nainá, jñà f̄ikò-la in̄im̄a ch'o-la neíi, mìtsà jè sobà Nainá. 'An, majìn-na nga ya síngàsòn-koo in̄im̄a ch'o-la neíi.

21 Mìk̄iì ndaà t̄jín, k'e nga jye 'yò vino xi ts'e Jesús, xi otíxoma-ná, ik̄joàn s'ioo xi ts'e in̄im̄a ch'o-la neíi. Tikoáá mìk̄iì ndaà t̄jín, k'e nga jye bichioò inchrājín xi ts'e Jesús, ik̄joàn bichioò xi ts'e in̄im̄a ch'o-la neíi.

22 ¿A xi mejèn-nò síkjàn-là Nà'èn-ná nga k̄atachin̄i? ¿A ìsaá t̄jín-nò nga'ño mì k'oa-ne Nainá?

Jè k̄inchátsjiaá ítjoán kjondaà ts'e x̄it̄a xi kj'eíi

23 Tsò jñà x̄it̄a: “Tjì'nde-né n̄it̄a mé xi s'eén.” Kix̄i kjoa tjì'nde-né, tanga mìtsà ngats'ii kjoa nga ndaà t̄jín. Tjì'nde-né n̄it̄a mé kjoa xi s'eén, tanga mìtsà ngats'ii kjoa tsjá-ná nga'ño.

24 Mìtsà tà kjondaà tsajòn binchaàtsjioò ítjòn, jè t̄inchátsjioò ítjòn kjondaà ts'e x̄it̄a xi kj'eíi.

25 Maá ch̄inee n̄it̄a mé yijo xi sat̄jna ya ñánda biyaà cho. Kì k̄iì ch̄jinanguio ñánda j'ìi-ne mé-ne nga mì ch'o koma-la kjoh̄itsjeèn-nò.

26 Nga ts'eé Nà'èn-ná jè nangui kò ngats'ii tsojmì xi t̄jín-la.

27 Tsà jngoò x̄it̄a xi mìk̄iì mokjeíin-la 'én-la Nainá, k̄ichj̄a-nò nga k̄ichikoo, tsà mejèn-nò nga onguió, ch̄j̄inee yije-nò xi tsjá-nò. Kì mé xi ch̄jinanguio nga mì ch'o koma-la kjoh̄itsjeèn-nò.

28 Tsà jngoò x̄it̄a xi k̄itsò-nò: “Jñà tsojmì koi, yaá k̄isinhaàt'aà-la xkósòn.” Jè kjoa-la x̄it̄a xi okitsò-nò, k̄i k̄iì chine, mé-ne nga mì ch'o koma-la kjoh̄itsjeèn-la.

29 Mìtsà kjoh̄itsjeèn tsajòn xi t̄ixan-nò, ts'eé x̄it̄a xi okitsò.

Tanga tsà t́jín i'nga xítà xi skonangui nga kítso: “¿Mé-ne mì t́j'nde-na nga s'iaàn nítà mé kjoa xi mejèn-na nga ta koi kjoa-là nga mì ch'o koma-là kjohítsjeèn-là xítà xi kj'eíí?

³⁰ 'An, tsà tsjaà-là kjondaà Nainá it'aà ts'e tsojmì xi kinee, mìkì ndaà t́jín tsà ch'o kítso-là xítà j́nà tsojmì xi jye kàtsjaà-là kjondaà Nainá.”

³¹ Tanga j́nò, k'e nga bichioò kò tsà 'yò, nítà mé kjoa xi 'nè, k'oaá s'ín t'een nga jeya kàtjina Nainá.

³² Kì jé binchaàtsji-là j́nà xítà judío, kò xi mìtsà xítà judío, kò j́nà xítà naxandá-là Nainá.

³³ 'An, k'oaá s'ín s'iaàn yije koni s'ín sasén-là xítà xi kj'eíí. Mìtsà jè otsjià ítjoàn xi kjondaà ts'an, jè otsjià ítjoàn kjondaà ts'e xítà xi kj'eíí mé-ne nga kítjokàjìin-ne kjo'in.

11

¹ Koni s'ín s'iaàn 'an nga kjingui-là Cristo, k'oa t́s'ín chj́ingui-ná.

Kó s'ín skoexkón x'in-là j́nà íchjín k'e nga chjat'aà-là Nainá

² Ndí 'ndsè kò tichjaá, ndaà 'nè-nò nga nìkítsjeèn it'aà ts'an ngats'ìi kjoa xi s'iaàn; t́kooa nìkítasòn kjotíxoma xi 'an kiskatoya-nò.

³ Tanga mejèn-na nga kàtasijìin-nò nga jngoò ìjngoò xítà x'in, jè Cristo xi sko-là ma, kò jè chjoón, jè xítà x'in xi sko-là ma, koni jè Cristo, jè Nainá xi sko-là ma.

⁴ Tsà jngoò xítà x'in xi t́jtsa sko k'e nga chjat'aà-là Nainá, o k'e nga chjaya 'én-là Nainá, mìkì beèxkón Cristo nga jè t́jna sko-là.

⁵ Tanga tsà jngoò chjoón, tsà mìkì bíttsa sko k'e nga chjat'aà-là Nainá, o k'e nga chjaya 'én-là Nainá, mìkì beèxkón x'in-là nga jè t́jna sko-là. K'oaá ngaya-là koni tsà kisiyno-là.

⁶ Tsà jngoò chjoón xi majìn-là bíttsa sko, t́kooaá-ne kàtasijno-là tsja sko. Kò tsà masobà-là nga sijno-là, kàtjtsa sko.

⁷ Jè xítà x'in, mìkì t́j'nde nga kùjtsa sko, nga k'oaá s'ín 'ya-là koni Nainá, kò it'aà ts'e xítà x'in, 'yaá-là kjoajeya-là Nainá; tanga it'aà ts'e chjoón 'yaá-là kjoajeya-là x'in-là.

⁸ Jè x'in, mìtsà ya itjokàt'aà-ne ts'e chjoón; jè chjoón xi it'aà ts'e xítà x'in itjokàt'aà-ne.

⁹ Jè xítà x'in, mìtsà kjoa ts'e chjoón kisindaà-ne; tanga jè chjoón, kjoa ts'e x'in kisindaà-ne.

¹⁰ Koií kjoa-là jè chjoón t́jínè-là nga kùjtsa sko, seña-né nga beèxkón x'in-là, mé-ne nga t́kooa skoe-ne j́nà àkjalé.

¹¹ Tanga koni s'ín t́jindaà-là Na'èn-ná, tsà tsjìn chjoón, mìkì t́jna x'in; kò tsà tsjìn x'in, mìkì t́jna chjoón.

¹² Koni s'ín komà nga jè chjoón, it'aà ts'e x'in kisindaà-ne; t́kooa jè x'in, it'aà ts'e chjoón ts'ìin. Tanga it'aà ts'e Nainá nchrobá yije-ne.

¹³ J́nò, ndaà t́kítsjeèn: ¿A ndaà t́jín tsà mìkì t́jtsa sko j́nà íchjín k'e nga chjat'aà-là Nainá?

¹⁴ Tjé-ne isò'nde, bénojmya-ná nga kjoasobà-né k'e nga jè xítà x'in síndojò tsja sko.

¹⁵ Tanga ndaà tsejèn k'e nga jngoò chjoón xi ndojò kjoàn tsja sko. Kjoajeya ts'e-né. Koií xá kits'ìi-là tsja-là nga ndojò kjoàn, mé-ne nga kùjtsa-ne sko koni tsà payo.

¹⁶ Tsà t́jín xítà xi mìkì t́jngoò ikon koni bixón-jen, k'oaá s'ín kàtasijìin-là, ngajen kò naxandá-là Cristo, ngui k'oaá s'ín 'nè-jen, tsjìn xi kj'eíí s'ín.

Kjoa xi mìkì ndaà t́jín k'e nga bichiaá koni s'ín tsakóya Cristo

17 Nga tìkjiì ìsa-nò, mìkiì ndaà síkítsajna-nò, koií kjoa-la nga mìkiì ndaà tìtsa'nè k'e nga maxkóya; ch'o tìtsa'nè.

18 Jè kjoa xi tìjna ítjòn ít'aà tsajòn, k'oaá s'ín ki'nchrè, jñò xi naxandá-la Cristo 'mì-nò, k'e nga maxkóya, jò xó ya maà. Mejèn tsà mokjeiín-na tsà koií naxrjein-la tsà k'oaá s'ín tìtsa'nè.

19 Ta xó k'oaá-la komat'in-nò nga s'eé xita xinguiòo xi sùjòya-nò, mé-ne nga jcha-la yá-ne xi tjin-la okixi.

20 K'e nga maxkóya nga bichioò, koni s'ín tsakóya Cristo, mìtsà kixi kjoa nga jè nìkìtsjeèn-yaà koni s'ín komat'in Na'èn-ná k'e nga k'en.

21 K'e nga bichioò, tjin i'nga xita xi ítjòn kjèn tsojmì xi bijchóko; mìkiì koña-la xikjín nga tsjá ítse-la; skanda tjin xi mach'i. Tanga jña xita xi i'nga, imaá ijò-la nga mìkiì tsjá ítse-la.

22 Jñò, ¿a tsjìn-nò ni'ya ñánda nga bichioò ko nga 'yò? ¿Mé-ne nachrjekàngui-nò xita naxandá-la Cristo koa nìsobà-là xita ima xi tsjìn-la tsojmì xi kine? K'e nga k'oas'ín 'nè, ¿kó s'ín xán-nò? ¿A ndaà síkítsajna-nò? Majìn, mìkiì ndaà síkítsajna-nò.

*K'e nga jè Na'èn-ná tsakjèn-ko xita-la k'e nga kòjñò
(Mateo 26:26-29; Marcos 14:22-25; Lucas 22:14-20)*

23 Koni s'ín tsakóya-na Na'èn-ná, ti koií-ne xi 'an tsakoòya-nò. Jè nitjen k'e nga Na'èn-ná Jesús kitsobà'ñò xita, kiskoé inchrajín,

24 kitsjaà-la kjondaà Nainá, ikjoàn kisìxkoaya, kitsò: “Chjoé, jè-né xi yijo-na nga tìtsjaà kjotjò nga kiyá xi kjondaà tsajòn. K'oa tì s'ín t'een nga tixkoaya inchrajín, mé-ne nga síkìtsjeèn-nò ít'aà ts'an.”

25 K'oaá tìs'ín kis'ùin k'e nga jye tsakjèn, kiskoé chitsín, kitsò: “Vino xi tjiya chitsín jè, jè jní-na xi síkixiya kjoa xitse xi bìndaajìin-ko-nò. Jñò, k'e nga ìjngò ìjngò k'a s'ioo, k'oaá s'ín t'een mé-ne nga síkìtsjeèn-nò ít'aà ts'an.”

26 K'e nga ìjngò ìjngò k'a kichioò inchrajín jè, koa s'ioya vino chitsín jè, ít'aà ts'eé kjoabiyaà-la Na'èn-ná kìnókjoaya, skanda k'e nga kjoí ìjngò k'a Cristo.

Mikiì ma taxki bichikoaá Na'èn-ná

27 Nita yá xita-ne xi kòkjen inchrajín jè, o xi skoíya chitsín ts'e Na'èn-ná, tsà mìkiì skoexkón k'e nga kòkjen, jè tíhótsji ít'aà ts'e Na'èn-ná nga tíhochrjengui yijo-la ko jní-la.

28 Koií kjoa-la, ítjòn ndaà tìkìtsjeèn ijìin inìma-nò kós'ín tìtsajnakoo Nainá ko xita xinguiòo. Iskan tichioò inchrajín koa t'ioya chitsín ts'e Na'èn-ná.

29 Tsà yá xita xi kòkjen inchrajín koa skoí vino xi tjiya chitsín, tsà mìkiì síkìtsjeèn nga jè yijo-la Na'èn-ná, xita jè, kjo'ùin tìbínè-la yijo-la.

30 K'oaá ma-ne kjìn xita xinguiòo xi ch'in bít'aà-la koa tjin xi indaàkjoa tìtsajna, skanda jye kjò kjìn biyaà.

31 Tsà ndaà síkìtsjeén kós'ín tìtsajnakoaá Nainá ko xita xinguiáá, Na'èn-ná mìkiì kjo'in tsjá-ná.

32 Tanga tsà jè Na'èn-ná tsjá-ná kjo'in, koi-né nga mejèn-la síkixiya-ná mé-ne mìkiì kòkot'aà-ná kjo'in xi mìkiì fehet'aà nita kjé-ne xi tjoé-la jña xita isò'nde xi mìkiì beèxkón Nainá.

33 K'oaá ma-ne jñò ndí 'ndsè k'e nga maxkóya nga bichioò, chíñakjoa-là xinguiòo.

34 Tsà tjin i'nga xi 'ñó ijò-la, tichioò ni'ya-nò, mé-ne k'e nga koxkóya mì kjo'in tsjá-nò Na'èn-ná. Jña kjoa xi i'nga xi tjin ìsa-nò, k'e kìjchokon-nò kìndaajñaá.

12

Kó s'ín tjin kjoa chjine xi tsjá Inìma Tsjeè-la Nainá xi kjondaà ts'e naxandá-la

¹ Ndí 'ndsè kò tichjaá, 'an mejèn-na kàtasijìn-nò jǎnà kjoa chjine xi tsjá Inima Tsjeè-la Nainá.

² Jǎnò, ndaà tíjìn-nò k'e nga tikj'eè mokjeiín-nò 'én-la Nainá, yaá tsanguit'aà-là xkòsòn xi mikii ma chja nga xìn ndiyá kiikò-nò nga mìtsà kixi kjoa nga Nainá.

³ K'oaá xan-nò, niyá xita xi koma kitsò-la Jesús: “¡Ch'o kàtamat'in!”, tsà it'aà ts'e Inima Tsjeè-la Nainá tíchja. Tíkooá tsà mìtsà nga'ño ts'e Inima Tsjeè-la Nainá tíchja, mikii koma kitsò-la: “¡ji-né Jesús xi otixomai!”

⁴ Ya ijìn naxandá-la Nainá, kjin skaya kjoa chjine tjín kjoa ts'e xá xi síkitasòn xita, tanga jè xi tsjá kjoa chjine, tijè-ne Inima Tsjeè-la Nainá.

⁵ Jǎnà xita, kjin skaya xá tjín-la nga siixá-la Na'èn-ná, tanga tijè-ne Na'èn-ná xi maxá-la.

⁶ Kjin skaya nga'ño tjín kós'ín maxá, tanga tijè-ne nga'ño-la Nainá xi síxájin-la ngats'ii xita.

⁷ Nga jngoò ijngoò xita, tjoé-la jngoò kjoa chjine xi okó nga yaá tijnajìn inima-la Inima Tsjeè-la Nainá mé-ne nga ngats'ii xita naxandá-la Nainá kochjeén-la kjondaà xi tjoé-la.

⁸ Xi it'aà ts'e Inima Tsjeè-la Nainá tjín xita xi 'biì-la 'én xi tjín-la kjohítsjeèn; koa tjín i'nga xi 'biì-la 'én xi tjín-la kjoa chjine, nga tijè-ne Inima Tsjeè-la Nainá tsjá.

⁹ Tjín xi tjoé-la kjoachjine nga ndaà mokjeiín-la nga tijè-ne Inima Tsjeè-la Nainá tsjá-la, tíkooá tjín xi tjoé-la kjoachjine nga síndaà-ne xita xi xk'én, nga tijè-ne Inima Tsjeè-la Nainá tsjá-la.

¹⁰ Tjín xi tjoé-la kjoachjine nga ma-la s'ín kjoxkón xi ndaà tjín, kò xi ma-la chja ngajo-la Nainá, kò xi machiya-la mé inima xi tíxájin inima-la xita xi chja. Kò tjín xi tjoé-la nga ma-la chja 'én xi kjeíí tsò xi mì yá xita fiya-la, tíkooá tjín xi ma-la síkatoya 'én xi kjeíí tsò xi mì yá xita fiya-la.

¹¹ Tijè ta jngoó-ne Inima Tsjeè-la Nainá xi síxá it'aà ts'e ngats'ii kjoa koi nga síka'bí-la nga jngoò ijngoò xita kjoachjine xi jè mejèn-la nga tsjá-la.

¹² Yijo tsaján, kjin jchán skaya tjín-la; tanga koni s'ín tíkjoò, ta jngoò ma-ne yijo. Naxandá-la Cristo, k'oaá tis'ín tjín, ta jngoò ma-ne.

¹³ Jǎnà xi xita judío kò xi mìtsà xita judío, xi xita ch'inda títsajna kò xita xi títsajnandeíí ta jngoò ma-ne. Ngats'iaá jǎnà, tà ngásòn komaá bautizar it'aà ts'e xi tijè-ne Inima Tsjeè-la Nainá nga jngoò naxandá-la Nainá komaá koni tsà jngoò yijo. Nga jngoò ijngoá, Nainá kitsjaà-ná xi tijè-ne Inima Tsjeè-la.

¹⁴ Jè yijo-ná, mìtsà tà jngoò skaya tjín-ne; kjin jchán skaya tíkjoòya.

¹⁵ Tsà jè ndsokoaá kitsò: “An, mìtsà tsja xita ma, mìtsà ya chjà-na jè yijo.” Mìtsà koi kjoa-la nga okitsò nga mì ya chja-ne yijo.

¹⁶ Tsà jǎnà líká kitsò: “An, mìtsà xkon xita ma, mìtsà ya chjà-na jè yijo.” Mìtsà koi kjoa-la nga okitsò nga mì ya chja-ne yijo.

¹⁷ Tsà kóhokji yijo-ná, tsà nguì xkoaán koma, ¿kós'ín kjiná'ya-ná? Tsà jè yijo-ná, tsà nguì líká koma, ¿kós'ín kijne-ná?

¹⁸ Tanga Nainá nga jngoò ijngoò skaya yijo-ná, yaá kisíkítsajna i'nde-la yijo-ná nǎnda nga jè kjòmejèn-la.

¹⁹ Yijo-ná tsà tà jngoò skoya koma, mì-la tsà yijo xi nguì tíjngoò.

²⁰ Kixíí kjoa nas'ín kjin skaya tíkjoòya yijo-ná, tanga tajngoò ma-ne.

²¹ Jǎnà xkoaán mikii koma kitsò-la jǎnà ndsaá: “Mikii mochjeén-na.” Jè skoaá tíkooá mikii koma kitsò-la jǎnà ndsokoaá: “Mikii mochjeén-na.”

²² Tanga it'aà ts'e yijo-ná, tjín-né xi 'mì-lá nga chiba nga'ño tjín-la tanga isaá ndaà mochjeén.

²³ It'aà ts'e yijo-ná xi 'mì-lá nga mìkiì ndaà tsejèn, jñà-né xi nìkakjá nìkè mé-ne nga ìsà ndaà kòtsejèn-ne. Bìjtsa'ma-né jè yijo-ná, jñà xi mìkiì tjí'nde-la nga jcha-la.

²⁴ Mìkiì mochjeén nga sijtsa'ma yijo-ná xi tsejèn. Nainá jye k'oas'ín tsibíndaà nga ìsà ndaà jchaxkón jè xi 'mì-lá nga ìsà chiba chjí-la,

²⁵ mé-ne nga mì kojòya-ne. Tà saá nga jngoò lingoò skaya kàtasíkínda xíkjín.

²⁶ Tsà tjín jngoò skaya yijo-ná ñánda ijò ma, ok'ín yije-la xíkjín kóhokji nga ma ijò. Koà tsà tjín ñánda ndaà tíyaxkón, ndaá s'e yije-la kóhokji yijo.

²⁷ Jñò, k'oaá ngaya-la koni yijo-la Cristo. Katjín, katjín xá xi kitjoé-nò ya jjiìn naxandá-la Nainá.

²⁸ Nainá k'oaá s'ín kiskoòsòn-la mé xá xi s'jin xita: jñà títsajna ítjòn xita xi bíxáya-la Nainá; xi ma-ne jò, xita xi chja ngajo-la Nainá; xi ma-ne jàn, xita xi okóya 'én-la Nainá. Tíkoà tjín xi ma-la s'ín kjoaxkón xi ndaà tjín. Kò tjín xi ma-la síndaà-ne xita xi xk'én; tjín xi ma-la síchját'aà; tjín xi otíxoma mé kjoà xi koma; kò tjín xi chja 'én xi kj'eíí tsò xi mì yá xita fiya-la.

²⁹ Mìtsà ngats'ii nga ma bíxáya-la Nainá. Mìtsà ngats'ii nga Nainá chja ngajo-la. Mìtsà ngats'ii nga ma-la okóya 'én-la Nainá. Mìtsà ngats'ii nga ma-la s'ín kjoaxkón xi ndaà tjín.

³⁰ Kò mìtsà ngats'ii nga ma-la síndaà-ne xita xk'én. Mìtsà ngats'ii nga ma-la chja 'én xi kj'eíí tsò xi mì yá xita fiya-la. Mìtsà ngats'ii ma-la síkatoya 'én xi kj'eíí tsò xi mì yá xita fiya-la.

³¹ Tanga jñò, mochjeén-né nga tinchátsjioò jñà kjoachjine xi ìsà ndaà tjín.

Tanga j'ndeí 'aán kokoò-nò jngoò ndiyá xi ìsà ndaà tjín kó s'ín sijchá yijo-nò.

13

It'aà ts'e kjoatjòcha

¹ An, tsà ma-na chja jñà 'én xi kj'eíí tsò xi chja xita nas'ín jñà 'én xi chja àkjale, tanga tsà tsjìn-na kjoatjòcha, nímé chjí-la; k'oaá ngaya-na koni jngoò kicha xi 'ñó one, o koni jñà kicha tsjìn xi ch'o one k'e nga kaàkjoò.

² Tsà tsjìn-na kjoatjòcha, nímé chjí-na nas'ín ma-na chja ngajo-la Nainá, nas'ín machiya yije-na kjoà xi tjí'ma-la Nainá; nas'ín ma yije-na kjoà chjine, nas'ín ndaà mokjeíin yije-na it'aà ts'e Nainá, skanda ma-na síkjaníyá-la nin-dòò.

³ Tsà sika'biá yije tsojmì xi tjín-na nga kòkjen xita ima, koà tsjaà kjotjoà yijo-na nga kiti xi kjondaà ts'e xita xi kj'eíí, tanga tsà tsjìn-na kjoatjòcha, nímé síkijne.

⁴ Jè xita xi tjín-la kjoatjòcha, tjín-la kjoatsetakòn nita mé kjoa-ne; tjín-la kjondaà; mìkiì maxitakòn; mìtsà 'én 'nga chja; kò mìtsà tijè ndaà síkijna-ne yijo-la;

⁵ mìtsà taxki s'ín; mìtsà tà kjondaà ts'e ótsji; mìkiì taxki majti-la; nímé kjoa bíngui takòn;

⁶ mìtsà matsja-la it'aà ts'e kjoa xi ch'o tjín, ts'eé kjoa kixi xi matsja-la.

⁷ Jè xi tjín-la kjoatjòcha, síkjeíin yije-la nita mé kjoa-ne, mokjeíin yije-la, koña yije-la, chíkjoako yije-la ngats'ii kjoa.

⁸ Jè kjoatjòcha mìkiì kjoehet'aà. Tanga kijchò nachrjein nga mì tí yá xi kichja ngajo-la Nainá, nga mì tí yá xi kichja-ne 'én xi kj'eíí tsò xi mì yá xita fiya-la kò nga mì tí yá xi tjoé-la kjohítsjeèn xi tjí'ma-la Nainá.

⁹ Nga kj'eé tsà nguì ndaà tíjìn yije-ná kjohítsjeèn xi tjí'ma-la Nainá, kò kj'eé tsà nguì ndaà nokjoà ngajo-lá Nainá.

¹⁰ Tanga k'e nga kijchò nachrjein nga kjoíí xi nímé chijat'aà-la, yaá kjoehet'aà jñà kjoa xi ta chiba machiya-ná.

¹¹ K'e nga sa chítia, k'oaá s'ín kichjà koni chja ixti, k'oas'ín kisikítsjeèn koni s'ín síkítsjeèn ixti, k'oas'ín kiskoòsòn-la koni ixti. Tanga k'e nga jye kòjchínga, kisikíjna-ná kjoa ts'e ixti.

¹² I'ndeí, ta k'oaá s'ín 'yaá Nainá koni tsà chítsín jmà chítsejèn-yaá nga mìkiì ndaà tsejèn-ná. Tanga kijchò nachrjein k'e nga ndaà kotsejèn-ná nga chí'aán Nainá. I'ndeí ta chibaá machiya-na, tanga kijchò nachrjein nga ndaà kochiya-na koni s'ín beèxkon-na Nainá.

¹³ Ján kjoa tjin xi mìkiì kjoehet'aà, jngoò kjoa nga mokjeiín-ná it'aà ts'e Nainá, ijngoò nga chiña-lá xi tjoé-ná, ijngoò nga s'e-ná kjoatjòcha. Jña ingaján kjoa koi, jè kjoatjòcha xi isa 'ño chjí-la.

14

Jè xi ma-la chja 'én xi kj'eíí tsò

¹ Jè kjoatjòcha tanguítjinguí-la; tikoá mochjeén-né nga tinchátsjioò jña kjoachjine xi tsjá Iníma Tsjeè-la Nainá. Kò jè xi isa 'ño mochjeén nga kinókjoa ngajo-la Nainá.

² Jngoò xita xi kj'eíí tsò 'én xi chja, mìtsà taxki xita tíchja-la; Nainá tíchjat'aà-la. Nga mì yá xita fiya-la kó tsò 'én xi tíchja. Jña 'én xi chja, ts'eé Iníma Tsjeè-la Nainá nga tíchja'ma-né.

³ Tanga jè xita xi chja ngajo-la Nainá, jña xita naxandá-la Nainá chjajin-la, mé-ne nga isa ndaà koma-la, isa ndaà k'ñojín-ne kjohítsjeèn-la koa isa ndaà sije takòn-ne xita naxandá-la Nainá.

⁴ Jè xita xi chja 'én xi kj'eíí tsò xi mì yá xita fiya-la, tì yijo-laá tsjá nga'ño-la. Tanga jè xi chja ngajo-la Nainá, jña xita naxandá-la Cristo tsjá-la nga'ño.

⁵ 'An, k'oaá s'ín mejèn-na tsà ngats'ioò koma-nò kinókjoa 'én xi kj'eíí tsò xi mì yá xita fiya-la. Tanga isaá-la ndaà tjin tsà koma-nò kinókjoa ngajo-la Nainá. Jè xi Nainá chja ngajo-la isaá 'ño chjí-la mì k'oa-ne koni jè xi chja 'én xi kj'eíí tsò. Ta jngoó-la tsà tjin xita xi koma-la sikkatoya 'én xi kj'eíí tsò mé-ne isa ndaà s'e-la nga'ño xita naxandá-la Cristo.

⁶ Ndí 'ndsè kò tichjaá k'oaá ngaya-la tsà 'an mejèn-na kjikon-nò, tsà kj'eíí tsò 'én xi kichjàkò-nò xi mìkiì na'yà-là, kós'ín kochjeén-nò. Ta jé-la tsà 'én-la Nainá sikíchiya-nò, tsà kènojímí chiba-nò kjohítsjeèn xi ndaà tsò, tsà kichjàjin-nò 'én kixi, kò kokoòya-nò 'én xi ndaà tsò.

⁷ Jña chrjo-la música kò ní'ño xi tíhone tsà ngàsòn kjone, ¿kós'ín jcha-la ñá-laá xi tíhone nga tà ngàsòn tsò?

⁸ Tsà jè chrjo trompeta-la xita kjojchán, tsà mìkiì ndaà skindàya, ¿yá xita xi kítsajnandaà nga kjoí kjojchán?

⁹ Jño, k'oaá tís'ín mat'ioòn tsà mìtsà 'én tsajòn kinókjoa nga kjiya-la xita, ¿kó s'ín kiná'ya-la mé 'én xi titsanokjoà? Tà jjin isén-la titsanokjoà.

¹⁰ Kjin jchán skoya 'én tjin nga títsa isò'nde, tanga ngats'ì 'én tjin-la kjohítsjeèn kó tsòya-ne nga jngoò ijngoò skoya.

¹¹ 'An, tsà mìkiì fiya-na kó tsò 'én xi tíchja jngoò xita, xita xin nanguí koma-na. Kò jè xita xi tíchja, k'oaá tì koma-la it'aà ts'an koni xin nanguí i'nde-na.

¹² Jño, nga mejèn-nò jña kjoachjine xi tsjá Iníma Tsjeè-la Nainá, mochjeén-né nga isa ndaà tinchátsjioò jña kjoachjine xi koma ndaà síchjat'aà-la naxandá-la Cristo mé-ne nga isa tse nga'ño s'e-la.

¹³ K'oaá ma-ne jè xita xi kj'eíí tsò 'én xi chja xi mì yá xita fiya-la, kàtasíjèt'aà-la Nainá nga kàtatsjá-la kjoachjine mé-ne koma sikkatoya-ne 'én xi chja.

14 'An, k'e nga chjàt'aà-la Nainá nga k'ejí tsò 'én xi tichjà xi mìkì fìya-na, tà jè tichjà Inìma Tsjeè-la Nainá xi tìjnajìin inìma-na. Tanga jè kjohítsjeèn-na, nìmé kjondaà sakò-la nga mìkì fìya-na kó s'ín tichjà.

15 'An, ¿mé xi s'iaàn? Mochjeén-né nga kichjàt'aà-la Nainá 'én xi bíjìin inìma-na Inìma Tsjeè-la Nainá. Tìkoaá mochjeén-né nga kichjàkoa Nainá 'én xi ndaà fìya-na. K'e nga seè, tìkoaá mochjeén-né nga seè sò xi bíjìin inìma-na Inìma Tsjeè-la Nainá. Tanga tìkoaá mochjeén nga seè sò xi ndaà fìya-na.

16 K'e nga jeya nìkìjni Nainá, tsà tà jñà 'én nokjoi xi bíjìin inìma-lè Inìma Tsjeè-la Nainá, tsà kji'nchré-la 'én-lè jñà xità xi mìkì fìya-la, mìkì koma kítóso: “K'oaá s'ín kátama”, nga mìkì fìya-la kó tsò 'én xi nokjoi.

17 Okixi-né, kjondaà xi tì'biì-la Nainá, ndaà tìjn, tanga jñà xità xi i'nga, nì mé nga'ño tísakó-la nga mìkì fìya-la.

18 'An, tsjaà-la kjondaà Nainá nga isaá ndaà ma-na chjà 'én xi mì yá xità fìya-la mì k'oa-ne koni jñò.

19 Tanga k'e nga ya tìjnajìin-la xità naxandá-la Cristo, isaá ndaà tìjn tsà tà 'òn 'én kichjà xi tìjn-la kjohítsjeèn nga kokoòya-la xità, mì k'oa-ne tsà te jmiì 'én kichjà xi k'ejí tsò xi mìkì 'nchréya-la xità.

20 Ndí 'ndsè kò tichjaá, kì k'oaá s'ín nìkítsjeèn koni ixti. Tanga ts'e kjoa xi ch'o tìjn, k'oaá s'ín t'een koni ixti xi k'j'eè ndaà machiya-la. Tanga it'aà ts'e kjohítsjeèn-nò, k'oaá s'ín t'een koni xità xi jye ndaà machiya-la.

21 Xojon-la Nainá k'oaá s'ín tichja nga tsò: “Nga kichjà-la naxandá-na, xità xìn nanguí sikkjeén xi k'ejí 'én chjà nga koma kichja-la. Tanga nas'ín k'oa's'ín s'iaàn mìkì kji'nchréijon-na, tsò Na'èn-ná.”

22 K'e nga nokjoá 'én xi k'ejí tsò xi mì yá xità fìya-la, kjoxkón okó-la Nainá jñà xità xi mìkì mokjeiín-la, mìtsà ts'e xità xi mokjeiín-la. Tanga k'e nga nokjoà ngajo-lá Nainá, ts'eé xità xi mokjeiín-la, mìtsà ts'e xità xi mìkì mokjeiín-la.

23 Jñà xità naxandá-la Cristo k'e nga maxkóya, tsà ngats'ìi nga k'ejí 'én kichja xi mì yá xità fìya-la, tsà kjoahas'en jngoò xità xi taxkì xità xi mìkì mokjeiín-la 'én-la Nainá, kítóso-né: “Jñà xità koi, xità ská-né.”

24 Tanga tsà ngats'ioò nga 'én-la Nainá títanokjoáya ngajo-lá, tsà kjoahas'en jngoò xi taxkì xità xi mìkì mokjeiín-la 'én-la Nainá, k'e nga kji'nchré-nò, kòkjeiín-la kò kochiyaá-la nga xità jé-né.

25 Jè kjoa xi tìjna'ma jìiìn inìma-la, jchaá-la; kò jè xità, kosijna-xkó'nchi-la Nainá nga skoexkón; kòkjeiín-la nga kixi kjoa nga ya tìjnajìin-nò Nainá.

Okixi xi kitsjaà Pablo kó s'ìin xità k'e nga maxkóya nga jeya síkìjna Nainá

26 Jñò ndí 'ndsè kò tichjaá, ¿kó s'ín fìya-nò jñà 'én koi? Tsòyaá-ne, k'e nga maxkóya nga jeya nìkìjna Nainá, tìjn i'nga xità xinguiqo xi seè-la Nainá; tìjn i'nga xi ma-la okóya 'én-la Nainá; tìjn xi ma-la bénojmi 'én xi jye tsakó-la Nainá; tìjn xi chjà 'én xi k'ejí tsò xi mì yá xità fìya-la; tìkoaá tìjn xi ma-la síkatoya 'én xi k'ejí tsò. Ngats'ìi xá koi, k'oaá s'ín kàtabitasòn mé-ne nga isa ndaà s'e-la nga'ño inìma-la jñà xità naxandá-la Nainá.

27 Tsà tìjn xità xi ma-la chjà 'én xi k'ejí tsò xi mì yá xità fìya-la, tà jò kò tsà jàn kichja; tanga ta ijngoò ijngoò kichja; kò jngoò xi síkatoya 'én koi.

28 Tsà tsjìn xità xi ma-la síkatoya, tà jyò kàtìtsajna nga nguixkòn naxandá-la Cristo, tìkoaá-ne tà jìiìn inìma-la kàtichjako Nainá.

29 K'oaá tìs'ín tìjn ts'e xità xi chjà ngajo-la Nainá, tà jò-ne kò tsà jàn xi kichja. Jñà xità xi i'nga, tà kji'nchré-né; ta sìngàsòn-kjoò-né a ndaà tìjn, o xi majìin-né.

30 Jñà xità xi títajna, tsà kítjokajìin jngoò xità xi Nainá sìkìchiya-la 'én xi mejèn-la nga kichja, jè xità xi tichjaya tìkoaá-ne ta jyò kàtìjna, kàtatsjá'nde-la nga jè kàtichja.

³¹ K'oaá ma-ne, ngats'ioò xi ma-nò nokjoà ngajo-là Nainá komaá k̄inókjoa nga ìjngò ìjngò-nò mé-ne nga ìsa ndaà koma-nò kò ìsa ndaà kotsja-nò ngats'ioò.

³² J̄nà x̄ita xi ma-la ch̄ja ngajo-la Nainá, mochjeén-né nga t̄ijnà skósòn-la kós'ín k̄ichja.

³³⁻³⁴ Nga Nainá, jè xi mejèn-la nga s'e kjoa'nchán, majìn-la nga kjoasiù s'e.

J̄nà íchjín, jyò kàtìtsajna, koni ma ngats'ì naxandá-la Cristo ñánda maxkóya x̄ita-la; mìkii t̄jín'nde nga k̄ichja; ndaà kàta'nchréñijon koni s'ín tichja k̄jotíxoma.

³⁵ Tsà mé kjoa xi mejèn-la nga skoe, yaá ni'ya-la kàtakjònangui-la x'ín-la. Mìkii ndaà t̄jín tsà jngò chjoón k̄ichjajìin ñánda maxkóya x̄ita naxandá-la Nainá.

³⁶ ¿A k'oaá s'ín nìkìtsjeèn nga ta ìt'aà tsajòn kisindaà 'én-la Nainá? ¿A k'oaá ma-nò tsà ta j̄nò-nò xi kitjoé-nò?

³⁷ Tsà t̄jín i'nga x̄ita xinguiò xi k'oas'ín s̄ikìtsjeèn nga ma-la ch̄ja ngajo-la Nainá, o xi ndaà machiya-la k̄johìtsjeèn-la Inima Tsjeè-la Nainá, k'oas'ín kàtakixiya-la nga j̄nà 'én xi t̄ikjii-nò, k̄jotíxoma ts'eé Na'èn-ná.

³⁸ Tsà t̄jín x̄ita xi mìkii sasén-la koni s'ín okoòya-nò, t̄ikoáá Nainá mìkii sasén takòn x̄ita jè.

³⁹ Ndí 'ndsè kò tichjaá, k'oaá s'ín 'ñó t̄inchátsjioò nga t̄inókjoa ngajo-la Nainá; tanga k̄i bitsajna ikòn-la j̄nà xi ma-la ch̄ja 'én xi k̄j'eí tsò xi mì yá x̄ita fiya-la.

⁴⁰ Tanga ngats'ì kjoa koi, ngui ndaà t'een, kixi tanguíkoo.

15

K'e nga jaáya-la Cristo

¹ I'ndeí ndí 'ndsè kò tichjaá, 'an mejèn-na nga s̄ikìtsjeèn-nò jè 'én ndaà-la Nainá xi kjoa ts'e Cristo xi 'an kichjàyajìin-nò xi kichjoétjò kò nga kixi t̄itsajnakoo.

² Jè 'én ndaà-la Nainá xi kjoa ts'e Cristo xi koma kochrjeìin-nò kjo'in tsà kixi t̄itsajnakoo skanda i'ndeí koni s'ín nga kichjàyajìin-nò nga t̄isa ítjòn; tsà majìn, n̄imé ch̄jì-la nga kòkjeiín-nò.

³ Jè kjoa xi ìsa 'ñó t̄jín, jè-né nga kòs'ín tsakoòya-nò koni t̄jín xi 'an kitjoé-na, nga jè Cristo k'en ngajo-ná xi kjoa ts'e jé-ná nga k'oaá s'ín tichja Xojon-la Nainá;

⁴ nga kisìhijìin, koa nga ijchò jàn nachrjein jaáya-la, koni s'ín tichja Xojon-la Nainá.

⁵ K'e nga jaáya-la, tsakó-la yijo-la jè Cefas [t̄ijè-ne Pedro], ikjoàn tsakó-la yijo-la j̄nà x̄ita-la xi i'nga, ya tejó ma-ne kò Pedro.

⁶ Xi komà iskan, tsato 'òn s̄indò ma-ne x̄ita 'ndsè xi t̄itsajnajt̄ín nga tsakó-la yijo-la. J̄nà x̄ita koi, t̄jín i'nga xi jye k'en, tanga k̄jìn ma xi tákó t̄itsajnakon skanda i'ndeí.

⁷ Ikjoàn tsakó-la yijo-la jè Jacobo. Xi komà iskan tsakó yije-la yijo-la j̄nà x̄ita-la xi tsibíxáya-la.

⁸ Xi jyehet'aà-ne, ikjoàn 'aán tsakó-na yijo-la. 'An, k'oaá s'ín ngaya-la koni tsà jngò k̄i'ndí xi mì jè nachrjein kits'iin koni s'ín chíya nachrjein-la.

⁹ 'An-ná xi ìsa 'ñó nangui t̄jina-la kóhotj̄ín j̄nà x̄ita xi tsibíxáya-la Jesús. Skanda mìkii ok'ín-na nga k'oas'ín k'óin-na; nga 'aán k̄it̄jngui kondra-la j̄nà x̄ita naxandá-la Cristo.

¹⁰ Tanga jè k̄jondaà-la Nainá ndaà tsasikò-na; k'oaá komà-ne nga 'an tsibíxáya-na. Jè k̄jondaà-la, mìtsà tà k̄jotjò kitsjaà-na. Tanga 'an, ìsaá 'ñó kisixá mì k'oa-ne koni ngats'ì x̄ita-la xi i'nga. Kixi kjoa, mìtsà nga 'ñó ts'an, k̄jondaà ts'eé Nainá.

11 Tsà 'an-ná, kò tsà jñà xita-la xi i'nga xi ndaà síxá, tanga jè xi chjí-la nga k'oa s'ín nokjoàya-jen, koa jñò, k'oaá s'ín mokjeíin-nò.

K'e nga kjoaáya-la jñà xita xi jye k'en

12 K'oaá s'ín tìnokjoáya nga jè Cristo jaáyajìin-la xita xi jye k'en, tanga, ¿mé-ne tjin i'nga-ne xita xinguioo xi tsò: “Jñà xita xi jye k'en mì tì kii kjoaáya-la.”?

13 Tsà mìkii kjoaáya-la xita xi jye k'en, tìkoaá jè Cristo, mì-la tsà kixi kjoa nga jaáya-la.

14 Tsà mìkii jaáya-la Cristo, jñà 'én xi nokjoàya-jen nímé-la chjí-la, tìkoaá nímé-la chjí-la koni s'ín mokjeíin-nò.

15 Tìkoaá ngajen, xita ndisoó kíjokàngui-jen it'aà ts'e Nainá, nga k'oaá s'ín nokjoàya-jen 'én-la Nainá nga bixón-jen: “Jè Nainá kisikjaáya-la Cristo.” Nga tsà jñà mik'en mìkii kjoaáya-la, mì-la tsà kixi kjoa nga kisikjaáya-la Cristo.

16 Tsà jñà xita xi jye k'en mìkii kjoaáya-la, tìkoaá jè Cristo mì-la tsà kixi kjoa nga jaáya-la.

17 Jè Cristo, tsà mìkii jaáya-la, nímé-la chjí-la koni s'ín mokjeíin-nò it'aà ts'e, tákó yaá-la titsajnajñòò jé-nò.

18 Tìkoaá jñà xita xi jye k'en nga kòkjeíin-la it'aà ts'e Cristo, jngoò k'aá-la kichijà, tsà mì jaáya-la Cristo.

19 Jè kjoa xi chiñà-lá it'aà ts'e Cristo, tsà tà jí isò'nde kjoehet'aà, jñà-la xi ngui xita ima 'mì-ná kó ngats'ii xita xi tjin isò'nde.

20 Tanga ngui kixii kjoa nga jè Cristo jaáyaá-la it'aà ts'e kjoa biyaà. K'oaá ngaya-la koni tsojmì xi majchá ítjòn, nga jè Cristo jaáya ítjòn-la ngats'ii xita xi iskan kjoaáya-la [nga mì tì kii kiyá-ne].

21 Koni s'ín komà nga it'aà ts'e jngoò xita kjòts'ia nga biyaà xita, k'oaá tìs'ín komà nga it'aà ts'e jngoò xita j'ii nga kjoaáya-la xita xi jye k'en.

22 Koni s'ín ma nga biyaà ngats'ii xita xi it'aà ts'e tje-la Adán kits'iin, k'oaá tìs'ín ma nga kjoaáyaá-la ngats'ii xita xi it'aà ts'e Cristo ts'iin xitse-ne.

23 Tanga jngoò ijngoò 'ncha ndiyá-né nga kjoaáya-la koni s'ín oko-la. Jè Cristo, tjna ítjòn nga jaáya-la; k'e nga kjoii ijngoò k'a Cristo, k'ée kjoaáya-la xi xita ts'e.

24 Cristo, ítjòn sikkjehesòn ngats'ii xi kondra fi-la, ngats'ii xi títajna ítjòn, xi tjin-la nga'ño kò xi otixoma. Ikjoàn jè Cristo sùngatsja kjotixoma-la Nainá xi Na'èn-ná ma; k'ée kjoehet'aà isò'nde.

25 Mochjeén-né nga jè Cristo kàtatixoma skanda k'e nga jye sikkítsajnangui yije ndsoko jñà xi kondra-la.

26 Kò jè kondra-la xi fehet'aà-ne nga chija, jé kjoa biyaà.

27 Nita mé xi tjin, Nainá, yaá kisikítsajnangui yije ndsoko Cristo. Jè tíhotixoma yije-la. Tanga mìtsà tsò-ne kjoa nga jè Nainá, yaá tijnangui ndsoko Cristo. Nga jè sobá Nainá xi kisikítsajnangui ndsoko nita mé xi tjin.

28 K'e nga jye ya títajnangui yije ndsoko Cristo nita mé xi tjin, jè Cristo, nga Ki'ndí-la Nainá ma, tìkoaá nangui sikkijna yijo-la nga nguixkon Nainá nga jè sobá Nainá tsibítsajnangui ndsoko Cristo nita mé xi tjin, mé-ne nga jè Nainá jngoò k'aá jè kijna ítjòn-la nita mé kjoa-ne.

29 Tanga tsà jñà xita xi jye k'en mì tì kii kjoaáya-la, jñà xita xi it'aà ts'e mik'en ma-ne bautizar, ¿kó s'ín síkítsjeèn? ¿Mé-ne it'aà ts'e mik'en ma-ne bautizar, tsà kixi kjoa nga mì tì kii kjoaáya-la xita?

30 Kò ngajen, ¿mé kjoa-ne nga nachrjein nchijòn binchaxkón-lajen yijo-najen, tsà mì tì kii kjoaáya-la xita?

31 Ndí 'ndsè kò tichjaá, k'oaá xan-nò nga ngui kixii kjoa nga nachrjein nchijòn tjin-na kjoxxkón tsà ya kiyá, koni s'ín nga ngui kixii kjoa nga matsja-na it'aà tsajòn nga ngàsòn mokjeíin-ná it'aà ts'e Na'èn-ná Jesucristo.

³² Tsà tà j̄nà kjoa ts'e isò'nde-né nga kiskaàn-koaa x̄ita koni tsà xa ján Éfeso, ¿mé xi kisikijne? Tsà j̄nà x̄ita xi jye k'en mì t̄i k̄i kjoaáya-la, t̄ikoaa-ne: “K̄ichiaá, s'ioaa nga nchijòn-lè kiyá-ná.”

³³ Kì yá x̄ita xi konachan-nò it'aà ts'e kjoa koi. Nga tjín jngoò 'én xi tsò: “J̄nà x̄ita xi tsahijtakooá xi mìkì ndaà s'ín, j̄nà síkits'ón-jìin kjoa xi ndaà tjín koni s'ín titsanìchá yijo-ná.”

³⁴ Ndaà t̄ikítsjeèn it'aà ts'e kjoa koi; k̄i tà tsjaà jé binchaàtsjioò. Nga tjín i'nga x̄ita xinguiqo xi mìkì beèxkon Nainá. K'oaá xan-nò mé-ne nga kàtasobà-nò.

Kó kjoàn koma mik'en k'e nga kjoaáya-la

³⁵ Tsà koi nachrjein-la tjín i'nga x̄ita xi tsò: “¿Kós'ín koma nga kjoaáya-la x̄ita xi jye k'en? ¿Kó kjoàn yijo xi k̄itjokàjìin-ko?”

³⁶ Mé tà tònò-nò! K'e nga 'bè tje, j̄nà nojmé nga sihiijìn, biyaà-né, mé-ne nga kiso x̄itse-ne jno, nga ìjngoò k'a k̄itsajnakon.

³⁷ K'e nga 'bè tje, mìtsà j̄nà xi jye jno bitjee; tà j̄nà nojmé bitjee, o xi trigo-né.

³⁸ Tanga jè Nainá, k'oaá kjoàn s'ín koni s'ín mejèn-la; k'oaá kjoàn s'ín nga jngoò ìjngoò skaya xojmá koni kjoàn tje-la.

³⁹ J̄nà yijo, mìtsà ngàsòn kjoàn. Yijo-la x̄ita, kj'eí kjoàn; yijo-la cho, kj'eí kjoàn; yijo-la t̄in, kj'eí kjoàn; yijo-la nise, kj'eí kjoàn.

⁴⁰ Koni choòn ì isò'nde nga tjín yijo xi kj'eí s'ín tsejèn, k'oaá ti choòn ngajmì nga tjín xi kj'eí s'ín tsejèn. Mìtsà ta ngàsòn tsejèn xi tjín ngajmì ko xi tjín isò'nde.

⁴¹ Jè ts'oi kj'eí s'ín tsejèn, jè sá kj'eí s'ín tsejèn, j̄nà ni'ño kj'eí s'ín tsejèn. K'a kj'eí, k'a kj'eí s'ín tsejèn nga jngoò ìjngoò skoya.

⁴² K'oaá t̄is'ín ma nga kjoaáya-la x̄ita xi jye k'en. Jè yijo xi sihiijìn, bits'on-né, tanga jè yijo xi kjoaáya-la, mì t̄i k̄i k̄its'ón-ne.

⁴³ Sihiijìn-né xi nímé chjì-la; jè xi kjoaáya-la jeya-né. Xi sihiijìn, yijo indaà-né; xi kjoaáya-la tjín-la nga'ño.

⁴⁴ Jè yijo xi sihiijìn, taxkì yijo-né, ts'e isò'nde-né. Yijo xi kjoaáya-la, yijo x̄itse-né, ts'ée Inìma Tsjeè-la Nainá. Tjín xi taxkì yijo, t̄ikoaa tjín xi tsjá Inìma Tsjeè-la Nainá.

⁴⁵ K'oaá s'ín tichjā Xojon-la Nainá nga tsò: “Jè x̄ita x'ìn tjòn xi k̄i'ni Adán, jngoò xi x̄ita komà xi tsibijnakon.” Tanga [jè Cristo], jngoò inìma xi síkitsajnakon x̄ita, nga jè j'ì ngajo-la Adán nga jyehet'aà-ne kjoa.

⁴⁶ Tanga jè xi inìma, mìtsà jè j'ì ìtjòn; jè j'ì ìtjòn xi taxkì yijo ts'e isò'nde, iskaán j'ì xi inìma.

⁴⁷ Jè x̄ita x'ìn xi tjòn, ì it'aà nangui ts'e; ni'ndeé kisindaà-ne. Jè x̄ita x'ìn xi ma-ne jò, ngajmì ts'e, yaá inchrobà-ne, [nga jè xi Na'èn-ná].

⁴⁸ Ngats'ì x̄ita xi ì isò'nde ts'e, k'oaá kjoàn yijo-la koni k̄i ts'e Adán nga ni'ndeé kisindaà-ne. Ngats'ì xi ngajmì k̄itsajna, k'oaá kjoàn koma yijo-la koni k̄i ts'e Cristo xi ngajmì inchrobà-ne.

⁴⁹ I'ndeì, j̄nà, k'oaá kjoàn tsejèn yijo-ná koni k̄i xi ni'nde kisindaà-ne; nga komà iskan, k'oaá kjoàn kotsejèn yijo-ná koni k̄i xi ngajmì j'ì-ne.

⁵⁰ Ndí 'ndsè, k'oaá xan-nò jè yijo-ná nga jnì tjín-la mìkì ma kjoahas'en-jìin ñánda tíhotixoma Nainá. T̄ikoaa jè yijo-ná xi bi'ndoya mìkì ok'ìn-la nga ya kjoahas'en-jìin ñánda tjín xi mìkì bi'ndoya.

⁵¹ Kènojmi jngoò-nò kjoa ma ts'e Nainá: J̄nà xi x̄ita-la Cristo 'mì-ná, mìtsà ngats'iaá nga kiyá, tanga ngats'ì-ná ta jngoò tjò kjoatjìya-ná,

⁵² k'oaá ngaya-la koni k'e nga tsíx'aa koa bíchjoà xkoaán, t̄ik'eé-ne nga skindàya chrjo trompeta xi fehet'aà-ne. K'e nga kjone chrjo trompeta, j̄nà mik'en kjoaáya-la, mì t̄i k̄i k̄i'ndo-ne n̄ita kjé-ne. Koa j̄nà kjoatjìya-ná.

⁵³ Jè yijo-ná nga biyaà kọ nga bi'ndo, mochjeén-né nga tjoé jngoò-là yijo xi mì tì kii kiyá-ne kọ mì tì kii k'indo-ne nita kjé-ne.

⁵⁴ K'e nga k'oas'ín koma nga jè yijo-ná tjoé jngoò-là yijo xi mì tì kii kiyá-ne kọ mì tì kii k'indo-ne nita kjé-ne, k'eé kítasòn koni s'ín tíchja Xojon-là Nainá nga tsò: “Jè kjoa xi síkijne jngoò k'aá síchija kjoabiyaà.

⁵⁵ Ji xi kjoa biyaà 'mì-lè, ¿ñánda-ne nga kinikijni? ¿Ñánda tíjna na'yá-lè xi ma-là sík'en xita?”

⁵⁶ Jè na'yá xi tjin-là kjoa biyaà, jé kjoa ts'e jé. Kọ jè nga'ño xi tjin-là jè kjoa ts'e jé, jé kjotixoma.

⁵⁷ Ndaà chjí-là Nainá nga jè tsjá-ná nga'ño xi it'aà ts'e Jesucristo xi otixoma-ná nga nikijne-lá kjoa biyaà kọ kjoa ts'e jé.

⁵⁸ Jñò ndí 'ndsè xi matsjake-nò, kixi titsajna. Niyá xi sikkatjìya-là kjohitsjeèn-nò. Kjit'aà nàchrjein isa 'ño tixá-là Na'èn-ná. Nga tíjìn-nò nga jè xá xi 'nè xi ts'e Na'èn-ná, mìtsà tà kjotjò.

16

Ton xi maxkót'aà-là jñà xita naxandá-là Cristo

¹ Jè ton xi maxkót'aà-là xita naxandá-là Cristo, k'oas'ín t'een koni s'ín kixan-là xita naxandá-là Nainá ján nangui Galacia.

² Jñò, nga jngoò ijngoò, nga jìn jìn nàchrjein k'e nga tahàngo, titjò chiba ton-nò koni s'ín machikon-t'ioòn, mé-ne nga mì k'e kixkó-nò k'e nga 'an xi kija.

³ K'e nga kichokon-nò ya Corinto, síkasén ján Jerusalén xita xi jñò chjaajñoò. Tsjaà-là xojon carta nga kiko jè ton xi maxkót'aà-nò.

⁴ Tsà mochjeén nga tikoá 'an kjián, komaá kiko-na jñà xita koi.

K'e nga kisikitsjeèn Pablo nga kjo ján Corinto

⁵ Mejèn kikon-nò k'e nga jye kjoáhaatoaá ján nangui Macedonia, nga k'oaá s'ín tíndaà-na nga ya kjoáhaatoaá mé-ne nga ikjoàn kija-na Corinto.

⁶ Tsà koma ya kótijnako chiba nàchrjein-nò, kọ tsà koi nàchrjein-là nga ya kótijnako-nò skanda k'e nga kjoehet'aà nàchrjein-là chon 'nchán, mé-ne jñò koma síchját'aà-ná k'e nga tsà ñánda kjián nga koma iskan.

⁷ Majìn-na nga tà jngoò tjò skotsejèn-nò; jè xi mejèn-na nga kjin nàchrjein kótijnako-nò, tsà Nainá mejèn-là nga tsjá'nde-na.

⁸ Í kótijna naxandá Éfeso skanda nàchrjein ts'e s'eí Pentecostés, [jè s'eí xi bitjo k'e nga jye bijchó icháte nàchrjein nga bitjo s'eí Paxko].

⁹ Ndaà tíjjo'nde-na nga tìs'iaàn xá-là Nainá xi 'ño ndaà tíbitasòn, nas'ín 'ño kjin ma-ne xita xi kondra titsajna-na.

¹⁰ Tsà kijchòkon-nò jè Timoteo, chítsejèn-là nga tsja kàtas'e-là nga kijnako-nò nga mì yijo-là kinchaxkón-là, nga tikoá xá-là Nainá tís'ín koni 'an.

¹¹ K'oaá ma-ne, kì nàchrjenguiò jñò, tà sáá tichját'aà-là nga 'nchán kàtjanchrobákon-na; 'an, tíkoñaá-là kọ xita 'ndseé xi i'nga.

¹² An 'ño tsibìtsi'ba-là jè 'ndsè Apolos, nga katahijtako jñà xita 'ndseé xi tíjine nga kikon-nò, tanga majìn-là nga fi; k'eé-la kjo k'e nga kọ'a-là.

¹³ Ndaà titsajnakon. 'Ñó kixi titsajnakoo jè 'én xi mokjeín-nò. Kì yá xi tsakjoòn-là, kàtas'e-nò nga'ño.

¹⁴ Ngats'i kjoa xi 'nè, koó kjoatjòcha-nò k'oa t'een.

¹⁵ Jñò ndí 'ndseé kọ tichjaá, jyeé tíjìn-nò nga jñà xita ni'ya-là Estéfanos, jñà kòkjeín ítjòn-là 'én-là Cristo ya nangui Acaya. Jñà xita koi, k'oaá s'ín bínè-là yijo-là nga jñà xita naxandá-là Cristo síchját'aà-là.

¹⁶ Ndí 'ndsè, bìtsi' bà-nò nga t̄iná'yañijon-là x̄it̄a xi k'oas'ín síxá koni j̄ñà x̄it̄a koi, k̄o ngats'iì x̄it̄a xi mìkìi bijta-là nga síxá-là Nainá.

¹⁷ Matsja-na nga j'ìikon-na Estéfanas, Fortunato k̄o Acaico [nga j̄ñò kinikasén], nga j̄ñà j'ìi síkitasòn xi j̄ñò mìkìi komà kinitasòn nga inchrobàchon-ná.

¹⁸ J̄ñà j'ìi síje ikon-na k̄o tsajòn. K'oaá ma-ne jchaxkón j̄ñà x̄it̄a xi k'oas'ín s'ín koni j̄ñà x̄it̄a koi.

Pablo síhixat'aà naxandá-là Cristo

¹⁹ J̄ñà naxandá-là Cristo xi t̄ítsajna nangui Asia síhixat'aà-nò. Jè Aquila k̄o Priscila k̄o x̄it̄a naxandá-là Cristo xi bixoña ya ni'ya-là, it'aà ts'e Na'èn-ná ndaà síhixat'aà-nò.

²⁰ Ngats'iì x̄it̄a 'ndseé, síhixat'aà-nò. J̄ñò t̄iixat'aà nga jngoò ìjngoò x̄it̄a xinguiqo nga k̄o inima-nò.

²¹ 'An, xi Pablo 'mì-na, t̄isihixat'aà-nò nga k̄o ndsaa t̄ikjìi-nò xojon jè.

²² Tsà t̄jín x̄it̄a xi mìkìi matsjakeè Jesucristo xi otíxoma-ná, jè x̄it̄a neí kàtjìk̄o. Na'èn, j̄i n̄iton nchroboí.

²³ Jè kàt̄ijnak̄o-nò kjondaà-là Jesucristo xi otíxoma-ná.

²⁴ K̄jit'aà nachrjein kàtas'e-nò kjoat̄jòcha-na nga jè Cristo Jesús t̄ítsajnakoá. K'oaá s'ín kàtama.

Xojon carta-la San Pablo xi ma-ne jò xi kiskii-la xita naxandá-la Cristo xi títsajna Corinto

Kó tsò Pablo nga síhixat'aà jñà xita naxandá-la Cristo xi títsajna Corinto

¹ 'An, Pablo, tìsikasén-nò xojon jè, nga k'oaá s'ín kjòmejèn-la Nainá nga 'an tsibíxáya-na Cristo Jesús. 'An, ko 'ndsè Timoteo tìtsanìkasén-nòjen xojon jè. Tìtsanìhixot'aà-nòjen jñò xi xita naxandá-la Nainá 'mì-nò xi títsajnaà ya naxandá Corinto, ko ngats'iì xita tsjeè-la Cristo xi títsajna kóhokji nangui Acaya.

² Nainá xi Na'èn-ná, ko jè Jesucristo xi otíxoma-ná kàtatsjá-nò kjondaà ko kjoa'nchán ya ijìin inìma-nò.

Kó tsò Pablo nga tsjá-la kjondaà Nainá

³ Ndaà kàtayaxkón Nainá xi Na'èn-la ma Jesucristo xi otíxoma-ná. Jè Nainá xi Na'èn-ná ma, tse kjohimatakòn tjín-la it'aà tsaján. Ko jè, kjit'aà nachrjein síje takoán.

⁴ K'e nga mé kjo'in títsajnajñaá, jè Na'èn-ná síjetakòn-ná mé-ne jñá, k'oaá tìs'ín síjetakoán xinguiáá xi tìkoa kjo'in títsajnajìin koni s'ín kisìjetakòn-ná Nainá.

⁵ Koni tjín kjo'in xi tse nìkjaán xi kjoa ts'e Cristo, k'oaá tìs'ín tse kjojetakòn sakó-ná it'aà ts'e Cristo.

⁶ Ngajen, tsà kjo'in tìtsanìkjeiín-jen, kjondaà tsajòn-nò nga s'e-nò kjojetakòn, koa kítjokajñoò kjo'in. Tsà Nainá síjetakòn-najen, jè-né nga tìkoa jñò s'e-nò kjojetakòn, koa kichikjoa ko-nò kjo'in xi jìn tìtsanìkjeiín-jen.

⁷ Tjín kixijí kjoa xi chiñà-lajen it'aà tsajòn. Tjìin-najen, koni s'ín tíhokot'aà-nò kjo'in xi tìtsanìkjeiín-jen, k'oa tìs'ín okot'aà-nò kjojetakòn xi tjín-najen.

⁸ Jñò 'ndsè ko tichjaá, mejèn-najen nga kàtasijìin-nò kjo'in xi kis'e-najen ján nangui Asia. Tse jchán kjo'in kinìkjeiín-jen. Jyeé mì tì kù kichikjoako-najen skanda mì tì kù bixón-najen tsà kìtsajnakon isa-jen.

⁹ K'oaá s'ín komà-najen nga jyeé-la tjínè-la nga kiyá-jen. K'oaá s'ín komàt'in-jen mé-ne nga isa ndaà kjót'aà takòn-najen Nainá xi ma-la síkjaáya-la mik'en, nga mì tà yijo-najen kjót'aà takòn-jen.

¹⁰ Nga jyeé kjomeè k'en-jen, tanga Nainá tsasìko-najen nga kisìkatojìin-najen kjo'in ko tákó sùkatojìin-isa-najen kjo'in. Ko k'oaá s'ín kjit'aà takòn-jen nga jè sùkatojìin isa-najen nita mé kjoa-ne.

¹¹ Jñò, mochjeén-né nga s'ichját'aà-najen nga kinókjoat'aà-là Nainá it'aà tsajen mé-ne nga isa kjìn koma-ne xita xi kichjat'aà-la Nainá, tìkoaá kjìn koma xita xi tsjá-la kjondaà Nainá koni s'ín machikon-t'in-jen.

Mé-ne mìkii kù-ne Pablo ján Corinto

¹² Tjín jngoò kjoa nga ndaà nìkìtsajna-jen yijo-najen. K'oaá s'ín beè-lajen takòn-jen nga it'aà ts'e Nainá nchrobá-ne nga tsjeè ko kixi tihonguìko-jen yijo-najen i isò'nde, ko jè tjina íjtòn it'aà tsajòn. Mìtsà kjoachjine-la xi taxkì xita nga ko'nè-jen, kjondaà-la Nainá-né.

¹³ Mìtsà k'ejí kjoa nga tìtsachjìin-nòjen, ta jè-né nga kixkejñoò ko kjoas'en-jìin-nò koni tsò 'én xi tjít'aà xojon jè. K'oaá s'ín majngoò takoàn nga nguì ndaà kjìya-nò

¹⁴ koni s'ín jye kjòchiya chiba-nò nga tsja kàtama-nò it'aà tsajen kò nga tìkoà tsjaá kòma-najen it'aà tsajòn k'e nga kjoí ìjngoò k'a Jesucristo xi otìxoma-ná.

¹⁵ 'An, jyeé ndaà tíjngoò takoàn it'aà ts'e kjoa koi, k'oaá ma-ne nga k'oas'ín kiskoòsòn-la nga jò k'a k'íkòn-nò mé-ne jñò, jò kjondaà sakò-nò. [Tanga mì k'oaá s'ín tsitasòn.]

¹⁶ K'oaá s'ín kisikítsjeèn, k'e nga kiaà nangui Macedonia nga ya jahato ítjòn-nò. Tjín-nè nga kjoahato ìjngoò k'a-nò k'e nga kjinchrobà-na mé-ne jñò kòma sìchját'aà-ná nga kjián nangui Judea.

¹⁷ K'e nga k'oas'ín kiskoòsòn-la, za k'oaá s'ín kinikítsjeèn nga 'an, tìsiskáko-nò? Majìn, nga mì k'oaá s'ín s'iaàn koni s'ín xi taxkì xitá isò'nde. Mìtsà ítjòn xan-nò: “Kòma-né”, kò tìk'e-ne ìjngoò k'a xan-nò: “Mìkì kòma.”

¹⁸ Tíbeè Nainá; 'én kixí xi kixan-nò, ngajen, mì k'oaá s'ín nokjoà-jen nga bixón-jen: “Jon, kòma-né”, kò “Mìkì kòma.”

¹⁹ Tímoteo, Silvano kò 'an, k'oaá s'ín nokjoàyajìin-nòjen it'aà ts'e 'én-la Jesucristo xi ki'ndí-la Nainá. Tsjìn-la 'én xi tsò jon kò majìn. Nainá jngoò k'a síkitasòn it'aà ts'e Cristo nga tsò: “Jon, kòma-né.”

²⁰ Ngats'ì 'én xi chja Nainá koni s'ín tsjá tso'ba, it'aà ts'e Cristo bitasòn yije-né. Nga jè Cristo xi tsò “kòma-né”. Kò it'aà ts'e Cristo, jñá bixón-ná: “K'oas'ín kàtama”, mé-ne jeya kíjna-ne Nainá.

²¹ Jè Nainá, xi síkixiyandaà-ná nga jè titsajnaoá Cristo [xi xó jaàjìin-ne Nainá], tìkoá jñá xó jaàjìin-ná Nainá.

²² Kò tìjè-ne Nainá xi tsibít'aà chiba-ná koni jngoò sello; kisikíjnajìin inìma-ná jè Inìma Tsjeè-la xi tjoé ítjòn-ná nga kixì kjoa nga tìkoà tjoé yije-ná kjondaà xi tjíndaà-la nga tsjá-ná.

²³ Tíkotsejèn Nainá, jè tíbeè inìma-na, mé-ne kj'eè kii fi-na Corinto koni s'ín tíjìin-na; koií kjoa-la, majìn-na nga 'on kòma-la inìma-nò nga 'én ts'èn kichjàko-nò.

²⁴ Ngajen, majìn-nòjen nga ngajen, kjo'ño kotìxoma-nòjen it'aà ts'e 'én xi mokjeiín-nò. Ta saá nìchját'aà-nòjen mé-ne nga s'e-nò kjotsja nga kixì titsajnaà koni s'ín mokjeiín-nò.

2

¹ K'oaá ma-ne nga k'oas'ín kiskoòsòn-la nga mì tì kii kùikon-nò. Majìn-na nga ba kìtsajnaà.

² Tanga tsà 'an, ba síkìtsajna-nò, nga kòma iskan, mì tì yá tjín-ne xi sìtsjako-na, nga jñò, jyeé ba titsajnaà.

³ Koií xá jye kiskii jngoò-nò xojon, mé-ne k'e nga kìjchokon ìjngoò k'a-nò nga mì ba síkìjna-ná nga mochjeén-né nga jñò sìtsjako-ná. Nga k'oaá s'ín tíjngoò takoàn, 'an, matsja-na tìkoà jñò, matsjaá-nò.

⁴ K'e nga k'oas'ín kiskii-nò, ndaà jchán kokájno-la inìma-na, baá kis'e-na skanda ndáxkoaàn tsibíxteèn. Tanga 'an mìtsà koi xá kiskii-nò nga kàtaba-nò. Jè-né nga jchaa nga 'ño matsjake-nò.

Kó kitsò 'én xi kùichja Pablo it'aà ts'e xitá xi tsohótsji jé

⁵ Jè xitá xi tsohótsji jé, mìtsà ta 'an xi ba kisikìjna-na, mejèn tsà ba kisikìtsajna ngats'ì xitá naxandá-la Cristo. Tà k'oaá xan-nò nga mì koto chiba-la koni s'ín tìxan-nò.

⁶ Nga kjìn ma-nò xi tsibìnè-là kjo'in jè xitá jè; jyeé ndaà tjín, ta kòma-ne.

⁷ I'ndeí, jè xi s'een nga sìjchàat'aà-là jé-la; sìjetakòn xitá jè, mé-ne nga mì kjoba kiyájìin-ne.

⁸ K'oaá ma-ne nga bìtsi'bà-nò nga ndaà jchibàya-nò nga ìjngoò k'a tìtsjacha xitá jè.

⁹ Tikoá koií xá kiskii-nò it'aà ts'e kjoá koi, mejèn-na skot'aà-nò, a kixii kjoá nga ma-nò nikitason yije.

¹⁰ Jè xita xi jñò nìjchàat'aà-la jé-la, tikoá 'an siìjchàat'aà-la. Tsà mochjeén-né nga 'an siìjchàat'aà-la xita jè, 'an jyeé kisìjchàat'aà-la xi kjondaà tsajòn kò tíbeè Cristo.

¹¹ Mé-ne jè xita neí mikiì koma jè siìkijne-ná, nga jyeé ndaà 'yaá kjoamaña-la kós'ín síxá.

Kó komà-la Pablo nga mikì kisatìkjoè Tito ján Troas

¹² K'e nga ijchoa ján naxandá Troas, nga kichjàya 'én ndaà-la Nainá xi kjoá ts'e Cristo, it'aà ts'e Na'èn-ná kitáx'a'nde-na nga kisixákoá 'én ndaà-la Nainá.

¹³ Tanga mikì ndaà kis'e-la inìma-na nga mikì kiskaàjñaà jè 'ndsé Tito. K'oaá komà-ne kisikítsajna jña xita xi ya i'nde-la, ikjoàn kiaà ján nangui Macedonia.

Mé kjoa-ne nga jè Pablo tsjá-la kjondaà Nainá

¹⁴ Ndaà chí-la Nainá nga it'aà ts'e Cristo fikò-najen k'e nga okó-lajen jña xita isò'nde nga jye kisikijne. It'aà tsajen k'oaá s'ín obísòn kjohítsjeèn-la Nainá xi kós'ín ngaya-la koni jngoò jta-la tsojmì xi 'ñó ndaà jne, mé-ne nga skoe-ne jña xita nita ñánda-ne nga títsajna.

¹⁵ It'aà tsajen k'oaá s'ín ngaya-la koni nì'ndi-la chrjongó-la Nainá, k'e nga jè Cristo tsját'aà-la Nainá. K'oaá s'ín bijchókajiiin-la jña xita xi bitjokajiiin kjo'in kò xita xi chija.

¹⁶ It'aà ts'e jña xita xi chija, [k'e nga beè-najen nga bènojmiya-jen 'én-la Nainá], k'oaá s'ín ch'o jne-la koni jngoò jta xi sík'en-ná. Tanga jña xita xi bitjokajiiin kjo'in, k'oaá s'ín ndaà jne-la koni jngoò jta xi síkijnakon-ná. It'aà ts'e xá koi, nijngoò xita chíkjoa-la nga síkitason xi ta kjohítsjeèn ts'e.

¹⁷ Ngajen, mikì k'oaas'ín 'nè-jen koni s'ín xita xi kj'eíí xi chjaya 'én-la Nainá nga ton síkijne. Ngajen, 'én kixii nokjoà-jen. Nainá tíbeè-ne nga jè kisikasén-najen kò nga'ño ts'e Cristo-né nga nokjoàya-jen, nga jè Cristo titsajnakò-jen.

3

Xá-la Nainá xi kjoa xitse

¹ K'e nga k'oa'mì-nòjen kjoá koi, ¿a bìts'ia ijngoò k'a-jen nga ndaà nikitajna-jen yijo-najen? Jñò, ¿a k'oaá s'ín nikitajne nga mikì tíj'nde-na nga ma sixá tsá tsjìn-na xojon xi jñò k'oi-ná, o xi kj'eíí xita tsjá-na koni s'ín síjé xita xi kj'eíí?

² Majìn, jñò sobà-nò xi xojon-najen ma xi tíjìn ijìn inìma-najen. Ngats'ii xita beè-né koá bíxkejiiin-né.

³ K'oaá s'ín ndaà 'ya-jen nga jñò-nò xi koni xojon-la Cristo xi it'aà tsajen kitjei. Jngoò xojon carta xi mìtsà tinta kitjei-ne; koo Inìma Tsjeè-la Nainá xi tíjnakon kitjei-ne; mìtsà ndajo kitjeit'aà; yaá kitjeit'aà yijo inìma-la xita.

⁴ Kjoá koi, k'oaá s'ín makixiya nga it'aà ts'e Cristo mokjeiín-najen it'aà ts'e Nainá.

⁵ Xi ta nga'ño tsajen tsjìn-najen kjohítsjeèn mé xi s'en-jen. Tanga jè Nainá tsjá-najen kjohítsjeèn k'e nga mé xi 'nè-jen.

⁶ Jè Nainá tsjá-najen kjohítsjeèn nga chí'nda-la ma-jen mé-ne nga koma kinókjoaya-najen it'aà ts'e kjondaà xitse xi Nainá tsibíndaajiiin-kò jña xita. Mìtsà kjoá ts'e kjotíxoma xi xojon tíj'aà, ts'eé Inìma Tsjeè-la Nainá. Jè kjoá xi ts'e kjotíxoma sík'en-ná nga nguixkon Nainá, tanga jè Inìma Tsjeè-la Nainá síkijnakon-ná.

⁷ Jè kjotíxoma xi kitjoé-la Moisés xi ndajo kitjeit'aà, kjoa biyaà j'ìko. Tanga k'e nga sa kitjoé íjòn-la kjotíxoma jè, k'oaá s'ín ki'ya-la kjoa jeya-la Nainá. Jè Moisés, k'e nga j'ì-ne nga kù mijìn-jno nindoò, jñà xita Israel mìkù komà kiskoò'an Moisés nga 'ño ote ni'ín kji isén-la; tanga xi komà iskan, chaán kichijà xi ote kji isén-la. Tsà k'oaá s'ín kis'e-la kjoajeya, jè kjoa xi tjinè-la nga chija,

⁸ isa jeya tjin kjondaà xitse xi tsjá-ná Nainá k'e nga tsjá-ná Inima Tsjeè-la.

⁹ Nga jeya j'ì jè kjotíxoma xi kjoa biyaà tsibínè-ná, isaá 'ño jeya kitasòn 'én xi nokjoàya-jen nga xita kixi síkítsajna-ná Nainá.

¹⁰ Nas'ín 'ño kis'e-la kjoa jeya jè kjotíxoma xi jye tsato, tanga mìkù mangàsòn-ko jè kjoajeya xi tjin-la kjondaà xitse; isaá 'ño jeya tjna.

¹¹ Tsà jè kjoa xi tíchijangui kis'e-la kjoa jeya, isaá jeya tjin kjoa xitse xi mì tì kù chija-ne nita kjé-ne.

¹² Nga tjangò takòn-jen nga titsachiñá-lajen kjoa koi, k'oaá ma-ne nga mìkù masobà-najen nga nokjoà-jen.

¹³ Mìtsà k'oa'sín 'nè-jen koni kis'ìn Moisés nga nikje tsibíjtsa isén-la, mé-ne nga jñà xita Israel mìkù komà kiskoò'an-ne nga jye tíchijangui xi ote kji isén-la.

¹⁴ Tanga jñà xita Israel kjòtájàjìn kjohítsjeèn-la. Skanda nachrjein i'ndeij, k'e nga bíxkejìn Xojon-la Nainá xi tjit'aà kjoa jchínga xi tsibíndaàjìn-ko xita, tákó k'oaá s'ín ma-la koni tsà nikje xoba kijtsa kjohítsjeèn-la. Ta jngoo it'aà ts'e Cristo koma tjáxin nikje jè.

¹⁵ Skanda nachrjein i'ndeij, jñà xita Israel, k'e nga bíxkejìn xojon xi kiskù Moisés, tákó k'oaá s'ín ma-la koni tsà nikje xoba tíjtsa'ma kjohítsjeèn-la.

¹⁶ Tanga k'e nga jngoo xita síkjahtjya-la kjohítsjeèn-la nga fit'aà-la Na'èn-ná xi otíxoma-ná, tjáxin-la nikje xoba xi tíjtsa'ma kjohítsjeèn-la.

¹⁷ Nga jè Na'èn-ná, jè sobà-né xi Inima Tsjeè-la Nainá. Ya ñánda tjna Inima-la Na'èn-ná, jñà xita títsajnandeij-né kjoa ts'e kjotíxoma.

¹⁸ Ngats'iaá jñà mì tì nikje xoba tíjtsa'ma-ne kjohítsjeèn-ná. It'aà tsaján k'oaá s'ín ngaya-la koni jngoo chitsín xi ma chitsejèn-yá xi okó kjoa jeya-la Na'èn-ná. Kjit'aà nachrjein isa jeya tíhotsejèn koni kji Na'èn-ná nga jè Inima Tsjeè-la tískjajtjya-ná.

4

Kó s'ín síhiseèn-ná jè 'én ndaà-la Nainá xi kjoa ts'e Cristo

¹ Koi kjoa-la ngajen, mìkù mahindaà inima-najen nga jè Na'èn-ná kjohimakeè-najen nga xá ts'e kisingatsja-najen.

² Jyeé kichjaàxin-jen jñà kjoa ch'o xi tji'ma, xi sísobà-najen; mìkù chonachan-jen, nì mìkù níkatjya-lajen 'én-la Nainá. Nguì 'én kixi bènojímí-jen, mejèn-najen nga nguixkon Nainá ngats'ii xita kateèxkon kjohítsjeèn-najen kós'ín 'nè-jen.

³ Jè 'én ndaà-la Nainá xi kjoa ts'e Cristo xi nokjoàya-jen, jñà xita xi ya tíchijajìn kjoa ts'e jé-la, ta jñà-né xi tíjtsa'ma kjohítsjeèn-la nga mìkù fiya-la.

⁴ Jè xita neij xi tíhotíxoma-la isò'nde nachrjein i'ndeij, xi kos'ín tjna koni tsà nainá, jé bíchjoà xkon jñà xita xi mìkù mokjeiín-la it'aà ts'e Cristo; nga jè bíjño kjohítsjeèn-la, mé-ne nga mìkù skoe-ne kjoahiseèn-la 'én ndaà-la Nainá xi kjoa ts'e Cristo xi 'ño jeya tjna, nga jè Cristo xi okó kó kji xi nguì jè sobà Nainá.

⁵ Ngajen, mìtsà tà it'aà tsajen nokjoà-jen k'e nga bènojímíya-jen 'én-la Nainá; it'aà ts'éé Jesucristo nokjoà-jen nga jè xi otíxoma-ná. Ngajen, tà chí'ndaá ma-jen nga ngajen níxá-nòjen, koi-né nga matsjacha-jen Jesús.

⁶ Nainá, jè xi kitsò nga jè ni'ín kàtasíhiseèn i'nde ñánda jñò choòn, tjiè-né xi kisihiseèn ijìin inìma-najen, mé-ne jñà xita xi kj'eíi kòhiseèn-la nga skoexkon kjoa jeya-la Nainá koni s'ín 'ya-la ts'e Cristo.

Mé-ne tìngòò-ne takoán nas'ín kjo'in tìtsanìkjaán

⁷ Kjonndaà jè xi 'ñó tse chjí-la, yaá tíjìn yijo-najen. Tanga yijo-najen k'oaá s'ín ngaya-la koni tíjì ni'nde. Jè Nainá k'oaá s'ín kis'iìn mé-ne nga 'ya-la nga jè nga'ñó xi 'ñó ndaà tísíxájiìn yijo-najen, it'aà ts'e Nainá nchrobá-ne; mìtsà it'aà tsajen nchrobá-ne.

⁸ 'Ñó kjin ma-ne kjoa xi tjin-najen, tanga maá kitjokàjiìn-jen. Tjin kjoa xi makájno-najen, tanga mìkii mahindaà-jen.

⁹ Fitjinguì kondraá-najen xita, tanga Nainá mìkii tsjeiìn takòn-najen; jñà xita beetoòn-najen, tanga mìkii chíkjoa-la nga síkjesòn-najen.

¹⁰ Nita ñánda-ne nga onguí-jen, kjit'aà nachrjein mejèn-la sìik'en-najen xita koni s'ín komàt'in Jesús; tanga jè Nainá, jè xi mejèn-la nga it'aà tsajen kàta'ya-la nga jè Jesús xi tísíkíjnakon-najen.

¹¹ Ngajen xi tìtsajnakon-jen, kjit'aà nachrjein tijnat'aà chraña-najen kjoabiyaá xi jè ngatji-la Jesús, mé-ne jè yijo-najen xi ma biyaá jcha-la kjoabinachon ts'e Jesús.

¹² Ngajen, kjo'iìn tìtsanìkjeiìn-jen skanda mejèn-la xita sìik'en-najen, tanga jñò kjoabinachon tísakó-nò.

¹³ K'oaá s'ín tíchja Xojon-la Nainá nga tsò: “Mokjeiìn-na k'oaá ma-ne nga kichjà.” Ngajen, k'oaá tìs'ín tjin inìma-najen it'aà ts'e 'én xi mokjeiìn-najen, k'oaá ma-ne nga nokjoá-jen.

¹⁴ Jè Nainá xi kisikjaáya-la Na'èn-ná Jesús it'aà ts'e kjoabiyaá, 'ya-nájen nga tìkooá kijchò nachrjein nga sìikjaáya-najen koni s'ín jaáya-la Jesús. Ikjoàn ngats'iaá kjiiko-ná ya nguixkon Nainá.

¹⁵ Ngats'ii kjoa koi, kjonndaà tsajòn-nò, mé-ne isa kjin koma-ne xita xi tjoé-la kjonndaà-la Nainá, nga tìkooá isa jeya kina Nainá nga kjin ma xita xi tsjá-la kjonndaà.

¹⁶ K'oaá ma-ne mìkii mahindaà inìma-najen; kixii kjoa yijo-najen tífehenguì-né; tanga Nainá, nachrjein nchijòn tísixitseyá inìma-najen.

¹⁷ Jè kjo'in xi nikjeiìn-jen i isò'nde, tà chibaá tjin. Tà jngòò tjò oto. Tanga yaá sakó-najen kjonndaà xi isa jeya tjin xi mìkii fehet'aà nita kjé-ne.

¹⁸ Nga mìtsà jñà chitseyèn-lajen kjoa xi tjin isò'nde xi tseyèn, jñà chitseyèn-lajen xi mìkii tseyèn xi ts'e Nainá. Kjoa xi tíma i isò'nde, kjoehet'aà-né, tanga jñà kjoa xi mìkii tseyèn, mìkii kjoehet'aà nita kjé-ne.

5

Ni'ya xi tìjndaà-la Nainá ján ngajmii

¹ Yijo-ná k'oaá s'ín ngaya-la koni ni'ya xi tjin i it'aà nangui xi chiba nachrjein ma-la nga bixòña. Tsà kixòña ni'ya jè, Nainá tìjndaà jngòò-la ni'ya ján ngajmii, xi tíjna nita kjé-ne, nga mìtsà tsja xita kisindaà-ne.

² K'oaá ma-ne nga imaá fahatse-la inìma-ná i isò'nde nga jè xi mejèn-ná nga nìton kìtsajnyáá ni'ya-ná ján ngajmii.

³ Nas'ín sijna yijo-ná xi tsjach'á i'nde, Nainá tsjá ijngòò-ná xi yijo xitse. Jè inìma-ná mìtsà chija, yijo xitseé koma.

⁴ K'e nga tákó tijnakon yijo-ná koni jngòò ni'ya xi ma bixòña, imaá fahatse-ná, maba-ná, mìkii tsò takoán nga nìkíjna ni'ya-ná. Majìn-ná nga tjáxìn-ná ni'ya jè, jè xi mejèn-ná nga kàtaxitseyá yijo-ná mé-ne nga yijo-ná xi ma biyaá jngòò k'aá jchija nga jè kjoabinachon sìikijne-la.

⁵ Jè Nainá xi xó k'oas'ín tsibíndaà-ná kò kitsjaà-ná Inima Tsjeè-la mé-ne tjikixi-ne kjoa nga iskan tsjá yije-ná koni s'ín kitsjaà tso'ba.

⁶ Kjit'aá nachrjein k'oas'ín tíjngoò takoán it'aà ts'e Nainá kò k'oaá s'ín tíjin-ná, k'e nga tákó tíjnakon yijo-ná i it'aà nangui koni jngoò ni'ya ñánda titsajnaá, kjiin titsajna-lá ni'ya-la Na'èn-ná ján ngajmii.

⁷ K'oaá s'ín titsanjchá yijo-ná koni s'ín mokjeiin-ná it'aà ts'e Nainá, mi k'oaá s'ín mochjeén nga kos'ín sijchá yijo-ná koni s'ín beè xkoaán.

⁸ Tíjngoò takoán it'aà ts'e Nainá, isaá-la ndaà tjin tsà sikijnaá yijo-ná, mé-ne nga ján kitsajnaáoá Na'èn-ná ngajmii.

⁹ Koií kjoa-la nga ndaà sikitasoán koni s'ín sasén-la Na'èn-ná, a i titsajnaá it'aà nangui a xi ján titsajnaá ján ngajmii.

¹⁰ Mochjeén-né nga ngats'iaá kijochoá nguixkon ñánda tíhotixoma Cristo nga k'oi-lá kindá nga jngoò jngoá; tjoé-ná chji-ná mé kjoa xi ki'né nga titsajnaá isò'nde, a ndaà ki'né, o xi ch'o ki'né.

'Én xi tsjá kjoa'nchán it'aà ts'e Nainá

¹¹ Nga yaxón-jen Nainá koni s'ín ok'in-la, k'oaá ma-ne bènójmí-lajen xita xi k'ejí, mé-ne kòkjeiin-la it'aà ts'e Cristo. Nga nguixkon Nainá ndaà beèkon-najen nga ndaà 'nè-jen, 'an k'oaá tjs'ín mejèn-na nga tikoá jñò jyeé ndaà yaxkon-najen.

¹² Mitsà 'mì-nòjen nga tjin ndaà nikítsajna-najen yijo-najen tanga jè xi mejèn-najen nga tsja kátama-nò it'aà tsajen, mé-ne koma kinókjoa-lá jñà xita xi tijnà ndaà síkítsajna-ne yijo-la koni s'ín tsejèn-la, tanga jè inima-la mikii ndaà síkinda.

¹³ Tsà ská-najen, koi-né nga Nainá nixá-lajen, tsà ndaà tjin kjohitsjeèn-najen, kjondaà tsajòn-nò nga jñò nixá-nòjen.

¹⁴ Jè kjoatjòcha-la Cristo jè kitsobà'ño-najen nga ma fiko-najen koni s'ín mejèn-la, k'oaá tjin kjohitsjeèn xi kjòchiya-najen nga jngoò xita k'en ngajo-la ngats'ii xita xi tjin isò'nde, k'oaá komà-ne nga ngats'ii xita k'en.

¹⁵ Jè Cristo k'en ngajo-la ngats'ii xita xi tjin isò'nde, mé-ne jñà xita xi títsajnakon mi tì k'oaá s'ín sijchá-ne yijo-la koni s'ín mejèn-la yijo-la. K'oaá s'ín sijchá yijo-la koni s'ín mejèn-la Cristo nga jè k'en ngajo-la koa jaáya-la it'aà ts'e kjoabiyaà.

¹⁶ I'ndeí mi tì kii k'oas'ín nikítsjeèn-najen it'aà ts'e xita xi k'ejí kós'ín tsejèn, kó kjoàn, koni s'ín s'ín jñà xita isò'nde. K'e nga sa ítjòn k'oaá s'ín kinikítsjeèn-jen, jè Cristo, tsà taxki xita isò'nde-nè. Tanga i'ndeí mi tì k'oaá s'ín nikítsjeèn-najen.

¹⁷ Jngoò xita, k'e nga Cristo tíjnakò, xita xitse-né it'aà ts'e Nainá. Jè kjoa jchínga jyeé tsato, jyeé kjòxitseya yije.

¹⁸ Ngats'ii kjoa koi it'aà ts'e Nainá nchrobá-ne, nga it'aà ts'e Cristo kichibándaà-ná kò Nainá. Kò jè Nainá kitsjaà-najen xá nga koma kénójmí-jen kós'ín kjoóndaà-ne xita kò Nainá.

¹⁹ It'aà ts'e Cristo kisixá Nainá nga kisikjoóndaà-ne xita isò'nde. Mi tì kii kindá kis'iin-ne jé-la jñà xita. Kò kitsjaà-najen xá nga bènójmí-jen kós'ín ma nga chibándaà-ná kò Nainá.

²⁰ K'oaá ma-ne ngajen síkasén-najen Cristo nga nokjoà ngajo-lajen. K'oaá ngaya-la koni tsà jè Nainá tíbitsi'ba-nò. It'aà ts'e Cristo bitsi'bà-nòjen: jchibándaàko-nò Nainá.

²¹ Cristo, mitsà jé tsohótsji; tanga xi kjondaà tsaján, Nainá, jé tsohónè yije-la ngats'ii jé xi tjin isò'nde, mé-ne it'aà ts'e Cristo, xita kixi komaá nga jè Nainá síkixiya-ná.

6

¹ Ngajen, xi Nainá nìxát'aà-lajen, bítsi'ba-nòjen, kjondaà xi tsjá-nò Nainá, ndaà tikjeén.

² Nga jè Nainá, k'oaá tsò:

Ki'nchrè-lè k'e nga ndaà chiba-la kjòchjeén-lè kjondaà-na, tsohósikoó-lè, jè nachrjein k'e nga tíchiñá-la nga kitjoiin kjo'in.

I'ndeí, jñò, ndaà tiná'yaà. Jyeé ijchò nachrjein ts'e kjondaà-la Nainá nga kítjokàjñòò kjo'in.

³ Nímé kjoa xi ch'o 'nè-jen xi síkits'ón-jiiin-la xita xi kj'eíí, mé-ne jè xá-la Nainá xi jin títsa'nè-jen mi yá xi ch'o kichjajno-la.

⁴ Nita mé kjoa xi 'nè-jen, ndaá onguíko-jen yijo-najen mé-ne jñà xita skoe-ne nga chí'nda-la Nainá 'mì-najen, nga 'ñó tjín-najen kjoatsetakòn, 'ñó ndaà chíkjoako-najen kjoa ts'e kjo'in, kò tíchijat'aà-najen mé tsojmì xi kochjeén-najen, koa chjá tíma-najen kjoa xi tíhotojiiin-jen,

⁵ nga tísat'é-najen, nga ndayá tínikjas'en-najen, nga ngajen binchaàtsji-lajen kjoasiì naxandá, nga 'ñó nìxá-jen, kò mìkiì tsafé-jen, skanda bitsajna kjinchrá-nájen.

⁶ Tanga nguì tsjeé títanìjchá-jen yijo-najen; ndaá machiya-najen nita mé kjoa-ne; tjín-najen kjoatsetakòn kò kjondaà it'aà ts'e xita; kò jè Inima Tsjeè-la Nainá tíxájiin inima-najen; kò nguì koó inima-najen nga tjín-najen kjoatjòcha.

⁷ Bènojmi-jen 'én xi kixi tjín. Tjín-najen nga'ñó-la Nainá. Jñà kjoa kixi xi 'nè-jen, k'oaá ngaya-la koni jñà kicha xi kò ngaskón kò kixi mochjeén.

⁸ Tjín xita xi beèxkón-najen, tikoá tjín xi mìkiì beèxkón-najen. Sakoáá ndaà chja it'aà tsajen, sakoáá majin. Tjín i'nga xi xita ndiso tsò-najen tanga ngajen 'én kixiì nokjoá-jen.

⁹ Tjín i'nga xi k'oas'ín síko-najen koni tsà mìkiì beèxkon-najen, tanga tjín xi beèxkon-najen. K'oaá s'ín beèhikon-najen koni tsà jyeé k'en-jen, tanga títajnakon-nájen. Tsjá-najen kjo'in jñà xita tanga mìkiì biyaa-jen.

¹⁰ K'oaá s'ín ko'an-najen koni tsà ba tjín-najen, tanga ngajen tsja tjín-najen. Tsò-najen nga xita ima-né, tanga it'aà tsajen, kjin jchán xita tísakó-la kjondaà ts'e inima-la. Nímé xi tjín-najen, tanga nguixkon Nainá, tjín yijeé-najen nita mé-ne.

¹¹ Jñò 'ndsee xi Corinto tsajòn, jyeé kinokjoà kixi-nòjen; nguì koó inima-najen matsjacha-nòjen.

¹² Ngajen, mìtsà bìxkon-nòjen kó tsò kjohítsjeèn-la inima-najen, jñò-nó xi bìxkoòn kó tsò kjohítsjeèn-la inima-nò.

¹³ K'oaá s'ín chja-nò koni tsà ixti-na xan-nò, jñò, k'oaá tís'ín t'een koni s'ín 'nè-jen, nga kò inima-nò títajacha-nájen.

Tinchat'aàxin-là kjoa ts'e jé

¹⁴ Jñò, xi mokjeiín-nò it'aà ts'e Cristo, kì jñà xita xi mìkiì mokjeiín-la nìngàsòn-kò kjohítsjeèn-nò. ¿A komaá kongàsòn-kò jngoò xita xi tjín-la okixi kò jngoò xi tsjin-la okixi-la Nainá? ¿A komaá ya kítajajnañáá ñánda jñò choòn nga tjín kjoa iseèn?

¹⁵ ¿A komaá ndaà kjiko xíkjin, jè Cristo kò xita neií? Tikoáá mìkiì koma ndaà kjiko xíkjin jngoò xita xi mokjeiín-la it'aà ts'e Cristo kò jngoò xi mìkiì mokjeiín-la.

¹⁶ Mìkiì koma ya sijnaya ni'ya ingo-la Nainá jñà xkòsòn xi nainá tsò-la xita. Nga jñá-ná xi 'mì-ná ni'ya ingo-la Nainá xi tíjnakon. Koni s'ín kitsò Nainá it'aà ts'e xita xi mokjeiín-la, tsò-né:

'An, yaá kótijnakoaa naxandá-na, tikoáá yaá kojmejiin-la.

'An-ná xi Nainá kitsò-na koa jñà koma xita naxandá-na.

¹⁷ Nainá k'oaá kitsò nga kiichjajin-la xita naxandá-la:

Titjokajin-la jñà xita xi mikii mokjeiin-la it'aà ts'an,

koa tinchat'aaxin-la.

Nimé kjoa chingajñoò xi tjé tjin nga nguixkoaàn,

mé-ne nga 'an koma skoétjò-nò.

¹⁸ 'An-ná xi skoétjò-nò koni jngoò Na'en,

jñò koma ndí ixti x'in-na ko ndí ixti íchjín-na,

k'oaá tsò Na'en-ná xi ta jè tajngoò xi 'ño tse nga'ño tjin-la.

7

¹ Jñò ndí 'ndsè xi matsjake-nò, k'oaá tjin kjondaà xi tsjá-ná Nainá koni s'in kitsjaà tso'ba. K'oaá ma-ne kinchat'aaxin-la ngats'ii kjoa xi tjé tjin xi síkits'on yijo-ná ko inima-ná, mé-ne tsjeè kitsajnaà nga nguixkon Nainá. Ndaà jchaxkoaàn Nainá mé-ne nga kjit'aà nachrjein isa tsjeè sjichá yijo-ná.

Mé-ne tsja ma-la Pablo kjoa xi s'in xita Corinto

² Chjoétjò-najen nga ko inima-nò. Ngajen, niyá xita xi ch'o niko-jen; ni saá yá xita níki'on-jen, ni saá jngoò xita chonachan-lajen.

³ K'e nga k'oas'in tixan-nò, mìtsà mé kjoa xi ch'o tjin tihonè-nò; jyeé k'oa kixan-nò nga sa ítjòn, kjit'aá nachrjein nga matsjacha-nòjen, nas'in kiyá ko tsà titsajnakoaàn, koó inima-najen nga matsjacha-nòjen.

⁴ Nguì 'én kixii xi tichjàko-nò; 'ño matsja-la inima-na it'aà tsajòn. 'Ñó tjin-na kjojetakòn ko taxki tsjaá ma-la inima-na, nas'in tse kjo'in tjin-najen.

⁵ K'e nga j'ii-jen i nangui Macedonia, nimé xi komà kinikája-jen. 'Ñó kinikájno-jen; xki xi ján kis'e-najen kjoasiì, koa ya jiiin inima-najen 'ño kisinchaàxkón.

⁶ Tanga Nainá síjehikon-né xita xi indaà tjin ikon; kisìjehikòn-najen k'e nga j'ii Tito.

⁷ Mìtsà tà koi kjoa-la nga j'ii Tito, jè-né nga jè, tikoáá tsja tjin-la xi it'aà tsajòn. Tsibénojmí-najen nga jñò, 'ño mejèn-nò nga jchaxkon-najen. K'oaá ti kitsò-najen nga ba titsajnaà koa makájno-nò it'aà ts'an. K'e nga ki'nchrè 'én koi, 'an, isgá ndaà kjòtsja-na.

⁸ Jñò, nas'in tà kjoaba tsohotsji-nò k'e nga kisikasén ítjòn-nò xojon, i'ndeì, mì ti kii tsikájno-na. Nga sa ítjòn kisikájnoa nga kisikasén jngoò-nò xojon, koi kjoa-la nga kisibaá chiba nachrjein-nò.

⁹ Tanga i'ndeì, matsja-la inima-na, mìtsà koi nga kjoaba kis'e-nò kjoa ts'e xojon, koi-né nga it'aà ts'e Nainá kinikájno jé-nò nga mì ti jé chinchaàtsji-nò. Jñò, k'oaá s'in kjòba-nò koni s'in mejèn-la Nainá. K'oaá ma-ne nga nimé kjoa ch'o kisakò-nò it'aà tsajen.

¹⁰ Jè kjoaba xi s'e-ná koni s'in mejèn-la Nainá, jè síxajin inima-ná nga nikájnoaá jé-ná nga mì ti jé binchaàtsji-ná mé-ne nga koma kitjokajñaá kjo'in; ko mìtsà mé xi iskan sikájnoaá. Tanga jè kjoaba xi tsjá-ná isò'nde nga mikii mokjeiin-ná it'aà ts'e Nainá, jé síxajin inima-ná nga kjoa biyaà fiko-ná.

¹¹ Tanga tikítsjeèn ngats'ii kjondaà xi ki'nè ta koi kjoa-la nga kjoaba kisakò-nò it'aà ts'e Nainá. I'ndeì titsajnandaà-nò nga s'een kjoa xi tjinè-nò nga sikitasòn; k'oaá s'in titsahokoò yijo-nò nga nimé jé tjin-nò; ma-jticha-nò kjoa ts'e jé; i'ndeì tsakjoòn-chaà Nainá; mejèn-nò nga jchaxkon-ná; makájnoó-nò it'aà ts'an; k'oaá komà-ne nga kits'ii-la kjo'in jè xita xi tsohotsji jé. Ngats'ii kjoa koi koni s'in ki'nè, k'oaá s'in 'ya-la nga mìtsà ngats'ioò tjin-nò jé.

¹² 'An, koni s'ín kiskii-nò xojon carta xi kisikasén-nò, mìtsà jè tìsikìtsjeèn it'aà ts'e xita xi tsohòtsji jé; ni mìtsà it'aà ts'e xita xi kitsì'on kisikasén-nò xojon. Jè-né nga tijnò ki'ya-nò nga nguixkon Nainá nga kixí kjoa nga tjòcha 'ya-nájen.

¹³ Maje takòn-nájen ngats'ii kjoa xi ki'nè.

Mìtsà ta koií kjoa-la nga maje takòn-jen it'aà ts'e kjoa koi; isa 'ño matsja-najen nga ki'ya-jen Tito nga 'ño tsja tjin-la, koií kjoa-la nga ngats'ioò kinìtsjakoo.

¹⁴ 'An, jyeé kos'ín ndaà kisikìtsajna-nò nga nguixkon Tito koni kixan-la. Jñò, nimé kjoa tjin xi ch'o kinikìjna-ná. Koni s'ín nga ngats'ii 'én xi ki'mi-nòjen, ngui 'én kixi-né, k'oaá tis'ín kixi itjo koni tsò 'én xi kixan-la Tito nga ndaà kisikìtsajna-nò.

¹⁵ Tito, isaá 'ño ndaà matsjakeè-nò k'e nga bítsjeèn-la nga ngats'ioò ndaà kinikitasòn-la ko ndaà kichjoétjò k'e nga ijchòkon-nò, koa 'ño ndaà kiyaxkón.

¹⁶ I'ndeí, it'aà tsajòn ma'ñót'aà takoàn nita mé kjoa-ne, k'oaá ma-ne nga matsja-la inima-na.

8

Mé kjoa-ne nga ton maxkó-ne

¹ Ndí 'ndsè ko tichjaá, mejèn-na nga kàtasijin-nò kjondaà-la Nainá xi okó ijìn naxandá-la Cristo xi tìtsajna ya nangui Macedonia.

² Nas'ín 'ño tse kjo'in nchihotojìn tikoa tí'ya-la nga 'ño matsja-la. Nas'ín 'ño xita ima, jña tsojmì xi tsjá kjotjò-la Nainá, koó inima-la tsjá koni tsà 'ño xita nchiná.

³ 'An, tibe-ná nga koó kjotsja-la tsjá ton xi kjotjò ts'e Nainá koni kji bijchó nga'ño-la, saá k'oaá skanda tsjásòn-né koni kji bijchó nga'ño-la.

⁴ Jña xita koi, 'ño tsibítsi'ba-najen nga mejèn-la nga tikoa sikkasén-la ton kjotjò jña xita naxandá-la Cristo jè i'nde ñánda kochjeén-la.

⁵ Jña xita koi, isaá tsato kitsjaà koni s'ín titsachiña-lajen. Ítjòn nangui kisikìtsajna-la Nainá inima-la, ikjoàn, k'oaá ti s'ín kis'iin it'aà tsajen koni s'ín mejèn-la Nainá.

⁶ K'oaá ma-ne bítsi'ba-lajen Tito koni s'ín tsibíts'iaako xá xi kitjoé-la k'e nga sa ítjòn, k'oaá tis'ín kàtasíkjehet'aà-ne nga kàtíxkó ton kjotjò xi jñò 'bioò.

⁷ Tanga jñò, 'ño ndaà 'nè-nò ngats'ii kjoa xi 'nè nga ndaà mokjeiin-nò, nga ndaà nokjoà, nga ndaà tjin-nò kjoa chjine, nga titsajnandaà nga mejèn-nò sichját'aà nita mé kjoa-ne, nga tjin-nò kjoatjòcha nga it'aà tsajen komà-nò. Koni s'ín 'nè yije kjoa koi, k'oaá tis'ín tikatonè-la jè kjotjò xi 'bioò.

⁸ Mìtsà k'oaas'ín tixan-nò koni tsà jngoò kjotíxoma tìtsja-nò. Jè xi mejèn-na nga skoeè a ngui kixí kjoa nga tjin-nò kjoatjòcha koni s'ín tjin-la xita xi kj'eíí nga titsajnandaà nga tsjá kjotjò-la.

⁹ Jñò, jyeé 'yaà kjondaà-la Jesucristo xi otíxoma-ná. Xita imaá kis'iin yijo-la xi kjondaà tsajòn, nas'ín ts'e yije-né ngats'ii tsojmì xi tjin, mé-ne jñò tjoé-nò kjoa nchiná xi tjin-la.

¹⁰ Tsjaà jngoò-nò kjohítsjeèn it'aà ts'e kjoa jè. Kochjeén-nò nga ndaà sikitasòn koni s'ín tsibíts'iaako jè nó xi tsato nga kits'ioò ton xi kjotjò ts'e Nainá. K'oaas'ín ki'nè nga ko kjotsja-nò kits'ioò.

¹¹ I'ndeí, tákó k'oaá s'ín t'een koni s'ín tsibíts'iaako. K'oaá s'ín tikjehet'aà koni s'ín kjomejèn-nò nga sa ítjòn. K'oaá kji tjioò koni kji bijchó nga'ño-nò.

¹² K'e nga jngoò xita xi tijnandaà nga ko inima-la mejèn-la tsjá, k'oaá kji kàtatsjá koni kji ma xi s'ín, mìtsà tsato tinné-la. Nainá mìtsà tsato síjé koni kji ma xi 'nè.

¹³ Mìtsà koi kjoa-là nga kjo'in s'e-nò nga sìchjât'aà-lá xita xi kj'eíí, jè-né nga ngàsòn ngáya s'e-ná mé xi mochjeén-ná.

¹⁴ I'ndeí, jña xita koi, tsjin-là mé xi mochjeén-là, tanga jñò, tjín-nò. K'e nga kj'eíí nàchrjein, jña xita koi, s'eé-là mé xi mochjeén-là, kò jña kosìko-nò k'e nga jñò tsjin-nò. K'oaá s'ín ngàsòn ngáya s'e-ná mé xi kochjeén-ná.

¹⁵ K'oaá s'ín tíchja Xojon-là Nainá nga tsò: “Jè xi kjìn tsibíxkó, nímé tsiningui-là, koa jè xi chiba tsibíxkó, nímé kisìchjaà't'aà-là.”

Kós'ín komà nga kinikasén Tito ján Corinto

¹⁶ Ndaà chjí-là Nainá nga k'oas'ín tsibíjìn iníma-là jè Tito nga tìkoa kisìkájno í't'aà tsajòn koni s'ín 'an kisìkájnoa.

¹⁷ Kixíí kjoa jè Tito kòkjeíin-là koni s'ín tsibit'ín-là; tìkoa jè, 'ñó mejèn-là nga kùikon-nò; ikoón xi kitsò nga kjìkon-nò.

¹⁸ Jè Tito tífikò jngoò 'ndseé xi ndaà síkíjna ngats'ìi xita naxandá-là Cristo xi tjín nita ñánda-ne; nga jè 'ndseé ndaà chjaya 'én ndaà-là Nainá xi kjoa ts'e Cristo.

¹⁹ Mìtsà tà koi kjoa koi, tìkoaá jña naxandá-là Cristo jaàjìn jè 'ndseé nga koahitako-najen nga onguíko-jen ton kjotjò-là Nainá xi ngajen titsabíxkó-jen mé-ne jè Na'én-ná jeya kíjna, tìkoa skoe jña xita nga koó iníma-najen sìchjât'aà-lajen xita.

²⁰ K'oaá ma-ne nga mì yá xita kichjajno-najen kós'ín kochjeén ton xi tse tímáxkó.

²¹ K'oaá s'ín bìnè-lajen yijo-najen kjoa xi ndaà tjín nga nguixkon Nainá ko tìkoa nguixkon xita.

²² Tito, tìkoaá báhitako òjngoò 'ndsè xi xkí xi ján ki'ya-jen nga 'ñó bìnè-là yijo-là nga kjìn xá ma-là. Tjín kixí-né i'ndeí, isaá ndaà bìnè-là yijo-là nga sìchjât'aà-nò nga isa ndaà beè takòn-nò.

²³ Jè Tito, amigo ts'an-ná nga 'aán síxáko-na xi kjondaà tsajòn. Jña xita 'ndseé xi i'nga, jña naxandá-là Cristo xi tjín nangui Macedonia jña kisikasén; nga í't'aà ts'e xita 'ndseé koi, jè Cristo jeya bíjna.

²⁴ Takó-là xita koi kjoatjòcha xi tjín-nò, takó-là kjondaà xi tjín-nò koni s'ín jye okixan-là jña xita 'ndseé koi, mé-ne nga skoe-ne jña naxandá-là Cristo xi i'nga nga kixí kjoa.

9

Mochjeén-né nga sìchjât'aà-lá xita-là Cristo xi kj'eíí

¹ Jè kjoa ts'e nga'ñó xi máxkót'aà-là jña xita tsjeè-là Nainá xi kochjeén-là jè nga'ñó, mì tì kù mochjeén-ne nga 'an skiì-isa-nò.

² Be-ná nga titsajnandaà nga mejèn-nò síkitasòn. K'oaá xan-là jña xita xi nangui Macedonia ts'e nga jñò xi Acaya tsajòn, titsajnandaà-nò skanda jè nó xi tsato nga mejèn-nò síkasén nga'ñó. K'e nga kù'nchré jña xita Macedonia koni s'ín títas'nè, kjìn ma-ne xi matsja-là í't'aà tsajòn tìkoaá kjòtsja-là nga mejèn-là sìchjât'aà.

³ Koií xá tìsikasén-nò jña 'ndseé koi, mé-ne 'an mì ch'o kótijna-na tsà koi nàchrjein-là tsà ta 'én ndiso koma-ne koni s'ín ndaà síkítasajna-nò í't'aà ts'e kjoa koi, mé-ne jñò titsajnandaà koni s'ín kixan.

⁴ Kós'ín koma-ne tsà koi nàchrjein-là kjìko i'nga-na xita Macedonia. K'e nga kjìchò skoe-nò nga kj'eè kù titsajnandaà nga'ñó xi síkasén. Tsà k'oas'ín koma kjoa koi, ngajen kosobá-najen, kò jñò, isaá 'ñó kosobà-anò. Nga ngajen, í't'aà tsajòn 'ñó ndaà nìkítasajna-nòjen.

⁵ Koií kjoa-là k'oaá s'ín tìsìkítseèn nga tsibìtsi'ba-là jña 'ndseé nga kisikasén í'tjoàn, mé-ne nga kàtikon-nò koa kàtasìchjât'aà-nò nga kàtìxkóko-nò ton kjotjò

xi jye k'oas'ín kits'ioò ndsobaa, mé-ne k'e nga jye tijnandaà kjotjò-nò jcha-la nga ijìin inima-nò inchrobàjìin-ne; mìtsà kjo'ño komà-nò.

⁶ Tikítsjeèn jè 'én xi tsò: Jè xi chiba tsojmì bítjè, chibaa tsojmì majchá-la; jè xi tse tsojmì bítjè, kjìin tsojmì majchá-la.

⁷ Nga jngoò ìjngoò, k'oaá kji kàtatsjá koni kji kosòn-la inima-la. Mìtsà kò kjoba-la nga tsjá, nì mìtsà kjo'ño koma-la, nga Nainá tsjakeè-né xi kò kjotsja-la tsjá.

⁸ Nainá koma-la tsjá yije-nò kjondaà xi tjin-la, mé-ne nga kjit'aà nachrjein s'e yije-nò xi mochjeén-nò, skanda kininguú-nò mé-ne koma sichját'aà ts'e xá xi ndaa tjin.

⁹ K'oaá s'ín tíchja Xojon-la Nainá nga tsò:

Kisika'bí-la xita ima nga kitsjaà-la mé xi mochjeén-la.

Kjoakixi-la, mìkiì kjoehet'aà nita kjé-ne.

¹⁰ Nainá tsjá tje-la tsojmì xi sitje, tikoá tsjá tsojmì xi chineé. Tsjá yije-nò xi mochjeén-nò nga kítjè; tikoáá síchá tsojmì xi bítjè. Kjìin skoya kjondaà sakò-nò k'e nga kò kjoakixi-nò 'bioò kjotjò-nò.

¹¹ Jñò, s'e yije-nò ngats'ii kjoa nchiná xi tjin, mé-ne nga kò kjondaà-nò ma sichját'aà-la xita xi kj'eí, nga sikasén-la kjotjò xi ngajen onguíko-jen. K'e nga tjoé-la jña xita 'ndsee, tsjá-la kjondaà Nainá.

¹² Jña tsojmì kjotjò xi titsanikasén-la jña xita 'ndsee, mìtsà ta koi kjoa-la nga kochját'aà-la mé xi chija-la, tikoá koií-né nga isa kjìin koma xita xi tsjá-la kjondaà Nainá.

¹³ Jña xita koi, k'e nga tjoé-la tsojmì kjotjò, jeya sikkjna Nainá. K'oaá s'ín skoe-ne nga kixí kjoa nga jñò nikitason-nò 'én ndaa-la Nainá xi kjoa ts'e Cristo koni s'ín mokjeíin-nò. Jña xita koi skoexkón Nainá it'aà ts'e tsojmì kjotjò xi 'biì-la kò xi 'biì-la jña xita xi kj'eí.

¹⁴ Koó inima-la kichjat'aà-la Nainá it'aà tsajòn, nga 'ño tse kjondaà tísakó-nò xi tsjá-nò Nainá.

¹⁵ Ndaà chjí-la Nainá nga 'ño tse kjondaà tsjá-ná, skanda tsjin-ná 'én kós'ín k'oi-lá kjondaà!

10

Kó tsò Pablo nga chjatjì xá-la nga ch'nda-la ma Cristo

¹ An xi Pablo 'mì-na, bìtsi'bà-nò it'aà ts'e Cristo xi tjin-la kjondaà, kò xi indaa tjna inima-la. Tjin xita xi tsò-na nga ima kjoa xó s'iaàn k'e nga ya tijnajìin-nò, kò 'ño xó ts'en s'iaàn k'e nga kjìin tjnaa.

² Tikoá bìtsi'bà-nò k'e nga kjìkon-nò, jñò, ítjòn jchibàya-nò kjoa xi tjin-nò, mé-ne k'e nga kijchoa, kì kù bìnè-nájen nga 'ño kichjàkoáa jña xita xi k'oas'ín nchitsò nga k'oaá s'ín titsa'nè-jen koni s'ín xi taxki xita isò'nde. Tanga 'an, tjna ndaa-ná nga kojtkoáa jña xita xi chajno-najen.

³ Kixí kjoa nga xita isò'nde 'mì-najen, tanga mì k'oas'ín bixkán-jen koni s'ín kjaán jña xi taxki xita isò'nde.

⁴ Kicha xi nikjeén-jen, mìtsà kicha ts'e isò'nde. Nga'ño ts'e Nainá-né xi ma-la síkixòña nga'ño-la xita neí xi bíchjoà ikòn-la 'én-la Nainá.

⁵ Nìkixòña-nájen ngats'ii kjohítsjeèn xi ch'o tjin kò kjoa 'nga takòn xi kondra ts'e kjoachjine-la Nainá. Ndobà'ño-nájen ngats'ii kjohítsjeèn mé-ne koma kítason-la Cristo koni s'ín mejèn-la.

⁶ Titsajnandaà-nájen nga k'oi-lajen kjo'in xita nita mé kjoa-ne xi mìkiì ndaa bitason-la, k'e nga jye jcha-la nga jñò kixi nikitason.

⁷ Jñò, tà k'oaá s'ín chitsejèn-là koni s'ín 'ya-la jñà xita. Tsà tjin i'nga xita xi tsò-la yijo-la nga jè Cristo kisikasén, ndaà kàtasíkítsjeèn, tikoà ngajen jè sobà Cristo kisikasén-najen.

⁸ Mikì masobà-na nga ndaà síkíjna yijo-na it'aà ts'e kjoéxoma xi kisingsja-najen Cristo mé-ne koma síhjat'aà-nò nga isa 'ño kitsajnaà; kò mitsà koi-ne nga 'an sikits'ón-jìin-nò.

⁹ Majìn-na nga k'oas'ín síkítsjeèn nga 'an mejèn-na binchaxkón-nò k'e nga xojon tìsikasén-nò.

¹⁰ Tjin i'nga xita xi tsò: “Xojon-la, 'ño jchán tjin, 'ño tíhja, tanga k'e nga i tijnajìn-ná mitsà 'ño xkón kji. 'Én xi chja, mì yá xi ndaà beèxkón.”

¹¹ Jñà xita xi k'oa tsò, ndaà kàtasíkítsjeèn koni tsò xojon xi nìkasén-jen k'e nga kjiin titsajna-jen. K'oaá tìs'ín s'en-jen k'e nga ya titsajnajìn-nòjen.

¹² Kixí kjoa, ngajen, majìn-najen nga sìngàsòn-kjoòko-jen jñà xita xi ti yijo-la ndaà síkítsajna-ne. Jñà xita xi k'oas'ín s'ín, xita tònò-né. Tsjin-la kjohítsjeèn nga ti chiba ts'eé síhiba-ne yijo-la. Tikoà ti xíkjin síhibakjò-ne.

¹³ Ngajen, mikì síkatonè-lajen chiba-la nga ndaà síkítsajna-jen yijo-najen. K'oaá kji koni kji tsjá chiba Nainá it'aà ts'e xá-najen. Jè Nainá kitsjaà-najen xá xi ijchòko-nòjen skanda ján Corinto.

¹⁴ Kò tsà mì-là ngajen ijchò ítjòn-jen, kixí kjoa kinìkatonè-lajen chiba-la i'nde koni kji kitjò'nde-najen. Tanga ngajen-najen xi ijchòko ítjòn-nòjen 'én ndaà-la Nainá xi kjoa ts'e Cristo.

¹⁵ Mitsà jìn ndaà nìkítsajna-jen yijo-najen it'aà ts'e xá xi nchis'ín xita xi kj'eí. Mitsà tìsanìkatonè-lajen chiba-la koni kji xá xi okò-najen. Chiñàkjoa-najen, koni s'ín isa 'ño ndaà kòkjeiín-nò, kò isaá kotseya xá xi tìsa'nè-jen. Tanga ta k'oaá kji síxá-jen koni s'ín tjen chiba-la.

¹⁶ K'oaá s'ín kénòjmíya-jen 'én ndaà-la Nainá jñà naxandá xi fi-isa ñanda kijna naxandá tsajòn. Tanga mì ya kitjás'en-jìin-jen i'nde ñanda jye nchisíxá xita xi kj'eí nga mì jìn ndaà síkítsajna-jen yijo-najen xá xi nchis'ín xita xi kj'eí.

¹⁷ Jè xi jeya síkíjna yijo-la, ta saá Nainá jeya kàtasíkíjna.

¹⁸ Mitsà jè xi ndaà bitjongui xi ti yijo-la ndaà síkíjna-ne it'aà ts'e mé kjoa xi s'ín. Jè Nainá xi k'oa kitsò tsà kixi kjoa nga ndaà xita.

11

Pablo, jè xi ngui xita-la Cristo nga jè tsibíxáya-la

¹ T'een kjondaà, tìná'ya jngoò tjò-ná; k'oaá s'ín tìhjàko-nò koni jngoò xita xi mì ndaà tìjna kjohítsjeèn-la. Kàtas'e-nò kjoatsejta.

² Koni s'ín makájno-la Nainá, 'an, k'oaá tìs'ín makájno-na it'aà tsajòn nga mì kj'eí xita konguít'aà-là. Ta jngoó x'ín tsibìndaàjìin-kò-nò nga sìngatsja-nò, jè Cristo. 'An mejèn-na nga tsjeè sìngatsja-nò Cristo koni jngoò tsòti xongó.

³ Tanga tsakjoòn-ná tsà k'oas'ín komat'ioòn koni komat'in Eva nga kiskoònachan-la jè ye, tsà ya kits'ón-jìin kjohítsjeèn-nò nga kìnchat'aàxìn-lá jè kjoatjòcha kixi xi tjin-nò kò Cristo nga mì ti tijnò-ne takòn nga onguít'aà-là.

⁴ Nga bìi'nde-là nga kj'eí xita bijchókon-nò xi kj'eí tsò 'én xi okóya-nò it'aà ts'e Jesús koni tsò 'én kixi xi jìn bènòjmí-nòjen, kò mokjeiín-nò nga choétjò jngoò inìma xi kj'eí xi mitsà jè Inìma Tsjeè-la Nainá xi jye kichjoétjò. Tikoà, mokjeiín-nò nga kj'eí tsò 'én ndaà-la Nainá xi kjoa ts'e Cristo xi bènòjmí-nò koni tsò xi kòkjeiín-nò nga sa ítjòn. Nga ndaà sasén-nò nga jñà na'yà-là xita koi.

⁵ 'An, mitsà isa nangui tìjna-la jñà xita xi 'mì-là jñò nga isaá 'nga tìtsajna-la jñà xita xi tsibíxáya-la Cristo.

⁶ 'An, naş'ín mikiì ndaà ma-na chjà, nimé kjohítsjeèn chijat'aà-na xi it'aà ts'e 'én-la Nainá. Jñò, jyeé ndaà 'yaà, 'an, nita ñánda nga tijnáa, k'oaá s'ín tsakoò-nò.

⁷ ¿A ch'oó kis'iaàn nga tsakoòya-nò 'én ndaà-la Nainá nga nimé kisikíchjí-nò? Nangui tsohótijnako-nò skanda kisihíma-ná yijo-na mé-ne jñò isa 'nga kisikítsajna-nò.

⁸ Jñà xita naxandá-la Cristo xi xìn i'nde-la kisichját'aà-na nga tsachrjekàjno-la ton mé-ne komà kisixáko-nò nga tsibenojmí-nò 'én ndaà-la Nainá xi kjoa ts'e Cristo.

⁹ K'e nga tsohótijnako-nò, niyá xi kisijti-la mé xi kichiját'aà-na. K'e nga mé tsojmì xi kjòchjeén-na, jñà xita 'ndseé xi j'ii-ne nangui Macedonia kitsjaà-na. Nga majìn-na nga chjá koma-nò. Nachrjein xi fi-isa, tákó k'oaá s'iaàn.

¹⁰ Ngui koó kjoakixi-la Cristo koni tìxan-nò nga mì yá xi kotichjoà-na kóhokji nangui Acaya nga ndaà síkíjna yijo-na kjoa xi tìs'iaàn nga mì ton kisijé-nò.

¹¹ ¿Mé-ne k'oa xan-na nga chjà? ¿A koi-né nga mikiì matsjake-nò? Tíbeè Nainá, 'an 'ño matsjake-nò.

¹² Tanga tákó k'oaá s'iaàn koni kisiko-nò nga sa ítjòn nga nimé kisijé-nò mé-ne nga mikiì tsjaà'nde-la nga kitso jñà xita xi mejèn-la nga jeya síkítsajna yijo-la nga k'oaá tìs'ín nchis'ín koni ngajen.

¹³ Xita koi, xita ndiso-né. Mìtsà kixi kjoa nga xita xi jè Cristo tsibíxáya-la. Ta konachan-né nga síkijatjya-la yijo-la koni tsà jè Cristo tsibíxáya-la.

¹⁴ Kjoa koi, mìtsà kjoa xitse; tijè-ne xita neí síkijatjya-la yijo-la koni jngoò àkjale-la Nainá xi ote kji.

¹⁵ Mìtsà xkón tjin, xó k'oaá koma-ne nga jñà xita xi síxá-la jè xita neí, k'oaá s'ín síkijatjya-la yijo-la koni tsà xita xi bénojmi 'én kixi-la Nainá. Xita koi k'e nga kjoehet'aà nachrjein-la, k'oaá s'ín komat'in koni s'ín tjin kjoa ch'o xi nchis'ín.

Mé kjoa-ne nga jeya síkíjna yijo-la Pablo

¹⁶ Jngoò k'a k'oa tìxan-nò, kì k'oaá s'ín nikítsjeèn nga mikiì ndaà tjin kjohítsjeèn-na. Tsà k'oas'ín sikítsjeèn, tji'nde-ná nga 'an, k'oa tìs'ín ndaà síkíjna itsé yijo-na koni s'ín xita xi i'nga xi mì ndaà tjin kjohítsjeèn-la.

¹⁷ K'e nga kos'ín tichjà, mìtsà k'oas'ín chjà koni s'ín sasén-la Na'è-ná, k'oaá s'ín tichjà koni jngoò xita xi mì ndaà tjin kjohítsjeèn-la nga tì'an ndaà síkíjna-na yijo-na.

¹⁸ Koni s'ín kjìn ma xita xi tijñà ndaà síkítsajna-ne yijo-la it'aà ts'e kjoa xi s'ín, 'an k'oaá tìs'ín mejèn-na nga tì'an ndaà síkíjna-na yijo-na.

¹⁹ Jñò, bixón-nó nga xita chjine-nò, tanga, ¿mé-ne bìi'nde-là jñà xita xi mì ndaà tsò kjohítsjeèn-la?

²⁰ Jñò, nìkjeiín-là xita xi kjo'ño s'ín-nò nga chì'nda 'nè-là, xita xi ma-la síkjehejno-nò tsojmì xi tjin-nò, xita xi jñò beètoòn-nò, xita xi ochrjekàngui-nò, koa nìkjeiín-là xita xi síjts'iin-'a isén-nò.

²¹ Jñò, ¿kó s'ín nikítsjeèn? ¿A masobà-na nga indaàkjoa kinìko-nòjen nga mì k'oaá s'ín kinìko-nòjen koni kisiko-nò jñà xita xi i'nga?

Tsà tjin i'nga xi 'ño ts'en s'ín nga chja, 'an tikoá ts'eén tìs'iaàn koni s'ín 'ño tichjàko-nò. Tanga ta k'oaá s'ín tichjà koni tsà mikiì ndaà tjin kjohítsjeèn-na.

²² Jñà xita koi, tsà kixi kjoa nga xita hebreo-né, 'an, tikoá xita hebreo-ná. Tsà xita Israel-né, 'an, tikoá xita Israel-ná. Tsà tje-la Abraham-né, 'an, tikoá tje-la Abraham-ná.

²³ ¿A chì'nda-la Cristo-né? 'An, isáá ndaà síxá-la Cristo. (K'e nga kos'ín chjà, k'oaá ngaya-la koni jngoò xita xi mikiì ndaà tjin kjohítsjeèn-la.) 'An isáá 'ño

síxá-la. Ísáá kò k̀jìn k'a ótijnaya ndayá, ìsá kò k̀jìn k'a síki'on-na xítá, tìkoá kò k̀jìn k'a nga jye k̀jomeè sík'en-na xítá.

²⁴ J̀nà xítá judío, 'òn k'a kitsjaà-na k̀jò'in nga tsakajá-na xox'ín xi s'e-la kohòyo xi kaàn chrj'oòn ñijòn t̀jìn-ne nga jngoò ìjngoò k'a.

²⁵ J̀àn k'a kits'iìn-na k̀jò'in nga tsajá-na xkajnchra j̀nà xítá; jngoò k'a tsibínè-na ndajo xítá nga mejèn-la s̀iik'en-na; j̀àn k'a kiskaàjiìn-ndáko-na chitso ya ìjiìn ndáchikon; jngoò nàchrjein kò jngoò ǹtjèn tsohótijnaj̀nà ìjiìn ndáchikon.

²⁶ Nítá ñánda nga ojmeè, ta k̀joxkón t̀jín k̀jit'aà-la. T̀jín k̀joxkón ya xajngá nandá ñánda nga otoa. T̀jín k̀joxkón ts'e xítá chijé. T̀jín k̀joxkón ìt'aà ts'e xítá xinguiáa judío koá t̀jín ìt'aà ts'e xítá xi mìtsà xítá judío. T̀jín k̀joxkón ya ìjiìn naxandá, koá ya ì'nde ìt'aà xìn ñánda tsjìn xítá. T̀jín k̀joxkón ya ìjiìn ndáchikon, koá ya ìjiìn-la xítá xi tsò nga xítá-la Cristo ma tanga mìtsà kixì kjoá.

²⁷ K̀jìn jchán xá kisinè-na xi 'ńó t̀jín, sà k'oaá skanda mìkì òjñafè. Kisìkjaán k̀jinchrá. Sà k'oaá tsjìn-na nandá xi ma 'yò, sà k'oaá skanda mìkì tsoókjeen, kisìkjaán 'nchán nga tsjìn-na nikje xi ójñakjá.

²⁸ M̀tsà tà j̀nà kjoá koi xi komàt'ian. T̀jín ìsá xi k̀j'ejí xi ìsá 'ńó t̀jín. Nàchrjein nchijòn makájno-na kjoá xi tímat'in kóhótjìn naxandá-la Cristo xi 'an s̀ikinda.

²⁹ Tsà yá 'ndseé xi ma indaàjiìn, t̀ikoáá 'an, ma indaàjiìn-ná. Tsà yá xi mejèn-la ótsji jé-la jngoò xítá xi k̀j'ejí, 'an ma jtike-ná.

³⁰ Tsà mochjeén nga t̀jì yijo-na ndaà síkìjna-na, jè ndaà síkìjna yijo-na ìt'aà ts'e kjoá xi mahindaàj̀nà.

³¹ Jè Nainá xi Na'èn-la Jesucristo xi otíxoma-ná, jeya kàtìjna nítá k̀jé-ne, tìbeè-ne nga 'én kixìjì xi tìchjà.

³² K'e nga tsohótijna ján naxandá Damasco, jè xítá xi gobernador t̀jna nga jè kitsjaà-la xá jè xítaxá ítjòn xi 'mì Aretas, kitsjaà-la okixì nga kisìkinda xotjoá-la naxandá nga mejèn-la tsobà'ńó-na.

³³ Tanga j̀nà xítá kisìchját'aà-na nga kisìkìjnaya-na nisìyá, ìkjoàn ya tsachrje-na ñánda t̀ix'á chrjò ndajo xi t̀jìndì-la naxandá nga kiskinìjen-t'aà-na skanda ìt'aà nangui. K'oaá s'ín komà-ne nga mìkì komà kitsobà'ńó-na.

12

Pablo, kits'ù jngoò-la nij̀nà xi kixì kjoá

¹ Nímé xi s̀ikijne nga ndaà síkìjna yijo-na. Tanga mochjeén-né nga k'oa xán-nò kjoá xi tsakó-na Nainá k'e nga tsohóko-na, jè kjoá xi Nainá kisìkichija-na.

² Beèxkon-ná jngoò xítá xi fit'aà-la Cristo. T̀jín-la te ñijòn nó nga k̀iikò Cristo skanda jè ngajmì xi ma-ne jàn [ñánda t̀jna Nainá]. M̀kì be tsà k'oaá s'ín k̀iikò nga yijo, a xi tà inìmaá k̀iikò. Jè Nainá t̀jìin-la.

³ Tanga be-ná nga jè xítá jè, k̀iì. A yijo-né, o a tà inìmaá k̀iì, tà jngoò Nainá tìbeè.

⁴ K̀iì skanda ján ì'nde ñánda ndaà jchán choòn ján ngajmì ñánda t̀jna Nainá. K̀iì'nchré 'én xi 'ńó xkón t̀jín, xi nijngoò xítá koma s'enojmí-la.

⁵ Koni komàt'in xítá jè, jè-né xi ok'ìn-la nga ndaà k̀jìna. Tanga ìt'aà ts'an mìkì ok'ìn-na nga 'an ndaà síkìjna yijo-na. T̀jìngoò tsà j̀nà kjoá xi mahindaàj̀nà ndaà síkìjna.

⁶ Tsà ndaà síkìjna yijo-na [koni t̀jín kjoá xi 'an k̀jtseè ngajmì], mìtsà 'én ská benojmiá, 'én kixìjì chjà. Tanga majìn-na nga ndaà síkìjna yijo-na ìt'aà ts'e kjoá xi k̀jtseè mé-ne nga nijngoò xítá ìsá 'nga s̀ikìjna-na ta ngatjì-la kjoá koi. Kos'ín kàtasìkinda-na kó s'iaàn, kó s'ín chjà, kò kó s'ín t̀sìjchá yijo-na.

⁷ Mé-ne nga mì 'an ndaà kótijna-na it'aà ts'e kjoa xi 'an tsakó-na Nainá xi jeya jchán tjín, kiskaàt'aà jngoò-na ch'in, k'oaá ngaya-la koni tsà na'ya nchajìin yijo-na. Jè xita neí kijtseètoòn-na nga kisikasén-na kjo'in.

⁸ Kò jàn k'a bítsi'ba-la Na'èn-ná nga kàtjaàxin-na kjo'in jè.

⁹ Tanga jè Nainá ta k'oaá tsò-na: “Jè kjondaà-na yaá tijnako-lè. Yaá okoaà yije nga'ño-na k'e nga tsjìn-lè nga'ño.” K'oaá ma-ne jè kjoa xi mahindaàjñaà, jè xi ndaà síkijna-na yijo-na, mé-ne nga jè nga'ño-la Cristo kíjnakò-na.

¹⁰ Koií kjoa-la matsja-na k'e nga ma indaàjñaà. Tikoáá matsja-na k'e nga chja'on-kò-na xita, k'e nga mé tsojmì xi chija-na, k'e nga fitjingui kondra-na xita, k'e nga mé kjoa xi 'iín ma-na síkjiaán it'aà ts'e Cristo. K'e nga ma indaàjñaà, k'ée isa ndaà s'e-la nga'ño inima-na [nga jè Cristo tsjá-na].

¹¹ 'An, k'oaá s'ín kichjà, koni s'ín chja xita 'én xi nímé chjí-la. Tanga jñò ki'nè-ná kjo'ño. Jñò xi tjínè-nò nga ndaà síkijna-ná. Nga 'an mìtsà isa nangui tijnà-la jña xita xi 'mì-là jñò nga isa 'nga títsajna-la jña xita xi tsibíxáya-la Cristo; nas'ín 'an nímé chjí-na.

¹² K'e nga tsohótijnako-nò kis'e-na kjoatsejta nga tsakoò-nò kjoaxkón xi okó chiba kò xi okó kjoa jeya-la Nainá kò nga'ño-la. Kjoa koi okó nga kixi kjoa nga 'an-ná xi tsibíxáya-na Cristo.

¹³ ¿Jñò, mé xi isa nangui kisikítsajna-nò koni jña naxandá-la Cristo xi kj'eíí? ¿A koií majti-nò nga mì jñò kisijti-nò k'e nga mé tsojmì xi kichijàt'aà-na? Tijchàat'aà-ná nga nímé kisijé-nò.

Kó kitsò Pablo nga ijngoò k'a tífikon jña xita Corinto

¹⁴ Jyeé tijnandaà xi ma-ne jàn k'a nga kíjkon-nò. Táko k'oaá s'ín s'iaàn, mìtsà mé xi síjé-nò. Mìtsà koi otsjià mé tsojmì xi tjín-nò; kjondaà tsajòn xi otsjià. Nga jña xita jchínga tjínè-la nga koiitjò ton xi kochjeén-la ixti, mìtsà jña ixti tjínè-la nga koiitjò ton xi kochjeén-la xita jchínga.

¹⁵ Matsjaá-na nga síkjèya yije mé xi tjín-na, skanda tìsikjè yijo-na kjoa ts'e inima-nò. Nga isa ndaà matsjake-nò, jñò, ¿a isaá chiba matsjacha-ná?

¹⁶ Kixíí kjoa, 'an, nímé tsojmì xi kisijé-nò. Tanga tjín i'nga xita xi tsò: “Ñó maña nga konachan-la xita.”

¹⁷ Tanga, ¿mé xi kiskoònachan-nò k'e nga kisikasén i'nga-nò xita?

¹⁸ Tsibítsi'ba-la Tito nga kíjkon-nò kò jè 'ndsè xi ijngoò. Jè Tito, ¿a kiskoònacháán-nò? ¿A mìtsà ngàsòn tikoí-ne kjohítsjeèn tjaajìin-jen, tikoá tikoí-ne ndiyá kixi tjaàya-jen?

¹⁹ ¿A k'oaá s'ín níkijsjeèn nga yijo-najen titsanokjoàtji-jen? Majìn, tíbè Nainá koi 'én xi titsanokjoà-jen nga Cristo títsajnakò-jen. Jñò ndí 'ndsè xi 'ño matsjake-nò, ngats'ii kjoa koi, kjondaà tsajòn-nò nga isa tse nga'ño kàtas'e-nò.

²⁰ Makájno-na tsà k'e nga kíjchokon-nò tsà mì k'oaá s'ín títsa'nè koni s'ín mejèn-na. Koá 'an tsà mì k'oa s'ín tìs'iaàn koni s'ín mejèn-nò jñò. Koií makájno-na tsà koií nachrjein-la tìsabixkàn-kjoò, tsà kjoaxítakòn tjín-nò, tsà kjoajtì tjiin inima-nò, tsà jò tsà jàn ya títsajna-la xinguiò, tsà 'én ndiso tìsabinè-la xinguiò, tsà xinguiò tìsanokjoájno-lá, tsà 'nga takòn títsa'nè kò tsà mìkiì ndaà títsajnakò xinguiò nga jngoò ijngoò.

²¹ Tikoáá makájnoó-na k'e nga kíjchokon ijngoò k'a-nò tsà Nainá sùsobà-na nga nguixkòon jñò. Tsà Nainá síkjindáya-na xi kjoa tsajòn nga kjìn ma-nò xi jye kjòtseé binchaàtsjioè jé nga mìkiì níkájno jé-nò kjoa tjé xi 'nè kò kjoa chijngui xi 'nè kò ngats'ii kjoa ch'o xi 'nè.

13

'Én-la Pablo xi fehet'aà-ne.

¹ Jè xi ma-ne jàn k'a nga kjíkon-nò. K'oaá s'ín tíchja Xojon-la Nainá nga tsò: “K'e nga tsà jngoò xítà mejèn-la kíndaàjìn jngoò kjoa, jò kò tsà jàn xítà kochjeén xi koma tsjá 'én nga xkon kijtsee-ne kjoa xi komà mé-ne nga jcha-la, a kixí kjoa, o xi majìn-né.”

² K'oaá s'ín jye kixan kixi-nò k'e nga ijchòkon-nò xi ma-ne jò k'a, kò i'ndeí nas'ín kjìin tíjnaa, k'oaá tí xan ijngoò k'a-nò nga jñà xi jé tsohótsji nga sa ítjòn kò xi nchihótsji jé skanda i'ndeí, mìkìi kojno-la nga tsjaà-la kjo'íin nga jngoò ijngoò.

³ 'An, k'oaá s'iaàn mé-nè nga jcha-nò, a kixí kjoa nga 'an síkjeén-na Cristo nga chjàjìn-nò 'én-la. Mìtsà indaàkjoa Cristo; tíin-la nga'ño k'e nga síxájin iníma-nò.

⁴ Kixí kjoa jé Cristo, k'oaá s'ín k'en-t'aà krò koni jngoò xítà xi tsjìn-la nga'ño. Tanga i'ndeí, nga'ño ts'e Nainá tíjnakon-ne. Ngajen, k'oaá tí s'ín indaàkjoa titsajna-jen koni s'ín komàt'in Cristo, tanga nga'ño ts'e Nainá kítsajnakon-najen koni Cristo mé-ne nga koma síxá-nòjen.

⁵ Jñò, chít'aà iníma-nò, tsà kixí kjoa nga ndaà mokjeíin-nò it'aà ts'e Nainá. Ndaà chít'aà iníma-nò xi tíjñò-nò. ¿A mìtsà tíjìn-nò nga Cristo tíjnajìn iníma-nò? Tà jngoò-la tsà mìkìi tsatojioòn koni s'ín kichít'aà-nò.

⁶ Tanga 'an, majngoò takoàn nga jchaá it'aà tsajen, ngajen tsatojìn yije-nájèn koni s'ín kichít'aà-najèn.

⁷ Koií kjoa-la bìtsi'ba-lajèn Nainá nga nímé jé kíinchátsjioè. Tanga mìtsà koi-ne nga jcha-najèn nga ndaà bitjo-jèn k'e nga chít'aà-najèn. Jè-né nga síkitasòn jñò kjoa xi ndaà tíin, nas'ín k'oas'ín kàta'ya-la it'aà tsajen koni tsà mìkìi chíkjoa-najèn kjoa xi otojìn-jèn.

⁸ Mìkìi koma kondra kítsajna-lajèn xítà xi síkitasòn kjoakixi-la Nainá. Tà saá k'oi-lajèn nga'ño.

⁹ Matsja-najèn k'e nga jñò tíin-nò nga'ño, nas'ín ngajen ma indaàjìn-jèn. K'oaá ma-ne nga bìtsi'ba-lajèn Nainá, mé-ne jñò nímé kjohítsjeèn chijat'aà-nò.

¹⁰ Tikjì-nò xojon jé k'e nga tákó kjìin tíjnaa-isa, mé-ne k'e nga kíjchokon-nò mì tí k'oaá s'ín 'ño kichjàkò-nò koni s'ín tíin kjotíxoma xi kitsjaà-na Nainá. Nga Nainá mìtsà koi xá kitsjaà-na kjotíxoma nga 'an síkits'ón-jìn-nò, jè-né nga isa kixi kítsajnakoo 'én xi mokjeíin-nò.

Kó kitsò Pablo nga síhixat'aà xítà Corinto

¹¹ Ndí 'ndsè kò tíchjaá, jè xi fehet'aà-ne, tsja t'è-là iníma-nò; kixi títsajna; tíjetakòn xinguiò; tà jngoò kjohítsjeèn kàtas'e-nò, 'nchán títsajnakoo xinguiò. Nainá xi tíin-la kjoa 'nchán kò xi tíin-la kjoatjòcha kàtìjnakò-nò.

¹² Nga nguì koó iníma-nò tíixat'aà xinguiò nga jngoò ijngoò.

¹³ Ngats'ii xítà-la Nainá xi i títsajnakoo-na síhixat'aà-nò.

¹⁴ Jè kjondaà-la Jesucristo xi otíxoma-ná, kò kjoatjòcha-la Nainá, kò Iníma Tsjeè-la Nainá kàtìjnakò-nò ngats'ioè. K'oaá s'ín kàtama.

Xojon carta-la San Pablo xi kiski-la xita naxandá-la Cristo xi títsajna nangui Galacia

Kó tsò Pablo nga síhixat'aà xita naxandá-la Cristo xi títsajna nangui Galacia

¹⁻² Jñò xi naxandá-la Cristo maà xi títsajnaà ján nangui Galacia, títsajnihihot'aà-nòjen 'an xi 'mì-na Pablo, kò ngats'ì xita-la Cristo xi ì títsajna-kò-na. Jè xá ítjòn xi 'an tjín-na, mìtsà ìt'aà ts'e xita isò'nde kitjoé-na kò mìtsà taxkì xita tsibít'aà-na. Jè sobà Jesucristo kò Nainá tsibíxáya-na, jè xi Na'èn 'mì-lá xi jè kisikjaáya-la Jesús ìt'aà ts'e kjoabiyaà.

³ Jè Na'èn-ná xi Nainá kò Na'èn Jesucristo xi otíxoma-ná kàtatsjá-nò kjondaà kò kjoa'nchán ya jjiin inima-nò.

⁴ Jñò, jyeé tíjiin-nò nga jè Jesucristo kitsjaà kjotjò yijo-la nga k'en xi kjoa ts'e jé-ná, mé-ne nga kochrjekàjiin-ná jñà kjoach'o xi tjín ì isò'nde. Jesucristo, k'oaá s'ín kisikitasòn koni s'ín mejèn-la Na'èn-ná xi Nainá.

⁵ Jeya kàtìjna Nainá nita mé nachrjein-ne, nita mé nó-ne. K'oa's'ín kàtama.

Tsjìn ìjngoò-isa 'én ndaà-la Nainá xi kjoa ts'e Cristo xi kj'eíí tsò

⁶ 'An, tà maxkón-na nga jñò, ta nitoón chinchat'aàxin-là Nainá nga kj'eíí 'én tsanguit'aà-là kò kijnei takòn Nainá xi xó kiichja-nò mé-ne nga ìt'aà ts'e kjondaà-la Cristo sijchá yijo-nò.

⁷ Tanga tsjìn ìjngoò-isa 'én ndaà-la Nainá xi kjoa ts'e Cristo xi kj'eíí tsò. Tanga tjín i'nga xita xi binchá ská-nò xi mejèn-la sùkijatjìya-la 'én ndaà-la Nainá xi kjoa ts'e Cristo.

⁸ Tanga tsà tjín xita xi kj'eíí tsò 'én xi okóya xi mì k'oaá tsò koni tsò 'én ndaà-la Nainá xi kjoa ts'e Cristo xi jin bènójmí-jen, kàtatsjá-la kjo'in Nainá, nas'ín tí 'an-na, o nas'ín jngoò àkjale xi ngajmù nchrobá-ne kàtatsjá-najen kjo'in.

⁹ Koni s'ín ki'mì-nòjen nga sa ítjòn, tákó k'oaá s'ín tìxan ìjngoò k'a-nò: Tsà yá xi kj'eíí tsò 'én xi bènójmí-nò koni tsò 'én ndaà-la Nainá xi jye kichjoétjò, Nainá kàtatsjá-la kjo'in.

Mé kjoa xi komàt'in Pablo nga ìt'aà ts'e Cristo kisixáya-la

¹⁰ 'An, mìtsà kjondaà-la xita otsjià, kjondaà-la Nainá otsjià. Mìtsà koií otsjià nga ndaà kótijna nga nguixkòn xita. Tsà kos'ín s'iaàn, mì-là tsà kixì kjoa nga chì'nda-la Cristo ma.

¹¹ Jñò 'ndseé kò tichjaá, k'oaá s'ín kàtasijìin-nò; jè 'én ndaà-la Nainá xi kjoa ts'e Cristo xi 'an bènójmiá, mìtsà kjohítsjeèn-la xi taxkì xita.

¹² Mìtsà ìt'aà ts'e xi taxkì xita komà-na kò nga kjòchiya-na 'én koi; jè sobà Jesucristo kisihiseèn-na nga tsakóya-na.

¹³ Jñò, jyeé kina'yà kó kis'iaàn nga tisa ítjòn, k'e nga ya kiit'aà-la kjotíxoma-la xita judío. 'An, tsangatjìngui-la jñà xita naxandá-la Cristo nga kòjtikeé; mejèn-na nga kàtachija.

¹⁴ Koni s'ín tjín kjotíxoma-la jñà xita judío, kjìn jchán xita naxandá-na xi taña jchínga-jen, kisikítsajna tjìngui nga 'an, isa 'nó ndaà kisikitasoàn koni s'ín tjín xkósòn xi tjín-la xita jchínga-na.

¹⁵ Tanga Nainá k'oaá s'ín kisaseèn-la nga 'an jaàjiin-na k'e nga tákó ya tìjnaya'ma indso'ba nea-na, nga nguì tà kòó kjondaà-la nga 'an kiichja-na;

¹⁶ kò kisikatsjèn-na Ki'ndí-la mé-ne koma kichjàyajiin-la 'én ndaà-la jñà xi mìtsà xita judío. Mìtsà yá xi kiskònangui-la xi taxkì xita;

¹⁷ Kò mítsà yà kiaà ján naxandá Jerusalén ñánda títsajna jñà xítà xi ìsà kjòtseé tsibíxáya-là Cristo koni 'an. Tà saá yà kiaà i'nde Arabia; xi komà iskan-ne inchrobà ìjngoò k'a-na yà naxandá Damasco.

¹⁸ K'e nga jye tsato jàn nó, skanda k'eé kiaà ján Jerusalén nga mejèn-na skoexkoan Cefas [xi tìkoà Pedro 'mì]; chrj'oòn nachrjein tsohótijna yà ní'ya-là.

¹⁹ Xítà xi kisìxáya-là, mítsà yá xi kìjtseèxkoan xi kj'eíí, ta jè tajngoò Jacobo xi 'ndse ma Na'èn-ná.

²⁰ Jñà 'én koi xi 'an tìsikásén-nò, ngui 'én kixi-né, tíbeè Nainá, mítsà 'én ndiso.

²¹ K'e nga jye komà iskan, kiaà ján nangui Siria kò yà nangui Cilicia.

²² Tanga jñà nachrjein koi, kj'eè kì beèxkon-na jñà xítà naxandá-là Cristo xi títsajna yà nangui Judea.

²³ Tà k'oaá tsò 'én xi kii'nchré: “Jè xi kii'tjingui kondra-ná nga sa kjòtseé, i'ndeí, 'én ndaà-là Nainá xi kjoà ts'e Cristo chjaya, jè 'én xi mejèn-là kisichja nga sa ítjòn.”

²⁴ Jñà xítà koi, jeya kisikíjna Nainá nga jye jahatjìya-na.

2

¹ K'e nga jye komà iskan nga jye ijchò te ñijòn nó, kiaà ìjngoò k'a ján Jerusalén kò Bernabé; tìkoà kii'koaa jè Tito.

² Koií kii-na nga Nainá k'oas'ín kisikichiya-na nga tjínè-na nga kjián. Jñà xítà xi xá 'nga tjín-là yà naxandá-là Cristo it'aà xìn tsibenojmí-là kó tsò 'én ndaà-là Nainá xi kjoà ts'e Cristo xi 'an chjaya-là jñà xi mítsà xítà judío. Majìn-na nga jñà xítà koi kítso-na nga nímé chjì-là xá xi 'an tìs'iaàn kò xi jye kis'iaàn.

³ Jè Tito nas'ín xítà griego nga yà tjìkò-na, mítsà yá xi kjo'ño kis'iin-là nga kisit'aà chiba-là yijo-là kjoà ts'e circuncisión.

⁴ Tanga tjín i'nga xítà ndiso xi jahas'en-jìin chijé nga tsò nga tìkoà jè Cristo fit'aà-là; ta jè xi mejèn-là nga kotsejèn chijé kós'ín títsa'né jñà xi mokjeiín-ná it'aà ts'e Cristo Jesús nga jye títsajnandiaá kjoà ts'e kjotíxoma xi kitjoé-là Moisés, kò mejèn-là nga kjo'ño s'iin-ná nga sikitasoán kjotíxoma.

⁵ Tanga ngajen nì itsé kinis'in-lajen mé-ne nga jè kjoà kixi xi ts'e 'én ndaà-là Nainá xi kjoà ts'e Cristo, yaá kàtijnajìin-nò nga kjit'aà nachrjein.

⁶ Jñà xítà xi xá 'nga tjín-là nímé kjoà xitse kitsjaà-ìsa-na koni tsò 'én xi 'an okoòya. Tanga mítsà 'an tjín-na kindà tsà xítà ítjòn-né kò tsà majìn. Nga Nainá mítsà faájìin xítà yá-ne xi títsajna ítjòn kò yá-ne xi títsajna tjìngui.

⁷ Ta saá kòkjeiín-là nga jè sobà Nainá kitsjaà-na xá nga 'an kichjáyajìin-là 'én ndaà-là Nainá xi kjoà ts'e Cristo jñà xi mítsà xítà judío xi mìkì tjít'aà chibà yijo-là kjoà ts'e circuncisión. Kò jè Pedro kitjoé-là xá nga jè kii'chjayajìin-là jñà xi ngui xítà judío xi tjít'aà chibà yijo-là kjoà ts'e circuncisión.

⁸ Nainá, koni kisikò Pedro nga jè tsibíxáya-là nga kii'chjayajìin-là 'én ndaà-là Nainá xi kjoà ts'e Cristo jñà xi ngui xítà judío, 'an, k'oaá tì kisikò-na nga 'aán tsibíxáya-na nga kichjáyajìin-là 'én ndaà-là Nainá xi kjoà ts'e Cristo jñà xi mítsà xítà judío.

⁹ Jacobo, Cefas [xi tìkoà Pedro 'mì] kò Juan, xi kos'ín beèxkón xítà nga jñà títsajna ítjòn yà naxandá-là Cristo, kijtseè nga Nainá kitsjaà-na kjondaà koi. Kjòjngoò ikon, ikjoàn kitsjaà-najen tsja, 'an kò Bernabé, mé-ne nga k'i'ya-là nga ta jngoó xá títsa'nè-jen. Ndaà kisaseèn-là nga tsanguì nìxá-lajen jñà xi mítsà xítà judío, koa jñà, kisìxáko jñà xi ngui xítà judío.

¹⁰ Tà koií kjoà xi kisìjé-najen nga kochját'aà-là xítà imà. Jñà kjoà koi, tìkoáá 'an, jyeé kos'ín tìbìnè-là yijo-na nga k'oa tìs'iaàn.

Mé-ne tsohótikò-ne Pedro jè Pablo ján naxandá Antioquia

11 Jngoò k'a k'e nga jè Cefas [xi tikoà Pedro 'mì] j'ìi ì naxandá Antioquía, tsakatíkoà nga nguixkon xita k'e nga kijtseè nga mìkii ndaà tjín kjoa xi tís'ín.

12 K'e nga sa ítjòn, yaá tsakjèn-ko jña xita-la Cristo xi mìtsà xita judío. Nga komà iskan, k'e nga j'ìi xita judío xi tikoà mokjeiín-la it'aà ts'e Cristo, xita xi ts'e Jacobo, k'eé mì tì kii ya tsakjèn-ko-ne; tsasit'aaxìn-né nga majìn-la nga ch'o kijnako jña xita koi nga kjo'ño mejèn-la nga sit'aà chiba-la jña xi mìtsà xita judío.

13 Tikoáá jña xita judío xi i'nga xi mokjeiín-la 'én-la Nainá, k'oaá ti kis'iìn koni jè Pedro nga kisìs'in-la kjoa xi jò isén tjín-la, skanda jè Bernabé k'oaá ti kis'iìn.

14 'An, k'e nga kijtseè nga mì k'oaá s'ín nchisíkitasòn koni s'ín tjín kjoa kixi-la 'én ndaà-la Nainá xi kjoa ts'e Cristo, k'oaá kixan-la jè Cefas [xi tikoà Pedro 'mì] nga nguixkon ngats'ii xita: “Ngaji nga xita judío 'mì-lè, k'oaá s'ín tìnjchí yijo-lè koni tsà mìtsà xita judío. ¿Mé-ne kjo'ño 'nè-la jña xi mìtsà xita judío nga k'oas'ín kàtasíjchá yijo-la koni tsà nguì xita judío?”

15 'Nas'ín kixi kjoa nga tje-la xita judío 'mì-ná nga mì yaá kits'iìn-jìin-lá jña xi mìtsà xita judío xi xita jé 'mì-lá,

16 tanga 'ya-ná nga jña xita, mìtsà kixi kítsajna nga nguixkon Nainá nga ta koi kjoa-la nga síkitasòn Kjotíxoma xi kitjoé-la Moisés; ta jè-né nga mokjeiín-la it'aà ts'e Cristo. Jña, jyeé kòkjeiín-ná it'aà ts'e Jesucristo, ko jè Nainá kixi síkijna-ná koi kjoa-la nga jye ya kòkjeiín-ná it'aà ts'e Cristo, mìtsà koií kjoa-la nga nìkitasoán kjotíxoma. Njingoò xita xi kixi kijná nga nguixkon Nainá nga ta koi kjoa-la nga síkitasòn Kjotíxoma.

17 'I'ndeì k'oaá s'ín chiñá-lá nga kixi kítsajnaá ya nguixkon Nainá ta koií kjoa-la nga mokjeiín-ná it'aà ts'e Cristo, [mìtsà koi-ne nga kjotíxoma tìtsanìkitasoán]. K'oaá ma-ne nga xita jé t'ímì-ná [koni jña xi mìtsà xita judío]. Tanga, ¿a tsò-ne kjoa nga jè Cristo bít'in-ná nga binchaàtsjiaá jé? Majìn, mì k'oaá s'ín tjín.

18 Tsà jè kjotíxoma xi 'an tsachrjekànguia nga sa ítjòn, ko tsà ijngoò k'a sìkitasoàn, jé tihotsjià.

19 Jè kjotíxoma xi kitjoé-la Moisés, jè kisik'en-na. I'ndeì tijnandeìí-ná kjoa ts'e kjotíxoma mé-ne ma kótijnakon-na nga sìkitasòn-la Nainá.

20 K'e nga k'en-t'aà krò Cristo, 'an, tikoáá ya k'en-t'aàkoà. Ko mìtsà tì'an-na xi tijnakoan, jè Cristo xi tijnajìin inima-na. I'ndeì, koií tijnakon-na nga jè Kì'ndí-la Nainá ma'ñót'aà takoàn nga 'ño kjòtsjakeè-na skanda jè kitsjaà kjotjò yijo-la nga k'en ngajo-na.

21 Majìn-na nga ochrjekànguia kjondaà-la Nainá. Tsà it'aà ts'e kjotíxoma xi kitjoé-la Moisés, kixi kítsajnaá nga nguixkon Nainá, mì-la mé chjí-la nga k'en Cristo.

3

Mé xi chjí-la, a jè kjotíxoma xi kitjoé-la Moisés, o xi jè-né nga mokjeiín-ná it'aà Cristo

1 Jño xi nangui Galacia tsajòn, mé ta tònò-nò! ¿Yá xi kiskoònachan-nò? ¿A mì bítsjeèn-nò koni s'ín nga nguì ndaà tsibènojímíya-nòjèn nga jè Jesucristo yaá k'en-t'aà krò xi kjondaà tsajòn?

2 Tà koií kjoa kjònangui-nò: ¿A koií kjoa-la nga kinìkitasòn kjotíxoma nga kitjoé-nò Inimà Tsjeè-la Nainá, o xi koií-né nga mokjeiín-nò 'én-la Nainá koni s'ín kina'yà?

3 Jño, nga sa ítjòn, tsibìts'ia-ko-nò kjohítsjeèn-la Inimà Tsjeè-la Nainá; ko j'ndeì, mejèn-nò nga tà kjohítsjeèn-la xita sìkجهet'aà-nò. ¿Mé ta tònò-nò!

⁴ Jñò, tseé kjo'in tsatojioòn nga kòkjeiín-nò 'én ndaà-là Nainá. ¿A tà kjo'tjò-ne nga tse kjo'in tsatojioòn? Majìn, mì-la kiì ndaà tjín.

⁵ K'e nga Nainá kitsjaà-nò Inìma Tsjeè-là kò kis'iìn kjo'xkón xi ndaà tjín jjiìn naxandá tsajòn, ¿mé-ne k'oas'ín kis'iìn-ne? ¿A koi-né nga ndaà kinikitasòn kjo'tíxoma? Majìn, koií-né nga kòkjeiín-nò 'én ndaà-là Nainá.

Nainá, mé-ne xita kixi kijtseè takòn-ne Abraham

⁶ Koni jè xita jchínga-ná xi ki'mì Abraham kòkjeiín-là it'aà ts'e Nainá; k'oaá komà-ne nga xita kixi kitsò-là Nainá.

⁷ Jñò, k'oaá s'ín ndaà kàtasijjìn-nò: Jñà xi mokjeiín-là, jñà-né xi tje-là Abraham.

⁸ Nga tisa kjòtseé, jyeé k'oas'ín kitsjaà 'én Nainá koni s'ín tíchja Xojòn-là nga síkixi-né jñà xi mìtsà xita judío k'e nga mokjeiín-là it'aà ts'e. Yaá tíchja ñánda jè Nainá tjen kitsjaà ítjòn-là Abraham jñà 'én ndaà-là xi tsò: “Ngats'iì naxandá xi tjín isò'nde, it'aà tsijí kochikon-t'in.”

⁹ K'oaá ma-ne nga ngats'iì xita xi mokjeiín-là it'aà ts'e Nainá ngàsòn kochikon-t'in kò Abraham nga jè Abraham kòkjeiín-là it'aà ts'e Nainá.

¹⁰ Ngats'iì xita xi jè ma'ñót'aà takòn koni s'ín nchisíkitasòn kjo'tíxoma, kjo'iìn tjínè-là, nga mìtsà kixi kjoa nga ndaà síkitasòn ngats'iì kjoa xi ya tjit'aà. Nga k'oaá s'ín tíchja Xojòn-là Nainá nga tsò: “Kàtasinè-là kjo'in jè xi mì kixi síkitasòn ngats'iì kjoa xi tjit'aà jè xojòn ts'e kjo'tíxoma.”

¹¹ Okixi-né nga nijngòò xita xi kixi kijná nga nguixkon Nainá nga kjo'tíxoma síkitasòn. Nga jè 'én-là Nainá tsò-né: “Jè xi xita kixi, jè kjoa xi mokjeiín-là kijnakon-ne.”

¹² Jñà xita xi kjo'tíxoma síkitasòn mìtsà Nainá ma'ñót'aà ikon. Nga k'oaá s'ín tíchja Xojòn-là Nainá, nga tsò: “Xita xi kjo'tíxoma síkitasòn, k'oaá s'ín tjínè-là nga k'oas'ín sijnchá yijo-là koni tsò kjo'tíxoma.”

¹³ Jè Cristo tsibíchjítjì-ná kjo'in xi ya titsajnajñaá nga kjo'tíxoma titsanikitasoán nga jè kisikjeiín kjo'in xi jé tsaján; nga k'oaá s'ín tíchja xojòn nga tsò: “Kjo'iìn sinè-là ngats'iì xi krò sit'aà.”

¹⁴ Jè Cristo, koií okis'iìn-ne mé-ne nga jñà kjoa machikon-t'in xi kitjoé-là Abraham tikoá tjoé yije-là ngats'iì naxandá xi tjín isò'nde nga jñà kjoa machikon-t'in, yaá nchrobá-ne it'aà ts'e Cristo mé-ne nga it'aà ts'e kjoa xi mokjeiín-ná, tjoé-ná Inìma Tsjeè-là Nainá xi jye k'oas'ín kitsjaà tso'ba Nainá nga tsjá-ná.

Nga'ño xi tjín-là 'én-là Nainá koni s'ín kitsjaà-là tso'ba Abraham

¹⁵ Jñò 'ndsè kò tichjaá, kènojmi jngoò-nò kjo'tíxoma xi ts'e isò'nde. K'e nga sindaàjìn jngoò kjoa nga xojòn tjàmì'nga, nga jye ma firma kò sasén-là sello, mì tì kiì koma kits'ón-ya-ne koni s'ín sindaàjìn, tikoáá mì tì kiì koma sijn'aàsòn-isa-là 'én xi kjeíí tsò koni s'ín jye kasindaàjìn.

¹⁶ K'oaá s'ín kitsjaà-là tso'ba Nainá jè Abraham kò jè xita tje-là. Jè Xojòn-là Nainá mìtsà tsò “jñà xita tje-là”, ta tsò-né: “jè tje-lè.” Nga mìtsà kjin ma tje-là Abraham xi kitjoé-là koni tsò 'én xi kitsjaà-là Nainá, ta jngoó ma-ne. Nga jè tíhoxkit'aà Cristo.

¹⁷ Jè kjoa xi tibenojmiá, kiís'ín tjín: Nainá kò Abraham tsibíndaàjìn jngoò kjoa, ikjoàn kisikixiya [koni ma k'e nga jye ma firma]. K'e nga jye tsato ñijòn sindò kò katé nó, j'iì kjo'tíxoma ts'e Moisés; tanga jè kjo'tíxoma mìkiì ma síkits'óna jè kjoa xi jye kisindaàjìn kò mìkiì ma kitjongui xi Nainá jye k'oas'ín kitsjaà tso'ba.

¹⁸ Jè Nainá k'e nga tsjá-ná kjondaà-là, mìtsà koi kjoa-là nga nikitasoán kjo'tíxoma, koi-né nga jye k'oas'ín kitsjaà tso'ba. Nga Nainá, tà kjo'tjò kitsjaà-là kjondaà Abraham nga jyeé k'oas'ín kitsjaà-là tso'ba.

Mé xá xi tǵín-la kǵotíxoma

¹⁹ Tanga jè kǵotíxoma, ¿mé xá kitjei-ne? Koií k'oas'ín kitjei-ne koií kjoa-la nga ch'o nchis'ín xíta. K'oaá s'ín kisijna skanda k'e nga j'ì tje-la Abraham xi Nainá xó k'oas'ín kitsjaà-la tso'ba. Jè kǵotíxoma, jǵnà àkjalé j'ìkò ko jè Moisés tsasijnajiin osen nga kisikatoya 'én ko kiichjatǵi xíta nguixkon Nainá.

²⁰ K'e nga jngoò xíta osijnajiin osen, mìtsà ta jngoò xíta fit'aà-la, fit'aà-la ngajò. Tanga jè Nainá ta jè tajngoò kitsjaà-la 'én Abraham.

²¹ Nainá, k'e nga kitsjaà kǵotíxoma, mìtsà kondra kii-la koni s'ín jye kitsjaà-la tso'ba Abraham. Tsà jè-la-ne kǵotíxoma ma-la síkítsajnakon xíta, maá-la kixi kítsajna xíta nga kǵotíxoma síkitasòn.

²² Tanga jè Xojon-la Nainá, k'oaá tsò nga ngats'ii xíta saá jé títsajnajiiin. K'oaá ma-ne nga jǵnà xíta xi mokjeiín-la it'aà ts'e Jesucristo, tjoé-la kjoabinachon xi Nainá jye k'oas'ín kitsjaà tso'ba nga tsjá-la jǵnà xíta nga mokjeiín-la.

²³ K'e nga tikj'eè f'ii jè kjoa xi mokjeiín-ná, jè kǵotíxoma kitsobà'ñó-ná koni tsà ndayá tsibítsajna'ya-ná skanda jè nachrjein k'e nga ki'ya-la jè kjoa xi mokjeiín-ná.

²⁴ Ko jè kǵotíxoma kisikinda-ná koni s'ín makinda jǵnà ixti, skanda k'e nga j'ii Cristo, mé-ne k'e nga mokjeiín-ná it'aà ts'e Cristo, kixi kítsajnaá nga nguixkon Nainá.

²⁵ I'ndeǵi nga jye j'ii kjoa xi mokjeiín-ná, mì tǵi yaá títsajna'ñó-ná it'aà ts'e kǵotíxoma.

²⁶ Jǵnò, ngats'ioò, saá ixti-la Nainá maá koi kjoa-la nga mokjeiín-nò it'aà ts'e Cristo Jesús.

²⁷ K'e nga ya títsajnakjoòkoo Cristo nga komà bautizar, k'eé jahatǵiya-nò koni jngoò xíta xi síkǵatǵiya nikje-la. Jè sobá Cristo xi komà nikje xitse-nò.

²⁸ Mì tǵi kii mochjeén-ne nga tǵajiiin xíta yá-né xi xíta judío ko yá-né xi mìtsà xíta judío, yá xi chǵ'nda'ñó títsajna ko yá xi títsajnandeǵi, yá-né xi x'ín ko yá-né xi chjoón. Ngats'ioò ta jngoò yijo ma-nò nga ya títsajnakjoòkoo Cristo Jesús.

²⁹ Jǵnò, nga xíta-la Cristo ma, kixií kjoa nga tje-la Abraham ma, tikoá tjoé-nò kǵotǵò koni s'ín kitsjaà-la tso'ba Nainá jè Abraham.

4

¹ Tikoá kènojmi jngoò-nò kǵotíxoma: Jngoò ti, k'e nga tákó itsé kji, k'oaá ngayala koni tsà chǵ'nda tǵjna nga kj'eè tsà jè be mé tsojmi xi tǵín-la na'èn-la nas'ín k'e nga koma iskan jè tjoé-la tsojmi xi tǵín.

² Nga xítaá síkinda skanda k'e nga majchínga, ko tǵín xíta xi síkinda jǵnà tsojmi-la skanda k'e nga kichóya nachrjein-la koni s'ín tsibijna chiba na'èn-la.

³ Jǵnà xi xíta 'mì-ná, k'oaá tis'ín komàt'iaán koni mat'in jǵnà ixti k'e nga tikj'eè mokjeiín-ná it'aà ts'e Cristo nga jǵnà kǵotíxoma xi tǵín isò'nde 'ñó tsatíxoma-ná koni s'ín mat'in jǵnà xi chǵ'nda títsajna'ñó nga mikii tǵi'nde-la nga kítsajnandeǵi.

⁴ Tanga k'e nga kichóya nachrjein koni s'ín tǵindaà-la Nainá, jè Nainá kisikasén ki'ndí-la i it'aà nangui; ko it'aà ts'e chjoón kits'iin koni s'ín ts'iin xi taxki xíta isò'nde. Ko yaá kǵojchájiiin kǵotíxoma ts'e xíta judío.

⁵ K'oaá kis'iin Nainá, mé-ne nga jè Jesucristo síkítsajnandeǵi jǵnà xíta xi ya títsajnajiiin-ñó kǵotíxoma ko mé-ne nga ngásòn skoétǵò-ná Nainá nga ixti-la komaá.

⁶ Koií kjoa-la nga jye ixti-la maá, Nainá kisikasén Inima Tsjeè-la xi ts'e Ki'ndí-la ya jiiin inima-ná. K'e nga nokjoát'aà-lá Nainá, k'oaá tsò Inima Tsjeè-la: “Ndí apa”, tsò-né.

⁷ K'oaá ma-ne nga i'ndeǵi mìtsà tǵi xíta chǵ'nda títsajnaá; jyeé ixti-la Nainá 'mì-ná; ko tikoá tsjá-ná Nainá ngats'ii kǵotǵò xi jǵnà tjoé-ná nga ixti-la 'mì-ná.

Mé-ne síkájno-ne Pablo it'aà ts'e xita Galacia xi mokjeiín-la 'én-la Nainá

8 Jñò k'e nga sa kjòtseé, k'e nga tikj'eè yaxkon xi nguì jè sobà Nainá, chi'nda'ño tsitsajnaà nga kjo'ño-né nga jñà tsanguit'aà-là xi mìtsà kixi kjoa nga Nainá.

9 Tanga i'ndeì nga jye yaxkoòn xi nguì jè sobà Nainá, (tanga xi nguì kixi kjoa, jè Nainá xi jye ndaà beèxkon-nò), ¿mé-ne k'oas'ín nìkìtsjeèn-nò nga jñà onguít'aà ìjngoò k'a-là jñà kjotíxoma imà xi tjín-nò, jè xi tsjìn-la nga'ño, kò xi nímé chjì-la? ¿A mejèn-nò nga ya sikkìtsajna'ño ìjngoò k'a-nò?

10 Jñò, tákó 'ño yaxkón nachrjein ts'e s'eí, ts'e sá, kò ts'e nó.

11 'An, makájno-na jè xá xi kis'iaàn nga kisixájiìn-nò tsà tà kjotjò-ne.

12 'An nga jye tsohósijnat'aaxìn-la jè kjotíxoma, tikoaá yaá kisìngàsòn-kò-nò, nga jñò, mìkiì tjìiìn-nò it'aà ts'e kjotíxoma. I'ndeì k'oaá s'ín tìsìjé-nò nga tìnchat'aaxìn-la kjotíxoma koni 'an jyeé tsohósijnat'aaxìn-la. Nga sa ítjòn nímé kjoa tjín xi ch'o kinìkò-ná.

13 Jyeé tjìiìn-nò k'e nga sa kiaà ítjoàn nga kichjàyajiìn-nò 'én ndaà-la Nainá xi kjoa ts'e Cristo, koií kjoa-la nga ch'in tjín-la yijo-na.

14 Jñò, mìkiì kinachrjengui-ná nì mìtsà xìn kinìkìjna-ná, nas'ín kjoa tsohósji-nò nga ch'in tjín-la yijo-na. Tà saá kichjoétjò-ná koni jngoò àkjale-la Nainá, koni tsà jè sobà Cristo Jesús.

15 ¿Nga sa ítjòn, 'ño tsja tjín-nò! I'ndeì, ¿mé xi komà-nò? K'oaá xan-nò, skanda jñà xkoòn mejèn kinachrje nga 'an kits'iì-ná.

16 I'ndeì, ¿a kondraá kótijnako-nò, tà koií kjoa-la nga 'én kixi benojmí-nò?

17 Jñà xita [xi mejèn-la nga kjotíxoma sikitason], 'ño bìnè-la yijo-la it'aà tsajòn, tanga mìkiì ndaà tjín kjohìtsjeèn-la. Tà jè xi mejèn-la nga kochrjet'aaxìn-nò it'aà tsajèn mé-ne nga jñà konguít'aà-là.

18 Jñò, ndaà tjín k'e nga 'ño bìnè-la yijo-nò it'aà ts'e kjoa xi mejèn-nò tsà ndaà tjín kjohìtsjeèn-nò kò tsà kjit'aà nachrjein k'oas'ín s'een, mìtsà tà k'e nga 'an tijnako-nò.

19 Jñò xi koni tsà ndíixti-na xan-nò, 'an, k'oaá s'ín tímat'ian koni jngoò chjoón xi ki'ndí tí'beé; tseé kjo'in tìsikjiaán xi kjoa tsajòn. Jè kjo'in xi tìsikjiaán skanda k'eé-la kjoehet'aà k'e nga k'oas'ín sijchá yijo-nò koni Cristo.

20 Mejèn-na nga ya kótijnako-nò jè hora jè, mé-ne nga kj'eíí tsò 'én xi kichjàkò-nò. Jyeé mì tì kiì be-na kós'ín sikkìtsjeèn it'aà tsajòn.

Kó tsòya-ne it'aà ts'e chjoón Agar kò Sara

21 Jñò xi mejèn-nò nga kjotíxoma sikitason, ¿a kj'eè na'ya-là kó tsò 'én xi tjít'aà kjotíxoma-la Moisés?

22 K'oaá tsò nga jè Abraham, jò komà ixti-la, jngoò ts'e chjoón chi'nda-la; jè xi ìjngoò, ts'eé xi nguì chjoón-la xi mìtsà chi'nda tíjna.

23 Jè ki'ndí-la xi chjoón chi'nda k'oaá s'ín kits'iìn koni s'ín ts'iìn ngats'iì ndíixti. Tanga jè ts'e xi nguì chjoón-la xi mìtsà chi'nda tíjna, k'oaá s'ín kits'iìn nga tsitasòn koni s'ín kitsjaà-la tso'ba Nainá Abraham.

24 Kjoa ts'e íchjín koi, k'oaá ngaya-la koni jñà kjoa xi jò tsibíndaàjiìn Nainá. Jè chjoón Agar, jè ngaya-la kjoa xi kisindaàjiìn ya nindoò Sinaí k'e nga kitjoé-la kjotíxoma Moisés. Ngats'iì xita tje-la chi'ndaá tsibìtsajna.

25 Jè chjoón Agar, jè ngaya-la nindoò Sinaí xi síjna ján Arabia, kò nachrjein i'ndeì jè mangàsòn-kò naxandá Jerusalén, nga jñà xita-la chi'nda'ño títsajna nga tákó kjotíxoma sí'sin-la.

26 Tanga jè Jerusalén xi kijna ngajmì, tíjnandeí-né kò yaá nokjoá-ná ya naxandá jè; k'oaá ngaya-la koni tsà nea-ná ma.

27 K'oaá tsò Xojon-la Nainá nga tsò:

Kàtatsja-lè ngajì xi chjoón 'ndì 'mì-lè nga tsjìn-lè ixti.

'Nó chihindáyi nga kọ kjotsja-lè nga mìkiì 'yi kós'ín ma nga ts'ìin ìxti.

Nga jè chjoón xi kijnei takòn,

ìsaá kjìn koma ìxti-là mì k'oa-ne jè xi tjín-là x'ín.

²⁸ Isaac k'oaá s'ín kits'ìin koni s'ín kitsjaà tso'ba Nainá. Jñò tìkoáá ìxti-lá maá xìtá jchínga-là Isaac koni s'ín kitsjaà-là tso'ba Nainá.

²⁹ Jè ki'ndí xi tà k'oa's'ín kits'ìin koni ts'ìin yije xìtá isò'nde, kùtjìngui kondra-là jè xi ìt'aà ts'e Inìma Tsjeè-là Nainá kits'ìin-ne. Koni s'ín komà jñà nàchrjein koi, tákó k'oaá s'ín ma skanda nàchrjein ì'ndeì.

³⁰ Tanga, ¿kó tsò Xojon-là Nainá? K'oaá tsò: “Tìyótjìngui-là jè chjoón ch'ìnda kọ ki'ndí-là; nga jè ki'ndí-là nìmé kjotjò tjoé-là, tà jè tjoé-là kjotjò jè ki'ndí-là xi mìtsà chjoón ch'ìnda.”

³¹ Jñò ndí 'ndsè kọ ndí tichjaá, k'oaá s'ín tjín, jñà mìtsà ìxti-là chjoón ch'ìnda maá, jñà-ná xi ìxti-là chjoón xi mìtsà ch'ìnda tìjna.

5

Kós'ín sijchá yijo-ná nga jye titsajnandiaá ìt'aà ts'e kjotíxoma xi kitjoé-là Moisés

¹ Jè Cristo, jngoò k'aá kisikítsajnandeií-ná ìt'aà ts'e kjotíxoma xi kitjoé-là Moisés; k'oaá ma-ne jñò 'nó kixì tìtsajna koni s'ín kisikítsajnandeií-nò Jesucristo. Kì tì yà onguít'aà-là kjoa ts'e kjotíxoma xi kitsobà'nó-nò skanda kjotseé.

² 'An sobá-ná xi 'mì-na Pablo, tìná'ya-ná koni xan-nò: tsà sít'aà chibà-nò kjoa ts'e circuncisión, mì tì mé kjondaà sakò-nò ìt'aà ts'e Cristo.

³ Ìjngoò k'a koxan-nò, nìtá yá xìtá-ne xi sít'aà chiba-là kjoa ts'e circuncisión, kjo'nó tjínè-là nga sùkitasòn yije koni tsò 'én xi tjit'aà xojon ts'e kjotíxoma.

⁴ Jñò xi k'oa's'ín mejèn-nò nga ìt'aà ts'e kjotíxoma kixì kìtsajnaà nga nguixkon Nainá, jyeé chinchat'aàxìn-là Cristo, jyeé chinchat'aàxìn-là kjondaà xi tsjá kjotjò-ná Nainá.

⁵ Tanga ngajen, ìt'aà ts'eé Inìma Tsjeè-là Nainá titsachiñá-lajen nga kixì kìtsajna-jen nga nguixkon Nainá nga ta koi kjoa-là nga mokjeiín-najen ìt'aà ts'e Cristo.

⁶ Nga ìt'aà ts'e Cristo Jesús, mì tì mé chjí-là yá-ne xi tjit'aà chibà-là kọ yá-ne xi tsjìn-là chibà kjoa ts'e circuncisión. Jè xi chjí-là nga 'ya-là koni s'ín mokjeiín-ná ìt'aà ts'e Cristo, nga tjín-ná kjotsjacha.

⁷ Jñò, k'e nga sà ítjòn, ndaà titsahonguikoo kjohítsjeèn-nò. ¿Yá xi tsatekjáya-nò nga mì tì kii nìkitasòn-nò xi kjoa kixì?

⁸ Jè kjohítsjeèn jè, mìtsà yà nchrobá-ne ts'e Nainá xi xó kiìchja-nò.

⁹ Tìkindaa yijo-nò; nga k'oaá tsò jngoò 'én: “Nas'ín ìtsé-ne na'yò san xi sjiìn na'yò inchrájin, sísan yije-né nas'ín tse ma-ne na'yò.”

¹⁰ Jè Nainá ot'aà takoàn ìt'aà tsajòn nga mìtsà kj'eíí s'ín s'ikítsjeèn. Jè Nainá tsjá-là kjo'in nìtá yá xìtá-ne xi mejèn-là s'ikits'ón-jìin-nò.

¹¹ Jñò ndí 'ndsè kọ ndí tichjaá, nga mì k'oaá s'ín tihokoòya nga sít'aà chibà-là xìtá kjoa ts'e circuncisión, koií kjoa-là nga fitjìngui kondra-na jñà xìtá. Tanga tsà mì k'oa's'ín okoòya, mì-la kii kjìtjìngui kondra-na, mì-la tì kii kojitikeè-ne 'én xi chjàya ìt'aà ts'e krò-là Cristo.

¹² Jñà xìtá xi mejèn-là s'ikits'ón-jìin-nò, kì tà bít'aà chibà-là yijo-là, tà saà jngoò k'a kàtatet'aà yijo-là.

¹³ Jñò 'ndseé kọ tichjaá, k'oaá s'ín kiìchja-nò Nainá nga kìtsajnandeií-nó ìt'aà ts'e kjotíxoma. Tanga ì'ndeì nga titsajnandeií-nó, kì ch'o 'nè koni s'ín mejèn-là yijo-nò. Mochjeén-né nga tìsìkòò xinguiòò, kàtas'e-nò kjotjòcha nga ìjngoò ìjngoò-nò.

14 Nga ngats'iì kjotíxoma, yaá majngoò yije jè xi tsò: “Tìtsjachi xìtā xinguii koni tsà tì yijo tsiji-ne.”

15 Tsà tijnò tìtsabixkàn-ko-nò xinguiio koni s'ín nañá, t'een kinda yijo-nò nga mì tijnò sijkjehesòn-nò xìtā xinguiio.

Kjoach'o xi síjé yijo-ná

16 K'oaá xan-nò: Tjiì'nde-là yijo-nò nga jè Inìma Tsjeè-là Nainá kàtakó-nò ndiyá mé-ne nga mì koi kjoa sikitason kjoach'o xi síjé yijo-nò.

17 Jñà kjoach'o xi síjé yijo-ná kondraá fì-là jè Inìma Tsjeè-là Nainá, ko jè kjoa xi mejèn-là Inìma Tsjeè-là Nainá kondraá fì-là jè xi mejèn-là yijo-ná. Jñà kjoa koi kondraá tìtsajna-là xíkjín. K'oaá ma-ne nga jñò, mìkì k'oa's'ín s'een koni s'ín mejèn-nò.

18 Tanga tsà jè Inìma Tsjeè-là Nainá tíhokó-nò ndiyá, mì tije kjotíxoma otíxoma-nò.

19 Jyeé 'yaá mé kjoach'o xi síjé yijo-ná koni jè kjoachijngui, kjoaxòpa, kjoachinga,

20 kjoa nga xkósòn yaxkoán, kjoatj'e, kjoa nga majtichaá xinguiáá, nga bixkán-koaá xinguiáá, nga machinichaá xinguiáá, nga jti takoán, nga nachrjenguiáá xinguiáá, nga xìtā nìjòyaá ko nga binchat'aàxìn-lá xinguiáá,

21 kjoaxìtakòn, kjoach'i, ko ngats'iì kjoachrjá'a xi ma ñánda bitjo s'eí. Tjín ìsa kjoa xi k'ejí, xi mangásòn-ko kjoa koi. Koni s'ín kixan-nò nga sa ítjòn, tákó k'oaá xan-nò skanda i'ndeì, jñà xìtā xi k'oa tjín kjoa xi s'ín, nímé kjondaà sakò-là ya ñánda nga tíhotíxoma Nainá.

Kjondaà xi tsjá Inìma Tsjeè-là Nainá

22 Tanga jñà kjondaà xi tsjá Inìma Tsjeè-là Nainá, jñà-né nga tjòcha s'eén xinguiáá, nga tsja s'en kjit'aá, nga 'nchán sijchá yijo-ná, nga s'e-ná kjoatsejta, nga tsjakjoa s'eén, nga s'en-ná kjondaà xi ndaà tjín, nga kixi tjín kjohítsjeèn-ná,

23 nga indaàkjoa s'eén ko nga kixi kotíxoma-lá yijo-ná. Jñà kjoa koi, tsjìn kjotíxoma xi kondra tíjna-là.

24 Jñá xi jye xìtā-là Cristo maá, ngats'iì kjohítsjeèn-ná xi ch'o tsò ko xi ch'o síjé yijo-ná, yaá kinìk'en-t'aá krò-là Cristo.

25 I'ndeì nga jè Inìma Tsjeè-là Nainá tísíkjínakon-ná, mochjeén-né nga kos'ín kjiaán koni s'ín okó-ná ndiyá.

26 Mìkì ndaà tjín nga 'nga koma takoán, nga tijná sijti-lá xinguiáá, ko nga koxìtakòn-chaá xinguiáá.

6

Mé xi mochjeén nga ndaà sikoáá ngats'ì xìtā

1 Jñò ndí 'ndsè ko ndí tichjaá, tsà tjín i'nga xìtā xi jé ótsji, jñò xi ndaà onguít'aà-là jè Inìma Tsjeè-là Nainá, jñò tìsikòò nga kàtakixiya òngòò k'a-ne nga indaàkjoa tìnókjoa-là. Tanga jñò, t'een kinda yijo-nò, mé-ne nga mì jé skajìin-nò.

2 Tìsikòò xinguiio k'e nga tsà mé kjoa xi 'in tjín tìtsajnajìin; k'oaá s'ín koma-ne nga sikitason jè kjotíxoma xi kitsjaà Cristo.

3 Tsà tjín i'nga xìtā xi ndaà ochrjengui yijo-la, koa tsà mìtsà kixi-ne kjoa, jñà xìtā koi, tà yijo-laá nchikonachan-la.

4 Ìsaá ndaà-ne nga chít'aà yijo-nò nga jngoò òngòò-nò, a ndaà tìtsa'nè; tsà ndaà tìtsa'nè, ta ya tíjìin takòn, kì k'oaá s'ín nìkìtsjeèn nga jñò, ìsaá ndaà tìtsa'nè mì k'oa-ne koni jñà xìtā xi k'ejí.

5 Nga jngoò òngòò, yaá kjinè-là kós'ín tísíjchá yijo-la.

⁶ Jñà xità xi nchikota'yà 'én ndaà-là Nainá, mochjeén-né nga kàtatsjá-là mé xi kochjeén-là maestro-là nga 'én okóya.

⁷ Kì yijo-nò chonachan-là; nga Nainá mìkì koma siskákoáá. Nga ìjngò ìjngò xità, koni tjin kjoa xi s'in, k'oaá tì tjin kjoa xi sakò-là.

⁸ Nga jè xi k'oas'in s'in koni s'in mejèn-là yijo-là, kjoabiyaá tjoé-là it'aà ts'e kjoa ch'o xi síjé yijo-là, tanga jè xi k'oas'in s'in koni s'in mejèn-là Inima Tsjeè-là Nainá, it'aà ts'e Inima Tsjeè-là Nainá tjoé-là kjoabinachon xi mìkì fehet'aà nita kjé-né.

⁹ Mìkì ndaà tjin tsà kosì-ná nga ndaà s'eén; nga kijchò nachrjein nga sakò-ná kjondaà tsà mì kì s'hindaà-lá takoán.

¹⁰ Koií kjoa-là, k'e ma xi 'né itsé, ndaà s'koáá ngats'ì xità, jñà títsajna ítjòn jñà xità xinguiáá xi ngàsòn mokjeiín-ná 'én-là Nainá.

Mé kjoa xi síkíjna ítjòn Pablo

¹¹ Chítsejèn-là tsí kitsian-ne letra xi ndsaa tìkjiì-nò.

¹² Jñà xità xi mejèn-là nga kjo'ñó s'in-nò nga sit'aà chiba-nò kjoa ts'e circuncisión, tà koií xi mejèn-là nga ndaà síkítsajna yijo-là nga nguixkon xità; ko majin-là nga xità kjitjingui kondra-là tsà kos'in keènojmiya nga ya k'en-t'aà krò Cristo.

¹³ Jñà xità xi tjit'aà chiba-là kjoa ts'e circuncisión, tikoáá mìkì síkitasòn kjotixoma, tanga mejèn-là nga sit'aà chiba-nò mé-ne nga it'aà tsajòn ndaà síkítsajna-ne yijo-là k'e nga skoe nga jñò jye tjit'aà chiba-nò.

¹⁴ Tanga 'an, nimé kjoa xi mejèn-na nga ndaà síkíjna yijo-na; ta jè tajngó krò-là Na'èn-ná Jesucristo nga ndaà síkíjna yijo-na. K'oaá ma-ne nga jñà kjoa ch'o xi tjin isò'nde, it'aà ts'an, títsajnak'en-né ko 'an tijnak'eén-là jè isò'nde. Mì tì k'oaá tjin kjoa xi sis'in-na.

¹⁵ Xi it'aà ts'e Cristo, mìtsà jè xi chjí-là tsà tjit'aà chiba-ná ko tsà tsjin-ná chiba kjoa ts'e circuncisión; jè xi chjí-là nga jè Nainá jyeé kisikjatjya-ná ko jyeé xità xitse kjoán.

¹⁶ Kàtas'e-là kjoa'nchán ko kjoa ima takòn ya jjiin inima-là ngats'ì xità xi k'oas'in nchisíkitasòn koni tsò 'én jè; jñà-né xi xità-là Nainá ts'e naxandá Israel.

¹⁷ K'oaá ma-ne i'ndeí, kì tì yá xi kjoa ótsji-isa-na nga jyeé tjit'aà chiba-là yijo-na kjo'in xi kitsjaà-na xità xi kjoa ts'e Na'èn-ná Jesús.

¹⁸ Jñò ndí 'ndsè ko ndí tichjaá, jè kàtasiin inima-nò kjondaà-là Jesucristo xi otixoma-ná. K'oas'in kàtama.

Xojon carta-la San Pablo xi kiski-la xita naxandá-la Cristo xi títsajna Éfeso

Kó tsò Pablo nga síhixat'aà jñà xita naxandá-la Cristo xi títsajna Éfeso

¹ Jñò xi xita-la Nainá 'mì-nò xi títsajnaà naxandá Éfeso, jñò, xi kixi onguít'aà-la Cristo Jesús, 'an xi 'mì-na Pablo tsihixat'aà-nò nga 'an tsibíxáya-na Jesucristo nga k'oas'ín kjòmejèn-la Nainá.

² Nainá xi Na'èn-ná, kò jè Jesucristo xi otíxoma-ná kàtatsjá-nò kjòndaà kò kjoa'nchán ya jjiin inima-nò.

Kós'ín síchikon-t'in-ná Nainá k'e nga Cristo títsajnaakoá

³ Jeya kàtìjna Nainá, Na'èn-la Jesucristo xi otíxoma-ná nga kisiçhikon-t'in-ná, kitsjaà-ná ngats'ii kjòndaà xi ts'e inima-ná xi ngajmii nchrobá-ne koi kjoa-la nga Cristo títsajnaakoá.

⁴ Nainá xó k'oáá s'ín jaàjiin-ná k'e nga tikj'eè sindaà isò'nde nga Cristo títsajnaakoá mé-ne nga nimé jé s'e-ná kò tsjeè kitsajnaá nguixkò jè.

⁵ Koi-né nga matsjakeè-ná nga k'oas'ín kiskoòsòn-la nga tisa-ne nga kiskoétjò-ná koni ixti jchan-la maá xi it'aà ts'e Jesucristo. Nainá k'oáá s'ín kis'iin koni s'ín kisaseèn-la ta koi kjoa-la nga k'oas'ín kjòmejèn-la.

⁶ Koií kjoa-la nga jeya bijna Nainá nga tse kjòndaà kitsjaà-ná nga kisiçhikon-t'in-ná nga ya títsajnaakoá ki'ndí-la xi 'ño matsjakeè.

⁷⁻⁸ Jè jní-la Jesucristo tsibíçhítjì-ná koa kisiçhàat'aà-ná jé-ná nga Cristo títsajnaakoá, nga 'ño tse kjòndaà tjín-la Nainá nga tsjá-ná kjòhítsjeèn kò kjoachjine xi tjín-la.

⁹ K'oáá ma-ne nga tikoa tsakó-ná jè kjoatjí'ma-la koni s'ín kjòmejèn-la jè, tikoií-ne kjòhítsjeèn-la xi tijè-ne kiskoòsòn-la nga kitasòn.

¹⁰ Koni s'ín tjíndaà-la kjòhítsjeèn jè, kijchò nachrjein nga kitasòn tsjeè. Nainá, jé sijnogò yije nita mé xi tjín ngajmii kò it'aà nangui nga jè Cristo kotixoma.

¹¹ Nainá jyeé kjòtseé jaàjiin-najen nga Cristo títsajnaako-jen. Kitjoé-najen kjòtjò xi tsjá Nainá koni s'ín tjíndaà-la nga k'oas'ín bitasòn 'én-la koni s'ín ndaà sasèn-la.

¹² K'oáá s'ín kis'iin nga ngajen kiníkítsajna ítjòn-jen nga jeya tjina Nainá, ngajen xi xita judío 'mì-najen, ngajeén kòkjeiín ítjòn-najen it'aà ts'e Cristo.

¹³ Tikoaá jñò nga ya títsajnaako Cristo, k'e nga kina'ya 'én ndaà-la Nainá xi kjoa kixi, jè xi tsachrjekàjiin-nò kjo'in nga kòkjeiín-nò it'aà ts'e Cristo, Nainá kitsjaà-nò Inima Tsjeè-la; yaá tsibít'aà çiba-la jjiin inima-nò, koni s'ín jye kitsjaà tso'ba nga tsjá-nò.

¹⁴ Jè Inima Tsjeè-la Nainá, jè-né xi tjoé ítjòn-ná nga kixi kjoa nga tjoé yije-ná kjòtjò xi Nainá tsjá-ná jè nachrjein k'e nga kongàsòn nga sikiítsajnandeíí-ná xi naxandá-la maá mé-ne nga jeya kija-ne Nainá.

Kós'ín bítsi'ba Pablo it'aà ts'e jñà xita xi jye mokjeiín-la

¹⁵ Koií kjoa-la k'e nga ki'nchrè nga mokjeiín-nò it'aà ts'e Jesucristo xi otíxoma-ná, kò nga matsjacha ngats'ii xita-la Nainá;

¹⁶ mìkii sìjchàajñaà nga nachrjein inçhijòn tsjaà-la kjòndaà Nainá xi it'aà tsajòn; k'e nga bítsi'ba-la, síjèt'aà-la xi kjòndaà tsajòn

¹⁷ mé-nè nga jè Nà'èn-ná xi jeya tíjna, jè xi Nainá tsò-la Jesucristo xi otíxoma-ná, jè kàtasíkhichiya-nò kò kàtatsjá-nò kjoachjine xi ts'e inima-nò mé-ne nga isa ndaà jchaxkon-nò Nainá.

¹⁸ K'oaá s'ín síjèt'aà-la Nainá nga silihiseèn-la kjohítsjeèn-nò mé-nè nga jcha-nò mé xi chiñà-là nga xó kinokjoàa-nò. Tíkoaá jcha nga 'ñó ndaà tjin kò 'ñó jeya tjin kjotjò xi Nainá tsjá-la jña xita naxandá-la.

¹⁹ Tíkoaá síjèt'aà-la nga jchaxkon kó kji 'ñó tse nga'ñó tjin-la Nainá nga koma kosíko-ná jña xi mokjeiín-ná it'aà ts'e. Tíkoií-ne nga'ñó xi 'ñó tse tjin-la Nainá

²⁰ xi kisíkjeén nga kisíkjaáya-la Cristo k'e nga k'en, ikjoàn jeya kisíkijnat'aà chrja kixi-la ján ngajmii

²¹ ñánda nga isa ta 'ñó 'nga kisíkijna ítjòn mì k'oaá-ne tsà jngoò xita ítjòn, xitaxá ítjòn, ngats'ii nga'ñó xi tjin i it'aà nangui kò xi tjin jjiin isén, ngats'ii xi tjin-la kjotíxoma ngajmii; tíjna ítjòn-la ngats'ii xi tjin isò'nde jè, kò jè isò'nde xi sa nchrobá.

²² Nainá, jè kisíngatsja yije Cristo, ngats'ii kjotíxoma xi tjin; tíkoaá jè kitsjaà yije-la Cristo nga jè koma xi sko-la naxandá-la.

²³ Naxandá-la tijè-ne yijo-la Cristo; kò jè tsjá yije-la nita mé xi chija-la. Tijè-ne Cristo xi síjngoò yije, nita mé xi tjin isò'nde.

2

Kós'ín síjchàat'aà-ná jé-ná Nainá

¹ Jñò, nga sa kjòtseé, k'oaá ngaya-la koni tsà titsajna k'en-nò it'aà ts'e Nainá nga jè kjoa-la jé-nò nga ch'o ki'nè.

² K'oaá s'ín tse tsitjaáyaà ndiyá jé-la xita isò'nde; jè kiníkitasòn-là xita neij xi sko-la tjo jjiin isén nga jè sixájiin inima-la jña xita xi mìkii 'nchréñijon-la Nainá.

³ Tíkoaá ngats'iaá jña, k'e nga isa kjòtseé, k'oaá tís'ín chinchàatsjiaá jé koni s'ín kjòmejèn-la yijo-ná kò kjohítsjeèn-ná. Tjin-ne nga ngàsòn tse kjo'in k'oi-ná tsà ndaà, koni jña xita xi kje'ei nga koi kjoa-la jé-ná.

⁴ Tanga Nainá, tseé kjohimatakòn tjin-la nga 'ñó matsjakeè-ná.

⁵ Nainá kisíkítsajnakon ìjngoò k'a-ná kò Cristo, nas'ín jye titsajnak'eén xi kjoa ts'e jé-ná. (Kò jñò, tà kjondaà-la Nainá-né nga bitjokàjñoò kjo'in.)

⁶ Nainá, kisíkjaáyakjoè-ná kò Cristo, nga ya titsajnakoaá, kò tañaá kisíkítsajnakjoè-ná ján ngajmii.

⁷ K'oaá s'ín kis'iin mé-nè nga kòkò-ne jña naxhrjein xi sa nchrobá nga tse kjoatjòcha tjin-la kò tse kjondaà tjin-la it'aà tsaján nga Cristo Jesús titsajnakoaá.

⁸ Tà kjondaà-la Nainá-né nga itjokàjñoò kjo'in nga kòkjeiín-nò it'aà ts'e Cristo. Mìtsà kjondaà tsajòn nchrobá-ne kjoa koi; ta kitsjaà kjotjò-nò Nainá.

⁹ Mìtsà koi kjoa-la nga xá ki'nè, mé-nè nga nijngoò xita ndaà síkijna-ne yijo-la.

¹⁰ Nainá tsibíndaàya xitse ìjngoò k'a-ná, nga ya titsajnakoaá Cristo, mé-nè nga s'eén ngats'ii kjoa xi ndaà tjin, jña kjoa xi Nainá jyeé k'oa'sín kiskoòsòn-la nga tisa kjòtseé nga kos'ín sikitasoán.

Kjoa'nchán xi tjin-ná nga Cristo titsajnakoaá

¹¹ Jñò xi mì ya tjen-nò tje-la xita judío, k'oaá tsò-nò jña xita judío xi tjit'aà chiba yijo-la nga mìtsà xita-la Nainá 'mì-nò, koi kjoa-la nga mì tjit'aà chiba-nò kjoa ts'e circuncisión. Tanga jè kjoa jè, tà tsja xitaá bíndaàya-ne yijo-la.

¹² Tikítsjeèn k'e nga sa kjòtseé jñò titsat'aaxìn-la Cristo; tíkoaá titsajnat'aaxìn-la naxandá Israel, mìkii ya nokjoà-nò koni s'ín tsibíndaàjijn-kò

Nainá jñà xita judío koni s'ín kitsjaà-là tso'ba Nainá. Isò'nde jè, nímé xi chiñà-là kò mìkii yaxkon Nainá.

¹³ Tanga i'ndeì, nga ya titsajnakoo Cristo, Nainá jyeé kisichrañat'aà-nò jè kjoa-là jní xi tsibíxteèn Cristo, nas'ín kjiin tjat'aàxin-là Nainá nga sa kjòtseé.

¹⁴ I'ndeì, jè Cristo xi tsjá-ná kjoa'nchán. Kisikjoóndaà-ná nga jngoò naxandá komà-ne jñà xita judío kò xi mìtsà xita judío. Jè kisihixàña jè kjoa kondra xi jòya tjín nga sa ítjòn k'e nga kitsjaà kjòtjò yijo-là nga k'en-t'aà krò.

¹⁵ Yaá kisikjehet'aà jè kjotíxoma-là Moisés xi tjín-là jñà xita judío; kjòjngoò-ne ingajò naxandá; jngoò naxandá xitse komà-ne nga jè titsajnakoaá Cristo; k'oaá komà-ne nga tsijne 'nchán kjoa.

¹⁶ Cristo, k'e nga k'en-t'aà krò, yaá kisikjehet'aà kjoa kondra xi jòya tjín. Kisikjoóndaà-ne ingajò naxandá; jngoò naxandá komà-ne koa kitsjaà-là kjoa'nchán it'aà ts'e Nainá.

¹⁷ Jñò xi kjiin títsajna-là Nainá nga sa ítjòn, tikoá ngajen xi titsajnat'aà chrañà-lajen, j'ìi Cristo nga j'ìi kénojmi-ná 'én ndaà xi tsjá-ná kjoa'nchán.

¹⁸ Ndaà chí-là Cristo nga ingajò naxandá-ná jyeé tjí'nde-ná nga koma chikoaá Nainá nga tijè-ne Inima Tsjeè-là tsjá-ná nga'ño nga ingajoá.

¹⁹ K'oaá ma-ne jñò xi mìtsà xita judío 'mì-nò, mìtsà tì xita xin nangui-nò. Jñò, i'ndeì, ngàsòn ya tajngoò nokjoà-nò naxandá-là Nainá; xita xinguiòo-nò ngats'ìi xita naxandá-là Nainá.

²⁰ K'oaá ngaya-là koni tsà jngoò ni'ya tísindaà. Jñò, jè ngaya-là ndajo xi mochjeén-là chrjó ni'ya. Jñà xita xi tsibíxáya-là Cristo kò jñà xi kiichja ngajo-là Nainá, jñà-né tàts'en chrjó-là ni'ya. Kò jè Cristo jè ndajo chrjangui-là chrjó ni'ya.

²¹ Nga kò Cristo ngats'ìi ndajo-là chrjó ni'ya, ndaà tísikjoò kò tímajeya ni'ya mé-nè nga ni'ya tsjeè-là Nainá koma-ne.

²² Tikoá jñò, nga Cristo títsajnakjoókoo, Nainá tísíkítsajnakjoò-nò kò xita xinguiòo xi kj'eí, mé-ne nga jñò koma-nò ni'ya ñánda tíjna Nainá nga Inima Tsjeè.

3

Xá-là Pablo it'aà ts'e xita xi mìtsà xita judío

¹ K'oaá ma-ne bìtsi'bà-là Nainá, 'an xi 'mì-na Pablo nga ndayá tíjna, koií ngatjì-là nga 'an benojmí-nò 'én ndaà-là Jesucristo, jñò xi mìtsà xita judío 'mì-nò.

² Nga jyeé-la tíjiin-nò nga kjondaà ts'e Nainá-né nga 'an kitsjaà-na xá xi kjondaà tsajòn,

³ koni s'ín kisihiseèn-na Nainá nga tsakó-na jè kjoa xi tjí'ma-là skanda kjòtseé. Jyeé isa kiskii chiba-nò jñà 'én koi.

⁴ K'e nga tsà ndaà kíxkejñòò xojòn jè koni s'ín kiskii ítjòn-nò, yaá jcha nga 'an ndaà tíjiin-na jè kjoa tjí'ma it'aà ts'e Cristo.

⁵ Nga isa kjòtseé, nijngoò xita tíjiin-là jè kjoa tjí'ma; tanga i'ndeì jè Inima Tsjeè-là Nainá kisihiseèn-là jñà xita xi xó jaàjiin-ne Nainá, jñà xita xi tsibíxáya-là Cristo kò xi kiichja ngajo-là.

⁶ Jè kjoa tjí'ma, jè-né nga jñà xi mìtsà xita judío, k'e nga mokjeiín-là 'én ndaà-là Nainá xi kjoa ts'e Cristo, ngàsòn tjoé-là kjòtjò-là Nainá nga ngàsòn ixti-là ma koni jñà xita judío; jngoò naxandá koma yije kóhotjín; kò jñà xi mìtsà xita judío ngàsòn tjoé-là kjondaà koni s'ín kitsjaà-là tso'ba Nainá jñà xita judío.

⁷ Ta kjondaà-la Nainá-né nga 'an kitjoé-na xá jè. Jè kitsjaà kjotjò-na nga chi'nda-la ma k'e nga kitsjaà-na nga'ño-la mé-ne nga 'an kènojmiá 'én ndaà-la Cristo.

⁸ 'An, nas'ín isa 'ño nangui tjina-la ngats'ii xita-la Nainá, tanga Nainá kitsjaà-na kjondaà jè, nga 'an chjàyajiin-la 'én ndaà-la Nainá xi kjoa ts'e Cristo jña xi mìtsà xita judío, mé-nè nga skoe-ne kó kji 'ño tse kjondaà tsjá Cristo skanda mìkiì bijchótjinguì-la kjohítsjeèn-ná.

⁹ Jè xá xi 'an kjongatsja nga 'an sìhiseèn-la jña xita mé-ne nga skoe-ne kó s'ín tjín kjoa xi tjí'ma. Nainá xi tsibíndaà isò'nde, jè tjina'ma-la kjoa jè skanda tisa tàts'en-la kjoa.

¹⁰ Koií k'oas'ín komà-ne mé-ne skoe-ne i'ndeì ngats'ii inima ch'o kò inima xi ndaà xi tjín-la nga'ño jjiin isén nga kjin skoya kjoachjine tjín-la Nainá. Yaá skoe kjoa koi it'aà ts'e naxandá-la Cristo.

¹¹ Nga tisa tàts'en-la kjoa, Nainá k'oaá s'ín tjíndaà-la nga it'aà ts'e Cristo kítasòn yije kjoa koi.

¹² I'ndeì, nga Cristo titsajnakoaá, jyeé 'ño takoán. Komaá chikoaá Nainá ñánda tjina nga mì tì kiì xkón-oná nga jyeé mokjeiín-ná it'aà ts'e Cristo.

¹³ K'oaá s'ín sìjé-nò nga kì nikjajen-là takòn jè kjo'in xi tìsikjaán nga 'an benojmí-nò 'én ndaà-la Nainá xi kjoa ts'e Cristo. Isáá ndaà kàtatsja-la inima-nò nga kjondaà tsajòn-nò.

Kó tsò Pablo nga bìtsi'batjì naxandá-la Cristo xi títsajna Éfeso

¹⁴ Koií kjoa-la nga ósijna xkó'nchit'aà-la nga bìtsi'bà-la Nainá xi Na'èn-ná.

¹⁵ Nga it'aà ts'eé Nainá nchrobá-ne nga tjín na'èn kò tjín ixti nga jngoò ljngoò ni'ya xita xi tjín ngajmii kò xi tjín isò'nde.

¹⁶ Nainá, nga tse nga'ño tjín-la, k'oaá s'ín bìtsi'bà-la nga kàtatsjá-nò nga'ño-la xi ts'e inima-nò nga jè Inima Tsjeè-la Nainá kàtasíxájiin inima-nò.

¹⁷ Jè Cristo, ndaà kàtijnajiin inima-nò, nga mokjeiín-nò it'aà ts'e; 'ño ndaà kàtas'e-nò kjoatjòcha-la Nainá koni jngoò yá xi nanga fi ima-la, kò koni jngoò ni'ya xi nanga tjíhijiin chrjó-la.

¹⁸ K'oaá s'ín koma-ne nga jño kò ngats'ii xita-la Nainá, jchaxkoòn koa kochiya-nò nga 'ño tse kjoatjòcha xi tjín-la Cristo, 'ño tiyà, 'ño ndojò, 'ño nanga kò 'ño 'nga.

¹⁹ Nguì ndaà jchaa jè kjoatjòcha xi tjín-la Cristo xi isa 'ño otonè-la ngats'ii kjohítsjeèn-ná skanda mìkiì machiya-ná, mé-ne nga nímé chijat'aà-nò koni jè Nainá, nímé chijat'aà-la.

²⁰ Nainá, 'ño tse nga'ño tjín-la, tsà k'e nga mé xi nijé-laá, skanda isaá 'ño síkatonè-la koni s'ín nijé-laá kò nga koni s'ín nikítsjeèn. K'oaá s'ín tsjá yije-ná nga kò nga'ño-la xi síxájiin inima-ná.

²¹ Jeya kàtìjna Nainá ya jjiin naxandá-la kò it'aà ts'e Cristo nita mé nachrjein-ne, nita mé nó-ne. K'oas'ín kàtama.

4

Tìtsajtiòn nga kò Inima Tsjeè-la Nainá

¹ Koií kjoa-la nga k'oas'ín bìtsi'bà-nò nga ndaà tijchá yijo-nò koni s'ín ok'in-la kjoa xi xó kinokjoà-nò. 'An, ndayá tjinaa'ya jè ngatji-la nga Nainá tìsìxá-la.

² Jño, kì 'nga ikon 'nè; indaàkjoa t'een, kàtas'e-nò kjoatsejta; ngásòn kàtachíkjoa-nò mé kjoa xi tjín-nò nga matsjacha xinguiòo.

³ Tìnè-là yijo-nò nga titsajnajtiòn-koo xinguiòo koni s'ín jye tsibítsajnajtín-nò jè Inima Tsjeè-la Nainá, mé-ne nga 'nchán kìtsajna-nò.

⁴ Nga tà jngoò ma naxandá-la Nainá; kò tà jngoò ma Inima Tsjeè-la Nainá; tikoá tà jngoò kjoá chiñá-lá nga Nainá xó kiichja-ná;

⁵ kò tà jngoò ma Na'èn-ná Jesucristo xi otíxoma-ná; tà jngoò kjoá tjín koni s'ín mokjeiín-ná it'aà ts'e Cristo; tikoáà tà jngoò kjoá tjín nga ma bautizar xita.

⁶ Ta jngoò ma Nainá nga ngats'iaá Na'èn-ná ma, jè xi otíxoma-ná nga ngats'iaá, jè xi síxájiin inima-ná nga ngats'iaá, kò jè xi tijnakò-ná nga ngats'iaá.

⁷ Tanga kitjoé-ná kjoá koni s'ín sasén-la Cristo mé xá-la Nainá xi s'eén nga jngoò jngoáá.

⁸ Koií kòs'ín tíchja-ne Xojon-la Nainá nga tsò:

K'e nga jye kisikijne nga tífmijìn-ne ngajmì,

kiikò preso jña xita xi kitsobà'ño,

kò kitsjaà-la kjoá jña xita.

⁹ ¿Kò tsòya-ne jè xi tsò: “Tífmijìn-ne ngajmì”? Tsòyaá-ne nga [jè Cristo] ítjòn itjojen skanda ñánda 'ño nanga jiin nangui.

¹⁰ Jè xi itjojen-t'aà skanda it'aà nangui, tijè-ne xi tsijin òjngoò k'a-ne ñánda nga isa 'ño 'nga tsibijna koni ngats'ì xi 'nga títsajna mé-ne nga jè sijnngoò yije-ne nita mé xi tjín isò'nde.

¹¹ Tikoá tijè-ne xi kitsjaà-la xá xita-la mé xá xi s'ín nga jngoò òjngoò. Tjín xi tsibíxáya-la Jesucristo nga sika'bísòn 'én ndaà-la; tjín xi jña kichja ngajo-la; tjín xi 'én ndaà-la Nainá xi kjoá ts'e Cristo benojmíya; tjín xi síkinda naxandá-la Nainá; tikoá tjín xi okóya 'én-la Nainá.

¹² K'oaá s'ín kitsjaà-la xá xita-la nga jngoò òjngoò mé-nè nga kàtatsjá-la kjohítsjeèn xita naxandá-la nga koma síxá-la Nainá, nga isa tse nga'ño s'e-la naxandá-la Cristo.

¹³ K'oaá s'ín koma-ne nga jngoò kjohítsjeèn s'e-ná ngats'iaá koni s'ín mokjeiín-ná it'aà ts'e Nainá kò koni s'ín yaxkoaán Ki'ndí-la mé-ne nga nguì xita kixi komaá. Nguì k'oaá s'ín kongásòn-kjoá kóhótjián koni jè Cristo nga nímé chijat'aà-la.

¹⁴ Mì tì k'oas'ín s'en-ná koni s'ín ndí ixti nga nìton mokjeiín-la yá xita xi konachan-la; nga fijen fikjako koni tsà tjo tísiskako; nga fitjngui-la kjohítsjeèn-la xita maña xi 'én ndiso okóya nga kjeíí ndiyá tjimaya.

¹⁵ Tà saá 'én kixi-la Nainá kinókjoáá nga matsjachaá xinguiáá mé-nè nga kòs'ín isa ndaà skasòn kjohítsjeèn-ná koni s'ín tjín kjohítsjeèn-la Cristo nga jè tjina xi skò-la naxandá-la Nainá.

¹⁶ Nga jè naxandá-la Nainá, k'oaá kji koni jngoò yijo-la xita. Jè Cristo tjina xi skò-la; kò jè tsjá-la nga jngoò òjngoò xá xi okò-la; ikjoàn síjngoò koni s'ín tjín yijo-ná nga títeya naxá-la nindaà-ná; nga jngoò òjngoò skaya, katjín katjín xá-la. K'e nga ndaà síxá yije yijo-ná maje-né koá ma'nga-né. K'oaá tìs'ín tjín jè naxandá-la Cristo nga koje-né koá kò'nga-né k'e nga jngoò òjngoò xita-la ndaà síxá nga matsjakeè xíjín.

Kòs'ín sijchá yijo-ná k'e nga jè Nainá síxítseya inima-ná kò kjohítsjeèn-ná

¹⁷ It'aà ts'e kjotíxoma xi tsjá-na Cristo, k'oaá xan-nò kò bit'in-nò nga mì tì k'oas'ín s'en-nò koni s'ín xita xi kjeíí xi mìkiì beèxkon Nainá, nga tákò tjimako kjohítsjeèn-la xi níméè chjì-la.

¹⁸ Tà tjíjño kjohítsjeèn-la. Tsjin-la kjoabinachon xi it'aà ts'e Nainá nchrobá-ne; mìkiì beè kó s'ín síjchá yijo-la nga jè inima-la tájaàjiin tjín; mìkiì tsjá'nde nga fahas'en-jiin kjohítsjeèn xi ndaà tsò.

¹⁹ Mì tì kiì beè-ne xi kjosobà 'mì, jyeé kòxox'ín. Tà kjoá chijngui 'ño sís'in-la; kjit'aà nachrjein ótsji ngats'ì kjoá ch'o xi tjín isò'nde.

²⁰ Tanga jño, mì k'oaá tjín kjoá xi kis'enojmí-nò it'aà ts'e Cristo.

21 Nga jye ndaà kina'ya-là 'én-la kò ndaà kichità'ya kó s'ín tjín xi nguì kjoa kixi it'aà ts'e Jesús.

22 K'oaá s'ín kis'enojmi-nò nga chjaàxiòn kjoa jchínga xi tjín-nò nga sa kjòtseé koni s'ín kinìjchá yijo-nò; i'ndeji jyeé mì tì mé chjí-la kjoa koi koi kjoa-la nga jña kjoa ch'o xi kisaseèn-la yijo-nò kiskoònachan-nò.

23 Tjí'nde-là Nainá nga jè kàtasíxitseya iníma-nò kò kjohítsjeèn-nò.

24 Chjoé ijngòò k'a xi kjoa xitse xi k'oas'ín kisindaà koni kji isén-la Nainá mé-ne nga kixi kò tsjeé sijchá yijo-nò koni s'ín tjín xi nguì kjoakixi.

25 K'oaá ma-ne i'ndeji, kì tì 'én ndiso nokjoà-nò. 'Én kixi tìnókjoakoo xinguiòo nga jngòò ijngòò nga tà ngàsòn xita xinguiáá ma kóhotjián.

26 Tsà k'e nga majti-nò, kì jé binchaàtsjioè; kì nìjti-là yijo-nò kóni nga 'ba nachrjein skanda k'e nga okatji ts'oi.

27 Kì kii bìi'nde-là xita neji nga jè konachan-nò.

28 Jè xi chijé s'ín nga sa ítòn, kì tì chijé s'ín-ne i'ndeji; tikoáá-ne k'oas'ín kàtasíkjeén tsja nga kixi kàtasíxá mé-nè nga sakò-la ton xi tsjá itsé-la xita ima xi nimé tjín-la.

29 Nijngòò 'én xi ch'o tsò nokjoà; jña 'én tìnókjoakoo xinguiòo xi ndaà tsò xi kochjeén-la xinguiòo nga isa kixi kítsajna mé-nè nga kochikon-t'in-ne jña xita xi kji'nchré-nò.

30 Kì nìba-là jè Iníma Tsjeè-la Nainá, jè xi tsibít'aà chiba-ná mé-ne nga kàta'ya-ná nga xita-la Nainá 'mì-ná skanda jè nachrjein k'e nga sikkítsajnadeji-ná Nainá xi kjoa ts'e jé.

31 Chjaàxiòn yije jjiin iníma-nò jña kjoa xi ch'o tjín xi kondra ts'e xita xi kjeí koni kjoa bínguitakòn, kjoajti, kjoa xi makjan-nò, kjoa nga chítikoo xinguiòo, kò nga nokjoàjno-là xinguiòo, kò ngats'ii kjoats'en.

32 Ndaà chibàkoo xinguiòo; kàtas'e-nò kjohimatakòn; tijchàat'aà-là jé-la xinguiòo koni s'ín kisikò-nò Nainá it'aà ts'e Cristo nga kisijchàat'aà-nò jé-nò.

5

Kó s'ín sijchá yijo-ná nga ixti-la Nainá 'mì-ná

1 K'oaá ma-ne nga k'oas'ín tijchá yijo-nò koni s'ín Nainá nga koi kjoa-la nga ixti-la Nainá 'mì-ná nga 'ñó matsjakeè-ná.

2 K'oaá tìs'ín tjòcha chaà xinguiòo koni Cristo tjòkeè kijtseè-ná nga jè kitsjaà ngajo-ná yijo-la nga k'en, jngòò kjotjò xi ndaà kjòtsjakeè Nainá.

3 Jè xi kjoa chijngui, ngats'ii kjoa ch'o xi 'ñó tjé tjín kò kjoa nga maxítakòn-chaà xinguiòo mì tì k'oaá tjín kjoa xi koxki-ne it'aà tsajòn. Nga jño, xita tsjeè-la Nainá 'mì-nò.

4 Kì 'én tsa'a nokjoà, kò 'én nchikón, kò 'én xi ch'o tsò nga bijnòkeè xita. Jña kjoa koi, tikoáá mikì ok'in-la nga kòs'ín kìnókjoaa. Tà saà kjondaà tji-là Nainá.

5 Jye tjiin-nò nga mikì koma kjoahas'en ñánda tíhotíxoma Cristo kò Nainá, ngats'ii xita xi kjoa chijngui s'ín, xi kjoa xi 'ñó tjé s'ín kò nga maxítakòn-keè xíkjin. Jña xita xi k'oas'ín s'ín, ta jña kjoa koi beèxkón nga nei-la ma.

6 Kì yá xita xi konachan-nò xi taxki 'én bénojmí-nò xi nimé chjí-la it'aà ts'e jé koi. Ta jè ngatji-la nga kjo'in tsjá-la Nainá jña xita xi mikì 'nchréñijon-la.

7 Kì yá tsjahijtakoo xita koi.

8 Jño, nga sa kjòtseé, jè kjohítsjeèn-nò tjiñò-la, tanga i'ndeji, jyeé iseèn titsajnaà nga Na'èn-ná Jesucristo titsajnakoo. K'oaá s'ín tijchá yijo-nò koni s'ín ok'in-la jña xita xi yá titsajna ñánda iseèn choòn.

9 K'e nga kjoa iseèn tjiin iníma-ná ndaà s'eén, ya kitjáyaá ndiyá kixi, koa nguì 'én kixi kìnókjoaa.

10 Tinchátsjioò mé kjondaà xi sasén-la Nà'èn-ná.

11 Kì ya chingàjñòò kjoa xi nímé chjí-la koni s'ín xita xi tjiñò kjoátsjeèn-la. Jñò, ta saà takó nga kàta'ya-la nga mìkì ndaà tjin kjoa xi s'ín.

12 Skanda masobà-ná nga nokjoá jña kjoa'ma xi ch'o tjin xi s'ín jña xita.

13 Nita mé kjoa-ne xi sijna ñánda iseèn choòn, nitoón beè xita mé kjoa-ne, a ndaà tjin, a xi mìkì ndaà tjin. Nga jè kjoa iseèn okó yije xi ndaà tjin ko xi mìkì ndaà tjin.

14 Koií kotsò-ne 'én xi tsò:

Ngaji xi titsajnafì, tikjaá-la yijo-lè.

Tisítjen-jiin-la mik'en;

jè Cristo sùhiseèn-lè.

15 Ndaà tikindaa koni s'ín titsanjchá yijo-nò; k'oaá s'ín titsajna koni xita xi tjin-la kjoachjine; kì k'oaá 'nè koni s'ín xi tsjin-la kjoátsjeèn.

16 Ndaà tikjeén nachrjein mé xi s'een; nga nachrjein i'ndeji, 'ñó tjin kjoa ch'o.

17 Kì ch'o onguikoo kjoátsjeèn-nò; ndaà kàtachiya-nò mé xi mejèn-la Nainá.

18 Kì xán 'yò, jè xán síkíts'ón-ná, tà saá jè Inima Tsjeè-la Nainá ndaà kàtas'en-jiin inima-nò nga kàtakó-nò ndiyá kixi.

19 Chikoo xinguioo 'én-la Nainá. Tijndá-là sò xi 'mì salmo, himno koa tijndá jjiin inima-nò jè xi okóya-nò Inima Tsjeè-la Nainá. Jeya tikijna Nainá nga ko inima-nò.

20 It'aà ts'e 'ín-la Nà'èn-ná Jesucristo, nachrjein nchijòn tji-là kjondaà Nainá xi Nà'èn-ná ngats'ii xi tsjá-nò.

Kjoa xi tjinè-la nga siikitasòn jña xita x'in ko jña íchjín

21 Nangui titsajna-là xinguioo koni s'ín yaxkón Cristo.

22 Jñò, íchjín xi x'in tjin-nò, nangui titsajna-là x'in-nò koni s'ín nangui bitsajna-là Cristo.

23 Nga jè x'in, jè xi sko tjina-la chjoón, koni Cristo, jè xi sko-la naxandá-la. Ko jè Cristo xi ochrjekàjiin kjo'in naxandá-la nga tijè-ne yijo-la.

24 Koni jè naxandá-la Cristo nangui tjina-la, k'oaá tis'ín jña íchjín, nangui kàtjina-la x'in-la nita mé kjoa-ne.

25 Jñò xi x'in mì-nò, titsjacha íchjín-nò, koni jè Cristo matsjakeè naxandá-la nga jè kitsjaàtji yijo-la nga k'en.

26 Koií kos'ín kis'iin-ne nga tsjeè siikijna naxandá-la nga nguixkon Nainá. Jè jaàxìn jé-la nga ko 'én ndaà-la koni s'ín xita nga onijno yijo-la,

27 mé-nè nga tijè kokò-ne nga tsjeè kji ko tijè skoétjò-ne nga ts'e koma, jngoò naxandá xi jeya tjina, xi mì ch'oó kji, mì tjiyó kji, mì tjé kji, jngoò k'a tsjeè kji, ko nímé jé tjin-la.

28 Tikoáá jè x'in kàtamatsjakeè chjoón-la koni s'ín matsjakeè xi ti yijo ts'e-ne; nga jè xi matsjakeè chjoón-la, tijè-ne yijo-la tímatsjakeè.

29 Njingoò xita xi tijè beètoòn-ne yijo-la; ta saá tsjá-la nga'ñó nga síkinda yijo-la koni s'ín jè Cristo nga síkinda naxandá-la.

30 Nga jè naxandá-la tijè-ne yijo-la; ko jña, tikoáá yaá nokjoàt'aà-ná yijo-la.

31 Koií kjoa-la nga k'oas'ín tíchja Xojon-la Nainá nga tsò: “Jè x'in xi bixan siikijna nà'èn-la ko nea-la nga kijnako chjoón-la. Ingajò, tà jngoò xita koma.”

32 Jña 'én koi, jngoò kjoa xi 'ñó 'in tjin skanda mìkì fiya-ná. Tanga 'an, jè tisikaxkia Cristo ko naxandá-la.

33 K'oaá xan-nò ngats'ioò nga jngoò ijngoò, titsjacha íchjín-nò koni s'ín matsjacha yijo-nò; ko jè chjoón kàteèxkón x'in-la.

6

Kjoa xi tjinè-la nga sükitasòn jñà ixti ko xita jchinga

¹ Jñò xi ixti 'mì-nò, tìná'yañijon-là xita jchinga-nò nga Cristo titsajnakoo. Koií kjoa xi kixi tjin.

²⁻³ Nga tsò jè Xojon-la Nainá: “Jchaxkoín na'èn-lè ko nea-lè, mé-nè nga ndaà kijna-ne koa tseé koma-lè i isò'nde.” Ngats'ii kjotixoma xi kitsjaà Nainá, jè jèe xi tsjá ítjòn jngoò-la kjondaà jñà xita xi sükitasòn.

⁴ Jñò xi na'èn 'mì-nò, ki ixti-nò nìjti-là; k'oaá s'ín tijchá nga ndaà tikixioo koa ndaà takóya-là koni s'ín mejèn-la Na'èn-ná.

Kjoa xi tjinè-la nga sükitasòn xi chì'nda 'mì

⁵ Jñò xi chì'nda maà, ndaà tükitasòn-là xi nei-nò ma i it'aà nangui; ndaà jchaxkón nga tijngoò takòn koni tsá xá ts'e Cristo titsa'nè.

⁶ Ndaà tixá-là nei-nò; mì tà k'e ndaà nixá k'e nga tímakinda nga tà jè nei-nò ndaà kitsajnakoo; k'oaá s'ín t'een koni tsá chì'nda-la Cristo maà nga nguì koò inima-nò tixá koni s'ín mejèn-la Nainá.

⁷ K'oaá s'ín tixá nga nguì ko kjotsja-nò koni tsá xá-la Na'èn-ná titsa'nè ko mìtsà ts'e xi taxki xita.

⁸ Ndaà 'yaà nga jngoò ljnngoò xita, Nainá, k'oaá s'ín tsjá-la chjí-la koni tjin xá xi s'ín, nas'ín xita chì'nda ko xi mìtsà xita chì'nda.

⁹ Jñò xi nei-la xá 'mì-nò, k'oaá tis'ín tjò t'een chì'nda-nò. Kì taxki chítikoo chì'nda-nò nga mejèn-nò kjo'in binè-là. Ndaà tjiin-nò nga jè Nei-la xita chì'nda-nò ko jè Nei-nò, tijé-ne xi tjina ján ngajmii. Nga jè, mìkii faájiiin xita; tà ngásòn fiko.

Kjoa xi tsjá-la nga'ño inima-ná

¹⁰ Jñò 'ndseé, jñà kjoa koi xi fehet'aà-ne; k'oaá xán-nò: Tinchátsjioò nga'ño ts'e inima-nò it'aà ts'e Na'èn-ná Jesucristo; 'ño titsajnakoo ngats'ii nga'ño xi 'ño tse tjin-la Cristo.

¹¹ Tisikoo yijo-nò, chjoé yije nga'ño xi tsjá-nò Nainá mé-nè nga tájaà titsajna-nò nga mì jè xita neii skónachan-nò. K'oaá ngaya-la koni jñà soldado nga 'ya yije kicha-la k'e nga fi kjojchán.

¹² Nga mìtsà jñà xita isò'nde titsabixkán-koaá. Jñà kondra-ná xi xitaxá ítjòn tjin-la ijiiin iseèn, jñà xi mìkii tsejèn, ngats'ii xi tjin-la kjotixoma ts'e xita neii, koa xi sko-la titsajna nga jñà otixoma isò'nde jñò, ngats'ii nga'ño-la xita neii xi tjíma ijiiin isén nga títtsa isò'nde.

¹³ Koií koxan-nò, chjoé yije nga'ño xi tsjá-nò Nainá mé-nè nga 'ño kitsajna-nò jè nachrjein k'e nga mejèn-la skónachan-nò xita neii. K'e nga jye sikijneè, tákó k'oaá s'ín kixi kincha-là nita mé kjoa-ne.

¹⁴ K'oaá s'ín 'ño kixi titsajnandaà; nguì 'én kixi tinókjoaa mé-ne nga kitsajnandaà kjoa ts'e xita neii koni s'ín jñà soldado nga 'ño bíkjá xincho-la [mé-ne nga mì sijiiti-la nikje-la k'e fi kjojchán]. Ko nguì kixi titsajnaá nga nguixkon Nainá mé-ne nga ndaà kójttsa inima-nò koni jngoò soldado xi ndaà kijttsa inima-la jè chrjoa xi 'mì coraza.

¹⁵ Kjit'aà nachrjein titsajnandaà nga sika'bió 'én ndaà-la Nainá mé-ne nga kátas'e-la kjoa'nchán jñà xita. K'e nga kos'ín s'een, 'ño kitsajnaà koni jngoò soldado nga tjin-la nga'ño xoxté-la nga ma fi.

¹⁶ K'e nga ndaà mokjeiin-nò it'aà ts'e Nainá, jè kosiko-nò xi kjoa ts'e xita neii k'e nga jè bí'tin-nò nga binchaàtsjioò jé; k'oaá ngaya-la koni s'ín jngoò soldado nga kjoé escudo-la, jè xi síkits'o ni'ín flecha xi títi-la xita neii.

17 Jè kjoa nga bitjokàjñoò kjo'in, jè ngaya-la jè tsí'nguién kicha xi osìko sko soldado. Koà jña 'én ndaà-la Nainá jè ngaya-la kicha ndojò xi tsjá Inima Tsjeè-la Nainá.

18 Kì bìkjoàn-là nga bìtsi'bà-là Nainá; tìjèt'aà kjit'aà-là koni s'ín bénojmiya-nò Inima Tsjeè-la Nainá. Kjit'aà nàchrjein titsajnaandaà; kì nìhindaà-jèn nga bìtsi'batjiò ngats'ìi xita naxandá-la Nainá.

19 Tìkoà titsi'batji-ná it'aà ts'an mé-nè nga Nainá tsjá-na 'én xi kichjà, koà mé-ne nga mìkì tsakjoòn-na k'e nga kènojmi-la xita jè 'én ndaà-la Nainá xi kjoa ts'e Cristo xi ochrjekàjìin-ná kjo'in mé-ne nga koma skoe-ne jè kjoa'ma xi tìjna-la Nainá skanda kjòtseé.

20 Nainá kisikasén-na nga 'an kichjà ngajo-la it'aà ts'e 'én ndaà-la; koií kjoa-la nga ndayá tìjna'ya; sìjèt'aà-nò nga titsi'batji-ná mé-ne nga mì tsakjoòn-na nga kènojmiá 'én ndaà-la.

'Én xi fehet'aà-ne

21 Tìsikasén-nò jè 'ndsé Tíquico jè xi matsjachaá, tìkoà ndaà síxá-la Nainá. Jè okitso yije-nò xi it'aà ts'an, kó s'ín tìjna, kò mé xi tìs'iaàn.

22 Koií xá tìsikasén-nò nga kènojmi-nò xi it'aà tsajen kós'ín titsajna-jen kò mé-ne nga kàtatsjá-nò nga ñó ts'e inima-nò.

23 Jè Nainá xi Na'èn-ná kò jè Jesucristo xi otíxoma-ná kàtasíkìjna 'nchán jìjìn inima-nò ngats'ioò xi xinguiáá chibá; kàtatsjá-nò kjondaà nga tjòcha t'een xinguiòo, nga mokjeiín-nò it'aà ts'e Nainá.

24 Jè kjondaà-la Jesucristo xi otíxoma-ná kàtìjnako ngats'ìi xita xi mìkì síkjahatjìya-la kjohìtsjeèn-la nga kjit'aà nàchrjein ndaà matsjakeè Na'èn-ná Jesucristo. K'oas'ín kàtama.

Xojon carta-la San Pablo xi kiski-la xita naxandá-la Cristo xi títsajna Filipos

Kó tsò Pablo nga síhixat'aà jñà xita naxandá-la Cristo xi títsajna Filipos

¹ Ngats'ioò xi títsajnaà ján naxandá Filipos xi xita-la Nainá maà nga Cristo Jesús títsajnakoo, tíkoa jñò xi níkitasòn xá nga níkindaa naxandá-la Nainá kò jñò xi nìchját'aà, 'an xi 'mì-na Pablo kò Timoteo títsanìhixot'aà-nòjen nga chí'nda-la Jesucristo 'mì-najen.

² Nainá xi Na'èn-ná, kò jè Jesucristo xi otíxoma-ná kàtatsjá-nò kjondaà kò kjoa'nchán ya ijìin inìma-nò.

Kó tsò Pablo nga chjat'aà-la Nainá it'aà ts'e xita Filipos

³ Jè Nainá xi 'an bexkoán, tsjaà-la kjondaà nga indiaà indiaà bítsjeèn-na it'aà tsajòn.

⁴ K'e nga indiaà indiaà chjàt'aà-la Nainá, 'ñó ndaà matsja-na nga ngats'ioò chjàtjì-nò,

⁵ koií kjoa-la nga jñò títsanìchját'aà-ná nga ma chjàya 'én ndaà-la Nainá xi kjoa ts'e Cristo tjen-ne jè nachrjein k'e nga kòkjeiín-nò skanda nachrjein i'ndeí.

⁶ 'An, k'oaá s'ín makixi-na nga jè Nainá, koni s'ín tsibíts'iaqo-nò nga tísíkjatjìya-la inìma-nò kò kjohítsjeèn-nò, skanda k'eé síjngoò-ne kjoa koi jè nachrjein k'e nga kjoíí ijngoò k'a Na'èn-ná Jesucristo.

⁷ Ndaà tjín nga k'oaá s'ín síkítsjeèn-nò ngats'ioò jñò xi 'ñó matsjake-nò nga ngàsòn kitjoé-nò kjondaà-la Nainá koni 'an; nga jñò títsanìchját'aà-ná nga ma benojmí-la jñà xita jè 'én ndaà-la Nainá xi kjoa ts'e Cristo nas'ín ndayá tjínaa iya, kò nas'ín xìn tjínaa nga ósikoaa jè 'én kò okoò-la xita nga 'én kixi-né.

⁸ Tíbeè Nainá nga kixií kjoa nga ngats'ioò, 'ñó matsjake-nò koni s'ín tjín jè kjoatjòcha xi 'ñó tse tjín-la Jesucristo.

⁹ K'e nga bítsi'batjì-nò, k'oaá s'ín síjèt'aà-la Nainá nga jè kjoatjòcha xi tjín-nò, isa ndaà títsjacha xinguiqo, isa ndaà kjohítsjeèn kàtas'e-nò kò isa ndaà kàtamachiya-nò ngats'iì kjoa xi kixií tjín,

¹⁰ mé-ne koma chjaàjìin-nò kjoa xi nguì ndaà tjín. K'oaá s'ín koma-ne nga tsjeè síjchá yijo-nò kò nímé jé sakòt'aà-nò jè nachrjein k'e nga kjoíí ijngoò k'a Cristo.

¹¹ Nga kàta'ya-la nga jñò, nguì kixií tjín kjoa xi 'nè nga kò nga'ñó xi tjín-la Jesucristo mé-ne jè Nainá jeya kíjna-ne kò 'nga kíjna.

Kó komà nga isa kjìn xita kòkjeiín-la 'én ndaà-la Nainá xi kjoa ts'e Cristo

¹² Ndí 'ndsé, mejèn-na nga ndaà kàtasijìin-nò nga k'oaá s'ín tímochjeén ngats'iì kjoa xi tímat'ian nga isa kjìn xita mokjeiín-la 'én ndaà-la Nainá xi kjoa ts'e Cristo.

¹³ Nga ngats'iì soldado xi síkinda ni'ya osen kò ngats'iì xita xi i'nga, tjíjìin-la nga koií kjoa-la 'én-la Cristo nga ndayá tjínaa.

¹⁴ Jñà xita xinguiáá xi 'ndsé chibá, nga nchibeè nga ndayá tjínaa'ya, kjìn ma-ne xi ma'ñó ikon, mì tí kiì tsakjón-ne it'aà ts'e 'én ndaà-la Nainá xi kjoa ts'e Cristo nga chjayajìin-la xita.

¹⁵ Kixií kjoa, tjín i'nga xita xi 'én-la Cristo chjaya ta koií kjoa-la nga machinikeè-na nga jè xi mejèn-la nga isa kjìn xita kjit'aà-la. Tanga tíkoaá tjín i'nga xi ndaà tjín inìma-la nga bénojmi kixií jè 'én-la Cristo.

¹⁶ Jñà xit̃a xi ndaà t̃jín iñima-l̃a, k'oaá s'ín bénoj̃mí nga matsjakeè-na, nga jyeé ndaà t̃jiĩn-l̃a nga Nainá ĩi kisik̃j̃na-na ndayá mé-ne nga 'an kichj̃at̃j̃ià 'én ndaà-l̃a Nainá xi kjoa ts'e Cristo.

¹⁷ Tanga jñà xit̃a xi i'nga, nga chjaya it'aà ts'e Cristo, mìtsà k̃o iñima-l̃a bénoj̃mí. Ta jè xi mejèn-l̃a nga kj̃in xit̃a kjit'aà-l̃a. K'oaá s'ín mejèn-l̃a nga isa tse kjo'in sikjiaán nga jye ndayá t̃j̃naa'ya.

¹⁸ Mìtsà mé-ne, tsà ndaá t̃jín iñima-l̃a nga okóya 'én ndaà-l̃a Nainá, k̃o tsà majin; mì 'aán oko-na. Ta jè xi mejèn-na nga kàtachjaya 'én ndaà-l̃a Nainá xi kjoa ts'e Cristo. K'oaá ma-ne nga tsja ma-na.

Mé xi 'ñó mejèn-l̃a Pablo

Nga tífi ñachr̃ein kotsjaá-isa-na,

¹⁹ koií kjoa-l̃a nga ngats'ĩi kjoa xi tíma, jyeé t̃jiĩn-na nga kijchò ñachr̃ein nga k̃it̃jokàj̃naà kjo'in koi-né nga jñò bìtsi'bat̃j̃i-ná k̃o nga tsjá-ná nga 'ñó Iñima Tsjeè-l̃a Cristo.

²⁰ Ta jè xi 'ñó mejèn-na k̃o t̃ikoña kjoa nga mì kosobà-na nga ch'o sík̃j̃na Cristo. Jè xi mejèn-na nga mì k̃i tsakjoòn-l̃a xit̃a nga ma kichj̃a-l̃a mé-ne 'an, tsà t̃j̃nakoan, k̃o nas'ín kiyá, jè Cristo jeya k̃j̃na it'aà ts'an.

²¹ 'An, nga t̃j̃nakoan, jè-né nga jeya k̃j̃na Cristo. K̃o tsà 'an kiyá, isaá-la ndaà s'e.

²² Tanga tsà takó kót̃j̃nakoan ĩ isò'nde, tsà koií ñachr̃ein-l̃a s'ĩin-isa xá-la Nainá. K'oaá ma-ne, mìk̃i be mé xi isa ndaà t̃jín.

²³ Ingajò kjoa koi 'ñó 'in ma-na; jòya t̃jín kjoh̃itsjeèn-na; mejèn-na nga k̃atiyaá mé-ne nga ya kót̃j̃nakoaa Cristo; nga isaá-la 'ñó ndaà s'e.

²⁴ Tanga xi kj̃ondaà tsajòn, isa 'ñó mochjeén nga kót̃j̃nakon isa.

²⁵ K'oaá s'ín beè-l̃a takoàn nga kót̃j̃nakon isa, nga k'oaá s'ín t̃j̃ngoò takoàn nga mochjeén-nò it'aà ts'an. Kót̃j̃naj̃in-nò mé-ne koma siichj̃at'aà-nò nga isa tsja koma-nò koni s'ín mokjeiín-nò k̃o nga isa ndaà k̃okjeiín-isa-nò.

²⁶ Mé-ne k'e nga kijchokon ĩjngoò k'a-nò, isaá tsja koma-nò nga isa 'nga sík̃j̃na Cristo Jesús koni s'ín osik̃o-na.

²⁷ Ta jè xi 'ñó mochjeén nga k'oas'ín t̃j̃chá yijo-nò koni tsò 'én ndaà-l̃a Nainá xi kjoa ts'e Cristo; mé-ne tsà koma k̃j̃kon-nò k̃o tsà mìk̃i koma k̃j̃ián, takó k̃j̃i'nchrè-ná nga kixi t̃itsajnakoo 'én, nga jngoó t̃jín kjoh̃itsjeèn-nò nga ngàsòn t̃itsabixkàn-t̃j̃iò koni s'ín mokjeiín-nò 'én ndaà-l̃a Nainá xi kjoa ts'e Cristo,

²⁸ nga mì tsakjoòn-l̃a jñà xit̃a kondra-nò. Koni s'ín t̃itsa'nè ngats'ĩi kjoa koi, k'oaá s'ín sijna koni jngoò ch̃iba xi okó nga jñà xit̃a kondra, kjoehesòn-né, tanga jñò, k̃it̃jokàj̃in-nò kjo'in. Kjoa koi, it'aà ts'e Nainá nchrobá-ne.

²⁹ Nga Nainá t̃ikoaá tsjá-nò kj̃ondaà nga kjo'in t̃itsañikjioón xi kjoa ts'e Cristo koni s'ín kitsjaà-nò kj̃ondaà nga k̃okjeiín-nò 'én ndaà-l̃a.

³⁰ Nga jñà kjoa xi t̃j̃in-nò i'ndẽi, t̃j̃j̃nà-ne xi 'an kis'e-na koni s'ín ki'yaà jñò, k̃o takó koií kjoa t̃j̃in-na skanda ñachr̃ein i'ndẽi koni s'ín t̃itsana'ya.

2

Kjoh̃itsjeèn xi kis'e-l̃a Cristo nga nangui kisik̃j̃na yijo-l̃a ĩ isò'nde

¹ Jñò, nga Cristo tsjá-l̃a nga 'ñó iñima-nò, k̃o nga jè kjoat̃jòcha síje takòn-nò, k̃o nga jè Iñima Tsjeè-l̃a Nainá ndaà sík̃itsajnajt̃in-nò nga ñixákjoò, k̃o nga ngui k̃o iñima-nò t̃j̃in-nò kjoh̃imatakòn,

² k'oaá ma-ne nga síjé-nò nga ta jngoò kjoh̃itsjeèn k̃atas'e-nò, jngoò kjoat̃jòcha, ngàsòn t'è-là takòn, k̃o ngàsòn chibà-nò mé xi ñik̃itsjeèn mé-ne nga isa ndaà kotsja-na.

³ Kì kjoa 'nga takòn onguíchjaà, k̃o k̃i 'nga ñik̃itsajna yijo-nò. Ta saá nangui t̃ik̃itsajna yijo-nò, k'oaá s'ín jchaxkón xit̃a xi kj'eíi koni tsà jñà t̃itsajna ítjòn.

⁴ Kì ta koi nìkájno xi kjondaà tsajòn. Tìkoáá tìkájno-nò mé xi mochjeén-la xìta xi k'ejí.

⁵ K'oaá t́ín kjohítsjeèn xi kátas'e-nò koni t́ín kjohítsjeèn xi t́ín-la Cristo Jesús.

⁶ Nas'ín t́ijè sobà-ne Nainá, mìtsà kòs'ín kisikítsjeèn nga kjo'ño mejèn-la nga kòs'ín ḱjna koni s'ín t́jna Nainá.

⁷ Ta saá 'ño nangui kisiḱjna yijo-la nga kòs'ín tsib̀jna koni jngoò xìta chi'nda, koni xi taxkì xìta isò'nde.

⁸ K'e nga jye taxkì xìta komà, kisikajeén-la inìma-la nga ndaà kisikitasòn yije-la Nainá skanda kó nga k'en nga ya kinik'en-t'aà krò.

⁹ K'oaá ma-ne, Nainá, k'e nga jye kisikjaáya-la, taxkì 'ño 'nga kisiḱjna. Kitsjaà jngoò-la 'ín xi isa 'ño 'nga t́jna mé-ne jè kotìxoma yije-la xìta.

¹⁰ Mé-ne nga it'aà ts'e Jesús kìncha-xkó'nchi-la ngats'ì xi títsajna ngajmì, xi títsajna ì it'aà nangui, kò xi títsajna j̀ìn nangui.

¹¹ K'oaá s'ín kítso ngats'ì xìta nga Jesucristo, jè xi otìxoma; k'oaá ma-ne nga jeya ḱjna Nainá xi Nà'èn-ná.

Mé xi s'een nga ixti tsjeè-la Nainá 'mì-ná

¹² K'oaá ma-ne, j̀nò ndí 'ndsè xi 'ño matsjake-nò, k'e nga tsohótijnako-nò, kjit'aà nachrjein ndaà kinikitasòn. I'ndeì nga k̀ìn t́jnaa, tákò k'oas'ín ndaà t́kitasòn. K'oas'ín t'een nga kàta'ya-nò nga jyeé itjokaj̀nò kjo'in kjoa ts'e jé-nò koií kjoa-la nga 'ño tsakjoòn-chaà yijo-nò.

¹³ Nga jè Nainá xi ndaà tíxájiìn inìma-nò. Jè síkítsjeèn-nò nga k'oaá s'ín mejèn-nò koni s'ín ndaà sasén-la Nainá kò t́ijè-ne xi tsjá-nò nga'ño nga ma k'oas'ín 'nè.

¹⁴ Ndaà t'een yije nìta mé kjoa-ne; kì taxkì tsajét'aà-là Nainá kò kì chitiya-nò nìta mé kjoa-ne.

¹⁵ K'oaá s'ín koma-ne nga ixti tsjeè-la Nainá k'oín-nò; nìmé jé s'e-nò nga títsajnajiìn-là xìta ts'en kò xi ch'o s'ín; j̀nò, k'oaá s'ín kàta'ya-nò koni ni'ín-la ni'ño xi síhiseèn ñánda j̀nò choòn.

¹⁶ Tìka'bísòn 'én ndaà xi síkíjnakon inìma-ná, mé-ne jè nachrjein k'e nga kjoíì j̀ngoò k'a Cristo, ndaà kòtsja-na nga mìtsà ta kjotjò koni s'ín kis'iaàn nga 'ño kisixájiìn-nò nga tsakoòya-nò 'én ndaà-la Nainá xi kjoa ts'e Cristo.

¹⁷ An, matsjaá-na kò síjngoàà kjòtsja xi t́ín-nò nas'ín kjo'in t̀sìkjaán koni j̀nò nga kjo'in títsanìkjoón nga koií kjoa-la nga mokjeíìn-nò it'aà ts'e Cristo. Kjo'in xi t́ín-nò k'oaá ngaya-la koni jngoò kjotjò xi j̀nò 'biì-là Nainá, kò jè kjo'in xi 'an t́ín-na tìkoáá 'an tsjaà-la Nainá koni kjotjò tsajòn.

¹⁸ J̀nò, k'oaá t̀s'ín kàtatsja-nò mé-ne kojngoò-ne kjòtsja xi t́ín-ná.

It'aà ts'e Timoteo

¹⁹ K'oaá s'ín tísíkítsjeèn, tsà Nà'èn-ná Jesús mejèn-la nga síkasén nìton-nò Timoteo, mé-ne 'an kòtsja-na k'e nga kjoíìko-na okixì it'aà tsajòn kòs'ín títsajnaà.

²⁰ Mì tì yá xìta t́ín isa-na xi k'oas'ín ngàsòn síkájno it'aà tsajòn koni jè Timoteo.

²¹ Ngats'ì xìta xi k'ejí, saà kjondaà ts'eé ótsji, mìkìl ótsji xi kjondaà ts'e Cristo.

²² J̀nò, jyeé ndaà t́jiìn-nò, jè Timoteo xìta kixì-né. Ndaà síchját'aà-na it'aà ts'e 'én ndaà-la Nainá xi kjoa ts'e Cristo, k'oaá ngaya-la koni tsà k'í'ndí ts'an-ná.

²³ Tìkoña kjoa-ná nga síkasén-nò Timoteo k'e nga skoeè kòs'ín s̀indaàjiìn kjoa-na.

²⁴ Tanga jè Nà'èn-ná ma'ñót'aà takoàn, nga tsjá'nde-na nga tìkoá 'an koma ḱikon nìton-nò.

It'aà ts'e Epafrodito

²⁵ Tanga k'oaá s'ín kisikítsjeèn nga ítjòn siikasén ìjngò k'a-nò jè 'ndsè Epafrodito. Ndaà kisixáko-na. K'oaá s'ín tsajmeiiko-na koni jngò soldado nga bixkàn-tji-jen 'én-la Nainá. Nainá kàtíhjí-nò nga kinikasén-ná k'e nga 'ño tímochjeén-na. Ndaà kisìhjíat'aà-na.

²⁶ I'ndeí, mejèn-la nga skoexkon-nò ngats'ioò, 'ño tísikájno nga jñò jyeé kina'yà nga kjòxk'én-né.

²⁷ Kixíi kjoa nga kjòxk'én-né, kjomeé k'en. Tanga Nainá kjòhímakeè; mìtsà ta jè xi kjòhímakeè, koó 'an, mé-ne nga mì ìsa tse kjoaba s'e-na.

²⁸ K'oaá ma-ne nga tìsikásén nìton-nò, mé-ne k'e nga jchaxkoòn ìjngò k'a, kotsja-nò it'aà ts'e, koa 'an, tjáxin chiba-na kjoaba.

²⁹ Chjoétjò nga ko kjotsja-nò nga 'ndseé chibá it'aà ts'e Na'èn-ná. Chaxkón yije xi ngàsòn ok'in-la koni jè.

³⁰ Koií kjoa-la it'aà ts'e xá-la Cristo nga kjomeé k'en. Jè kjoa xi jñò mìkì komà kinìhjíat'aà-ná, jé Epafrodito, 'ño tsibínè-la yijo-la nga ndaà kisìhjíat'aà-na nas'ín kjomeé k'en.

3

Mé kjoa xi ìsa 'ño chjí-la nga kixi kítsajnaá nguixkon Nainá

¹ Ndí 'ndsè, k'oaá xan-nò, tsja t'è-là inìma-nò nga Na'èn-ná Jesús tìtsajnakoo. 'An, mìkì masii-na nga tikjì ìjngò k'a-nò jñà kjoa xi jye kòkjìn k'a kjìi-nò nga kjondaà tsajòn-nò.

² Tikindaá yijo-nò it'aà ts'e jñà xita xi kjo'ño mejèn-la nga otet'aà yijo-la xita nga bit'aà chiba-la kjoa ts'e circuncisión. Tikindaá xita koi nga nìmé chjí-la. Tikindaá nga 'ño ch'o s'ín.

³ Jñá-ná xi nguì kixi kjoa nga tjít'aà chiba-ná nga 'ya-la nga xita-la Nainá 'mì-ná. Jñá-ná xi ndaà yaxkoán Nainá nga jè Inìma Tsjeè-la síhjíat'aà-ná. 'Nó ndaà matsja-ná nga jè ma'ñót'aà takoán Cristo Jesús nga mìtsà jè kjoa ts'e yijo-ná ma'ñót'aà takoán.

⁴ 'An, mìtsà kjoa ts'e yijo-na ma'ñót'aà takoán nas'ín kìn skoya kjondaà kisikitasoàn. Tsà tjín i'nga xita xi koi ma'ñót'aà takòn kjondaà xi tjín-la, tanga 'an mì k'oaá s'ín tìs'iaàn nas'ín tsato kìn skoya kjondaà kisikitasoàn.

⁵ K'e nga tjín-la jìn nachrjein nga kits'ian, kisit'aà chiba-na kjoa ts'e circuncisión. 'An, xita Israel-ná, tje-la Benjamín-ná. Xita Hebreo-ná, ko jñà xita jhínga-na nguì xita Hebreo-né. 'An, nguì xita fariseo-ná nga jñà kjotíxoma-la xita judío nguì ndaà kisikitasoàn.

⁶ Nga 'ño fit'aà-la koni s'ín tjín kjotíxoma-la xita judío, 'an skanda kùtjìngui kondraá-la xita naxandá-la Cristo. 'An, nguì kixíi kisikitasoàn kjotíxoma-la xita judío, nijngò xi mìkì ndaà kisikitasoàn.

⁷ Nga sa ítjòn, 'an, k'oaá s'ín kisikítsjeèn nga 'ño tse chjí-la ngats'ìi kjoa koi; tanga i'ndeí nga Cristo fit'aà-la nìmé chjí-la kjoa koi.

⁸ Xi nguì okixi, ngats'ìi kjoa xi 'an ma'ñót'aà takoán nga sa kjòtseé, i'ndeí, k'oaá s'ín beè takoán nga nìmé chjí-la mì k'oaà-ne koni s'ín bexkoan Cristo Jesús xi otíxoma-na nga ìsa 'ño tsato chjí-la. Ngats'ìi kjoa koi, jyeé tsachrjen-guía yije xi kjoa-la Cristo. Ta tje beè takoán mé-ne nga ya ma fit'aà-la Cristo

⁹ ko mé-ne nga ya kótijnakjoòkoa. Nga kixi ótìjna nga nguixkon Nainá, mìtsà koi kjoa-la nga 'an ndaà sikitasoàn kjotíxoma-la xita judío, koi-né nga mokjeiín-na it'aà ts'e Cristo. Jè Nainá xi kixi síkìjna-na koií kjoa-la nga mokjeiín-na.

10 Mejèn-na nga isa ndaà skoexkoan Cristo; skoeè nga'ño xi tjín-la nga jaáya-la it'aà ts'e kjoabiyaà; kàtamajngò kjohítsjeèn-na kò ts'e Cristo koni s'ín komàt'in nga kisikjeiín kjo'in skanda k'e nga k'en,

11 mé-ne k'oa tís'ín kjoáya-na it'aà ts'e kjoabiyaà koni s'ín jaáya-la Cristo.

Mé xi s'ín Pablo nga ma kijchò tjingui-la kjotjò xi tsjá Nainá

12 Mìtsà tsò-ne kjoa nga jye kjòngàsòn yije-na kjoa koi. Kj'eè tsà nguì xita kixi 'mì-na. Tanga tífi tjingui-la nga mejèn-na nga isa ndaà skoexkoan skanda kó nga kijchò tjingui-la mé kjoa-ne nga ijchò tjingui-na Cristo Jesús.

13 Ndí 'ndsè, k'oaá s'ín machiya-na, kj'eè kiì bijchó tjingui yije-la kjondaà xi tjín-la Cristo. Tanga jngoò kjoa tís'iaàn, tìsjcháajñaà yije kjoa xi jye tsato, tìbínè-la yijo-na nga kijchò tjingui-la kjoa xi sa nchrobá.

14 Tífi tjingui-la skanda ñanda fehet'aà-ne, mé-ne nga tjoé-na kjotjò xi Nainá tsjá-na nga xó kiichja-na Nainá ján ngajmiì nga Cristo Jesús tijnakoaa.

15 Ngats'iaá xi jye ndaà mokjeiín-ná it'aà ts'e Cristo, ngàsòn ngáya k'oas'ín sikítsjeén. Jñò, tsà mìkiì k'oas'ín nikítsjeèn, Nainá sikkichiyandaà-nò.

16 Tanga mochjeén-né nga k'oas'ín sikitasoán koni kji jye machiya-ná skanda nachrjein i'ndeì.

17 Ndí 'ndsè, k'oaá s'ín tijchá yijo-nò koni s'ín tìsjchá yijo-na. Chjinguì-là jña xita xi k'oas'ín ndaà nchisíjchá yijo-la koni s'ín tìtsa'nè-jen.

18 Nga kjìn ma xita xi tjíma xi kondra fi tjingui-la jè 'én xi tís'enojmíya nga krò k'en-t'aà Cristo. Kòkjìn k'a k'oa xan-nò; i'ndeì skanda koó ndáxkoaàn tibixteèn nga ijngoò k'a k'oa tixan-nò.

19 Xita koi, k'e nga kjoehet'aà nachrjein-la, kjo'iín sikkjeiín nita kjé-ne. Ta koií ótsji kjoa xi síjé yijo-la kò mìtsà Nainá ótsji. 'Nga sikítsajna yijo-la kjoa xi tjínè-la nga kosobà-la. Tà koií sikítsjeèn kjoa ts'e isò'nde.

20 Tanga jña, ján i'nde-ná ngajmiì. 'Ñó ndaà tìtsachiñá-lá nga ya kjinchrobà-ne jngoò xi kochrjekajin-ná kjo'in, jè-né Jesucristo xi otíxoma-ná.

21 Jè sikkjatjya-la yijo ni'nde-ná; k'oaá kji koma koni kji ts'e jè, nga jeya kji. Jè sikkjeén nga'ño xi tjín-la nga jè otíxoma yije-la nita mé xi tjín.

4

Mé xi s'én nga jye kixi tìtsajnaakoá Cristo

1 K'oaá ma-ne jñò ndí 'ndsè xi 'ño matsjake-nò, kò nga 'ño makájno-na nga mejèn-na skoexkon-nò, kò nga nìtsja-là inima-na, kò jñò xi kjotjò-na ma it'aà ts'e xá-na, k'oaá xan-nò nga kixi tìtsajnakoo Na'èn-ná, jñò xi 'ño matsjake-nò.

2 Tìbitsi'bà-la jè Evodia kò Síntique, nga ngàsòn ndaà kàtjiko xíkjín nga ndichja joó xi it'aà ts'e Na'èn-ná.

3 Tìkooá ngaji ndí 'ndsè xi ngàsòn taña nìxá, tìsjét'aà-lè, tìchját'aà-la íchjín koi; nga ndaà kisixáko-na it'aà ts'e 'én ndaà-la Nainá xi kjoa ts'e Cristo. Kò jè Clemente kò xita xi i'nga tìkooá ndaà kisixáko-na. Xita koi, jye tjít'aà 'ín-la xojon ts'e kjoabinachon ján ngajmiì.

4 Tsja t'è-là inima-nò nga Na'èn-ná tìtsajnakoo. Ijngoò k'a k'oa xan-nò: ¡Tsja t'è-là takòn!

5 Jñò, kàtabeè yije-nò xita nga xita ndaà 'mì-nò. Jyeé tímachraña nga kjoíí ijngoò k'a Na'èn-ná.

6 Kì mé kjoa nikájno. Ta isaá tijét'aà-là Nainá k'e nga mé xi mochjeén-nò. Tìkooa tjiì-là kjondaà.

7 K'oaá s'ín koma-ne nga tsjá-nò kjoa'nchán Nainá. Jè kjoa'nchán xi tsjá-nò fahatonè-la koni s'ín bítsjeèn-la xita. Kjoa'nchán jè, jè xi sikkinda inima-nò kò kjohítsjeèn-nò nga Cristo Jesús tìtsajnakoo.

⁸ Ndí 'ndsè k'oaá xan-nò xi fehet'aà-ne. Tíkítsjeèn xi kjoa kixi, kjoa xi ndaà yaxkón, kjoa xi ndaà tjín nga nguixkon Nainá, kjoa xi tsjeè tjín, kjoa xi ndaà sasén-ná, kò ngats'ìi kjoa xi ndaà na'yà-la. Kò tsà tjín-ìsa kjoa xi kj'eíi xi 'ño ndaà tjín, xi ok'in-la nga 'nga kítsajna, koií kjoa tíkítsjeèn.

⁹ K'oas'ín t'een koni s'ín tsakoòya-nò okixi xi 'an kitsjaà-nò, 'én xi kina'yá-ná, koni s'ín ki'ya-ná nga kis'iaàn; tákó k'oas'ín t'een. Nainá xi tsjaà-la kjoa 'nchán inima-ná, jè kíjnakò-nò.

Kjondaà-la ts'e xita Filipos it'aà ts'e Pablo

¹⁰ 'Ñó matsja-na koni síko-na Na'èn-ná nga ijchò nàchrjein, ìjngò k'a kiníkítsjeèn-ná. 'An k'oaá s'ín síkítsjeèn nga mìtsà kinìjchàajñoò xi it'aà ts'an, tà jè-né nga mìkiì xátì kitjò'nde-nò nga kinìchját'aà-ná.

¹¹ Mìtsà koi kjoa-la nga k'oatìxan-nò tsà mé tsojmì xi chijat'aà-na. Jyeé kjò'nga-na nga majngòò takoàn mé xi tjín-na.

¹² Be-ná kó ma nga imà tísíjchá yijo-na. Tíkooá be-ná kó ma k'e nga tjín-na tsojmì. Jye tìbe nìtá mé kjoa xi tímat'ian. Tìjé-na tsà skii tjína ìndso'bà, kò tsà kjinchrá tìbiyàà, tsà ningui-na tsojmì kò tsà nìmé tsojmì tjín-na.

¹³ Koma yijee-na nìtá mé kjoa-ne nga jè Cristo tsjá-na nga'ño.

¹⁴ Tanga jño, tákó ndaà ki'nè-nò nga kinìchját'aà-ná k'e nga kjoa tìjnajñaà.

¹⁵ Jño xi naxandá Filipo tsajòn, tìjìn-nò nga ta jño-nò xi kinìchját'aà-ná mé xi kjòchjeén-na, jè nàchrjein k'e nga kiaà nangui Macedonia k'e nga sa tsibìts'iaa nga kichjàkò-nò 'én ndaà-la Nainá xi kjoa ts'e Cristo. Nìjngòò naxandá-la Cristo xi kj'eíi xi ma-la kisìchját'aà-na.

¹⁶ Tíkooá k'e nga tsohótijna naxandá Tesalónica, jngòò jò k'a kinìkasén-ná kjotjò xi kjòchjeén-na.

¹⁷ Mìtsà mé kjotjò tsajòn xi mejèn-ìsa-na, ta jè xi mejèn-na nga ìsa ndaà kàtasìchikon-t'ín-nò Nainá.

¹⁸ Jyeé kiskaat'aà yije-na ngats'ìi xi kinìkasén-ná. Jyeé tjín yije-na xi mochjeén-na skanda ninguii-na nga jyeé j'ìiko-na nga'ño xi kinìkasén-ná kò Epafrodito. Kjotjò xi kinìkasén-ná k'oaá s'ín ngaya-la koni chrjongó-la Nainá xi 'ño ndaà jne, jña kjotjò xi 'ño ndaà sasén-la Nainá.

¹⁹ K'oaá ma-ne, jè Nainá xi 'an kjit'aàtakoàn, tsjá yije-nò nìtá mé xi chijat'aà-nò koni s'ín jeya tjín kjoa nchíná xi tjín-nò nga Cristo Jesús tìtsajnakoo.

²⁰ Jè Nainá xi Na'èn-ná, jeya kàtijna nìtá mé nàchrjein-ne, nìtá mé nó-ne. K'oas'ín kàtama.

Xi fehet'aà-ne, Pablo síhixat'aà xita Filipos

²¹ It'aà ts'an, tìixat'aà yije jña xita naxandá-la Cristo xi ya tìtsajna. Jña xita 'ndseé xi ì tìtsajnakò-na, tíkooá nchisìhixat'aà-nò.

²² Ngats'ìi xita-la Cristo síhixat'aà-nò. Jña nchisìhixat'aà ítjòn-nò xi tìtsajna ni'ya-la César xi xitaxá ítjòn ts'e Roma.

²³ Ngats'ioò, jè kàtìjnakò-nò kjondaà-la Jesucristo xi otìxoma-ná. K'oas'ín kàtama.

Xojon carta-la San Pablo xi kiski-la xita naxandá-la Cristo xi títsajna Colosas

Kó tsò Pablo nga síhixat'aà jñà xita naxandá-la Cristo xi títsajna Colosas

¹⁻² Jñò xi xita naxandá-la Cristo 'mì-nò xi ján títsajnaà naxandá Colosas nga kixi onguít'aà-là Cristo, 'an xi Pablo 'mì-na kò 'ndsè Timoteo títsajnihiot'aà-nòjen nga 'an tsibíxáya-na Jesucristo nga k'oas'ín kjòmejèn-la Nainá. Nainá xi Nà'èn-ná, kò jè Jesucristo xi otíxoma-ná kàtatsjá-nò kjondaà kò kjoa'nchán ya ijìin inima-nò.

Kó tsò Pablo nga tsjá-la kjondaà Nainá

³ Kjit'aà nachrjein k'e nga nokjoat'aà-lajen Nainá xi it'aà tsajòn, 'bii-lajen kjondaà Nainá xi Nà'èn-la Jesucristo jè xi otíxoma-ná.

⁴ Koií kjoa-la ngajen jyeé k'oas'ín kina'yà-jen nga ndaà mokjeíin-nò it'aà ts'e Cristo Jesús. Tíkoa matsjacha ngats'ii xita-la Nainá.

⁵ Koií k'oas'ín 'nè-nò nga títsachiñá-là nga tjoé-nò kjondaà xi tíjnatjò-la Nainá ján ngajmii; koni s'ín kjòchíya-nò k'e nga kina'yà 'én ndaà-la Nainá xi kjoa ts'e Cristo xi nguì kjoakixi.

⁶ Tjje-ne jè 'én ndaà-la Nainá xi kjoa ts'e Cristo xi jye k'oas'ín kina'yà, 'ñó tínokjoáya nga títsa isò'nde kò 'ñó kjin xita nchifatjìya-la kjohítsjeèn-la koni s'ín komàt'ioòn jñò k'e nga jahatjìya-la kjohítsjeèn-nò nga jahas'en-jìin-nò kjondaà-la Nainá xi nguì kjoakixi.

⁷ K'oáá s'ín tsakóya-nò Epafras jè xita xi matsjacha-jen nga taña nixákjoè-jen it'aà ts'e Nainá; nga jè Epafras, jngoò chí'nda-la Cristo xi kixi síxá xi it'aà tsajòn.

⁸ Jyeé tsibénojmí-najen nga jè Inima Tsjeè-la Nainá síkítsjeèn-nò nga ndaà matsjacha xita.

⁹ K'e nga kina'yà-jen, mìkii nìjchàajìin-jen nga bìtsi'batjì-nòjen. K'oáá s'ín nìjèt'aà-lajen Nainá nga nguì ndaà kàtasíchiya-nò koni s'ín mejèn-la jè; jè Inima Tsjeè-la kàtatsjá-nò kjohítsjeèn kò kjoachjine.

¹⁰ Tíkoaá nìjèt'aà-lajen nga k'oas'ín tíjchá yijo-nò koni s'ín ok'in-la nga síjchá yijo-la xi xita-la Nainá, nga kjit'aà nachrjein k'oas'ín t'een koni s'ín mejèn-la, nga k'oas'ín t'een ngats'ii kjoa xi ndaà tíjín kò nga isa ndaà jchaxkon yá-né xi Nainá.

¹¹ K'oáá tíjín nìjèt'aà-lajen Nainá nga tse nga'ñó kàtatsjá-nò koni s'ín tíjín nga'ñó-la xi mìkii fehet'aà, mé-ne nga kixi kítsajna-nò nita mé kjoa xi sakò-nò, tíkoa s'e-nò kjoatsejta kò kjotsja.

¹² Tjii-là kjondaà Nà'èn-ná nga jè kisiíkítsajnaandaà-nò nga tíkoa tjoé-nò kjotjò xi jè jye tíjindaà-la ján ngajmii ñánda iseèn choòn nga tsjá-la ngats'ii xita-la xi ya chá-ne naxandá-la Nainá.

¹³ Nainá kisiíkítsajnadeíí-ná it'aà ts'e nga'ñó-la xita neíí jè xi otíxoma ñánda jñò choòn; yaá kisiíkítsajna-ná ñánda tíhotíxoma Ki'ndí-la xi 'ñó matsjakeè,

¹⁴ jè xi kò jní-la tsibíchítjì-ná nga kisiíkítsajnadeíí-ná tíkoa kisiíjchàat'aà-ná jé-ná.

Jè Cristo tíjna ítjòn-la ngats'ii xi tsejèn kò xi mìkii tsejèn

¹⁵ Nì saá jngoò xita beèxkon Nainá tanga jè Ki'ndí-la tsakó-la xita yá-ne xi Nainá. Nga jè Ki'ndí-la xi tíjna ítjòn-la ngats'ii xi kisindaà isò'nde.

¹⁶ Nga kò Cristo, Nainá tsibíndaà yije xi tíjín ngajmii kò xi tíjín i it'aà nangui, xi tsejèn kò xi mìkii tsejèn, ngats'ii nga'ñó xi tíjín ijìin isén, xi títsajna ítjòn, xi

otíxoma, xi xá ítjòn tjin-la, kò jñà nga'ño xi mìkì tsejèn-ná; ít'aà ts'eé Cristo kisindaà yije-ne kò ts'e-né.

¹⁷ Cristo, isaá kjòtseé tjna mì k'oa-ne ngats'ii tsojmì xi tjin, kò jè tsjá-la nga'ño ngats'ii tsojmì mé-ne nga ndaà kitsajna-ne.

¹⁸ Jè Cristo tjna sko-la naxandá-la nga tijè-ne yijo-la kò ít'aà ts'eé kjòts'ia-ne. K'e nga jaáya-la Cristo ít'aà ts'e kjoabiyaà, jè tsibìjna ítjòn-la ít'aà ts'e xita xi faáya-la mé-ne nga jè kína ítjòn-la nita mé xi tjin.

¹⁹ Nainá k'oaá s'ín kisaseèn-la nga jngoò k'aá ya tsibìjnajìn yijo-la Cristo,

²⁰ nga ít'aà ts'eé Cristo, Nainá tsajoóndaako yije-ne ngats'ii xi tjin isò'nde kò xi tjin ngajmì; ít'aà ts'e jní-la Jesucristo xi kixixteèn ján ít'aà krò, Nainá kisikijne 'nchán kjoa.

²¹ Jñò, nga sa ítjòn, tikoáá titsajnat'aaxìn-la Nainá; kondraá tsanguì-la ya jjin inima-nò, koií kjoa-la nga ch'o tjin kjoa xi ki'nè.

²² Tanga i'ndeì jyeé ndaà tsajoókò-nò Nainá koií kjoa-la jè kjo'in xi kisikjeín Cristo i ít'aà nangui k'e nga k'en. Koií k'oas'ín kis'ìn-ne mé-ne nga tsjeè kitsajnaà-nò, kò nímé jé xi s'e-nò kò nímé xi ch'o kíjõnguio nga nguixkon Nainá.

²³ Kjoa koi mochjeén-né nga kixi titsajnakoo koni s'ín mokjeín-nò. Kò kì binchat'aaxìn-la kjoa xi titsachiñà-la ít'aà ts'e 'én ndaà-la Nainá xi kjoa ts'e Cristo, 'én xi jye kina'yà-la. Jè 'én jè, xkì xi ján tìnokjoàyajìn-la xita kóhokji isò'nde; kò 'an xi 'mì-na Pablo, 'aán kjòngatsja nga okoòya 'én.

Xá-la Pablo

²⁴ I'ndeì matsjaá-na nga kjo'in tìsikjaán xi kjoa tsajòn nga k'oaá s'ín tísìjngoà jjin yijo-na koni s'ín chijat'aà-na kjo'in xi kitsjaà-na Cristo xi kjondaà ts'e naxandá-la nga tijé-ne yijo-la.

²⁵ 'Aán tísìkjeén-na Nainá nga 'an tìsìxákoa naxandá-la, xá xi kisìngatsja-na xi kjondaà tsajòn nga nguì ndaà kènojmiá 'én ndaà-la,

²⁶ jè 'én xi tjna'ma-la Nainá nga tisa tàts'en-la kjoa, tanga nachrjein i'ndeì, Nainá jyeé tsakó-la xita-la.

²⁷ Jè Nainá k'oaá s'ín kjòmejèn-la nga tsakó-la jñà xita-la kó s'ín tjin kjoa'ma-la xi 'ño jeya tjna xi kjondaà ts'e xi mìtsà xita judío. Jè kjoa'ma, jè-né nga jè Cristo tijnajìn inima-nò jñò xi mìtsà xita judío 'mì-nò, k'oaá ma-ne nga titsachiñà-la jñò kjoajeya-la Nainá xi tsjá-nò ján ngajmì.

²⁸ K'oaá s'ín nokjoàyajìn-lajen ngats'ii xita ít'aà ts'e Cristo; 'ño nokjoàko-jen nga nguì kò kjoachjine okoòya-lajen mé-ne nga ngats'ii xita xi fit'aà-la Cristo nímé chijat'aà-la jè nachrjein k'e nga ngajen sìnngatsja-jen nga nguixkon Nainá.

²⁹ K'oaá ma-ne nga 'ño tìbìnè-la yijo-na nga tìsìxá, tìsikjeén jè nga'ño xi tsjá-na Cristo.

2

¹ Mejèn-na nga ndaà kàtasijìn-nò, nga 'ño tìkjaàn-tji-nò ít'aà tsajòn kò jñà xita-la Cristo xi tìtsajna ján naxandá Laodicea, kò ít'aà ts'e ngats'ii xita xi kj'eè kii beèxkon-na.

² Koií k'oas'ín tìkjaàn-tji-nò mé-ne nga kàtas'e-la nga'ño inima-nò kò mé-ne nga jè kjòtsjacha xi tjin-nò sikkitsajnajtìn-nò. Jè xi mejèn-na nga isa ndaà kokixi kjòhìtsjeèn-nò nga nguì ndaà kochiya-nò jè kjoa xi tji'ma-la Nainá xi Na'èn-ná. Jè kjoa'ma jè, jè-né Cristo.

³ Nga ta jè Cristo tjin-la ngats'ii kjòhìtsjeèn kò kjoachjine xi 'ño chjì-la.

⁴ Koií k'oas'ín tìxan-nò nga mì yá xi skónachan-nò nga sikkjeén 'én xi ndaà tsò tanga mìtsà 'én kixi.

⁵ Nās'ín m̀tsà yà t̄jnakò-nò, t̄anga in̄imā-na t̄isik̄itsjeèn kjit'aà-nò. Mat-sjaá-na nga t̄'be nga kixi t̄itsajt̄ión koni s'ín onguíkoo yijo-nò t̄ikoa kixi t̄itsajnaà nga mokjeiín-nò it'aà ts'e Cristo.

Kjondaà xi t̄jín-ná nga Cristo t̄itsajnaoá

⁶ Koni s'ín kòkjeiín-nò it'aà ts'e Jesucristo xi ot̄ixoma-nò, k'oaá t̄is'ín kixi t̄it̄j̄at'aà kjit'aà-là

⁷ koni jngoò yá xi n̄anga fi im̄a-là kò koni jngoò ni'ya xi t̄isindaàsòn-isa nga k̄atakixiya jè kjoa xi mokjeiín-nò koni s'ín kichita'yà; kò t̄j̄i kjit'aà-là kjondaà Nainá.

⁸ T̄ikinda yijo-nò nga mì j̄nà skónachan-nò x̄it̄a xi 'én ndiso ch̄ja xi n̄i mé ch̄j̄i-là. J̄nà kjoh̄itsjeèn koi, tà yaá nchrobá-ne it'aà ts'e xi taxk̄i x̄it̄a koni tsò kjot̄ixoma xi t̄j̄ín isò'nde, m̀tsà kjot̄ixoma ts'e Cristo.

⁹ Yaá t̄ijnaj̄iín yijo-là Cristo yá-ne xi nguì jè sobà Nainá nga n̄imé ch̄ijat'aà-là.

¹⁰ Nga Cristo t̄itsajnakoo, t̄j̄ín yije-nò n̄it̄a mé xi mochjeén-nò. Jè Cristo ot̄ixoma-là ngats'ii nga'ño kò kjot̄ixoma xi mìk̄i tsejèn.

¹¹ T̄ikoaá it'aà ts'e Cristo kisit'aà ch̄iba-nò kjoa ts'e circuncisión, t̄anga m̀tsà jè xi tsja x̄it̄a bít'aà ch̄iba-là yijo-ná, jè-né nga jè Cristo tsibít'aà ch̄iba-là in̄imā-nò k'e nga jaàxìn jè xi t̄j̄ín-là yijo jé-nò.

¹² T̄ikoa k'e nga komà bautizar, k'oaá ngaya-là koni tsà yà kis̄ih̄ijiín-t'aà-là Cristo xi kjoa ts'e jé-nò. K'oaá t̄is'ín jaáya-nò koni s'ín jaáya-là Cristo koi kjoa-là nga mokjeiín-nò nga'ño xi t̄j̄ín-là Nainá nga komà kiskím̄it̄j̄en Cristo it'aà ts'e kjoa biyaà.

¹³ J̄nò, nga s̄a it̄jòn, t̄itsajnaà k'en-nò it'aà ts'e Nainá koi kjoa-là jé-nò nga jè Cristo kj'eè k̄i bít'aà ch̄iba-là in̄imā-nò nga faàxìn jè xi t̄j̄ín-là yijo jé-nò. Tanga i'nde, Nainá jyeé kis̄ik̄itsajnakon-nò kò Cristo nga kis̄ijch̄aat'aà-nò ngats'ii jé-nò.

¹⁴ K'oaá ngaya-là koni tsà jye kis̄ik̄jeheya-ne xojon xi kit̄j̄ami'nga xi kondra tsaján. Jaàxìn-ne, yaá tsohójnat'aà krò ñanda k'en-t'aà Cristo.

¹⁵ J̄nà nga'ño xi t̄j̄ín īj̄iín isén kò ngats'ii xi ot̄ixoma, Nainá jaàxìn yije-là nga'ño-là. Yaá kis̄ik̄ijne-là k'e nga jè Cristo k'en-t'aà krò. Kò ngats'ii x̄it̄a, yaá k̄ijtseè nga kis̄ich̄ja.

Kjot̄ixoma-là x̄it̄a xi mì k̄i fit'aà-là Cristo

¹⁶ K'oaá ma-ne j̄nò, k̄i k̄i n̄is'in-là x̄it̄a xi ch̄ajno-nò nga tsò-nò nga mìk̄i n̄ik̄itasòn kjoa ts'e tsojm̄i xi chine, xi 'yò, kjoa ts'e s'eí xi bitjo, kjoa ts'e nga otsejèn x̄it̄se ījngoò k'a sá, kò ts'e nachrjein n̄ik̄j̄aya.

¹⁷ Ngats'ii kjoa koi, k'oaá ngaya-là koni tà 'nguién-laá kjoa xi iskan j'ii; t̄anga jè xi nguì kjoa kixi, jè Cristo.

¹⁸ K̄i k̄i bīi'nde nga faàxìn-nò jè kjondaà xi jye t̄itsajnaj̄iñoò j̄nà x̄it̄a xi beèxkón àkjale; k'oaá tsò-là yijo-là nga m̀tsà x̄it̄a 'nga ikon. Jè xi mejèn-là nga j̄nò k'oa t̄is'ín s'een. J̄nà x̄it̄a koi tsò-né nga inga nij̄ná kis'enojm̄i-là kjoa jè, kò 'ño 'nga s̄ik̄itsajna yijo-là xi ta kjoh̄itsjeèn ts'e, t̄anga n̄imé ch̄j̄i-là.

¹⁹ X̄it̄a koi m̀tsà yà ndaà fit'aà-là Cristo. Nga jè Cristo t̄jna skò-là naxandá-là kò jè tsj̄á-là kjoh̄itsjeèn kò nga'ño kò jè s̄ik̄itsajnajt̄ín x̄it̄a-là koni s'ín ma yijo-ná nga j̄nà naxá-ná bítéya nindaà-ná, mé-ne nga ndaà s̄ixá-ne naxandá-là Cristo koni s'ín mejèn-là Nainá.

²⁰ J̄nò, tañaá k'en-koo Cristo, k'oaá ma-ne nga mìk̄i t̄i t̄j̄i'nde-nò nga j̄nà s̄ik̄itasòn kjot̄ixoma xi t̄j̄ín isò'nde. ¿Mé-ne tákó k'oa's'ín 'nè-nò koni tsà kjoa ts'e isò'nde ot̄ixoma-nò nga n̄ik̄itasòn-nò kjot̄ixoma

²¹ xi tsò: “K̄i k̄i n̄ikōi tsojm̄i koi, k̄i k̄i chin̄i, k̄i ndseji n̄iko-ne.”?

²² Jñà kjotíxoma koi, tà ts'eé tsojmì xi chija k'e nga tímochjeén. Tà kjotíxoma ts'e xita-né koni s'ín okóya.

²³ Jñà kjotíxoma koi, k'oaá s'ín 'ya-la koni tsà tjín-la kjoachjine tanga mìtsà kixi kjoa. Nga síjé-ná nga ndaà síkitasoán kjoa xi 'in tjín mé-ne nga ndaà jchaxkoán kjotíxoma xi tjín-la ingo; tikoáá tsò-né nga mochjeén nga mì xita 'nga ikon komaá, kò nga kínè-lá kjo'in yijo-ná. Tanga jñà kjoa koi nímé chjí-la, nga mìkiì ma osìkò-ná nga nìkítsajnaá jñà kjoa ch'o xi síjé yijo-ná.

3

¹ Jñà kjoa tinchátsjioò kjondaà xi tjín ngajmì ya ñánda tíjna Cristo nga ya tíjnat'aà chrja kixi-la Nainá, koií kjoa-la nga ya jaáyakjoè-nò kò Cristo,

² Koií tikítsjeèn kjit'aà mé kjoa xi tjín ngajmì, kì koií nìkítsjeèn kjoa xi tjín isò'nde.

³ Nga jñò, jyeé k'en kjoa ts'e isò'nde, kò jè kjoabinachon xitse xi tjín-nò nga ya titsajnakoo Cristo, yaá tíjnatjò nga nguixkòn Nainá.

⁴ Jè Cristo, jè-né xi kjoabinachon-nò; k'e nga jè xi kòtsejèn ìjngòè k'a, jñò, tikoáá yaá kòtsejèn-koo nga jeya kítsajnaà.

Xi kjoa jchínga kò xi kjoa xitse

⁵ Tikítsajna kjoa ch'o xi síjé yijo jé-nò xi kjoa ts'e isò'nde: koni jñà kjoa chijngui, kò kjoa tjé kò kjoa ch'o xi sasén-la yijo-nò kò ngats'ìi kjoa ch'o xi fahajìin-nò, kò nga kìn tsojmì mejèn-nò. Kjoa jè tíjé-ne koni tsà xkósòn yaxkón.

⁶ Koií kjoa-la nga kjo'in tsjá-la Nainá jñà xita xi mìkiì 'nchréñijon-la.

⁷ Jñò, tikoáá k'oaá tjín kjoa xi k'ì'nè kjòtseé k'e nga ya titsajnajñòè kjoa xi ch'o tjín.

⁸ Tanga i'ndeì tikítsajna yije kjoa koi: jñà xi kjoa jti, kò jñà xi kjoa ts'en, kò jñà kjoa xi ch'o tjín, kò jñà kjoa xi nokjoàjno-la xita, kò jñà 'én xi ch'o tsò nga nokjoà.

⁹ Kì 'én ndiso nokjoàkoo xinguiòo nga jyeé kichjaàxin-la yijo-nò kjoa jchínga-nò kò ngats'ìi kjoa xi k'ì'nè nga sa kjòtseé.

¹⁰ Jyeé kichjoé xi kjoa xitse. Jyeé jahatjìya-la kjohítsjeèn-nò. K'oaá s'ín tímáxitseya koni kji isén-la Nainá xi tsibíndaà-nò skanda kóni nga isà ndaà jchaxkoòn yá-ne xi Nainá.

¹¹ I'ndeì, mì tì kiì 'ñó mochjeén-ne yá-né xi xita griego, o yá-né xi xita judío, yá-né xi tíjt'aà chiba-la, o yá-né xi kjoa ts'e circuncisión, yá-né xi xita xin nangui-la kò yá xita-ne xi ima tímajchá, yá-né xi ch'inda tíjna'ñó, o yá-né xi tíjnandeí. Jè Cristo xi isà 'ñó chjí-la; kò jè xi tíjnajìin inìma-la ngats'ìi xita-la.

¹² Jñò xi xó k'oa'sín jaàjìin-nò Nainá kò xi nguì xita tsjeè-la maà nga ndaà matsjakeè-nò, k'oaá s'ín chjoé xi kjoa xitse nga kàtahimacha xita; kàtas'e-nò kjondaà; kì 'nga matakòn; indaàkjoa t'een; kò kàtas'e-la kjoatsejta inìma-nò.

¹³ Nita mé kjoa xi tjín-nò tikjeíin-la xinguiòo, tíjchàat'aà-la xinguiòo tsà mé kjoa xi ch'o síkò-nò. Jñò, k'oaá tìs'ín t'een, koni s'ín kisiòo-nò Cristo nga kisiìjchàat'aà-nò.

¹⁴ Jè xi tíjna ítjòn ts'e kjoa koi, jè-né nga tìtsjacha xinguiòo, nga jè kjoatjòcha xi ndaà síkítsajnajtín-ná.

¹⁵ Kjoa'nchán-la Cristo ndaà kàtatíxoma jìin inìma-nò; nga Nainá xó k'oaá s'ín kiìchja-nò nga 'nchán kítsajnakoo xinguiòo mé-ne nga ta jngòè yijo koma-nò. Kò mochjeén-né nga kjit'aà nachrjein tjì-la kjondaà Nainá.

¹⁶ Jè 'én-la Cristo 'ñó ndaà kàtasijìin kjit'aà ya jìin inìma-nò. Takóya-la xinguiòo kò tikixiyàà nga tikjeén kjohítsjeèn xi tjín-la kjoachjine. Tíjndá-la

Nainá nga tjiì-là kjondaà xi tjiìn inima-nò; tijndá-là sò ts'e salmo, kò sò xi jeya síkíjna Nainá, kò sò xi ya nchrobá-ne ya jjiìn inima-nò.

¹⁷ Ngats'ìi 'én xi nokjoà kò ngats'ìi xá xi 'nè, ìt'aà ts'e Jesucristo xi otíxoma-ná koat'een. Kò ìt'aà ts'e Jesucristo tjiì-là kjondaà Nainá xi Na'èn-ná.

Kjoa xi mochjeén nga sùkitasòn xita-la Cristo

¹⁸ Jñò íchjín xi x'in tjin-nò, nangui titsajna-là x'in-nò koni s'ín ok'in-la jña xita-la Cristo.

¹⁹ Jñò xi íchjín tjin-nò, tjòcha jchaa íchjín-nò, kì toòn 'yaà.

²⁰ Jñò xi ixti 'mì-nò, ndaà tjiná'yañijon-là xita jchínga-nò, nga jè Nainá ndaà sasén-la kjoa koi.

²¹ Jñò xi Na'èn 'mì-nò, kì taxkì sù nokjoàkoo ixti-nò mé-ne nga mì síkàjeèn-la ikon.

²² Jñò xi chí'nda maà, ndaà tikitasòn yije-là nei-nò ì ìt'aà nangui; kì tà k'ée nixá k'e nga tíkotsejèn-nò nga ta jè xi mejèn-nò nga ndaà kitsajnakoo. Nguì koó inima-nò nga tikitasòn-là koií kjoa-la nga yaxkón Nainá.

²³ Nita mé kjoa xi s'een, nguì koó inima-nò nga t'een koni tsà ìt'aà ts'e Na'èn-ná titsanikitasòn kò mìtsà ìt'aà ts'e xi taxkì xita.

²⁴ Jyeé 'yaà nga jè Na'èn-ná Jesucristo tsjá-nò chjí-nò nga tjoé-nò jè kjotjò xi tsjá-nò Nainá nga ixti-la maà koi kjoa-la nga jè titsanixát'aà-là Jesucristo xi otíxoma-nò.

²⁵ Tanga jè xi ch'o tjin kjoa xi s'ín, k'oaá s'ín kochjí-la koni tjin kjoa ch'o xi s'ín. Nainá mìtsà faájiìn xita, ngàsòn ngáya fikò ngats'ìi.

4

¹ Jñò xi nei-la xá ma, ndaà tikoo jña xita chí'nda-nò koni s'ín tjin xi kjoa kixi, nga jñò 'yaà-nò nga tikoa tjin jngoò-nò xi Nei-nò ma ján ngajmì.

² Kì bìkjoàn-là nga nokjoàt'aà-là Nainá; kjit'aà nachrjein titsajnandaà nga tjinókjoat'aà-là kò tjiì-là kjondaà Nainá.

³ K'oaá tis'ín titsi'batji-nájen, mé-ne jè Na'èn-ná kàtatsjá'nde nga koma kénojmi-jen 'én-la Cristo xi tji'ma-la Nainá nga sa ítjòn; nga koií kjoa-la nga ndayá tijná'ya.

⁴ Titsi'batji-ná mé-ne nga s'e-na nga'ño nga ndaà kixi kichjàjiìn-la xita koni s'ín tjinè-la nga kichjà.

⁵ Jñò, ndaà tikjeén kjohítsjeèn-nò mé-ne nga ndaà kitsajnakoo jña xita xi mìkì beèkxon 'én ndaà-la Nainá xi kjoa ts'e Cristo. Ndaà tikjeén nachrjein xi tí'biì-nò nga kos'ín tikitasòn.

⁶ K'e nga chikoo xita, jña 'én tjinókjoaa xi ndaà tsò kò xi ndaà sasén-la mé-ne nga koma síkátji-là 'én xi skonanguì-nò.

Kó tsò Pablo nga síhixat'aà xita

⁷ Ngats'ìi kjoa xi tímat'ian, jè keènojmi yije-nò jè 'ndseé Tíquico xi 'an 'ño ndaà matsjake nga jè ndaà síchját'aà-na koa ndaà nixákjoò-lajen Nainá.

⁸ Koií xá tísikasén-nò nga keènojmi-nò xi ìt'aà tsajen kós'ín titsajna-jen kò mé-ne nga kàtatsjá-nò nga'ño ts'e inima-nò.

⁹ Tikoáá ya túbáhihtakò Onésimo xi xita tsajòn, xi 'ndsè ma ìt'aà ts'e Cristo. Nga xita kixi-né kò 'ño matsjacha-jen. Jña keènojmi-nò mé kjoa xi tíma ijndé.

¹⁰ Jè Aristarco xi taña titsajnaya-jen ndayá, tísíhixat'aà-nò. Kò jè Marcos xi tí xíkjin ma Bernabé tikoáá tísíhixat'aà-nò. Jyeé kis'enojmi-nò ìt'aà ts'e Marcos; tsà ya kijchòkon-nò, t'een kjondaà ndaà choétjò.

¹¹ Tikoáá tísíhixat'aà-nò Jesús xi tikoá Justo 'mì. Tà jña-né xi xita judío xi mokjeiín-la xi k'oas'ín 'ño ndaà nchisíxako-na ìt'aà ts'e kjotíxoma-la Nainá kò 'ño ndaà síjehikon-na.

¹² Epafra, xi chí'nda-là Cristo, tìkoáá tísìhixat'aà-nò nga xitá tsajòn-nò. Kjit'aà nàchrjein bìtsi'batjì-nò mé-ne nga nguì kixì kítsajnaà koá ndaà kítsajnandaà nga sikitason mé xi mejèn-là Nainá.

¹³ 'An, ndaà tibe nga jè Epafra 'ñó síkájno xi it'aà tsajòn ko it'aà ts'e xitá xi títsajna ján naxandá Laodicea ko xi títsajna ján naxandá Hierápolis.

¹⁴ Tísìhixat'aà-nò Lucas jè xi chjìnxkì xi 'ñó matsjacha-jen, tìkoá tísìhixat'aà-nò jè Demas.

¹⁵ Xi it'aà ts'an tìixat'aà-ná jñà 'ndseé xi títsajna ján naxandá Laodicea, ko jè chjoón tichjaá Ninfa, ko ngats'ì xitá naxandá-là Cristo xi ya bixoña ni'ya-là.

¹⁶ K'e nga jye kíxkejìin-là xinguióo xojon jè, tìkoáá kàtaxkejìin-là naxandá-là Cristo xi títsajna ján Laodicea; koá jè xojon xi ts'e Laodicea tìkoáá tìxkejñò.

¹⁷ Koatìn-là jè Arquipo: kàtasíkitason xá xi kitsjaà-là Cristo.

¹⁸ Nga jye tífehet'aà xojon jè, koó ndsaa tìkjì-nò 'an xi 'mì-na Pablo, nga tìsìhixat'aà-nò. Tìkítsjeèn nga ndayá tìjna'ya. Jè kàtìjnako-nò kjondaà-là Nainá. K'oa s'ín kàtama.

Xojon carta-la San Pablo xi kiskii ítjòn-la xita naxandá-la Cristo xi títsajna Tesalónica

Kó tsò Pablo nga síhixat'aà jñà xita naxandá-la Cristo xi títsajna Tesalónica

¹ Jñò xi xita naxandá-la Nainá maà xi títsajnaà ya naxandá Tesalónica nga ya títsajnakjoòkoo Nainá xi Na'èn-ná kò jè Jesucristo xi otíxoma-ná, 'an xi 'mì-na Pablo títsanìhixot'aà-nòjen kò Silvano [tíjé-ne xi 'mì Silas] kò Timoteo. Nainá kàtatsjá-nò kjondaà kò kjoa'nchán ya ijìin inima-nò.

Kó tsò Pablo nga tsjá-la kjondaà Nainá

² K'e nga nokjoàt'aà-lajen Nainá, kjit'aà nachrjein 'bii-lajen kjondaà it'aà tsajòn.

³ Bítseèn-najen nga nguixkon Nainá xi Na'èn-ná koni s'ín nga títsanìxá, koií kjoa-la nga mokjeiín-nò it'aà ts'e Cristo, tíkoo ndaà nìxá-là xita xi kj'eíj nga matsjacha, nga tíkoo kixi títsajnaà nga títsachiña-là Jesucristo xi otíxoma-ná.

⁴ Ndí'ndse, Nainá matsjakeè-nò. 'Ya-najen nga xó k'oas'ín jaàjìin-nò nga xita naxandá-la komaà.

⁵ Nga jè 'én ndaà-la Nainá xi kjoa ts'e Cristo xi tsibènojmi-nòjen, mìtsà ta 'én tsajen xi kinokjoáko-nòjen. Jè Inima Tsjeè-la Nainá kitsjaà-najen nga'ño, kò tíkoo 'ño ndaà kjòchiya-najen nga nguì kixi kjoa. Jñò, ndaà ki'yaà k'e nga ya tsakítsajna-jen, ndaà kinìchját'aà-nòjen xi kjondaà tsajòn.

⁶ Jñò, k'oaá s'ín ki'nè koni s'ín ki'nè-jen kò koni s'ín s'ín Cristo. Jè Inima Tsjeè-la Nainá kitsjaà-nò kjòtsja nga komà kichjoétjò 'én-la Nainá nas'ín 'ño tse kjo'in tsatojioòn.

⁷ K'oaá ma-ne jñò tsakoò jngoò-là kjoa xi ndaà tjín nga kiskinguì ngats'ìi xita xi jye kòkjeiín-la 'én-la Nainá ya nangui Macedonia kò Acaya.

⁸ Nga yaá kjòts'ia-ne it'aà tsajòn nga tsabìsòn jè 'én ndaà-la Na'èn-ná; mìtsà tà ya nangui Macedonia kò Acaya; xki xi ján kina'ya-la nga jñò, ndaà mokjeiín-nò it'aà ts'e Nainá. K'oaá ma-ne nga mì tì kii mochjeén-ne nga ngajen kènojmi-lajen xita it'aà tsajòn, nga jyeé beè-nò xita.

⁹ Nga tíjña bénojmi-ne nga ndaà kichjoétjò-najen k'e nga ijchochoòn-nòjen. Tíkooá tsò-né nga jñò jyeé kinikíjna kjoa ts'e xkòsòn. I'ndeí jyeé ya tjaàt'aà-là xi nguì jè sobà Nainá xi kixi kjoa nga tíjnakon.

¹⁰ Tíkooá bénojmi-né nga títsachiña-là Ki'ndí-la Nainá nga kítjojen ijngoò k'a-ne ngajmii, jè xi tíjé-ne Jesús xi Nainá kisikjaáya-la k'e nga k'en, nga jè-né xi kòchrjekàjìin-ná kjo'in ts'e kjoajti-la Nainá xi sa nchrobá.

2

Xá xi kis'ùin Pablo ya naxandá Tesalónica

¹ Jñò ndí'ndse kò ndí tichjaá, 'ya-nò k'e nga ijchochón-nòjen mìtsà ta kjotjò.

² Nga jyeé ndaà tíjìin-nò koni s'ín komàt'in-jen ján naxandá Filipos, nga 'ño tse kjo'in kinìkjeiín-jen; 'ño kijtseètoòn-najen xita; tanga Nainá kisìchját'aà-najen nga kitsjaà-najen nga'ño nga komà tsanguì-jen ya naxandá-nò nga komà tsibènojmi-nòjen 'én ndaà-la Nainá nas'ín 'ño kjiin ma kondra-najen.

³ Nga 'én kixijí kinokjoàya-jen, mìtsà jò tjín inima-najen nga tsibènojmi-nòjen, tíkoo mìtsà xita kichonachan-lajen.

⁴ Nga Nainá jyeé kiskoòt'aà-najen kò k'oaá kitsò nga ok'ín-najen nga ngajen kjòngatsja-jen 'én ndaà-la Nainá xi kjoa ts'e Cristo mé-ne nga koma

kinókjoaya-jen. Mìtsà jè xi mejèn-najen nga ndaà kítsajna-jen nguixkon xità; jè-né nga ndaà kítsajna-jen nguixkon Nainá nga jè xi tíbeè inìma-ná.

⁵ Jyeé ndaà tíjìn-nò nga mìtsà 'én tsjén nokjoà-jen koni tsà mé xi mejèn-najen nga k'oi-nájen, tíkoaá mìtsà ton binchaàtsji'ma-jen. Kjoa koi, Nainá tíbeè-né.

⁶ Mìtsà jè binchaàtsji-jen nga jñò, kò xità xi kj'eíí, nga 'nga sjikítsajna-nájen. Tsà jìn xi mejèn-najen nga tsibìnè-nòjen kjotíxoma xi tjín-najen nga it'aà ts'e Cristo kisixáya-najen, komaá-la okinìko-nòjen.

⁷ Tanga mìtsà kòs'ín kinìko-nòjen. Ta saá k'oas'ín kinìko-nòjen koni ndí ixti. K'oaá गया-la koni jngoò nea xi síkaki ixti-la nga ndaà síchá ixti-la.

⁸ 'Nó tjòcha ki'ya-nòjen. K'oaá ma-ne nga kò kjotsja-najen tsibènojímí-nòjen 'én ndaà-la Nainá xi kjoa ts'e Cristo. Tíkooá matsjaá-najen nga ndaà kinìko-nòjen nità mé kjoa xi komàt'ioòn ta koií kjoa-la nga 'nó matsjacha-nòjen.

⁹ Ndí 'ndsè kò ndí tichjaá, bítsjeèn-nò kòs'ín kinixá-jen nga binchaàtsji'a-jen yijo-najen. Kò nachrjein kò nítjen nixá-jen, mé-ne nga mì jñò sijti-nòjen jñà nachrjein k'e nga kinokjoàyajìin-nòjen 'én ndaà-la Nainá.

¹⁰ Jñò, ndaà ki'yaà, tíkoaá Nainá kijtseè-né, nga ngajen ndaà kinìko-nòjen. K'oaá s'ín kinìko-nòjen koni s'ín sasén-la Nainá koni s'ín tjín xi kjoa kixi. Kò niyá xi jé koònè-najen koni s'ín kinìko-nòjen jñò xi mokjeiín-nò 'én ndaà-la Nainá.

¹¹ Tíkooá jyeé ndaà tíjìn-nò nga jen, ndaà kinìko-nòjen nga jngoò ijngoò koni s'ín síko ixti-la jngoò xità xi na'èn ma.

¹² Kinije ikon-nòjen koa kinì'nójiin-jen takòn kò k'oas'ín tsibìnè-nòjen nga k'oas'ín s'een koni s'ín ok'in-la xi xità-la Nainá maà; nga jè-né xi síkí'nchré-nò nga ya titsajnajìin-là xità xi jye jè tíhotíxoma-la kò tíkoa ya titsajnajñoò kjoajeya-la.

¹³ Kjit'aà nachrjein 'biì-lajen kjondaà Nainá koni s'ín ndaà kichjoétjò 'én-la nga mìtsà k'oas'ín kichjoétjò koni 'én-la xi taxkì xità. K'oaá s'ín kichjoétjò koni tjín xi ngui kjoa kixi nga 'én-la Nainá-né. Jñà 'én koi, tí'yaá-la nga nchisíxájiin inìma-nò jñò xi mokjeiín-nò.

¹⁴ Jñò ndí 'ndsè kò ndí tichjaá, k'oaá s'ín komàt'ioòn koni s'ín komàt'in jñà xità naxandá-la Nainá xi mokjeiín-la it'aà ts'e Cristo Jesús xi titsajna ján nangui Judea. Tijnà-ne xità naxandá judío xikjín kùtjingui kondra-la. Jñò tijñà-ne xità naxandá tsajòn kùtjingui kondra-nò.

¹⁵ Jñà xità judío kisik'en Na'èn-ná Jesús kò tijñà-ne xità jchínga-la kisik'en jñà xità xi kùchjaya ngajo-la Nainá kjòtseé. I'ndeí, tákó k'oaá síko-najen nga fitjingui kondra-najen. Nainá mìkìl sasén-la kjoa xi s'ín xità koi, ngui kondraá fi-la ngats'ii kjoa,

¹⁶ nga mìkìl tsjá'nde nga nokjoà-lajen jñà xi mìtsà xità judío mé-ne nga tíkoa kitjokajìin-ne kjo'in. K'oaá ma-ne xità koi, skanda nchisíkatonè-la nga ótsji jé-la yijo-la. Jyeé kjomeè f'iìkanè-la kjo'in xi tjìkò kjoiti-la Nainá.

Kó kitsò Pablo nga mejèn-la kjìkon jñà xità-la Cristo xi titsajna ya naxandá Tesalónica

¹⁷ 'Ndsee kò tichjaá, k'e nga chinchat'aàxìn chiba nachrjein-nòjen, nas'ín mì tì kii kiyaxkon-ná xinguiáá, ngajen 'nó nìkìtsjeèn-nòjen. 'Nó mejèn-najen nga onguíchoòn-nòjen.

¹⁸ Mejèn tsanguì-jen. 'An xi 'mì-na Pablo, kjìn k'a mejèn kiaà, tanga jè xità neíj mìkìl kitsjaá'nde-najen.

¹⁹ Kjoa tsajòn-nò nga titsachiñá-lajen nga 'nó kòtsja-najen kò nga ndaà kitjo-jen k'e nga kjoíí ijngoò k'a Na'èn-ná Jesucristo.

²⁰ Kixií kjoa it'aà tsajòn-nò nga ndaà kitjongui-jen kò nga s'e-najen kjoa tsja.

3

Mé-ne ya kinikasén-ne Timoteo ján naxandá Tesalónica

¹ K'e nga mì tì kii komà kichikjoa isa-najen nga mejèn-najen sijiin-najen kó s'ín titsajnaà ján Tesalónica, k'oaá komà-ne nga kichibàya-najen nga kinikasén-jen jè 'ndsè Timoteo, kò ngajen yaá tsitsajna-jen Atenas.

² Kinikasén-jen jè 'ndseé Timoteo, ch'inda-la Nainá-né nga tikoáá chjaya 'én ndaà-la Nainá xi kjoa ts'e Cristo koni ngajen. Koií xá kiiikon-nò mé-ne nga kàtatsjá-isa-nò nga'ño nga isa 'ño ndaà kixi kitsajnaà koni s'ín mokjeiin-nò,

³ mé-ne nga nijngò xi sihindaà-ne kjoa ts'e kjo'in xi titsanikjioón. Jñò, jyeé ndaà tjiin-nò nga k'oaá s'ín tjinè-la nga kòs'ín komat'iaán.

⁴ K'e nga tisa ya titsajnakò-nòjen, k'oaá ki'mi-nòjen nga kjo'iin s'e-ná. I'ndeí, jyeé tisa'yaà nga k'oaá s'ín tímat'ioón.

⁵ Koií kjoa-la nga mì tì kii kiskoòhà kjoa-na; kisikasén Timoteo nga mejèn-na skoeè kòs'ín titsajnakoo jè 'én xi mokjeiin-nò. Timakájno-na tsà jye kiskoònachan-nò jè xita neií. Tsà koií nachrjein-la, xá xi ki'nè-jen, tsà ta kichija-né.

⁶ I'ndeí, jè Timoteo jyeé j'ii-ne nga kii Tesalónica; ndaà tsò okixi xi 'ya-najen it'aà tsajòn koni s'ín mokjeiin-nò kò nga tjin-nò kjotsjacha. K'oaá s'ín tsibénojmi-najen nga kjit'aà nachrjein tsjaá ma-nò nga nikitsjeèn-najen. Tikoáá mejèn-nò nga jchaxkoòn-najen koni ngajen tikoáá mejèn-najen jchaxkoòn-nòjen.

⁷ K'oaá ma-ne ndí 'ndsè kò ndí tichjaá, nas'ín kjo'in kò kjoa kondra titsajnajiin-jen, k'e nga kina'ya-jen it'aà tsajòn nga 'ño ndaà mokjeiin-nò it'aà ts'e Cristo, tikoáá ngajen, 'ño ndaà kjotsja-najen.

⁸ K'e nga kina'ya-jen nga kixi onguít'aà-là Na'èn-ná, ngajen jyeé mì tì mé makájno-najen.

⁹ Ngajen, 'ño tse kjotsja tjin-najen nga nguixkò Nainá xi kjoa tsajòn skanda mì-la kii kjoehet'aà nachrjein nga k'oi-lajen kjondaà Nainá.

¹⁰ Kò nachrjein kò nitjen nokjoat'aà-lajen Nainá mé-ne nga tsjá'nde-ne nga koma konguichoòn-nòjen. Tikoá koma kokòya-isa-nòjen mé-ne nga kojngò-ne 'én xi chijat'aà-nò koni s'ín mokjeiin-nò.

Kjoa bítsi'ba-la Pablo

¹¹ Mejèn-najen nga tijè-ne Na'èn-ná xi Nainá kò jè Jesucristo xi otíxoma-ná, kàtatsjá'nde-najen nga koma konguichoòn-nòjen.

¹² Jè kjotsjacha-la Na'èn-ná isa ndaà kàtasjiin inima-nò, mé-ne nga isa ndaà kotsjacha-nò xinguiò kò ngats'ii xita xi kj'eíí, koni ngajen, ndaà matsjacha-nòjen.

¹³ Jè Na'èn-ná kàtatsjá-la nga'ño inima-nò mé-ne nga nimé jé sakòt'aà-nò kò tsjeè kitsajnaà nga nguixkò Nainá xi Na'èn-ná k'e nga kjoíí lingoò k'a-ne Jesucristo xi otíxoma-ná nga tjiko ngats'ii xi ya chja-ne.

4

Kjoa xi sasén-la Nainá

¹ Ndí 'ndsè kò ndí tichjaá, k'oaá s'ín tsakoòya-nòjen nga k'oas'ín sijchá yijo-nò koni s'ín sasén-la Nainá. Kò kixií kjoa, jyeé kòs'ín tisa'nè. Tanga i'ndeí bítsi'ba-nòjen tikoá bìnè-nòjen it'aà ts'e Jesús xi otíxoma-ná nga isa 'ño ndaà tji-là nga'ño yijo-nò nga kòs'ín tikitasòn.

² Jyeé tjiin-nò kó s'in tjin kjotixoma xi kits'ii-nòjen koni s'in kitsjaà-najen Jesucristo xi otixoma-ná.

³ Jè xi mejèn-la Nainá nga nguì tsjeè sijchá yijo-nò, mì tì kjoa chijngui s'is'in-là.

⁴ Nga jngoò ijngoò-nò tikindaa yijo-nò; k'oas'in tikjeén nga nguì tsjeè titsajna koni s'in sasén-la Nainá.

⁵ Kì biì'nde-là nga síkijne-nò jña kjoa ch'o xi síjé yijo-nò koni s'in jña xita xi mìkì beèkxon Nainá.

⁶ Jño xi 'ndseé chibá it'aà ts'e Cristo, kì k'oaá tjin kjoa xi kaajñoò mé-ne nga mì xinguiòo chónachan-là nga mì xinguiòo jchatoòn. Tsà k'oas'in s'een, kjo'ín tsjá-nò Nainá. Jyeé k'oas'in tsibènojmi-nòjen.

⁷ Nainá mìtsà koi xá kichja-ná nga ch'o s'een, jè xi mejèn-la nga tsjeè kitsajnaá.

⁸ Jè xi ochrjekàngui kjoa koi, mìtsà kjohitsjeèn ts'e xita ochrjekàngui, kjohitsjeèn ts'e Nainá ochrjekàngui; nga jè xi tsjá-nò Inima Tsjeè-la.

⁹ Mìkì mochjeén nga xojon skiit'aà-isa-nò xi ts'e kjoatjòcha. Nainá jye tsakóya-nò kós'in sitjòchaà xinguiòo nga jngoò ijngoò.

¹⁰ Jyeé kós'in tita'nè nga matsjacha ngats'ii xita xinguiòo xi titsajna kóhokji ya nangui Macedonia. Tanga k'oaá s'in bitsi'ba-nòjen nga isa ndaà titsjacha xinguiòo.

¹¹ Tinè-là yijo-nò nga 'nchán titsajna, kì kjoa-la xinguiòo chingajñoò, t'een xá-nò koni tjin xá xi ma-nò, koni s'in jye kì'mi-nòjen ngats'ii kjoa koi.

¹² Mé-ne nga skoexkón-nò jña xita xi mìkì mokjeiin-la 'én-la Nainá. Koa jño, nímé chijat'aà-nò.

K'e nga kjoii ijngoò k'a-ne Na'èn-ná Jesucristo

¹³ Ndí 'ndsè kò ndí tichjaá, mejèn-najen nga katasijin-nò mé kjoa xi mat'in jngoò xita xi biyaà, mé-ne nga mì kobaá-nò koni jña xita xi nímé nchikoña-la.

¹⁴ Koni s'in mokjeiin-ná nga Jesús k'en, ikjoàn jaáya-la, k'oa tis'in mokjeiin-ná nga Nainá siikjaáya-la xita xi jye k'en, jña xi mokjeiin-la it'aà ts'e Jesús.

¹⁵ Nga koií 'én bènojmiya-jen koni tsò 'én xi tsibijna Jesús nga jña xi titsajna kooán skanda k'e nga kjoii ijngoò k'a Na'èn-ná Jesucristo, mìtsà jña kjiin ítjòn-là jña xi jye k'en.

¹⁶ Nga jè sobà Na'èn-ná kitjojen ijngoò k'a-ne ngajmi; 'nó kichja nga tsjá okixi, kiná'ya jngoò-la jta ts'e àkjale ítjòn, kò kiná'ya-la chrjo-la Nainá; ikjoàn jña xita xi jye k'en nga mokjeiin-la it'aà ts'e Cristo, kjoaáya ítjòn-la.

¹⁷ Ikjoàn jña xi tákó titsajna kooán jè nachrjein jè, yaá tjámijin-tjen-koaá jjiin ifi nga kixokjoaá Nainá ya jjiin isén. K'oaá s'in koma nga ya kitsajna kooá Nainá nita mé nachrjein-ne.

¹⁸ K'oaá ma-ne nga tije takòn xinguiòo nga tènnojmiya-là koni tsò jña 'én koi.

5

¹ Ndí 'ndsè kò ndí tichjaá, mìkì mochjeén nga xojon sit'aà-nò mé nachrjein-ne nga okoma.

² Jño, nga jyeé ndaà tjiin-nò, jè nachrjein k'e nga kjoii ijngoò k'a Na'èn-ná Jesucristo, k'oaá s'in kjoii koni jngoò xita chijé xi f'ii nga nitjen k'e nga niya xi nchikoñaá-la.

³ K'e nga kitso jña xita: “Nchán titsajnaá, nímé kjoa tjin.” K'ee tà nitoón kitjojenè-la kjojkón koni s'in mat'in jngoò chjoón xi bijchó nachrjein-la nga kì'ndí 'beé, mìkì kojno-la.

⁴ Tanga jñò ndí 'ndsè kò ndí tichjaá, mìtsà jjiìn jñò titsajnaà jñò. Kò k'oaá ma-ne nga mì k'oaá s'ín kòmat'ioòn jè nàchrjein jè, koni ma k'e nga ta nitoón fì jngoò xita chijé.

⁵ Tanga jñò, ngats'ioò, iseèn choòn ñánda titsajnaà, kò nàchrjein-né. Nga jñá, mìtsà jjiìn jñò titsajnaà kò mìtsà nìtjen titsajnaà.

⁶ K'oaá ma-ne nga mìkiì k'oa s'éeen koni s'ín xita xi kj'eíí nga mì titsajnaandaà-jèn mé kjoa xi tjin k'oaá ngaya-la koni tsà kjiyijòfè. Mochjeén-né nga kitsajnaandaà koni jngoò xita xi tijnakon, xi ngui ndaà tjin ikon.

⁷ Nga jñá xita xi oyijòfè, k'ée oyijòfè k'e nga jñò. Kò jñá xi mach'i, k'ée mach'i k'e nga jñò.

⁸ Tanga jñá, yaá titsajnaà ñánda iseèn choòn. K'oaá ma-ne nga ndaà sjchá yijo-ná. Jè 'én xi mokjeiín-ná kò jè kjoatjòcha, jñá kòsikò inima-ná koni jngoò soldado xi ndaà kijtsa inima-la jè chrjoa xi 'mì coraza. Kò k'e nga ngui tíjngoò takoán nga chiñá-lá jè nàchrjein k'e nga kitjokàjñá kjo'in, jè ngaya-la tsí'nguién kichá xi osikò skò soldado.

⁹ Nainá mìtsà koi xá jaàjiìn-ná nga kjo'in tsjá-ná, jé-né nga kitjokàjñá kjo'in it'aà ts'e Jesucristo xi otíxoma-ná.

¹⁰ Nga jè k'en ngajo-ná mé-ne k'e nga kjoíí jngoò k'a-ne, tsà titsajnaakoaán, kò tsà jye k'éeen, yaá kitsajnaakoaá.

¹¹ K'oaá ma-ne nga tijetakòn kò tjii-la nga ñó xinguiò koni s'ín jye tita'nè.

Kjotíxoma xi kitsjaà Pablo

¹² Ndí 'ndsè kò ndí tichjaá, nìjé-nòjen kjondaà, jchaxkón xita xi síxako-nò nga jñá titsajna itjòn ya jjiìn naxandá-la Nainá kò nga okóya-nò.

¹³ Ndaà jchaxkón tikoà ndaà titsajna xita koi, jè kjoa-la xá xi s'ín. 'Nchán titsajnaakò xinguiò.

¹⁴ K'oa tís'ín bitsi'ba-nòjen ndí 'ndsè kò ndí tichjaá, kot'in-là nga kàtasíxá jñá xita xi ta jyò tjíma nga majìn-la síxá; tì'ñó ikon jñá xi indaà tjin ikon; tichját'aà-là jñá xi tsjìn-la nga'ñó ya jjiìn inima-la; kò kàtas'e-nò kjoatsejta it'aà ts'e ngats'ii xita-la Nainá.

¹⁵ Tsà k'e nga mé kjoa xi ch'o síko-nò xita xi kj'eíí, tikindaa xinguiò nga mì sùjndà ngajo-ne. Ta saá tìnè-là yijo-nò nga kjit'aà nàchrjein ndaà tikòo xinguiò kò ngats'ii xita xi kj'eíí.

¹⁶ Kjit'aà nàchrjein tsja t'è-là inima-nò.

¹⁷ Titsi'ba kjit'aà-là Nainá.

¹⁸ Nita mé kjoa-ne, tjii kjit'aà-là kjondaà Nainá. K'oaá s'ín mejèn-la Nainá nga k'oas'ín s'éeen ngats'ioò xi mokjeiín-nò it'aà ts'e Cristo Jesús.

¹⁹ Kì bichjoá ikòn-là xá xi s'ín Inima Tsjeè-la Nainá.

²⁰ Kì nàchrjekànguiò 'én-la xita xi chja ngajo-la Nainá.

²¹ Ndaà ndaà chít'aà yije ngats'ii 'én. Jñá tikítsajnatjò xi ndaà tsò.

²² Ngats'ii xi ch'o tsò, kì kù nìkitasòn.

²³ Jè Nainá xi tsjá kjoa'nchán, jngoò k'a tsjeè kàtasíkítsajna-nò. Ndaà kàtasíkínda inima-nò, yijo-nò kò kjohítsjeèn-nò mé-ne nga nímé jé s'e-nò jè nàchrjein k'e nga kjoíí jngoò k'a jè Jesucristo xi otíxoma-ná.

²⁴ Nga xita kixi-né jè Nainá xi xó kiichja-nò, sùkitasòn yijeé kjoa koi.

Kó kitsò Pablo nga síhixat'aà xita

²⁵ 'Ndsee kò tichjaá, titsi'batjì-nájen.

²⁶ Tìixot'aà ngats'ii xita 'ndsee nga ngui kò inima-nò.

²⁷ 'An, tsja-nò okixi nga nguixkòn Na'èn-ná nga kàtaxkejiìn-la xojon jè ngats'ii xita naxandá-la Nainá.

²⁸ Jè kàtijnako-nò kjondaà-la Jesucristo xi otíxoma-ná.

Xojon carta-la San Pablo xi ma-ne jò xi kiski-la xita naxandá-la Cristo xi títsajna Tesalónica

Kó tsò Pablo nga síhixat'aà jñà xita naxandá-la Cristo xi títsajna Tesalónica

¹ Jñò xi xita naxandá-la Nainá maà xi títsajnaà ya naxandá Tesalónica nga ya títsajnakjoòkoo Nainá xi Na'èn-ná kò jè Jesucristo xi otíxoma-ná, 'an xi 'mì-na Pablo títsanìhixot'aà-nòjen kò Silvano [tíjé-ne xi 'mì Silas] kò Timoteo.

² Nainá xi Na'èn-ná, kò jè Jesucristo xi otíxoma-ná kàtatsjá-nò kjondaà kò kjoa'nchán ya ijìin inìma-nò.

Kó tsò Pablo nga tsjá-la kjondaà Nainá

³ Ndí 'ndseé kò tichjaá mochjeén-nè nga kjit'aà nachrjein k'ojí-lajen kjondaà Nainá xi it'aà tsajòn. Ndaà tjín nga k'oas'ín s'en-jen, koií kjoa-la nga nachrjein inchijòn isa ndaà mokjeiín-nò kò isa ndaà matsjacha xinguiòo nga jngòè ijngòè.

⁴ K'oaá ma-ne nga ndaà matsja-najen it'aà tsajòn; k'oaá s'ín bènojímí-lajen jñà xita naxandá-la Cristo xi xìn nangui títsajna nga jñò, ndaà mokjeiín-nò kò ndaà chíkjoakò-nò nas'ín 'ñó fì tjingui kondra-nò xita kò nas'ín kjo'in títsanìkjoón.

⁵ Ngats'ìi kjoa koi, Nainá k'oaá s'ín okó nga kixi koiíndaajìin; kò k'oaá ma-ne nga jñò, ok'ín-nò nga ya kítsajnajìin-là xita xi jè tíhotíxoma-la, nga tíkoi-ne kjoa-la Nainá nga kjo'in títsanìkjoón.

⁶ Nainá, xita kixi-né nga tsjá-la kjo'in jñà xita xi kjo'in tsjá-nò.

⁷ Kò jñò xi kjo'in títsanìkjoón, tsjá-nò kjoa'nchán kò ngajen, k'e nga kjinchrobàjen ngajmì Jesucristo xi otíxoma, tjikò àkjale-la xi 'ñó tse nga'ño tjín-la nga kjinchrobàjen-jìin ni'ín.

⁸ Nainá tsjá-la kjo'in jñà xita xi mìkìi beèxkón nì mìkìi síkitasòn 'én ndaà-la Nainá xi kjoa ts'e Jesucristo xi otíxoma-ná.

⁹ Xita koi, 'ñó tse kjo'in sìikjeiín nita kjé-ne; mì yaá kítsajna nguixkòn Na'èn-ná, kò mìkìi skoe kjoajeya-la xi 'ñó tse nga'ño tjín-la.

¹⁰ Kjoa koi, k'oaá s'ín koma jè nachrjein k'e nga kítjojen ijngòè k'a Na'èn-ná mé-ne nga it'aà ts'e xita-la jeya kíjna-ne kò ngats'ìi xita xi mokjeiín-la it'aà ts'e, ta koxkón-la. Tikoáá jñò yaá kítsajnaà, koií kjoa-la nga kòkjeiín-nò koni s'ín tsibènojímí-nòjen.

¹¹ K'oaá ma-ne nga kjit'aà nachrjein bítsi'ba-lajen Nainá it'aà tsajòn, mé-ne nga Nainá kító nga ok'ín-nò nga ya kìnókjoa-nò naxandá-la nga xó k'oaá s'ín kùichja-nò. Nga kò nga'ño-la kàtasíkitasòn ngats'ìi kjondaà xi jñò sasén-nò kò xá xi 'nè nga Na'èn-ná ma'ñót'aà takòn.

¹² K'oaá s'ín koma nga it'aà tsajòn jeya kíjna Jesucristo xi otíxoma-ná. Tikoá jè ndaà sìikítsajna-nò koni s'ín tjín-la kjondaà jè Nainá kò jè Jesucristo xi otíxoma-ná.

2

K'e nga kjoí ijngòè k'a-ne Jesucristo

¹ Ndí 'ndseé kò tichjaá, i'ndeí jè kénojímí-nòjen kó s'ín koma k'e nga kjoí ijngòè k'a Jesucristo xi otíxoma-ná kò k'e nga ya koxkóyat'aà-lá. K'oaá ma-ne bítsi'ba-nòjen

² tsà yá x̄it̄a xi k̄it̄so-nò nga jyeé j'ìi l̄jngoò k'a Jesucristo, k̄i tà n̄it̄on mokjeiín-nò; k̄i tsakjoòn-là tsà yá x̄it̄a xi k̄it̄so-nò: k'oaá tsò 'én-là Nainá xi k̄jòngatsja Pablo; k'oaá s'ín ch̄jaya, k̄o k'oaá s'ín kisìkasén jngoò x̄ojon.

³ K̄i yá x̄it̄a xi konachan-nò. Nga jè nachrjein k'e nga okoma, ítjòn s'e nachrjein nga jñà x̄it̄a, 'ñó kondra k̄itsajna-là Nainá. Ikjoàn ta n̄it̄oón kotsejèn jè x̄it̄a xi 'ñó ch'o s'iin, jè xi t̄jínè-là nga k̄jo'in s̄iikjeiín n̄it̄a kjé-ne.

⁴ X̄it̄a jè, jè xi kondra k̄ijna-là ngats'ìi xi Nainá tsò-là x̄it̄a k̄o n̄it̄a mé-ìsa-ne xi beèxkón nga jè mejèn-là k̄ijna ítjòn. Skanda yaá k̄ijnaya ingo ítjòn-là Nainá koni tsà jè sobà Nainá, k'oaá k̄it̄so-là yijo-là nga Nainá jè.

⁵ ¿A mì bítsjeèn-nò k'e nga sa ya tsohótijnako-nò, k'oaá kixan-nò nga k'oaá s'ín koma?

⁶ I'ndeí jye t̄jiiin-nò mé kjoa xi bíchjoa ikòn-là x̄it̄a jè nga mì xátí f'ìi; skanda k'eé k̄joí k'e nga k̄ichóya nachrjein-là.

⁷ Jè nga 'ñó-là kjoach'o, jyeé tíxá'ma i isò'nde, tanga t̄jna jngoò xi t̄jna ikòn nga mìkìi tsjá'nde k̄o ta jè chija nga t̄jáxin.

⁸ K̄o ikjoàn k'eé kotsejèn jè x̄it̄a xi ch'o s'ín. Tanga Jesucristo xi otíxoma, ta jngoò 'én k̄ichja nga tsjá-là k̄jo'in n̄it̄a kjé-ne. Tà ma tà jé nga ote k̄i nga k̄joí, jngoò k'a kjoááxin nga 'ñó-là.

⁹ K'e nga k̄joí jè x̄it̄a xi ch'o s'ín, jè x̄it̄a neíi tsjá-là nga 'ñó nga k̄jìn skaya k̄joxkón kokò xi mìtsà kixi kjoa.

¹⁰ S̄iikjeén yije kjoa xi ch'o t̄jín nga skónachan-là x̄it̄a xi k̄jo'in s̄iikjeiín n̄it̄a kjé-ne, koií kjoa-là nga jñà x̄it̄a koi mìkìi matsjakeè xi kjoa kixi xi ma k̄it̄jokajìin-ne k̄jo'in kjoa ts'e jé-là.

¹¹ K'oaá ma-ne Nainá tsjá'nde-né nga t̄jna jngoò xi skónachan-là x̄it̄a koi, mé-ne k̄atakjeiín-là kjoa ndiso,

¹² nga k̄atas'e-là k̄jo'in ngats'ìi xi mìkìi mokjeiín-là kjoa kixi. Nguì ta kjoa ch'oó sasén-là.

Mé kjoa-ne nga jaàjìin-ná Nainá

¹³ Ndí 'ndsè k̄o ndí tichjaá, mochjeén-né nga k̄jit'aà nachrjein 'biì-lajen k̄jondaà Nainá xi it'aà tsajòn xi 'ñó matsjakeè-nò Na'èn-ná, nga xó k'oaá s'ín jaàjìin-nò Nainá k̄oni nga t̄isa t̄ats'en-là kjoa, mé-ne nga k̄it̄jokajìnoò-nò k̄jo'in, nga jè Inima Tsjeè-là Nainá sítsjeèya-nò k̄o nga ndaà mokjeiín-nò xi kjoa kixi.

¹⁴ Xó k'oaá s'ín k̄ichja-nò Nainá it'aà ts'e 'én ndaà-là Nainá xi kjoa ts'e Cristo xi ngajen nokjoàya-jen, mé-ne nga jñò, t̄ikoa s'e-nò kjoajeya-là Jesucristo, jè xi otíxoma-ná.

¹⁵ Ndí 'ndsè k̄o tichjaá, k'oaá s'ín kixi t̄itsajna. Kì n̄jchàajìin-jèn jñà 'én kixi-là Cristo xi ngajen kinikatoya-nòjen, jñà xi ta 'én kinokjoà-nòjen k̄o xi x̄ojon carta tsakoòya-nòjen.

¹⁶ Aán síjèt'aà-là Jesucristo, jè xi otíxoma-ná k̄o jè Nainá xi Na'èn-ná, jè xi 'ñó matsjakeè-ná nga tsjá-ná kjoajetakòn-là xi mìkìi kjoehet'aà, k̄o tsjá k̄jotjò-ná k̄jondaà-là nga t̄jngoò takoán nga t̄itsachiñá-lá.

¹⁷ K'oaá s'ín síjèt'aà-là nga ìsa tse nga 'ñó k̄atatsjá-là inima-nò mé-ne nga ìsa kixi k̄itsajnaà koni s'ín 'nè kjoa xi ndaà t̄jín k̄o koni s'ín nokjoà 'én xi ndaà tsò.

3

K'oaá tsò Pablo nga mejèn-là s̄itsi'batjì

¹ Xi fehet'aà-ne ndí 'ndsè k̄o ndí tichjaá, t̄itsi'batjì-nájen mé-ne jè 'én-là Nainá n̄it̄on x̄k̄i xi ján katijchó, t̄ikoa ndaà k̄ateèxkón jñà x̄it̄a xi skoétjò 'én koni s'ín k̄i'nè jñò nga ndaà kiyaxkón.

² T̄ikoa t̄itsi'batjì-nájen mé-ne nga jè Na'èn-ná k̄i k̄i tsjá'nde nga ch'o s̄iiko-najen x̄it̄a ts'en k̄o xi ch'o s'ín, nga mì tà ngats'ìi x̄it̄a mokjeiín-là.

³ Na'èn-ná x̄ita kixi-né, síkitasòn 'én-la, kixíí s̄ikítsajna-nò t̄ikoá s̄ikinda-nò mé-ne nga mì ch'o s̄ikò-nò jè x̄ita neíí.

⁴ Nga ìt'aà ts'e Na'èn-ná mokjeiín-najen nga titsanìkitasòn-nò koni s'ín t̄itsahotiixoma-nòjen kò tákó k'oaá s'ín s'een-isa.

⁵ Jè Na'èn-ná k̄atasíhjat'aà-nò nga kos'ín tjòcha jchaa xinguioo koni s'ín tjòkeè kijtseè-nò Nainá; kò nga k̄atachíkjoako-nò kjo'in koni s'ín kichìkjoako-la Cristo.

Mochjeén-né nga k̄atasíxá jñà x̄ita

⁶ Ndí 'ndsè kò ndí tichjaá, k'oaá s'ín bìnè-nòjen, ìt'aà ts'e Na'èn-ná Jesucristo, kì t̄i ya tsjahijtako-nò jñà x̄ita 'ndseé kò tichjaá xi majìn-la síxá, jñà xi mìkì k'oas'ín síkitasòn koni s'ín tjín kjoa kixi xi ngajen kinìkatoya-nòjen.

⁷ Jñò, jyeé tíjìin-nò nga mochjeén-né nga chjíngruì-nájen koni s'ín k'ì-nè-jen k'e nga ya tsitsajnakò-nòjen; mì jyò tsitsajna-jen, kinìxá-nájen.

⁸ Mitsà ta k̄otjò chichì-jen. Tà saá 'ñó kinìxá-jen kò nachrjein kò n̄itjen kinìkijta-jen yijo-najen, mé-ne nga mì jñò s̄ìjti-nòjen.

⁹ Kinìxá-nájen nas'ín tjí'nde-najen nga s̄ijé-nòjen mé tsojmì xi mochjeén-najen. Jè xi mejèn-najen nga chjíngruì-nájen mé-ne k'oa t̄is'ín s'een koni 'nè-jen.

¹⁰ K'e nga tsitsajnakò-nòjen k'oaá s'ín k'ì-mì-nòjen: Tsà jngoò x̄ita xi majìn-la síxá, t̄ikoá mìkì tjí'nde-la nga kòkjen.

¹¹ Jyeé kina'yà-jen nga tjímajìin i'nga x̄ita xi majìn-la síxá nga tà jyò binchima, nga ta jñà chjajìin chja'a ñánda mì jñà oko-la.

¹² Jñà x̄ita koi, ìt'aà ts'e Jesucristo xi otixoma-ná, k'oaá s'ín bìtsi'ba-lajen, t̄ikoá bìnè-lajen nga k̄atasíxá, mé-ne nga k̄atátsji'a-ne yijo-la.

¹³ Jñò ndí 'ndsè kò ndí tichjaá, kì bijta-nò nga ndaà 'nè.

¹⁴ Tsà tjín i'nga xi mìkì síkitasòn koni tsò xojon jè, chítsejèn-là yá-né, kì yaá báhijtako, mé-ne nga kosobà-la.

¹⁵ Tanga kì k'oaá s'ín n̄ikoo koni jngoò x̄ita kondra, k'oaá s'ín t̄enojmiya-là nga 'én ndaà chikoo nga 'ndseé chibá.

'Én xi fehet'aà-ne

¹⁶ Tjìjè-ne Na'èn-ná xi tsjá kjoa'nchán, k̄jit'aà nachrjein k̄atatsjá-nò kjoa'nchán n̄ita mé kjoa-ne. Na'èn-ná k̄atijnako-nò ngats'ioò.

¹⁷ Nga jye tífehet'aà xojon jè, koo ndsaa tikjì-nò 'an xi 'mì-na Pablo, nga t̄isihixat'aà-nò. Nga k'oas'ín s'iaàn firma-na, kò k'oaá s'ín k̄jiaà.

¹⁸ Ngats'ioò, jè k̄atijnako-nò k̄jondaà-la Jesucristo xi otixoma-ná.

Xojon carta-la San Pablo xi kiskiù ítjòn-la jè Timoteo

Kó tsò Pablo nga síhixat'aà Timoteo

¹ 'An, Pablo, tìkjiù-lè xojon jè, nga 'an tsibíxáya-na Jesucristo, nga k'oas'ín kitsjaà okixi Nainá xi ochrjekàjiù-ná kjo'in kò Na'èn-ná Jesucristo nga titsachiñá-lá kjondaà-la.

² Ngaji Timoteo, koni tsà ki'ndí ts'an xan-lè nga 'an tsakoòyandaà-lè koni s'ín mokjeiù-ná it'aà ts'e Cristo. Nainá xi Na'èn-ná kò Na'èn-ná Jesucristo kàtatsjá-lè kjondaà, kàtahimakeè-lè, kàtas'e-la kjoa'nchán jjiù inima-lè.

Pablo tsibínè-la Timoteo nga sìkixiya xita xi kj'eii kjohitsjeèn okóya

³ Koni s'ín tsibitsi'ba-lè k'e nga kiaà nangui Macedonia, yaá tijní naxandá Éfeso mé-ne nga kichakjáya-la xita xi mìtsà 'én kixi nchihokóya jjiù naxandá-la Nainá.

⁴ Ngaji Timoteo, k'oaa s'ín tjínè-la jña xita koi, kì kù s'ín-la cuento jchínga xi mìtsà kixi kjoa tikoá kì kù s'ín-la kjoa xi mìkii fehet'aà ts'e xita jchínga kjòtseé. Kjoa koi nímé chjí-la. Tà síkjaán-kjoò-ná. Mì kì osikò-ná nga mokjeiù-ná it'aà ts'e Cristo mé-ne nga koma sikitasoán koni s'ín mejèn-la Nainá.

⁵ Xá xi tibìnè-lè, jè-né nga tsjeè tjína inima-ná, nga tsjeè tjín kjohitsjeèn-ná koa nga ngui ndaà mokjeiù-ná; yaá nchrobát'aà-ne nga sítjòchaà xinguiáá.

⁶ Tanga tjín i'nga xita xi xìn ndiyá tjímaya; tà koií joóya-ne 'én xi nímé chjí-la.

⁷ Mejèn-la maestro ts'e kjotíxoma-la Nainá kítsajna. Tanga tjíña-ne, skanda mìkii machiya-la 'én xi chja nga 'ño chja nga tsò nga kixi kjoa.

⁸ Tíjiù-ná nga jè kjotíxoma xi kitsjaà Nainá, ndaà tjín tsà k'oas'ín kochjeén koni s'ín mejèn-la Nainá.

⁹ Ya-ná, kjotíxoma-la Nainá, mìtsà ts'e jña xita xi ndaà s'ín. Ts'e-né jña xita xi mìkii 'nchréñijon koa mìkii síkitasòn; ts'e-né xita xi mìkii beèxkón Nainá koa ótsji jé; ts'e-né xita xi mì tsjeè tjín kjohitsjeèn-la xi tjé beèhikon jè kjoatsjeè-la Nainá; ts'e-né xita xi sík'en na'èn-la kò nea-la, kò ngats'ii xita xi xita sík'en.

¹⁰ Tikoá ts'e-né jña xita xi kjoa chijngui s'ín, jña xi xita xa'nda, xita xi xikjín fikò chijé nga otíjna. Tikoá ts'e-né jña xita ndiso kò xita xi mìtsà 'én kixi chja, jña xita xi ch'o tjín kjoa xi s'ín xi kondra ts'e kjohitsjeèn xi kixi tjín.

¹¹ Jè kjohitsjeèn kixi, k'oaa tjín xi okóya jña 'én jeya-la Nainá xi kjoa ts'e Cristo. Nainá xi 'ño jeya tjína, jè kisingatsja-na nga 'an kichjaya 'én koi.

Mé kjoa-ne nga kitsjaà-la kjondaà Nainá jè Pablo

¹² Tsjaà-la kjondaà Na'èn-ná Jesucristo. Ndaà chjí-la nga kitsjaà-na nga'ño tikoá ndaà kijtseè ikon-na nga 'an kisingatsja-na xá-la,

¹³ nas'ín k'e nga sa ítjòn, 'ño ch'o kis'iaàn; kichjajno-la Nainá; kondra kùtjingui-la; toòn kijtseè xita-la. Tanga kjohimakeè-na Nainá, nga kj'eè kii be, koa kj'eè kii mokjeiù-ná it'aà ts'e Cristo.

¹⁴ Tanga jè kjotjò-la Na'èn-ná isaa 'ño tse kitsjaà-na tikoá kisihiseèn-na nga mokjeiù-ná kò kitsjaà-na kjoatjòcha-la nga jè Cristo tjínakoaa.

¹⁵ Jña 'én koi, ngui 'én kixi-né. Mochjeén-né nga kokjeiù yije-la xita nga jè Jesucristo j'ii j'isò'nde nga kochrjekàjiù kjo'in ngats'ii xita xi jé tjín-la. Ngats'ii xita xi ch'o s'ín, 'aán tjína ítjoàn nga tsohotsjià jé.

¹⁶ Nas'ín 'ño ch'o kis'iaàn, Nainá kis'e-la kjohimatakòn it'aà ts'an. Jña xita, k'e nga skoe kó s'ín kisikò-na Na'èn-ná Jesucristo, nga 'ño tjín-la

kjoatsetakòn, tìkoáá kòkjeiín-là ìt'aà ts'e Cristo nga s'e-là kjoabinachon nìta mé nachrjein-ne.

¹⁷ Nainá, 'nga kàtìjna, kàtas'e-là kjoajeya nìta mé nó, nìta mé nachrjein-ne nga jè otixoma nìta mé nachrjein-ne koa mìkiì kjoehet'aà nachrjein-là nìta kjé-ne, tìkoá mìkiì tsejèn ñánda tìjna koa nguì jè tajngòò xi Nainá. K'oas'ín kàtama.

¹⁸ Ngaji Timoteo koni tsà ki'ndí-na xan-lè, sìngatsja-lè 'én koi, koni s'ín kitsò xìta xi kisìkjeén Nainá nga kiùchja ìt'aà tsiji, mé-ne nga ìt'aà ts'e 'én koi, tsjá-lè nga ñó nga ndaà s'ixá-là Nainá koni s'ín s'ixá soldado.

¹⁹ Ndaà kàtakjeiín-lè ìt'aà ts'e Cristo, tìkoá ndaà kàtìjna kjohìtsjeèn-lè. Tjín i'nga xìta xi mìkiì kisìs'in kjohìtsjeèn xi ndaà tjín. K'oáá komà-ne nga kisìkje-là ikon nga mì tì kiì kòkjeiín-là.

²⁰ K'oáá s'ín komàt'in jè Himeneo kò Alejandro xi 'an kisìkìtsajna kò xìta neij mé-ne nga kàtakixiya-ne nga mì taxkì kichjajno-là Nainá.

2

Mochjeén-né nga kítsi'batjiá xinguiáá

¹ Jè kjoa xi isa 'ñó mochjeén, k'oáá s'ín tìbìnè-nò nga tìtsi'batjiò ngats'ì xìta, tìnókjoat'aà-là Nainá, tìtsi'ba-là Nainá, tjiì-là kjondaà ìt'aà ts'e ngats'ì xìta xi tjín nga tìtsa isò'nde.

² Mochjeén-né nga kítsi'batjiá xi xìtaxá ítjòn tìtsajna kò ngats'ì xi kjotìxoma tjíya tsja mé-ne nga 'nchán kìtsajna-ná tìkoá tafi tafi sjichá yijo-ná tìkoá jchaxkoán Nainá kò jchaxkoán kjoa xi ndaà tjín.

³ K'e nga k'oas'ín s'eén ndaà tjín koa ndaà sasén-là Nainá xi ochrjekátjì-ná kjo'in.

⁴ Nainá, jè xi mejèn-là nga ngats'ì xìta kìtjokàjìin kjo'in tìkoá sijiìn-là kós'ín tjín xi kjoakixi.

⁵ Tà jngòò ma Nainá; tìkoáá tà jngòò ma xìta xi chjatjì-ná ìt'aà ts'e Nainá, jè xìta xi Jesucristo 'mì.

⁶ K'e nga kichíya nachrjein-là Nainá, Jesucristo kitsjaà kjotjò yijo-là nga k'en mé-ne nga kochjítjì-ne ngats'ì xìta nga ma kìtjokàjìin kjo'in. K'oáá s'ín kis'ìin nga kisijiìn yije-là xìta.

⁷ 'Aán kjòngatsja xá jè nga 'an tsibíxáya-na Cristo nga kichjàya 'én ndaà-là tìkoá kokòya-là jñà xi mìtsà xìta judío nga kòkjeiín-là ìt'aà ts'e Cristo tìkoá skoe xi kjoakixi. 'Èn kixií xi tìxan-lè, mìtsà 'én ndiso.

⁸ Ìt'aà ts'e xìta x'ín, mejèn-na k'e nga chjat'aà-là Nainá nìta ñánda i'nde tìtsajna, tsjeè kàtasíkitajna inìma-là k'e nga skímìtjèn-là tsja Nainá. Kì kjoajti tjiìn inìma-là, koa kì nchikjaán-kjoò-jèn.

⁹ Tìkoá jñà íchjín, jè nikje xi ndaà ok'ín-là kàtakjá. Kì nikje chjì ókjá. Kì taxkì sí'ñójno skò kò yijo-là tsojmì xi 'ñó chjì koni kichá oro kò perla. Chiba chiba kàtíndaà yijo-là mé-ne nga mì xìta skótsejèn-jno-ne.

¹⁰ Tà saá xá xi ndaà tjín kàtas'ín koni s'ín ok'ín-là jñà íchjín xi beèxkón Nainá.

¹¹ Jñà íchjín jyò kàtìtsajna k'e nga skóta'yà 'én-là Nainá; kàta'nchréñijon-là jè xi okóya.

¹² 'An, mìkiì tsjaà'nde nga jñà íchjín kotìxoma-là xi xìta x'ín koa kokòya-là. Íchjín, jyò kàtìtsajna.

¹³ Koií kjoa-là jè Nainá ítjòn tsibíndaà Adán, iskan tsibíndaà Eva.

¹⁴ Mìtsà jè Adán xi kichonachan-là; jè Eva xi chjoón-là. K'oáá s'ín komà-ne nga kisakò jé-là.

¹⁵ Tanga, jñà íchjín, tsà s̀ìkitasòn koni s'ín mejèn-là Nainá nga s'e-là ixti, kítjokàjiín kjo'in. Mochjeén-né nga ndaà kòkjeiín-là it'aà ts'e Cristo, nga s'e-là kjoatjòcha, nga tsjeè kítsajnakò Nainá koà ndaà s̀ìjchá yijo-là.

3

Kjoa xi mochjeén ts'e xita xi síkinda naxandá-là Nainá

¹ 'Én jè, nguì 'én kixi-né: Tsà tjín jngoò xita xi mejèn-là xá nga naxandá-là Nainá s̀ìkinda, 'ńó ndaà tjín xá xi mejèn-là.

² Jè xita xi síkinda naxandá-là Nainá mochjeén-né nga ndaà s'iin mé-ne nga mì yá xi ch'o kítso-là. Jngoò chjoón s'e-là; jngoò xita xi indaà tjín ikon; xita xi ndaà kosòn-là yijo-là; xita xi yaxkón nga ndaà tísjchá yijo-là; xi ndaà sí's'in-là xita xi bijchókò; xita xi ndaà ma-là okóya;

³ xi mìtsà xita ch'i; xi mìtsà xita kjaán-ko; xi mìtsà ton chijé kjòtsjakeè. Jè xita xi mochjeén xi ndaà xita, xi mìtsà kjoasì sí's'in-là, xi mìtsà ton kájno-là.

⁴ Mochjeén-né nga ndaà kjotíxoma-là xita ni'ya-là; ndaà s̀ìkixi ixti-là mé-ne nga s'e-là kjoxkón ixti tikoà s̀ìkitasòn koni s'ín tsò xita jchínga-là.

⁵ Tsà mìkiì ma-là otíxoma-là xita ni'ya-là, ¿kó s'ín koma s̀ìkinda xita naxandá-là Cristo?

⁶ Jè xi síkinda xita naxandá-là Nainá jè xi mochjeén xi kjòtseé kòkjeiín-là, mé-ne nga mì 'nga ikon koma-ne nga mì kjo'in s'e-là koni komàt'in xita neíí.

⁷ Mochjeén-né nga ndaà s̀ìjchá yijo-là mé-ne nga skoexkón-ne jñà xita xi mìkiì mokjeiín-là it'aà ts'e Cristo nga mì ch'o kíjna, nga mì jè xita neíí s̀ìkijne-là.

Kjoa xi mochjeén ts'e xita xi s̀ìchját'aà-là naxandá-là Nainá

⁸ K'oaá tís'ín tjín ts'e xita xi s̀ìkitasòn xá nga s̀ìchját'aà-là xita naxandá-là Nainá, jñà mochjeén xita xi yaxkón nga ndaà nchisíjchá yijo-là. Mìkiì koma s̀ìkijatjya-là 'én xi chja. Mìkiì koma xán koahijtakò. Mìkiì koma ton chijé kòtsjakeè.

⁹ Mochjeén-né nga ndaà kàtafit'aà-là kjoatjí'ma xi jye tsakó Nainá koni s'ín mokjeiín-ná it'aà ts'e Cristo. Tikoà mochjeén-né nga tsjeè kàtasíkítsajna kjohítsjeèn-là.

¹⁰ Jñà xita xi s̀ìkitasòn xá nga s̀ìchját'aà-là xita naxandá-là Nainá, ítjòn kàtachit'aà tsà nímé kjoa tjín-là, ikjoàn, k'eé kàtasíkitasòn.

¹¹ K'oaá tís'ín tjín ts'e íchjín; mochjeén-né nga yaxkón nga ndaà nchisíjchá yijo-là. Mì 'én ndiso kichja. Indaà k'oeè ikon. Ndaà s̀ìkitasòn yije nita mé kjoa-ne.

¹² Jè xita xi síkitasòn xá nga síchját'aà-là xita naxandá-là Nainá, mochjeén-né nga tà jngoò chjoón s'e-là. Ndaà kàtatíxoma-là ixti-là kò xita ni'ya-là.

¹³ Jñà xita xi ndaà s̀ìkitasòn xá koi, isa ndaà jchaxkón koà isa 'ńó ndaà s'e ikon koni s'ín mokjeiín-là it'aà ts'e Cristo Jesús.

Kjoa'ma-là Nainá

¹⁴ Mejèn-na nga kjíkon nítòn-lè, tanga tsà koií nachrjein-là kochrjein-ya-na, k'oaá ma-ne tikjiì-lè xojon jè

¹⁵ mé-ne nga jcha-ne kós'ín kítsajna kjoa xita xinguiáá ya jjiin naxandá-là Cristo xi tjínakon. Jè naxandá-là Cristo tjíya tsja 'én kixi-là Nainá.

¹⁶ Nguì 'én kixi-né nga 'ńó jeya jè kjoa'ma-là Nainá xi jye tsakó koni s'ín yaxkoán Nainá:

Nainá, xitaá komà nga j'ìi j'isò'nde;

it'aà ts'e Inima Tsjeè-là ki'ya-là nga tjín-là kjoakixi;

jñà àkjale kijtseè-né;

'én-là kinokjoàyajìin-là ngats'ìi xi mìtsà xita judío;

nga títsta isò'nde kòkjeiín-la xítà it'aà ts'e Cristo;
jeya kitjoéttjò-ne ján ngajmì.

4

Xítà xi mìtsà 'én kixi kòkòya

¹ Tanga jè Inìma Tsjeè-la Nainá ndaà bénojmiya-ná nga tsò: k'e nga chiba nachrjein chija-isa-la nga kjoíí òngòò k'a Cristo, s'eé xítà xi mì tì kii kòkjeiín-la it'aà ts'e Cristo. Yaá kjit'aà-la inìma ch'o-la neíí xi konachan koa kjohítsjeèn-la neíí sùkitasòn.

² Jñà kji'nchré-la xítà ndiso xi jò isén tjín-la. Xítà koi, nga jye kjòtájaàjìn kjohítsjeèn-la, mì tì kindà fiko-ne kjoach'o xi nchis'ín.

³ Jñà xítà koi mìkii tsjá'nde nga kixan xítà. Tìkoáá tjín tsojmì xi ma chine, mìkii tsjá'nde nga koma chjine. Tanga tsojmì koi, Nainá tsibíndaà nga tjí'nde-la nga koma skine xítà xi mokjeiín-la kò xi ndaà tíjìn-la kjoakixi. K'e nga skine tsjá-la kjondaà Nainá.

⁴ Ngats'ì tsojmì xi Nainá tsibíndaà, ndaà-né, mìkii koma kináchrjenguaá. Koma sikkjeén yije tsà k'oi-lá kjondaà Nainá k'e nga sikkjeén.

⁵ Jè 'én-la Nainá sùtsjeè tsojmì k'e nga kinókjoat'aà-lá.

Jngòò chi'nda-la Cristo xi ndaà síxá

⁶ Ji, tsà k'oas'ín kòkòya-la jñà xítà xinguiáá kjoa koi, 'ñó ndaà síxát'aà-la Cristo Jesús. Skasòn-isa kjohítsjeèn-lè it'aà ts'e 'én xi mokjeiín-ná kò kjohítsjeèn xi ndaà tjín xi ndaà tì'mìtjingui-la.

⁷ Tanga kì taxki nìs'in-la 'én jchínga ts'e isò'nde xi nímé chjí-la xi tà kjohítsjeèn-la xítà. Tìnè-la yijo-lè nga chaxkoín Nainá.

⁸ Tsà kìnè-lá yijo-ná nga k'oi-lá nga'ñó, sakó chiba-la kjondaà, tanga tsà kìnè-lá inìma-ná nga ndaà jchaxkoán Nainá, isaá sakó-ná kjondaà xi mochjeén-ná nga kjit'aà nachrjein. Sakó-ná kjondaà i it'aà nangui kò nga koma iskan tìkoáá sakó-ná ján ngajmì.

⁹ 'Én koi, 'én kixi-né. Mochjeén-né nga kàtakjeiín yije-la xítà.

¹⁰ Koií k'oas'ín binè-lá xá yijo-ná, tìkoá nìkjiaán kjo'in nga jè titsachiñá-lá Nainá xi tjínakon xi ma-la ochrjekàjìn kjo'in ngats'ì xítà. Jñà-né xi kítjokàjìn kjo'in xi mokjeiín-la it'aà ts'e Cristo.

¹¹ K'oaá s'ín tatixoma-la jñà xítà, k'oa tì s'ín takóya-la 'én koi.

¹² Kì yá xi ochrjekàngui-lè nas'ín ngui sa òxti-isi. Ya jìjìn-la xítà xi mokjeiín-la it'aà ts'e Cristo, jì, ndaà t'in ítjoìn mé-ne skíngui-ne kós'ín nokjoi, kós'ín 'nì, kós'ín tjòcha 'yi Nainá kò xítà, [kós'ín ndaà tjína inìma-lè], kós'ín mokjeiín-lè it'aà ts'e Nainá, kós'ín tsjeè tìnìjchí yijo-lè nga nguixkòn Nainá.

¹³ Skanda k'e nga kìjchokon-lè, k'oaá s'ín t'jìn: tìxkejìn-la xítà 'én-la Nainá; tìnè-la nga 'ñó kàt'eé-la ikon; tìkoá takóya-la.

¹⁴ Kì nìjchàajìn-jèn nga síxát'aà-la Nainá it'aà ts'e kjotjò xi kitjoé-lè k'e nga jñà xítà jchínga-la naxandá-la Nainá tsohósòn-lè tsja nga jñà kùichja ngajo-la Nainá it'aà tsjì.

¹⁵ It'aà ts'e kjoa koi, kjit'aà nachrjein tiyakoii, tìkoá tixákoii mé-ne nga skoe yije-ne xítà nga ndaà tímajchíngakoii.

¹⁶ Ndaà tìkindii yijo-lè mé xi 'nì. Tìkoá t'jìn kindà jè 'én xi okoòya-la xítà. Kixi tìjini. Tsà k'oas'ín sùkitasòn, ngaji, kítjokàjìn kjo'in; tìkoáá kítjokàjìn kjo'in jñà xítà xi 'nchré-lè.

5

Kjondaà xi mochjeén it'aà ts'e xítà xi kj'eii

¹ Jñà xit̃a xi jye 'ñó jchínga, k̃i taxk̃i ñikaká-la; k'oaá s'ín t̃enojmíya-la koni tsà na'èn-lè ma; t̃ikoa jñà xi ìsa ixti-ìsa, k'oaá s'ín t̃enojmíya-la koni tsà 'ndsì ma.

² Jñà íchjín xi jye 'ñó jchínga, k'oaá s'ín t̃enojmíya-la koni tsà nea-lè ma. Jñà xi íchjín ixti k'oaá s'ín t̃enojmíya-la koni tsà tichji ma nga nguì tsjeè t̃jna kjohítsjeèn-lè.

³ T̃isikò jñà íchjín xi jye k'en x'in-la tsà kixi kjoa nga tsjìn xi osìko.

⁴ Tsà t̃jín íchjín ka'àn xi t̃jín-la ixti, kò tsà t̃jín-la ixti 'ndejí, ixti koi, ítjòn k̃atasíkitasòn ya ni'ya-la kós'ín beèxkón Nainá. K̃atasìko xit̃a xíkjín, mé-ne nga tsjá ngajo-la kjoat̃jòcha ts'e xit̃a jchínga-la. Kjoa koi, ndaa t̃jín. K'oaá s'ín sasén-la Nainá.

⁵ Jè chjoón ka'àn xi kixi kjoa nga t̃jna tajngoò, Nainá 'ñót'aà-takòn kò nachrjein kò ñitjen bítsi'ba nga chjat'aà-la Nainá.

⁶ Tanga jè chjoón ka'àn xi kjotsja ts'e isò'nde xi ch'o t̃jín tsjá-la yijo-la, ít'aà ts'e Nainá t̃jnak'en-né nas'ín t̃jnakon.

⁷ K'oaá s'ín tatixoma-la kjoa koi mé-ne nga ndaa s̃ijchá-ne yijo-la nga mì yá xi ch'o k̃itso-la.

⁸ Tsà yá xi mìkì s̃ikinda xit̃a xíkjín nga s̃ichjat'aà-la, mats'iãko ítjòn-ne xi ya t̃itsajnakò ni'ya-la, tsà mì k'oaá s'ín kosìko xíkjín, mìkì nchisíkitasòn 'én xi mokjeiín-la ít'aà ts'e Cristo. Ìsaá ch'o nchisíkítsajna yijo-la mì k'oaá-ne koni jñà xit̃a xi mìkì mokjeiín-la 'én-la Nainá.

⁹ Íchjín ka'àn xi s̃it'aà xojon nga kochjat'aà-la, tà jñà-né xi tsato jàn kaàn nó t̃jín-la xi kixi tsibítsajnakò x'in-la,

¹⁰ jñà xi 'ya-la nga ndaa kisijchá yijo-la ts'e xá xi ndaa t̃jín: tsà ndaa kisijchá ixti-la, tsà ndaa kisìs'in-la xit̃a xi ijchòkon ni'ya-la, tsà tsaníjno ndsokò xit̃a-la Cristo nga ndaa kisìs'in-la, tsà kisichjat'aà-la xit̃a xi kjoa t̃itsajjìn. Tsà k'oas'ín kisìkitasòn yije xá xi ndaa t̃jín, koma s̃it'aà xojon.

¹¹ Tanga jñà íchjín ka'àn xi sa ixti ìsa mìkì koma xojon s̃it'aà. K'e nga x'in kjoajjìn-la, mìtsà 'iín koma-la nga k̃inchat'aaxìn-la Cristo nga k̃ixan ìjngoò k'a-ne.

¹² Tsà k'oas'ín s'iin, kjo'iín s'e-la nga mìkì nchisíkitasòn koni s'ín kitsjaà tso'ba nga sa ítjòn.

¹³ Íchjín koi, t̃ikoaá mangaá-la nga xk̃i xi ján ni'ya binchimajto. Ma ts'eè-né. Mìtsà tà ma ts'eè. T̃ikoaá 'én ndiso bíxkó. Chjajjìn chja'a ñánda mì jñà oko-la.

¹⁴ An, k'oaá s'ín mejèn-na nga k̃atixan ìjngoò k'a-ne jñà íchjín ka'àn xi sa ixti ìsa. K̃atas'e-la ixti. Ndaà k̃atatixoma ni'ya-la mé-ne nga mì ch'o k̃ichjajno-ná xi kondra.

¹⁵ T̃jín i'nga íchjín ka'àn xi jye tsohófaya-ne, jè k̃iit'aà ìjngoò k'a-la xit̃a neí.

¹⁶ Tsà jngoò xit̃a xi mokjeiín-la 'én-la Nainá tsà t̃jín xíkjín xi chjoón ka'àn, mochjeén-né nga k̃atasíchjat'aà-la xíkjín mé-ne nga mì jè naxandá-la Cristo 'ñó skanè-ne xá. Jè naxandá-la Cristo komaá kosìko xi kixi kjoa nga nguì ndí chjoón ka'àn ìma.

¹⁷ Jñà xit̃a jchínga xi ndaa otixoma ya naxandá-la Nainá, ok'ín-la nga ìsa ndaa jchaxkón koa kochjat'aà-la xi mochjeén-la, mats'iãko-ne jñà xi chjaya koa okóya 'én-la Nainá.

¹⁸ Xojon-la Nainá, k'oaá s'ín t̃ichja nga tsò: “Jè nchraja xi síxá, k̃i na'ya bì'a tso'ba.” T̃ikoaá t̃jít'aà xi tsò: “Jè xit̃a xi síxá, mochjeén-né nga k̃atichjì-la.”

¹⁹ Kì k̃i nìs'in-la tsà yá xi óngui xit̃a jchínga xi otixoma ts'e naxandá-la Nainá tsà mì jò jàn ma-ne xit̃a xi k̃ijtseè-ne xkon kjoa xi komà.

²⁰ Tanga jñà xit̃a jchínga xi ótsji jé-ìsa, t̃ikaká-la nga nguixkon ngats'ì xit̃a naxandá-la Nainá, mé-ne jñà xit̃a xi i'nga k'oaá s'ín sincháxkón-ne.

²¹ Tibìnè-lè nga nguixkɔn Nainá kɔ Na'èn-ná Jesucristo kɔ àkjale-la xi xó jè jaàjìn-ne, ndaà tikitasoìn kjoa koi. Nímé kjoa xi bìnɔàjìn k'e nga kj'eè kiì 'ya-la tsà kixi kjoa. Kì chjaàjìn xita xi nìs'in-la; ngàsòn tìs'in yije-la.

²² Kì yá xita xi taxki chjaàjìn nga kjósòn-la ndseji k'e nga k'oi-la xá jìjìn naxandá-la Nainá. Ítjòn ndaà tíkítsjìn mé-ne nga mì jì kòkòt'aà-lè jé-la xita xi kj'eí. Tsjeè tìjni.

²³ Nga ch'in tìjín kjit'aà-la indso'boi, kì tà nandá 'yoi, tìkoáá t'i chibi nandá vino.

²⁴ Tjín i'nga xita xi tìk'e 'ya-la jé-la k'e nga tìkj'eè sìnɔàjìn. Tanga tìkoáá tìjín i'nga xi iskan 'ya-la.

²⁵ K'oa tìs'in tìjín xá xi ndaà tìjín, tìjín xi nìton beè xita. Tìkoáá tìjín xá ndaà xi mì nìton 'ya-la tanga mìkiì koma jngòò k'a sijna'ma. Iskan jcha-la.

6

¹ Ngats'ìi xita naxandá-la Nainá xi ch'inda tìtsajna'ńó, ndaà kàteèxkón nei-la mé-ne nga mì yá xi ch'o kichjajno-la Nainá kɔ 'én xi okoòyáá ìt'aà ts'e Cristo.

² Jńà xita ch'inda xi mokjeiín-la nei-la ìt'aà ts'e Cristo, mochjeén-né nga ngàsòn ndaà kàteèxkón nei-la nga 'ndseé joó ìt'aà ts'e Cristo. Ísáá ndaà kátasíxá-la nga ngàsòn mokjeiín-la 'én-la Nainá tìkoáá tsjakeè xíkjín.

Jńà 'én koi, takóyi tìkoáá tìnókjoayi.

Kjoa xi sakó-ná k'e nga tɔn matsjachaá

³ Tsà tìjín xita xi kj'eí tsò 'én xi okóya nga mì tìjngòò ikon koni tsò 'én ndaà-la Na'èn-ná Jesucristo tìkoáá mìkiì tìjngòò ikon ìt'aà ts'e kjotixoma koni s'in yaxkoán Nainá.

⁴ Xita koi, xita 'nga takòn-né, nímé machiya-la. 'Nó tsjakeè nga ótiya-ne 'én xi nímé chjí-la. Yáá nchrobát'aà-ne nga maxítakòn-chaá xinguiáá, nga bixkán-kjoáá, nga nokjoàjno-lá xinguiáá 'én xi ch'o tsò, tìkoáá ch'o nìkítsjeèn ìt'aà ts'e xita xi kj'eí.

⁵ Tìkoáá yáá nchrobát'aà-ne nga kjit'aà naxrjein nchikjaán-kjoò jńà xita xi mì kixi síkjeén kjohítsjeèn-la kɔ mì kjoakixi fit'aà-la. K'oaá s'in síkítsjeèn, tsò-né: tsà ndaà jchaxkoán Nainá, yáá sakó-ná tɔn. Ngaji, kì k'oaá tìjín kjoa xi nìkítsjìn.

⁶ Kixíi kjoa, tseé kjondaà sakó-la xita k'e nga beèxkón Nainá tsà tìkoáá tsja tìjín-la inima-la mé xi tìjín-la.

⁷ Nga nímé xi kich'á k'e nga kits'iaán i isò'nde. Tìkoáá nímé xi kjikoaá k'e nga kiyá.

⁸ Tsà tìjín-ná tsojmì xi chineé koa tìjín-ná nikje xi chíkjá, mochjeén-né nga tsjaá kíjngòò-lá takoán.

⁹ Tanga jńà xita xi mejèn-la kjoanchíná, nga mìkiì chíkjoako-la kjohítsjeèn xi ch'o tìjín nga kjìn tsojmì mejèn-la, yáá kixongui ch'an koa yáá s'ingui'ńó. 'Nó mejèn-la kjoa xi nímé chjí-la koa xi ch'o síko-ná, kjoa xi síkíts'ón xita koa yáá chijajìn.

¹⁰ K'e nga tɔn matsjachaá, yáá mats'ia-ne kjoa ts'e jé kɔ ngats'ìi kjoa xi ch'o tìjín. Tjín i'nga xita xi jye chinchat'aaxìn-la kjoa xi mokjeiín-ná ìt'aà ts'e Cristo jè ngatjì-la nga tse tɔn mejèn-la. K'oaá s'in ma-ne nga tìjńà-ne tse kjo'in tsjá-la yijo-la.

Tìnè-la yijo-lè kjoa xi mokjeiín-lè

¹¹ Tanga ngaji xi xita-la Nainá 'mì-lè, tìsít'aaxìn-la ngats'ìi kjoa koi. Jè t'in tìjngui-la xi kjoakixi. Jchaxkoín Nainá. Ndaà kàtakjeiín-lè ìt'aà ts'e Cristo. Kátas'e-lè kjoatjòcha. Kátas'e-lè kjoatsetakòn. Indaà kjoa tìkíjni inima-lè.

¹² Ndaà tixkàtjì kjoa xi mokjeiín-ná it'aà ts'e Cristo. Kì nìkíjna-jèn ndiyá kixì ts'e kjoabinachon xi mìkìi fehet'aà nìtá kjé-ne. Nga koií xá kùichja-lè Nainá. Ngaji jyeé k'oas'ín ndaà kits'iì ndsoboì nga kinìkixiyi 'én xi mokjeiín-lè it'aà ts'e Cristo nga nguixkon xìtá xi kjin ma-ne nga kù'nchré.

¹³ I'ndeì jngoò xá tìbìnè-lè nga nguixkon Nainá xi síkítsajnakon yije nìtá mé xi tjin, tìkoa nguixkon Jesucristo xi ndaà kitsjaà tso'ba nga kisikixiya 'én ndaà-lá k'e nga kùichja nga nguixkon Poncio Pilato.

¹⁴ K'oaá s'ín tìhotìxoma-lè, ndaà tìkitasoìn kjotìxoma koi; kì nìkjàtjìya-lá mé-ne nga mì yá xi kòchrjengui-lè skanda k'e nga kjoíì jngoò k'a Na'èn-ná Jesucristo.

¹⁵ K'e nga kijchòya nàchrjein, Nainá, k'oaá s'ín sùikitasòn yije kjoa koi. Mé tà ndaà-la Nainá nga jè tajngoò tíhotìxoma. Jè tìjna ítjòn-lá jñà xi xìtaxá ítjòn títsajna tìkoa tìjna ítjòn-lá jñà xi xìtá sko-lá títsajna.

¹⁶ Tajngoò Nainá xi xó k'oas'ín tìjna-ne nga mìkìi biyaa. Yaá tìjnajìn kjoahiseèn ñánda mì yá xi koma kijchò kinchat'aà-lá. Nì saá jngoò xìtá beèxkon nì mìkìi tìj'nde-lá nga skoexkon. Nainá, kjit'aà nàchrjein jeya kàtìjna. Kàtayaxkón kjotìxoma-lá nìtá kjé-ne. K'oas'ín kàtama.

¹⁷ Jñà xìtá nchíná xi tjin i isò'nde, k'oaá s'ín tìnè-lá: “Kì bí'nga-lá ikon.” Kì koií ma'ñót'aà ikon kjoanchíná xi tjin-lá nga tà nìton fehet'aà. Jè kàtama'ñót'aà ikon Nainá xi tìjnakon nga jè tsjá yije-ná xi mochjeén-ná skanda síkatonè-lá mé-ne nga kò kjotsja sùkjeén tsojmì xi tsjá-ná.

¹⁸ Koatìn-lá, kjondaà kàtas'ín. Kàtas'e-lá kjoanchíná nguixkon Nainá it'aà ts'e kjondaà xi s'ín. Kì kjoaxkon fìkjaá, kò inìma-lá kàtatsjá itsé-lá xíkjin mé xi tjin-lá.

¹⁹ Tsà k'oas'ín sùikitasòn nàchrjein i'ndeì, s'eé-lá kjoanchíná xi mìkìi kjoehet'aà k'e nga jye títsajna nguixkon Nainá. Tìkoaá tjoé-lá kjondaà xi nguì ts'e kjoabinachon.

'Én xi fehet'aà-ne

²⁰ Ngaji Timoteo, ndaà tìkitasoìn 'én ndaà-lá Nainá xi jì kjòngatsjei. Kì kùì na'yà-lá 'én ndiso xi nìmé chjì-lá. Kì kùì nìs'in-lá kjoa xi chitiya-ná ts'e kjoachjìne ndiso.

²¹ Tjin i'nga xìtá xi k'oa tjin kjohítsjeèn fitjìngui-lá. K'oaá ma-ne nga chinchat'aàxìn-lá kjoa xi mokjeiín-ná it'aà ts'e Cristo.

Jè kàtìjnako-lè kjondaà-lá Nainá.

Xojon carta-la San Pablo xi ma-ne jò xi kiski-la Timoteo

Kó tsò Pablo nga síhixat'aà Timoteo

¹ 'An, Pablo, tikji-lè xojon jè. Nga 'an tsibíxáya-na Jesucristo nga k'oaá s'ín kjòmejèn-la Nainá. K'oaá s'ín kitsjaà tso'ba Nainá nga kijnakon inima-ná it'aà ts'e Cristo Jesús.

² Ngaji Timoteo xi 'nó matsjake-lè koni tsà ki'ndí ts'an xan-lè, Nainá xi Na'èn-ná ko Na'èn-ná Jesucristo kàtatsjá-lè kjondaà, kàtahimakeè-lè, kàtas'e-la kjoa'nchán jjiin inima-lè.

'Én xi tsjá Pablo it'aà ts'e Cristo

³ Mikii jchàajiiin-na ko nachrjein ko nitjen bitisi'batji-lè tikoà tsjaà-la kjondaà Nainá, jè xi 'an bexkoán koni s'ín kijtseèxkón jña xita jchinga-na nga nguì tsjeè tjín kjohítsjeèn-na.

⁴ K'e nga bitsjeèn-na kjoa ts'e ndáxkoiin mejèn-na nga skoeè ijngoò k'a-lè mé-ne nga kotsja-la inima-na.

⁵ Bitsjeèn-na nga nguì ndaà mokjeiin-lè it'aà ts'e Cristo koni s'ín kòkjeiin ítjòn-la neajchá-lè Loida ko nea-lè Eunice. 'An k'oaá s'ín makixi-na nga ngaji tikoá ndaà mokjeiin-lè.

⁶ Koií k'oas'ín tisikítsjeèn-lè nga isa ndaà tikjiin kjotjò xi kitsjaà-lè Nainá nga ndaà tixá-la, jè kjotjò xi kitjoé-lè k'e nga 'an tsakàsòn-lè ndsaa.

⁷ Nainá, mìtsà inima tsakjón kitsjaà-ná. Jè kitsjaà-ná Inima Tsjeè-la nga tsjá-ná nga'ño, nga tsjá-ná kjoatjòcha, nga tsjá-ná kjohítsjeèn kós'ín s'een nga kixi sijchá yijo-ná.

⁸ Koií kjoa-la kì masobà-lè nga nokjoàkoi xita it'aà ts'e Na'èn-ná Jesucristo. Tikoà kì masobà-lè xi it'aà ts'an nga ndayá tjina'ya koií kjoa-la nga ya sixát'aà-la Na'èn-ná. Tikjeiin-ko-ná kjo'in xi it'aà ts'e 'én ndaà-la Nainá xi kjoa ts'e Cristo. Jè Nainá tsjá-lè nga'ño xi kochjeèn-lè.

⁹ Nainá, jyeé tsachrekajiiin-ná kjo'in. K'oaá s'ín kiichja-ná nga tsjeè sijchá yijo-ná. Mìtsà koi kjoa-la nga ndaà ki'né. Koi-né nga k'oas'ín kjòmejèn-la Nainá tikoà kitsjaà-ná kjondaà-la xi it'aà ts'e Cristo skanda tisa tàts'en-la kjoa k'e nga tikj'eè sindaà isò'nde.

¹⁰ I'ndeì Nainá jyeé tsakó kjondaà-la nga jyeé j'ii Jesucristo xi ochrekajiiin-ná kjo'in. Jaàxin-ná nga'ño-la kjoabiyaà. Xi it'aà ts'e 'én ndaà-la Nainá xi kjoa ts'e Cristo, tsakó-ná kjoabinachon tikoà tsakó-ná nga mìtsà jngoò k'a kiyá nità kjé-ne.

¹¹ Nainá, 'aán kisìngatsja-na xá jè nga 'an kichjàya 'én ndaà-la Nainá xi kjoa ts'e Cristo. Tsibíxáya-na it'aà ts'e xá-la nga 'an kokoòya-la jña xi mìtsà xita judío.

¹² Tsee kjo'in tisikjiaán tà jè ngatji-la 'én xi 'an chjàya. Tanga mikii masobà-na. Jyeé tjiiin-na nga it'aà ts'e Cristo mokjeiin-na. Tikoá ndaà tjiiin-na nga ta jngoò jè Nainá xi tjín-la nga'ño. Ndaà sìkinda jè xá xi 'an kisìngatsja-na skanda jè nachrjein k'e nga kjoii ijngoò k'a-ne Jesucristo.

¹³ Ndaà tjiiin takoìn 'én ndaà xi 'an tsakoòya-lè koni s'ín tjín 'én xi mokjeiin-ná ko kjoatjòcha xi tjín-ná nga Cristo titsajnaakoá.

¹⁴ Ndaà tikitasoìn xá ndaà xi jì kjòngatsjei. Jè sìchját'aà-lè Inima Tsjeè-la Nainá xi tjijnajiiin inima-ná.

¹⁵ Jyee tíjìin-lè ngats'iì xi títsajna nangui Asia, jyee kitsjeiìn takòn-na, koni jè Figelo kọ Hermógenes.

¹⁶ Nainá kàtahimakeè xità ni'ya-la Onesíforo. Kjin k'a j'iì síjehikon-na. Mikiì kjòsobà-la nas'ín ndayá tíjna'ya.

¹⁷ Tà saá, k'e nga j'iì i Roma skanda mikiì kisikjáya nga 'ñó tsohótsji-na skanda kó nga kisakò-la ñánda tíjnaa.

¹⁸ Na'èn-ná kàtahimakeè jè Onesíforo k'e nga kijchò nachrjein-la Nainá. Ngaji jyee ndaà tíjìin-lè, ndaà kisichját'aà-ná ján Éfeso.

2

Timoteo, jngò soldado-la Cristo xi ndaà síxá-la

¹ Ngaji Timoteo koni tsà ki'ndí ts'an xan-lè, tjìi-la nga'ñó yijo-lè it'aà ts'e kjondaà xi tsjá Jesucristo nga jè titsajnaakoá.

² Jè 'én xi kina'yà-ná nga kichjàya nguixkon nga kjin ma xità xi kii'nchré, k'oaá s'ín takóya-la xi xità kixi xi ndaà ma-la okóya mé-ne k'oaá tis'ín kokóya ngajo-la xità xi k'ejí.

³ Ngaji Timoteo, tikjeiín-kọ-ná kjo'in nga ndaà mìt'aà-la Jesucristo koni jngò soldado xi síkjeiín kjo'in.

⁴ Jngò xità xi soldado síkitasòn mikiì tíj'nde-la nga k'ejí xá skóngajìin xi tíjín isò'nde, tíjìnè-la nga ya síkitasòn-la jè xi kitsjaà-la xá mé-ne nga ndaà kíjnakọ.

⁵ K'oaá tis'ín tíjín jè ts'e xità xi síská. Tsà mì kixi síská koni s'ín tíjín kjotíxoma-la mikiì tjoé-la chjí-la.

⁶ Xità xi bínè-la yijo-la nga ndaà síxá nga bíte tsojmì tje, k'e nga jye kojchá tsojmì, jè tjoé ítjòn chiba-la tsojmì xi majchá koni tsà chjí-la.

⁷ Tikítsjiìn koni s'ín tíxan-lè. Jè Nainá isa ndaà tsjáya yije-lè kjohítsjeèn.

⁸ Tikítsjiìn it'aà ts'e Jesucristo, jè xi jaáyajìin-la mik'en xi tje-la xitaxá ítjòn xi David ki'mì. K'oaá tsò 'én ndaà-la Nainá xi kjoa ts'e Cristo xi 'an chjàya.

⁹ Koií kjoa-la 'én ndaà-la Nainá xi kjoa ts'e Cristo xi 'an chjàya, tìsikjiaán kjo'in skanda na'ñó kicha tíjít'aà'ñoá nga tíjna'ya ndayá koni jngò xità xi 'ñó ts'en. Tanga jè 'én-la Nainá mìtsà tíjít'aà'ñoó jya ndayá.

¹⁰ Koií kjoa-la tìsikjiaán yije kjo'in xi kjondaà ts'e xità xi xó jaajìin-ne Nainá mé-ne nga tikoá kitjokajìin-ne kjo'in xi it'aà ts'e Cristo Jesús; s'ee-la kjoajeya xi mikiì fehet'aà nita kjé-ne.

¹¹ 'Én koi, 'én kixi-ne nga tsò:

Nga ya k'en-koaá Cristo, tikoá yaá kitsajnakon-koaá.

¹² Tsà chíkjoa-ná kjo'in tikoá yaá kotíxomakoá Cristo.

Tsà kixoán mikiì bexkoan, jè k'oaá tí kitso-ná mikiì bexkoan.

¹³ Tsà mikiì síkitasoán 'én xi nokjoá, tanga Nainá síkitasòn 'én xi chja.

Mikiì koma síkijatjìya 'én-la.

Jngò xità xi ndaà síxá-la Cristo

¹⁴ Tikítsjeèn-la kjoa koi. Tínoákoá koi nga nguixkon Nainá mé-ne nga mì kohótiya-ne kjoa ts'e 'én. Jè kjoa xi chitiya-ne nímé chjí-la. Tà saá síkíts'ón xità xi 'nchré.

¹⁵ 'Ñó ndaà tíjìnè-la yijo-lè mé-ne nga ndaà kíjna-ne nga nguixkon Nainá. Nímé xi kosobà-lè nga ndaà tíjín xá-lè koa ndaà okoóyi 'én kixi-la Cristo.

¹⁶ Kì taxkì nokjoà-jèn 'én xi mikiì sasén-la Nainá xi nímé chjí-la. Jña xità xi k'oas'ín chja, isaá 'ñó binchat'aaxìn-isa-la Nainá.

¹⁷ Jña 'én xi ch'o tsò k'oaá ngaya-la koni ch'in nchikòn xi bi'ndo-ne yijo-ná. K'oaá s'ín chja Himeneo kọ Fileto

¹⁸ nga jyeé chinchat'aàxìn-là xi kjoakixi nga tsò: “Jè kjoa xi faáya-là mik'en jyeé tsato-né.” K'oaá ma-ne sískáya i'nga-là xita kjoa xi mokjeiín-là.

¹⁹ Tanga Nainá jyeé tsibíjna'nó tàts'en jngoò kjoakixi ñánda tjit'aà 'én xi tsò: “Nainá beèxkon-né xi xita ts'e”; ngats'ii xi tsò: “An, xita-là Cristo-ná, kàtinchat'aàxìn-là kjoa xi ch'o tjin.”

²⁰ Jngoò ni'ya xi je kji, tjin tsojmì xi oro kò plata. Tikoáá tjin tsojmì xi yá kò xi ni'nde. Tjin tsojmì xi nachrjein nchijòn mochjeén koá tjin xi tà k'e mochjeén k'e nga ndaà tíma.

²¹ Tsà sìtsjeé kjohítsjeèn-ná nga kinchat'aàxìn-lá kjoa xi ch'o tjin, k'oaá s'in sìkjeén-ná Nainá koni tsojmì tsjeé xi tà k'e mochjeén k'e nga ndaà tíma. Titsajndaà nga sikitasoán nita mé xá-là Nainá xi ndaà tjin.

²² Ngaji Timoteo, tsit'aàxìn-là kjohítsjeèn-là ixti xi ch'o tjin. Koií t'in tjingui-là xi kjoakixi, kò kjoa xi mokjeiín-ná it'aà ts'e Cristo, kò kjoatjòcha, kò kjoa'nchán takòn. K'oas'in t'in tjingui-là kjoa koi kò xita xi tsjeé tjin inima-là nga chjat'aà-là Nainá.

²³ Ki kjoa nchikón nìs'in-là xi nimé chjí-là. Jyeé ndaà tíjìn-lè nga kjoasii ótsji.

²⁴ Jngoò ch'inda-là Nainá mìkii mochjeén nga kjoasii skóngajìn. Ndaà kàtasikò yije xita. Kàtijnndaà nga kòkòya 'én-là Nainá. Kàtas'e-là kjoatsetakòn mé kjoa xi mat'in.

²⁵ Kòó kjondaà-là kàtasíkixiya jña xi xita kondra, tsà koi nachrjein Nainá tsjá isa-là nachrjein nga sìkájno jé-la nga mì tì jé kohótsji-ne mé-ne nga kòkjeiín-là xi kjoakixi.

²⁶ K'e nga táx'anguì xkon, komaá kitjokàjìn kjoanachan-là neií nga ya tjit'aà'nó-là nga k'oas'in sikitason-là koni s'in mejèn-là neií.

3

Mé kjoa ch'o xi s'iin xita k'e nga tímachraña nga kjoehet'aà nachrjein

¹ Ngaji Timoteo, kàtasijìn-lè k'e nga tímachraña't'aà nachrjein nga kjoíí jngoò k'a-ne Cristo, kjin skoya kjoa s'e xi mìkii ndaà tjin.

² Jña xita xi s'e, tà yijo-laá 'nó sìs'in-là; toón 'nó kotsjakeè; yijo-laá 'nó ndaà sìkítsajna; xita 'nga ikoón koma; kichjajno-là Nainá kò xita; mìkii kii'nchréñijon-là xita jhínga-là; mìkii tsjá ngajo-ne kjondaà, mìkii skoèxkón Nainá,

³ mìkii sìtjòkèè xíkjin, jngoò k'a mìkii sìje-là ikon, 'én ndiso tsját'in xíkjin, mìkii sìkinda yijo-là mé kjoa xi s'iin, xita ch'o koma, kondraá kjoí-là kjoa xi ndaà tjin,

⁴ kondraá kjoí-là amigo-là, mìtsà ítjòn sìkítsjeèn mé kjoa xi s'iin, 'nó 'nga ikon koma, jè sìtsjakeè kjoa ts'e isò'nde xi sasén-là yijo-là, mìkii sìtsjakeè Nainá.

⁵ K'oaá s'in s'iin koni tsà beèxkón Nainá, tanga mìkii tsjá'nde nga jè nga'nó-là Nainá sìxájìn inima-là.

Xita koi kii nìs'in-là.

⁶ Jña xita koi, ótsji'nde-là nga fahas'en ni'ya-là íchjín xi mìkii beèxkón yijo-là kò xi tse jé tjin-là nga ma konachan-là. Íchjín koi, yaá fitjingui-là kjoa xi isa 'nó ch'o tjin koni s'in mejèn-là yijo-là.

⁷ Kjit'aà nachrjein nchikota'ya 'én xitse tanga nijngoò nachrjein fahas'en-jìn-là xi nguì kjoakixi.

⁸ Jña xita koi, k'oaá tìs'in binchahikon-là xi kjoakixi, koni kis'iin xita chjine xi ma-là bíndaà xi ki'mì Janes kò Jambres nga chinchahikon-là Moisés. Xita koi, jngoò k'aá ch'o tjin kjohítsjeèn-là. Bitjongui-né nga nguixkon Nainá nga mìkii mokjeiín-là xi kjoakixi.

⁹ Tanga mìkiì sikkijne. Kijchò nachrjein nga skoe yije xita kjoa tondo-la. K'oaá s'in jchat'in-la koni jè Janes ko Jambres.

Kó tsò Pablo nga bú'tin-la Timoteo nga 'én kixi kokòya

¹⁰ Tanga ji Timoteo k'oaá s'in tì'mitjingui-la koni s'in tsakoòya-lè, koni s'in tísjchá yijo-na, koni s'in tjín kjohítsjeèn-na mé kjoa xi tìfitjingui-la. K'oaá tís'in mokjeiín-lè koni s'in mokjeiín-na 'an it'aà ts'e Cristo. K'oaá s'in tjín kjoatsetakòn-lè ko kjoatjòcha-lè koni s'in tjín ts'an. K'oaá tís'in chíkjoa yije-lè nita mé kjoa-ne koni 'an.

¹¹ Tíjìn-lè koni s'in tìsikjiaán kjo'in it'aà ts'e Cristo tikoá ongatjingui-na xita kondra koni s'in komà'tian ján naxandá Antioquía, Iconio ko Listra. Taxki toòn kijtsee-na xita nga tsangatjingui-na tanga jè Na'èn-ná tsachrjekàjìn yije-na kjoa koi!

¹² Kixii kjoa, ngats'ii xi mejèn-la skoexkón Na'èn-ná Jesucristo, k'oaá tís'in s'e-la kondra nga kjitjinguikeè xita.

¹³ Tanga jña xita xi ch'o s'in, xi konachan, kjit'aà nachrjein, saá 'nó, saá 'nó ch'o s'in nga skónachan-la xita, tanga k'oaá tís'in komat'in ngajo-ne nga skónachan-la xita xi k'ejí.

¹⁴ Tanga ngaji, ndaà kixi tikoji jña kjoa xi kichita'yi xi jye k'oas'in ndaà kòkjeiín-lè. Jyeé tíjìn-lè yá xita xi tsakóya-lè.

¹⁵ Skanda tik'e-né nga tisa ndí ti titsjoi, kiyaxkoin Xojon Tsjeè-la Nainá jè xi koma-la sikkijne-lè kó s'in kitjokàjìn kjo'in nga mokjeiín-lè it'aà ts'e Cristo Jesús.

¹⁶ Ngats'ii 'én xi tít'aà Xojon-la Nainá, kjohítsjeèn ts'ee Nainá nga kitjei. K'oaá s'in mochjeén nga okóya-ná, nga okó-ná k'e nga ch'o 'nè, nga síkixiyandaà-ná, nga okó-ná ndiyá kixi,

¹⁷ mé-ne jña xi xita-la Nainá 'mì-ná jngoò k'a ndaà kitsajndaá nga sikitasoán yije kjoa xi ndaà tjín.

4

Kó tsò Pablo nga tìbìnè-la Timoteo nga 'Én-la Nainá kichja

¹ 'Nó tìbìnè-lè nga nguixkon Nainá ko Na'èn-ná Jesucristo jè xi jeya kjoii ijngoò k'a-ne koni xitaxá itjòn nga koìndaàjìn-la xita xi títajnakon ko xi jye k'en.

² Tìnokjoayi 'én ndaà-la Nainá xi kjoa ts'e Cristo. Tijnandeii nga kjit'aà nachrjein nita mé kjoa xi tjín. Chikoji xita k'e nga ch'o s'in; tikixiyi; tì'in-la nga 'nó kàt'ee-la ikon. K'e nga k'oas'in s'jìn, tsee t'jìn takoin, ko kjondaà-lè takóya-la.

³ Kijchò nachrjein k'e nga jña xita mì tì kiì kokjeiín-la nga kji'nchré 'én ndaà xi kixi tjín xi jña okoòyaá it'aà ts'e Cristo. Kjin maestro kohótsji xi kokòya-la kjoa xi jña komejèn-la nga kji'nchré-la.

⁴ Kínchat'aaxìn-la xi kjoakixi, koií kjit'aà-la xi taxki cuento jchínga xi mìtsà kixi kjoa.

⁵ Tanga ngaji Timoteo, indaà t'è-la takoin nita mé kjoa-ne, tikjeiín kjoa ts'e kjo'in, koi xá t'jìn nga tika'bisoìn 'én ndaà-la Nainá xi kjoa ts'e Cristo, ndaà tikitasoìn xá xi ji kjòngatsjei.

⁶ 'An, jye tìtsjaà kjotjò-la yijo-na Nainá. Jyeé ijchò nachrjein nga kiyá.

⁷ Jyeé ndaà kiskaàn-tjià xá-la Cristo; jyeé ndaà kisikitasoàn xá xi 'an kjòngatsja; jyeé ndaà tsohótijnakoaa jè 'én xi mokjeiín-na it'aà ts'e Cristo.

⁸ I'ndeí, Cristo, xi xitaxá kixi tjína, tijnatjò jngoò-la corona ján ngajmii xi 'an tsjá-na nga kixi tsohótijnakoaa. K'e nga kjoii ijngoò k'a-ne, mìtsà tà 'an xi tjoé-na. Tikoáá tjoé-la ngats'ii xita xi tìjngoò ikon nga nchikoña-la Cristo.

Kó kitsò Pablo nga kisixátíya-lá Timoteo nga kjoikon nìton

⁹ Tìxátíyi nga nìton nchrobáchon-ná.

¹⁰ Nga jè Demas, jyeé kitsjeiin takòn-na. Jè 'ñó matsjakeè kjoa xi tjín i isò'nde. Ján kii naxandá Tesalónica. Crescente, ján kii nangui Galacia, koa jè Tito ján kii nangui Dalmacia.

¹¹ Tà jè Lucas tíjnakò-na. K'e nga kjinchroboi, tjàjchatoi Marcos, nchrobákoji. Kochjeén-na kjoa ts'e xá xi tjín-na.

¹² Jè Tíquico, ján kisikasén Éfeso.

¹³ K'e nga kjinchroboi, jcha-ná inchrokisòn-na xi tsakajná ya naxandá Troas ya ni'ya-lá Carpo. Jch'ii xojon-na; jña xi isa 'ño mochjeén-na xi chrjoa kjoàn.

¹⁴ Alejandro, jè xi chjine kicha, 'ño ch'o tjín kjoa xi tísikò-na. Nainá, jè kàtatsjá-lá kjo'in kjoa xi tís'in.

¹⁵ Ngaji Timoteo, tikindii yijo-lè it'aà ts'e xita jè. 'Ñó kondra fitjingui-lá 'én xi okoòyaá.

¹⁶ K'e nga kisindaajin itjòn-na nga nguixkon xitaxá, niyá xi tsasikò-na. Ngats'ii xita kitsjeiin takòn-na. Kì kindáá s'in Nainá kjoa koi.

¹⁷ Tanga Na'èn-ná tsasikò-na. Kitsjaà-na nga'ño mé-ne nga komà kichjàjìn-lá jña xita 'én ndaà-lá Nainá xi kjoa ts'e Cristo. K'oaá s'in komà-ne nga kii'nchré yije xi mìtsà xita judío. Nainá tsasikò-na nga mìkii kisik'en-na xita xi tsibindaajin-na.

¹⁸ Na'èn-ná kosikò-na it'aà ts'e ngats'ii kjoa xi ch'o tjín. Kjiko-na ñánda tíhotíxoma ján ngajmii. Nainá, kàtas'e-lá kjoajeya nita mé nó-ne nita mé nachrjein-ne. K'oa's'in kàtama.

Xi fehet'aà-ne, Pablo síhixat'aà xita xikjín

¹⁹ Tixat'eì jè Priscila ko Aquila ko xita ni'ya-lá Onesíforo.

²⁰ Erasto, ján tsibijna naxandá Corinto. Jè Trófimo, ján kisikijna naxandá Mileto. Xk'én-né.

²¹ Tixátíyi nga nìton nchrobáchón-ná k'e nga tikj'eè f'ii nachrjein choòn 'nchán. Tísíhixat'aà-lè Eubulo, Pudente, Lino ko Claudia, ko ngats'ii xita xi 'ndsè chibá.

²² Jè kàtijnakò-lè Jesucristo xi otíxoma-ná. Ngats'ioò, jè kàtijnakò-nò kjondaà-lá. K'oa's'in kàtama.

Xojon carta-la San Pablo xi kiski-la Tito

Kó tsò Pablo nga síhixat'aà Tito

¹ An, Pablo, xi chí'nda-la Nainá ma. Tíkoo 'an tsibíxáya-na Na'èn-ná Jesucristo mé-ne nga kòkjeiín-la it'aà ts'e Cristo jñà xita xi xó jè Nainá jaàjìin-ne, tíkoo skoë xi kjoakixi nga koma-la skoexkón Nainá.

² Xita koi k'oaá s'ín komat'in nga tíngoò ikon nga nchikoña-la nga kítsajnakon inima-la nita kjé-ne koni s'ín kitsjaà tso'ba Nainá skanda k'e nga tikj'eè sindaà isò'nde. Nainá mikì konachan.

³ K'e nga jye ijchò nachrjein, Nainá kisikatsejèn 'én-la it'aà ts'e 'én ndaà-la Nainá xi kjoa ts'e Cristo xi 'an chjaya. Na'èn-ná kisingsatsja-na xá jè nga k'oaá s'ín tsatixoma Nainá xi ochrjekàjìin-ná kjo'in.

⁴ Ngaji, Tito, koni tsà ki'ndí ts'an xan-lè nga ngàsòn mokjeiín-ná it'aà ts'e Cristo, tìsikasén-lè xojon jè. Nainá xi Na'èn-ná kò Na'èn-ná Jesucristo xi ochrjekàjìin-ná kjo'in kàtatsjá-lè kjondaà-la, kàtahimakeè-lè, tíkoo 'nchán kàtasíkijna inima-lè.

Kjoa xi mochjeén ts'e xita xi síkitasòn xá ya ijìin naxandá-la Nainá

⁵ Koií xá kisikíjna-lè ján nangui Creta nga sikixiyi xá xi chijat'aà-isa. K'oaá tìs'ín tsatixoma-lè nga kinchandèi xita jchínga xi sùkinda naxandá-la Nainá nga jngoò ijngoò naxandá.

⁶ Xita jchínga xi síkitasòn xá, jñà-né xi ndaà nchisíjchá yijo-la nga mì yá xi ch'o kító-la; xi jngoò ma chjoón-la. Kò jñà ixti-la mochjeén-né nga ndaà mokjeiín-la it'aà ts'e Cristo nga mìtsà yá xita ónè-la kjoa nga kjoaská tjímajìin kò nga mikì 'nchréñijon.

⁷ Jè xita xi síkinda naxandá-la Nainá xi xá-la Nainá síkitasòn, mochjeén-né nga ndaà s'jìn mé-ne nga niyá xi ch'o kító-la. Mikì mochjeén nga 'nga ikon koma; mì taxkì kojti-la; mì xán kohijtako; mì xita skaàn-kò; kò mì ton chijé kotsjakeè.

⁸ Tà saá ndaà kàtasís'in-la xita xi bijchókon. Kàtamatsjakeè kjoa xi ndaà tjín. Indaà kàtijna ikon. Kixi kàtijnakò xita. Tsjeè kàtasíjchá yijo-la nga nguixkon Nainá, ndaà kàtasíkinda yijo-la nga mì taxkì s'jìn.

⁹ Ndaà kàtjìin ikon 'én kixi koni s'ín kis'enojmí-la mé-ne nga it'aà ts'e 'én ndaà xi kòkòya koma kùtin-la xita nga 'ñó kàt'eé-la ikon tíkoo koma síkixiya xi kondra fitjìngui-la xi kjoakixi.

¹⁰ Koií kjoa-la tjín jchán xita xi tájaajìin nga okóya 'én xi nímé chjí-la tíkoo konachan-la xita xi kje'eií; kò tjíñà-ne xi 'ñó bínè-la xita xi kje'eií nga kjo'ñó sít'aà chiba-la yijo-la kjoa ts'e circuncisión.

¹¹ Jñà xita koi mochjeén-né nga kichjoà'a nga sískáya-la ngats'ìi xita xi títajna nga jngoò ijngoò ni'ya. Tà jè xi mejèn-la nga ton síchijét'aà-la xita nga k'oa tjín 'én xi okóya xi nímé chjí-la.

¹² Jngoò xita chjine xi tiya-ne j'nde-la Creta k'oaá kitsò-la xita xíkjin: "Jñà xita Creta, xita ndiso-né, xita ts'en-né koni tsà cho ijñà, xita chrjá'a-né, xita ts'eè-né."

¹³ 'En kixií xi kùchja xita jè; ngaji, Tito, koií kjoa-la 'ñó tìnókjoakoi mé-ne nga ndaà kítsajnakò-ne koni s'ín mokjeiín-la it'aà ts'e Cristo,

¹⁴ kò mé-ne nga mì jñà sùs'in-la cuento xi nímé chjí-la xi fitjìngui i'nga-la xita judío tíkoo mì jñà sùs'in-la kjotixoma ts'e xita xi binchat'aaxìn-la kjoakixi.

¹⁵ Jñà xitá xi tsjeè tjin kjohítsjeèn-la tsjeè yije ma-la nitá mé-ne. Tanga jñà xitá xi mì tsjeè tjin kjohítsjeèn-la koa mìkì mokjeiín-la it'aà ts'e Cristo, saá tje yije ma-la nitá mé-ne; skanda jè inima-la ko kjohítsjeèn-la tje tjin.

¹⁶ K'oaá tsò nga beèxkon Nainá tanga jñà kjoa xi s'ín 'yaá-la nga mìtsà kixi kjoa. Xitá koi, 'ñó ch'o s'ín, mìkì 'nchréñijon, tikoá nimé chjí-la nga nijngoò ma-la síkitasòn xá xi ndaà tjin.

2

Kjohítsjeèn xi ndaà tjin takóyi

¹ Ngaji, Tito, k'oaá s'ín tinókjoii koni s'ín ok'in-la 'én ndaà xi jñá okoòyaá

² nga jñà xitá jchínga ts'e naxandá-la Nainá, indaàkjoa kátas'ín; ndaà kátayaxkón; ndaà kjohítsjeèn kátas'e-la; ndaà kátitsajnakò kjoa xi mokjeiín-la, ko kjoatjòcha-la ko kjoatsejta-la mé-ne nga kichikjoako-la kjo'in.

³ Jñà íchjín jchínga, k'oas'ín kátasíjchá yijo-la koni xitá-la Nainá. Kì xitá chjajno-la. Kì xán báhihtako. Koi kátakóya kjoa xi ndaà tjin.

⁴ K'oaá s'ín kátakóya-la íchjín ixti nga tjòkeè kátas'ín íchjá-la, tikoá tjòkeè kátas'ín ixti-la.

⁵ K'oaá s'ín ndaà kátakóya nga ndaà kátasíjchá yijo-la; tsjeè kátitsajnakò yijo-la; ndaà kátasíkinda ni'ya-la; ndaà xitá kátama; kátanchréñijon-la íchjá-la, mé-ne nga mì yá xi kichjajno-la 'én-la Nainá.

⁶ K'oaá tís'ín tinè-la jñà íchjá xi ixti-isa nga ndaà kátasíjchá yijo-la.

⁷ Nitá mé kjoa xi tjin, jì tjna ítjoìn nga ndaà t'jin. K'e nga kókóya-la xitá, kixi tikíjni kjohítsjeèn-lè; 'én kixi tinókjoii;

⁸ ndaà tsò 'én xi tinókjoii xi mì yá kochrjekàngui mé-ne k'e nga kji'nchré-la jñà xi xitá kondra, kosobà-la; nimé sakòt'aà-la xi ch'o kitsò-ná.

⁹ Koatìn-la jñà xitá xi chí'nda títsajna'ñó, ndaà kátasíkitasòn yije-la nei-la, ndaà kátasís'in-la mé-ne nga tsja s'e-la, kì kjingui'a-jèn;

¹⁰ kì síchijét'aà-la nei-la. Tà saá ndaà kátas'ín nga kátaya-la nga xitá kixi. K'oaá s'ín skoè-ne xitá xi k'ejí nga ndaà tjin kjotíxoma-la Nainá xi ochrjekàjìn-ná kjo'in.

¹¹ Nainá jyeé tsakó kjondaà-la nga ngats'ii xitá xi tjin nga tíjtsa isò'nde koma kitjokàjìn kjo'in.

¹² Jè kjondaà-la Nainá k'oaá s'ín okóya-ná nga mì tì kii k'oa s'en-ná nga mì ndaà yaxkoán Nainá tikoá mì tì kii k'oa s'en-ná kjoach'o xi síjé yijo-ná xi ts'e isò'nde. K'e nga jye síkítsajnaá kjoa koi, indaàkjoa síkíjnaá kjohítsjeèn-ná, xitá kixi komaá, tikoá ndaà jchaxkoán Nainá nachrjein xi títsajnaá i'nde.

¹³ K'oaá s'ín s'eén kjoa koi nga títsachiñá-lá kjondaà xi 'ñó ndaà tjin nga jchaá kjoajeya-la Jesucristo k'e nga kjoii jngoò k'a. Jesucristo xi Nainá nga 'ñó 'nga tjna nga jè xi ochrjekàjìn-ná kjo'in.

¹⁴ Jè Na'èn-ná Jesucristo kitsjaà yijo-la nga k'en ngajo-ná. Jè tsibíchjítjì-ná mé-ne koma kitjokàjñaá ngats'ii kjoa ts'e jé tikoá jngoò k'a sítsjeè-ná nga ngui xitá naxandá ts'e komaá. Ko ngui tíjngoò takoán nga síkitasóán nitá mé kjoa xi ndaà tjin.

¹⁵ K'oaá s'ín takóyi tikoá tít'in-la xitá. 'Nó tinókjoakoii koni s'ín tíj'nde-lè nga kotixomai. Kì yá xi ochrjekàngui-lè.

3

Ndaà tikítasòn jñà 'én xi mokjeiín-ná

¹ Tikítsjeèn-la nga kàteèxkón xi xitaxá títsajna ko ngats'ii xi kjotíxoma tíjya tsja. Kátanchréñijon-la. Kátasíkitasòn ngats'ii xá xi ndaà tjin.

² Koatìn-là kì xitàá chjajno-là; kì xitàá kjaán-ko; tà saá kjondaà kàtas'e-là; ngui indaàkjoa kàtìtsajnakò ngats'ìi xità.

³ Nga sa kjòtseeé, jñá, tìkoáá xità tònđoó komá. Mìkìi na'yañijoaán. Xìn ndiyá tsitjaayaá. K'oaá s'ín ki'né ngats'ìi kjoa xi ch'o tjin xi síjé yijo-ná ko kjoa xi sasén-là. Yaá tsitsajnajñaá xi kjoach'o ko kjoaxìtakòn. Tsak'ìn-ná nga kisìjtikeè-ná xità. Tìkoá jñá kinìjticha ngajo-ná xinguiáá.

⁴ Tanga Nainá xi ochrjekàjìin-ná kjo'in, k'e nga tsakó kjondaà-là ko kjoatjòcha-là it'aà ts'e xità,

⁵ tsachrjekàjìin-ná kjo'in. Mìtsà koi kjoa-là nga ndaà tjin kjoakixi xi ki'né. Tà koi-né nga kjòhìmakeè-ná. K'e nga kjòtseeé inìma-ná, kits'ìin xitsee òngò k'a-ná ko jè Inìma Tsjeè-là Nainá kisìxìtseyá òngò k'a-ná.

⁶ It'aà ts'e Na'ènná Jesucristo xi ochrjekàjìin-ná kjo'in, Nainá, 'ño ndaà kisìkìjnajìin inìma-ná Inìma Tsjeè-là.

⁷ K'e nga jè kjondaà-là Nainá jye kisìkixiya-ná, k'oaá s'ín kìtsajnaá nga tìjngò takoán nga tìtsachìñá-lá kjoabinachon xi mìkìi fehet'aà nità kjé-ne, jè kjotjò xi tsjá-ná Nainá nga òxti-là tsò-ná.

⁸ 'Èn koi, 'én kixi-né. K'oaá s'ín mejèn-na nga 'ño tìnè-là xità mé-ne jñá xità xi mokjeiín-là it'aà ts'e Nainá ndaà kàtásis'in-là kjoa xi ndaà tjin. Kjoa koi, ndaà tjin; mochjeén-là ngats'ìi xità.

⁹ Tanga kì kii nìs'in-là xi kjoa tònđo ko kjoa ts'e xità jchínga kjòtseeé xi mìtsà kixi kjoa. Kì kjoasìi nìs'in-là ko kjoa xi chitiya-ná it'aà ts'e kjotìxoma-là Moisés. Kjoa koi, mìkìi mochjeén, nìmé chjí-là.

¹⁰ Jè xità xi naxandá-là Cristo mejèn-là sùjòya, jò, jàn k'a tìnókjoa 'nchré-laà. Tsà mìkìi 'nchréñijon-lè, nàchrjekàjìin.

¹¹ Ji, jyeé 'yi nga xità jè, jyeé its'oòn kjòhìtseeé-là. Ch'o tís'ín. Jé tìhónè-là yijo-là.

'Èn xi títjsá-là Tito jè Pablo

¹² K'e nga sikasén-lè Artemas, o xi jè Tíquico, tìxátìyi nchrobáchón-ná Nicópolis. K'oaá s'ín kiskoòsòn-là, yaá kótijna nàchrjein cho 'nchán.

¹³ Tìchját'aà-là Zenas, maestro ts'e kjotìxoma, ko Apolos; tjiì-là mé xi mochjeén-là mé-ne nga koma kjoì-ne ñánda nchifi nga nìmé sìchijat'aà-là.

¹⁴ Jñá xi xità tsaján, k'oaá tìs'ín kàtama-là kjondaà xi ndaà tjin nga kàtásichját'aà-là xità xi chijat'aà-là tsojmì mé-ne nga ndaà sùkjeén-ne nàchrjein-là nga tìtsajnakon, komaá sùkìjna jngò kjoa xi ndaà mochjeén.

'Èn xi fehet'aà-ne

¹⁵ Ngats'ìi xità xi i tìtsajnakò-na tìsìhixat'aà-lè. Tìkoá tìixat'eì yije jñá xi matsjakeè-ná nga ngàsòn mokjeiín-ná it'aà ts'e Cristo. Kjondaà-là Nainá kàtìjnako-nò ngats'ioò. K'oaá s'ín kàtama.

Xojon carta-la San Pablo xi kiski-la Filemón

Kó tsò Pablo nga síhixat'aà Filemón

¹ Ji Filemón xi ndaà matsjake-lè xi ngàsòn xá-la Na'èn-ná titsa'né, 'an Pablo nga ndayá tijnáa'ya k'oií kjoa-la nga xá-la Cristo tís'iaàn, tísìhixat'aà-lè kò 'ndse Timoteo.

² Tikoáá tísìhixat'aà xita naxandá-la Cristo xi ya bixoña ni'ya-lè kò tichjaá Apia kò 'ndseé Arquipo xi tikoá xá-la Nainá nchikjaán-tji koni 'an.

³ Nainá xi Na'èn-ná, kò jè Jesucristo xi otíxoma-ná kàtatsjá-nò kjondaà kò kjoa'nchán ya ijìin inima-nò.

Kjoatjòcha xi tjín-la Filemón

⁴ K'e nga chjàt'aà-la Nainá, kjit'aà nàchrjein sikítsjeèn it'aà tsiji, k'oaá ma-ne nga tsjaà-la kjondaà Na'èn-ná,

⁵ Koií kjoa-la nga jyeé ki'nchrè nga ndaà mokjeiín-lè it'aà ts'e Na'èn-ná Jesucristo tikoá ndaà matsjachi ngats'ìi xita-la Nainá.

⁶ K'oaá s'ín sìjèt'aà-la Nainá nga ndaà kítasòn koni s'ín nokjoàkoi xita xi i'nga it'aà ts'e kjoa xi mokjeiín-lè mé-ne nga isa ndaà jchaxkoin ngats'ìi kjondaà xi koma sikitasoán it'aà ts'e Cristo.

⁷ Ji ndí 'ndseé, 'ño tsja ma-na kò ma'ño takoàn it'aà ts'e kjoatjòcha xi tjín-lè, nga it'aà tsiji-né, nga jye ndaà tìnìjetakoìn inima-la jña xita-la Nainá.

Kó tsò Pablo nga chjatjì Onésimo

⁸ K'oaá ma-ne nas'ín it'aà ts'e Cristo tjí'nde-na nga kìnè-lè mé kjoa xi s'ìin, tanga mìtsà kòs'ín tìbìt'in-lè.

⁹ Ta jngoò kjondaà tísìjé-lè, nga tjiìn-ná nga tjòcha 'yaá xinguiáá. Kò jyeé tjiìn-lè, 'an Pablo, jyeé xita jchínga-ná, tikoá ndayá tijnáa'ya xi jè ngatji-la Cristo Jesús.

¹⁰ K'oaá ma-ne nga tísìjé jngoò-lè kjondaà nga ndaà chjoétjò jè Onésimo xi koni ki'ndí-na komá nga kòkjeiín-la 'én ndaà-la Nainá xi 'an tsibenojmí-la nga i tijnáa'ya ndayá.

¹¹ Nga sa kjòtseé, jè Onésimo, jngoò xita chí'nda xi mìkì ndaà kjòchjeén-lè, tanga i'nde jyeé ndaà kochjeén-ná ingajoá.

¹² Tísikasén jngoò k'a-lè, 'an nga 'ño matsjake.

¹³ Ndaá-la s'e tsà i kijnako-na mé-ne nga sìichjåt'aà-na koni tsà jì tìnìchjåt'aà-ná, k'e nga takó ndayá tijnáa'ya nga jè ngatji-la 'én ndaà-la Nainá xi kjoa ts'e Cristo.

¹⁴ Tanga majìn-na nga kjo'ño sìikíjna tsà ngaji mìkì tìjngoò takoìn, mé-ne jè kjondaà xi tísìjé-lè mì kjo'ño koma-lè; inima-lè kjinchrobàjìin.

¹⁵ Tsà koi nàchrjein, jè Onésimo, koií kjoa-la tsasit'aà xìn chiba nàchrjein-lè mé-ne i'nde koma chjoétjò jngoò k'a-ne nga ya kijnako kjit'aà-lè.

¹⁶ Tanga kì k'oaá s'ín 'ya takoìn koni tsà jngoò xi taxkì chí'nda; isaá 'ño ndaà jchatakòin koni tsà jngoò 'ndsi xi 'ño ndaà matsjachi. 'An, 'ño matsjake; tanga ngaji isaá 'ño tìtsjachi mìtsà ta koi kjoa-la nga chí'nda tsiji koma, koi-né nga jyeé 'ndseé chibà it'aà ts'e Cristo.

¹⁷ Tsà kixij kjoa nga k'oas'ín 'yatakòn-ná nga 'ndseé chibá it'aà ts'e Cristo, chjoétjò Onésimo koni tsà 'an xi tichjoétjò-ná.

¹⁸ Tsà tjín mé kjoa xi ch'o kisko-lè, koa tsà mé xi kitjen-t'in-lè, 'aán tìkìchjì-ná.

¹⁹ 'An, Pablo, 'an sobá tìkjì-lè xojon jè. 'An kichjiá yije xi tjen-la. Mikiì mochjeén nga 'an koxán-lè, jyeé tíjìn-lè nga 'aán kitjen-t'in-ná kjoabinachon-lè.

²⁰ Ndí 'ndsè, k'oaá s'in tìsìjé-lè nga kàtasakó jngoò-na kjondaà it'aà tsiji, koni s'in ok'in-la nga 'ndseé chibá it'aà ts'e Na'en-ná; tije takoin inima-na it'aà ts'e Cristo.

²¹ Be-ná nga sikitason-né; k'oaá ma-ne nga tìsikasén-lè xojon jè; skanda 'beé-la takoàn, nga isáá tsatóo s'iin koni s'in tixan-lè.

²² K'oaá tìs'in tixan-lè nga tìkijnandaà jngoò-ná i'nde ñánda ma síkjáya. K'oaá s'in tìkoña nga jè Nainá kji'nchré-né koni s'in tìsanokjoat'aà-la, nga tsjá'nde-na nga koma kjíkon-nò.

'Én-la Pablo xi fehet'aà-ne

²³ Tísíhixat'aà-lè Epafra, xinguiáá xi ngásòn ndayá titsajna-jen nga jè ngatjì-la Cristo Jesús.

²⁴ Tìkoáá tísíhixat'aà-lè Marcos, Aristarco, Demas ko Lucas, xi síchját'aà-na kjoa ts'e xá xi tìs'iaàn.

²⁵ Jè kàtijnajìin inima-nò kjondaà-la Jesucristo xi otíxoma-ná.

Xojon carta xi kitjei-la xita Hebreo

Kós'in chjako-ná Nainá it'aà ts'e Ki'ndí-la

¹ Nga tisa kjòtseé, jè Nainá kjìn k'a kiichja-la xita jchínga-ná nga jñà kisikjeén xita xi kiichja ngajo-la, nga kjìn skaya tjín-ne kós'in kiichja-la.

² Tanga i'ndeí, nga tífehet'aà nachrjein, Nainá, jè ki'ndí-la tísikjeén nga tíchjako-ná ko tíjè-ne ki'ndí-la kisikjeén nga tsibíndaà isò'nde ko jè kjòngatsja ngats'ì nga yije tsojmì xi tjín isò'nde.

³ Ko jè Ki'ndí xi okó jè kjoa isén ko kjoa jeya-la Nainá; ko it'aà ts'eé 'ya-ná kó kji kjoàn-ne Nainá. It'aà ts'e nga ñó xi tjín-la 'én-la Cristo síjnangui'ño-la isò'nde. K'e nga jye kitsjaà kjotjò yijo-la nga kisìtsjeè-ná jé-ná, ikjoàn tsijin ngajmì nga tsibìjnat'aà chrja kixi-la Nainá.

⁴ Nga jè Ki'ndí-la Nainá tjina ítjòn; isaá 'ño 'nga tjina mì k'oà-ne koni jñà àkjale, koií kjoa-la nga isaá 'ño 'nga tjina jè 'ín xi kitjoé-la.

⁵ Nga jè Nainá, nijngoò k'a k'oas'in kitsò jngoò-la àkjale:

Ji-né xi ki'ndí-na xan-lè,

'an-ná Na'èn-lè.

Tikoáá nijngoò àkjale xi kitsò-la:

'Aán koma Na'èn-la,

jè koma ki'ndí-na.

⁶ K'e nga kisikasén ki'ndítjòn-la i isò'nde tikoáá k'oáá s'in kitsò:

Ngats'ì àkjale-na kàteèxkón.

⁷ It'aà ts'e àkjale, k'oáá tsò:

Nainá, maá-la tjo s'in àkjale-la;

jñà ch'índa-la maá-la ni'in s'in.

⁸ Tanga it'aà ts'e ki'ndí-la tsò-né:

Ji-né xi Nainá,

kixí kotixomai nita kjé-né.

⁹ Matsjacha-né kjoa xi ndaà tjín

ko majticha-né kjoa xi ch'o tjín;

koií kjoa-la, 'an xi Nainá 'mì-na xó jaàjìin-lè

nga isa ndaà jchaxkón-lè

mé-ne nga isa tse kjotsja s'e-lè

koni jñà xita xinguí xi báhijtakò-lè.

¹⁰ Tikoáá tsò-né:

Ji Na'èn xi Nainá 'mì-lè nga ji otixomai,

nga sa tàts'en-la kjoa, jí tsibìndiì isò'nde,

tijí-ne xi tsibìndiì ngajmì.

¹¹ Ngaji kijna-né nita mé nachrjein-ne.

Tanga jè isò'nde ko ngajmì kjoehet'aà-né;

k'oáá s'in kojchá koni ma nikje nga ma jchínga.

¹² K'oáá s'in kíxkóyi koni jngoò x'ió,

k'oáá s'in síkjatjìyi koni s'in fatjìya nikje.

Tanga ngaji mì k'ì kjoatjìya-lè nita kjé-ne

ko jñà nachrjein-lè mìkiì kjoehet'aà.

¹³ Nainá ni saà jngoò k'a kitsò-la jngoò àkjale-la:

Tijnat'eù chrja kixi-na

skanda k'e nga síkíjnanguia kondra-lè

ya ñánda nga nchasòn ndsokoiì.

14 Ngats'ì òkjale, inìma-né nga síxá-là Nainá; jñà ònkasén nga síxját'aà-là jñà xita xi tjoé-là kjondaà nga bitjokàjìn kjo'in kjoa ts'e jé-là.

2

Mé-ne 'ñó chjì-là 'én xi jye kina'yá it'aà ts'e Cristo

1 Koií kjoa-là, mochjeén-né nga nguì sà ndaà sis'in-lá 'én xi jye kina'yá, mé-ne nga mì xìn ndiyá kjiaán koni s'ín tjín ndiyá-là Nainá.

2 Jñà kjotíxoma xi Nainá kitsjaà nga kisìkjeén òkjale nachrjein xi jye tsato, tjín-là okixi, kò jñà xita xi tsohótsji jé nga mìkìl kisìkitasòn kjotíxoma xi kits'ì-là, kjo'ìin kitjoé-là koni s'ín ok'ìn-là.

3 Kò jñà xi titsajnaà nachrjein ì'ndeì, ìsáá 'ñó s'e-ná kjo'in tsà mì kì sis'iaán 'én-là Cristo nga jè kòchrjekàjìn-ná kjo'in. Nga jè sobá Na'én-ná kitsjaà ítjòn-ná 'én koi. Kò jñà xi iskan kù'nchré 'én koi, tìkooá tsibénojmi-ná nga kixi kjoa.

4 Nainá, tìkooá kisìkixiya 'én koi nga kjìn skoya kjo'kón kis'ìin xi okó kjoa jeya-là Nainá, tìkoo kisìka'bísòn kjotjò ts'e Inìma Tsjeè-là; k'ooá s'ín kitsjaà koni s'ín mejèn-là jè.

Yá xi ochrjekàjìn-ná kjo'in kjoa ts'e jé-ná

5 Nga Nainá mìtsà jñà òkjale-là kitsjaà-là nga jñà kotíxoma-là jè isò'nde xi iskan kjo'ì, jè xi titsachibàya-ná.

6 Ta saá tíchjaá jngòò k'a Xojòn-là Nainá ñánda nga tsò:

Jì Na'én, zyá-né xi xita?

¿A ok'ìn-là nga jì òkìtsjeèn-ne kò makájno-lè it'aà ts'e?

7 Ìsáá nangui kinikíjni koni jñà òkjale,

kits'ì-là kjoa jeya kò 'nga kinikíjni nga tsatíxoma,

8 jì kits'ì-là nga'ñó nga ma kotíxoma-là ngats'ì tsojmi xi tjín.

Tsà Nainá kitsjaà-là nga'ñó nga jè kotíxoma-là ngats'ì tsojmi xi tjín tsòyaá-ne nga nímé tsojmi tjín xi mì jè otíxoma-là. Kixií kjoa, nachrjein ì'ndeì, kj'eè kù ndaà 'ya-là tsà jè tíhotíxoma-là ngats'ì tsojmi xi tjín.

9 Tanga 'ya-ná nga jè Jesús, nas'ín nangui kinikíjna chiba nachrjein koni jñà òkjale, tanga ì'ndeì, jeyaá tíjna kò 'ngaá tíjna nga tíhotíxoma, koií kjoa-là nga kjo'in kisìkjiín k'e nga k'en. Nainá, 'ñó matsjakeè-ná nga kisìkasén Jesús nga jè kisìkjiín kjo'in ts'e kjoabiyaà xi kjondaà ts'e ngats'ì xita.

10 Jè Nainá, xi tsibíndaà yije nita mé xi tjín, ndaá ok'ìn-là koni s'ín kis'ìin k'e nga kisìkatojìn kjo'in Ki'ndí-là mé-ne nga it'aà ts'e kjo'in xi tsatojìn-ne, nímé kjoa xi kichiját'aà-là nga koma kòchrjekàjìn-ná kjo'in kjoa ts'e jé-ná ngats'ì xi ixti-là Nainá maá xi jè mejèn-là nga ya kítsajnaakooá ñánda nga jeya tíjna jè.

11 Jè xi títsjeè xita xi tjín-là jé, kò jñà xita xi tjímatsjeè, tajngoó Na'én ma. Koií kjoa-là jè Ki'ndí-là Nainá mìkìl masobà-là nga 'ndse tsò-là xita xi sítsjeè.

12 Jè Xojòn-là Nainá k'ooá s'ín tjít'aà nga tsò:

Kènojmi-là jñà xita 'ndsè xi it'aà tsiji,

seè-lè ya jìjìn-là xita naxandá-lè.

13 Tìkooá tjít'aà ñánda tsò:

Jé Nainá ma'ñót'aà takoàn.

Ìjngòò k'a tjít'aà ñánda tsò:

Ílì tjínakooa ixti xi Nainá kitsjaà-na.

14 K'ooá s'ín tjín koni ixti-là xita, tajngoò jní-né kò tajngoò yijo-né. Jesús, k'ooá tís'ín jní kò yijo kis'e-là mé-ne nga it'aà ts'e kjoa biyaà ma kisìkijne-là xita neí xi tjín-là nga'ñó nga ma-là sík'en xita.

¹⁵ Jesús, k'oaá s'ín komàt'in mé-ne nga komà kisikítsajndeí ngats'ì xita xi kitsakjòn-la kjoa biyaà nga k'oaá s'ín títsajna koni tsà tjit'aà'ñó-la kó tjin nàchrjein bìtsajnakon xita.

¹⁶ Jesús, mìtsà koií xá j'ì-ne nga jña àkjalè sùichját'aà-la, jña xita tje-la Abraham sùichját'aà-la.

¹⁷ K'oaá s'ín komà-ne, jè Jesús tjinè-la nga ngàsòn k'oas'ín xita komà koni 'ndse, mé-ne nga nò'miì ítjòn koma-ne xi tjin-la kjohimatakòn xi ndaà síkitasòn xá-la Nainá nga koma kùichjítjì-ne jé-la xita it'aà ts'e kjoa biyaà-la.

¹⁸ Koni s'ín kichit'aà nga kits'ì-la kjo'in, jè, k'oaá tìs'ín ma-la osikò jè xita xi kjo'in tíchit'aà-ne.

3

Mé-ne isq jeya tíjna-ne Jesús mì k'oa-ne Moisés

¹ Jñò ndí 'ndse, xi xita naxandá tsjeè-la Nainá 'mì-nò, xi xó k'oaá s'ín jaàjì-nò Nainá nga xita ts'e tsò-nò, k'oaá s'ín ndaà tikítsjeèn nga jè Cristo Jesús xi xó tsibíxáya-la Nainá kò jè tíjna nga nò'miì ítjòn it'aà ts'e kjoa xi mokjeiín-ná.

² Jesús ndaà síkitasòn xá-la Nainá, nga xó k'oaá s'ín kits'ì-la koni jè Moisés, ndaà kisikitasòn it'aà ts'e naxandá-la Nainá.

³ Jesús isaá jeya tíjna koni jè Moisés. K'oaá ngaya-la koni jngoò xita xi bíndaà ni'ya, isaá jeya bíjna nei-la mì k'oaá-ne koni tijè-ne ni'ya.

⁴ Ngats'ì ni'ya, tsejèn tjin xita xi tsibíndaà; tanga jè Nainá xi tsibíndaà yije tsojmì xi tjin isò'nde.

⁵ Xi nguì okixi, jè Moisés, nga xita chi'nda-la Nainá ma, ndaà kisikitasòn xá-la it'aà ts'e xita naxandá-la Nainá. Jè xá xi kis'iin, jè-né nga kitsjaà 'én kó s'ín kichja Nainá k'e nga koma iskan.

⁶ Tanga jè Cristo, nga Ki'ndí-la Nainá ma, jè otíxoma it'aà ts'e naxandá-la, jè naxandá-la xi tijná-ná, tsà kixi titsajnaá skanda k'e nga kjoehet'aà nàchrjein koni s'ín nga mokjeiín-ná it'aà ts'e Nainá nga kò kjotsja-ná titsachiñá xi kjondaà-la Nainá.

Mé xi mochjeén nga kitjás'een ñánda ma nìkjáyaá it'aà ts'e Nainá

⁷ K'oaá tsò jè Inima Tsjeè-la Nainá jè xojon xi tjit'aà 'én-la Nainá, nga tsò: I'nde, tsà titsana'ya jñò 'én-la Nainá,

⁸ kì tájaàjìin bitsajnakoo inima-nò koni s'ín kis'iin jña xita xi kondra kii-la Nainá nga kiskoòt'aà ya i'nde it'aà xin ñánda nangui kixi choòn.

⁹ Jña xita jchínga-nò kiskoòt'aà-na nas'ín jye kijtseè ichán nó kjoa xi kis'iaàn.

¹⁰ Koií kjoa-la nga tsohótijna jchán-la jña xita koi, k'oaá kixan-la: “Jñò, kjit'aà nàchrjein xin ndiyá tjaakoo kjohítsjeèn-la inima-nò kò mìkiì yaxkon ndiyá-na.”

¹¹ Xi kjoa jti-na, k'oaá s'ín kitsjaà ndsoba nga mìkiì kjoahas'en-jìin i'nde ts'an ñánda ma nìkjáya.

¹² Ndí 'ndse, t'een kindá yijo-nò, nijngoò xi ch'o síkijna inima-la nga mìkiì mokjeiín-la mé-ne nga mì kinchat'aaxìn-lá Nainá xi tíjnakon.

¹³ Ta saá, nàchrjein nchijòn tjii nga'ñó-laà xinguiò, k'e nga tíjna-isa nàchrjein, mé-ne nga mìkiì kotájaàjìin-ne inima-nò nga mìkiì ma skónachan-nò kjoa ts'e jé.

¹⁴ Jná yaá nokjoá-aná it'aà ts'e Cristo, tsà k'oas'ín ndaà kòkjeiín-ná skanda k'e nga kjoehet'aà nàchrjein koni s'ín kòkjeiín-ná nga tisa tàts'en-la kjoa.

15 Xojon-la Nainá k'oaá s'ín tíchja nga tsò:

I'ndeì, tsà titsana'yà jñò 'én-la Nainá,

kì tájaàjìin bitsajnakoo inìma-nò

koni s'ín kis'iìn jñà xità xi kondra kii-la Nainá.

16 ¿Yá xità-ne xi kii'nchré 'én-la Nainá, ikjoàn kondra kii-la? Tijñà-ne ngats'ìi xità xi jè Moisés tsachrjekàjìin i'nde Egipto.

17 ¿Kò yá xità-ne xi ichán nó tsibìjnajchán kò Nainá? Jñà-né xità xi tsohótsji jé, xi yá k'en yá iya ndiyá yá i'nde it'aà xìn ñánda nangui kixì choòn.

18 ¿Kò yá xità-ne xi Nainá kitsò-la nga mìkii kjoahas'en-jìin i'nde ñánda tjín kjoa nìkjáya? Jñà-né xità xi mìkii kii'nchréñijon-la.

19 Kò k'oaá s'ín tísijìin-ná nga mìkii jahas'en-jìin i'nde ñánda ma nìkjáya, koií kjoa-la nga mìkii kòkjeiín-la.

4

1 Nainá k'oaá s'ín kitsjaà-ná 'én nga kitjás'eén yá i'nde-la ñánda ma nìkjáyaá. K'e nga tákó tjina-isa 'én xi kitsjaà Nainá, ngats'iaá mochjeén-né nga ndaà sikkindaá yijo-ná mì k'oa-ne tsà mì kii'kitjás'eén.

2 Nga jñá, k'oaá tís'ín jye kis'enojmíya-ná 'én ndaà-la Nainá, koni s'ín kis'enojmíya-la jñà xità jchínga-ná. Tanga jñà xità jchínga-ná nímé kjondaà kisakò-la nga mìkii ngàsòn kòkjeiín-la koni jñà xità xi i'nga xi kisítasòn jñà 'én koi.

3 Tanga jñá xi jye mokjeiín-ná, kitjás'en-ná yá i'nde ñánda ma nìkjáyaá, ñánda kitsò Nainá:

Xi kjoa jti-na, k'oaá s'ín kitsjaà 'én-na xi ndsoba kichjà-na

nga mìkii kjoahas'en-jìin i'nde ts'an ñánda ma nìkjáyaá.

Tanga Nainá jye kjòtseé jyehet'aà xá xi kis'iìn kóni skanda k'e nga tsibíndaà isò'nde.

4 Xojon-la Nainá, k'oaá s'ín tíchja ts'e xi ma-ne itoò nachrjein:

Xi ma itoò nachrjein kisìkjáya Nainá nga komà jyehet'aà yije xá-la.

5 Tijè-ne Xojon-la Nainá, ìjngoò k'a tíchja ñánda tsò:

Mìkii kjoahas'en-jìin yá i'nde-na ñánda ma nìkjáya.

6 Jñà xità xi kii'nchré ítjòn 'én xi ndaà tsò, mìkii jahas'en i'nde ñánda ma nìkjáya nga mìkii kisítasòn; tanga nachrjein i'ndeì tjín-isa xità xi chija nga koma kjoahas'en-jìin i'nde ñánda ma nìkjáya.

7 Koií kjoa-la Nainá tsibìjna ìjngoò-isa nachrjein xitse, jè nachrjein i'ndeì. Nga isa 'ño komà iskan jè xitaxá ítjòn xi ki'mì David, k'oaá s'ín tsibít'aà Xojon-la Nainá jñà 'én xi tsò:

Jñò, nachrjein i'ndeì tsà titsana'yà 'én-la Nainá

kì tájaàjìin nìkítsajnaà inìma-nò.

8 Jè Josué, nga mìkii komà kitsjaà-la kjoa nìkjáya jñà xità Israel, koií kjoa-la Nainá kitsjaà ìjngoò-isa nachrjein xitse.

9 K'oaá ma-ne jè naxandá-la Nainá tjina ìjngoò-la nachrjein tsjeè ts'e kjoa nìkjáya;

10 nga jè xità xi fahas'en-jìin kjoa nìkjáya xi ts'e Nainá, tìkooá síkjáya-ne kjoa ts'e xá-la, koni s'ín kisìkjáya Nainá it'aà ts'e xá xi kis'iìn.

11 Mochjeén-né nga k'oi-lá nga'ño yijo-ná nga kitjás'en-jñá kjoa nìkjáya-la Nainá; mìkii k'oa'sín s'eén koni kis'iìn jñà xità xi mìkii kòkjeiín-la nga kisìkitasòn.

12 'Én-la Nainá tjínakon-né kò tjín-la nga'ño. Ìsaá ndaà ote mì k'oa-ne jngoò kichjà ndojò xi yijò nga ingajò ngobà-la; fahas'en-jìin-né skanda yá ijìin inìma-ná kò yá ijìin kjohítsjeèn-ná. Tìkooá fahas'en-jìin-né skanda ñánda

tíkjoò nindaà-ná kò ìya nindaà-ná; ótsjiya-né kjohítsjeèn-la inìma-ná mé xi mejèn-la nga s'ìin.

¹³ Ngats'ìi xi Nainá tsibíndaà, nì mé tjín xi tíjna'ma, nga ngats'ìi kjoa tíjna tsejèn-né; tíbeè-ne xkòn jè xi tjínè-la nga k'oi-lá kindà.

Jè xi ngui nò'miì ítjòn tíjna

¹⁴ Jesús xi ki'ndí-la Nainá, jè-né xi ngui sobà nò'miì ítjòn tíjna it'aà tsaján, jè-né xi jahas'en ngajmiì nga nguixkòn Nainá. K'oaá ma-ne nga mochjeén-né nga kixi kítsajnakoaá jñà 'én xi mokjeíin-ná.

¹⁵ Jè xi nò'miì ítjòn tíjna it'aà tsaján, komaá kohimakeè-ná k'e nga mahindaà; nga jè, k'oaá tìs'ín kichit'aà koni jñà, tanga mìtsà jè tsohótsji.

¹⁶ Kíjngoò-lá takoán nga kìnchat'aà chraña-lá íxile kjotíxoma-la Nainá xi tse kjondaà tjín-la, mé-ne nga skoe ìma-ná kjondaà xi tjín-la koa kosìko-ná k'e nga mé xi kochjeén-ná.

5

¹ Ngats'ìi jñà nò'miì ítjòn, yaá tjaájiin it'aà ts'e xita naxandá. Jè xá tjínè-la nga chjatjì xita nga nguixkòn Nainá tìkoa tsját'aà-la kjotjò Nainá kò sík'en cho xi kjoa ts'e jé-la xita.

² Jñà nò'miì, tìkoaá mahindaàjiin inìma-la; k'oaá s'ín ma-ne nga ma beehìma jñà xita xi mìkiì machiya-la kò xi xìn ndiyá tjímaya.

³ Koiì kjoa-la nga ma indaàjiin inìma-la nò'miì, tjínè-la nga sikk'en-la cho kjotjò xi tsjá-la Nainá xi kjoa ts'e jé-la kò tìkoa sikk'en cho kjoa ts'e jé-la naxandá.

⁴ Jñà nò'miì, mìtsà tà jñà tajngoò bí'taà xá 'nga yijo-la; jè Nainá xó chja-la koni s'ín kiichja-la jè Aarón.

⁵ K'oaá tìs'ín tjín it'aà ts'e Cristo, mìtsà tà jè tajngoò kiskoé xá xi ts'e nò'miì ítjòn, Nainá kitsjaà-la xá 'nga k'e nga kitsò-la:

Jì-né xi Ki'ndí-na xan-lè;

'aán-ná xi Na'èn-lè.

⁶ Tìjè-ne Xojon-la Nainá, ìjngoò k'a tíchja ñánda tsò:

Jì-né xi nò'miì tijni nita mé nachrjein-ne,

xá-lè, k'oaá s'ín tjín koni xá xi kisikitasòn Melquisedec.

⁷ Jè Cristo k'e nga sa tsibìjna ìsò'nde, 'ñó kiichjat'aà-la Nainá, ngui koó ndáxkòn tsibítsi'ba-la koa kisijét'aà-la jè xi tjín-la nga ñó nga ma-la kochrjekátjì it'aà ts'e kjoa biyaà; Nainá ki'nchré-la nga ndaà kijtseèxkón.

⁸ Jè Cristo, nas'ín ki'ndí-la Nainá ma, yaá komà-la kisikitasòn, k'e nga kisikjeíin kjo'in.

⁹ K'e nga jye mì tì mé xi kichijà'taà-la, k'oaá s'ín tsibìjna nga jè kochrjekátjì kjo'in xita nita mé nachrjein-ne, ngats'ìi xi 'nchréñijon-la,

¹⁰ Nainá kisikìjna Jesús nga nò'miì ítjòn tsibìjna, kitsjaà-la xá koni ts'e Melquisedec.

Jñà xita xi mìkiì machiya-la mé kjoa xi kixi tjín

¹¹ It'aà ts'e kjoa koi, 'ñó tjín-ìsa kjoa xi s'enojmíya-nò, tanga 'ñó chjá tjín nga s'enojmí-nò, koi kjoa-la nga jñò, mìkiì machiya-nò.

¹² Jñò, skanda kjotseé maestroó-là titsajnaà tsà ndaà; tanga jñò, tákó mochjeén-nò nga chí'ta'yà xitse ìjngoò k'a 'én-la Nainá xi mì 'in chja koni s'ín komà-nò nga sa ítjòn. K'oaá s'ín tímat'ioòn koni ndí ìxti xi tákó tsjín 'biì, mìkiì mochjeén-la nga tsojmì tájaà skìne.

¹³ Ngats'ìi xi tákó tsjín 'biì, ìxti-né, mìkiì machiya-la mé kjoa xi kixi tjín.

¹⁴ Tanga jñà tsojmì xi ma chine xi tájaà kjoàn, ts'eé xita xi jye kòjchínga, jñà xi jye machiya-la mé kjoa xi ndaà tjín kò mé kjoa xi mìkiì ndaà tjín nga k'oaá s'ín nchisíjchá yijo-la.

6

¹ Koií kòs'ín mochjeén-ne nga chíta'yà 'én-la Cristo xi ìsa ndaà kojchíngakoá kjoa ts'e Nainá mé-ne nga nímé chijat'aà-ná nga xita-la Cristo maá. Mì tijnà tijnà 'én chíta'yà-aná xi kichíta'yá nga sa ítjòn it'aà ts'e Cristo. Mì tijnà tijnà 'én síkítsjeèn-ya-ná kó s'ín ma nga níkájnoaá jé xi tjín-ná xi kjoabiyaá fiko-ná. Kò tikoáá mì tijnà tijnà 'én síkítsjeèn-ya ìjngò k'a-ná kó s'ín kòkjeiín-ná it'aà ts'e Nainá

² kò kòs'ín ma bautizar xita, kò kòs'ín oyijòsòn-lá ndsaá jñà xita xi mokjeiín-la it'aà ts'e Cristo. Kò tikoáá mì tijnà tijnà 'én síkítsjeèn-ya ìjngò k'a-ná kó s'ín kjoáya-la jñà xita xi jye k'en, kò kòs'ín s'iin Nainá nga kíndaàjìin-la xita mé xi ok'ín-la nga tsjá-la nita kjé-ne.

³ Mochjeén-né nga chíta'yà 'én xi ìsa ndaà kojchíngakoá kjoa ts'e Nainá; tsà Nainá tsjá'nde nga kòs'ín koma, k'oas'ín s'eén.

⁴ Nga jñà xita xi jye kjòhiseèn-la kjòhítsjeèn-la, xi jye kisaseèn-takòn kjondaà xi tsjá Nainá, xi tikoá jye ngàsòn kitjóé-la Inima Tsjeè-la Nainá,

⁵ xi jye kisaseèn-takòn 'én ndaà-la Nainá kò nga'ño-la isò'nde xi sa kjoíí,

⁶ tsà ìjngò k'a xìn ndiyá kjoí, tsà tsjìn takòn 'én-la Nainá, mì tì kiì koma kondaàya-ne kjòhítsjeèn-la nga kòófataa ìjngò k'a-la Nainá; nga jñà xita koi, kjoa xi nchis'ín, k'oaá ngaya-la koni tsà krò nchihót'aà ìjngò k'a jè Kí'ndí-la Nainá nga tsjá-la kjosobà nga nguixkòn ngats'ii xita.

⁷ K'oaá s'ín ngaya-la koni jè nangui, k'e nga 'ba jtsí, ma'nchì'nde-né. Tsà ndaà xka xi bisò xi mochjeén-la xita xi síxáko nangui, jè Nainá síchikon-t'ín nangui.

⁸ Tanga tsà na'yá chini kò na'yá xanchroò bisò, nímé chjí-la, mìtsà nangui ndaà nga nguixkòn Nainá; kijchò nachrjein nga tà kití-né.

⁹ Jñò ndí 'ndsè, xi matsjacha-nòjen, nas'ín k'oas'ín nokjoà-jen, k'oaá s'ín tijnò takòn-jen nga tjoé-nò kjoa xi 'ño ndaà tjín, ngats'ii kjondaà xi tjín-la xita xi jye itjokàjìin kjo'in.

¹⁰ Nga Nainá, xita kixi-né, mìkiì síjchàajìin xá-nò xi jye ki'nè kò kjoatjòcha xi tjín-nò nga nìchját'aà-la xita naxandá-la Cristo, koni s'ín tìtsa'nè skanda nachrjein i'ndeì.

¹¹ Tanga ngajen, k'oaá s'ín mejèn-najen nga kjit'aà nachrjein ngui kòó kjotsja nga kòs'ín tixá nga jngò ìjngò skanda k'e nga kjoehet'aà nachrjein-nò mé-ne nga kítasòn-ne kjoa xi tìtsachiñá-laá.

¹² Majìn-najen nga ts'eè s'eén. Chjíngruì-la jñà xita xi jye nchitjóé-la kjotjò koni s'ín kitsjaà tso'ba Nainá koií kjoa-la nga ndaà mokjeiín-la kò tjín-la kjoatsejta.

Kó tsò 'én xi kùichja Nainá koni s'ín kitsjaà-la tso'ba Abraham

¹³ Nainá k'e nga kitsjaà-la tso'ba Abraham, k'oaá s'ín kitsjaà kixi 'én-la nga tijnè tsasèn-ne nga mì tì yá tjín-ne xi ìsa 'nga tijná koni jè; k'oaá s'ín kùichja,

¹⁴ nga kitsò: “An, 'ño ndaà sichikon-t'ín-lè, tikoá 'ño kòkjìn-ya jñà ixti-lè.”

¹⁵ K'oaá s'ín komà-ne Abraham kiskoòñàkjoa, ikjoàn kitjóé-la koni s'ín kitsò Nainá.

¹⁶ Jñà xi taxki xita, k'e nga tsjá 'én-la, síkjeén jngò 'ín-la jngò xi ìsa 'nga tijná mé-ne nga síkixiya-ne 'én xi tsjá. Kò tà yaá fehet'aà kjoa.

¹⁷ K'oaá s'ín ma-ne k'e nga jè Nainá k'oaá s'ín kjòmejèn-la nga kitsjaà kixi-la 'én jñà xita xi tjoé-la kjotjò nga sùkitasòn koni s'ín kitsjaà tso'ba, kitsjaà jngoò 'én xi 'ñó xkón tjin nga nímé xi ma kjoatjya.

¹⁸ Jñà 'én koi xi jò ma-ne xi mìkì ma fatjya, nga mìkì koma skónachan-ná Nainá, yaá 'ñó sakó-la nga 'ñó inima-ná, jñà xi mejèn-ná nga Nainá kosiko-ná nga ngui jè kjit'aà takoán nga titsachiñá-lá jè kjoa kixi-la xi jè jye kitsjaà-ná.

¹⁹ Jè kjoa kixi xi titsachiñá-lá, k'oaá s'ín síkijna kixi inima-ná koni jngoò kicha xi sit'aà 'ñó-ne chitso, kò jè kjoa kixi xi okji skanda maá jahas'en ya i'nde tsjeè ñánda tjobátoò nikje cortina,

²⁰ ya ñánda jahas'en Jesús nga tsohójnandaà-ná ndiyá, nga no'miù ítjòn tjna nita mé nachrjein-ne koni jè Melquisedec.

7

Jesús, k'oaá s'ín ngayá-la koni jè no'miù ítjòn xi ki'mi Melquisedec

¹ Melquisedec xi xita xá ítjòn tsibijna ts'e naxandá Salem, tikoá no'miù ítjòn tsibijna ts'e Nainá xi tjna ngajmiù, kii kaña-la Abraham k'e nga tinchrobá-ne nga jye kisikijne yije-la xitaxá ítjòn xi kiskaàn-kò. Melquisedec kisichikon-t'in Abraham.

² Jè Abraham, teya kis'iin tsojmì xi kisakò-la ts'e kjoajchán, kò jngoòya kitsjaà-la Melquisedec. 'In xi 'mi Melquisedec, tsòyaá-ne: xitaxá ítjòn xi tjin-la okixi. Tikoá jè 'in xi 'mi xitaxá ítjòn ts'e Salem, tsòyaá-ne: xi tjin-la kjoa'nchán.

³ Jè Melquisedec mìkì 'ya-la tje-la, ya na'èn-la, ya nea-la, ñánda kits'iin, ñánda k'en; k'oaá s'ín mangásòn-kò koni Cristo xi Ki'ndí-la Nainá nga jè Melquisedec tikoá no'miù ítjòn tjna nita mé nachrjein-ne.

⁴ Jñò tikitsjeèn nga 'ñó 'nga tsibijna Melquisedec, skanda jè xita jchínga-ná Abraham teya kis'iin tsojmì xi kisakò-la ts'e kjoajchán, kò jngoòya kitsjaà-la Melquisedec.

⁵ Kixi kjoa, k'oaá s'ín tichja kjotixoma-la Moisés xi Nainá kitsjaà-la nga jñà xita naxandá tjinè-la nga teya sùjòya tsojmì xi tjin-la, jngoòya tsjá-la jñà no'miù xi tje-la Leví, nas'in ti xita xikjin-ne xi ya nchrobát'aà-ne tje-la Abraham.

⁶ Tanga jè Melquisedec, mìtsà tje-la Leví, tanga kitjoé-la xi jngoòya oko-la tsojmì xi teya kis'iin Abraham, ikjoàn k'eé kisichikon-t'in, nas'in jè Abraham xi kitjoé-la 'én xi tso'ba Nainá kiichja-ne.

⁷ Nga jyeé tjiin-ná, jè xi síchikon-t'in xita, isaá 'nga tjna mì k'oaá-ne koni jè xi machikon-t'in.

⁸ Jñà no'miù xi tje-la Leví xi tjoé-la xi jngoòya oko-la xi teya s'ín xita naxandá Israel, mìtsà ta bitsajnakon kjit'aà, bijchó nachrjein nga biyaà; tanga it'aà ts'e Melquisedec, jè Xojon-la Nainá, k'oaá s'ín 'ya-la koni tsà jngoò xita xi tákó tijnakon skanda nachrjein i'nde.

⁹ Jñà no'miù xi nchrobát'aà-ne tje-la Leví xi tjoé-la xi jngoòya oko-la xi teya s'ín xita naxandá Israel, komaá k'oakixoán nga tikoá jè Melquisedec kitjoé jngoòya-la it'aà ts'e xita koi k'e nga kitsjaà jngoòya-la Abraham,

¹⁰ nga jñà no'miù xi tje-la Leví, yaá nchrobát'aà-ne tje-la Abraham. Nas'in kj'eé kii ts'iin Leví k'e nga jè Melquisedec ijchò kaña-la Abraham, k'oaá s'ín ngayá-la koni tsà jñà no'miù Israel, jyeé ya titsajnakò Abraham nga nchitsjá-la kjotjò xi jè tjoé-la Melquisedec.

¹¹ Jñà kjotixoma xi kitjoé-la jñà xita Israel, yaá inchrobát'aà-ne it'aà ts'e no'miù xi tje-la Leví; tanga jñà no'miù koi, mìkì komà-la nga jngoò k'a kisikixiya xita nga mì ti mé chijat'aà-la. K'oaá s'ín komà-ne nga j'ii jngoò no'miù xi jè mangásòn-kò Melquisedec, kò mìtsà jè mangásòn-kò Aarón xi tje-la Leví.

12 K'e nga fatjìya nò'miì, kós'ín síxá, tìkoáá mochjeén-né nga kjoatjìya kjotíxoma.

13 Koni s'ín tíchja 'én-la Nainá, jè xi kitjoé-la xá koni ts'e Melquisedec, kj'eíí tje-né; ya ñánda inchrobàt'aà-ne, nì saá jngoò nò'miì bitjokàjìin.

14 K'oaá s'ín 'ya-la nga jè Na'én-ná Jesucristo, yaá inchrobàt'aà-ne tje-la naxandá Judá. Tje-la naxandá jè, mìkiì kisìkaxkì Moisés k'e nga kùichja it'aà ts'e nò'miì.

15 Kjoa koi, ìsaá ndaà makixiya-ná tsà jè nò'miì xitse sùkitasòn koni s'ín kisìkitasòn jè Melquisedec.

16 Nga mìtsà k'oaá s'ín kitjoé-la xá ts'e nò'miì koni s'ín tíchja kjotíxoma yá ts'e tje xi inchrobàt'aà-ne nga nò'miì kisìkitasòn. Ta saá k'oaá s'ín kitjoé-la xá it'aà ts'e nga'ño xi tjin-la nga mìtsà yá xi koma-la jngoò k'a sùk'en.

17 K'oaá s'ín tíchja 'én-la Nainá xi it'aà ts'e, nga tsò:

Ji-né xi nò'miì tìjni nìta mé nachrjein-ne,
k'oaá s'ín mangásòn-koi koni jè Melquisedec.

18 K'oaá s'ín komà-ne nga kichijàngui kjotíxoma jchínga, koi kjoa-la nga tsjin-la nga'ño tìkoá mì tì kii tímochjeén-ne.

19 Nga jè kjotíxoma jchínga xi kiskii Moisés, nímé xi kisìkixiya xita; tanga nachrjein i'ndeí, tjin jngoò-ná kjoa xi isa ndaà tjin xi titsachiñá-lá jè xi sikinchat'aà chrañà-ná Nainá.

20 Nainá k'oaá s'ín kitsjaà kixi 'én-la xi xkón tjin k'e nga kitsjaà tso'ba nga nò'miì ítjòn kína Cristo. Jña nò'miì xi i'nga, ta k'oaá s'ín kitjoé-la xá, mìtsà yá xi kitsjaà 'én-la.

21 Tanga xi it'aà ts'e Na'én-ná Jesús, k'oaá s'ín tíchja xojon xi tjit'aà 'én-la Nainá nga kitsò:

Na'én-ná k'oaá s'ín kitsjaà kixi 'én-la;
mìkiì sùkijatjìya-la kjohítsjeèn-la nga tsò:
“Ji-né xi nò'miì tìjni nìta mé nachrjein-ne.”

22 K'oaá s'ín ma-ne nga jè Jesucristo osen-tji-ná nga nguixkon Nainá nga jè bíndaàjìin ko-ná jngoò kjoa xitse xi isaá ndaà tjin.

23 Tìkoáá jña nò'miì xi kixíxá xi tje-la Leví, jyeé kjin ma xi jye kisìkitasòn xá-la tanga koií kjoa-la nga biyaà nga mìkiì ma síxá-isa.

24 Tanga jè Jesús tijnakon-ne nìta kjé-ne, k'oaá ma-ne nga nò'miì tìjna nìta mé nachrjein-ne.

25 K'oaá s'ín ma-ne nga ma-la ochrjekàjìin kjo'in xita nìta mé nachrjein-ne, ngats'ii xita xi it'aà ts'e Jesús bijchó nguixkon Nainá; jè tijnakon-né nìta kjé-ne mé-ne nga bítsi'batjì xita.

26 It'aà tsaján, nguì jè Jesús xi mochjeén-ná nga nò'miì ítjòn tìjna: nga xita tsjeè-né; nímé jé tjin-la; mì tje kji inima-la; tijnat'aaxìn-la xita jé, ko jè xi isa 'nga tìjna ján ngajmii.

27 Mìtsà k'oas'ín koni s'ín nò'miì ítjòn xi i'nga, nga nachrjein nchijòn sík'en cho nga tsjá kjotjò-la xi kjoa ts'e jé-la, ikjoàn tsjá ts'e jé-la xita naxandá. Tanga Jesús k'e nga kitsjaà kjotjò yijo-la nga k'en, jngoò k'aá kitsjaà nìta kjé-né.

28 Jè kjotíxoma xi kitsjaà Moisés, k'oaá s'ín tíchja nga jña kitsajna nò'miì ítjòn xi taxkì xita xi chiba nga'ño tjin-la; tanga jè 'én xi xkón tjin xi iskan kitsjaà Nainá, k'oaá s'ín tíchja nga jè Ki'ndí-la Nainá, kína nò'miì ítjòn, jè xi k'oas'ín kisìko Nainá nga nímé chijat'aà-la nìta kjé-ne.

8

Jè kjoa xitse xi tsibí'ño Jesús

¹ Ngats'iì kjoa xi chibàya-ná, tjín jngoò xi isaá 'ñó chjí-la, jè-né nga tíjna jngoò-ná nò'miì ítjòn xi tsibijnat'aà chrja kixi-la íxile kjotíxoma-la Nainá ján ngajmiì.

² Yaá síxá ya ñánda tíjna xi nguì Ni'ya Tsjeè-la Nainá, xi jè sobà Nainá tsibíndaà; mìtsà taxkì xita tsibíndaà.

³ Ngats'iì nò'miì ítjòn, k'oaá s'ín satíxoma-la nga kjotjò tsját'aà-la Nainá kò chò sík'en; k'oaá ma-ne nga jè Cristo tíkoa tjínè-la nga kis'e-la mé kjotjò xi kitsjaat'aà-la Nainá.

⁴ Jè Cristo, tsà ì tíjna ít'aà nangui, skanda mì-la kii koma nga nò'miì kíjna, nga ì ít'aà nangui, jyeé tjín nò'miì xi tsját'aà-la kjotjò Nainá koni s'ín tjín kjotíxoma xi kiskii Moisés.

⁵ Tanga jña nò'miì xi tjín ì ít'aà nangui, yaá síxá ni'ya xi tà isén-la-né kò 'nguién-la-né jè Ni'ya Tsjeè-la Nainá xi tíjna ngajmiì; nga jè Moisés k'e nga jye mejèn koiìts'ia nga kiindaà ni'ya tsjeè-la Nainá xi nikje, jè Nainá kitsò-la: “Ndaà chítsejìn, k'oa kó kji t'iin koni kji xi tsakoò-lè ya nindoò Sinaí.”

⁶ Tanga nàchrjein ì'ndeì, isaá ndaà tjín xá xi kitjoé-la Jesucristo nga nò'miì ítjòn tíjna, nga jè osijnajìn jngoò kjoa xitse xi isa ndaà tjín xi tsibíndaajìn Nainá kò xita, nga yaá nchrobát'aà-ne 'én xi isa ndaà tjín koni s'ín jye kitsjaà tso'ba Nainá.

⁷ Tsà nímé xi kisichiját'aà-la jè kjoa xi kisindaajìn ítjòn, mì-la kii mochjeén nga ìjngoò k'a sindaajìn xi ma-ne jò k'a.

⁸ Tanga Nainá k'e nga tsohótiko, k'oaá kitsò: Kijchò nàchrjein k'e nga kindaajìn-kò jngoò kjoa xitse jña xita Israel kò xita Judá, kitsò Nainá.

⁹ Jè kjoa xitse xi kindaajìn-koaa, mìtsà k'oas'ín sindaajìn koni ts'e xita jchínga-la, k'e nga 'an sobà kitsobà tsja nga tsachrjekàjñaà nangui Egipto.

Jña xita koi, mìkii kisikitasòn koni s'ín kisindaajìn, k'oaá komà-ne nga kitsjìn takoàn, tsò Nainá.

¹⁰ K'e nga jye koma iskan, jè kjoa xitse xi kindaajñaàkoaa xita Israel, kiís'ín s'e, tsò Nainá: Kjotíxoma-na yaá kíjnajñaà ya kjohítsjeèn-la, kò yaá skiaà ijìn inima-la. 'An-ná xi Nainá kitsò-na, kò jña-né xi koma xita naxandá-na.

¹¹ Mì tì kii kochjeén-ne nga xita xíkjín keènojmiya-la nì mìtsà jè 'ndse keènojmi-la nga skoexkon Nainá, nga ngats'iì xita skoexkon-na mats'iaako-ne xi isa ixti skanda jña xi 'ñó xita jchínga.

¹² 'Aán siìjchàat'aà-la ngats'iì kjoa ch'o xi kis'iin, mì tì kii siikítsjeèn-na jé xi tjín-la.

¹³ K'e nga Nainá síkaxkì ìjngoò kjoa xitse, tsòyaá-ne nga jè kjoa xi kisindaajìn ítjòn, jyeé kòjchínga. Mì tì kii tímochjeén-ne, jyeé tíchija.

9

Jè Ni'ya Tsjeè-la Nainá xi nikje

¹ Jè kjoa xi tsibíndaajìn ítjòn Nainá kis'eé-la kjotíxoma kós'ín ma nga jeya níkjnaá Nainá kò kis'e jngoò-la ni'ya tsjeè ì ít'aà nangui.

² Jè Ni'ya Tsjeè-la Nainá xi nikje, k'oaá s'ín tjíndaà nga jngoò ì'nde tǐjna ítjòn xi 'mì Ì'nde Tsjeè, ñánda tǐjna kǐcha xi tǐya ni'ín kò ñánda tǐjna ímǐxa xi nchasòn ìnchrajín tsjeè-la Nainá.

³ Jè nikje cortina xi ma jò-ne xi tjobá jngoò osen ni'ya nikje, ya ijton kijjna ì'nde xi 'mì Ì'nde xi ìsa 'Ñó Tsjeè.

⁴ Ì'nde jè, yaá kijjna jngoò kaxa xi nguì oro ñánda tìsòn chrjongó-la Nainá; tikoá yaá kijjna kaxa xi nguì oro yijájno ts'e kjoá xi tsibíndaàjìin Nainá. Kaxa jè, tǐjnaya jngoò tǐjí kǐcha xi nguì oro ñánda 'ncha ìnchrajín xi 'mì maná, tikoá yaá kǐjnaya yá nise-la Aarón xi tsibíjts'én-t'aà chrja-la kò ya 'ncha jña ndajo teè ñánda tǐjt'aà kjotíxoma-la Nainá xi kitjoé-la Moisés.

⁵ Ya ìsòn kaxa 'ncha isén-la àkjale xi querubín 'mì xi tǐjn-la jngaá xi okó kjoá jeya-la Nainá; jña jngaá-la bíjtsa'ma jè kaxa. Tanga ì'nde, jña kjoá koi, mìkì mochjeén nga íjngó íjngó skaya koxki.

⁶ K'e nga jye k'oas'ín kisinchaàndaà tsojmì koi, jña nò'miì, kjit'aà nachrjein fahas'en ya Ni'ya Tsjeè-la Nainá xi nikje, jè ì'nde xi tǐjna ítjòn, nga síkitasòn xá-la nga beèxkón Nainá.

⁷ Tanga jè ì'nde xi ma-ne jò, ta jè tajngoò nò'miì ítjòn fahas'en jngoò k'a nga jngoò nó; k'e nga fahas'en, tǐjné-la nga jní-la cho 'ba xi tsját'aà-la Nainá kjoá xi tǐts'e-ne jé-la kò ngats'ìi jé-la xita naxandá, jña xi mìkì tǐjìin-la tsà jé ótsji.

⁸ Jè Inima Tsjeè-la Nainá k'oaá s'ín síkíchiya-ná, k'e nga tákó jè tímochjeén Ni'ya Tsjeè xi nikje xi kisindaà ítjòn, kj'eè kù táx'a'nde nga koma kitjás'eén jè Ì'nde xi Ìsa 'Ñó Tsjeè.

⁹ Jña kjoá xi komà kjòtseé, tà kjoá mangásòn-né koni s'ín tíma nachrjein ì'nde; nga jña kjòtjò kò jní-la cho xi kixíxteèn ì'nde jè, tsjìn-la nga'ño nga sǐtsjeè kjohítsjeèn-la xita xi k'oas'ín beèxkón Nainá.

¹⁰ Kjoá koi, tà kjoá ts'eé yijo-la xita, mé tsojmì xi ma chine kò xi ma 'yò, koá kós'ín sítsjeè yijo-la xita; tà k'oaá s'ín tǐjèn kochjeén skanda k'e nga jè Nainá sǐkijatjìya-la ngats'ìi kjoá koi.

Nga'ño xi tse tǐjn-la jè jní xi tsibíxteèn Cristo

¹¹ Tanga jyeé j'ìi Cristo nga nò'miì ítjòn tǐjna ít'aà ts'e kjondaà-la Nainá xi jye tíma. Yaá jahas'en Ni'ya Tsjeè-la Nainá jè xi ìsa 'ño ndaà choòn kò xi ìsa kixi tǐjn, nga mìtsà tsja xita kisindaà-ne jè xi tsò-ne kjoá nga mìtsà ì ít'aà nangui kisindaà.

¹² Cristo, jngoò k'aá jahas'en ya Ì'nde Tsjeè. Mìtsà tǐ jní-la tǐndsó kò jní-la nchraja jahas'en-kò-ne. Ts'e sobá jní jahas'en-ne. K'oaá s'ín kis'ìin nga tsibíchjítjì jé-ná, mé-ne nga komà kisíkítsajnandeí-ná nita mé nachrjein-ne.

¹³ Jè jní-la nchraja kò jní-la tǐndsó kò chijo-la nchraja kiti xi nchraja chjoón ki'ndí, maá-la sítsjeè yijo-la xita xi xa'ya-la k'e nga xíxteèn-jno.

¹⁴ Tsà k'oaá s'ín bitasòn kjoá koi, jè jní xi tsibíxteèn Cristo, ìsaá tse nga'ño tǐjn-la. Nga ít'aà ts'eé nga'ño-la Inima Tsjeè xi tǐjnakon nita mé nachrjein-ne nga kitsjaà kjòtjò-la Nainá yijo-la xi mìtsà mé jé tǐjn-la. Jè jní-la Cristo sítsjeèya kjohítsjeèn-nò nga mì tǐ kù koá tǐs'ín s'en-nò kjoá xi fiko-ná kjoabiyaà, mé-ne nga ma sǐxá-la Nainá xi tǐjnakon.

Jè kjoá xitse xi tsibíndaàjìin Nainá kò xita

¹⁵ K'oaá ma-ne nga jè Cristo osìjnajìin osen koni s'ín tsibí'ño jngoò kjoá xitse. K'e nga k'en ngajo-la xita, jè tsibíchjítjì jé-la xi tsohótsji xita k'e nga tisa jè tíhotíxoma kjoá xi kisindaàjìin ítjòn, mé-ne ngats'ìi xita xi xó jaàjìin-ne tjoé-la kjòtjò xi tsjá Nainá nita kjé-ne koni s'ín kitsjaà 'én-la Nainá xi tso'ba kùchja-ne.

¹⁶ K'e nga jngoò xita mejèn-la síka'bí tsojmì xi tǐjn-la, bíndaà jngoò xojon xi bí'ño. Skanda k'eé mochjeén k'e nga biyaà jè xita xi bíndaà.

¹⁷ Tanga xojon jè, nímé chjí-là k'e nga tikj'e è biyaà xita xi tsibíndaà; skanda k'eé chjí-là k'e nga kiyá.

¹⁸ Jè kjoa xi kisindaàjiin ítjòn k'oaá tis'in kisindaàjiin nga cho k'en mé-ne komà kixixteèn-ne jní.

¹⁹ Moisés, k'e nga jye tsibíxkejiin-là xita naxandá ngats'ii kjotíxoma-là Nainá, ikjoàn kiskoé jní-là tíndsó kò jní-là nchraja ki'ndí kò kisikájiin nandá; kò kiskoé jngoò chrja-là yá hisopo kò tsja-là orrè xi inì kjoàn; jahajiin jní-là cho; ikjoàn tsibíxteèn-jno jè xojon xi tjít'aà kjotíxoma-là Nainá; k'eé tsibíxteèn-jno ngats'ii xita naxandá.

²⁰ Moisés kitsò: “Jè jní jè xi síkixiya kjoa nga koma sikitason koni s'in tsibíndaàjiin-kò-nó Nainá.”

²¹ Moisés, tikoáá tsibíxteèn-jno jní jè Ni'ya Tsjeè-là Nainá xi nikje kò ngats'ii tsojmì xi mochjeén k'e nga yaxkón Nainá.

²² Koni s'in tíchja xojon xi tjít'aà kjotíxoma-là Nainá, mejèn tsà ngats'ii kjoa, saá jní matsjeèya-ne; tsà mìkiì xixteèn jní, mìkiì koma jchat'aà-là jé-là xita.

²³ K'oaá s'in kjòchjeén nga jní-là cho matsjeèya-ne jè Ni'ya Nikje Tsjeè kò tsojmì xi tjíya xi mochjeén k'e nga yaxkón Nainá; jña tsojmì koi, ta okó-né koni choòn ján ngajmì; tanga jña xi tjín ngajmì, mochjeén-né nga biyaà jngoò xi isa xkón tjín mé-ne koma kotsjeèya-ne.

²⁴ Tanga Cristo, mìtsà ya jahas'en Ni'ya Nikje Tsjeè xi tsja xita kisindaà-ne, xi ta okó xi tjín ngajmì. Cristo, nguì yaá jahas'en ngajmì nga nguixkon Nainá nga tíchjatjì-ná.

²⁵ Mìkiì k'oas'in kjin k'a jahas'en ya ngajmì nga kitsjaat'aà kjotjò yijo-là, koni s'in no'miì ítjòn nga xkì nó fahas'en I'nde xi 'Nó Tsjeè, nga fahas'en kò jní xi mìtsà ts'e.

²⁶ Cristo tsà kjin-là k'a jahas'en ngajmì tikoáá tjínè-là nga kjin k'a sikkjeiín kjo'in kó-ne skanda kisindaà isò'nde. Tanga i'ndeì, nga jye tífehèt'aà nàchrjein, ta jngoò k'a j'ii nga kitsjaà kjotjò yijo-là nga tsibíxteèn jní-là, mé-ne nga kitjaàxìn-ne kjoa ts'e jé nita mé nàchrjein-ne.

²⁷ K'oaá s'in tjín nga ngats'ii xita, ta jngoò k'a biyaà, kò iskan kjoí jè nàchrjein nga sindaàjiin-là.

²⁸ K'oaá tis'in tjín it'aà ts'e Cristo, ta jngoò k'a kitsjaat'aà kjotjò yijo-là nga tsibíxteèn jní-là, mé-ne nga kjin xita tjáxìn-ne jé-là. Xi ma-ne jò k'a, kitjojen ijngoò k'a-ne ngajmì; mìtsà tì jé kjoááxìn-ne; koií xá kjoí-ne nga kòchrjekàjiin kjo'in jña xita xi nchikofña-là.

10

Mé-ne 'ño chjí-là jè kjoa biyaà-là Cristo

¹ Jè kjotíxoma-là Nainá xi kitjoé-là Moisés, mìtsà nguì jña kjondaà xi iskan j'ii; ta 'nguién-là né xi tsakó. K'oaá ma-ne nga jngoó k'a mìkiì koma nguì tsjeè sikkítsajna xita xi xkì nó síchrañat'aà-là Nainá nga tijña tijña kjotjò tsjá-ne.

² Jè kjotíxoma, tsà jngoò k'a kisitsjeèya jé-là xita, mì-la tì kii sikkájno-ne tsà jé tjín-là; tikoáá mì-la tì kii jní-là cho tsjá kjotjò-ne.

³ Tanga jè jní-là cho, xkì nó xkì nó síkítsjeèn-ya jé-là xita.

⁴ Nga jè jní-là nchraja kò jní-là tíndsó mìkiì ma-là faáxìn jña jé-là xita.

⁵ Cristo, k'e nga j'ii i isò'nde kitsò-là Nainá:

Majìn-lè jní-là cho xi biyaà, kò kjotjò xi tsját'aà-lè xita, tanga jè yijo-nà kinikijnandei.

⁶ Mìkiì sasén-lè cho xi kitì, kò nì jña kjotjò xi tsjá-lè xita xi kjoa ts'e jé-là.

⁷ K'eé kichjà, kixan-lè: “Koni s'in tíchja xojon-lè xi it'aà ts'an, jí tijnaa nga sikitason koni s'in mejèn-lè,

ji xi Nainá 'mì-lè.”

⁸ Cristo, ítjòn kitsò: “Majìn-lè kò m̀k̀ì sasén-lè jní-là cho xi biyaà kò kjotjò xi tsjá-lè x̄ita, cho xi kitì kò kjotjò xi tsjá xi kjoa ts'e jé-là”, nas'ín k'oas'ín tíchja kjotíxoma nga t̄jínè-là nga koatjín xi tsjá x̄ita.

⁹ Ikjoàn kitsò ìsa: “Í t̄jinaa nga sikitasoàn koni s'ín mejèn-lè.” K'e nga os'ín kùichja, tsòyaá-ne nga jè Cristo jaàxìn jè kjoa jchínga mé-ne nga kisikíjna ngajo-ne xi kjoa x̄itse.

¹⁰ K'oáá s'ín komà nga kisitsjeèya inima-ná Nainá it'aà ts'e Na'èn-ná Jesucristo k'e nga kos'ín kisikitasòn koni s'ín mejèn-là Nainá nga ta jngoò k'a kitsjaà kjotjò yijo-là n̄ita kjé-ne k'e nga k'en.

¹¹ Ngats'ì nò'miì, nachrjein nchijòn síkitasòn xá-là nga kjìn k'a tsjât'aà-là Nainá xi t̄jñà t̄jñà-ne kjotjò xi m̀k̀ì ma-là faáxìn jé-là x̄ita.

¹² Tanga Jesucristo ta jngoò k'a kitsjaat'aà kjotjò yijo-là kjoa ts'e jé n̄ita kjé-ne, ikjoàn tsibijnat'aà chrja kixi-là Nainá.

¹³ Yaá tíkoña skanda k'e nga kijchò nachrjein nga jñà x̄ita kondra-là s̄iichija nga jè Nainá s̄iikítsajngangi ndsoko.

¹⁴ Ta jngoò k'aá kitsjaat'aà kjotjò yijo-là mé-ne nga nguì ndaà kjòkixiya-ne x̄ita n̄ita kjé-ne, jñà x̄ita xi tímatsjeè.

¹⁵ Jè Inima Tsjeè-là Nainá ndaà síkixiya-ná kjoa koi; nga sa ítjòn tsò-né:

¹⁶ Jè kjoa jè xi k̄indaàjìn-koaa jñà x̄ita

k'e nga jye koma iskan, tsò Na'èn-ná:

Jñà kjotíxoma-na síkíjnajñà inima-là,

kò yaá skiáa ijìin kjohítsjeèn-là.

¹⁷ Ikjoàn tsò-ìsa:

'An, mì t̄i k̄i sìkítsjeèn-na jé xi t̄jín-là

kò ngats'ì kjoa ch'o xi s'ín.

¹⁸ K'e nga jye jchat'aà-ná jé-ná, mì t̄i mé kjotjò kochjeén-ne xi kjoa ts'e jé.

Mé kjoa-ne nga ìsa ndaà k̄inchat'aà chrañà-lá Nainá

¹⁹ Jñò ndí 'ndsè, k'oáá ma-ne nachrjein ì'ndeì, t̄jì'nde-ná nga k̄itjás'eén jè Ì'nde-là Nainá xi 'Nó Tsjeè, koi kjoa-là jè jní xi tsibíxteèn Jesús.

²⁰ Nga jè kiskíx'a jngoò-ná ndiyá x̄itse xi fiko-ná ñánda t̄jín kjoabinachon, nga koma kotokjá jè nikje cortina xi t̄johóya jngoò osen Ì'nde Tsjeè-là Nainá. Jè nikje, k'oáá ngaya-là koni yijo-là Jesús.

²¹ Nga t̄jín jngoò-ná nò'miì xi 'ñó jeya t̄jina xi otíxoma ya ni'ya-là Nainá.

²² K'oáá ma-ne nga mochjeén-né nga ìsa ndaà k̄inchat'aà chrañà-lá Nainá, nga nguì kixi síkíjnaá inima-ná kò nguì t̄jingoò takoán xi it'aà ts'e, nga jè Cristo jye kisitsjeè inima-ná kjoa ts'e jé, kò jè yijo-ná, k'oáá ngaya-là koni tsà nguì nandá tsjeè tsaníjno-ne.

²³ Kixi k̄itsajnaakoá kjoa xi titsachiñá-lá koni s'ín mokjeiín-ná nga mì kijen k̄ikjá-lá takoán; nga Nainá, x̄ita kixi-né, s̄iikitasòn-né koni s'ín jye kitsjaà 'én-là.

²⁴ K̄inchátsji'nde-lá nga 'én ndaà k̄inókjoa-lá xinguiáá mé-ne nga ìsa ndaà s'e-ná kjotsjacha; kò s'eén kjoa xi ndaà t̄jín.

²⁵ M̀k̀ì s̄ijchayaá jè nachrjein k'e nga bixoñaá, koni s'ín i'nga x̄ita nga mì t̄i k̄i bixoñat'aà-là x̄ikjín. Ta saà mochjeén-né nga k'oì-lá nga'ñó xinguiáá nga jngoò ìjngoò; ìsaá 'ñó kos'iaán k'e nga yaá nga jye t̄inchrobá machrañà nachrjein-là Nainá.

²⁶ Tsà k'oas'ín t̄jín takoán nga k̄inchátsji jé ìsaá k'e nga jye kiyaxkoaán kjoa kixi-là Nainá, mì t̄i mé jní koma x̄ixteèn-ne xi ma kjoaáxìn jé-ná.

²⁷ Tà jè kòkò ìsa-ná kjo'in xi 'ñó xkón t̄jín kò ni'ín jnga xi síkjehesòn yije x̄ita xi kondra fi-là Nainá.

²⁸ K'e nga tsà jngoò xit̄a xi mìkiì síkitasòn kjotíxoma-là Nainá xi kitjoé-là Moisés, tsà t̄jín jò, jàn xit̄a xi tsjá 'én nga kixi kjoa, mìkiì mahimacha, nìk'en-né.

²⁹ ¿Kós'ín beè-là takòn jñò, a mìtsà isa tse kjo'in ok'in-là jñà xit̄a xi binchanè jè Kì'ndí-là Nainá, kò ochrjekàngui jè jní xì tsibíxteèn, kò t̄ikoá chjajno-là Inìma Tsjeè-là Nainá xi t̄jín-là kjondaà? Jè jní xi ochrjekàngui, jè-né xi Nainá kisikjeén nga tsibíndaàjìl-n-kò xit̄a jngoò kjoa xit̄se, kò jè xi kisitsjeè-ne inìma-là xit̄a koi.

³⁰ Jyee t̄jìin-ná nga k'oaá tsò Nainá: “Aán okò-na nga tsjaà-là kjo'in xit̄a, 'aán tsjaà-là chjì-là.” Ìjngoò k'a tsò: “Jè Nà'èn-ná kùndaàjìl-n-là xit̄a naxandá-là.”

³¹ ¡Taxki 'ñó tse kjo'xkón t̄jín k'e nga ya kàyaá tsja Nainá xi t̄jnakon!

³² Tanga t̄ikítsjeèn kós'ín komàt'ioòn nàchrjein xi jye tsato, k'e nga sa kina'ya ítjòn 'én kixi xi kisihiseèn-nò, nga kichìkjoa-nò nga tse kjo'in kinìkjioòn.

³³ Kis'eé nàchrjein k'e nga jñà xit̄a kiichjajno-nò kò kiskaàn-kò-nò nga nguixkon xit̄a naxandá. T̄ikoáá kis'eé nàchrjein nga jñò kitsjahijtakoò jñà xit̄a xinguio xi t̄ikoá kjo'in nchisikjeín.

³⁴ Jñò, kjòhimacha xit̄a xi kjo'in nchisikjeín nga ndayá títsajna; kò t̄ikoá mìkiì kòjti-nò k'e nga kjòchijé-nò tsojmì-nò, ta saá kjòtsjaá-nò nga jye t̄jìin-nò nga ján ngajmii t̄jín-nò tsojmì xi isa ndaà kjoàn xi mìkiì fehet'aà n̄it̄a mé nàchrjein-ne.

³⁵ Kì nìchija-jèn koni s'ín kjit'aatakòn Nainá nga yaá tjoé-nò jè xi 'ñó tse chjì-là.

³⁶ Mochjeén-né nga s'e-nò kjoatsetakòn kjoa ts'e kjo'in, mé-ne k'e nga jye k̄itasòn koni s'ín mejèn-là Nainá, tjoé-nò xi tsjá-nò koni s'ín jye kitsjaà 'én-là xi tso'ba kiichja-ne.

³⁷ K'oaá s'ín chjā xojon xi t̄jít'aà 'én-là Nainá nga tsò:

Ta jngoò t̄jò chija-là nga kjo'í jè xi sa nchrobá.

Mìkiì kochrjein-là.

³⁸ Jè xi xit̄a kixi kíjnakon-né nga mokjeín-là,

tanga tsà kosit'aà xìn, mìkiì sasén-là inìma-na.

³⁹ Tanga jñá, mì k'oaá s'eén koni s'ín xit̄a xi ít's'in fi-ne nga síchija inìma-là. Ta saá ya kjiaán ya ì'nde ñánda k̄itjokàjìl kjo'in inìma-ná koi kjoa-là nga mokjeín-ná.

11

Kjoa xi mokjeín-ná

¹ Jè kjoa xi mokjeín-ná, jè-né nga t̄jín kixi nga tjoé-ná jñà kjoa xi chiñá-lá; jè-né nga t̄jngoò takoán nga k̄itasòn nas'ín mìkiì titsa'yaá xi kjoa n̄iton.

² Jñà xit̄a jchínga kjòtseé, koií kjoa-là nga kòkjeín-là nga ndaá ki'ya-là.

³ Ta koi-né nga mokjeín-ná nga kos'ín machiya-ná nga jè Nainá, tà kòò 'én-là tsibíndaà isò'nde; kisikatsejèn tsojmì xi mìkiì tsejèn nga sa ítjòn.

⁴ Abel, koií kjoa-là nga kòkjeín-là, kitsjaat'aà-là Nainá kjotjò xi isa 'ñó ndaà kjoàn, mì k'oaá-ne koni ts'e Caín. K'oaá s'ín komà-ne nga xit̄a kixi kitsò-là Nainá Abel; kiskoé kjotjò xi ijchòkò-là; skanda nàchrjein ì'ndeì, tákó k'oaá s'ín tíchja nga mokjeín-là, nas'ín jye k'en.

⁵ Enoc, t̄ikoáá kòkjeín-là; k'oaá s'ín komà-ne nga kiikò tíkon Nainá ján ngajmii; mì t̄i kiì kisakò-ne k'e nga jye kiikò. K'e nga sa tsibijna ì isò'nde, Enoc, k'oaá s'ín ki'ya-là nga ndaà kisaseèn takòn Nainá.

⁶ Tsà mìkiì mokjeín-ná ìt'aà ts'e Nainá, mìkiì koma s'eén kjoa xi sasén-là Nainá. Jè xit̄a xi síchrañat'aà-là Nainá mochjeén-né nga ndaà kòkjeín-là nga

tíjna Nainá, tikoá kòkjeiín-la nga ngats'iì xita xi ótsji Nainá, tsjá-la kjoṭjò xi ndaà tjín.

⁷ Noé koií-né nga kòkjeiín-la, k'e nga tsibénojmí-la Nainá kjoa xi iskan koma, kisikitasòn; koó kjoṭkón-la nga tsibíndaà jngoò chitso xi 'ño je kji, mé-ne nga mìkiì kiyá-ne jña xita ni'ya-la. Noé, nga ndaà kòkjeiín-la, k'oaá s'ín tsibínè-la kjo'in xita isò'nde nga jé tjín-la; ko jé Noé kitjoé-la kjoṭjò xi tsjá Nainá nga xita kixi kitsò-la ta koií kjoa-la nga kòkjeiín-la.

⁸ Abraham, nga kòkjeiín-la k'e nga kiichja-la Nainá, kisikitasòn. Itjokàjìin nangui-la, kiì ya i'nde ñánda tà kjoṭjò tsjá-la Nainá, tanga skanda mìkiì tíjìin-la ñánda tífi.

⁹ Koií kjoa-la nga kòkjeiín-la, nga kos'ín kisijchá yijo-la koni tsà xita xi xìn nangui-la nas'ín ya tsibijna ya i'nde ñánda nga k'oa kitsò-la Nainá nga tsjá kjoṭjò-la. Ni'ya nikjeé tsibijnaya. Nga kiì-isa nachrjein, k'oaá tì komat'in jé Isaac ko Jacob, xi tikoá k'oa's'ín kitsjaà-la 'én Nainá nga ts'e koma nangui.

¹⁰ Abraham tíkoña jngoò-la naxandá xi 'ño ndaà tjín tàts'en chrjó-la, nga jé Nainá kiskoòsòn-la kós'ín sindaà ko tijè-ne Nainá tsibíndaà.

¹¹ Koií kjoa-la nga kòkjeiín-la Abraham, nga nas'ín chjoón 'ndi jé chjoón-la xi 'mì Sara, ko nas'ín jye 'ño xita jchínga, kis'eé-la nga'ño nga kisakò jngoò-la ki'ndí jé Sara, koií kjoa-la nga kòkjeiín-la nga Nainá siikitasòn koni s'ín jye kitsjaà-la 'én-la.

¹² K'oaá ma-ne nga ta jé tajngoò xita jé, nas'ín jye tífehet'aà nachrjein-la, kjin jchán ma ixti-la xi tje ts'e k'oaá ngaya-la koni jña ni'ño xi tjín ngajmì ko tso mi xi jncha indii ndáchikon nga mìkiì ma maxkeya.

¹³ Ngats'iì xita koi, k'oaá s'ín mokjeiín-la skanda k'e nga k'en, nas'ín mìkiì kitjoé-la tsojmì xi Nainá k'oa's'ín kitsjaà 'én-la nga tsjá-la; ta k'oaá s'ín kjòchiya-la koni tsà ta kjìin kijtseè-ne; tsjaá kis'e-la nga kitsò nga mìtsà i i'nde-la, ta nchifahato-né nga títsajna i it'aà nangui.

¹⁴ Jña xita xi koatsò, k'oaá s'ín bénojmí kixi-né nga saá nchihótsji jngoò nangui xi nguì ts'e koma.

¹⁵ Tsà jé nchisíkítsjeèn nangui ñánda itjokàjìin, okixi-né komá-la kiì jngoò k'a-ne i'nde ñánda inchrobà-ne.

¹⁶ Tanga jngoò i'nde nchihótsji xi isa ndaà choòn, i'nde xi ts'e ngajmì. K'oaá ma-ne nga jé Nainá, mìkiì masobà-la nga kitso-la xita: jé jèe xi Nainá, nga jyeé kisikíjnandaà jngoò-la i'nde ñánda naxandá-la koma nga ya kitsajna.

¹⁷ Abraham, k'e nga kichit'aà, koií kjoa-la nga kòkjeiín-la nga kiskoé Isaac nga kitsjaat'aà kjoṭjò-la Nainá. Tsibijnandaà nga tsjá-la ki'ndí-la xi ta jé tajngoò-ne, nas'ín xó k'oa's'ín kitsjaà-ne 'én Nainá it'aà ts'e ki'ndí-la, k'e nga kitsò:

¹⁸ “It'aà ts'e Isaac, kjin jchán koma xita tje-lè.”

¹⁹ Abraham k'oaá s'ín kisíkítsjeèn nga Nainá tjín-la nga'ño nga ma-la síkjaáya-la xita nas'ín jye k'en. Kitjoé jngoò k'a-la ki'ndí-la koni tsà jaáya-la it'aà ts'e kjoabiyaà.

²⁰ Isaac, koií kjoa-la nga mokjeiín-la nga kisijét'aà-la Nainá nga katasíchikon-t'in Jacob ko Esau it'aà ts'e kjoa xi iskan koma.

²¹ Koií kjoa-la nga mokjeiín-la Jacob, k'e nga jye tíbiyaà, kisijét'aà-la Nainá nga katasíchikon-t'in ingajò ixti-la José; síngui'ño tsja ya nise-la nga jeya kisikíjna Nainá.

²² Koií kjoa-la nga mokjeiín-la José, k'e nga jye tíbiyaà, tsibénojmí kós'ín komat'in jña xita Israel nga kitjokàjìin naxandá Egipto. Tikoá kitsjaà okixi it'aà ts'e nindaà-la ñánda kjiko.

²³ Xita jchínga-la Moisés, koií kjoa-la nga kòkjeiín-la nga jàn sá kisikíjna'ma ki'ndí-la k'e nga sa kits'iín, nga kijtseè nga 'ńó ndaà kji isén-la ki'ndí-la, ko mìkiì kitsakjòn-la kjoṭíxoma-la xitaxá ítjòn ts'e naxandá Egipto.

²⁴ K'e nga jye kòjchínga Moisés, koií kjoa-la nga kòkjeiín-la nga mìkiì kisaseèn-la nga nea-la kitsò-la tsòti-la faraón.

²⁵ Tà saá jè jaàjìin nga kjo'in kisikjeiín ko naxandá-la Nainá, mì k'oa-ne nga kjotsja tsjá-la yijo-la xi kjoa ts'e jé.

²⁶ K'oaá s'ín kiskoòsòn-la nga isa 'ńó chjí-la kjo'in xi sùikjeiín xi it'aà ts'e Cristo mì k'oaá-ne nga kjotsja tsjá-la yijo-la xi kjoa nchiná ts'e naxandá Egipto. Kiskoñákjoaá-la kjondaà xi iskan tsjá-la Nainá.

²⁷ Koi-né nga tikoá kòkjeiín-la nga itjokàjìin naxandá Egipto; mìkiì kitsakjòn-la kjoajti-la jè xitaxá ítjòn; kixií tsibijna koni tsà xkon tíbeè-ne Nainá xi ni saá jngoò xita beèxkon.

²⁸ Moisés, nga kòkjeiín-la, tsjachrje s'eí Paxko. K'oaá kitsò-la ngats'ii xita Israel nga jní sùikaájno xotjoo ni'ya-la mé-ne jè àkjalé-la Nainá mìkiì sùik'en jñà xi ki'ndítjòn-la ts'e xita Israel.

²⁹ Jñà xita Israel, nga kòkjeiín-la, tsatojìin jè xi 'mì Ndáchikon Inì koni tsà nangui kixi. Jñà xita Egipto, k'e nga kijtseè, mejèn-la nga k'oa tìs'ín kis'iín, tanga ta yaá k'en yije ya ijìin ndáchikon.

³⁰ Nga kòkjeiín-la xita Israel, kisikixòjen chrjó xi tjíndiì-la naxandá Jericó, k'e nga jye kjò itoò nachrjein bitjindiì-la jé naxandá.

³¹ Koií nga kòkjeiín-la Rahab xi chjoón chijngui nga mì ya k'en-ko jñà xita xi mìkiì mokjeiín-la, koií kjoa-la nga ndaà kijtseètjò jñà xita Israel xi ítjòn ijchò kotsejèn 'ma-la nangui.

³² ¿Mé kjoa xi kènojímì isa? Mì-la kii chíya-na nachrjein nga kichjà it'aà ts'e Gedeón, ts'e Barac, ts'e Sansón, ts'e Jefté, ts'e David, ts'e Samuel ko ngats'ii xita xi kiichja ngajo-la Nainá.

³³ Koií nga kòkjeiín-la xita koi nga kis'e i'nga xi kisikijne-la kjoa ts'e kjojchán, xi kixi tsibíndaàjìin kjoa, xi Nainá kitsjaà-la koni s'ín jye kitsò-la xi tso'ba kiichja-ne, xi tsibíchjoajtò tso'ba xa.

³⁴ Kis'eé i'nga xi kisikits'o nga'ńó-la ni'ín jnga, xi itjomachinga-la nga kichà ndojò k'en-ne, xi kis'e ijngoò k'a-la nga'ńó nas'ín xk'én kjoàn, xi kis'e-la nga'ńó kjoa ts'e kjojchán, xi kisikijne-la xita kjojchán xi kondra ts'e.

³⁵ Kis'eé i'nga íchjín xi kitjoé ijngoò k'a-la xita xíkjín xi jye k'en nga jaáya-la.

Tanga tjín i'nga xi ya k'en-jìin kjo'in; mìkiì kjòmejèn-la nga tsibìtsajnandeíí, nga k'oaá s'ín kjòmejèn-la nga isa ndaà kítsajna k'e nga kjoaáya-la.

³⁶ Xi i'nga, kisikjeiín kjo'in nga kinìsobà-la, kiskaàn-ko xita, skanda na'ńó kichà cadena kisit'aà'ńó iya ndayá.

³⁷ Tjín i'nga xi ndajo kisinè nga kinìk'en; tjín i'nga xi kichà serrote kjòjòya-ne; tjín xi kichà ndojò k'en-ne. Xki xi ján chinchimasòn, tà chrjoo-la orrè ko chrjoo-la tíndsó tsakakjá nga 'ńó ima chinchima, tseé kjo'in kis'e-la ko 'ńó ki'yatoòn.

³⁸ Jñà xita koi, nga 'ńó ndaà kòkjeiín-la it'aà ts'e Nainá, skanda mìkiì ok'in-la nga i tsibìtsajna isò'nde. Xki xi ján chinchimasòn ya i'nde it'aà xìn ñánda nangui kixi choòn, kóhokji ijìin ijñá ko ingui nguijo ko ngajo xi tix'á ijìin nangui.

³⁹ Ngats'ii xita koi, koni s'ín nga ndaà kòkjeiín-la ndaá ki'ya-la, tanga nijngoò kitjoé-la xi Nainá tjín-ne nga tsjá-la koni s'ín jye kitsjaà-la 'én-la.

⁴⁰ Nainá tsibíndaà jngoò-ná kjoa xi isa 'ńó ndaà tjín, mé-ne jñà xita koi, ngàsòn kongásòn-kjoaá nga nímé chijjat'aà-ná nga kixi kítsajnaá.

12

Ndaà chítsejèn-là Jesús

¹ Nga 'ñó kjìn ma-ne xità xi títajandii-ná xi ndaà mokjeiin-là, k'oaá ma-ne nga tikoáá jñá, jngoò k'a sítajnaá ngats'ii kjoa xi sí'in-ná kò kjoa ts'e jé xi tsojà'ñó-ná nga konachan-ná; mochjeén-né nga k'oa s'ín s'eén koni jngoò xità xi ongachikon nga chíkjoako-là nga kijchò skanda ñánda nga tjín-nè-là nga kijchò.

² Ndaà chítsejèn-là Jesús; jè tsibíts'ia íjòn koni s'ín mokjeiin-ná kò jè síjngoò kjoa koni s'ín mokjeiin-ná. Jesús nga jye tjiin-là nga koma iskan s'eé-là kjotsja, k'oaá ma-ne nga kichikjoa kò-là kjo'in it'aà krò, mìkii kjòsobà-là koni s'ín k'en; ikjoàn tsibíjnat'aà chrja kixi-là Nainá nga ya tíhotíxoma.

³ Tíkítseèn it'aà ts'e Jesús; kichikjoa kò-là kjo'in xi tsibínè-là jñà xità jé, mé-ne jñò mìkii kijta-nò kò mìkii sikhàjeèn-là takòn.

⁴ Koni s'ín títajbixkàn-koo kjoa ts'e jé, kj'eè tsà yá xità xi tsò ikon nga sík'en-nò.

⁵ ¿A jye kijchàjiiin-nò koni tsò-nò Nainá nga íxti-là tsò-nò? K'oaá s'ín tíchja xojon xi jtít'aà 'én-là Nainá nga tsò:

Nga ki'ndí-na xan-lè, kì nachrjekàngui-jèn k'e nga síkixiya-lè Na'èn-ná, kò kì nìkjajen-là takoìn k'e nga síkaká-lè.

⁶ Na'èn-ná síkixiya-né jè xità xi tsjakeè,

tsjá-là kjo'in ngats'ii xi kjoétjò nga ki'ndí-là tsò-là.

⁷ Nainá k'oaá s'ín beèhikon-nò nga ki'ndí-là tsò-nò; tikjioón k'e nga kjo'in tsjá-nò. Ngats'ii xi Na'èn ma, tsjá-là kjo'in íxti-là nga síkixiya.

⁸ Tanga tsà Nainá mìkii sìkixiya-nò koni s'ín síko ngats'ii xi íxti-là ma, mìtsà kixi kjoa nga nguì íxti-là Nainá maà.

⁹ K'e nga sa íxtiaá, jñà xità jchínga-ná xi tjín í it'aà nangui, kíkixiya-ná koo ndaà kiyaxkoán. ¿A mìtsà isa ndaà jchaxkoán Na'èn-ná xi tíjna ngajmii, mé-ne nga kátas'e-ná kjoabinachon?

¹⁰ Xità jchínga-ná í it'aà nangui tsjá-ná kjo'in nga síkixiya-ná koni s'ín mejèn-là, nas'ín ta chiba nachrjein títajnaá. Tanga Nainá síkixiya-ná xi kjondaà tsajan mé-ne nga tsjeè kítajnaá koni jè Nainá nga tsjeè tíjna.

¹¹ Kixií kjoa, tsjìn kjo'in xi kjotsja tsjá, tà kjoaba tsjá nga 'on ma-là yijo-ná, tanga komà iskan-ne s'eé-ná kjoa kixi xi 'nchán tjín nga ndaà kítajnakoáá Nainá ngats'iaá xi bìl'ndeé nga tímakixiyaá.

¹² K'oaá ma-ne nga tjii-là nga'ño yijo-nò, chjímii'ngaà ndsaa xi mìkii ma síkjaníyá, kò xkó ndsokoò xi tsjín-là nga'ño;

¹³ Tjinchátsjioè xi ndiyá kixi nga kátandaà-ne ndsokoò xi tsá'yá kji, mé-ne nga mìkii isa ndaà kòtsó'ñò-ne.

Kì binchat'aàxìn-là kjondaà-là Nainá

¹⁴ 'Nchán títajnakoo ngats'ii xità; tsjeè títajna nga nguixkon Nainá. Nga nijngoò xità skoexkon Nainá tsà mì tsjeè tíjna.

¹⁵ Ndaà chítsejèn nga nijngoò xità kosijnat'aàxìn-là kjondaà-là Nainá, mé-ne nga mì k'oaá s'ín komat'ioòn koni tsà jngoò xka ijñá kiso xi tsja ima-là xi síkíts'ón xità nga tsjá ch'in-là.

¹⁶ Jñò, nijngoò xi xità chijngui koma, kì nachrjekànguiòè tsojmì xi tsjeè; kì k'oaá s'ín 'nè koni k'is'ín Esau nga tà jngoò chroba tsojmì xi ma chine tsatíjna-ne xi jè tjín-ne nga kòkò-là koni ki'ndí tjòn.

¹⁷ Jñò jyeé tjiin-nò, k'e nga jye komà iskan, Esau k'e nga kjòmejèn-là nga sìchikon-t'in na'èn-là, kinachrjekàngui-né, mì tì kii komà kjòchikon-t'in-ne, nas'ín takó 'ño kiskindàya.

18 [Koni s'ín komàt'in xita Israel nga kjin kjojkón kijtseè], jñò, mìtsà kos'ín ya ijchò kinchat'aà-là nindoò xi ma nìkò, jè nindoò ñánda títi ni'ín jnga, ñánda skanda mì tì kiì kjòtsejèn-ne nga jñò choòn kò ñánda tí'ba tjo xkón.

19 Mikii kina'yà-là jta-là chrjo, tikoà mikii kina'yà-là jta-là Nainá k'e nga kiichja. Jñà xi kiì'nchré-là Nainá, tsibítsi'ba-ne nga majìn-là nga kichja-isa,

20 koií kjoa-là nga mikii kichikjoa-là koni s'ín tjín kjotíxoma xi kisinè-là nga tsò: “Jè xita xi kosìjna jngoò ndsokò ya it'aà nindoò, nas'ín jngoò cho, ndajoò kiyá-ne kò tsà majìn kichaá kotosikjá yijo-la.”

21 'Nó xkón tjín kjoa xi ki'ya-là, skanda tijè-ne Moisés kitsò: “Tsakjoòn jchán-ná skanda chiba-là tíhotsé-ná.”

22 Tanga jñò, yaá ijchò kinchat'aà-là nindoò Sión, jè naxandá-là Nainá xi tijnakon, xi tijè-ne Jerusalén xi ts'e ngajmiì, ñánda kjin jmiì àkjalè títsajna xi nchisítsjako Nainá nga jeya nchisíkijna,

23 ñánda títsajnajtín ixti-là Nainá xi tjoé-là kjotjò xi ts'e ixtitjòn xi jtít'aà 'ín-là xojon ts'e ngajmiì. Ijchò kinchat'aà-là Nainá xi xitaxá tíjna nga jè bíndaàjìin-là ngats'ii xita. Tikoáá ijchò kinchat'aà-là injma-là xita kixi xi Nainá jye kisítsjeè nga nimé chijat'aà-là.

24 Ijchò kinchat'aà-là Jesús xi osìjnajìin-ná jngoò kjoa xitse kò jè jní-là xi kixíxteèn [nga kisítsjeè-ná] xi isa ndaá chja-ná mì k'oaá-ne koni ts'e Abel [xi síjé nga sindaàjìin].

25 Jñò, t'een kindà yijo-nò. Kì nachrjekànguioè jè xi tíchja-ná. Jñà xita jchínga kjòtseè xi tsachrjekàngui koni s'ín kinokjoa-là i it'aà nangui nga kinikaká-là, mikii tsajno-là nga kitjoé-là kjo'in. Jñá, isaá 'ñó 'ín tjín tsà kinachrjekànguiaá Nainá k'e nga skanda ján ngajmiì chja-ná nga síkaká-ná; mikii kojno-ná nga tjoé-ná kjo'in.

26 Jè nachrjein jè, jta-là Nainá, skanda jè nangui kisìjtiya-là, tanga nachrjein i'nde, k'oaá tsò: “Ijngoò k'a sùjtiya-là, mìtsà tà jè nangui sùjtiya-là koó ngajmiì.”

27 Jè 'én, k'e nga tsò “ijngoò k'a sùjtiya-là”, k'oaá s'ín machiya-ná nga tjáxin tsojmì xi xó kisindaà-ne, jñà xi ma oniyá-là, mé-ne nga kítsajna-ne xi mikii ma oniyá-là.

28 It'aà ts'e Nainá tsjá-ná okixi nga ya kotíxomakoáá ya i'nde ñánda mikii ma oniyá-là. Ndaà chjí-là Nainá jñà kjoa koi. Jeya síkijnaá kò jchaxkoán koni s'ín sasén-là jè.

29 Nga “jè Nainá, k'oaá गया-là koni ni'ín xi síkjesòn yije nita mé xi tjín.”

13

Kjoa xi mochjeén nga s'iin jñà xita-là Cristo

1 Jñò, títsjacha xita xinguiò xi 'ndsè chibá xi it'aà ts'e Cristo.

2 Kì nìjchàajioèn jñà xita xi bijchókón-nò ni'ya-nò, tìs'in-là nga kàtasíkjáya. K'oaá komàt'in i'nga xita, kiskoétjò xita xi mikii beèxkon, tanga àkjalè-né.

3 Tikítsjeèn jñà xita xi ndayá títsajna; k'oa's'ín t'è-là takòn koni tsà ngàsòn kjo'in títsajnaà. Tikítsjeèn jñà xita xi tíyatoòn koni tsà jñò xi tikoà k'oa's'ín tíyatoòn-nò.

4 Jñò xi jye chixàn, ngàsòn jchaxkón xinguiò. Kì ch'o bitsajnakoo xinguiò. Nga jñà xi kjoachijngui s'ín, Nainá tsjá-là kjo'in.

5 Kì toón 'ñó matsjacha; kàtajngoò takòn koni kji tjín-nò. Nainá k'oaá tsò: “Mikii tsjeiìn takòn-nò, kò mikii tajngoò siikijna-nò.”

6 K'oaá ma-ne nga ma k'oa's'ín kixoán:

Jè Nà'èn-ná kosìko-ná,
mikii kiskoán mé kjoa xi siko-ná xita.

⁷ Tíkítsjeèn jǎa xítà xi chinchà ítjòn nga tsakóya-nò 'én-la Nainá; tíkítsjeèn kó s'ín kisijchá yijo-la xítà koi kò k'oaá s'ín chjíngruì-là koni s'ín kòkjeiín-la.

⁸ Jesucristo mìkii fatjìya, tìjè-ne ngojña, tìjè-ne nachrjein ì'ndeì, kò tìjè-ne nítà mé nachrjein-ne.

⁹ Kì kiì nìs'in-là kjohítsjeèn xi k'ejí tsò kò xi mìkii yaxkon-la nga xìn ndiyá fikò-ná. Ìsáá ndaà tǐn nga jè inìma-ná s'e-la nga ñó ít'aà ts'e kjondaà-la Nainá mì k'oaá-ne koni ts'e tsojmì xi ma chine; nga jǎa tsojmì xi ma chine, nìmé nga ñó kitsjaà-la jǎa xi k'oa tǐn kjoa kisis'in-la.

¹⁰ Jǎa, tǐn jngoò-ná ì'nde tsjeè [ñánda kitsjaà kjotjò yijo-la Cristo nga k'en], tanga jǎa nò'miì xi tákó ya síxá ít'aà ts'e kjoa jchínga ya Nì'ya xi nikje, mìkii tǐ'nde-la nga tjoé-la kjondaà nga ya kòkjen.

¹¹ Nga jè yijo-la cho xi sík'en jǎa nò'miì, [mìkii tǐ'nde-la nga tjoé-la nga skine]; ta jè jní-la cho fikò jè nò'miì ítjòn ya ì'nde tsjeè-la Nainá xi kjoa ts'e jé. Tanga jè yijo-la cho, ít'aà xìn ì'nde fikò nga tì.

¹² K'oaá tìs'ín komàt'in Jesús, ít'aà xìn-la naxandá kisikjeiín kjo'in, mé-ne nga kisìtsjeè-ne naxandá ít'aà ts'e xi nguì jní ts'e.

¹³ K'oaá ma-ne jǎa, kítjokàjñaá naxandá. Jè kǐtjìngui-lá Jesús nga sǐkjaán-koaá kjo'in xi jè kisikjeiín.

¹⁴ Nga ì ít'aà nangui tsjìn-ná naxandá xi nguì jngoò k'a tǐna nítà kjé-ne; jè tìtsachiña-lá naxandá xi iskan kòtsejèn.

¹⁵ Koi kjoa-la mochjeén-né nga kǐt'aà nachrjein jeya sǐkǐjnaá Nainá ít'aà ts'e Jesucristo koni jngoò kjotjò xi 'bì-lá Nainá, 'én xi nguì tso'baá bitjo-ne nga bènojmiá yá-né jè.

¹⁶ Kì nìjchàajioòn nga ndaà t'een, tǐi ítse-là xinguiòo mé xi tǐn-nò; k'oaá tǐn kjotjò xi sasén-la Nainá.

¹⁷ Tíkítasòn-lá jǎa xítà xi jncha ítjòn-nò, tǐná'yañijon-là. Nga jǎa síkinda-nò nga mì jchija inìma-nò koiì kjoa-la nga tǐnè-la nga tsjá-la kindá Nainá. Tíkítasòn-là koni s'ín kǐtso-nò mé-ne nga nguì kò kjotsja-la sǐixá-ne nga mì ba s'e-la; tsà ba s'e-la, nìmé kjondaà s'e-nò.

¹⁸ Tǐjét'aà-là Nainá ít'aà tsajen, nga k'oaá s'ín tǐjngoò takòn-jen nga ndaà tǐn kjohítsjeèn-najen, mejèn-najen nga ndaà s'en-jen nítà mé kjoa-ne.

¹⁹ Ìsáá ndaà síjé-nò nga tǐjét'aà-là Nainá xi ít'aà ts'an, mé-ne nga kàtatsjá'nde-na nga nìton kjíkon-nò.

'Én xi fehet'aà-ne

²⁰ Jè Nainá xi tsjá kjoa'nchán xi kisìkjaáya-la ít'aà ts'e kjoa biyaa Na'èn-ná Jesucristo, xi paxtò ítjòn-la ts'e orrè, jè xi kò jní-la tsibí'ño-ne jngoò kjoa xitse xi mìkii kjoehet'aà nítà kjé-ne,

²¹ kàtasíkixiyandaà-nò ngats'ìi kjoa xi ndaà tǐn, mé-ne nga kàtítasòn-ne koni s'ín mejèn-la Nainá; ít'aà ts'e Jesucristo, k'oaas'ín kàtasíko-ná koni s'ín sasén-la Nainá. Jeya kàtǐjna Cristo nítà mé nachrjein-ne! K'oaá s'ín kàtama.

²² Bìtsi'bà-nò ndí 'ndsè, ndaà chjoétjò 'én xi tìkjiì-nò koni s'ín tìbìnè-nò nga ta chiba 'én tìkjiì-nò.

²³ Kàtasijìin-nò jè 'ndseé Timoteo jye tǐjnandejì-ne xi kjoa ts'e kjo'in; tsà kjoìi nìton, kjíko-ná k'e nga kjián katsejèn-nò.

²⁴ Tǐixat'aà yije jǎa xítà xi jncha ítjòn-nò kò ngats'ìi xítà-la Cristo. Jǎa xi Italia ts'e nchisíhixat'aà-nò.

²⁵ Ngats'ioò, jè kàtǐjnako-nò kjondaà-la Nainá.

Xojon carta xi kiskiù Santiago

Kó tsò Santiago nga síhixat'aà xità

¹ 'An, Santiago, xi chí'nda-la Nainá ma, kò ts'e Na'èn-ná Jesucristo, tìsìhixat'aà-nò, jñò, xi ya inchrobàt'aà-nò xi tejò tje-la naxandá Israel xi xkì xi ján nangui tìtsajnaà nga tíjtsa isò'nde.

Nga'ño xi sakó-ná k'e nga mé kjoa xi otojñá

² Jñò, xi 'ndse chibá it'aà ts'e Cristo, nguì tsja t'è-là inìma-nò k'e nga nìta mé kjoa xi kòmat'ioòn.

³ 'Ya-nò k'e nga tsà mé kjoa xi kòmat'ioòn nga chít'aà-nò koni s'ín mokjeiín-nò, jñà kjoa xi kotojñò, yaá sakò-nò nga'ño nga kichikjoako-nò nìta mé kjoa xi kotojñò.

⁴ K'oaá ma-ne jè nga'ño xi sakò-nò, ndaà kàtasíxájiìn inìma-nò mé-ne nga ndaà kojchínga-ne kò tíjngò-ne kjohítsjeèn-la inìma-nò nga nìmé síchijat'aà-la.

⁵ Tsà tíjín i'nga xità xi chijat'aà-la kjohítsjeèn, tíjé't'aà-la Nainá; jè tsjá-nò. Nga jè Nainá nguì koò inìma-la nga tsjá kò mìtsà ch'o tsò-la xità k'e nga síjé.

⁶ Tanga nguì ndaà kàtakjeiín-nò k'e nga síjé. Kì jò 'beé-la takòn. Jè xità xi jò 'beé-la ikon, k'oaá s'ín ngaya-la koni ndáchikon k'e nga 'ba tjo, fijen fikjako.

⁷ Jè xità xi jò 'beé-la ikon, kì k'oaá s'ín síkítsjeèn nga tíjín xi tjoé-la it'aà ts'e Na'èn-ná,

⁸ nga mìkì tíjngò ikon. Nachrjein i'ndeì kj'eìí s'ín tísíkítsjeèn, nchijòn-lè tìkooá kj'eìí kjohítsjeèn tíjín-la. Mìtsà nguì jngò ndiyá kjoé.

⁹ Jñà xità xi 'ndse chibá it'aà ts'e Cristo xi ìma tìtsajna, tsja kàtas'e-la nga 'nga tìtsajna nga nguixkon Nainá.

¹⁰ Tanga jñà xità nchíná, tsja kàtas'e-la nga nangui kìtsajna ya nguixkon Nainá, nga jè xità nchíná, k'oaá s'ín kòmat'in koni jngò naxó xi mìkì fìchrjein-la.

¹¹ K'e nga 'ño matsjè ndobá, jñà ijñá, xì-né, ìkjoàn bixòjen jè naxó-la; chíja isén-la nga ndaà kjoàn. K'oaá tìs'ín kòmat'in jñà xità nchíná, k'e nga 'ño nchisíxako xá xi tíjín-la, ta nìtoón kiyá.

¹² Mé ta ndaà-la jè xità xi chíkjoako-la k'e nga chít'aà, mé-ne k'e nga jye síkijne, tjoé-la kjoabinachon koni s'ín kitsjaà-la 'én Nainá, ngats'ì xità xi jè matsjakeè. Tjoé-la kjoabinachon k'oaá ngaya-la koni jngò corona sí'a sko xità xi síkijne k'e nga síská.

¹³ Jñò, k'e nga chít'aà-nò nga mejèn-nò nga ch'o s'een, kì k'oaá s'ín nìkítsjeèn nga jè Nainá tìkot'aà-nò. Nga jè Nainá mì yá xi koma-la skót'aà nga ch'o kàtas'ín Nainá. Tìkooá jè Nainá mì kì kot'aà xità nga ch'o kàtas'ín.

¹⁴ Jngò xità, k'e nga chít'aà, tíjñà-ne kjoa ch'o-la xi matsjakeè bínga nga tsobà'ño.

¹⁵ Kò jè kjoa ch'o xi matsjakeè, k'e nga jye bitasòn, yaá sakó jé. K'e nga jye bitasòn kjoa ts'e jé, ìkjoàn f'ì kjoa biyaa.

¹⁶ Jñò ndí 'ndse xi matsjake-nò, kì yijo-nò chonachàn-là.

¹⁷ Ngats'ì kjondaà kò kjotjò xi tjoé-ná, it'aà ts'e Nainá xi tíjna ngajmì nchrobá-ne, jè xi tsibíndaà ngats'ì tsojmì xi 'ya-la ngajmì, jñà xi síhiseèn. Nainá, mì k'oaá s'ín fatjìya-la koni ma jñà tsojmì xi síhiseèn ngajmì nga fatjìya-la koni ma 'nguién.

¹⁸ Nainá, k'oaá s'ín kjòmejèn-la nga kisikítsajnakon xitse ìjngoò k'a-ná xi kjoa ts'e 'én kixi-la, mé-ne nga jñá s'ingatsjaá yijo-ná Nainá koni tsojmì xi majchá ítjòn xi jè tsibíndaà.

Mochjeén-ne nga sikitasoán k'e nga jye na'yá 'én-la Nainá

¹⁹ Jñò, ndí 'ndsè xi matsjake-nò, t'ikítsjeèn ngats'ioò, isa ndaà titsajnandaà nga k'ina'ya-là xita xinguiáá xi k'její, chiba chiba t'ínókjoaa, ko k'ì taxki majti-nò.

²⁰ Jngoò xita xi jti takòn, mìk'ì kixi s'ikitasòn koni s'ín mejèn-la Nainá.

²¹ Chjaàxin-là yijo-nò ngats'ì kjoa t'jé ko kjoa ch'o xi xki xi ján t'jín, mé-ne nga indaàjìin chjoé-nò jñà 'én ndaà-la Nainá xi jye kina'yà, jñà 'én koi xi koma kochrjekàjìin-nò kjo'in.

²² T'ikitasòn koni tsò 'én-la Nainá. Kì tà na'yà-jèn. Tsà mìk'ì s'ikitasòn, t'ì yijo-nò titsachonachan-là.

²³ Nita yá xita-ne xi 'nchré 'én-la Nainá, tsà mìk'ì s'ikitasòn, k'oaá ngaya-la koni jngoò xita xi ch'itsín t'ikotsejèn-ya.

²⁴ K'e nga jye beè isén-la kó kji, ikjoàn fi, yaá jchàajìin-la kó kji isén-la.

²⁵ Tanga jè xi nguì ndaà kotsejèn-la kjotixoma kixi xi s'ikijnandejí-ná, nga koi 'én s'ikitsjeèn k'it'aà koni tsò kjotixoma, ko mìk'ì s'jchàajìin 'én xi 'nchré nga ndaà s'ikitasòn, xita jè, yaá sakó-la kjoa machikon-t'in k'e nga k'oas'ín t'is'ín.

²⁶ Tsà jngoò xita xi tsò: “Beèxkón-ná Nainá”, koa tsà mìk'ì bíchjoà-la nijen-la nga chja ngats'ì 'én xi ch'o tsò, yijo-laá t'ikonachan-la; nímé chjí-la nga tsò: “Beèxkón-ná Nainá.”

²⁷ K'e nga nguì kixi kjoa nga Nainá xi Na'èn-ná yaxkoán, koni s'ín mejèn-la, jé-né nga s'ichját'aà-lá xi ixti jchan, ko íchjín ka'àn xi jye k'en x'in-la, jñà xi kjo'in t'jín-la, t'ikoa mì k'ì k'inde-lá yijo-ná nga kjoa ch'o jch'ìnj'ñaá xi t'jín isò'nde.

2

Mì k'ì mochjeén nga chjaajñaá xita xinguiáá nga ndaà sis'in-lá

¹ Jñò, ndí 'ndsè, koni s'ín mokjeiín-nò it'aà ts'e Na'èn-ná Jesucristo xi jeya t'jna, k'ì chjaajñoò xita xinguióo.

²⁻³ Tsà jngoò xita k'ijchò ya i'nde ñánda bixoña, xi tangò oro t'ikjá najnó tsja, t'ikoa 'ño ndaà kjoàn nikje chjí xi kikjá. Jñò, tsà 'ño ndaà sis'in-là, k'oín-la: “T'ijni ijndé ñánda ndaà choòn.” Tsà t'ikoa k'ijchò jngoò xita ima xi kixajndajno kixajndat'aà nikje-la, tsà k'oín-la: “Taxki t'isijni ya, ko tsà majìn, taxki t'ijnat'eù ya nangui.”

⁴ Jñò, k'e nga kos'ín s'een, xinguióo titsanachrjekànguio nga chjaajñoò xita xinguióo koni s'ín xitaxá xi ch'o t'jín kjohítsjeèn-la.

⁵ Jñò ndí 'ndsè xi 'nó matsjake-nò, t'ina'ya: Nainá xó k'oaá s'ín jaàjìin-ne jñà xi xita ima xi t'jín i'isò'nde, mé-ne nga jñà k'itsajna ítjòn-ne koni s'ín mokjeiín-la t'ikoa t'joé kjotjò-la ngats'ì kjondaà xi Nainá tsjá-la jñà xita xi jè otixoma-la nga jyeé k'oas'ín kitsjaà 'én-la nga tsjá-la xita xi matsjakeè.

⁶ Tanga jñò, ta saá nachrjekànguioò jñà xita ima. ¿A mìtsà jñà xita nch'ina xi jñò beètoòn-nò nga fikò-nò nguixkon xitaxá nga óngui-nò?

⁷ ¿A mìtsà jñà xita nch'ina xi chjajno-la it'aà ts'e 'ín-la Cristo, xi jè otixoma-nò?

⁸ Jñò, ndaà 'nè-nò tsà kixi kjoa nga n'ikitasòn jè kjotixoma-la Cristo xi otixoma koni s'ín t'ichja Xojon-la Nainá nga tsò: “T'itsjachi xita xingui xi i'nga koni tsà t'ì yijo tsiji-ne.”

⁹ Tanga tsà chjaajñoò xita xinguióo, t'jín xi ndaà n'is'in-laà ko t'jín xi mìk'ì ndaà n'is'in-laà, jé binchaàtsji-la yijo-nò, nga n'ikatonè-là kjotixoma; t'ijè-ne kjotixoma t'ibínè-nò jé.

¹⁰ Nga tsà jngoò x̄ita xi ndaà síkitasòn yije kjotíxoma tanga tsà tà jngoò kjoa síkatonè-la, jye kisakò jé yije-la ìt'aà ts'e kjotíxoma-la Nainá.

¹¹ Nga k'oaá tsò Nainá: “Kì kjoa chijngui 'nè.” Tanga t̄ikoáá t̄jít'aà ñánda tsò: “Kì x̄ita nìk'eèn.” J̄nò, tsà mì kjoa chijngui 'nè, tanga tsà x̄ita nìk'eèn, jye kisakò jé-nò ìt'aà ts'e kjotíxoma.

¹² J̄nò, k'oaá s'ín t̄inókjoaa kò k'oaá s'ín t'een koni x̄ita xi Nainá k̄indaàj̄iìn-la tsà k'oas'ín t̄ibitasòn-la koni tsò kjotíxoma xi síkítsaj̄nandej̄í x̄ita.

¹³ J̄nà x̄ita xi tsj̄ìn-la kjoh̄imatakòn ìt'aà ts'e x̄ita xi kj'eíí, t̄ikoáá mìkì s'e-la kjoh̄imatakòn k'e nga s̄inè-la kjo'in. Tanga j̄nà xi t̄j̄ìn-la kjoh̄imatakòn, mì kjo'in s̄inè-la k'e nga s̄indaàj̄iìn-la.

Kjondaà xi 'né k'e nga mokjeiín-ná

¹⁴ Ndí 'ndsè, nímé chj̄í-la tsà jngoò x̄ita xi tsò: “An, mokjeiín-na ìt'aà ts'e Nainá”, tsà mìkì t̄í'ya-la kjondaà-la. X̄ita jè, xi ta jè kjoa mokjeiín-la, mìkì koma k̄itjokàj̄iìn kjo'in.

¹⁵ Tsà jngoò 'ndsé kò tsà jngoò tichjaá xi tsj̄ìn-la nikje xi ókjá kò tsà tsj̄ìn-la tsojmì xi kine;

¹⁶ j̄nò, tsà k'óin-laà: “T'in-là ndaà-ne, ndaà ch̄ikjeí nikje-lè, ndaà chin̄i tsojmì xi mejèn-lè.” Kò tsà mìkì s̄ichj̄át'aà-là mé xi mochjeén-la, nímé chj̄í-la.

¹⁷ K'oaá t̄is'ín ma kjoa xi mokjeiín-ná, tsà mìkì t̄í'ya-la kjondaà-ná, nímé chj̄í-la kjoa xi mokjeiín-ná.

¹⁸ T̄j̄ìn i'nga x̄ita xi kjònangui, tsò: “¿A mokjeiín-lè ìt'aà ts'e Cristo?” 'An, xan-la: “T̄í'yaá-la kjondaà-na. ¿A komaá kókó-ná nga mokjeiín-lè ìt'aà ts'e Cristo tsà nímé kjondaà t̄i'nì? Tanga 'an t̄is'ín-ná kjondaà, k'oaá ma-ne kokoò-lè nga kix̄í kjoa nga mokjeiín-na.”

¹⁹ Ngaji ndaá t̄j̄ìn nga mokjeiín-lè nga jngoò ma Nainá. Tanga t̄ikoáá j̄nà in̄ima ch'o-la neíí mokjeiín-la nga t̄j̄ìn Nainá, skanda otsé-né nga tsakj̄ón-la.

²⁰ J̄nò, x̄ita xi tsj̄ìn-nò kjoh̄ítsjeèn, ¿a mì f̄iya-nò nga nímé chj̄í-la kjoa xi mokjeiín-nò tsà mìkì t̄í'ya-la kjondaà-nò?

²¹ Na'èn jchán kj̄ìn-ná Abraham, ¿mé-ne x̄ita kix̄i kitsò-la Nainá? Koií kjoa-la nga ndaà kisikitasòn koni s'ín kitsò-la k'e nga kitsjaà kjotjò Isaac xi k̄i'ndí-la ma nga t̄j̄ìn-ne nga s̄ìk'en.

²² ¿A mì 'ya-jèn nga jè Abraham koni s'ín nga kòkjeiín-la, k'oaá t̄is'ín kisikitasòn? Koni s'ín kisikitasòn, yaá kjòjngoò kjoa mokjeiín-la nga nímé kis̄ichj̄át'aà-la.

²³ K'oaá s'ín tsitasòn koni s'ín t̄íchja Xojon-la Nainá nga tsò: “Abraham kòkjeiín-la ìt'aà ts'e Nainá; k'oaá s'ín komà-ne nga Nainá kiskoétjò nga x̄ita kix̄i kitsò-la.” Amigo-la Nainá k̄i'mì Abraham.

²⁴ Yaá 'yaà, nga Nainá kjoétjò x̄ita kjoa ts'e kjondaà xi síkitasòn, mìtsà tà koi kjoa-la nga mokjeiín-la.

²⁵ K'oaá t̄is'ín t̄j̄ìn ts'e chjòón chijngui xi 'mì Rahab; Nainá kiskoétjò nga x̄ita kix̄i kitsò-la koií kjoa-la kjondaà xi kis'ín nga kitsjaà'nde-la j̄nà x̄ita xi ijchò katsejèn-'ma, ikjoàn kis̄ichj̄át'aà-la nga x̄in ndiyá kisikasén-ne x̄ita koi.

²⁶ K'oaá t̄is'ín t̄j̄ìn jè yijo-ná, nímé chj̄í-la, t̄jna k'en-né tsà tsj̄ìn in̄ima-ná. K'oaá t̄is'ín ma kjoa xi mokjeiín-ná, tsà mìkì t̄í'ya-la kjondaà-ná, nímé chj̄í-la.

3

Kjoa ts'e nijen-ná nga nokjoá

¹ J̄nò ndí 'ndsè, ìt'aà tsajòn, k̄i kj̄ìn ma-ne xi maestro ma. Jyee 'ya nga ngajen xi okoòya-jen, tsà mé kjoa xi ch'o 'nè-jen, isaá tse kjo'in s̄inè-najen.

² Ngats'iì-ná, k̄jìn skaya kjoach'o xi 'né, tanga jngoò x̄ita xi mì ch'o tsò 'én xi chja, jè-né xi nguì x̄ita kixi, xi komà-la kotixoma yije-la yijo-la.

³ K'oaá ngaya-la koni kohòyo xi si'a freno tso'ba mé-ne nga s̄ikitasòn-ne koni s'ín mejèn-ná nga kjoì, k'oaá s'ín ma'nchré yije yijo-la.

⁴ K'oaá t̄is'ín t̄jín koni s'ín síxá j̄nà chitso, nas'ín takó i'í kjoàn, ko nas'ín takó 'ñó 'ba tjo xi fàhitjen, jè x̄ita xi síxáko nas'ín jtobá kji yá xi 'mì timón xi síxáko, maá fàhitjen nga fikò n̄ita kós'ín mejèn-la nga k̄jiko.

⁵ K'oaá t̄is'ín ma xi kjoa ts'e n̄ijen-ná. Tà yijo jtobá kji, tanga 'ñó 'nga chja n̄ita mé kjoa-ne. K'oaá ngaya-la koni jngoò ni'ín xi ìtsé kji, komaá kókángui ij̄nà nas'ín takó tse ma.

⁶ N̄ijen-ná k'oaá ngaya-la koni jngoò ni'ín, yaá t̄jì'a yije ngats'iì 'én ch'o xi t̄jín isò'nde xi ma-la síkits'ón yije yijo-ná. Jè ni'ín xi t̄jín ya i'nde ts'e kjo'in ñánda 'mì infierno, jè bít'a'í-la n̄ijen-ná nga chja 'én xi ch'o tsò xi koma-la kókà-ná koni t̄jín nachrjein k̄itsajnakoaán.

⁷ Ngats'iì cho xi t̄jín i isò'nde ma ma'nchré, koni j̄nà cho xi t̄jín ij̄in ij̄nà, ko xi t̄jímaj̄in isén, ko j̄nà cho xi nangui bífejno yijo-la ko j̄nà xi t̄jín ij̄in ndáchikon, j̄nà x̄ita ma-la sí'nchré.

⁸ Tanga n̄jngoò x̄ita xi ma-la sí'nchré n̄ijen-la. Nga jè n̄ijen-ná jngoò kjoa ch'o t̄jín-la xi mìkìl tsjá'nde nga ma'nchré. Yaá t̄jì'a koni xán kjan-la ye xi ma-la sík'en-ná.

⁹ T̄ijè-ne n̄ijen-ná jeya síkijna Nainá xi Na'èn-ná, ko t̄ijè-ne nokjoà'on-koaá x̄ita xi kós'ín kisindaà koni kji Nainá.

¹⁰ T̄ijè-ne ndsobaá bitjo-ne 'én xi jeya síkijna Nainá ko t̄ijè bitjo-ne xi nokjoà'on-koaá x̄ita. Ndí 'ndsè, mìkìl ndaà t̄jín kjoa koi.

¹¹ Jngoò ngajo ñánda t̄ibitjo nandá, mìkìl koma k̄itjo nandá jnchra koa k̄itjo nandá ndaà.

¹² J̄nà yá toò iko, ¿a komaá koja-la toò xi 'mì aceituna? Jè yá uva, ¿a komaá koja-la toò iko? J̄nò ndí 'ndsè k'oaá t̄is'ín t̄jín kjoa ts'e nandá, jngoò ngajo mìkìl koma k̄itjo nandá jnchra ko k̄itjo nandá ndaà.

Kós'ín t̄jín kjoachjine xi nchrobá-ne ján ngajmì

¹³ J̄nà x̄ita xinguiòo, tsà t̄jín i'nga xi t̄jín-la kjoa chjine ko xi ndaà fiya-la, kàtakó kjoachjine-la nga indaà ikon t̄isíjchá yijo-la.

¹⁴ J̄nò, tsà biì'nde-laà yijo-nò nga kjoax̄itakòn s̄ij̄in inima-nò nga mejèn-nò nga j̄nò k̄itsajna ítjòn-la xinguiòo, kì k'oaá s'ín nokjoà nga ndaà titsa'nè; kì 'én ndiso nokjoà nga kondra onguí-la kjoa kixi-la Nainá.

¹⁵ Kjoa chjine jè, mìtsà it'aà ts'e Nainá nchrobá-ne. Kjoa chjine ts'e isò'nde-né. K̄joh̄itsjeèn ts'e x̄ita-né, ko t̄i ts'eé-ne x̄ita nejí.

¹⁶ K'e nga max̄itakòn-chaá xinguiáá ko nga mejèn-ná nga j̄nà k̄itsajna ítjòn-laà, yaá sakó-ná kjoasiì, ngats'iì kjoa ch'o xi t̄jín isò'nde.

¹⁷ Tanga j̄nà x̄ita xi t̄jín-la kjoa chjine xi it'aà ts'e Nainá nchrobá-ne, tsjeè síjchá yijo-la, kjoa'nchán ótsji, t̄jín-la k̄jondaà, x̄ita 'nchré-né, t̄jín-la k̄joh̄imatakòn, ndaà t̄jín xá xi s'ín, mì jò fi-ne, ko 'én kixí chja.

¹⁸ Jè x̄ita xi mejèn-la nga s'e kjoa'nchán, 'nchán b̄ijnako x̄ita xi i'nga mé-ne nga ma iskan sakò-la k̄jondaà xi kixi t̄jín.

4

Jè xi matsjakeè kjoa ts'e isò'nde, kondra ts'eé Nainá

¹ ¿Ñánda nchrobá-ne k̄jojchán nga bixkàn-koo xinguiòo? Yaá nchrobá-ne kjoach'o xi k̄jit'aà nachrjein síjé inima-nò nga bixkàn-koo k̄joh̄itsjeèn ch'o-nò.

² Mejèn-nò tsojmì xi tsjìn-nò tanga mìkìl sakó-nò, k'oaá ma-ne nga nìk'eèn x̄ita koa max̄itakòn-chaá x̄ita, tanga mìkìl sakó-nò tsojmì xi mejèn-nò. K'oaá

ma-ne nga sakó-nò kjojchán nga bixkàn-koo xinguiṓ. Mìkì sakó-nò tsojmi xi mejèn-nò koií kjoa-la nga mìkì nìjé-la Nainá.

³ K'e nga nìjé-laà Nainá, mìkì tsjá-nò nga mìkì ndaà nìjé-laà. Nga jè xi mejèn-nò nga ya sìchjeén it'aà ts'e kjotsja xi ch'o síjé yijo-nò.

⁴ Jñò xi mìtsà xita kixi 'mì-nò, ¿a mìtsà 'ya nga jè xi matsjakeè kjoa ts'e isò'nde, kondra ts'eé Nainá? Nita yá-ne xi mejèn-la kotsjakeè kjoa ts'e isò'nde, kondra-la Nainá ma.

⁵ Koií k'oa tsò-ne Xojon-la Nainá nga tsò: “Jè Inima Tsjeè xi Nainá kitsjaà-ná, skanda machini-né nga 'ñó matsjakeè-ná.”

⁶ Tanga Nainá, nga ko kjondaà-la ndaà síchjít'aà-ná. K'oa tsò Xojon-la nga tsò: “Nainá kondraá tjna-la jña xita xi 'nga ikon, tanga koó kjondaà-la ndaà síko jña xi xita ima kjoa.”

⁷ Tjii'nde nga Nainá kátatixoma-nò, ko 'ñó tájaàjìin titsajna-laà xita neí mé-ne nga kosít'aàxìn-nò.

⁸ Tichrañat'aà-laà Nainá mé-ne jè Nainá sìchrañat'aà-nò. Jñò xi jé binchaàtsjioò, kì tì jé binchaàtsji-nò, titsjeè ndsaa. Tìtsjeèya kjohítsjeèn-la inima-nò, jñò xi jò kjohítsjeèn tjin-nò nga okji matsjacha Nainá ko okji matsjacha isò'nde.

⁹ Tikájnoò jé-nò, ba titsajna ko chihindáyaà. Jè kjoa bijnò-nò, kjoa ts'e ndáxkoón kátama. Ko jè kjotsja-nò, kjoaba kátama.

¹⁰ Nangui titsajna-la Nainá mé-ne jè Nainá 'nga sìkítsajna-nò.

¹¹ Ndí 'ndsè, kì nokjoàjno-la xinguiṓ. Jè xi chjajno-la 'ndse nga tsò: “Mìkì ndaà tís'in”, jè kjotixoma tíchjajno-la nga tsò nga mìkì ndaà tjin kjotixoma. Ko tsà k'oa s'in si nga mìkì ndaà tjin kjotixoma, mìkì tìnkitasòin koni tsò kjotixoma. K'oa gaya-la koni tsà xitaxá tjni nga jì tìbìndaàjìin.

¹² Tà jngoò ma-ne xi tsjá kjotixoma, tije-ne xi xitaxá tjna nga bìnndaàjìin-la xita. Ko tije-ne xi ma-la kochrjekàjìin-ná kjo'in, tiko tije-ne xi ma-la tsjá-ná kjo'in. ¿Yá-ne ngaji nga jé bìnè-laà xingui?

Xita xi chja 'én 'nga ikon

¹³ Jñò, ndaà tiná'yaà koni xán-nò. Jñò bixón-nò: “Nachrjein i'nde, o nchijòn-lè, xìn naxandá kjaán, jngoò nó kitsajnaá nga síxá mé-ne tse ton síkijneé.”

¹⁴ Tanga jñò, mìkì tjiin-nò mé xi komat'ioòn nchijòn-lè nga titsajnakon. Jñò, k'oa s'in gaya-la koni ifi. Jngoò tjò fahaya, ikjoàn nitoón fiya-ne.

¹⁵ Jñò, kii s'in tinókjoa: “Tsà Nainá mejèn-la nga sìkítsajnakon-ná, komaá s'eén xá koi, o s'eén xá xi kjeí.”

¹⁶ Tanga jñò, 'ñó 'nga 'én nokjoà nas'in mìkì tjiin-nò mé xi koma nga tífi-isa nachrjein. Ngats'i 'én 'nga xi nokjoà, jé-né.

¹⁷ Jè xi tjiin-la kjoa xi ndaà tjin ko mìkì síkitasòn, jé tíhótsji-la yijo-la.

5

Kjo'in xi sìkjeín xita nchiná

¹ Jñò xi xita nchiná 'mì-nò, tiná'yaà 'én xi xán-nò. Chihindáyaà ba ba it'aà ts'e kjo'in xi síkjoón.

² Kjoa nchiná-nò, nímé chjí-la, tíbi'ndo-né. Nikje xi kichíkjá, jye nchisíkje cho kixo.

³ Ton oro-nò ko ton plata-nò jyeé tímachi. Jè nachrjein k'e nga sindaàjìin, jña chi-la kochjeén xi kondra tsajòn. Koó ni'in koka yije yijo-nò. Nga jñò, titsabincháxkó ton nas'in jye tífehet'aà nachrjein.

⁴ Jñà xità chj'nda xi kisixá nangui-nò, nchikjindáya nga ótsjiya chjí-la nga jñò kichonachan-là. Nainá xi ts'e yije nga'ño xi tjín, jyeé kiì'nchré-la koni s'ín nchikjindáya.

⁵ Jñò, nga ì titsajnaà it'aà nangui, ndaà titsajnaà nga nimé chija-nò, 'bì-la kjotsja yijo-nò. Titsanisiin-là inima-nò nga 'bì-là kjotsja xi síjé k'oaá ngaya-la koni cho xi mìkiì tíjiin-la tsà jye ijchò nachrjein-la nga kijá.

⁶ Jñò, tsohònè-là jé koa kinik'eèn jñà xi xità kixi xi mì jé tjín-la. Jñà xità koi, mì kì komà tsasìko yijo-la.

Mé kjoa xi s'eén nga titsachiñá-lá nga kjoí ìjngoò k'a Cristo

⁷ Jñò ndí 'ndsè, chíñakjoaa kóni skanda k'e nga kjoí ìjngoò k'a Na'èn-ná. K'oas'ín chíña koni s'ín xità xi síxáko nangui nga koñakjoa-la jé jtsí xi 'ba ítjòn ko xi iskan 'ba nga síxáko jñà tsojmì tjè mé-ne nga koma koiixkó-ne tsojmì tjè-la xi majchá nga 'ño chjí-la.

⁸ Jñò, k'oaá tis'ín chíñakjoaa, 'ño t'è-là takòn nga jyeé nchrobá machraña nga kjoí ìjngoò k'a Na'èn-ná.

⁹ Ndí 'ndsè, kì xkì xi ján tsajét'aà-là xinguiò, mé-ne nga mì kjo'in sìnè-nò. Nga jé Na'èn-ná jyeé tjnandaà nga kjoí mé-ne koiindaàjiin-la xità.

¹⁰ Ndí 'ndsè, jñò, k'oaá s'ín t'een koni s'ín kis'iin jñà xità xi kiichja ngajo-la Nainá nga kichìkjoako-la nga kisìkjeiín kjo'in koií kjoa-la nga 'én-la Nainá kiichjaya.

¹¹ K'oaá s'ín 'ya-la nga jñà xità xi chíkjoako-la kjo'in, s'eé-la kjondaà. Jyeé tíjiin-nò nga jé Job k'oaá tis'ín kichìkjoako-la kjo'in. Ko jyeé 'yaà mé xi kitsjaà-la Na'èn-ná k'e nga jyehet'aà-ne kjoa. Na'èn-ná 'ño ndaà xità, tjín-la kjohimatakòn.

¹² Jñò ndí 'ndsè, k'e nga 'bioè 'én-nò, kì yá xi nìkítsajna ítjòn. Kì jé ngajmì ko nangui, o xi kj'eji tsojmì nìkjeén. Tà k'oaá s'ín tixón: “Jon”, o xi “Majìn”, mé-ne nga mì kjo'in sìnè-nò tsà mìkiì kítasòn.

Kjoa bìtsi'ba

¹³ Tsà tjín i'nga xità xinguiò xi ba tjín-la, kàtítisi'ba-la Nainá. Tsà tjín i'nga xi tsja tjín-la, kàtaseè-la Nainá nga jeya kàtasikíjna.

¹⁴ Tsà tjín i'nga xità xinguiò xi xk'én, kàtakinikjaá xità jchínga xi tjín-la xá ya jjiin naxandá-la Cristo mé-ne nga katítisi'batji-ne ko it'aà ts'e nga'ño-la Na'èn-ná kàtasikájno-la asitì.

¹⁵ K'e nga bìtsi'batjiò xità, tsà ndaà mokjeiín-nò, jé xità xi xk'én kondaà-ne. Jé Na'èn-ná siindaà-ne nga koma kosítjen-ne. Tsà jé tjín-la jchat'aà-la jé-la.

¹⁶ Chjahatakòn-là xità xinguiò jé-nò. Tikoā titsi'batjiò xinguiò mé-ne nga kondaà-nò. K'e nga jngoò xità kixi bìtsi'ba, tjín-la nga'ño nga kítasòn.

¹⁷ Jé xità xi kiichja ngajo-la Nainá xi k'ì m'Elías, k'oaá tis'ín xità koni jñá. 'Ñó kisìjét'aà-la Nainá nga mì tì jtsí k'oa-ne; ko ján nó osen mì tì kiì ts'a-ne jtsí.

¹⁸ Ìjngoò k'a tsibìtsi'ba-la Nainá nga kàt'a jtsí. Ts'aá ìjngoò k'a-ne jtsí ko jé nangui kòjchá tsojmì tjè.

¹⁹ Ndí 'ndsè, tsà tjín i'nga xinguiò xi chinchat'aaxìn-la xi kjoa kixi, koa tsà jngoò xità kichja-la nga kàtjanchróbát'aà ìjngoò k'a-la Nainá,

²⁰ jé xità xi kichja-la nga keènojmi-la nga ch'o tjín ndiyá xi tsó'baya, k'oas'ín kàtasiin-nò nga jngoò xità tíhochrjekàjiin kjo'in xi ts'e kjoabiyaà. 'Ñó kjìn jé jchat'aà-la.

Xojon carta xi kiskiù ítjòn San Pedro

Kó tsò Pedro nga síhixat'aà xita

¹ An xi 'mì-na Pedro, nga 'an tsibíxáya-na Jesucristo, síhixat'aà-nò ngats'ioò xi xó jaàjiin-nò Nainá nga mì tì nangui-nò titsajna-nò nga xkì xi ján naxandá kitsjohoya ya nangui Ponto, Galacia, Capadocia, Asia kò Bitinia;

² jñò xi xó kitjaàjiin-nò, koni s'ín jye tjíndaà-la xi kjohítsjeèn-la Nainá xi Na'èn-ná ma, nga jè Inima Tsjeè-la k'oaá s'ín kisikò-nò nga nguì xita-la Nainá ma, mé-ne nga sikitason-là Jesucristo kò mé-ne ma xíteèn-jno-nò jní-la nga matsjeèya inima-nò kjoa ts'e jé-nò. Tsee kjondaà kò kjoa'nchán katas'e-la inima-nò.

Kjotjò xi chíñakjoa-lá xi týnatjò-la Nainá ján ngajmì

³ Jeya kàtìjna Nainá xi Na'èn-la Jesucristo xi otíxoma-ná. 'Nó tse kjoahimatakòn týn-la: koni s'ín jaáya-la Jesucristo kjoa ts'e kjoabiyaà, k'oaá kisikò-ná Nainá nga kits'in xitse òjngòò k'aá mé-ne nga kjit'aà nachrjein chíñakjoá

⁴ nga tsjá-ná kjotjò xi jè týnatjò-la ján ngajmì, kjotjò xi mìkiù bits'on nita kjé-ne, mìkiù bi'ndo kò mìkiù bixòña. Kjotjò jè, jñá tjoé-ná.

⁵ Ta ngatjì-la nga mokjeiín-ná it'aà ts'e Nainá, jè nga'ñó-la síkinda-ná skanda k'e nga kitjokàjñaà kjo'in koni s'ín tjíndaà-la Nainá k'e nga jye kjoehet'aà nachrjein.

⁶ Koií kjoa-la, jñò, 'ñó tsja týn-nò, nas'ín týn i'nga nachrjein nga makájno-nò nga kjìn skaya kjo'in nìkjioón.

⁷ K'oaá ma-ne nga kjo'in nìkjioón nga ma chít'aà-nò tsà ndaà mokjeiín-nò. K'oaá ngaya-la koni jè oro, mochjeén-né nga kò ni'ín kotsjeèya-ne. Kò jè kjoa nga mokjeiín-nò isaá 'nó chjí-la mì k'oaá-ne koni jè oro xi bits'ón-ya. Jñò, k'e nga jye chít'aà-nò koni s'ín mokjeiín-nò, jeyaá kitsajnaà, 'ngaá kitsajnaà kò jchaxkón-nò k'e nga kjoí òjngòò k'a Jesucristo.

⁸ Jñò, matsjacha-nò Jesucristo, nas'ín mìkiù kiyaxkoòn. Mokjeiín-nò it'aà ts'e, nas'ín mìkiù titsa'yaà. 'Nó tsja ma-nò skanda tsjìn 'én xi ma s'enojmí nga 'ñó týn-nò kjotsja.

⁹ Koií kjoa-la nga matsja-nò nga jye titsabitjokàjñoò kjo'in ta ngatjì-la nga mokjeiín-nò it'aà ts'e Cristo.

¹⁰ Jè kjoa nga bitjokàjñoò kjo'in, jñá xita xi kiichja ngajo-la Nainá kjòtseé, kiskoòta'yako-né tikoáá kiskònanguiya-né, ikjoàn kiichjaya jè kjondaà xi tsjá-nò Nainá.

¹¹ Jñá xita koi, jè Inima-la Cristo kisikichiya ítjòn-la mé kjo'in xi sùkjeiín Cristo kò kjoa jeya xi s'e-la k'e nga koma iskan. Kiskònanguiya-né mé nachrjein-ne nga k'oas'ín komat'in koa kós'ín koma.

¹² Tanga jè Nainá kisikichiya-la nga mìtsà kjondaà ts'e nga kos'ín kis'enojmí-la 'én koi; kjondaà tsajòn-nò. Kò jñá 'én koi, týjñá-ne 'én ndaà-la Nainá xi kjoa ts'e Cristo xi tís'enojmí-nò nachrjein i'ndeji. Nga týjé-ne Inima Tsjeè-la Nainá xi ngajmì nchrobá-ne tsjá-la nga'ñó jñá xita xi bénojmí-nò. Skanda jñá àkjale, mejèn-la skoe kjoa koi.

Mochjeén-né nga tsjeè sijchá yijo-ná

¹³ Koií kjoa-la jñò, titsajnandaà, ndaà tikítsjeèn, nguì ndaà chíñakjoa-là kjondaà xi tjoé-nò k'e nga kjoí òjngòò k'a Jesucristo.

14 K'oa s'ín ndaà tìjchá yijo-nò koni ixti xi ndaà 'nchréñijon. Kì k'oa tìs'ín 'nè-nò koni s'ín ki'nè nga sa ítjòn nga ch'o tìjín kjoa xi kisijé yijo-nò k'e nga tìkj'eè ndaà yaxkoòn Nainá.

15 Ta saá tsjeè tìjchá yijo-nò ngats'ì kjoa xi 'nè, nga jè Nainá xi xó kiìchja-nò, xita tsjeè-né.

16 Nga jè Xojon-la Nainá, k'oa s'ín tìchja nga tsò: “Jñò, xita tsjeè kàtama, nga 'an, xita tsjeè-ná.”

17 Jñò, tsà Na'èn 'mì-là Nainá xi ta ngàsòn tífikò ngats'ì xita k'e nga bìnààjìin-la nita mé kjoa xi s'ín, mochjeén-né nga kjit'aà nachrjein ndaà jchaxkón nga i tìtsajnaà isò'nde nga mìtsà i nangui-nò.

18 Jñò, jyeé ndaà tìjìin-nò nga mìtsà tsojmì xi ma-la bits'on kjòchjítjì-nò nga ma tìtsajnadejì-nò ngats'ì kjoa ch'o xi nìmé chjì-la koni s'ín tsakó-nò xita jchínga-nò. Mìtsà ton oro kò ton plata kjòchjítjì-nò.

19 Jè jní-la Cristo xi 'ñó tse chjì-la kjòchjítjì-nò. Cristo kitsjaà kjotjò yijo-la nga k'en-t'aà krò koni jngoò orré xi tsjeè kji, xi nìmé ch'in tjit'aà yijo-la.

20 Tìk'e-ne nga tìkj'eè sindaà isò'nde, Cristo, k'oa s'ín kisinè-la kjoa xi sùkitasòn. Tanga jè nachrjein xi tìtsajnaà i'nde ki'ya-la nga j'ìi Cristo nga kisikitasòn kjoa xi kisinè-la xi kjondaà tsajòn.

21 Xi it'aà ts'e Cristo, jñò mokjeiín-nò it'aà ts'e Nainá; nga jè kisikjaáya-la it'aà ts'e kjoabiyaà, tìkoà kitsjaà-la kjoa jeya; k'oa ma-ne nga mokjeiín-nò kò chiñà nga sùkitasòn Nainá koni s'ín kitsjaà-nò tso'ba.

22 Jè inima-nò, jyeé kjòtsjeè, koí kjoa-la nga nìkitasòn koni tsò 'én kixi-la Nainá mé-ne nga kixi sítjòchaà xinguioo. K'oa ma-ne nga mochjeén-né nga 'ñó ndaà tìtsjacha xinguioo nga tsjeè tìjín inima-nò.

23 Jñò, ijngoò k'a kits'iin xitse ijngoò k'a-nò. Tanga mìtsà tje-la xita xi biyaà kits'iin-nò, jè tje-la Nainá xi mìki biyaà kits'iin-nò. Nga jè 'én-la Nainá xi tìjnakon kò xi mìki fehet'aà nita kjé-ne kits'iin ijngoò k'a-nò.

24 Nga k'oa s'ín tìchja Xojon-la Nainá nga tsò:
Ngats'ì xita, k'oa s'ín ngaya-la koni xka ijñá;
kjoajeya-la xita, k'oa s'ín ngaya-la koni naxó-la xka ijñá;
jñà xka ijñá, xì-né; ikjoàn bixòjen naxó-la.

25 Tanga jè 'én-la Nainá tìjna-né nita kjé-ne.

'Én jè, jè 'én ndaà-la Nainá xi kjoa ts'e Cristo xi jye kis'enojmi-nò.

2

Naxandá xitse-la Nainá

1 Chjaaxìn-là yijo-nò xi kjoa ts'en, kjoa chonachan, kjoa ts'e xita xi jò isén tìjín-la, kjoaxitakòn, ngats'ì 'én ndiso.

2 Kos'ín t'een koni s'ín ndí ixti xi sa kits'iin nga 'ñó síjé tsjín nga mejèn-la koki. K'oa tìs'ín 'ñó tìnchátsjioè jè 'én-la Nainá xi nguì 'én tsjeè mé-ne nga jè kojchá-nò kò kochrjekàjìin-nò kjo'in Nainá,

3 nga jyeé ki'yaà jñò nga jè Na'èn-ná, 'ñó ndaà xita.

Jè ndajo xi tìjnakon

4 Jè Jesucristo, jè ngaya-la jngoò ndajo xi tìjnakon, jè xi ochrjekàngui jñà xita, tanga Nainá xó k'oa s'ín jaajìin-ne nga 'ñó tse chjì-la. Jñò, k'e nga binchat'aà chrañà-là Cristo,

5 tìkoá k'oa s'ín ngaya-nò koni ndajo xi tìtsajnakon. Nainá tísikjeén-nò koni ndajo nga tìbìndaà ni'ya tsjeè-la mé-ne jñò, nò'miù tsjeè koma nga ya sixá nga it'aà ts'e Jesucristo k'oi-la kjotjò Nainá xi jè ndaà sasén-la koni s'ín okóya Inima Tsjeè-la.

⁶ K'oaá s'ín tíchja Xojon-la Nainá nga tsò:
Chítsejèn-là, 'an síkíjna jngoàà ndajo nga'ño-la chrjangui-la ni'ya ján naxandá
Sión,

xi xó 'an jaàjìin-na,

xi 'ño ndaà kji ko 'ño tse chjí-la.

Jè xi kòkjeiín-la it'aà ts'e, mìkiì kosobà-la.

⁷ Jñò, xi mokjeiín-nò it'aà ts'e ndajo jè, bixón-nò: 'ño tse chjí-la. Tanga jñà xita
xi mìkiì mokjeiín-la, bitasòn-né koni s'ín tíchja Xojon-la Nainá nga tsò:

Jè ndajo xi tsachrjekàngui chjinechrjó,

jè xi ndajo skò-la koma ts'e chrjangui-la ni'ya.

⁸ Jngoò k'a tjít'aà Xojon-la Nainá ñánda tsò:

Ndajo jè, kjìn xita satíngui kò kjìn xita kixangui.

Jñà xita koi, k'oaá s'ín mat'in nga mìkiì síkitasòn koni tsò 'én-la Nainá; koií
kòs'in mat'in-ne nga k'oaá s'ín ok'in-la.

Jè naxandá-la Nainá

⁹ Tanga jñò, xita naxandá xi xó kitjaàjìin-nò. Jñò, no'miì xi nìxá-la Cristo, jè
xi xitaxá ítjòn tíjna. Jñò, xi naxandá tsjeè-la Nainá 'mì-nò, jngoò naxandá xi ya
nokjoà-nò it'aà ts'e Nainá mé-ne nga koma kìnókjoaya-nò kjondaà-la Nainá
xi tsachrjekàjìin-nò kjoa ts'e jé ñánda jñò choòn koa yaá kisikítsajna-nò ñánda
iseèn choòn.

¹⁰ Jñò, nga sa kjòtseé skanda mìtsà xita naxandá 'mì-nò; tanga i'nde
naxandá-la Nainá 'mì-nò. Nga sa kjòtseé Nainá mìkiì mahimakeè-nò; tanga
i'nde, jyeé mahimakeè-nò.

¹¹ Jñò ndí 'ndsè xi 'ño matsjacha-nò, bítsi'ba-nò koni xita xi mì tì nangui-nò
titsajna-nò xi ta titsabitjaajtoò i'isò'nde, kì kiì biì'nde-la yijo-nò kjoa ts'e jé xi
sìjé yijo-nò xi kjaán-kò inìma-nò.

¹² Ndaà tanguíkoo yijo-nò ya jjiin-la xita xi mìkiì mokjeiín-la it'aà ts'e Cristo.
Jñà xita koi, nas'in chjajno-nò i'nde, tanga k'e nga kjoí jngoò k'a Cristo tsjá-la
kjondaà Nainá koií kjoa-la nga skoexkon-nò nga ndaà titsa'nè.

Jchaxkón xitaxá

¹³ Nga jeya kíjna-ne Na'èn-ná, tikitason-là ngats'iì xita isò'nde xi kjotixoma
tjía tsja, jñà xi 'ño 'nga xá tjín-la, xi xita skò-la titsajna;

¹⁴ tikoá tikitason-là jñà xi gobernador titsajna nga jè xitaxá ítjòn síkasén nga
tsjá-la kjo'in xita xi kjoa ótsji; koa jñà xi ndaà s'in, ndaà síkítsajna.

¹⁵ Nainá k'oaá s'in mejèn-la nga jñò, ndaà s'een, mé-ne jñà xita xi mìkiì
machiya-la jyò kítsajna-ne, nímé 'én kichja xi kondra tsajòn.

¹⁶ Jñò, k'oaá s'in tijchá yijo-nò nga titsajnandeíi-nò, tanga kì k'oaá s'in
nikítsjeèn nga tjí'nde-nò nga ch'o s'een. K'oaá s'in tijchá yijo-nò nga chí'nda-la
Nainá maà.

¹⁷ Jchaxkón yije xita. Tìtsjacha xi 'ndsè chibà. Tìskón-chaà Nainá. Jchaxkón
jè xi xitaxá ítjòn tíjna.

Kjoa xi tjínè-la nga sikitason xi chí'nda 'mì

¹⁸ Jñò xi xita chí'nda 'mì-nò, jchaxkón koa tikitason-là nei-nò. Mìtsà ta jñà
nei-nò xi ndaà síkò-nò kò xi beètjò-nò, tikoá tikitason-là jñà xi ch'o síkò-nò.

¹⁹ Ndaà bitsajna nga nguixkon Nainá jñà xita xi kjo'in síkjeiín nas'in mì jé
tjín-la ta jè ngatjì-la nga machiya-la kó tsò Nainá.

²⁰ Jñò, tsà kjo'in tsjá-nò xita nga jé binchaàtsjioò, ¿mé xi ndaà kítsajna-nò?
Tanga tsà kjo'in titsanikjioón nga ndaà 'nè, ndaà sikitásajna-nò Nainá.

²¹ Nga koií xá kichja-nò Nainá nga jè Cristo kisikjeiín kjo'in xi kjoa tsajòn.
Tsibíjna jngoò-nò chibà nga k'oas'in sikitason koni s'in kisikitason jè.

22 Cristo, nijngoò jé tsohótsji, kọ nijngoò 'én ndiso kiichja.

23 K'e nga kiichjajno-la xita, miki tsà kiichjajno ngajo-la. K'e nga kisikjeiin kjo'in, miki tsà koa tis'in kis'iin ngajo-ne. Ta Nainá tsibíya tsja, nga jè xi bindaajiin kjoakixi.

24 Jè sobà Cristo tsakajen jé-ná k'e nga kisitjoòt'aà yijo-la ya krò, mé-ne jñá kitsajnakon-ná nga nikitasoán xi kjoa kixi nga jyeé titsajnat'aaxin-lá kjoa ts'e jé koni tsà jye k'eén. Jè Cristo, koni s'in kisikjeiin kjo'in nga kitsi'on, jñò kjòndaá-nò.

25 Jñò, nga sa kjòtseé, k'oaá s'in tsitjaà koni orrè xi kisijchàaxkon ndiyá-la, tanga i'ndeí, jyeé inchrobàt'aà-là Cristo koni jngoò paxtò xi síkinda inima-nò.

3

Kós'in sijnchá yijo-la jè x'in kọ chjoón

1 K'oaá tis'in tjin it'aà tsajon xi íchjín 'mì-nò, nangui titsajna-là x'in-nò, mé-ne jñà xita x'in-nò tsà tjin i'nga xi miki mokjeiin-la 'én-la Nainá, kọkjeiin-la, nas'in miki kinókjoakoo kjoa ts'e Nainá. K'e nga skoexkon-nò nga ndaà titsanjchá yijo-nò tikoáa sijnkatjiaá-la yijo-la.

2 Skótsejèn-nò nga tsjeé titsanjchá yijo-nò nga ndaà yaxkón Nainá.

3 Kọ kì tà isò'nga-la yijo-nò 'ñó ndaà bindaà, nga 'ñó ndaà bí'ñó tsja skòò, nga ndátòn chjí nìkjeén xi nguì oro, nga jñà nikje x'ió-nò 'ñó xkón kjoàn.

4 Majin, jè xi nchrobájin inima-nò xi ndaà síkatsejèn-nò, jè-né xi miki bits'on, jè inima xi indaakjoa kọ xi 'nchán tíjna. Jè xi 'ñó tse chjí-la nga nguixkon Nainá.

5 Nga sa kjòtseé, jñà íchjín xi ndaà kijtseèxkón Nainá nga kiskoòña-la, k'oaá s'in ndaà tsatsejèn nga nangui tsibítsajna-la x'in-la.

6 K'oaá s'in kis'iin Sara nga kisikitasòn-la Abraham. K'oaá ma-ne nga ndaà kijtseèxkón nga jè xi Na'èn tíjna. Jñò, tsà ndaà 'nè kọ tsà nímé kjoaxkón tjin-nò, tje-la Saraá ma.

7 Jñò xi x'in 'mì-nò, ndaà titsajnakoo jñà íchjín-nò nga ndaà kàtachiya-nò nga isaá indaakjoa. Ndaà jchaxkón íchjín-nò nga ngàsòn tjoé-nò jè kjòndaà-la Nainá, jè kjoabinachon xi jè Nainá jye tíndaà-la nga tsjá-nò. K'oaá s'in t'een mé-ne k'e nga nokjoàt'aà-là Nainá, nímé sijn-ti-nò.

Kós'in sijnchá yijo-la ngats'ù xita-la Nainá

8 Nga yije kjoa koi, ngats'ioò, ta jngoò kjohítsjeèn kàtas'e-nò; tijetakòn xinguio; tjòcha t'een xinguio nga 'ndse chiba; chajima xinguio; ima kjoa t'een.

9 Tsà yá xi ch'o síko-nò, kì k'oaá tis'in 'nè ngajo-nò. Tsà yá xi 'on chjajno-nò, kì k'oaá tis'in nokjoajno ngajo-la. Jñò, ta saá tijét'aà-là Nainá nga kàtasíchikon-t'in; nga jyeé 'yaà nga koií xá kinokjoá-nò nga Nainá sijnchikon-t'in-nò.

10 Nga:

Jè xi mejèn-la nga tsja s'e-la nga tíjnakon, nga mejèn-la skoe nachrjein xi ndaà, kàtasíkinda nijen-la nga mì ch'o kichja; kọ kàtasíkinda tso'ba, nga mì 'én ndiso kichja.

11 Tinchat'aaxin-là kjoa xi ch'o tjin; ndaà t'een.

'Nchán titsajnakoo xinguio nita mé kjoa xi tjin-nò.

12 Nga jè Na'èn-ná tísik'aá xkon nga tísíkinda xi xita kixi, tíbinchá líká-la nga tí'nchré-la k'e nga chjat'aà-la,

tanga jñà xita xi ch'o s'in bí'maá-la isén-la nga kondra ts'e-né.

13 Jñò, tsà kjit'aà nachrjein nga ndaà titsa'nè, mì yá xita xi ch'o síko-nò.

14 Tanga mé ta ndaà-nò tsà kjo'in títanìkjoón ta koi kjoa-là nga kixi 'nè. Tanga ni jngoò xita tsakjoòn-là, kì binchaxkón-là yijo-nò.

15 Jè tikijna ítjòn Cristo nga jè kàtatíxoma-nò ya ijìin inìma-nò. Títajndaà nga kjit'aà nàchrjein mé-ne nga koma kénajmíya-là jñà xita xi skonanguiya-nò it'aà ts'e kjoa xi títachiñá-là it'aà ts'e Cristo.

16 K'e nga kinókjoaa, indaàkjoa t'een. Chaxkón jñà xi kénajmíya-là, tsjeè kàtjna kjohítsjeèn-nò, mé-ne jñà xita xi ch'o chjajno-nò nga ndaà 'nè nga mokjeiín-nò it'aà ts'e Cristo, kosobà-là nga jñò chjajno-nò.

17 Ìsaá ndaà tjín tsà kos'ín mejèn-là Nainá nga kjo'in sikjioón k'e nga ndaà 'nè, mì k'oa-ne tsà k'e nga ch'o 'nè.

18 Nga skanda jè Cristo, jngoò k'aá kisìkjeiín kjo'in k'e nga k'en xi kjoa ts'e jé-ná. Cristo, mìtsà jé tsohótsji; xita kixi-né; kisìkjeiín kjo'in it'aà ts'e xita xi jé tjín-là mé-ne nga koma kjiko-ná nguixkon Nainá. Yijo-là, jñà xita kisìk'en, tanga it'aà ts'e Inìma-là jaáya jngoò k'a-là.

19 Kò jè Inìma-là Cristo kii j'nde ñánda títajna inìma xi títajna ndayá nga kiihjajjìin-là.

20 Inìma koi, ts'eé xita xi mìkii kii'nchréñjion-là Nainá nàchrjein ts'e Noé. Nainá tseé kiskoòñà kjoa k'e nga Noé tsibíndaà chitso je. Ya iya chitso, tà jìin ma-ne xita xi itjokajjìin kjo'in nga mìkii k'en k'e nga ts'a jtsí xkón.

21 Kò jè nandá ts'e jtsí xkón, jè गया-là nandá xi ma-ná bautizar nàchrjein j'ndeì nga bitjokajñá kjo'in. Tanga nga maá bautizar, mìtsà yijo-ná mat-sjeè-ne, jè-né nga nijét'aà-lá Nainá nga tsjeè kàtas'e kjohítsjeèn-ná. Kò bitjokajñá kjo'in, koi kjoa-là nga jaáya-là Cristo,

22 kò kii mijin ján ngajmii nga ya tjínat'aà chrja kixi-là Nainá. Jé tíhotíxoma-là àkjale kò inìma xi tjín-là kjotíxoma kò ngats'iì xi tjín-là nga'ñó.

4

1 Cristo, koni s'ín kisìkjeiín kjo'in yijo-là, jñò, tikoá mochjeén-né nga kítajndaà nga sikjioón kjo'in. Nga jè xi jye kisìkjeiín kjo'in, yaá jyehet'aà jé-là,

2 mé-ne jñà nàchrjein xi kijna isa isò'nde, k'oaá s'ín kàtjna koni s'ín mejèn-là Nainá, mìtsà k'oa's'ín kijna koni s'ín mejèn-là yijo-là.

3 Jyeé 'ñó kjìin nàchrjein kinikato nga ch'o ki'nè koni s'ín xita xi mìkii beèxkon Nainá. K'oaá s'ín kinikòò yijo-nò kjoa xi ch'o tjín koni kjoa chijngui, kjoa ch'o xi síjé yijo-nò, kò kjoa ch'i, kjoa ts'e s'eí xi ch'o tjín, kò nga ta xán ki'yò kjit'aà, kò nga xkòsòn kiyaxkón nga mìtsà kixi kjoa nga Nainá.

4 I'ndeì jñà xita koi, ta maxkón-là it'aà tsajòn nga mì tì kii ya tsjahijtako-nò kjoa xi ch'o tjín; bijnòkeè-nò; ch'oó chjajno-nò.

5 Tanga jñà xita koi, tjínè-là nga tsjá-là kindà Nainá; jè Nainá xi tjíndaà nga koiindaajjìin-là xita xi títajnakon kò xi jye k'en.

6 Koi kjoa-là nga k'oa tìs'ín kis'enojmí-là 'én ndaà-là Nainá xi kjoa ts'e Cristo jñà xita xi jye k'en, mé-ne nas'ín jñà yijo-là kisìkjeiín kjo'in koni s'ín bìndaajjìin xita isò'nde, tanga jñà inìma-là títajnakon-né nita kjé-ne koni s'ín tjínakon kjit'aà Nainá.

7 Jyeé tímachraña nga kjoehet'aà isò'nde, koi kjoa-là jñò, ndaà títajnakò kjohítsjeèn-nò; kjit'aà nàchrjein títì'ba-là Nainá.

8 Jè xi tjina ítjòn, jè-né nga 'ñó tjòcha t'een xinguiò. Tsà tjín-nò kjoatjòcha, komaá sjjchàat'aà-là jé-là xinguiò.

9 Chjoétjò xita xinguiò k'e nga bijchókon-nò tsà mejèn-là nga sikkjáya ya ni'ya-nò. Tsja t'è-là inìma-nò; kì ch'o chibàya-nò.

¹⁰ Nga jngoò ìjngoò, koni s'ín tǐn kjondaà xi kitsjaà-nò Nainá, k'oas'ín tǐsikòo xinguioo nga ndaà tǐchjeén, nga kǐn skoya tǐn-ne kjondaà xi kitjoé-nò.

¹¹ Jè xǐta xi k'oas'ín kits'ì-là nga 'én-là Nainá kǐchjaya, k'oaá s'ín kàtǐchjaya koni tsò 'én-là Nainá. Kò jè xǐta xi k'oas'ín kits'ì-là nga sǐxá, k'oaá s'ín kàtasíxá koni tǐn nga'ńó xi tsjá-là Nainá. Nǐta mé xi s'een, k'oaá s'ín t'een mé-ne nga ìt'aà ts'e Jesucristo jeya kǐjna-ne Nainá. Nga ts'eé Cristo jè kjoajeya kò ngats'ì nga'ńó xi tǐn skanda nǐta kjé-ne. K'oas'ín kàtama.

Sǐkǐaán kjo'in nga xǐta-là Cristo 'mì-ná

¹² Jǐnò ndí 'ndsè xi matsjake-nò, kǐ maxkón-nò nga 'ńó 'in tǐn kjoa xi nchrobánè-nò nga tǐchìt'aà-nò.

¹³ Ta saá kàtas'e-nò kjotsja nga tǐhokò chiba-nò kjo'in ts'e Cristo, mé-ne nga tǐkoa s'e-nò kjotsja k'e nga jcha-là kjoajeya-là Cristo.

¹⁴ Jǐnò, mé ta ndaà-nò k'e nga tsà xǐta kòtít'aà-nò xi kjoa ts'e Cristo nga jè kjoajeya-là Inǐma Tsjeè-là Nainá yaá tǐnako-nò.

¹⁵ Tsà kjo'in tǐtsanǐkjoón, chǐtsejèn-là yijo-nò, a koií kjoa-là nga ch'o 'nè, nga xǐta nǐk'eèn, nga chijé 'nè, nga chingájiin chingá'a kjoa. Kǐ k'oaá tǐn jé xi binchaàtsjioò.

¹⁶ Tanga tsà kjo'in tǐtsanǐkjoón nga xǐta-là Cristo maá, kǐ masobà-nò; ta saá jeya tǐkǐjna Nainá nga xǐta-là tsò-nò.

¹⁷ Jyeé ijchò nachrjein nga kòts'ia nga sǐndaàjiin-là xǐta naxandá-là Nainá. Tsà jǐná tǐmats'ia ìtjòn kò-ná, ¿mé xi kòmat'in jǐná xǐta xi mìkǐ sǐkitasòn 'én ndaà-là Nainá?

¹⁸ Jè xi xǐta kixi, chjá koma-là nga kǐtjokàjiin kjo'in.

¿Kòs'ín kòmat'in jǐná xǐta xi mìkǐ beèxkón Nainá kò xi jé ótsji?

¹⁹ K'oaá ma-ne, jǐná xǐta xi kjo'in sǐkjeiín nga kòs'ín mejèn-là Nainá, kǐ bǐkjoàn-là nga ndaà s'ín. Jè Nainá kàta'ńót'aà takòn nga jè kàtasíkǐnda, nga jè tsibíndaà jǐná xǐta kò jè sǐkitasòn-né koni s'ín tsjá tso'ba.

5

Jǐná xǐta jchínga xi xá ìtjòn tǐn-là ya naxandá-là Nainá

¹ Sǐjèt'aà-là jǐná xǐta jchínga xi xá ìtjòn tǐn-là nga ya sǐxájiin-nò ya naxandá-là Nainá. Tǐkoaá 'an, xǐta jchínga-ná nga xá ìtjòn tǐn-na koni jǐná xǐta koi; kǐtseè-ná kjo'in xi kis'e-là Cristo; tǐkoaá s'eé-na kjoajeya xi ìskan jcha-là.

² Tǐkindaa jǐná xǐta-là Nainá xi jǐnò kjòngatsja koni tsà orrè; kǐ kjo'ńó 'nè-là yijo-nò; kòó kjondaà-nò nga tǐkindaa koni s'ín mejèn-là Nainá. Mǐtsà koií kjoa nga tse tòn sǐkǐjneè. Tà kòó kjotsja-nò nga k'oa t'een.

³ Kǐ yatoòn-jèn jǐná xǐta xi jǐnò mangatsja koni tsà nei-là ma. Jǐnò tǐncha ìtjòn-là, takó-là ndiyá-là Nainá mé-ne koma skǐngui-nò.

⁴ Mé-ne k'e nga kjoí ìjngoò k'a jè Paxtò ìtjòn, tjoé-nò kjoajeya-là Nainá koni jngoò corona xi mìkǐ fehejno ote-là nǐta kjé-ne.

⁵ Tǐkoa jǐnò xi ìxti xongó 'mì-nò, tǐkitasòn-là jǐná xǐta jchínga xi otíxoma ya jǐjìn naxandá-là Nainá. Ngats'ioò, ìndaàkjoa tanguíkoo xinguioo, nga:

Jè Nainá kondraá tǐjna-là jǐná xǐta xi 'nga ìkon;

kò jǐná xǐta xi ìndaàkjoa tǐn inǐma-là, tsjá-là kjondaà.

⁶ Nangui tǐtsajna-là Nainá nga tse nga'ńó tǐn-là koni s'ín sǐko-nò, mé-ne k'e nga kǐjchò nachrjein jè Nainá 'nga sǐkǐtsajna-nò.

⁷ Tsja Nainá tǐkǐtsajnaya ngats'ì kjoa xi makájno-nò nga jè tǐsíkǐnda-nò.

⁸ Tǐkindaa yijo-nò, kǐt'aà nachrjein tǐtsajnandaà, nga jè xǐta neí xi kondra-nò, k'oaá s'ín tsóbandi-nò k'oaá ngaya-là koni jngoò xa xi tǐkjindáya nga 'ńó ìjò-là, nga tǐhótsji yá xi skǐne.

⁹ Nga ndaà mokjeiín-nò, 'ńó tìncha-là xita nejí. Nga jyeé tíjìn-nò nga jńà xita xinguiòo xi títsajna nga títsa isò'nde, tikoáá k'oaá tjin kjo'in xi nchisíkjeiín.

¹⁰ K'e nga jye koto chiba nachrjein nga titsaníkjoón kjo'in, jè sobà Nainá sùndaàya-nò, sùkijnandaà-nò, tsjá-nò nga'ńó, kò kixi sùkítsajna-nò. Tije-ne Nainá xi kò kjoatjòcha-là kùchja-ná nga s'e-ná kjoajeya-là nita kjé-ne nga Jesucristo titsajna kooá.

¹¹ Ts'eé Nainá ngats'ii nga'ńó xi tjin skanda nita kjé-ne. K'oas'ín kàtama.

Xi fehet'aà-ne, Pedro síhixat'aà xita

¹² Silvano, xi 'ndsè xan-la, nga kixi tjin xá-la, jè kisichját'aà-na nga kiskii-nò xojon carta jè. K'oaá s'ín tìbìnè-nò kò tìsikixiya-nò nga ngats'ii 'én xi tìsikasén-nò, nguì k'oaá s'ín tjin kjonndaà-la Nainá. Kixi titsajnakoo kjonndaà koi.

¹³ Nchisíhixat'aà-nò jńà xita naxandá-la Cristo xi i títsajna Babilonia xi xó tańa kitjaàjìn-nò. Kò jè Marcos xi ki'ndí-na xan-la it'aà ts'e Cristo, tikoáá tìsìhixat'aà-nò.

¹⁴ Tixot'aà xinguiòo nga nguì kò inima-nò.

Kàtas'e-la kjoa'nchán ijìn inima-nò ngats'ioò xi ya nokjoà-nò it'aà ts'e Cristo. K'oas'ín kàtama.

Xojon carta xi ma-ne jò xi kiskiì San Pedro

Kó tsò Pedro nga síhixat'aà xita

¹ 'An, xi Simón Pedro 'mì-na, nga 'an xi chì'nda-la Jesucristo ma, kò nga tìkoà 'an tsibíxáya-na, tìsikásén-nò xojon jè, jñò xi ngàsòn 'ñó ndaà mokjeiín-nò koni s'ín mokjeiín-najen; nga xita kixi-né jè Jesucristo xi Nainá ma kò xi ochrjekàjìin-ná kjo'in.

² Koni s'ín nga isa ndaà titsayaxkon Nainá kò jè Jesucristo xi otíxoma-ná, k'oaá s'ín isa ndaà kàtasakó-nò kjondaà kò kjoa'nchán ya ijìin inima-nò.

Mé xi mochjeén nga s'éeen nga ndaà jchaxkoán Nainá

³ Jè nga'ño-la Nainá tsjá yije-ná xi mochjeén-ná nga titsajnakoaán kò nga ndaà yaxkoán Nainá. Koií kjoa-la nga tsjá-ná ngats'ì kjondaà koi nga yaxkoaán jè xi kò kjoajeya-la kò nga'ño tsjeè-la kiichja-ná.

⁴ It'aà ts'e kjoa koi, kitsjaà-ná kjoa xi 'ño ndaà tjín kò xi 'ño tse chjí-la koni s'ín kitsjaà tso'ba Nainá, mé-ne nga tìkoà kòkòt'aà-ná nga k'oas'ín s'éeen koni s'ín s'ín Nainá nga jye chinchat'aaxìn-la kjoa xi ch'o síjé yijo-ná i isò'nde xi ta síkits'ón-ná.

⁵ K'oaá ma-ne, 'ño tìnè-la yijo-nò jña kjoa koi. Koni s'ín nga mokjeiín-nò it'aà ts'e Cristo, k'oaá tìs'ín mochjeén-né nga ndaà xita kàtama jñò. Nga jye ndaà xita ma, tìkoà mochjeén-né nga kàtas'e-nò xi kjoa chjine.

⁶ Nga jye tjín-nò kjoa chjine, tìkoá mochjeén-né nga kixi tatixoma-la yijo-nò. Kò nga jye kixi otíxoma-la yijo-nò tìkoà mochjeén-né nga s'e-nò kjoatsejta. Kò nga jye tjín-nò kjoatsejta, tìkoá mochjeén-né nga nguì ndaà chaxkón Nainá.

⁷ Nga jye ndaà yaxkón Nainá, tìkoà mochjeén-né nga ndaà tìtsjacha xinguioo. Kò nga jye ndaà matsjacha xinguioo, tìkoá mochjeén-né nga nguì ndaà tìtsjacha ngats'ì xita xi kj'eíí.

⁸ Jñò, tsà tjín-nò kjondaà koi, kò tsà kjit'aà nachrjein tìk'aasòn-nò, mì jyò kitsajnaà; nguì ndaà kochjeén-nò nga isaá ndaà jchaxkoòn Jesucristo xi otíxoma-ná.

⁹ Tanga tsà tjín i'nga xi tsjìn-la kjondaà koi, k'oaá ngaya-la koni xita xkan xi mìkiì ndaà tsejèn-la; jyeé kijchàajìin-la nga Nainá jye kisìjchàat'aà-la jé xi kis'e-la nga sa ítjòn.

¹⁰ K'oaá ma-ne, jñò, ndí 'ndsè, isa 'ño tjiì-la nga 'ño yijo-nò nga tìkixiyaà kjoa nga Nainá xó k'oaá s'ín kiichja-nò kò jaajìin-nò. Tsà k'oas'ín s'éeen kjit'aà, nìmé jé skajñò.

¹¹ Nga k'oaá s'ín koma nga táx'a'nde-nò nga kitjás'een ñánda tíhotíxoma nita kjé-ne jè Jesucristo xi ochrjekàjìin-ná kjo'in kò xi otíxoma-ná.

¹² Koií kjoa-la kjit'aà nachrjein síkìtsjeèn yije-nò kjoa koi, nas'ín jye ma-nò kò jye kixi titsajnakoo jè kjoakixi-la Nainá koni s'ín mokjeiín-nò nachrjein i'ndeí.

¹³ K'e nga tákó tjìnakon-isa i isò'nde jè, mochjeén-né nga síkìtsjeèn-nò nga kos'ín tìjchá yijo-nò.

¹⁴ Jè Jesucristo xi otíxoma-ná jyeé k'oas'ín kitsò-na nga jyeé kjòchrañàt'aà nga kjoehet'aà nachrjein-na.

¹⁵ Tìkoá 'an tìbinè-la yijo-na nga tìsìkìtsjeèn-nò mé-ne k'e nga 'an xi jye kiyá, nga nachrjein nchijòn k'oaá s'ín tìkìtsjeèn kjoa koi.

Ñánda j'ì-ne 'én xi tjít'aà Xojon-la Nainá

¹⁶ Nga mìtsà ta cuento xi ta x̄ita kisikítsjeèn koni s'ín tsibenojmí-nòjen kó kji nga'ño kis'e-la Na'èn-ná Jesucristo kò nga kjoíi ìjngoò k'a. Nga xkoón ki'ya-najen kjoajeya-la nga 'ño tse nga'ño t̄jín-la.

¹⁷ Ki'ya-nájen k'e jè Nainá xi Na'èn-ná nga jeya kò 'nga kisikíjna Jesucristo. Kina'yà-la ya j̄iìn isén ñánda 'ño ote kji 'én xi kitsò: “Jè jèe xi ki'ndí-na xi 'ño matsjake nga xó 'an jaàj̄iìn-na.”

¹⁸ Ngajen sobà kina'yà-lajen j̄nà 'én xi ngajmii inchrobà-ne k'e nga titsajnakò-jen Jesucristo ya isò'nga nindoò tsjeè-la.

¹⁹ Nga yije kjoa koi, k'oaá s'ín isa ndaà makixiya koni s'ín kiichja j̄nà x̄ita xi kiichja ngajo-la Nainá. 'Nó ndaà 'nè nga na'yà-la 'én koi. K'oaá s'ín ngaya-la koni jngoò ni'ín xi síhiseèn ya i'nde ñánda j̄nò choòn skanda k'e nga s'e isén, ikjoàn síhiseèn-j̄iìn inima-ná koni jè ni'ño tse.

²⁰ Ítjòn k'oa s'ín ndaà katasij̄iìn-nò, j̄nà 'én xi t̄jít'aà Xojon-la Nainá, mìtsà ta jngoò x̄ita kitsjaà kjohítsjeèn-la nga kitjei.

²¹ Nga j̄nà x̄ita xi kiichja ngajo-la Nainá, nijngoò 'én xi ta kjohítsjeèn ts'e nga kiichjaya. Jé Inima Tsjeè-la Nainá kisikichiya-la kjohítsjeèn-la x̄ita koi nga komà kiichjaya 'én-la Nainá.

2

X̄ita ndiso xi okóya 'én xi mìtsà kixi kjoa (Judás 4-13)

¹ Ya j̄iìn naxandá Israel kis'e x̄ita ndiso xi kitsò nga 'én-la Nainá kiichjaya, tanga mìtsà kixi kjoa. It'aà tsajòn, k'oaá t̄is'ín s'e x̄ita ndiso xi kòkòya'ma kjohítsjeèn xi síkíts'ón-j̄iìn-la x̄ita naxandá-la Nainá, skanda kochrjengui jè Na'èn-ná xi tsibíchj̄t̄jì-ná. K'oaá ma-ne nga j̄nà x̄ita koi, t̄j̄j̄nà nchihótsji-la kjoabiyaà yijo-la nga ta ñitoón jchija.

² 'Nó k̄jìn x̄ita k̄j̄it̄j̄ngui-la nga k'oas'ín s'j̄iìn kjoa xi 'ño ch'o t̄j̄j̄n. Koií kjoa-la x̄ita ndiso koi, nga ch'o k̄iná'ya-la kjoa ts'e ndiyá kixi.

³ J̄nà x̄ita ndiso koi, ta toón tse mejèn-la; kochrjekájno-nò ton nga skónachan-nò nga kòkòya-nò 'én ndiso. Nainá, jyeé kjòtseé t̄j̄indaà-la nga tsjá-la kjo'in kò mìkiì kojno-la kjo'in xi s'e-la.

⁴ Nga Nainá mìkiì kisìjchàat'aà-la j̄nà àkjale xi tsohótsji jé. Ján kiskinij̄iìn i'nde kjo'in ñánda t̄t̄i ni'ín. Na'ño kichá cadena tsibít'aà'ño. Yaá kisikítsajna ngajo ñánda j̄nò choòn, skanda jè nachrjein k'e nga s̄indaàj̄iìn.

⁵ Nainá, t̄j̄kooá mìkiì kisìjchàat'aà-la isò'nde xi kisijna kjòtseé; kisikasén jtsí xkón xi kisikjehesòn yije x̄ita xi kis'e nachrjein koi. Tà jè Noé kisìjchàat'aà-la, koi kjoa-la nga 'én kixi kiichjayaj̄iìn-la x̄ita, kò itoò x̄ita xíkjín tsiningui-ne.

⁶ Nainá t̄j̄kooá kisikjehesòn yije x̄ita ts'e naxandá Sodoma kò Gomorra. Jngoò k'aá tsaká, ta chijo kisinchaà. K'oaá s'ín tsibíjna jngoò-la chiba nga k'oaá t̄is'ín komat'in j̄nà x̄ita xi kondra t̄ítsajna-la Nainá.

⁷ Tanga jè Lot nga x̄ita kixi, itjokàj̄iìn kjo'in. 'Nó ch'o komà-la kjoa ts'e jé xi nchis'ín j̄nà x̄ita naxandá koi.

⁸ X̄ita jè nga x̄ita kixi-né, nga ya t̄j̄najiìn-la j̄nà x̄ita koi nga ch'o nchis'ín, kjo'iìn t̄isíkjeiìn nga 'on ma-la inima-la nga nachrjein nchijòn beè koa 'nchré-la kjoa xi ch'o nchis'ín x̄ita koi.

⁹ Yaá tí'ya-la nga jè Na'èn-ná osikò-né j̄nà x̄ita xi beèxkón nga síkítsajnandeíí mé kjoa xi t̄j̄j̄n-la, t̄j̄kooá síkítsajna'ño-né j̄nà x̄ita xi ch'o s'ín nga tsjá-la kjo'in jè nachrjein k'e nga s̄indaàj̄iìn.

¹⁰ J̄nà t̄ítsajna ítjòn nga s'e-la kjo'in j̄nà x̄ita xi 'ño fit̄j̄ngui-la kjoa ch'o xi síjé yijo-la kò j̄nà xi ochrjekàngui kjotixoma-la Nainá.

Jñà xita ndiso koi, xita tájaajìin nga 'ño 'nga ikon. Mikì tsakjón nga chjajno-la jñà nga'ño xi mikì tsejèn.

¹¹ Jñà àkjale, nas'ín isa tse nga'ño tjín-la koa tjín-la kjotíxoma, mì k'oaá s'ín chjajno-la nga'ño xi mikì tsejèn nga nguixkon Na'èn-ná.

¹² Jñà xita koi, chjajnoó-la kjoa xi mikì fiya-la. K'oaá s'ín ngaya-la koni cho xi mikì síkítseèn nga tà xó k'oaá s'ín kits'iin-ne nga kindoba'ño ikjoàn sík'en. Xita koi, yaá kiyájiin kjoa ts'e jé-la.

¹³ Koi kjo'in tjoé ngajo-la koni tjín kjo'in xi kitsjaà-la xita xi kjeí. Jñà xita koi, nas'ín nachrjein, tsjaá ma-la nga s'ín kjoa xi 'ño ch'o tjín. K'e nga jñà xita koi, báhjtako-nò tsà s'eí tjín-nò, síkít'ón-jiin-né nga sísobà-nò nga ch'o tjín kjoa xi s'ín.

¹⁴ K'e nga beèxkon jngoò chjoón, nitoón fahajiin-la ko mikì ma síkíjna kjoa ts'e jé. Konachan-la xita xi mì kixí tjín kjohítseèn-la. Inima-la, kjit'aà nachrjein tjín mé xi mejèn-la. Xita koi, tjínè-la nga kjo'in tjoé-la.

¹⁵ Jyeé kíkíjna ndiyá kixí. Jè fitjingui-la ndiyá xi ch'o tjín, jè ndiyá ts'e Balaam, ki'ndí-la Beor, jè xi 'ño kjòtsjakeè ton nga mejèn-la s'iin kjoa xi mìtsà kixí tjín.

¹⁶ Tanga tsaká-la kjoa ts'e jé-la. Jngoò búrró chjoón xi mikì ma-la chja, kiichja-la koni tsà xita; mikì kitsjá'nde-la nga kiiko-isa kjoaská-la.

¹⁷ Jñà xita ndiso koi, k'oaá s'ín ngaya-la koni ngajo nandá xi tsjín-la nandá, koni ifi xi nímé jtsí fiko, nitoón fiko tjo. K'oaá s'ín tjínè-la nga ya kítajajjiin i'nde jñò ts'e kjo'in nita mé nachrjein-ne.

¹⁸ Ngui 'én 'ngaá chja xi nímé chí-la. 'Ñó 'nga ikon nga síchjeén kjoach'o xi sasén-la yijo-la nga konachan-la jñà xita xi sa nchibinchat'aàxìn-la jñà xita xi ch'o nchisíchá yijo-la.

¹⁹ K'oaá tsò-la jñà xita nga kítajajndeí, tanga tijnà-ne tikoá yaá títajajjiin'ño kjoach'o-la. K'e nga jngoò xita xi bítajajjiin'ño jngoò kjoa, jè kjoa jè tjín-la nga'ño nga jè otíxoma-la.

²⁰ Jñà xita xi jye kijtseèxkon Jesucristo xi otíxoma-ná, nga jè tsachrjekàjiin kjo'in, nga jye chinchat'aàxìn-la kjoa ch'o-la isò'nde, tsà ijngoò k'a k'oas'ín s'iin, tsà síkijne ijngoò k'a-la kjoa xi ch'o tjín, nga koma iskan, isaá ch'o komat'in mì k'oa-ne k'e nga sa ítjòn.

²¹ Isaá-la ndaà tjín tsà mikì kijtseèxkon ndiyá kixí-la Cristo, mì k'oa-ne nga jye chinchat'aàxìn-la kjotíxoma tsjeè-la Nainá xi jye kitjoé-la.

²² Xita koi, k'oaá s'ín kít'íin koni tsò 'én xi tíjna-la xita xi tjín-la kjoachjine nga tsò: “Nañá, tije kine ijngoò k'a-ne ndábisò-la” koa: “Jè chinga k'e nga jye ongáya, ijngoò k'a ongáyajiin-ne ndási.”

3

K'e nga kjoí ijngoò k'a Na'èn-ná Jesucristo

¹ Ndí 'ndsé xi 'ño matsjake-nò, xojon jè, jè xi ma-ne jò nga tikjiin-nò. Ingajò xojon koi, k'oaá s'ín binè-nò nga síkítseèn kjoa xi ngui kixí tjín;

² mé-ne nga síkítseèn-nò jñà 'én xi kjòtseé tsakóya xita tsjeè-la Nainá xi kiichja ngajo-la. Tikoá síkítseèn kjotíxoma-la Na'èn-ná Jesucristo xi tsachrjekàjiin-ná kjo'in koni s'ín tsakóya-nò jñà xita xi tsibíxáya-la.

³ Jè xi 'ño mochjeén nga ndaà kátasjiin-nò, jñà nachrjein xi sa nchrobá nga jyeé tífehèt'aà nachrjein, kjoí xita xi sísobà-nò ts'e kjoa kixí; yaá kojchájiin kjoach'o xi síjé yijo-la.

⁴ Skonangui, kitso-nò: “Nachrjein i'ndeí, ¿mé-ne mì tíbitasòn-ne 'én xi tíjna xi tsò nga kjoí ijngoò k'a Cristo? Jyeé kjòtseé k'en xita jchínga-ná, tákó k'oaá choòn skanda kóni nga kisindaà isò'nde.”

⁵ Jñà x̄ita xi k'oā tsò, xó k'oāá s'ín-ne nga síjchàajìin nga jñà 'én xi kiichja Nainá nàchrjein kjòtseé, jñà kisindaà-ne ngajmìi kò nangui. Tijè-ne nandá inchrobàt'aà-ne kò tijè tíjnakon-ne.

⁶ Xi komà iskan, tijè-ne 'én-la Nainá kò nandá kisikje-ne isò'nde jchínga k'e nga tsangasòn nandá.

⁷ Tì jé-ne 'én xi kitsjaà Nainá k'oāá s'ín tíchja nga jè ngajmìi kò nangui ñánda titsajnasoán nàchrjein i'ndeì, títsajnandaà-la mé-ne nga kitì-ne jè nàchrjein k'e nga sindaajìin-la x̄ita tikoá kjoehesòn jñà x̄ita xi mìkiì beèxkón Nainá.

⁸ Jñò ndí 'ndsè xi matsjake-nò kì nìjchàajìin-jèn kjoa koi: xi it'aà ts'e Nainá, jngoò nàchrjein k'oāá ngaya-la koni tsà jngoò jmiì nó tíjín-ne, koa jngoò jmiì nó, Nainá, jngoò nàchrjein tsò-la.

⁹ Na'èn-ná mìtsà tísíkichrjein nga síkkitasòn 'én-la koni tsò i'nga x̄ita; tíkoña kjoaá-nò Nainá; jè xi mejèn-la nga nìjngoò x̄ita jchija, nga kàtasíkájno jé-la nga mì tì jé kohótsji-ne.

¹⁰ Tanga jè nàchrjein-la Nainá, k'oāá s'ín kjoí koni s'ín f'ìi x̄ita chijé. Ngajmìi, jngoò k'aá jchija k'e nga kíná'ya-la nga ch'o jchán kjone. Jè ts'oi, sá kò ni'ño kitì-ne. Jè nangui kò nita mé xi tíjín i it'aà nangui, jngoò k'aá kitì.

¹¹ Koni s'ín koma nga jchija ngats'ìi tsojmì xi tíjín, 'ño mochjeén nga tsjeè síjchá yijo-nò koni s'ín síjé Nainá,

¹² kò nga chíñakjoa-là jè nàchrjein k'e nga kjoí Nainá. Tixátíya-là nàchrjein jè. Kò ngats'ìi tsojmì xi tíjín isò'nde kò ngajmìi, jngoò k'aá kongandá nga kitì.

¹³ Tanga it'aà tsaján, jè titsachiñá-lá ngajmìi xitse kò nangui xitse koni s'ín kitsjaà tso'ba Nainá, ya ñánda s'e kjoa kixi kò kjondaà.

¹⁴ Koií kjoa-la jñò ndí 'ndsè xi matsjake-nò, nga k'oā tíjín kjoa xi titsachiñá-lá, tíjín-là nga'ño yijo-nò, mé-ne k'e nga kjoí jngoò k'a Jesucristo, k'oāá s'ín sakòt'aà-nò nga 'nchán kitsajnaà nga tsjeè titsanìjchá yijo-nò kò nímé jé tíjín-nò.

¹⁵ K'oāá s'ín kàtasijìin-nò, jè kjoatsejta-la Nainá nga tse titsachiñá, jè-né nga kitjokajìin kjo'in jñà x̄ita. Jè 'ndsè Pablo x̄ita xinguiáá xi 'ño matsjachaá, tikoáá jye isa kiskìi-nò koni s'ín tíjín kjoachjìine xi kitsjaà-la Nainá.

¹⁶ Nga jngoò jngoò xojon carta xi kiskìi Pablo, k'oāá s'ín tíchja kjoa koi. Tanga tíjín i'nga xi 'ño 'in chja, mìkiì ndaà machiya-ná kó tsòya-ne. K'oāá ma-ne jñà x̄ita xi mìkiì ndaà fiya-la kò xi mì kixi tíjín kjohítsjeèn-la, síkjatjìya-la 'én. K'oāá tì síkò jñà Xojon-la Nainá xi kiskìi xi kj'eíj x̄ita. K'oāá ma-ne jñà x̄ita xi koasíko 'én-la Nainá, tíjñà nchihótsji-la kjo'in yijo-la.

'Én xi fehet'aà-ne

¹⁷ K'oāá ma-ne, jñò ndí 'ndsè xi matsjake-nò, nga jye ndaà tíjìin-nò kjoa koi, tíkindaa yijo-nò, mé-ne nga mì skónachan-nò jñà x̄ita xi ch'o s'ín nga xìn ndiyá kùiko-nò xi mì kixi tíjín kò yaá jchija nga kixi titsajnakoo Nainá.

¹⁸ Isáá ndaà kàtasakó-isa-nò kjondaà-la kò kjohítsjeèn-la Jesucristo xi otíxoma-ná nga jè ochrjekajìin-ná kjo'in. Jeya kàtìjna i'ndeì kò nita mé nàchrjein-ne. K'oās'ín kàtama.

Xojon carta xi kiskiù ítjòn San Juan

Jesús, jè 'Én xi síkíjnakon iníma-ná

¹ Jè Jesús, jè 'Én xi síkíjnakon-ná xi tíjna skanda tisa tãts'en-la kjoa. Tanga i'ndeí, jyeé kina'ya-lajen, kò xkoón ki'ya-najen, kichitsejèn-lajen kó kji, tikoáá ndsaá kinìkò-najen.

² Jè 'Én jè, ki'ya tsejeén-la. Kò ki'ya-najen. Kò nguì kjoa kixi-né xi bènojmi-jen xi it'aà ts'e. Kò tikoáá bènojmiya-nòjen jè 'Én xi síkíjnakon iníma-ná nita kjé-ne. Jè 'Én jè, k'e nga tisa ítjòn, yaá tíjnat'aà-la Nainá. Tanga i'ndeí, jyeé tsatsejèn-najen.

³ Bènojmi-najen kjoa xi ki'ya-jen kò xi kina'ya-jen, mé-ne jñá, k'oa tís'ín ngàsòn kitsajna kjoá, koni s'ín ndaà titsajna kjoá Nainá xi Na'én-ná ma, kò Ki'ndí-la xi Jesucristo.

⁴ Koií xá titsachjiù-nòjen Xojon jè mé-ne nga nguì kò kjotsja kãtasakó kjit'aà-la iníma-ná.

Jè Nainá kjoa iseèn-né

⁵ K'oaá s'ín tíjn jñà 'én xi tsakóya-najen Jesucristo, kò koií-né xi nokjoayajiù-nòjen: Jè Nainá, kjoa iseèn-né. Xi it'aà ts'e, tsjìn xi kjoa jñò.

⁶ Tsà kixoán nga ndaà titsajna kjoá Nainá, tanga tsà yaá titsanjchá yijo-ná ya ñánda jñò choòn, ñánda tíjn kjoach'o, 'én ndisoó titsanokjoá; mìtsà kjoa kixi xi tisa'né.

⁷ Tanga tsà ya titsajnaá ñánda iseèn choòn, koni jè Nainá yaá tíjna ñánda iseèn choòn, ndaá titsajna kjoá xinguiáá, kò jè jní-la Jesucristo xi Ki'ndí-la Nainá ma, sítsjeè yijeé jñà jé xi tíjn-ná.

⁸ Tsà kixoán: “Tsjìn-na jé”, tíjñá titsachonachan-lá yijo-ná; mìtsà kjoa kixi xi titsanokjoá.

⁹ Tanga tsà kénojmi yije-lá Nainá jñà jé xi tíjn-ná, komaá jè kjót'aàtakoán nga sijncháat'aà-ná jé-ná tikoáá sítsjeeya-ná ngats'ii kjoa xi ch'o 'né. Nga jè Nainá síkitasòn 'én-la, kò nguì kjoa kixi xi s'ín.

¹⁰ Tanga tsà kixoán: “Kj'eè tsà jé otsjià”, jè Nainá ndisoó titsanachrjekànguiaá, kò mìtsà kixi kjoa nga mokjeiín-ná jè 'én-la.

2

Yá xita xi chjatjì-ná ya nguixkon Nainá

¹ Jñò xi koni tsà ndí ixti-na xan-nò, koií xá tìkjiù-nò Xojon jè, mé-ne nga mì tí jé kinchátsji-lá yijo-nò. Tanga tsà tíjn jngoò xita xi tíhótsji jé-la yijo-la, jè Nainá sijncháat'aà-la, nga tíjna jngoò-ná xita xi chjatjì-ná ya nguixkon Nainá, jè xi 'mì Jesucristo xi nguì xita kixi.

² Jesucristo kitsjaà kjotjò yijo-la nga k'en ngajo-ná, mé-ne koma sijncháat'aà-ná jñà jé-ná, tanga mìtsà tà jñá xi sijncháat'aà-ná; tikoáá sijncháat'aà yijeé-la ngats'ii xita xi tíjn nga tíjtsa isò'nde.

³ Tsà ndaà síkitasoán kjotixoma-la, maá kíjngoò-lá takoán nga jyeé ndaá yaxkoaán.

⁴ Tsà tíjn xita xi tsò: “An, jyeé ndaá bexkoan Nainá”, tanga tsà mìkiù ndaá síkitasòn kjotixoma-la, xita ndiso-né; tsjìn-la kjoa kixi.

⁵ Tanga tsà ndaá nikitasoán koni tsò 'én-la, jyeé 'ñó ndaá tíjn-ná kjotsjacha-la Nainá kò k'oaá s'ín ma-ne nga 'ya-la nga kixi kjoa nga jè Cristo titsajna kjoá.

⁶ Jè xita xi tsò nga ya tijnako Cristo, mochjeén-né nga k'oas'ín kàtasíjchá yijo-la koni s'ín kis'iin Jesucristo.

Kjotíxoma xitse

⁷ Jñò ndí 'ndsè, jè kjotíxoma xi tikjiì-nò, mìtsà nguì kjotíxoma xitse; tijè-ne kjotíxoma xi kits'iì-nò k'e nga sa ítjòn k'e nga tisa kòkjeiín-nò. Jè kjotíxoma jchínga jè, tijè-ne 'én xi kina'yà jñò nga tisa ítjòn.

⁸ Tanga i'ndeì k'oaá s'ín tikjiì-nò koni tsà jngoò kjotíxoma xitse. Nga it'aà ts'e Cristo ki'ya-la nga xitse-né kò tikoáá tí'yaá-la xi it'aà tsajòn. Nga jyeé tífahato kjoa xi jñò choòn, kò jyeé tí'ya-la xi nguì kjoa iseèn-la Nainá.

⁹ Tsà jngoò xita k'oaas'ín títsò nga k'oaá s'ín tísjchá yijo-la koni s'ín tjin kjoa iseèn-la Nainá, tanga tsà majtikeè xíkjin xi tikoá it'aà ts'e Cristo mokjeiín-la, mìtsà kixi kjoa nga iseèn tísjchá yijo-la, takó yaá tijnajiìn nándá jñò choòn.

¹⁰ Jè xita xi matsjakeè xita xíkjin xi tikoá it'aà ts'e Cristo mokjeiín-la, k'oaá s'ín tísjchá yijo-la koni s'ín tjin kjoa iseèn-la Nainá. Jè xita jè, mìtsà tì mé tjin-ne xi ma kohótsji jé-la.

¹¹ Tanga jè xita xi majtikeè xita xíkjin xi tikoá it'aà ts'e Cristo mokjeiín-la, yaá tjna, kò yaá tsó'baya ya ndiyá nándá jñò choòn. Mikiì beè nándá tífi, nga jè kjoa jñò, bíchjoà xkon.

¹² Jñò xi ndí ixti 'mì-nò, tikjiì-nò Xojon jè, nga it'aà ts'e Cristo-né nga jye kisiìjchàat'aà-nò Nainá jñà jé xi tjin-nò.

¹³ Jñò xi xita jchínga 'mì-nò, tikjiì-nò Xojon jè, nga jyeé kiyaxkoòn jè Jesucristo xi tjna skanda tisa tàts'en-la kjoa. Jñò ixti xi sa titsanìjchá yijo-nò, tikjiì-nò Xojon jè, nga jyeé kinìkijne-la jè xita neíí. Jñò xi ndí ixti 'mì-nò, jyeé kiskii-nò Xojon jè nga jye kiyaxkoòn Nainá xi Na'èn 'mì-laà.

¹⁴ Jyeé kiskii-nò xojon, jñò xi xita jchínga 'mì-nò, koií kjoa-la nga jyeé kiyaxkoòn Jesucristo xi tjna skanda tisa tàts'en-la kjoa. Tikoáá jyeé kiskii-nò jñò ixti xi sa titsanìjchá yijo-nò, koií kjoa-la nga tjin-nò nga'ño kò jyeé ya tijnajiìn inìma-nò jè 'én-la Nainá kò jyeé kinìkijne-la jè xita neíí.

¹⁵ Kì jñà matsjacha jñà kjoa xi tjin isò'nde. Tsà yá xita xi matsjakeè jñà kjoa xi tjin isò'nde, mìtsà kixi kjoa nga matsjakeè Nainá xi Na'èn 'mì-laà.

¹⁶ Ngats'iì kjoa ch'o xi jè isò'nde bí'taà-ná, mìtsà ya nchrobá-ne it'aà ts'e Nainá xi Na'èn 'mì-laà. Tiyáá tí'sindaà-ne i isò'nde. Jñà kjoa ch'o koi, xi tjin isò'nde: jñà-né kjoa ch'o xi síjé yijo-ná, kjoa xi tsejèn-la xkoaán nga mején-ná tsaján koma, kò kjoa 'nga takòn xi ts'e kjoa nchiná.

¹⁷ Ngats'iì kjoa ch'o xi tjin isò'nde, kò kjoa xi ya fahajiìn-ná, jyeé tífehet'aà, tanga jè xita xi síkitasòn koni s'ín mejèn-la Nainá, kíjnakon-né nita kjé-ne.

Jè xi kjoa kixi kò kjoa ndiso

¹⁸ Jñò xi ndí ixti xan-nò, jyeé tífehet'aà nachrjein. Jyeé tíjiìn-nò nga kjoíí jngoò xita xi nguì kondra tjna-la Cristo. Kò nachrjein i'ndeì jyeé 'ño kjìn ma-ne xi kondra nchifi-la Cristo. K'oaá ma-ne nga k'oaas'ín machiya-ná nga jyeé tífehet'aà nachrjein.

¹⁹ Jñà xita koi, tì íí itjokàjiìn-ná, tanga xi kjoa kixi, mìtsà nguì xita tsaján ma; tsà kixi kjoa nga xita tsaján, íí-la títsajnakò-ná. Tanga koií k'oaas'ín itjokàjiìn-ná jñà xita koi mé-ne nga ndaà kàta'ya-la nga ngats'iì xita xi k'oaas'ín kondra fi-la Cristo, mìtsà nguì xita tsaján.

²⁰ Jè Jesucristo, xi xita tsjeè, jyeé kitsjaà-nò jè Inìma Tsjeè-la Nainá; k'oaá ma-ne nga ngats'ioò jyeé ndaà tíjiìn-nò kós'ín tjin xi kjoa kixi.

²¹ K'oaá ma-ne nga k'oaas'ín tikjiì-nò xojon jè, nga jyeé ndaà tíjiìn-nò xi kjoa kixi; mìtsà koi-ne nga kj'eè tíjiìn-nò. Kò jyeé ndaà tíjiìn-nò nga nijngoò 'én ndiso xi ya nchrobát'aà-ne it'aà ts'e kjoa kixi.

22 ¿Yá-ne xi x̄ita ndiso? Jè-né xi bí'ma nga tsò: “Jè Jesús mìtsà jè xi Cristo, [mìtsà Nainá kisikasén].” Jè x̄ita jè xi kondra fì-là Cristo nga jngoò k'a mìkiì mokjeiín-là ìt'aà ts'e Nainá xi Na'èn-ná ma kò ìt'aà ts'e Jesucristo xi Ki'ndí-là Nainá ma.

23 Ngats'ìi x̄ita xi jngoò k'a mìkiì mokjeiín-là ìt'aà ts'e Ki'ndí-là Nainá, mìtsà Nainá xi Na'èn-ná ma tíjnakò. Tanga jè x̄ita xi mokjeiín-là tìkoá tsjá 'én-là nga jè Jesús, jè xi Ki'ndí-là Nainá, yaá tíjnakò Nainá xi Na'èn-ná ma.

24 Koií k'oas'ín xan-nò, ndaà kàtasijìin inìma-nò jè 'én xi ìt'aà ts'e Cristo xi jye kina'yà nga tisa tàts'en-là kjoa. Tsà k'oas'ín ndaà sijìin inìma-nò, tìkoáá ndaà kítsajnakò Nainá xi Na'èn-ná ma kò Ki'ndí-là.

25 Jesucristo k'oáá s'ín kitsjaà 'én-là nga tsjá-ná kjoabinachon xi mìkiì fehet'aà nita kjé-ne.

26 Koií xá tìkjiì-nò xojon jè mé-ne nga ma jchaxkon-nò jñà xi mejèn-là konachan-nò.

27 Tanga jñò, jyeé tíjìin inìma-nò jè Inìma Tsjeè-là Nainá xi kitsjaà-nò Jesucristo. Mì tì kiì mochjeén-ne tsà yá xi kòkòya-nò. Nga tíjè-ne Inìma Tsjeè-là Nainá keènojmiya-nò kós'ín tíjín ngats'ìi kjoa xi ndaà tíjín. Koni s'ín kòkòya-nò, 'én kixì-né, mìtsà 'én ndiso. K'oáá s'ín ndaà titsajnakò kjit'aà Jesucristo, koni s'ín síkíchiya-nò Inìma Tsjeè-là Nainá.

28 Jñò xi ndí ìxti xan-nò, k'oáá s'ín ndaà titsajnakò Cristo, mé-ne nga 'ñó tíjín-ne takoán kò mìkiì kòsobà-ná k'e nga jè xi kítjojen ìjngoò k'a-ne ngajmii.

29 Koni s'ín jye tíjìin-nò nga jè Cristo, x̄ita kixì-né nga nguixkon Nainá, k'oáá tìs'ín ndaà kàtasijìin-nò, nga ngats'ìi x̄ita xi kjoa kixì s'ín nga nguixkon Nainá, ki'ndí-là Nainá-né.

3

Ixti-là Nainá

1 Ndaà kàtasijìin-nò, 'ñó ndaà matsjakeè-ná Nainá xi Na'èn-ná ma, k'oáá ma-ne nga ìxti-là tsò-ná. Kò nguì kixìí kjoa nga ìxti-là Nainá 'mì-ná. K'oáá ma-ne nga jñà x̄ita isò'nde, mìkiì mokjeiín-là tsà ìxti-là Nainá 'mì-ná, koií kjoa-là nga jñà x̄ita koi, mìkiì mokjeiín-là ìt'aà ts'e Nainá.

2 Jñò ndí 'ndsè xi matsjake-nò, i'nde jyeé ki'ndí-là Nainá 'mì-ná. Tanga kj'eè tsà ndaà okó-ná Nainá kó kjoàn komaá nga koma ìskan. Tanga jyeé tíjìin-ná nga k'oá tì kjoàn komaá koni kji jè Jesucristo k'e nga kijchò nachrjein nga jè xi kjoíí ìjngoò k'a-ne; nga k'oáá s'ín jchaxkoaán koni kji jè.

3 Ngats'ìi x̄ita xi k'oas'ín nchikoña nga k'oáá s'ín kjoàn koma koni kji jè Jesucristo, nachrjein nchijòn-né nga tsjeè nchisíjchá yijo-là koni s'ín nga x̄ita tsjeè jè Jesucristo.

4 Ngats'ìi x̄ita xi ótsji jé, kondraá fì-là kjotíxoma-là Nainá. K'e nga jé binchaàtsjiaá, jè kjotíxoma-là Nainá tìnáchrjenguaá.

5 Jñò, jyeé tíjìin-nò nga jè Jesucristo koií xá j'ìi-ne nga jè faáxìn-ná jñà jé xi tíjín-ná. Kò 'ya-nò nga jè Jesucristo, nímé jé tsohótsji.

6 Ngats'ìi x̄ita xi Cristo títsajnakò, mìtsà jé ótsji; tanga jñà x̄ita xi ótsji jé, kj'eè kiì beèxkon kò tìkoá mìkiì tíjìin-là yá-né xi 'mì Jesucristo.

7 Jñò, xi ndí ìxti-nà xan-nò, kì kiì bìi'nde tsà yá xi skónachan-nò. Jè x̄ita xi kjoa kixì s'ín nga nguixkon Nainá, x̄ita kixì-né, koni x̄ita kixì jè Cristo.

8 Tanga jè x̄ita xi kjit'aà nachrjein tíhótsji jé, ts'e x̄ita neíí-né. Nga jè x̄ita neíí, k'oáá s'ín tíhótsji jé skanda tisa tàts'en-là kjoa. Kò koií xá j'ìi-ne Jesucristo xi Ki'ndí-là Nainá nga jè sikixòña jñà kjoa ch'o xi s'ín jè x̄ita neíí.

⁹ Ngats'iì x̄ita xi jye Nainá kisik̄jat̄j̄iya-là nga ki'ndí-là Nainá ma, mìtsà t̄iya t̄itsaj̄naj̄iìn-ne jé. Nga jyeé ya t̄ijnaj̄iìn in̄ima-là jè In̄ima Tsjeè-là Nainá. Kò mì t̄i k̄iì ma k̄ohóts̄ji-jé-Ìsa, nga jyeé ki'ndí-là Nainá-né.

¹⁰ K'oaá s'ín ma-ne nga yaxkon-là yá-né xi ixti-là Nainá kò yá-né xi ixti-là x̄ita neí; ngats'iì x̄ita xi mìk̄iì síkitasòn k̄joa k̄ixi-là Nainá, t̄ikoa mìk̄iì tsjakeè beè x̄ita x̄ík̄j̄ín xi t̄ikoa ìt'aà ts'e Cristo mokjeiìn-là, mìtsà ki'ndí-là Nainá ma.

Ngásòn ngáya tsjacha s'eén xinguiá

¹¹ Nga k'oaá s'ín t̄ích̄ja jè 'én xi jye kina'yà k'e nga t̄isa kòk̄jeiìn-nò nga sa ìt̄jòn nga tsò: Ngásòn ngáya tsjacha s'eén xinguiá.

¹² Mìk̄iì k'oa's'ín s'eén koni kis'iìn jè x̄ita xi ki'mì Caín nga jè x̄ita neí k̄iìt'aà-là nga kisik'en 'ndse. ¿Mé-ne kisik'en-ne 'ndse? Tà koií k̄joa-là nga jè 'ndse, x̄ita k̄ixi-né nga nguixkòn Nainá kò jè Caín ch'oó t̄jín k̄joa xi s'ín.

¹³ K'oaá ma-ne k'oa's'ín t̄ixan-nò j̄nò ndí 'ndsè, k̄i maxkón-nò tsà s̄ij̄tikeè-nò x̄ita ìsò'nde xi mìk̄iì mokjeiìn-là 'én-là Nainá.

¹⁴ J̄ná jyeé t̄j̄iìn-ná nga jyeé it̄jokàj̄naá ya ndiyá k̄joabiyaá xi ya t̄jaáyaá k̄jòtseé kò jyeé t̄j̄iìn-ná k̄joabinachon xi mìk̄iì fehet'aà n̄ita kjé-ne. Nga jyeé k'oa's'ín ndaà matsjachaá j̄ná x̄ita xinguiá xi t̄ikoa ìt'aà ts'e Cristo mokjeiìn-là. Jè x̄ita xi mìk̄iì matsjakeè x̄ík̄j̄ín, ndiyá k̄joabiyaá tsóhoya jè in̄ima-là.

¹⁵ Ngats'iì x̄ita xi majtikeè x̄ita x̄ík̄j̄ín, k'oaá s'ín ngaya-là koni tsà x̄ita sík'en. J̄nò, ndaá t̄j̄iìn-nò, jè x̄ita xi x̄ita sík'en, mìtsà k̄joabinachon xi mìk̄iì fehet'aà t̄is̄j̄ch̄aj̄iìn yijo-là.

¹⁶ J̄ná, k'oaá s'ín 'ya-ná mé xi 'mì k̄jotsjacha k'e nga jè Jesucristo kitsjaá k̄jòtjò yijo-là nga k'en ngajo-ná. J̄ná k'oaá t̄is'ín mochjeén nga s'eén ìt'aà ts'e x̄ita xinguiá koni kis'iìn jè Cristo.

¹⁷ Tsà t̄j̄iìn jngoò x̄ita xi t̄j̄iìn-là tsojmì xi tímochjeén k̄jit'aà-là, tsà skoe jngoò x̄ita x̄ík̄j̄ín xi t̄ikoa ìt'aà ts'e Cristo mokjeiìn-là nga tsjìn-là tsojmì xi mochjeén-là, tsà mìk̄iì ma-là nga k̄osikò jè x̄ita x̄ík̄j̄ín xi ìt'aà ts'e tsojmì xi tsjìn-là, mìtsà k̄ixi k̄joa nga k̄jotsjacha-là Nainá t̄ijnaj̄iìn in̄ima-là.

¹⁸ J̄nò xi ndí ixti-nà xan-nò, t̄itsjacha xinguiò, k̄i tà 'én nokjoà; ngui ndaá kàta'ya-là kós'ín matsjacha xinguiò nga t̄isikòò mé tsojmì xi mochjeén-là mé-ne nga kàta'ya-là nga k̄ixi k̄joa nga ndaà matsjacha xinguiò.

'Nó t̄j̄iìn takoán nga nguixkòn Nainá

¹⁹ K'e nga k'oa's'ín t̄itsa'né, k'eé j̄ch̄a-ná nga k̄ixi k̄joa nga k'oaá s'ín t̄itsan̄j̄ch̄a yijo-ná koni s'ín t̄j̄iìn k̄joa k̄ixi-là Nainá kò 'nchán n̄ik̄j̄naá in̄ima-ná nga nguixkòn Nainá.

²⁰ Nas'ín jè in̄ima-ná jè t̄ibínè-ná, t̄anga jè Nainá, ìsaá ndaà t̄j̄iìn-là mì k'oa-ne koni jè in̄ima-ná. Nga jè Nainá ìsaá ndaà tsejèn yije-là ngats'iì k̄joa xi t̄itsa'né.

²¹ J̄nò ndí 'ndsè xi matsjake-nò, tsà jè in̄ima-ná mìtsà t̄i mé k̄joa ch'o t̄ibínè-ná, 'nó t̄j̄iìn takoán nga nguixkòn Nainá.

²² Tsà mé xi s̄ij̄é-lá Nainá, maá-là tsj̄a yije-ná n̄ita mé k̄jondaà-ne; nga n̄ik̄itasoán k̄jòt̄ixoma-là, kò k'oaá s'ín 'né koni s'ín sasén-là Nainá.

²³ Jè k̄jòt̄ixoma-là Nainá, jé-né nga ndaà k̄atakjeiìn-ná ìt'aà ts'e Jesucristo xi Ki'ndí-là ma, t̄ikoa ngásòn ngáya k̄otsjachaá xinguiá koni s'ín jye tsat̄ixoma-ná Cristo.

²⁴ Jè x̄ita xi síkitasòn k̄jòt̄ixoma-là Nainá, yaá t̄j̄inakò Nainá, kò jè Nainá yaá t̄ijnaj̄iìn in̄ima-là x̄ita jè. K'oaá ma-ne nga 'yaá nga Nainá ya t̄j̄inakò-ná, koi k̄joa-là nga jye kitsjaá-ná jè In̄ima Tsjeè-là.

4

Jñà xità xi kondra fi-la Cristo

¹ Jñò ndí 'ndsè xi 'ñó matsjake-nò, kì taxkì mokjeiin-nò it'aà ts'e ngats'ii xità xi tsò nga jè Inìma Tsjeè-la Nainá síkichiya-la 'én xi chjaya. Ítjòn chít'aà, a kixí kjoa nga jè Inìma Tsjeè-la Nainá tísichiya-la 'én xi chja, a xi majìn-né. Nga jñà nàchrjein xi titsajnaá i'nde, tjin jchán xità ndiso xi tjímasòn ya isò'nde xi tsò nga jè Nainá tsjá-la 'én xi nchibénojmíya.

² Jè xità xi bénojmí nga jè Jesucristo, jí kits'iin it'aà nangui, kò xitàá komà koni jñá, jè xità xi k'oas'ín bénojmí, jè-né xi tjin-la Inìma Tsjeè-la Nainá. K'oaá s'ín 'ya-nò yá xità-ne xi jè Inìma Tsjeè-la Nainá tísichiya-la 'én xi tichjaya.

³ Tanga jè xità xi mìkì k'oas'ín keènojmí nga jè Jesucristo jí kits'iin it'aà nangui, kò xitàá komà koni jñá, jè xità xi k'oas'ín tsò, tsjin-la Inìma Tsjeè-la Nainá. Xità jè, jè tísikjeén kjohítsjeèn-la xità xi tjna ítjòn nga kondra fi-la Cristo. Jñò, jyeé kina'yà nga kjoí-né jè xi kondra fi-la Cristo, kò nàchrjein xi titsajnaá i'nde jyeé k'oas'ín tísíxá kjohítsjeèn-la.

⁴ Jñò xi ndí ixti-na xan-nò, jyeé xità-la Nainá 'mì-nò; jñò, jyeé kinikijne-là jñà xità xi k'oas'ín 'én ndiso chjaya; mì tì kii koma-ne nga jñà skónachan-nò, nga jè Inìma Tsjeè-la Nainá xi tijnajìin inìma-nò, isaá ts'e nga 'ñó tjin-la mì k'oaà-ne koni jè kjohítsjeèn ts'e xità neí xi síxájiin inìma-la xità xi mìkì mokjeiin-la it'aà ts'e Cristo.

⁵ Jñà xità koi, tà jñá titsajnakon-ne kjohítsjeèn xi tjin ya isò'nde; k'oaá ma-ne nga k'oas'ín chja kò jñà 'nchré-la xità xi tikoá kjohítsjeèn ts'e isò'nde síkjeén.

⁶ Tanga ngajen, xità-la Nainá-nájen. K'oaá ma-ne nga jñà 'nchré-najen jñà xità xi mokjeiin-la 'én-la Nainá. Tanga jñà xi mìtsà xità-la Nainá ma, mìtsà ngajen sí's'in-najen. K'oaá ma-ne nga 'ya-la yá-né xi nguì jè Inìma Tsjeè-la Nainá tísíchiya-la nga nguì kjoa kixi kò yá-né xi inìma ndiso-la neí tikonachan-la.

Nainá, 'ñó tjin-la kjotsjacha

⁷ Jñò ndí 'ndsè xi 'ñó matsjake-nò, mochjeén-né nga ngásòn ngáya tsjacha jchaá xinguiáá, nga jè xi kjotsjacha, it'aà ts'e Nainá nchrobá-ne. Ngats'ii xità xi tjin-la kjotsjacha, ki'ndí-la Nainá-né kò tikoá beè-né yá-né xi Nainá.

⁸ Jè xità xi mìkì matsjakeè xità xíkjin, kj'eè kì beè yá-né xi Nainá, nga jè Nainá kjotsjacha-né.

⁹ K'oaá s'ín tsakó-ná Nainá kjotsjacha xi tjin-la xi it'aà tsaján nga kisikasén ki'ndí-la i isò'nde, jè ki'ndí-la xi ta jè ta jngoò ma-ne, mé-ne nga it'aà ts'e ndaà kítsajnakoaán.

¹⁰ K'oaá s'ín tjin kjotsjacha xi tsakó Nainá xi it'aà tsaján: Mìtsà koi-ne nga jñá ndaà matsjachaá Nainá. Jè Nainá xi 'ñó ndaà matsjakeè-ná. K'oaá ma-ne nga kisikasén ki'ndí-la nga k'en ngajo-ná, mé-ne sijnchàat'aà-ná jé-ná.

¹¹ Jñò ndí 'ndsè xi matsjake-nó, tsà jè Nainá k'oas'ín 'ñó ndaà matsjakeè-ná, mochjeén-né nga k'oa tís'ín kotsjachaá xinguiáá nga ijngoò jngoá.

¹² Nì saá jngoò xità xi xkon beè-ne Nainá, tanga tsà ndaà kotsjachaá xinguiáá nga ijngoò jngoá, jè Nainá yaá tijnajìin kjit'aà inìma-ná kò it'aà tsaján-ná nga ndaà tìbitasòn yije kjotsjacha-la Nainá.

¹³ Nainá jyeé kitsjaà-ná Inìma Tsjeè-la. K'oaá ma-ne nga jye 'yaá nga kjit'aà nàchrjein ya titsajnakoaá Nainá kò tikoá ya tijnako-ná Nainá nga tijnajìin inìma-ná.

¹⁴ Ngajen sobá ki'ya-jen kò 'bí-nájen 'én-najen nga jè Nainá xi Na'èn 'mì-laà kisikasén Ki'ndí-la nga jè kochrjekàjiin kjo'in xi kjoa ts'e jé-la ngats'ii xità isò'nde.

¹⁵ Ngats'ìi x̄ita xi nguì k̄o in̄ima-l̄a tsjá 'én-l̄a nga jè Jesús xi Ki'ndí-l̄a Nainá, kjit'aà n̄achrjein ȳa t̄ijnak̄o Nainá k̄o jè Nainá ȳaá t̄ijnajiin in̄ima-l̄a.

¹⁶ Jyeé k'oas'ín ndaà 'yaá, k̄o t̄ikoá mokjeiín-ná, nga jè Nainá t̄jín-l̄a kjotsjacha xi it'aà tsaján. Nga jè Nainá kjotsjacha-né. K̄o jè x̄ita xi kjotsjacha t̄ijnajiin kjit'aà ȳa in̄ima-l̄a, ȳaá t̄ijnak̄o Nainá k̄o jè Nainá ȳaá t̄ijnajiin in̄ima-l̄a x̄ita jè.

¹⁷ K'e nga it'aà tsaján k'oas'ín ndaà t̄íbitasòn yije kjotsjacha-l̄a Nainá, 'ñó t̄jín takoán nga mìtsà t̄i mé tsakjoòn-ná jè n̄achrjein k'e nga s̄indaàjiin-l̄a x̄ita xi kjoá ts'e jé-l̄a. Nga jñá, k'oaá s'ín ndaà t̄itsá'né ì isò'nde koni s'ín kis'iin jè Jesucristo.

¹⁸ Ȳa ñánda nga t̄jín xi kjotsjacha, mìtsà t̄i mé kjoskon t̄jín-ne. Nga jè xi nguì kjotsjacha, faáxìn-né ngats'ìi xi kjoskon 'mì. Jè x̄ita xi tsakjón, k̄jò'in-né xi tsakjón-l̄a. K̄o jè x̄ita xi tákó kjoskon t̄jijn in̄ima-l̄a, koií-né nga kj'eè tsà ndaà t̄jijn in̄ima-l̄a jè kjotsjacha-l̄a Nainá.

¹⁹ Koií k'oas'ín matsjacha-ná Nainá, koií kjoá-l̄a nga jè kjòtsjakeè ítjòn-ná.

²⁰ Tsà t̄jín x̄ita xi tsò: “An, matsjake-ná Nainá.” Tanga tsà majtikeè x̄ita xíkjín xi t̄ikoá it'aà ts'e Cristo mokjeiín-l̄a, jè x̄ita jè, x̄ita ndiso-né. Tsà mì k̄i matsjakeè x̄ita xíkjín xi xk̄on t̄ibeè-ne, ¿kós'ín ma-ne kòtsjakeè Nainá xi kj'eè tsà xk̄on beè-ne?

²¹ Jè kjotíxoma xi kitsjaà-ná Jesucristo, k'oaá tsò: Jè xi matsjakeè Nainá, mochjeén-né nga t̄ikoá k̄atamatsjakeè x̄ita xíkjín xi t̄ikoá it'aà ts'e Cristo mokjeiín-l̄a.

5

Kós'ín koma s̄ikijne-lá kjoá ts'e isò'nde

¹ Jyeé ixti-l̄a Nainá-né ngats'ìi x̄ita xi nguì k̄o in̄ima-l̄a mokjeiín-l̄a nga jè Jesús, [jè-né xi Nainá kisikasén], jè-né xi Cristo. K̄o ngats'ìi x̄ita xi tsjakeè xi na'èn t̄jna-l̄a, t̄jínè-l̄a nga t̄ikoá kòtsjakeè ngats'ìi ixti-l̄a na'èn-l̄a.

² K'e nga matsjachaá Nainá, k̄o t̄ikoá n̄ikitasoán kjotíxoma-l̄a, 'ya-ná nga t̄ikoá matsjachaá jñá xi ixti-l̄a Nainá ma.

³ K'oaá s'ín t̄jín tsà kixi kjoá nga matsjachaá Nainá, jè-né nga ndaà s̄ikitasoán kjotíxoma-l̄a. K̄o jè kjotíxoma-l̄a, mìtsà 'ñó 'in bitasòn.

⁴ Nga ngats'ìi x̄ita xi ixti-l̄a Nainá ma, s̄ikijneé-l̄a ngats'ìi kjoá ch'o xi t̄jín isò'nde. Koií ma n̄ikijne-lá kjoá xi t̄jín isò'nde nga mokjeiín-ná it'aà ts'e Cristo.

⁵ Niyá xi ma s̄ikijne-l̄a jè kjoá ch'o xi t̄jín isò'nde, tajngoò-né jè x̄ita xi mokjeiín-l̄a it'aà ts'e Jesús, nga jè-né xi Ki'ndí-l̄a Nainá ma. Jè-né xi chíkjoá-l̄a nga s̄ikijne.

Jè xi tsjá kixi 'én it'aà ts'e Ki'ndí-l̄a Nainá

⁶ Jè-né Jesucristo xi j'ìi ì isò'nde. K̄o k'e nga j'ìi, jè nandá k̄o jn̄i xi ndaà tsakó. K̄o mìtsà tà jè nandá xi tsakó, t̄ikoáá jè jn̄i. K̄o jè In̄ima Tsjeè-l̄a Nainá xi bénojmi kixi yá-ne xi jè. Nga jè In̄ima Tsjeè-l̄a Nainá, nguì kjoá kixi-né.

⁷ Jàn ma-ne xi nguì tsjá kixi 'én-l̄a xi it'aà ts'e kjoá koi:

⁸ jè In̄ima Tsjeè-l̄a Nainá, jè nandá, k̄o jè jn̄i. K̄o ngajàn koi, ngásòn tsò.

⁹ Tsà mokjeiín-ná jñá 'én xi tsjá x̄ita isò'nde, mochjeén-né nga is̄a ndaà kokjeiín-ná jè 'én xi jè sobà Nainá t̄itsjá. Nga jè 'én xi t̄itsjá, jè t̄ibénojmi, yá-ne xi Ki'ndí-l̄a Nainá.

¹⁰ Jè xi nguì k̄o in̄ima-l̄a mokjeiín-l̄a it'aà ts'e Ki'ndí-l̄a Nainá, ȳaá t̄jijn in̄ima-l̄a nga kixi kjoá jè 'én xi tsjá Nainá. Tanga jè xi mìkìi mokjeiín-l̄a it'aà ts'e Nainá, jè Nainá, ndiso tíhochrjengui, koií kjoá-l̄a nga mìkìi mokjeiín-l̄a 'én xi tsjá Nainá xi it'aà ts'e Ki'ndí-l̄a.

¹¹ Jè 'én xi kitsjaà Nainá, jè-né nga jè Nainá tsjá-ná kjoabinachon xi mì fehet'aà n̄ita kjé-ne. Kò jè kjoabinachon jè, yaá sakó-ná it'aà ts'e Ki'ndí-là.

¹² Jè x̄ita xi Ki'ndí-là Nainá t̄ijnajìin in̄ima-là, t̄jín-là kjoabinachon xi mìkì fehet'aà n̄ita kjé-ne; t̄anga jè x̄ita xi mìtsà Ki'ndí-là Nainá t̄ijnajìin in̄ima-là, tsjìn-là kjoabinachon.

'Én xi fehet'aà-ne

¹³ J̄nò xi mokjeiín-nò it'aà ts'e Ki'ndí-là Nainá, koií xá t̄ikjì-nò Xojon jè mé-ne nga ndaà k̄atasijìin-nò nga jyeé t̄jín-nò kjoabinachon xi mìkì fehet'aà n̄ita kjé-ne.

¹⁴ K'oaá ma-ne nga 'ñó t̄jín takoán k'e nga nokjoát'aà-lá Nainá. K'oaá s'ín ndaà k̄jì'nchré-ná tsà k'oas'ín s̄ijét'aà-lá koni s'ín sasén-là jè.

¹⁵ Tsà jye k'oas'ín t̄jìin-ná nga Nainá 'nchré-ná k'e nga tsà mé xi n̄jé-laá, t̄ikoáá jyeé 'yaá nga t̄ik'eé-ne nga n̄jé-laá tsjá-ná mé xi n̄jé-laá.

¹⁶ Tsà yá x̄ita xi skoe j̄ngò x̄ita x̄ikjín xi t̄ikoá it'aà ts'e Cristo mokjeiín-là nga ya t̄ikàjìin j̄nà jé xi mìtsà kjoabiyaà f̄ikó-ná, maá kat̄itsi'batjì, kò jè Nainá tsjá-là kjoabinachon jè x̄ita xi t̄ihótsji jé. T̄anga tà j̄nà-né xi koxan-là nga ma s̄itsi'batjì j̄nà x̄ita xi mìtsà nguì kjoabiyaà k̄jit'aà-là j̄nà jé xi nchihótsji. Nga t̄jín jé xi kjoabiyaà f̄ikó-ná, kò k'oaá xan nga mìtsà mochjeén nga s̄itsi'batjì jè x̄ita xi kotjín jé xi t̄ihótsji.

¹⁷ T̄anga ngats'ìi kjoa ch'o xi s'ín x̄ita, nguì jé-né nga nguixkon Nainá. T̄anga t̄jín-né j̄nà jé xi mìtsà kjoabiyaà f̄ikó-ná.

¹⁸ Jyeé t̄jìin-ná nga j̄nà xi ixti-là Nainá ma, mìtsà t̄iya t̄itsajnajìin-ne jé, nga jè Jesús xi Ki'ndí-là Nainá ma, t̄is'ín kinda, kò jè x̄ita neí, mì t̄i kù mé xi ch'o síko-ne.

¹⁹ Jyeé 'ya-ná nga ixti-là Nainá 'mì-ná; t̄anga j̄nà x̄ita xi mìkì mokjeiín-là it'aà ts'e Cristo xi t̄jín nga t̄jtsa isò'nde, jè x̄ita neí t̄ihot̄ixoma-là.

²⁰ T̄ikoáá 'ya-ná nga koií xá j'ìi-ne jè Ki'ndí-là Nainá i it'aà nangui nga jè ndaà kis̄ikichiya-ná mé-ne nga ma yaxkoaán xi nguì jè sobà Nainá. Kò yaá t̄itsajnakoaá jè xi nguì jè sobà Nainá koií kjoa-là nga ya t̄itsajnakoaá Jesu-cristo xi Ki'ndí-là ma, xi t̄ijè sobà-ne Nainá kò xi ma-là tsjá-ná kjoabinachon xi mìkì fehet'aà n̄ita kjé-ne.

²¹ J̄nò xi ndí ixti-nà xan-nò, k̄i j̄nà onguít̄j̄ngui-là j̄nà nainá xi beèxkón x̄ita xi mìtsà kixi kjoa nga Nainá.

Xojon carta xi ma-ne jò xi kiskii San Juan

Kjoa tsjacha ko kjoa kixi

¹ Ji ndí chjoón xi xó jaàjiin-lè Nainá, ko jñà ixti-lè, tikjiin-nò Xojon jè 'an xi xita jchínga 'mì-na ya ingo. Ngui okixi-né nga matsjake-nò; mìtsà ta 'an xi matsjake-nò, tikoáá matsjakeè-nò ngats'ii jñà xita xi jye beè kós'ín tjín xi kjoakixi.

² Koií k'oas'ín matsjake-nò, nga jyeé ndaà tíjiin ya inima-ná jè xi ngui kjoa kixi, ko yaá kíjnajiin kjit'aà skanda nita mé nachrjein-ne.

³ Nainá xi Na'èn 'mì-laà ko Na'èn-ná Jesucristo xi Ki'ndí-la Nainá ma, kàtatsjá-nò kjondaà, kàtahimakeè-nò, 'nchán kàtasíkijna jiin inima-nò, xi ngui ko kjoakixi ko kjotsjacha-la.

⁴ 'Ñó kjòtsja-na k'e nga kijtseè xkoaàn i'nga ixti-lè, nga k'oaá s'ín nchisíjchá yijo-la koni s'ín tjín kjoa kixi ts'e Nainá, koni s'ín jye tsatixoma-ná jè Nainá xi Na'èn 'mì-laà.

⁵ K'oaá s'ín tìbitsi'bà-nò j'ndeí jñò ndí 'ndsè xi 'ñó matsjake-nò, nga mochjeén-né nga 'ñó kòtsjachaá xinguiáá nga jngó íjngoá. Ko mìtsà kjotixoma xitse xi tikjiin-nò, tijé-ne jè kjotixoma xi kitjoé-ná skanda tisa tàts'en-la kjoa.

⁶ K'oaá s'ín tjín xi it'aà ts'e kjotsjacha, jé-né nga k'oas'ín sikitasoán koni s'ín tjín kjotixoma-la Nainá; jyeé kina'ya nga tisa 'ñó kjòtseé kós'ín tíchja kjotixoma nga 'ñó mochjeén nga kòtsjachaá xinguiáá nga jngó íjngoá.

Xita xi konachan

⁷ Nga kíjn ma-ne xita xi tímasòn nga tíjngoò isò'nde xi nchikonachan-la xita, nga tsò: “Mìtsà 'én kixi nga k'oas'ín kits'iin Jesucristo nga xita komà koni jñà.” Jè xita xi kòtsò, ta tikonachan-né ko jè-né xi tíjna ítjòn nga kondra fi-la Cristo.

⁸ Ndaà t'een kinda yijo-nò, mé-ne nga mìkii síchjaà-nò jè kjotjò xi tjoé-nò it'aà ts'e xá xi títsa'nè. Nga mochjeén-né nga kàtatjoé yije-nò jè chí-la xá xi títsa'nè.

⁹ Ngats'ii xita xi otonè-la koni s'ín tjín 'én xi tsakóya jè Cristo nga xìn ndiyá kjoé, mìtsà Nainá tíjnako; tanga jè xi kixi tíjna nga k'oas'ín tís'ín koni s'ín tsakóya Cristo, yaá tíjnako Nainá xi Na'èn 'mì-laà ko jè xi Ki'ndí-la ma.

¹⁰ Tsà k'e jngoò xita kijchòkon-nò xi mejèn-la nga 'én-la Nainá keènojmi-nò tanga tsà mì k'oas'ín okóya koni tsò 'én-la Cristo, kì kii bìi'nde-laà nga ni'ya-nò fahas'en ko kì 'mì-laà: “Tíkjáyi.”

¹¹ Nga jè xi tsjá'nde-la nga síikas'en ni'ya-la, tikoáá yaá tísíngàsòn-ko kjohítsjeèn-la jñà xita xi ta kjoa ndiso nchihokóya.

'Én xi fehet'aà-ne

¹² Tjín jchán-isa mé 'én xi mejèn-na nga koxán-nò, tanga majìn-na nga tà Xojon kit'aà-nò. Jè xi mejèn-na nga kíkion xatí-nò. K'eé isa ndaà jchibá mé-ne nga ngats'iaá ngàsòn ngáya kàtas'e-la kjotsja inima-ná.

¹³ Jñà ixti-la chjoón tichji xi tikoá xó jaàjiin-ne Nainá nchisíkasén-lè 'én nga síhixat'aà-lè. K'oas'ín kàtama.

Xojon carta xi ma-ne jàn xi kiskiì San Juan

Mé kjoa-ne nga ndaà chja Juan it'aà ts'e xita xi 'mì Gayo

¹ Ji ndí 'ndsè xi 'mì-lè Gayo xi 'ñó ndaà chibá kò xi nguì kò inima-na nga matsjake-lè, tìkjì-lè Xojon jè 'an xi xita jchínga 'mì-na ya ingo.

² Ji ndí 'ndsè, 'an, k'oaá s'ín tísíjé-la Nainá, nga ndaà kàtitjo yije nita mé kjoa xi s'iin ji, koni s'ín ndaà tímachikon-t'in inima-lè xi it'aà ts'e Nainá, k'oaá tís'ín ndaà kàtijna jè yijo-lè nga nímé ch'in kàtas'e-la.

³ Taxki 'ñó kjòtsja-na k'e nga j'ìi i'nga jña 'ndsé xi tsibénojmí-na nga k'oaá s'ín tìnjchí yijo-lè koni s'ín tjín kjoa kixi it'aà ts'e Cristo.

⁴ Nì tì mé kjoa tjín-ne xi k'oas'ín 'ñó matsja-la inima-na, ta jè-ne k'e nga 'nchrè nga jña xi ndí ixti-na xan-la nga k'oaá s'ín nchisíjchá yijo-la koni s'ín tjín xi kjoakixi.

⁵ Ngaji ndí 'ndsè xi 'ñó matsjake-lè, 'ñó kixi tìnjchí yijo-lè, k'e nga k'oas'ín ndaà nìs'in-la ya ni'ya-lè jña xita xinguiáa xi bijchókon-lè xi tìkoa 'én-la Nainá mokjeíin-la; kò isaá ta ndaà tjín-isa k'e nga tìkoa ndaà nìs'in-la jña xita xinguiáa xi xìn j'nde f'ii-ne.

⁶ Jña xita xinguiáa k'oaá s'ín tsibénojmí kixi ya nguixkon xita naxandá-la Cristo, nga ngaji 'ñó matsjachi ngats'ìi xita xinguiáa koi. K'oas'ín ndaà tìsiko-ìsi k'e nga kijchòkon-lè; tjìi-la mé xi mochjeén-la k'e nga tìmaya ya iya ndiyá. K'oaá s'ín tìkoi koni s'ín sasén-la Nainá.

⁷ Nga it'aà ts'e Cristo-né nga k'oas'ín jye tsibínè-la yijo-la jña xita xinguiáa koi, nga k'oaá s'ín nchisíxá-la Jesucristo, kò majìn-la nga jña kiskoé tsojmi xi tsjá-la xita xi mìtsà it'aà ts'e Cristo mokjeíin-la.

⁸ Koií mochjeén-ne nga jña oko-ná nga kisihoaá jña xita xinguiáa koi. Tsà k'oas'ín kisihoaá, tsò-ne kjoa nga ngàsòn titsanìka'bisoán jè 'én kixi xi ndaà tsò.

Kjoa ch'o xi s'ín jè xita xi 'mì Diótfes

⁹ 'An jyeé kiskiaà jngò Xojon nga kisihasén-la jña xita naxandá-la Cristo, tanga jè Diótfes mìkì sasén-la koni s'ín kì-mì-lajen, nga jè, koií xi mejèn-la nga ta jè kotixoma.

¹⁰ K'e nga kìjchoa, k'ee koxán kixi-la it'aà ts'e ngats'ìi kjoa ch'o xi tís'ín, nga 'ñó ch'o tsò 'én ndiso xi tìbínè-najen. Kò mìtsà ta ya majngò ikon, tìkoaá mìkì ma-la nga sís'in-la jña xita xinguiáa xi bijchókon ya ni'ya-la. Kò jña 'ndseé xi mejèn-la nga s'ìs'in-la xita xinguiáa, jé bíhjoà ikon-la, kò tìkoaá ochrjekajìn-né ya naxandá-la Cristo jña 'ndsé xi k'oas'ín síkitasòn kjondaà koi.

¹¹ Ji ndí 'ndsè xi 'ñó matsjake-lè, kì jña chjìnguì-la jña kjoa xi ch'o tjín; jì, jña chjìnguì-la jña kjoa xi ndaà tjín. Nga jè xita xi ndaà s'ín, xita ts'e Nainá-né; tanga jè xita xi ch'o s'ín, kj'eè kì beè yá-ne xi Nainá.

Kjondaà xi s'ín jè xita xi 'mì Demetrio

¹² It'aà ts'e Demetrio, ngats'ìi xita k'oaá tsò nga 'ñó ndaà tjín koni s'ín tís'ín, skanda jè xi kjoa kixi, k'oaá s'ín okó nga jè Demetrio, ndaà tjín koni s'ín tís'ín; k'oaá tís'ín bixón-jen nga ndaà tjín koni s'ín tís'ín, kò ndaà 'yi nga 'én kixi-né koni s'ín bixón-jen.

'Én-la Juan xi fehet'aà-ne

¹³ Tjín-isa-na mé 'én xi mejèn-na nga koxán-lè, tanga majìn-na nga tà Xojon s'ìkasén-lè;

¹⁴ jè xi mejèn-na nga kjíkon xátí-lè; k'ée ìsà ndaà jchibanojmiá k'e nga kìjchokon-lè.

¹⁵ K'oas'ín 'nchán kàtìjna kjit'aà inìma-lè. Jñà xítà xi ndaà óko-ná xi i'nde-là tísíhixat'aà-lè. Kot'in-là jñà xítà xi ndaà óko-ná xi ya títsajnakò-lè, Nainá kàtasíchikon-t'in nga jngoò ìjngoò.

Xojon carta xi kiskiì San Judas

¹ 'An, Judas xi chi'nda-la Jesucristo ma, ko 'ndsè ma Jacobo, tikjiì-nò jñò xi xó kinokjoà-nò nga tjòkeè-nò Nainá xi Na'èn-ná ma, ko nga jè Jesucristo síkinda-nò.

² Tse kjohimatakòn ko kjoa'nchán ko kjoatjòcha kàtatsjá-nò Nainá.

Kjo'in xi tjoé-la jñà xita xi jahas'en-jiìn'ma naxandá-la Nainá nga 'én ndiso okóya

(2 Pedro 2:1-17)

³ Ndí 'ndsè xi 'nó matsjake-nò, kjòtseé tjín-ne nga mejèn-na skiì-nò koni s'ín ngásòn kisikò-ná Nainá nga tsachrjekàjiìn-ná kjo'in kjoa ts'e jé-ná. Tanga i'ndeì mochjeén-né nga tikjiì-nò mé-ne nga ma bítsi'ba-nò nga 'nó tixkàtjiò jè kjotixoma koni s'ín mokjeiìn-nò xi xó k'oas'ín jngoò k'a kis'enojmi-la xita tsjeè-la Nainá.

⁴ Tjín i'nga xita xi jahas'en-jiìn'ma-nò. Jñà xita koi, kjòtseé k'oas'ín tjínè-la nga kjo'in s'e-la koni tsò Xojon-la Nainá. Jñà xita koi, ch'oo s'ín; mìkiì beèxkón Nainá. Síkatjìyaá-la kjondaà-la Nainá; koií síkitasòn kjoa ch'o xi síjè yijo-la. Ochrjenguiì Jesucristo xi ta jè tajngoò otixoma-ná.

⁵ Jñò, nas'ín jye tjíìn-nò kjoa koi, tanga ijngoò k'a tsìkìtsjeèn-nò, jè Nainá tsachrjekàjiìn xita naxandá Israel ján Egipto, tanga xi jye komà iskan, ijngoò k'a kisikjehesòn jñà xita xi mìkiì kòkjeiìn-la it'aà ts'e.

⁶ K'oaá tì komàt'in jñà àkjale xi mìkiì ndaà tsibìtsajnajììn xá xi kjòngatsja, ta saá kitsjeiìn takòn i'nde xi kitjoé-la. Tjen-ne nàchrjein jè, skanda i'ndeì, Nainá, na'nó kichà cadena tjít'aà'nó-la nita mé nàchrjein-ne, ya ñánda i'ndeì jñò choòn, skanda jè nàchrjein k'e nga sindaàjiìn.

⁷ K'oaá tìs'ín komàt'in jñà naxandá Sodoma ko Gomorra ko naxandá xi ya chrañàt'aà-la kjijijò nga kjoachijnguiì kis'iìn nga nguì ta kjoach'o ts'e yijo-la kiitjìngui-la. Naxandá koi, ngats'iì xita xi tjín, ni'ín kisikjehesòn. Nainá k'oaá s'ín tsibíjna jngoò-ná chiba ni'ín xi ts'e kjo'in xi mìkiì bits'o nita kjé-ne.

⁸ Jñà xita xi jahas'en-jiìn'ma-nò, k'oaá tìs'ín tà nijná tí'biì-la, nchihótsji jé-la yijo-la, ochrjengui kjotixoma-la Na'èn-ná, chjajno-la jñà nga'nó xi mìkiì tsejèn.

⁹ Jè Miguel xi àkjale ítjòn, mìtsà 'én ngaá kiichjako jè xita neí k'e nga kiskaàn-ya-ne yijo-la Moisés; mìtsà kó kitsò-la mé kjo'in xi tjoé-la; ta kitsò-la: "Nainá kàtatsjá-lè kjo'in."

¹⁰ Tanga jñà xita koi, chja kondraá-la kjoa xi mìkiì tjíìn-la. Ko jñà kjoa xi tjíìn-la, k'oaá s'ín síchjeén koni cho xi tsjìn-la kjohìtsjeèn nga ti yijo ts'e síkìts'ón-ne.

¹¹ iIma xó-ne xita koi, nga jè ndiyá-la Caín kiitjìngui-la! K'oaá tì tjín jé xi tsohótsji koni kis'iìn Balaam ta jè kjoa-la nga ton síkijne. K'oaá s'ín kiyá koni s'ín k'en Coré koi kjoa-la nga kondra kiì-la Nainá.

¹² Jñà xita koi k'e nga ya báhihtako-nò nga s'eí-la Na'èn-ná tjín-nò, síkìts'ón-jiìn-nò, mìkiì masobà-la k'e nga kjèn-ko-nò. Ta yijo-laá sís'in-la. K'oaá ngaya-la koni ifi xi mìtsà jtsí tjiko, xki xi ján fiko tjo; koni yá xi bixòjen xka-la nga mì toò ojà-la ikjoàn tjánè ko ima-la, jngoò k'a biyaà.

¹³ Jñà xita koi, k'oaá ngaya-la koni xó-la ndáchikon nga bíxteèn tjé-la ya indii-la nga okó kjoasobà-la; koni ni'ño xi kisìchja ndiyá-la, ko k'oaá s'ín tjínè-la nga ya kítsajna ñánda i'nde jñò choòn nita mé nàchrjein-ne.

¹⁴ Jè Enoc xi ma-ne itoò tje-la Adán xi ya inchrobàt'aà-ne; k'oaá tjs'ín tsibíjna 'én it'aà ts'e xita koi k'e nga kitsò: “Chítsejèn-là Na'èn-ná nga tínchrobá, kjìn jchán jmiù ma àkjale-la xi tjiko,

¹⁵ nga koìndaàjìn-la ngats'ìi xita mé-ne nga tsjá-la kjo'in ngats'ìi xita xi jé tjín-la koni tjín kjoa ch'o xi kis'ìin, jña xi mikìi beèxkón Nainá nga ch'o tsò 'én xi chjajno-la.”

¹⁶ Jña xita koi, kjit'aà nachrjein nchihojé, chjajno-la ngats'ìi kjoa. Ta koi ótsji kjoa xi mochjeén-la yijo-la. K'e nga chjako xita, ndaà síkítsajna yijo-la, ta 'én sin 'én ndaà chja; ta jè xi mejèn-la nga sùikijne mé xi mejèn-la.

Kjoa kixi xi sinè-la xita

¹⁷ Tanga jño ndí 'ndsè xi matsjake-nò, tikítsjeèn koni s'ín jye kùichjako ítjòn-nò jña xita xi tsibíxaya-la Na'èn-ná Jesucristo,

¹⁸ nga kitsò-nò: “K'e nga jye kjoehet'aà nachrjein, s'eé xita xi tà kijnokeè xi kjoa kixi. K'oaá s'ín kojchájin kjoach'o xi síjé yijo-la nga mikìi beèxkón Nainá.”

¹⁹ Xita koi, xita naxandá-la Nainá síjòya. Kjohtsjeèn-la isò'nde tjín-la nga tsjin-la Inima Tsjeè-la Nainá.

²⁰ Tanga jño ndí 'ndsè xi matsjake-nò, 'ño kixi tinchakoo jè kjoa tsjeè-la Nainá xi mokjeín-nò. Tìtsi'ba-là Nainá nga jè Inima Tsjeè-la kàtasíchiya-nò.

²¹ Tikindaa yijo-nò nga kjit'aà nachrjein kàtas'e-nò kjoatjòcha-la Nainá. Chíña-la kjoa ima takòn-la Na'èn-ná Jesucristo, mé-ne nga tsjá-nò kjoabinachon xi mikìi fehet'aà nita kjé-ne.

²² Jcha ima takòn nga tjsikoò jña xita xi jò beè-la ikon.

²³ Ko jña xita xi i'nga, nitoón tináchrjekàjñoò jña kjoa ch'o xi s'ín nga jyeé kjomeè ya bixòjìn ni'ín ts'e kjo'in. Jcha ima takòn i'nga tanga t'een kinda yijo-nò tsà tikoā ya skajñoò jé-la. Tináchrjekànguioò kjoa ts'e jé-la. Skanda jña nikje tjé-la tináchrjenguioò.

Jeya kàtìjna Nainá

²⁴ Jè Nainá xi ma-la síkinda-nò mé-ne nga mikìi kixonguioò. Tsjeè síkítsajna-nò ya nguixkon kjoa jeya-la nga nimé jé sakò-nò ko 'ño s'e-nò kjotsja.

²⁵ Jè Nainá xi ta jè tajngoò ma-ne nga ochrjekàjìn-ná kjo'in xi it'aà ts'e Na'èn-ná Jesucristo, ta jè tajngoò xi jeya kàtìjna, 'nga kàtìjna; kàtas'e-la kjotíxoma; kàtas'e-la nga'ño; skanda kjotseé, ko nachrjein i'nde, ko skanda nita kjé-ne. K'oaas'ín kàtama.

Xojon-la San Juan kjoa xi tsakó-la Jesucristo

Kjoa xi kijtseè kò 'én xi kii'nchré San Juan

¹ Jñà kjoa koi xi kitjoé-la Jesucristo nga Nainá kitsjaà-la mé-ne nga kokò-la xita chi'nda-la jñà kjoa xi ta nitoón okoma. Jesucristo kisikasén àkjale-la nga tsakó-la kjoa koi Juan xi chi'nda-la ma.

² Kò jè Juan tíchja kixi-né [k'e nga kiskiì] ngats'ìi kjoa xi kijtseè kò xi kii'nchré koni s'ín nga jè Jesucristo kiìchja kixi-la jñà 'én xi kitsjaà-la Nainá.

³ Mé tà ndaà-la jè xita xi bíxkejiin xojon koa jñà xi 'nchré 'én-la Nainá xi tjit'aà xojon jè, jñà kjoa xi sa kítasòn; tikoáá mé ta ndaà-la jè xita xi síkitasòn koni tsò xojon jè, nga jè nachrjein, jyeé nchrobá machraña.

Kó tsò Juan nga síhixat'aà nga itoò naxandá-la Cristo xi títsajna ján i'nde Asia

⁴ An xi 'mì-na Juan, tsihixat'aà-nò, jñò xi naxandá-la Cristo maà xi itoò i'nde títsajnaà ján nangui Asia. Jè kàtatsjá-nò kjondaà kò kjoa'nchán jè Nainá xi tíjna, jè xi tsibijna kò jè xi kjoíi ìjngoò k'a-ne; k'oa tìs'ín kàtatsjá-nò kjondaà kò kjoa'nchán jñà inima xi itoò ma-ne xi títsajna nguixkon jè xi tíjnasòn íxile nga tíhotíxoma;

⁵ kò jè Jesucristo k'oa tìs'ín kàtatsjá-nò kjondaà kò kjoa'nchán. Jè Cristo, jè xi nguì 'én kixi tsjá, xi ki'ndí tjòn xi jaáya-la it'aà ts'e kjoa biyaà kò jè xi otíxoma-la jñà xita sko-la xi tjin i it'aà nangui. Cristo matsjakeè-ná nga kisitsjeè jé-ná it'aà ts'e jni-la xi tsibíxteèn.

⁶ Cristo k'oaá s'ín kisikítsajna-ná nga xita ítjòn komaá kò no'miì komaá nga jñà sixá-lá Nainá xi Na'èn-la ma Jesucristo. Jeya kàtìjna; jè kàtatíxoma kjit'aà, nita mé nachrjein-ne, nita mé nó-ne. K'oaá s'ín kàtama.

⁷ ¡Chítsejèn-là! Jè Cristo jyeé kjomeé f'ìi nga tìnchrobájiin ifi. Ngats'ìi xita, xkoón skoe-ne. Jñà xita xi kisik'en Cristo tikoáá skoe-ne. Ngats'ìi xita naxandá xi tjin i it'aà nangui skindáyakeè-né nga 'on koma-la it'aà ts'e. Jon, k'oaá s'ín koma.

⁸ “An-ná xi tíjna ítjoàn skanda tàts'en-la kjoa kò nga skanda fehet'aà-ne; 'an-ná xi tíjnaa, xi tsibijnaa, kò xi kjoii ìjngoò k'a; tajngoó-ná xi tse nga'ño tjin-na”, tsò Na'èn-ná xi Nainá.

Kjoa xi tsakó-la Nainá Juan it'aà ts'e Cristo

⁹ An-ná xi mì-na Juan, xi 'ndsè xan-nò it'aà ts'e Cristo. Nga yaá títsajna kjoaá Cristo ngásòn títsajna kjoa'ín, kò ngásòn ya nokjoà-ná ñánda tíhotíxoma Nainá kò ngásòn tíchikjoa kjoa-ná ngats'ìi kjoa. 'An nga 'én-la Nainá tíchjaya kò tibenojmí kixi-la xita it'aà ts'e Cristo, k'oaá komà-ne ján kinikasén-na ya nangui jiin-nda ñánda 'mì Patmos.

¹⁰ Jngoò nachrjein-la Nainá, 'an, nga ya tíjna kjoa Inima Tsjeè-la, ya ijton índsiàn ki'nchré jngoò-la 'én xi 'ño kiìchja koni jngoò chrjo xi 'ño jane,

¹¹ kitsò-na:

—'An-ná xi tíjna ítjoàn kò xi fehet'aà-ne. Chjoí jngoò xojon, tí'eii kjoa xi t'yi; ikjoàn tíkasén-la naxandá-na xi itoò i'nde títsajna ján nangui Asia, jñà naxandá xi 'mì Éfeso, Esmirna, Pérgamo, Tiatira, Sardis, Filadelfia kò Laodicea.

¹² K'eé kisikátjifaya nga mejèn-na skoeè yá xita xi tíchja-na; kijtseè itoò candelero xi nguì kichá oro xi ma tíya asiti.

¹³ Ya jngoò osen-la ñánda jncha candelero xi itoò ma-ne síjnajìn xi okji koni kji ki'ndí-la xita. Jngoò nikje kinakjá xi ndojò kji. Bijchó skanda itjòn ndsokò. Tíkjá jngoò na'ño payo ya isòn inima-la xi nguì oro.

¹⁴ Tsja sko, k'oaá kjoàn koni kjoàn tsja chroba-la orrè, koni kjoàn 'nchán kjoàn. Xkon, k'oaá s'ín tsejèn koni tsà títì ni'ín.

¹⁵ Ndsokò k'oaá kjoàn koni kicha sinè xi 'ño ndaà ote k'e nga jye sjiìn ni'ín. Jè jta-la, k'oaá s'ín na'yà-la koni ñánda 'ño je nandá tibixòjen-tjòn.

¹⁶ Jè tsja kixi, itoò ni'ño tjíya. Jè tso'ba jngoò kicha ndojò bitjo xi 'ño yijò kji ingajò ngobà. Isén-la k'oaá kji koni kji ts'oi k'e nga 'ño matsjè ndobá, 'ño ote kji.

¹⁷ K'e nga kijtseè, kiskaànguia ingui ndsokò koni jngoò mik'en. Ikjoàn jè tsakájnason-na tsja kixi, kitsò-na:

—Kì tsakjoòn-jèn, 'an-ná xi tijná ítjoàn kò xi fehet'aà-ne,

¹⁸ kò tijnakon-ná. Tsakátijna k'en-ná tanga i'ndeí tijnakon-ná nita mé nachrjein, nita mé nó-ne. 'An tjíya ndsaa ibi ts'e kjoabiyaà ya i'nde-la mik'en. [Tj'indeé-na nga skix'aa kò kichjoà nga sùkjaáya-la.]

¹⁹ Chjí jña kjoa xi jye kà'yi kò kjoa xi tíma nachrjein i'ndeí kò kjoa xi koma nga koma iskan.

²⁰ Kíí tsò-ne jè kjoa'ma xi kà'yi ts'e ni'ño xi itoò ma-ne xi tjíya ndsaa kixi kò xi itoò candelero xi nguì kicha oro. Jña ni'ño xi itoò ma, jña àkjale-la naxandá-na xi itoò i'nde títsajna; kò jña candelero xi itoò ma-ne, jña-né xi naxandá-na xi itoò i'nde títsajna.

2

Kjoa xi kisinè-la naxandá-la Cristo ján Éfeso

¹ 'Chjí jngoò-la xojon jè àkjale-la naxandá-na xi tíjna ján Éfeso: “Kíí tsò jè xi itoò ni'ño tjíya tsja kixi, jè xi tsóhojìn osen-la jña candelero xi itoò ma-ne xi nguì kicha oro, tsò-né:

² Tibe-ná xá-nò, 'ño titsanixá kò nga mìkìi bijta-nò. Tíkooá tibe-ná nga mì tì kii chikjoako-nò jña xita xi ch'o s'ín. Tíkooá tibe-ná nga jyeé kichit'aà jña xita xi tsò-la yijo-la nga Cristo tsibixáya-la, tanga mìtsà kixi kjoa. Jyeé ki'yaà nga xita ndiso-né.

³ Kjit'aà nachrjein 'ño tse kjo'in titsanikjioón, kò 'ño titsanixá xi kjoa ts'an. Mìkìi bijta-nò.

⁴ Tanga tjín jngoò-nò kjoa xi ch'o tjín xi mìkìi sasén-na nga mì tì k'oaá s'ín tjín-nò kjotjòcha koni nga sa ítjòn.

⁵ Jño, tikítsjeèn kó ki'nè nga sa ítjòn k'e nga kj'eè jé bixòjñoò. Tíkájno jé-nò. Jngoò k'a Nainá tanguít'aà-là. K'oaá s'ín t'een koni ki'nè nga sa ítjòn. Tsà majìn-nò, 'an kjián nga tsjaà-nò kjo'in kò kjoaáxìn-nò ni'ín candelero-nò ya i'nde ñánda síjna.

⁶ Tanga tjín kjoa xi ndaà titsa'nè nga majticha kjoa xi s'ín jña xita nicolaítas. 'An, tíkooá majtike-ná.

⁷ Ndaà tiná'yaà koni tsò Inima Tsjeè-la Nainá nga tíchja-la naxandá-na. Jña xi síkijne, 'aán tsjaà-la nga skine jña toò-la jè yá xi síkijnakon-ná xi síjna ya i'nde-la Nainá ñánda 'ño ndaà choòn.”

Kjoa xi kisinè-la naxandá-la Cristo ján Esmirna

⁸ 'Chjí jngoò-la xojon jè àkjale-la naxandá-na xi tíjna ján Esmirna: “Kíí tsò jè xi tsibijna ítjòn kò xi fehet'aà-ne, jè xi k'en kò jaáya-la, tsò-né:

⁹ 'An be-ná xá-nò kò kjo'in xi titsanikjioón kò nga xita ima 'mì-nò (tanga it'aà ts'e Nainá, xita nchiná-nó jño). Be-ná nga ch'oo chjajno-nò jña xita xi tsò nga

xita judío-né tanga mìtsà kixi kjoa nga xita judío. Jñà xita koi, yaá chja-ne ya ni'ya ñánda maxkóya xita-la xita neí.

¹⁰ Kì tsakjoòn-jèn jè kjo'in xi sikjioón, jè xita neí skinìs'en-nò ndayá mé-ne nga skót'aà-nò kjoa xi mokjeiín-nò; te nàchrjein s'e-nò kjo'in. 'Ñó t'è-là takòn kóni skanda k'e nga kiyá. Kò 'aán tsjaà-nò jè kjoabinachon xi mìkiì fehet'aà koni jngò corona.

¹¹ Ndaà tiná'yaà koni tsò Inima Tsjeè-la Nainá nga tíchja-la naxandá-na. Jñà xi sikkijne, ñimé kjoa xi komat'in it'aà ts'e kjoabiyaà xi ma-ne jò k'a."

Kjoa xi kisinè-la naxandá-la Cristo ján Pérgamo

¹² 'Chjí jngò-la xojon jè àkjale-la naxandá-na xi tíjna ján Pérgamo: "Kíí tsò jè xi tjín-la kichá ndojò xi yijò kji nga ingajò ngobà, tsò-né:

¹³ 'An tibe-ná xá-nò, tibe-ná nga yaá titsajnaà ñánda tíhotíxoma xita neí. Tanga be-ná nga kixi titsajnaà; mìkiì ñìchàajioòn it'aà ts'an. Tikoá be-ná nga mìkiì bì'ma koni s'ín mokjeiín-nò it'aà ts'an, nas'ín k'e nga k'en Antipas, xita xi kixi bénojmi xi it'aà ts'an; nga yaá k'en ijìin naxandá-nò ya ñánda síxá xita neí.

¹⁴ Tanga tjín i'nga kjoa xi mìkiì sasén-na nga ch'o titsa'nè, nga yaá titsajnajìin-nò xita xi mokjeiín-la koni s'ín tsakóya Balaam kjòtseé nga chinchá'a Balac nga mejèn-la kohótsji jé jñà xita Israel nga kàtakine tsojmì xi xkósòn kisinchaat'aà-la; tikoá kàtas'ín kjoachijngui.

¹⁵ Tikoáá titsajnajìin i'nga-nò xita xi mokjeiín-la koni s'ín okóya jñá xita nicolaítas. Jñà xita koi, 'an majtike-ná.

¹⁶ K'oaá ma-ne tikájno jé-nò, kì tì jé binchaatsji-nò. Tsà mì k'oa s'een, ñitòon kjián nga skaàn-koa xita koi. Jè sikjeén kichá ndojò xi bitjo-ne ndsoba.

¹⁷ Ndaà tiná'yaà koni tsò Inima Tsjeè-la Nainá nga tíchja-la naxandá-na. Jñà xi sikkijne, 'aán tsjaà-la tsojmì xi skine xi 'mì maná xi 'an tíj'ma-na; tikoá tsjaà jngò-la ndí ndajo jtobá xi chroba kji; yaá tíj'aà 'ín xitse xi mì yá beèxkon; tà jè skoèxkon xi tjoé-la."

Kjoa xi kisinè-la naxandá-la Cristo ján Tiatira

¹⁸ 'Chjí jngò-la xojon jè àkjale-la naxandá-na xi tíjna ján Tiatira: "Kíí tsò jè Kì'ndí-la Nainá xi kòkjoàn xkon koni ni'ín, kò jñà ndsokò, k'oaá kjoàn koni kichá sinè xi 'mì bronze xi 'ñó ndaà kjòchrja'i:

¹⁹ 'An, be-ná xá-nò kò kjoatjòcha-nò, kò kós'ín nga mokjeiín-nò koá kós'ín titsanixá nga tíchikjoako-nò xá xi titsa'nè. Be-ná nga jè nàchrjein i'ndeí isaá ndaà titsanixá mì k'oa-ne koni nga sa ítjòn.

²⁰ Tanga tjín i'nga kjoa xi mìkiì sasén-na nga ch'o titsa'nè, nga bìl'nde-là jè chjoón Jezabel xi tsò-la yijo-la nga ma-la bénojmiya mé kjoa xi iskan koma nga konachan kò okóya-la xita chì'nda-na mé-ne nga kjoachijngui kàtas'ín-ne tikoá kàtakine tsojmì xi xkósòn sinchát'aà-la.

²¹ 'Aán titsja isa-la nàchrjein nga kàtasíkájno jé-la nga mì tì jé kohótsji-ne, tanga majìn-la tsjeiín takòn kjoachijngui xi s'ín.

²² Tanga 'aán tsja-la ch'in nga 'ñó tse kjo'in sikkjeiín kò jñà xita xi ngásòn s'ín kjoachijngui, tsà majìn-la nga sikkájno jé-la nga mì tì jé kohótsji-ne.

²³ Jñà xita xi ya fit'aà-la, jngò k'aá sik'en. Kò ngats'ì xita naxandá-la Cristo skoe-né nga 'an-ná xi be kó tsò kjohítsjeèn-la kò inima-la jñà xita. Jñò, nga jngò l'ngò, k'oaá s'ín tsja-nò kjo'in koni tjín kjoa xi titsa'nè.

²⁴ Tanga jñò kò xita xi i'nga xi titsajna Tiatira xi mìkiì kota'ya kjohítsjeèn xi mìkiì ndaà tjín, tikoá kj'eè kii beè jè xi tsò-la jñà xita koi kjoatjí'ma-la xita neí. Jñò, k'oaá xan-nò mìtsà tì mé kjoa sikkje-isa-nò.

²⁵ Tanga jñò, koni s'ín tjín jè kjohítsjeèn ndaà xi títsa'nè, k'oaá s'ín t'een skanda k'e nga 'an kjoiaa ìjngoò k'a.

²⁶ Jñà xi sìikijne-la kjoa ts'e jé tikoá sìikitasòn xá-na koni s'ín mejèn-na skanda k'e nga kjoehet'aà nachrjein, 'aán tsjaà-la xá nga jñà kotìxoma-la ngats'iì naxandá xi tjín isò'nde.

²⁷ Jñà xitá xi kotìxoma, nguì koó kichá kotìxoma-ne. K'oaá s'ín sìixkoaya koni tiji ni'nde.

²⁸ Jè kjotìxoma jè, tije-ne xi kitsjaà-na Na'èn-na. 'An tikoá tsjaà-la jè ni'ño tse xi bitjokàtji k'e nga tajñòya.

²⁹ Ndaà tiná'yaà koni tsò Inima Tsjeè-la Nainá nga tíchja-la naxandá-na.”

3

Kjoa xi kisinè-la naxandá-la Cristo ján Sardis

¹ 'Chí jngoò-la xojon jè àkjale-la naxandá-na xi tjína ján Sardis: “Kíí tsò jè xi itoò inima-la Nainá tjín-la, kò itoò ma ni'ño-la: 'An be-ná kjoa xi títsa'nè; k'oaá s'ín 'ya-nò nga títsajnakon-nó tanga xi nguì kixi kjoa, títsajnak'en-nó.

² Tikjaáya-là yijo-nò, tji-là nga'ño kjoa xi jye mejèn tíchija. 'An, kj'eè kù be tsà ndaà títsa'nè nga nguixkon Nainá.

³ Tikítsjeèn kjohítsjeèn xi kitjoé-nò kò xi jye ndaà kina'yà; k'oas'ín tikitasòn. Tikájno jé-nò, kì tì jé binchaàtsji-nò. Tsà mìkì sìkindaa yijo-nò k'oaá s'ín kjoikjaá-nò koni s'ín xitá chijé k'e nga mìkì títsajnandaà mé hora-ne nga kjoí.

⁴ Tanga tjín chiba-nò xitá ya Sardis xi kj'eè mé jé ótsji, yaá taña kìnchimako-na nga chroba kjoàn nikje xi kókjá nga k'oaá s'ín ok'in-la.

⁵ Jñà xitá xi sìikijne-la kjoa ts'e jé, nikje chrobaá kjoàn xi kókjá; mìkì sìjchàaya 'ín-la ya it'aà xojon ts'e kjoabinachon. Kò k'oaá xán nga nguixkon Nainá xi Na'èn-na ma kò nguixkon àkjale-la nga xitá ts'an-ná.

⁶ Ndaà tiná'yaà koni tsò Inima Tsjeè-la Nainá nga tíchja-la naxandá-na.”

Kjoa xi kisinè-la naxandá-la Cristo ján Filadelfia

⁷ 'Chí jngoò-la xojon jè àkjale-la naxandá-na xi tjína ján Filadelfia: “K'oaá tsò jè xi nguì xitá tsjeè kò xi nguì jè sobà xi xitá kixi, jè xi tjín-la ibi-la xitaxá ítjòn xi k'i'mì David, jè xi ma-la kix'a xòhotjoa-la ngajmì kò nijngoò-isa xi tji'nde-la nga kichjoàjto; kò k'e nga jè kichjoàjto, nijngoò-isa xi tji'nde-la nga skix'ajto:

⁸ 'An be yije-ná xá-nò; chítsejèn-là, kisikijna osen jngoò-nò xotjoa xi tix'á, xi nijngoò tji'nde-la nga kichjoàjto. Nga nas'ín tà chiba nga'ño tjín-nò tanga títanikitasòn-nó koni tsò 'én-na; mìkì bitsajna'ma it'aà ts'an.

⁹ Tjín jngoò jtín xitá xi ya chja-ne ya ni'ya ñánda maxkóya xitá-la xitá nejí; xitá ndiso-né nga tsò nga xitá judío, tanga mìtsà kixi kjoa. Xitá koi, 'aán kichjà-la nga kàtjanchrobá mé-ne nga kìncha-xkó'nchit'aà-nò; k'oaá s'ín skoe-ne nga 'an, 'ño matsjake-nò.

¹⁰ Koi kjoa-la nga títanikitasòn koni tsò 'én xi kitsjaà-nò nga kichikjoako kjit'aà-nò nitá mé kjoa-ne, k'oaá ma-ne, 'aán kósiko-nò jè nachrjein xi jye nchrobá machraña nga s'e-la kjo'in nga títsa isò'nde k'e nga chít'aà yije xitá xi títajna it'aà nanguì.

¹¹ Kjoii nitoón ìjngoò k'a. Ndaà tikindaa ngats'iì kjondaà xi tjín-nò koni s'ín mokjeiín-nò mé-ne nga mì yá xi kjoaá'an-nò xi jñò jye kinikijne.

¹² Jñà xi sìikijne-la ngats'iì kjoa ch'o xi tjín isò'nde, 'aán tsja jngoò-la i'nde ñánda kítajna nga kjit'aà nachrjein k'oaá ngaya-la koni jngoò chrjó xi kosingui'ño-la ya ni'ya tsjeè-la Nainá nga skijnoa 'ín-la xi Nainá xan-la kò

'ín-là naxandá-là Nainá, xi Jerusalén xitse 'mì xi kjinchrobà-ne ngajmii ñánda tíjna Nainá, tikoá skijnoa 'ín xitse xi ts'an.

¹³ Ndaà tina'yaà koni tsò Inima Tsjeè-là Nainá nga tíchja-là naxandá-na.”

Kjoa xi kisinè-là naxandá-là Cristo ján Laodicea

¹⁴ 'Chjí jngoò-là xojon jè àkjale-là naxandá-na xi tíjna ján Laodicea: “Kíí tsò jè xi síjngoò yije 'én-là Nainá, jè xi nguì 'én kixi tsjá, jè xi nguì jè sobà kjoakixi, jè xi tsibíts'ia ngats'ii xi tsibíndaà Nainá. K'oaá tsò:

¹⁵ 'An, be-ná mé kjoa xi títsa'nè; mìtsà 'nchán títsajnaà nì mìtsà tsjè títsajnaà nga mìtsà kondra títsajnao-ná ko mìtsà ndaà onguít'aà-ná. Ndaà-là tjin tsà nguì ndaà onguít'aà-ná ko tsà majin tsà nguì kondra títsajnao-ná.

¹⁶ Tanga jñò, nga isò-nò, mìtsà 'nchán títsajnaà nì mìtsà tsjè títsajnaà, k'oaá ma-ne nga ndsoba skihisò-na.

¹⁷ Jñò k'oaá bixón: Xita nchiná-nájen; ndaà títsajna-jen; nímé chijat'aà-nájen. Tanga mìkii 'ya nga 'iin títsajnaà; nímé xi tjin-nò; xita ima-nó; mìkii tsejèn-nò; laká títsjoè.

¹⁸ 'An, k'oaá xan-nò, 'aán tindát'aà-ná ton oro xi ni'ín kjòtsjeè-ne mé-ne nga xita nchiná koma-nò. Tikoá 'aán tindát'aà-ná nikje tsjeè xi chroba kjoàn mé-ne nga mì kosobà-nò nga títsajna laká yijo-nò. Tikoá tinguioè xkii colirio jña xkoòn mé-ne nga ndaà kotsejèn-nò.

¹⁹ Ngats'ii xita xi 'an matsjake, otiko-ná tikoá tsjaà-là kjo'in. Mochjeén-né nga tji-là nga'ño yijo-nò; tikájno jé-nò, kì tì jé binchaàtsji-nò.

²⁰ 'An, yaá tijnajtoa xotjoa ni'ya nga tíchja; tsà tjin i'nga xi kji'nchré-na, koá tsà skíx'a xotjoa ni'ya-là, komaá kjoahas'en nga kókjen-koa, tikoá jè, kókjen-ko-na.

²¹ Jña xi sijikijne tsjaà'nde-là nga ya kítsajnat'aà-na ñánda tíjna íxile ts'e kjotíxoma-na koni s'ín 'an jye kisikijne nga yaá tijnat'aà-là Na'èn-na ñánda tíjna íxile ts'e kjotíxoma-la.

²² Ndaà tina'yaà koni tsò Inima Tsjeè-là Nainá nga tíchja-là naxandá-na.”

4

Kós'ín yaxkón Nainá ján ngajmii

¹ Xi jye komà iskan, kiskoòtsejèn ján i'ngaá; kijtseè ngajmii nga tix'á jngoò xotjoa ko jè jta xi ki'nchrè ítjòn-là xi koá tsò koni chrjo trompeta, kitsò-na:

—Nchrobá mijin ijndé; kokoè-lè kjoa xi koma k'e nga jye komà yije kjoa xi tíma i'ndeí.

² Tà nitoón j'ii kanè ijngoò k'a-na jè nga'ño-là Inima Tsjeè-là Nainá; kijtseè jngoàà íxile xi tíjna ngajmii ñánda tísatíxoma. Jé íxile jè, tíjna jngoò xi ya tíjnasòn.

³ Jè xi tíjnasòn íxile nga tíhotíxoma, k'oaá kji ote tsejèn koni kji ndajo chjí xi 'mì jaspe, o koni kji ndajo chjí xi 'mì cornalina. Ya indi-là íxile síjrandii jngoò-là ijñe xi okji ote tsejèn koni kji ndajo chjí xi 'mì esmeralda.

⁴ Tijaá-ne nga jngoò itjandi-là ñánda tíjna xi tíjnasòn íxile nga tíhotíxoma, kaàn ñijòn íxile 'ncha isa ñánda tísatíxoma, tikoá kaàn ñijòn xita jchínga títsajnasòn xi nguì chroba kjoàn nikje xi kikjá; saà corona kichá oro tí'a skò.

⁵ Ya ñánda tíjna xi tíjnasòn íxile nga tíhotíxoma, bitjo ni'ín ch'on, ko ts'ii ch'on, tikoá na'yà-là jta xi chja; itoò ni'ín xi síhiseèn títi ya nguixkon íxile; jña ni'ín, jña inima tsjeè-là Nainá xi itoò ma-ne.

⁶ Ya nguixkon jè xi tíjnasòn íxile nga tíhotíxoma, kijjna jngoò ndáchikon xi koni kji chítsín kji xi 'ño ote.

Ya it'aà íxile ko ya indi-là, ñijòn ma xi títsajnakon; kóhokji ijton íts'in ko ya indso'ba, xkí xi ján tjit'aà xkon.

⁷ Jè xi tǐjna ítjòn jǎà xi títsajnakon, k'oaá kji koni kjoàn xa. Xi ma-ne jò, koni kji nchraja ki'ndí kji. Xi ma-ne jàn, isén-la xitaá tǐjn-la. Xi ma-ne ñijòn, k'oaá kji koni kji ja xi tsó'bjáiln isén.

⁸ Jǎà xi ñijòn ma-ne xi títsajnakon nga jngoò ìjngoò, joòn jngaá tǐjn-la. Ñó kjín ma-ne xkon xi tǐjn nga jngoò itjandiì-la kò iya-la. Mikiì síkjáya kò nachrjein kò ñitjen nga tsò:

Tsjeè-né, tsjeè-né, tsjeè-né jè Na'èn-ná xi Nainá,
xi ta jè tajngoó xi 'ñó tse nga'ñó tǐjn-la,
jè xi tsibìjna, jè xi tǐjna kò jè xi kjoíí ìjngoò k'a-ne.

⁹ Jǎà xi títsajnakon nchitsjá-la kjoajeya, nchitsjá-la kjondaà, kò nchibeèxkón jè xi tǐjnasòn íxile jè xi tǐjnakon ñita kjé-ne. K'e k'oa nchis'ín,

¹⁰ jǎà xita jchínga xi kaàn ñijòn ma-ne bincha-xkó'nchi-ñiat'aà-la jè xi tǐjnasòn íxile tǐkoá beèxkón-né jè xi tǐjnakon ñita mé nachrjein-ne. Síkatsoò corona-la ya nguixkon jè xi tǐjnasòn íxile nga tsò:

¹¹ Na'èn, ok'ín-lè nga jì tjoé-lè kjoajeya, nga jchaxkón-lè,
nga tsiji yije-né nga'ñó xi tǐjn,
nga jì tsibìndiì ngats'ì tsojmì xi tǐjn,
nga k'oaá s'ín kjòmejèn-lè nga tǐjn yije tsojmì
kò nga kisindaà kóhotjǐn xi tǐjn.

5

Xojon xi maxkóya kò jè Orrè

¹ 'An, kǐtseè jè xi tǐjnasòn íxile nga tíhotíxoma, kjinaya tsja kixi jngoò xojon xi kǐjxkóya xi kitjeijno iya-la kò ngatsejèn-la kò itoò k'a tǐ'ñó ñánda jncha-la sello nga jngoò ìjngoò k'a.

² Kǐtseè jngoàà àkjale xi tse nga'ñó tǐjn-la, xi 'ñó kùichja nga kitsò:

—Yá xi ok'ín-la nga skíx'a jè xojon koá komà-la kjoaáxin jǎà sello xi jncha-la.

³ Tanga ñiyá kisakò xi komà-la nga kiskíx'a jè xojon, ñi mikiì ma kotsejèn-la nga kot'aà kó tsò 'én xi tǐt'aà; ñijngoò kisakò ján ngajmì, ñijngoò kisakò it'aà nangui, koá ñijngoò kisakò ñingui nangui.

⁴ 'An, 'ñó kiskindàya nga kò ndáxkoaàn k'e nga kǐtseè nga ñijngoò kjòtsji xi ok'ín-la nga kiskíx'a jè xojon nga ma kot'aà kó tsò 'én xi tǐt'aà.

⁵ Jǎà xita jchínga xi kaàn ñijòn ma-ne, jngoò xi kitsò-na:

—Kì chihindáya-jèn. Tǐjna xi 'mì: Xa-la xita naxandá Judá, xi tǐkoá 'mì: Tje-la xitaxá ítjòn David, nga jè xi jye kisikijne-la kondra-la. Jè xi ok'ín-la nga skíjndaya jè xojon koá koma kjoaáxin sello-la xi itoò ma-ne.

⁶ K'eé kǐtseè jngoò Orrè nga síjna ya jngoò osen-la ñánda tǐjna xi tǐjnasòn íxile nga tíhotíxoma, kò ñánda títsajna jǎà xi ñijòn ma-ne xi títsajnakon, kò ñánda títsajna xita jchínga xi kaàn ñijòn ma-ne. Jè Orrè, k'oaá kji koni tsà jye k'en; itoò ma nchrajá-la tǐkoá itoò ma xkon; jǎà xkon, jǎà inima-la Nainá xi itoò ma-ne xi kinikasén nga tǐtsa isò'nde.

⁷ Jè Orrè, kiskoé jè xojon xi kjinaya tsja kixi jè xi tǐjnasòn íxile nga tíhotíxoma.

⁸ Jè Orrè, k'e nga jye kiskoé xojon jè, jǎà xi ñijòn ma-ne xi títsajnakon kò jǎà xita jchínga xi kaàn ñijòn ma-ne chincha-xkó'nchi-ñiat'aà-la nga nguixkon Orrè. Ngats'ì saà ní'ñó arpaá 'ya kò chitsín xi nguì oro xi tǐjya chrjongó-la nainá. Jè chrjongó-la nainá jǎà xi kjoá bítsi'ba-la jǎà xita-la Nainá.

⁹ Kiseè jngoò sò xitse xi tsò:

Ok'ín-lè nga ngaji chjoí jè xojon, chjaáxin sello-la
nga jì kinik'en-lè, nga kò jní-lè tsibíchjítjì xita
xi ya itjokàjiln-ne ngats'ì tje-la xita xi tǐjn isò'nde,
ngats'ì 'én xi tǐjn isò'nde,

ngats'ìi naxandá xi tjín,
 kò ngats'ìi nangui xi tjín isò'nde
 mé-ne nga ya kichja-ne it'aà ts'e Nainá.

¹⁰ Kò xitaxá itjòn ki'nì kò no'miì ki'nì
 nga ma siikitasòn-la Nainá,
 koa jña kotixoma i it'aà nangui.

¹¹ K'e nga kiskoòtsejèn, ki'nchrè jta-la jña àkjale xi kjiìn jchán millón ma-ne
 xi nchiseè ya indii-la ñánda tjina xi tjinasòn íxile nga tíhotixoma kò ya ñánda
 títsajna jña xi títsajnakon kò jña xita jchinga.

¹² 'Nó jchán nchichja nga tsò:
 Jè Orrè xi kinik'en, ok'ín-la nga jchaxkón
 nga ts'e yije-né nga'ño xi tjín,
 kò kjoa nchiná kò kjoa chjine,
 kò jè tsjá nga'ño,
 ndaà kátayaxkón,
 jeya kàtìjna kò 'nga kàtìjna.

¹³ Ngats'ìi xi xó kisindaà-ne xi tjín ngajmiì, xi tjín i it'aà nangui kò ya ingui
 nangui, kò xi tjín jjiìn ndáchikon, ki'nchrè-la nga tsò:
 Jè xi tjinasòn íxile kò Orrè, 'nga kàtìtsajna;
 kátayaxkón, jeya kàtìtsajna,
 kàtas'e-la nga'ño nita mé nachrjein-ne.

¹⁴ Jña xi ñijòn ma-ne xi títsajnakon, kitsò:
 —iK'oas'ín kátama!

Jña xita jchinga xi kaàn ñijòn ma-ne chincha-xkó'nchi-ñiat'aà-la nga jeya
 kisikijna jè xi tjijnakon nita mé nachrjein-ne.

6

Sello xi itoò ma-ne

¹ K'ée kijtseè jè Orrè nga jaàxìn itjòn jngoò sello. Ikjoàn ki'nchrè jngoò-la jña
 xi ñijòn ma-ne xi títsajnakon nga kiichja. K'oaá kitsò koni ma ch'on nga one,
 kitsò:

—Nchroboí.

² Kiskoòtsejèn, k'ée kijtseè jngoò kohòyo xi chroba kji; jè xi tjínakjá-la kohòyo,
 kjinaya tsja jngoò arco xi mochjeén k'e nga tjín kjojchán; ikjoàn kitjoé jngoò-la
 corona xi si'a skò xita k'e nga síkijne; kiì nga jye kisikijne mé-ne nga siikijne
 isa-ne.

³ Jè Orrè, k'e nga jaàxìn sello xi ma-ne jò, ki'nchrè-la jè xi ma-ne jò xi
 títsajnakon nga kitsò:

—iNchroboí!

⁴ Kò ñjngoò kohòyo itjo xi inì kji; jè xi tjínakjá-la, kitjoé jngoò-la kichja ndojò
 xi 'ño je kji, tikoá kitjoé-la nga'ño nga kàtjaàxìn kjoa'nchán xi tjín it'aà nangui
 mé-ne nga kàtasík'en-ne xikjín jña xita.

⁵ Jè Orrè, k'e nga jaàxìn sello xi ma-ne jàn, ki'nchrè-la jè xi ma-ne jàn xi
 títsajnakon nga kitsò:

—iNchroboí!

K'e nga kiskoòtsejèn, kijtseè ñjngoò kohòyo xi jmà kji; jè xi tjínakjá-la kohòyo,
 jngoò libra tjíya tsja jè xi machibaya-ne tsojmi.

⁶ Ki'nchrè jngoò-la jta ya jngoò osen-la jña xi ñijòn ma-ne xi títsajnakon nga
 kitsò:

—Nga jngoò nisoò trigo, jngoò nachrjein chjí-la chì'nda tjín-ne. Kò nga jàn
 nisoò cebada, tikoáá jngoò nachrjein chjí-la chì'nda tjín-ne. Kì tà nìkits'ón-jen
 jè asitì kò vino.

7 Jè Orrè, k'e nga jaàxìn sello xi ma-ne ñijòn, ki'nchrè jta-la jè xi ma-ne ñijòn xi títsajnakon nga kitsò:

—¡Nchroboí!

8 Kiskoòtsejèn, kijtseè jngoàà kohòyo xi sinè kji. Jè xi tíjnakjá-la, Kjoabiyaà 'mì 'ín-la; ìjngoò tjingui-la xi Ì'nde ts'e Mik'en 'mì. Kitjoé-la kjotíxoma nga ngats'ìi xita xi tjín isò'nde, xi ñijòn xita, jngoò kiyá xi kjoa ts'e kjojchán, kjoa ts'e kjinchrá, kjoa ts'e ch'in kjoa ts'e cho ts'en xi tjín ijìin ijñá sikk'en.

9 Jè Orrè, k'e nga jaàxìn sello xi ma-ne 'òn, 'an kijtseè ya ìngui ímíxa tsjeè-la Nainá títsajna jña xita xi kinik'en nga koií kjoa-la 'én-la Nainá, tikoá koií kjoa-la nga kixi kitsjaà 'én-la Nainá.

10 'Ñó nchichja nga tsò:

—Na'èn xi jì sabà tíhotíxomai, jì xi nguì tsjeè tijni kjo nguì kjokixi, skanda mé nachrjein kíndaàjìin-la nga k'oi-la kjo'in jña xita xi tjín ján isò'nde, jña xi kisik'en-najen.

11 K'eé kits'ìi-la nikje xi chroba kjoàn, ki'mì-la nga kátasíkjáya chiba nachrjein isa skanda k'e nga kojngoò jña xi 'ndse joó it'aà ts'e Cristo xi tikoá ngàsòn xá-la Nainá kiyájìin-ne.

12 Jè Orrè, k'e nga jaàxìn sello xi ma-ne joòn, kiskoòtsejèn nga j'ìi jngoò ch'ón xi 'ñó ts'a. Jè ts'oi, jmà kji komà koni nikje jmà, kjo jè sá, inì kji komà koni jní.

13 Jña ni'ño xi tjín ngajmii, chixòt'aà nangui koni ma jña toò ikò xkoén nga bixòngui k'e nga 'ñó 'ba tjo.

14 Jè ngajmii, k'oaá s'ín kichijà koni jngoò xojon xi ma maxkóya; ngats'ìi jña nindoò kjo nangui jìin-ndá xi tjín ijìin ndáchikon, jahatjìya-la ya ì'nde ñánda títsajna.

15 Jña xitaxá ítjòn xi tjín isò'nde, kjo xita xi 'ñó ndaà yaxkon-la, kjo xita nchiná, kjo xita sko-la soldado, kjo xita xi tse nga'ño tjín-la, kjo xita chì'nda, kjo xita xi títsajnandeíi nga mìtsà nei tjín-la, yaá tsibítsajna'ma ñánda tjín nguijo kjo naxi xi tjín-la nindoò.

16 Kitsò-la jña nindoò kjo jña naxi:

—Tíkatsjònè-nájen yijo-nò, tijtsa'ma-nájen mé-ne nga mìkìi skoè-najen jè xi tíjnasòn íxile nga tíhotíxoma kjo tikoá kitsajna'ma-lajen kjoajti-la kjo kjo'in xi tsjá jè Orrè.

17 Nga jye ijchò nachrjein-la Nainá kjo Orrè nga kjojtì-la, 'ñó tse kjo'in tsjá. ¿Yá xi koma kichikjoako-la?

7

Jña chì'nda-la Nainá xi tjít'aà chiba-la

1 Xi jye komà iskan kjoa koi, 'an kijtseè ñijòn àkjale xi jncha kixi nga ñijòn chrjangui-la isò'nde xi nchibíchoàhikon-la tjo mé-ne nga mì tì kii k'oa-ne ya isòn isò'nde kjo isòn ndáchikon, tikoá nijngoò yá sijníyá-la.

2 Tikoáá kijtseè ìjngoàà àkjale xi tíinchrobá-ne ñánda bitjokàtji-ne ts'oi xi 'ya jngoò kichá ts'e Nainá xi tíjnakon xi ma sit'aà chiba-la xita. 'Ñó kiichja-la jña àkjale xi ñijòn ma-ne xi jye kitjoé-la nga'ño nga tsjá ch'in-la isò'nde kjo ndáchikon.

3 Kitsò-la:

—Kì tà chjà ch'in 'bì-lá isò'nde kjo ndáchikon kjo yá, skanda k'e-né nga jye sít'aà chiba-la ya tjen-la jña xi chì'nda-la Nainá.

4 Kì'nchrè-la kótjín ma-ne jña xita xi kisit'aà chiba-la, jngoò sìndo kjo ichán ñijòn jmii ma-ne, ngats'ìi tje-la xita Israel.

5 Jña ngats'ìi tje-la xita koi xi kisit'aà chiba-la: jña tje-la Judá, tejò jmii ma-ne. Jña tje-la Rubén, tejò jmii ma-ne. Jña tje-la Gad, tejò jmii ma-ne.

⁶ Jñà tje-là Aser, tejà jmiì ma-ne. Jñà tje-là Neftalí, tejà jmiì ma-ne. Jñà tje-là Manasés, tejà jmiì ma-ne.

⁷ Jñà tje-là Simeón, tejà jmiì ma-ne. Jñà tje-là Leví, tejà jmiì ma-ne. Jñà tje-là Isacar, tejà jmiì ma-ne.

⁸ Jñà tje-là Zabulón, tejà jmiì ma-ne. Jñà tje-là José, tejà jmiì ma-ne. Jñà tje-là Benjamín, tejà jmiì ma-ne.

Xità xi kjín jchán ma-ne xi chroba kjoàn nikje xi íkjá

⁹ Xi jye komà, k'e nga kiskoòtsejèn, kjín jchán xità kijtseè; nìyá xi maxkeya-là. Yaá títsajna xità xi ya inchrobàjiìn-ne ngats'ìi nanguì xi tjín isò'nde, kò ngats'ìi tje-là xità xi tjín isò'nde, kò títsajna xità xi chja ngats'ìi 'én xi tjín, kò xità xi ya nchrobá-ne ngats'ìi naxandá xi tjín. Jñà xità koi, 'ncha kixi-né nga nguixkòn xi tíjnasòn íxile nga tíhotíxoma tikoá nga nguixkòn jè Orrè. Saà nikje chrobaá íkjá kò saà xkajén kjiya tsja.

¹⁰ Ngats'ìi xità koi, 'ñó jchán nchichja nga tsò:
Jè Na'èn-ná xi Nainá xi tíjnasòn íxile ñánda nga tíhotíxoma kò jè Orrè,
tsachrjekàjiìn-ná kjo'in.

¹¹ Ngats'ìi jñà àkjale 'ncha kixi-né ya indii-là ñánda tíjna xi tíjnasòn íxile nga tíhotíxoma kò ya ñánda títsajna jñà xità jchínga xi kaàn ñijòn ma-ne, kò jñà xi ñijòn ma-ne xi títsajnakon. Chíncha-xkó'nchi-ñiat'aà-là skanda it'aà nanguì nga kijtseèxkón Nainá.

¹² Kitsò:

K'oaá s'ín kátama.

Nainá 'ñó tjín-là kjoa machikon-t'in, kò kjoa jeya, kò kjoa chjine,
tjín-là kjondaà, 'ñó 'nga tíjna, tse nga'ñó tjín-là,
kò tjín-là kjotíxoma.

K'oa'sín kátama skanda nità mé nachrjein-ne.

¹³ K'eé kiichja jngoò-na jñà xità jchínga, kitsò:

—Jñà xità xi chroba kjoàn nikje xi íkjá, ¿yá xità-ne, ñánda kòf'ìi-ne?

¹⁴ 'An, kixan-là:

—Ngají tíjìn-lè na'èn.

Jè kitsò-na:

—Jñà xità koi xi tsatojiìn kjo'in jè nachrjein k'e nga 'ñó tse kjo'in kis'e.
Kisìtsjeè nikje-là nga kò jní-là Orrè-là Nainá kisìchroba-ne.

¹⁵ Koií kjoa-là nga ya títsajna-ne nguixkòn jè xi tíjnasòn íxile nga tíhotíxoma kò nachrjein kò nítjen sís'in-là ya ingo-là. Jè xi tíjnasòn íxile yaá kíjnajiìn osen kjit'aà-là nga sùkinda.

¹⁶ Mì tì kiì kjínchrá sùkjeín-ne kò mì tì kiì koxínda-là. Kò mì tì kiì kòkà-ne yijo-là jè ndobá-là ts'oi k'e nga 'ñó matsjè.

¹⁷ Nga jè Orrè xi tíjna jngoò osen-là ñánda tíjna xi tíjnasòn íxile nga tíhotíxoma, jè sùkinda koni s'ín makinda orrè; jè kjoiko ñánda tíbitjo nandá xi tíjnakon. Nainá sùixijno yije ndáxkòn jñà xità koi.

8

Xi ma-ne itoò sello

¹ Jè Orrè, k'e nga jaàxìn jè sello xi ma-ne itoò, osen-la hora jñá kis'e ján ngajmiì.

² Íkjoàn kijtseè jñà àkjale xi itoò ma-ne xi 'ncha kixi nguixkòn Nainá, jngoò chrjo trompeta kits'ìi-là nga jngoò ìjngoò.

³ K'eé j'ì ìjngoò àkjale xi 'ya jngoò kicha xi nguì oro jè xi tjíya chrjongó-là Nainá. Tsasíjna kixi ya it'aà ímixa tsjeè-là Nainá, íkjoàn tse chrjongó-là Nainá

kits'iì-là mé-ne nga ya kisijngòkò-ne jè kjoa bìtsi'ba-là jñà xità-là Nainá. Yaá tsaká ya isòn ímìxa tsjeè xi nguì oro xi tíjna ya nguixkòn jè xi tíjnasòn íxile ñánda tíhotíxoma.

⁴ Jè nì'ndì-là chrjongó-là nainá kò kjoa bìtsi'ba-là xità-là Nainá tsijin-né ya tsja jè àkjale ya nguixkòn Nainá.

⁵ Jè àkjale kiskoé jè kichá xi tíya chrjongó-là Nainá, chinchá-ìsa xá'í xi títisòn ya it'aà ímìxa tsjeè-là Nainá. Ikjoàn kisikatjen-sòn isò'nde; 'ñó kits'iìn ch'òn, kina'yà-là jtá, ki'ya-là ni'ín ch'òn, kò ts'a ch'ón.

Jñà chrjo trompeta

⁶ Jñà àkjale xi itoò ma-ne kò itoò chrjo trompeta tjíma'ya tsibítsajnándaà nga sùkjindáya.

⁷ Jè àkjale xi síjna ítjòn kisìkjindáya chrjo-là. Ikjoàn ts'a jtsí ndajò kò ni'ín xi tsjájìn jní; ján kisikasén it'aà nangui. Jè xi ma-ne jàn-ya-là isò'nde, jngòya kitì; k'oa tí jín kitì jñà yá; kitì yije xká xkoén.

⁸ Jè xi ma-ne jò àkjale kisìkjindáya chrjo-là. Kò jngò xi okji koni jngò nindoò xi je kji xi títi, yaá kiníkatjen-jìn ndáchikon. Nga jàn-ya-là ndáchikon, jngòya, jní komà.

⁹ Jñà chò xi tíjn-ngui ndáchikon, jngòya k'en xi ma-ne jàn-ya chò. K'oaá tís'ín komà jñà chitso, jngòya chixoña xi ma-ne jàn-ya chitso.

¹⁰ Jè xi ma-ne jàn àkjale kisìkjindáya chrjo-là. Jngò ni'ño xi 'ñó je kji xi tíjnga, kiskaàngui-ne ngajmì. Jè ni'ño jè, jngòya xajngá nandá kiskaàjìn xi ma-ne jàn-ya xajngá nandá kò ya ñánda tíjjo nandá.

¹¹ Jè 'ín-là ni'ño jè, xká tsja 'mì. Kò jè nandá, jngòya kjòtsja, jè xi ma-ne jàn-ya nandá. Kjín jchán xità k'en nga kjòtsja nandá.

¹² Jè xi ma-ne ñijòn àkjale kisìkjindáya chrjo-là. Ikjoàn jngòya kitsi'on jè ts'oi xi ma-ne jàn-ya yijo-là; kò k'oaá tís'ín komà jè sá kò ni'ño. Ikjoàn kòjñò jngòya jè ts'oi kò sá kò ni'ño. Koa jngòya kòjñò jè nàchrjein xi jàn-ya tíjn-ne; kò k'oaá tís'ín komà k'e nga nítjen; mì tí kiì kjòhiseèn-ne.

¹³ K'e nga kiskoòtsejèn, ki'nchrè jngò-là ja xi kitoòtjen ján ijìn isén. 'Ñó kiìchja nga kitsò:

—Ima xó-ne, ima xó-ne, ima xó-ne jñà xità xi tíjn ján isò'nde, taxki 'oón komat'in k'e nga skìndáya chrjo-là jñà àkjale xi nguì jàn chija-isa.

9

Chrjo trompeta xi ma-ne 'òn

¹ Jè xi ma-ne 'òn àkjale kisìkjindáya chrjo-là; 'an kítseè jngoaa ni'ño xi kiskaàngui-ne ngajmì skanda it'aà nangui. Ikjoàn kjòngatsja jè ibi ts'e nítjan.

² Kiskix'a jè nítjan. K'oaá s'ín itjo nì'ndì koni tsà ts'e ngajá xi 'ñó ì kjoàn. Jè nì'ndì xi itjo, kisijñò jè ts'oi kò ijìn isén.

³ Jè nì'ndì, yaá itjojìn chò langosta xi tsangasòn isò'nde; kits'iì-là nga'ño nga ma-là k'oe-là xità koni chò na'yá xi tíjn isò'nde.

⁴ K'oaá s'ín kisatiìxoma-là nga mìkiì tsjá ch'in-là ngats'ii xká ijñá xi tíjn isò'nde, kò nijngò yá; tà jñà xi koma tsjá ch'in-là jñà xità xi tsjìn-là chiba-là Nainá ya ítjòn tjen-là.

⁵ Mìkiì kitsjaà'nde-là nga sùk'en xità; tà kjo'ín 'òn sá tsjá-là; jè kjo'in xi tsjá, k'oaá ngaya-là koni k'e nga 'bé-là chò na'yá xità nga ijò 'beé.

⁶ Nàchrjein koi, jñà xità mejèn-là nga kiyá, tanga mìkiì sakò-là kós'ín sùk'en yijo-là. 'Ñó komejèn-là nga sùk'en yijo-là tanga mìkiì koma kiyá.

⁷ Jñà chò langosta k'oaá kjoàn isén-là koni kjoàn kohòyo xi binchandaà-là kjojchán. Tjísòn skò koni corona xi nguì oro; isén-là xitàá tíjn-là.

⁸ Tsja skò k'oaá kjoàn koni kjoàn ts'e íchjín; nì'ño, k'oaá kjoàn koni ts'e xa.

⁹ Ya isòn inìma-la k'oaá kjoàn xi kijtsa koni kicha tájaà xi síkjeén xita kjojchán; jña jngaá-la k'oaá s'ín na'ya-la nga one koni tsà 'ño kjin ma carreta xi bíndofe kohòyo nga ongachikon nga fi kjojchán.

¹⁰ Tjín nditsin koni cho na'yá kò tjín-la na'yá. Jña nditsin tjín-la nga'ño nga 'òn sá sìiki'on xita.

¹¹ Jè xi síjna skò-la cho langosta, jè àkjale ts'e nitjan. Jè 'ín-la àkjale jè, xi 'én hebreo, Abadón 'mì, koa xi 'én griego, Apolión 'mì. [Jña 'ín koi, tsòyaá-ne: jè xi síkits'óna.]

¹² Jyeé tsato kjo'in xi tjina ítjòn xi taxki 'oon komàt'in xita; tanga nguì jò chija xi sà nchrobá.

Chrjo trompeta xi ma-ne joòn

¹³ Jè xi ma-ne joòn àkjale kisikjindáya chrjo-la; k'eé ki'nchrè jngoò-la jta xi ya itjojìn-ne nga ñjòn nchrajá-la jè ímixa tsjeè xi nguì oro jè xi síjna nguixkon Nainá

¹⁴ nga kitsò-la jè àkjale xi ma-ne joòn, xi kjiya chrjo tsja:

—Chjìjnda'ñoí jña àkjale xi ñjòn ma-ne xi jtít'aà'ño ya chraña-la jè nandá xajngá je Éufrates.

¹⁵ K'eé kitjájnda'ño jña àkjale xi ñjòn ma-ne xi jye k'oas'ín títsajndaà jè hora, jè nachrjein, jè sá kò jè nó, mé-ne nga jngoòya sìik'en-ne xita xi ma-ne jàn-ya ngats'ìi xita xi tjín.

¹⁶ 'An, ki'nchrè-la kótjín ma-ne jña xita kjojchán xi kohòyo títsajnakjá-la; jò sìndo millón ma-ne.

¹⁷ K'oaá s'ín tsatsejèn-na jña kohòyo kò xita xi títsajnakjá-la nga kicha tájaà kijtsa inìma-la xi inì kjoàn koni ni'ín, xi azul kjoàn koni zafiro, kò xi sinè kjoàn koni azufre. Jña skò kohòyo, k'oaá kjoàn koni skò xa; kò ya tso'ba, ni'ín bitjo, nì'ndjì bitjo, kò azufre bitjo.

¹⁸ Jè kjoa-la nga ingajàn kjo'in koi, jngoò ya k'en xita xi jàn ya ngats'ìi xita xi tjín. Jè kisik'en jè ni'ín, nì'ndjì kò azufre xi bitjo-ne tso'ba kohòyo.

¹⁹ Nga'ño xi tjín-la kohòyo, yaá tjí'a tso'ba kò ítjòn nditsin, nga jña nditsin k'oaá kjoàn koni kjoàn ye; koa jña skò síki'on-ne jña xita.

²⁰ Jña xita xi tsiningui-ne xi mìkì k'en k'e nga jye tsato yije kjo'in koi, mìkì kisikájno jé-la nga mì tì jé kohótsji-ne; takó jña kijtseèxkón inìma ch'o-la neii, kò jña isén xi Nainá tsò-la xi kicha oro, plata, bronce, ndajo kò yá, jña xi mìkì tsejèn-la kò xi mìkì 'nchré kò xi mìkì ma fi.

²¹ Jña xita koi, mìkì kisikájno jé-la nga mì tì jé kohótsji-ne nga xita sík'en, nga ma-la bíndaà, kò nga kjoa chijngui s'ín, kò kjoa chijé.

10

Àkjale xi kjiya tsja jngoò xojon libro jtobá

¹ Jngoò àkjale kijtseè-isa xi tjín-la nga'ño xi tinchrobájen-ne ngajmì nga ifi tsátijno; jè skò kijnasòn jngoò ijñe; isén-la k'oaá kji koni ts'oi; jña ndsoko k'oaá s'ín tsejèn koni tsà ni'ín xi ncha kixi nga títi.

² Kjinaya tsja jngoò xojon xi jtobá kji xi jye kitjájndaya. Jè ndsoko kixi tsasíjnajìn ya ndáchikon kò jè ndsoko ngaskón tsasíjnason nangui.

³ K'oaá s'ín 'ño kichja koni tsò xa k'e nga kjindáya; k'e nga jye kichja, itoò ch'on kina'ya jta-la nga tikoà kichja.

⁴ K'e nga jye jane ch'on xi itoò kits'ìn, 'an tjnandaà-ná nga mejèn-na skijno jngoà xojon, tanga ki'nchrè jngoò-la jta xi ngajmì inchrobà-ne xi kitsò-na:

—Jña 'én xi kachja ch'on xi itoò kats'ìn, 'maá tikjini; kì xojoón bìt'ìi.

⁵ Jè àkjale xi 'an kijtseè nga ya sijnajìnn jngoò ndsoko ndáchikon kò xi ijngoò ndsoko ya sijnasòn nangui, kiskími'nga tsja kixi ján ngajmii,

⁶ kitsjaà 'en-la it'aà ts'e Nainá xi tijnakon nita mé nachrjein-ne, jè xi tsibíndaà ngajmii, nangui kò ndáchikon, ngats'ii tsojmi xi ya tjin, kitsò:

—Mì tì kii s'e isa-ne nachrjein.

⁷ K'e nga kichóya nachrjein-la nga kojits'ia jè àkjale xi ma-ne itoò nga sijkindáya chrjo-la, jè kjoa'ma-la Nainá kítasòn-né koni s'ín kitsò jña xita chi'nda-la xi kiichja ngajo-la.

⁸ Jè jta xi ki'nchrè ítjòn-la xi ngajmii inchrobà-ne, ijngoò k'a kiichja-na kitsò:
—T'in, chjoí jè xojon xi jtobá kji xi jye kitjajndaya nga kjinaya tsja jè àkjale xi sijnakixi isòn ndáchikon kò isòn nangui.

⁹ Kiikoaan jè àkjale, kixan-la:

—Tjii-ná jè xojon jtobá xi kjinaya ndseii.

Kitsò-na:

—Chjoí, ikjoàn chinii; ján iya indso'boi kotsjaya-né, tanga ya i'a ndso'boi, ixii koma-lè koni tsà tsjén.

¹⁰ Kiskoé jè xojon xi kjiya tsja jè àkjale. K'e nga kiskínee, kisìhixi'á ndso'ba koni tsà tsjén; tanga ján iya indso'bà kjòtsja-né.

¹¹ Ki'mi-na:

—Mochjeén-né nga ijngoò k'a kinókjoo'ya ngajo-la Nainá mé kjoa xi komat'in jña xita xi kjin naxandá nchrobá-ne kò xi kjin nangui chja-ne kò xi kjin skoya 'én chja, kò mé kjoa xi komat'in xitaxá ítjòn xi tjin isò'nde.

11

Jò ma xita xi tsja 'én it'aà ts'e Cristo

¹ K'ée kits'ii jngoò-na yá xi ma machibaya-ne, xi k'oa kji koni kjoàn yá nise. Ki'mi-na:

—Tisítjiin, tichibayi jè ingo ítjòn-la Nainá kò jè ímixa tsjeè-la. Tixkeyi kótjín ma-ne jña xita xi ya beèxkón Nainá.

² Jè nditsin xi kijnat'aà-la ingo, kì kii nìchibayi nga jña kitjoé-la xi taxki xita xi mitsà xita judío. Jña xita koi, ichán jò sá kotixoma ya Jerusalén xi i'nde tsjeè-la Nainá.

³ Aán siikasén ingajò xita-na xi tsja 'én it'aà ts'an nga kichjaya jngoò jmiì kò jò sindo kò jàn-kaàn nachrjein; kò jña nikje xi kòkjá, nikje jmà kjoàn xi ts'e kjoaba.

⁴ Jña ingajò xita xi tsja 'én, jña-né ingajò yá olivo kò ingajò kichja candelero xi jncha kixi nguixkon Nainá xi otixoma-la isò'nde.

⁵ Tsà yá xi mejèn-la siki'on xita koi; ni'ín kochrje tso'ba xi jngoò k'a kòkà jña xi kondra-la. K'oaá s'ín kiyá yije, nita yá-ne xi mejèn-la siki'on.

⁶ Jña xita koi tjin-la nga'ño nga ma-la kiichjoà-la ngajmii mé-ne mì tì kii k'oa-ne jtsí jña nachrjein k'e nga kichjaya. Tikoáá tjin-la nga'ño it'aà ts'e nandá nga ma-la nga jni s'iin; kò komaá-la kjin skoya kjo'in tsja-la xita isò'nde; komaá-la nga kos'ín s'iin nita kótjín k'a mejèn-la nga s'iin.

⁷ Ingajò xita koi, k'e nga jye tsja 'én-la, jè cho je xi ch'o kji xi bitjomijìn-ne ya nitjan jñò, skaàn-kò-né, kò sijkijne-la, ikjoàn kiyá ingajò xita koi.

⁸ Jña yijo-la xita koi, yaá siyijò osen nditsin-la naxandá ítjòn, ñánda kisit'aà krò Na'èn-ná. Jè 'ín-la naxandá ítjòn xi okji, k'oaá s'ín ngaya-la koni Sodoma, o Egipto.

⁹ Xita xi ya inchrobàjìnn-ne naxandá xi tjin isò'nde, kò ngats'ii tje-la xita xi tjin isò'nde, kò xita xi chja ngats'ii 'én xi tjin, kò xita xi ya nchrobá-ne ngats'ii

nangui xi tjin isò'nde, ján nàchrjein osen skótsejèn-jno yijo-la mik'en; kò mikì tsjá'nde nga sùjìin jñà xità koi xi jò ma-ne.

¹⁰ Jñà xità xi tjin isò'nde kòtsjaá-la nga jye k'en xità koi; tsjá kjotjò-la tsojmi xità xíkjin. Koi k'oas'ín s'iin-ne nga jñà ingajò xità xi chja ngajo-la Nainá, tseé kjo'in tsjá-la jñà xità isò'nde.

¹¹ K'e nga jye tsato xi jàn nàchrjein osen, jè Nainá kisikítsajnakon ìjngò k'a-ne nga jaáya-la; ikjoàn chinha kixi ìjngò k'a-ne; kò ngats'ì xità xi kijtseé, 'ño jchán kitsakjòn.

¹² Ingajò xità koi kù'nchré jngò-la jta xi 'ño kùichja xi ngajmiì inchrobà-ne, kitsò-la:

—Nchrobá-mijìn-jno ijndé.

Ikjoàn kùimijìn-jìin ifi ján ngajmiì. Ngats'ì jñà xità kondra-la kijtseé-né.

¹³ Tik'eé-ne j'ì jngò ch'ón xi 'ño jchán ts'a; jngò ya naxandá chixoña xi ma-ne te ya kòhokji naxandá; kò jè kjoa-la ch'ón, itoò jmiì xità k'en. Jñà xità xi tsiningui-ne, ndaà jchán kitsakjòn. Ikjoàn kùichjat'aà-la Nainá xi tjina ngajmiì nga jeya kisikíjna.

¹⁴ Jyeé tsato kjo'in xi ma-ne jò xi taxki 'oón komàt'in xità; tanga nchrobá nitoón xi ma-ne jàn k'a.

Chrjo trompeta xi ma-ne itoò

¹⁵ Jè xi ma-ne itoò àkjale kisikjindáya chrjo-la; kjín jchán jta kina'yà-la ngajmiì xi 'ño kùichja nga kitsò:

Jñà kjotixoma xi tjin isò'nde,

jyeé ts'e Na'èn-ná xi otixoma-ná kò jè Cristo xi xó kinikasén-ne.

Jè kotixoma nità mé nàchrjein-ne.

¹⁶ Jñà xità jchínga xi kaàn ñijòn ma-ne, xi títsajnanè íxile nga nguixkon Nainá, chinha-xkó'nchi-ñiat'aà-la nga kijtseèxkón Nainá.

¹⁷ Kitsò:

Na'èn xi Nainá 'mì-lè.

Ndaà chjí-lè nga ta jì tã jngò-né xi 'ño tse nga'ño tjin-lè,

ngaji xi tijni i'nde,

kò xi tijni skanda kjòtseé,

[kò xi sa kjoii ìjngò k'a-ne].

Ti'bi-lèjen kjondaà nga jyeé kachjoí nga'ño xi tjin-lè;

kò jyeé kòbits'ii nga jì tìhotixomai.

¹⁸ Jñà xità xi taxki xità xi mìtsà xità judío jyeé kòjti-la;

tanga jyeé ijchò nàchrjein-la kjojti-lè k'e nga jì k'oi-la kjo'in xità koi,

jè nàchrjein k'e nga jì kíndaàjìin-la jñà xità xi jye k'en

kò k'oi-la kjotjò xi ok'in-la nga tjoé-la xità ch'inda-lè xi kùichja ngajo-lè

kò jñà xità-la Nainá kò ngats'ì xi beèxkón-lè,

jñà xi jtobá kjoàn kò xità jchínga.

Síkjesoìn jñà xità xi ma-la síkjesòn xità naxandá isò'nde.

¹⁹ Ján ngajmiì kitáx'a i'nde tsjeè-la Nainá; ya iya i'nde tsjeè-la ki'ya-la jè kaxa ts'e kjoa xi tsibíndaàjìin Nainá kò jñà xità. Ikjoàn jate ni'ín ch'ón, kina'yà-la jta, kits'ìin ch'ón, ts'a ch'ón, ts'a jtsí ndajo xi 'ño tsiaàn kjoàn.

12

Jè chjoón kò jè ye

¹ Ján ngajmiì tsatsejèn jngò kjoxkón. Jngò chjoón ki'ya-la; jè ts'oi xi ma nikje-la. Jè sá yaá tjina ingui ndsokò, kò jngò corona tjí'a skò xi tejò ni'ño tjt'aà.

² Jè chjoón, ki'ndí 'ya. 'Ñó jchán kjindáya nga jye machraña nga jts'ín ki'ndí-la; tsee kjo'in tísíkjeín nga jye ijchò chiba-la nga jts'ín ki'ndí-la.

³ Ján ngajmii ìjngoò kjojkón tsatsejèn. Jngoò ye xi 'ño je kji tsatsejèn. Inì kji, itoò ma sko, kò jngoò corona ìtsé tji'a nga jngoò ìjngoò sko. Tikoáá te ma nchrajá-la.

⁴ Jè nditsin ye, jngoò ya ni'ño tsibíndofe xi ma-ne jàn ya ngats'ii ni'ño xi tjín ngajmii, ikjoàn tsibítsjot'aà nangui. Jè ye je, tsasìjnat'aà-la jè chjoón xi tí'beé ki'ndí mé-ne nga skine-ne ki'ndí-la k'e nga jye jts'ín.

⁵ Jè chjoón, tsi'beé jngoò ki'ndí x'in nga jè kotixoma-la ngats'ii naxandá xi tjín isò'nde koni jngoò xita xi yá kicha kjiya tsja nga kìnè-la kjo'in xita xi mìkii 'nchréñijon-la. Tanga jè ki'ndí-la chjoón, kitjá'an-la; yaá kiìkò ñánda tíjna Nainá nga tíhotixoma.

⁶ Jè chjoón, tsanga-né. Ján kii ì'nde it'aà xìn ñánda nangui kixì choòn, ñánda nga Nainá tsibíjnandaà jngoò-la ì'nde nga ya katji-la tsojmì xi skine. Jngoò jmii kò jò sìndo kò jàn-kaàn nachrjein kijna.

⁷ Xi jye komà iskan, ján ngajmii kis'e kjojkán. Jè àkjale Miguel kò àkjale-la kiskaàn-kjoòkò jè ye je. Kò jè ye je, kò àkjale-la nas'ín 'ño kiskaàn-kjoò,

⁸ tanga mìkii kisikijne-la, kò mì tì mé ì'nde kis'e-la ján ngajmii.

⁹ K'oaá s'ín komà nga itjokàjìin ngajmii jè ye jchínga xi 'mì Xita Neí kò xi 'mì Satanás xi konachan-la ngats'ii xita isò'nde. Kinìkatjengui ya it'aà nangui kò àkjale-la.

¹⁰ Ki'nchrè jngoò-la jta ján ngajmii xi 'ño kiìchja xi tsò:

—Ì'nde jyeé ijchò nachrjein nga kitjokàjìin kjo'in xita xinguiáá nga kò nga'ño-la Nainá nga jè kotixoma kò kjotixoma xi tjín-la Cristo [xi Nainá xó kisikasén-ne], koií kjoa-la nga jye kànikatjengui jè xi kò nachrjein kò nìtjen tsját'in 'én ndiso xita xinguiáá nga nguixkon Nainá.

¹¹ Jñà xita xinguiáá, nga ngui koó nga'ño xi tjín-la jní xi tsibíxteèn jè Orrè kisikijne-la kò ngui koó jñà 'én xi kitsjaá it'aà ts'e Nainá. Mìkii kitsakjòn-la nas'ín kinìk'en.

¹² Tsja kàtas'e-la ngajmii kò jñà xi ya títsajna. Tanga ima xó-nò jñò xi ya titsajnaà it'aà nangui kò xi titsajnaà ya jìin ndáchikon nga jè xita neí jyeé ijchòjen-tjìngui-nò kò 'ño jti tjín-la nga jyeé tíjìin-la nga ta chiba nachrjein kijna-isa.

¹³ Jè ye xi 'ño je kji, k'e nga kinìkatjengui it'aà nangui, tsangatjìngui-la jè chjoón xi tsi'beé ki'ndí x'in.

¹⁴ Tanga jè chjoón, jò jngaá ts'e ja kits'ii-la xi 'ño ì kjoàn mé-ne koma tótjen-ne nga kongala jè ye xi je kji. Ján kii kijna ya ì'nde it'aà xìn ñánda nangui kixì choòn. Jàn nó osen kijna nga kòkinda nga tjoé-la tsojmì xi skine.

¹⁵ Jè ye xi je kji, tsachrje nandá tso'ba nga ndána koma mé-ne nga koma kichrjoako-ne jè chjoón.

¹⁶ Tanga jè nangui kisìchját'aà-la jè chjoón; kitáx'a, kits'ii ndána xi jè ye tsachrje tso'ba.

¹⁷ Jè ye isaá 'ño kjòjtikeè jè chjoón. Kii tjìngui kondra-la jñà xita tje-la chjoón nga kiìkjaán-kò jñà xi síkitasòn kjotixoma-la Nainá kò jñà xi ndaà tsjá 'én it'aà ts'e Cristo.

¹⁸ Jè ye, yaá tsibìjnajiin tsojmì xi 'ncha ìndii ndáchikon.

13

Jò cho ù xi ch'o kjoàn

¹ Kìjtseè jngoàà cho je xi ch'o kji xi itjo-mijìn-jììn-ne ndáchikon xi itoò ma skò; te ma nchrajá-la; jngoò corona ìtsé tíj'a nga ìjngoò ìjngoò nchrajá-la; jñà skò tíjt'aà 'ín xi Nainá chjajno-la.

² Jè cho je xi ch'o kji xi 'an kìjtseè, k'oaá kji koni kjoàn xa indo; k'oaá kjoàn ndsokò koni ts'e cho oso; k'oaá kji tso'ba koni tso'ba xa. Jè nga'ñoó xi tjín-la jè ye, kò jè ì'nde-la ñánda tíhotíxoma, kò jè kjoatíxoma-la xi 'ñoó tjín, jè cho ts'en kjòngatsja.

³ 'Nó tse kitì jngoò skò jè cho je xi ch'o kji; k'oaá kji komà koni tsà jye kiyá; tanga jè skò xi 'ñoó tse kitì, kjòndaà-ne. Ngats'ì xìta xi tjín nga tíjtsa ìsò'nde, tà kjòxkón-la kjoa xi komà, kò yaá kìjtjingui-la jè cho ts'en.

⁴ Ngats'ì xìta kìjtseèxkón jè ye, nga jè ye kitsjaà-la kjoatíxoma xi tísíjjeén jè cho ts'en. Jñà xìta tíkooá kìjtseèxkón jè cho je xi ch'o kji. Ìkjoàn kitsò:

—Tsjìn ìjngoò ìsa koni jè cho je xi ch'o kji; mì yá tjín xi kichìkjoa-la nga skaàn-kò.

⁵ Jè cho ts'en kitjò'ndeé-la nga kùchja 'én xi 'nga síkìjna yijo-la nga chjajno-la Nainá. Tíkooá kits'ì'nde-la nga ichán jò sá kotíxoma.

⁶ K'oaá s'ín kis'ìin; kùchjajno-la Nainá, kùchjajno-la 'ín-la Nainá kò Ni'ya Tsjeè-la, kò kùchjajno-la jñà xìta xi títsajna ngajmì.

⁷ Tíkooá kitjò'ndeé-la nga kiskaàn-kò xìta-la Nainá skanda kó nga kisìkijne-la. Ìkjoàn kits'ì-la kjoatíxoma ìt'aà ts'e ngats'ì tje-la xìta, kò ìt'aà ts'e ngats'ì naxandá xi tjín, kò ìt'aà ts'e ngats'ì xìta xi chja ngats'ì 'én xi tjín, kò ìt'aà ts'e xìta xi tjín nga ìjngoò ìjngoò nangui xi tjín ìsò'nde.

⁸ Ngats'ì xìta xi tjín nga tíjtsa ìsò'nde, jè cho ts'en skoèxkón, jñà ngats'ì xìta xi mìkì tíjt'aà 'ín-la nga tísa tàts'en-la kjoa, jè xojon xi ts'e kjoabinachon xi ts'e Orrè-la Nainá xi k'en ngajo-la xìta.

⁹ Ndaà tìná'yaà koni xan-nò.

¹⁰ Jè xi ndayá kjis'en, k'oaá s'ín tjínè-la nga ndayá kjoì. Jè xi kichà ndojò kiyá-ne, k'oaá s'ín tjínè-la nga kichà ndojò kiyá-ne. Íí mochjeén nga kixi kítsajna kjit'aà kò nga kichìkjoako-la kjo'in jñà xìta-la Nainá.

¹¹ Xi komà iskan kìjtseè ìjngoàà cho je xi ch'o kji xi itjo mijìn-ne ijìin nangui. Jò ma nchrajá-la xi k'oa kjoàn koni nchrajá-la orrè. K'oaá s'ín chja koni jngoò ye xi 'ñoó je kji.

¹² K'oaá s'ín tjín-la kjoatíxoma koni jè cho je xi ch'o kji xi tjína ítjòn nga ya síjna nguixkòn. Bínè-la xìta xi tjín ìsò'nde nga kàteèxkón jè cho je xi ch'o kji xi tjína ítjòn, jè xi kjòndaà-ne ñánda 'ñoó tse kitì jngoò skò.

¹³ Tíkooá maá-la kis'ìin kjòxkón xi 'in tjín. Skanda maá-la kisìkjinchrobà-jen ni'ín xi ngajmì nchrobà-ne skanda ìt'aà nangui nga nguixkòn xìta.

¹⁴ Kiskoònachan-la xìta xi tjín ìsò'nde, koií kjoa-la jñà kjòxkón xi kits'ì'nde-la nga kis'ìin nguixkòn cho je xi ch'o kji xi tjína ítjòn. Tsibít'in-la xìta nga kàtíndaà jngoò xkósòn-la jè cho xi tjína ítjòn xi kichà ndojò kitì-ne skò tanga jaáya-la.

¹⁵ Jè cho xi ma-ne jò kits'ì-la nga'ñoó nga kisìkìjnakon jè xkósòn-la cho xi kisindaà, mé-ne nga koma kichja-ne kò ngats'ì xìta xi mìkì skoèxkón sìk'en-ne.

¹⁶ K'oaá s'ín tsibínè-la nga kàtasit'aà chiba-la jñà xi xìta ìxti, jñà xìta jchínga, jñà xìta nchíná kò jñà xìta ima, jñà xìta xi títsajnandèjì kò xi chì'nda títsajna'ñoó. Yaá kàtasit'aà chiba-la ya tsja kixi kò tsà ya ítjòn tjen-la.

¹⁷ Nijngoò xìta xi ma kotse tsojmì, nijngoò xi ma kotìjna tsà mìkì tíjt'aà chiba-la kò tsà jè 'ín-la cho mìkì tíjt'aà-la kò tsà mìkì tíjt'aà-la número ts'e 'ín-la cho.

¹⁸ Ijndé mochjeén kjoachjine-la xita; jè xi ndaà machiya-la, kàtixkeya número-la cho je xi ch'o kji; ts'e xita-né. Jè número: joòn sindo ko jàn kaàn ko joòn.

14

Jè Orrè-la Nainá ko jña xita xi jngoò sindo ko ichán ñijòn jmiù ma-ne

¹ Xi komà iskan, kiskoòtsejèn, kijtseè jè Orrè, nga síjnaxixi isòn nindoò Siòn ko xita xi jngoò sindo ko ichán ñijòn jmiù ma-ne xi tjit'aà itjòn tjen-la 'ín-la Orrè ko ts'e Na'èn-la.

² Ki'nchrè jngoò-la jta xi ngajmiù nchrobá-ne xi 'ño tíhone koni ma nandá k'e nga 'ño maje, koni ma nga faáya-la ch'on k'e nga jye ts'ìn; k'oaá s'ín ki'nchrè-la koni tsà kjìn ma xita xi síkjane ní'ño arpa.

³ Tína'yà jngoò-la sò xitse nga tíjnda nguixkon jè xi tíjnasòn íxile nga tíhotixoma, ko ya nguixkon xi ñijòn ma-ne xi títsajnakon ko ya nguixkon jña xita jchínga. Niyá xi ma-la seè jè sò xi tíjnda, ta jña-né xi jngoò sindo ko ichán ñijòn jmiù ma-ne, jña xi jye itjokàjìin kjo'in ya isò'nde.

⁴ Jña xita koi, mìtsà íchjín tsibìtsajnakò, nguì tsjeè kisìjchá yijo-la. Jña-né xi fi tjingui-la Orrè nita ñánda-ne nga fi. Jña-né xi itjokàjìin itjòn kjo'in ngats'ìi it'aà ts'e xita xi tjin isò'nde, mé-ne nga koma kongatsja itjòn-ne Nainá ko Orrè.

⁵ Nímé 'én ndiso kiichja, ko nímé jé tjin-la nga nguixkon Nainá.

Àkjale xi jàn ma-ne

⁶ Kijtseè ñjngoàà àkjale xi tsó'bajìin isén nga tífiko 'én ndaà-la Nainá xi tjin nita mé nachrjein-ne nga keènojmi-la jña xita xi títsajna isò'nde, ngats'ìi xita xi tjin nga ñjngoò ñjngoò nangui, ngats'ìi tje-la xita, ngats'ìi xita xi chja ngats'ìi 'én xi tjin, ko ngats'ìi xita xi tjin nga ngats'ìi naxandá xi tjin isò'nde.

⁷ 'Ñó chja kitsò:

—Jchaxkón Nainá, jeya tikijna; jye ijchò nachrjein-la nga koìindaàjìin. Jchaxkón jè xi tsibíndaà ngajmiù, xi tsibíndaà nangui, xi tsibíndaà ndáchikon ko ñánda tìbitjo nandá.

⁸ Ìjngoò àkjale kiichja xi kitsò:

—Jyeé kakaàngui, jyeé kakaàngui Babilonia, naxandá xi 'ño je kji, jè xi bit'in-la naxandá xi tjin isò'nde nga [k'jei nainá fit'aà-la] koni s'ín xita k'e nga kjoachijngui s'ín. Koni s'ín kis'ìn, k'oaá ngaya-la koni tsà kisich'i yije xita isò'nde jè xán ts'e kjoachijngui-la xi tjiko kjojtì-la Nainá.

⁹ Ìjngoò àkjale tsatsejèn xi ma-ne jàn xi 'ño chja nga kitsò:

—Tsà yá xi skoexkón jè cho je xi ch'o kji ko isén xkósòn-la, tsà tikoa sít'aà chiba-la itjòn tjen-la, o tsà tsja,

¹⁰ Nainá tsjá-la kjo'in, k'oaá ngaya-la koni tsà vino skoí xi tjiko kjoajti-la Nainá. Nga jè sobà Nainá jyeé tsibíndaà jngoò chitsín vino xi 'ño kjaán mé-ne nga kokò-ne kjoajti-la nga s'e-la kjo'in ijìin ní'ín azufre xi 'ño tsjè títi. Tíkotsejèn àkjale tsjeè ko Orrè.

¹¹ Jè nì'ndi-la ts'e kjo'in-la, kjit'aá nachrjein nita kjé-ne nga kitjomijìn. Mikiì sijkjáya ko nachrjein ko nitjen jña xita xi jè cho ts'en ko isén xkósòn-la beèxkón, jña xi tikoa tjit'aà chiba-la ko 'ín-la jè cho je xi ch'o kji.

¹² Ijndé nga mochjeén nga kàtachikjoa-la nita mé kjoa-ne jña xita-la Nainá xi síkitasòn kjoitixoma-la ko xi ndaà mokjeiín-la it'aà ts'e Jesús.

¹³ Ki'nchrè ñjngoàà 'én xi ngajmiù inchrobà-ne xi kitsò-na:

—Chjí, tí'eìi xojon: “Jña nachrjein xi fi-isa, mé tà ndaà-la jña xita xi kiyá nga mokjeiín-la it'aà ts'e Na'èn-ná.” K'oaá tsò Inima Tsjeè-la Nainá: “Kixií kjoa, jña

xita koi sijkáya-né kjoa ts'e xá-la; ján ngajmii, jchaá-la ngats'ii kjoa xi ndaa kis'iin."

K'e nga maxkó tsojmi xi jye kòjchá ya it'aà nangui

¹⁴ K'e nga kiskoòtsejèn, kijtseè jngoàà ifi xi chroba kji, ya isò'nga ifi tíjna jngoò xi k'oa kji koni ki'ndí-la xita. Jngoò corona xi nguì oro tji'a sko, ko jngoò kicha libá kjiya tsja xi 'ño yijò kji.

¹⁵ Ìjngoò àkjale itjo ya i'nde tsjeè-la Nainá xi 'ño chja, kitsò-la jè xi tíjnasòn ifi:

—Tits'ii nga tixákoji kicha libá-lè; tichásoin, ko tíxkoí kóhotjín tsojmi tjè xi tjín it'aà nangui nga jye kòjchá yije; ko jyeé ijchò nàchrjein-la nga sincháxkó.

¹⁶ Jè xi tíjnasòn ifi, tsibíts'iaako kicha libá-la ya isòn nangui nga tsatesòn tsojmi tjè-la isò'nde, ikjoàn chincháxkó.

¹⁷ Ìjngoò àkjale itjo ya i'nde tsjeè-la Nainá xi kijna ngajmii xi tikoá kicha libá kjiya tsja xi 'ño yijò kji.

¹⁸ Ìjngoò àkjale itjo-ne it'aà ímixa tsjeè-la Nainá, jè xi síkinda ni'ín. 'Ñó kiichja-la jè àkjale xi kicha libá kjiya tsja; kitsò-la:

—Tits'ii nga tixákoji kicha libá-lè xi 'ño yijò kji; tichát'eii 'én-la jña toò uva xi tjín it'aà nangui, nga jña toò-la jye kichji.

¹⁹ Jè àkjale tsibíts'iaako kicha libá-la nga tsatet'aà toò-la jña yá uva; ikjoàn kisikatsjooya ya ñánda nga ma binchanè toò uva. Kjoa koi, jè okó kjoajti-la Nainá.

²⁰ Mitsà ya jjiin naxandá kisinè jña toò uva; ján indiì naxandá kisinè; k'e nga jye kisinè, jní itjo ñánda nga kisinè; 'ño tse jní itjo skanda ijchò kangui-la kó kji 'nga tíjna freno xi tji'a tso'ba kohoyo ko jàn sìndò kilómetro tsangasòn.

15

Itoò ma àkjale xi itoò kjo'in j'ìiko

¹ Ìjngoò kjoəxkón kijtseè ján ngajmii xi 'ño xkón kji ko 'ño jeya ki'ya-la. Itoò ma àkjale xi itoò kjo'in j'ìiko jña kjo'in xi fehet'aà-ne nga yaá fehet'aà-ne kjoajti-la Nainá.

² Tikoá kijtseè jngoàà ndáchikon xi chitsín kji; tsjájiin ko ni'ín. Ya ncha kixi isòn ndáchikon xi chitsín kji, jña xita xi jye kisikijne it'aà ts'e cho je xi ch'o kji ko isén xkósòn-la, jña xi mìkiì kitsjá'nde nga kisit'aà chiba-la, ko número ts'e 'ín-la. Xita koi kjiya tsja ní'ño arpa xi Nainá kitsjaà-la.

³ Nchiseè sò-la Moisés xi chi'nda-la Nainá ko sò-la Orrè, nchitsò: Na'èn xi Nainá 'mì-lè, xi ta ji ta jngoò-né xi 'ño tse nga'ño tjín-lè, 'ño jeya ko 'ño xkón tjín ngats'ii kjoa xi 'nì. Xita kixi-né; kixii tjín ndiyá-lè.

Jii-né xi Xitaxá Ítjòn tìjna-la ngats'ii naxandá xi tjín isò'nde.

⁴ ¿Yá xi mìkiì tsakjón-lè Na'èn?

¿Yá xi mìkiì skoəxkón-lè?

Tajngoò ngaji xi xita tsjiì,

koií k'oas'ín kjoii-ne ngats'ii naxandá-la isò'nde nga skoəxkón-lè nga jye tí'ya-la kjoa kixi-lè.

⁵ K'e nga jye kijtseè kjoa koi, kiskoòtsejèn nga kitáx'a ján ngajmii jè i'nde tsjeè-la Nainá xi tíjnaya iya Ni'ya Nikje xi okó nga ya tíjna Nainá.

⁶ Itjo ya i'nde tsjeè-la Nainá jña àkjale xi itoò ma-ne xi j'ìiko itoò kjo'in. Íkjá nikje lino chroba xi 'ño ote kjoàn; tíkjá ndáyá-la na'ño payo xi nguì oro.

⁷ Jñà xi ñijòn ma-ne xi títsajnakon, jngoò itjojìin xi kisìngatsja nga íjngó íjngó àkjale xi itoò ma-ne; kitsjaà íjngó íjngó-la chitsín xi nguì oro xi ya tjíya kjo'in ts'e kjoajti-la Nainá xi tíjnakon nítà mé nachrjein-ne.

⁸ Ya iya i'nde tsjeè-la Nainá, kitseè ni'ndi xi ya inchrobà-ne it'aà ts'e kjoajeya-la Nainá kò nga'ño xi tjín-la. Niyá xi kitjò'nde-la nga jahas'en ya i'nde tsjeè-la Nainá skanda k'e nga jye tsitasòn yije jñà kjo'in xi itoò ma-ne xi j'ìiko jñà àkjale xi itoò ma-ne.

16

Chitsín xi itoò ma-ne

¹ Ki'nchrè jngoàà 'én xi ya itjo-ne i'nde tsjeè-la Nainá nga kitsò-la jñà àkjale xi itoò ma-ne:

—Tanguió, tíxteèn-sòn isò'nde jñà xi tjíya chitsín xi itoò ma-ne, kjo'in xi tjiko kjoajti-la Nainá.

² Kii jè àkjale xi tsako ítjòn-la. Tsibíxteèn-sòn isò'nde xi tjíya chitsín-la. Ngats'ìi xità xi tjín-la chiba-la cho ts'en kò xi beèxkón jè isén xkòsòn-la jè cho je xi ch'o kji, tsako-la ch'in xajtsé xi 'ño ch'o kjoàn kò ijò jchán ma.

³ Jè àkjale xi ma-ne jò tsibíxteèn-jìin ndáchikon xi tjíya chitsín-la. Kò jè ndáchikon, nguì jní komà, koni tsà ya k'en-jìin xità. Ngats'ìi xi títsajnakon ya ijìin ndáchikon jngoò k'aá k'en.

⁴ Jè àkjale xi ma-ne jàn, tsibíxteèn-jìin ya xajngá nandá kò ñánda tíbitjo nandá, jè xi tjíya chitsín-la. Saà jní komà.

⁵ Ikjoàn ki'nchrè-la jè àkjale xi ts'e nandá, kitsò:

—Ngaji Na'èn, tjín-lè kjoakixi, nga k'oaá s'ín kits'ìi-la kjo'in jñà xità it'aà ts'e kjoa koi, nga jii xi xità tsjeè 'mì-lè, jii xi tjini skanda kjòtseé, tjini skanda i'ndeì.

⁶ Nga jñà xità koi tsibíxteèn jní-la xità-lè nga jñà kisik'en, kò xità xi kùichja-ngajo-lè. I'ndeì ngaji k'oaá tis'ín tì'biì ngajo-la jní nga nchi'biì; yaá chiba-la.

⁷ Tìkoo ki'nchrè jngoò-la 'én xi ya it'aà ímixa tsjeè-la Nainá chja, nga tsò:

—Ji Na'èn xi Nainá 'mì-lè, xi ta ji ta jngoò-né xi 'ño tse nga'ño tjín-lè, kixii kjoa, jñà kjo'in xi tí'biì-la xità koi, ndaa tjín kò nguì kixii tjín.

⁸ Jè àkjale xi ma-ne ñijòn, tsibíxteèn xi tjíya chitsín-la ya isòn ts'oi. Jè ts'oi kitjò'nde-la nga jè ndobá-la kisichjàn yijo-la xità.

⁹ Jè ndobá-la ts'oi 'ño kisichjàn-la ngats'ìi xità tanga jñà xità koi mìkii kisikájno jé-la ni mìkii jeya kisikájna Nainá; ta saá kùichjajno-la Nainá nga jè xi tjín-la nga'ño it'aà ts'e kjo'in koi.

¹⁰ Jè àkjale xi ma-ne 'òn, tsibíxteèn-sòn jè xi tjíya chitsín-la ya ñánda tíhotixoma jè cho ts'en. Kò jè i'nde ñánda tíhotixoma jè cho je xi ch'o kji, kòjñò-né. Jñà xità xi beèxkón jè cho ts'en kiskinetjòn nijen-la nga 'ño ijò komà-la.

¹¹ Tanga mìkii kisikájno jé-la; tà saá isa ndaa kùichjajno-la Nainá xi ts'e ngajmii, koi kjoa-la nga ijò komà yijo-la nga xajtsé tjín-la.

¹² Jè àkjale xi ma-ne joòn tsibíxteèn-jìin xi tjíya chitsín-la ya xajngá nandá-je Éufrates. Jè nandá-la xajngá, kixiya-né, mé-ne nga koma kjoahato-ne jñà xitaxá ítjòn xi nchrobà-ne ñánda bitjokàtji-ne ts'oi.

¹³ Kijtseè-ná nga jè ye xi 'ño je kji, kò jè cho je xi ch'o kji, kò jè xità xi kùichjaya 'én ndiso nga itjo-ne tso'ba jàn inima ch'o xi cho xke kjoàn.

¹⁴ Jñà-né inima ch'o-la neii xi s'ín kjoaxkón; bitjo nga bíxkóya xitaxá ítjòn xi tjín nga títsa isò'nde nga kjinchrobà kjoichán jè nachrjein xi jye tjíndaà-la Nainá xi ta jè tajngoó xi 'ño tse nga'ño tjín-la.

15 “Tíná'yaà, 'an, k'oaá s'ín kjoiaa koni s'ín f'ìi xita chijé. Mé ta ndaà-la jè xita xi tijnandaà k'e nga 'an xi kjoiaa; kijjindaà nikje-la nga kòkjá; mé-ne nga mìkiì kòsobà-la nga tìjna laká.”

16 Jñà inima cho-la neji tsibíxkóya xitaxá ítjòn-la isò'nde ya i'nde ñánda 'mì Armagedón xi 'én hebreo.

17 Jè àkjale xi ma-ne itoò, tsibíxteèn ijìin isén xi tjíya chitsín-la. Kiì'nchré-la 'én xi 'ñó kiìchja xi ya inchrobà-ne i'nde tsjeè-la Nainá xi tìjna ngajmì ñánda tìjna jè xi tìjnasòn íxile nga tíhotíxoma; kitsò:

—Jyeé tsitasòn yije.

18 Ikjoàn jate ni'ín ch'on, kina'yà-la jta, kits'iìn ch'on, ts'a ch'ón xi 'ñó jchán ts'a; nì saà jngoò k'a k'oas'ín 'ba kóni nga tisa tsatsejèn xita isò'nde.

19 Jè naxandá je xi 'ñó ndaà yaxkon-la, jàn ya komà. Kò jñà naxandá xi chja-ne nga ijngoò ijngoò nangui xi tìjn isò'nde, jngoò k'aá kichijà. Kò jè naxandá je xi 'mì Babilonia xi 'ñó ndaà yaxkon-la, mìkiì kisìjchàajìin Nainá nga kitsjaà-la kjo'in, k'oaá ngaya-la koni kisik'iì jngoò chitsín xi tjíya vino xi nguì kjoajti-la Nainá xi jè jye tijnandaà-la.

20 Ngats'iì nangui xi tìjn ijìin ndáchikon kò jñà nindoò, jngoó k'aá kichijà, mì tì kiì ki'ya-la.

21 Jñà xita tsanè jtsí ndajo xi 'ñó tsiaàn kjoàn, tìjn-la tsà ichán kilo nga jngoò ijngoò. Jñà xita, 'on kiìchjajno-la Nainá, koiì kjoa-la nga tse kjo'in kis'e-la kjoa ts'e jtsí ndajo.

17

Kós'ín s'e-la kjo'in jè chjoón chijngui

1 J'ìi jngoò jñà àkjale xi itoò ma-ne xi itoò chitsín tjíya tsja, kiìchja, kitsò-na:
—Nchroboí, kokoò-lè kjo'in xi tjoé-la jè chjoón chijngui xi 'ñó ndaà yaxkon-la xi tìjnandiì ñánda nga kjìin xajngá nandá fahato.

2 Jñà xitaxá ítjòn xi tìjn isò'nde, yaá tsafáhijtakò chjoón jè nga kj'eíj nainá kijtseèxkón k'oaá ngaya-la tsà kjoa chijngui kisikò jè chjoón. Kò ngats'iì xita xi tìjn isò'nde, k'oaá tì kis'iìn nga kj'eíj nainá kiìtjìngui-la k'oaá ngaya-la koni tsà xán ts'e kjoachijngui-la chjoón kjòch'i-ne.

3 It'aà ts'e Inima Tsjeè-la Nainá, jè àkjale kiìkò inima-na jngoò i'nde it'aà xìn ñánda nangui kixì choòn. Kijtseè jngoaa chjoón xi tìjnakjá-la cho je xi ch'o kji xi inì kji. Yijàjno yije yijo-la 'én xi kondra ts'e Nainá nga chjajno-la. Itoò ma skò kò te ma nchrajá-la.

4 Jè chjoón, nikje skò kò nikje inì kjoàn xi íkjá. Yijàjno xi nguì oro kò ndajo ote xi 'ñó ts'e chjí-la, kò ndátòn fanguì xi 'ñó chjí-la xi 'mì perla. Tjíya tsja jngoò chitsín xi nguì oro; jè chitsín kitseé kjoa ch'o-la kò kjoa tjé xi ts'e kjoa chijngui-la.

5 Ya ítjòn tjen-la, tít'aà 'én 'ma xi tsò: “Babilonia xi 'ñó je kji nga ndaà yaxkon-la, jè nea-la íchjín chijngui kò ngats'iì kjoa ch'o xi tìjn isò'nde.”

6 K'e nga kiskoò'an chjoón jè, kijtseè xkoaàn nga ch'i-né nga jní-la xita-la Nainá kits'iì kò ts'e xita xi kinik'en nga 'én-la Jesús kiìchjaya. K'e nga kijtseè tà kjòxkón-na.

7 Kitsò-na jè àkjale:

—¿Mé-ne maxkón-lè? 'Aán, kènojmi-lè kó tsòya-ne kjoa 'ma-la chjoón jè, kò it'aà ts'e cho je xi ch'o kji xi tìjnakjá-la xi itoò ma skò koa te ma nchrajá-la.

8 Jè cho xi kà'yi, tsibìjnakon-né, tanga i'ndeì tìjnak'en-né; yaá kjìinchrobà mijìn-ne nitjan jñò mé-ne nga jngoò k'a chija-ne. Jñà xita xi tìjn isò'nde, xi mìkiì tít'aà 'ín-la xojòn ts'e kjoabinachon kóni nga tisa kisindaà isò'nde, tà

koxkón-la k'e nga skoexkon jè cho xi tsibìjnakon, ko i'ndeì tìjnak'en-né, tanga kotsején ìjngoò k'a-ne.

⁹ 'Íjndé mochjeén kjohítsjeèn xi t́jín-la kjoa chjine. Jñà sko cho xi itoò ma-ne, jñà ngaya-la jñà nindoò xi itoò ma-ne ñánda t́jnanè jè chjoón. Tíkooá jñà ngaya-la xi itoò ma-ne xitaxá ítjòn.

¹⁰ 'Òn ma-ne xi jye k'en, jngoò ma xi tíhotíxoma-ísa, ko jè xi ìjngoò, kj'eè kù f'ìi. Tanga k'e nga kjoí, tà chibaá naxrjein kotíxoma.

¹¹ Jè cho je xi ch'o kji xi tsibìjnakon tanga i'ndeì t́jnak'en-né, jè xi ma-ne jùin xitaxá ítjòn. Yaá t́jnajiin-la xi itoò ma-ne, ko yaá tífi ñánda nga jngoò k'a jchija.

¹² 'Jñà nchrajá xi te ma-ne xi kà'yi, jñà ngaya-la xitaxá ítjòn xi te ma-ne xi kj'eè kù tjoé-la kjotíxoma. Tanga k'e nga tjoé-la kjotíxoma ta jngoò hora kotíxomakjoò ko jè cho je xi ch'o kji.

¹³ Jñà xitaxá ítjòn xi te ma-ne, tajngoó kjohítsjeèn t́jín-la nga jè cho je xi ch'o kji s̀jngatsja nga'ño-la ko kjotíxoma-la.

¹⁴ 'Ikjoàn skaàn-ko jè Orrè, tanga jè Orrè s̀jikijne-né. Nga jè-né xi otíxoma-la jñà xita xi otíxoma, ko Xitaxá ítjòn-laá ma jñà xi xitaxá ítjòn títsajna. Jñà xita xi títsajna, xó kinokjoà-la, xó kitjaajiin-ne, ko kixíí síkitasòn-la.

¹⁵ Jè àkjale k'oaá ti kitsò-na:

—Jè nandá xi kà'yi, ñánda t́jnandiì chjoón chijngui, naxandá-né, xita kjín-né, jñá-né xita xi t́jín nga ìjngoò ìjngoò nangui xi t́jín isò'nde, koa jñá-né xita xi chja ngats'ìi 'én xi t́jín isò'nde.

¹⁶ Jñà nchrajá xi te ma-ne xi kà'yi, ko jè cho je xi ch'o kji xi kà'yi, s̀jiktikeè-né jè chjoón chijngui, kjoaá'an yije-la skanda jñà nikje-la, s̀jikájna laká-né. Yijo-la skine-né. Ikjoàn yaá kokájiin ní'ín.

¹⁷ Nainá k'oaá s'ín tsibíjiin kjohítsjeèn-la jñà xita koi nga k'oas'ín s̀ikitasòn koni s'ín mejèn-la Nainá. Jè kjotíxoma xi t́jín-la xita koi t́jngoò ikon nga jè cho ts'en kongatsja, skanda k'e nga kítasòn yije 'én xi kiichja Nainá.

¹⁸ Jè chjoón xi kà'yi, jè-né naxandá je xi otíxoma-la jñà xitaxá ítjòn xi t́jín isò'nde.

18

Kós'ín kiskaàngui jè naxandá Babilonia

¹ Xi jye komà iskan, ìjngoò àkjale kijtseè xi t́nchrobájen-ne ngajmì, xi 'ño tse nga'ño t́jín-la. Jè kjoa jeya-la xi 'ño ote kji, kisìhiseèn-sòn nangui.

² 'Ñó kiichja, kitsò:

—Jye kiskaàngui, jye kiskaàngui naxandá je Babilonia. Jyeé ta i'nde-la inima ch'o-la neí komà, ya ñánda kitseè yije inima tjé xi ch'o kjoàn. Ko ya títsajna nise xi ch'o kjoàn xi mìkiì ma chine.

³ Ngats'ìi xita isò'nde, k'oaá ti kis'ìin koni s'ín xita naxandá jè nga kj'eíí nainá kiitjngui-la, k'oaá ngaya-la koni tsà kjòch'i-ne jñà kjoachijngui xi kis'ìin. Jñà xitaxá ítjòn-la xi t́jín nga títsa isò'nde, k'oaá ti kis'ìin. Ko jñà xita isò'nde xi tsojmì otseya nga s'ín kjohima, kjònchiná-né xi kjoa ts'e kjotsja-la yijo-la koni s'ín jñà xita xi t́jín naxandá jè.

⁴ Ìjngoò 'én ki'nchrè xi ngajmì inchrobà-ne, xi kitsò:

—Jñò xi naxandá ts'an xan-nò, títjokájñoò naxandá jè, mé-ne nga mì ya kokot'aà-nò jé-la, tíkoo mìkiì kokot'aà-nò kjo'in xi s'e-la.

⁵ Jñà jé-la, jyeé tímakjìn, jyeé j'ìi skanda i ngajmì. Nainá, mìkiì s̀jichàajiin [nga tsjá-la kjo'in] xi kjoa ts'e jé-la.

⁶ K'oaá tís'in kàtamat'in ngajo-ne koni s'in kis'iin jè. Jò k'a k'oa tís'in kàtamat'in ngajo-ne koni tjin kjoa xi kis'iin. Jè chitsín xi kisikáyajin vino, kokji tikájin ngajo-là nga jò k'a isa jchá kàtama, [jò k'a okji kjo'in kàtakò-la].

⁷ Jè kjoa-la nga jeya kisikijna yijo-la kò nga 'ño kis'e-la kjotsja, k'oa tís'in tji ngajo-là kjo'in nga kàtakjindáya. Nga k'oaá tsò inima-la: “An, k'oaá s'in tina nga chjoón sko-la 'mì-na. An mìtsà chjoón ka'an 'mì-na, tikoáà mìkiì silkjiaán kjo'in nita kjé-ne.”

⁸ Koi kjoa-la nga tajngò nàchrjein kitjojenè-la kjo'in: Kiyá xita-la. Tikoáà skindáya-né. S'eé-la kjoa ts'e kjinchrá. Ni'in kitj-ne nga kjoehesòn. Nga 'ño tse nga 'ño tjin-la jè Nainá xi otixoma nga k'oaá s'in jye kiskoòsòn-la nga tsjá-la kjo'in.

⁹ Jña xitaxá ítjòn-la isò'nde 'ño skindáyakeè kò 'ño 'on koma-la k'e nga skoe nga tíbitjo ni'ndi-la nga títi jè naxandá jè ya ñánda kùtjingui-la xi kjeí nainá k'oaá ngaya-la koni tsà jngó chjoón chjingui kùtjingui-la nga kisitsjako yijo-la.

¹⁰ Kjiin kincha-ne nga skótsejèn-la, nga tsakjón-la kjo'in-la. 'Nó kichja, kitsò: —Ima xó-ne, ima xó-ne naxandá je Babilonia xi 'ño kis'e-la nga 'ño; tajngò tjò kòf'i-la kjo'in.

¹¹ Jña xita xi otijnaya tsojmì xi tjin isò'nde, tikoáà skindáyakeè-né nga 'on koma-la inima-la nga mì ti yá xi kotse-ne tsojmì xi otijnaya,

¹² tsojmì xi ts'e ton oro, plata, ndajo chjí xi 'ño ndaà kjoàn, ndáton chjí xi 'ño ndaà kjoàn; nikje lino xi 'ño chjí, kò nikje seda, nikje sko kò xi inì kjoàn; ngats'ì yá xi 'ño ndaà jne, tsojmì chjí xi nindaà ni'ño cho kisindaà-ne, ngats'ì tsojmì xi yá xi 'ño chjí xi yá ikon, kò kichá bronze, kò kichá xi 'mì hierro, kò ndajo marmol,

¹³ kò chrjoayá canela, ngats'ì tsojmì xi ndaà jne, chrjongó-la Nainá, kò xkiì jne xi 'mì mirra, kò chrjongó ts'e yá olivo, kò vino kò asiti. Trigo kò skoan inchrajín, kò cho ch'á, orrè, kohoyo, carreta, kò xita chi'nda nga kisatjna.

¹⁴ Kitsò-la jè naxandá:

—Ngats'ì kjoa xi ndaà kisaseèn-la inima-lè, jyeé kitjaàxìn yije-lè. Kjoa nchiná-lè jyeé kichjà. Kò kjoa xi ndaà kòtsjachi, mì ti kiì sakò-lè nita kjé-ne.

¹⁵ Jña xita xi otijnaya tsojmì xi ya kjònchiná ts'e naxandá jè, kjiin kinchat'aàxìn nga tsakjón-la kjo'in. Skindáyakeè ko 'ño 'on koma-la inima-la.

¹⁶ K'oaá kitsò:

—Ima xó-ne naxandá xi 'ño je kji, xi nikje lino chjí tsakakjá kò nikje xi sko kjoàn kò xi inì kjoàn. Yijajno yijo-la oro, ndáton chjí xi 'mì perla kò ndajo chjí xi 'ño ndaà kjoàn.

¹⁷ Tajngò tjò kachija yije kjoa nchiná xi tjin-la.

Ngats'ì xita xi síxako chitso, kò ngats'ì xita xi ya chitso títsaya nga nchifi, jña xi ya iya chitso síxá kò ngats'ì xi síxajin ndáchikon, kjiin tsibitsajna

¹⁸ k'e nga kijtseè ni'ndi-la naxandá nga títi; 'ño kichja, kitsò:

—Ni saá jngò naxandá tjin xi mangásòn-kjoò koni kji naxandá jè, nga 'ño ndaà kiyaxkon-la.

¹⁹ Ikjoàn tsibixteèn-jno chijo sko, 'ño kiskindáyakeè nga 'on komà-la inima-la; kitsò:

—Ima xó-ne naxandá xi 'ño je kji; jè kjoa nchiná-la, ndaà kjònchiná-ne jña xita xi tjin-la chitso ya ijìn ndáchikon. Kò i'nde, ta jngó tjò kachija yije kjoa nchiná-la.

²⁰ Ngats'ioò jño xi titsajnaà ngajmì, tsjaá t'è-là takòn. Jño xi xita-la Nainá mà, jño xi tsibixáya-nò Cristo, kò jño xi Nainá nokjoà ngajo-là, tsja

t'è-là inìma-nò. Nainá jyeé kàtsjá-la kjo'in naxandá jè koií kjoa-la nga ch'o kisìko-nò.

²¹ Jngoò àkjale xi 'ńó tse nga'ńó tjín-la kiskoé jngoò ndajo xi koni kji ndajo natsí kji, kisikatjen-jiin ndáchikon, kitsò:

—Jè naxandá Babilonia, xi 'ńó je kji, k'oaá s'ín skajiin-ndá; jngoó k'aá chija nita kjé-ne, mì tì yá xi skoexkon-ne.

²² Mì tì kii kina'ya-la inchò calle-la jña música xi síkjane arpa, jña xi síkjindáya xobí, kò xi síkjane chrjo trompeta. Mì tì kii s'e-la xita xi síxá nita mé xá-ne. Tikoá mì tì kii koxáko-ne molino ts'e ncheé.

²³ Ni'ín ts'e lámpara, mì tì kii silihiseèn-ne; mì tì kii s'e-ne s'eí nga kixan xita; koií kjoa-la kos'ín komat'in-ne nga jña xita-la xi otseya kò otijnaya tsojmì, 'ńó xita nchiná komà i isò'nde; tikoá kiskoðnachan yije-la naxandá xi tjín isò'nde nga komà-la kis'iin kjoatj'e.

²⁴ Naxandá jè, Nainá kitsjaà-la kjo'in nga jé ts'e-né nga kinik'en xita-la Nainá kò xita xi kiichjaya ngajo-la Nainá kò ngats'ì xita xi kinik'en nga títsa isò'nde.

19

Xita xi tsjá-la kjondaà Nainá ján ngajmii

¹ Xi jye komà iskan, ki'nchrè-la ján ngajmii 'én koni kjin jchán ma xita xi chja nga tsò:

¡Aleluya! ¡'Nga tikíjna Nainá!

Nga jè ochrjekàjiin-ná kjo'in kjoa ts'e jé-ná,

kò ta jè tajngoò xi tjín-la kjoajeya

kò xi tse nga'ńó tjín-la.

² Nga jè Nainá, ndaà s'ín kò kixí s'ín

k'e nga tsjá-la kjo'in xita;

nga jyeé kitsjaà-la kjo'in jè naxandá je Babilonia

xi kisikits'ón-jiin isò'nde nga tsakó-la xita isò'nde

nga kjeí nainá kijtseèxkón

k'oaá ngaya-la koni jngoò chjoón xi kjoa chijngui s'ín.

Koií jé xi komà-la nga jè kisik'en xita chí'nda-la Nainá xi kiichja ngajo-la.

³ Jngoò k'a k'oa kitsò:

—¡Aleluya! ¡'Nga tikíjna Nainá! Jè ni'ndi-la jè naxandá nga títi, k'oaá s'ín kitjomijìn nita mé naxrjein-ne.

⁴ Jña xita jchínga xi kaàn ñjòn ma-ne kò xi ñjòn ma-ne xi títsajnakon, chincha-xkó'nchi-ñiat'aà-la nga kijtseèxkón Nainá xi tíjnasòn íxile ñánda tíhotíxoma. Kitsò:

—¡K'oa s'ín kátama! 'Nga tikíjna Nainá. ¡Aleluya!

⁵ Ya íxile-la ñánda tíhotíxoma, kina'yà-la 'én xi kitsò:

Tji-là kjondaà Nainá ngats'ioò jño xi chí'nda maà,

jño xi ixti maà kò xita jchínga,

ngats'ioò xi tsakjoòn-chaà Nainá.

⁶ Ki'nchrè-la 'én koni tsá kjin jchán ma xita xi chja, koni s'ín na'yà-la nandá k'e nga one, koni s'ín na'yà-la k'e nga one ch'on, xi kitsò:

¡Aleluya!

¡'Nga tikíjna Nainá xi ta jè tajngoó xi 'ńó tse nga'ńó tjín-la!

Nga jyeé jè tíhotíxoma.

⁷ Tsja k'oe-lá inìma-ná, sìtsja-chaá takoán, jeya síkíjnaá Nainá,

nga jyeé j'ì kjoa bixan-la Orrè;

chjoón-la jyeé tíjnandaà.

⁸ Jè chjoón, jye ko'biì-là nikje lino xi 'ñó chjí, xi 'ñó tsjeè kjoàn tikoá 'ñó ote nga kónakjá. Jè nikje lino xi 'ñó chjí, jè ngayá-là kjoakixi xi s'ín xita-là Nainá.

⁹ Jè àkjale kitsò-na:

—Chjí kjoa koi: “Mé ta ndaà-là jñà xita xi xó kinokjoà-là kjoa bixan-là Orrè nga jè kokjen-ko.”

Kitsò isa:

—Jñà 'én koi, nguì 'én kixi-là Nainá-né.

¹⁰ Tsohósijna xkó'nchiñia it'aà ndsokò jè àkjale nga mejèn-na skoexkoán. Tanga jè àkjale kitsò-na:

—Ki k'oaá 'ni; 'an, tikoá chí'nda-là Nainá ma koni ngaji kò jñà 'ndsì xi ndaà fì tjingui-là jñà 'én kixi xi kiichja Jesús. Jè Nainá chaxkoín.

Jñà 'én kixi xi kiichja Jesús, tijñà-ne xi síkítsjeèn-ya-là xita xi chja ngajo-là Nainá.

Jè xi týnasòn-là kohòyo chroba

¹¹ Kijtseè ngajmiì nga tix'á; tsatsejèn jngoò kohòyo xi chroba kji. Jè xita xi týnakjá-là, k'oaá s'ín yaxkon-là nga kixi síkitasòn kò kixi týna, koi kjoa-là nga nguì kò kjoakixi-là bíndaàjiìn kò nga kjaán-kjoò.

¹² Jñà xkon, k'oaá kjoàn koni ni'ín. Ya skò, kjín corona jtobá tjí'a kò jngoò 'ín-là tjít'aà xi mikì yá xi machiya-là kó tsòya-ne; tajngoò jè machiya-là kó tsòya-ne.

¹³ Jè nikje xi kinakjá, jní yijájno. Jè 'ín-là, 'Én-là Nainá 'mì.

¹⁴ Yaá tjingui-là jñà soldado ts'e ngajmiì nga títsajnakjá-là kohòyo chroba; saà nikje lino chrobaá íkjá xi 'ñó chjí kò tsjeè kjoàn.

¹⁵ Jè tso'ba bitjo jngoò kichá ndojò xi 'ñó yijò kji, jè xi síki'on-ne ngats'ì naxandá. Nga jè kotixoma-là xita naxandá. Jè yá nise síikjeén xi nguì kichá tájaà. Jè sobá kosinè jñà toò uva ya iya chitso nga kochrje vino xi okó kjoajti-là Nainá xi ta jè tajngoó xi 'ñó tse nga'ñó týn-là.

¹⁶ Jè nikje-là kò chrjomí-là tjít'aà 'ín xi tsò: “Xitaxá Ítjòn-là ngats'ì jñà xi xitaxá ítjòn títsajna kò jè-né xi otixoma-là ngats'ì jñà xita xi otixoma.”

¹⁷ Kijtseè jngoàà àkjale xi ya síjnasòn-là ts'oi; 'ñó chja-là ngats'ì chò xi týmajiìn isén xi yijo kine. Tsò:

—Nchrobá, tixkóyaà xinguiòo mé-ne nga chjinee yijo xi Nainá tsjá-nò,

¹⁸ nga chjinee yijo-là xitaxá ítjòn, kò yijo-là xita skò-là soldado, yijo-là xita ts'en, yijo-là kohòyo kò yijo-là xita xi títsakjá-là kohòyo, yijo-là ngats'ì xita xi títsajnandeí kò xita chí'nda kò xi ixti kò xita jchínga.

¹⁹ Kijtseè jè chò je xi ch'o kji kò jñà xitaxá ítjòn ts'e isò'nde kò xita soldado-là; jyeé títsajnandaà nga skaàn-ko jè xi týnakjá-là kohòyo chroba kò jñà soldado-là.

²⁰ Jè chò je xi ch'o kji kindobà'ñó; tikoá kindobà'ñó jè xi 'én ndiso kiichja xi kis'iìn kjoxxkón nga nguixkon jè chò. K'oaá s'ín komà-ne nga kiskoònachan-là jñà xita xi kiskoé chiba-là tikoá kijtseèxkón isén xkósòn-là jè chò. Ingajò kinikatsjoðjiìn tìkòn jjiìn ni'ín xi títijnga ñánda titi kò azufre.

²¹ Jñà xita xi i'nga, jè kisik'en-ne jè kichá ndojò xi bitjo tso'ba jè xi týnakjá-là kohòyo. Ngats'ì chò xi týmajiìn isén, jñà kjòskiì-ne nga kiskine yijo-là xita xi jye k'en.

20

Jè xi jngoò jmiì nó

¹ Kijtseè jngoàà àkjale xi tinchrobájen-ne ngajmiì. 'Ya ibi ts'e nitjan jñò. Kjiya tsja jngoò na'ñó kichá cadena xi 'ñó je kji.

² Jè àkjale kitsobà'ńó jè ye jchínga xi tǵjè-ne xi 'mì Xítà Neí kǵ xi Satanás. Jngoò jmiì nó tsibít'aà'ńó.

³ Kisíkatjen-s'en ya nǵtjan jńò; tsibíchjoà'ńó-la jè xotjoa; ikjoàn tsasíjna-la sello mé-ne nga mì yá skíx'a-ne jè xotjoa nǵtjan. Yaá tsasíjnahiya mé-ne nga mì tǵ kiì kǵma skónachan-la xítà isò'nde, skanda k'e nga kjoehet'aà xi jngoò jmiì nó. Xi kǵma iskan tǵjnda'ńó òjngoò k'a-ne nga kǵma kojmeèdeí chiba nachrjein isa.

⁴ Kǵjtseè íxile ts'e kǵotíxoma; títsajnasòn jńà xítà xi kitjoé-la kǵotíxoma nga jńà koíndaàjìin. Tǵkoà kǵjtseè iníma-la jńà xítà xi kitiís'ìin, nga koí kjoa-la 'én kixi xi kitsjaà it'aà ts'e Jesús kǵ nga 'én-la Nainá kiichjaya. Jńà xítà koí, mìkiì kǵjtseèxkón jè cho je xi ch'o kǵi kǵ isén xkósòn-la; tǵkoà mìkiì kisit'aà chiba-la itjòn tjen-la kǵ tsja. Xítà koí, òjngoò k'a tsibítsajnakon; jngoò jmiì nó tsatíxoma kǵ Cristo.

⁵ Jńà xítà koí xi jaáya ítjòn-la. Tanga jńà mik'en xi i'nga, skanda k'eé jaáya-la nga ijchò jngoò jmiì nó.

⁶ Mé ta ndaà-la jńà xi kǵkǵ-la nga kjoaáya ítjòn-la; xítà koí, jyeé xítà-la Nainá kǵma; jè kjoa biyaà xi ma-ne jò, nǵmé nga'ńó tǵín-la it'aà ts'e xítà koí; mì tǵ mé ma sǵkǵ-ne. Tà saá nǵ'miì-la Nainá kǵma kǵ ts'e Cristo. Jngoò jmiì nó kǵtǵxomako.

⁷ K'e nga kjoehet'aà xi jngoò jmiì nó, tǵjnda'ńó òjngoò k'a-ne jè Satanás ya ñánda tíjnahiya nǵtjan jńò.

⁸ Kǵtjondeí-ne nga skónachan-la xítà naxandá xi tǵín nga títsa isò'nde, jè Gog kǵ Magog. Koíxkóya xítà mé-ne nga koíts'ia-ne kǵojchán. Kǵín jchán kǵma xítà, k'oaá ngaya-la koni tsumì xi jncha òndiì ndáchikon.

⁹ Chinchimasòn kóhokǵi isò'nde; chinchandiì-la nga jngoò itjandiì ñánda títsajna xítà-la Nainá kǵ naxandá xi tsjakeè. Ikjoàn kisikasén ni'ín Nainá xi inchrobà-ne ngajmiì. Jngoò k'a tsaká kóhotǵín.

¹⁰ Jè xítà neí xi kiskoðnachan-la xítà, kiníkatjen-jìin ya ò'nde ñánda títǵnga ni'ín kǵ azufre. Jyeé ya títsajna jè cho je xi ch'o kǵi kǵ kiichjaya 'én ndiso. Yaá sǵkǵjeíin kǵ'ín kǵ nachrjein kǵ nǵtjen nǵta kǵé-ne.

Jè íxile ts'e kǵotíxoma xi chroba kǵi

¹¹ Kǵjtseè jngoò íxile xi chroba kǵi kǵ 'ńó je kǵi nga ya títnasòn jngoò xi tíhotíxoma. Nga nguixkon jè xi títnasòn íxile, jngoò k'a kichijà nangui kǵ ngajmiì. Nǵta ñánda-ne, mì tǵ kiì ki'ya-la.

¹² Kǵjtseè mik'en xi òxti kjoàn kǵ xi xítà jchínga kjoàn, 'ncha kixi nguixkon Nainá. Ikjoàn kitáx'a jńà libro [ńánda tǵít'aà mé xi kis'ìin nga jngó jngó xítà]; koà òjngoò libro kitáx'a ñánda tǵít'aà ts'e kjoabinachon. Jńà mik'en, k'oaá s'ín kisindaàjìin-la koni s'ín tǵít'aà xojon ts'e libro, mé kjoa xi kis'ìin.

¹³ Jè ndáchikon kitsjaà jńà mik'en xi ya k'en-jìin. Jè kjoabiyaà kǵ ò'nde kǵ'ín tǵkoáá kitsjaà mik'en xi ya títsajna. K'oaá s'ín kisindaàjìin-la nga jngoò òjngoò xítà koni tǵín kjoa xi kis'ìin.

¹⁴⁻¹⁵ Jè kjoabiyaà kǵ ò'nde kǵ'ín kiníatsjoòjìin ñánda títi ni'ín jnga. Kǵ jńà mik'en xi mìkiì tǵít'aà 'ín-la jè libro ts'e kjoabinachon, tǵkoáá yaá kiníatsjoòjìin ñánda títi ni'ín jnga. Jè xi ma-ne jò kjoabiyaà.

21

Ngajmiì xitse kǵ nangui xitse

¹ Kǵjtseè jngoáá ngajmiì xitse kǵ nangui xitse. Jè ngajmiì xi kisijna ítjòn kǵ nangui xi kisijna ítjòn, jyeé kichijà; tǵkoáá kichijà jè ndáchikon.

² Tíkòá kǐtseè jè naxandá tsjeè xi Jerusalén xitse 'mì, nga tǐnchrobájen ngajmìi nga nguixkòn Nainá. K'oaá s'ín tǐjnandaà koni jngoò chjoón xi ndaà bindaà yijo-la nga jye kixan-kò x'in-la.

³ Kì'nchrè-la 'én xi 'ñó chja, xi ngajmìi inchrobà-ne, xi tsò:

—Chítsejèn-là Ni'ya Tsjeè-la Nainá, jyeé kòbitjojen; Nainá yaá kǐjnako jǎa xita; xita naxandá-laá koma, nga jè sobà xi Nainá kǐtso-la.

⁴ Jè sobà Nainá siixìjno yije ndáxkòn; mì tǐ kǐi s'e-ne kjoabiyaà; mì tǐ kǐi s'e-ne kjoaba; mì tǐ kǐi yá skǐndàya-ne; mì tǐ kǐi s'e-ne xi ijòjno ijòt'aà yijo-la, koi kjoa-la nga jye tsato kjoa jchínga.

⁵ Jè xi tǐjnasòn íxile ts'e kǐjotíxoma, kǐtsò:

—Chítsejèn-la, 'aán siixitseyá yije tsojmì xi tǐjín.

Ikjoàn kǐtsò-na:

—Chjí, xojòn tít'eii jǎa 'én koi; nga nguì k'oaá s'ín tǐjín nga kǐtasòn; nguì 'én kixi-né.

⁶ Ikjoàn kǐtsò-na:

—Jyeé tsitasòn yije. 'An-ná xi tǐjna ítjoàn skanda tàts'en-la kjoa kó nga skanda fehet'aà-ne. 'An-ná xi tsibìts'iaa kò xi sikjehet'aà-na kjoa. Ngats'ii xi xínda-la, 'aán tsjaà kǐjotjò-la nandá xi tǐbitjo ya i'nde ñánda mìkǐi xiya nandá mé-ne koma kǐjnakon-ne inìma-la nita kjé-ne.

⁷ Jǎa xi siikijne, jǎa skoé kǐjotjò ngats'ii kǐjondaà koi. 'Aán kótǐjnakoaa nga Nainá kǐtso-na kò jǎa, ixti-naá koma.

⁸ Tanga jǎa xita xi tsakjón, jǎa xi mìkǐi mokjeiin-la, jǎa xi 'ñó ch'o s'ín, jǎa xi xita sík'en, jǎa xi kjoa chijngui s'ín, jǎa xi xita tj'e, jǎa xi xkósòn beèxkón, ngats'ii xi 'én ndiso chja, ján kixojìin ñánda títì ni'ín jnga kò azufre; jè xi ma-ne jò kjoabiyaà.

Naxandá xitse xi 'mì Jerusalén

⁹ J'ìikon jngoò-na àkjale jǎa xi itoò ma-ne, xi tǐkòá itoò chǐtsín tǐjín-la, xi jncha kǐtseè xi itoò kǐj'in xi fehet'aà-ne. Kǐtsò-na:

—Nchroboí, kokoò-lè jè xi koma chjoón-la Orrè.

¹⁰ It'aà ts'e Inìma Tsjeè-la Nainá, jè àkjale kǐiko inìma-na jngoò nindoò xi je kǐi kò 'nga kǐi. Tsakó-na jè naxandá xi je kǐi, naxandá tsjeè Jerusalén nga tǐnchrobájen-ne ngajmìi nga nguixkòn Nainá.

¹¹ Jè naxandá tsjeè Jerusalén, oteé tsejèn xi kjoa ts'e kjoajeya-la Nainá. K'oaá s'ín ote kǐi koni ndajo chjí xi 'ñó ndaà kjoàn, koni ndajo xi jaspe 'mì nga ote kǐi koni chǐtsín.

¹² Nga jngoò itjandiì, jè naxandá, chrjó ndajo tǐjindiì-la xi 'ñó je kǐi kò 'ñó 'nga kǐi. Tejò xotjoa tǐjín-la. Nga jngoò òjngoò xotjoa, jngoò àkjale síjnajto. Tíkòá ya tǐt'aà 'ín-la nga tejò naxandá xi ya inchrobàt'aà-ne ixti-la Israel.

¹³ Ya kixi-la ñánda bitjokàjiin-ne ts'oí, jàn xotjoa tǐjín-la, ya kixi-la ñánda kahatji-ne ts'oí, jàn xotjoa tǐjín-la. Ya norte, tǐkòá jàn xotjoa tǐjín-la, ya sur, tǐkòá jàn xotjoa tǐjín-la.

¹⁴ Jè chrjó ndajo xi tǐjindiì-la naxandá, tejò chrjó ndajo xi ya tǐt'aà nga tejò 'ín-la xita xi tejò ma-ne xi it'aà ts'e Orrè kǐsìxáya-la.

¹⁵ Jè àkjale xi tǐchjako-na, jngoò kǐcha kǐjina ya tsja xi nguì oro xi koni kǐi yá xi ma machiba-ne. Jè kǐsìkjeén nga ma kǐsìchiba naxandá kò xotjoa-la kò chrjó ndajo-la.

¹⁶ Jè naxandá k'oaá s'ín kǐjna nga ñijòn chrjangui tǐjín-la. Koni kǐi ndojò, k'oaá tǐ kǐi tiyà-ne. Jè àkjale, k'e nga kǐsìchiba, jò jmiì kò jò sìndo kilómetro tǐjín-la. Ngàsòn chiba tǐjín-la nga ndojò kò nga tiyà kò nga 'nga.

¹⁷ Ikjoàn kǐsìchiba jè chrjó ndajo. Jngoò sìndo kò ichán ñijòn xkó tsja tǐjín-la xi chiba-la xita xi tǐsìkjeén jè àkjale, [jè xi ichán nanga tǐjín-ne].

¹⁸ Jè chrjó ndajo xi tjíndi-là naxandá, koií tjíndaà-ne ndajo chjí xi 'mì jaspe. Kò jè naxandá, nguì oro sobà-né. K'oaá s'ín ote kji koni chítsín tsjeè.

¹⁹ Jñà tàts'en chrjó xi tjíndaà-ne nga tíchjoàndi-là naxandá, nguì ndajo chjí yijàjno xi 'ñó ndaà kjoàn. Jè xi ítjòn, jè ndajo xi 'mì jaspe; xi ma-ne jò, ndajo xi 'mì zafiro; xi ma-ne jàn, ndajo xi 'mì ágata; xi ma-ne ñijòn, ndajo xi 'mì esmeralda;

²⁰ xi ma-ne 'òn, ndajo xi 'mì ónice; xi ma-ne joòn, ndajo xi 'mì cornalina; xi ma-ne itoò, ndajo xi 'mì crisólito; xi ma-ne jùin, ndajo xi 'mì berilo; xi ma-ne ñijaàn, ndajo xi 'mì topacio; xi ma-ne te, ndajo xi 'mì crisoprasa; xi ma-ne tejngoò, ndajo xi 'mì jacinto; xi ma-ne tejò, ndajo xi 'mì amatista.

²¹ Jñà xotjoa xi tejò ma-ne, tejò ndajo perla tjíndaà-ne. Nga jngoò ìjngoò xotjoa jngoò perla tjíndaà-ne. Ndiyá teè-là naxandá, nguì oro sobà-né koni chítsín xi ma chítsejèn-ya.

²² Ya ijùin naxandá, nijngoò ingo kijtseè; nga jè sobà xi ma ingo-là naxandá, jè Nainá xi tíjna ítjòn nga ta jè tajngoò-né xi 'ñó tse nga'ñó tjín-là kò jè Orrè.

²³ Jè naxandá, mìkiì mochjeén-là jè ts'oi kò sá nga sùhiseèn-là. Nga jè sobà kjoa isén-là Nainá síhiseèn-là; kò jè Orrè ma ni'ín-là.

²⁴ Ngats'ì jñà xita naxandá ts'e isò'nde kinchima iseèn-né it'aà ts'e ni'ín-là. Kò jñà xitaxá ítjòn xi tjín isò'nde, kji kò kjoanchiná-là nga ya sùngatsja.

²⁵ Jñà xotjoa-là naxandá, mìkiì sìchjoàjto nga kjit'aà nachrjein; nga ya naxandá, mìkiì kojñò.

²⁶ Ngats'ì naxandá kjoiko ngats'ì kjoa nchiná-là kò ngats'ì tsojmì xi 'ñó chjí-là nga ya sùngatsja.

²⁷ Ya i'nde jè ñimé kjoahas'en xi tjé kjoàn xi ch'o s'ín kò xi kjoa ndiso. Tà jñà kjoahas'en xi tjít'aà 'ín-là jè xojon-là Orrè xi ts'e kjoabinachon.

22

¹ Jè àkjale tsakó jngoò-na xajngá nandá xi kijna tsjeè tsjeè, jè nandá xi bítsajnakon-ná ñita mé nachrjein-ne. K'oaas'ín tsjeè kji koni chítsín. Yaá tíbitjo ñánda síjna íxile-là Nainá nga tíhotixoma kò yaá tíbitjo ñánda tíjna jè Orrè.

² Ya jngoò osen ndiyá-là naxandá tífa nandá. Kò ya ngobà ngobà xajngá nandá, yaá síjna jè yá xi tsjá kjoabinachon ñita mé nachrjein-ne. Tejò k'a ojà-là toò nga jngoò nó. Jngoò jngoò k'a ojà-là toò nga ìjngoò ìjngoò sá. Jñà xka-là, k'oaá s'ín mochjeén nga maxkii-là naxandá ts'e isò'nde.

³ Mì tì mé kjoa ch'o s'e-ne xi mìkiì sasén-là Nainá. Yaá sasíjna jè íxile-là Nainá kò ts'e Orrè nga kotixoma. Kò ngats'ì xita ch'inda-là, yaá síxá-là.

⁴ Ngats'ì xi xita-là ma, skoexkon-né kó kji isén-là Nainá; kò jè 'ín-là Nainá yaá sít'aà ítjòn tjen-là.

⁵ Ya i'nde jè, mì ti kojñò-ne. Jñà xita xi ya títsajna, mì tì ni'ín kochjeén-là xi sùhiseèn-là, tìkoaá mì tì ts'oi kochjeén-là; nga jè sobá Na'èn-ná xi Nainá sùhiseèn-là. Jñà xita kotixoma ñita mé nachrjein-ne.

Jyè nchrobá machraña nga kjoí ìjngoò k'a Cristo

⁶ Jè àkjale kitsò-na:

—Én koi, nguì k'oaá s'ín tjín nga kítasòn; nguì 'én kixi-né. Jè Na'èn-ná xi Nainá xi síkichiya-là jñà xita xi chja ngajo-là, koií xá kisikasén-ne àkjale-là nga kokò-là xi ch'inda-là ma jñà kjoa xi ta ñitoón okoma.

⁷ —Tíná'ya-ná. 'An, kjoí ñitoón ìjngoò k'a.

Mé tà ndaà-là jñà xi síkitasòn jñà 'én xi kitsjaà Nainá koni s'ín tíchja xojon jè.

⁸ 'An-ná xi 'mì-na Juan, 'aán ki'nchrè koa kijtseè kjoa koi. K'e nga jye ki'nchrè koa jye kijtseè, tsohósijna-xkó'nchi-niñiat'aà-là jè àkjale xi tíhokó-na kjoa koi, nga mejèn-na skoexkoán.

⁹ Tanga jè àkjale kitsò-na:

—Kì k'oaá 'nì. Jè Nainá jchaxkoín. 'An, tìkoaá chì'nda-la Nainá ma, koni ngaji, kò xita xingui xi chja ngajo-la Nainá, kò ngats'ì xita xi síkitasòn 'én xi tjit'aà xojon jè.

¹⁰ K'oaá tìs'ín kitsò-na:

—Kì bijná'ma jñà 'én xi Nainá kitsjaà xi tjit'aà xojon jè, nga jyeé nchrobá machraña nachrjein nga kitasòn.

¹¹ Jñà xita xi mìtsà kixi tìtsajna nguixkon Nainá nga ch'o s'ín, ta k'oaá s'ín kàtìtsajna. Kò jñà xi tjin-la kjoakixi kò tsjeè tìtsajna nga nguixkon Nainá, k'oaá tìs'ín kàtasíkitasòn xi kjoakixi kò kjoatsjeè.

¹² —Tiná'ya, 'an, kjoíi nitoón ìjngoò k'a. Yaá kjoiiikoa chjí-la xi tsjaà-la xita koni s'ín kis'iin nga ìjngoò ìjngoò.

¹³ 'An-ná xi tìjna ítjoàn skanda tàts'en-la kjoa kò skanda fehet'aà-ne. 'An-ná xi tsibìts'iaa kò xi sikjehet'aà-na kjoa. 'An-ná xi tìjna ítjoàn kò xi fehet'aà-ne.

¹⁴ Mé ta ndaà-la jñà xita xi [jní-la Orrè] sítsjeè-ne nikje-la mé-ne nga tjò'nde-la nga skine toò-la yá xi tsjá kjoabinachon, tìkoa koma kjoahas'en xotjoa-la jè naxandá.

¹⁵ Tanga ndìtsiaán kìtsajna, ngats'ì jñà xita xi ch'o s'ín, kò jñà xi xita tje, kò jñà xi kjoa chijngui s'ín, kò jñà xi xita sík'en, kò jñà xi xkòsòn beèxkón kò ngats'ì xi tsjakeè kjoa ndiso nga 'én ndiso chja.

¹⁶ —'An xi 'mì-na Jesús, 'aán kisikasén-nò àkjale-na nga tsjá-nò 'én it'aà ts'e kjoa koi, jñò xi xita naxandá-na ma. 'An-ná jè jts'én xi itjot'aà-ne tje-la xitaxá ítjòn xi k'ì'mì David. 'An-ná ni'ño tse xi 'ño ote kji xi bitjokàtji k'e nga tajñoa.

¹⁷ Jè Inima Tsjeè-la Nainá kò chjoón-la Orrè, tsò-né:

—Nchroboí [Na'èn Jesús].

Jñà xi nchi'nchré, k'oaá tì kàtatsò:

—Nchroboí [Na'èn Jesús].

Jñà xi xínda-la kò xi mejèn-la nandá, kàtjanchrobá, kàt'ì kjetjò nandá xi tsjá kjoabinachon.

¹⁸ 'An, k'oaá xan-nò, ngats'ioò xi na'yà-là jñà 'én xi kitsjaà Nainá xi tjit'aà xojon jè: Tsà yá xi kùt'aasòn kjoa xi tjit'aà xojon jè, Nainá k'oaá tìs'ín tsjásòn-la kjo'in koni s'ín tjit'aà xojon jè.

¹⁹ Tsà yá xi kjoaáxìn jngoò-la 'én xi kitsjaà Nainá xi tjit'aà xojon jè, Nainá, tìkoaá kjoaáxìn kjondaà xi tji'nde-la nga skine toò-la yá xi tsjá kjoabinachon kò mìkiì tsjá'nde-la nga ya kìtsajna naxandá tsjeè-la Nainá koni s'ín tjit'aà xojon jè.

²⁰ Jè xi bénojmí kjoa koi, k'oaá tsò:

—Jon, kjoii nitoón ìjngoò k'a.

K'oaá s'ín kàtama. ¡Nchroboí Na'èn Jesús!

²¹ Kjondaà-la Na'èn-ná Jesucristo kàtijnako-nó ngats'ioò. K'oaá s'ín kàtama.